



儒

藏



精華編四七冊
經部禮類

儒藏



北京大學《儒藏》編纂與研究中心

圖書在版編目 (CIP) 數據

儒藏·精華編·四七 / 北京大學《儒藏》編纂與研究中心編. —北京: 北京大學出版社, 2016. 10
ISBN 978-7-301-11765-1

I. ①儒… II. ①北… III. ①儒家 IV. ① B222

中國版本圖書館 CIP 數據核字 (2016) 第 230738 號

書 名	儒藏 (精華編四七)
	RUZANG
著作責任者	北京大學《儒藏》編纂與研究中心 編
責任編輯	吳遠琴
標準書號	ISBN 978-7-301-11765-1
出版發行	北京大學出版社
地 址	北京市海澱區成府路 205 號 100871
網 址	http://www.pup.cn 新浪微博: @ 北京大學出版社
電子信箱	dianjiwenhua@163.com
電 話	郵購部 62752015 發行部 62750672 編輯部 62756694
印刷者	北京中科印刷有限公司
經 銷 者	新華書店
	787 毫米 × 1092 毫米 16 開本 63.25 印張 947 千字
	2016 年 12 月第 1 版 2016 年 12 月第 1 次印刷
定 價	1200.00 元

未經許可, 不得以任何方式複製或抄襲本書之部分或全部內容。

版權所有, 侵權必究

舉報電話: 010-62752024 電子信箱: fd@pup.pku.edu.cn

圖書如有印裝質量問題, 請與出版部聯繫, 電話: 010-62756370



国家出版基金项目
NATIONAL PUBLICATION FOUNDATION

國家出版基金項目



教育部哲學社會科學研究重大課題攻關項目



「十五」國家重點圖書出版規劃項目·重大工程出版規劃
國家社會科學基金重大項目
北京大學「九八五工程」重點項目



《儒藏》精華編第四七冊

首席總編纂 季羨林

項目首席專家 湯一介

總編纂 湯一介 龐樸 孫欽善 安平秋
(按年齡排序)

本冊主編 彭林

《儒藏》精華編凡例

一、中國傳統文化以儒家思想爲中心。《儒藏》爲儒家經典和反映儒家思想、體現儒家經世做人原則的典籍的叢編。收書時限自先秦至清代結束。

二、《儒藏》精華編爲《儒藏》的一部分，選收《儒藏》中的精要書籍。

三、《儒藏》精華編所收書籍，包括傳世文獻和出土文獻。傳世文獻按《四庫全書總目》經史子集四部分類法分類，大類、小類基本參照《中國叢書綜錄》和《中國古籍善本書目》，於個別處略作調整。凡單書已收入入選的個人叢書或全集者，僅存目錄，並注明互見。出土文獻單列爲一個部類，原件以古文字書寫者一律收其釋文文本。韓國、日本、越南儒學者用漢文寫作的儒學著作，編爲海外文獻部類。

四、所收書籍的篇目卷次，一仍底本原貌，不選編，不改編，保持原書的完整性和獨立性。

五、對入選書籍進行簡要校勘。以對校爲主，確定內容完足、精確率高的版本爲底本，精選有校勘價值的版本爲校本。出校堅持少而精，以校正誤爲主，酌校異同。校記力求規範、精煉。

六、根據現行標點符號用法，結合古籍標點通例，進行規範化標點。專名號除書名號用角號（《》）外，其他一律省略。

七、對較長的篇章，根據文字內容，適當劃分段落。正文原已分段者，不作改動。千字以內的短文一般不分段。

八、各書卷端由整理者撰寫《校點說明》，簡要介紹作者生平、該書成書背景、主要內容及影響，以及整理時所確定的底本、校本（舉全稱後括注簡稱）及其他有關情況。重複出現的作者，其生平事蹟按出現順序前詳後略。

九、本書用繁體漢字豎排，小注一律排爲單行。

《儒藏》精華編第四七冊

經部禮類

儀禮之屬

儀禮正義（卷一——卷二十）〔清〕胡培翬

〔清〕胡肇昕

楊大堉

目錄

四七冊

校點說明	一
校勘儀禮正義序	一
儀禮正義序	一
儀禮正義卷一 鄭氏注	一
士冠禮第一	一
儀禮正義卷二 鄭氏注	七六
儀禮正義卷三 鄭氏注	一一〇
士昏禮第二	一一〇
記	一五六
儀禮正義卷四 鄭氏注	一七七
士相見禮第三	一七七
儀禮正義卷五 鄭氏注	二〇六
鄉飲酒禮第四	二〇六
儀禮正義卷六 鄭氏注	二六五

儀禮正義卷七 鄭氏注	二九九
記	三二二
儀禮正義卷八 鄭氏注	三二二
鄉射禮第五	三四二
儀禮正義卷九 鄭氏注	三九四
儀禮正義卷十 鄭氏注	四七〇
記	四七〇
儀禮正義卷十一 鄭氏注	四九九
燕禮第六	四九九
儀禮正義卷十二 鄭氏注	五四一
記	五七五
儀禮正義卷十三 鄭氏注	五九〇
大射儀第七	五九〇
儀禮正義卷十四 鄭氏注	六三四
儀禮正義卷十五 鄭氏注	六七〇
儀禮正義卷十六 鄭氏注	七〇三
聘禮第八	七〇三
儀禮正義卷十七 鄭氏注	七六七
儀禮正義卷十八 鄭氏注	八二〇
記	八四二

儀禮正義卷十九 鄭氏注 八七八

公食大夫禮第九 八七八

記 九二五

儀禮正義卷二十 鄭氏注 九三四

覲禮第十 九三四

四八冊

儀禮正義卷二十一 鄭氏注 九八九

喪服經傳第十一 九八九

儀禮正義卷二十二 鄭氏注 一〇三一

儀禮正義卷二十三 鄭氏注 一〇七八

儀禮正義卷二十四 鄭氏注 一一二二

儀禮正義卷二十五 鄭氏注 一一六五

記 一一六五

儀禮正義卷二十六 鄭氏注 一二〇七

士喪禮第十二 一二〇七

儀禮正義卷二十七 鄭氏注 一二六四

儀禮正義卷二十八 鄭氏注 一三〇一

儀禮正義卷二十九 鄭氏注 一三四三

既夕禮第十三 一三四三

儀禮正義卷三十 鄭氏注 一三八四

儀禮正義卷三十一 鄭氏注 一四〇七

記 一四〇七

儀禮正義卷三十二 鄭氏注 一四五〇

士虞禮第十四 一四五〇

儀禮正義卷三十三 鄭氏注 一四八三

記 一四八三

儀禮正義卷三十四 鄭氏注 一五二六

特牲饋食禮第十五 一五二六

儀禮正義卷三十五 鄭氏注 一五五一

儀禮正義卷三十六 鄭氏注 一六〇五

記 一六〇九

儀禮正義卷三十七 鄭氏注 一六三二

少牢饋食禮第十六 一六三二

儀禮正義卷三十八 鄭氏注 一六六六

儀禮正義卷三十九 鄭氏注 一六九八

有司徹第十七 一六九八

儀禮正義卷四十 鄭氏注 一七四二

《儀禮正義》書後 一七八一

《儀禮正義》後跋 一七八二

儀禮正義

〔清〕

胡培翬

撰

胡肇昕

補

楊大堉

張文

徐到穩

校點

殷嬰寧

目錄

四七冊

校點說明	一
校勘儀禮正義序	一
儀禮正義序	一
儀禮正義卷一 鄭氏注	一
士冠禮第一	一
儀禮正義卷二 鄭氏注	七六
儀禮正義卷三 鄭氏注	一一〇
士昏禮第二	一一〇
記	一五六
儀禮正義卷四 鄭氏注	一七七
士相見禮第三	一七七
儀禮正義卷五 鄭氏注	二〇六
鄉飲酒禮第四	二〇六
儀禮正義卷六 鄭氏注	二六五

儀禮正義卷七 鄭氏注	二九九
記	三二二
儀禮正義卷八 鄭氏注	三二二
鄉射禮第五	三四二
儀禮正義卷九 鄭氏注	三九四
儀禮正義卷十 鄭氏注	四七〇
記	四七〇
儀禮正義卷十一 鄭氏注	四九九
燕禮第六	四九九
儀禮正義卷十二 鄭氏注	五四一
記	五七五
儀禮正義卷十三 鄭氏注	五九〇
大射儀第七	五九〇
儀禮正義卷十四 鄭氏注	六三四
儀禮正義卷十五 鄭氏注	六七〇
儀禮正義卷十六 鄭氏注	七〇三
聘禮第八	七〇三
儀禮正義卷十七 鄭氏注	七六七
儀禮正義卷十八 鄭氏注	八二〇
記	八四二

儀禮正義卷十九 鄭氏注 八七八

公食大夫禮第九 八七八

記 九二五

儀禮正義卷二十 鄭氏注 九三四

覲禮第十 九三四

四八冊

儀禮正義卷二十一 鄭氏注 九八九

喪服經傳第十一 九八九

儀禮正義卷二十二 鄭氏注 一〇三一

儀禮正義卷二十三 鄭氏注 一〇七八

儀禮正義卷二十四 鄭氏注 一一二二

儀禮正義卷二十五 鄭氏注 一一六五

記 一一六五

儀禮正義卷二十六 鄭氏注 一二〇七

士喪禮第十二 一二〇七

儀禮正義卷二十七 鄭氏注 一二六四

儀禮正義卷二十八 鄭氏注 一三〇一

儀禮正義卷二十九 鄭氏注 一三四三

既夕禮第十三 一三四三

儀禮正義卷三十 鄭氏注 一三八四

儀禮正義卷三十一 鄭氏注 一四〇七

記 一四〇七

儀禮正義卷三十二 鄭氏注 一四五〇

士虞禮第十四 一四五〇

儀禮正義卷三十三 鄭氏注 一四八三

記 一四八三

儀禮正義卷三十四 鄭氏注 一五二六

特牲饋食禮第十五 一五二六

儀禮正義卷三十五 鄭氏注 一五五一

儀禮正義卷三十六 鄭氏注 一六〇五

記 一六〇九

儀禮正義卷三十七 鄭氏注 一六三二

少牢饋食禮第十六 一六三二

儀禮正義卷三十八 鄭氏注 一六六六

儀禮正義卷三十九 鄭氏注 一六九八

有司徹第十七 一六九八

儀禮正義卷四十 鄭氏注 一七四二

《儀禮正義》書後 一七八一

《儀禮正義》後跋 一七八二

校點說明

《儀禮正義》四十卷，清胡培翬撰，胡肇昕、楊大堉補。

胡培翬（一七八二—一八四九），字載屏，號竹村，安徽績溪人。嘉慶十五年（一八一〇）舉於鄉，二十四年成進士，殿試二甲，授內閣中書，充實錄館詳校官。書成，擢戶部廣東司主事，後改雲南司主事。道光八年（一八二八），充捐納房差。十年，假照案發，以失察被議，醵級歸里。十三年，奉旨准捐復原官，遂以親老而不復出。歷主鍾山、惜陰、雲間、婁東、廬州、涇川諸書院，凡十餘年，後得疾歸里，道光二十九年七月卒於家。所著除《儀禮正義》，還有《燕寢考》、《禘祫問答》、《研六室文鈔》等，亦多關乎禮學考證，可與《儀禮正義》相輔而行。傳

見《清史列傳》卷六九、《清史稿》卷四八二。族弟胡培系所撰《事狀》，敘其生平行實尤詳。

《儀禮》為禮之本經，自漢以來惟有鄭注行世。北齊之黃慶、隋朝之李孟哲皆遵從鄭注，撰有章疏之作。賈公彥本此二家之疏，擇善而從，兼增己意，撰成《儀禮疏》五十卷，集南北朝義疏學之成。因《儀禮》節次繁密，文辭古奧，以韓昌黎學識之博，猶苦其難讀，故歷來傳授者較少。至王安石新學廢黜《儀禮》，不立於學官，學者遂絕鮮誦習。是以自宋至明，治此經者較他經為尤少，能於全經有所發明者，寥寥數家而已。清初學風丕變，《儀禮》研究漸趨興盛，在乾嘉時期達到高峰，相關研究論著紛紛湧現，舉凡古今文異同、文字訓詁、版本校勘、官室方位、禮例儀節、名物職官以及喪服制度諸方面，皆有精當的專門之作問世。而諸儒所撰經說劄記，亦多涉及對《儀禮》的考證。當此之時，實有必要充分彙集前人經說，尤其是全面吸收乾嘉以來的學術成果，撰作一部能取代賈疏之《儀禮》新疏。作為經學

名臣的阮元，當時就已明確發出這種呼聲，《儀禮正義》正在此背景之下應運而生。

胡培翬自幼紹承家學，得其祖父胡匡衷之傳，後又受業於禮學名家凌廷堪，故其禮學淵源至萃。胡氏以爲《儀禮》乃周公所作，有殘闕而無僞託，其中冠昏喪祭等尤切於民用，社會教化意義重大，故專力於《儀禮》研究。因不滿賈疏「或解經而違經旨，或申注而失注義」，遂有重疏《儀禮》之志。胡氏自嘉慶十九年撰著《儀禮正義》，去世前夕猶力疾從事，先後三十餘年，可謂終生以之，死而後已。此書在胡氏生前寫定十二篇二十八卷，其撰作之次第，是先成《喪服》、《士喪》、《既夕》、《士虞》四篇，再爲《特性》、《少牢》、《有司》三篇，後爲《士冠》、《士相見》、《聘禮》、《公食》、《覲禮》五篇。至於《士昏》、《鄉飲》、《鄉射》、《燕禮》、《大射》五篇十二卷，則因其晚年患病，精力不濟，乃命族姪胡肇昕助爲采輯眾說，以俟折衷案斷，未及完成而胡氏身歿。後胡肇昕攜書稿至江寧，兩江總督陸建瀛訪以付梓，以

此五篇未成，乃屬胡氏弟子楊大埏補綴成編，所據即胡肇昕輯錄之本。《儀禮正義》補纂篇卷今皆題楊大埏補，實則由胡肇昕、楊大埏相繼完成，胡肇昕之名不應湮滅無聞。

胡培翬撰著《儀禮正義》，採用傳統義疏之作的形式，但不拘守疏不破注之例，自言有補注、申注、附注、訂注四例，其實視鄭注爲解經之鎗鍵，既以其爲宗主，又不惟鄭是從，是非得失以經爲斷，無有宗派門戶之見，體現了實事求是之精神。胡氏《正義》能網羅薈萃眾家之說，前此重要的研究成果，大都爲其參考利用。如其分節則依從張爾岐《儀禮鄭注句讀》，官制則依據胡匡衷《儀禮釋官》，禮例則依據凌廷堪《禮經釋例》，古今文則依據胡承珙《儀禮古今文疏義》，校勘則依據阮元《儀禮注疏校勘記》。此外如邵晉涵《爾雅正義》、郝懿行《爾雅義疏》、段玉裁《說文解字注》、王念孫《廣雅疏證》、王引之《經義述聞》等，其文字訓詁和經義考辨之成果，亦多爲胡氏採擇吸收。正因胡氏《正義》能全面吸收前人

成果，故得以熔鑄眾家之長，從而具有集大成之特色。胡氏《正義》對經注文字訓釋較為精確，對名物

制度的考辨非常詳盡，對聚訟紛紜的問題也能折衷至當，解釋較為圓融。全面來看，《儀禮正義》對經注的疏解要遠比賈疏詳悉可據。由於《儀禮正義》成書過程曲折，全書學術水準亦不甚均衡。就胡培輩生前寫定的部分來看，以先寫成之喪祭諸篇最為精密，而後成之《士冠》、《士相見》、《聘禮》諸篇略為遜色。至於補纂之篇卷，則不盡遵從胡氏既定體例，疏解多有抵牾違失，不逮胡氏原作遠甚。尤其是楊大堉的補纂，對於胡肇昕原稿多有變亂，於前人經說或沒去其名，很多案斷也襲取自他書，剽竊抄襲痕跡顯然。毋庸諱言，《儀禮正義》存在諸多疏失和不足，但瑕不掩瑜，其學術成就不容否認。即就補纂部分而論，儘管存在諸多缺陷，其實亦不乏精闢考證與論說，並且薈萃輯錄了很多前人經說，仍具有重要參考價值。就整體成就而言，《儀禮正義》校訂精審，疏解詳明，蒐採廣博，辨析精密，論斷

公允，體例謹嚴，允為清代《儀禮》研究集大成之作，具有深遠學術影響，在經學史上具有重要地位。

《儀禮正義》成書之後，由兩江總督陸建瀛付梓，並延請陳奐校勘，時當咸豐二年（一八五二）。次年春，太平軍攻陷金陵，陸建瀛殉節，書板以存於蘇州刻局而幸免劫灰。其後歷經周折，同治六年（一八六七）始由陸氏之孫光祖運抵京師。翌年夏，胡培輩之姪肇智乃以他物易歸，由是書板轉歸續溪金紫胡氏。其間因書板有殘蝕破損，又有補刻遞修。陸氏所刻原有「木犀香館家藏刻本」之牌記，後此刷印者則因書板易主，不復有此牌記，序跋文字亦有增刻。然其版式行款字體皆同，目錄尾頁均鐫「蘇州湯晉苑局刊印」，屬於同一版本。該版本存世甚多，《續修四庫全書》所收據南京圖書館藏本影印，此本為晚清學者陳作霖舊藏，前有木犀香館牌記，當屬該版本的早期印本。咸豐年間，在木犀香館本刊竣之後，胡肇昕曾對其刊刻訛誤有所訂正，後輯刻為《儀禮正義正誤》一卷行世。光緒間南菁

書院彙刻《清經解續編》，重刊《儀禮正義》，即據木犀香館本校勘，對文字訛誤有所更正，然因讎校不精，又致新訛。民國時期有上海中華書局《四庫備要》之鉛印本，乃據《續清經解》本排印校勘。商務印書館《萬有文庫》亦收入《儀禮正義》，為排印句讀本。段熙仲先生點校整理《儀禮正義》，則以《續清經解》本為底本，一九九三年由江蘇古籍出版社刊行。此其版本之大略。

此次重新整理，以《續修四庫全書》所影印之木犀香館本為底本，以《續清經解》本為校本。鑒於該書內容特點，又廣泛參校所引各家之書（引據版本目錄附後）。在校勘及標點方面，對段熙仲先生整理本多有參考（校記引據則稱「段校」）。北京大學圖書館所藏之同治印本，較底本多出陸建瀛、陸光祖和胡肇智之序跋三篇，因有助於瞭解成書刊刻之過程，今據以補入。此次校點由三人合作完成，張文負責《士冠》、《喪服》、《士喪》、《既夕》、《士虞》五篇凡十五卷，徐到穩負責《士昏》、《士相見》、《鄉

飲》、《鄉射》、《燕禮》、《大射》六篇凡十三卷，殷嬰寧負責《聘禮》、《公食》、《覲禮》、《特牲》、《少牢》、《有司徹》六篇凡十二卷。

《儀禮》自古號稱難讀，加之我們讀書不廣，學殖淺陋，校點錯訛之處定然不少，敬祈專家和讀者指正為感。

《儀禮正義》徵引凌廷堪《禮經釋例》極多，在《禮經釋例》原文多有小字注文，而此書刊刻之時皆與正文相混，如不注明，則文義不甚明晰，因此我們通過核對原文，恢復《釋例》小字注文排版方式。在校勘及標點方面，同時參考了大量他校引書，今皆附錄如下：

敖繼公《儀禮集說》，清《通志堂經解》本。

蔡德晉《禮經本義》，清文淵閣《四庫全書》本。

曹元弼《禮經學》，清宣統元年刻本。

陳奐《詩毛氏傳疏》，清道光二十七年陳氏掃葉山莊刻本。

陳立《白虎通疏證》，中華書局，一九九四年。

陳立《公羊義疏》，清《清經解續編》本。

陳啟源《毛詩稽古編》，清文淵閣《四庫全書》本。

陳祥道《禮書》，元至正七年福州路儒學刻明修本。

陳暘《樂書》，清文淵閣《四庫全書》本。

程瑤田《儀禮喪服文足徵記》，清嘉慶刻《通藝錄》本。

褚寅亮《儀禮管見》，清乾隆刻本。

戴震《方言疏證》，清乾隆孔繼涵刻《微波榘叢書》本。

杜佑《通典》，中華書局，一九八八年。

段玉裁《說文解字注》，清嘉慶二十年經韻樓刻本。

鄂爾泰等《儀禮義疏》，清文淵閣《四庫全書》本。

范家相《詩瀋》，清文淵閣《四庫全書》本。

方苞《儀禮析疑》，清文淵閣《四庫全書》本。

韓愈《昌黎先生文集》，宋蜀本。

郝敬《儀禮節解》，明《九部經解》本。

胡承珙《儀禮古今文疏義》，清道光五年求是堂刻本。

胡匡衷《儀禮釋官》，清道光九年《清經解》刻本。

胡肇昕《儀禮正義正誤》，民國九年胡宣鐸活字本。

惠棟《九經古義》，清文淵閣《四庫全書》本。

姜兆錫《儀禮經傳》，清乾隆元年寅清樓刻本。

焦以恕《儀禮彙說》，清乾隆三十七年研雨齋刻本。

孔廣森《禮學卮言》，清《興軒孔氏所著書》本。

李如圭《儀禮集釋》，清《武英殿聚珍版叢書》本。

劉熙《釋名》，四部叢刊景明翻宋書棚本。

凌廷堪《禮經釋例》，清嘉慶十四年阮氏文選樓刻本。

盧文弨《儀禮注疏詳校》，清乾隆六十年刻本。

毛奇齡《西河集》，清文淵閣《四庫全書》本。

聶崇義《新定三禮圖》，《四部叢刊三編》景蒙

古本。

秦蕙田《五禮通考》，味經窩初刻試印本。

阮元《十三經注疏校勘記》，清道光九年《清經

解》本。

司馬光《書儀》，清雍正刻本。

邵晉涵《南江劄記》，清嘉慶八年面水層軒

刻本。

沈彤《儀禮小疏》，清文淵閣《四庫全書》本。

盛世佐《儀禮集編》，清文淵閣《四庫全書》本。

萬斯大《儀禮商》，清乾隆二十六年刻本。

王念孫《廣雅疏證》，清嘉慶元年刻本。

王士讓《儀禮紉解》，清乾隆三十五年張源義

刻本。

王引之《經義述聞》，清道光刻本。

韋協夢《儀禮蠡測》，清道光二十五年帶草軒

刻本。

韋昭《國語韋氏解》，清《士禮居叢書》景宋本。

佚名《三禮考注》，清乾隆二十一年刻本。

吳廷華《儀禮章句》，清文淵閣《四庫全書》本。

夏炘《學禮管釋》，清咸豐景紫山房本。

李善《文選注》，上海古籍出版社，一九八六年。

徐乾學《讀禮通考》，清文淵閣《四庫全書》本。

許慎《說文解字》，清嘉慶十四年覆宋刻本。

楊復《儀禮圖》，清文淵閣《四庫全書》本。

張淳《儀禮識誤》，清《武英殿聚珍版叢書》本。

張爾岐《儀禮鄭注句讀》，清文淵閣《四庫全

書》本。

張惠言《讀儀禮記》，清《清經解續編》本。

朱大韶《實事求是齋經義》，清《清經解續

編》本。

朱熹《儀禮經傳通解》，上海古籍出版社、安徽

教育出版社，二〇一〇年。

《十三經注疏》，清嘉慶二十年南昌府學刊本。

校點者 張文 徐到穩 殷嬰寧

校勘儀禮正義序

《儀禮》經文古奧，世所罕習。鄭氏以前無注本，其後自賈疏外，傳者甚尠。蓋墨守者多涉穿鑿，師心者復病蕪陋，古典所存，幾成絕學。績溪胡農部撰《正義》，以鄭注爲宗，而萃輯羣言，辨析精密，洵足輔翼鄭氏，嘉惠來學。因屬陳君免詳校授梓，仍依原帙，分四十卷。《士昏禮》及《鄉飲酒禮》、《鄉射禮》、《燕禮》、《大射儀》五篇十二卷，則其門人楊君大堉所補也。至是書之體例，已詳椒生侍郎原序中，不復贅論。咸豐壬子九月，沔陽陸建瀛序。

儀禮正義序

績溪戶部胡先生夙承家學，邃精三禮，以《儀禮》經爲周公作，有殘闕而無僞託，鄭注而後，惟唐賈氏公彥疏盛行，而賈疏或解經而違經旨，或申注而失注意，因參稽衆說，覃精研思，積四十餘年，成《正義》若干卷。先生自述其例有四：曰補注，補鄭君注所未備也。曰申注，申鄭君注義也。曰附注，近儒所說雖異鄭旨，義可旁通，附而存之，廣異聞，佞專己也。曰訂注，鄭君注義偶有違失，詳爲辨正，別是非，明折衷也。

夫禮者履也，禮者體也，使人約其心於登降揖讓、進退酬酢之間，目以處義，足以

步目，考中度衷，昭明物則。以是觀其容而知其心，即其敬惰以考其吉凶之故，《春秋》所記，其應如響。故先王所以教，君子所以履，莫不於是盡心焉。顧嬴秦滅學，而後高堂生傳《禮》十七篇，五傳而有大小戴、慶氏三家之學。其時雖竝置博士，而范史所紀，至儒林未有顯者。賴康成鄭君本小戴之學，又校以古經，爲鄭氏學，而是經以明，宜其爲百代師表也。然自是鄭注孤行，雖有荀崧「宜置博士」之請，而爲其學者絕少，自王肅、沈重、黃慶、李孟哲而外，如袁準、孔倫十數家，大都專解《喪服》而已。故賈氏竝疏二禮，而《儀禮》不逮《周禮》之該洽。即《儀禮》一經，而衆篇亦不逮《喪服》之該洽。觀其自序，稱《喪服》南北章疏甚多，其解全經，惟取裁黃、李二家，則其詳略之殊致，亦以所本者多寡不同歟。況自高堂生

推士禮以合之天子，後儒雖錯綜全經，旁推
午貫，而先王制禮貴多貴少主減進文精意
所存有非一端可例。則即鄭注以考經文，
亦不免偶有歧合之殊，而疏家例取專門，即
有違失，必爲曲解，又所申釋，必取經注正
文，彼此殊科，或亦彊爲比傳。則其解經而

反違經旨，申注而并失注義，亦勢所必然，
曷若無所依違，期於大通哉。雖然，三代以
上，典物具存。服其服，則帶裳鞞舄之異等
易明也；履其地，則堂室奧阼之殊方易識
也；接其人，則南鄉北鄉東面西面之異位易
辨也；舉其器，則几席筐篚尊俎觚觶之殊制
易考也。故其時君子務察位稱之義，而器
數則有司存。三代以後，即鄭君去古未遠，
而先王法物已罕有知者，故其注禮時即漢
制以相譬況。及賈疏時，則并漢制亦多有
不能知者，如《士冠禮》「缺項」，鄭注舉卷幘箇以證「如

頰」之讀，而賈疏則謂卷幘之狀不可知矣。況其更歷
千載乎？是非旁搜博考，神與古會，念釋
所在，回翔反覆，即器數以考誼理之存，使
精融形釋，若親接古人而與之進退酬酢於
其間，亦安能抉經之心，析異同之見，以折
衷一是哉？

余於茲識先生爲之之勤，研之之久，而
益信其所擇者精，所成者大也。昔鄭君自
以年老，祈於禮堂寫定經說，後遂夢徵起
起，歲阨龍蛇。今先生亦力疾成書，書甫成
而遽歸道山，後先之軌，千載同符。然則先
生紹業鄭君，將於是在。世有好是書而刊
布之者，其亦先生之志也夫。道光己酉十
月，順德羅惇衍椒生氏撰。

儀禮正義卷一 鄭氏注

績溪胡培壅學

士冠禮第一

鄭《目錄》云：「童子任職居士位，年二十而冠，主人玄冠朝服，則是仕於諸侯。天子之士，朝服皮弁素積。古者四民世事，士之子恒爲士。冠禮於五禮屬嘉禮。大、小戴及《別錄》此皆第一。」【疏】正義曰：儀徵大學士阮公撰《十三經注疏校勘記》，於《儀禮》尤詳。其自序云：「鄭氏疊古今文最爲詳覈，語助多寡，靡不悉紀。今校是經，寧詳毋略，^①用鄭氏家法也。」培壅撰《正義》，一遵其說，詳載各本經注異同。其宋嚴州單注本，爲宋本之最佳者，現已重刻行世，悉據錄焉。○《校勘記》云：「自『鄭《目錄》云』至『此皆第一』，毛及陳、閩、監本俱列疏前。」今案：「則是仕於諸侯天子之士」，近汪士鐘重刻單疏本無「仕」字，誤。朱氏《儀禮經傳通解》、陳鳳梧單

注本及各本俱有。陸氏德明《經典釋文》以「天子」二字加於「諸侯」之上，非。朱子嘗辨之，又云「溫本亦誤」。冠禮於五禮屬嘉禮，臧輔堂《目錄》本「冠」下無「禮」字，各本有。「此皆第一」，各本同，《通解》作「皆此爲第一」，今俱從各本。○鄭《目錄》者，鄭氏康成所作，別爲一書，不入注內。賈氏公彥作疏，始引以散附各篇題之下，今仍之。《隋書·經籍志》云：「《三禮目錄》一卷，鄭氏撰，梁有陶弘景注。」^②是別爲一書也。嘉慶間，黃丕烈重刻宋嚴州單注本，不載《目錄》，可證。云「童子任職居士位，年二十而冠」者，鄭意蓋以此爲士身加冠也。然下又云：「古者四民世事，士之子恒爲士。」朱子謂「詳鄭意，似謂士之子雖未仕，亦得用此禮矣」。《曲禮》：「二十曰弱，冠。四十曰強，而仕。」此常法也。亦容有才質出衆，當未冠之時，即已居士位者，故鄭兼已仕、未仕言之。吳氏廷華《儀禮疑義》云：「徐以升謂下記云『天子之子猶士也』，^③天下無生而貴者」，^④則自天子之子以下，凡入學者皆可以士名之，見此經爲天下之

① 「毋」，原作「無」，今據《儀禮注疏校勘記》改。

② 「弘」，原避諱作「宏」，今回改。下同，不出校。

③ 「之」下，據下記當有「元」字。

④ 「下」，原作「子」，今據下記文改。

通禮。其說是也。鄭謂「士之子恒爲士」，亦指學士言。」

先祖樸齋先生諱匡衷。《鄭氏目錄校證》云：「案：士有已

仕而有位者，《周禮》上士、中士、下士是也。有未仕者，

《玉藻》所謂居士，《王制》所謂選士、俊士是也。」今案：

據此則未仕者亦稱士，經文「士」字實該之矣。敖氏繼公

《儀禮集說》謂此篇主言士冠其適子之禮。今以經考之，

其曰「主人玄冠朝服」，則其父固有位之士也，又曰「將冠

者采衣、紒」，則未仕爲士可知，敖說近是。然賈疏引《喪

服》小功章「大夫爲昆弟之長殯」以證，則固有年未二十

而已任職居位者，若必專主未仕之士言，又不若鄭說之

該括矣。萬氏斯大《儀禮商》云：「禮不下庶人，故自士

以上，一依乎士禮，以爲之準，雖天子、諸侯之子亦不得

異焉。彼諸侯之有冠禮，止惟先君早世，世子年幼爲君，

如魯襄、邾隱者乃行之。推此於天子，亦惟幼而即位，如

周成王者，或有異焉。故曰：「天子之元子猶士也」，則

諸侯、大夫之子可知。」案：此說是也。冠者，將以責成

人之道，故年必以二十爲斷。《喪服》十九以下則爲殯，

以其未成人也。《荀子》謂十九而冠，非矣。《曲禮》曰

「男子二十，冠而字」，《內則》曰「二十而冠，始學禮」，此

禮之正也。其有年未及二十而冠者，則皆禮之變，不足

引以爲此經之證。云「主人玄冠朝服，則是仕於諸侯。

天子之士，朝服皮弁素積」者，此當以「仕於諸侯」絕句。

朱子云：「諸侯朝服以日視朝，天子皮弁以日視朝，皆君

臣同服。故言此篇言主人玄冠朝服，則是仕於諸侯而爲

士者。若天子之士，則其朝服當用皮弁素積，不得言玄

冠朝服也。」張氏爾岐《儀禮鄭注句讀》云：「其云仕於諸

侯，明非天子之士。實則天子之士亦同此禮，唯主人冠

服有異。」今案：冠昏喪祭，切於民用，周公制禮，欲以通

行天下，故多就侯國言之。然王朝之與侯國，異冠服不

異禮節，張說是也。云「古者四民世事，士之子恒爲士」

者，《齊語》文。四民，謂士、農、工、商也。云「冠禮於五

禮屬嘉禮」者，五禮，吉、凶、賓、軍、嘉是也，皆《周禮》大

宗伯掌之。冠屬嘉禮者，《大宗伯》云「以嘉禮親萬民」，

下即云「以昏冠之禮親成男女」，是冠爲嘉禮也。王氏應

麟《困學紀聞》引《三禮義宗》云：「《儀禮》十七篇，吉禮

三，凶禮四，賓禮三，嘉禮七，軍禮皆亡。」案：吉禮三，

《特牲》、《少牢》、《有司》也；凶禮四，《喪服》、《士喪》、

《既夕》、《士虞》也；賓禮三，《士相見》、《聘》、《覲》也；

嘉禮七，《士冠》、《士昏》、《鄉飲》、《鄉射》、《燕》、《大射》、

《公食》也。云「大、小戴及《別錄》此皆第一」者，大戴，戴

德；小戴，戴聖，皆傳《儀禮》者。《別錄》，劉向所作。此三家篇第不同，惟此篇則皆列爲第一，以禮始於冠故耳。今所傳之十七篇，以《士冠》始，以《有司徹》終，^①即《別錄》之次第，而鄭用之者也。其大戴篇次：《士冠》第一，《士昏》第二，《士相見》第三。與《別錄》同，以下則異：《士喪》第四，《既夕》第五，《士虞》第六，《特牲》第七，《少牢》第八，《有司徹》第九，《鄉飲酒》第十，《鄉射》第十一，《燕禮》第十二，《大射》第十三，《聘禮》第十四，《公食》第十五，《覲禮》第十六，《喪服》第十七。小戴篇次：《士冠》第一，《士昏》第二，《士相見》第三，《鄉飲酒》第四，《鄉射》第五，《燕禮》第六，《大射》第七。與《別錄》同，以下則異：《士虞》第八，《喪服》第九，《特牲》第十，《少牢》第十一，《有司徹》第十二，《士喪》第十三，《既夕》第十四，《聘禮》第十五，《公食》第十六，《覲禮》第十七。具見賈疏中，皆鄭所不從也。

儀禮。【疏】正義曰：唐石經「士冠禮第一」下標「儀禮

鄭氏注」五字，嚴本同。「儀禮」爲全部之總名，乃退在「士冠禮」下者，古人著書多以小題居上，大題列下，班氏之著《漢書》亦然，今仍之。又案：「士冠禮第一」上，

唐石經有「儀禮卷第一」五字，用隸體書，蓋後人所加，非鄭本之舊。不然，既退大題於下，何於上又書《儀禮》卷數乎？嚴本同，皆非也。○《禮記·明堂位》曰：

「周公攝政六年，制禮作樂。」故崔氏靈恩、陸氏德明、孔氏穎達及賈氏，皆云「《儀禮》周公所作」。韓氏愈云：

「文王、周公之法制粗在於是。」^②蓋亦以爲周公作也。

孔子、孟子所云「學禮」，即謂此書。朱子云：「遭秦滅學，禮樂先壞。漢晉以來，諸儒補輯，竟無全書。其頗存者，三禮而已。《周官》一書，固爲禮之綱領。至其儀

法度數，則《儀禮》乃其本經，而《禮記·郊特牲》、《冠

義》等篇，乃其義疏耳。前此猶有三禮、通禮、學究諸科，王安石變亂舊制，廢罷《儀禮》，而獨存《禮記》之科，

棄經任傳，遺本宗末，其失已甚。」張氏淳云：「《周禮》古矣，然聖人設官分職之書也，至其所用以長以治者，

豈能舍《儀禮》？《禮記》古矣，然皆釋《儀禮》之義，若

《祭義》、《冠義》、《昏義》、《鄉飲酒義》、《射義》、《燕義》、

① 「徹」，原脫，今據《儀禮正義正義正誤》補。

② 「粗」，原作「具」，今據《韓昌黎文集》卷十一《讀儀禮》改。

《聘義》是也，豈得而先《儀禮》？」處氏云：「《禮記》乃《儀禮》之傳。《周禮》雖得之於河間獻王時，無有傳之者，武帝以爲末世瀆亂之書，何休以爲六國陰謀之書，至漢末乃行於世。唯《儀禮》之書，漢初已行，高堂生傳之蕭奮，蕭奮傳之孟卿，孟卿傳之后蒼，后蒼傳之戴德、戴聖。」案：此即鄭氏《六藝論》所謂五傳弟子也。熊氏朋來云：「《周禮》大綱雖正，其間職掌繁密，恐傳者不皆周公之舊。《戴記》固多格言，而譌謬亦不免。惟《儀禮》爲禮經之稍完者，先儒謂其文物彬彬，乃周公制作之遺。」今案：據此諸說，三禮惟《儀禮》最古，亦惟《儀禮》最醇矣。《儀禮》有經、有記、有傳、記、傳乃孔門七十子之徒之所爲，而經非周公莫能作。其間器物陳設之多，行禮節次之密，升降揖讓褻褻之繁，讀之無不條理秩然。每篇自首至尾，一氣貫注，有欲增減而不能者。今所存止十七篇，以爲殘闕不全，固有之矣。若以爲出後人之僞撰，則斷乎其未有也。彼樂史、徐積之說，昔人已早辨之。賈疏謂《周禮》是統心，《儀禮》是履踐。不知履踐必本於心，外之有揖拜辭讓之文，內之必有恭敬謙遜之實。故魏氏了翁以爲《儀禮》一經非由外心以生，凡皆人性之固有，天秩之自然。則以二禮分別

外內，非矣。賈疏又謂《儀禮》亦名「曲禮」，引《禮器》「經禮三百，曲禮三千」爲證。今案：《中庸》作「禮儀三百，威儀三千」，《漢書·藝文志》作「禮經三百，威儀三千」，其名大同小異。舊解多以「經禮」爲《周禮》，「曲禮」爲《儀禮》。然《周禮》三百六十是官名耳，非禮之條目。王氏應麟云：「朱文公從《漢書》臣瓚注，謂《儀禮》乃「經禮」也，「曲禮」皆微文小節，如今《曲禮》、《少儀》、《內則》、《玉藻》、《弟子職》，所謂威儀三千也。」後人多宗朱子之說，則以《儀禮》爲「曲禮」非矣。張氏淳云：「漢時未有「儀禮」之名，豈漢後學者覩十七篇中有儀有禮，遂合而名之歟？」方氏體云：「案：《漢·藝文志》曰禮古經，《儒林傳》曰士禮，《六藝論》曰古文禮，《論衡》曰佚禮，《隋·經籍志》曰古經，《釋文·序錄》曰古禮。『儀禮』之名，始見《後漢書·鄭康成傳》，其爲魏晉間人所加可知。」今案：《儀禮》古祇謂之「禮」，《漢書·景十三王傳》云：「河間獻王所得書，皆古文先秦舊書，《周官》、《尚書》、《禮》、《禮記》。」所謂「禮」，即《儀禮》也。

鄭氏注。【疏】正義曰：《校勘記》云：「注，作「註」誤。《要義》作「著」。盧文弨云：「鄭氏注舊作註，通部皆然。案：疏云：言注者，注義於經下，若水之注物。作

注是也。』今案：唐石經及嚴本俱作「注」，從之。○鄭氏者，青州北海郡高密縣人，名玄，字康成，漢尚書僕射鄭崇八世孫也。後漢末，徵爲大司農，不就。年七十四，卒於家。賈此疏云「鄭崇之後」，而《周禮疏》又云「鄭沖之孫」。考《後漢書》本傳云「八世祖崇」，又《漢書》有《鄭崇傳》，孫氏星衍云「沖之名不見於史，疑沖爲崇之誤也」。注者，解經之名。漢人解經，有名傳者，若《書》孔氏、《詩》毛氏是也；有稱解詁、解詁者，服氏之《左傳》、何氏之《公羊》是也。鄭氏解《詩》名箋，而他經則多稱注。今三禮皆用鄭注，而《儀禮》尤爲絕學云。

士冠禮。筮于廟門。筮者，以蓍問日吉凶於

《易》也。冠必筮日於廟門者，重以成人之禮成子孫也。廟，謂禰廟。不於堂者，嫌著之靈由廟神。【疏】正義曰：自此至「宗人告事畢」，言筮日之事。○張氏爾岐云：「將冠，先筮日，次戒賓。至前期三日，又筮賓、宿賓。前期一日，又爲期告賓。冠期前事，凡五節。」今案：舊本經不分章，朱子作《經傳通解》，始分節以便讀者。至張氏爾岐《句讀》本，分析尤詳。此書分節多依張本，而亦時有更易云。○「禮」下，今本有一圈，唐石經、嚴、徐本皆無之。《校勘

記》云：「案：分段用圈，非古也。施之此處，尤非所宜。葛本別爲一行，亦謬。」張氏淳《儀禮識誤》云：「《士冠禮》釋文云：「廟，劉昌宗音廟。案：廟，古廟字。」引此以證經注不當復有從朝者，《冠禮》一卷，經注皆一。自《昏禮》而下，稍稍從朝，是蓋後之鈔寫校勘者失於不審而已。今悉改作「廟」，從《釋文》。」今案：唐石經、嚴本俱作「廟」。茲撰《正義》，經文俱從唐石經，注文俱從嚴本。其或石經、嚴本有誤，則改從他本，並注明於下。○此「士冠禮」三字，爲經之正文。敖氏謂此目下文所言之禮，是也。冠者，加冠於首之名。筮于廟門者，凌先生諱廷堪。《禮經釋例》云：「凡卜筮皆于廟門，唯將葬則于兆南。案：《士冠禮》：「筮于廟門。」又云：「筮與席、所卦者，具饌于西塾。」注：「西塾，門外西堂也。」又云：「布席于門中，闔西闕外，西面。」又：「前期三日，筮賓，如求日之儀。」《特牲饋食禮》：「筮日，席于門中，闔西闕外。」前期三日之朝，筮尸，如求日之儀。《少牢饋食禮》：「筮日，筮于廟門之外，明日，朝筮尸。」如筮日之儀。是凡筮皆于廟門也。《士喪禮》：「卜日，族長涖卜，及宗人吉服，立于門西，東面南上。」又：「闔

①「朝筮尸」，據《儀禮·少牢》經文「朝」下當有「服」字。

東扉，主婦立于其內，席于闌西闕外。」此卜日之門，謂殯宮門也。上經：「巫止于廟門外。」注：「凡宮有鬼神曰廟。」然則殯宮門即廟門，是卜亦于廟門也。^①筮亦有不得廟門者，《士喪禮》：「筮宅，既朝哭，主人皆往，兆南北面。」注：「兆，域也。」又云：「命筮者在主人之右，筮者東面，抽上韉，兼執之，南面受命。筮人許諾，不述命，右還，北面，指中封而筮。」注：「中封，中央壤也。」是將葬筮宅，則于兆南也。今案：筮宅不得廟門而于兆南者，以宜就地筮之也。《少牢》、《特牲》皆云門外，而此但云廟門者，以下布席云闕外，則亦在廟門外可知矣。注云「筮者，以著問日吉凶於

《易》也」者，著，筮草也。郭璞云：「上有蔭叢著，下有千齡蔡。」《曲禮》曰：「龜爲卜，筮爲筮。」筮即著也。《周禮·序官·筮人》鄭注：「問著曰筮，其占《易》。」又其職云：「掌三易以辨九筮之名。」又曰：「以辨吉凶。」故知筮日是以著問日之吉凶於《易》也。賈疏云：「不筮月者，《夏小正》：「二月，綏多士女，冠子娶妻時也。」既有常月，故不筮。」今案：古無筮月之法，賈說非也。秦氏蕙田《五禮通考》云：「綏多士女」，專指昏言，《周禮》「仲春之月，令會男女」是也。云「冠子娶妻」，乃注家之誤耳。下經云：「屨，夏用葛，冬皮屨可也。」則冠無常月明矣。云「冠必筮日於廟門

者，重以成人之禮成子孫也」者，案：筮日於廟，重其事也。《禮記·冠義》曰：「古者聖王重冠。古者冠禮，筮日，筮賓，所以敬冠事。敬冠事，所以重禮。」又曰：「已冠而字之，成人之道也。」又曰：「成人之者，將責成人禮焉也。責成人禮焉者，將責爲人子、爲人弟、爲人臣、爲人少者之禮行焉。將責四者之行於人，其禮可不重與？」是其義也。兼言「成子孫」者，容祖在則祖爲冠主也。云「廟謂禰廟」者，禰廟，父廟也。周制：天子七廟，諸侯五廟，大夫三廟，上士二廟，中士、下士一廟。必於禰者，以其親也。李氏如圭《儀禮集釋》云：「凡言廟者，皆禰廟。」^②《昏禮》行事於廟，記云「受諸禰廟」是也。其非禰廟，則舉廟名以別之。」若祖廟、祧廟是也。云「不於堂者，嫌著之靈由廟神」者，凡廟有室有堂，有庭有門。禮有行於廟之室者，祭祀陰厭之屬是也；有行於廟之堂者，饋尸之屬是也；有行於廟之庭者，納牲之類是也；有行於廟之門者，此筮日之類是也。《冠禮》三加皆行於廟堂，此筮日不於堂而於門，故云「嫌著

① 「門」，原脫，今據《禮經釋例》補。

② 「禰」，原作「彌」，今據《續清經解》本改。下「受諸禰」、「其非禰」同。

之靈由廟神」，明著自有神也。江氏筠《讀儀禮私記》云：

「注說陳用之非之，而據《郊特牲》『卜郊作龜於禴宮』，謂人君卜於禴宮之內，大夫、士筮於禴門之外。案：天地大祭，不敢自專，故須就禴宮卜之。若其祭禴，恐不然矣。此經筮祭之辭，具詳《特牲》、《少牢》。試以此辭命筮人於堂上，其去廟與祇一牖之隔，不幾視廟神爲無知乎？注蓋通全經而釋之，其說未可非也。」主人玄冠朝服，緇帶素鞞，即位于門東，西面。主人，將冠者之父兄也。

玄冠，委貌也。朝服者，十五升布衣而素裳也。衣不言色者，衣與冠同也。筮必朝服者，尊蓍龜之道。緇帶，黑繒帶。士帶博二寸，再繚四寸，屈垂三尺。素鞞，白韋鞞。長三尺，上廣一尺，下廣二尺，其頸五寸，肩革帶博二寸。天子與其臣，玄冕以視朔，皮弁以日視朝。諸侯與其臣，皮弁以視朔，朝服以日視朝。凡染黑，五人爲緇，七人爲緇，玄則六人與。【疏】正義曰：李氏云：「門東，門外之東。」程氏瑤田《儀禮經注疑直》云：「初疑席於闔西，門東爲門左扉之東。細繹之，不然，蓋兩門之東也。主人即位於此，以待筮事。」吳氏廷華《儀禮章句》云：「西面者，鬼神位在西鄉之。」○注「筮必朝服，尊蓍龜之道也」，毛氏汲古閣本如是，嚴、徐、《集釋》、楊氏「服」下俱有「者」字，「道」下無「也」

字。又「黑繒帶也」，嚴本、《集釋》俱無「也」字。「白韋鞞也」，嚴、徐、《集釋》俱無「也」字。「肩革帶博三寸」，嚴本、《集釋》、《通解》、楊氏「三」俱作「二」，《校勘記》云：「案：作『二』與《玉藻》合。」今俱從嚴本。又「玄冕以視朔」，「視」，《釋文》作「眡」，云：「本或作視，下同。」嚴本作「視」。云「主人，將冠者之父兄也」者，《孟子》曰：「丈夫之冠也，父命之。」是冠之事父爲主也。兼言兄者，容或父有廢疾，使兄主其事。云「玄冠，委貌也」者，玄冠，黑繒冠也。注以爲委貌，詳後。云「朝服者，十五升布衣而素裳也」者，《雜記》曰：「朝服十五升。」江氏永《鄉黨圖考》云：「古未有棉花，布以麻爲之。布幅闊二尺二寸，十五升，一千二百縷，麻布之極細者也。」云「衣不言色者，衣與冠同也」者，李氏云：「禮之通例，衣與冠同色，黃衣黃冠是也；裳與鞞同色，素積素鞞是也。此玄冠素鞞，故其服玄衣而素裳。」今案：經不云裳，統於服中。鄭知素裳者，固以素鞞推而知之，然亦有所本。金氏榜《禮箋》云：「石渠論玄冠朝服，戴聖云：『玄冠，委貌也。朝服，布上素下，緇帛帶，素韋鞞。』鄭君謂朝服素裳，實本小戴說。」是也。云「筮必朝服者，尊蓍龜之道」者，楊氏復《儀禮圖》云：「朝服重於玄端。冠時主人玄端爵鞞，今此筮亦在廟，不服玄端而

服朝服，是尊著龜之道也。」然《特性》筮日與祭同服玄端，何又不尊著龜乎？於是賈疏申之云：「彼爲祭事，著不可尊於先祖，故同服。此爲冠事，著可尊於子孫，故異服。」其說殊牽強。《禮經釋例》云：「考《特性饋食禮》士筮當用玄端，冠禮攝盛，故用朝服。《特性》筮日、筮尸、宿尸、宿賓皆用玄端，正祭日賓及兄弟助祭，皆攝盛用朝服。」①《士冠》正冠日用玄端，筮日、筮賓、宿賓、爲期則攝盛用朝服。蓋相變以爲禮也。《士冠禮》注：「筮必朝服，尊著龜之道。」則與《特性》用玄端不合。賈曲爲之解，非經意也。云「縹帶，黑繒帶」者，帶亦與衣同色也。云「士帶博二寸，再繚四寸，屈垂三尺」者，案：《玉藻》曰：「士練帶，率下辟。」鄭注：「率，絳也。辟，讀如「裨冕」之「裨」，裨，謂以繒采飾其側。人君充之，大夫裨其紐及末，士裨其末而已。」孔疏：「士用熟帛練爲帶。絳，謂緋緝也。下裨者，士則用縹，唯裨嚮下一垂者。」《玉藻》又曰：「大夫大帶四寸。雜帶：君朱綠，大夫玄華，士縹辟二寸，再繚四寸。」鄭注：「雜猶飾也，即上之裨也。君裨帶，上以朱，下以綠終之。大夫裨垂，外以玄，內以華。華，黃色也。士裨垂之下，外內皆以縹，是謂縹帶。大夫以上以素，皆廣四寸。士以練，廣二寸，再繚之。」孔疏：「縹，繞也。再度繞要，亦四寸也。」今

案：《玉藻》注云「是謂縹帶」，「是謂」者，即指此經言也。「屈垂三尺」，亦據《玉藻》而知。《玉藻》曰：「紳長制：士三尺。」鄭注：「紳，帶之垂者也，言其屈而重也。」李氏云：「帶之反屈向上，又垂而下者，則有三尺也。」②云「素鞞，白韋鞞」者，鞞，蔽膝也。冕服謂之鞞，其他服謂之鞞，皆以韋爲之。《字林》云：「韋，柔皮也。」鄭注《乾鑿度》云：「古者田漁而食，因衣其皮，先知蔽前，後知蔽後。後王易之以布帛，而獨存其蔽前者，重古道，不忘本也。」凡鞞皆同裳色，其鞞則有山火龍章之飾焉，此鞞與鞞之分也。鞞以白韋爲之者，朝服之鞞也。若士玄端服之鞞，則以爵韋爲之。《玉藻》曰：「鞞：君朱，大夫素，士爵韋。」鄭注：「此玄端服之鞞也。凡鞞必象裳色，則天子、諸侯玄端朱裳，大夫素裳，唯士玄裳、黃裳、雜裳也。皮弁服皆素鞞。」今案：皮弁服用素鞞，自天子至士皆然，故云「皆」也。其朝服自上至下，亦皆素鞞。其玄端服，則唯大夫用素鞞耳。云「長三尺，上廣一尺，下廣二尺，其頸五寸，肩革帶博二寸」者，《玉藻》文。彼注云：「頸五寸，亦謂廣也。頸中央、肩兩角，皆上

①「皆」，《禮經釋例》作「則」。

②「有」，《儀禮集釋》作「皆」。

接革帶以繫之。肩與革帶廣同。凡佩，繫於革帶。」此鞞之形制也。云「天子與其臣，玄冕以視朔，皮弁以日視朝。諸侯與其臣，皮弁以視朔，朝服以日視朝」者，案：《玉藻》曰：「天子玄端而朝，日於東門之外，聽朔於南門之外。」鄭注：「端當爲冕，字之誤也。」又曰：「皮弁以日視朝。」又曰：「諸侯皮弁以聽朔於大廟，朝服以日視朝於內朝。」此鄭所據也。但《玉藻》不言臣，鄭兼言臣者，欲見君臣同服。且以見此朝服而筮者，爲諸侯之士也。云「凡染黑，五人爲緇，七人爲緇，玄則六人與」者，此釋經玄與緇之文也。《考工記》：「鍾氏染羽，三人爲緇，五人爲緇，七人爲緇。」鄭注：「染緇者，三人而成。又再染以黑，則爲緇。又復再染以黑，乃成緇矣。染布帛者，染人掌之。凡玄色者，在緇緇之間，其六人者與？」賈疏：「此經及《爾雅》不言四人及六人。《士冠》有朱紱之文，鄭云：『朱則四人與？』是更以緇入赤汁，則爲朱。以無正文，故云『與』以疑之。若不入赤而入黑汁，則爲紺矣。若更以紺入黑，則爲緇，此『五人爲緇』是也。若更以此緇入黑汁，則爲玄。更以玄入黑汁，則名『七人爲緇』矣。但緇與玄相類，故禮家每以緇布衣爲玄端也。」^①今案：此注及疏極明析，然則《鍾氏》所云爲染黑法。其《爾雅》「一染謂之緇，再染謂之緇，三染謂之緇」，乃

染赤法也。詳後「爵弁服纁裳」下。又案：《淮南子·俶真訓》云：「以涅染緇，則黑於涅。」賈疏引作「以涅染紺」，誤。有司如主人服，即位于西方，東面北上。有司，羣吏有事者。謂主人之吏，所自辟除，府史以下，今時卒吏及假吏是也。【疏】正義曰：《校勘記》云：「于，徐本作『於』。《士昏禮》『至於某之室』，《大射儀》『士御於大夫』，鄭注皆云『今文於爲于』，則『於』、『于』二字宜有辨，但俗本溷寫已久，不可勝校。」今案：唐石經、嚴本俱作「于」，從之。以後經從石經，注從嚴本可也。注「府史以下也」，毛有「也」字。注末「皆是也」，毛有「皆」字，嚴、徐、《集釋》俱無。○如主人服，亦朝服也。有司朝服，敬事也。西方，門外西方。北上者，有司非一，立位以北爲上也。注云「有司，羣吏有事者。謂主人之吏，所自辟除，府史以下」者，賈疏：「案：《周禮》三百六十官之下，皆有府史胥徒，不得君命，主人自辟除，去賦役，補置之是也。」敖氏云：「有司，即下筮者、卦者、^②宰、宗人之類。」先祖樸齋先生《儀禮釋官》云：「司，主也。凡事有專主之者，謂之有司。」

① 「家」，原脫，今據《周禮·考工記》賈疏補。

② 「下」，《儀禮集說》無，「卦」作「占」。

又云：「案：鄭氏注《大射》及《周禮·司裘職》，皆云士無臣。而《特牲饋食禮》有私臣，則士有臣矣。《左傳》云：①「士有隸子弟。」又云：「士臣阜。」蓋士得以其子弟及府史之屬爲臣也。特其所臣者少，有事私臣不足，則同僚相佐助，或假公臣爲之。故《特牲》有公有司，《士喪》有公家之臣來給事者。賈此疏以羣吏與屬吏不同，羣吏爲府史胥徒，屬吏爲君命之士。然《特牲》注言屬吏，而經言有司羣執事，則兼公有司、私臣而言，府史之屬亦統之矣。此篇經言有司，不言公有司，又下賓及贊者不在有司之列，則有司皆士之私臣，府史以下也。」褚氏寅亮《儀禮管見》云：「公有司、②私臣皆可謂之有司，但褻冠事所用人少，③或私臣已足，故鄭專以主人所自辟除者言之。」云「今時卒吏及假吏是也」者，是舉漢制以證。沈氏彤云：「案：《漢書·倪寬傳》『補廷尉文學卒史』，《儒林傳》『置五經百石卒史』，《黃霸傳》『補馮翊卒史』，皆作史。」今案：鄭注各本俱作「卒史」，沈說存以俟考。筮與席、所卦者，具饌于西塾。筮，所以問吉凶，謂著也。所卦者，所以畫地記爻。《易》曰：「六畫而成卦。」饌，陳也。具，俱也。西塾，門外西堂也。【疏】正義曰：此筮也、席也、所卦者，皆爲將筮陳之。敖氏云：「席，蒲筵也。士用蒲席，神人同。」

注云「筮，所以問吉凶，謂著也」者，然則此著也，而云筮者，敖氏云：「以其用名之。」云「所卦者，所以畫地記爻」者，褚氏云：「注『所以畫地記爻』，④蓋據《少牢》『卦以木』之文。敖氏補入『書卦之具』，亦密。具，即方也。」張氏惠言《讀儀禮記》云：「《少牢》卦以木畫地者，此木也。又下『筮人書卦』，注云：『以方寫所得之卦。』則所卦者，兼有木、方二物。」今案：方，即版也。經云「所卦者」，謂所用以畫卦、書卦者，褚、張之說是也。云《易》曰「六畫而成卦」者，《說卦傳》文。云「饌，陳也」者，謂陳設也。《詩·卷阿》疏：「饌，謂供置之。」故其義爲陳也。云「具，俱也」者，《詩·民具爾瞻》，《毛傳》云：「具，俱也。」云「西塾，門外西堂也」者，以筮在門外，故知爲門外西塾也。必陳於西塾者，以筮在闕西，近其事也。李氏如圭《儀禮釋宮》云：「夾門之堂謂之塾。《爾雅》曰：『門側之堂謂之塾。』郭氏曰：『夾門堂也。』門之內外，其東西皆有塾，一門而塾四，其外塾南

①「云」，原脫，今據《儀禮釋宮》補。

②「公」原脫，今據《儀禮管見》補。

③「事」，原作「者」，今據《儀禮管見》改。

④「注」下，《儀禮管見》有「云」字。

鄉。案：《士虞禮》：「陳鼎在門外之右，匕俎在西塾之西。」注曰：「塾有西者，是室南鄉。」^①又案：《士冠禮》：「擯者負東塾。」注曰：「東塾，門內東堂。負之，北面。」則內塾北鄉也。今案：此云「具饌于西塾」，爲門外西塾。又下經曰「舉鼎，陳于門外，直東塾」，是門外有東西兩塾也。又此篇云「擯者負東塾」，爲內東塾。《士虞禮》曰「羞燔俎在內西塾上」，是門內有東西兩塾也，所謂一門而塾四也。《聘禮》曰「賓立接西塾」，爲門外西塾。又聘畢擯者負東塾，爲門內東塾。則人君之門亦有四塾也。○賈疏云：「筮法，依七八九六之爻而記之，但古用木畫地，今則用錢。以三少爲重錢，重錢則九也。三多爲交錢，交錢則六也。兩多一少爲單錢，單錢則七也。兩少一多爲拆錢，拆錢則八也。」張氏惠言云：「案：此用錢所以記爻，^②非代筮也。以錢擲法，未知始於何時。」《禮經釋例》云：「此即京氏《易》。項氏安世云：『以京《易》考之，世所傳火珠林者，即其法也。以三錢擲之，兩背一面爲拆，兩面一背爲單，俱面爲交，俱背爲重。』說與賈疏正同。考世應、飛伏、游魂、歸魂、納甲等說，俱見京氏《易》中。然則近日錢卜，猶是漢人舊學也。」布席于門中，闌西闕外，西面。闌，門槩。闕，闕也。古文「闌」爲「槩」，「闕」爲「蹙」。**【疏】**正義

曰：張氏爾岐云：「布席，將坐以筮也。前具之西塾，至此乃布之。云門中者，以大分言之，闌西闕外則布席處也。」○注「門槩」下，毛本有「也」字，嚴、徐、《集釋》俱無。云「闌，門槩」者，李氏云：「闌，門中央所豎短木也。」程氏瑤田云：「槩以一條木爲之，即杙也。《爾雅》之言杙也，曰：『機謂之杙，在牆者謂之樨，在地者謂之臬，大者謂之栢，長者謂之閭。』然則杙之爲物，大小長短不必同，而以之爲門闌，則其直者也。」云「闕，闕也」者，鄭注《曲禮》：「闕，栢，皆云『門限』。闕與栢同，則闕即闕可知。邢氏昺云：『闕謂門下橫木，爲內外之限也。其門之兩旁木，則謂之根。根闌之間，則謂之中門。』今案：以經考之，《玉藻》曰：「公事自闌西，私事自闌東。」《曲禮》曰：「由闌右。」闌有東西左右之稱，則闌之爲中央豎木無疑也。《曲禮》曰：「不踐闕。」《玉藻》曰：「不履闕。」闕言踐履，則闕之爲門下橫木無疑也。《爾雅》曰：「槩謂之闕。」則槩與闕爲一物亦無疑也。惟栢之爲闕，經無明徵。然《曲禮》曰：「外言不

① 「室」，原作「空」，今據《續清經解》本改。
② 「所」，《讀儀禮記》作「特」。

入於梱，內言不出於梱。」梱言不出不入，是有限域之義，故鄭解梱爲門限，與闕同也。程氏又云：「《說文》則曰：「闕，門梱也。梱，門槪也。槪，弋也，一曰門梱。弋，槪也。」是不謂梱爲門限之橫者，而以闕之植於兩扉間者亦呼之爲梱也。至解闕字，則曰「闕，楣也」、「楣，限也」。是固明知闕之與闌兩不相混，所異者移闕之名梱者以名其闌爾。然而梱之名斷在於闕，則《說文》之云爲所聞異辭者也。《廣韻》於闌字不曰「門闌」，而曰「門闌中」，是謂闌安門闌之中，不謂闌即闕也。於闕字、闕字，則皆曰「門限也」，可謂能別白黑而定之者矣。」云「古文「闕」爲「槩」，「闕」爲「蹙」者，賈疏云：「遭秦燔滅典籍，漢興求錄遺文之後，有古文、今文。《漢書》云：「魯人高堂生爲漢博士，傳《儀禮》十七篇。」是今文也。至武帝之末，魯恭王壞孔子宅，得古《儀禮》五十六篇，其字皆以篆書，是爲古文也。古文十七篇，與高堂生所傳者同，而字多不同。其餘三十九篇，絕無師說，祕在於館。」王氏應麟云：「康成不注，遂無傳焉。」方氏體《古文考誤》云：「賈公彥謂《儀禮》五十六篇，其字皆篆書，是爲古文。案：昭帝女讀古文《論語》，宣帝下太常博士，時稱難曉。若皆篆書，則漢時人人能讀，何云難曉乎？此賈疏之誤也。」又云：「《禮》古經出魯淹中，

賈公彥顧以爲孔壁《禮記》，不亦疎乎？」今案：許氏《說文序》謂孔氏壁中書係古文，與篆書異，賈說誠誤。至《經典釋文》引鄭《六藝論》云：「後得孔氏壁中古文《禮》五十六篇。」是鄭亦以古文《禮》爲得於孔壁中。又《漢·藝文志》云：「《禮》古經者，出於魯淹中及孔氏。」所云孔氏，蓋即謂孔氏宅也。胡氏承珙《儀禮古今文疏義序》云：「《後漢書·儒林傳》云：「《前書》魯高堂生傳《禮》十七篇，至梁人戴德及德兄子聖，於是德爲大戴《禮》，聖爲小戴《禮》。」又云：「鄭玄本習小戴《禮》，後以古經校之，取其義長者順故，爲鄭氏學。」是則鄭注所謂今文者，乃小戴本。所謂古文者，則《前書》云古經出於魯淹中者也。鄭君作注，參用二本。從今文者，則今文在經，古文出注。從古文者，則古文在經，今文出注。然有不言今古文，但云「某或作某」者，殆當時行用更有別本。」此十七篇文字異同之由，而今文、古文所以流傳也。此節今文作「闕」、「闕」，古文作「槩」、「蹙」，鄭於經用今文之本，而注明「古文作某」於下，使後人有所稽考，乃解經慎重之意。然鄭從「闕」、「闕」，不從「槩」、「蹙」者，則以「闕」、「闕」爲正字，人所易曉也。其注《周禮·匠人》云：「槩，古文臬，假借字。」此古文之「槩」亦是假借，而義又殊。《周禮·匠人》之「槩」與《爾雅》在地之「臬」同，謂於平地中樹八尺之表以規識日景，非門中之闕，鄭注《考工記》甚明。《爾雅》既云「在地者謂之臬」，又云「槪謂之闕」，是「臬」與「闕」殊。郭氏以門槪釋「臬」，則繆

矣。《說文》「槩」作「楸」，本義訓爲木相摩。《周禮》假「槩」爲「臬」，《儀禮》古文及《穀梁傳》「置旃以爲槩」，皆假「槩」爲「闌」耳。「蹙」字各本皆同。段氏玉裁《儀禮漢讀考》以「蹙」爲「戚」，謂「漢人無蹙字，祇用戚字」，又謂「漢人多謂門限爲門切，門切即闕也，亦謂之戚。言其界畫謂之闕，言其迫切謂之戚」。胡氏承珙則以「蹙」爲「城」，引《文選·西京賦》「右平左城」薛綜注「城，限也」爲證。要之，「戚」、「城」亦皆「闕」之假借也。○張氏惠言云：「闕，孔疏以爲門止有一，賈則以爲有二。案：鄭注《論語》『立不中門』，云：『立行不當根闕之中央。』則鄭以爲一闕可知。」詳《聘禮》。筮人執筴，抽上韝，兼執之，進，受命于主人。筮人，有司主三易者。韝，藏筴之器。今時藏弓矢者，謂之韝丸也。兼，并也。進，前也，自西方而前。受命者，當知所筮也。【疏】正義曰：《儀禮釋官》云：「筮人，私臣掌筮者。案：許氏《說文解字》云：『天子著九尺，諸侯七尺，大夫五尺，士三尺。』《少牢》疏引《大戴禮》：「三正記」同。士有著，則得有筮人也。《雜記》：「如筮，則史練冠、長衣以筮。」鄭注：「謂下大夫若士也。筮史，筮人也。」是可證士有筮人矣。筮人亦名筮史，詳《少牢禮》。敖氏謂宰、宗人、筮人之屬，皆公家所使給事於私家者。說未的，辨見《特牲》篇末。張氏爾岐云：「兼執之者，兼上韝與下韝而并執之。此時著尚在下韝，①待筮時乃取出以筮。」今

案：韝有上下者，下韝嚮上承之，上韝嚮下冒之，筴在韝中，執筴即執韝也。必抽上韝見著者，示有事也。《特牲禮》：「筮人取筮于西塾，執之，東面受命于主人。」《士喪禮》：「筮者東面，抽上韝，兼執之，南面受命。」此皆士禮，大略相同，惟《士喪》筮于兆南，南面受命爲異耳。《少牢禮》：「史朝服，左執筮，右抽上韝，兼與筮執之，東面受命于主人。」彼言左右，此不言，其實一也。○注「主三易者」，毛本「者」下有「也」字，嚴、徐、《集釋》俱無。「藏筴之器」，「筴」，嚴本、《通解》俱作「筮」。案：《曲禮》曰「筴爲著」，則「筴」亦著也，宜從各本作「筴」。敖氏竝改經「筴」字爲「筮」，尤非。「器」下，毛本有「也」字，嚴、徐、《集釋》俱無。盧氏文弨《儀禮詳校》云：「丸俗凡正，世人疑爲凡，疏矣。」云「筮人，有司主三易者」，《周禮·筮人》：「掌三易：一曰《連山》，二曰《歸藏》，三曰《周易》。」蓋筮得一卦，而三人各據一易以占也。《儀禮釋官》云：「卜筮，古者貴賤同用三兆、三易。《洪範》：『立時人作卜筮，三人占，則從二人之言。』」鄭注：「卜筮各三人，大卜掌三兆、三《易》。」是鄭意謂卜則掌三兆者各一人，筮則掌三易者各一人。故

①「著」，原作「筮」，今據《儀禮鄭注句讀》改。

《金縢》「乃卜三龜」，《士喪禮》「占者三人」，注以為「掌玉兆、瓦兆、原兆者」是矣。賈疏謂大夫卜筮同用一龜一易，無所據也。「云「贛，藏策之器。今時藏弓矢者，謂之贛丸也」者，《說文》「贛，弓矢贛也」，段氏注云：「《左傳》服注：『冰，贛丸蓋也。』」後漢書·南匈奴傳引《方言》：「藏箭為贛丸。」案：案呼之曰贛丸，單呼之曰贛。」今《方言》：「所以藏弓謂之韃，或謂之贛丸。」贛與贛同，此鄭以漢時之贛丸證經之贛也。贛字從革，蓋以皮為之。云「兼，并也」者，《說文》同。云「進，前也，自西方而前」者，《鄉射禮》「賓少進」注云：「少進，差在前。」是以進為前也。筮人位本在西方，今云進，是自西向東前行，與《特性》云「東面受命」一也。云「受命者，當知所筮也」者，謂當知所筮之事也。宰，自右少退，贊命。宰，有司主政教者。自，由也。贊，佐也。命，告也。佐主人，告所以筮也。《少儀》曰：「贊幣自左，詔辭自右。」【疏】正義曰：右，主人位之右。宰本在西方，今來至東方，由主人之右贊命也。李氏云：「少退，後於主人。」蓋不敢與主人并也。《士喪禮》亦云：「命筮者在主人之右。」惟《特性禮》「宰自主人之左贊命」，不由右者，彼注云「為神求變也」。《少牢》「不使人贊命而自命之者，賈疏云：『大夫尊屈，士卑不嫌。』」又《特性》、《士喪》贊

命皆有辭，此無辭者，文不具。朱子云：「所贊之辭未聞，蓋當云：『某有子某，將以來日某加冠於其首，庶幾從之。』」○注「主政教者」下，毛本有「也」字，嚴、徐、《集釋》俱無。云「宰，有司主政教者」，《儀禮釋官》云：「宰，家宰，私臣，亦曰家相。案：《國語》趙簡子「使少室周為宰」，韋注：「宰，家宰也。」宰本家臣之名，而邑長亦稱宰，故有家宰、邑宰之殊。《喪服傳》疏云：「孤卿大夫有采邑者，其邑既有邑宰，又有家宰。若魯三卿，公山弗擾為季氏費宰，子羔為孟氏郈宰之類，皆為邑宰也。陽貨、冉有、子路之等為季氏家相，亦名家宰。若無地卿大夫，則無邑宰，直有家宰。孔子為魯大夫，而原思為之宰，是直有家相者也。」此諸侯之士無地，未必有邑宰，但於私臣中擇其長者一人，使主家之政教，亦謂之宰。《特性》注云「宰，羣吏之長」，《曲禮》「士不名家相」，即此。賈疏謂士無臣，以屬吏為宰。失之矣。云「贊，佐也」者，《特性》注又云「贊，佐也，達也」。云「命，告也」者，《爾雅·釋詁》文。云「佐主人，告所以筮也」者，謂告以所筮之事也。云「《少儀》曰「贊幣自左，詔辭自右」者，彼注亦云：「自，由也。謂為君受幣，為君出命也。」此鄭引以證自右贊命之義。筮人許諾，右還，即席坐，西面。卦者在左。即，就也。東面受命，

右還北行就席。卦者，有司主畫地識爻者。【疏】正義曰：《說文》：「許，聽也。諾，應也。」筮人即席坐西面，蓋受命訖，行筮事也。《易》曰：「大衍之數五十，其用四十有九。」分而爲二以象兩，掛一以象三。揲之以四，以象四時。歸奇于扚，以象閏。五歲再閏，故再扚而後掛。」又曰：「十有八變而成卦。」此筮法也。《少牢禮》云：「史曰諾，西面于門西，抽下韉，左執筮，右兼執韉以擊筮。」又曰：「乃釋韉立筮。」此不言擊筮與釋韉者，文有詳略，而儀節當同。「卦者在左」，則亦西面可知。《士喪》、《特性》、《少牢》皆云「卦者在左」，蓋皆在筮人之左也。敖氏云：「《少牢禮》：『卦者在左，坐。』此不言坐，則是立也。」江氏筠《讀儀禮私記》云：「此說不然。《少牢》筮人立筮，卦者不言坐，則嫌於不坐，故特著坐文。」^①今此與《特性》俱坐筮，卦者之坐不言可知，故文省耳。」褚氏云：「筮者雖有坐與立之異，而卦者畫爻於地，無不坐也。」盛氏世佐《儀禮集編》云：「卦者必坐，便其畫地識爻也。」今案：諸家駁敖之說甚是。《禮經釋例》云：「凡筮，士坐筮，卿大夫立筮。案：《特性禮》：『筮者許諾，即席，西面坐。卦者在左。卒筮，寫卦。』注：『士之筮者坐，著短由便。』《士冠禮》筮者亦坐，是士坐筮也。《少牢禮》：筮日，史朝服，受命于主人；命畢，史曰

諾。又云：「乃釋韉，立筮。」注：「卿大夫之著長五尺，立筮由便。」疏云：「以其著長，立筮爲便。對士之著三尺，坐筮爲便。若諸侯著七尺，天子著九尺，立筮可知。」《少牢》卿大夫祭禮，經云立筮，故知卿大夫是立筮也。又《士喪禮》筮宅，但云「筮人北面，指中封而筮」，不云坐立。此是士禮，當亦是坐筮也。至於《士喪》卜日之禮：宗人還，少退，受命；命畢，許諾，不述命，還即席，西面坐，命龜，興，授卜人龜，卜人坐，作龜。據此，則卜禮士亦坐卜也。而經文止此一事，別無可證。注云：「宗人不述命，亦士禮略。凡卜，述命、命龜異，龜重，威儀多也。」疏云：「言凡非一，則大夫已上皆有述命。」蓋卜重於筮，威儀多。龜無長短之殊，自無坐立之別，而但以述命不述命爲異也。」○《釋例》又云：「案：世所傳筮儀甚舛陋，近王氏懋竑以爲非朱子作，其言曰：『《士冠禮》、《特性饋食》、《少牢饋食禮》，筮者皆西面。惟《士喪禮》筮宅，以不在廟，故筮者北面。今直云：筮者北面，見《儀禮》。朱子豈不見《儀禮》者，而疏謬若是邪？』可謂先得我心者矣。」○注「識爻者」下，毛本有「也」字，嚴本、《集釋》、楊氏俱無。云「即，就也」者，本

①「著」，原作「著」，今據《續清經解》本改。

《方言》。云「東面受命，右還北行就席」者，蔡氏德晉《禮經本義》云：「右還，回身右轉也。就席，就闌西闕外之席。」詳蔡意，則是右還即北行也。吳氏《疑義》以爲從東面轉而南，轉而西乃北行。恐非。云「卦者，有司主畫地識爻者」，爻有七八九六，每得一爻，以木畫地識之，《少牢》所謂「卦以木」是也。《儀禮釋官》云：「卦者亦私臣，筮人之貳。」案：《少牢》史掌筮，注云：「卦者，史之屬。」則此亦筮人之屬也。其職主記卦爻，故目爲卦者，以事名其官。卒筮，書卦，執以示主人。卒，已也。書卦者，筮人以方寫所得之卦。【疏】正義曰：卒筮，謂筮事畢也。書卦，謂六爻備，已成卦體，乃書之於版也。執以示主人，敖氏云：「執之不言筮人，文省也。」今案：《特性禮》：「卒筮，寫卦。筮者執以示主人。主人受視，反之。」《士喪禮》：「卒筮，執卦以示命筮者。命筮者受視，反之。」《少牢禮》：「卒筮，乃書卦于木，示主人。」各經詳略不同，宜以《特性》爲正。褚氏云：「卦者書卦，筮人執示，於《特性》經文明著之矣。竊疑此禮及《士喪禮》皆然，未必有異，經文渾耳。」江氏筠云：「《特性》注云「卦者以方版寫之」，此注則云「筮人以方寫所得之卦」，而寫卦遂有二人矣。《特性禮》：「筮者執以示主人」，《士喪禮》注則云「卦者寫卦示主人」，而示卦又有二

人矣。案：寫卦自是卦者事，示卦自是筮人事，俱宜與《特性》同。經惟《特性》執示云筮人，餘俱不云，乃省文耳。」盛氏云：「注、疏謂書卦、執示皆筮人事，姜氏兆錫謂皆卦者事，俱未合。賈疏又云《士喪禮》卦者自畫自示主人，亦非也。詳彼文，亦是筮者執示，但不言寫卦耳。然既云執卦，則其寫於版固不待言也。」注「寫所得之卦」下，毛本有「也」字，嚴本、《集釋》俱無。《校勘記》云：「案：《特性》疏引亦無「也」字。」云「卒，已也」者，《爾雅·釋詁》文。注又以書卦爲筮人，非，辨見上。主人受眡，反之。反，還也。【疏】正義曰：嚴本作「眡」，或作「眡」，非。《說文》「眡，視兒也」，與「眡」別。「眡」，古文「視」。主人受眡，則既知其卦體，仍以卦與筮人，令占吉凶。注云「反，還也」者，反與返通，《說文》：「返，還也。」此注「還」字，與《聘禮》「還玉于館」之「還」音義同。筮人還，東面旅占，卒，進告吉。旅，衆也。還與其屬共占之。古文「旅」作「臚」也。【疏】正義曰：案：《特性禮》：「筮者還，東面，長占，卒，告于主人：『占曰吉。』」《士喪禮》：「東面旅占，卒，進告于命筮者與主人：『占之曰從。』」《少牢禮》：「乃退占，吉，則史贊筮，史兼執筮與卦，以告于主人：『占曰

從。」據此，則占時東面，諸篇皆然。《少牢》雖無文，亦東面可知。褚氏云：「上言『主人受眡，反之』，則筮者向西行，就有司西方之位，乃還其身東面。必言東面者，明與筮時異向。」案：進告吉者，告於主人也。○注「臚」下，毛本無「也」字，嚴本有。云「旅，衆也」者，《爾雅·釋詁》文。

云「還與其屬共占之」者，謂與其屬主三易者共占之也。高郵王文簡公《經義述聞》云：「旅，序也。旅占，謂占者三人，順其長幼之序以占也。《特牲饋食禮》云「長占」，注曰：「長占，以其年之長幼旅占之。」疏曰：「從長者爲始也。」是其明證。《鄉飲酒禮》「司正升相旅」，注曰：「旅，序也。」《燕禮》「士旅酌」，注曰：「旅，序也。」今案：以旅爲序，較勝衆義。占者，以《易》辭占其吉凶也。王氏士讓《儀禮訓解》云：「案：疏謂『夏殷以不變爲占』，《周易》以變者爲占」。然周之占法，原兼不變者。如六爻皆不變，則占本卦彖，內爲貞，外爲悔。孔成筮立衛元得屯，秦伐晉筮得蠱貞風悔山是也。其占變爻者，如晉文遇貞爲屯，悔爲豫，皆利建侯是也。賈說未的。」云「古文「旅」爲「臚」也」者，段氏云：「案：古「旅」、「臚」通用。《論語》「季氏旅於泰山」，《漢書》作「臚岱」是也。此鄭從今文，不從古文者，鄭釋旅

占爲衆占，故不用臚陳之義。《周禮·司儀》皆旅擯，鄭意此時陳擯而不傳辭，故易「旅」字爲「臚」字。臚，陳之也。皆各就其義之所近訓之。」若不吉，則筮遠日，如初儀。遠日，句之外。【疏】正義曰：吳氏《章句》云：「凡筮

吉事，先筮句內近日。不吉，則筮句外遠日。賈以《曲禮》句內外爲士與大夫之分，未的。」今案：此節經注俱與《特牲禮》同，此疏及彼疏解近日遠日俱多謬誤，辨見《特牲禮》。其解「如初儀」，亦未合。沈氏彤《儀禮小疏》云：「初儀，賈疏謂自筮於廟門以下至告吉，敖繼公斷自筮人執筮以下。案：此先云「筮遠日，如初儀」，然後云「徹筮席，宗人告事畢」，則不吉而弗筮遠日，事未畢也，筮席未徹也。故《特牲》亦序「宗人告事畢」於「筮遠日」之下，明「筮遠日」乃當日并筮也。若非并筮，則如《少牢》所謂「不吉，則及遠日，又筮日如初」者，必於「官戒，乃退」之下敘之矣。敖說是。」從叔祖繩軒先生諱匡憲。《讀經記》云：「如初儀，敖君善謂自筮人執筮以下，張稷若謂自進受命於主人以下，以駁賈說，是矣。然云「受命於主人」，則已知所筮，「宰自右贊命」，則已告所筮。豈此時筮遠日，又須受命贊命乎？恐敖、張說亦未盡。」今案：據此，則初儀當自「即席坐，西

面「以下至「告吉」也。徹筵席。徹，去也，斂也。【疏】

正義曰：張氏淳《儀禮識誤》云：「案：《釋文》寫注作「撤」，

注字必與經同，宜皆作「撤」，從《釋文》。」戴氏震校《識誤》

云：「案：《說文》無「撤」字。徹通、徹去，古皆用「徹」，

「撤」乃後代俗書。張氏不能訂正其非，轉改「徹」以從

「撤」，疎矣。」今案：唐石經、嚴本經注俱作「徹」。○徹筵

席，謂徹筵與席也。前陳之於西塾，今事畢則徹之。他篇

不言者，省文。注云「徹，去也，斂也」者，案：《曲禮》：

「客徹重席。」鄭注：「徹，去也。」徹之爲去，本屬常解，此復

言斂者，謂筵與席皆斂而藏之。《內則》曰：「斂枕席簟。」

是席亦云斂也。宗人告事畢。宗人，有司主禮者。

【疏】正義曰：宗人位在西方，進東北面告主人也。○注

「者」字下，毛本有「也」字，嚴、徐、《集釋》、敖氏俱無。一云

「宗人，有司主禮者」，《儀禮釋官》云：「宗人，私臣，掌禮及

宗廟。案：掌禮之官，天子謂之宗伯，諸侯以下通謂之宗

人。《周禮》有都宗人、家宗人。《左傳》「晉范文子反自鄆

陵，使其祝宗祈死」；「鄭公孫黑肱有疾，召室老、宗人立

段」；「魯叔孫昭子齊於其寢，使祝宗祈死」。《國語》「魯公

父文伯之母欲室文伯，饗其宗老」，韋注「宗，宗人主禮樂

者」；「楚屈到嗜芰，有疾，召其宗老而屬之」，韋注「宗老爲

宗人者」。據此，則大夫有宗人也。《周禮》都、家宗人，皆

王朝所置。諸侯大夫之宗人，或自使其家臣爲之。士雖

卑，亦當有家臣主禮事者，如大夫宗人之職。《樂記》曰「宗

祝辨乎宗廟之禮」，鄭注《文王世子》云「宗人掌禮及宗廟」

是也。」

右筵日

主人戒賓，賓禮辭，許。戒，警也，告也。賓，

主人之僚友。古者有吉事，則樂與賢者歡成之。有凶事，

則欲與賢者哀戚之。今將冠子，故就告僚友使來。禮辭，

一辭而許。再辭而許曰固辭。三辭曰終辭，不許也。【疏】

正義曰：敖氏云：「戒賓亦朝服。凡既筵而有事，如戒宿

之類，皆因筵服，無變也。此雖親相見，其辭則皆擯者傳

之。宿賓放此。」張氏爾岐云：「主人筵日訖，三日之前戒

賓，使來觀禮。戒賓者，主人親至賓大門外，賓西面，主人

東面戒之。其戒辭，對辭竝見後。」○注「則樂與賢者歡成

之」，嚴本及各本俱作「歡」，《集釋》作「勸」。盧氏文弼云：

「歡成正與下凶事哀戚相對，勸字無義。」今案：作「勸」非

也。「一辭而許」下，毛本有「也」字，嚴、徐、《集釋》俱

無。云「戒，警也，告也」者，案：戒之本義訓警。《說文》：「戒，警也。」此戒賓兼有告義，故鄭又言「告也」以足之。云「賓，主人之僚友」者，賈疏謂「同官爲僚，同志爲友」是也。然賓取賢德，當合戚黨僚友言之，鄭舉一以例其餘耳。云「古者有吉事，則樂與賢者歡成之」，冠昏之類是也；「有凶事，則欲與賢者哀戚之」，喪禮是也。云「禮辭，一辭而許」者，蔡氏德晉云：「賓許必禮辭，以致謙也。」云「再辭而許曰固辭。三辭曰終辭，不許也」者，《禮經釋例》云：「凡一辭而許曰禮辭，再辭而許曰固辭，三辭不許曰終辭。案：《士冠禮》：『主人戒賓。賓禮辭，許。』又冠禮畢請醴賓，《士昏禮》納采、問名之禮既畢請醴賓，賓皆禮辭。《鄉飲酒》請賓，《鄉射》戒賓，《燕》、《大射》命賓，《鄉飲酒》、《鄉射》安賓，賓皆禮辭。《鄉飲酒》、《鄉射》作相爲司正，司正皆禮辭。《聘禮》主國之君使卿郊勞，聘賓禮辭。郊勞畢，聘賓將僎勞者，勞者禮辭。聘享正禮已畢，未私覲之前，主國之君使擯者請禮賓，及私覲聘賓先以臣禮見，僎者辭出，請以客禮受，聘賓皆禮辭。介、衆介覲，先以臣禮見，擯者辭出，請以客禮受，介亦禮辭。聘禮既畢，聘賓請問卿，主國之君禮辭。主國之君使卿歸饗餼，賓朝服禮辭。禮畢將僎使者，使者禮辭。《士昏·記》不親迎，壻請覲，主

人對曰「不敢固辭」，是亦禮辭。皆所謂一辭而許者，是一辭而許曰禮辭也。又《士相見禮》：「某也願見，無由達，某子以命命某見。主人對曰：某子命某見，吾子有辱，請吾子之就家也，某將走見。賓對曰：某不足以辱命，請終賜見。主人對曰：某不敢爲儀，固請吾子之就家也，某將走見。賓對曰：某不敢爲儀，固以請。主人對曰：某也固辭，不得命，將走見。」疏以此爲固辭，則下文辭贊、^①辭還贊皆固辭。《燕禮》：「公與客燕，曰：寡君有不腆之酒，以請吾子之與寡君須臾焉，使某也以請。對曰：寡君，君之私也，君無所辱賜於使臣，臣敢辭。寡君固曰不腆，使某固以請。寡君，君之私也，君無所辱賜於使臣，臣敢固辭。寡君固曰不腆，使某固以請。某固辭不得命，敢不從。」是亦固辭。若下文致命，則禮辭矣。是再辭而許曰固辭也。又《士相見禮》：「士見于大夫，終辭其贊。若嘗爲臣者，則禮辭其贊。」注：「終辭其贊，以將不親荅也。禮辭，一辭其贊而許也。」是三辭不許曰終辭也。至於《鄉飲酒》、《鄉射》、《燕禮》、《大射儀》之辭降、辭洗，雖較禮辭爲殺，亦禮辭之

① 「下」，原作「上」，「贊」，原作「贊」，今並據《禮經釋例》改。

屬也。《聘禮》：「士介覲，以臣禮見，擯者辭，禮請受，賓固辭。」注：「賓爲之辭，士介賤，不敢以言通於主君。固，衍字，當如面大夫也。」敖氏繼公曰：「一辭而得遂，亦可謂之固。」又《聘禮·記》：「私獻，賓固辭。」注亦以固爲衍字。考經所云固辭者，蓋賓再辭而後公許，故曰固也。禮請受者，一請。賓固辭者，再辭。注未確，敖說亦曲爲之解也。又案：《士冠禮》疏：「三辭而許，則曰三辭。若三辭不許，則曰終辭。」引《公食大夫》：「戒賓，上介出請人告，三辭。」又引《司儀》三辭，以釋三辭而許之義。而注所謂三辭不許曰終辭者，賈氏但覆述而已，未嘗據經文以釋之也。考「終辭」二字，《士相見禮》經與注皆有明文，實可爲三辭不許曰終辭之顯證。賈氏不此之引，而旁及注外之義，何也？

主人再拜，賓荅拜。主人退，賓拜送。退，去也，歸也。【疏】正義曰：盧氏文弼《羣書拾補》云：「荅，諸本上從竹，譌。唐石經從艸，後竝同。」今案：嚴本亦作「荅」。賓許而主人再拜，謝其許也。賓拜送不言主人荅拜者，凡拜送之禮，送者拜，去者不荅拜。詳《鄉飲酒》「賓出奏陔，主人送于門外再拜」下。注云「退，去也，歸也」者，《鄉飲酒》「主人退」，注云：「退猶去也。」此復言歸者，《廣雅·釋詁》云：「退，歸也。」

右 戒 賓

前期三日，筮賓，如求日之儀。前期三日，空二日也。筮賓，筮其可使冠子者，賢者恒吉。《冠義》曰：「古者冠禮筮日、筮賓，所以敬冠事。敬冠事，所以重禮。重禮，所以爲國本。」【疏】正義曰：求日，筮日也。如求日之儀，如其「筮于廟門」以下至「告事畢」也，唯命筮之辭有異。張氏爾岐云：「前者戒賓汎及僚友，此又於僚友中專筮一人，使爲加冠之賓也。」疏云：「命筮之辭蓋云：主人某爲適子某加冠，筮某爲賓，庶幾從之。若庶子，則云庶子某。」愚意「主人」二字似未安，亦言其銜位可耳。今案：《特性》、《少牢》筮尸不筮賓者，祭所重者尸，賓直助祭而已，無庸筮也。○注「古者冠禮」，《校勘記》云：「者」，嚴、鍾本俱作「日」，誤。」今案：嚴本作「者」不誤，蓋作《校勘記》時未見原書，係據顧廣圻校錄於鍾本簡端者採入，故有此譌。茲則取黃氏重刻嚴本逐一校對，庶見真面目云。一云「前期三日，空二日也」者，期，冠期也。在冠期之前三日，是中空二日也。沈氏彤云：「注謂空二日者，爲期一日，宿賓、宿贊冠者又一日也。敖乃謂但空爲期之一日，

誤以宿賓、贊與筮賓同日耳。」云「筮賓，筮其可使冠子者，賢者恒吉」者，謂必擇其賢者，筮之乃吉也。王氏士讓云：「冠爲人道之始，賓必取人倫中有德望者。冠賓乃己之僚友，宜素知之，然不遽自決，又不宜品第其可否以謀於人，故決之鬼神。」今案：注引《冠義》者，證筮賓爲敬冠事也。

右 筮 賓

乃宿賓。賓如主人服，出門左，西面再拜。主人東面荅拜。宿，進也。宿者必先戒，戒不

必宿。其不宿者爲衆賓，或悉來或否。主人朝服。【疏】正

義曰：朱子云：「此云宿賓，言主人往而宿之，以目下事。」

如篇首言筮日於席門也。」今案：如主人服，賓亦重其事也。門左，門東，詳後。《禮經釋例》云：「凡門外之拜，皆

東西面。」故此賓西面再拜，主人東面荅拜也。詳孤子冠

「凡拜北面于阼階上」節。敖氏云：「西面再拜，拜其辱也。」注云「宿，進也」者，謂進之使來。《特牲》、《少牢》

注皆云：「宿讀爲肅。肅，進也。」本《爾雅·釋詁》。「宿」

爲古文「夙」，「宿」又通「速」，皆是豫召使來之義。云「宿者

必先戒，戒不必宿」者，案：上主人戒賓，所戒者廣，其冠子

之賓及贊冠者皆在戒內，故云「宿者必先戒」。其衆賓則但戒而不宿，故知戒者不必皆宿也。云「其不宿者爲衆賓，或悉來或否」者，朱子云：「鄭注本謂正賓或時不來，則將不得成禮，故雖已戒之而又宿之，欲其必來。其非正賓，則不更宿，蓋但使爲衆賓，雖不悉來，亦無闕事也。疏與音皆非是，爲只合作如字讀，賓字句絕。」今案：鄭意衆賓不宿者，

原不必其悉來，賈則謂衆賓容有不來者，故不宿，與鄭背矣。《釋文》音「爲衆賓」之「爲」，於僞反，則似合「或悉來或否」爲句，故朱子辨之。云「主人朝服」者，經不言主人何

服，明與前同服，故知朝服也。○《禮經釋例》云：「凡戒賓，宿賓，宿者必先戒，禮殺者則不宿。《鄉飲酒》：『主人戒賓，賓拜辱。』主人荅拜，乃請賓。」陳器之後，主人速賓，

賓拜辱，主人荅拜。注：「速，召也。」《鄉射禮》：「主人戒賓，賓出迎，再拜。主人荅再拜，乃請。」主人朝服，乃速

賓。注：「速，召也。」《士冠》、《鄉飲》皆先戒賓而後宿賓，

所謂宿者必先戒也。速即宿也，《特牲禮》「宿尸」，注：「凡

宿，或作速。」此其證也。惟《士冠》速賓於前日，《鄉飲》、《鄉射》速賓於當日，爲小異耳。疏謂《鄉飲》、《鄉射》皆有

①「目」，原作「日」，今據《續清經解》本改。

戒無宿，非也。若《燕禮》：「小臣戒與者。」《大射》：「君有命戒射，宰戒百官有事於射者，射人戒諸公卿大夫射，司士戒士射與贊者。前射三日，宰夫戒宰及司馬。」《公食大夫禮》：「使大夫戒。」方是有戒無宿也。又《大射》：「射人宿視滌」，疏以爲非戒宿之宿。《特性饋食禮》宿尸、宿賓之前皆無戒，疏以爲《特性》文不具，其實亦有戒。疏說皆是也。《少牢禮》：「筮日之後乃官戒。」又云：「宿。前宿一日，宿戒尸。」此戒尸也。筮尸之後，乃遂宿尸。此宿尸也。注云：「大夫尊，儀益多。筮日既戒諸官以齊戒矣，至祭前一日，又戒以進之，使知祭日當來。」疏云：「其大夫宿戒兩有，士有宿而無戒，是儀略，故云大夫儀多也。」則又謂《特性》有宿無戒，與《士冠》疏文互異矣。乃宿賓，賓許。主人再拜，賓荅拜。主人退，賓拜送。乃宿賓者，親相見，致其辭。【疏】正義曰：但云賓許，不云「禮辭」者，以前戒已許故也。注云「乃宿賓者，親相見，致其辭」者，張氏爾岐云：「重言乃宿賓者，上文言主人往行此禮，此乃親致宿之之辭也。辭並見後。」宿贊冠者一人，亦如之。贊冠者，佐賓爲冠事者，謂賓若他官之屬，中士若下士也。宿之以筮賓之明日。【疏】正義曰：「亦如

之」者，如上「宿賓，賓如主人服」以下。云「一人」，則其餘衆賓不宿可知。注云「贊冠者，佐賓爲冠事者」，即下文坐櫛、設纚、卒紘諸事，佐賓成禮者。朱子云：「佐賓雖輕，亦必擇其賢而習禮者爲之，不來則亦有闕，故竝宿之，使必來也。」云「謂賓若他官之屬，中士若下士也」者，《漢書·高帝紀》注：「若，及也。」此兩「若」字，俱當作「及」字解，謂賓之僚屬及他官之屬，皆可爲贊也。又言中士、下士者，鄭意以賓是上士，則其屬中士及下士皆可爲之，言此以見贊冠者當次於賓耳。云「宿之以筮賓之明日」者，案：上經云「前期三日筮賓」，下經云「厥明夕爲期」，則宿賓贊明在冠前二日，爲筮賓之明日矣。必言於此者，見宿賓與宿贊冠者同日也。

右宿賓宿贊冠者

厥明夕，爲期于廟門之外。主人立于門東，兄弟在其南，少退，西面北上。有司皆如宿服，立于西方，東面北上。厥，其也。宿服，朝服。【疏】正義曰：「厥明夕」者，謂宿賓、贊之明日夕，冠前一日之夕也。爲期，猶言約期也。必於廟門之外，

以冠在廟故也。不於廟內者，別於冠日行冠事時也。兄弟，兼親族、姻戚言。在其南，謂在主人之南，相次而立於下也。西面，面向西。東面，面向東。北上，以北爲上，統於席也。注云「厥，其也」者，《爾雅·釋言》文。云「宿服，朝服」者，謂如主人宿賓時所服之朝服也。此宿服指主人言，云有司皆如之，則主人之服可知矣。兄弟不言服，於下「畢袵玄」見之。擯者請期，宰告曰：「質明行事。」擯者，有司佐禮者。在主人曰擯，在客曰介。質，正也。宰告曰：「旦日正明行冠事。」【疏】正義曰：此云「請期」，謂請早晚之期，故宰告以質明行事也。宰告者，宰主贊命也。注云「擯者，有司佐禮者」，謂擯者即上有司之屬爲之也。《儀禮釋官》云：「案：敖氏以有司爲筮者、卦者、宰、宗人之類。是舉類言之，其實有司不盡此。據經：「擯者請期。」注云：「擯者，有司佐禮者。」又：「爵弁、皮弁、緇布冠各一簠，執以待于西牀南。」注云：「執之者有司。」則是冠時凡主人之吏有事者，皆得以有司目之也。」又云：「有司有二義：一是事有常職者謂之有司。一是事本無常職，行禮時特使人主其事者，①亦目爲有司。後凡言有司者放此。」云「在主人曰擯」者，擯，主人所使接賓者也。云「在客曰介」者，介，客所用以爲輔者也。《禮經釋例》

云：「所謂擯、介者，凡禮皆有之。《士冠禮》：「擯者請期。」又云：「擯者玄端，負東塾。」又：迎賓，擯者告。《士昏禮》：問名、禮賓，擯者出請事。《士昏·記》：「賓至，擯者請。」又：不親迎，婿見，擯者以摯出，請受。《燕禮》：「射人納賓。」注：「射人爲擯者也。今文曰擯者。」《大射儀》：「大射正擯，擯者請賓。」又：「擯者命賓」、「擯者反命」、「擯者納賓」。《公食大夫禮》：賓人，大夫納賓。注：「大夫，謂上擯也。」又：拜至，擯者辭。又：賓三飯，擯者退，負東塾而立。又：公以束帛侑賓，擯者進相幣。《公食大夫·記》：「卿擯由下。」此嘉禮之擯也。《士相見禮》：「士見于大夫，若嘗爲臣者，賓出，使擯者還其摯於門外。」又：賓對，擯者對。又：「始見於君，若他邦之人，則使擯者還其摯。《聘禮》：「卿爲上擯，大夫爲承擯，士爲紹擯。」又：賓問卿，下大夫擯。《聘禮·記》：「賓若私獻，擯者入告。《覲禮》：「嗇夫承命。」注：「嗇夫，蓋司空之屬也，爲末擯。」又：「擯者謁。」又：「擯者延之曰：升。」又：「享，擯者曰：予一人將受之。」又：禮畢，擯者謁諸天子。又：「諸侯覲于天子，四傳擯。」此賓禮之擯也。《既夕禮》：「公贈。」

①「者」，原脫，今據《儀禮釋官》補。

擯者出請，入告。」又：「賓賄者，將命。擯者出請，入告。」又：「賓奉幣。擯者先入。」又：賄畢，擯者出請。又：贈者將命，擯者出請。此凶禮之擯也。《有司徹》：「主人出迎尸，宗人擯。」注：「賓客尸而迎之，主人益尊，擯贊。」此吉禮之擯也。皆在主人曰擯也。《士冠禮》：冠畢，乃醴賓以壹獻之禮，贊冠者爲介。注：「介，賓之輔。飲酒之禮，賢者爲賓，其次爲介。」疏云：「此禮賓與饗禮同。」《鄉飲酒禮》：「主人就先生而謀賓、介。」注：「賢者爲賓，其次爲介。」《聘禮·記》：「大夫來使，無罪，饗之。其介爲介。」注：「饗賓有介者，尊賓，^①行敵禮也。」據此則饗禮亦有介。此嘉禮之介也。《聘禮》：受命遂行，上介及衆介俟于使者之門外。又：郊勞，上介出請，入告。又：聘，介皆入門左。又：上介覲，士介覲。又：歸饗餼，上介請事。又：賓問卿，上介特面，衆介面。又：還玉，上介出請。又：公館賓，賓辟，上介聽命。注：「聽命於席門中，西面，如相拜者然也。」《覲禮》：「上介皆奉其君之旂，置于宮。」此賓禮之介也。《有司徹》：「乃議侑于賓，以異姓。宗人戒侑。」賓尸之禮，尸如賓，侑如介。此吉禮之介也，皆在客曰介也。至於《聘禮》郊勞、歸饗餼，還玉之「上介出請」，即聘問禮之「擯者出請」也。公館賓之「上介聽命」，即覲面及私獻禮之

「擯者立於門中以相拜」也。此時皆賓爲主人，故上介所行，皆擯者之禮矣。《釋例》又云：「案：《士冠禮》疏云：『《聘禮》及《大行人》皆以在主人曰擯，在客稱介，亦曰相。』《司儀》每門止一相是也。」《士相見禮》：「請還贊于將命者。」注：「將猶傳也。傳命，謂擯相也。」疏云：「出接賓曰擯，入詔禮曰相，一也。故《聘禮》與《冠義》皆云每門止一相，是謂擯介爲相也。」考《聘禮》、《冠義》皆無每門止一相之文，唯《周官·司儀》有之，不知疏說何所本。又《鄉飲酒》、《鄉射》主人迎賓，皆云：「主人一相迎于門外。」注：「相，主人之吏。」《鄉射》注作：「主人家臣，擯贊傳命者。」皆指擯者曰相。唯《司儀》鄭注：「相謂主君擯者及賓之介。」故疏兼擯介而言之。云「質，正也」者，《小爾雅·廣言》文。又《周禮·大司馬》「質明」注同。云「宰告曰旦日正明行冠事」者，《說文》：「旦，明也。」旦日，謂明日也。《少牢禮》云「旦明行事」，注蓋本此。段氏云：「《說文·日部》『哲』字下曰：『昭晰，明也。』从日，折聲。《禮》曰：『晰明行事。』案：《說文》凡言《禮》，皆謂《儀禮》。是鄭本作「質」，許本作

①「尊賓」，《禮經釋例》同。段校據《儀禮·聘禮》鄭注乙作「賓尊」。

「晰」也。今案：字異義同。告兄弟及有司。擯者告

也。【疏】正義曰：李氏云：「兄弟有司在列，而猶告之者，審慎重其事。」^①注云「擯者告也」者，以下文云「擯者告

期於賓之家」，故知此亦擯者告也。告事畢。宗人告

也。【疏】正義曰：告事畢，告爲期之事畢，亦向主人告也。

注云「宗人告也」者，上經徹筵席時宗人告事畢，此亦宜

然。擯者告期于賓之家。【疏】正義曰：賓不在列，

故至其家告之也。言賓，則贊可知。敖氏云：「別言擯者，

事更端也。」

右爲期

夙興，設洗，直于東榮，南北以堂深。

水在洗東。夙，早也。興，起也。洗，承盥洗者棄水器

也。士用鐵。榮，屋翼也。周制，自卿大夫以下，其室爲夏

屋。水器，尊卑皆用金疊，及大小異。【疏】正義曰：冠至

期先陳設器服，次主人以下即位，次迎賓及贊冠者人，乃行

三加之禮。加冠畢，賓禮冠者，冠者見于母，賓字冠者。凡

九節而冠禮成，賓出矣。○注「及大小異」，「小」下，聶氏崇

義《三禮圖》有「皆」字，嚴本無。朱子云：「詳注文，及字恐

誤。《校勘記》云：「案：疏云『及其大小異』，蓋謂論其質

則尊卑皆用金疊，及論其形制之大小，則仍有異耳。」○直，

當也。經曰「直于東榮」，東西節也，故《鄉飲酒》曰「東西當

東榮」。沈氏彤云：「正堂之旁爲東堂、西堂，東堂、西堂之

旁爲夾道，夾道之旁爲都宮之牆。」^②則東榮正臨夾道，故

洗東有餘地可置水。而「當東榮」上加「東西」二字，亦非贅

文。萬氏《寢廟圖》屋兩旁無夾道，疎也。經又曰「南北以

堂深」，謂南北之節也。《釋文》：「深，申鳩反。凡度淺深

曰深。」《鄉飲酒》疏云：「堂深，謂從堂廉北至房室之壁。」^③

堂下洗北去堂遠近深淺，取於堂上深淺。假令堂深三丈，

洗亦去堂三丈，以此爲度。」沈氏云：「堂之深無明文。陳

氏《禮書》引《尚書大傳》曰：「士之堂廣三雉，三分其廣，以

二爲內。」注云：「雉長三丈。內，堂東西序之內也。」是堂

廣九丈，序內六丈，而堂之深亦未及焉。案：《考工記》

云：「周人明堂，度九尺之筵，東西九筵，南北七筵，五室，

凡室二筵。」疏引《書傳》云：「周人路寢南北七雉，東西九

①「其」，《儀禮集釋》作「冠」。

②「夾道」二字，原脫，今據《儀禮小疏》補。

③「室」，原作「屋」，今據《儀禮·鄉飲酒》賈疏改。

雉，室居二雉。』知周人度堂寢之深廣，皆以九與七差之也。然則堂廣九丈者，堂深宜七丈，室取二丈，室之外宜五丈。以序內堂廣六丈，九七差之，堂之深尚宜四丈六尺六寸有奇。《儀禮釋宮》云：『《士昏禮》疏云：碑在堂下，三分庭，一在北。《聘禮》注云：設碑，近如堂深。三分庭，一在北，設碑而碑如堂深，^①則庭蓋三堂之深也。』《聘禮》疏云：『碑東當洗』，則洗西亦當碑，而北去堂亦四丈六尺六寸有奇矣。今案：沈說推闡俱細。《禮經釋例》云：『凡庭洗設于阼階東南，南北以堂深。天子、諸侯當東霤，卿大夫、士當東榮。案：《士冠禮》：『設洗，直于東榮，南北以堂深。水在洗東。』《鄉飲酒》、《鄉射》：『設洗于阼階東南，南北以堂深，東西當東榮。水在洗東。』《特牲饋食》：『設洗于阼階東南。』記：『設洗，南北以堂深，東西當東榮。水在洗東。』《少牢饋食》：『設洗于阼階東南，當東榮。』《士冠禮》：『醢用酒。』注：『洗，庭洗。當東榮，南北以堂深。』此皆當東榮之洗，言庭洗者，別於北堂上內賓之洗。《士昏禮》：『設洗于阼階東南。』經注不言當東榮及南北之節者，文不具也。其實亦當東榮之洗，所謂卿大夫、士之禮也。《燕禮》：『設洗于阼階東南，當東霤。疊水在東。』注：『當東霤者，人君爲殿屋也，亦南北以堂深。』《大射儀》：『設洗于阼階東南，疊水在東。』《公食大夫》：『設洗如饗。』注：『必如饗者，先

饗後食，如其近者也。《饗禮》亡，《燕禮》則設洗于阼階東南。鄭氏以《燕禮》證之，是《公食大夫》之洗當亦在阼階東南也。此皆當東霤之洗，所謂天子、諸侯之禮也。卿大夫、士言當東榮，天子、諸侯言當東霤，其實設洗皆在阼階東南，異其文，不異其處也。又《士虞禮》庭洗則『設于西階西南，水在洗西，篚在東』者，反吉也。今案：《士冠禮》設洗不言阼階東南者，省文也。《鄉飲酒義》云：『洗之在阼，其水在洗東，祖天地之左海也。』此洗與水設於東方之義也。《少牢》云『有料』者，據鄭注『凡設水必用疊，沃盥必用料』，此不言者，文不具也。吉禮水在洗東，篚在洗西。凶禮反吉，則水在西，篚在東。此不言篚者，以冠禮醴醴俱在房，不洗爵於此，故無篚也。《大射》獻獲者，則設洗於獲者之尊西北。《士虞》卒哭餞尸，則設洗在席門外尊東南者，異於常禮也。又有內洗，設于北堂，亦名北洗，詳《士昏禮》。注云『夙，早也』者，《爾雅·釋詁》文。『興，起也』者，《釋言》文。云『洗，承盥洗者棄水器也』者，古者盥手、洗爵，皆一人挹水，從上沃之，故曰沃盥，又曰沃洗。其盥洗時下注之水，謂之棄水，別有器承之，使不溢地，其器名曰洗也。

① 下「碑」字，原作「俾」，今據《儀禮小疏》改。

云「土用鐵」者，賈疏云：「案：《漢禮器制度》洗，土用鐵，大夫用銅，諸侯用白銀，天子用黃金也。」《三禮圖》引舊圖云：「洗高三尺，口徑一尺五寸，足徑三尺，中身小，疏中，士以鐵爲之，大夫以上銅爲之，諸侯白金飾，天子黃金飾。」據此則天子、諸侯之洗亦銅爲之，但有飾爲異耳。云「榮，屋翼也」者，《詩·斯干》「如鳥斯革」，《毛傳》「革，翼也」。榮在屋兩頭，如鳥之張其兩翼，故謂榮爲屋翼。沈氏云：「賈謂即今之搏風。朱子《厦屋說》云：『橫棟盡外，有版下垂，謂之搏風。』榮翼乃接簷之名，賈直指搏風，誤。」又《釋宮》云：「《說文》曰：尾栢之兩頭起者爲榮。又曰：屋榜聯，齊謂之檐，楚謂之栢。然則栢即檐，而檐之東西起者乃曰榮耳。」案：二說，《釋宮》爲得其實。謂檐爲榮，乃本郭璞注《上林賦》所云「南榮，屋南檐」者。以《說文》核之，郭亦誤也。又《士喪禮》云「升自前東榮，降自後西榮」，前者南，後者北，由南北而言，則曰東榮、西榮。由東西而言，則曰前榮、後榮。故《喪大記》之西北榮，與《士喪禮》之後西榮，一也。今案：沈說蓋以《說文》爲據。云「周制，自卿大夫以下，其室爲夏屋」者，李氏云：「周制：天子、諸侯爲殷人四阿之屋，東西南北皆有雷。大夫以下爲夏后氏南北兩下之屋，無東西雷，而有東西榮。」案：《檀弓》曰：「見若覆

夏屋者矣。」鄭注：「夏屋，今之門廡。」蓋漢時門廡亦兩下爲之，故舉以爲證。此經不言東雷，而言東榮，據大夫、士宮室之制也。云「水器，尊卑皆用金疊，及大小異」者，經但言水，不言盛水之器，故注特明之。敖氏因《士冠》諸篇不言疊，謂士之水器異於此。褚氏辨之云：「士苟用他器，則諸篇必一見以明其異，而俱不言，則用疊同也。」案：經傳多以疊爲盛酒器。《說文》：「櫺，龜目酒尊，刻木作雲雷象，象施不窮也。從木，從囀。」又云：「疊，櫺或從缶。疊，櫺或從皿。」段氏玉裁《說文注》云：「蓋始以木，後以匋。」或曰疊亦木器或瓦器，而飾以金耳。段氏又云：「《爾雅》：『彝、卣、疊，器也。小疊謂之坎。』然則疊有大小。《燕禮》：『疊水在東。』則疊亦以盛水。」今案：《韓詩說》云：「天子疊以玉，諸侯、大夫以金，士以梓。」存以備考。凡設洗必設水，諸篇或言水在洗東，或言疊水在東，或言水在洗西。《大射》獻獲者，云「水在洗北」，是有洗必有水也。惟《士昏禮》設洗不言水，則文不具耳。陳服于房中

西墉下，東領，北上。墉，牆。【疏】正義曰：陳服，陳將冠者之衣服，即下爵弁服、皮弁服、玄端三服也。房中，東房中也。大夫、士寢廟之制，室在中，有東房，有西房，與諸侯同。注疏謂大夫、士有東房無西房，其說非也，

辨見後。江氏永《鄉黨圖考》云：「大夫、士陳器服，及婦人行禮，常在東房。經有直言房者，省文耳，非謂止有一房，不必言東也。」方氏苞云：「贊者立於房中，負東墻。將冠者房中，南面，當戶，近於西。故服陳西墻下，取之便也。凡著衣必繫其領，故東領，亦取之便也。」今案：東房之西墻，即室之東墻也。「北上」者，爵弁服在北，皮弁服次南，玄端最南。冠時先用卑服，自南而北，亦取之便也。○注「牆」下，《集釋》有「也」字，嚴本無。云「墻，牆者，牆是總名。以經文考之，凡室中、房中與夾之牆則謂之墻，堂上之牆則謂之序，堂下之牆則謂之壁，其實一也。爵弁服：纁裳，純衣，緇帶，韎韐。此與君祭之服。

《雜記》曰：「士弁而祭於公。」爵弁者，冕之次，其色赤而微黑，如爵頭然，或謂之緇。其布三十升。纁裳，淺絳裳。凡染絳，一入謂之緇，再入謂之赭，三人謂之纁，朱則四人與？純衣，絲衣也。餘衣皆用布，唯冕與爵弁服用絲耳。先裳後衣者，欲令下近緇，明衣與帶同色。韎韐，緇韐也。士緇韐而幽衡，合韋爲之。士染以茅蒐，因以名焉。今齊人名蒨爲韎。韐、韐之制似韠。冠弁者不與衣陳，而言於上，以冠名服耳。今文「纁」皆作「熏」。【疏】正義曰：爵弁爲士服之最尊者，三加時服之。禮之通例，衣與冠同色，帶

與衣同色，裳與韠同色，屨與裳同色。注每言之，然不盡然。《禮經釋例》云：「亦有衣與冠不同色者，如《士冠禮》爵弁服純衣緇帶，純衣與帶同緇色是也。亦有裳與韠不同色者，如注既以朝服爲素裳，而《特性饋食·記》之朝服則緇韠是也。亦有屨與裳不同色者，玄端用黑屨，而裳則有玄裳、黃裳、雜裳之異是也。注疏蓋舉其多者言之耳，故疏亦云其衣冠異色，經即別言之。」今案：韎韐，即韎色之韠，詳下。此陳爵弁服，言衣言帶，言韠言裳，不言屨者，下經云「爵弁纁屨」是也。或謂爵弁即韋弁，誤，詳《聘禮》「君使卿韋弁歸饗餼」下。○注「此與君祭之服」，「與」，《通典》作「助」，嚴本及各本作「與」。《校勘記》云：「案：作『與』當讀去聲，而《釋文》無音，疑作『助』是也。」今案：《集釋》作「與」，音預，宜從嚴本。又「再入謂之赭」，入，《釋文》作「染」，下二字同，嚴本俱作「入」。張氏《識誤》云：「《爾雅》有再染、三染之文，此鄭氏用『染』字之據也。」《校勘記》云：「鄭氏既據《爾雅》，何以一人不稱染？不若依今本概作『入』字爲是。」又「今齊人名蒨爲韎韐」，戴氏震校《集釋》，謂「韐」衍文，非也。宜從戴氏。《六書故》，以「韐」字屬下句讀。段氏云：「韎，《說文》从韋末聲，《五經文字》亦作韎，音末。今人從未，誤也。」云「此與君祭之服」者，

與君祭，即謂助祭於公也。云「《雜記》曰士弁而祭於公」者，鄭注「弁，爵弁也」，此引以證爵弁爲助祭服也。云「爵弁者，冕之次」者，賈疏云：「凡冕以木爲體，長尺六寸，廣八寸，績麻三十升布衣之，上以玄，下以纁，前後有旒。其爵弁制大同，唯無旒，又爲爵色爲異。又名冕者，俛也，低前一寸二分，故得冕稱。其爵弁則前後平，故不得冕名。以其尊卑次於冕，故云「爵弁，冕之次」也。」吳氏《疑義》云：「據《說文》，弁本作「兗」，象形，或作「弁」。又《釋名》：「弁如兩手相合也。」爵弁與冕制異，與皮弁之制同。」今案：據《周禮》、《左傳》疏，賈氏之說蓋本《漢禮器制度》。吳氏以《說文》、《釋名》駁之，似亦可從。江氏永云：「案：《大戴禮》及東方朔《荅客難》皆云「冕而前旒，所以蔽明」，則無後旒可知。謂前後皆有旒，此因《玉藻》「前後邃延」而誤耳。前後邃延，謂板長尺六寸，自延端至武，前後皆深邃，非謂後亦有旒也。」其說是矣。云「其色赤而微黑，如爵頭然，或謂之緇」者，案：《考工記·鍾氏》注云：「染纁者，三人而成。又再染以黑，則爲緇。緇，今《禮》俗文作「爵」，言如爵頭色也。」是也。云「其布三十升」者，《論語》「麻冕」，孔注：「績麻三十升布以爲之。」鄭意爵弁與冕同，故云「其布三十升」也。江氏永辨之云：「三十升之說非是。」

古布幅闊二尺二寸，當今尺一尺三寸七分半。若容三十升之纁二千四百，則今尺一分之地幾容一十八纁，此必不能爲者也。孔意蓋謂古者朝服十五升，冠當倍於衣。不知冠升倍衣，唯喪服斬衰三升冠六升則然，自齊衰以下則非倍半之數矣。禮無冠倍於衣之例，孔誤釋耳。麻冕之布，亦不過十五升。如今尺之一分容九纁，已是細密難成矣。云「纁裳，淺絳裳」者，絳是大赤，纁則赤而有黃，故云「淺絳裳」也。云「凡染絳，一人謂之縗，再人謂之頰，三人謂之纁，朱則四人與」者，案：一人，再人，三人，《爾雅》「人」俱作「染」，是皆爲染絳法也。沈氏彤云：「縗，淺頰。頰，淺纁。」是三者皆由淺入深。若更以纁入赤，則爲朱。《詩·七月》「我朱孔陽」，《毛傳》「朱，深纁」是也。但縗、頰、纁之爲一人，再人，三人，經有明文，朱則四人無明文，故言「與」以疑之。凡冕服皆玄上纁下，爵弁爲冕之次，故亦纁裳也。云「純衣，絲衣也。餘衣皆用布，唯冕與爵弁服用絲耳」者，《詩·周頌》「絲衣其紃，載弁俅俅」，弁，爵弁也。則爵弁服用之絲衣可知矣。此經及《士昏禮》「純衣」，鄭皆以絲衣解之。《周禮·媒氏》之「純帛」，《論語》之「今也純」，鄭皆讀爲緇，又謂古緇以才爲聲，字亦作紃。不同者，一言其質，一言其色也。《經義述聞》云：「純當讀黝。《廣雅》：「黝，

黑也。」黼與純聲義相近，是亦主色言之。」餘衣，謂皮弁服以下及深衣之類，皆用布也。云「先裳後衣者，欲令下近緇，明衣與帶同色」者，言衣當在裳先，此退在裳後者，欲令與緇帶連文，見衣與帶同緇色，非尊裳而抑衣也。褚氏云：「敖乃有纁裳與冕服之裳同而尊之之論，豈爵弁之衣卑於裳邪？」褚說是矣。云「黼黻，緇黻也。士緇黻而幽衡，合章爲之。士染以茅蒐，因以名焉。今齊人名蒨爲黼。黻、韍之制似鞞」者，案：此韍也而名黼黻者，黼言其色，黻言其質。鄭此注云：「黼黻，緇黻也。」《玉藻》注云：「緇，赤黃之間色，所謂黼也。」是鄭以此經黼與《玉藻》緇同爲赤黃色名。《說文》：「黼，茅蒐染韋也，一入曰黼。」《爾雅》：「一染謂之緇。」《說文》：「緇，帛赤黃色。」黼與緇皆一入，爲赤黃色，而染韋則曰黼，染帛則曰緇，因事異名也。《爾雅》：「再染謂之緇，三染謂之纁。」黼一入淺於纁，爵弁服纁裳而黼黻，故《說文》云：「士無市有鞞，制如楯，缺四角。爵弁服其色黼，賤不得與裳同。」是也。市即鞞字，鞞即鞞字，鄭云「合章爲之。士染以茅蒐，因以名焉」者，「合章爲之」解鞞字，「染以茅蒐，因以名焉」解黼字。謂此鞞合章爲體，而染以茅蒐，其色赤黃，因名黼也。又云「今齊人名蒨爲黼」者，蒨是茅蒐之別名，謂染黼用茅蒐，後人因謂茅蒐

爲黼，假今通古，見黼之名義取於蒨也。然鄭意固以黼名取於蒨，非以黼黻名取於蒨，蒨得名黼，不得名黼黻。賈此疏出注云「韍之制似鞞」，孔穎達《詩·瞻彼洛矣》疏引此注云「今齊人名蒨爲黼黻」，皆誤甚。鞞字義取合章，大夫以上亦用韋爲之，而不名鞞者，據大夫以上有山火龍章之飾，謂之鞞。士無飾，則但謂之鞞，本其質而言之。賈疏謂「士無飾，不得單名鞞，一名黼黻，一名緇黻」是也。鄭云「鞞之制似鞞」者，黼黻雖不得單名鞞，得單名鞞。《士喪禮》「設鞞帶」，注云「鞞帶，黼黻、緇帶」，是其證。又鞞與鞞對，黼是色名，不得兼黼言似，故單云鞞。文連鞞言者，因上引緇黻而及之，謂鞞與鞞其制均似鞞也。必云「制似鞞」者，鞞、鞞形象經傳無文，鞞之制具於《玉藻》、《雜記》，故鄭假以名焉。或疑蒨不得名黼黻，遂謂「鞞」字爲衍文，亦非。鞞與鞞微異，經固云「鞞」，不云「鞞」，鄭不當單云「鞞之制似鞞」。戴侗《六書故》「黼」字下引「鄭氏曰：齊人謂蒨爲黼」，又「鞞」字下引「鄭康成曰：鞞鞞之制似鞞」，以「鞞」字屬下爲句，得其讀矣，今依彼正之。又《詩》「黼黻有奕」，今本《毛傳》：「黼黻者，茅蒐染草也。一曰黼。鞞，所以代鞞也。」鄭箋：「黼黻者，茅蒐染也。茅蒐，黼黻聲也。黼黻，祭服之鞞，合章爲之，其服爵弁服紵衣纁裳也。」今案：傳

「草」字疑「韋」之誤，韎旁從韋，是以茅蒐染韋之名，非直染草。《說文》云：「韎，茅蒐染韋也。」當依彼作「韋」。孔氏《正義》引「定本云一人曰韎韐」，「一下當依定本有「入」字，但以「韎」爲句。《說文》云「一人曰韎」，《左傳疏》引「賈逵云：一染曰韎」，《國語注》引三君云同。一染即一人，一人曰韎，蓋漢儒相傳之舊詁。此二句傳釋「韎」字，下云「韐，所以代韎也」，釋「韐」字。孔疏「韎韐」連讀，亦誤。箋云「韎韐者，茅蒐染也。茅蒐，韎韐聲也」者，謂此韎韐以茅蒐染之，故云韎，茅蒐聲近韎也。「聲」上「韐」字爲衍文，《左傳疏》及《國語注》引皆云「韎聲也」，無「韐」字。茅蒐韎聲，韋昭所謂「急疾呼茅蒐成韎」是也。前人訓韎者多舉其義，至鄭始兼著其聲，以爲義由聲出，與此注「士染以茅蒐，因以名焉。今齊人名蒨爲韎」者同，皆單釋「韎」字。下云「韎韐，祭服之韐，合韋爲之」，始訓「韐」字。疏連韐言聲者，皆誤衍。云「冠弁者不與衣陳，而言於上，以冠名服耳」者，陳服在房中，而緇布冠及皮弁、爵弁之等，皆人執之，在堂下，是不與衣同陳也。今加爵弁於服上者，是以爵弁名其服，非謂冠弁亦陳於房內也。云「今文「纁」皆作「熏」」者，段氏云：「此同音假借字。《鄉射禮》「大夫與士射，袒薰襦」，則從今文也，轉寫加艸頭耳。凡所從古今文有彼此

互異者，以可參觀而得也。」胡氏云：「《士昏禮》「玄纁束帛」，注同。案：云「皆」者，蓋合下文「纁邊」，《士昏禮》則合下文「纁裳」、「纁衽」等言之與？《禮經釋例》云：「凡士冠三加，士昏親迎，士復、士襲，皆用爵弁服。」案：士而用爵弁服，攝盛也。士復者，即《士喪禮》「復者一人，以爵弁服，簪裳於衣」是也。士襲者，即《士喪禮》「陳襲服」爵弁純衣」是也。① **皮弁服：素積，緇帶，素鞞。**此與君視朔之服也。皮弁者，以白鹿皮爲冠，象上古也。積猶辟也，以素爲裳，辟蹙其要中。皮弁之衣用布亦十五升，其色象焉。【疏】正義曰：皮弁卑於爵弁，陳之在爵弁服南，再加時所服也。皮弁服不言衣者，衣與冠同色，略之也。言素積、素鞞者，見裳與鞞同色也。亦言緇帶者，士止有一緇帶，故爵弁、皮弁、玄端三服皆陳之。不言屨者，下經云「素積白屨」是也。注云「此與君視朔之服也」者，張氏爾岐云：「此視朔時君臣同服之服。」吳氏《章句》云：「注謂視朔之服，其實他禮亦用之。」今案：皮弁服亦用之於聘，詳《聘禮》。亦用之於蜡，《郊特牲》曰「蜡者，索也。歲十二月，合聚萬物而索饗之也」，又曰「皮弁素服而祭」是也。云

① 「弁」下，《儀禮·士喪禮》有「服」字。

「皮弁者，以白鹿皮爲冠，象上古也」者，《禮運》曰：「昔者先王未有麻絲，衣其羽皮。」鄭注：「此上古之時也。」案：後王易之以麻絲，而皮弁猶用皮爲之，如上古時。李氏云「古者以鳥獸之皮，冒而句領，皮弁象之」是也。必以白鹿皮者，取其與衣色相稱也。聶氏云：「舊圖云以鹿皮淺毛者爲之，高尺二寸。《周禮》王及諸侯、孤、卿、大夫之皮弁，會有五采，三采，二采，玉璫象抵，唯不言士之皮弁有此等之飾。」案：《弁師》注云「一命之大夫及士，韋弁，皮弁之會無結飾」是也。云「積猶辟也」。以素爲裳，辟蹙其要中者，案：辟即《喪服》注所謂「辟兩側，空中央也」。此之謂辟積，祭服、朝服辟積無數，唯喪服三辟積也。輔氏廣云：「禮服取其方正，故裳用正幅。而人身之要爲小，故於要之兩旁爲辟積，即今衣摺也。」賈疏云：「素有三義：若以衣裳言素者，謂白繒，即此文之等是也。畫繪言素者，謂白色，即《論語》云「繪事後素」之等是也。器物無飾亦曰素，則《檀弓》云「奠以素器」之等是也。」今竝存其說。云「皮弁之衣用布亦十五升，其色象焉」者，《雜記》曰「朝服十五升」，此皮弁衣雖無文，亦與朝服同可知，故云「亦」也。皮弁色白，衣亦色白，是象之也。鄭注《士喪禮》「皮弁服」，亦云「白布衣」。敖氏謂皮弁服用絲衣，與鄭異。吳氏紱、江

氏筠、褚氏寅亮皆以爲可從。《禮經釋例》云：「考《聘禮》：『公側授宰玉。』楊，降立。」注：《論語》曰：「素衣麕裘。皮弁時或素衣，其裘同可知也。」《郊特牲》：「皮弁素服。」注亦云：「衣裳皆素。」則鄭氏已不能自守其前說。

《雜記》：「子羔之襲也，素端一，皮弁一。」是皮弁與素端爲二服。孔氏正義曰：「盧云布上素下皮弁服，賀瑒云以素爲衣裳也。」然則衣裳皆素者，或素端歟？《周禮·司服》其齊服有玄端、素端，亦別於皮弁而言之也。今案：據盧云布上素下，則皮弁用布衣，其說有自來矣，當以鄭注爲正。《釋例》又云：「凡《士冠禮》再加，《聘禮》行聘、還玉、賓受饗餼，《覲禮》郊勞，《士喪禮》襲，《既夕禮》乘車所載，^①皆用皮弁服。」今案：此皆見於經而可考者也。至於《聘禮》受饗餼，「明日，賓拜於朝，拜饗與餼，皆再拜稽首」，注「此拜亦皮弁服」。案：此經無明文，注意蓋以受時皮弁，則拜亦皮弁，是拜饗與餼，據注亦用皮弁服也。玄端：玄裳、黃裳、雜裳可也，緇帶，爵韞。此莫夕於朝之服。玄端，即朝服之衣，易其裳耳。上士玄裳，中

①「禮」，《禮經釋例》同，段校改作「記」。

士黃裳，下士雜裳。雜裳者，前玄後黃。《易》曰：「夫玄黃者，天地之雜色，天玄而地黃。」士皆爵韋爲鞞，其鞞同。不以玄冠名服者，是爲緇布冠陳之。《玉藻》曰：「鞞，君朱，大夫素，士爵韋。」疏正義曰：玄端又卑於皮弁，陳之在皮弁服南，初加時所服也。玄端即玄衣，端者，取其正也。金氏榜云：「衣以端名者有二：其一，後鄭云「衣袂二尺二寸而屬幅，是廣袂等也，其袂尺二寸」，是謂玄端，對朝服以上侈袂者得名，乃次於朝服之服。其一，鄭仲師云「衣有襦裳者爲端」，對深衣以下連裳削幅者得名，乃冕、弁服、朝服、玄端通稱。」今案：《樂記》言「端冕」，則冕亦稱端。《左傳》言「端委」，《論語》言「端章甫」，則朝服、玄端皆可稱端。但此經所陳，則次於朝之服也。玄裳、黃裳、雜裳三等裳以配玄端，乃士服。《特性饋食·記》云：「玄端，玄裳、黃裳、雜裳可也，皆爵鞞。」與此同。李云：「可也者，三等士惟其所宜服者陳之。裳雖有三，而同用爵鞞，爵亦雜色也。帶有二，大帶以束衣，革帶以繫鞞、繫佩。舉鞞，則有革帶可知。」今案：玄端不言冠者，平時玄冠，始冠則服緇布冠也。不言屨者，下經云「玄端黑屨」，三等裳皆用黑屨者，以玄裳爲正也。《禮經釋例》云：「朝服」，注「素裳」。《鄉飲酒·記》：「鄉朝服而謀賓介。」注：「朝服，素鞞，白屨。」《燕

禮·記》：「燕，朝服於寢。」注同。「然則玄冠，玄端，玄裳、黃裳、雜裳，緇帶，爵鞞，黑屨者，玄端服也。玄冠，玄衣，緇帶，素裳，素鞞，白屨者，朝服也。此玄端與朝服之分也。○注「天地之雜色」，毛本「色」作「也」，嚴、徐本俱作「色」。《識誤》云：「鄭氏正引《易》文，不必改「也」爲「色」。「也」字近「色」，傳寫者誤耳。」《校勘記》云：「案：漢時六經異文甚多，張說未確。」今案：黃氏丕烈亦以嚴本爲不誤。

云「此莫夕於朝之服」者，吳氏《疑義》云：「據賈疏引《左傳》昭十二年「子革夕」，哀十四年「子我夕」，本非常禮，《左傳》亦無夕時玄端明文。據《玉藻》「朝玄端，夕深衣」，則玄端爲大夫、士私朝之服也。」今案：玄端所用甚廣，詳下。云「玄端，即朝服之衣，易其裳耳」者，玄端、朝服皆用緇布衣，其裳則朝服用素裳，玄端用玄裳、黃裳、雜裳，是易其裳也。然朝服用素鞞白屨，玄端用爵鞞黑屨，則鞞與屨亦易矣。云「上士玄裳，中士黃裳，下士雜裳」者，《特性·記》注同。蓋以士有上中下三等，故制三等裳以別之。玄尊於黃，而黃爲純色，又尊於雜也。此乃士之正服，若大夫以上則有異。大夫玄端用素裳，天子、諸侯用朱裳也。云「雜裳者，前玄而後黃」。《易》曰：「夫玄黃者，天地之雜色，天玄而地黃」者，鄭以言雜，必非一色，故知前玄後黃，而引《易》爲

證也。褚氏云：「天玄而地黃，陽前而陰後，故玄必在前，黃必在後。玄之幅必三，黃之幅必四，不可易也。敖氏乃謂雜裳亦可前黃後玄，謬甚。」云「士皆爵韋爲鞞，其爵同」者，朱子云：「其爵同」三字未詳。」盛氏云：「案：注云「其爵同」者，謂公侯伯之士皆一命，子男之士皆不命也。士雖有上中下三等，而其爵則同，故皆以爵韋爲鞞。」云「不以玄冠名服者，是爲緇布冠陳之」者，此服冠時以配緇布冠，則陳於皮弁服之南者，乃爲緇布冠陳之，不得名玄冠服矣。故空其文，而但云玄端也。江氏永云：「朝服、玄端及深衣皆用玄冠，雖不爲緇布冠陳，亦不可以玄冠名服。」云「玉藻」曰：「鞞，君朱，大夫素，士爵韋」者，此皆爲玄端服之鞞，鄭引以證經之爵鞞也。詳前「主人玄冠朝服，緇帶素鞞」下。《禮經釋例》云：「凡士冠禮、賓、主人、兄弟、摯者、贊者，及冠者初加，見君與卿大夫、鄉先生，皆用玄端。士昏禮，使者、主人、壻從者，皆用玄端。鄉飲酒、鄉射之禮，息司正，皆用玄端。士祭禮，筮日、筮尸、宿尸、宿賓、視濯、視殺、正祭尸、主人、祝、佐食，皆用玄端。」今案：此皆見於經而可考者也。玄端有用緇裳者，《昏禮》「納采，使者玄端至」，注云「有司緇裳」，賈疏以緇裳即玄裳也。玄端有用緇鞞者，見《冠禮》「兄弟畢袵玄」注。蓋玄端而緇鞞，則謂之

袵玄也。又朝服亦有用緇鞞者，詳《特性·記》。《釋例》又云：「凡士冠禮，筮日、筮賓、宿賓、爲期，皆用朝服。飲、射、燕、食之禮，皆用朝服。聘禮，本國君授使者幣，使者受命及釋幣于襡、肆儀，聘畢使者歸反命，賓至所聘之國展幣、辭饗餼、問卿，上介問下大夫，士介受餼，主國之君使卿郊勞，宰夫設飧，致士介餼，卿接聘賓，君不親食使大夫致侑幣，皆用朝服。士正祭，賓及兄弟助祭者，皆用朝服。大夫祭禮，皆用朝服。」案：此亦皆見於經而可考者也。至《既夕·記》云「復者朝服」，又云「道車載朝服」，則亦士禮用朝服者，今備錄之。○《禮經釋例》云：「《論語》公西華曰：「端章甫，願爲小相焉。」端即玄端，小相即末摯也，皆指士而言。蓋思以其所學仕於列邦，但願服土服，爲諸侯之末摯，以相禮而已。此謙辭也，乃或者誤會下文「宗廟會同，非諸侯而何」，遂謂公西氏欲得國爲諸侯。不知會同之禮，諸侯當服裋冕，豈有玄端章甫以見天子者乎？明代時文家之不學，可笑如此。」《釋例》又云：「案：弁服吉者凡三等，《士冠禮》陳冠服，爵弁服一也，皮弁服二也，玄端三也。玄端即朝服之異其裳者，故言玄端，即兼朝服也。《士喪禮》陳襲服，爵弁服一也，皮弁服二也，祿衣三也。賈云：祿衣則玄端，又連衣裳。是祿衣即玄端也。又《周

官·司服』凡兵事，韋弁服」，一也。蓋韋弁稍次於爵弁，或衣裳小異，猶玄端之於朝服。故言韋弁，即兼爵弁也。又云「眡朝，則皮弁服」，二也。又云「凡甸，冠弁服」，三也。鄭氏注：「冠弁，委貌。其服緇布衣，亦積素以爲裳，諸侯以爲視朝之服。」是冠弁即朝服也。言朝服，則兼玄端矣。」今案：爵弁、韋弁爲二服，辨見前。緇布冠缺項，青

組纓屬于缺。緇纓，廣終幅，長六尺。皮弁筭，爵弁筭。緇組紃，纁邊。同篋。缺，讀如

「有頰者弁」之「頰」。緇布冠無筭者，著頰圍髮際，結項中，隅爲四綴，以固冠也。項中有緇，亦由固頰爲之耳。今未冠筭者著卷幘，頰象之所生也。滕，^①薛名國爲頰。屬猶著。纁，今之幘梁也。終，充也。纁一幅，長六尺，足以韜髮而結之矣。筭，今之簪。有筭者，屈組爲紃，垂爲飾。無筭者，纁而結其條。纁邊，組側赤也。同篋，謂此上凡六物。隋方曰篋。【疏】正義曰：張氏爾岐云：「此所陳者，飾冠之物，非謂冠也。」此說是。下文云「爵弁、皮弁、緇布冠各一匱」，則冠弁各用匱盛之，不在篋矣，詳下。敖氏云：「經言纁於缺項、二筭之間，以見三加同一纁也。」案：下再加之時，云「正纁如初」，則不易纁矣。缺項、纁、纁、

筭、紃同篋貯之者，待冠時隨各冠取用也。○注「結項中」，

賈疏無「中」字。「屬猶著」，「著」下，《通典》有「也」字。「今

之幘梁也」，《集釋》無「也」字。今俱從嚴本。「足以韜髮」，

韜，《釋文》作「攷」。《識誤》云：「《士昏禮》注之「緇髮」，

《釋文》亦云「本又作攷」，不爲「攷」則爲「緇」。今之爲韜，

未知孰據。《校勘記》云：「案：《說文》：「韜，劍衣也。攷，

弓衣也。」二字音義相近，故古多通用。如《六韜》一作《六

攷》是也。攷本訓滑，因攷而轉爲攷，從省也。緇則韜之俗

字。」今案：《集釋》作「韜」，與嚴本同，不誤。「謂此上凡六

物」，嚴本、徐本、《通典》、《集釋》俱如是，《通解》、《要義》、

毛本「此」下俱有「以」字。《釋文》摘「以上」二字爲音，張氏

《識誤》遂改「此」爲「以」，豈「此」、「以」二字不宜並存歟？

黃氏謂嚴本不誤，今從之。云「缺讀如「有頰者弁」之頰」

者，段氏云：「《毛詩》「有頰者弁」，傳云：「頰，弁貌。」鄭注

《禮》時未箋《毛詩》，云「著頰圍髮際」，云「頰象生於卷幘」，

則頰是一物，非爲弁貌。蓋注《禮》多用三家《詩》，三家

《詩》或釋頰爲篋也。」云「緇布冠無筭者，著頰圍髮際，結項

中，隅爲四綴，以固冠也」者，皮弁、爵弁有筭，而緇布冠無

① 「滕」，原作「滕」，今據《續清經解》本改。

筭，故於冠武下別制頰，圍髮際，結於項中，謂之缺項。缺與頰同，其上四隅綴於武，以固冠也。缺項唯緇布冠有之，玄冠則不用，而纓屬於武矣。是以《內則》不言缺項，然則缺項自別爲一物。若如後儒解項爲冠項，讀缺爲如字，謂當冠項之處有不合者，故名缺項，則缺項即指冠言之，下屬於缺者，即屬於冠，何以冠在匱而纓在篋乎？其說必不然矣。云「項中有繩，亦由固頰爲之耳」者，此申上「結項中」之義也。繩即結也，項中有結，亦以固頰耳。云「今未冠筭者著卷頰，頰象之所生也」者，是舉漢法爲況。《廣雅》：「纓、頰，頰也。纓與卷同。《釋名》云：「頰，頰也，下齊眉頰然也。《急就篇》注云：「頰常在冠下，或單著之。《獨斷》云：「頰者，古之卑賤執事不冠者之所服也。《續漢書·輿服志》云：「未入學小童頰句卷屋者，示尚幼小也。」王石隲先生諱念孫。《廣雅疏證》云：「卷與頰，一聲之轉也。」胡氏承珙云：「《輿服志》云：「古者有冠無頰，其戴也加首有頰，所以安物」，此亦以頰爲固冠之物名也。」云「滕、薛名齒爲頰」者，劉氏台拱《端臨遺書》云：「案：齒，各本誤作「齒」，《釋文》亦誤。《釋名》云：「齒，恢也，恢廓覆髮上也。魯人曰頰。頰，傾也，著之傾近前也。齊人曰幌，飾形貌也。」字從竹，亦從巾作「幌」。滕、薛在漢爲魯之南境，劉熙以頰爲

魯語，與鄭合。」段氏又云：「今本齒從艸作齒，誤。《廣韻》十八隊：「齒，筐也，亦作櫛。」然則齒，即《說文》「櫛」字。《廣韻》別出「齒」字，引《儀禮》此注作「齒」，由《禮》注轉寫誤耳。鄭知「缺」訓齒者，以經云「青組纓屬於缺」知之。近敖繼公、江慎修、戴東原氏讀「缺項」如字。」今案：敖說雖與鄭殊，然謂「別以緇布一條圍冠而後不合」，則猶以缺項爲固冠之物也。自萬氏斯大謂冠後兩開不相屬爲缺項，吳氏廷華、蔡氏德晉、盛氏世佐因之，皆以缺項即冠後，非別有一物，說愈紛而義愈遠矣。沈氏彤亦辨萬說之誤，當以鄭注爲正。「屬猶著」者，謂屬與著同，以物相連附之名。經云「青組纓屬於缺」者，謂以青色之組二條爲纓，著于缺項之兩旁，冠時垂於頤下結之也。云「纓，今之頰梁也」者，亦舉漢法爲況。《開元禮義鑑》云：「古者以黑繒爲纓，先韜髮而後加冠頰卷梁。」故鄭引漢法申之。《漢書注》「纓，織絲爲之」，然則緇纓即以緇色繒爲纓也。纓所以韜髮，江氏永云：「纓，即《內則》之「緇」。①古人不露髮，必韜而結之，繞爲髻，乃著冠。」云「終，充也」者，古布帛每幅闊二尺二寸。「廣終幅」者，謂充其幅之闊以爲廣，而長則六尺也。

①「緇」，原作「縱」，今據《續清經解》本改。

云「足以韜髮而結之矣」者，謂纒之廣長足以韜髮而結之。《內則》疏引盧氏云「纒所以裹髻承冠，以全幅疊而用之」是也。云「筭，今之簪」者，《釋名》云「筭，係也，所以係冠使不墜也」，《文選·招隱詩》注「簪，筭也，所以持冠也」，又謝靈運詩注：「簪，以玉爲筭也。古曰筭，今曰簪。」是也。天子、諸侯以玉爲筭，大夫以下蓋用象爲之。喪事則用櫛筭、榛筭，詳《喪服·記》。云「有筭者，屈組爲紃，垂爲飾。無筭者，纒而結其條」者，案：有筭者，爲皮弁、爵弁也。二弁有筭，加冠後以筭橫貫之以固冠。用組爲紃，以一條繫於筭左頭，繞頤下自右屈向上，仰屬於筭，繫之有餘，因垂爲飾。故《雜記》注「冠有筭者爲紃」也。無筭者，即緇布冠也。纒，《說文》云：「冠系也。」餘詳上。云「纒邊，組側赤也」者，纒是淺赤色，謂組以緇爲中，以纒爲邊而織之，故云「組側赤也」。云「同篋，謂此上凡六物」者，缺項，青組纒屬於缺，共爲一物。緇纒爲二物，皮弁筭爲三物，爵弁筭爲四物。緇組紃纒邊，皮弁、爵弁各一，則爲二物。是六物也。云「隋方曰篋」者，篋與匣同。《說文》：「匣，藏也。匣或從竹作篋。」《史記正義》：「篋，箱類也。」云「隋方」者，蓋長方而不正方，故《釋文》云「狹而長」也。櫛實于簪。簪，筭也。【疏】正義曰：櫛所以理髮。《內則》釋文云：「櫛，

梳也。《說文》：「櫛，梳比之總名也。」段氏注云：「疏者爲梳，密者爲比。」《玉藻》曰：「櫛用櫛櫛，髮晞用象櫛。」據孔疏以櫛爲白理木，象爲象牙，是櫛有二，此蓋用象櫛與？注云「簪，筭也」者，簪筭皆竹器。鄭注《曲禮》及《論語》俱云「圓曰簪，方曰筭」，此乃訓簪爲筭者，亦對文異，散則通也。「實于簪」者，謂以簪盛櫛也。蒲筵二，在南。筵，席也。【疏】正義曰：「蒲筵二」者，此筵以蒲葦爲之。二者，賈疏云：「一爲冠子，即下云「筵于東序，少北」是也。一爲體子，即下云「筵于戶西，南面」是也。」「在南」者，程氏恂云：「通指上篋在服南，次簪，次筵，筵最南也。」注云「筵，席也」者，謂筵即席也。鄭注《周禮·序官·司几筵》云：「鋪陳曰筵，藉之曰席。」蓋初鋪在地一重爲筵，其上重即謂之席，義取相承藉也。又布席亦謂之筵，詳下文「筵於東序」下。《釋名》：「筵，衍也。舒而平之，衍衍然也。」側尊一甒醴，在服北。有篚實勺、觶、角、枳、脯醢，南上。側猶特也，無偶曰側。置酒曰尊。側者，無玄酒。服北者，纒裳北也。篚，竹器如笥者。勺，尊斗，所以斟酒也。爵三升曰觶。枳狀如匕，以角爲之者，欲滑也。南上者，篚次尊，籩豆次篚。古文「甒」作「廡」。【疏】正義

曰：「注『勺尊升』，嚴本及各本皆作『升』。金氏曰：追《儀禮正義疏》云：『賈疏謂此尊料斟酒者也』，是注升本作斗。後魏以來，字多別體，升、斗字幾不辨，故致誤如此。」黃氏丕烈《儀禮校錄》云：「沈氏彤校正作斗。」今從之。又「所以斟酒也」，《集釋》、《單疏》、《要義》、毛本俱作「斟」，嚴本作「刺」。黃氏云：「刺，蓋『斟』之壞字。」云「側猶特也，無偶曰側」者，側與特皆訓獨，故云「無偶」也。張氏惠言云：「賈謂禮之大例，^①稱側有二：一者無偶特一為側，此側尊、《昏禮》側載、《聘禮》側襲之類；一者《聘禮》云『側受几』者，側是旁側之義也。案：《聘禮》禮賓，公側受几于序端。注不言側義，其文與『側授宰玉』正同，亦是無偶之義，非旁側也。凡《儀禮》一經，側字皆作特訓。」今案：側亦訓旁，見《廣雅·釋言》。側亦訓邊，見《史記索隱》。《玉藻》「大夫側尊用楸，士側尊用禁」，鄭無注，孔疏亦以旁解之。然此經之側，當依張說為是。又云「側者，無玄酒」者，古人設尊多用兩，其一係玄酒，即明水，示不忘古，《玉藻》曰「凡尊必上玄酒」是也。此則無玄酒，但用一尊，故云「側」。云「置酒曰尊」者，置酒謂之尊，猶布席謂之筵，皆是陳設之名，非謂酒器。側尊一甒醴，猶言特設一甒醴耳。甒是盛醴器名，《方言》：「甒，甕也。周魏之間謂之甒。」鄭注《既夕》云：「甒，

瓦器。《禮記·禮器》曰「君尊瓦甒」，孔疏云：「此瓦甒即《燕禮》之『公尊瓦大』也。」詳《燕禮》。《禮經釋例》云：「凡醴尊皆設于房中，側尊，無玄酒。案：《士冠禮》：『陳服于房中西墉下。』又云：『側尊一甒醴，在服北。』是設於房中也。《士昏禮》亦云：『側尊甒醴于房中。』是醴尊皆在房中也。醴事實而禮盛，故特尊，無玄酒也。亦有不尊於房中者，《聘禮·記》：『醴尊于東箱，瓦大一，有豐。』是《聘禮》主君禮賓，醴尊則在東箱也。亦有不側尊者，《士虞禮》：『尊于室中北墉下，當戶，兩甒醴酒。』此是反吉，以醴代玄酒，故醴酒竝設，不側尊，不於房中，非醴尊正例也。敖氏云：「醴尊設於房，臣禮也，國君則於東箱。」蓋據《聘禮·記》言之。云「服北，纁裳北也」者，此上陳三服，先陳爵弁服，而纁裳最在北，故知在服北為在纁裳北也。云「筐，竹器如筥者」，案：《三禮圖》引舊圖云：「筐以竹為之，長三尺，廣一尺，深六寸，足高三寸，如今小車筥。」今案：《說文》「筐」只作「匪」，而「筐」則訓為車筥。段氏注云：「《釋

①「大」，《讀儀禮記》同，段校據《儀禮·士冠禮》賈疏改作「通」。

器：「竹前謂之禦，後謂之蔽。」竹前竹後，許所謂車簋也。^①簋之言櫛也，言其吟嚙也。」然則筐蓋竹器之疎櫛而不密者，故鄭云「如簋也」。許書專以筐爲車簋字，而筐匪之匪不從竹，後世筐匪字多用筐，^②故段氏云：「匪、筐古今字。」又云：「《漢書》作「棐」，應劭曰：「棐，竹器也。方曰箱，^③隋曰棐。」隋者，方而長也。」又案：《三禮圖》謂筐有蓋，以《儀禮》諸篇考之，似未確。此經云：「實勺、觶、角柶。」《少牢》云：「勺、爵、觚、觶實於筐。」又《鄉飲酒》有上筐、下筐，皆以盛爵。又《燕禮》、《大射》君臣異筐，其單言筐者，臣筐也；言膳筐者，君筐也。注云：「言膳筐者，君象觚所饌也。」堂下之筐常設於洗西，堂上之筐設於尊南。此筐設於房中，則在尊北。筐近洗者，便於取爵以洗，近尊者，便於取爵以酌，凡皆盛酒器之筐也。又《士虞禮》有盛食之筐，又有盛玉幣之筐，《孟子》所謂「實玄黃於筐」是也。云「勺、尊斗，所以斟酒也」者，斗與料同，賈疏云：「案：《少牢》疊水有料，與此勺爲一物，故云尊斗。對彼是疊料，所以斟水，則此爲尊斗，所以斟酒也。」今案：《詩·賓之初筵》「賓載手仇」，鄭箋「仇讀曰斟」。斟者，挹酒於尊之名。詳《少牢》「司宮概豆籩勺爵觚觶」下。云「爵三升曰觶」者，爵是飲器之大名，對文爵與觚、觶、角、散有異，散文亦得通

稱爵，故注主爵言之。三升曰觶，^④詳《特牲·記》。云「柶狀如匕，以角爲之者，欲滑也」者，鄭司農注《周禮·玉府》云：「角柶，角匕也。」《說文·匕部》云「匕，一名柶」，《木部》柶下云「《禮》有柶。柶，匕也」，《廣雅》「柶，匙匕也」，是柶亦名匕。鄭不直云匕，而云如匕者，蓋見十七篇中扱醴、扱剛用柶，而匕飯、匕牲體用匕，二者自當有異。下文云「加柶，覆之，面葉」，又云「加柶，面枋」，則柶有葉有枋。注云「葉，柶大端」，張氏爾岐云：「柶類今茶匙，葉即匙頭。」或云柶之盛物處謂之葉，然則柶頭亦當爲淺斗狀以挹物，其形有似於匕，視匕飯、匕牲體之匕爲小耳。故鄭不直云匕，而云如匕也。段氏《說文注》云：「常用器曰匕，禮器曰柶。」此說似未確。王氏《廣雅疏證》云：「柶有醴柶，有銅柶。吉事用角柶，喪事用木柶。《士冠禮》角柶，《士喪禮》「東方之饌：其實醴酒，角觶，木柶」，《少牢禮》：「上佐食羞兩銅，皆用柶」。《三禮圖》引舊圖云：「柶長尺，櫛博三

①「簋」，原作「苓」，今據《續清經解》本改。
 上「筐」字，據文意似當爲「筐」。

③「箱」，據《漢書·食貨志》應劭注當爲「筐」。

④「升」，原脫，今據《續清經解》本補。

寸，曲柄長六寸，漆赤中及柄端。」今案：喪禮楔齒用角柄者，以始死時喪具未備，故仍用生人吉時所用之柄也。《三禮圖》又謂「禮柄用角爲之，銅柄用木爲之」，然《士喪禮》「禮柄亦用木，則其說不足據矣」。《禮經釋例》云：「凡扱醴、扱羹之器皆曰柄。《士冠禮》賓醴冠者，《士昏禮》女父醴使者、舅姑醴婦，《聘禮》：主國之君醴聘賓，授醴者皆加柄，受醴者皆以柄祭醴三。《士昏禮·記》：「祭禮，^①始扱一祭，又扱再祭。」是扱醴之器謂之柄也。《公食禮》賓祭正饌：「扱上銅以柄，徧擣之。」注：「扱以柄，扱其銅菜也。」《士虞·記》：銅莧有柄。《少牢禮》：尸飯之先，設羊、豕兩銅，皆有柄，尸扱以柄，祭羊銅，遂以祭豕銅，嘗羊銅。《有司徹》：主婦獻尸，尸坐，以羊銅之柄挹羊銅，遂以挹豕銅。是扱銅羹之器亦謂之柄也。《士虞》、《特牲》尸入但云「祭銅」、「嘗銅」，不云「扱以柄」者，文不具也。醴有糟，銅羹有菜，故皆以柄扱之。」今案：匕制詳《少牢》「廩人概甑甗匕」下。云「南上者，篚次尊，籩豆次篚」者，籩豆即脯醢也。李氏云：「一籩一豆者，籩實脯而豆實醢。」今案：脯醢，亦詳《少牢》「司宮概豆籩」下。程氏瑤田云：「案：饌於西墉下，服南篚，篚南簞，簞南筵。服北尊，尊北篚，篚北籩豆。」云「古文『甗』作『廡』者，廡是門廡，兩下爲之。段

氏云：「古文字少，假借，故以廡爲甗。《說文·瓦部》不錄『甗』者，從《禮》古文也。《小戴記》四十九篇多從今文，是以有『甗』無『廡』。如《禮器》「君尊瓦甗」，《喪大記》「士容瓦甗」皆是。」今案：《廣雅》云：「甗，瓶也。」「甗」旁瓦乃後人所加，後人又省作「甗」耳。爵弁、皮弁、緇布冠各一匱，執以待于西坫南，南面東上。賓升則東面。爵弁者，制如冕，黑色，但無纁耳。《周禮》：

「王之皮弁，會五采玉琕，象邸，玉笋。諸侯及孤卿大夫之冕、皮弁，各以其等爲之。」則士之皮弁，又無玉象邸飾。緇布冠，今小吏冠其遺象也。匱，竹器名，今之冠箱也。執之者，有司也。坫在堂角。古文「匱」作「纂」，「坫」作「檐」。【疏】正義曰：宋本《釋文》云：「匱，本或作算。」《校勘記》云：「《通典》作『算』，與或本合。今本《釋文》『算』誤作『纂』。」段氏云：「《史記·鄭莊傳》：『饒遺人不過算器食。』徐廣曰：『算，竹器。』疑『算』即『匱』之假借。」注「玉琕」，嚴本「琕」作「琪」，《通解》、《楊圖》同。《周禮·弁師》釋文云：「琕，本亦作『琪』。」是一字通。「又無玉象邸

①「禮」，據《儀禮·士昏禮》當作「禮」。

飾」，汪氏中云：「『邸』字疑衍。」又「古文匱作纂，坵作檐」，毛本兩「作」字俱作「爲」。徐本上「作」字作「作」，下作「爲」。嚴本、《集釋》俱作「作」。纂，《釋文》、《要義》、毛本俱作「纂」，嚴、徐、《集釋》俱作「纂」。「檐」，嚴本、毛本俱作「檐」，《釋文》作「檐」。張氏《識誤》云：「《廣韻》檐與簷同，坵謂之坵，故或爲檐，今從檐，非也。」《校勘記》云：「《釋文》『檐』，今本亦誤作『檐』。」黃氏《校錄》以嚴本作「檐」爲誤，段氏《漢讀考》、胡氏承珙亦皆以「檐」爲誤，今從「檐」。

○冠弁是禮之主，重於他服，故執之而不陳。且他服適房自著而已，冠弁必俟賓加之，故執以待事。各一匱，則執之各一人。「西坵南」者，堂廉西頭之南，在堂下也。執匱者，賓未入南面，賓升堂則東面，以向賓也。東上，謂執爵弁匱者在東，皮弁、緇布冠以次而西。東面則以北爲上，不言北上者，省文也。注云「爵弁者，制如冕，黑色，但無纁耳」者，《周禮》·弁師①：「掌王之五冕，皆玄冕，朱裏，延，紃，五采纁十有二。」②鄭注：「纁，合五采絲爲之繩，垂於延，每一市而貫五采玉，十二旂則十二玉也。」鄭以爵弁之制與冕大同，唯無纁旂爲異。吳氏《疑義》云：「上注言爵『色赤而微黑，或謂之緇』，下『纁屨』注則以爲與纁同色，此又第以爲黑色者，蓋因《弁師》五冕皆玄，此注既以爲如冕，故以

黑言之，不覺自爲矛盾耳。」云「《周禮》王之皮弁，會五采玉璫，象邸，玉笋」者，《弁師》文，鄭注：「會，縫中也。璫，讀如綦。綦，結也。皮弁之縫中，每貫結五采玉十二以爲飾，謂之綦。邸，下抵也，以象骨爲之。」云「諸侯及孤卿大夫之冕，皮弁，各以其等爲之」者，亦《弁師》文，此鄭引以證皮弁之制也。云「則士之皮弁，又無玉象邸飾」者，鄭蓋據「各以其等爲之」之文推之。《弁師》注又云：「皮弁，則侯伯璫飾七，子男璫飾五，玉亦三采。孤則璫飾四，三命之卿璫飾三，再命之大夫璫飾二，玉亦二采。」故知降殺至士，無玉象飾矣。云「緇布冠，今小吏冠其遺象也」者，《續漢書》·輿服志③云：「進賢冠，古緇布冠也，文儒者之服也。公侯三梁，中二千石以下至博士兩梁，自博士以下小吏私學弟子皆一梁。」故鄭云「今小吏冠其遺象」，今謂漢時也。聶氏云：「緇布冠，始冠之冠也，大夫、士無綏。諸侯始加緇布冠，纁綏。自士已上，冠訖則敝去之，不復著也。然庶人猶常著之，故《詩》云『彼都人士，臺笠緇撮』，謂彼都邑人有士行

① 「禮」，原作「謂」，今據《儀禮正義正義正誤》改。

② 「二」下，段校據《周禮》·弁師《補「就」字。

③ 「下」下，《後漢書》·輿服志有「至」字，「吏」作「史」。

者，以緇布爲冠，撮持其髮。」今案：《詩毛傳》：「緇撮，緇布冠也。」云「匱，竹器名，今之冠箱也」者，《說文》：「匱，淥米簍也。」淥米之簍非可以盛冠，許蓋與鄭異義。《廣韻》：「匱，冠箱也。」《一切經音義》三引《風土記》云：「笈，如冠箱而卑者也。」云「執之者，有司也」者，前注云「有司，羣吏有事者」，故知有司是執事之人，此執匱者即有司也。云「玷在堂角」者，禮玷有四：《爾雅》「堦謂之玷」，郭注「在堂隅」，與此注「玷在堂角」者同。《既夕·記》曰：「設於東堂下，南順，齊于玷。」據此，則玷當在東西堂之隅，蓋統一堂而論之，必以東堂盡東、西堂盡西之處爲隅。《儀禮》凡言玷者，皆謂堂隅之玷，一也。《明堂位》曰「反玷出尊」，此反爵之玷，二也。又曰「崇玷康圭」，此亢圭之玷，三也。《內則》曰「士於玷一」，此庀食之玷，四也。反玷、崇玷，皆在廟中兩楹之間。賈氏釋《士喪禮》云「堂隅有玷，以土爲之」，又云「或謂堂隅爲玷」，則其說不能定矣。江氏永云：「堂之四隅即爲玷，非別有土爲之也。反玷以反爵，崇玷以康圭，乃是燒土爲之。」案：《論語》皇疏云：「反玷，築土爲之，形如土堆。」《禮記疏》略同，江說是矣。庀食之玷在寢內，亦當以土若木爲之。云「古文『匱』作『簠』」，「玷」作「檐」者，胡氏承珙云：「《說文·竹部》『簠』字注云：『竹

器也，從竹，贊聲，讀若簠。』此當與『簠』同字。」今案：《明堂位》曰：「薦用玉豆雕簠。」鄭注：「簠，簠屬也。」則非盛冠之物矣。又檐者屋榜聯，不在堂角。故鄭於此二字俱從今文，不從古文也。

右冠日陳設

主人玄端爵韠，立于阼階下，直東序，西面。玄端，士人席之服也。阼猶酢也，東階所以荅酢賓客也。堂東西牆謂之序。【疏】正義曰：主人言玄端爵韠，不言裳者，以三等士皆用此禮冠子，裳有玄、黃、雜之異，故不言也。必言爵韠者，見其爲玄端也。若緇韠，則不得名玄端，如下兄弟服是也。張氏爾岐云：「主人服此服，立阼階下以待賓至，其立處與堂上東牆相直。」注云「玄端，士人席之服也」者，案：《特性》「士祭用玄端，故知爲士人廟之服。此冠禮行於廟，故服玄端也。不言冠者，方氏苞云：『篇首朝服用玄冠，則玄端之冠不待言矣。』云「阼猶酢也，東階所以荅酢賓客也」者，《說文》「阼，主階也」段注云「階之在東者」，東階謂之阼階，猶西階之賓階，有主賓相酢之義，故注以酢釋之。云「堂東西牆謂之序」者，《爾雅·

釋宮云：「東西牆謂之序。」鄭加「堂」字於上者，見《儀禮》經內所言東序、西序，乃堂上東西牆之名也。兄弟畢袵玄，立于洗東，西面，北上。兄弟，主人親戚也。畢猶盡也。袵，同也。玄者，玄衣、玄裳也，緇帶鞞。位在洗東，退於主人。不爵鞞者，降於主人也。古文「袵」爲「均」也。【疏】正義曰：王氏《困學紀聞》云：「案：《後漢書·輿服志》：『秦郊祀之服皆以袵玄。』蓋「袵」字誤爲「袵」。《釋文》之忍反，亦誤。」段氏云：「案：經、注「袵」字，皆「均」字之誤。參與匀篆體易譌。《說文·衣部》曰：「均，玄服也，从衣匀聲。」今本譌爲袵，參聲。賴《文選·閒居賦》注可證。」今案：「袵」當爲「均」，王、段說是也。胡氏承珙說亦同，《九經古義》、《禮經釋例》亦皆以「袵」爲「均」。注云「兄弟，主人親戚也」者，謂親族姻戚也。古人通謂婚姻爲兄弟，則兄弟兼外姻在內。云「畢猶盡也」者，《爾雅·釋詁》云：「畢，盡也。」云「均，同也。玄者，玄衣、玄裳也，緇帶鞞」，又云「古文「均」爲「均」也」者，案：《昏禮》「女從者畢袵玄」，「袵」亦當爲「均」，彼注云：「均，同也。同玄者，上下皆玄。」段氏云：「注以同釋均，以同玄釋均玄者，此據其字之從匀而言。均、均字皆取匀，會意。不從古文作均者，經言衣服，則字從衣爲切近也。許釋均

爲玄服，而鄭不同者，許蓋禮家舊說也。《春秋左氏傳》云「均服振振」，賈、服、杜等皆爲「均服」，賈云「均，同也」。劉達注《吳都賦》亦引《左氏》「均服振振」，注「均，同也」。杜注《左傳》云：「戎事上下同服。」此說均皆同鄭也。服虔注《左傳》云「均服，黑服也」，見《閒居賦》注。此說均同許也。鄭於此經不釋均爲玄者，經云「均玄」，必二字各義。倘均亦訓玄，則但言玄可矣。《月令》「孟冬乘玄路」，注曰：「今《月令》曰乘袵路，似當爲均。」則「均」可訓玄，鄭未嘗廢其說。惟此《儀禮》之均字作均，而義同均，字從今文，義從古文也。胡氏承珙云：「《左傳》「均服振振」，《釋文》云「均，字書作均」，《漢書·律曆》《五行》二志引皆作均。《淮南子·齊俗訓》：「尸祝均袵。」高誘注云：「均，純服。袵，黑齊衣也。」是均本純服之名。純服者，謂衣裳同色，非均即是玄。此經「畢均玄」，謂兄弟皆服玄衣玄裳。純玄之服爲均玄，故鄭訓均爲同。《周禮·司几筵》疏引賈逵《左傳注》，訓均爲同。《呂覽·悔過》篇「今均服回建」，高誘注亦云「均，同也」，皆與鄭合。」今案：袵訓鞞，不訓同。經文若作「袵」，則注義不可通矣，故知爲「均」之誤也。鄭兼言緇帶鞞者，緇與玄近，不獨衣裳玄，而帶鞞亦玄，以見上下皆玄之爲同玄，義與《昏禮》注正同也。云「位在洗東，退於主

人」者，主人立於堂下，直東序，兄弟立於洗東，直東榮，而皆西面，是退在主人後也。云「不爵鞞者，降於主人也」者，上文主人玄端爵鞞，今兄弟不爵鞞而緇鞞，是降於主人也。《禮經釋例》云：「玄端用爵鞞，若緇鞞則謂之杓玄，其服又次於玄端矣。」程氏恂云：「經特起杓玄之文，爲不爵鞞言之，猶《昏禮》『女從者畢杓玄』，爲不纁相言之也。」○方氏苞云：「《玉藻》『無君者不貳采』，謂未仕及去位者，衣裳上下同色也。此兄弟蓋未仕者，杓玄，即所謂不貳采也。衆皆杓玄，即間有已仕者，亦降服以從同，故曰畢也。敖氏謂盡服玄端，則經文宜曰『畢玄端』。此經於主人擯者之中特揭『杓玄』，而《昏禮》於從者曰『畢玄端』，於女從者曰『畢杓玄』，則異制明矣。」今案：敖氏之說，沈氏彤、褚氏寅亮亦皆駁之，是也。至「不貳采」之義，周氏學健及沈氏說俱與方同，可備一解，惟皆不知杓爲杓之誤耳。擯者玄端，負東塾。東塾，門內東堂。負之北面。【疏】正義曰：擯者，即前「爲期」節注所云「有司佐禮者」是也。與主人同玄端，不必同裳，故略之，下贊者玄端亦然。注云「東塾，門內東堂」者，詳前「具饌于西塾」下。敖氏謂塾之崇過於堂，褚氏駁之云：「塾基必稍高於門，故有門堂之稱。然必卑於正堂，斷無反崇於堂之理。」又云：「東塾、西塾，遙與東

西堂不相直，其廣也與東西房等，廣於東西堂四之一。」云「負之北面」者，以向主人也。負，背立也。詳《覲禮》「天子袞冕負斧依」下。將冠者采衣，紒，在房中，南面。采衣，未冠者所服。《玉藻》曰：「童子之節也，緇布衣，錦緣，錦紳并紐，錦束髮，皆朱錦也。」紒，結髮。古文「紒」爲「結」。【疏】正義曰：在房中，亦謂在房內耳，非謂在房東西之中也。南面，則固當戶而立矣。然據《特性》鄭注云「東房，房中之東，當夾北」，則房戶不正當房南壁之中。孔氏廣森《禮學卮言》謂「東房戶必近西，西房戶必近東，乃可以達於堂，而東房內之東，西房內之西，則皆正當夾室牆後」，是也。然則在房中南面者，謂在所陳器服之東，南面而立也。○注「童子之節也」，「節」，毛本作「飾」，嚴、徐、《集釋》、楊、敖俱作「節」。《校勘記》云：「案：作『節』與《玉藻》合。」云「采衣，未冠者所服」者，言采衣爲童子未冠者之常服，故將冠時服此以待也。云「《玉藻》曰：童子之節也，緇布衣，錦緣，錦紳并紐，錦束髮，皆朱錦也」者，彼注亦引此經爲證，孔疏釋節爲禮節，又云：「緇布衣者，謂用緇布爲衣。錦緣，錦紳并紐者，謂用錦爲緇布衣之緣，又用錦爲紳帶，并約帶之紐，皆用錦也。錦束髮者，以錦爲總而束髮也。皆朱錦者，言童子所用之錦皆朱色。

童子尚華，示將成人有文德。」云「紒，結髮」者，謂結髮爲之。盧氏植云：「童子紒似刀環。」敖氏云「紒，露髮爲紒也。凶時謂之髻，吉時謂之紒。」《內則》言男子未冠者亦用纚，此乃紒者，爲將冠去之。」又云：「《曲禮》曰：『童子不衣裘裳。』不裳，則是連裳於衣，如深衣制也。」云「古文『紒』爲『結』」者，段氏云：「案：《說文·糸部》有『結』無『紒』，此從古文，不從今文也，是以《說文·髟部》：『髻，卧結也。髻，喪結也。髻，簪結也。』字皆作『結』。『紒』、『結』古今字，皆即後世『髻』字。鄭君從今文，是以《少牢禮》注、《周禮·追師》注、《禮記·雜記》注，皆作『紒』，與《說文》異。」

右主人以下即位

賓如主人服，贊者玄端從之，立于外門之外。外門，大門外。【疏】正義曰：賓如主人服，尊卑同也。贊者玄端，義詳前「擯者玄端」下。從，隨也。從之，謂從賓而至於主人門外也。吳氏《章句》云：「凡言贊者，皆謂賓贊冠者。」王氏士讓云：「是時衆賓亦從之，西方東面北上。主人之贊者先時已入，不隨賓入也。」○注末「外」

字，嚴本、《集釋》、《通解》、楊氏、毛本俱有，敖氏無。今案：經云「立于外門之外」，則門外義已明，注特釋「外門」二字耳，敖是也。今仍嚴本，而附辨於此。云「外門，大門外」者，《曲禮》孔疏云：「天子五門，諸侯三門，大夫、士二門。」所謂二門者，大門、寢門也，是大門對寢門爲外門矣。此冠禮行於庑，則對庑門爲外門，故云「外門，大門」也。

擯者告。告者，出請入告。【疏】正義曰：注云「出請入告」者，謂出請事於賓，入告主人也。褚氏云：「敖謂此賓乃主人戒宿而來，故不出請事，蓋破注出請之言。」今案：經言「擯者告」，省文耳，其實亦當出請，敖說非。

人迎，出門左，西面再拜。賓荅拜。左，東也。出以東爲左，人以東爲右。【疏】正義曰：此門即大門也。

《禮經釋例》云：「凡迎賓，主人敵者於大門外，主人尊者於大門內。案：禮之通例，大綱則迎於大門內外，細目則迎於廟門內外。此例以大門爲主，而以廟門附注之。」《士冠禮》：「賓立于外門之外，注：『外門，大門。』」主人迎，出門左。《士相見禮》：「主人出迎于門外。」此門亦大門。此賓、主人皆士。《聘禮》：「君使卿朝服，用束帛勞，賓迎于舍門之外。」此即所舍之大門外。又：「卿致館，賓迎，再拜。」此即

所館之大門外。又：「君使卿歸饗餼，賓迎於外門外。」僕使者，賓出迎，則迎于廟門外。又：「賓問卿，迎于外門外。」又：「君使卿還玉，賓迎于外門外。」還璋報享，賓迎，則皆於廟門外。考《聘禮》：「君與卿圖事，遂命使者。」是聘賓卿也。此賓、主人皆卿。《公食大夫禮》：「大夫相食，迎賓於門外。」此大夫兼卿而言。此賓、主人皆大夫。《覲禮》：「王使人勞，侯氏迎于帷門之外。」又：天子賜侯氏以車服，迎于外門外。考郊勞使大行人，見鄭注。賜車服使諸公。王臣與侯氏，皆天子臣也，皆賓、主人相敵者，故皆迎於大門外也。《聘禮》：「賓皮弁聘，公皮弁，迎賓于大門內。」注：「公不出大門，降於待其君也。」禮賓，公出迎賓，敖氏繼公曰「出廟門也」。《公食禮》：「賓朝服，即位于大門外，如聘。公如賓服，迎賓于大門內。」注：「不出大門，降於國君。」又：《燕禮·記》：「若與四方之賓燕，則公迎之于大門內。」注：「四方之賓，謂來聘者也。」考公則主國之君，賓則異國之臣，皆主人尊者，故迎於大門內也。《聘禮》執圭、行享、私覲，賓皆入廟門，公皆在廟門內，惟禮賓公出廟門迎。又《士昏禮》納采：「使者至，主人迎于門外。」注：「門外，大門外。」禮賓，經云「主人迎賓于廟門外」。此使者，注謂「夫家之屬，若羣吏使往來者」。又：親迎，壻至于門外。注：「婦家大門之外。」又云：「主人玄端迎于門

外。」此主人，注謂「女父也」。此主人尊者而迎于大門外，以賓客接之，故盛其禮也。《鄉飲酒禮》：「主人一相迎于門外。」《鄉飲酒義》云：「主人拜迎賓於庠門之外。」此經云「二相迎」者，疏謂「主人於羣吏中立一相，使傳賓主之命，主人乃自出迎賓於大門外也」。《鄉射禮》：「賓及門，主人一相迎于門外。」與《鄉飲酒禮》同。考《鄉飲酒》主人，諸侯之鄉大夫也，《鄉射》主人，州長及鄉大夫也，而賓皆處士，賓主不敵，而迎於大門外者，尊賢，故具賓主正禮也。《鄉飲酒禮》：「賓若有遵者，主人迎。」注：「主人迎之於門內也。」《鄉射禮》：「大夫若有遵者，則入門左。主人降。」注：「迎大夫於門內也。不出門，別於賓。」此遵者是諸公大夫，賓、主人相敵，而迎之於門內者，辟正賓也。又《士昏·記》：「不親迎，壻見，主人出門左，西面，壻入門，東面。」注：「出門，出內門。入門，入大門。出內門不出大門者，異於賓客也。」此又殺於親迎，成主人之尊也。敖氏云：「荅拜不言再，可知也。」注云「左，東也。出以東為左，人以東為右」者，李氏《儀禮釋宮》云：「《特牲饋食禮》注曰：『凡鄉內以入為左右，鄉外以出為左右。』以入為左右，則門西為左，門東為右。《鄉飲酒禮》『賓入門左』，《燕

禮《卿大夫皆入門右》是也。以出爲左右，則門東爲左，門西爲右。《士冠禮》：「主人迎賓，出門左，西面」，《士虞禮》：「側亨于廟門外之右」是也。^①闕東曰闕右，亦自入者言之也。^②案：《特牲》注與此注義正同。《禮經釋例》云：「《士相見》疏云：『凡門，出則以西爲右，以東爲左，入則以東爲右，以西爲左，依賓西主東之位也。』蓋主人就東階，客就西階。主人之位常在東，故入門右即東也。賓之位常在西，故入門左即西也。《士虞·記》：『餞尸，尸出門右。』即出門西也。考門制，二扉之間有一闕，入門左者由闕西，入門右者由闕東也。」今案：以上皆泛言賓客出入之法。若臣之見君，則出入皆由闕東，《曲禮》所謂「大夫，士出入君門由闕右」是也。詳後。主人揖贊者，與賓揖，先人。贊者賤，揖之而已。又與賓揖，先人道之。贊者隨賓。【疏】正義曰：注云「贊者賤，揖之而已」者，對上主人迎賓再拜，於贊者揖而不拜，是賤於賓也。云「又與賓揖，先人道之」者，前拜賓訖，今又揖賓，是爲將先人道之也。云「贊者隨賓」者，以後更不見與贊者行禮之文，故知隨賓入也。經但言主人先入，不言賓入，又不言入門左右者，省文。《禮經釋例》云：「凡入門，賓人自左，主人入自右，皆

主人先入。案：《士相見禮》：「賓奉摯，入門左。」《鄉飲酒禮》：「賓厭介，入門左，介厭衆賓入，衆賓皆入門左。」《鄉射禮》：「賓厭衆賓，衆賓皆入門左。」又：「大夫若有遵者，則入門左。」《聘禮》：「賓入門左，此大門也。及席門，納賓，賓入門左，介皆入門左；又：行享，賓入門左。此皆席門。《公食大夫禮》：『大夫納賓，賓入門左。』此大門也。卒食，賓入門左。此席門。是入門賓皆入自左也。又《士相見禮》：「主人揖，入門右。」《有司徹》：「主人揖，先入門右。」敖氏繼公曰：「凡主人與客揖而先入，皆入門右也。」是入門主人皆入自右也。至於《士冠禮》：「迎賓，主人與賓揖，先入。」注：「先人道之。」《士昏禮》：「納采，主人迎賓，揖入；大門，席門同。親迎，主人揖入，賓執鴈從。《鄉飲酒禮》：『賓至，主人揖，先入。《鄉射禮》：『賓至，主人以賓揖，先入。《聘禮》：郊勞，賓揖，先入，此時勞者爲賓，賓爲主人。勞者奉幣入；聘，公揖入；禮賓，公出，迎賓以入；歸饗餼，賓迎于外門外，揖入；及席門，賓揖入，此亦賓爲主人，還玉同。大夫奉束帛入；問卿，大夫迎于外門外，大夫先入，及席門，大夫揖入，

① 「外」，原脫，今據《儀禮釋官》補。

② 「自」，原脫，今據《儀禮釋官》補。

賓奉束帛入；還玉，賓帥大夫以入。《公食大夫禮》：「及席門，公揖入，賓入。」經不云左右者，文不具也。其實皆賓入門左，主人入門右也。又凡入門，經皆書主人在先，賓在後，是知皆主人先入也。經或云先入，或但云入，亦文不具也。《曲禮》曰：「凡與客人者，每門讓於客。客至於寢門，則主人請入為席，然後出迎客。客固辭，主人肅客而入。主人入門而右，客人入門而左。」即此例矣。每曲揖。周左宗廟，入外門，將東曲，揖；直廂，將北曲，又揖。【疏】正義曰：注云「周左宗廟」者，《周禮·小宗伯》文。鄭言此者，以見席在寢東，入大門必曲行，乃得至廟也。云「入外門，將東曲，揖；直廂，將北曲，又揖」者，曲，折也。蔡氏德晉云：「凡廟在大門內之東，入大門折而東行為一曲，望廟門折而北行為二曲。」故入外門，將東曲，主人與賓揖；直廂，將北曲，主人與賓又揖。是為每曲揖也。《聘禮》行聘時，賓入大門，公揖入，每門每曲揖。又賓問卿，大夫先入，每門每曲揖。諸侯三門，廟在中門內，固有每門矣。大夫與士同二門，彼言每門，此不言每門者，大夫三廟，廟門外當更有都宮之門。士無之，故不言每門也。餘詳《聘禮》。至于席門，揖入。三揖，至于階，三讓。入門，將右曲，揖；將北曲，揖；當碑，揖。【疏】正義曰：「至于席

門，揖入」，此席門外之揖也。「三揖，至于階」，此席門內之揖也。《禮經釋例》云：「冠于櫺廡。案：此云『至于席門，揖入』，上云『厥明夕，為期于席門之外』，下云『賓出，主人送于席門外』，皆不云何廡。惟『筮于席門』，注：『席謂櫺廡。』則經所云廡者，皆指櫺廡而言，是冠禮行于櫺廡也。」敖氏云：「揖入，主人揖而先入門右，西面也。賓入門左，贊者、衆賓皆入門左，東面北上。」注云「入門，將右曲，揖；將北曲，揖；當碑，揖」者，《禮經釋例》云：「凡入門，將右曲，揖；北面曲，揖；當碑，揖，謂之三揖。案：《士冠禮》：『至于席門，揖入，三揖。』注：『入門，將右曲，揖；將北曲，揖；當碑，揖。』《士昏禮》：『納采，使者至于席門，揖入，三揖。』注：『入三揖者，至內雷將曲，揖。既曲北面，揖。當碑，揖。』《鄉飲酒禮》：『主人與賓三揖。』注：『三揖者，將進揖，即入門，將右曲，揖。當陳揖，即將北曲，揖。陳，堂塗也。陳與門不相直，故入門必再曲，然後當陳也。當碑揖。』《士冠禮》疏云：『主人將右，欲背客，宜揖。將北曲，與客相見，又揖。碑是庭中大節，碑在堂下，三分庭，一在北。又宜揖。是知三揖據此而言也。』《昏禮》及《聘禮》、《鄉飲酒》，入三揖，注雖不

① 「至於」，原作「至至」，今據《禮經釋例》改。

同，皆據此三節爲三揖，義不異也。案：《聘》三揖小異，詳下。又《士昏禮》：親迎，至于廟門，揖入，三揖。《鄉射禮》：「主人以賓三揖，皆行。」皆無注，亦此三揖也。又《聘禮》「三揖」，注：「君與賓也，入門將曲，揖；既曲北面，又揖；當碑，揖。」據上文「及席門，公揖入，立于中庭」，與《鄉飲酒》、《鄉射》賓主相敵竝入者不同。此節疏文，刊本錯誤不可讀。詳其意，蓋謂入門將曲揖者，公先在庭南，賓既入門將曲，揖主君。賓既曲北面，又揖主君。二者主君皆向賓揖之，再揖訖，主君亦東面向堂塗，曲而北行，當碑，乃得賓主相向而揖。是以得君行一、臣行二，非謂賓入門時主君更向內雷相近而揖也。《公食大夫禮》：「及席門，公揖入。賓入，三揖。」注：「每曲揖，謂右曲揖，北曲揖。當碑揖，相人偶。」亦是公先揖入，賓後入，主尊賓卑，與《聘禮》立于中庭小異。又《聘禮》：主君使卿歸聘賓饗餼之禮，及席門，此廟門謂聘賓所舍之廟也。賓揖入，大夫奉束帛入，三揖，皆行。此賓主相敵，而聘賓先入者，注以爲：「賓與使者揖而入，使者止執幣，賓俟之於門內，謙也。」疏云：「聘時主君揖入，立于庭，尊卑法。此賓與使者敵，故賓在門內，謙也。」又：聘賓問卿，卿受于祖廟，賓主相敵，及廟門，亦大夫先揖入，然後賓奉束帛入，三揖，皆行。竊謂主人先入，道賓也，凡

禮皆然，似不必別求其義也。」《釋例》又云：「案：堂塗與門不相直，而與階相直。故主人入門，至內雷，將右曲就堂塗，則賓主必相背，故揖。既至堂塗，俱曲而北面，則賓主又相見，故再揖。當碑，則將及階矣，故三揖。非此固無緣相揖也。敖氏曰：『三揖者，於入門左右之位，揖，參分庭，一在南，揖，參分庭，一在北，揖。』與注乖違，不可從也。」今案：程氏恂、褚氏寅亮亦皆以敖說爲非。又經云「至于階，三讓」，鄭無注。《禮經釋例》云：「凡升階皆讓，賓主敵者俱升，不敵者不俱升。案：《聘禮》：歸饗餼，至于階，讓。注：『讓不言三，不成三也。凡升者，主人讓于客三。敵者，則客三辭，主人乃許升，亦道賓之義也。使者尊，主人三讓，則許升矣。今使者三讓，則是主人四讓也。公雖尊，亦三讓乃許升，不可以不下主人也。古文曰三讓。』疏云：『三讓三辭，成也。今有三讓，大夫即升，無三辭，則不成三也。』又云：「案：《周禮·司儀》云：諸公之臣相爲國客，大夫郊勞，三讓，登聽命。又云：致饗餼如勞之禮。即得行三讓之禮。此中古文云三讓，與彼合，問卿節注亦云：『古文曰三讓。』鄭不從古文也。」是凡升階皆讓也。《士冠禮》：「至于階，三讓。主人升，立于序端，西面。賓西序，東面。」注：「主人、賓俱升，立相鄉。」《士昏禮》納采：

「至于階，三讓。主人以賓升，西面。賓升西階，當阿，東面。」疏云：「禮之通例，賓主敵者，賓主俱升，若《士冠》與此文是也。」是賓主敵者俱升也。又婿親迎：「至于階，三讓。主人升，西面。賓升，北面。」不相鄉，亦尊卑法。《鄉飲酒禮》：「至于階，三讓。主人升，賓升。」主人，大夫。賓，士。此賓主不敵，而亦俱升者，盛其禮尊賓，使與敵者同也。《鄉射禮》：「及階，三讓。主人升一等，賓升。」注：「三讓而主人先升者，是主人先讓於賓。不俱升者，賓客之道，進宜難也。」《聘禮》：「至于階，三讓。公升二等，賓升。」注：「先賓升二等，亦欲君行一，臣行二。」《公食大夫禮》：「至于階，三讓。公升二等，賓升。」注：「遠下人君。」《覲禮》郊勞：「至于階，使者不讓，先升。」注：「不讓先升，奉王命，尊也。升者，升壇。」疏云「以帷宮無堂可升」。是賓主不敵者不俱升也。《聘禮》歸饗餼：「至于階，讓。大夫先升一等，賓從，升堂。」大夫，即歸饗餼使者也。又聘賓餼歸饗餼使者：「賓升一等，大夫從，升堂。」注：「賓先升，敵也。」賓謂聘賓。此時聘賓爲主人。蓋歸饗餼時，大夫奉主君之命來，則使者尊，故大夫先升。已致命訖，則賓尊，故聘賓先升也。又聘賓問卿之禮：「至于階，讓。賓升一等，大夫從，升堂。」大夫，主國之卿也。注：「賓先升，使者尊。」此皆賓主敵，而不俱升者，

尊其君，故尊使者也。又《士昏禮》疏云：「《鄉飲酒》、《鄉射》皆主尊賓卑，故初至之時，主人升一等，賓乃升，至卒洗之後，亦俱升。」考《鄉飲酒》經文，但云主人升，無一等、二等字，與《鄉射》不同，疏說誤也。《釋例》又云：「《有司徹》迎尸、侑：「揖，乃讓。主人先升自阼階，尸、侑升自西階。」注：「没雷相揖，至階又讓。」此既祭饗尸之禮，與賓客略相同也。又《曲禮》曰：「主人就東階，客就西階。客若降等，則就主人之階，主人固辭，然後客復就西階。主人與客讓登，主人先登，客從之。」蓋古經師釋禮之辭，亦可與經相證也。」主人升，立于序端，西面。賓西序，東面。主人、賓俱升，立相鄉。【疏】正義曰：序端，序頭。賓不言升，省文。注云「主人、賓俱升，立相鄉」者，以經云西面、東面知之也。俱升義詳上節。敖氏云：「主人立於序端，北當序也。賓在西序，負序也。主人不立於東序者，辟子之坐，且不參冠禮也。」褚氏云：「賓蓋在西序端也，文省耳。此非昏禮之賓，安得在主人北？敖氏蓋欲破注相鄉之說而誤。」盛氏云：「序端不言東，西序不言端，文互見也。」今案：盛氏「文互見」一語最明。下經云「筵于東序，少北」，注云「少北，辟主人」，則序端之位，安得云辟子

乎？敖說非。贊者盥于洗西，升，立于房中，西面南上。盥于洗西，由賓階升也。立于房中，近其事也。南上，尊於主人之贊者。古文「盥」皆作「浣」。【疏】正義曰：程氏瑤田云：「汪肇濤謂經文是『贊者盥升』爲句，無『于洗西』三字，三字乃注譌入經者。案：此說精確，觀賈疏『無正文』句可見，當據疏刪正。」浦氏鏗云：「『于洗西』三字衍。賈疏云『贊者盥于洗西無正文』，若經有此三字，便是正文，何云無也？」戴氏震說同。案：唐石經及各本皆有此三字，未敢遽刪，然諸家之說自確也。○注云「盥於洗西，由賓階升也」者，朱氏大韶云：「《儀禮詳校》載汪肇濤說曰：『注本以此二句釋經盥升二字，若謂以由賓階升釋盥於洗西，則方位不相當矣。』段氏《經韻樓集》曰：『賈疏以洗西句絕，甚誤。注盥於洗爲句，西字下屬。贊者是賓黨，不當入門而右。洗在東，故知自西而東，仍自東而西也。注於洗二字，以明贊者之東。』大韶謹案：此句補明經義也。以經但云「盥」，故云「盥于洗西」，經但云「升」，故云「由賓階升」。知於洗西者，以《鄉飲》、《鄉射》皆主人盥于洗北，賓盥于洗南，故知贊者在洗西。阼階惟主人升降，其餘無論賓黨主黨，皆由西階，故知由賓階升。」今案：汪說、朱說是也。洗是承棄水之物，盥是別挹水於疊以沃之，

不於洗盥也。若如段說，以於洗爲句，則文義有難安矣。敖氏云：「盥者，重冠禮，故將執事而自潔清也。盥于洗西者，以洗西無筐，故得辟正賓，而盥於此也。」說亦通。云「立于房中，近其事也」者，以纚、笄、櫛等俱陳於房，待冠時贊者取以奠於筵端，故知立於此爲近其事也。云「南上，尊於主人之贊者」，此贊冠者止一人，而云「南上」，明與主人之贊者爲序。主人敬客，故尊之而在主人贊之上也。朱子云：「贊者西面，則負東墉，而在將冠者之東矣。」盛氏云：「此篇起宿賓節，止醴賓節，言贊者十有三，言主人之贊者一，而於始末二節特書曰贊冠者，則凡不言者可知。然其中有兼主贊言者，此節是也。兼，故下言主人之贊者以別之。有兼主贊、衆賓言者，醴賓節是也。兼，故下言贊冠者以別之。」今案：盛說頗有分曉。云「古文『盥』皆作『浣』」者，胡氏承珙云：「案：《說文》：『盥，澡手也。澣，濯衣垢也。澣或從完作浣。』是『澣』、『浣』一字，與『盥』義別。此經之義當爲澡手，則『盥』是正字，故鄭疊古文，不從也。」

右迎賓及贊冠者入

主人之贊者筵于東序，少北，西面。主人

之贊者，其屬中士若下士。筵，布席也。東序，主人位也。

適子冠於阼。少北，辟主人。【疏】正義曰：注云「主人之

贊者，其屬中士若下士」者，詳前「宿贊冠者一人」下。鄭意

以主人之贊者與賓贊者位略同也。敖氏以主人之贊者爲

私臣，褚氏云：「注謂其屬中士若下士者，以贊冠者止降賓

一等耳，其位亦不甚懸，其非私臣可知。」云「筵，布席也」

者，布席謂之筵，猶設尊謂之尊。此筵爲冠子也。云「東

序，主人位也。適子冠於阼」者，鄭意以東序爲主人之位，

而東序即在阼階之上，故又引《冠義》適子冠於阼，以見著

代之義。筵于東序而西面，則其位負東序矣。云「少北，辟

主人」者，江氏筠云：「父於東序冠子，而其位少北者，則又

是子之義不敢正居主位，猶父在之不由阼耳。」今案：適子

冠於阼，此經「筵于東序」是也。庶子則冠於房戶之外，詳

後庶子冠節。將冠者出房，南面。南面立於房外之

西，待賓命。【疏】正義曰：注云「南面立於房外之西」者，

李氏云：「《昏禮》『母南面於房外，女出於母左』，知房外南

面者，皆於房戶外之西，其房外之東，則南當阼階矣。」云

「待賓命」者，下文「賓揖將冠者」，即是命也。贊者莫

纚、笄、櫛于筵南端。贊者，賓之贊冠者也。莫，停

也。古文「櫛」爲「節」。【疏】正義曰：「筵南端」者，即東序

筵之南頭也。冠事已至，故取纚、笄、櫛莫於此，以待用也。

不言纚、紕等物，文不具也。纚、笄同篋，櫛實篋，經但言

纚、笄、櫛，則是已從篋、簞取出，其篋、簞不在筵端可知

也。注云「贊者，賓之贊冠者」，前「宿贊冠者」注云「佐賓

爲冠事者」，此「莫纚、笄、櫛」及下「櫛，設纚」，皆是佐冠之

事，故云「賓之贊冠者也」。云「莫，停也」者，《考工記·匠

人》「凡行莫水」，鄭司農云「莫讀爲停」，是莫有停義。故此

及《士昏禮》「坐奠饌」，注皆訓莫爲停也。云「古文「櫛」爲

「節」者，段氏云：「此從今文，不從古文者，亦謂「櫛」爲正

字，「節」爲假借字也。『櫛』，《周禮》作『櫛』。案：注凡言

「皆」者，如上文「古文盥皆作浣」，謂此篇「盥」字三見皆然。

不言「皆」者，如此經上文「櫛實于簞」，不言「古文作節」，至

此言之，則惟此一字古文作「節」耳。」賓揖將冠者。

將冠者即筵，坐。贊者坐，櫛，設纚。即，就。

設，施。【疏】正義曰：是時賓在西序端，將冠者在房外，蓋

東北面揖之，使就筵也。將冠者即筵，西面坐，贊者亦坐。

櫛者，爲之理髮也。櫛訖，則以纚輶之。朱子云：「古人坐

法，以膝著地，兩蹠向後，如今之跪。經凡言坐皆然。」

注云「即，就」者，詳前。云「設，施」者，《說文》：「設，施陳也。」賓降，主人降。賓辭，主人對。主人降，爲

賓將盥，不敢安位也。辭對之辭未聞。【疏】正義曰：注云

「主人降，爲賓將盥，不敢安位也」者，賓之降，爲將有事，盥以自潔。主人則以賓爲已事而降，不敢安於其位，而從之

降也。云「辭對之辭未聞」者，謂辭與對皆有辭，經記無文，故未聞也。注上「辭」字爲辭受之辭，下「辭」字謂辭說之

辭，今多混作「辭」，辨見《聘禮·記》。蔡氏德晉云：「賓辭，辭以主人無事，不必降也。主人對，對以勞賓降盥，不

敢不從降也。」○《禮經釋例》云：「凡禮盛者必先盥。案：

《士冠禮》：初加，賓盥，卒，壹揖壹讓，升，再加，賓盥如初。《士昏禮》：婦至，舉者盥。又：舅姑入于室，婦盥饋。

此冠、昏之盥也。《鄉飲酒》、《鄉射禮》：主人獻賓，盥洗。

注：「已盥乃洗爵，致潔敬也。」又云：卒洗升，復降盥。賓

酢主人同。又：介酢主人，降洗，卒洗，主人盥。注：「盥

者，當爲介酌。」《燕禮》、《大射》：主人獻賓，盥洗，卒洗，

升，復降盥。賓酢主人同。又：主人獻公，盥洗，升。此燕

飲之盥也。《公食禮》：設正饌，公降盥。此食禮之盥也。

《士喪禮》：飯含、小斂奠、①大斂奠、朝夕奠，經皆云盥。

凶事無洗，但設盆盥而已。此喪禮之盥也。《士虞禮》：陰

厭，祝盥，升。又：佐食及執事盥。《特牲饋食禮》：陰厭，主

婦盥于房中。又云：宗人遣佐食及執事盥。《少牢饋食

禮》：將祭，士盥，舉鼎。又：陰厭，祝盥于洗，②升自西

階，主人盥，升自阼階。《有司徹》：主人獻尸，降洗，卒

洗，降盥。此祭禮之盥也。考《士冠禮》：醴冠者，贊者洗

于房中。注：「盥而洗爵。」疏云：「凡洗爵者必先盥，盥有

不洗爵者。此經直云洗，明盥手乃洗爵，故鄭云盥而洗

爵。則經云洗爵者，皆盥而後洗。不云「盥」者，文不具

也。《釋例》又云：「凡賓、主相敵者，降則皆降。案：《鄉

飲酒禮》：主人獻賓，取爵于篚，降洗，賓降。注：「從主人

也。」卒洗，升，復降盥，賓亦降。賓酢主人，賓降洗，主人

降；卒洗，升，復降盥，如主人禮。主人酬賓，降洗，賓降；

升，主人卒饌，復降洗，賓降，如獻禮。主人獻介，降洗，介

降。介酢主人，降洗，主人復阼階，降辭如初。③《鄉射》

同，唯無介。《燕禮》：主人獻賓，此主人以宰夫爲之。降洗，賓

①「斂」，原作「飲」，今據《續清經解》本改。

②「祝」，原作「視」，今據《禮經釋例》改。

③「降」，原脫，今據《禮經釋例》改。

降；卒洗，升，復降盥，賓降。賓酢主人，賓以虛爵降，主人降；卒洗，升，復降盥，主人降。主人酬賓，主人降洗，賓降。《大射》同。《有司徹》：主人獻尸，主人降洗，尸、侑降；卒洗，升，復降盥，尸、侑降。主人受尸酢，尸降洗，主人降自阼階；卒洗，升，復降盥，主人降。主人酬尸，降，洗，爵，尸、侑降；卒洗，尸升，侑不升，主人先卒饌，降洗，尸降。《聘禮》：介面卿，介降拜，大夫降辭。此皆賓主相敵者，降則皆降也。《有司徹》：祭畢賓尸之禮，尸如賓，侑如介。則尸、侑皆賓，不似正祭時尸尊，故亦與主人俱降，如《鄉飲酒》也。《鄉飲酒》、《鄉射》：主人獻衆賓，不備升降之禮者，衆賓卑也。《燕禮》、《大射》：主人獻公，公不降者，公尊也。《公食大夫禮》：「公降盥，賓降，公辭。」賓主不敵，亦降者，主君尊賓也。《燕禮》、《大射》：主人獻卿、獻大夫，皆云「主人洗升」，不云「降」者，蓋卿大夫之位本在堂下，主人酬賓之後亦降復位也。獻士、獻庶子，不備升降之禮者，卑也。《有司徹》：主婦獻尸，洗于房中，不降者，婦人之禮變於男子也。《聘禮》：歸饗餼，聘賓僕使者，賓降堂，受老束錦，將以授使者。大夫即使者。止。注：「止不降，使之餘尊也。」賓盥，卒，壹揖壹讓，升。主人升，復初位。揖，讓皆壹者，降於初。古文「壹」皆作「一」。

【疏】正義曰：「賓盥卒」者，盥畢也。初位，即東序端之位。斯時升，亦主人先而賓從之。賓不言復初位者，以賓升即至筵前故也。注云「揖、讓皆壹者，降於初」者，初謂初升堂時三揖三讓然後升，此壹揖壹讓，為降殺於初也。云「古文「壹」皆作「一」者，胡氏承珙云：「一與壹，古今文皆互用。賈疏雖云一、壹得通，然鄭於經文必從壹不從一者，正以一為奇數，二為偶數。壹為始初之義，再為重複之詞。故凡與二對舉者從一為協，與再對舉者從壹為宜。經文有再讓，無二讓；有再拜，無二拜。明乎此，可以知鄭意矣。」

○《禮經釋例》云：「凡降洗、降盥，皆壹揖壹讓升。案：《鄉飲酒》、《鄉射》主人獻賓：「降洗，賓降。主人卒洗，壹揖壹讓，以賓升。」又：降盥，賓降，卒盥，亦壹揖壹讓升。賓酢主人，卒洗，揖讓如初，升，降盥，如主人之禮。主人酬賓，降，賓降；卒洗，揖讓升。主人卒饌訖，又：「降洗，賓辭降，①如獻禮，升。」《鄉飲酒》獻介，《鄉射》獻遵，皆「揖讓升，降洗，如賓禮，升」。《特牲》主人獻賓：「降阼階，西面拜賓如初，洗。賓辭洗。卒洗，揖讓升。」是皆壹揖壹讓

①「辭降」，《禮經釋例》同，據《儀禮·鄉飲酒》當作「降辭」。

也。《燕禮》、《大射》：主人獻賓、賓酢主人，降洗、降盥，皆賓揖先升，主人乃升；主人酬賓，降洗，卒洗，亦揖升，不讓。《鄉飲酒》、《鄉射》是賓、主人正禮，故揖讓俱升。《燕禮》、《大射》則宰夫爲主人，故賓揖不讓先升也。《公食大夫》：「卒盥，壹揖壹讓。公升，賓升。」此賓是異國之臣，故公先升也。《有司徹》：主人降洗降盥，尸、侑亦降。卒洗、卒盥，經但云「揖」，不云「讓」，禮殺也。《鄉飲酒》、《鄉射》：主人獻衆賓，卒洗，升。《有司徹》：主人受尸酢，卒洗、卒盥，升；主人獻長賓，卒洗，升。皆不揖不讓，禮又殺也。《燕禮》、《大射》獻卿、獻大夫、獻士，升不揖讓者，盛禮不在己也。至於《鄉飲酒》獻賓畢，賓降，立於階西，當序東面；獻介畢，介降，立於賓南；獻衆賓，衆賓之長升受者三人，畢，降復賓南東面位。《鄉射》同，但無介。至一人舉觶時，始揖讓升，蓋亦壹揖壹讓也。賓筵前坐，正纚，興，降西階一等。執冠者升一等，東面授賓。正纚者，將加冠，宜親之。興，起也。降，下也。下一等，升一等，則中等相授。冠，緇布冠也。【疏】正義曰：筵前，將冠者筵前也。執冠者東面授，則賓西面受也。授時亦以匱，既授則以匱退。注云「正纚者，將加冠，宜親之」

者，贊者既爲設纚矣，此賓復正之者，以將加冠，宜親其事也。云「興，起也」者，謂既正纚而起立，將降階取冠也。云「降，下也」者，《爾雅·釋言》文。云「下一等，升一等，則中等相授者」，《禮器》曰：「天子之堂九尺，諸侯七尺，大夫五尺，士三尺。」舊說士堂高三尺，階三等。程氏瑤田云：「階三等者，連堂廉而言。若除堂廉言之，則九尺之堂其階止八等，七尺者六等，五尺者四等，三尺者二等也。所謂盡等不升堂者，當是盡其廉下之等，而不踐廉以升堂也。而《士喪禮》注乃曰「盡階，三等之上」，則不升堂者已踐廉矣。」張氏惠言云：「下文「賓降三等受爵弁」，注云「降三等，下至地」。降三等而下至地，則凡階上等即堂廉也。案：《公食禮》：大夫食賓受醬涪等，皆自阼階降堂受，授者升一等。注云：「降堂，謂止階上。」則堂廉上也。《士昏禮》：廟見，婦降堂，取筭菜。注：「降堂，階上也。」婦人無降階之事，則在堂廉上又可知。蓋堂之界以殿爲限，殿以前即爲階，自堂而出至階廉即爲降堂，降一等乃爲降階。在階之上等接簷下，爲盡階不升堂。然則堂更當崇於階，乃有升降之節。堂高數尺，但就階廉爲度耳。中等者，中，隔也。謂不竝等，即爲中等。」今案：階三等，程氏、張氏俱以爲連堂廉言之，是也。此經賓降一等，則在二等之上，執冠者升一

等，則在三等之上，授者、受者不竝等而立，即爲中等。然則注云「中等相授」，即謂隔等相授，張說亦是。至程氏引《喪服小記》「中一以上」，張氏引「中月而禪」，^①以釋此注「中」字，謂中等爲間一等。則階有四等矣，恐非。又《鄉射》云：「上射先升三等，下射從之，中等。」所謂中等，則當如程、張所云也。賓右手執項，左手執前，進容，乃祝。坐如初，乃冠。興，復位。贊者卒。進容者，行翔而前，鵠焉，至則立祝。坐如初，坐筵前。興，起也。復位，西序東面。卒，謂設缺項，結纓也。【疏】正義曰：項，冠之後。前，冠之面也。下皮弁亦云「右執項，左執前」，則此項非缺項明矣。乃冠，謂以緇布冠加於將冠者之首。興，謂賓也。○注「行翔而前鵠焉」，「鵠」，《通典》作「鏘」。云「進容者，行翔而前鵠焉」者，翔謂行而張拱，鵠謂容貌舒揚。鵠與踰同，詳《聘禮·記》。此謂賓進至筵前，特正其容儀，爲冠者取法也。云「至則立祝」者，此釋經「乃祝」之文，謂先祝而後加冠也。云「坐如初，坐筵前」者，初時賓筵前坐，此亦如之。云「復位，西序東面」者，謂復賓初升時西序東面之位也。云「卒謂設缺項、結纓也」者，纓即屬於缺，俟加冠後乃可結之。此贊者，亦賓之贊冠者也。方氏苞云：「經不言卒纓，以兼治其屬於缺者，統言

卒，乃可以該之。」今案：卒謂終其事也。冠者興，賓揖之。適房，服玄端、爵韞。出房，南面。復出房南面者，一加禮成，觀衆以容體。【疏】正義曰：此但言冠者，不言將，以已加冠也。揖之適房，使釋采衣，服玄端服也。李氏云：「冠於堂，服於房，以冠爲重也。」方氏苞云：「據經，乃冠者自服而出，蓋被服、束帶、納屨等事，自成童已習爲之。敖氏謂皆贊者爲之，^②未知何據。」○注「容體」，《通典》「體」作「儀」。云「復出房南面者，一加禮成，觀衆以容體」者，上出房南面以待加冠，此復出房南面者，則以一加禮成，服成人之服，使衆觀知也。朱子云：「觀，示也。」《禮記·冠義》曰：「冠而後服備，服備而後容體正，顏色齊，辭令順。」吳氏《疑義》云：「出房，以待再加，不特觀衆而已。」今案：吳說亦是。

右 始 加

賓揖之，即筵坐。櫛，設筭。賓盥，正

① 「張」，原作「段」，今據上下文意改。下「程張」同。

② 「皆」，《儀禮析疑》同，段校據《儀禮集說》改作「亦」。

纚如初。降二等，受皮弁，右執項，左執前，進祝，加之如初，復位。贊者卒紼。如初，爲不見者言也。卒紼，謂繫屬之。【疏】正義曰：「賓揖之」，謂揖冠者，使即筵坐也。斯時贊者亦坐，經不言者，省文。「櫛，設筭」，亦贊者爲之。櫛者，以將加皮弁，必先脫去緇布冠，恐髮亂，故重櫛也。賈疏云：「設筭有二種：一是紒內安髮之筭，一是皮弁、爵弁及六冕固冠之筭。今此櫛訖未加冠，即言設筭者，宜是紒內安髮之筭也。」又云：「其固冠之筭，則賓於加弁時自設之。」今案：《魏書·劉芳傳》載：「王肅曰：『《喪服》稱男子免而婦人髻，男子冠而婦人筭，則男子不應有筭。』」芳曰：「此專謂凶事也，非謂男子無筭。《禮·內則》稱子事父母，雞初鳴，櫛、纚、筭、總。以茲而言，男子有筭明矣。」肅以芳言爲然。」案：《內則》筭總之筭，即安髮之筭，賈說是也。敖氏不信二筭之說，以此筭即爲上所陳之皮弁筭。褚氏云：「設筭在正纚前，安得指爲皮弁筭？」江氏筠亦辨之。但安髮之筭緇布冠亦有，始加不言者，互見爲義也。「賓盥，正纚如初」，不更言設纚，則止一纚矣。復位，仍復西序之位也。注云：「如初，爲不見者言也」者，以其儀節已見於前，而經省文，不復重見，則言如初以括之。李氏云：「不見，謂辭對主人升復位之類。」

云「卒紼，謂繫屬之」者，謂加弁訖，以紼繫於筭之左頭，遠頤下屈而上，屬於右頭是也。興，賓揖之。適房，服素積、素鞞。容，出房，南面。容者，再加彌成，其儀益繁。【疏】正義曰：興，冠者興也。敖氏云：「上不見皮弁之衣，故此亦不言之，皆省文也。」注云「容者，再加彌成，其儀益繁」者，上加緇布冠時，亦正其容體，但經不言容，至再加乃言之，是儀益繁也。王氏士讓云：「始加云『進容，乃祝』，言賓之自正以容。再加云『容』，見冠者之敬其威儀也。」

右再加

賓降三等，受爵弁，加之。服纁裳、韎韐。其他如加皮弁之儀。降三等，下至地。他，謂卒紼、容、出。【疏】正義曰：降二等受皮弁，降三等受爵弁。高氏愈謂「其服彌尊，其敬彌至」是也。不言純衣，亦省文。○《禮經釋例》云：「凡士禮，冠、昏、喪、祭皆攝盛。案：《士冠禮》：再加皮弁服，三加爵弁服，冠畢乃易服，服

玄冠、玄端、爵弁，莫摯見於君，遂以見於卿大夫鄉先生。^①注謂：「皮弁服，與君視朔之服。爵弁服，與君祭之服。」惟玄端爲士之正服，見君必易玄冠、玄端者，明皮弁、爵弁二服是攝盛，非士所常服也。此冠禮之攝盛。《士昏禮》：「納采用鴈。」^②《周禮·大宗伯》：「以禽作六摯，大夫執鴈，士執雉。」士當用雉而用鴈者，攝盛也。注謂「取其順陰陽往來」者，非也。又云：「主人爵弁、纁裳、緇帶。乘墨車。婦車亦如之。」注：「墨車，漆車。士而乘墨車，攝盛也。」疏云：「爵弁，用助祭之服親迎，以爲攝盛。」《周禮·司服》：「士之服，自皮弁而下，如大夫之服。」爵弁尊於皮弁，非士服明矣。經又云：「女次，純衣，纁袿。」注：「次，首飾也，今時髮也。」《周禮·追師》掌爲副、編、次。純衣，絲衣。考士妻當服纁、笄、宵衣，則次而純衣，亦攝盛也。此昏禮之攝盛。《士喪禮》：「復者一人，以爵弁服。」又云：「陳襲事于房中。纁極二。爵弁服，純衣。皮弁服。祿衣。緇帶，緼屨。」考極唯公射始有之，此攝盛也。《既夕禮》：大遣奠，厥明，陳鼎五于門外。注：「士禮特性三鼎，盛葬莫，加一等，用少牢也。」注謂盛葬莫，即攝盛之意也。《既夕·記》：「薦乘車，載旛，載皮弁服。」注：「通帛爲旛，孤卿之所建，^③亦攝焉。」此乘車當亦攝盛用墨車，注以爲

棧車，疑非。君贈，賓奠幣於棧，此謂柩車，非乘車也。此喪禮之攝盛。《士虞禮》、《特牲饋食禮》：尸飯畢，皆三獻。考飲酒之禮：士一獻，大夫三獻。士祭而三獻者，攝盛也。此祭禮之攝盛。冠、昏爲人道之始，喪、祭爲人道之終，故皆攝盛，與他禮不同。後儒但知昏禮爲攝盛，而不知冠與喪、祭亦然，故多歧說也。」注云「他，謂卒紼、容、出」者，謂唯卒紼、容、出，如再加皮弁之儀也。經獨言其他，明餘禮節，如賓盥、降、升之類，皆與始加同，故略之。《五禮通考》引《五經名義》云：「士冠三加：始緇布冠，欲其尚質重古。次皮弁，欲其行三德三行。次爵弁，欲其承事神明。」《禮記·玉藻》曰：「玄冠朱組纁，天子之冠也。緇布冠纁綬，諸侯之冠也。」陳氏澠云：「天子始冠之冠則玄冠，而以朱組爲纁。諸侯雖是緇布冠，卻用雜采之纁爲纁綬，爲尊者飾耳，非古制也。」陳氏祥道《禮書》云：「諸侯始加緇布冠纁綬，次加皮弁，三加爵弁，四加玄冕。天子則始加玄

①「以」下，據本篇經文當有「摯」字。

②「鴈」，原作「雁」，今據《禮經釋例》改。下「大夫執鴈」、「而用鴈者」同。

③「建」，原作「見」，今據《禮經釋例》改。

冠朱組纓，次加皮弁，三加爵弁，四加玄冕，五加袞冕矣。《郊特牲》言「玄冠朱組纓，天子之冠。緇布冠纁綬，諸侯之冠」，鄭氏皆以爲始冠之冠。《家語》稱成王冠，祝雍辭曰「去幼志，心袞職」。而賈公彥、孔穎達皆言天子當加袞冕，則始終之所加與士異也。《家語》曰「王太子之冠亦儗諸侯四加，則天子五加可知矣」。今案：諸侯四加，天子五加，蓋據傳記推而言之。其「玄冠朱組纓」云云，乃《玉藻》文，陳氏引作《郊特牲》，誤。徹皮弁、冠、櫛、筵，入于房。徹者，贊冠者、主人之贊者爲之。【疏】正義曰：將禮冠者，故徹去此等，入於房。冠，緇布冠也。但言徹皮弁，緇布冠者，以爵弁冠者服以受醴，至見姑姊訖，乃易服也。注云「徹者，贊冠者、主人之贊者爲之」者，以其上文主人之贊者設筵，賓贊冠者奠櫛，故知此徹是賓黨、主黨之贊者爲之也。

右 三 加

筵于户西，南面。筵，主人之贊者。户西，室户西。【疏】正義曰：此筵爲醴子也。冠醴子筵於户西，與昏之禮賓筵於户西者同，以其成人尊之。設席南面，以東方

爲上也。褚氏云：「户西，廟中最尊之位，自户而外，惟賓居之，故下記云「醴於客位，加有成也」。敖謂遠避主人，非特失旨，且背記文。」注云「筵，主人之贊者」，以上文筵于東序，經明云主人之贊者，故知此筵亦同也。云「户西，室户西」者，凡五架之屋，棟北楣下爲三間，中爲室，東西爲房。房之南壁止一戶，室則有戶有牖，戶在東，牖在西。故户西牖東之地爲正中，《爾雅》所謂「户牖之間謂之扃」是也。鄭恐人疑爲房戶，故特明之。李氏云：「寢廟以室爲主，故室戶專得户名，凡言戶者皆室戶。若房戶，則兼言房以別之。」贊者洗于房中，側酌醴，加枌，覆之，面葉。洗，盥而洗爵者。《昏禮》曰：「房中之洗在北堂，直室東隅。筐在洗東，北面盥。」側酌者，言無爲之薦者。面，前也。葉，枌大端。贊酌者，賓尊不入房。古文「葉」爲「揭」。【疏】正義曰：注「古文葉爲揭」，陳、閩、監、葛「揭」俱誤作「揭」。《校勘記》云：「案：『揭』，當作『攬』。說詳《聘禮》。」段氏云：「揭，當作『攬』，字之誤也。舊籍『攬』皆誤，如獵作獬，臘作臠，攬作鑢，攬作躡，鬣作鬣，皆是。《聘禮》經注皆從手作攬，而《廣韻》、《集韻》二十九葉俱云：「攬，枌端。攬，理持也。」然則《禮經》古本攬從木明矣。《少儀》「執箕膺揭」，亦當作攬。《校勘記》謂當從手作

「撮」，二者不同耳。○云「洗，盥而洗爵者」，凡洗爵必先盥手，故注云然。云《昏禮》曰：「房中之洗在北堂，直室東隅。筐在洗東，北面盥」者，此《昏禮·記》文。鄭以經云「洗於房中」，故引《昏禮》房中有洗以證之。萬氏斯大讀「贊者洗」爲句，後人頗惑其說，惟沈氏彤、江氏筠辨之最力。沈氏云：「贊者之洗，爲酌醴而洗觶也。觶實於筐，筐置房中，與醴同在服北，則洗於房中固其所宜。萬氏以洗絕句，而謂就庭中之洗洗觶，失之矣。」江氏云：「萬駁鄭注云：『《昏禮》舅洗於南洗，姑洗於北洗，男女有別之義也。《冠禮》無婦人與事，贊者何容別洗。況考上文陳器，第云設洗直于東榮，無北堂別置洗之文。』」筠案：經惟《昏禮》見北洗之文，然其所設之處，至下記始見之，而經初不言也。其餘如《特牲》、《少牢》云「主婦盥于房中」、「主婦洗于房中」，俱是北洗。而其上文陳器，皆止云「設洗於阼階東南」，初不及其在房中者。然則凡北堂設洗，經皆不見之，不得執以相難。至於房中之文見於經者，句讀總於中字絕，未有於字之上爲句，而以此三字貫下連讀者，又不應此處獨與他處異也。《聘禮》宰夫佐酌，鄭注謂洗升實觶者，彼乃禮尊於東箱，未聞在房者而然也。蓋婦人無堂下位，

故不得用庭洗。男子得立於房中，則亦得用房中之洗。其有婦人與事，則此洗非所宜用，無婦人亦得用之。」今案：沈、江二說，足破萬氏之謬。北堂設洗，詳《昏禮·記》。云「側酌者，言無爲之薦者」，無爲之薦，謂無人爲之薦脯醢也。鄭意以贊者自酌自薦爲側。吳氏《疑義》云：「側即上文側尊側字，彼注以側爲特，謂無玄酒也。此經言側酌醴，亦謂特酌醴而無玄酒，其義甚明，與脯醢何涉？注以側酌爲贊者獨自酌之，其說可通，若謂竝以明下文脯醢爲贊者獨自薦之，則鑿矣。」今案：吳說是也。云「面，前也」者，謂葉在前，枋在後也。《書·顧命》：「大辂在賓階面」，傳亦云：「面，前也。」葉，枋大端」者，詳前「實勺觶角枋」下。經云「加枋，覆之」者，蓋未用時覆於觶上，用時則仰也。李氏云：「枋，禮也。其兩端枋細而葉大。贊者面葉以授賓，賓迎受得面枋以授冠者，冠者亦迎受得面葉以授醴也。」云「贊酌者，賓尊不入房」者，賓尊在堂，不入房，故房中酌醴等事皆贊者爲之。下文「薦脯醢」，注以爲贊冠者薦，則此贊亦贊冠者也。云「古文『葉』爲『搗』」者，段氏云：「《士冠》、《士昏》注皆云：『古文葉爲搗。』而《聘禮》：『以枋兼諸觶，尚撮。』」撮即搗字，《聘禮》從古文，《冠》、《昏

禮》從今文也。所從不一者，葉是本文，謂平面如木葉然。攬是假借字，^①皆可從也。《聘禮》注不云「今文攬爲葉」

者，可互見也。必知攬是搗非者，攬與葉同部，葛聲不同部也。「賓揖，冠者就筵，筵西南面。賓受醴于戶東，加枌，面枌，筵前北面。」戶東，室戶東。今

文「枌」爲「柄」。【疏】正義曰：李氏云：「父醴子而賓主之者，以父子不可行揖拜之禮，猶《燕禮》以宰夫爲主人也。」褚氏云：「面枌者，訝受也。贊酌時已言加枌，此復言者，

蓋因下面枌而連言之耳。敖氏謂見其更爲之，非也。觀

《昏禮》「主人受醴，面枌」不言加枌自明。」王氏士讓云：

「賓致醴辭，當在筵前北面，冠者將受觶之際。」注云「戶

東，室戶東」者，以其贊者酌醴自房出，賓當於室戶東受之，不得以爲房戶也。云「今文「枌」爲「柄」者，胡氏承珙云：

「案：《說文》：「柄，柯也。枌，木作車。」此經之義，作「柄」

爲近。然古音方聲、丙聲同部，從方從丙字多通，故鄭於

《冠》、《昏》二篇從古文作「枌」，而於《少牢禮》又依今文作

「柄」也。」冠者筵西拜受觶，賓東面荅拜。筵西

拜，南面拜也。賓還，荅拜於西序之位。東面者，明成人與

爲禮。異於荅主人。【疏】正義曰：注「賓還，荅拜於西序

之位」，葛本脫「還」字，《集釋》「西序」誤作「東序」。云

「筵西拜，南面拜也」者，以上云「冠者就筵，筵西南面」知之。吳氏云：「凡筵西拜，皆南面。」云「賓還，荅拜於西序

之位。東面者，明成人與爲禮」者，賓既授觶，還西序端，東面荅之。不云「拜送觶」者，以冠者幼，故賓不先拜送，俟其

拜受而荅拜之，明成人而與爲禮也。云「異於荅主人」者，

李氏云：「凡賓荅主人，拜於西階上，北面。又主人禮賓，

皆云拜送，此云荅拜，亦異於主人。」薦脯醢。贊冠者

也。【疏】正義曰：脯，籩實。醢，豆實。《昏禮》注云：

「薦，進也。」凡醴必用籩豆，詳上。注云「贊冠者也」，謂

此脯醢贊冠者薦之。冠者即筵坐，左執觶，右祭

脯醢，以枌祭醴三，興。筵末坐，啐醴，建

枌，興。降筵，坐奠觶，拜，執觶興。賓荅

拜。建枌，扱枌於醴中。其拜皆如初。古文「啐」爲「呼」。

【疏】正義曰：「以枌祭醴三」，毛本三誤二。「建枌」，唐石

經、嚴、徐、《集釋》、敖氏俱作「建」，注「建枌」同。《通解》、

毛本「建」俱作「捷」，蓋因《釋文》而誤改。錢氏大昕云：

①「攬」，原作「攬」，今據《儀禮漢讀攷》改。

「士昏禮」婦受醴，亦有「坐啐醴，建柶」之文，則作「建」爲是。《禮經釋例》云：「《士昏》、《聘禮》皆云「建柶」，當從石經也。」注「拔柶於醴中」，「拔」，《釋文》作「捷」，云「本又作插，亦作拔」。今案：嚴本及各本多作「拔」，蓋用《釋文》亦作之本也。戴氏震校《集釋》云：「唐初已非一本，毋庸改「拔」爲「捷」。盧氏文弼云：「《釋文》云云，正指注言。後人誤會，乃改經之「建柶」爲「捷柶」，失之矣。」《校勘記》云：「案：《集釋》云：「建，陸作捷。」蓋其誤自李氏始。」○「左執觶」者，以右手祭，故左手執觶也。「以柶祭醴三」，詳《士昏·記》。筵末，筵之西端也。啐，嘗也。祭則坐於筵中，啐則坐於筵末，拜則降筵也。降筵，則在筵西矣。此爲拜而降，以席上不拜也。觶亦爲拜而暫奠，與奠於薦東者異。李氏云：「祭謂取少許祭先世造此食者，不忘本也。凡醴不卒觶，啐之而禮成。上拜，拜受觶。此拜，拜禮成。其卒觶者，則卒觶乃拜。《曾子問》曰：「將冠子，冠者至，聞齊衰，大功之喪，如之何？」孔子曰：「內喪則廢，外喪則冠而不醴，徹饌而歸，即位而哭。如冠者未至，則廢。」內喪，謂同門者。冠者，謂賓及贊者也。廢者，喪成服，因喪而冠。」敖氏云：「祭脯醢，以脯祭搗醢而祭之。」注云「建柶，拔柶於醴中」者，拔與插同。謂祭畢不用，以柶插於

醴中也。敖氏云：「建猶立也。建者，上葉下枋。」盛氏謂「上枋下葉」，似盛氏是。云「其拜皆如初」者，謂冠者筵西南面拜，賓西序端東面荅拜，與上受觶同，故云「如初」。《禮經釋例》云：「凡醴皆用觶，不卒爵。《士冠禮》賓體冠者：「筵末坐，啐醴，建柶，興。降筵，坐奠觶，拜。」《士昏禮》女父體使者：「西階上北面坐，啐醴，建柶，興。坐奠觶，遂拜。」又舅姑體婦：「降席，東面坐，啐醴，建柶，興。拜。」《聘禮》主君體聘賓：「降筵，北面，以柶兼諸觶，尚攝，坐啐醴。」是凡醴皆用觶，但啐之而已，不卒爵也。舅姑體婦：「降席，東面坐，啐醴。」賓體冠者，但云「筵末坐，啐醴」，不云「東面」。女父體使者：「西階上北面坐，啐醴。」主君禮聘賓，但云「北面坐，啐醴」，不云「西階上」。皆文不具也。醴事實，如羹之有大羹湑，酒之有明水，故啐而不卒爵，從其實也。至《聘禮》禮賓，有庭實，用束帛，與冠昏不同者，蓋國君之禮又盛矣。盛氏云：「不卒觶者，糟醴不可盡也。」云「古文「啐」爲「呼」者，段氏云：「案：「呼」與「啐」音義皆隔，必是誤字。當是古文「啐」爲「啐」之誤。如古文「醕」作「酌」，今禮「酌」皆誤「酌」也。」

右賓醴冠者

冠者奠饌于薦東，降筵，北面坐取脯，降自西階，適東壁，北面見于母。薦東，薦左。

凡奠爵，將舉者於右，不舉者於左。適東壁者，出闔門也。時母在闔門之外。婦人入廟由闔門。【疏】正義曰：此奠饌亦於筵上，故下云降筵也。取脯，或以爲祭脯。褚氏云：「《特牲》、《少牢》俱云賓取祭以降，則祭脯也。此篇下文卒醢，云取籩脯如初，則是籩內之脯，非祭脯也。不敢取祭餘者以見母，敬也。凡已祭者，不復實於籩。」今案：褚說是也。必取脯者，明其見禮也。《士昏·記》：「賓右取脯，歸，執以反命」，與此相類。「降自西階」，父在，不敢由阼也。注云「薦東，薦左」。凡奠爵，將舉者於右，不舉者於左者，此薦即籩豆也。敖氏云：「籩豆而云薦者，上經云『薦脯醢』，故因其事名之，省文，後皆放此。」《禮經釋例》云：「醴不卒爵，故皆奠於薦左，注謂『不舉者於左』是也。醴子之席，筵於戶西，南面，故注以薦東爲薦左也。」《士昏禮》：「女父醴使者，奠于薦左。」注：「薦左，籩豆之東。」賓席亦南面，故注以薦左爲籩豆之東也。舅姑醴婦，奠于薦東，婦席戶牖間南面也。《聘禮》：「主君醴聘賓，北面奠于薦東。」注「醴醴不啐」，當作「醴醴不卒爵」，則與「奠于薦東」經文相應也。又此篇醢用酒，冠者奠爵於薦東。此禮

雖用酒，不用醴，亦但啐酒而已，不卒爵，與醴同，異於飲酒正禮，故亦奠於薦左也。」今案：飲酒正禮，亦將舉者於右，不舉者於左，但其儀節較醴爲更繁耳。詳《鄉飲酒·記》。

云「適東壁者，出闔門也。時母在闔門之外。婦人入廟由闔門」者，《爾雅》「宮中之門謂之闔」，郭注謂「相通小門也」。言宮中，則廟與寢皆有之。郝氏敬謂如此則廟反在宅右，萬氏斯大亦謂乖左祖之制，皆非也。東壁，堂下東牆也。冠者降自西階，由西而東，折而北，乃得見母，故知適東壁者，出闔門也。「時母在闔門之外」者，江氏筠云：「惟房中乃婦人位，今既因贊者在房，而不得位於此，則其不入闔門明矣。」褚氏云：「廟中未有無事而入者，母在闔門外無疑。」二說是也。《雜記》曰「夫人至，入自闔門」，故知闔門爲婦人出入所由也。母拜受，子拜送，母又拜。婦人於丈夫，雖其子，猶俠拜。【疏】正義曰：母拜受，受脯也。子拜送，而母又拜，俠拜也。或疑母無拜子之理，萬氏斯大云：「孔疏謂奠席之脯重，從尊者處來，故拜之，非拜子也。呂氏謂母有從子之義，故屈庸敬，以伸斯須之敬。王氏謂此適子代父承祖，與祖爲正體，故禮之與衆子異。愚以爲皆非也。案：禮，婦人之拜有二：肅拜也，手拜也。肅拜者，足不跪，微俯其躬而肅之，如今婦人揖也。手拜

者，足跪地而拜，如今婦人拜也。《少儀》曰：「婦人吉事，雖有君賜，肅拜。」君賜至重，尚止肅拜，況其他乎？故知此受脯俠拜，亦肅拜也。今案：《禮記·冠義》曰：「見於母，母拜之，見於兄弟，兄弟拜之，成人而與爲禮也。」成人而與爲禮」一語，即是定解。孔疏以下諸說紛如，萬氏駁之，是已。至謂俠拜爲肅拜，亦是也。唯謂子「先揖而後拜送，既拜而更揖」，與經不相符耳。^①《特性》餞，父拜子。《昏》舅姑饗婦，則拜婦。禮各有宜也。或又疑子無見父與賓之文，《儀禮紉解》云：「父冠其子，延賓以重其事。父自爲主而涖之，即是見也。賓既與冠者成禮於堂矣，亦不必更行見賓之禮。」是也。注云「婦人於丈夫，雖其子猶俠拜」者，《禮經釋例》云：「凡婦人於丈夫皆俠拜。俠拜者，丈夫拜一次，婦人則拜兩次也。《士冠禮》冠者取脯見于母：「母拜受，子拜送，母又拜。」又：「見姑姊，如見母。」注：「姑與姊亦俠拜也。」《士昏禮》婦見舅姑：「執筭棗栗，自門入，升自西階，進拜，奠于席。舅坐撫之，興，荅拜。婦還，又拜。」注：「還又拜者，還於先拜處拜。婦人與丈夫爲禮，則俠拜。」又贊醴婦：「婦東面拜受，贊西階上北面拜送，婦又拜。」又：「啐醴，拜。贊荅拜。婦又拜。」皆俠拜也。《士昏·記》：不親迎壻見，主婦一拜，壻荅再拜，主婦

又拜。注：「必先一拜者，婦人於丈夫必俠拜。」《少牢禮》：主婦亞獻，酌，拜，獻尸；尸拜受，主婦西面拜送爵。《有司徹》：主婦拜，獻尸；尸拜于筵上，受；主婦西面拜送爵。不賓尸之禮：「尸酢主婦，主婦拜受爵，尸荅拜。主婦反位，又拜。」注：「主婦俠爵拜。」^②亦皆俠拜。至於《特性》：主婦亞獻，主婦致爵于主人，主婦自醋，《少牢》尸酢主婦，主婦獻祝，主婦獻兩佐食，《有司徹》主婦獻侑，主婦致爵于主人，主婦自酢，賓致爵于主婦，受爵，送爵，啐酒，卒爵，皆不俠拜。《特性》：主婦亞獻。注：「不俠拜，士妻儀簡耳。」《少牢》：主婦亞獻，卒爵。《有司徹》：主婦獻尸，啐酒，卒爵。不賓尸之禮：尸醋主婦，卒爵。亦不俠拜，皆降殺之義。《少牢》：主婦獻祝，祝拜受爵，主婦荅拜。注：「不俠拜，下尸也。」餘可類推矣。」

右冠者見於母

賓降，直西序，東面。主人降，復初位。

① 「與」，原作「歟」，今據《續清經解》本改。

② 「主」，原脫，今據《禮經釋例》補。

初位，初至階讓升之位。【疏】正義曰：注云「初位，初至階讓升之位」者，程氏瑤田云：「案：主人初立於阼階下，直東序，西面。此云復初位，即其位也。賓主階上立位在序端，則階下立位亦宜直東西序，與賓主位必相對也。且至階讓升處，賓主皆然，非位也。鄭注蓋誤。」今案：程說是也，張氏惠言亦辨之。冠者立于西階東，南面。

賓字之，冠者對。對，應也。其辭未聞。【疏】正義曰：王氏士讓云：「案：冠者立于西階東，乃西階下之東也。是時尊者既降，卑者豈得獨升？冠者見母後，經無升階之儀，足以見之矣。」今案：南面，蓋在賓北也。《禮記·冠義》曰「已冠而字之，成人之道也」，鄭注「字，所以相尊也」。記於下乃云見母，似見母在字後者，記文隨舉為義，其實次序當以此經為正。賈疏云：「未字先見母，字訖乃見兄弟之等，急於母，緩於兄弟也。」注云「對，應也」者，《漢書·注》「對謂應對」是也。云「其辭未聞」者，謂對之辭未聞也。

右賓字冠者

賓出，^①主人送于廟門外。不出外門，將醴

之。【疏】正義曰：張氏爾岐云：「此下冠禮既成，賓出就

次以後諸事。冠者見兄弟，見贊者，見姑姊，為一節；易服，見君，見卿大夫、鄉先生，為一節；主人醴賓，為一節，凡三節。請醴賓，賓禮辭，許。賓就次。此禮當作禮。禮賓者，謝其自勤勞也。次，門外更衣處也，以帷幕簾席為之。【疏】正義曰：此請醴賓，蓋主人於送時請之，賓許而後就次，不出外門也。敖氏云：「請者，有白於人而恭孫之辭也。」○注「此醴當作禮」下，嚴、徐、《集釋》《通解》、敖氏俱有「禮賓者謝其自勤勞也」九字，毛本脫。「以帷幕」，「以」，毛本誤「必」，嚴、徐、《集釋》《通解》《要義》、敖氏俱作「以」。云「此醴當作禮」者，下「若不醴」注「醴亦當作禮」，《士昏禮》「出請醴賓」注「此醴亦當為禮」，「贊醴婦」注「醴當為禮」。褚氏云：「經於『醴賓』、『醴婦』字皆為『醴』，注必讀為禮者，蓋推優禮於人之意，不欲質言之也。賈疏謂天子禮諸侯用鬯，不云『鬯賓』，足破不必改禮之論。」云「禮賓者，謝其自勤勞也」者，胡氏承珙云：「鄭既破醴為禮，故禮賓之禮，即易字說之。《昏禮》注云「此醴亦當為禮。禮賓者，欲厚之」，又「贊禮婦者，以其婦道新成，親厚之」。其易字說經，並與此經同。『醴辭曰』注則不破

①「賓」，原作「實」，今據《續清經解》本改。

從禮，惟「禮於阼」注疊「今文作醴」不用，①賈疏云：「以其言醴則不兼於醢，言禮則兼醴醢二法故也。」然則此「若不醴」，正是不兼於醢，故當作醴，而注仍破從禮者，疑此注本是前文「乃醴賓以壹獻之禮」注，寫者誤移於此。然彼處疏云「此醴亦當爲禮，不言可知也」，則在賈時已誤矣。今案：此以「若不醴」爲當作「禮」，②是也。云「次，門外更衣處也」者，此門外即席門外，以經云就次，不更言出門可知也。更衣處，謂可於此更換衣服且小息也。鄭注《周禮·序官·掌次》云「次，自修止之處」，又其職云「凡祭祀，張尸次」，鄭司農云「尸次，祭祀之尸所居更衣帳」，與此注義同。此冠禮賓有次，聘禮賓亦有次，射有射次，喪有喪次。覲禮受舍于朝，亦謂次也。義詳各篇下。云「以帷幕簟席爲之」者，帷幕用布，簟席用葦，言二者皆可爲次也。李氏云：「《聘禮·記》以帷，士或用簟席。」冠者見于兄弟，兄弟再拜，冠者荅拜。見贊者，西面拜，亦如之。見贊者西面拜，則見兄弟東面拜。贊者後賓出。【疏】正義曰：敖氏云：「兄弟與贊者皆先拜之，亦重冠禮也。」今案：重冠禮，即謂重其成人而與爲禮也。「亦如之」者，謂如其再拜而冠者荅拜也。此兄弟兼外嫗言，義已詳

上，非謂兄與弟也。吳氏《章句》乃分別兄弟解之，或又謂見弟則宜見妹，皆誤。注云「見贊者西面拜，則見兄弟東面拜」者，經但言見贊者西面，不言見兄弟面位，故注明之。斯時贊者位在西方，兄弟位在洗東也。云「贊者後賓出」者，以當與冠者爲禮也。贊者出，亦就次待禮可知。人

見姑姊，如見母。入，入寢門也。席在寢門外。如見母者，亦北面，姑與姊亦俠拜也。不見妹，妹卑。【疏】正義曰：注「亦俠拜也」，《集釋》無「也」字，嚴本有。云「入，入寢門也。席在寢門外」者，廟在寢東，與寢別門。又姑姊當在寢，不在廟，故知自廟而言入，爲出廟門而入寢門也。云「如見母者，亦北面，姑與姊亦俠拜也」者，上經見母北面，母俠拜，故知經言如者，亦如其北面及俠拜也。鄭分姑與姊爲二，或據《左傳疏》云「古人謂姑爲姑姊、妹，父之姊爲姑姊，父之妹爲姑姊」，謂《冠禮》之姑姊即姑，並引《列女傳》魯義姑姊、梁節姑姊，以駁鄭注。今案：姑姊、姑姊，後世容有此稱，周公制禮則無之。《爾雅》亦周公作，而《釋親》篇止云「父之姊妹爲姑」，不云「姑姊」、「姑姊」，其證一

①「用」下，段校補「者」字，與《儀禮古今文疏義》合。

②「爲」，據上文或當作「不」字。

也。《儀禮·喪服》篇多言姑姊妹，若以爲姑姊、姊妹，則是父之姊妹有服，而已之姊妹無服。周公制禮，何獨遺之？其證二也。《白虎通》云：「父之昆弟不俱謂之世父，父之女昆弟俱謂之姑，何也？姑當外適人，疏，故總言之。」其證三也。況姑姊、姊妹均屬父行，冠者冠畢，何獨見父之姊，而不見父之妹？以是知此篇之姑姊，當如鄭說，未可易也。云「不見妹，妹卑」者，案：《白虎通》云「姊尊妹卑，其禮異也」，注蓋本此。《邶風·泉水》詩曰：「問我諸姑，遂及伯姊。」言姑姊而不言妹，斯可證已。

右冠者見兄弟贊者姑姊

乃易服，服玄冠、玄端、爵韠，奠摯見于君。遂以摯見于鄉大夫、鄉先生。易服，不朝服者，非朝事也。摯，雉也。鄉先生，鄉中老人爲卿大夫致仕者。【疏】正義曰：「奠摯」，《釋文》「摯」作「贊」，云「本又作摯」。唐石經、嚴本俱作「摯」。《校勘記》云：「案：『摯』、『贊』今本錯出，宜俱從手，後不悉校。」「鄉大夫」，「鄉」當作「卿」，唐石經、嚴本俱作「鄉」。劉端臨《遺書》云：「陸德明《釋文》『鄉』字無音，至《禮記·冠義》，則云

「鄉大夫、鄉先生竝音香」。自此以後，《儀禮》、《禮記》各本皆作「鄉」，即石經亦然。由今考之，此經及《冠義》皆當作「卿大夫」，作「鄉」誤也。卿大夫，謂見爲卿大夫者。鄉先生，謂已爲卿大夫而致仕者。見君之次偏見卿大夫，如《國語》趙文子冠偏見六卿是也。賈疏釋注云：「鄉先生，鄉中老人爲卿大夫致仕者。先生亦有士，鄭不言者，經云卿大夫，不言士，故先生亦略不言。」據此，知賈所見《儀禮》本作「卿大夫」也。孔疏云「見於卿大夫，謂在朝之卿大夫也」，是孔所見《禮記》本亦作「卿大夫」。孔以在朝對致仕者，文義甚明，而今本《正義》亦竝改作「鄉」。今案：劉氏從賈，孔作「卿」，段氏玉裁、張氏敦仁、顧氏廣圻及《校勘記》俱從陸作「鄉」。《經義述聞》以劉爲是，云：「宋明道本《國語》韋注引《禮》『既冠，奠摯於君，遂以摯見卿大夫』，其字正作『卿』，則韋所見《儀禮》、《禮記》皆作『卿大夫』，不作『鄉』可知。此足正陸氏《釋文》之誤。」又云：「《初學記·禮部下》引《儀禮》正作『卿大夫』，則唐時固有不誤者，不獨賈、孔也。」案：《述聞》證據甚確，其段、張、顧說，《述聞》悉加注辨之，詳彼書內，不具錄焉。又盧氏文弼、程氏瑤田、朱氏大韶皆斷從劉說，字當作「卿」無疑。《石經考文提要》已定作「卿」，今從之。「鄉先生」，「先」，毛本誤作「見」。注「爲

卿大夫致仕者，「卿」，鍾、陳、《通典》、《通解》、楊氏俱作「鄉」。嚴本、《集釋》、毛本俱作「卿」，《校勘記》云：「作「卿」爲是。」○「易服」者，易去爵弁服，而服玄冠，玄端也。言玄端必言玄冠者，以別於始加之緇布冠也。奠摯，謂奠之於地，不親授也。《禮經釋例》云：「凡卑者於尊者，皆奠而不授，若尊者辭乃授。」案：《士冠禮》：「奠摯見於君。《士昏禮》親迎：「賓升，北面奠鴈，再拜稽首。」《士相見禮》：「士見於大夫，若嘗爲臣者，奠摯，再拜，主人荅壹拜。注：「奠摯，尊卑異，不親授也。」又：始見於君，士大夫則奠摯，再拜稽首。此男子之禮。又《士昏禮》婦見舅：「執筭棗栗，自門入，升自西階，進拜，奠于席。」注：「奠之者，舅尊，不敢授也。」又見姑：「受筭股脩，升，進，北面拜，奠于席。」此女子之禮。是卑者於尊者，皆奠而不授也。①又《聘禮》聘後：「賓即館，卿大夫勞賓，賓不見。大夫奠鴈再拜，上介受。勞上介，亦如之。」此賓因公事未行，辭之，故奠摯也。又《士昏禮》不親迎：「壻見，入門，東面奠摯，再拜，出。」注：「奠摯者，壻有子道，不敢授也。」此卑者先奠而不授也。又云：「摯者以摯出，請受。」注：「欲使以賓客禮見。」又云：「壻禮辭，許，受摯，入。主人再拜受。壻再拜送，出。」此女父辭，壻乃授也。《聘禮》賓覲：「入門右，

北面奠幣，再拜稽首。」此聘賓先以臣禮見，奠而不授也。又云：「摯者辭，賓出。摯者以幣出。」又云：「摯者請受。賓禮辭，聽命。」又云：「振幣，進授。」此主君辭，聘賓乃授也。又上介覲：「皆入門右，東上，奠幣，皆再拜稽首。」此上介先以臣禮見，奠而不授也。又云：「摯者辭，介逆出。」摯者以幣出。又云：「摯者請受，介禮辭，聽命。」又云：「介振幣，自皮西進，北面授幣。」此主君辭，上介乃授也。又：上介面卿，入門右，奠幣，再拜。此上介先奠而不授也。又云：「大夫辭，摯者反幣。」又云：「介奉幣入，大夫揖讓如初。介升，大夫再拜受。」此主國之卿辭，上介乃授也。《覲禮》：「侯氏入門右，坐奠圭，再拜稽首。」注：「卑者見尊，奠摯而不授。」此侯氏覲天子，先奠而不授也。又云：「摯者謁。」注：「謁猶告也。上摯告以天子前辭，欲親受之，如賓客也。」又云：「侯氏坐取圭，升致命，王受之玉。」此天子辭，侯氏乃授也。又：四享，奠幣，再拜稽首。此侯氏享天子，先奠而不授也。又云：「摯者曰：予一人將受之。」侯氏升致命，王撫玉。侯氏降自西階，東面授宰幣。」此天子辭，侯氏乃授也。天子不親受，使宰受之，殺於覲時也。皆

①「奠」，原作「尊」，今據《續清經解》本改。

卑者先奠而不授，尊者辭乃授，蓋以客禮待之也。又《聘禮》士介覲：「入門右，奠幣，再拜稽首。擯者辭，介逆出。擯者執上幣以出，禮請受，賓固辭。」注：「固衍字。」又衆介面卿：「入門右，奠幣，皆再拜。大夫辭，介逆出。擯者執上幣出，禮請受，賓辭。」又《聘禮·記》賓若私獻：「東面坐奠獻，再拜稽首。擯者東面坐取獻，舉以入告，出，禮請受，賓固辭。」注：「固亦衍字。」此皆尊者雖辭，終不敢授，禮又殺也。賓私獻，奠而不授，注以爲竝受者，則以擯者東面知之。《釋例》又云：

「授受之例，卑者先奠而不授，猶之入門例先入門右，拜例先堂下再拜稽首也。至尊者辭之乃授，猶之入門例尊者辭之乃入門左，拜例尊者辭之乃升成拜也。其實奠而不授爲卑者之正禮，猶之入門右爲卑者入門之正禮，堂下再拜稽首爲卑者拜之正禮也。飲酒之禮，獻酢皆授，酬則奠而不授，亦此例也。」今案：《禮經釋例》末條以入門例、拜例兼明卑於尊之禮，比例尤精。「卿大夫」，劉氏謂見爲卿大夫者，引《國語》趙文子冠偏見六卿爲證，其說甚確。案：《國語》趙文子冠，見欒武子、范文子、韓獻子、知武子等，皆有訓辭，蓋亦古禮如是。敖氏依譌本，作鄉解之，云：「鄉大夫，鄉之異爵者也。或曰鄉大夫，即主治一鄉者。」其說無據，《經義述聞》已駁之。冠者冠畢，必奠摯見君，竝見卿大

夫、鄉先生者，《禮記·冠義》謂「以成人見」是也。注云

「易服，不朝服者，非朝事也」者，鄭注《禮記》云「服玄冠、玄端，異於朝也」，與此注義同。敖氏云：「不朝服者，以其未仕也。」褚氏云：「敖氏主士冠其子，故云未仕。不知士之子苟未仕，冠後亦未必奠摯見君。鄭義爲長。」云「摯，雉也」者，士摯用雉，見《周禮·大宗伯》。云「鄉先生，鄉中老人爲卿大夫致仕者」，案：《尚書大傳》云「大夫、士七十而致仕，歸其鄉里，大夫爲父師，士爲少師」，即此所云「鄉先生」也。注不云「士」者，義已詳前，其實鄉先生中亦當有士也。

右冠者見君及卿大夫鄉先生

乃醴賓以壹獻之禮。壹獻者，主人獻賓而已，

即燕，無亞獻者。獻、酢、酬、賓，主人各兩爵而禮成。《特牲》、《少牢饋食》之禮獻尸，此其類也。士禮一獻，卿大夫三獻。禮賓不用柶者，沛其醴。《內則》曰：「飲：重醴清糟，稻醴清糟，黍醴清糟，梁醴清糟。」凡醴事，質者用糟，文者用清。【疏】正義曰：此「醴」亦當爲「禮」。朱子云：「注不言改字，說見上，非不具也。」陳氏《禮書》云：「既冠乃禮

賓，贊者皆與，蓋君子之於人勞之，必有以禮之。故昏禮享送者，鄉飲息司正，祭禮饋尸，冠禮禮賓，其義一也。」○注「禮賓不用柶者」，毛本「禮賓」誤作「賓禮」，嚴、徐、《集釋》、《通解》俱作「禮賓」。「飲重醴清糟稻醴清糟黍醴清糟梁醴清糟」，案：「稻醴」以下十二字今本俱脫，嚴、徐、《集釋》、《通解》俱有，敖氏無末「清糟」二字。^①陸氏云：「糟，劉本作漕，音糟。」盧氏文弼云：「飲重醴」下，朱、李誤衍「清糟」二字。」今案：《內則》「重醴」下本無「清糟」二字。云

「壹獻者，主人獻賓而已，即燕，無亞獻者」，經云壹獻，明無亞獻，故知惟主人獻賓而已。程氏恂云：「壹獻之後有燕者，主人樂得嘉賓，而安燕以洽之也。」《昏禮》禮賓一人，可無燕。《聘禮》禮賓無燕者，燕在後也。」云「獻、酢、酬、賓、主人各兩爵而禮成」者，謂主人獻賓，賓酢主人，主人將酬賓，先自飲訖，乃酌以酬賓，賓奠而不舉。是獻賓、酬賓、酢主人、主人先自飲，為各兩爵而禮成也。鄭必知有酢有酬者，以下言「主人酬賓」知之也。云「《特性》、《少牢饋食》之禮，獻尸，此其類也」者，謂獻尸之禮，與獻賓略同，亦具獻、酢、酬也。云「士禮一獻，卿大夫三獻」者，以《大行人》「子男饗禮五獻差之，則卿大夫三獻，士止一獻。」然《特性》「主人初獻，主婦亞獻，賓長三獻。士禮亦得備三獻者，方氏苞

云：「士惟祭備三獻。鄉大夫賓興，州長教射，雖國政，賓不過一獻，故冠、昏不得踰也。」云「禮賓不用柶者，沛其醴」者，《郊特性》曰「縮酌用茅，明酌也」，鄭注謂「和之以明酌，沛之以茅」，^②縮去滓也」，即此注言沛之義。鄭以此經無用柶之文，故知此醴為已沛之醴也。凡糟醴不卒爵，此一獻之禮有酢有酬，須卒爵，故用已沛之醴，不用糟也。云《內則》曰：「飲：重醴，稻醴清糟，黍醴清糟，梁醴清糟」者，此鄭引以證醴有清有糟，清是已沛者，糟是未沛者，彼注云：「重，陪也，陪設之也。糟，醇也。清，沛也。致飲有醇者，有沛者。」是也。云「凡醴事，質者用糟，文者用清」者，謂若冠醴子無獻酬，是質，故用糟，此禮賓有獻有酢有酬，是文，故用清也。王氏士讓云：「案：全經獻、酢、酬之禮，各有異同，當詳辨之。凡行禮之序，獻為先，酢次之，酬又次之。蓋主獻賓，賓酢主，主復自飲而酬賓，賓奠之。此其大概同也，而每異焉。有行一獻之禮者，賓主各兩酌而禮成，無亞獻。如冠醴賓之類是也。有共成一獻而奠酬者，

① 段校謂敖氏《集說》「重醴」下無「清糟」二字，非未無，其說是也。案，胡氏乃從《校勘記》而誤。

② 「沛」，原作「束」，今據《續清經解》本改。

若舅姑之饗婦，舅獻之，婦酢之，姑酬之，婦奠之，而禮成矣。其外舅外姑之饗壻也視此，蓋外舅獻之，壻酢之，外姑酬之，壻奠之，而禮成也。至若《鄉飲酒》之儀不同矣，惟賓備獻、酢、酬、尊之也。於介則獻、酢而未酬，於衆賓則獻而不酢、酬。《鄉射》之於衆賓，亦獻而不酢、酬，皆以次而省也。《燕禮》又異矣。其獻賓也，君使宰夫代之，臣莫敢與君亢禮也。其賓酢主之後，主未酬賓而遂獻公者，尊君也。其皆有獻而無酬、酢者，樂工以下是也。若夫《大射》之禮，有獻於未射之先者，於賓、於公、於孤卿、於大夫也，尊之也。有獻於既射之後者，於庶子、左右正、內小臣之屬也，卑之也。有射未終而獻者，於服不、於釋獲、於獲者也，因其所有事也。聘而禮賓，儀甚優也。然獻以醴而無酢、酬者，則以行於享之後、覲之先，儀尚多，未暇盡歎也。《公食大夫》雖設酒而無獻、酢、酬者，主於食也。《士虞》主人獻尸，尸惟酢主而不酬，至三獻利成，別無酢、酬之儀者，未吉也。至若饋食祭禮，上自尸賓，下至佐食，旁及兄弟，內及宗婦，則主人皆有獻，而主婦有亞獻者，其酬、酢之儀繁矣，其可強以爲同乎？更爲通論行酢之禮。凡酢者，皆承獻爵而答之也。其有賓親酌酢主者，禮之敵鈞也。有授主人爵而主自實爵酢者，此介之下一等，不敢親酌也。尊者於主人亦不親酌，何也？主人卑，不敢煩尊者也。其有受酢

而更爵者，膳宰於公，不敢襲至尊也。婦之酢舅，亦必更爵者，男女不相因也。主人與主婦，亦更爵酌酢者，明夫婦之別也。主婦於主人，不更爵而自酌酢者，敬而親之也。尸之醋主人，必祝酌授之者，正祭之尸尊，不親酌也。賓尸而尸親醋主人者，非正祭，則尸卑也。三獻獻主人，而尸受三獻之爵，酌以酢之者，尸遂賓欲行禮之意也。凡此皆酢之異同者也。若乃禮成於酬，其異同又可得而言矣。有至酬而徹筵者，禮事畢也。有至酬而加幣者，申厚意也。賓不盡主之歡，故至酬而奠爵。尸欲神惠之均，故至酬亦奠爵。酬必先飲，勸之周也。酬不拜洗，禮之殺也。旅酬亦名酬，而非正獻之酬。無算爵之酬，則繼乎旅酬也。復有酌而無酢、酬者，此則以醴名，又與是禮異也。然則酒也者，以行禮也。獻、酢、酬者，行禮之節也。行之於冠昏，和之於飲射，洽之於燕食，通之於聘覲，達之於祭祀。緣情循分，以爲多寡隆殺。古之人相觀而習之，是故可與酬、酢，可與祐神也。主人酬賓，束帛儷皮。飲賓客而從之以財貨曰酬，所以申暢厚意也。束帛，十端也。儷皮，兩鹿皮也。古文「儷」爲「離」。【疏】正義曰：賈疏云：「尊卑獻數多少不同，及其酬幣，惟於奠酬一節行之而已。」①褚氏云：「幣

①「一節行之」，《儀禮·士冠禮》賈疏作「之節一行」。

言酬賓，必行於奠酬之節矣。賈說不可易。敖氏謂在賓受獻之時，非也。」注云「飲賓客而從之以財貨曰酬，所以申暢厚意也」者，財謂幣帛，貨謂金玉。此注釋酬字，通上下言之。酬而用玉，惟天子、諸侯爲然。《禮器》曰「琥璜爵」，鄭注謂「天子酬諸侯，諸侯相酬，以此玉將幣也」。餘詳《聘禮》「致饗以酬幣亦如之」下。此酬賓以束帛儷皮，而《家語》公冠酬賓「束帛、乘馬」，《大戴禮》「酬幣朱錦綵，四馬」，則諸侯禮與士異也。云「束帛，十端也」者，凡物十曰束，束帛、束錦、束脩，皆以十爲數也。《周禮·媒氏》「凡嫁子娶妻，人幣純帛，無過五兩」，鄭注：「五兩，十端也。必言兩者，欲得其配合之名。《雜記》曰：『納幣一束，束五兩，兩五尋。』然則每端二丈。」案：據此注，五兩即十端，特言之異耳。云「儷皮，兩鹿皮也」者，案：《士昏禮》注云「儷，兩也」，《聘禮》「儷皮」注同。《春秋傳》曰「鳥獸猶不失儷」，是儷爲兩也。知儷皮爲鹿皮者，惠氏棟云：「《說文》：『麗，旅行也。鹿之性，見食急則必旅行。从鹿，麗聲。』《禮》麗皮納聘，蓋鹿皮也。」譙周《古史考》云：「伏羲制嫁娶，以儷皮爲禮。」今案：許所謂《禮》，即《儀禮》也。許所見本作「麗」，鄭本作「儷」，字雖不同，而可通用。云「古文『儷』爲『離』」者，《月令》「宿離不貸」，注「離，讀如儷偶之

儷」，是二字本通。《白虎通·嫁娶》篇引《士昏禮》作「束帛離皮」，蓋用古文也。贊者皆與，贊冠者爲介。贊者，衆賓也。皆與，亦飲酒爲衆賓。介，賓之輔，以贊爲之，尊之。飲酒之禮，賢者爲賓，其次爲介。【疏】正義曰：敖氏云：「言此於酬賓之後，明酬幣惟用於正賓也。」沈氏彤云：「《鄉飲酒·記》云『主人之贊者不與，無算爵然後與』，此亦當然。」注云「贊者，衆賓也。皆與，亦飲酒爲衆賓」者，朱子云：「贊者，謂主人之贊者也，恐字誤作衆賓耳。」今案：下云「贊冠者爲介」，即前經「宿贊冠者一人」，乃賓之贊者也，則此贊者爲主人之贊者甚明。「贊者皆與」，謂主人之屬凡有事於冠者，皆得與於飲酒也。鄭云「衆賓」者，飲酒之禮有賓、有介、有衆賓，既云「贊冠者爲介」，則主人之贊者自在衆賓之列矣。故云「亦飲酒爲衆賓」，非謂戒而不宿之衆賓也。惟上「衆賓也」句，殊未分曉，故朱子辨之。若戒而不宿之衆賓，有來觀禮者，則亦與於飲酒，亦在衆賓之列也。云「介，賓之輔，以贊爲之，尊之」者，言介所以輔佐賓者，尊亞於賓，以贊爲介，是尊贊也。云「飲酒之禮，賢者爲賓，其次爲介」，詳《鄉飲禮》。言此以見尊之之意也。

右 醴 賓

賓出。主人送于外門外，再拜。歸賓

俎。一獻之禮，有薦有俎，其牲未聞。使人歸諸賓家也。

【疏】正義曰：前冠畢尚有禮賓之事，故賓出廟門，不出大門。此賓出，出大門也。《禮經釋例》云：「凡送賓，主人敵者於大門外。案：《士冠禮》：禮賓畢，賓出，主人送于外門外，再拜。《士昏禮》：女父禮賓畢，賓降，授人脯，出；主人送于門外，再拜。敖氏繼公曰：「門者，外門也。」《士相見禮》：賓退，主人送于外門外，再拜。又：還贊，出，主人送于門外，再拜。《鄉飲酒禮》：「賓出，奏《陔》。主人送于門外，再拜。《鄉射禮》：「《陔》作，賓出，衆賓皆出。主人送于門外，再拜。」皆是大門外。《聘禮》：歸饗餼畢，賓送于外門外，再拜。又：問卿私面畢，賓出，大夫送于外門外，再拜。《覲禮》：賜車服，使者出，侯氏送，再拜。此皆賓、主人相敵，或尊賓使與相敵者，前迎於大門外，故送亦於大門外也。《聘禮》：郊勞，賓送，再拜。前迎於舍門外，此亦當送於舍門外也。《覲禮》：郊勞，使者降，以左驂出，侯氏送于門外，再拜。前迎于帷門外，此亦當送於帷門外也。又《士冠禮》：賓字冠者後，賓出，主人送于廟門外。注：「不出

外門，將禮之。」禮未畢者，其迎送皆於廟門外也。又《聘禮》：還玉畢，大夫出，賓送，不拜。前迎於外門外，不拜，此送亦當於外門外，不拜也。《聘禮》：公出送賓，及大門內，賓出，公再拜送。《公食大夫禮》：賓出，公送于大門內，再拜。此皆賓主不敵者，前迎於大門內，故送亦於大門內也。又《士昏·記》：若不親迎，壻見畢，出，主人送，再拜。敖氏繼公曰：「送謂送於外門外。」竊謂此說非也。前迎，主人出門左。注云：「出門，出內門。」則此送亦當於內門外、外門內也。又案：《士虞禮》：「賓出，主人送，拜稽顙。」注：「送、拜者，明於大門外也。」又《士虞·記》：餼尸，賓出，主人送，拜稽顙。注：「送賓，拜於大門外。」《特牲饋食禮》：賓出，主人送于門外。以《士虞》證之，當於大門外。經不云迎賓，但云送賓者，祭禮之賓壓於尸也。《士喪禮》上篇：小斂奠，賓出，主人拜送于門外。注：「廟門外也。」又：大斂奠，賓出，主人拜送于門外。下篇：設遷祖奠，賓出，主人送于門外。以小斂奠注證之，皆當送於廟門外。送於廟門外，與吉禮異也。又上篇：君使人弔，主人迎于寢門外，賓出，主人拜送于外門外。下篇：公賁，主人釋杖，迎于廟門外，賓出，主人送于外門外。尊君之使，故迎於寢門外。又云：「貳車畢乘，主人哭，拜送。」亦

當送於外門外也。君親至，益尊，故迎送皆於大門外也。
 《有司徹》：「尸出，侑從。主人送于廟門之外，拜。」前迎尸，侑於廟門外，故送亦於廟門外也。又：不賓尸之禮，衆賓出，主人拜送于廟門外。注：「不言長賓者，下大夫無尊賓也。」大夫尊於士，又無尊賓，故送於廟門外，不於大門外也。此皆異於賓客正禮者也。《釋例》又云：「凡拜送之禮，送者拜，去者不荅拜。案：《鄉飲酒禮》：「賓出，奏《陔》。主人送于門外，再拜。《鄉射禮》：「《陔》作，賓出，衆賓皆出。主人送于門外，再拜。」注：「門東西面拜也。不荅拜，禮有終也。《聘禮》禮畢：「賓出，公再拜送，賓不顧。」注：「公既拜，客趨辟。君命上擯送，賓出，反告賓不顧，於此君可以返路寢矣。《論語》說孔子之行曰：君召使擯，色勃如也，足躩如也。賓退，必復命曰：賓不顧矣。」又聘賓問卿面卿及介面卿畢：「賓出，大夫送于外門外，再拜，賓不顧。」注：「不顧，言去。《公食大夫》禮畢：「賓出，公送于大門內，再拜，賓不顧。」注：「初來揖讓，而退不顧，退禮略也，示難進易退之義。擯者以賓不顧告公，公乃還也。《特牲》、《饋食禮》：祝告利成，賓出，主人送于門外，再拜。注：「拜送賓也，凡去者不荅拜。」疏云：「總解諸文主人拜送，賓皆不荅拜。鄭注《鄉飲酒》云禮有終是也。」

《有司徹》：「尸出，侑從。主人送于廟門之外，拜。尸不顧。」注：「拜送之。」疏云：「儻尸之禮，尸、侑賓也，故孔子云賓不顧矣。《有司徹》又曰：「拜侑與長賓，亦如之，衆賓從。」注：「從者，不拜送也。」又：不儻尸之禮，衆賓出，主人拜送于廟門外，乃反。注：「拜送賓也者，亦拜送其長。不言長賓者，下大夫無尊賓也。」疏云：「賓尸時鄭注言從者不拜送，則此云拜送者，拜送其長可知。皆送者拜，去者不荅拜也。《有司徹》尸亦然者，賓尸之禮，尸如賓，侑如介也。他如《士冠禮》醴賓畢：「賓出，主人送于外門外，再拜。《士昏禮》納采，問名：「主人送于門外，再拜。《士相見禮》賓見主人：「賓退，主人送于門外，再拜。」還贊亦然，皆此例也。《士冠禮》戒賓、宿賓，皆云「主人退，賓拜送」。《鄉飲酒禮》主人戒賓：「主人退，賓拜辱。介亦如之。」不云「主人荅拜」者，亦禮有終也。速賓亦然。《鄉射禮》戒賓、速賓，皆云「主人退，賓送，再拜」。此皆主人至賓之門，賓送之，則賓爲送者，主人爲去者。《聘禮》郊勞：「勞者揖皮出，乃退。賓送，再拜。」致館設餼：「卿退，賓送，再拜。」歸饗餼：「大夫降，執左馬以出。賓送于外門外，再拜。」此皆主君使人於聘賓，則聘賓爲送者，使者爲去者。《覲禮》王使人郊勞：「使者降，以左驂出。侯氏送于門外，再拜。」

王賜侯氏車服：「使者出，侯氏送，再拜。」此皆天子使人於侯氏，則侯氏爲送者，使者爲去者，故經皆不云「荅拜」也。」

注云「一獻之禮，有薦有俎」者，薦謂脯醢。經不言薦，鄭知有薦者，吳氏《疑義》云：「《昏禮》禮賓，《聘禮》禮聘使皆有薦，此禮有薦之明證也。」今案：前賓禮冠者云「薦脯醢」，則此有薦必矣。云「其牲未聞」者，盛氏謂「此俎以乾肉載之，冠子者不殺，禮之正也」，吳氏《疑義》以爲「牲當用豚，如醢子」。沈氏彤則云：「有俎必有特性。《鄉飲》、《鄉射》取擇人，而用狗。此冠禮戒賓、宿賓，亦有擇人之義，當亦用狗。」未知孰是。云「使人歸諸賓家也」者，解經「歸賓俎」爲歸諸賓家也。必歸賓俎者，厚之也。○張氏爾岐疑此經數事，謂冠不告廟，見母不見父，見贊者不見賓，言歸俎不言載俎。今案：不言載俎，張氏以爲「文不具」是也。不見父與賓，說已見前。至冠不告廟，秦氏蕙田云：「《文王世子》『冠、取妻必告』，有明證矣。」盛氏云：「《曲禮》言取妻者『齊戒以告鬼神』，而《士昏禮》亦不具，即此例也。」○朱子云：「此章以上正禮已具，以下皆禮之變。」

右送賓歸俎

儀禮正義卷二 鄭氏注

績溪胡培塈學

若不醴，則醢用酒。若不醴，謂國有舊俗可

行，聖人用焉不改者也。《曲禮》曰：「君子行禮，不求變俗。祭祀之禮，居喪之服，哭泣之位，皆如其國之故，謹修其法而審行之。」是。酌而無酬酢曰醢。醢亦當爲禮。【疏】正義曰：自此至「卒醢取籩脯以降如初」，言不醴而醢之事。○案：醢爲太古造法，酒爲後世造法，醢濁酒清，醢質而酒文也。據行禮之本意，則質爲重，故冠禮以醢爲正，而醢亦並行焉。張氏爾岐云：「醢、醢二法，其異者：醢側尊在房，醢兩尊于房戶之間。醢用觶，醢用爵。醢從尊在房，醢從洗在庭。醢待三加畢乃一舉，醢每一加即一醢。醢薦用脯醢，醢每醢皆用脯醢，至三醢又有乾肉折俎。醢贊冠者酌授賓，賓不親酌。醢則賓自降取爵，升酌酒。醢者每加入房易服，出房立待賓命。醢則每醢訖，立筵西

待賓命。醢者每加冠必祝，醢時又有醢辭。醢者加冠時不祝，至醢時有醢辭。其餘儀節並不異也。」○注「不改者也」，《集釋》「者」作「舊」，嚴本及各本俱作「者」。《校勘記》以作「者」爲是。「而審行之是也」，毛本有「也」字，嚴、徐、《集釋》俱無。云「若不醴，謂國有舊俗可行，聖人用焉不改者也」者，聖人謂周公，言周公制禮，醢子以醢，而復有用酒，蓋因其國有舊俗可行，用焉不改，故並著之於經。朱子謂此以下爲禮之變，是也。引《曲禮》者，即以證不改舊俗之義。案：《曲禮》曰：「君子行禮，不求變俗。」鄭注：「求，猶務也。不務變其故俗，重本也。謂去先祖之國，居他國。」孔疏：「此云不變俗，謂大夫出在他國，不變己本國之俗。」案：鄭荅趙商，以爲衛武公居殷墟，故用殷禮，即引此云「君子行禮，不求變俗」。如鄭之意，不變所往之國舊時風俗，與此注不同。然則不求變俗，鄭有兩解，此注所引，蓋謂不變他國舊俗，《王制》曰：「修其教，不易其俗。齊其政，不易其宜。」是也。孔疏又云：「祭祀之禮者，即夏立尸，殷坐尸，周旅酬六尸，及先求陰陽犧牲騂黑之屬也。居喪之服者，殷雖尊貴猶服旁親，周則以尊降服。哭泣之位者，殷不重適，以班高處上，周世貴正，嗣孫居其首。皆如其國之故者，謂故俗也。」今案：鄭引《曲禮》至「謹修其法

而審行之，即云「是」者，謂《曲禮》所云是不改舊俗也。孔疏據夏殷立論，蓋謂夏殷之子孫不變夏殷之舊俗，與此注所引義殊。賈疏乃謂此經醺用酒爲夏殷冠子之法。朱子云：「不醺而醺，乃當時國俗不同有如此者。如魯衛之幕有縵布，祔有離合，皆周禮自不同，未必夏殷法也。」其說誠是。劉氏敞以醺用酒專爲庶子冠法。盛氏云：「如以此節爲醺庶子，經當云『若庶子則醺用酒』，而下文亦不應別見庶子冠法矣。朱子謂庶子一醺以酒，安得有若此及殺牲之盛禮哉？」然則劉說亦非矣。蓋制禮惟醺而已，其或舊俗有用醺者，聖人以其無大害理，故亦錄於《禮經》，以聽民之擇用也。又盛氏謂自以下皆爲記文，詳後記下。云「酌而無醺酢曰醺」者，或謂醺與醺通，《曲禮》「長者舉未醺」，鄭注：「盡爵曰醺。」《荀子·禮論篇》「利爵之不醺也」，楊注「醺，盡也」是也。然《說文》以醺爲冠娶禮，與醺異義。此云「無醺酢」者，吳氏紱云：「醺無醺酢，①《冠禮》醺子，《昏禮》醺賓、醺女、醺婦，《聘禮》醺賓，皆是也。亦有有醺酢者，《冠禮》醺賓，鄭氏以爲清醺是也。若醺，則皆無醺酢，此經及《昏》父醺子命之迎，使人醺庶婦是也。」云「醺亦當爲禮」者，醺與酒對，上云醺，此云酒是也。醺亦與醺對，用醺謂之醺，用酒謂之醺是也。此經「醺」字不必改「禮」，

說已詳前。尊于房戶之間，兩甔，有禁，玄酒在西，加勺，南枋。房戶間者，房西、室戶東也。禁，承尊之器也。名之爲禁者，因爲酒戒也。玄酒，新水也。雖今不用，猶設之，不忘古也。【疏】正義曰：此設尊亦當在陳服之後，與醺子同。敖氏云：「兩甔，一酒、一玄酒也。玄酒在西，尊西上也。加勺，加於二尊之上而覆之也。玄酒亦加勺者，②不以無用待之也。南枋，爲酌者北面覆手執之便也。」注云「房戶間，房西、室戶東也」者，凡言戶者皆室戶，以經云「之間」，明在東房與室戶之間，故知「房西、室戶東也」。云「禁，承尊之器也」者，禁以承尊。經云「有禁」，明兩甔俱有也。云「名之爲禁者，因爲酒戒也」者，詳《特牲·記》。又豐亦承尊器，詳《燕禮》。云「玄酒，新水也。雖今不用，猶設之，不忘古也」者，李氏云：「古未有醺醺，以水當酒之用。後世以其色玄，故謂之玄酒。」又云：「凡醺無甔，醺亦不用甔，從醺質。」蔡氏云：「醺一甔，無禁，無玄酒，有勺在筐，不加於尊。醺則兩甔，有禁，有玄酒，加勺尊上。此其異也。」《禮經釋例》云：「凡設尊，賓、

① 《儀禮訓解》引吳氏說「醺」下有「有」，「酢」下有「者」。

② 「酒」，《儀禮集說》作「尊」。

主人敵者於房戶之間，君臣則於東楹之西，竝兩壺，有玄酒，有禁。案：《士冠禮》：「醺用酒，尊于房戶之間」云云。

《鄉飲酒禮》：「尊兩壺于房戶間，斯禁，有玄酒，在西。」《特牲禮》：「尊于戶東，玄酒在西。」注：「戶東，室戶東。」《少牢禮》：「司宮尊兩甌于房戶之間」，注：「房戶之間，房西、室戶東也。」飲酒與祭，皆尊於房戶之間者，既祭獻賓及酢

酬、旅酬、無算爵，皆具賓主，如飲酒之禮也。《鄉射禮》：「尊于賓席之東，兩壺，斯禁，左玄酒，皆加勺。」《鄉射》不云「房戶之間」者，蓋鄉射於序，序有堂無室，無室則無房戶，故但云「尊于賓席之東」。《鄉射》上經云「乃席賓，南面東上」，注「不言於戶牖之間者，此射於序」是也。《鄉飲酒》疏云：「設酒之尊，皆於顯處，見其文。是以此及醺子，與《鄉射》、《特牲》、《少牢》、《有司徹》，皆在房戶之間。」敖氏繼公曰：「不言戶牖間者，可知也。記云出自東房，有東房，西房，則中有室，而席賓於戶牖之間也明矣。」皆與注異。《有司徹》既祭饌尸之禮，因《少牢》正祭之酒，但攝之而已，不更設尊，故疏亦以為在房戶之間也。《燕禮》：「司宮尊于東楹之西，兩方壺，左玄酒，南上。公尊瓦大兩，有豐。」

注：「於東楹之西，予君專此酒也。」《玉藻》曰：「唯君面尊。」玄酒在南，順君之面也。《大射儀》：「司宮尊于東楹之西，

兩方壺，膳尊兩甌在南，有豐。」膳尊即《燕禮》公尊，君之尊也。兩方壺，臣之尊也。君臣不同尊，尊君也。皆有玄酒，故君臣皆兩尊。注云：「酒在北，尊統於君，南為上也。唯君面尊，言專惠也。」燕禮、大射皆臣與君行禮，故尊於東楹之西也。《曲禮》「侍飲於長者」，孔穎達正義曰：「陳尊之所，貴賤不同。若諸侯燕禮、大射，設尊在東楹之西，自北嚮南陳之，酌者在尊東，西嚮，以酌者之左為上尊，尊面有鼻，鼻向君，示君專有此惠也。若《鄉飲酒》及卿大夫燕，則設尊陳於房戶之間，東西列尊，尊面嚮南，酌者嚮北，以西為上尊。時主人在阼西嚮，賓在戶西牖前南嚮，使賓主得夾尊，示不敢專惠也。」尊于房戶之間，但云《鄉飲酒》，不云《鄉射》，較賈氏為精矣。」《釋例》又云：「案：《燕禮》疏云：『《少儀》云：『尊壺者面其鼻。』鄭注：『鼻在面中，言嚮人也。』據《燕禮》向君而言。《少儀》又云：『尊者以酌者之左為上尊。』《鄉飲酒》云：『尊兩壺于房戶之間，玄酒在西。』又《鄉射》云：『尊于賓席之東，兩壺，斯禁，左玄酒。』鄭注：『設尊者北面，西曰左。』此皆據酌者北面而言。若據設尊之人及尊面而言，即南面以右為尊。」詳疏意，以為《鄉飲》、《鄉射》設玄酒之位，與《燕禮》若有異者。考《鄉飲》、《鄉射》尊面向南，則以西為上，《燕禮》、《大射》尊面向

東，則以南爲上，經例固不異也。」洗，有篚在西，南順。洗，庭洗。當東榮，南北以堂深。篚亦以盛勺，陳於洗西。南順，北爲上也。【疏】正義曰：注云「洗，庭洗」者，以別於北堂之洗也。醯不言設洗者，敖氏云：「醯而設洗之節亦與醴同，惟有篚爲異，此見其異者耳。」今案：醴之篚在房，醯之篚在庭，此其異也。云「當東榮，南北以堂深」者，說已詳前。云「篚亦以盛勺」者，王氏士讓云：「三醯皆用爵，勺加在尊上，篚中非解，并無勺也。注誤耳。」張氏惠言云：「房中之篚有勺者，醴尊不加勺故也。此尊既加勺，則勺不在篚。注連言之，誤。」今案：爵、解通稱。篚有勺者，褚氏謂勺先實於篚，後加於尊，則注說亦可通。云「陳於洗西」者，據經「有篚在西」言之也。云「南順，北爲上也」者，此篚蓋縱設之，以北爲上，《特性·記》注謂「南順，統於堂也」，是也。據此，則篚似有刻識爲首尾矣。此篚在庭爲下篚，又在堂爲上篚，詳《鄉飲禮》。始加，醯用脯醢。賓降，取爵于篚，辭降如初。卒洗，升酌。始加者，言一加一醯也。加冠於東序，醯之於戶西，同耳。始醯亦薦脯醢。賓降者，爵在庭，酒在堂，將自酌也。辭降如初，如將冠時降盥，辭主人降也。凡薦

出自東房。【疏】正義曰：朱子云：「始加」二字，乃疊見前始加緇布冠一章之禮。「醯用脯醢」乃題下事，其實賓荅拜後乃薦之也。」敖氏云：「卒洗亦當壹揖壹讓乃升。」今案：此章於其儀文之與醴同者皆云如初，則醴爲正禮益可見矣。注云「始加者，言一加一醯也」者，注以經云「始加」即云「醯」，明是一加一醯，與醴行於三加之後乃薦脯醢者異矣。云「加冠於東序，醯之於戶西，同耳」者，上冠子筵于東序，醴子筵于戶西，此經不言，故注補之，明一加一醯雖異，而其行禮處所則與用醴者同也。「醯之於戶西」，即所謂「醯於客位」者。據此，則鄭不專以醯爲冠庶子法明矣。云「始醯亦薦脯醢」者，明每醯皆有脯醢也。云「賓降者，爵在庭，酒在堂，將自酌也」者，爵實于篚，在洗西，是在庭也。酒尊于房戶之間，是在堂也。上醴子者體在房，贊者酌授賓，賓無升降之節。此醯則賓自酌，故須降取爵於篚以洗，洗畢乃升酌也。云「辭降如初，如將冠時降盥，辭主人降也」者，謂上將冠時賓降盥，主人降，賓辭，主人對也。但前將冠時賓降止爲盥手，此則兼爲洗爵，雖有不同，而其辭主人降之節亦如之也。云「凡薦出自東房」者，《禮經釋例》云：「凡脯醢謂之薦，出自東房。案：《士冠禮》疏云：『醴尊在房，脯醢出自東房。酒尊在堂，脯醢亦出自東

房。《鄉飲》、《鄉射》、《特牲》、《少牢》薦者皆出東房，故注云凡以該之。『考《士冠禮》：「陳服于房中。」又云：「脯醢南上。」房中即東房也。《鄉飲酒·記》：「薦脯五脰，出自左房。《鄉射·記》：「薦脯用籩，醢以豆，出自東房。《特牲禮》：「豆籩鉶在東房。《少牢禮》：「饌豆籩與筐于房中。』又：陰厭，主婦薦自東房。此皆疏所已言者也。《公食禮》設正饌，宰夫自東房授醢醬。又云：「宰夫自東房薦豆六。』《有司徹》：主人獻尸，主婦自東房薦韭菹醢。又云：「主婦興，取籩于房。』又：主婦獻尸，興，入于房，取糗與暇脩，執以出。又：主婦致爵于主人，設糗脩，如尸禮。又：主人獻長賓，宰夫自東房薦脯醢。又：不饋尸之禮，主婦亞獻，反取籩于房中，執棗糗。又云：「婦贊者執栗脯。』此皆疏所未言者也。《燕禮》、《大射》、《聘禮》以及《有司徹》，主人獻侑、主人受尸酢、主婦獻侑、主婦受尸酢，不饋尸之禮，主婦獻祝、主婦致爵于主人、賓致爵于主婦，所薦籩豆，經雖無文，則皆出自東房可知也。薦亦有不在東房者，《特牲·記》云：「賓與長兄弟之薦自東房，其餘在東堂。』其餘，謂衆賓兄弟之薦是也。若《士虞禮》：「饌兩豆菹醢于西楹之東，醢在西，一鉶亞之。從獻豆兩亞之，①四籩亞之。』則是反吉，非恒例矣。」冠者拜受，賓荅拜，

如初。贊者筵於戶西，賓升，揖冠者就筵，乃酌，冠者南面拜受，賓授爵，東面荅拜，如醴禮也。於賓荅拜，贊者則亦薦之。【疏】正義曰：注云「贊者筵於戶西」至「東面荅拜」者，因經但言拜受荅拜，未言節次面位，故約醴子之文以明之，見醢與醴同也。云「如醴禮也」者，釋經「如初」之文也。云「於賓荅拜，贊者則亦薦之」者，上禮禮云「賓東面荅拜」，下即云「薦脯醢」，明醢禮亦當於賓荅拜時薦之也。張氏爾岐云：「賓亦筵前北面釋醢辭訖，冠者乃南面拜受。」冠者升筵坐，左執爵，右祭脯醢，祭酒，興，筵末坐，啐酒，降筵，拜。賓荅拜。冠者奠爵于薦東，立于筵西。冠者立俟賓命，賓揖之，則就東序之筵。【疏】正義曰：朱子云：「此正醢禮也，下兩醢及後章三醢，凡言「如初」者，皆謂如此禮也。」李氏云：「不卒爵者，從醴禮。」張氏爾岐云：「降筵奠爵而後拜，執爵興，賓乃荅拜，拜訖冠者乃奠爵薦東，其節亦與醴同。」今案：上禮禮云「冠者奠饌于薦東，降筵，北面坐取脯」，此奠爵薦東，云「立于筵西」，唯此爲異耳。注云「冠

①「豆兩」，原倒，今據《禮經釋例》乙正。

者立俟賓命」者，沈氏彤云：「上一加入房易服訖而出南面者，立於房戶外之西待命也。此立于筵西待命者，以不但易服出房，而又醺訖，故筵西便也。」云「賓揖之，則就東序之筵」者，賓揖之，即所謂賓命也。就東序之筵，謂當更加皮弁也。徹薦爵，筵尊不徹。徹薦與爵者，辟後加也。不徹筵尊，三加可相因，由便也。【疏】正義曰：注云「徹薦與爵者，辟後加也」者，謂後加更須設薦爵，故徹之也。敖氏云：「徹之，亦贊冠者也。每醺禮畢必徹薦爵者，所以新後醺之禮，若不相因然。」是也。云「不徹筵尊，三加可相因，由便也」者，吳氏《章句》云：「可相因者則不徹。上祇一體，故醺畢見母而盡徹。此三醺，故其節不同。」加皮弁，如初儀。再醺攝酒，其他皆如初。攝，猶整也。整酒，謂撓之。今文「攝」爲「聶」。【疏】正義曰：朱子云：「此「如初儀」者，如前再加一章之儀也。下條放此。」「再醺攝酒，其他皆如初」，言惟攝酒異於始醺，其他皆如之也。」注云「攝，猶整也。整酒，謂撓之」者，胡氏承珙云：「《說文》：「攝，引持也。」引持亦整理之義，故鄭君訓攝爲整。」惠氏棟云：「《漢書·匈奴傳》：「單于以徑路刀金留犁撓酒。」應劭曰：「撓，和也。」鄭以攝酒有撓撓之

事，故舉漢法以明之。」今案：《有司徹》「司宮攝酒」，注云「更撓益整頓之」，賈疏云：「因前正祭之酒，更撓攪添益整新之也。」然則此攝酒，亦謂因始醺之酒撓益整頓之，示新也。此經再醺言攝酒，三醺不言攝。下若殺章再醺不言攝，三醺言攝酒，皆省文互見，其實再醺、三醺皆攝酒也。云「今文「攝」爲「聶」者，胡氏云：「「攝」，正字，今文省作「聶」。猶《爾雅》「攝虎鼻」，《釋文》云「攝又作聶」是也。」加爵弁，如初儀。三醺，有乾肉折俎，膾之，其他如初。北面取脯，見于母。乾肉，牲體之脯也，折其體以爲俎。膾，嘗之。【疏】正義曰：朱子云：「初儀，見上。三醺，唯攝酒及有乾肉折俎膾之爲異，其他皆如始醺也。」北面取脯，見於母，敖氏云：「著此者，見其與醴同也。」注云「乾肉，牲體之脯也」者，案：《周禮》：「腊人掌乾肉，凡田獸之脯腊臠胖之事。」鄭注：「大物解肆乾之，謂之乾肉，若今涼州烏翅矣。薄析曰脯，捶之而施薑桂曰膾脩。腊，小物全乾。」據此，則乾肉與脯腊膾脩俱別。此云「牲體之脯」，謂以牲體乾之如脯。沈氏彤云「但取於脯之乾，不取其薄析」是也。云「折其體以爲俎」者，賈疏云：「或爲豚解而七體以乾之，謂之乾肉。及用之，將升於俎，則節折爲二十一體，與《燕禮》同。故總名乾肉折俎

也。」盛氏云：「俎用乾肉，不殺故也。」今案：豚解之法，陳氏祥道據《士喪禮》「特豚四鬣，去蹠，兩肱，脊」，謂「四鬣者，殊左右肩髀而爲四，又兩肱一脊，而爲七」是也。體解之法，朱子謂「折脊爲三，曰正脊，曰脰脊，曰橫脊。兩肱各三，曰代脅，曰長脅，曰短脅，凡六。兩肱各三，曰肩，曰臂，曰臑，凡六。兩股各三，曰髀，曰肫，曰胙，凡六。通爲二十一體」，是也。陳氏去兩髀，而以兩股足之，非是。辨見《少牢禮》「佐食遷所俎于阼階西」下。又案：宣十六年《左傳》曰：「王享有體薦，宴有折俎。」杜注：「宴則體解節折，升之於俎。」亦謂折爲二十一體也。若骨折與節折異，骨折則《特性·記》所言是也。云「臠，嘗之」者，《說文》「臠，嘗也」，《禮記·雜記下》鄭注「臠，啐，皆嘗也，臠至齒，啐入口」，是也。○以上醺。若殺，則特豚，載合升，離肺實于鼎，設局甬。特豚，一豚也。凡牲皆用左胖。煮於鑊曰亨，在鼎曰升，在俎曰載。載合升者，明亨與載皆合左右胖。離，割也。割肺者，使可祭也，可臠也。今文「局」爲「鉉」，古文「甬」爲「密」。【疏】正義曰：殺，殺牲也。此又醺禮之盛者，亦因其舊俗而行之也。醺用乾肉折俎盛於醴，殺牲又盛於折俎，而冠不以盛禮先之者，聖人制禮，欲其盡人可行，故示以淳朴之意也。注云「特豚，一豚

也」者，以一訓特，亦猶《特性饋食》之爲一豕也。《說文》：「豚，小豕也。」沈氏彤云：「不用豕而用豚，豚未成牲而將成牲，於冠義類也。」云「凡牲皆用左胖」者，《禮經釋例》云：「凡牲皆用右胖，唯變禮反吉用左胖。案：《鄉飲酒·記》賓俎、主人俎、介俎，皆右體，進腍。《鄉射·記》亦云：『皆右體也，進腍。』注：『右體，周所貴也。』此嘉禮用右胖也。《特性·記》：『尸俎：右肩、臂、臑、肫、胙。』《少牢禮》：『司馬升羊右胖，髀不升。』注：『上右胖，周所貴也。』又：『司士升豕右胖。』又：『將祭載俎，上利升羊，載右胖；下利升豕，其載如羊。』《有司徹》：『司馬牝羊，^①亦司馬載，載右體。』又云：『司士牝豕，亦司士載，亦右體。』此吉禮用右胖也。是凡牲皆用右胖也。《既夕禮》：「大遣奠陳鼎，其實羊左胖，豕亦如之。」注：「反吉祭也。」《士虞·記》：「豚解，升左肩、臂、臑、肫、胙，脊。」又云：「升腊左胖。」是變禮反吉，始用左胖也。至於《特性·記》：「賓，骼。」注：「骼，左骼也。」賓用左骼者，下尸也。《有司徹》：「侑俎：羊左肩、左肫，豕左肩折。」侑用左體者，亦下尸也。主婦

①「牝」，原作「牝」，今據《禮經釋例》改。下「司士牝豕」同。

俎，羊左臠。主婦用左體者，因俎無體，故下主人也。此皆禮之殺者，不用右胖，其餘皆用右胖也。《士冠禮》注：「凡牲皆用左胖。」當作「右胖」，左字蓋傳寫之誤。」褚氏云：「諸吉禮皆升右胖，而此注言凡，則是解全經之通例，何反背經而云左，斯不然矣。賈不悟其譌，乃云據夏殷法，曲說也。」盛氏世佐、盧氏文弼、張氏惠言亦皆以左爲右之誤。云「煮於鑊曰亨，在鼎曰升，在俎曰載」者，此因經言載合升，而分別其義也。凡牲煮於爨上之鑊謂之亨，由鑊而實於鼎謂之升，由鼎而盛於俎謂之載。李氏云：「牲體在俎，亦得升名。下云『肴升折俎』，《少牢》云『升羊載右胖』是也。」云「載合升者，明亨與載皆合左右胖」者，加載於合升之上，見不獨合升於鼎，而亨與載亦皆合左右胖也。敖氏以「載」爲衍文，沈氏彤以「特豚載」爲句，謂俎爲載也，豚合升不合載。張氏惠言云：「若合升而不竝載，則經當明之，如《昏禮》《盥饋合升側載也。沈說非是。敖去載字，則升者將不載乎？更非矣。」《釋例》云：「《士昏禮》：『初昏陳鼎，其實特豚，合升。』注：『合升，合左右胖升於鼎也。』《士喪禮》：『大斂奠陳鼎，豚合升。』注：『合升，合左右體升於鼎。』冠禮人道之始，昏禮男女之始，大斂人道之終，故皆合升左右胖，異於他禮也。陳氏祥道云：『豚則吉凶皆合

升，用成性則升其胖而去髀，吉升右而凶升左。」云「離，割也。割肺者，使可祭也，可臠也」者，肺必割之而後可祭可臠。但肺有二種：一曰舉肺，爲食而設，割之使不絕中央少許，又名離肺，又名臠肺是也。一曰祭肺，爲祭而設，割斷之使絕，又名刳肺，又名切肺是也。《儀禮》諸篇多舉肺、祭肺竝言，此但言離肺，不言刳肺，蓋省文耳。肺爲氣主，周人尚之，故與牲體同實於鼎也。云「今文『肩』爲『鉉』，古文『鼎』爲『密』」者，此注但疊今古文，而未解肩、鼎之義。案：《士昏禮》注云：「肩，所以扛鼎。鼎，覆之。」《公食禮》注：「肩，鼎扛，所以舉之者也。凡鼎鼎，蓋以茅爲之，長則束本，短則編其中央。」或謂此注有「肩鼎扛所以舉之者也」鼎覆之「十二字，考嚴本及各本皆無，蓋移後篇之注於前耳，未足據。段氏《儀禮漢讀考》云：「肩，篆作『鼎』，以『尸』爲聲，音古癸切。鼎，以一下垂之『爲聲，音莫狄切。《說文·鼎部》曰：『鼎，以木橫貫鼎耳舉之。从鼎尸聲。《周禮》廟門容大鼎七箇，即《易》玉鉉也。』又曰：『鼎，鼎覆也。從鼎，『亦聲。』蓋許叔重原文如是，二形相似，轉寫遂但存其一。」又云：「《說文·金部》『鉉』字下曰：『所以舉鼎也。《易》謂之鉉，《禮》謂之鼎。』則許氏所據古文《禮》作『鼎』甚明。十七篇內，本皆鼎、鼎連文，後人因兩字易混，

遂易鼎爲局。」王石臞先生云：「此臆說，不可從。《說文》

「鉉」字注「禮」謂之鼎，當作「《周禮》謂之鼎」，與鼎字注引

《周禮》正合。鄭注明言「今文局爲鉉」，則古文乃是「局」

字，非「鼎」字。《儀禮》今文作「鉉」，而許不引者，已云

「《易》謂之鉉」，則不須更引《儀禮》。至古文作「局」，乃

「鼎」之借字，例不當引，故不引也。」左氏暄云：「扛鼎之

具，《說文》作「鼎」，而鄭與許異者，以《儀禮》古文已假借用

「局」字，說經嫌於改字，故從古文。《說文》「鼎」字注云：

「以木橫貫鼎耳。」則字不當從金。又爻辭：「鼎玉鉉。」①

玉亦非可以扛鼎也，豈扛鼎之具飾以金飾以玉與？」惠氏

棟云：「今文局爲鉉」，是局即鉉也。顏師古謂局貫於鉉，

則是以鉉爲鼎耳，誤矣。」胡氏承珙云：「《禮經》今文作

「鼎」者正字，古文作「密」者假借字。鄭於貫鼎之扛皆從古

文作「局」，不從今文作「鉉」。於覆鼎之蓋皆從今文作

「鼎」，不從古文作「密」。此則其例之畫一者也。」今案：鼎

自一至十二，數有多寡，由禮有隆殺也。此云「實於鼎」，則

一鼎也。楊氏《儀禮旁通圖》：「一鼎，特豚，《土冠》醢子，

《土昏》婦盟饋，《土喪》小斂奠用之。三鼎，豚、魚、腊，《特

牲》祭，《昏禮》共牢，《喪禮》大斂奠、朔月奠、遷祖奠用之。

五鼎，羊豕魚腊膚，《少牢》祭，《聘禮》致飧衆介，《玉藻》諸

侯朔月用。」楊氏云：「少牢五鼎，大夫之常事，又有殺禮而

用三鼎者。如《有司徹》乃升羊豕魚三鼎，腊爲庶羞，膚從

豕，陳於門外，如初。以其繹祭，殺於正祭，故用少牢而鼎

三也。又士禮特牲三鼎，有以盛葬奠加一等用少牢者，如

《既夕》遺奠「陳鼎五于門外」是也。」又「七鼎，牛、羊、豕、

魚、腊、腸胃、膚，《公食》下大夫用之。九鼎，牛、羊、豕、魚、

腊、腸胃、膚、鮮魚、鮮腊，《公食》上大夫用之。」楊氏云：

「上大夫九俎，九俎，九鼎也。牛、羊、豕曰大牢。凡七鼎、

九鼎，皆大牢，而以魚、腊、腸胃、膚配之者爲七，又加鮮魚、

鮮腊者爲九。」又「十鼎，正鼎七，牛、羊、豕、魚、腊、腸胃、

膚，陪鼎三，腳、臠、臠，《聘禮》致飧上介用之。十二鼎，正

鼎九，牛、羊、豕、魚、腊、腸胃、膚、鮮魚、鮮腊，陪鼎三，腳、

臠、臠，《聘禮》宰夫設飧，卿歸饗，《周禮》膳夫「王日一舉

用之。」楊氏云：「凡十鼎、十二鼎，皆合正鼎、陪鼎也。《郊

特牲》云：「鼎俎奇而籩豆偶，以象陰陽。」若十鼎、十二鼎，

正陪別數則爲奇也。」始醯，如初。亦薦脯醢，徹薦爵，

筵尊不徹矣。【疏】正義曰：朱子云：「初，謂前章之始醯

也。」吳氏《章句》謂如初兼醴及醢言，非。注云「亦薦脯

①「玉」，原作「王」，據《續清經解》本改。

醢，徹薦爵，筵尊不徹矣」者，是亦據前章之始醢言，不兼醢也。再醢，兩豆：葵菹、羸醢，兩簋：栗、脯。

羸醢，蜺螭醢。今文「羸」爲「蜺」。【疏】正義曰：朱子云：

「再醢唯攝酒，加豆簋爲異，不言如初者，可知也。」今案：

葵菹、羸醢，《周禮》饋食之豆也。栗、脯，《周禮》加簋之實也。前止一豆一簋，此兩豆兩簋者，《敖氏》云：「於此加其

豆簋，以起三醢之禮，示禮隆有漸也。」○注「蜺螭醢」，《釋文》、嚴、徐、集釋、《通解》、敖氏作「蜺」，毛本誤作「蜺」。

《校勘記》云：「此字从虫虎聲。」云「羸醢，蜺螭醢」者，

以羸爲蜺螭，《周禮·醢人》注同，即《爾雅·釋魚》曰「蜺羸，蜺螭」是也。云「今文「羸」爲「蜺」者，段氏云：「《說

文》「羸」字下云：「一曰蜺螭也。」蜺字下云：「羸也。」螭字下云：「蜺螭也。」然則蜺與羸同物而異名。《周禮》作

「羸」，《儀禮》古文同，今文作「蜺」。《禮記》從今文者也，故《內則》作「蜺醢」，徐仙民《禮記》蜺音羸。此據《周禮》及

《儀禮》古文。顏師古議其未達，又云「蜺者，羸類而非一」，失於考之不詳。今案：鄭以「羸」字近古，故疊今文不用

也。《爾雅》郭注謂蜺螭即蜺牛。熊氏朋來以《內則》之「蜺」乃古「螺」字，羸即螺，亦作蜺，韻書云蚌屬，非蜺牛之

蜺。其說與郭異矣。三醢，攝酒如再醢，加俎

之，皆如初，齊肺。攝酒如再醢，則再醢亦攝之矣。

加俎齊之，齊當爲祭，字之誤也。祭俎如初，如祭脯醢。

【疏】正義曰：朱子云：「初，謂上章之三醢也。」○今案：加

俎謂加豚俎，三醢亦兩豆、兩簋，如再醢，而又有豚俎焉。

三加彌尊，故三醢禮彌盛也。齊肺，即離肺也。殺牲而後

有肺，則齊肺不在「如初」中，故退在下也。注云「攝酒如

再醢，則再醢亦攝之矣」者，此據經以明再醢之亦攝酒也。

再醢不言者，省文，說已詳前。云「加俎齊之，齊當爲祭，字

之誤也」者，賈疏云：「經有二齊，不破如初齊之齊，唯破加

俎齊之字者，以祭先之法，祭乃齊之，又不宜有二齊，故破

加俎之齊爲祭也。」胡氏承珙云：「鄭讀經文「加俎齊之皆

如初」爲句，「齊肺」爲句，故既破上齊爲祭，即云「祭俎如

初，如祭脯醢」，則疏當云「不破齊肺之齊」。此乃云「不破

如初齊之齊」，轉似以「齊肺」與上「皆如初」連文，誤矣。」今

案：鄭破上「齊」爲「祭」，即云「祭俎如初，如祭脯醢」，是爲

祭俎言之。其實經云「皆如初」，所包尚廣，不止祭俎一事

也。上章「三醢，有乾肉折俎，齊之，其他如初」，明折俎不

在如初中，故別云「其他」，謂薦脯醢及降洗升酌至祭酒諸

①「三」，《儀禮經傳通解》作「始」。

儀也。此經云「皆如初」，亦兼薦脯醢及祭脯醢、祭酒等事，加俎雖與初異，而祭之之法亦與初祭脯醢者同，故統言皆以概之。賈疏謂三醢用再醢之籩豆，再醢不徹薦，唯徹爵而已。乃臆說，不可從，後儒多辨之。○又案：朱子不取鄭改字之說，謂「上章之俎無肺，而此章有肺，故又特言所嗜者肺，而不嫌於複出，則此嗜字當從本文爲是。陸氏亦云嗜讀如字。嗜肺，釋上嗜之爲嗜肺也。」說與鄭異，今竝存之。卒醢，取籩脯以降，如初。【疏】正義曰：「如初」，謂見母也。方氏苞云：「有加俎而取籩脯者，^①執以見母，濡肉非所宜。」蔡氏德晉云：「籩脯，籩中之脯。取籩脯見母，以別於薦脯也。薦脯已嗜，籩脯未嗜。」今案：必取籩脯者，恐其褻爾。○以上殺牲而醢。

右醢用酒之禮

若孤子，則父兄戒宿。父兄，諸父諸兄。

【疏】正義曰：自此至「直東塾北面」，言孤子冠法。○此孤子，謂適子無父者也。敖氏云：「孤子雖尊於家，然未冠，不可與成人爲禮於外，故戒宿賓客則諸父若兄爲之。惟言父兄戒宿，則筮日、筮賓、爲期之事，皆將冠者自主之可

知。」注云「父兄，諸父諸兄」者，謂諸伯叔父及諸從兄之屬是也。冠之日，主人紒而迎賓，拜，揖，讓，立于序端，皆如冠主，禮于阼。冠主，冠者親父若宗兄也。古文「紒」爲「結」，今文「禮」作「體」。【疏】正義曰：此主人，謂孤子將冠者也。上經云「將冠者采衣紒」，此但言紒而不言采衣者，《曲禮》曰「孤子當室，冠衣不純采」是也。然則亦不用錦束髮可知矣。「迎賓，拜，揖，讓，立于序端」，謂前主人迎賓，西面再拜，賓荅拜，以至三揖至階，三讓，主人升，立于序端諸儀。此雖將冠者，亦一一皆如爲子加冠之主人也。敖氏云：「孤子未冠，而於此乃行成人之禮者，無父則得伸其尊也。諸父若兄不主其事者，家無二主也。」禮于阼，楊氏云：「父在時冠于東序，醴于戶西。此則冠于東序，醴于東序也。」今案：醴不於戶西客位者，以父沒，不敢以賓客禮自居，故冠在阼，禮亦在阼也。上經冠子「筮于東序，少北」，張氏惠言云：「此孤子冠，當正在阼階，不少北也。敖氏謂禮爲賓與冠者行禮，非是。然則有父加冠，則將冠者紒而俟于房，孤子則紒而迎賓，自

①「加」，《儀禮析疑》作「折」。

爲主。有父加冠，則受醴于室戶西，孤子則醴于阼。此其異也。」注云：「冠主，冠者親父若宗兄也」者，親父，冠者之父。宗兄，則適兄也。注意蓋謂庶子父不在而冠，則適子可爲之主耳。言宗者，以其承大宗小宗而言，是適也。《昏禮·記》曰：「支子則稱其宗，弟稱其兄。」鄭義疑本此。云「古文『紒』爲『結』」，詳前。云「今文『禮』爲『醴』」者，或謂宜從古文作「禮」，或謂宜從今文作「醴」，諸說紛紛。胡氏承琪云：「賈疏謂鄭不從今文者，以其言醴則不兼於醺，言禮則兼醴醺二法。此說是也。若《昏禮》『賓人授如初禮』，謂如納采授雁之禮。《聘禮》『賓拜禮于朝』，乃拜夫人之歸禮。又『禮玉束帛乘皮』，乃報彼君之享禮。皆與醴酒無涉，故鄭皆從『禮』，不從『醴』也。」凡拜，北面于阼階上，賓亦北面于西階上荅拜。【疏】正義曰：阼階上、西階上，各專階也。拜言凡者，謂醴若醺時，拜受、啐拜及荅拜之類也。此孤子冠，賓主皆北面專階而拜，異於父在時醴與醺之拜也。敖氏云：「此賓主相拜之正位也。」《禮經釋例》云：「凡門外之拜皆東西面，堂上之拜，皆北面。案：《士冠禮》宿賓：『賓如主人服，出門左，西面再拜。主人東面荅拜。』又賓至：『主人迎，出門左，西面再拜，賓荅拜。』亦東面拜。《士昏禮》親迎：『主人玄端，迎于

門外，西面再拜。賓東面荅拜。《特牲饋食禮》宿尸：『尸如主人服，出門左，西面。主人辟，皆東面北上。主人再拜，尸荅拜。』又宿賓：『賓出門左，西面再拜，主人東面荅再拜。』又視濯視牲：『主人及子姓兄弟即位于門東，如初。』注：「初，筮位也。」即門外西面之位。又云：「賓及衆賓即位于門西，東面北上。」又云：「主人再拜，賓荅再拜。三拜衆賓，衆賓荅再拜。」又祭日：「主人及賓、兄弟、羣執事即位于門外，如初主人拜賓，如初。」此皆大門外之拜。《士昏·記》：若不親迎，主人出門左，西面；注：「出內門。」壻入門，東面；注：「入大門。」奠摯，再拜，出。此內門外之拜。是門外之拜皆東西面也。又《士冠禮》戒賓、宿贊冠者，《士相見禮》迎賓，《鄉飲酒》、《鄉射禮》戒賓、速賓、迎賓，《聘禮》致館，《公食大夫禮》戒賓，亦皆門外之拜。經不云東西面者，文不具也。又：送賓及爲人使者不荅拜，而主人門外之拜當亦西面也。《士冠禮》孤子冠：「凡拜，北面于阼階上，賓亦北面于西階上荅拜。」《士昏禮》納采：「賓致命，主人阼階上北面再拜。」又醴賓：「主人北面再拜，賓西階上北面荅拜。」又親迎：「賓升，北面奠雁，再拜稽首。」《鄉飲酒禮》拜至：「主人阼階上當楣北面再拜，賓西階上當楣北面荅拜。」《鄉射》作「荅再拜」。又主人獻賓：「賓西階上北面

坐卒爵，興，坐奠爵，遂拜。」又賓阼主人：「主人適阼階上，北面坐卒爵，興，坐奠爵，遂拜。」又云：「阼階上北面再拜崇酒。」《鄉射》無「北面」二字，文不具也。又主人酬賓：「阼階上北面坐奠觶，遂拜。」又云：「賓西階上荅拜。」《鄉射》作「北面荅拜」。又主人獻介：「介西階上北面拜。」又云：「主人介右北面拜送爵。」又云：「介降席，北面坐卒爵，興，坐奠爵，遂拜。」《鄉射禮》旅酬：「主人阼階上北面拜。」又云：「賓主人之西北面拜送。」又二人舉觶：「西階上北面，皆坐奠觶，拜。」《鄉飲酒》不云「北面」，文不具也。《燕禮》：「主人升自西階，賓右北面至再拜。」又主人獻賓：「賓西階上北面坐卒爵，興，坐奠爵，遂拜。」又賓酢主人：「主人北面拜受爵。」又主人酬賓：「賓降筵北面荅拜。」《賓降筵》三字，《大射》作「西階上」。《聘禮》：「賓致命，公左旋，北向。擯者進，公當楣再拜。」又：「賓覲，升，公北面再拜。」《特牲饋食禮》：「西階上獻賓，賓北面拜受爵。」《有司徹》：「主人授尸几，東楹東北面拜。」又云：「尸與侑皆北面荅拜。」又：「尸西楹西北面拜洗，主人東楹東北面奠爵荅拜。」又：「主人酌獻尸，尸北面拜受爵，主人東楹東北面拜送爵。」又：「尸拜，告旨，主人北面于東楹東荅拜。」又：「尸北面卒爵，拜，主人北面于東楹東荅拜。」又：「主人酌獻侑，侑西楹西北面拜受爵，主人

在其右北面荅拜。」又：「侑北面于西楹西卒爵，拜。」又：「尸酢主人，主人拜洗，尸北面于西楹西荅拜。」又：「主人東楹東北面拜受爵，尸西楹西北面荅拜。」又：「主人北面于阼階上，卒爵，拜。」又：「尸侑皆北面于西楹西，主人北面于東楹東再拜崇酒，尸侑皆荅再拜。」又：「上賓三獻，西楹西北面拜送爵。」又：「主人酬尸，東楹東北面拜，尸西楹西北面荅拜。」又：「獻賓于西階上，主人在其右北面荅拜。」又：「主人酌酢于長賓，西階上北面，賓在左。主人坐奠爵，拜，賓荅拜。」又：「尸作三獻之爵，三獻北面荅拜。」又：「酌獻侑，三獻北面荅拜。」又：「酌致主人，三獻東楹東北面荅拜。」又：「尸酢三獻，西楹西北面拜受爵。」又：「二人舉觶，西楹西北面東上，坐奠爵，拜。」又：「尸北面于阼階上酬主人，主人在右。坐奠爵，拜，主人荅拜。」是堂上之拜皆北面也。又《士冠禮》：「賓醴冠者，冠者筵西拜受觶，賓東面荅拜。」《有司徹》：「尸酢三獻，尸升筵，南面荅拜。此皆堂上拜，而不北面者，辟正主也。」又《士昏禮》：「婦見舅姑，升，進，北面拜。」又：「贊醴婦，婦東面拜受，贊西階上北面拜送。」《有司徹》：「主婦獻尸侑及受尸酢皆西面拜，致爵于主人則北面拜。此則婦人之禮，雖堂上拜不皆北面，異於男子也。」《釋例》又云：「凡賓、主人，禮盛者專階，不盛

者不專階。案：《士冠禮》：「凡拜，北面于阼階上，賓亦北面于西階上荅拜。」《士昏禮》：「賓升西階，當阿東面致命，主人阼階上北面再拜。」禮畢，禮賓：「揖讓如初，升，主人北面再拜，亦于阼階上。」賓西階上北面荅拜。」《鄉飲酒》、《鄉射》：賓至，「主人升，賓升。主人阼階上當楣北面再拜，賓西階上當楣北面荅拜。」主人獻賓，拜洗，受爵，送爵，告旨，卒爵。賓酢主人，拜洗，受爵，送爵，卒爵，崇酒。主人酬賓，先卒觶，及受觶，送觶。皆主人阼階上拜，賓西階上拜。《聘禮》：「公升二等，賓升，西楹西東面。」歸饗餼及問卿，皆賓主專階。《有司徹》：迎尸迎侑：「主人先升自阼階。尸、侑升自西階，西楹西北面東上。主人東楹東北面拜至，尸荅拜。主人又拜侑，侑荅拜。」主人獻尸，送几，受几，拜洗，受爵，送爵，告旨，卒爵。主人受尸酢，拜洗，受爵，卒爵，崇酒。主人酬尸，先卒觶，受觶。皆主人于東楹東拜，尸于西楹西拜。東楹東，即阼階上也。西楹西，即西階上也。《公食大夫》：拜至，賓雖降階拜，辭之始升成拜，然亦各拜於其階。是禮盛者則專階也。《鄉飲酒》：主人獻介，受爵，送爵，卒爵；介酢主人，賓爵，卒爵，崇酒，皆介於西階上拜，主人

于介右拜。同拜于西階上。《鄉射禮》：主人獻大夫，即遵者。受爵，送爵，卒爵；大夫酢主人，賓爵，卒爵，崇酒，亦大夫於西階上拜，主人於大夫右拜。《鄉飲酒》、《鄉射》：主人獻衆賓于西階上，衆賓之長升拜受者三人，主人拜送。注：「拜送爵於衆賓右。」是亦同在西階上也。《燕禮》、《大射》：賓、主人皆升自西階，主人賓右至再拜，賓荅再拜。主人獻賓，拜洗，送爵，受爵，告旨，卒爵；賓酢主人，拜洗，受爵，送爵，卒爵；主人酬賓，先卒爵，受爵，送爵，皆賓於西階上拜，主人於賓右拜。《燕禮》、《大射》：公席于阼階上，不與賓行獻酢之禮，別使宰夫爲主人，故不敢專階，而與賓同行禮於西階上也。若主人獻公，則降自西階，于阼階下拜。獻卿獻大夫獻士，亦同于西階上拜。《有司徹》：主人獻侑，侑于西楹西拜，主人于侑右拜。是禮不盛者則不專階也。又《特牲饋食禮》：主人獻賓，受爵，送爵，卒爵及酌酢，賓皆于西階上拜，主人于賓右拜。祭畢飲酒，殺於飲酒正禮，故不專階也。至於《有司徹》：獻長賓，略同《鄉飲酒》獻衆賓之儀，故亦同在西階上也。」若殺，則舉鼎陳于門外，直東塾，北面。孤子得申，禮盛之。父在，有鼎不陳於門外。【疏】正義曰：殺亦謂殺牲。盛氏以此爲孤子冠之變禮，是也。陳于門外，廟門之外也。當東塾，謂

鼎在東塾之南也。考《士昏禮》：「期，初昏，陳三鼎于寢門外東方，北面北上。」《特牲》、《少牢》亦云：「北面北上。」此但云「北面」，不云「北上」，則止一鼎爾。賈疏以爲三鼎，非也。○注「孤子」下，敖本有「尊」字，嚴本無。《校勘記》云：「敖蓋以意加，不可從。」云「孤子得申，禮盛之」。父在，有鼎不陳於門外者，鄭意以門外之禮盛。上「若殺則特豚」節不云「陳于門外」，是乃父在之禮。故知孤子無父得申，禮盛之也。或謂冠而殺牲，本爲其子，故不陳於門外；孤子自主冠，則陳於門外，示特殺以盡敬於賓，而非爲己。說亦可通。賈疏乃謂陳鼎在外者賓客之禮，在內者私家之禮。案：《士昏禮》「陳三鼎于寢門外」，《特牲禮》「陳鼎于門外」，《少牢禮》「陳鼎于廟門之外」。此皆私家之禮，而陳鼎在外，則賈說不足據矣。《禮經釋例》云：「《公食大夫禮》：『甸人陳鼎七，當門，南面西上。』此陳於門外而南面者也。至於《士喪禮》小斂奠、大斂奠、朔月奠、既夕禮，陳鼎皆門外西面。《士虞禮》：『陳三鼎于門外之右，北面北上。』人設于西階前，東面北上。」則又禮之變，不可引以爲據也。敖氏云：「大夫、士陳鼎于門外，皆北面，惟喪奠西面，國君陳鼎南面，天子未聞。」此說得之。○李氏云：「《大戴禮》曰：『公冠自爲主，迎賓，揖升自阼，立於席北。」

既醴，降自阼。①其餘自爲主者，其降也自西階以異，其餘皆與公同也。《曾子問》曰：「父没而冠，則已冠掃地而祭於禰，已祭而見伯父叔父，而後饗冠者。」饗冠者，謂禮賓也。今案：《大戴禮》所云，可證孤子自爲主之禮。《曾子問》所云，則直可補此經之闕也。周氏學健云：「已祭而見伯父叔父，則知伯叔父不得爲冠主明矣。」

右孤子冠

若庶子，則冠于房外，南面，遂醺焉。房

外，謂尊東也。不於阼階，非代也。不醺於客位，成而不尊。【疏】正義曰：上經所云，適子無父者冠法也。此經所云，庶子父在者冠法也。敖氏謂父没則其禮同於適，恐非。方氏苞云：「適兄在而庶弟冠於阼，其義何居？觀庶婦之不饋，則知庶子不得與適同矣。」今案：「遂醺焉」者，謂冠於房外，醺亦於房外也。敖氏云：「若不醺而醴，其位亦如之。」此說甚是。周公制禮，以醴爲正，醺則因其舊俗而行之。經因上醴醺並言，故隨舉醺言之，與言醺於客位者同。

①「阼」，原作「酢」，今據《儀禮集釋》改。

互文耳，非謂庶子冠但得用醺，而不得用醴也。賈疏牽涉夏殷，謂三代庶子皆同用醺，非矣。又謂周庶子一醺，夏殷庶子三醺，更屬支離。敖氏云：「經惟言冠而遂醺，略無異文，則是三加三醺皆與上文適子之禮同，惟以冠醺在房外爲異。」案：敖說是也。褚氏云：「適子有當用醺者。《曾子問》：『孔子曰：天子賜諸侯、大夫冕弁服於大廟，歸設奠，服賜服，於是乎有冠醺，無冠醴。』鄭注：『服賜服，酌用酒，尊賜也。不醴，明不爲改冠，改冠當醴之。』皇氏云：『諸侯、大夫未冠，總角從事。當冠之年，因朝天子而賜之服，故歸遂不改冠。』然則適子用醴、庶子用醺之說固不足信矣。注云「房外，謂尊東也」者，上經云「尊于房戶之間」，謂尊在房西、室戶東。此在房戶之外而南面，故知在尊東也。云「不於阼，非代也」者，下記曰：「適子冠于阼，以著代也。」此庶子不於阼，是非代故也。云「不醺於客位，成而不尊」者，記曰：「醺于客位，加有成也。」是適子於客位，因其成人而尊之。此因冠之處醺焉，不於客位，是成而不尊也。

右庶子冠

冠者母不在，則使人受脯于西階下。

【疏】正義曰：敖氏云：「言於此者，見以上冠者之禮同也。」張氏爾岐云：「母不在，謂有他故，非沒也。使人受脯，當於後見之。」褚氏云：「母沒則無所謂使，無所謂受矣。被出而嫁，則已絕於廟，亦不得行此禮矣。不在，當依賈疏歸寧、疾病之訓爲正。」今案：不在，謂不在闔門之外耳。王氏士讓謂母或有外戚之服未除，不入廟預嘉事，可備一說。或以不在爲母亡，誤甚。母亡，則當與父沒同掃地而祭矣。吳氏《疑義》云：「西階下，蓋就取脯降處授之，不至東壁也。」

右見母權法

戒賓，曰：「某有子某，將加布于其首，願吾子之教之也。」吾子，相親之辭。吾，我也。子，男子之美稱。古文「某」爲「謀」。【疏】正義曰：周公作經，先載行禮節次，而以諸辭類載於後，蓋欲其儀節易明也。自此至「某敢不夙興」，^①乃戒賓、宿賓之辭。又有祝辭、醴

①「夙」，原作「宿」，今據本篇經文改。

辭、醺辭、字辭列後。王氏士讓云：「辭與記異，記乃讀經者所附，辭則作經時著爲定式之文，便於士大夫承用，亦即經也。」今案：《昏禮》諸辭俱載記中，與此篇異，敖氏嘗疑之。沈氏彤云：「案：《冠禮》諸辭即經也，《昏禮》經未及辭，故於記補之。《冠禮》經詳，《昏禮》經略，故記補其未備，未可一例論也。」○「某有子某」，賈疏云：「上某，主人名。下某，子之名。加布，初加緇布冠也。」敖氏云：「冠禮三加，乃惟云布者，取其始加而質者言之，謙也。」今案：教之，謂教以加冠之禮也。注云「吾子，相親之辭」者，經不

直云子，而云吾子，是親之之辭也。云「吾，我也」者，《爾雅·釋詁》文。《說文》：「吾，我，自稱也。」云「子，男子之美稱」者，賈疏云：「古者稱師曰子。又《公羊傳》云「名不若字，字不若子」是也。」云「古文「某」爲「謀」者，胡氏承珙云：「案：以「某」代名，《金縢》「惟爾元孫某」已然。此本無正字，皆假借爲之。《說文》：「某，酸果也。」古書多借此爲代名之字。「謀」亦從某聲，故古文又作「謀」。鄭以代名之字，書傳相承作「某」，故不從古文耳。」賓對曰：「某不敏，恐不能共事，以病吾子，敢辭。」病，猶辱也。古文「病」爲「秉」。【疏】正義曰：共事，謂供給冠事。敖氏云：「不能共事，則冠禮不成，故云「病吾子」。」注

云「病，猶辱也。古文「病」爲「秉」者，段氏云：「病不訓辱，而可通於辱，故曰猶辱。秉，則病之假借字也。丙聲，秉聲，古音同部。」主人曰：「某猶願吾子之終教之也。」賓對曰：「吾子重有命，某敢不從。」敢不從，許之辭。【疏】正義曰：重有命，謂再有命也。重訓再，見《史記索隱》。注云「敢不從，許之辭」者，敢不從，謂不敢不從，是許之也。李氏云：「此所謂一辭而許曰禮辭也。」○以上戒。宿曰：「某將加布于某之首，吾子將莅之，敢宿。」賓對曰：「某敢不夙興。」莅，臨也。今文無「對」。【疏】正義曰：注云「莅，臨也」者，莅亦作泣。《詩·采芣》「方叔泣止」，《毛傳》：「泣，臨也。」云「今文無「對」者，胡氏承珙云：「案：上文戒賓，賓辭及賓許皆有「對」，此宿賓亦當有「對」，故不從今文。」○以上宿。

右戒賓宿賓之辭

始加，祝曰：「令月吉日，始加元服。令、吉，皆善也。元，首也。【疏】正義曰：前始加冠時云「進

容，乃祝」，此「令月吉日」以下，即始加之祝辭也。再加，三加不言祝，省文。○注「首也」，「首」，《通典》作「長」。云「令、吉，皆善也」者，《爾雅·釋詁》云：「令，善也。」《說文》：「吉，善也。」云「元，首也」者，《左傳》僖三十三年「晉先軫入狄師，死焉。狄人歸其元，面如生」，《孟子》曰「勇士不忘喪其元」，是元爲首也。上經云「某有子某，將加布于其首」，故知加元服爲加首服也。棄爾幼志，順爾成德。壽考惟祺，介爾景福。」爾，女也。既冠爲成德。祺，祥也。介、景，皆大也。因冠而戒，且勸之，女如是則有壽考之祥，大女之大福也。【疏】正義曰：「壽考惟祺」，「惟」，《集釋》作「維」。○朱子云：「順，古與慎通用。」張氏爾岐云：「幼志，幼年戲弄之志也。棄，禁絕之也。順成德，安養其成人之德也。」今案：幼志，即《左傳》所謂「童心」。棄，謂除去也。注云「爾，女也」者，女與汝通。《表記》「靖共爾位」，鄭注：「爾，汝也。」云「既冠爲成德」者，既冠，責以爲人子、爲人弟、爲人臣、爲人少者之禮，皆成人之德也。云「祺，祥也」者，《爾雅·釋言》文。云「介、景，皆大也」者，介與景皆訓大，見《爾雅·釋詁》。《詩·小明》「介爾景福」，《毛傳》：「介、景，皆大也。」云「因冠而戒」者，棄爾幼志「是戒也。云「且勸之，女如是則有壽考之祥，大女

之大福也」者，祝以有是德即有是福，是勸之也。李氏云：「《家語》成王冠頌曰：『令月吉日，王始加元服，去王幼志，服袞職，欽若昊天，六合是式，率爾祖考，永永無極。』此周公之制也。」○張氏云：「服，蒲，北反。福，筆勒反，與德叶。」再加，曰：「吉月令辰，乃申爾服。辰，子丑也。申，重也。」【疏】正義曰：古謂吉月爲月朔，此云「吉月令辰」，謂月辰皆善耳，與上「令月吉日」互言以成文，無異義也。注云「辰，子丑也」者，《左傳》成九年「浹辰之間，而楚克其三都」，孔疏：「從甲至癸爲十日，從子至亥爲十二辰。故《周禮》縣治象，「浹日而斂之」。謂周甲癸十日。此言浹辰，謂周子亥十二辰。」然則自子至亥皆爲辰，此注云子丑者，隨舉以示人也。云「申，重也」者，《爾雅·釋詁》文。敬爾威儀，淑慎爾德。眉壽萬年，永受胡福。」胡，猶遐也，遠也，遠無窮。古文「眉」作「麋」。【疏】正義曰：敖氏云：「淑，善也。眉壽，豪眉也。人年老，必有豪眉秀出者。」張氏爾岐云：「敬爾威儀，正其外也。淑慎爾德，謹其內也。內外夾持，順成德者當如是。」注云「胡，猶遐也，遠也，遠無窮」者，惠氏棟云：「《詩·隰桑》云：『心乎愛矣，遐不謂矣。』《禮記》引此詩，

「遐」作「瑕」，鄭注：「瑕之言胡也。」遐胡互訓，古音通。「互詳《少牢禮》《胡壽保建家室》下。云「古文「眉」作「麋」者，惠氏云：「《大戴禮·王言篇》「孔子愀然揚麋」，盧注：「麋，一作眉。《荀子·非相》云「伊尹之狀，面無須麋」，楊注：「麋，與眉同。《漢書》皆以「麋」爲「眉」，蓋古字簡少通用，至漢猶然也。」今案：「眉」正字，「麋」借字，故鄭從今文。三加，曰：「以歲之正，以月之令，咸加爾服。正，猶善也。咸，皆也。皆加女之三服，謂緇布冠、皮弁、爵弁也。【疏】正義曰：注「皆加女之三服」，「加」，毛本誤作「如」。云「正，猶善也」者，上注云「令、吉，皆善也」，此正亦是善，故云「猶善」。《士喪禮》「決用正王棘」，注云：「正，善也。」是正有善義。云「咸，皆也」者，《爾雅·釋詁》文。兄弟具在，以成厥德。厥，其。【疏】正義曰：此注嚴、徐、《集釋》、《通解》俱有，《集釋》「其」下有「也」字，他本脫。○此云「兄弟具在」，下醴辭云「兄弟具來」，見觀瞻攸繫也。敖氏云：「厥指兄弟。能成兄弟之德，則正身齊家之事也。」張氏爾岐云：「兄弟具在，成此冠禮，是成其德也。」今案：成德當指冠者言，張說是也。注云「厥，其」者，詳前。黃耆無疆，受天之

慶。」黃，黃髮也。耆，凍黎也。皆壽徵也。疆，竟。【疏】正義曰：慶，賜也。○注，嚴本作「凍黎」，監本「黎」作「黎」。盧氏文弼《羣書拾補》云：「凍作凍，譌。黎，黎可通。或作犁，譌。」云「黃，黃髮也。耆，凍黎也」者，《詩·行葦》序云「外尊事黃耆」，鄭箋同。云「皆壽徵也」者，《爾雅·釋詁》曰：「黃髮，鬢齒、鯢背、耆、老，壽也。」《詩·行葦》疏引舍人曰：「黃髮，老人髮白復黃也。」孫炎曰：「黃髮，髮落更生者。」似舍人說是。耆，《說文》云：「老人面凍黎若垢。」《詩疏》引孫炎曰：「耆，面凍黎色，如浮垢也。」是皆爲壽徵也。云「疆，竟者，《詩·七月》「萬壽無疆」，《毛傳》：「疆，竟也。」○張氏爾岐云：「首三句爲一聯，服叶德，慶叶疆，音羌。正令二句又自相叶。」

右加冠祝辭

醴辭曰：「甘醴惟厚，嘉薦令芳。嘉，善也。善薦，謂脯醢。芳，香也。【疏】正義曰：此醴辭，謂冠訖醴冠者之辭也。敖氏云：「醴言厚，見其未泆。」注云「嘉，善也」者，《爾雅·釋詁》文。拜受祭之，以定爾祥。承天之休，壽考不忘。」休，美也。不忘，長有

令名。【疏】正義曰：拜受祭之，謂拜受饌、祭脯醢、祭醴也。此教其行禮，下三句祝之也。張氏爾岐云：「定祥、承休，與《易》『凝命』之旨相類。天人之理，微見於此。」^①○注「休美也」三字，今本脫，嚴、徐、《集釋》、《通解》、敖氏俱有。云「休，美也」者，《釋詁》文。云「不忘，長有令名」者，敖氏云：「壽考不忘者，謂至於壽考，而人不能忘之也。此蓋古人祝頌之常語，《詩》亦多用之。」

右 醴 辭

醴辭曰：「旨酒既清，嘉薦亶時。」亶，誠

也。古文「亶」爲「瘡」。【疏】正義曰：此不醴而醴者之辭也。醴每一加一醴，故醴辭一而醴辭有三。又醴有不殺及殺之異，而其辭則同也。注云「亶，誠也」者，《爾雅·釋

詁》文。云「古文『亶』爲『瘡』」者，段氏云：「古文用假借字，瘡，勞病也。」始加元服，兄弟具來。孝友時格，永乃保之。」善父母爲孝，善兄弟爲友。時，是也。格，至也。永，長也。保，安也。行此乃能保之。今文「格」爲「嘏」。凡醴者不祝。【疏】正義曰：注「格至也」，《集釋》「至」作「致」，嚴本及各本俱作「至」。云「善父母爲孝，善

兄弟爲友」者，《爾雅·釋訓》文。云「時，是也。格，至也。永，長也」者，皆《釋詁》文。云「保，安也」者，《詩·南山有臺》「保艾爾後」，《毛傳》：「保，安也。」云「行此乃能保之」者，張氏爾岐云：「孝友時格，孝友極其至也。教以盡孝友之道，乃可長保之也。」云「今文『格』爲『嘏』」者，胡氏承珙云：「格有至訓，本《爾雅》。嘏不訓至，故鄭不從今文。《少牢禮》『以嘏于主人』，注：『古文嘏爲格。』彼是福慶之辭，字當作『嘏』，故又不從古文作『格』耳。」《經義述聞》云：「格，借字也。嘏，正字也。大福曰嘏。孝友時嘏，言唯孝友之人是福也。其福久而不失，故又曰永乃保之，之字正指嘏言也。下文字辭曰『宜之于假，永受保之』，注曰：『假，大也。』案：假亦與嘏通，宜之于嘏，猶言福祿宜之也。永受保之，之字亦指嘏言也。敖繼公訓格爲感格，尤誤。謹案：從今文作『嘏』，則『之』字較有著落，似勝鄭說。云「凡醴者不祝」者，李氏云：「醴者於醴乃有辭，冠時不祝。」楊氏云：「三加三醴，既有醴辭，則不用祝辭也。」張氏云：「醴者不祝，謂用酒以醴者，每加冠畢，但用醴辭。其方加冠時，不用祝辭也。詳醴辭『始加元服』等句，與祝

① 「微」，原作「徵」，今據《儀禮鄭注句讀》改。

辭相類，兼用之則複矣。賈以爲醺庶子不用祝辭，錯會注意。今案：諸說是也。敖氏謂醺者亦祝，則豈「始加元服」等句，既用於加冠時，又用於醺乎？必不然矣。王氏士讓、褚氏寅亮已辨之。○李氏云：「來，古音力之反。」案：

與時、之叶。再醺曰：「旨酒既涓，嘉薦伊脯。」

涓，清也。伊，惟也。【疏】正義曰：敖氏云：「獨言脯者，

欲協音耳，亦舉其所上言之也。凡一籩一豆，則先脯後醢。」注云「涓，清也」者，《說文》：「涓，舊酒也。」《詩·

鳧鷖》「爾酒既涓」，箋云：「涓，酒之沛者也。」是涓不訓清，

但舊之沛之則酒清，故此注直云「涓，清也」。云「伊，惟也」

者，《爾雅·釋詁》云：「伊，維也。」惟與維通。乃申爾

服，禮儀有序。祭此嘉爵，承天之祐。」祐，福

也。【疏】正義曰：注云「祐，福也」者，《釋詁》文。三醺

曰：「旨酒令芳，籩豆有楚。」旨，美也。楚，陳列

之貌。【疏】正義曰：醺辭三章，皆從旨酒說起，明其不用

醢也。注云「旨，美也」者，《說文》同。云「楚，陳列之貌」

者，《詩·賓之初筵》「籩豆有楚」，《毛傳》：「楚，列貌。」與

此義同。案：籩豆每醺皆更設之，賈謂三醺用再醺之籩

豆，非也，辨見前。咸加爾服，肴升折俎。肴升折

俎，亦謂豚。【疏】正義曰：注云「肴升折俎，亦謂豚」者，敖

氏云：「肴，謂乾肉若豚也。」今案：上文不殺而醢有「乾肉

折俎」，殺而醢云「加俎臠之」，是二者皆有俎。鄭恐人疑此

「肴升折俎」專指不殺者言之，故云「亦謂豚」，謂兼若殺在

內。蓋不殺與殺，均用此醢辭也。或謂此醢辭與三百篇文

句多相似，乃後人襲《詩》辭爲之，非周公作經之舊。不知

周公因舊俗而制醢禮，自當有其辭，安知非後之作詩者襲

取《禮經》而用之乎？承天之慶，受福無疆。【疏】

正義曰：王氏士讓云：「首章言孝友，本也。次章言禮儀，

有本而後有文。終之以受福無疆，勉其以德獲福也。」○

慶，音羌。張氏爾岐云：「亦兩句叶。」

右 醢 辭

字辭曰：「禮儀既備，令月吉日，昭告爾

字。昭，明也。【疏】正義曰：此賓直西序東面，與冠者爲

字之辭也。禮儀既備，謂三加已畢也。注云「昭，明也」

者，《說文》：「昭，日明也。」是昭有明義。爰字孔嘉，

髦士攸宜。爰，於也。孔，甚也。髦，俊也。攸，所也。

【疏】正義曰：此孔嘉之字，實髦士所宜也。注云「爰，於

也」，《釋詁》文。云「孔，甚也。髦，俊也。攸，所也」，皆《爾雅·釋言》文。○李氏云：「嘉，古音姬，與宜字叶。」宜之于假，永受保之，曰伯某甫。」仲、叔、季，唯其所當。于，猶爲也。假，大也。宜之是爲大矣，伯、仲、叔、季，長幼之稱。甫是丈夫之美稱，孔子爲尼甫，周大夫有嘉甫，宋大夫有孔甫，是其類。甫，字或作父。【疏】正義曰：《通典》《仲》上有「伯」字，《集釋》《唯》作「惟」。案：自「字辭曰」至此，經注分節悉依嚴本，其餘本、鍾本、《集釋》、楊氏竝與嚴同。今本以「字辭」至「孔嘉」爲一節，「髦士」至「于假」爲一節，「永受」至「所當」爲一節，注亦隨經而分，與古本異。《校勘記》云：「案：備與字爲一韻，嘉與宜爲一韻，假與甫爲一韻，此鄭氏分節之意也。《通解》誤讀古韻，割裂經注，今本依之，非矣。」注云「于，猶爲也」，謂「于」與「爲」同義，詳《聘禮·記》「賄在聘于賄」下。云「假，大也」者，《爾雅·釋詁》文。云「宜之是爲大矣」者，鄭訓于爲爲，訓假爲大，故言宜之爲大矣。朱子云：「假恐與嘏同，福也，注說非是。」《經義述聞》據《藝文類聚》禮部下，《通典》禮十六竝引作「宜之於嘏」，亦謂嘏大福也，詳前醢辭「孝友時格」下。云「伯仲叔季，長幼之稱」者，如《論語》

周有八士，以伯仲叔季分別長幼之次是也。此「仲叔季唯其所當」七字非字辭，乃作經者於辭外申言之，謂辭稱伯某甫者，特舉伯爲例，其實伯仲叔季，當隨長幼異稱。李氏云：「唯其所當者，當其次則稱之。」今案：如次仲則稱仲某甫，次叔則稱叔某甫，次季則稱季某甫也。《檀弓》曰：「幼名，冠字，五十以伯仲，周道也。」賈疏謂二十爲字之時，未呼伯仲，至五十乃加而呼之。朱子曰：「案：《檀弓》孔疏云：『人年二十，冠而加字，如曰伯某甫者。年至五十耆艾轉尊，則又舍其某字，而直以伯仲別之。』」與此賈疏不同，疑孔說是。云「甫是丈夫之美稱」者，《說文》：「甫，男子美稱也。」鄭氏《詩·甫田》箋云「甫之言丈夫也」是也。云「孔子爲尼甫」者，見《左傳》哀十六年。云「周大夫有嘉甫」者，嘉亦作家，見《左傳》桓十五年。云「宋大夫有孔甫」者，見《左傳》桓二年。云「是其類」者，舉以證經某甫之稱也。云「甫字或作父」者，段氏云：「此古同音通用，《春秋經》孔父、家父，《檀弓》尼父，字皆作父是也。」胡氏承珙云：「鄭君注《禮》，凡不言古今文，言「或作」、「或爲」者，蓋當時又別有本，存之所以通俗。」又下記「章甫，殷道也」，注：「甫或爲父，今文爲斧。」《士相見禮》「若父則游目」，注「今文父爲甫」者，段氏云：「斧與父甫同音，故今文假斧爲甫。」胡

氏云：「此又假借中之假借也。至《士相見禮》之父，今文又借甫爲之。此雖於義易明，然不如各仍其正字，故皆疊而不用。」今案：某甫，鄭多釋爲且字，詳《士喪禮》「哀子某爲其父某甫筮宅」下。○顧氏炎武云：「備與字一韻，嘉與宜一韻，假與甫一韻。古人文字錯綜，不必二句一韻也。」案：前引《校勘記》所云，即本顧說。臧氏庸謂字辭終於「永受保之」，自「曰伯某甫」以下十一字，皆爲記者之言，恐非。

右字辭

屨，夏用葛。玄端黑屨，青絢縹純，純博寸。屨者順裳色，玄端黑屨，以玄裳爲正也。絢之言拘也，以爲行戒，狀如刀衣鼻，在屨頭。縹，縫中紉也。純，緣也。三者皆青。博，廣也。【疏】正義曰：此以下言三服之屨也。左氏暄云：《周禮·屨人》注：「縹下曰屨，複下曰舄。」《古今注》：「以木置屨下，乾腊不畏泥溼，故曰舄。」以是知屨、舄，屨之異名也，但有縹下、複下、用木之異耳。」今案：屨與舄異，而屨爲通名。《說文》云：「屨，足所依也。」又云：「屨，屨也。」《韻會》云：「舄，屨也。」是屨、舄皆

可稱屨矣。經不敘屨於三服後者，一以屨賤，宜別言之，一以屨制繁，若竝言之，恐失輕重之義，故退在篇末也。經言「夏用葛」，則冬用皮可知，故下經又言「冬皮屨可也」。賈氏謂春則從冬，秋則從夏。①張氏爾岐謂春秋熱則從夏，寒則從冬。張說較勝。葛屨見《詩》，亦見《周禮·屨人》。據鄭注《屨人》，謂天子、諸侯吉事皆舄，其餘惟服冕衣翟著舄耳。然則士無冕，亦無舄矣。此玄端黑屨，初加緇布冠時所用之屨也。○注「屨者順裳色」，敖無「者」字，嚴本及各本俱有。云「屨者順裳色」者，謂屨與裳同色，猶之衣與冠同色也。云「玄端黑屨，以玄裳爲正也」者，玄端有玄裳、黃裳、雜裳之不同，而同用黑屨者，以其黑與玄同色，故云「以玄裳爲正也」。云「絢之言拘也，以爲行戒，狀如刀衣鼻，在屨頭」者，《士喪禮》襲時「乃屨，綦結于跗，連絢」，注云：「絢，屨飾，如刀衣鼻，在屨頭上。」《周禮·屨人》鄭注：「絢謂之拘，著舄屨之頭，以爲行戒。」然則絢者屨飾，在屨頭上，其狀如漢時刀衣鼻，有孔得穿繫於中。其義則取於拘，拘止足以爲行戒也。若無絢，則謂之鞮屨，見《周

①

「春則從冬，秋則從夏」，據《儀禮·士冠禮》賈疏當作「春則從夏，秋則從冬」。

禮·鞮鞢氏》。注云「縹，縫中紉也」者，《履人》注同。案《禮記·雜記》：「紉以五采。」注：「紉施諸縫中，若今時條也。」是紉即條，謂屨牙底相接之縫中，綴條以爲飾也。云「純，緣也」者，《履人》注亦同，謂屨口緣邊也。云「三者皆青」者，以經云「青絢縹純」，明是絢縹純三者皆用青色也。此及下白屨皆以繡次爲飾也。云「博，廣也」者，謂緣之廣一寸也。素積白屨，以魁柎之，緇絢縹純，純博寸。魁，蜃蛤。柎，注者。【疏】正義曰：「柎」，宋本《釋文》從手旁。「也」，嚴、徐作「者」，敖氏作「之」，《集釋》及今本作「也」。○此素積白屨，再加皮弁時所用之屨也。素積素裳而白屨，亦順裳色也。絢縹純皆緇，緇亦黑色也。注云「魁，蜃蛤」者，《周禮·掌蜃》曰「祭祀共蜃器之蜃」，鄭注：「飾祭器之屬也。鄭司農云：『蜃可以白器，令色白。』」又曰「共白盛之蜃」，鄭注：「謂飾牆使白之蜃也。今東萊用蛤，謂之又灰云。」《考工記·蜃氏》注鄭司農引此經，亦云：「魁，蛤也。」段氏以《爾雅·釋魚》「魁陸」解之。案：郭注引《本草》云：「魁狀如海蛤。」則「魁陸」爲此經的解。萬氏斯大謂魁以木爲之，今俗制屨者之模範，乃謬說也。云「柎，注者」，段氏云：「《周禮·司市》『其附于刑者，歸于士』，注：『故書附爲柎。杜子春云當爲附。』然則此經「柎之」，亦當爲「附之」也，古柎、付、附三字通用。注者，《周禮·瘍醫》注云：「注，謂附著藥。」則此亦謂附著之

也。「爵弁纁屨，黑絢縹純，純博寸。爵弁屨以黑爲飾，爵弁尊，其屨飾以纁次。」【疏】正義曰：此爵弁纁屨，三加爵弁時所用之屨也。爵弁纁裳而纁屨，亦順裳色也。不言纁裳者，賈氏謂嫌與六冕同玄衣纁裳，故不以衣裳而以首服見屨，是也。注云「爵弁屨以黑爲飾，爵弁尊，其屨飾以纁次」者，案：《考工記》曰：「畫纁之事：雜五色，東方謂之青，南方謂之赤，西方謂之白，北方謂之黑，天謂之玄，地謂之黃。青與白相次也，赤與黑相次也，玄與黃相次也。」鄭注：「此言畫纁六色所象及布采之第次，纁以爲衣。」又曰：「青與赤謂之文，赤與白謂之章，白與黑謂之黼，黑與青謂之黻，五采備謂之繡。」鄭注：「此言刺繡采所用，繡以爲裳。」又鄭注《履人》云：「凡烏之飾，如纁之次。凡屨之飾，如纁次也。」賈疏謂對方爲纁次，比方爲繡次。案：對方者，謂青與白，赤與黑，玄與黃也。比方者，謂青與赤，赤與白，白與黑，黑與青也。上黑屨以青爲飾，白屨以緇爲飾，如繡次，則纁屨當以白爲飾，而乃以黑爲飾者，尊爵弁，故飾屨加纁次，^①與烏同也。○朱子云：「三屨經不言所陳處，注疏亦無明文，疑亦在房中，故既加冠而適房

① 「加」，據文義當作「如」。《續清經解》本「加」上增出「如」字。

改服，即得竝易屨而出也，但不知的在何處。疑服既北上，則或各在其裳之南也。」敖氏云：「此屨先卑而後尊，以三加之次言之也。三屨陳之，蓋在其裳之西。」盛氏云：「朱子謂屨在裳南者，據經服北上言也。敖氏謂在裳西者，據經服東領言也。蓋服既東領，則裳與帶鞶以次而西，屨當在其末，敖說近是。」冬，皮屨可也。【疏】正義曰：敖氏云：「皮屨不見其色與飾，同於上可知。」案：餘已詳上。不屨總屨。總屨，喪屨也。縗不灰治曰總。【疏】正義曰：敖氏云：「不屨之屨，著屨之稱也。」然則不屨，即謂不著矣。注云「總屨，喪屨也」者，李氏云：「喪服有總衰，知總屨喪屨也。《曾子問》曰：『如將冠子而未及期日，而有齊衰、大功之喪，則因喪服而冠，除喪不改冠。』《雜記》曰：『以喪冠者，雖三年之喪可也。大功之末，可以冠子，可以嫁子。父小功之末，可以冠子，可以嫁子，可以取婦。己雖小功，既卒哭，可以冠，取妻。下殤之小功，則不可。』今案：據《曾子問》，有因喪而冠之禮。因喪而冠，可用喪屨。此經所云乃平常冠法，則不得用喪屨也。然考《喪服》總衰不用總屨，他亦無總屨者，則總屨喪屨之說似有難明。惟敖氏云：「總乃布之疏者，以之爲屨，則輕涼也。言此者，嫌夏時冠或得用之。總非吉布，而冠則嘉禮之重者，是

以不宜屨此屨也。」此說得之。云「縗不灰治曰總」者，賈疏云：「斬衰冠六升，傳云：『鍛而勿灰。』則總衰四升半，不灰治可知。」餘詳《喪服》「總衰」傳下。

右 屨

記。冠義。【疏】正義曰：賈疏云：「凡言記者，皆是記經不備，兼記經外遠古之言。」熊氏朋來云：「十七篇惟《士相見》、《大射》、《少牢饋食》、《有司徹》四篇不言記，其有記者十有三篇。然《冠禮》之記有『孔子曰』，其文與《郊特牲》所記冠義正同。其餘諸篇，惟《既夕》之記略見於《喪大記》之首章，《喪服》之傳與《大傳》中數語相似，餘記自與《小戴》冠昏等六義不同，何二戴不以《禮經》所有之記文而傳之也？十三篇之記，必出孔子之後，子夏之前。蓋孔子定禮而門人記之，故子夏爲作《喪服傳》，而竝其記亦作傳焉。」張氏爾岐云：「此記已有『孔子曰』，當在孔子後，不知定誰所錄。冠義又記中小目，餘篇不復言某義者，或欲舉一例餘也。又《戴記》亦有《冠義》，又後儒所爲，故與此異也。盛氏云：『凡爲記者有三，有記經所未備者，有記禮之變異者，有各記所聞頗與經義相違者。』記經所未備

者，周公之徒爲之，與經竝行者也。記禮之變異，則非周之盛時之書矣，其在春秋之際乎？至於各記所聞者，則七十子後學所記也。」今案：諸家發明記義，各有所見，故竝錄之。又盛氏謂此篇之經至「歸賓俎」而止矣，自「若不醴則醢用酒」以下皆記也，以《昏禮》較之，此「若不醴」及下文「若殺」，猶《昏禮·記》「若不親迎也」；「若孤子」、「若庶子」及「冠者母不在」，猶《昏禮·記》「庶婦」及「宗子無父」之類；屨制一節，亦似《昏禮·記》「摯不用死，腊必用鮮」之類，皆記經所未備；至諸辭，則《昏禮》俱屬記內，尤爲明證。案：此經古本相傳已久，未可據易，而其說則可存參云。始冠，緇布之冠也。大古冠布，齊則緇之。其綏也，孔子曰：「吾未之聞也，冠而敝之可也。」大古，唐虞以上。綏，纓飾。未之聞，大古質，蓋亦無飾。重古，始冠冠其齊冠。白布冠者，今之喪冠是也。【疏】正義曰：「大古」，嚴本作「大」，注同。《集釋》亦作「大」，今本「大」作「太」，盧氏《詳校》從「大」。注「大古質，蓋亦無飾」，毛本無「蓋亦」二字，嚴、徐、《集釋》、《通解》、《要義》、敖氏俱有。「白布冠者」，毛本「冠」下無「者」字，嚴、徐俱有。○此以下至末，與《郊特牲》所引冠義悉

同，唯字句小異耳。彼文作「始冠之緇布之冠也」，多一「之」字。冠禮三加，先加緇布冠，故以爲始冠之冠也。「大古冠布，齊則緇之」，此釋緇布冠所由來也。《郊特牲》疏云：「大古之時，其冠唯用白布，常所冠也。若其齊戒，則染之爲緇。」彼注云：「齊則緇之，鬼神尚幽闇也。」其綏也，孔子曰：「吾未之聞也」，此引孔子之言，以明有綏之非也。《郊特牲》疏云：「《玉藻》『緇布冠纁綏』，則緇布冠有綏者。皇氏云：『此經所論謂大夫、士，故緇布冠無綏。諸侯則位尊盡飾，故有綏也。』」今案：皇說蓋本《玉藻》注。然孔子云未聞，是緇布冠古未有加綏之事。《玉藻》所云，論者多以爲非古制，則諸侯亦不得有綏矣。「冠而敝之可也」，此亦孔子之言，緇布冠冠訖不復用，故可敝棄之也。晁氏云：「自士以上冠訖不復著，然庶人猶常著之，故《詩》云：『彼都人士，臺笠緇撮。』」案：《毛傳》云：「緇撮，緇布冠也。」《郊特牲》注云：「三代改制，齊冠不復用也。」又《玉藻》曰：「始冠緇布冠，自諸侯下達，冠而敝之可也。」鄭注：「本大古耳，非時王之法服也。」與《郊特牲》注義同。自諸侯下達，謂自諸侯至士，皆用緇布冠也。不言天子者，以天子始冠用玄冠也。江氏永云：「後世之玄冠用緇不用布，故始冠之緇布冠既冠可敝。注疏未明言玄冠用緇，則

可敝之義不明，當補。」注云「大古，唐虞以上」者，以下云「三王共皮弁素積」，知大古在三王前，故云「唐虞以上」。《郊特牲》注亦云：「唐虞以上曰大古也。」云「綏，纓飾」者，陳氏奐云：「《內則》『冠綏纓』，鄭注『綏，纓之飾也』，孔疏：『結纓頷下以固冠，結之餘者散而不垂，謂之綏。』據此孔疏，則纓綏一物。張氏惠言《儀禮圖》云：『疑綏者別爲絲組，既結纓乃著於纓之兩端。』《玉藻》疏云惟纓爲異，其青組纓與土同。是孔亦以綏纓爲二物矣。又玄冠紫綏，注云綏當用纁。諸侯玄冠丹組纓，而綏當用纁，則鄭亦以纓綏爲一也。」云「未之聞，大古質，蓋亦無飾」者，《雜記》曰：「大白冠，緇布之冠，皆不蕤。」蕤與綏同，鄭注「不綏，①質無飾也」是也。云「重古，始冠冠其齊冠」者，緇布冠，古之齊冠，重之，故始冠不用玄冠，而用緇布冠也。云「白布冠者，今之喪冠是也」者，大古唯服白布冠，後制毋追之等，則以白布冠爲喪冠也。《郊特牲》注亦云：「大白，即大古白布冠，今喪冠也。」

右記用緇布冠之義

適子冠于阼，以著代也。醺于客位，加

有成也。醺，夏殷之禮。每加於阼，則醺之於客位，所以尊敬之，成其爲人也。【疏】正義曰：嚴、徐、《集釋》俱有此注，在「加有成也」下。楊氏有「醺夏殷」至「於客位」十五字，今本竝脫。又注「阼」下「則」字，《集釋》作「階」，非。○《郊特牲》注云：「東序少北，近主位也。」案：阼是主位，故冠於此以著代。敖氏云：「著，明也。明其代父也。」《禮記·冠義》注云：「適子冠於阼，若不醺，則醺用酒於客位，敬而成之也。戶西爲客位，庶子冠於房戶外，又因醺焉，不代父也。」今案：適子醺於客位，醺亦於客位，記不言醺而言醺者，欲見醺與醴雖殊，而於客位則同，以別於庶子也。此注極明析。注云「醺，夏殷之禮」者，此賈疏所本，然朱子已辨之矣，未可從。蓋醴質而醺文，三代之禮每由質而趨於文，未有由文而趨於質也。云「每加於阼，則醺之於客位」者，謂一加則一醺也。此專主醺禮言之，不若《禮記注》之包括。云「所以尊敬之，成其爲人也」者，《郊特牲》注云：「每加而有成人之道也，成人則益尊。醺於客位，尊之也。」二注解「有成」義異，亦《禮記注》爲長。敖氏云：「加，猶尚也，尊也。尊其有成人之道，故以客禮待之。」張氏爾

①「綏」，《禮記·雜記》鄭注當作「蕤」。

岐云：「加有成，加禮於有成德者也。」姜氏兆錫云：「加、嘉同。適子冠於阼，醴於戶西，醢用酒亦如之，凡以嘉之也。」今案：此數說不解加爲加冠，甚是，否則與下「三加彌尊」句複矣。

右記重適子之義

三加彌尊，諭其志也。彌，猶益也。冠服後加益尊。諭其志者，欲其德之進也。【疏】正義曰：嚴、徐、

《集釋》俱有此注，楊氏有「諭其志者」二句，今本竝脫。○《郊特牲》「諭作喻」，義同。注云「彌，猶益也」者，彌

與益殊，而義可通於益，故云「猶益」。《呂覽》高注亦云：

「彌，猶益也。」云「冠服後加益尊」者，謂始加緇布冠，次加皮弁，皮弁尊於緇布冠，三加爵弁，爵弁又尊於皮弁，是益尊也。云「諭其志者，欲其德之進也」者，張氏爾岐云：「教諭之，使其志存修德，每進而上也。」冠而字之，敬其名也。名者質，所受於父母。冠成人，益文，故敬之也。

今文無「之」。【疏】正義曰：注「故敬之也」今文無之，下五字今本俱脫，嚴、徐、《集釋》俱有。云「名者質，所受於父母。冠成人，益文」者，子生三月父名之，既冠賓字之，字以

代名，是益文也。云「故敬之也」者，張氏爾岐云：「敬其名，敬其所受於父母之名，非君父之前不以呼也。」云「今文無『之』」者，案：《郊特牲》作「冠而字之」，有「之」字，與古文合，故鄭從古文。○《禮記·冠義》曰：「故冠於阼，以著代也。醢於客位，三加彌尊，加有成也。已冠而字之，成人之道也。」與此大同，而文有詳略，蓋記禮者傳聞之異耳。

右記三加及冠字之義

委貌，周道也。章甫，殷道也。毋追，

夏后氏之道也。委，猶安也。言所以安正容貌。章，

明也。殷質，言以表明丈夫也。甫或爲父，今文爲「斧」。

毋，發聲也。追，猶堆也。夏后氏質，以其形名之。三冠皆

所服以行道也，其制之異同未之聞。【疏】正義曰：「毋

追」，唐石經、嚴本、閩、監、宋本《釋文》俱作「毋」，今本《釋

文》、徐、陳俱作「母」，注同。《校勘記》云：「案：古人書

「母」、「毋」不甚有別，故《釋文》遇「毋」字必有音。《曲禮》

音義曰：「毋字與父母字不同，俗本多亂，讀者皆朱點母字

以作無音，非也。」可見二字蒙溷已久，凡可以意會者，今不

盡校也。」注首「或謂委貌爲玄冠」，嚴、徐、《集釋》俱無此七

字，《通解》及今本有。金氏曰追云：「此乃鄭注《郊特牲》文，因《通解》參取兩注，傳寫者不察，而誤衍於此耳。」「甫或爲父」，葛本「爲」作「謂」。「猶堆也」，陸氏云：「堆」，本或作「塹」，同。「皆所常服」，嚴本無「常」字。○江氏筠云：「委貌三句，是據經緇布冠而推言之。周弁、殷冏、夏收，據爵弁而言。退皮弁在下者，以上二者三代異制異名，皮弁則無異故也。」今案：江說本《郊特牲》疏。張氏爾岐謂此因冠畢易服玄冠，故記之，蓋重古始冠服緇布冠，其後即服玄冠。二說皆通。前筮曰「主人玄冠」，注：「玄冠，委貌也。」《玉藻》注同。《續漢書·輿服志》注云：「石渠論玄冠朝服，戴聖曰：『玄冠，委貌也。』」是鄭所本矣。注云「委，猶安也。言所以安正容貌」者，鄭訓委爲安，而又申言安正容貌，以明冠名委貌之義也。委貌亦單言委，《雜記》言「委武玄縞」，《左傳》言「晏平仲端委立于虎門」是也。云「章，明也。殷質，言以表明丈夫也」者，鄭注《書·堯典》「平章百姓」，亦訓章爲明。《詩·甫田》箋云：「甫之言丈夫。」故以表明丈夫解冠名章甫之義也。云「甫或爲父，今文爲『斧』」者，①詳前「伯某甫」下。江氏永云：「公西華言『端章甫』，猶云端委。孔子言『長居宋，冠章甫之冠』，魯人歌『衰衣章甫，爰得我所』，似當時章甫與委貌亦通行，可通

稱也。」云「毋，發聲也」者，《史記集解》引《漢書音義》亦云：「毋，發聲語助。」又《釋名》作「牟追」，《廣雅》作「無追」，毋、牟、無三字聲同。云「追，猶堆也」者，惠氏棟云：「案：追，古堆字。枚乘《七發》曰：『踰岸出追。』李善曰：『追亦堆字。今爲追，古字假借。』《說文》云：『白，小阜也。』徐鉉曰：『今俗作堆。』河東風陵堆，戴延之謂之風塹。」案：此與《釋文》「堆本作塹」合。云「夏后氏質，以其形名之」者，以委貌、章甫皆言其義，此追與堆同，是言其形也。云「三冠皆所服以行道也」者，《郊特牲》注云：「常所服以行道之冠也。」孔疏：「行道，謂養老、燕飲、燕居之服。」敖氏訓道爲制，恐非。云「其制之異同未之聞」者，謂其制或異或同，未聞也。鄭在漢時既未之聞，則後世如《三禮圖》等書所云「三冠制相似，皆漆布殼，以緇縫其上」，蓋有難於徵信者矣。周弁，殷冏，夏收。弁名出於槃。槃，大也，言所以自光大也。冏名出於幬。幬，覆也，言所以自覆飾也。收，言所以斂髮也。其制之異亦未聞。【疏】正義曰：《白虎通》云：「弁之爲言攀也，所以攀持其髮也。」《詩·文王》曰「常服黼冏」，《毛傳》：「冏，殷冠也。」

①「爲」，原作「作」，今據上注文改。

《五經文字》云：「𡙇，《字林》作𡙇，經典相承，隸省作𡙇。」《史記·五帝紀》云帝堯「黃收純衣」。或謂收以持筭。《王制》曰：「有虞氏皇而祭，夏后氏收而祭，殷人𡙇而祭，周人冕而祭。」似𡙇、收即冕矣。然此記與弁連言，冠禮三加爵弁，不加冕，則二者當與弁同也。江氏筠云：「凡經專言弁者，類皆指爵弁。《雜記》：『大夫弁而祭於己，士弁而祭於公』，下云「士弁而親迎」是也。爵弁既非冕制，而與𡙇、收連言者，蓋冕飾至周始備，𡙇、收二者，周制以弁例之。如殷士裸將服𡙇，周士祭於公用弁，其一也。又殷人𡙇而葬，周人弁而葬，亦其一也。」今案：《說文》：「弁，冕屬也。夏曰收，殷曰𡙇，周曰弁。」《公羊傳》宣元年何注云：「夏曰收，殷曰𡙇，周曰弁，加旒曰冕。」此可證弁、𡙇、收同類矣。○注「齋所服而祭也」，嚴、徐、《集釋》俱無此六字，《通解》及今本有。盧氏文弨云：「《郊特牲》疏全引此兩節注文，而無『或謂委貌爲玄冠』及『齋所服而祭也』兩句，尤可證。」「其制之異亦未聞」，嚴、徐、《集釋》俱有「亦」字，今本無。「異」，葛本誤作「畢」，「異」下敖氏有「同亦」二字。盧氏云：「《郊特牲》疏引此注有亦字，當補正。」今案：《王制》疏引亦有「亦」字。云「弁名出於槃。槃，大也。𡙇名出於幬。幬，覆也」者，古音弁與槃、𡙇與幬相近，故取聲近之

字解之。云「收言所以收斂髮也」者，即就字之本義解之也。三王共皮弁素積。質不變。【疏】正義曰：皮弁素積，解已詳前。《郊特牲》注云：「所不易於先代。」孔疏：「以其質素，故三王同服，無所改易也。」亦據此注「質不變」申之。《說苑》云：「皮弁素積，百王不易。」

右記三代冠之同異

無大夫冠禮，而有其昏禮。古者五十而后爵，何大夫冠禮之有？據時有未冠而命爲

大夫者。周之初禮，年未五十而有賢才者，試以大夫之事，猶服士服，行士禮。二十而冠，急成人也。五十乃爵，重官人也。大夫或時改取，有昏禮是也。【疏】正義曰：自此至「德之殺也」，皆推明士冠禮可以上達之故。此節特言大夫無冠禮也，有昏禮帶說。古者二句，乃申明大夫無冠禮之由。下云「古者生無爵，死無謚」，注云：「古謂殷。」此云古，據注則謂周初時也。○注「或時改取」，毛本「取」作「娶」，嚴、徐、《集釋》、《通解》、敖氏俱作「取」。云「據時有未冠而命爲大夫者」，時謂周末作記之時，未冠而命爲大夫，其冠亦從乎士而已。大夫不宜有冠禮，故非之。云「周

之初禮，年未五十而有賢才者，試以大夫之事，猶服士服，行士禮者，此正明古者必五十而後爵也。云「二十而冠，急成人也。五十乃爵，重官人也」者，周公制禮，五十始命爲大夫，服官政。此注正明冠必二十，爵必五十之義也。云「大夫或時改取，有昏禮是也」者，三十而取，五十而爲大夫，則大夫不宜有昏禮。然或五十後改取，則宜有之，故注云是也。公侯之有冠禮也，夏之末造也。造，作也。自夏初以上，諸侯雖父死子繼，年未滿五十者，亦服士服，行士禮，五十乃命也。至其衰末，上下相亂，篡殺所由生，故作公侯冠禮，以正君臣也。《坊記》曰：「君不與同姓同車，與異姓同車不同服，示民不嫌也。以此坊民，民猶得同姓以殺其君也。」【疏】正義曰：《郊特牲》云：「諸侯之有冠禮。」「公」作「諸」，無「也」字。張氏爾岐云：「此言不獨大夫無冠禮，雖公侯冠禮亦夏末始作，非古也。據注訓造爲作，則末字當一讀。近徐師曾解《郊特牲》云：「末造猶言末世。」則二字連讀。」盛氏云：「夏之末造也」句法與《檀弓》「魯禮之末失也」相似，當於末字一讀，徐說非。」盛氏又云：「大夫以上本無冠禮，而《玉藻》記天子、諸侯始冠之冠，《家語》記成王冠頌及公侯冠禮，《左傳》載魯襄公冠事，《國語》載趙文子冠事。然則諸侯冠禮始於夏末，天子

冠禮始於周初，大夫冠禮其始於周之季世乎。《郊特牲》孔疏謂「此記直言諸侯，不云天子，又下云天子之元子猶與士同，則天子冠禮由來已久，但無文以明之」。案：此臆說也。《家語》言天子冠禮，而直以成王之事實之，且曰「此周公之制也」，足徵其所自起矣。惟其先有諸侯冠禮，而後有天子冠禮，故《大戴禮·公冠》篇云：「天子擬焉。」今案：天子、諸侯之冠詳《家語》，竝錄其文備考。《家語·冠頌》：「邾隱公既即位，將冠，使大夫因孟懿子問禮於孔子。孔子曰：『雖天子之元子，猶士也，其禮無變，天下無生而貴者故也。行冠事，必於祖廟，以裸享之禮將之，以金石之樂節之，所以自卑而尊先祖，示不敢擅也。』懿子曰：『天子未冠即位，長亦冠乎？』孔子曰：『古者王世子雖幼，其即位則尊爲人君。人君，治成人之事者，何冠之有？』懿子曰：『然則諸侯之冠異天子歟？』孔子曰：『君薨而世子主喪，是亦冠也已，人君無所殊也。』懿子曰：『今邾君之冠，非禮也？』孔子曰：『諸侯之有冠禮也，夏之末造也，有自來矣，今無譏焉。天子冠者，武王崩，成王年十有三而嗣立，周公居家宰攝政，以治天下。明年夏六月，既葬，冠成王而朝於祖，以見諸侯，示有君也。周公命祝雍作頌，曰：祝王，辭達而勿多也。祝雍辭曰：使王近於民，遠於年，嗇

於時，惠於財，親賢而任能。其頌曰：令月吉日，王始加元服，去王幼志，服袞職，欽若昊命，六合是式，率爾祖考，永永無極。此周公之制也。」懿子曰：「諸侯之冠，其所以爲賓賓何如？」孔子曰：「公冠則以卿爲賓，公自爲主，迎賓，揖，升自阼，立於席北，其禮也則如士，饗之以三獻之禮，既醴降自阼階。諸侯非公而自爲主者，其所以異，皆降自西階，玄端與皮弁，異朝服素鞞。公冠四加，玄冕祭。其酬幣於賓，則束帛乘馬。王太子、庶子之冠擬焉，皆天子自爲主，其禮與士無變，饗食賓也皆同。」○注「五十乃命也」，「五」，徐本作「吾」，誤。「篡殺所由生」，《釋文》作「殺」，云：「本又作弑，亦作試。」嚴、徐、陳本，《通解》亦俱作「殺」，下同。「以殺其君也」，毛本「也」作「者」，嚴、徐、《集釋》俱作「也」。云「造，作也」者，謂作此禮也。《郊特牲》注云：「言夏初以上，諸侯雖有幼而即位者，猶以士禮冠之，亦五十乃爵命也。至其衰末，未成人者多見篡弑，乃更即位則爵命之，以正君臣，而有諸侯之冠禮。」與此注略同。《晉書·禮志》云：「《儀禮》：『公侯之有冠禮，夏之末造也。』王、鄭皆以爲夏末上下相亂，篡弑由生，故作公侯冠禮。」是王亦與鄭同矣。引《坊記》者，證篡弑之事也。天子之元子猶士也，天下無生而貴者也。元子，

世子也。無生而貴，皆由下升。【疏】正義曰：《郊特牲》無「猶」字。「天下無生而貴者也」，明天子之元子與士同，故冠用士禮也。褚氏云：「上既言大夫與諸侯無自身之冠禮，此又明冠子亦用士禮，雖天子之元子尚然，況等而下之乎。」注云「元子，世子也」者，元者長也，鄭必解爲世子者，明其有繼體之尊也。云「無生而貴，皆由下升」者，《郊特牲》注云：「明人有賢行著德，乃得貴也。」惠氏棟云：「此說與《易》合。乾初爲元士，《彖傳》曰：『時乘六龍以御天。』皆由下升也。」今案：《白虎通》云：「王者太子亦稱士何？舉從下升，以爲人無生得貴者，莫不由士起。」是注說所本矣。繼世以立諸侯，象賢也。象，法也。爲子孫能法先祖之賢，故使之繼世也。【疏】正義曰：此下二節，又覆解諸侯、大夫所以無冠禮之意。張氏爾岐云：「諸侯繼世而立，疑其生而貴矣，實以其象賢乃立之。天子元子亦以象賢乃享天位，均非生而貴者也，故其冠皆用士禮也。」注云「象，法也」者，象與像同，「象賢」二字亦見《書·微子之命》篇。以官爵人，德之殺也。殺，猶衰也。德大者爵以大官，德小者爵以小官。【疏】正義曰：官與爵有殊，《王制》論定然後官之，任官然後爵之是也。張氏云：「凡以官位爵人，皆以德爲等殺。爵以待有德，安

得有生而貴者乎？」注云「殺，猶衰也」者，惠氏棟云：「衰，猶差也。」荀子《云》「相地而衰政」，注：「衰，差也。」《九章算術》謂差分為衰分。然則殺謂德有等差，故鄭又云「德大者爵以大官，德小者爵以小官」也。或解殺為隆殺之殺，謂後世擇人任官，不及上世民各推其賢者奉之，以此為德之殺，恐非。○盛氏云：「朱子解自『繼世以立諸侯』以下別為一義，以其為錯簡也。竊疑此與《郊特牲》文同，不應兩處皆屬錯簡。」沈氏彤云：「先儒疑為錯簡，非也。去此三節，則義不明備。」今案：盛、沈之說似是。

右記大夫以上冠皆用士禮之義

死而謚，今也。古者生無爵，死無謚。

今謂周衰，記之時也。古謂殷，殷士生不為爵，死不為謚。周制以士為爵，死猶不為謚耳，下大夫也。今記之時，士死則謚之，非也。謚之，由魯莊公始也。【疏】正義曰：「謚」，今本作「謚」，唐石經、嚴本俱作「謚」。盧氏文弼云：「謚，《說文》本作謚，今竝當作謚。」○沈氏彤云：「此因上『冠而字之，敬其名也』，而類及之。」今案：沈說是也。《表記》曰：「先王謚以尊名。」《檀弓》曰：「幼名，冠字，五十以伯

仲，死謚，周道也。」是謚法至周始備，然士死猶不為謚，其有謚則起於後世，故記之以明今古之變耳。注云「今謂

周衰，記之時也者，以記云「今也」，明是作記者據其時而言，故知今謂周衰，作記之時也。云「古謂殷，殷士生不為爵，死不為謚」者，《郊特牲》注云：「古，謂殷以前也。大夫以上乃謂之爵，死有謚也。」是士無爵無謚矣。《白虎通》云：「公卿大夫者何謂也？內爵稱也。內爵稱公卿大夫何？爵者，盡也。各量其職，盡其才也。」又云：「何以知士非爵？《禮》曰四十強而仕，不言爵為士，至五十爵為大夫。」故知士不為爵也。云「周制以士為爵，死猶不為謚耳，下大夫也」者，《周禮·小宗伯》曰：「賜卿大夫、士爵，則殯。」《孟子》言周室班爵祿，而云：「上士一位，中士一位，下士一位。」則周固以士為爵矣。又《大史》曰「小喪賜謚」，鄭注：「小喪，卿大夫也。」言卿大夫而不及士。又《白虎通》云：「卿大夫老歸，死者有謚何？謚者，別尊卑，彰有德也。卿大夫歸無過，猶有祿位，故有謚也。」亦不言及士，則士死不為謚明矣，是下於大夫也。云「今記之時，士死則謚之，非也」者，言非禮也。云「謚之，由魯莊公始也」者，①

①「由」，原作「自」，今據注文改。

《禮記·檀弓》曰：「魯莊公及宋人戰於乘邱，縣責父御，卜國爲右。馬驚，敗績，公墜，佐車授綬。公曰：『末之卜也。』縣責父曰：『他日不敗績，而今敗績，是無勇也。』遂死之。圉人浴馬，有流矢在白肉。公曰：『非其罪也。』遂誅之。士之有誄，自魯莊公始也。」王氏士讓云：「鄭注引魯莊公誄縣責父之事，似未確。蓋謚與誄有辨，誄者不必皆謚，故哀公誄孔子，但稱尼父，仍字之而不謚。」汪氏肇澐云：「周制，下大夫、士皆無謚。是以孔子爲下大夫，有誄無謚。魯莊公誄縣責父，是誄也，非謚也。誄與謚不同，鄭誤以誄爲謚。」今案：《周禮·大祝》注云：「誄謂積累生時德行，以賜之命。」是與易名之典異也。○此記所引冠義之文，自始至末，詞義高古，實勝《禮記·冠義》篇，蓋不知誰人所作，要必孔子之徒爲之，是以傳習者多。《儀禮》作記者錄其文，以爲《士冠》之記，而《戴記》又取以入《郊特牲》篇也。不然，何以二者無異辭乎？

右記士爵謚今古之異

儀禮正義卷三 鄭氏注

受業江寧楊大培補

士昏禮第二

鄭《目錄》云：「士娶妻之禮，以昏爲期，因而名焉。必以昏者，取其陽往而陰來。日入三商爲昏。昏禮於五禮屬嘉禮。大、小戴及《別錄》此皆第二。」【疏】正義曰：「昏」，嚴本作「昏」，唐石經作「昏」。《說文》：「日冥也。從日氏省。」^①氏者，下也。段氏玉裁注：「字從氏省，爲會意，絕非從民聲，爲形聲也。唐人作《五經文字》乃云：『緣廟諱偏旁準式省從氏。』」^②凡氾、昏之類皆從氏。以「昏」類「泯」，其亦慎矣。今案：據此，當以作「昏」爲正。從民作「昏」，非也。或加女旁作「婚」，亦俗體耳。「娶」，《釋文》作「取」。「陽」上，《釋文》有「取其」二字。《羣書拾補》云：「《三禮考注》同。」今據增。臧

《目錄》本「陽」上有「取」字，「昏禮」「昏」下無「禮」字。○鄭云「士取妻之禮」者，鄭以此篇主言士禮。士二十而冠，冠而後娶，故《昏》次於《冠》也。敖氏曰：「此篇主言士之適子娶妻之禮。」《儀禮釋官》云：「案：此篇主言士之昏禮，亦兼已仕、未仕者言。大夫無冠禮而有昏禮，鄭氏謂大夫或時改娶也。其天子、諸侯早娶亦有其禮，今皆亡耳。」云「以昏爲期，因而名焉」者，下經云：「期初昏，陳三鼎于寢門外。」又記云：「凡行事必用昏听。」注：「用听，使者，用昏，婿也。」案：昏禮有六：一曰納采，二曰問名，三曰納吉，四曰納徵，五曰請期，六曰親迎。自納采至請期五禮，皆遣使者行之，必用听者，賈疏謂「听，即明之始，君子舉事尚早」，是也。婿之親迎則用昏，故注云「用昏，婿也」。婿親迎用昏，因名其禮爲「昏禮」。自天子以下，禮之隆殺不同，而其名「昏」則同，故《禮記·哀公問》言天子、諸侯親迎之禮曰「大昏」，《周禮·大司徒》言聚萬民之政曰「多昏」，是上下皆名「昏」也。云「必以昏者，取其陽往而陰來」者，

①「省」，原脫，今據《說文解字》補。
②「準」，原誤作「隼」，今據《說文解字注》改。

《三禮札記》云：「晝爲陽，夜爲陰。昏是陰陽交接之時，故云『取其陽往而陰來』也。《白虎通》云：『所以昏時行禮何？示陽下陰也。』昏亦陰陽交時也。」云「日入三商爲昏」者，賈疏云：「商謂商量，是漏刻之名，故《三光靈曜》亦日入三刻爲昏，不盡爲明。案：馬氏云：日未出、日歿後皆云二刻半，前後共五刻。今云三商者，據整數而言，其實二刻半也。」惠氏棟云：「《三光靈曜》，當作『考靈曜』。」今案：《周禮·司寤》疏云：「日入三刻爲昏，不盡三刻爲明。」則「不盡」下當有「三刻」二字。《禮經釋例》云：「王氏應麟曰：『《詩正義》云：《尚書緯》謂刻爲商。夏文莊《蓮華漏銘》：五夜持宵，三商定夕。蓋取此。蘇子美亦云：三商而眠，高春而起。』義與賈疏同，皆作商量之商，讀如式羊切。阮侍郎元云：『三商，日入後計劃漏之數，商算至三次也。今籌算法有初商、再商、三商之制，古法或與之同。考《士昏·記》：凡行事必用昏昕。昏昕者，即今之矇影限也。以時憲術考之，太陽未出之先，已入之後，距地平一十八度皆有光，以一十八度爲矇影限。然北極出地有高下，太陽距赤道有南北，故矇影刻分隨時隨地不同。其隨時不同者，二分之刻分少，二至之刻分多也；

隨地不同者，愈北則刻分愈多，愈南則刻分愈少也。若北極出地五十度，則夏至之夜半猶有光，愈高則愈不夜矣。南至赤道下，則二分之刻分極少，而二至之刻分相等。赤道以南則反是。古人推步之術甚疎，不論何地何時，皆以二刻半爲昏昕之候，其說今不可復用矣。」云「昏禮於五禮屬嘉禮」者，詳《士冠禮》目錄下。褚氏寅亮云：「杜佑謂：『康成主男必三十娶，女必二十嫁。王肅以爲男十六可娶，女十四可嫁，三十、二十言其極耳。』今案：三十、二十而嫁娶者，《周官》掌萬民之判，衆庶之禮也；《喪服經》有爲夫姊之長殤，士、大夫之禮也；《左傳》十五而生子，國君之禮也。」又：「鄭氏嫁娶必以仲春，王肅以爲秋冬嫁娶之時。孫卿曰：霜降逆女，冰泮殺止。《家語》：霜降而婦功成，嫁娶者行焉。冰泮而農桑起，昏禮殺於此。束皙云：春秋二百四十年，天王娶后，魯女出嫁，夫人來歸，大夫逆女，自正月至十二月悉不以得時，失時爲褒貶，何限於仲春、季秋以相非哉？」《士昏禮》請期辭曰：惟是三族之不虞。卜得吉日，便相配合。先賢以時月爲限，恐非至當。」說似圓通，然三十娶、二十嫁之文不特見于《周官》，即《曲禮》、《內則》諸文亦彰彰可據。《白虎通》云：「男三十

筋骨堅強，任爲人父；女二十肌膚充滿，任爲人母。合爲五十，應大衍之數，生萬物也。」是也。自春秋時風俗嬗薄，有不待年而即恣欲者，于是不得已，乃遷就爲早昏之禮，以杜其漁色之端。禮之本義，豈若是乎？又嫁娶必以春者，《白虎通》曰：「天地交通，萬物始生，陰陽交接之時。」故「仲春之月，令會男女」，其文見於《周官》；「二月，綏多士女」，其文見於《大戴禮·夏小正》；「士如歸妻，迨冰未泮」，其文見於《邶風》。今舍經不從而信荀卿、王肅等言，祇見其惑已。」又曰：「娶妻不先告廟者，示不必安也。」蓋因《昏禮》篇無告廟之文耳。然《左傳》楚公子圍娶于鄭之辭曰：「圍布几筵，告于莊、共之廟而來。」明言告廟矣。陳氏《禮書》謂「既納采、問名，然後歸卜於禰；既卜，然後納吉，當在告廟之日」，遂引「卜郊受命于祖廟，作龜于禰宮」，注云「受命退，乃卜」，以爲卜昏之禮亦如之。案：隱八年《左傳》杜解云：「禮，逆婦必先告祖廟而後行。鄭忽先逆婦而後告廟，故曰先配而後祖。」《正義》引鄭司農「以配爲同牢食也。先食而後祭祖，無敬神之心，故曰誣其祖」。孔氏詆鄭而從杜。其實，告廟而後行，與夫祭祖而後同牢，禮皆無其文。」毛氏奇齡云：「《昏義》：『壻至，

主人几筵于廟，而拜迎于門外。婦家亦告廟。且迎壻入廟行事，則婦至可知矣。又納采、納吉、問名、納徵、請期五禮，婦家俱告廟，行事歷載士禮，而壻家未嘗一告廟，則壻家行事皆不載矣。而《白虎通》即曰「娶妻必先告廟」，何鹵莽邪？賈氏以爲士、大夫、諸侯、天子禮各不同，恐亦周旋之說耳。」吳氏廷華云：「篇內衣服之屬無一定之等，如用鴈爲大夫之摯，墨車爲大夫之車，其餘如爵弁與禁又俱爲士禮。注以墨車爲攝盛，疏以女從纁黼爲假盛。愚謂若以攝盛言，則車服等俱應從大夫禮，胡又有攝、不攝之分？則攝盛特說經者不得已之辭耳。」又云：「器服等不過錯舉士、大夫禮以爲之準，俾行禮者得六禮大節所在，奉而行之，餘則各引其分而爲之具。聖人制禮之義，大略如此。」方氏苞云：「親迎昏以爲期，蓋必已成夫婦而後可見于舅姑。若早至而不見所尊，則嫌于慢，故必近夜爲宜。」案：「納徵」疏云：「大夫無冠禮而有昏禮，若試爲大夫及幼爲大夫者，依士禮。若五十而爵，改娶者，大夫昏禮，玄纁及鹿皮則同于士。餘有異者，無文以言也。」記云「無大夫冠禮而有其昏禮」，此篇是也。疏以爲試爲大夫及幼爲大夫者依士禮，恐非。《周禮疏》亦有改娶之說，大抵皆因

《曲禮》「三十壯，有室」、「五十命爲大夫，服官政」，故作此周旋耳。萬氏充宗云：「先王之制，仕者世祿不世官，官有尊卑，祿即有厚薄。因是以思，卿之子孫即食卿之祿，大夫之子孫即食大夫之祿。既食卿、大夫之祿，即行卿、大夫之禮，固不必身爲卿、大夫也。大夫之有昏禮，曷足怪？若以爲備改娶，聖人豈預爲此不祥之目哉？」其說是也。但萬氏尚未考此篇之即大夫昏禮耳。

昏禮。下達，納採用鴈。達，通達也。將欲

與彼合昏姻，必先使媒氏下通其言。女氏許之，乃後使人納其采擇之禮。納采而用鴈爲摯者，取其順陰陽往來。《詩》云：「取妻如之何？匪媒不得。」昏必由媒，交接設紹介，皆所以養廉恥。【疏】正義曰：徐本、《通典》、《集釋》、《要義》、楊氏注無「達」字及「納采而」三字。○褚氏寅亮云：「朱子謂『下達』二字爲用鴈而發，言士、庶皆得用鴈，攝盛之意也。如此，則宜云『納採用鴈下達』，文義與『三年之喪自天子達』同，方順。今無上事，而啓口即云『下達』，古人立言恐不若是。仍當主『使媒下通其言』之說。至用鴈之義，^①注與六摯絕不相涉。^②若云士許用大夫之摯以攝盛，則天子、諸侯大昏，合二姓之好，以爲宗廟社稷之主，

何反降用大夫之所執乎？又案：《白虎通》云：「用鴈者，取其隨時南北，不失其節，明不奪女子之時也；又取飛成行、止成列，明嫁娶之禮長幼有序，不相踰越也。」沈氏彤曰：「『下達』『下』字當去聲讀，如《周易》『男下女』之『下』。蓋自請期以上，皆壻父下女父之事。故女在家，壻父未有不爲之下者，^③故使媒氏下達，乃壻父自下之始也。」注

云「將欲與彼合昏姻，必先使媒氏下通其言。女氏許之，乃後使人納其采擇之禮」者，《周禮·地官》有媒氏職，諸侯之國亦有媒氏傳通男女，使成昏姻也。云「用鴈爲摯，取其順陰陽往來」者，江氏筠《讀儀禮私記》云：「方氏苞獨指爲舒鴈。夫鴈不再偶，是以取之。蓋《郊特牲》所謂『一與之齊，終身不改』之義也。舒鴈則無所取矣。」盛氏世佐云：「士摯當用雉，而雉不可生致，故舍雉而用鴈，記云『摯不用死』是也。」引《詩》者，證須媒氏下達之義也。云「昏必由媒，交接設紹介」者，五禮自納采以下皆使使往，是交接設紹介也。云「皆所以養廉恥」者，《孟子》曰：「不待父母之命、媒

①「義」，原作「文」，今據《儀禮商》改。

②「注」下，《儀禮商》有「所謂順陰陽往來也」八字。

③「父」，《儀禮小疏》作「家」。

灼之言，則父母、國人皆賤之。」《曲禮》曰：「男女非有行媒，不相知名。」《坊記》曰：「男女無媒不交。」《說文》云：「媒，謀也，謀合二姓也。」灼，斟酌二姓之稱。凡此，皆所以備禮通情，養成男女，使保其廉恥也。主人筵于戶西，西上，右几。主人，女父也。筵，爲神布席也。戶西者，尊處，將以先祖之遺體許人，故受其禮於禰廟也。席西上，右設几，神不統於人。席有首尾。【疏】正義曰：女家將受納采之禮，先設神坐，乃受之。韋氏協夢云：「設筵者雖非主人，而主人必親蒞之，故以主人立文也。」褚氏寅亮云：「女父在，父爲主人；祖在，祖爲主人。若父、祖俱歿，則有事於宗子之廟，①而以宗子爲主人？」②孔氏穎達謂女家每事告廟，則男氏將行六禮必皆告廟，不徒卜而已。其說似女氏可不問卜者，然考《左傳》，懿氏卜妻敬仲，其妻占之曰吉；又晉獻公筮嫁伯姬于秦，遇歸妹之睽，則卜、筮皆用矣。婿家亦惟納吉，請期有卜，他禮則否。士用漆几。是時主人及擯者立位與冠禮同。吳氏廷華云：「戶，室戶也。室南鄉，牖在西，戶在東。戶西即牖之東，蓋堂之中也。賓曰『東上』，此曰『西上』，陰陽之義也。」注云「右設几」者，几，神所憑也。人道，東上而左几。此神道，取「地道尊右」之義。西，右也。云「席有首尾」者，上其首也。

西上，神道也。賈疏云《公食大夫·記》蒲筵、萑席皆卷自末是也。使者玄端至。使者，夫家之屬，若羣吏使往來者。玄端，士莫夕之服。又服以事其廟，有司緇裳。【疏】正義曰：玄端，禮服。使者以鴈來也。注云「使者，夫家之屬，若羣吏使往來者。玄端，士莫夕之服」者，吳氏廷華云：「此使者當是《周禮》媒氏，男父使來納采，故曰使。至，奉男父命至門外也。莫夕之說非，已見《士冠禮》。又冠禮止言贊者與贊冠，而不言其爲何人，其以贊冠爲降主人一等者，特注說耳。此疏竟以彼注爲經，謬矣。至云主人是下士，屬是不命之士，尤謬。據《周禮·典命》，公、侯、伯之士一命，子、男之士不命。如賈說，是大國上、中、下士之外又有不命之士，小國不命之士以上又有上、中、下士，不顯與《典命》經文悖乎？據下記「士受皮」疏云，此不命府、史之等，與子、男不命者別，又以《既夕禮》士受馬爲胥徒，不知何據。要之，使者是媒氏，不可以屬吏言也。且下「賓升」疏以此爲賓主敵，則又何屬之可言？」盛氏世佐云：「使者亦士也，故玄端服，《士冠禮》擯者及贊者

①「有」，《儀禮管見》作「行」。

②「人」下，《儀禮管見》有「與」字。

皆服玄端是也。」云「有司緇裳」者，賈疏云：「士惟有三等之裳：玄裳、黃裳、襍裳。此云「緇裳」，即玄裳矣。」擯者出請事，入告。擯者，有司佐禮者。請，猶問也。禮不必事，雖知猶問之，重慎也。【疏】正義曰：敖氏云：「賓之將命者入告，擯者告主人，乃出請事也。其辭蓋曰：『某也使某請事。』凡賓非主人之所戒速而來者，則有請事之禮。凡請事西面，入告東面，大夫、士之禮也。」注云「禮不必事，雖知猶問之，重慎也」者，吳氏廷華云：「擯者當是私臣將命者。前已有媒氏通言，今使者在門，當知有昏事，而猶問之，故曰「重慎也」。」主人如賓服，迎于門外，再拜。賓不荅拜。門外，大門外。不荅拜者，奉使不敢當其盛禮。【疏】正義曰：張氏爾岐云：「當亦如《士冠禮》：主人迎賓，主人西面，賓東面。此時賓自執鴈。」凌氏《釋例》云：「凡迎賓，主人敵者則迎于大門外。」《士冠禮》：賓立于外門之外，主人迎，出門左。其賓，注謂主人之僚友；其主人，注謂將冠者之父兄。《士相見禮》：主人出迎于門外。此賓，主人皆士。《士昏禮》：納采，使者至，主人迎于門外。注：「門外，大門外。」又：親迎，壻至于門外。注：「婦家大門之外。」又云：「主人玄端，迎于門外。」

此主人，注謂女父也。此主人尊者，而迎于大門外，以賓客接之，故盛其禮也。又《士昏·記》：「不親迎，壻見，主人出門左，西面，壻入門，東面。」注：「出門，出內門；入門，入大門。出內門不出大門者，異於賓客也。」此又殺於親迎，成主人之尊也。」注云「門外，大門外」者，賈疏云：「大夫、士惟有兩門，寢門、大門而已。廟在寢門外之東，此下有「至于廟門」，明此是大門外可知也。」云「不荅拜者，奉使不敢當其盛禮」者，吳氏廷華《疑義》云：「主人再拜者，亦西面拜辱。使者為男氏納采，不敢當賓禮，故不荅拜，非卑之謂也。賈疏謂士卑無君臣之禮，故不荅拜。非也。」揖人，至于廟門，揖人。三揖，至于階，三讓。人三揖者，至內雷，將曲，揖；既曲，北面，揖；當碑，揖。【疏】正義曰：注云「人三揖者，至內雷」者，李氏如圭云：「內雷，門內雷也。雷，屋檐滴處。」云「將曲，揖；既曲，北面，揖；當碑，揖」者，賈疏云：「凡人入門三揖，以其入門，賓主將欲相背，故須揖；賓主各至當塗，北面相見，故亦須揖；至碑，碑在堂下，三分庭之一在北，是庭中之節，故亦須揖。」敖氏云：「與賓揖，先人也。揖人之後亦每曲揖。不著之者，此與上篇皆士禮，其同可知。」吳氏廷華云：「碑在中庭，當云：二分庭一在北。賈疏本下記言之，不知彼

原非中庭，此注明言當碑，不當取以爲證。」主人以賓升，西面。賓升西階，當阿，東面致命。主人阼階上北面再拜。阿，棟也。入堂深，示親親。今文「阿」爲「庑」。【疏】正義曰：褚氏寅亮云：「賓降等者，主人先升固已；即敵者，亦主人先升也。《聘禮》：賓饋卿，賓升一等；大夫升，面卿、大夫；大夫升一等，賓從之。又《曲禮》：主人與客讓登，主人先登，客從之。皆賓主敵而主先升之證。先升者，道之也。道之，故曰「以」。若賓尊于主，則賓先升，不必銜君命也。《燕禮》、《大射禮》宰夫爲主人以辟正主，故賓先升。考之禮，無賓主俱升法，賈疏似失之。」注云「阿，棟也」者，胡氏承珙云：「《考工記》：門阿之制五雉」注：「阿，棟也。」《鄉射·記》云：「制五架之屋，正中曰棟，次曰楣，前曰庑。鄭以棟訓阿者，非謂棟有阿名，謂屋之中脊其當棟處名阿耳。阿之訓義爲曲。《說文》：阿，一曰曲阜也。其在宮室，則凡屋之中脊，其上穹然而起，其下必卷然而曲。其曲處則謂之阿。棟隨中脊之勢，亦有卷然、穹然之形，故《易》於棟言「隆」，《禮》即以棟爲阿。《考工記》：殷人四阿重屋。注：「四阿，若今四柱屋。」又「王宮門阿之制五雉」疏云：「謂門之屋，兩下爲

之，其脊高五丈。」夫屋有四柱，兩下，必皆於中脊分之，則阿爲中脊卷曲之處明矣。中脊者，棟之所承，故鄭以當阿爲當棟也。此經云：賓當阿，東面致命，主人阼階上北面再拜。程氏易田云：「主人在阼階上接賓，賓乃獨入堂深，而至於棟。賓主不相對，於授受行禮不便，故知阿當在楣而不在棟。」按：古人所稱東階上、西階上者，必非僅指階前數尺之地。焦氏循謂兩楹在楣、棟之間，東楹之東、西楹之西，自階至房戶之前，通可謂之階上。引《燕禮》「小臣設公席于阼階上，西鄉」，而其下又云「樂正由楹內東楹之東告于公」。以此爲自階至房戶前皆名階上之證，其說甚確。然則此納采之賓當阿東面，主人阼階上北面，本不甚懸絕，^①況賓致命之後，主人再拜之時，賓必還辟，不荅拜。凌氏廷堪云：「凡爲人使者不荅拜。」《士昏禮》納采授鴈，略用聘享授玉、授璧之例。拜時，使者當亦三退負序。然則此賓致命後退至楹間，主人拜後亦從阼階上至楹間，故經云「授于楹間，南面」，無嫌於授受不順也。「今文「阿」爲「庑」者，即《說文》之「戶」字。《尸部》：「戶，仰也。从人在尸上。一曰：屋相也。秦謂之楣，齊謂之戶。」《木部》

①「本」上，《儀禮古今文疏義》有「相去」二字。

曰：楣者，秦名屋榜聯也。又曰：「齊謂之檐，楚謂之相。」然則戶與檐一物，庶即戶，亦屋檐之名。鄭於《聘禮》「公側襲受玉于中堂與東楹之間」注：「入堂深，尊賓事也。」及此經皆取入堂深爲義，故不從今文歟？按：主人北面再拜者，拜其納采之命，許之也。授于楹間，南面。授于楹間，明爲合好，其節同也。南面，並授也。【疏】正義曰：程氏易田云：「云『楹間』，著東西之節。案：《公食大夫禮》：『若不親食，使大夫致之，豆實實于饗，陳于楹外；簋實實于簠，陳于楹內兩楹間。』兩楹間者，總謂饗、簠、蓋楹內、楹外著南北之節，楹間著東西之節。不知者乃謂楹內、楹外、楹間是三處，其故在誤解楹間爲南北之節，謂其處必正當兩楹。案：《聘禮》階上授受，東西之節有四法：一爲賓主敵體，在兩楹間，賓面卿受幣于楹間是也。一爲賓主雖敵體，而所趨者君命，則在堂中西鄉，歸饗餼于聘賓，受幣堂中西、賓問卿堂中西是也。一爲賓臣主君，則直趨君位，當東楹。賓覲，進授幣，當東楹。公禮賓，受幣，當東楹是也。一爲賓主雖君臣，而所執者君之器，則在中堂與東楹之間，聘賓致命，公側襲受玉于中堂與東楹之間是也。以上四事，若以楹爲南北之節，則必不能出而在楹南矣。于楹間、堂東、堂西三者非可言，而於所謂堂東楹者，亦謂

其不在楹南乎？此可決授受之節當楹間也。」朱大韶云：「疏以經云『南面』，不辨賓主，故知南面竝授也。《聘禮》：歸饗餼節，大夫東面致命，賓降階再拜稽首。大夫辭，升成拜。受幣，堂中西北面。賓饋大夫節，賓奉幣西面，大夫東面，賓致幣。大夫對，北面當楣。再拜稽首，受幣于楹間，南面。注：賓北面授，尊君之使。又賓問卿節，大夫受幣，堂中西北面。賓面卿節，大夫受幣于楹間，南面。注：賓亦振幣進，北面授。經三云楹間南面。注於《昏禮》云『並授』，於《聘禮》則以爲訝受。疏通之曰：『雖是敵者，于兩楹之間，或有訝受者，皆是相尊敬之法。此大夫南面，賓北面，雖是敵體，尊大夫故訝受。』案：《聘禮》注是也。《曲禮·記》雖云卿與客並然後受，而《禮經》固無並授受法。惟《聘禮》宰執主，屈纁，自公左授使者。使者受主，同面，垂纁以受命。既述命，同面授上介。聘畢歸，使者執主，垂纁，北面，上介執璋，屈纁，立于其左。宰自公左受玉。此同面相授受也。蓋於君前皆北面，故授由其右，受由其左，其餘無同面者。《公食大夫禮》：公授宰夫受帛以侑，賓受幣，①當東楹北面。賓北面受，則公南面授可知。《聘

①「幣」，原作「聘」，今據《續清經解》本改。

禮：賓觀，振幣進授，當東楹，北面。賓北面授，^①則公南面受可知。歸甕餼與問卿，皆奉其君之命而致公幣也，故受於堂中之西而北面，與受於公所同。賓使者與面卿，私幣也，故受於兩楹之間而南面。賓與卿體敵，不南面授者，禮固無竝授受法也。此使者奉其主人之命來納采，不南面授者，嫌於君使於大夫同也。言受者南面，則授者北面可知。『授』，當爲『受』字之誤也。文承主人再拜下，自然言主人受，不當言使者授。《聘禮》諸條皆主受者言，其例自明。鄭不審授爲受之譌，故以南面屬之使者，解爲並授，與聘禮注異耳。又案：禮於授受之節，或東西面，或南北面，賓主相對，經並不言訝。惟《聘禮》禮賓，公東南鄉，外拂几三，卒，進西鄉，賓進，訝受几于筵前。進，猶前也。訝，迎也。公前就賓，故賓前迎受几也。又賓執左馬以出，上介受賓幣，從者訝受馬。《公食大夫禮》：「從者訝受皮。」蓋從者在上介之後，賓出，從者前迎受之，故於上介言「受」，獨於從者言「訝受」。《士喪禮》下篇：「若無器，則梧受之。」蓋賓東面，主人西面，宰在主人之北，由北而西南，必稍前受之，故亦言「訝」。惟此四處言「訝」，則訝受與對面相授受者義亦別，但相傳以爲訝受耳。」注云「南面，並授也」者，盛氏世佐云：「凡堂上授受摯、幣之法，主人尊則

近東楹，賓尊則近西楹。於楹間南面並授，敵者之禮也。此使者卑於主人而用敵禮者，以其奉壻父之命故也。」賓降，出。主人降，授老鴈。老，羣吏之尊者。【疏】正義曰：注云「老，羣吏之尊者」者，吳氏廷華云：「老即趙魏之老者，蓋家臣之長。注以老爲羣吏之尊者，即上文『屬吏』，說似未確。又《士冠禮》：「賓出，主人送于席門外。」此亦當然也。案：授老鴈後不見有還鴈之儀，疑主人既授老鴈，老即以授賓將命者。下文「賓執鴈」，即前所執之鴈也。經不言還鴈，文不具耳。」敖氏云：「授鴈於階下，既則進立於中庭。」

右 納 采

賓者出請。不必賓之事有無。【疏】正義曰：賓出未去，有事可知，故出請也。賓執雁，請問名，主人許。賓入授，如初禮。問名者，將歸卜其吉凶。古文「禮」爲「醴」。【疏】正義曰：褚氏寅亮云：「記『西面

① 「授」，原作「受」，下「受」，原作「授」，據《續清經解》本改。

對」注云：「對賓以女名。」則孔穎達以爲問母姓者，非矣。^①問名而以誰氏問，不敢斥言也。主人則直對以三月之名。此亦與卜得吉日，而先請期於女氏之意同，所謂「小讓如僞」。吳氏廷華云：「據《內則》三月之名合男女言，則女固有名。女何氏，則父之氏耳，但未有已納采而猶不知其氏者。疏云：「婦人不以名行，明本不問三月名。」其說較勝。」敖氏云：「初禮，三揖以下之儀也。此雖俟於中庭，亦有三揖，與《聘禮》同。」

右問名

賓者出請，賓告事畢，入告，出請醴賓。

此「醴」亦當爲「禮」。禮賓者，欲厚之。【疏】正義曰：此下至「送于門外」，主人禮賓之事。又請者，不敢必賓事之無，敬之至。賓告事畢，則可以出矣。不出者，其賓者留之歟？蔡氏德晉云：「凡行重禮者，事畢必醴之，以致殷勤也。」敖氏云：「醴與醴子之醴同。」賓者請醴賓，亦以其降等也。若敵者，則主人自請之。」注云「此「醴」亦當爲「禮」。禮賓者，欲厚之」者。賈疏云：「《士冠》禮賓爲「醴」字，彼已破從「禮」，故云「亦」。此以醴酒醴賓，不從「醴」

者，以《大行人》上公「再裸而酢」，侯、伯「一裸而酢」，子、男「一裸不酢」，及「以酒禮之」，用齊禮之，皆不依酒醴爲名，皆取相禮，故知此醴亦爲禮敬之禮，不取用醴爲醴之義也。」吳氏廷華云：「注因《司儀》王用鬯禮賓，不言「鬯」而言「禮」，是亦理之可通者。若賈疏謂凡言「禮」者，皆是上下之辭，且與「賓」字別，則卿、大夫所謂以禮禮賓之，又何說邪？據《士冠禮》主人戒賓，注以賓爲主人之僚友，冠畢則禮賓，是敵者亦曰禮，不得以上下爲說。至謂《聘禮》卿亦云「無賓」者，案：彼經聘享之後，賓朝服問卿，受幣，無賓。彼注以辟君爲訓，蓋賓與卿名位相敵，所謂「無賓」，正「敵者曰賓」之謂也。但彼經問卿只言「賓」，未嘗言「禮」，則賈疏得有「賓、禮兩名之說，又未可信矣。」賓禮辭，許。禮辭，一辭。【疏】正義曰：不言「賓」入告，可知賓亦就次。

注云「禮辭一辭」者，蔡氏德晉云：「一辭而許者，禮賓之常法。」案：「賓禮辭，許」者，亦謂其爲使而禮之，與平時宴饗之事不同也。主人徹几，改筵，東上，側尊甒醴于房中。徹几，改筵者，鄉爲神，今爲人。側尊，亦言無

① 「非」，原作「然」，今據《儀禮管見》改。

玄酒。側尊於房中，亦有簠有籩豆，如冠禮之設。【疏】正義曰：《校勘記》云：「陸氏云：『鄉，本又作歸。』案：歸，正字。鄉，今之向字。」注云「鄉爲神，今爲人」者，於戶西禮神坐，易他席而布之。徹几，亦易他几於後授賓也。張氏爾岐云：「改筵，改西上而東上也。爲人設則東上者，統於主人也。」云「側尊，亦言無玄酒」者，禮象大古質，故士冠禮與士昏禮之等皆無玄酒也。云「亦有簠有籩豆，如冠禮之設」者，此下云「贊者酌醴，加角柶」，明有簠盛之。又云「贊者薦脯醢」，則有籩豆可知。但冠禮，尊在服北，南上，則此尊與簠亦南上，故云「如冠禮之設」也。韋氏協夢云：「徹與改，皆有司爲之。云『主人』者，亦謂主人親蒞其事耳。」主人迎賓于庑門外，揖讓如初，升。主人北面，再拜。賓西階上，北面荅拜。主人拂几授校，拜送，賓以几辟。北面設于坐，左之，西階上荅拜。拂，拭也。拭几者，尊賓，新之也。校，几足。辟，遂遁。古文「校」爲「枝」。【疏】正義曰：盧弼弓云：「校」，緣避明諱改作「校」。《釋文》「遁」，徐本、《集釋》、敖氏俱作「巡」，《通解》、楊氏俱作「遁」。張氏云：「鄭於《儀禮》用『遂遁』字十有一，開寶《釋文》獨於

此作「巡」，諸《釋文》本皆作「遁」。「枝」，徐本、《集釋》俱作「技」，《通解》作「枝」。○賈疏云：「如初升者，如納采時三揖三讓也。主人拂几者，案：《有司徹》：『主人西面，左手執几，縮之，以右袂推拂几三，^①二手橫執几，進授于戶前。』凡敵者，拂几皆若此；卑於尊者，則內拂之。凡授几之法，卑者以兩手執几兩端，尊者則以兩手於几間執之，授受皆然。受時或受其足，或受於手，皆橫受之。及其設之，皆旋几縱執，乃設之於坐南，北面陳之，位爲神則右之，爲人則左之。不坐設之者，几輕故也。」敖氏云：「復迎之，禮更端也。主人拜至，賓荅拜爲己也。」几，所以安體。賓雖不隱几，主人猶進之，崇優厚也。几校，未詳。以《有司徹》執几之法推之，則校者其謂左廉歟？云「以几辟」者，嫌辟時或釋几也。凡自敵以下，其於拜者皆辟，經不盡見之也。左之，在席上之東也。設几於左，使其右也。授几於筵前，西面拜送，亦於阼階上北面。吳氏廷華云：「賈疏謂昏禮有相親之義。案：拜至特主人敬賓之意，並無相親義。若云「相親」，則聘禮何嘗不是親睦？聘禮私覲拜至，則禮賓亦當拜至，文省耳。若云不相親故不拜，則豈有不親於禮

①「袂」，原作「手」，今據《儀禮注疏》改。

而又獨親於覲之禮？又此疏賓主不敵等說，即前節注意，且既以此賓不敵，而其言拂几也則曰敵，且尸尊主卑，既以《有司徹》爲外拂，又據《聘禮》謂卑於尊者內拂，前後矛盾。經明言「授校」，其爲兩手執之可知。乃又轉一說曰昏禮異於餘禮，豈不支離？」又云：「此言先授後拜，則主人既授而拜，几方在客手，不能荅拜，故必設几後乃荅。至受禮時，主方執禮，故賓先拜受。賓受後，主人始拜送，情理不過如是。賈疏忽創爲「非己所得」及「己所當得」等語，謬矣。至主拜、賓拜，俱有相辟之禮。《聘禮》賓覲再拜，公少退，則不特卑始辟尊也。況是經賓本不卑乎？烏得傳會其說？」注云「校，几足」、「古文「校」爲「枝」者，胡氏承琪云：「校」，蓋「骹」之借字。《說文》：「骹，脛也。」與《既夕》注「校，脛也」訓同。《祭統》：「夫人執校。」注：「校，豆中央直者也。」豆有跗而無足，故謂其中央直者爲校。几則有足，故《士昏》注以校爲几足也。古文作「枝」者，四體謂之四肢。《說文》：「臑，或作肢。」《逸周書》、《孟子》又作「枝」，《釋名》：「臑，肢也，似木之枝格也。」几之有足，猶人之有四肢，故校亦謂之枝歟？鄭以肢兼手足，骹則專於足脛，故不從古文。」贊者酌醴，加角枌，面葉，出于房。贊，佐也，佐主人酌事也。贊者亦洗酌，加角枌，覆

之，如冠禮矣。出房南面，待主人迎受。古文「葉」作「搗」。【疏】正義曰：「迎受」，《釋文》作「梧授」，从木。張氏引《釋文》从手。各本注疏《聘禮》、《公食大夫禮》从木，《既夕禮》从手，未知孰是。《說文》無「梧」字，有「梧」字，訓「逆也」。《既夕》疏云：「梧，還也。」還，逆二義相近，疑「梧」即「梧」之俗體，而「梧」又其假借通用者也。盧文弨曰：「陸」梧授「授」二字譌。今案：《公食大夫禮》及《既夕》經既有「梧受」之言，張氏引《既夕》乃作「梧授」，又引《玉篇》「梧，受也」。梧授，謂受其所授也。①鄭於《既夕》注云：「謂對相授不委地，則經似當作授，則張說不爲無據，而此處《釋文》「授」字亦未必譌也。○凌氏《釋例》云：《士冠禮》：②賓醴冠者，贊者洗于房中，側酌醴，加枌，覆之，面葉。賓授醴于戶東，加枌，面枌。冠者筵西拜，受。《士昏禮》：女父醴使者，贊者酌醴，加角，面葉，出于房。主人受醴，面枌，筵前西北面，賓拜受醴。此皆酌者面葉以授醴者，所以然者，醴者尊，不自酌，必由酌醴者授之。凡訝受皆對面相

①「受其所授」，原作「授其所受」，今據《十三經註疏校勘記》改。

②「禮」，原作「者」，今據《禮經釋例》改。

授受，酌醴者面葉以授醴者，則醴者始得面枋以授受醴者。受醴者受之，乃得前其葉以扱醴而祭也。《士昏禮》：舅姑醴婦，贊者酌醴，加枋，出房，席前北面，婦東面拜受。此則酌者徑授受醴者。所以然者，舅姑益尊，不自酌，併不自授，徑由酌者授之，故面枋以便受醴，面葉而祭也。」

注云「酌加角枋，覆之如冠禮矣」者，《士冠禮》：「贊者洗于房中，側酌醴，加枋，覆之。」此與之同，故知如冠禮。吳氏廷華云：「贊者，私臣之屬。酌醴，酌醴尊以實罍也。」主人受醴，面枋，筵前西北面。賓拜受醴，復位。主人阼階上拜送。主人西北面疑立，待賓即筵也。賓復位於西階上北面，明相尊敬。此筵不主爲飲食起。【疏】正義曰：敖氏云：「西北面，以賓在西階上，不可背之也。醴子、醴婦皆北面者，以其立於席西也。賓拜亦於西階上。復位，俟既薦，乃升席。於賓之拜也，主人少退，主人拜送，賓亦如之。」張氏爾岐云：「主人執醴，筵前西北面以待賓，賓拜於西階上，乃進筵前受醴，受訖復西階北面之位。主人乃於阼階拜送。」^①此醴，古人受爵、送爵相拜之法，大率如此。」注云「主人西北面疑立」者，吳氏廷華云：「疑立者，無事而立。此經主人方在受醴獻賓之

時，何暇疑立？又《鄉飲酒禮》言：「賓西階上拜，主人少退，賓進受爵。」此賓拜主人，亦當少退，又烏能疑立？」云「此筵不主爲飲食起」者，賈疏云：「此筵爲行禮，故拜及啐皆於西階。」不知凡筵皆爲行禮，焉有素爲飲食而設者？若以拜、啐必於西階始爲行禮之筵，則《士冠禮》醴子曰：冠者筵末坐，啐醴，降筵坐，奠觶拜。是拜、啐皆於筵前，彼何嘗非行禮之筵？而拜、啐皆不在西階，賈說尚可信哉？要之，拜、啐於西階上皆是敬主之義。啐於西階，蓋有不敢當此筵之義。贊者薦脯醢。薦，進。【疏】正義曰：此贊疑即擯者。褚氏寅亮云：「凡祭於脯醢之豆間。」籩爲竹豆，故脯雖籩實，亦得名豆。」賓即筵坐，左執觶，祭脯醢，以枋祭醴三，西階上北面坐。啐醴，建枋，興，坐奠觶，遂拜。主人荅拜。即，就也。左執觶，則祭以右手也。凡祭於脯醢之豆間，必所爲祭者，謙敬，示有所先也。啐，嘗也。嘗之者，成主人意，建，猶扱也。興，起也。奠，停也。【疏】正義曰：李氏如圭云：「公食大夫豆多者，祭於上豆之間，知凡祭皆於籩豆之

① 「阼階」下，《儀禮鄭注句讀》有「上」字。

問也。」張氏爾岐云：「賓即筵坐，而祭醴南面坐也。啐醴，則西階北面之位。奠觶遂拜，亦於西階。遂拜者，因事曰遂。坐奠，不起而遂拜也。」吳氏廷華云：「既言『興』，復言『坐』者，坐如《曲禮》『坐而遷之』之『坐』，賈疏所謂跪也。興而跪，跪而奠觶，遂以拜也。啐於西階，不敢以賓禮自居也。」注云「凡祭於脯醢之豆間」者，賈疏謂祭脯醢，置之皆於豆間。此及《冠禮》、《鄉飲酒》、《鄉射》、《燕禮》、《大射》皆有脯醢，則在籩豆之間。此注不言「籩」者，文省耳。云「成主人意」者，主人設饌，望賓美之。今客嘗之告旨，是成主人意也。賓即筵，奠于薦左，降筵，北面坐取脯，主人辭。薦左，籩豆之東。降，下也。自取脯者，尊主人之賜，將歸，執以反命。辭者，辭其親徹。【疏】正義曰：即筵奠觶者，以取脯當北面，禮貴相變也。主人辭者，蓋見賓珍己之物而取之，則以不腆辭之。賈疏云：「此奠于薦左，不言面位。下贊醴婦奠于薦東」注：「奠于薦東，升席奠之。」此云「奠于薦左」，明皆升席南面奠之也。又祭酒亦皆南面，並因奠酒之面奠之，則《冠禮》「禮子亦南面奠之」，《聘禮》「禮賓賓北面奠者，以公親執束帛待賜己，不敢稽留，故由便疾北面奠之也。《鄉飲酒》、《鄉射》酬酒不祭不舉，不得因祭而奠於薦東也。《燕禮》、《大射》重君物，

君祭酬酒，故亦南面奠。」^①注云「執以反命」者，下記「賓右取脯，左奉之，乃歸執以反命」是也。賓降，授人脯，出。主人送于門外，再拜。人，謂使者從者。授於階下，西面，然後出，去。【疏】正義曰：盛氏世佐云：「上云『主人辭』，此不言『賓對』者，文省耳。」張氏爾岐云：「前迎於門外，是大門外；此送，亦大門外。」注「授於階下，西面」者，以賓位在西。「授脯」文在「出」上，故知西階下西面。

右醴使者

納吉，用鴈，如納采禮。歸卜於廟，得吉兆，

復使使者往告，婚姻之事於是定。【疏】正義曰：徐本「婚」作「昏」。案：昏嫁宜作「昏」，婚姻宜作「婚」，古或俱用「昏」字。凡今本經注作「婚」者，石經、徐本俱作「昏」。○郝氏云：「問名而後納吉者，慎重不迫，禮之序也。乃昏姻之約，自納采、問名時定矣，故昏辭曰：『吾子有惠，既室，請納采。如必問名始卜，倘卜不吉，可中廢乎？』故用禮通其

① 「南」，原作「北」，今據《儀禮注疏》改。

義而已。」張氏爾岐云：「如納采禮，其揖讓、升階、致命、授鴈及主人體賓、取脯、出門之節並皆如之。」

右納吉

納徵，玄纁束帛，儷皮，如納吉禮。徵，成

也。使使者納幣以成昏禮。用玄纁者，象陰陽備也。束

帛，十端也。《周禮》曰：「凡嫁子取妻入幣，純帛無過五

兩。」儷，兩也。執束帛以致命。兩皮爲庭實。皮，鹿皮。

今文「纁」皆作「熏」。【疏】正義曰：李氏如圭云：「五兩，

玄三、纁二也，象陽奇陰耦也。天子加以大璋，諸侯加以穀

圭，^①庶人則用緇帛，無纁。用緇者，婦人陰也。納徵用

幣，故又謂之納幣。何休云：玄纁，取其順天地；鹿皮，所

以重古。」沈氏彤云：「鄭《周禮注》云：『五兩，十端也。必

言兩者，欲得其配合之名。《雜記》云：納幣一束，束五兩，

兩五尋。然則每端二丈。』彼疏云：『古者二端相向卷之，

共爲一兩。五兩，故十端也。』又案：鄭《雜記》注云：『十

箇爲束，貴成數。兩兩者合其卷，是謂五兩。八尺曰尋，五

兩五尋，則每卷二丈也。^②合之則四十丈。今謂之匹，猶

匹偶之云歟？』彼疏云：『一束謂十箇，兩箇合爲一卷，是

束五兩也。』天之正色蒼而玄，地之正色黃而纁。聖人法天地以制衣裳而別其色，故禮法之重者莫不上玄而下纁。記云：「皮帛必可制。」納幣以玄纁，重昏禮，使制爲盛服也。又鄭《周禮·媒氏》注：「純，實緇字，古緇以才爲聲。納幣以緇。婦人陰也，凡取禮必用其類。」士大夫乃以玄纁束帛，此經注「用玄纁，象陰陽備也」，然則玄爲陽而緇爲陰矣。又鄭注此經「纁裳緇施」云「緇緣者，象陽氣下施」，是緇亦陽也。案：《考工記》：「畫繪之事雜五色，東方謂之青，南方謂之赤，西方謂之白，北方謂之黑，天謂之玄，地謂之黃。」凡五而有六者，玄與黑同而異也。五方之色單，而天之色乃全乎五方之色。玄入黑而爲緇，則諸色潛藏，獨見其方之色而已。故《說文》但訓緇爲黑，而康成以爲陰類也。然所見者雖獨北方之色，而天之色實含諸其中，故禮服緇與玄恒互用，而康成又以緇爲陽象，不等諸專象北方之黑也。蓋專象北方之黑，不以青、赤、黃諸色爲裏。或曰：凡昏禮，無貴賤皆陰陽備。鄭乃謂惟士、大夫之幣象

①「天子加以大璋，諸侯加以穀圭」，《續清經解》本作「天子加以穀圭，諸侯加以大璋」。

②「丈」，原作「尺」，今據《續清經解》本改。

之，豈庶民獨不當象之乎？謂娶禮必用其類，而以緇則士、大夫何爲而不用其類乎？彤謂言非一端，各有所當，專用緇則取象幽陰，兼用玄纁則取陰陽之備，皆昏禮之義類。庶人取其細而不取其大，下士也。然不用黑而用緇，則以緇之中仍備陰陽之色耳。又案：《士冠禮》所陳三服，玄端玄裳乃服之下者，然在庶人爲上服。^①昏禮攝盛，則庶人與其妻皆可服玄。而納幣以緇者，緇又降於玄也。昏禮幽陰，故取象北方之色。謂象婦人陰者，非也。」蔡氏德晉曰：「納徵禮最重，故特用皮帛而不用鴈。」

右納徵

請期用鴈。主人辭，賓許，告期，如納徵禮。主人辭者，陽倡陰和，期日宜由夫家來也。夫家必先卜之，得吉日，乃使使者往，辭即告之。【疏】正義曰：婿家得吉，乃不敢直以告女家而必請之者，示聽命於女家，尊之也。案：此遞言三禮同節，皆如納采，惟鴈與皮帛爲異耳。

右請期

期，初昏，陳三鼎于寢門外東方，北面北上。其實，特豚，合升，去蹄，舉肺、脊二，祭肺二；魚十有四；腊一肫，髀不升。皆飪。設扃鼎。期，取妻之日。鼎三者，升豚、魚、腊也。寢，婿之室也。北面，鄉內也。特，猶一也。合升，合左右胖升於鼎也。去蹄，蹄甲不用也。舉肺、脊者，食時所先舉也。肺者，氣之主也，周人尚焉。脊者，體之正也，食時則祭之。飯必舉之，貴之也。每皆二者，夫婦各一耳。凡魚之正，十五而鼎，減一爲十四者，欲其敵偶也。腊，兔腊也。「肫」，或作「純」。純，全也。凡腊用全。髀不升者，近竅，賤也。飪，熟也。扃，所以扛鼎。鼎，覆之。古文「純」爲「鈞」，「髀」爲「脾」。今文「扃」作「鉉」，「鼎」皆作「密」。

【疏】正義曰：注，《通解》、徐本俱作「孰」。「熟」、「孰」諸本錯出，後不悉校。徐本作「扛」，《釋文》、《集釋》、《通解》俱作「扛」。依注例，「鼎」上當有「古文」二字。案：《儀禮》「扃鼎」屢見，恐經、注俱有誤。《說文》「鼎」注云：「以木橫貫鼎耳舉之。」則鼎即扃耳，不得爲兩字。又《金部》「鉉」字

①「服」，原作「法」，今據《儀禮小疏》改。

注：「《易》謂之鉉，《禮》謂之甬。」是「鉉」字惟《易》有之，《禮經》安得有鉉？今本《儀禮》覆尊則爲甬，覆鼎則爲甬。《釋文》則多作「甬」。或強爲分別曰：「甬」字从巾，覆尊以巾則稱甬，覆鼎以茅，故不得稱甬。然則「肩」字從户，何以得施於鼎？賈氏云：「鄭兼下絺綌總疊之，故云皆。」可見覆鼎、覆尊皆作「甬」矣。又《士喪》及《既夕》「甬用疏布」，古文皆作「密」，是古文無分尊、鼎，尤其明證也。案：「肩甬」二字，古文當爲「肩密」，今文當爲「甬帳」。①鄭於上字從古，下字從今。當注云：「今文『肩』爲『甬』，古文『帳』爲『密』。」甬之從巾，乃諧聲，非會意也。古蓋音冥，冥、肩聲相近，故通作肩；又音暝，暝、鉉聲相近，故別作鉉。○此又下盡合盥一節，論夫家欲迎婦之時預陳同牢之饌也。賈疏云：「東方北面，是禮之正，但數鼎，故云『北面北上』，則此及《少牢》是也。《特牲》陳鼎于門外，北面北上，當門而不在東方者，辟大夫故也。今此亦東方，不辟大夫者，重昏禮，攝盛也。鼎不言北上，直云『北面』，《士冠》所云是也。凡鼎陳于外者，北面爲正，阼階下，西面爲正。《士喪禮》小斂，陳一鼎于門外西面者，喪禮少變，在東方者，未忍異於生時。於大斂奠及朔月奠，《既夕》陳鼎，皆如小斂奠，門外皆西面者，亦是喪禮變也。《士虞》陳三鼎于門外之右，

北面北上，入設于西階前，東面北上。不言東者，既葬，鬼事變吉故也。②《公食》陳鼎七當門南面東上者，以賓是外人，向外統之。《集釋》云：「肺有二：其一舉肺，離割之，使食時可祭可啻，又名離肺、啻肺；其一各祭肺，剉切之以祭，又名剉肺、切肺。祭時二肺俱有，生人食惟有舉肺。此具二肺者，鬼神、陰陽也。」郝氏云：「北面，鼎面向北也。北上，自北陳而南，豚鼎在北也。合升，③全體解折，孰於鑊而升於鼎。去蹄，去四蹄甲。舉，猶食，手舉食之也。肺爲氣之主，脊爲體之正，食先舉之。將食先祭之，所食之肺、脊與所祭之肺皆升之鼎者也。全禽之乾者曰腊，謂兔也。『肫』，當作『純』。一純，一雙也。《少牢》云『腊一純而鼎』是也。髀，尾骨也。《內則》云『兔去尻』，故不升於鼎。」褚氏寅亮云：「豚合升，則豚解爲七體，而左右胖皆升矣。觶亦連於髀。脊則分爲二，令夫婦各二，增脊之一而爲八。去魚之一而爲十四，合偶數也。經明云『腊一純』，而敖氏謂用一胖，不惟失同牢之義，且近凶禮矣。」吳氏廷華云：

①「今」，原作「古」，今據《續清經解》本改。

②「變」，《儀禮注疏》作「之反」。

③「合」，原作「全」，今據《儀禮節解》改。

「下婦饋言『合升側載』者，下兩俎分載之，此一俎合載之也。案：肺當兼舉肺、祭肺，以舉肺亦祭，故以祭概之。兩者各二，則四也。豚只一肺，此有四者，析之。父醢子當在此時。合有胖升者，夫婦各一也。若祭，則升右。下文皆坐、祭之，薦黍、稷、肺，即此『祭肺』；『贊爾黍、稷，授肺、脊』，即此『舉肺、脊』也。牲一身，前有肩、臂、臠，後有肫、胙、脊。中央有三脊，正、脰、橫脊。取中央正脊，故曰『體之正』。兔腊也者，《少牢》用麋脂，^①士兔腊可知。凡牲體用一胖，腊則左右體脅相配，共為一體，故得全名。《特牲》、《少牢》亦用全。大斂，《士虞》皆用左胖，不全者，喪禮略。」注：肫作純，純，全也。古文「純」為「鈞」者，胡氏承珙曰：「今文作『肫』，本「純」之假借，當時蓋別有作「純」之本，故云「肫」，或作純。純，全也。」下即就「純」字疊之。^②云「古文純為鈞」，《周禮·司凡筵·司農注》：「純，讀為均服之均。」鄭於此不從古文作「鈞」者，蓋以《少牢》之「純」為正字。「鈞」音與「純」稍遠，惟「肫」音與「純」相近，故但取「純」訓其字，則仍從今文作「肫」耳。」云「髀為脾」者，髀，正字；脾，同音假借字。設洗于阼階東南。洗，所以承盥洗之器棄水者。【疏】正義曰：設洗之節，詳於前篇，故此略之。吳氏廷華云：「設洗必兼水，水在洗東，文省耳。」

饌于房中，醢醬二豆，菹醢四豆，兼巾之；黍稷四敦，皆蓋。醢醬者，以醢和醬，生人尚褻味。兼巾之者，六豆共巾也。巾為禦塵，蓋為尚溫。《周禮》曰：食齊視春時。【疏】正義曰：盧昭弓云：「石經『菹』，各本同。」○聶氏崇義云：「舊圖云：敦受一斗二升，漆赤中。大夫飾口以白金。案：《九嬪職》云：『凡祭祀，贊玉盥。』注：『玉盥，玉敦也，受黍稷器。』然則天子八簋之外兼用敦也。又《少牢禮》曰：『主婦執一金敦黍，有蓋。凡設四敦，皆南首。』注：敦有首者，尊器飾也，飾象龜形。周之禮，飾器各以其類。又《明堂位》曰：『有虞氏之兩敦，夏后氏之四璫，殷之六瑚，周之八簋。』注：『皆黍稷器，制之異同未聞。』今依《孝經緯》說，^③與簠、簋容受並同，上下內外皆圓為異。」褚氏寅亮云：「饌亦兼夫婦菹醢。菹謂葵菹、蜆醢，以士用饋食之豆籩也。聶氏云：『覆饌巾，士、大夫以緇布禴裏。』二者，夫婦各一；四者，夫婦各二。注云「醢醬者，以醢和醬」者，李氏如圭云：「醬以醢和之，故名醢醬，下經

①「少」，原作「牛」，今據《續清經解》本改。

②「下」上，《儀禮今古文疏義》有「其」字。

③「緯」，原脫，今據《三禮圖集注》補。

直言醬也。惟《公食大夫禮》及此禮有醢醬。」吳氏廷華云：「醬合醢言，是用醢釀成者。《膳夫》：『醬合醢醢言，《醢人》則曰齊、醢、菹、醢，《醢人》則曰醬、醢、菹，是蓋有用醢而成者，亦有不用醢而成者。』注所謂和即釀之義，蓋以二者相雜之謂也。賈疏殊混。」大羹湑在饗。大羹湑，煮肉汁也。大古之羹無鹽菜。饗，寗也。《周禮》曰：「羹齊視夏時。」今文「湑」皆作「汁」。【疏】正義曰：盧弼弓云：「寗也」二字，各本皆譌作「火上」，今從宋本改正。」○敖氏云：「此上牲之肉汁也。以其重於他牲，^①故曰大。復曰湑者，嫌羹當用肉也。」注云「大古之羹無鹽菜」者，《左傳》：「桓二年傳：『大羹不致。』」《郊特牲》云：「大羹不和。」謂不致五味，故知不和鹽菜。唐虞以上曰大古。三王以來更有銅羹，則致以五味。雖有銅羹，猶存大羹，不忘古也。「今文『湑』皆作『汁』者，《五經文字》云：『湑從泣，下肉，大羹也；湑從泣，下日，幽陰也。』今《禮經》相承，多作下字。」段氏玉裁云：「《儀禮音義》引《字林》云：『湑，羹汁也。』《玉篇》、《廣韻》同。然則本無異字，肉之精液如幽溼生水也。」^②羅氏有高云：「湑之爲肉汁者，古文假借字，音入聲，讀若液。《說文》：『液，汁也。』古文借爲液，故湑可訓汁。」今案：此二說是也。其「汁」字，古人多假「和」、

「叶」字，如《周禮·大史》「協事」注：「杜子春云：書亦或爲協，或爲汁。」又《大行人》「協辭命」注：「故書協爲汁。」《鄉士》「汁曰刑殺」司農注：「汁，合也，和也。」故鄭於此仍依古文作「湑」耳。尊于室中北墻下，有禁，玄酒在西，給冪，加勺，皆南枋。墻，牆也。禁，所以廢甌者。玄酒，不忘古也。給，粗葛。今文「枋」作「柄」。【疏】正義曰：張淳云：「《釋文》『冪』作『甌』，後『徹尊冪』，《鄉飲酒》、《鄉射》『尊給冪』，同。」案：今本《釋文》仍作「冪」，作「冪」是也。然賈氏於前節疏云鄭兼下給冪總疊之，則兩處之文同矣。甌則皆甌，冪則皆冪，明無尊、鼎之別。《集釋》校云：「《周禮》有冪人。」^③《說文》作「幪」，云：「《周禮》有幪人。」是「冪」即「幪」之變體。「粗」，《集釋》、徐本、《通解》、楊、敖俱作「麤」。○敖氏云：「《士虞禮》云：『尊于室中北墻下，^④當戶。』此東西之節，宜如之。尊不言其器，如上篇可知。」案：尊皆用酒，此爲夫婦三醕

①「牲」，原作「羹」，今據《儀禮集說》改。

②「精」，原作「津」，今據《說文解字注》改。

③「有冪人」，《儀禮集釋》作「冪人以疏布巾冪八尊」。

④「墻」，原作「牆」，今據《儀禮集說》改。

而設，下注所謂「內尊」也。《玉藻》：「士用禁。」玄酒在西，不用也。南枋，便於酌也。不言篚者，爵在外篚，此不重設也。注云「禁」，所以廢甔者。玄酒，不忘古也者，《士冠禮》云「甔」，此亦土禮，雖不言甔，然尊亦甔也。廢承於甔，云「禁」者，因為酒戒也。古，謂黃帝以前。以《禮運》云「汙尊而抔飲」，謂神農時，雖有黍稷，未有酒醴，以水為玄酒也。尊于房戶之東，無玄酒，篚在南，實四爵、合盃。無玄酒者，略之也。夫婦酌於內尊，其餘酌於外尊。合盃，破甔也。四爵，兩盃，凡六，為夫婦各三酌。一升曰爵。【疏】正義曰：敖氏云：「無玄酒，則惟一尊而已。無玄酒，用一尊，且不尊於房戶之間，又不冪，皆遠下尊者也。篚實爵、盃，主酌夫婦也。乃設於此者，非常禮，因有尊而為之耳。凡設此篚於堂者，必在尊南。《鄉飲酒禮》云：「設篚于禁南，東肆。」吳氏廷華曰：「上二句言外尊，蓋贊酌以自酢者，初酌、再酌用爵，①三酌合盃。贊自酢亦用此爵。案：無玄酒者，玄酒非當飲之酒，特陳之，以表不忘古耳，故無庸再陳也。盃，半甔。蓋分一甔為二，不用則仍合為一也。一、再酌用爵，夫婦各二，故四。三酌用盃。不設篚於室者，室隘，不能容也。此有醯子之禮。」盛氏世佐云：「此尊為媵御設也。古人房室之戶皆在東南，②房戶之東則東序也。不

曰「東序」而曰「房戶之東」，尊統於戶，不統於牆也。」

右將親迎豫陳饌

主人爵弁，纁裳，緇施。從者畢玄端，乘墨車，從車二乘，執燭前馬。主人，壻也，壻為婦主。爵弁而纁裳，玄冕之次。大夫以上，親迎冕服。冕服迎者，鬼神之。鬼神之者，所以重之親之。纁裳者，衣緇衣。不言衣與帶而言施者，空其文，明其與施俱用緇。施，謂緣。施之言施，以緇緣裳，象陽氣下施。從者，有司也。乘貳車，從行者也。畢，猶皆也。墨車，漆車。士而乘墨車，攝盛也。執燭前馬，使從役持炬火居前照道。【疏】正義曰：「二」，嚴本、《通解》、楊、敖俱作「貳」。「士而乘墨車」，疏無「而」字。「從」，楊、敖、徐本作「徒」。○自此至「俟于門外」，論親迎之節。《集釋》曰：「注言「冕服迎者，鬼神」之者，一言敬此夫婦之道如事鬼神也。凡昏各用其上

① 「用」，原作「自」，今據《儀禮疑義》改。

② 「之戶」，原脫，今據《儀禮集編》補。

服，五冕色俱玄，故謂之玄冕。爵弁，則士之上服也。^①

《雜記》曰：「士弁而親迎。」盛氏世佐云：「士昏用上服以爵弁，^②則天子以下皆用上服。以五冕色俱玄，故總稱玄冕也。」賈疏云五等諸侯亦不過玄冕，殆誤。」敖氏云：

「此禮據壻家而言，故以壻爲主人。爵弁者，以親迎當用上服也。此言緇袍不言衣帶鞶，與前篇互見也。從者，謂在車及執燭者也。」張氏爾岐云：「一命大夫冕而無旒，士變冕爲爵弁，故云「冕之次」。大夫乘墨車，士乘棧車。今親迎乘大夫車，故注云「攝盛」。」巾車」注云「棧車不革鞵而漆之」，則士之棧車亦漆，但無革鞵爲異。」吳氏廷華云：

《士冠禮》：「爵弁服，纁裳，純衣，緇帶，韎鞹，玄裳，黃裳，雜裳，緇帶，爵鞶。」此但言「緇袍」者，蓋彼此見義也。注以言其文明與衣帶同色，鑿矣。又據《士喪禮》言「貳車，白狗攝服」，是士明有貳車也。賈疏謂士無貳車，誤。案：下經「女從者畢紵玄」注謂從者爲姪娣，則此從者亦主人之娣若姪也。賈疏謂爲僕隸之屬，非是。又墨車有革，或取其膠固，亦用鴈之義。注攝盛之說存參。」婦車亦如之，有褱。亦如之者，車同等。士妻之車，夫家共之。大夫以上嫁女，則自以車送之。褱，車裳幃，《周禮》謂之容。車有容，則固有蓋。【疏】正義曰：婦車，壻家往迎

婦之車，亦執燭前馬也。褱，檐通，車衣也。吳氏廷華云：

「親迎爲六禮之一。親迎者，即《鵲巢》所謂「百兩御之」、「百兩迎之」。焉有夫家不共車而自乘其車之理？此經壻車、婦車並舉，其爲夫家所共甚明。注謂大夫以上自以其車送之，非也。賈疏引《左氏》「反馬」，據《左傳》有反馬說，注謂：「禮，送女留其送馬，三月反馬。」此或是送女之人所乘，如下所謂「送者」，或載嫁女服器之車，俱未可知。又

《鵲巢》詩所謂「迎」、「御」，亦正夫家共車之證。賈乃以爲自乘其車，何其瞶瞶！要之，親迎之義，謂夫家自以其車迎之耳。若自乘其車，則往就矣，烏得曰迎？」盛氏世佐云：「如之者，如其乘墨車而下之儀也。嫁時之車，王后重翟，上公夫人厭翟，侯、伯、子、男夫人翟車，孤卿以下至士皆與夫同，惟有褱爲異。」注「褱，車裳幃，《周禮》謂之容。車有容，則固有蓋」者。《周禮》謂之容，《詩》謂之帷裳，一名童容。^③容者，以爲車之容飾也。帷裳者，以其帷障車之旁如裳也。其上有蓋謂之童容，四旁垂而下謂之褱，其

①「之上服」，《儀禮集釋》作「服之上」。

②「士」上，《儀禮集編》有「郊特性孔疏曰」六字。

③「一」，《儀禮集編》作「亦」。

實一物也。男子立乘，有蓋無褙。婦人坐乘，重自蔽，故有蓋復有褙。敖云：「以布爲之」，想當然耳。又云：「在上曰褙，在下曰裳帷。此惟有褙而已。」以褙與裳帷爲二，非也。

鄭注《雜記》云：「褙謂鼈甲邊緣。」褙固在旁，不在上。」沈氏彤云：「《雜記》：『其輦有褙，緇布裳帷。』注：『褙，謂鼈甲邊緣。』裳帷，圍棺者。」則褙與裳帷明非一物。《詩疏》云：「裳帷，以帷障車之旁如裳，上有蓋，蓋有衣，四旁垂而下謂之檐」是也。且《昏禮》以有褙爲盛，爲褙非凡婦人車所有也。《衛風》云：「漸車帷裳。」則帷裳乃凡婦人車有之，其爲二物明矣。《既夕·記》注又云：「褙於蓋弓垂之。此得其實。又容與蓋相配，則容是在上之檐，非在旁之裳帷也。」至于門外。婦家大門之外。【疏】正義曰：賈疏云：「注知是大門之外者，以下有揖人乃在廟，^①廟在大門內，故知此爲大門外也。」主人筵于户西，西上，右几。主人，女父也。筵，爲神布席。【疏】正義曰：顧氏炎武曰：「主人爵弁，纁裳緇袍。」注：「主人，壻也。壻爲婦主。」主人筵于户西。」注：「主人，女父也。」親迎之禮，自夫家而行，故壻稱主人；至於婦家，則女父又當爲主人，故不嫌同辭也。女父爲主人，則壻當爲賓，故曰「賓東面答拜」。

注：「賓，壻也。」對女父之辭也。至於賓出而婦從，則變其文而直稱曰壻。壻者，對父之辭也。曰主人，曰賓，曰壻，一人而三異其稱，可以見禮時爲大，而義之由內也。」女次，純衣，纁裙，立于房中，南面。次，首飾也，今時髮也。《周禮·追師》掌爲副編次。純衣，絲衣。女從者畢袵玄，則此衣亦玄矣。裙，亦緣也。裙之言任也。以纁緣其衣，象陰氣上任也。凡婦人不常施裙之衣，盛昏禮，爲此服。《喪大記》曰：復衣不以裙，明非常。【疏】正義曰：徐本、《集釋》「則此衣亦玄矣」無「衣」字。《通解》有，與疏合。○不言裳者，以婦人之服不殊裳，是以內司服皆不殊裳。彼注云：「婦人尚專一德，無所兼，連衣裳不異其色。」是也。注云：《周禮·追師》：「掌爲副編次」者，彼注云：「副之言覆，所以覆首爲之飾，其遺象若今步搖矣。編，編列髮爲之，其遺象若今假紒矣。次，次第髮長短爲之，所謂髮髻。」謂如少牢主婦髮髻也。又云：「外內命婦衣鞠衣、襜衣者服編，衣祿衣者服次。」其副惟於三翟祭祀服之。士服爵弁助祭之服以迎，則士之妻亦服祿衣助祭之服也。《玉藻》有鞠衣、襜衣、祿衣。注：「諸侯之臣皆分爲

① 「在」，《儀禮注疏》作「至」。

三等，其妻以次受此服。公之臣，孤爲上，卿、大夫次之，士次之。侯、伯、子、男之臣，卿爲上，大夫次之，士次之。」其三大夫以下內命婦，則三夫人自闕翟而下，九嬪自鞠衣而下，世婦自翟衣而下，女御自祿衣而下，嫁時以服之。諸侯之夫人無助天子祭，亦得各申上服，與祭服同也。云「以纁祿其衣」者，褚氏寅亮云：「《內司服》注：婦人連衣裳不異其色。豈於嫁時反異其色而衣緇裳纁邪？吳草廬所云裳下襖，與《集說》同誤。注以纁緣衣之解不可易。」云「婦人不常施衽之衣，盛昏禮爲此服」者，此純衣即祿衣，是士妻助祭之服，尋常不用纁爲衽，今用之，故云「盛昏禮爲此服」。引《喪大記》者，證衽爲非常服也。

姆纁笄、宵衣，在其右。 姆，婦人年五十無子，出而不復嫁，能以婦道教人者，若今時乳母矣。纁，緇髮。笄，今時簪也。纁亦廣充幅，長六尺。宵，讀爲《詩》「素衣朱綃」之綃。《魯詩》以綃爲綺屬也。姆亦玄衣，以綃爲領，因以爲名，且相別耳。姆在女右，當詔以婦禮。【疏】正義曰：《釋文》「綃」本亦作「曳」，聶氏「髮」下有「纁也」二字。○姆，蓋齒德兼優之婦，可爲女之師表者，或爲乳母，或爲幼時撫育之人，更有老而無夫、老而無子、無所歸依而德行猶堪導人者可勝斯任。注云「姆，婦人年五十無子，出不復嫁」者，夫無子

被出，非事所常有。若專藉此爲保母，豈得盡人而有乎？褚氏寅亮云：「此與下婦「纁笄、綃衣以俟見」，及《特牲》「主婦纁笄、綃衣」服並同。注謂姆以綃爲領，終未安。綃衣本在六服下，姆執禮事，可以服之。」郝氏云：「纁，黑繒，裏髮也。笄，加簪以綰髻也。宵衣，黑色衣。女子宵衣，猶男子玄端。宵，小也。列采爲夏，全黑爲宵。猶俗謂青衣爲小衣也。」盛氏世佐云：「婦人祿衣，因男子之玄端。玄端一名祿衣。《士喪禮》「陳襲事于房」云爵弁服、皮弁服、祿衣是也。男子之服惟爵弁服用絲，餘皆用布，則婦人祿衣亦當用布。宵衣次於祿衣，其用布可知。宵衣，士妻之正服，其上服祿衣。純衣與祿衣制同而用絲，乃嫁時盛服，非常服也。祿衣玄，宵衣亦玄，而謂之宵者，以祿衣是后御於王之服，三夫人以下御於王當衣宵衣。《詩》云：「肅肅宵征。」以其宵時所衣，故名宵衣歟？其所以異於祿者，《少牢饋食禮》：「主婦被錫，衣侈袂。」說者謂侈袂大袖之衣，然則宵衣之制其袖狹小爲異，餘則同也。考士服之玄端袂長二尺二寸，袂尺二寸；大夫以上侈之，蓋半而益一，其袂三尺三寸，袂尺八寸。宵衣與祿之異，亦猶是矣。」云「纁，緇髮」者，此纁亦如《士冠禮》以繒爲之，廣充幅，長六尺，以緇髮而紒之。姆所以異於女者，女有纁兼有次；姆

則有纁而無次也。云「宵」，讀爲《詩》「素衣朱綃」之「綃」者，胡氏承琪云：「鄭於此易經文作「綃」，而《特牲禮》「主婦纁笄、宵衣」注：「宵，^①綺屬也。」此衣染之以黑，其繒本名宵，《詩》所謂「素衣朱宵」，記有「玄宵衣」，蓋以《士昏禮》說宵，^②綃假借已明，故於《特牲》不妨依經作「宵」，并引《詩》及記皆轉從《禮經》作「宵」，以見「宵」借作「綃」，爲經典通用之例。《特牲》疏謂《詩》及《禮記》皆本作「宵」字，非也。」

女從者畢袵玄，纁笄，被纁黼，在其後。女從者，謂姪娣也。《詩》云：「諸娣從之，祁祁如雲。」袵，同也。同玄者，上下皆玄。纁，禪也。《詩》云：「素衣朱襮。」《爾雅》云：「黼領謂之襮。」《周禮》曰：「白與黑謂之黼。」天子諸侯后，夫人狄衣，卿、大夫之妻刺黼以爲領，如今偃領矣。士妻始嫁，施禪黼於領上，假盛飾耳。言被，明非常服。

【疏】正義曰：婦人之服未有以黼爲衣者。敖氏謂以黼爲禪衣，而被於玄衣之上，亦猶婦之加景，非也。昏禮惟攝盛，車服乃有異爾。此固從者，安得別製異服？注黼領之說是也。江氏筠曰：「注謂施纁黼於領上，假大夫妻之盛飾。據經上云「女從者畢袵玄」，所謂袵者，乃無上衣之謂，《玉藻》「袵絺綌不入公門」是也。如別有衣加之，則不名爲袵矣。然則經之言「袵」，正以示別於加景而立文也。案：

賈疏引《郊特牲》「黼黼丹朱中衣」，謂天子、諸侯中衣有黼領，上衣則無之。今此婦人事華飾，故於上衣則有之，中衣則無也。此亦是言袵及言纁之義。又案：敖氏謂此女從者，亦玄衣。然據經上「從者畢玄端」之文，知無不實著其名者，今此乃異其文，當是以被黼之故。蓋古人謹於命名，即如一深衣，所純者殊，則其名亦異。今此以非常服，故不別爲之名，而但不使得蒙其上，以示別也。」陳氏祥道曰：「袵，設飾也。《說文》：「褻，縗也，皐屬。」纁與褻、縗通。袵玄，設飾以玄也。纁黼，以皐爲領而刺黼也。」盛氏世佐云：「女從者，謂女之從者，即下經所謂「婦人送者」也。《詩》云「諸娣從之」，乃諸侯禮。鄭引以證此，誤。纁與褻通，禪也。黼，謂領也。纁黼者，蓋爲無裏之領，而刺黼於其上也。詳被字，則此領與凡領不同。凡領連於衣，此蓋別以絲爲之而加於領上歟？」

主人玄端，迎于門外，西面再拜。賓東面荅拜。賓，壻。【疏】正義曰：敖氏云：「亦擯者出請入告，乃出迎之。此時賓爵弁服，而主人玄端，不嫌於服異者，主人不正與賓爲禮，特迎而道之

① 「宵」，原作「綃」，今據《儀禮古今文疏義》改。

② 「蓋」上，《儀禮古今文疏義》有「鄭」字。

入廟耳。」按：賓爵弁服，以攝盛故也。主人不必攝盛，故祇服玄端。主人揖入，賓執鴈從。至于席門，揖入。三揖，至于階，三讓。主人升，西面。賓升，北面奠鴈，再拜稽首，降，出。婦從，降自西階。主人不降送。賓升，奠鴈拜，主人不荅，明主爲授女耳。主人不降送，禮不參。【疏】正義曰：奠鴈而拜稽首，婿有子道也。案：主人揖入之後，當有每曲揖之節，不言者，文略。主人不降送，父無送女之禮也。

注云「禮不參」者，據凡行禮者言也。此婿迎女而女從之，是婿、女二人爲禮矣，故主人不參之。沈氏彤云：「此時女立房中，南面，俟婿。婿當楣，北面奠鴈，拜，所謂「執摯以相見」也。婿、婦之相見同此始。婦不荅拜者，謙不敢當其盛禮也，蓋稍還避之。婦人，從夫者也。無論夫下之而不敢當，即夫齊視之而亦不敢當，故夫有親迎之禮而婦無見夫之儀，夫執摯以拜而婦不荅拜也。不還其摯者，鴈取有常節，隨陽義，不可不受也。婦雖不敢當夫之下之，齊之而未嘗不隨者，所以明婦順也。主人西面于阼階上，女房外南面，而賓北面奠鴈，是許之執摯相見矣。許之執摯相見，若父母親授之，故曰「婿親受之於父母」也。」吳氏廷

華云：「婦從者，奠鴈時已出堂矣。變「女」言「婦」，已受摯而從之也。此有父母戒及送之節，記言「父西面戒之」，又言「父送女，命之」，此又言「不降送」者，蓋戒在女出房時，送則又申命之。送當少違其位，但不降耳。母亦不降，惟庶母降。」盛氏世佐云：「《書》云「拜手稽首」者，始拜首至手，而於其卒拜則首至地也。稽首，拜中最重，臣拜君之拜，乃於奠鴈行之者，①《昏義》云「蓋親受之於其父母也」，得其旨矣。上言「女」，對其父；此言「婦」，對其夫言也。既從夫而出，即謂之婦，此《禮經》正名之義。」婿案：經言主人不降送，記言父送女命之，蓋違其位少進耳。又疏引何休云「周人逆於戶」，知當在房戶外，當阿北面。婿御婦車，授綏。姆辭不受。婿御者，親而下之。綏，所以引升車者。《曲禮》曰：「僕人之禮，必授人綏。」【疏】正義曰：徐本、《集釋》、楊、敖俱無「曲禮曰」三字，《通解》有。據疏云《曲禮》文，則注無可知。○李氏如圭曰：「《郊特牲》曰：「婿親御授綏，親之也。親之也者，親之也。」沈氏彤曰：「此稱婿而不稱賓者，女未授則賓之，婦既從則婿

①「鴈」，原脫，今據《儀禮集編》補。

之，皆對主人而稱也。此辨名定分之義。」敖氏曰：「《曲禮》云：『若僕者降等則受，不然則否。』此壻爲御，故如僕人之禮。然非降等，故姆辭不受。」案：婦不親辭者，夫婦始接，情有廉恥，姆道其志也。姆既辭，則壻當舍綏，姆執綏以授女矣。婦乘以几，姆加景，乃驅。御者代。乘以几者，尚安舒也。景之制蓋如明衣，加之以爲行道禦塵，令衣鮮明也。景，亦明也。驅，行也。行車輪三周，御者乃代壻。今文「景」作「憬」。【疏】正義曰：「景」，《通典》作「憬」，非也，古無「憬」字。《釋文》作「御」，《集釋》無「車」字。注但云「尚安舒」，而賈疏知謂登車時者，記云：「從者二人坐持几，相對。」坐，即踞。几卑，故二人踞於地而對持之，非登車而何？馬前亦有燭。褚氏寅亮云：「庶人妻用錦，外加禪縠，其名曰褻，爲文之太著也。士妻緇衣纁緇不爲文著，故外加者爲景，轉取鮮明之義。熊氏朋來欲改「景」爲「褻縠」，不必。」李氏如圭云：「《碩人》詩亦云「衣錦褻衣」，庶人卑，不嫌與國君夫人同。士妻純衣，加明衣，非爲其文太著，爲禦風塵耳。」云「今文「景」作「憬」者，胡氏承珙云：「上文「被纁黼」注云：「纁，禪也。士妻始嫁，施禪黼於領上，假盛飾耳。」此注云「景之制蓋如明衣」。」案：鄭於《詩》「褻衣」、《禮記》「尚縠」及此

經「纁黼」皆訓禪，蓋本《玉藻》禪爲縠義。惟於此景訓明，是意與褻、縠、纁不同。賈疏仍以禪縠釋景，非鄭義。彼褻爲正字，縠、纁爲假借字；此景爲正字，憬乃借字。」壻乘其車，先俟于門外。壻車在大門外。乘之先者，道之也。男率女，女從男，夫婦剛柔之義自此始也。俟，待也。門外，壻家大門外。【疏】正義曰：敖氏云：「御者既代，止車以俟，壻乘其車先，然後從之。」注云「壻家大門外」者，案：賈疏云：「命士以上，父子異宮，故解爲壻家大門外。若不命之士，父子同宮。」吳氏廷華云：「《喪服》、《內則》雖俱有異宮說，然未聞父子各門之說。以理論之，父母見在，壻豈得自立爲家？又此時門內及席皆有燭。」

右親迎

婦至，主人揖婦以入。及寢門，揖入，升自西階。媵布席于奧。夫人于室，即席。婦尊西，南面。媵、御沃盥交。升自西階，道婦

① 「衣」下，原衍「云」字，今據《儀禮今古文疏義》刪。

② 「御」「代」，原皆作「待」，今據《續清經解》本改。

人也。媵，送也，謂女從者也。御，當爲訝，訝，迎也，謂壻從者也。媵沃壻盥於南洗，御沃婦盥於北洗。夫婦始接，情有廉恥，媵，御交，道其志。【疏】正義曰：《釋文》「媵」、「席」中無「布」字。○自此至「卒食」，明夫導婦入門、升階及對席、媵御沃盥，即席之儀。李氏如圭云：《詩》云：「好人提提，宛然左辟。」好人，爲容好者。左辟，辟而左，不敢當尊，蓋壻揖婦人之時也。壻爲主，先即席，婦席未設也。吳氏廷華云：「曰入闌西，升自西階，雖是導婦，亦父在不由阼階之義。第言夫即席者，婦俟饌具，饌具乃即席也。」案：升自西階，謂夫婦並升西階也。並升之法，夫升三等，婦少右從之，中等並行。夫在左既立，夫婦並立於西階上，俟布席乃入也。下經云「燭出」，則夫婦未入之前燭必先入矣。不言者，文略耳。注云「媵沃壻盥於南洗，御沃婦盥於北洗」者，此當如先儒媵沃御盥，御沃媵盥爲是。蓋媵御佐禮，當盥以致潔也。鄭道志說殊謬。且婦人不下堂，今媵亦婦人，乃下堂而沃壻盥於南洗乎？褚氏寅亮云：「於即席尊西之後，而言『媵，御沃盥交』，則敖云盥於北洗者得之。」^①但交沃者，媵御也；盥者，夫婦也。如敖媵沃御盥，御沃媵盥之說，^②是媵御盥而反遺夫婦矣，則非也。席東向，西向，以南方爲上，正法也。敖乃變爲北

上，^③蓋因執豆席相變，^④故遷就以文其詞耳。」江氏筠云：「盥有不必就洗者，《特牲禮》盤匱之設是也。此經沃盥，婦即在尊西南面，媵奉盤，御執匱。夫當於其拜受贊醕之處，御奉盤，媵執匱。」云「御，當爲訝」者，迎訝字，《周禮》作「訝」，他經皆作「御」。鄭《曲禮》注亦云：「御，當爲訝。」與此同。埤案：《鄉飲酒禮》云：「主人南面盥，沃洗者西北面。此當準之。贊者徹尊罍，舉者盥，出，除罍；舉鼎人，陳于阼階南，西面北上。匕、俎從設。執匕者，執俎者從鼎而入設之。匕，所以別出牲體也；俎，所以載也。【疏】正義曰：「鼎」，《通解》、敖氏俱作「罍」。浦云：「鼎」，^⑤當作「罍」，今作「鼎」，後人更易也。《集釋》校云：「『杞』，各本作『匕』，下同。張淳云：『釋文』：杞，必履反。《士喪禮》『乃杞載』，又曰『杞者』；《特牲禮》『乃杞』；《有司》『杞羊』，杞豕魚：字皆从木。」

- ① 「盥」，原脫，今據《儀禮管見》補。
- ② 「敖」下，原衍「云」字，今據《儀禮管見》刪。
- ③ 「敖乃」，《儀禮管見》作「何緣」。
- ④ 「因」，《儀禮管見》作「固」。
- ⑤ 「鼎」上，《十三經注疏校勘記》有「衛氏湜云」四字。

《少牢》「長杙」，古文作「匕」，鄭氏亦改爲「杙」。^①《士喪禮》舉鼎，右人以右手執匕，左人以左手執俎，舉鼎人兼執匕俎者，喪禮略也。《公食》執匕、俎之人，入加匕於鼎，陳俎於鼎南。其匕與載皆舉鼎者爲之。《士虞》右人載者，喪祭少變，故在西方，長者在左也。今《昏禮》鬼神陰陽當與《特牲禮》同，亦右人匕、左人載，遂執俎而立以待設也。盛氏世佐云：「贊者，^②室老也。下經云「贊醴婦」，而「舅姑既沒」章云「老醴婦于房中」，明是一人矣。不云老而云贊者，以事命之。」敖氏云：「盥北面，盥於南洗也。除冪者，右人也。既陳鼎，則右人抽扃，委於鼎北，而西面於鼎東以俟。」注云「執匕者，執俎者從鼎而入設之」者，敖氏云：

「執匕、俎者從鼎入，而設於其鼎之西也。」既設俎，則各加匕於其鼎，東枋，遂退。此三匕、三俎從設，則有司三人各兼執一匕、一俎歟？沈氏彤云：「上經所陳器饌，醢醬二豆，菹醢二豆，黍稷四敦及四爵合盞，皆爲夫婦各用其半，故兼陳之。則此設匕、俎亦當有六匕、六俎矣。《郊特牲》、《昏義》並用共牢而食者，^③特謂不異牲。若豚、魚、腊，夫婦各食其半耳，非謂止三俎而共之也。又下經婦用特豚饋舅姑。注云：「右胖載之舅俎，左胖載之姑俎。」時舅姑共席，猶各有俎，豈夫婦異席而顧共俎乎？且婦前無俎，亦

非敵偶之義。」吳氏廷華云：「上尊有冪，徹之，待酌也。設匕、俎，待載也。亦徹豆巾。《儀禮》大概，右人於鼎東西面匕，^④左人於鼎西俎南北面載。《士虞禮》鼎在西階下，故匕者東面，而載者則仍北面也。賈疏以特牲右人鼎北南面，左人鼎西俎南北面，何也？據《特牲》「加匕」注云：「左人北面。」疏亦以爲鼎西北面，猶與此疏合也。但彼注又云「加匕東柄」，疏亦云然。夫東柄者，以匕者在鼎東西面，^⑤故東其柄以便其匕耳。若右人鼎北南面，則當南柄，不當東柄也。」墳案：賈疏云：「右人於鼎北南面匕，左人於鼎西俎南北面載。」^⑥考《特牲》注則右人既錯，西面俟，左人北面，當是右人西面匕，非南面也。北面載，執而俟。執俎而立，俟豆先設。【疏】正義曰：敖氏云：「北面載，左人也，右人則西面匕。此載以俎盛物之稱。《士喪禮》載豚云：「載兩髀于兩端，兩肩亞，兩胎亞，脊、肺在於

① 「贊」下，《儀禮集編》無「者」字。

② 「用共牢而食」，原作「云共牢」，今據《儀禮小疏》改。

③ 「面」，原脫，今據《續清經解》本補。

④ 「面」，原脫，今據《續清經解》本補。

⑤ 「北」，原脫，今據《續清經解》本補。

中，皆進抵。『載魚，左首，進饗，三列。腊進抵。』此魚十有四，則二列也。載腊如豚，惟無肺耳。俟，俟時而升。褚氏寅亮云：『《少牢禮》云：「匕皆加于鼎，東枋。」東枋者，鼎西面，匕者在東，便也。此鼎亦西面，則敖氏謂西面匕勝疏南面匕之說。』匕者逆退，復位于門東，北面西上。執匕者事畢逆退，由便。至此乃著其位略賤也。

【疏】正義曰：李氏如圭云：「逆退，後入者先退也。」敖氏云：「匕者乃右人，以匕出鼎實者也。逆退則匕下鼎者在先，匕上鼎者在後也。言復位，見其初位在此門東，北面西上，私臣之位也。《特性·記》曰：「私臣門東，北面西上。」逆退者，由便也。亦便其復位也。」案：左人執俎而俟，則退者為右人明矣。此亦舉鼎者，謂之匕者，以事命之，且以別於載者也。注以是為執匕者，恐非。又案：逆退者，西面匕畢，乃轉南面而退也。載者尚立俟，故匕者先退。贊

者設醬于席前，菹醢在其北。俎入，設于豆東，魚次，腊特于俎北。豆東，菹醢之東。【疏】正

義曰：醬與菹醢俱在豆，^①知不在醬東者，下文醬東有黍稷，故知在菹醢東也。敖氏云：「菹醢在醬北，南上也。別見魚、腊，則此俎云者，指豚俎也。當豚俎北端而云「特」

者，明不與豚俎為列，亦橫設之。凡俎數奇，故於其下者特設之。」張氏爾岐云：「魚次者，又在俎東也。腊特設俎北，若復東則饌不得方故也。」盛氏世佐云：「此設俎豆之次，皆以南為上者。夫席東向，便其右也。設俎者，即載牲體之左人也。魚次，次豚而東也。俎北，豚俎北也。腊云特，則豚魚之並可見矣。」贊設黍于醬東，稷在其東。

設涪于醬南。饌要方也。【疏】正義曰：敖氏云：「黍在豚南，稷在魚南。涪不言其器，在豆可知。《少牢禮》曰：「進二豆涪。」張氏爾岐云：「二豆並列醬北，二敦直列醬東，此為夫設。下對設二豆、二敦，則為婦。三俎共之。」注云「饌要方也」者，沈氏彤云：「《特性》注云：「腊特，饌要方也。」彼疏云：豆在神坐前，豕設於豆東，魚次豕東，若腊復在東，則饌不得方，故特也。上經「腊特于俎北」，義同。此經「設涪于醬南」者，以醬東黍，黍東稷，若稷東復涪，則饌仍不得方，故亦特設之於醬南。兩注皆明特設之義，蓋必有特設者而後饌乃得方也。」設對醬于東。對醬，婦醬也。設之當特俎。【疏】正義曰：敖氏

①「菹醢」，原作「俎」，今據賈疏改。

云：「下文云『設黍于腊北』，而此醬宜在黍東，則於特俎爲東北也。」盛氏世佐云：「此爲婦設也。夫西婦東，故云對。凡饌皆對，獨於醬言之者，以其首設也。設之於夫饌之東，少北，惟云東者，舉其大判言之耳。不言婦前者，婦席未設也。」案：以下言婦饌不言俎者，同牢者亦同俎。曰對者，以壻饌爲主也。特俎，即上所謂腊特于俎北者也。沈氏彤曰：「下經設黍于腊北之腊，謂婦之腊，即婦之特俎也。敖誤以夫婦共三俎，乃誤以此腊爲即上所特設者，遂謂醬於特俎爲東北。二豆當特俎之東，無之而不誤矣。且如其言，則下經對席北去壻席過半，^①夫婦徑不相直也，何以稱敵偶之義邪？」蒞醢在其南，北上。設黍于腊北，其西稷。設湑于醬北，御布對席，贊啓會，卻于敦南，對敦于北。啓，發也。今文「啓」作「開」，古文「卻」爲「綌」。**【疏】**正義曰：注本「啓發也」有「會合也謂敦蓋也」七字。^②○盛氏世佐云：「醬二豆，二敦湑，^③夫婦各者也；三俎，共者也。夫席在室之西南隅，婦席在其東，少北。室中迫，而饌又在其西偏，則二饌蓋相連矣。連故得共俎，且成其方也。又夫婦各有三俎，尤經所未之見者。經云『設對醬于東』，注謂當特俎。敖氏以下

文設黍于腊北參之，當在特俎之東北。且經云「設黍于腊北」者，腊即上文「腊特于俎北」之腊，非有二也。乃謂婦饌別有二豚魚，^④一腊，而案其設黍之處，又不在腊，而在豚北，直與經文相背矣。」褚氏寅亮云：「夫席之黍在醬東，稷在黍東，對席之黍，宜設在醬西豚北，其稷宜在黍西豚北，無如設稷之地已有腊在，故必設黍於稷北，而稷乃設于黍西，此經所以特著設黍于腊北之文也。鄭注所以云對醬當特俎也。敖氏以對席當設之稍北，因有對醬于腊俎爲東北及北腊即醬西之說，^⑤不知昏禮對席與養者對席自別。安可以彼例此？設席一誤，饌位無不誤矣。李氏如圭謂對席亦有俎，則是六俎而非三俎，且失同牢之義，亦非。」張氏惠言云：「據禮圖，豆徑尺二寸，登與豆同。敦徑六寸八分，俎廣尺二寸，長二尺四寸。橫設之，一俎適當二豆之徑。兩席共俎，蒞醢當席中，必相對，與豚、魚之俎直。腊

- ①「過」，原作「各」，今據《儀禮小疏》改。
 ②「有」上疑當有「下」字。
 ③「敦」，原作「對」，今據《儀禮集編》改。
 ④「二」，原作「三」，今據《續清經解》本改。
 ⑤「腊」，原脫，據《續清經解》本補。

特于其北，則醬涪當之，故鄭云對醬當特俎。經文云：「設黍于腊北。」^①蓋當腊稍北，略言之。又疑「北」爲「東」字之誤。疏云：「設婦涪於醬北，當特俎東饌內。」是明以黍在腊東。若經爲腊北，不應無說也。又肝俎，經不言所在，依祭禮當在內西塾。韋氏協夢云：^②「對席必稍北者，壻席南上，婦席雖與壻席相向而不敢並，示有尊卑之義也。」張氏爾岐曰：「會，敦之蓋。卻，仰也。開敦蓋，各仰置敦右。」案：敦南，壻敦；對敦，婦敦。又涪本佐食之具，飫射等飲而不飯，故無涪。賈疏說非也，《少牢》文不備是矣。至《有司徹》雖有匕涪、肉涪，但祭祀之涪在登，不祭不噲。彼涪在俎，噲而嘗之。蓋賓尸在味，與正祭在登者不可同日語也。注「今文『啓』作『開』」者，胡氏承珙云：「古人於啓閉字多作『啓』，少作『開』。故古文作『啓』者，今文則作『開』。《左傳》哀三年經『城啓陽』，《公羊》作『開陽』，此《左氏》古文，《公羊》今文之別。『古文卻爲給』者，卻，正字；給，借字。《說文》：『卻，節欲也。』《玉篇》：『卻，節卻也。』《玉篇》爲是。『所以節進退。』《趙策》云：「進退之謂節。」蓋進則以節召之，退則以節卻之，故云「節卻」。《說文》「欲」字傳寫誤耳。疏云：「卻，仰也，謂仰於地也。」案：「贊啓會，卻于敦南」者，謂啓其蓋，退於敦南，即卻爲

却之義。「贊告具。揖婦，即對筵，皆坐；皆祭，祭薦、黍、稷、肺。」贊者西面告饌具也。壻揖婦，使即席。薦，菹醢。【疏】正義曰：張氏爾岐云：「其祭之序，由近及遠。肺，指祭肺，非舉肺也。」盛氏世佐云：「告具，告於主人也。揖婦不言主人，可知也。敖氏以爲贊者揖，非也。至是云皆坐，則曷者夫之即席猶立也。」注云「贊者西面告」者，主人東面，故西面告也。云「薦菹醢」者，敖氏云：「祭薦黍、肺，釋上所謂祭者此也。祭薦，以菹搗於醢而祭也。」贊爾黍，授肺、脊；皆食以涪、醬，皆祭舉、食舉也。爾，移也。移置席上，便其食也。皆食，食黍也。以，用也。用者，謂用口啜。涪用指師醬。古文「黍」作「稷」。【疏】正義曰：徐本、《集釋》俱無「用口」、「用指」四字，與疏合。盧云：「《公食大夫》疏引此注亦無此四字。」○敖氏曰：「惟爾黍者，夫婦各有二敦，故但取其尊者而食之。凡爾敦者，皆右之於席上。經特於《少牢禮》見之，授肺、脊，兼舉而授之也。皆受以右手，惟飯時則右

① 「腊」，原作「涪」，今據《續清經解》本改。

② 「韋」，原作「章」，今據前文改。

執之也。贊授夫于饌南西面，婦則于饌北東面，皆訝受之，皆食謂一飯也。以涪醬皆謂師之，未食舉，故用此安食耳。舉謂肺、脊以其先食舉之，因名之曰舉祭，謂振祭嚼之一飯乃祭舉，異於饋食禮也。食舉謂啗之，再飯、三飯則皆食舉，不復以涪醬矣。」注云「移置席上，便其食也」者，吳氏廷華云：「俎不可移置席上，故授肺、脊而已。」爾黍注謂「便其食」，則席上之右也。饌食無不祭而先飯之理，此經雖先言「皆食」，後言「祭舉、食舉」，然玩「也」字義，蓋謂其食黍者皆祭舉、食舉而後食黍，是錯綜之文，非先後之序也。賈疏謂三飯不須道食，疎矣。至《特性》《少牢》皆祭禮，此合豎禮，儀節自是不同。不應據一節之異，遂斷為尊卑之大別也。」云「古文『黍』作『稷』者，胡氏承珙云：『《少牢禮》：『上佐食爾上敦黍于筵上，右之。』注：『爾，近也，或曰移也。右之，便尸食也。』疏云：『案：特性云黍、稷，此及虞皆不云黍、稷者，此後黍、稷連言，明并黍、稷食之，不虛陳而不食。不言爾之者，文不具，其實亦爾之也。』」案：此經云「爾黍」，注「皆食，食黍也」，是鄭意此敦惟爾黍而不及稷，下文「三飯卒食」注：「同牢示親，不主為食，起三飯而成禮也。」可知不必偏食黍、稷矣。且黍重於稷，下文婦饋舅姑有黍無稷，故此爾敦不及稷。古文作「稷」，鄭

所不用。「三飯卒食。卒，已也。同牢示親，不主為食起，三飯而成禮也。」【疏】正義曰：同牢，示親不主為食起者，少牢十一飯，特性九飯而禮成，此獨三飯也。贊洗爵，酌醕主人，主人拜受，贊戶內北面荅拜，醕婦亦如之。皆祭。醕，漱也。醕之言演也，安也。

漱，所以潔口，且演安其所食。醕酌內尊。【疏】正義曰：徐本、《集釋》「潔」俱作「絜」。案：凡「絜」字，嚴、徐、鍾本並作「絜」，是正字。○賈疏云：「絜拜當東面，婦拜當南面。少牢養荅拜。」注云：「在東面席者東面拜，在西面席者南面拜。」故知婦南面拜，若贊荅婦拜，亦於戶內北面也。」敖氏云：「洗爵，洗於庭也。醕之言繼也，①其字從酉。蓋既食之而復繼之以酒，取其酒食相續之義也。此拜受者皆在席。戶內，②戶內之西也。祭謂祭酒。凡醕皆坐受爵。」案：注漱以絜口，蓋頤養之道應爾也。贊以肝從，皆振祭，嚼肝，皆實于菹豆。肝，肝炙也。飲

①「繼也」上，《儀禮集說》有「亂也」二字。

②「戶內」，原脫，今據《續清經解》本補。

酒宜有肴以安之。【疏】正義曰：張淳曰：「《釋文》曰：『齊，才計反。』」齊，齊古通用。此从口者，後人加之耳。」案：今本《釋文》仍作「齊」。○敖氏云：「以肝從，謂以肝從於酒而進之。二肝蓋共俎而進本，贊則縮執之。振祭者，執而振動之，以爲祭也。此亦以肝擣於鹽，乃振祭肝從之法，《少牢禮》備之矣。」吳氏廷華云：「擣鹽過多，振而去之。祭而齊之後或言『加』，或言『實』，其義一耳。賈疏因《士虞禮》言『加』，此言『實』，遂以祭禮言『加』，此不言『加』爲異，不知特性亦祭禮，其舉獸幹及魚也，則曰實魚於俎豆矣。」卒爵，皆拜。贊荅拜，受爵。再醕如初，無從；三醕用盃，亦如之。亦無從也。【疏】正義曰：卒爵而拜，拜其飯己之賜也。爵出奠於篚，乃復洗他爵以升。盛氏世佐云：「荅拜，各荅一拜也，亦於戶內北面。『贊荅拜』下不言婦又拜，^③是不挾拜矣。^④不挾拜者，以其禮輕故也。」褚氏寅亮云：「儀則同初醕，無從則同再醕。每醕洗爵於庭，皆有兩番降。」案：禮成乃用盃，重之，不輕用也。贊洗爵，酌于戶外尊。入戶，西北面奠爵，拜。皆荅拜。坐祭，卒爵，拜。皆荅拜。興。贊酌者自酢也。【疏】正義曰：戴氏震

云：「據前尊于北墉下，是爲內尊；尊于房戶之東，是爲外尊。注止稱內尊、外尊。此處疏云『乃酌外尊』，亦無『戶』，今刪正。」○敖氏云：「三醕乃自酢，變於常禮也。自酢之禮，代人酢己耳。洗爵者，象其爲己洗也。奠爵拜者，象受也。夫婦皆荅拜，則象同酢之也。興，謂夫婦也。」案：皆者，皆夫婦也。始荅拜，象拜送也；次荅拜，象荅卒爵拜也。坐，贊者坐也。祭，祭酒也。言坐祭，則必興而後坐也。不言興，文省。興者，夫婦及贊者皆興也。洗亦在房，入室戶西北面。拜，兼拜兩席也。主人出，婦復位。復尊西南面之位。【疏】正義曰：敖氏云：「主人出，爲將說服於房也。婦但當說服於室，故不出，惟復其尊西南面之位。」^⑤乃徹于房中，如設于室，尊否。徹室中之饌設於房中，爲媵御餽之。徹尊不設，有外尊也。【疏】

- ①「釋文曰」，原脫，今據《儀禮識誤》補。
- ②「才」，原作「方」，今據《儀禮識誤》改。
- ③「下」，原脫，今據《儀禮集編》補。
- ④「挾」，原作「挾」，今據《續清經解》本改。
- ⑤「惟復其尊西南面之位」，《儀禮集說》作「惟變位而已」。

正義曰：「乃徹」，《釋文》作「迺」。敖氏云：「徹之者，亦贊也。如設于室者，謂其饌與席之位也，亦皆東西相鄉。」

案：媵西御東。主人說服于房，媵受；婦說服于室，御受。姆授巾。巾，所以自潔清。今文「說」

皆作「稅」。【疏】正義曰：「御授」，石經、徐本、《集釋》、《通解》、楊、敖俱作「受」，「作稅」上，徐本、《集釋》俱有「皆」字。

○郝氏曰：「夫婦皆說禮服也。巾，帨也。姆授，授婦也。」

案：下記云：「母施衿結帨。」帨即巾也，至是與服俱說，故姆還以授之，使不忘父母之戒云爾。吳氏廷華云：「說服當於隱處，其房室之西南隅歟？」注云「今文『說』作

「稅」者，賈疏云：「疊今文爲『稅』，不從者，稅是追服之言，非脫去之義，故不從也。」御衽于奧，媵衽良席

在東，皆有枕，北止。衽，卧席也。婦人稱夫曰良。

《孟子》曰：「將暱良人之所之。」止，足也。古文「止」作

「趾」。【疏】正義曰：「暱」，徐本、《集釋》、敖氏俱作「見」，

與疏合。《釋文》作「覲」，云：今本亦作「見」。臧氏琳云：

「賈本作『將見』，故後人校《釋文》云『今本亦作見』。乃注

疏本反作『覲』，此文後人依《釋文》改也。《祭義》『見以蕭光』、『見覲以俠覲』，『見』及『見閒』皆爲『覲』之誤。此《儀

禮注》當從《釋文》作「覲」，賈疏作「見」，非也。」○郝氏曰：

「良，良人。至是始成夫婦焉，稱良，戚之也。北止，趾向

北，首向陽也。」張氏爾岐云：「設衽曰衽，猶置尊曰尊，布

筵曰筵也。上文媵受主人服，御受婦服，此御衽婦席，媵衽

夫席，皆與媵御沃盥交義同。」①注云「古文『止』作『趾』

者，胡氏承珙云：『《說文》：『止，下基也。象艸木出有趾，

故以止爲足。』段氏玉裁云：『此引申假借之法，凡以韋爲

皮韋，以朋爲朋黨，以來爲行來之來，以西爲東西之西，以

子爲人之稱皆是也，以止爲人足之稱正同。許書無『趾』

字，『止』即『趾』字。許同鄭從今文，故不錄『趾』字，如從今

文『名』，不錄古文『銘』也。」主人入，親說婦之纓。

入者，從房還入室也。婦人十五許嫁，笄而禮之，因著纓，

明有繫也。蓋以五采爲之，其制未聞。【疏】正義曰：賈疏

云：「纓有二：《曲禮》云：『女子許嫁，纓。』示有從人之端

也，即此說纓之纓。《內則》云：男女未冠笄者，總角，笄

纓。此幼時纓也。皆與男子冠纓異，故注云『其制未聞』。」

案：主人親說之者，明此纓爲己而繫也，亦示親之。燭

①「交」，原脫，今據《儀禮鄭注句讀》補。

出。昏禮畢，將卧息。【疏】正義曰：出，出於室也。媵

餽主人之餘，御餽婦餘。贊酌外尊醕之。外

尊，房戶外之東尊。【疏】正義曰：經不言媵御餽位，據上

經云「徹于房中，如設于室」，則壻之餘仍在東，婦之餘仍在

西。媵位如壻，御位如婦，惟尊在房戶之外為異耳。敖氏

云：「不洗而酌，略賤也。此醕之儀，惟拜受拜送而已，不

拜既爵。」媵侍于戶外，呼則聞。為尊者有所徵求。

今文「侍」作「待」。【疏】正義曰：媵初至，有徵求必資之

御，則御亦在焉，經文省耳。注云「今文「侍」作「待」者，

胡氏承珙云：「侍、待古同聲，故二字互用。《禮記·雜記》

注：「待，或為侍。」」

右婦至成禮

夙興，婦沐浴，纚笄、宵衣以俟見。夙，早

也，昏明日之晨。興，起也。俟，待也。待見於舅姑寢門之

外。古者命士以上，年十五父子異宮。【疏】正義曰：《集

釋》本「以」作「已」。○敖氏云：「士妻之纚笄、宵衣，猶士

之玄冠、玄端也，蓋事舅姑之常服也。」盛氏世佐云：「纚

笄、宵衣，士妻之正服。次純衣、纁衿，為始嫁而加盛飾焉

耳。事已則服其常也。」郝氏云：「降如姆服，①卸靡麗，示

執役也。」注云「古者命士以上，年十五父子異宮」者，

案：《內則》云：「由命士以上，父子異宮。」不云年限，鄭知

十五為限者，以其十五成童，是以鄭注《喪禮》亦云：「子

幼，謂年十五以下。」則不隨母嫁，故知十五以後乃異宮也。

質明，贊見婦于舅姑。席于阼，舅即席。席

于房外，南面，姑即席。質，平也。房外，房戶外之

西。古文「舅」皆作「咎」。【疏】正義曰：賈疏云：「鄭知房

外是房戶外之西者，以其舅在阼，阼當房戶之東，若姑在

房戶之東，②即當舅之北，南面向之不便。又下記云：「父

醴女而俟迎者，母南面于戶外，女出于母左。」以母在房戶

西，故得女出于母左，是以知房外亦房戶外之西也。」敖氏

云：「見者，通言於舅姑使得見也。」郝氏云：「舅席在阼，

示為主也。姑席在東房戶外，南面，為內主也。」注云

「古文「舅」皆作「咎」者，案：「舅」是正字，「咎」是借字。

婦執筭棗栗，自門入，升自西階，進拜，奠于

①「服」，原脫，今據《儀禮節解》補。

②「姑」，原作「舅」，今據《儀禮注疏》改。

席。筭，竹器而衣者，其形蓋如今之筭筭簾矣。進拜者，

進東面乃拜。奠之者，舅尊，不敢授也。【疏】正義曰：「筭簾」，徐本、《釋文》、《集釋》、敖氏俱作「筭簾」，嚴、鍾、《通解》作「筭簾」。案：《說文》：「口盧，飯器。或从竹去聲。」

○敖氏曰：「筭，束栗，同一器也。」①門，舅姑寢門也。始執筭用二手，拜時則惟右手執之。凡婦人之拜，以左掌據地，故右手執物而可以拜也。《內則》曰：「凡女拜尚右手。」沈氏彤云：「《詩傳》曰：『方曰筐，圓曰筭。』《說文》：『筭，箱也。箱，飯器。』又云：『筭，飯器，以柳爲之。』蓋飯器而竹與柳爲之者，宜於圓，是以筭亦圓也。鄭殆兼二者以況筭之圓歟？《禮記釋文》云：②「筭以葦，若竹爲之，衣以青縹。」《圖》云：「筭如筥狀，其口微弇而稍淺，③容一斗。」敖氏謂聘禮卷幣實於筭，謂筭之制隨方如篋，非也。實幣之筭蓋隋圜。」郝氏云：「筭，竹盤，盛棗栗爲摯也。升自西階，不敢由阼也。手奉摯進，至舅席前，東面立拜。古婦人拜不著地，故執摯拜而後奠於席。」賈疏云：「《雜記》云：『婦見舅姑，兄弟、姊妹皆立於堂下，④西首，⑤是見己。』注云：『婦來爲供養也，其見主於尊者，兄弟以下在位，是爲己見，不復特見。』又云：『見諸父，各就其寢。』注：『旁尊也，亦爲見時不來。』今此不言者，文略耳。」

注云「筭，竹器而衣」者，⑥下記云：「筭，緇被纁裏，加于橋。」注：「被，表也。婦見舅姑，以飾爲敬。」是有衣也。云

「進東面乃拜」者，自西階上東面，至阼席前而拜也。云「舅尊，不敢授也」者，下舅直撫之而已，姑則親舉之。親舉者，若親授之然，故於舅得云「尊，不敢授也」。舅坐撫之，

興，荅拜。婦還，又拜。還，又拜者，還於先拜處

拜。婦人與丈夫爲禮則俠拜。【疏】正義曰：張氏爾岐

云：「撫，撫棗栗筭也。撫之者，示受也。」江氏筠云：「婦

人立拜，故姑舉殿脩必興而後拜。男子跽拜，乃舅坐撫棗

栗。經亦云「興，荅拜」者，下記云「舅荅拜，宰徹筭」，⑦可

以明其故矣。蓋筭須拜後乃徹，則荅拜時筭固在席也。婦

之奠筭於席必正當舅前，舅之坐撫亦必與筭對，則筭未徹

①「同」上，《儀禮集說》有「二物」二字。

②「記」，原作「器」，今據《儀禮小疏》改。

③「稍」，原作「梢」，今據《儀禮小疏》改。

④「姑」，原脫，今據《儀禮注疏》補。

⑤「西首」，《儀禮注疏》作「西面北上」。

⑥「筭」，原作「筭」，今據《續清經解》本改。

⑦「下」，原作「日」，今據《續清經解》本改。

之時其坐處之不可以拜明矣。以筭之有妨於拜，而稍違其坐處以荅之，此舅之所以興也。」又戴氏震云：「婦立拜而舅乃手拜荅之，疑未必是。」^①興荅拜者，所以示舅之亦肅拜耳。」案：還、旋通。婦還者，盤旋以辟，不敢當舅拜也。

注云「先拜處」者，謂前東面拜處也。云「婦人與丈夫爲禮則俠拜」，謂若《士冠禮》冠者見母，母拜受，子拜送，母又拜。母于子尚俠拜，不徒此婦於舅姑而已。《禮經釋例》曰：「婦奠摯，舅撫之，猶《覲禮》侯氏四享，王撫玉也。敖氏云：撫之，示受之。其說是也。」降階，受筭，殿脩，

升，進，北面拜，奠于席。姑坐，舉以興，拜，授人。人，有司。姑執筭以起，荅婦拜，授有司徹之。舅

則宰徹之。【疏】正義曰：「殿」，石經作「股」，《釋文》作

「段」。段氏玉裁云：「本又作「股」。瞿氏中溶云：「石本原作「段」，朱梁重刻譌作「股」。陸氏作「段」，正與石本原刻同。」○褚氏寅亮云：「婦已見舅，不必復出矣。故侍御者

先執殿脩，以俟於下。婦旋，降階受之以見姑，並非以門內、門外別輕重之差。案：《公羊傳》莊二十四年：「大夫、宗婦覲用幣。」何注云：「禮，婦人見舅，以棗、栗爲敬；見姑，以殿脩爲敬；見夫人至尊，兼而用之。」蓋據此經見舅

執棗栗，見姑執殿脩之文也。《集說》謂於舅並用棗、栗，見姑惟用殿脩，則是以見夫人之禮見舅也，而可乎？「盛氏世佐曰：「階，西階也。受，蓋受于婦氏人。殿脩，脯也。姑不撫之而舉以興。婦於姑之拜也，不還不又拜，皆下於舅。」吳氏廷華云：「北面，向姑也。人，女從。授女從，令宰徹之。曰「舉以興」，則視撫有加禮矣。」注云「舅則宰徹之」者，下記云：「舅荅拜，宰徹也。」《禮經釋例》曰：「姑舉摯授人，猶《聘禮》公側授宰玉，享，公側授宰幣也，皆略如臣見君之禮也。不降階拜者，婦人禮異於男子，且辟君也。」

右婦見舅姑

贊醴婦。「醴」，當爲「禮」。贊禮婦者，以其婦道

新成，親厚之。【疏】正義曰：敖氏云：「贊謂舅姑醴婦也。

舅姑必醴之者，荅其行禮於己也。舅不自醴之者，於其始至，宜示以尊卑之禮也。是時舅姑皆立於席。」吳氏廷華云：「猶宰夫爲主人之義。」江氏筠云：「自來說贊皆用男

①「是」，原作「示」，今據《續清經解》本。

子，蔡敬齋《本義》則云「以婦女之曉禮儀者爲之醴婦」，駁舊說云：「男女不親授受，豈有使男子引新婦見舅姑且酌而醴之之禮？」然案禮，惟婦人於丈夫乃有挾拜，若同爲婦人，雖婦之於姑亦不挾拜，此何以受醴、啐醴兩見「婦又拜」文？蔡因爲之說曰：「贊代舅姑拜送，故婦又拜，蓋婦與舅行禮當挾拜故也。」然果如所說，則下文婦餞而姑酌之，酌雖止爲姑禮，實亦兼達舅意，又何以不挾拜？筠謂贊雖代舅，而既爲婦人，則畢竟婦人之相與拜也。婦與婦行禮而爲挾拜，禮未之有。欲明男女之別，而創禮所未有之拜，未見其說之允也。且經惟男子有奠爵之拜，若婦人之拜，皆執爵者，此經於贊自酢云「贊洗爵，酌于戶外尊，入戶，西北面奠，拜」，果婦人而然乎？「席于戶牖間。室戶西，牖東，南面位。」【疏】正義曰：賈疏云：「禮子、禮婦、禮賓客皆於此，尊之故也。」^①側尊鬴醴于房中。婦疑立于席西。疑，正立自定之貌。【疏】正義曰：疑，疑通。鄭讀爲「屹然從于趙盾」之「屹」。疑立者，不偏倚，不搖動之意。《玉藻》云「立容德」是也。立於此者，俟贊者酌醴而出也。立時少久，故特著其容。孔氏廣森曰：「當讀如《士相見》篇『不疑君』之『疑』。疑立者，斜向舅姑立也。於君

以不敢斜向爲敬，獻酢則又必向所與行禮者爲敬，若《鄉飲酒》「賓西階上疑立」，是向主人立也；「主人阼階東疑立」，是向賓立也。《周禮》曰：「不正其主面，亦不背客。」此疑立之道乎？大抵足有定位而面無定矚，隨其所敬轉向之，是之謂疑立。今人行禮時亦惟習於此節，斯敬賓之意達矣。贊者酌醴，加枳，面枋，出房，席前北面。婦東面拜受。贊西階上，北面拜送。婦又

薦脯醢。婦東面拜，贊北面荅之，變於丈夫始冠成人之禮。【疏】正義曰：婦於贊乃挾拜者，重其爲舅姑醴己也。婦又拜，蓋執觶拜也。其下二拜亦然。注云「變

於丈夫始冠成人之禮」者，賈疏云：「冠禮禮子與此禮婦俱在賓位，彼禮子南面受醴，此則東面，不同，^②彼南面者，以向賓拜；此東面者，以舅姑在東，亦東面拜之也。」婦升

席，左執觶，右祭脯醢，以枳祭醴三，降席，東面坐，啐醴，建枳，興，拜。贊荅拜。婦又拜，奠于薦東，北面坐取脯，降，出，授人于門

^①「故」，原作「至」，今據《儀禮注疏》改。

^②「同」下，《儀禮注疏》有「故決之」三字。

外。奠于薦東，升席，奠之。取脯，降，出，授人，親徹，且榮得禮。人，謂婦氏人。【疏】正義曰：張氏惠言曰：「婦升席皆當由序西，席則當如《冠禮》東上。」褚氏寅亮云：「上經注云：婦人與丈夫爲禮則俠拜，此婦拜之通例也。敖氏何獨於此經云『重其爲舅姑禮已』？然則他禮不俠拜邪？其有不俠拜者，惟荅拜爲然。《少牢》獻侑不俠拜者，辟獻尸禮。」張氏爾岐云：「祭禮南面，①啐醴東面，奠醴又南面，取脯則北面。」韋氏協夢云：「醴子奠觶拜，賓荅拜，冠者不又拜。此婦又拜者，贊者爲舅姑醴婦，婦拜贊者，猶拜舅姑也。故贊既荅拜，婦又拜，敬之至也。降，降西階也。出，出寢門也。凡受醴者必取脯以降，榮見禮也。」案：升席下當有「坐」字。授婦氏人，則歸示其父母矣。

右贊者醴婦

舅姑入于室，婦盥饋。饋者，婦道既成，成以孝養。【疏】正義曰：盛氏世佐云：「盥以致其潔，饋以致其養。於既授脯，即反而行是禮，《昏義》曰『明婦順』是也。」案：舅姑既醴婦，婦即饋舅姑，所以荅舅姑之禮，又以執爲婦之道也。特豚，合升，側載，無魚腊，無

稷，並南上。其他如取女禮。側載者，右胖載之舅俎，左胖載之姑俎，異尊卑。並南上者，舅姑共席於奧，其饌各以南爲上。其他，謂醬、醢、菹、醢。女，謂婦也。如取婦禮同牢時。今文「並」當作「併」。【疏】正義曰：「並上」，徐本、《集釋》、《通解》俱有「今文」二字。案：既有「今文」二字，則「當」字宜衍。○盛氏世佐云：「側，獨也。合升、側載者，合左右胖，升於鼎，而載之俎，則獨用右胖也。《特牲》、《少牢》及《鄉飲酒禮》皆用右胖，此亦宜然。然則舅姑亦共俎矣。不合載者，此婦供養之道，非盛禮也。注疏說恐非。」褚氏寅亮云：「升鼎則合，載則左右兩胖各載一俎，異於同牢之合載也。非無魚腊之謂。《士虞禮》烹一胖，故曰『側烹』。此各載一胖，故曰『側載』。若因無魚腊而言『側』，則彼固有魚腊爨矣。脊亦分爲二，載諸兩俎。土室約深一丈八尺，向東既接設兩席北墉下，焉能更橫容婦席邪？當依注共席之說。室以奧爲尊，故舅居奧，而姑坐舅北。②敖氏謂舅北姑南，非也。」賈疏云：「自『側載』以下，『南上』以上，與取女異。彼有魚腊并稷，此無魚腊無

①「禮」，《儀禮鄭注句讀》作「醴」。

②「坐」，原作「居」，今據《儀禮管見》改。

稷。彼男東面，女西面別席。其醬菹醢，夫則南上，婦則北上。今此舅姑共席東面，俎及豆等皆南上，是其異也。^①雖不言酒，既有饋，明酒在其中。」程氏瑤田云：「凡禮，設飯、陳簋必黍稷並進，以稷五穀長，設之爲敬也。《昏禮》同牢皆食，亦黍稷並設。今婦饋舅姑，特見無稷，明但設黍也。黍美稷疏，婦道成以孝養，飯必精美，不進疏食也。」

注云「並」當作「併」者，胡氏承拱云：「當」字疑衍，並併義略同。鄭於並雖皆訓併，然多疊「併」字不用。此注云「並南上者，舅姑共席於奧，其饌各以南爲上」，^②是仍依古文作「並」，不應云「並當作併」也。段氏玉裁云：「《說文》：並，併也；併，並也。互相訓。並，讀如旁。併，讀如并。並、併義有別，許互訓者，《禮經》注云：古文並，今文作併。是古二字同也。」承拱案：鄭注此經並皆訓併，是二字義同，正與許合。然鄭意經字則一概從「並」，故《有司徹》注又疊古文作「併」者，不用也。婦贊成祭，卒食，一醕，無從。贊成祭者，授處之。今文無「成」也。

【疏】正義曰：不言舅姑即席於奧，文略也。無贊，故婦贊之祭，祭薦肺及黍也。^③成者，謂既授之，又處置之，使知當在豆間，贊祭則其餘皆贊矣。卒食，亦三飯矣。從者，從肝席也。敖氏云：「婦洗於北堂，酌於室中北墉下之尊，西

面醕，戶西北面拜。舅姑荅拜於其席。」席于北墉下。墉，牆也。室中北牆下。【疏】正義曰：徐本、《集釋》、《通解》俱有首三字，今本脫。○賈疏云：此席將爲婦餞之位。褚氏寅亮云：「席南向北向，以西方爲上。有東上者，統於主席也。敖氏謂此席東上，誤。」婦徹，設席前如初，西上。婦餞，舅辭，易醬。婦餞者，即席將餞也。

辭易醬者，嫌滓污。【疏】正義曰：《釋文》：「滓，本或作『染』。」○盛氏世佐云：「辭，辭其餞也。婦將餞姑之饌，姑不辭而舅辭者，統於尊也。易醬，示從舅命也。」沈氏彤曰：「敖氏謂易醬，御爲之，非也。」^④此蒙上舅辭之文，蓋舅親易之；下經婦餞姑之饌，則姑醕之。此舅辭婦之餞，則爲之易醬，猶醕之之義。禮必有報，且姑之醬非舅不得輒易也。自婦見舅姑至舅姑饗婦，罔皆不與，亦禮不參之義。婦餞姑之饌，御贊祭豆、黍、肺、舉肺、

①「異」，原作「義」，今據《儀禮注疏》改。

②「各」，原脫，今據《儀禮古今文疏義》補。

③「肺」，原脫，據《續清經解》本補。

④「醬御爲之非也」，《儀禮小疏》作「姑醬是也謂御爲之則」。

脊，乃食，卒。姑醕之，婦拜受，姑拜送。坐祭，卒爵，姑受，奠之。奠之，奠於篚。【疏】正義曰：徐本、《集釋》、《通解》、敖氏俱有首二字。○《內則》：「子婦佐餽，既食恒餽。」則舅食婦餽，其常也。此辭者，未授使代，尚行賓禮也。然婦則自率其常禮而已。醬爲饌本，既經指師，不易則於尊者爲褻，故易之，猶《燕禮》不敢褻君爵之義也。舅尊而姑親則易矣，故特言餽姑之饌以明之。下祭及食，則又合兩饌而言也。賈疏謂不餽舅餘，先儒又謂易醬爲易姑之醬而餽其饌，並與《內則》之義不符。盛氏世佐云：「餽餘亦祭，敬尊者之餘也。豆，菹醢也。上肺，祭肺也。祭者五，詳著之，見其無不祭也，且與上婦贊成祭之文互備。」敖氏云：「婦拜於席南面，姑亦拜於西墉下東面之位也。卒爵而姑受，亦不拜既爵矣。餽禮輕。」篚在房戶之東南。案：脯醢皆祭，言豆以概籩也。贊亦授之。婦徹于房中，媵御餽，姑醕之。雖無娣，媵先，于是與始飯之錯。古者嫁女必姪娣從，謂之媵。姪，兄弟之子。娣，女弟也。娣尊姪卑。若或無娣，猶先媵，客之也。始飯，謂舅姑。錯者，媵餽舅餘，御餽姑餘也。古文「始」爲「姑」。【疏】正義曰：徐本、楊氏俱作

「容」。案：作「容」與單疏本文合。○案：此當媵御徹之，曰「婦」者，蓋姑親醕，婦亦親徹也。其設之當略如同牢禮，御亦得醕，未必甚賤。此醕亦酌外尊。盛氏世佐云：「婦人送者皆曰媵，娣則妻之女弟從嫁者也。送者非一人，其中容有娣姪從嫁者，以士得有一妻一妾故也。士妻從嫁者，或娣或姪，科取其一。經惟言娣者，舉尊以見卑耳。無娣，謂無從嫁者也。北面之勢不足盡人骨肉之親，雖不以娣姪從可也。」先謂先於御，蓋御，主也；娣姪，客也。褚氏寅亮云：「先是娣止餽姑餘，不得言錯。至是則媵餽舅餘，御餽姑餘，有交錯之義矣。而必言始飯者，見止餽餘而不食舉也。何也？姑所舉者，婦已餽訖，惟餘舅所舉者而已。若媵食舅所舉而御無舉可食，一食舉一不食舉，非交錯之義，故媵亦不餽舉，經特著「始飯」二字以明交錯而餽止敦黍也。」古文作「姑」者，胡氏承珙曰：「姑飯者，媵御共餽姑之飯黍，而不餽舅飯，亦不敢褻之意。」

右婦饋舅姑

舅姑共饗婦以一獻之禮。舅洗于南洗，姑洗于北洗，奠酬。以酒食勞人曰饗。南洗在

庭，北洗在北堂。設兩洗者，獻酬酢以潔清爲敬。奠酬者，明正禮成，不復舉。凡酬酒皆奠於薦左，不舉，其燕則更使人舉爵。【疏】正義曰：「更」，陳本誤作「受」。○賈疏云：「共饗婦以一獻之禮者，案：下記云：『饗婦，姑薦焉。』」注云：「舅姑共饗婦，舅獻爵，姑薦脯醢，」但薦脯醢，無盥洗之事。今設北洗，爲婦人不下堂也。云「姑洗于北洗」，洗者，洗爵。則是舅獻姑酬，共成一獻，仍無妨姑薦脯醢也。」褚氏寅亮云：「舅姑席位，當如見時，注中『其燕』以下補經未備，容饗後亦燕。朱子曰：『以鄉飲酒約之，席在室戶外西，舅酌酒，獻婦於席西，受飲畢，更爵酢舅，姑乃酌自飲畢，更酌以酬婦。婦受觶，奠於薦左，不舉，正禮畢。』」敖氏云：「舅洗，爵以獻也。姑洗，洗觶以酬也。婦酢舅，亦洗於北洗，皆不辭洗，不拜洗。其獻酢，則各於其席前。舅拜於阼階上北面，婦拜於席西東面。姑酬婦則於主人之席北，^①而奠觶於婦之薦西。奠酬者，婦取姑之酬酒，而奠觶於薦東也。不燕者，尊卑之分嚴也。」張氏惠言云：「饗婦禮略，以意言之。舅降取爵於筐，婦避於房。舅升酌，筵前北面。婦筵西東面拜受，舅阼階西面拜送。^②即席。姑薦脯醢，贊者設俎。婦祭脯醢，祭肺，祭酒，降席，東面卒爵，拜，舅荅拜。婦又拜，更爵洗酌，阼階上酢舅，舅西面拜受。」

婦復位，東面拜送。婦薦脯醢，亦宜有折俎。舅祭，卒爵，拜，婦荅拜。姑洗於北洗，酌，筵前北面酬婦，拜卒爵。婦北面於姑西荅拜。姑洗酌。婦北面拜受。姑北面拜送。姑復位。婦奠爵於薦左，復位。【增案：《義疏》云：「舅獻姑薦」，^③疏云：「舅獻姑酬，共成一獻。」^④下記亦云：「姑薦。」又云：「婦酢舅，更爵自薦。」則一饗而獻、酢、酬之節皆備也。據《鄉飲酒禮》，獻賓席前北面，酬則席前北面，賓酢主人則席前東南面，薦脯醢。此經第言一獻。至所謂酬者，考之於禮，主人酬賓則奠於薦右，《鄉飲酒禮》主人奠觶于薦西是也。賓及主人拜送後，賓乃奠於薦左，彼經所謂賓北面，奠觶于薦東是也。此經奠酬當亦合姑與婦言。姑奠在右，婦奠在左。酢則當有舅席，如婦見時所設。婦東南面送爵於舅，姑酬則無酢，故略之。」吳氏廷華云：「一日之間，行見舅姑禮，又行醴婦禮，又行饋舅姑禮，其禮亦甚繁，乃又以饗禮責其行，不但過勞，恐日亦不足，是當異日

① 「酬」，原作「酌」，今據《續清經解》本改。

② 「西」，原作「東」，今據上下文義改。

③ 「舅」上，《儀禮義疏》有「鄭注云」三字。

④ 「共」，原作「其」，今據《儀禮注疏》改。

爲之，不必強爲之說也。」舅姑先降自西階，婦降自阼階。授之室，使爲主，明代己。【疏】正義曰：賈疏云：「《曲禮》曰：『子事父母，升降不由阼階。』阼階是主人尊者升降之處。今舅姑降自西階，婦降自阼階，是授婦以室之事也。『授之室』，《昏義》文也。」案：舅姑同降自西階，亦舅先降三等，姑乃從之，中等，舅姑既降，婦乃降自阼階。歸婦俎于婦氏人。言俎，則饗禮有牲矣。婦氏人，丈夫送婦者。使有司歸以婦俎，當以反命於女之父母，明所得禮。【疏】正義曰：《通解》作「明得其禮」，《要義》作「明所得禮」。案：賈疏云「三牲是賓所當得」，則作「所」字爲是。《鄉射》注云：「遷設薦俎就乏，^①明己所得禮也。」亦是此意。○盛氏世佐云：「歸者，^②舅姑使有司授之俎，^③蓋特豚也。歸俎，饗賓之禮也。饗婦亦歸其俎者，亦所以厚禮之。」

右舅姑饗婦

舅饗送者以一獻之禮，酬以束錦。送者，女家有司也。爵至酬賓，又從之以束錦，所以相厚。古文「錦」皆作「帛」。【疏】正義曰：盛氏世佐云：「冠禮酬賓用

束帛儷皮。此不用帛，用錦送者，賤，宜下賓也。」注云

「女家有司」者，尊無送卑之法，士無臣，故知有司送之也。

云「古文『錦』皆作『帛』」者，胡氏承珙云：「敖氏云：『聘禮』使介行禮，用錦不用帛，辟主君之幣也。此無所辟，不當用錦，宜從古文。」^④案：昏禮用束帛，此酬用束錦，或亦辟昏禮之正歟？《小行人》合六幣，錦次帛，繡次錦，則差次可知。姑饗婦人送者，酬以束錦。婦人送者，隸子弟之妻妾。凡饗，速之。【疏】正義曰：凡饗，皆就館速之。若異邦，則贈丈夫送者以束錦。贈，送也。就賓館。【疏】正義曰：士卑，不嫌外娶，先儒俱有明說。敖氏以此例大夫，泥矣。贈錦又在酬錦外。丈夫送者贈以束錦，則婦人亦贈可知。不言婦人者，文略。注云「就賓館」者，贈賄之等皆就館，故知此亦就館也。李氏如圭云：「聘賓至郊而贈，^⑤故知此亦就其館也。」

①「乏」，原作「之」，今據《儀禮注疏》改。

②「歸」下，《儀禮集編》無「者」字。

③「使」，原作「是」，今據《儀禮集編》改。

④「文」，原脫，今據《儀禮古今文疏義》補。

⑤「賓」下，《儀禮集釋》有「去」字。

右饗送者

若舅姑既沒，則婦人三月乃奠菜。沒，終也。奠菜者，以筐祭菜也。蓋用葷。【疏】正義曰：奠菜，祭菜，殺於正祭。此所謂廟見也。婦人必舅姑授之室，使代己而後主祭祀。舅姑在，則降阼階時已受之舅姑，與祭可矣。若舅姑沒，則無所受矣，故於時祭之，先行廟見之禮，以明其職之所有所受，然後可以助祭也。必三月者，時祭無過三月，故以久者言之。若昏期近於時祭，則不必三月矣。下記言三月祭行，亦以廟見之後乃可以主祭也。江氏筠云：「賈疏引《曾子問》三月廟見云云，謂即彼祭於禩一也。《曾子問》孔疏則謂廟見奠菜、祭禩是一事。萬氏充宗云：『然則舅姑在者，高、曾、祖、禩之廟可以不見乎？觀《曾子問》又曰：女未廟見而死不遷於祖，不祔於皇姑。所以不遷不祔者，以未廟見也。曰祖、曰皇姑，則知廟見及高曾祖矣。』今案：《曾子問》所云廟見，是專指舅姑在者。其所云祭禩即此經之奠菜，指舅姑沒者。非謂舅姑沒者止行祭禩，而別無廟見，又非即祭禩爲廟見，如注疏家之說也。或曰：經既著奠菜之禮矣，何以不并著廟見之文？」

曰：經本詳初昏及夙興事，初不及三月而後，其言奠菜者，特以見舅姑禮及之，非主爲廟見致詳也。」褚氏寅亮云：「舅沒姑存，則當時見姑，亦三月廟見舅。若姑沒舅存，則婦人無廟可見，斯不行奠菜之禮矣。賈疏極分明。庾氏蔚之謂舅姑偏有沒者，見其存者，不須見亡者，豈禩廟可以不見乎？崔氏靈恩謂盟饋於存者，廟見於亡者，當舅見在，姑未有專廟，又何由而見乎？皆屬一偏之見。疏謂婦人無廟，以舅尚存，則權附於皇祖姑之廟耳。既入皇祖姑之廟矣，乃竟專見姑乎？事有難處，故姑沒舅存，斷以不見爲正。三月祭行，達禮也；三月祭菜，變禮也，不可混而爲一。孔穎達謂奠菜之禮，適婦乃得行之，庶婦則否矣。」席于廟奧，東面右几，席于北方，南面。席，考妣之席。北方，墉下。【疏】正義曰：賈疏云：《周禮·司几筵》云：「每敦一几。」鄭注云：「《周禮》雖合葬及時，同在殯，皆異几，體實不同。祭於廟同几，精氣合。」又《祭統》云：「設同几。」同几即同席。此即祭於廟中而別席者。此既廟見，若生時見舅姑，舅姑別席異面，是以今亦別席異面象生，不與常祭同也。」敖氏云：「右几，見席南上也。凡設几，例在席之上端，舅席東面而南上，姑席南面而西上，與生人室中之席，東面者北上，南面者東上，鬼神則變之。生

時見舅姑，舅不用几，此有之者，異其神也。姑席無几，几主於尊者也。」^①張氏爾岐云：「席於奧者，舅席也；席於北方者，姑席也。」祝盥，婦盥于門外。婦執筭菜，祝帥婦以入。祝告，稱婦之姓，曰：「某氏來婦，敢奠嘉菜于皇舅某子。」帥，道也。入，入室也。某氏者，齊女則曰姜氏，魯女則曰姬氏。來婦，言來爲婦。嘉，美也。皇，君也。【疏】正義曰：盛氏世佐云：「祝盥不言其處，如常祭可知也。婦盥于門外，著其異也。蓋祝先入，筭几於室中，降盥於阼階東南之洗，乃出廟門，帥婦以入也。賈疏謂祝盥亦於門外，非也。某子之解，敖說得之。蓋謂父爲大夫，子爲士者也。廟見祭類，故以生者爲斷。若其舅亦士也，當稱其字曰伯某甫矣。」胡氏匡衷云：「祝，接神之官。《論語》：『祝鮀治宗廟。』《樂記》：『宗祝辨乎宗廟之禮。』士得立廟，^②則有祝明矣。或曰：此祝贊婦廟見，當爲女奴曉事者，如《周禮》之女祝。」婦拜，扱地，坐奠菜于几東席上。還，又拜，如初。扱地，手至地也。婦人扱地，猶男子稽首。【疏】正義曰：吳氏廷華云：「『坐』，當爲『跪』。」盧氏弨弓曰：「李疑『東』字爲誤，蓋當言『北』。」○盛氏世佐云：「婦人拜法見於經

傳者五：曰肅拜。《少儀》云：「婦人吉事，雖君賜，肅拜。」是也。曰手拜。《少儀》注曰：「凶事乃手拜。」孔疏云：「婦人除爲喪主，其餘輕喪，凶事乃有手拜。」是也。曰稽顙。《喪服小記》云：「婦人爲夫、爲長子稽顙。」是也。曰頓首。《左傳》：「晉穆嬴抱太子以適趙氏，頓首于宣子。」是也。曰扱地，此奠菜禮是也。唯肅拜爲正，餘皆非吉禮。扱地之拜，蓋介乎吉凶之間，以致其哀敬之意歟？以男子九拜例之，肅拜，軍中之拜；手拜，蓋與空首相似，其法先以手至地，而頭來至手也；稽顙，即凶拜；頓首，是男子平敵相與之拜，而穆嬴施於其臣，疏家以爲私求法，非禮之正。然嬴遭襄公之喪，則亦凶拜也，殆如吉拜而後稽顙，爲殷之凶拜歟？扱地，於九拜無所似。賈疏謂以手至地而首不至手，又與空首不同。注云：「婦人扱地，猶男子稽首。」稽首，拜頭至地，臣拜君之拜。舉以相況者，明其爲拜中之最重，非謂拜法似之也。然則扱地與肅拜異，稽顙又與扱地異；手拜與扱地皆以手至地，而首或至手或不至手，亦異。熊氏謂初嫁及爲夫、爲長子主喪，則以手扱地。

① 「几」，原脫，今據《儀禮集說》補。

② 「立」，原作「三」，今據《續清經解》本改。

蓋考之未精矣！又案：肅拜之法，《周禮注》云：「肅拜，但俯下手，今時撻也。」疏引《鄉飲酒》注「推手曰揖，引手曰撻」爲證。《少儀》注云：「肅拜，拜低頭也。」若然，女子拜，蓋不折腰屈膝矣。郝氏謂男子坐拜，婦人立拜，故婦見舅姑手棗、栗、股脩，拜而後奠。若坐奠，必先奠後拜。此說得之。敖氏云：「凡婦人之拜，以左掌據地，故右手執物而可以拜。」殆未講乎肅拜之法歟？《特牲禮》：主婦致爵訖，酌酢，左執爵拜。則以左掌據地之說不辨自破矣。蓋扱地之拜，爲不逮事舅姑者設，將以生其哀慕之心焉，故與凶事手拜相似也。」案：婦拜，象拜送也。奠菜於几東席上，象受也。還又拜，象荅拜也。此禮與生時舅姑相似。張氏爾岐云：「此在奧之席。」凌氏廷堪《禮經釋例》曰：「《士昏禮》疏云：婦人肅拜爲正，今云扱地，則婦人之重拜也，猶男子之稽首，亦拜中之重，故以相況也。考《少儀》曰：『婦人，吉事雖有君賜，肅拜；爲尸坐，則不手拜，肅拜；爲喪主，則不手拜。』鄭注：『肅拜，拜低頭也。手拜，拜至地也。婦以肅拜爲正，凶事乃手拜耳。』是拜扱地即手拜之類，惟手拜用於凶事，扱地拜用於吉事爲異。蓋婦人之拜皆立，扱地始坐拜也。」婦降堂，取筭菜入。祝曰：「某氏來婦，敢告于皇姑某氏。」奠菜于

席，如初禮。降堂，階上也。室事交乎戶，今降堂者，敬也。於姑言敢告，舅尊於姑。【疏】正義曰：敖氏云：「入而北面也，祝亦在左，告之如初禮拜，^①而奠於席上之右，還又拜也。」盛氏世佐云：「姑之生也，婦不挾拜。今乃如見舅之禮者，接神之道宜然也。」張氏爾岐云：「此北方之席。」婦出，祝闔牖戶。凡牖門無事則閉之。【疏】正義曰：注云「牖門無事則閉」，賈疏云：「神尚幽也。先牖後戶，闔之次第也。啟則先戶而後牖矣。」老醴婦于房中，南面，如舅姑醴婦之禮。因於牖見禮之。【疏】正義曰：敖氏云：「不於堂，辟尊者在之處也。」張氏爾岐云：「亦象舅姑生時，因婦來見，遂禮之也。房中，廟之房中。」盛氏世佐云：「上云贊醴婦，贊即老也。以其助舅姑行禮，故曰贊。此無助，故直指其人言之。老，家臣之長，必有德而年高者爲之，故使之醴婦，所以代舅姑也。《特牲》、《少牢禮》有主婦與尸祝佐食賓獻酢致爵之事，古人行禮不以爲嫌也。又郝氏謂三月廟見，以夫婦共爲祭主，非以三月爲限也。苟未三月而及祭期，婦可以不與於

①「拜」，原脫，今據《儀禮集說》補。

祭乎？與於祭可以不先見乎？此皆臆說也。婦人三月然後祭行，未三月而及祭期，婦固不與也。以其未成婦也。」婿饗婦送者丈夫、婦人，如舅姑饗禮。

【疏】正義曰：盛氏世佐云：「《春秋》宣五年經：『高固及子叔姬來。』《左傳》云：『反馬也。』杜注：『禮，送女留其送馬，謙不敢自安。三月廟見，遣使反馬。』此士禮雖無反馬之事，然送女者則必俟其成婦而後歸，亦猶謙不敢自安之意也。舅姑存，則以昏之明日見於舅姑。舅姑禮之，婦禮成矣，送者可以歸矣。故舅姑於饗婦之後，即饗送者，不必三月也。若舅姑既沒，則必待三月廟見而後成婦。記云：『擇日而祭于禰，成婦之義也。』又云：『女未廟見而死，歸葬于女氏之黨，示未成婦也。』成婦而後送者乃可以歸，故經言壻饗送者於老醴婦之後，著其行禮之節也。敖氏云此禮宜行於始嫁之時，非也。且婦未受醴而先饗送者，亦失其先後尊卑之次矣。」

右舅姑沒婦廟見及饗婦饗送者之禮

記

士昏禮。凡行事必用昏昕，受諸禰廟，

辭無不腆，無辱。用昕，使者；用昏，壻也。腆，善也。賓不稱幣不善，主人不謝來辱。【疏】正義曰：昕，陽始也。昏，陰終也。受，讀如受命文考之受，謂命於禰廟，然後行事也，蓋據壻家言之。此為適士二廟者言，其祖禰共廟，雖受諸禰廟，終不得云禰廟。注云「賓不稱幣不善，主人不謝來辱」者，郝氏云：「腆，厚也。辱，汙也。以物贈人，自稱不腆，謙言薄也。賓至，主人稱辱，謙己汙也。男女匹合，不得言薄言汙，示誠信也。」顧氏曰：「婦妹，人之終始也。先王於此有省文尚質之意焉，故『辭無不腆，無辱』，『告之以直信』，曰『先人之禮』而已，所以立生民之本，而為嗣續之基。故以內心為主，而不尚乎文辭也，非徒以教婦德而已。」摯不用死，皮帛必可制。摯，鴈也。皮帛，儼皮束帛也。【疏】正義曰：摯，使者及壻所執以相見也。死，謂雉也。不用死，所以釋用鴈之義。此古人用幣之通法也。《郊特牲》謂「幣必誠」。《聘禮·記》：「幣美則沒禮。」或失之華靡，或失之濫惡，是皆不可制也。可制，則無二者之弊矣。腊必用鮮，魚用鮒，必殽全。殽全者，不餒敗，不剥傷。【疏】正義曰：《集釋》校云：「《說文》有『餒』無『餒』，云『餒，飢也』。一曰：魚敗曰餒。」

《五經文字》云：「餒，奴罪反，飢也。經典相承，別作餒爲飢餒字，以餒爲餒餉之餒，字書無文。」是也。」○褚氏寅亮云：「惟九鼎乃有鮮腊，今有之者，非攝盛也，直取其新耳，故賈疏以日新解之。」郝氏曰：「鮒，鯽魚，性相依附曰鮒。」殺全者，謂體備。盛氏世佐云：「殺全，謂豚俎也。殺，骨體也。全者，不折也。一骨分爲二曰折。《特牲》、《少牢禮》言俎之折者不一，是皆有殺而不全也。雖一體完矣，而二十一體不備，亦不可謂全。若同牢之俎，斯爲全耳。」

右記昏禮時地辭命用物

女子許嫁，笄而醴之，稱字。許嫁，已受納

徵禮也。笄女之禮，猶冠男也，使主婦、女賓執其禮。【疏】

正義曰：盛氏世佐云：「《雜記》曰：『女子許嫁，笄而字，雖

未許嫁，年二十而笄，禮之，婦人執其禮。』此敖氏之所本

也，然先儒之論二笄禮則異是。賀氏瑒謂許嫁者，主婦爲

之著笄，女賓以醴禮之；未許嫁而笄，婦人禮之，無女賓。

賈疏謂未許嫁而笄，無主婦、女賓，使婦人而已；又謂許嫁

者用醴禮之，未許嫁者當用酒醴之。朱子謂許嫁而笄，主

婦當戒外姻爲女賓，使之著笄而遂禮之；未許嫁者，則不

戒女賓，而自以家之諸婦行笄禮。諸說皆用鄭義。鄭注此

節云：「使主婦、女賓執其禮。」《雜記》云「言婦人執其禮，

明非許嫁之笄」，蓋以「禮之婦人執其禮」七字爲指未許嫁

者言，而敖則通上許嫁者爲一義，此其所以異也。詳《雜

記》文，敖說亦不爲無理，特其所謂未許嫁笄而不字者，後

許嫁，將復笄而字之乎？抑字而不復笄乎？敖意似謂古

女子皆二十笄而後許嫁，許嫁復笄而字，又與記文不合，是

則可疑矣。或曰：二笄禮同，笄而字亦同，惟有字而稱與

不稱爲異耳。」韋氏協夢云：「笄女之禮與冠子略同。冠子

若不醴，則醴用酒；女子之笄亦可以醴，與酒擇用之矣。

疏謂女子未許嫁而笄者始用酒，意雖別之於已許嫁者，而

不知其說之非也。蓋已許嫁與未許嫁，皆以醴飲之，以笄

加之，特有稱字、不稱字之分耳。」祖廟未毀，教于公

宮三月；若祖廟已毀，則教于宗室。祖廟，女

高祖爲君者之廟也。以有總麻之親，就尊者之宮，教以婦

德、婦言、婦容、婦功。宗室，大宗之家。【疏】正義曰：敖

氏云：「此據士族之貴者言也。祖，女所自出之君也。祖，

國君五廟，大祖之廟不毀，其餘先君若過高祖，則毀其廟而

遷之。未毀者，以其猶在今君四親廟之中也。其與君共大

祖者，若大祖去今君五世，廟雖不毀，其禮亦與既毀者同。

祖廟未毀而教於公宮，統於祖也；祖廟毀而教於宗室，統於宗也。」注云「以有總麻之親」者，賈疏云：「共承高祖，是四世總麻之親，若三世共曾祖者，是小功之親；共祖是大功之親；共禰廟是齊衰之親：則皆教於公宮。今直言總麻者，舉最疏而言。」云「教以婦德、婦言、婦容、婦功」者，《昏義》文，鄭彼注：「婦德，貞順也。婦言，辭令也。婦容，婉婉也。婦功，絲麻也。」云「大宗之家」者，《昏義》孔疏云：「大宗、小宗之家悉得教之，與大宗近者於大宗，與大宗遠者於小宗。」此說不若賈疏云：「不於小宗者，小宗卑故也。」若謂與國君絕服者教於大宗之家，大宗絕服者教於小宗之家。設有繼高祖之宗而與大宗絕服者，將於何教乎？教於大宗則已遠，教於己室是無統矣。此則孔說所不通也。褚氏寅亮云：「異姓亦有宗子之室，於彼教之。」

右記笄女教女之事

問名。主人受鴈，還，西面對，賓受命乃降。受鴈於兩楹間，南面，還於阼階上，對賓以女名。【疏】正義曰：敖氏云：「問名之儀，主人以賓升，西面；賓升自西階，東面。問名，主人阼階上北面再拜，進受鴈於楹

間，①還於阼階上，西面。賓亦還於西階上，②東面。主人對，賓受命，乃俱降也。」吳氏廷華云：「致命皆當阿，此時當亦如之。當阿，亦階上地，但入堂深耳。」

右記問名對賓之節

祭醴，始扱一祭，又扱再祭。賓右取脯，左奉之，乃歸執以反命。反命，謂使者問名、納吉、納徵、請期，還報於壻父。【疏】正義曰：凡祭醴之法皆如此。其記於此者，以問名諸禮皆醴賓故也。吳氏廷華云：「經『醴賓以醢，祭醴三』，此祭醴當指賓言，況下明言賓取脯，又言反命，其為賓之祭醴甚明。賈疏以贊醴婦言之，謬矣！至所謂『又扱再祭』者，據《廣韻》『再，仍也』，謂仍如始祭扱之，以至於三也。賈謂再祭分為二祭，非也。」

右記祭醴法

納徵。執皮，攝之，內文，兼執足，左

①「鴈」，原脫，今據《儀禮集說》補。

②「上」，原脫，今據《儀禮集說》補。

首。隨人，西上，參分庭一在南。攝，猶辟也。兼執足者，左手執前兩足，右手執後兩足。左首，象生。《曲禮》曰：「執禽者左首。」隨人，爲門中阼狹。西上，中庭位併。【疏】正義曰：敖氏云：「先儒讀攝爲摺，則訓疊也。今人屈物而疊之謂之摺。執皮攝之者，中屈其皮，疊而執之也。內文，兼執足攝之之法也。文，獸毛之文也。內文者，事未至也。左首，爲西上也。」云「隨人」者，以其並設，嫌亦並行也。西上，統於賓也。參分庭一在南者，參分庭深，而所立之處當其參分之一，故二分在北，一分在南也。此設皮之位亦當在西方。」注云「左首，象生」者，褚氏寅亮云：「注是也。非以西上故也，故《聘禮》則右首矣。」盛氏世佐云：「攝皮之位說見《聘禮》。敖云在西方，非是。」云「隨人，爲門中阼狹」者，賈疏云：「皮皆橫執之。《匠人》云：『廟門容大扃七個。』」注：「大扃，牛鼎之扃，長三尺。每扃爲一個，七個二丈一尺。」彼天子廟門，此士之廟門，降殺甚小，故云「門中阼狹」，隨人得並也。」賓致命，釋外足見文。主人受幣，士受皮者，自東出于後，自左受，遂坐攝皮，逆退，適東壁。賓致命，主人受幣，庭實所用爲節。士，謂若中士、下士不命者，

以主人爲官長也。自，由也。【疏】正義曰：敖氏云：「釋外足見文，所謂張皮也。見文者，事已至也。皮以文爲美，故當授受之節宣示之，他時則否。士謂主人之私臣，非指有爵者言也。自東，自門東而來也。士之私臣，其位在門東北面，後與左，皆據執皮者言也。受者居客之左，使其先執前，乃執後也。《聘禮》曰：「賓出，當之坐，攝之。」逆退在東者，先退由便也。此記與《聘禮》互見，當參考。」注云「賓致命，主人受幣，庭實所用爲節」者，賓堂上致命時執皮者庭中釋皮，外足見文。主人堂上受命時，主人屬吏受皮者自東方出執皮者之後，至其左，北面受之也。云「若中士、下士不命者，以主人爲官長」者，韋氏協夢云：「士謂主人之私臣及府史、胥、徒之屬。注以中士、下士當之，固非；而敖氏專指私臣言，亦未備。」

右記納徵庭實之節

父醴女而俟迎者，母南面于房外。女既次純衣，父醴之於房中。南面，蓋母薦焉，重昏禮也。女奠

① 「匠」，原作「近」，今據《儀禮注疏》改。

爵於薦東，立於位而俟壻。壻至，父出，使擯者請事；母出南面房外，示親授壻，且當戒女也。【疏】正義曰：注云「蓋母薦焉」者，賈疏云：「舅姑共饗婦，姑薦脯醢，故知父母醢女，亦母薦脯醢。」云「莫爵於薦東」者，《士冠》「禮子與醢子及此篇醢賓、禮婦，皆莫爵於薦東，明此亦莫爵薦東也。女出于母左，父西面戒之，必有正焉，若衣、若笄。母戒諸西階上，不降。必有正焉者，以託戒，使不忘。【疏】正義曰：「不」，敖氏《集釋》作「勿」。○賈疏云：「母出房戶西，南面，女出房西行，故云『出于母左』；父在阼階上，西面，故因而戒之。母戒諸西階上者，母初立房西，女出房，母行至西階上，乃戒之也。」注云「必有正焉」者，盛氏世佐云：「以物爲憑曰正。母施衿結帨，庶母施鞶，皆謂以物與之，則此衣若笄，亦父戒時予女，使服之，識而弗忘也。」

右記父母授女

婦乘以几，從者二人坐持几相對。持几

者，重慎之。【疏】正義曰：賈疏云：「王后則履石，大夫、諸侯亦應有物履之，但無文。今人猶用臺。」盛氏世佐云：

「從者二人，蓋夫家之從者。跪而持之者，几卑故也。相對，各持其几之一端也。」

右記婦升車法

婦入寢門，贊者徹尊罍，酌玄酒，三屬于尊，棄餘水于堂下階間，加勺。屬，注也。玄酒，泔水貴新；昏禮又貴新，故事至乃取之，三注於尊中。

【疏】正義曰：敖氏曰：「云酌，則以勺也。棄餘水者，不欲人褻用之也。徹罍加勺，兼指二尊而言。」吳氏廷華云：《周禮·酒正》疏云：「若五齊加明水，三酒加玄酒，爲十六尊。」蓋以五齊各有一明水之尊，三酒各有一玄酒之尊也。《司尊彝》疏云：「雞彝盛明水，鳥彝盛鬱鬯。五齊、三酒并配尊，則尊有十八。」是以《酒正》疏十六尊，又增出玄酒、鬱鬯二尊，爲十八尊也。十八尊中正尊與配尊各九，即此疏配尊等說也。案：《郊特牲》只有「齊加明水」，無三酒加玄酒之文。泔，所謂加明水，不過如《禮運》所謂「玄酒在室」，①「醴醑在戶」。蓋於五齊之外別加一明水之尊，非謂

①「室」，原作「堂」，今據阮刻《禮記注疏》改

五齊各有一明水之尊也。又據彼文云「明水洗之」，似五齊各有一明水以洗之，不知五齊雖有異同，而明水則一，何必分而爲五？且據《司尊彝》疏「鬱鬯用五齊，五齊用三酒，三酒用水」，此蓋爲說清說醴言之。如其說，亦止三酒用水，與鬱鬯五齊何涉？此賈疏復舉以爲說，謬矣。」

右記注玄酒之節

筭，緇被纁裏，加于橋。舅荅拜，宰徹筭。被，表也。筭有衣者，婦見舅姑，以飾爲敬。橋，所以

廢筭，其制未聞。今文「橋」爲「鎬」。【疏】正義曰：盛氏世佐云：「橋制，漢時已不可考，無論後世。晁《圖》云：『舊圖云：讀如橋舉之橋，以木爲之，似今之步案，高五尺，下跗午貫，舉筭處亦午爲之。此則漢法也。』郝氏曰：『橋，筭蓋曲起如橋，以被覆其上，奉以進。《曲禮》：奉席如橋衡。《聘禮》：勞以二竹簠方，玄被纁裏，有蓋，其實棗栗。與此同。』二說不同，請以經文折之。經云「加于橋」，則所以廢筭也，當從注。云筭蓋者，非也。字从木，則以木爲之，當從圖。命名之義，或取其狀相似，則如橋之說亦未可盡廢，特其所稱橋衡之義亦與鄭異。鄭注《曲禮》云：「橋，井上

櫟梓。」注云「今文「橋」爲「鎬」者，胡氏承珙云：『《說文》：「橋，水梁也。」橋之本義爲橋梁。古者井上櫟梓亦名橋，《曲禮》「奉席如橋衡」是也。此橋所以廢筭，鄭雖云「其制未聞」，然作「橋」於義爲近。若鎬爲罍器，與此無涉，故不從古文。』

右記筭飾及受筭之節

婦席薦饌于房。醴婦，饗婦之席薦也。【疏】正

義曰：賈疏云：「醴婦時惟席與薦，無俎；其饗婦非直有席薦，並有俎。俎則不饌於房，從鼎升於俎，入設於席前。今據醴婦時同有席與薦饌於房中者言也。」盛氏世佐曰：「經但云「席于戶牖間」，而不見席未設時所陳處；但云「側尊甒醴于房中」，而不見薦所陳處，故記之。薦，謂脯醢也。冠禮筵在南，尊在北，籩豆次尊，南上。此宜亦如之。未設時，先饌于房；及其設之，則席在舅姑寢堂上客位，脯醢設於席前，饗婦之位同，注說是也。」饗婦，姑薦焉。舅姑共饗婦，舅獻爵，姑薦脯醢。【疏】正義曰：賈疏云：「經直云舅姑共饗婦以一獻之禮，不言姑薦，故記之。」婦洗在北堂，直室東隅，筐在東，北面盥。洗在北

堂，所謂北洗。北堂，房中半以北。洗南北直室東隅，東西直房戶與隅間。【疏】正義曰：賈疏云：「房與室相連爲之，房無北壁，故得北堂之名。知房無北戶者，見上文「尊于房戶之東」，房有南戶矣。《燕禮》、《大射》皆云羞膳者升自北階，立于房中，不言入房，是無北壁而無戶，是以得設洗直室東隅也。」敖氏云：「室之東隅有二，云「在北堂」，故無嫌於南。筐盛爵、觶，爲婦酢姑酬也。庭中設洗，水在洗東，筐在洗西。此筐在洗東，則水在洗西矣。盥，爲將洗爵以酬舅也，無嫌於不洗，故惟以盥見之。此洗，內洗也，亦曰北洗。凡其設之與盥者之位，皆如此。記主爲婦禮發之，故惟云婦洗。」盛氏世佐曰：「古宮廟之制，楊氏《儀禮旁通圖》最分明，惟北堂之說略焉。今以禮家言，推大夫、士屋皆兩下五架，正中曰棟，棟南兩架爲楣、爲廡，皆堂也。棟北兩架，西爲室，東爲房。室與房之南皆有壁、有戶、有牖，室北有牆，謂之北墉。房北無牆，故名其半以北曰北堂，婦洗設於此。云「直室東隅」者，明其在房之西偏也。謂天子、諸侯有左右房，大夫、士惟有東房西室者，此鄭義也。陳氏祥道謂大夫、士之房室與天子、諸侯相同，非也。」

婦酢舅，更爵，自薦。更爵，男女不相因也。【疏】正義曰：更爵者，不敢用舅獻己之爵爲己飲而褻也。自薦

者，爲姑親薦己，故不敢使人薦舅，行禮欲其稱也。不敢辭洗，舅降則辟于房，不敢拜洗。不敢與尊者爲禮。【疏】正義曰：此謂舅將獻婦之時也。舅降，謂降洗也。婦辟于房者，既不從降，又不敢安於堂上，故宜辟也。張氏爾岐云：「辭洗，拜洗，賓主敵者之禮，婦於舅則不敢也。」凡婦人相饗無降。姑饗婦人送者於房，無降者，以北洗，筐在上。【疏】正義曰：敖氏云：「此謂姑饗婦人送者，與舅沒而姑存饗婦者也，故以「凡」言之。言婦人相饗無降，明男女相饗則有降者，如上記所謂舅降是也。」

右記醴婦饗婦饌具儀節

婦入三月，然後祭行。入夫之室三月之後，於祭乃行，謂助祭也。【疏】正義曰：程氏瑤田云：「助祭自兼適婦、庶婦言，賈疏惟指適婦，未備。若三月廟見，則惟適婦以廟見奠菜象盥饋，庶婦不饋，則亦不奠菜也。」韋氏協夢云：「祭謂四時常祭，祭行謂至是遇有祭事，①婦乃

①「事」，原作「祀」，今據《儀禮蠡測》改。

行也。若然，則三月之前雖有祭事，婦亦不行與？^①不行者，未成婦也。」盛氏世佐云：「《特牲》、《少牢禮》婦人助祭者，內賓，宗婦皆與，此不專指適婦。若謂助夫祭爲主婦，必舅姑既沒，或「老而傳」者乃得謂之。^②舅在無姑，仍不得爲主婦也。」敖氏知此禮該舅姑之存沒，而不兼庶婦言，亦未爲備。」

右記婦助祭之期

庶婦則使人醺之，婦不饋。庶婦，庶子之婦也。使人醺之，不饗也。酒不酬酢曰醺，亦有脯醢。適婦，酌之以醴，尊之；庶婦，酌之以酒，卑之，其儀則同。不饋者，共養統於適也。【疏】正義曰：褚氏寅亮云：「醴適婦與醴適子同，則醴庶婦與醴庶子位在房外南面矣。敖氏疑此席亦在戶間，非也。」張氏爾岐云：「亦昏之明日，婦見舅姑時，因使人醺之於房外之西，如醴婦之儀。婦不饋，則舅姑亦不饗也。」盛氏世佐云：「或疑醴禮亦行於見舅姑之日。斯時房外之位，姑實在焉，豈庶婦見舅姑其位亦異於適歟？曰：非也。上文贊醴婦時，舅姑尚在阼與房外之位。醴畢乃入室，若親醴之然，所以尊適也。此云「使人醺之」，

則舅姑早入於室矣，無妨席於房外也。人亦室老也，舅姑不在其位，故不云贊。」注云「酒不酬酢曰醺者，亦如庶子醺然。知亦有脯醢者，以饗婦，醢子皆有脯醢也。云「其儀則同」者，適婦用醴於客位，東面拜受，醴贊者，北面拜送。今庶婦雖於房外之西者，亦東面拜受，醢者亦北面拜送也。」

右記庶婦禮之不同於適婦者

昏辭曰：「吾子有惠，貺室某也。」昏辭，擯者請事告之辭。吾子，謂女父也。稱「有惠」，明下達貺，賜也。室，猶妻也。「子謂公冶長：「可妻也。」某，壻名。【疏】正義曰：賈疏云：壻家舊已有辭，女家見許，故今得言貺室。若然，則納采之前固有行媒，以合二姓之好矣！經不具者，以不在六禮之內也。某有先人之禮，使某也請納采。某，壻父名也。某也，使名也。【疏】正義曰：「使」下，敖氏有「此」字。○案：行禮而推本於先人，示不敢自爲主也。對曰：「某之子蠢愚，

① 「與」，原脫，今據《儀禮蠡測》補。

② 「謂」，原作「爲」，今據《儀禮集編》改。

又弗能教。吾子命之，某不敢辭。」對曰者，擯出納賓之辭。某，女父名也。吾子，謂使者。今文「弗」爲「不」，無「能」字。【疏】正義曰：徐本、《集釋》、《通解》俱作「今文弗爲不」者，胡氏承珙云：「下文納吉對曰：『某之子不教。』蓋至納吉，則事已定而情彌親，故其辭徑遂；此納采，則禮初行而情未愜，故其辭微婉耳。」致命曰：「敢納采。」【疏】正義曰：賈疏云：「此使者升堂致命於主人辭，亦當有主人對辭，如納徵。不言之者，文不具也。」敖氏云：「此不言對，則是主人惟拜而已。」

右納采之辭

問名曰：「某既受命，將加諸卜，敢請女爲誰氏？」某，使者名也。誰氏者，謙也，不必其主人之女。【疏】正義曰：某，壻父名。言壻父既受主人之命，將加之於卜，敢請女爲誰氏也。注以某爲使者名，加卜豈使者事乎？盛氏世佐云：「古人有姓有氏，姓如姬、姜之類，氏如叔孫、季孫之類。男子惟稱氏，婦人恒稱姓。《記》云『幼名，冠字，五十以伯仲』，男子之禮也。婦人既笄之後，即以伯仲爲字而稱之，皆與男子異，故以姓配伯仲，婦人之

通稱。問有以姓配氏者，如欒黶之妻曰欒祁、郭偃之妻曰東郭姜之類。蓋傳者以此相別耳，非常稱也。婦人之氏有二種，而姓氏之氏不與焉：一則以姓爲氏，如曰姬氏、姜氏是也；一則以字爲氏，如《詩》所稱戴嬀、大任皆曰仲氏是也。上云「某氏來婦」，某，姓也；此云「女爲誰氏」，誰，字也。禮本問名，辭乃問字者，使者不敢斥言，主人則直告以女名矣。若女之姓氏於媒氏傳言時已知之，何必問邪？注誤以問名爲問姓，嫌於知而復問，故以謙不必其主人之女解之，非也。①疏家主於護注，遂創爲名有二種之說。此皆泥於婦人不以名行之故耳。夫不以名行者，特以婦人無外事，故名不聞於人，非謂有名而不稱也。昭二十七年《左傳》云：「請以重見。」是婦人稱名之例矣。《周禮·媒氏》云：「凡男女自成名以上，皆書歲月日名焉。」記云：「男女非有行媒，不相知名。」然則女子未字以前，其名不出於梱，惟媒氏知之，而男家則猶待也。姜氏亦知注疏之誤，而其說以問名爲問字，亦未爲得；又不駁注「不必其主人之女」云，即收養爲己女亦當姓主人之姓，豈有養女仍以本姓姓之而待請其姓？此尤非也。男女辨姓，收養之女不

①「非也」，《儀禮集編》作「真曲說也」。

必不以本姓姓之。不知其姓，當以實告男家而使卜之，如「買妾不知其姓，則卜之」之例，豈得冒己之姓而或犯同姓爲昏之厲禁哉？然其告之也，亦當於媒氏傳言之時，不待

納采後尚煩男家之問。此注說所以難通也。《昏義》孔疏云「問名者，^①問其女之所生母之姓名；云「爲誰氏」，言女之母何姓氏也」，亦非。問女名，將以卜之也。問女母之姓名何爲哉？

又案：此辭及下文「吾子有命」以下至「某不敢辭」，皆實在廟門外與擯者對荅之辭，即經所謂「擯者出請。賓執鴈，請問名，主人許」者也。賓致命於堂，當曰敢問名，主人則直以女名對之，即上記所謂「主人受鴈，還，西面對」者也。疏以此爲致命之辭，張氏謂告擯者之辭當亦不異，今皆不取。敖說近是，而謂致命亦當云敢請女爲誰氏，恐非也。不敢斥言而云誰氏者，使者之辭。直云問名者，壻父之命，自納采以至請期，致命之辭俱相似，故記於納采，納徵見其例，而餘則略之。」對曰：「吾子有命，且以備數而擇之，某不敢辭。」卒曰某氏，不記之者，明爲主人之女。【疏】正義曰：命，謂問女名也。備數而擇之，若曰不專采己女然，謙也。褚氏寅亮云：「賓之辭，若不必爲主人之女，主人之辭，若猶有他姓與男氏議昏者，無其事而設其辭，皆謙退，不敢質言也。」注云

「不記之者，明爲主人之女」者，言主人雖對以己女之氏，而記者以其可知而不記耳！

右問名之辭

醴曰：「子爲事，故至于某之室。某有先人之禮，請醴從者。」言從者，謙不敢斥也。今文

「於」爲「于」。【疏】正義曰：注云「今文「於」爲「于」者」，^②胡氏承珙云：「《說文》：「于，於也。象氣之舒。」段氏玉裁云：「於者，古文烏也。」烏下云：「孔子曰：烏乎呼也。取其助氣，故以爲烏呼。」然則以於釋于，亦取其助氣。《釋詁》、《毛傳》亦云：「于，於也。」凡《詩》、《書》用「于」字，凡《論語》用「於」字，蓋「于」、「於」二字在周時爲古今字，故《釋詁》、《毛傳》以今字釋古字也。此字蓋古文之後出者，此字既出，則又「于」、「於」爲古今字。凡經多用「于」，凡傳多用「於」。鄭於《昏禮》、《大射儀》從古文作「於」，「既夕」

① 「昏」上，《儀禮集編》有「若」字。

② 「注云今文於爲于者」，原在「胡氏承珙云」之後，今據《儀禮古今文疏義》內容及《儀禮正義》體例改。

③ 「烏」，原作「於」，今據《儀禮古今文疏義》改。

記》又從古文作「于」者，正欲見古文二字已通用耳。」對曰：「某既得將事矣，敢辭。」將，行。【疏】正義曰：禮辭也。「先人之禮，敢固以請。」主人辭固，如故。【疏】正義曰：此及下主人又請之之辭，言先人，見不可辭。固，請之堅也。「某辭不得命，敢不從也。」賓辭也。不得命者，不得辭己之命。【疏】正義曰：徐、陳、《集釋》、《通解》、楊、敖「辭己之命」「辭」俱作「許」。○此及下，使者又荅也。敖氏云：「此皆擯者傳賓主之辭，即經所謂『請禮賓，賓禮辭，許』者也。」

右禮賓之辭

納吉曰：「吾子有貺命，某加諸卜。占曰吉，使某也敢告。」貺，賜也。賜命，謂許以女名也。某，壻父名。【疏】正義曰：盛氏世佐云：「賈疏於『貺』字絕句，非。」對曰：「某之子不教，惟恐弗堪。子有吉，我與在，某不敢辭。」與，猶兼也。古文「與」爲「豫」。【疏】正義曰：賈疏云：「我與在，以其夫婦一體，夫既得吉，婦吉可知，故云我兼在占吉中也。」

注云「古文『與』爲『豫』者，胡氏承珙云：『與，正字；豫，古文假借字。』」

右納吉之辭

納徵曰：「吾子有嘉命，貺室某也。某有先人之禮，儷皮束帛，使某也請納徵。」致命曰：「某敢納徵。」對曰：「吾子順先典，貺某重禮。某不敢辭，敢不承命。」典，常也，法也。【疏】正義曰：儷皮束帛，所謂「先人之禮」也。納采之屬，不言行禮物者，鴈特執以將命，非幣帛之可比也。盛氏世佐云：「致命之辭，①宜在『敢不承命』之後。」對曰吾子順先典云云，當在「致命曰某敢納徵」之上。」

右納徵之辭

請期曰：「吾子有賜命，某既申受命矣。惟是三族之不虞，使某也請吉日。」三族，謂父

①「致」上，《儀禮集編》有「敖氏曰」三字。

昆弟、己昆弟、子昆弟。虞，度也。不億度，謂卒有死喪，此三族者，己及子皆爲服期，^①期服則踰年，欲及今之吉也。

《雜記》曰：「大功之末，可以冠子、嫁子。」【疏】正義曰：申受命者，自納采以來每度受命也。王氏引之云：「卒有死喪不測之患，則不得嫁娶矣，何以請吉日？」若豫料將來，則又與「惟是」之文不合。案：不，無也。虞，憂也。無憂，謂無死喪也。三族無死喪，則可行嘉禮，故惟用此三族無虞之時請吉日也。此與《萃》象傳之「戒不虞」、^②《左傳》之「備其不虞」異訓。彼謂不億度，此謂無憂患也。」對曰：

「某既前受命矣，惟命是聽。」前受命者，申前事也。【疏】正義曰：張氏爾岐云：「主人以期當自壻家來，故辭之。」曰：「某命某聽命于吾子。」曰某，壻父名也。對曰：「某固惟命是聽。」使者曰：「某使某受命，吾子不許，某敢不告期？」曰某日。某，吉日之甲乙。【疏】正義曰：使者來時本受吉期於壻父，初執謙以請之，此乃因其固辭而告之也。對

曰：「某敢不敬須？」須，待也。【疏】正義曰：盛氏世佐曰：「此節，張氏謂皆賓與主人面相往復之詞；敖氏

則以「吾子有賜命」以下至「某敢不告期」爲擯者所傳，^③

「曰某日」以下方屬堂上往復之辭：二說俱未安。謂皆堂上致命之辭，則失卻擯者傳言一段；如敖氏說，又未免割裂之病。蓋此辭皆使者在門外與擯者所往復者也。其致命於堂，當曰「敢請期」，而主人亦惟拜命而已。不於堂告期者，以在門外已告也。仍曰請期者，以壻父之命本欲使者請女氏示期，所謂「某命某聽命於吾子」也。若於堂上直告之曰某日，豈得爲致命乎？故以吉日私告擯者而致命，仍曰「敢請期」，斯於情文兩得矣。不記之者，如上文納吉辭之例也。又案：昏辭，凡使者稱吾子皆謂女父也，擯者稱吾子皆謂壻父也。注以擯辭之吾子爲指使者，其餘尚可強通；納徵對曰「吾子順先典」，則不可通矣。使者明云某有先人之禮，而對辭乃謂使者順先典，是以重禮之貺爲出於使者矣，其可乎？或疑向使者不合稱壻父爲吾子，然使者之稱吾子亦非面女父之辭也。況壻父是使命所自出，女

①「爲」，原作「謂」，今據《儀禮注疏》改。

②「不」，原脫，今據《經義述聞》補。

③「不」，原脫，今據《儀禮集編》補。

家顧無一辭及之，豈理也哉？^①惟禮辭曰：子爲事故之子，指使者言。納吉對曰「子有吉」，亦指使者，而意則不專指使者，猶下言「我與在」，雖爲擯者自我而意亦不專擯者也。何以知擯者自我也？凡擯者稱女父皆稱其名，此不云某而云我，則非指女父矣。何以不稱「吾子有吉，某與在」也？吉不專在壻，女之父也，二姓之人皆在吉中，而使與擯周旋其間，樂其事之有成者，亦與有榮焉。曰子、曰我，舉情之疏者，而戚者可知也。問名曰「某既受命，將加諸卜」，注以以某爲使者名，亦非也。此與「某加諸卜」、「某既申受命矣」兩處語意相似，「某」字皆當指壻父名。時雖未反命而使已受命，即如壻父親受命矣。「將加諸卜」，不可謂使者卜也。一使兼行二禮，皆出自壻父之命，故辭必稟之。「某敢納徵」之「某」亦當指壻父名，以此是致壻父之命也。」

右請期之辭

凡使者歸，反命曰：「某既得將事矣，敢以禮告。」主人曰：「聞命矣。」告禮所執脯。【疏】

正義曰：《通典》無「告」字。玩賈疏意，似亦無「告」字。○

張氏爾岐云：「凡者，五禮使者皆然。」注云「告禮所執脯」者，盛氏世佐云：「上記云『賓右取脯，左奉之，乃歸執以反命』，則知此禮是謂所執脯矣。蓋以己之得禮，明不辱命也。至其在女家交際之儀，酬荅之辭，自當一一述於主人，而記者則不及詳。敖氏謂禮即女家所受納采，問名之類，不若注說之安也。」

右使者反命之辭

父醮子。子，壻也。【疏】正義曰：男言醮，女言醴，互文也。取婦以承祭，故重其禮，亦應在廟，與醴女同。賈疏以不言神位，故知其不在寢，未免穿鑿。命之辭

曰：「往迎爾相，承我宗事。相，助也。宗事，宗廟之事。」【疏】正義曰：爾相，謂婦也。《祭統·記》國君取夫人之辭，而曰「此求助之本」，故謂婦爲相。承我宗事，即《昏義》所云「上以事宗廟，而下以繼後世」也。勛帥以敬，先妣之嗣，若則有常。」勛，勉也。若，猶女也。勛帥婦道以敬其爲先妣之嗣，女之行則當有常，深戒之。

① 「理」，原作「禮」，今據《儀禮集編》改。

《詩》云：「大姒嗣徽音。」【疏】正義曰：張淳云：「《釋文》作『帥道』，當云『勉帥道婦』。」張氏之說是也。帥之訓道，上文已具，故此不復言，但疊『帥道』二字以見義。○張氏爾岐云：「當四字爲句，事、嗣叶，相、常首尾叶。」敖氏讀「勛帥以敬」爲句，「先妣之嗣」爲句，言：「女當勉帥之以敬，彼能敬則盡婦道，而可以嗣續我先妣之事矣。」王氏引之曰：「敖說是矣而未盡也。之，是也。言當勉帥以敬，惟先妣是嗣也。」《大雅·江漢》篇「召公是似」文義與此同。^①傳曰：「似，嗣也。」經文以「事」、「嗣」爲韻，「若則有常」句不入韻。《士冠禮》醴辭：「禮儀既備，令月吉日。昭告爾字，爰字孔嘉。髦士攸宜，宜之于假。永受保之。」「備」字爲韻，「嘉」、「宜」爲韻，末二句不入韻，是其例也。顧氏《詩本音》謂「相」、「常」爲韻，非是。子曰：「諾，惟恐弗堪，不敢忘命。」【疏】正義曰：敖氏云：「堪，任也。惟恐不任帥以敬之事，蓋謙恭之辭。子既對，乃拜受禪。」

右父醢子辭

賓至，擯者請，對曰：「吾子命某，以茲初昏，使某將，請承命。」賓，婿也。「命某」，「某」，

婿父名。茲，此也。將，行也。使某行昏禮來迎。【疏】正義曰：吾子，謂女父。某，婿父也。命，上「敢不敬須」之命也。親迎而曰承命，立言之法也。對曰：「某固敬具以須。」【疏】正義曰：承上請期答辭，故曰固。

右親迎至門告擯者辭

父送女，命之曰：「戒之敬之，夙夜毋違命。」夙，早也。早起夜臥。命，舅姑之教命。古文「毋」爲「無」。【疏】正義曰：「毋」，陳、閩、監本俱誤作「母」。凡他篇「毋」字，此本亦有誤作「母」者，可以義求之。○張氏爾岐云：「即記云『父西面戒之，必有正焉』之辭。」盛氏世佐云：「賈疏云：『父戒之，使無違舅命；母戒之，使無違姑命，故父云命，母云戒』；此注有『姑』字者，傳寫誤也；下文『宮事』，謂姑命婦之事。此說似泥。命，謂舅姑之命，注中『姑』字非衍也。宮事，謂凡宮中之事，不可違夫命也。《孟子》載母戒女辭曰『無違夫子』，與此記互相發矣。」^②

^① 「江」，原作「河」，今據《經義述聞》改。

^② 「與」上，《儀禮集編》有「堪」字。

注云「古文『毋』爲『無』者，賈疏謂《說文》毋爲禁辭，故從今文『毋』爲正也。母施衿結帨，曰：「勉之敬

之，夙夜無違宮事。」帨，佩巾。【疏】正義曰：張氏

爾岐云：「即前記云『母戒諸西階上』之辭。衿，衣小帶，一

云衣領。」盛氏世佐云：「衿，注疏無明文。《內則》注：

「衿，猶結也。」又與此義不合。張說蓋用《說文注》及《詩

傳》。《漢書注》應劭曰：「衿，帶也。」竊疑此說於此義稍

近，蓋施帶於身而結巾於帶，^①以爲識也。」庶母及門

內，施鞶，申之以父母之命，命之曰：「敬恭

聽，宗爾父母之言。夙夜無愆，視諸衿

鞶！」庶母，父之妾也。鞶，鞶囊也。男鞶革，女鞶絲，所

以盛帨巾之屬，爲謹敬。申，重也。宗，尊也。愆，過也。

諸，之也。示之以衿鞶者，皆託戒使識之也。不示之以衣、

笄者，尊者之戒，不嫌忘之。「視」乃正字，今文作「示」，俗

誤行之。【疏】正義曰：門內，廟門之內也。庶母位在下，

故送之及門內。張氏爾岐云：「鞶，大帶。其訓囊者，从糸

不从革。視諸衿鞶者，教以見衿鞶，即憶父母之言也。」盛

氏世佐云：「以鞶爲囊者，鄭義也。杜注《左傳》，以爲紳

帶，一名大帶。賈、服皆與杜同。《說文》亦云：「大帶也。」

孔疏每曲鄭而直杜，以《易·訟》之「上九，或錫之鞶帶」，知鞶即帶也。《左傳疏》又以《內則》「繫衾」之繫亦當爲帶，然

「繫」字从糸，「鞶」字从革，則一爲囊，一爲帶，自屬兩義。

張說近得其實。上文母施衿，愚既以帶解之矣。此鞶又爲

帶者，丈夫之帶有二：一爲大帶，以束衣；一爲革帶，以佩

韞玉之等。婦帶應如之。鞶爲大帶，則衿猶丈夫之革帶

歟？知衿非衣小帶者，小帶散在於衣，非總束其身，且非

所用以佩物也。凡佩繫於革帶，故施衿則結帨以爲之佩。

抑猶有疑焉者，《玉藻》論大帶之制，自天子以至於士，皆以

絲爲之。而《內則》云「男鞶革，女鞶絲」，是杜意爲不可通

矣。意者，《內則》之「鞶」當作「繫」，所謂「小囊盛帨巾者」

也。《易》與《春秋傳》之「鞶」則如字，而爲大帶之別名，與

《內則》所論男女幼小時飾，《易》、《春秋傳》所陳命服之飾，

其指不同也。或曰：此記之鞶，鄭義亦可通。蓋母爲之結

帨，而庶母施囊以盛之也。鞶與繫古通用。」注云「視」

乃正字，今文作「示」，俗誤行之者，胡氏承珙云：「賈疏

云：《曲禮》云：「幼子常視毋誑。」注云：「視，今之示字。彼

注破从示，此注以視爲正字，以示爲俗誤。不同者，但古文

①「蓋」，原作「而」，今據《儀禮集編》改。

字少，故眼目視瞻與以物示人者皆作視字，故此注云視乃正字，今人作示，是俗人以今示解古視，故云誤也。彼注云視，今之示字者，以今曉古，故舉今文示而言，兩注相兼乃具也。『承琪案：《小雅》：「視民不佻。」箋云：「視，今示字。《曲禮》注云：「視，今之示字。」謂此「視」字即今人所用之「示」字。古人正作「視」，不作「示」耳。孔疏云：「鄭注經中視字者，是今之以物示人之示也。是舉今以辨古。」此說得之。賈疏謂《曲禮》注破「視」從「示」，非也。』

右父母送女戒命之辭

壻授綬，姆辭曰：「未教，不足與禮也。」

姆，教人者。【疏】正義曰：經文十四字，唐石經、徐本、《集釋》、《通解》皆有。注四字，徐本、《集釋》、《通解》、楊氏皆有。今本經注俱脫。

右姆辭壻授綬之辭

宗子無父，母命之。親皆沒，己躬命

之。宗子者，適長子也。命之，命使者。母命之，在《春秋》「紀裂繻來逆女」是也。躬，猶親也。親命之，則「宋公

使公孫壽來納幣」是也。言宗子無父，是有有父者。禮，七十老而傳，八十齊喪之事弗及。若是者，子代其父為宗子。其取也，父命之。【疏】正義曰：張氏爾岐云：「此請期以上五禮皆命使者行，^①故言使命所出必自其父。若無父者，則母命之。母命之者，亦但命子之父兄、師友使之命使，不得稱母命以通使也。親皆沒，不得已乃親命之，所以養廉遠恥也。」盛氏世佐云：「母命之者，母使子之諸父兄

命五禮之使者，親迎則命其子，^②昏辭皆稱母所使出命者之名也。雖有諸父諸兄，不敢擅為昏主，必待母命而後為之，尊大宗也。母沒，則族人無敢主其昏矣，故己躬命之。

躬命之者，躬命五禮之使者；^③親迎則告之於禰，而其辭皆稱壻名也。《說苑》載諸侯親迎之辭，直稱某國寡小君使寡人云云，而嫁女之國亦女母夫人對，是婦人得與外事矣。又言諸侯以至士，庶人親迎皆用屨，或三兩、二兩，而以所加琮與束脩為異。無用鴈者，亦與此經不合。蓋雜取諸書所成，未可盡信也。昏禮當使同姓主之。《公羊傳》云：

①「行」下，《儀禮鄭注句讀》有「之」字。

②「則」下，原衍「使」字，今據《儀禮集編》刪。

③「躬命」，原作「親迎」，今據《續清經解》本改。

「稱諸父兄、師友。」①《說苑》載大夫、士昏辭亦曰：「某之父、某之師友。」師友異姓，而與父兄並稱，恐未安。」注云「母命之，在《春秋》、《紀裂繻來逆女》」者，隱二年經書「秋九月，紀裂繻來逆女」，《公羊傳》：「裂繻者何？紀大夫也。何以不稱使？昏禮不稱主人。」何休云：「為養廉遠恥也。」又云：「然則曷稱？稱諸父兄、師友。宋公使公孫壽來納幣，則其稱主人何？辭窮也。辭窮者，無母也。」何注云：「禮有母，母當命諸父兄、師友，稱諸父兄、師友以行。宋公無母，莫使命之。辭窮，故自命之。自命之，則不得不稱使。」又云：「然則紀有母乎？曰有。有則何以不稱母？母不通也。」何注云：「禮，婦人無外事，但得命諸父兄、師友，稱諸父兄、師友以行耳。母命不得達，故不得稱母通使，又所以遠別也。」服注亦云：「不稱主人，母命不通，故稱使。」褚氏寅亮云：「命與親迎，各不相蒙。」②《集說》言父沒則無醮而命之之人，故不可親迎。固哉！《哀公問》：「諸侯當冕而親迎。」既繼世而為諸侯，無父可知，而必親迎，則親迎豈以父存沒而異？下記云「不親迎」，④謂或有事故及疾，不得親迎之等，非必指父沒者而言也。「支子則稱其宗。」支子，庶昆弟也。稱其宗子命使者。【疏】正義曰：敖氏云：「支子，謂宗子之族人也。」

此指其無父母與親兄者言。宗亦大宗子也。「稱其宗子命使者」，宗子尊也。言稱其宗，則非宗子自命之矣。下文弟稱其兄亦然。此支子與《喪服傳》所云者不同。盛氏世佐云：「此亦謂無父者。支子與庶子異，庶者對適而言，支者對宗而言。有庶子而為宗者，如庶子為父後者是也。有宗子而為支者，如身是繼禰之宗，而父非適長，則於祖為支矣；身是繼祖之宗，而祖非適長，則於曾祖為支矣。推而上之，即至為繼高祖之宗，而於大宗仍為支子也。《曲禮》云：「支子不祭，祭必告於宗子。」以支子對宗子言，與此同。《喪服傳》所云者，非宗子之正解也。宗，五宗也，大宗一、小宗四。稱，謂昏辭所稱之名，如曰「某有先人之禮」之類是也。父在則某是父名，無父則是繼禰之宗子名；身繼禰則稱繼祖之宗，身繼祖則稱繼曾祖之宗。其他可類推矣。」弟則稱其兄。弟，宗子之母弟。【疏】正義曰：此亦謂無父者。褚氏寅亮云：「注所以必指宗子母弟者，見

- ①「兄」，原作「母」，今據《續清經解》本改。
- ②「親迎」下，《儀禮管見》有「禮節」二字。
- ③「哀」上，《儀禮管見》有「按」字。
- ④「不」上，《儀禮管見》有「若」字。

所稱之兄非大宗子，則必小宗子也。假如宗子沒，母弟之次者存，季弟行昏禮，亦不得稱次兄，何也？雖其兄而非宗子也，則仍從支子之例，而稱其繼祖之宗子。敖氏謂有兄則不稱宗子，尚親也。似失記者之意。」

右記使命所自出

若不親迎，則婦人三月，然後壻見。

曰：「某以得爲外昏姻，請覲。」女氏稱昏，壻氏稱姻。覲，見也。【疏】正義曰：敖氏云：「親迎之時，主人迎壻以入，母立於房外，壻奠鴈而降，是亦見壻之父母矣。若不親迎，則壻須別見，故於此時爲之。必俟三月者，婦無舅姑者三月而廟見，故此壻行禮於婦家，亦以之爲節也。下文云：某之子未得濯漑于祭祀。然則此在廟見之後，祭行之前乎？」盛氏世佐云：「敖氏創爲無父者不親迎之說。據昭元年《左傳》楚公子圍娶婦事，^①曰「圍布几筵，告于莊、共之廟而來」，則無父者告於廟而後迎，禮也，豈以無所承命而廢鬼神陰陽之大典乎？隱二年，經書：「紀裂繻來逆女。」《公羊傳》曰：「譏始不親迎也。」莊二十四年，「公如齊逆女。」杜注云：「禮也。」《詩》曰：「韓侯迎止，于蹶之

里。」冕而親迎，孔子以告哀公，是諸侯之迎且不以無父廢也，況大夫以下乎？敖氏之云，其爲臆說無疑矣。」注云「女氏稱昏，壻氏稱姻」者，《爾雅·釋親》文。所以別男女，則男稱昏，女稱姻者，義取壻昏時往娶，女則因之而來。及其親，則女氏稱昏，壻氏稱姻，義取送女者昏時往男家，因得見之故也。主人對曰：「某以得爲外昏姻之數，某之子未得濯漑于祭祀，是以未敢見。今吾子辱，請吾子之就宮，某將走見。」

主人，女父也。以白造緇曰辱。【疏】正義曰：「漑」，敖氏作「概」。張氏云：「《釋文》云：『概，古代反。』《少牢禮》『概鼎、匕、俎』，『概甑、甗、匕與敦』，『概豆、籩、勺、爵、觚、觶』，字皆作「概」。今本《釋文》作「漑」。戴氏震曰：「《說文》：『漑，滌也。』『漑，灌注也。』二字各別。」此當爲「概」。○敖氏曰：「濯，洗也。漑，拭也。濯漑於祭祀，謂祭祀則濯漑祭器，此非主婦之事，乃言某之子，亦謙辭也。」王氏引之云：「注疏不釋「數」字，《釋文》亦無音。案：數當音所

①「楚」上，《儀禮集編》有「載」字。「事」下，《儀禮集編》有「云請以衆迎又」六字。

角切。《爾雅》曰：「數，疾也。」數之言速也，驟也。《曾子問》：「不知其己之遲數。」鄭注：「數，讀爲速。」是也。言前此驟爲昏姻，其時未久，某之子尚未濯漑于祭祀，某是以未敢往見吾子也。」對曰：「某以非他故，不足以辱命，請終賜見。」非他故，彌親之辭。命，謂將走見之言。今文無「終賜」。【疏】正義曰：《通解》「他」作「它」，注同。○張氏爾岐云：「非他故，謂以非他人之故而未見。」案：非他，即《詩》「兄弟匪他」之義，親親之辭也。言某以至親，故不敢辱主人走見之命，請終賜見之。賈疏以「非他」二字連讀，非也。注云「今文無「終賜」」者，此從古文有「終賜」者，蓋以辭謙爲得禮耳。對曰：「某得以爲昏姻之故，不敢固辭，敢不從？」不言外，亦彌親之辭。古文曰「外昏姻」。【疏】正義曰：此所謂禮辭也。得爲昏姻，則異于賓客，所以不敢固辭也。先辭其見而後不辭其摯，亦異於賓客。注云「古文曰「外昏姻」」者，《校勘記》曰：「『以得』，唐石經、徐本、《通解》、楊氏、敖氏俱作『得以』。」「《集釋》校云：「『上言『某以得爲外昏姻之數』，以者，自以也。此乃云『某得以爲昏姻之故』，以者，指摯以之也。正與故字語氣相貫。今注疏本從敖氏說改經

耳。」胡氏承珙云：「上言自以得爲昏姻之驟，故謙而言外；下言得其摯以我爲昏姻之故，故親而不復言外。邵晉涵謂上言「外昏姻」，此不宜異，非也。」主人出門左，西面。摯入門，東面，奠摯，再拜，出。出門，出內門。入門，入大門。出內門不出大門者，異於賓客也。摯見於寢。奠摯者，摯有子道，不敢授也。摯，雉也。【疏】正義曰：敖氏云：「主人出門左，西面」，則近於門矣。此異於見賓客之位，蓋親之也。摯入門，亦入門左也。記似脫一「左」字。此賓主服玄端。」郝氏曰：「主人出，①摯入門，皆大門也。主人以迎賓之禮出，摯不敢當，先入門，②東面，奠摯，再拜，如父子禮，不敢親授也。主人不荅拜，示不敢受也。」盛氏世佐云：「見摯之異於見賓者，主人出門而左，不拜不揖人是已，不必以不出大門爲異也。凡出門，則以東爲左；人，則以西爲左。記於摯入門下云東面，則摯亦入門左矣。不言左，省文也。疏云：案：《聘禮》賓執摯入門右，從君臣禮也。辭之，乃出，由門左西向北面，③

①「出」下，《儀禮節解》有「門」字。

②「門」下，《儀禮節解》有「內」字。

③「向」，《續清經解》本作「進」。

從賓客禮。此亦然，似以壻入門爲右者。然入門右者，奠摯當北面，此云東面，明與聘禮有間，當以敖說爲正。」案：注言雉也，以別於鴈。壻親迎執鴈，此當執雉，賈疏未得注意。擯者以摯出，請受。欲使以賓客禮相見。【疏】

正義曰：敖氏云：「壻既出，擯者東面，取摯以出，西面于門東，其辭蓋曰：『某也使某，請受！』」注云「欲使以賓客禮相見」者，案：聘禮賓執摯，入門右，從君臣禮；^①辭之，乃出，由門左，西向北面，從賓客禮。此亦然，故知所請受者，請退從賓客相見受之。壻禮辭，許，受摯，

人。主人再拜受，壻再拜，送出。出，已見女父。【疏】正義曰：受摯人者，亦如聘禮受摯乃更西人也。敖氏云：「壻東面辭，既許則進，訝受其摯人，立于寢門外之右，東面，向主人也。」褚氏寅亮駁之曰：「經明著人與出之文，敖氏以爲訝受於門中，臆說也。授受之節宜亦如《士相見禮》，在中庭。」盛氏世佐云：「此禮蓋與聘禮上介覲主國君相似，壻受摯入門左，主人再拜于中庭。壻進，北面授摯，退，復位，乃再拜送也。」張氏爾岐云：「壻出，更以請見主婦告擯者，乃入見也。」見主婦，主婦闔扉，立于其內。主婦，主人之婦也。見主婦者，兄弟之道，宜相親

也。闔扉者，婦人無外事。扉，左扉。【疏】正義曰：敖氏云：「擯出請入告，主婦乃位於此，然後壻入。必出乃入者，禮更端，不敢由便也。主婦此時亦纚笄宵衣。」注云「扉，左扉者，盛氏世佐云：『左扉是也。門以向堂爲正，左扉，西扉也。闔西扉，立于其內，主婦之正位也，蓋取夫東婦西之義。』《士喪禮》『闔東扉，主婦立于其內』，凶禮變於吉也。敖氏據之，而以此扉爲東扉，誤矣。賈疏謂東扉即左扉，尤誤。」云「兄弟之道，宜相親也」者，《爾雅》：「母與妻之黨爲兄弟。」故知主婦於壻者，兄弟之道也。壻立于門外，東面。主婦一拜，壻荅再拜。主婦又拜。壻出。必先一拜者，婦人於丈夫必俠拜。【疏】正義曰：「于丈夫」之「于」，《要義》作「與」。○主婦與壻行禮乃俠拜者，重始見也。壻東面，則主婦南面，不相對。《禮經釋例》曰：「婦見舅姑，如臣之見君；女父見壻，如主人之見賓；陽尊陰卑之義也。」主人請醴，及揖讓入，醴以一獻之禮，主婦薦，奠酬無幣。及，與也。無幣，異於賓客。【疏】正義曰：敖氏云：「此略如舅

① 「君」原脫，今據《儀禮注疏》補。

姑饗婦之禮而無俎。」盛氏世佐云：「主人送壻于寢門外，因請醴之，遂及壻，揖讓而入也。及之云者，^①嫌使擯者請之，且以見壻、見主婦而出，亦主人送也。敖云「及」當作「乃」，非也。人，入寢門也，此時壻尚未出大門。《士冠禮》云：「賓出，主人送于廟門外，請醴賓。賓禮辭，許。」此宜如之，但壻見於寢，則爲寢門而非廟門耳。」注云「無幣異於賓客」者，案：《士冠禮》醴賓，酬之以幣；昏禮饗賓，酬以束錦；燕禮、大射：酬賓客皆有幣。此無幣，故知異於賓客也。壻出，主人送，再拜。【疏】正義曰：敖氏云：「送，謂送于外門外。」

右記不親迎者見婦父母之禮

① 「及之云」，《儀禮集編》作「云及」。

儀禮正義卷四 鄭氏注

績溪胡培翬學

士相見禮第三

鄭《目錄》云：「士以職位相親，始承摯相見之禮。」《雜記》會葬禮曰：相見也，反哭而退；朋友，虞、祔而退。士相見於五禮屬賓禮，大、小戴及《別錄》皆第三。【疏】正義曰：單疏本「始承摯相見」下無「之」字，《釋文》、《集釋》、毛本俱有。○鄭云「士以職位相親，始承摯相見之禮」者，謂始仕爲士者因職位相親，而始行執摯相見之禮，是鄭專指有位之士而言也。然其實未仕之士以道藝相親而相見，當亦用此禮。又此篇主言侯國之士，然亦兼天子之士在內。賈疏謂「天子之孤、卿、大夫、士與諸侯之孤、卿、大夫、士執摯既同，禮亦無別」，是也。不云見而云「相見」者，據經，賓初以摯見主人，主人復還

摯見賓，是送爲賓主，故云「相見」也。《王制》六禮，相見居其一。張氏爾岐云：「經初言士相見禮，次言士見于大夫，又次言大夫相見，又次言士、大夫見于君，末及見尊長諸儀，皆自士相見推之，故以「士相見」名篇。」云《雜記》會葬禮曰：相見也，反哭而退；朋友，虞、祔而退者，案：《雜記》原文云：「相趨也，出宮而退；相揖也，哀次而退；相問也，既封而退；相見也，反哭而退；朋友，虞、祔而退。」此皆謂送葬之事，故鄭云「會葬禮」也。彼注云：「相趨，謂相聞姓名來會喪事也。相揖，嘗會於他也。相問，嘗相惠遺也。相見，嘗執摯相見也。」【附】，當爲「祔」。孔疏：出宮而退，謂柩出廟之宮門而退去；哀次而退，謂柩出至大門外之哀次而退去也；既封而退，謂至窆竟而退也；反哭而退，謂至葬竟，孝子反哭，還至家時而退也；虞、祔而退，謂至主人虞、祔而退也；此五者，恩薄者退速，恩厚者退遲。鄭引「相見也」二句者，明相見者之恩誼較朋友爲疏，而視相趨、相揖、相問者則爲厚耳。云「士相見於五禮屬賓禮」者，《周禮·大宗伯》：「以賓禮親邦國。」其別有八，雖未言相見，然相見亦是賓主相接之法，故鄭云「屬賓禮」也。郝氏敬云：「士相見禮，士君子初相接之禮也。古之君子

論行而結交。行苟同矣，未遽合也，必有介以相通，有辭以相命，有摯以相將，有儀以相敬，然後無苟合而免失身之悔。然則《儀禮》一經特制相見之禮，其以是與？○張氏爾岐云：「經本言士與士相見，遞推至見君，見禮已備；『凡燕見于君』以下，博言、圖事、進言、待坐諸儀法，殆類記文體例矣。」盛氏世佐云：「此篇之經止士相見一章，自『士見于大夫』以下皆記也。其中見大夫、大夫相見、見君三節，文與本篇相似，猶可曰『自士相見推之』也。至『凡燕見于君』以下，則其體宛似《戴記》，且與彼大同小異者。」^①今案：自「凡燕見于君」以下，文體與經不相似，非周公作。張氏、盛氏以爲記文，說亦有見。今並錄存之，以詒來者。

士相見之禮：摯，冬用雉，夏用脬。左頭奉之，曰：「某也願見，無由達。某子以命命某見。」摯，所執以至者。君子見於所尊敬，必執摯以將其厚意也。士摯用雉者，取其耿介、交有時、別有倫也。雉必用死者，爲其不可生服也。夏用脬，備腐臭也。左頭，頭，陽也。無由達，言久無因緣以自達也。某子，今所因緣

之姓名也。以命者，稱述主人之意。今文「頭」爲「脰」。
【疏】正義曰：自此至「賓再拜，送摯，出。主人送于門外，再拜」，言士與士相見之禮。其細目則再請返，再辭摯而後見賓，初以摯見，次請賓反見，次主人還摯見賓而禮成。
○「摯」，唐石經及嚴本、《集釋》、經、注俱作「摯」。《釋文》作「贊」，云「本又作『摯』」。今本多作「贊」。《石經考文提要》云：「案：《儀禮識誤》云：此卷中『摯』字，經注凡四十有四，皆從手。今計經『摯』字二十，監本作『摯』者四，作『贊』者十有六，歧出。今从唐石經、宋本《儀禮》鄭注、《儀禮圖》統作『摯』。」注「見於所尊敬」，《集釋》無「於」字。「以將其厚意也」，《集釋》無「也」字。「今所因緣之姓名也」，據疏，或本無「名」字，嚴本俱有。○《釋文》：「願見，賢遍反。凡卑於尊曰見，敵而曰見，謙敬之辭也。」今案：《禮記·少儀》曰：「開始見君子者，辭曰：『某固願聞名于將命者，不得階主。』敵者，曰：『某固願見。』」方氏慤云：「願聞名于將命者，以其尊而不可以遽見，故欲先聞其名。與之相敵，則不必先聞其名，直曰『願見』而已。此隆殺之辨也。」今此士與士相見，體敵，故云「願見」，不云願聞名也。注云

①「者」下，《儀禮集編》有「亦多有」三字。

「摯，所執以至者。君子見於所尊敬，必執摯以將其厚意也」者，案：鄭注《大宗伯》云：「摯之言至，所執以自致。」又注《曲禮》云：「摯之言至也。」《通典》云：「摯者，至也，信也。君子於其所尊，必執摯以相見，明其厚心之至，以表忠信，不敢相褻也。」陳氏祥道云：「《禮》云：『無辭不相接也，無禮不相見也，欲民之無相瀆也。』」又云：「君子於其所尊，不敢質也。」故貴至於邦君，賤至於庶人，以至婦人童子，相見不依摯，不足以爲禮；摯而不稱德，不足以爲義。」此論摯之大略也。云「士摯用雉者，取其耿介、交有時、別有倫也」者，《曲禮》曰：「凡摯，天子鬯，諸侯圭，卿羔，大夫雁，士雉。」《大宗伯》：「以禽作六摯。」「士執雉。」是其用雉之證也。《說苑》云：「雉者，不可指食，籠狎而服之。」是其性耿介也。李氏云：「雉春交秋別，既別不雜，是其有時有倫也。」云「雉必用死者，爲其不可生服也」者，《書·舜典》曰：「五玉、三帛、二生、一死摯。」一死，即謂雉也。《白虎通》云：「士以雉爲摯者，取其不可誘之以食，懾之以威；必死，不可生畜。士行威介，^①守節死義，不當移轉也。」云「夏用脰，備腐臭也」者，《周禮·庖人》曰：「夏行脰、鰾。」鄭司農云：「脰，乾雉。鰾，乾魚。」後鄭云：「脰，鰾，嘆熱而乾。」案：乾則不腐臭，故夏時用之。敖氏云：「惟見冬

夏而不言春秋，蓋春則先從冬，後從夏，秋則反之，亦若屢然與？」云「左頭，頭，陽也」者，謂頭爲陽，^②故在左也。《曲禮》曰：「執禽者左首。」首與頭同。鄭注：「左首尊。」孔疏：「左，陽也；首，亦陽也。左首，謂橫捧之也。」云「無由達，言久無因緣以自達也」者，言願見之心雖久，而無介紹以自通也。云「某子，今所因緣之姓名也」者，即介紹也。按：鄭解《鄉飲》、《鄉射》俱以某子爲姓氏，此云姓名者，賈疏謂：彼對面語，故不言名；此非對面之語，若不言名，直稱姓，是何人？故以姓名解之。其說是也。云「以命者，稱述主人之意」者，蓋主人若無見之意，雖有介紹先容，亦不得謾相就。敖氏云：「以命，以主人之命也。言某子以主人之命命某見，乃敢見也。語極明顯。」^③云「今文『頭』爲『脰』者，臧氏琳云：『賈疏謂鄭不從今文者，以其『脰，項也』，項不得爲頭，故不從也。』《士虞禮》：『取諸脰臙。』注：『古文脰臙爲頭臙也。』案：《說文·頁部》：『頭，首也。』《肉部》：『脰，項也。』二字義別。鄭注《士相見禮》

① 「介」，原脫，今據《白虎通》補。

② 「爲」，原作「謂」，今據《儀禮正義正義正誤》改。

③ 「語極明顯」，《儀禮集說》作「恭孫之辭」。

從古文，不從今文；注《士虞禮》從今文，不從古文：可謂各得其當矣。」主人對曰：「某子命某見，吾子有辱。請吾子之就家也，某將走見。」有，又也。某子命某往見，今吾子又自辱來，序其意也。走，猶往也。今文無「走」。**【疏】正義曰：**某子，即上某子。賈疏謂某子是中間介紹之人，故賓主共稱之，是也。張氏爾岐云：「某子，亦所因者之姓名。以其前來通意，故主人自謙，言其曾命某往見也。某者，主人自名也。」注云「有，又也」者，《詩·長發》：「有虔秉鉞。」箋云：「有之言又也。」云「某子命某往見，今吾子又自辱來」者，是申言解「有」爲「又」之義。敖氏作本字解，云「有辱，謂有所屈辱」。盛氏駁之，謂當從注爲是。云「走，猶往也」者，賈疏謂：「直取急往相見之意，非走驟之義，故釋從往也。」云「今文無「走」者，賈謂：「無「走」於文義不足，故不從今文，從古文也。」賓對曰：「某不足以辱命，請終賜見。」命，謂「請吾子之就家」。**【疏】正義曰：**注「謂」字，閩、葛俱誤在「子」字下。○張氏爾岐云：「命，謂主人請就家之命。不足辱，不敢當也。」主人對曰：「某不敢爲儀，固請吾子之就家也。某將走見。」不敢爲儀，言不敢外貌爲

威儀，忠誠欲往也。固，如故也。今文「不」爲「非」。古文云「固以請」也。**【疏】正義曰：**注「固以請」下，嚴、徐、《通解》俱有「也」字，《集釋》及毛本無。○此賓再請而主人再辭也。注云「固，如故也」者，前云「請吾子之就家」，今仍云然，故云「如故」也。云「今文「不」爲「非」者，賈疏謂：「非敢」於義不便，故不從今文。」云「古文云「固以請」也」者，賈疏謂：「「固請」於文從便，若有「以」字，於文舒緩，故不從古文。」今案：下注云：「今文「不」爲「非」。」亦不從今文也。「固以請」古文，多「以」字，蓋涉下文賓對之辭而誤衍。賓對曰：「某不敢爲儀，固以請。」言如固，請終賜見也。今文「不」爲「非」。**【疏】正義曰：**「對」，《唐石經補刻》誤作「用」。注「言如故」，《集釋》作「故」，嚴本及各本俱譌作「固」。程氏瑤田云：「按：上注云：「固，如故也。」今解此「固」字，即承用「如故」二字。若作「固」，則「如」字不可通矣。今從《集釋》。」主人對曰：「某也固辭，不得命，將走見。聞吾子稱摯，敢辭摯。」不得命者，不得見許之命也。走，猶出也。稱，舉也。辭其摯，爲其大崇也。古文曰「某將走見」。**【疏】正義曰：**此賓三請，主人許出見之，而又辭其摯也。注云

「走，猶出也」者，與上注「走，猶往也」殊者，賈疏云：「彼據向賓家，故走爲往；此據出門，故云「走，猶出也」。」云「稱，舉也」者，《爾雅·釋言》：「稱，舉也。」郝氏《義疏》云：「稱，又通作稱。《書》：「敢行稱亂。《史記·殷紀》作「敢行舉亂」。《士相見禮》「聞吾子稱摯」，《聘禮》「賓稱面」，鄭並云「稱，舉也」。云「辭其摯，爲其大宗也」者，爲用摯禮大崇，不敢當，故辭之也。云「古文曰「某將走見」者，賈疏云：「上已云「某也固辭，不得命」，於下不須云「某」，於文便。古文更云「某將走見」，文疊，故不從也。」賓對曰：

「某不以摯不敢見。」見於所尊敬而無摯，嫌大簡。

【疏】正義曰：注云「見於所尊敬而無摯，嫌大簡」者，此釋所以必用摯之義也。《白虎通》云：「相見有摯何？所以相尊敬、長和睦也。」故財帛者，所以副至意也。然則平等而相見，亦有相尊敬之意，故注云然。主人對曰：

「某不足以習禮，敢固辭。」言不足習禮者，不敢當

其崇禮來見己。【疏】正義曰：此賓嫌其無摯簡略，而主人再辭其用摯也。注云「言不足習禮者，不敢當其崇禮來見己」者，案：「不敢當其崇禮來見己」，是原其所以託言不足習禮之故。禮，謂賓客往來之禮。不云不敢當而云「不

足習禮」，謙以辭之也。賓對曰：「某也不依于摯不敢見，固以請。」言依於摯，謙自卑也。今文無「也」。【疏】正義曰：注末四字，毛本脫，嚴、徐、《集釋》、《通解》俱有。注云「言依於摯，謙自卑也」者，依於摯，謂託之以通意，無所託則不敢見，是謙自卑之辭也。云「今文無「也」者，謂古文作「某也不依於摯」，今文無「也」字。鄭從古文作「某也」者，取其配文足句，非有他義。後同。主人對曰：「某也固辭，不得命，敢不敬從？」

出迎于門外，再拜。賓荅，再拜。主人揖，入門右。賓舉摯，入門左。主人再拜，受。

賓再拜，送摯，出。右，就右也；左，就左也。受摯於

庭，既拜受送，則出矣。不受摯於堂，下人君也。今文無「也」。【疏】正義曰：注「既拜受送」，嚴、徐俱有「受」字，盧氏據疏疑爲衍文，非也。「今文無「也」四字，《集釋》、《通解》、毛本同，嚴、徐作「今文無」，脫「也」字。○此賓固請用摯，而主人許之，賓始以摯見也。自「敢不敬從」以上，皆賓在門外，賓者往復傳言。注云「右，就右也；左，就左也」者，謂主人就門右入，賓就門左入。門，大門也。門右，門左，詳《士冠禮》。云「受摯於庭」者，李氏云：「下記云：君

在堂升見。此無升文，則在庭也。「云「既拜受送，則出矣」者，謂主人既拜受摯，賓既拜送摯，而禮畢即出矣。明未與敘殷勤，故須反見也。」云「不受摯於堂，下人君也」者，意謂臣見君當受摯於堂，此於庭，是下人君也。楊氏復云：「注謂下人君，此義難曉。案《聘禮》賓至于近郊，君使卿用束帛勞，賓受于舍門內，諸公之臣則受于堂。又案《聘禮》賓私面于卿，受幣于楹間，及衆介面，則受幣于中庭。以此言之，則受于堂爲重，受于庭爲輕。其義可知也。」今案：楊說亦通。云「今文無「也」者，義已詳前。主人請見，賓反見，退。主人送于門外，再拜。請見者，爲賓崇禮來，相接以矜莊，歡心未交也。賓反見，則燕矣。下云「凡燕見于君」至「凡侍坐于君子」，博記反見之燕義。臣初見於君，再拜，奠摯而出。【疏】正義曰：上賓出，主人不送而使擯者請見，賓亦不辭而反見者，賓本爲見來也。賓退。主人送，再拜，賓不荅拜。義詳《士冠禮》。褚氏云：「反見之儀，則《曲禮》所云「凡與客人者」一節備之。」注云「請見者，爲賓崇禮來，相接以矜莊，歡心未交也。賓反見，則燕矣」者，江氏筠云：「賓之來，介以通名，摯以致敬，其禮過崇，是時相接以矜莊，賓主之意兩皆未伸，故主人須請見。請見亦猶是相見，而得以交歡心者，蓋賓反見則爲

燕見矣。燕見之禮，與始之致尊嚴者不同，非燕飲之燕也。」今案：賈疏以禮賓、饗賓歡燕爲解，誤甚。方氏苞、王氏士讓、吳氏廷華、章氏平皆辨之。云「下云「凡燕見于君」至「凡侍坐于君子」，博記反見之燕義」者，此因經但言反見，而反見之爲燕見其義未詳，故引下文以明之。江氏筠云：「案：下文「凡燕見于君」至「凡侍坐于君子」，雖不見此兩士燕見之禮，然即階之辯君所在，則知此得升堂矣。即言之妥而後傳，則知此得安坐矣。於博陳與言之儀，則知此主與賓得各言所有事，於詳論侍坐之法，則知此賓於主不嫌坐之移時。此鄭之所謂交歡心者也，豈燕飲之謂乎？且鄭於「凡燕見于君」節注云：此謂特立圖事，非立賓主之燕也。其義固自明之矣。」云「臣初見於君，再拜，奠摯而出」者，鄭欲明下燕見之的爲反見，其初見時並無此法；又欲見臣之于君，其初見禮與此之賓主略同。則此反見時亦猶彼之燕見，而非復如始之矜莊相接可知矣。自賈疏目反見爲留燕，而後之論者並疑此爲春秋戰國時公、卿、下士之儀，經義不失之愈遠乎？○以上賓見主人。主人復見之，以其摯，曰：「歸者吾子辱，使某見。請還摯于將命者！」復見之者，禮尚往來也。

以其摯，謂鄉時所執來者也。歸，曩也。將，猶傳也，傳命者，謂摯、相者。【疏】正義曰：注「謂摯相者」，毛本「者」作「也」，嚴、徐、《集釋》、《通解》、楊、敖俱作「者」。○「吾子辱，使某見」，褚氏云：「辱」字當一讀。辱，謂辱臨也。因辱臨而已出見之，若賓使之然，故謙言使某見也。」○案：還摯，謙不敢當也。士於士不終辭摯，而有還摯。大夫於士則終辭摯，而無還摯。君於其臣，則受之；於外臣，則使摯還之。大夫於嘗爲臣者亦然。注云「復見之者，禮尚往來也」者，「禮尚往來」，《曲禮》文。王氏士讓云：「賓既見而主人復見之，所謂『相見』也。」云「以其摯，謂鄉時所執來者也」者，言其摯即賓所執來之摯也。云「歸，曩也」者，

《說文》云：「歸，不久也。」又云：「曩，歸也。」是二字通。《莊子》曰：「曩子行，今子止。」以曩對今，則曩爲前時也。此經作「歸」，爲正字；或作「鄉」、作「嚮」、作「向」，皆古字通用；作「响」，則俗字也。云「將，猶傳也，傳命者，謂摯相」者，《論語》：「闕黨童子將命。」馬注：「將命者，傳賓主之語出入。」是「將，猶傳也」。《周禮·司儀》注：「出接賓曰摯，人贊禮曰相。」摯、相實一人，然則傳命即謂摯者矣。經云「還摯于將命」者，敖氏云：「不敢席主人。」主人對曰：「某也既得見矣，敢辭。」讓其來答己也。

【疏】正義曰：賈疏云：「上言『主人』，此亦言『主人』者，上言『主人』者，據前爲主人而言；此云『主人』者，謂前賓今在己家而說也。」張氏爾岐云：「此下凡稱主人者，即前賓，稱賓者，即前主人。」注云「讓其來答己也」者，章氏平云：「案：《鄉飲酒》注云：『事同曰讓，事異曰辭。』此以辭爲讓，恐轉寫誤。」今案：辭與讓大同小異，注所謂「讓」即經所謂「辭」也。賓對曰：「某也非敢求見，請還摯于將命者。」言不敢求見，嫌褻主人，不敢當也。

今文無「也」。【疏】正義曰：注末四字，毛本脫，嚴、徐、《集釋》、《通解》俱有。○上主人以既得見爲辭，故賓以非敢求見，但請還摯爲對也。注云「言不敢求見，嫌褻主人，不敢當也」者，賈疏云：「賓主頻見，是褻也。今云『非敢求見』，嫌褻主人，不敢當相見之法，直云『還摯』而已。」主人對曰：「某也既得見矣，敢固辭！」固，如故也。賓對曰：「某不敢以聞，固以請于將命者。」言不敢以聞，又益不敢當。【疏】正義曰：張氏爾岐云：「不敢以聞，謂不敢以還摯之事聞之主人，但固請于將命者而已，益自謙之辭。」注云「又益不敢當」者，不敢當相見之禮也。主人對曰：「某也固辭，不得命，

敢不從？」許受之也。異日則出迎，同日則否。【疏】正

義曰：注云「異日則出迎，同日則否」者，李氏云：「此不言主人出迎，蓋同日也。」《鄉射禮》：「明日息司正，主人猶出迎。」褚氏云：「今人交際以來而速荅爲敬，於同日則愈敬。

古人以異日爲敬，同日而往謂之殘日，故注云「異日則出迎，同日則否」，亦因荅者之敬心以爲差也。敖氏云：「不俟主人之迎而即自入，蓋急欲還摯，且尊主人也。」夫還摯何爭此斯須之頃，而汲汲如是？且賓既尊主人，主人顧傲

然自尊，不出迎乎？揆之情理，斯不然矣。經不言者，儀已具上文耳。」張氏爾岐云：「此上賓主之辭，皆擯者傳道。賓奉摯入。主人再拜，受。賓再拜，送摯，

出。主人送于門外，再拜。【疏】正義曰：經明言

「還摯」，則摯即其來之摯可知。吳氏《章句》謂禮尚往來，復見宜別有摯。非也。敖氏云：「授受不著其所，如上可知。」○以上還贊復見。

右士與士相見之禮

士見于大夫，終辭其摯。于其人也，一拜其辱也。賓退，送再拜。終辭其摯，以將不親

荅也。凡不荅而受其摯，唯君於臣耳。大夫於士不出迎。

入一拜，正禮也。送再拜，尊賓。【疏】正義曰：此下分爲五節：士見大夫，一也；士嘗爲大夫臣者見大夫，二也；大夫相見，三也；大夫、士、庶人見君，四也；他邦之人見君，五也。皆由士與士相見之禮推之。○注「尊賓」，楊氏「賓作「賢」。注云「終辭其摯，以將不親荅也」者，終辭，不受也。不言一辭、再辭，文省也。士於士受其摯，於親荅時還之。大夫於士不親荅，故不受其摯也。敖氏云：「士於大夫，降等者也。受摯而不荅則疑於君，荅之則疑於敵，使人還之則又疑於待舊臣，是以終辭之也。」云「凡不荅而受其摯，唯君於臣耳」者，君謂本國之君也。「若他邦之人，則使擯者還其摯」，故知不荅而受其摯，唯君於己臣然也。云

「大夫於士不出迎，入一拜，正禮也」者，案：經云「于其人也，一拜其辱也」，明不出迎可知。凡主於賓不出迎，不出送，入一拜，皆降等之禮宜然，故鄭以爲正禮也。《曲禮》曰：「士見於大夫，大夫拜其辱。」與此文同。孔疏亦引此經釋之。云「送再拜尊賓」者，程氏瑤田云：「賓退之賓，謂見大夫之士。」今案：送而再拜，即降等之客亦然，是尊之也。凡送賓，無論尊卑皆再拜，惟喪禮之送賓也，一拜。○吳氏紱以此爲卑見尊之禮，則由士推之，凡卑見尊者皆可

用此禮也。

右士見大夫

若嘗爲臣者，則禮辭其摯，曰：「某也辭，不得命，不敢固辭。」禮辭，一辭其摯而許也。

將不荅而聽其以摯入，有臣道也。【疏】正義曰：「嘗」，《集

釋》、《通解》、毛本俱作「常」。唐石經、嚴、徐、楊、敖俱作

「嘗」。案：作「嘗」是也。戴氏震云：「唐石經作『嘗』，即

「嘗」之俗體。」今从「嘗」。○《儀禮紉解》云：「嘗爲臣者，

謂歸爲其家臣而今爲公士者。」^①如趙文子所舉管庫之士

是也。嘗爲臣，^②則非始見矣，亦必以摯者，以始升爲公臣

而見也。」敖氏云：「禮辭之者，異於現爲臣者也。現爲臣，

則不辭之。」注云：「禮辭，一辭其摯而許也」者，案：「某

也辭，不得命」以下，即其許之之辭也。云「將不荅而聽其

以摯入，有臣道也」者，上士見大夫，以將不親荅而終辭其

摯。此亦將不荅而聽其以摯入，爲其有臣道，與凡爲士者

異也。賓入，奠摯，再拜。主人荅壹拜。奠摯，

尊卑異，不親授也。古文「壹」爲「一」。【疏】正義曰：敖氏

云：「荅一拜者，主人尊也。言主人荅拜，是不拜其辱矣。」

今案：《曲禮》曰：「大夫於其臣，雖賤必荅拜之。」鄭注：

「辟正君。」是現爲臣者且荅之，況舊臣乎？注云：「奠

摯，尊卑異，不敢授也」者，是亦以臣禮見也。云「古文「壹」

爲「一」者，詳《士冠禮》。賓出，使摯者還其摯于

門外，曰：「某也使某還摯。」還其摯者，辟正君

也。【疏】正義曰：敖氏云：「賓退而主人不拜送，亦異於

不爲臣者也。以其不現爲臣，故當還摯。某也，大夫名。」

吳氏《疑義》云：「下某，摯者名。」賓對曰：「某也既

得見矣，敢辭。」辭君，還其摯也。今文無「也」。【疏】

正義曰：注末，《集釋》、《通解》、毛本俱作「今文無也」，嚴、

徐俱作「今文無」，脫「也」字。注云「辭君，還其摯也」者，

解經辭爲辭還摯也。言君者，以嘗爲臣，則有君義也。摯

者對曰：「某也命某，某非敢爲儀也。敢以

請。」還摯者請使受之。【疏】正義曰：郝氏云：「某非敢

爲儀也」，摯者述主人命己之辭。」敖氏則以爲摯者自爲之

辭。盛氏云：「第三「某」字若作摯者自名，終於義未協，以

① 「士」，《儀禮紉解》作「臣」。

② 「嘗」上，《儀禮紉解》有「舊」字。

還摯非出自擯者意也。郝說似勝。」賓對曰：「某也，夫子之賤私，不足以踐禮，敢固辭。」家臣稱私。踐，行也。言某臣也，不足以行賓客禮。賓客所不荅者，不受摯。【疏】正義曰：注云「家臣稱私」者，《玉藻》曰：「士於大夫曰外私。」又曰：「大夫私事，使私人擯。」蓋臣於大夫者爲私人也。云「賓客所不荅者，不受摯」者，賓客之禮，凡不荅者不受摯，故言某是臣，不足以行賓客還摯之禮也。褚氏云：「上主人辭摯而云『不足以習禮』，謙辭也。此則直云『賤私，不足與行禮』，則是質言之，非謙矣。語似同，意大別。」擯者對曰：「某也使某，不敢爲儀也。固以請。」言使某，尊君也。或言命某，傳言耳。【疏】正義曰：此還摯有三辭：初言使某，次言命某，末復言使某，故鄭分別解之，謂言使某是其正，尊君之義也。或言命某，則取傳言之義耳。敖氏云：「使，猶命也。」是無甚分別矣，與鄭異。賓對曰：「某固辭，不得命，敢不從？」再拜受。受其摯而去之。【疏】正義曰：敖氏云：「再拜者，象受之於主人也。」注云「受其摯而去之」者，此因經無賓退之文，故注補之，謂受其摯即退之也。

右士嘗爲大夫臣者見於大夫

下大夫相見，以鴈，飾之以布，維之以索，如執雉。鴈，取知時，飛翔有行列也。飾之以布，謂裁縫衣其身也。維，謂繫聯其足。【疏】正義曰：《儀禮識誤》云：「《釋文》：以索，悉各反，注同。今注無『以索』二字。經曰：『飾之以布，維之以索。』注舉『飾之以布』全句釋之，至下句不應獨曰『維』，此必今本脫去『之以索』三字，今增入。」今案：戴氏震、盧氏文弼皆從《識誤》，是也。但嚴本及各本「維」下俱無此三字，未敢遽增，而附其說如此。○《王制》曰：諸侯之上大夫，卿；下大夫五人。是上大夫即三卿，下大夫即五大夫也。詳《聘禮》「君與卿圖事」下。《儀禮釋官》云：「案：卿爲上大夫，大夫爲下大夫，此對文耳，散文則通曰大夫。此經諸篇之內，有兼卿與大夫總言大夫者，有上大夫單言大夫者，有下大夫單言大夫者，各依文求之可也。」相見以鴈者，《周禮·大宗伯》曰：「卿執羔，大夫執鴈。」《曲禮》亦云：「卿羔，大夫鴈。」是下大夫相見以鴈，上大夫相見以羔也。如執雉者，謂執鴈亦左頭

① 「使」上，原衍「云」字，今據《儀禮集說》刪。

奉之，與執雉同。注云「鴈取知時」者，賈疏謂以其木落南翔，冰泮北徂，隨陽南北。今案：《大宗伯》注亦云：「鴈取其候時而行。」云「飛翔有行列」者，《說苑》云：「鴈者，行列有長幼之禮，故大夫以爲贊。」《白虎通》云：「以鴈爲摯者，取其飛成行、止成列也。大夫職在奉命邊四方，動作當能自正以事君也。」此皆以鴈爲鴻雁之雁。《經義述聞》則謂鴈，鵠也。詳《士昏禮》「納采用鴈」下。云「飾之以布，謂裁縫衣其身也」者，《曲禮》曰：「飾羔鴈者以績。」鄭注：「績，畫也。諸侯大夫以布，天子大夫以畫。」孔疏：「飾，覆也。畫布爲雲氣以覆羔、雁爲飾，以相見也。」《大宗伯》注云：「士相見之禮，卿、大夫飾摯以布。不言績，此諸侯之臣與天子之臣異也。」此鄭義也。吳氏《疑義》云：「摯重於飾，尚無王朝侯國之分，豈一飾之微反績與布各別乎？且經明言「飾」，若以布而不績，何取乎飾也？」今案：吳說似有理。此經言布，《曲禮》言績，相兼乃備。此云飾以布，言其以布爲質也；彼云飾以績，言其于布上畫之也。二經似不必爲王朝、侯國之別矣。裁縫衣其身，謂裁布縫之以衣其身也。云「維，謂繫聯其足」者，維有繫聯之義，故解經「維之以索」爲繫聯其足也。索，繩也。雉不言維，羔、鴈言維，以其生用之也。褚氏云：「既裁縫，衣其身，翼並在內

矣，止繫聯其足可也。」敖氏謂繫聯其足翼，添「翼」字欲補注未備，不知翼無須於繫耳。上大夫相見，以羔，

飾之以布，四維之，結于面，左頭，如麋執之。上大夫，卿也。羔，取其從帥，羣而不黨也。面，前

也。繫聯四足，交出背上，於胸前結之也。如麋執之者，秋

獻麋，有成禮，如之。或曰：麋，孤之摯也。其禮蓋謂左執

前足，右執後足。今文「頭」爲「脰」。【疏】正義曰：注「羔，

取其從帥」「從」，嚴、徐作「後」，《集釋》、《通解》、楊氏俱作

「從」。《識誤》曰：「「羔，取其後帥。」案：監本「後」作

「從」，疏引注文亦作「從」。至其下釋乃云：凡羔羊皆有引

帥，若卿之後君之命者也。此釋亦誤以「從」爲「後」，「後」

字近「從」，傳寫誤也。《校勘記》云：「按：作「從」是也。」

黃氏丕烈云：「單疏、魏氏皆作「從」，嚴本誤。」「秋」，閩、

監、葛本俱誤作「法」。注云「羔取其從帥，羣而不黨也」

者，賈疏云：「凡羔羊皆有引帥，若卿之從君之命者也。」今

案：《春秋繁露》云：「羔有角而不任，設備而不用，類好仁

者；執之不鳴，殺之不啼，類死義者；羔食于其母，必跪而

受之，類知禮者。故羊之爲言猶祥與？故卿以爲摯。」《說

苑》云：「羔者，羊也。羊羣而不黨，故卿以爲摯。」《白虎

通云：「卿以羔者，取其羣不黨；卿職在盡忠率下，不阿黨也。」云「面，前也」者，詳《士冠禮》。云「繫聯四足，交出背上，於胸前結之也」者，繫聯四足，此解經四維之，亦以索可知。蓋以索繫其前足，又繫其後足，從腹下交出背上，於胸前結之，故云「結于面」也。云「如麋執之者，秋獻麋，有成禮，如之者，經云「左頭」，則與雉、鴈同矣；而復云「如麋執之」者，雉、鴈兩足，羔四足，故其執之之法，當如麋也。麋，鹿子。蓋古時有獻麋之禮，今禮文殘闕，不可考矣。賈疏謂《庖人》《秋行犢麋》，故云「秋獻麋」。若然，《庖人》云「春行羔豚」，亦當有獻羔禮，何必云「如麋」也？云「或曰：麋，孤之摯也」者，此鄭廣存異說耳。《周禮·大宗伯》及《大行人》皆云：「孤執皮帛。」唯《白虎通》云：「古摯以麋鹿，今以羔、雁何？以為古者質，取其內，謂得美草鳴相呼。」麋與麋同，當為或說所本。云「其禮蓋謂左執前足，右執後足」者，其禮謂獻麋之禮。左執前足，右執後足，是左頭也。云「今文「頭」為「脰」」，詳前。○賈疏云：「執摯者，或平敵，或以卑見尊，皆用摯。尊無執摯見卑之法。《檀弓》云哀公執摯見己臣周豐者，彼謂下賢，非正法也。」如士相見之禮。大夫雖摯異，其儀猶如士。【疏】正義曰：注云「大夫雖摯異，其儀猶如士」者，大夫之摯，雖異於

士，然其相見之儀則同也。敖氏云：「此相見之禮，蓋兼復見者言之也。」張氏云：「士與士相見，敵者之禮也。兩大夫相見，亦敵者，故其儀如之。」王氏士讓云：「此經言敵鈞者相見。若上、下大夫之互相見，則經無明文。」○李氏紱云：「意下之見上，當倣上經士見大夫之禮。上之見下，當倣下經異爵者見士及《玉藻》大夫見士之禮與？」

右大夫相見

始見于君，執摯，至下，容彌蹙。下，謂君所也。蹙，猶促也。促，恭慙貌也。其為恭，士、大夫一也。

【疏】正義曰：盛氏云：「此當以「執摯」為句。云「始見于君，執摯」者，見摯唯新臣有之，常朝及燕見則不用也。舊以「執摯至下」四字為句，非。」注云「下謂君所也」者，

《經義述聞》云：「君所不得謂之下，鄭說未安。敖云至下謂當帶，則是解至下為極卑也。然但云極卑而不指其處，則安知不更下於帶乎？恐古人無此不了之文法。且上文：「摯，冬用雉，夏用脰，左頭奉之。」《釋文》：「奉，芳勇反。」是摯當奉，不當提，正當用「奉者當心」之禮，何得同於提者之當帶邪？此云「至下」，蓋謂執摯者行至君之堂下，

至堂下則與君益近，故其敬益甚，下文遂云「容彌蹙也」。古者謂堂下爲下。《鄉射禮》：「笙一人，拜于下。」又曰：「命弟子贊工遷樂于下。」《聘禮·記》曰：「若君不見，使大夫受，自下聽命。」《公食·記》：「卿擯由下。」注：「不升堂也。」《禮運》曰：「澄酒在下。」《論語》曰：「拜下，禮也。」皆其證矣。今案：以下爲堂下，解最直截。鄭云「君所」者，蓋謂堂下即係君所，說亦可通。敖氏解至下爲當帶，則盛氏亦駁之，其說不可從也。云「蹙，猶促也。促，恭敬貌也」者，鄭解蹙爲促，而又以爲恭敬貌者，言其恭敬誠實，蹙蹙不安之貌如是也。《詩·小明》：「政事愈蹙。」《毛傳》：「蹙，促也。」或謂蹙與蹴通。《哀公問》：「孔子蹴然辟席。」注云：「蹴然，敬貌。」云「其爲恭，士、大夫一也」者，經不言士，明臣之見君皆然，故云「士、大夫一也」。庶人見于君，不爲容，進退走。容，謂趨翔。【疏】正義曰：賈疏以庶人爲在官府、史、胥、徒之屬。王氏昭禹謂非特府史胥徒而已，凡民在焉。王說是也。方氏苞云：「古者，天子、諸侯耕藉，巡方。」^①大詢時田，皆與庶人接，故庶人有見君之禮。」或謂下節注「庶人之摯鷺」五字當在此節。據《大宗伯》「庶人執鷺」注云「鷺，取其不飛遷」，則兼凡民在內矣。《曲禮》：「庶人之摯匹。」鄭注：「說者以匹爲鷺。」

注云「容，謂趨翔」者，張氏爾岐云：「庶人見於君，不爲趨翔之容，進退唯疾走而已，即《曲禮》云「庶人僬僬」。」今案：不爲容甚于蹙。進退走，所謂「不爲容」也。士、大夫，則奠摯，再拜稽首。君荅壹拜。言君荅士、大夫一拜，則於庶人不荅之。庶人之摯鷺。古文「壹」作「一」。【疏】正義曰：稽首，頭至地，拜之重者。再拜稽首，臣見君之禮也。壹拜，《周禮》所謂「奇拜」也。《曲禮》曰：「君于士不荅拜也。」此荅壹拜者，以其始見故也。盛氏云：「案：士、大夫始見君之禮，其詳不可聞矣。以《聘禮》「賓觀」、「入門右，北面奠幣，再拜稽首」及《覲禮》「侯氏入門右，坐奠圭，再拜稽首」參之，則士、大夫奠摯處當在門東，拜亦北面也。是時君位蓋在堂上，荅壹拜者，遙荅之也。《曲禮》曰：「大夫見於國君，國君拜其辱。」熊氏謂以初爲大夫敬之，殆爲是與？上文注云：「臣初見於君，再拜，奠摯而出。」謂拜畢即出，無升堂入摯之事也。今案：盛氏謂奠摯不升堂，是矣。至以覲與覲例之，謂奠摯當在門東，恐非。蓋覲與覲其後尚有升授之文，故初時入門即

①「方」下，《儀禮析疑》有「省耕省斂」四字。

奠之。此無升授之事，則其奠不必與覲、覲同處，但經無明文，難以臆擬矣。注云「言君荅士、大夫一拜，則於庶人不荅之」者，上經並言庶人見君之禮，而此荅一拜，惟據士、大夫言之，是君於庶人不荅拜也。餘已詳前。

右大夫士庶人見於君

若他邦之人，則使擯者還其摯，曰：「寡君使某還摯。」賓對曰：「君不有其外臣，臣不敢辭。」再拜稽首，受。【疏】正義曰：他邦之人，謂他邦之臣，非己臣也。敖氏云「人蓋通大夫、士而言」，是其執摯來見也，則使擯者還其摯。不言于門外，省文也。賈疏云：「凡臣無境外之交，今得以摯執見他邦君者，謂他國之君來朝，此國之臣因見之，謂若《掌客》『卿皆見以羔』之類是也。」然不盡此，凡他邦之臣出亡來此國者，亦當以摯見。又定八年《左傳》：「公會晉師于瓦。范獻子執羔，趙簡子、中行文子皆執鴈。」亦是他邦臣來見也。篇末「他國之人，則曰外臣」，故此稱外臣也。敖氏云：「不有，言外之也。不敢辭，尊君也。再拜稽首，受，亦若受於君前然也。」今案：此與嘗為大夫臣者使擯還摯略同。然彼則

受而後還，此則不言受，但言還。彼還摯，賓三辭乃受，此則不辭而受者。《儀禮紉解》云：「禮無受他臣摯法，故莫即還之；亦無抗禮於他君法，故辭即受之也。」

右他邦之人見於君

凡燕見于君，必辯君之南面。若不得，則正方，不疑君。辯，猶正也。君南面，則臣見正北面。君或時不然，當正東面。若正西面，不得疑君所處邪鄉之。此謂特見圖事，非立賓主之燕也。疑，度之。【疏】正義曰：以下雜記諸儀，分為六節：燕見于君，一也；進言，二也；侍坐，三也；賜食、賜飲，四也；先生異爵者見士，五也；廣言稱謂及執幣玉之儀，六也。○注「鄉之」，嚴本作「鄉」，各本同，毛本作「嚮」。○郝氏敬云：「燕見，謂私見，非公朝行禮之時。」今案：公朝行禮，面位有一定；此燕見，面位無定也。注云「辯，猶正也」者，鄭注《玉藻》「辯色始入」亦云：「辯，猶正也。」鄭意蓋謂臣之見君當以北面為正，故必正君之南面，乃可北面鄉之。故注又云「君南面，則臣見正北面」也。云「君或時不然」者，解經「若不得」三字，謂不得君之南面，則君或西面，或東面也。云「當

右燕見於君

凡言非對也，妥而後傳言。凡言，謂己爲君

正東面，若正西面者，謂君西面，則臣當正東面；君東面，則臣當正西面也。此釋經「則正方」三字。方，猶鄉也，《曲禮》曰「立必正方」是也。云「不得疑君所處，邪鄉之」者，據注又云「疑，度之」，則訓「疑」爲「擬」，謂不得擬度君所處而邪鄉之。凡臣之事君，無一不當出於正，故其見君面位亦不苟如是也。云「此謂特見圖事，非立賓主之燕也」者，鄭恐人疑燕見爲燕飲之燕，故特辨之。圖事，詳《聘禮》「君與卿圖事」下。張氏爾岐云：「注知燕見非立賓主之燕者，以《燕禮》君在阼階，以西面爲正也。」君在堂，升見無方階，辯君所在。升見，升堂見於君也。君近東，則升東階；君近西，則升西階。【疏】正義曰：此謂燕見而君若在堂，則升堂見之也。正禮，升堂有一定之階，此則無之，惟辨君所在耳。敖氏云：方，猶常也，與上「正方」之方異義。注云「君近東，則升東階；君近西，則升西階」者，言或東或西，無一定之階，惟以近君爲便也。若燕禮，則君升自阼階，賓、主人升自西階，有定階矣。故知此亦非立賓主之燕也。案：天子、諸侯皆三朝，外朝在庫門外，治朝在路門外，皆係平地，無堂、無屋、無階。惟燕朝在路門內，有堂有階。亦詳《聘禮》。然則此節所云見，當在燕朝矣。敖氏云：此云君在堂，則上之燕見未必專在堂也。

言事也。妥，安坐也。傳言，猶出言也。若君問，可對則對，不待安坐也。古文「妥」爲「綏」。【疏】正義曰：注云「凡言，謂己爲君言事也」者，凡進言之法，自言曰言，因問曰對，二者不同也。云「妥，安坐也」者，《爾雅·釋詁》文。敖氏訓妥爲安，謂安和其志氣乃言。褚氏云：「郭注《爾雅》即引此經爲證。」又《詩》：「以妥以侑。」《毛傳》亦云：「妥，安坐也。」可見古人訓妥總以安坐爲義，無有言心之安和者；且此「妥」字指俟君安坐而言，不指己說。今案：褚說是也。云「若君問，可對則對，不待安坐也」者，禮，君子問更端，則起而對。是君有問即宜速對。經云「妥而後傳言」，乃專指自言者言之，不兼對在內也。云「古文「妥」爲「綏」者，胡氏承珙云：「《說文》無「妥」字。案：鄭注《曲禮》「大夫則綏之」云「綏，讀曰妥」，又「國君綏視」云「綏，讀爲妥」，是綏有妥音。段氏云：「妥」字見《禮經》、

①「經」下，《儀禮管見》有「文」字。

《小雅》，許蓋偶遺之。今案：此今文「妥」，正字；古文「綏」，借字。與君言，言使臣；與大人言，言事君；與老者言，言使弟子；與幼者言，言孝弟于父兄；與衆言，言忠信慈祥；與居官者言，言忠信。博陳燕見言語之儀也。言使臣者，使臣之禮也。大人，卿、大夫也。言事君者，臣事君以忠也。祥，善也。居官，謂士以下。【疏】正義曰：敖氏云：「今本『言忠信慈祥』，《大戴禮》注引此，無『忠信』字。今有之者，蓋因下文有『言忠信』三字而誤衍。」今案：唐石經、嚴本俱與今本同。盛氏云：有「忠信」二字於義亦通；況此本流傳已久，未可輕刪也。○張氏爾岐云：「所與言之人不同，則言亦各有所宜。言雖多端，大旨所主，不離乎此。」今案：「與君言，言使臣」者，方氏苞云：「人君治政成民，一日萬幾，而要道莫如使臣。能使大臣，羣臣皆稱其職而各盡其材，則萬事得理而民無不安矣。」與大人言，言事君者，方氏云：「始仕者雖有職事，尚未得自達於君，故與居官者言，但言忠信。至於大人，則忠信不必言，當勉以事君之大義，所謂以道事君也。」與老者言，言使弟子者，老者為後生所取法，故與之言使弟子之事。賈疏云：「《書》

傳：大夫致仕為父師，士致仕為少師，教鄉閭子弟。雷次宗云：「學生事師，雖無服，有父兄之恩，故稱弟子也。」今案：此經所謂老，即指年高德劭之人，不必定屬父師、少師，賈說似泥。「與幼者言，言孝弟於父兄」者，幼者，即承上弟子言。《論語》曰：「弟子入則孝，出則弟。」又曰：「人則事父兄，孝弟為人之本。故與幼者恒言及此也。」與衆言，言忠信慈祥者，上言老與幼，此言衆，則是強壯有作為之人。又下別言居官者，則此衆係泛指民庶，非有位者可知。凡人與人相接，必以忠信為要。忠信則蠻貊可行，不忠信雖州里難行，故與衆言以此為先也。又人與人相接，貴有親厚之意，而不可有乖戾之心。慈祥者，天地之善氣，而仁德之流行也。常言及此，則有以消其惡念，而人皆可為善矣。「與居官者言，言忠信」者，此指庶司百執事之人，必以忠信為事上接下之本也。但上與衆言兼及「慈祥」，此不言「慈祥」者，方氏云：「居官而偏於慈祥，則容奸引惡，而反為民害矣，非衆人之比也。」注云「博陳燕見言語之儀也」者，自與君言以至居官衆人，所謂「博陳」也。此皆從容燕處講論之言，非因事陳說，故知為「燕見言語」也。「儀」，疑當作「義」。上節「妥而後傳言」及下三節，是言其儀，此則言其所當言之義也。云「言使臣者，使臣之禮也」

者，《論語》曰：「君使臣以禮。」故知此所言者乃使臣之禮也。或疑「之禮也」「之」字當作「以」，非。云「大人，卿，大夫也」，又云「居官，謂士以下」者，古者建國必立三卿，又有五大夫，皆所以佐君出治者。其下上士、中士、下士及庶人在官者，皆屬於卿、大夫，不能自達於君，是士以下與卿、大夫尊卑迥殊。鄭見經言大人於君下，而又別言居官者，故以卿、大夫爲大人，以士以下爲居官者。其解甚確，而或且疑之，不知此經大人猶言大臣，以別於居官之爲小臣云爾。云「言事君者，臣事君以忠也」者，案：「臣事君以忠」，亦《論語》文。云「祥，善也」者，《爾雅·釋詁》文。凡與大人言，始視面，中視抱，卒視面，毋改。衆皆若是。始視面，謂觀其顏色可傳言未也。中視抱，容其思之，且爲敬也。卒視面，察其納己言否也。毋改，謂傳言見荅應之間，當正容體以待之，毋自變動，爲嫌解惰，不虛心也。衆，謂諸卿、大夫同在此者。皆若是，其視之儀無異也。古文「毋」作「無」，今文「衆」爲「終」。【疏】正義曰：《石經考文提要》云：「『毋改』，監本『毋』譌『母』。」○吳氏《疑義》云：「大人當合天子、諸侯、卿、大夫，凡德位尊者言之，與上大人不同。」褚氏云：「此大人，君與公、卿、大夫俱

在內。注專指君，敖專指公、卿、大夫，俱偏。」今案：吳、褚之說是也。注云「始視面，謂觀其顏色可傳言未也」者，謂進言之初，必先觀其顏色之可否，故視面也。《論語》曰：「侍于君子有三愆，『未見顏色而言謂之瞽』。」云「中視抱，容其思之，且爲敬也」者，抱在衿下，帶上，謂既進言之後，不敢視面而視抱者，容聽言者思之，且以視下於面爲敬也。云「卒視面，察其納己言否也」者，謂欲察其言之聽納與否，故又視面也。此論與言時之視有此三者，與《曲禮》所云「天子視不上于衿，不下于帶」、「國君妥視，大夫衡視」，論尋常視法不同也。云「毋改，謂傳言見荅應之間，當正容體以待之，毋自變動」者，謂傳言而聽者未荅，則當正容體以待之，毋自變動失容也。褚氏云：「此當以注『正容體』義爲長。敖氏謂不可以久故或改，則經文始、中、卒三視已屢變矣，何得云『毋改』乎？」云「爲嫌解惰不虛心也」者，解與懈通，言其所以毋改者，爲恐自變動，則容體近於懈惰，且似不虛心以待聽言者之荅也。云「衆謂諸卿、大夫同在此」者，鄭意以此大人爲君，故言諸卿、大夫同在此，其實非君亦有同在之人。褚氏謂公所俱可衆人同在，是也。云「皆若是其視之儀無異也」者，謂同在此之衆人，其視君之儀一與此同也。云「古文『毋』作『無』」，詳《昏禮》。「今

文「衆」爲「終」者，賈疏云：「以上已有「卒」，卒爲終，故從古爲「衆」也。」胡氏承珙云：「若「衆」爲「終」，不獨與「卒」視面「卒」字爲複，且上文云「毋改」，鄭云「毋自變動」，不必複言終皆若是矣。敖繼公謂「衆」字無意義，宜從今文作「終」，非也。今案：「衆」字古有「終」音，故今文訛作「終」。惠氏棟云：「《易·雜卦》：『《大有》，衆也。』荀爽本「衆」作「終」。《春秋傳》：『有魯大夫衆仲。』《明堂月令》云：『衆雨蚤降。』《釋草》云：『灤貫衆。』皆讀爲終。」是也。若父，則遊目，毋上于面，毋下于帶。子於父主孝，不主敬，所視廣也，因觀安否何如也。今文「父」爲「甫」。古文「毋」爲「無」。【疏】正義曰：注「古文毋作無」作「甫」，《通解》、毛本俱作「爲」，嚴、徐《集釋》俱作「作」。○敖氏云：「此謂與父言之時也，其異於大人者，遊目耳。」今案：上節云「凡與大人言」，此云「若父」，緊承上說，則敖以此爲與父言之時是矣。《曲禮》曰：「士視五步。」鄭注：「士視得旁遊目五步之中也。」視大夫以上，上下遊目，不得旁。此經云「遊目」，亦謂得旁遊也。但其上下仍有節限。《曲禮》又曰「凡視上於面則傲，下於帶則憂」，故此經直言「毋上于面，毋下于帶」也。注云「子於父主孝，不主敬，所視廣也」者，此釋所以得遊目之故，蓋非不主敬也，但敬

心不如孝心之摯耳。云「因觀安否何如也」者，謂所視廣，則得觀親之安否也。褚氏云：「上經所云視面、視抱，雖有上下而目睛專注，只一直線，不旁遊也。若旁遊，則目光可四注矣。蓋不四注不足以察親體之安否。敖氏謂與視面、視抱無異，如是則何謂遊目？」今案：褚說是也。云「今文「父」爲「甫」」，詳《冠禮》。若不言，立則視足，坐則視膝。不言，則伺其行起而已。【疏】正義曰：此云「若不言」，則上爲與言時明矣。李氏云：「《荀子》云：『坐視膝，立視足，應對言語視面。』」案：視足、視膝，統謂視大人與父也。郝氏以爲自視，非。注云「不言，則伺其行起而已」者，案：立而行則足先動，坐而起則膝先動，故注以「伺其行起」解經「視足」、「視膝」也。敖氏以爲益恭，失之矣。

右進言之法

凡侍坐于君子，君子欠伸，問日之早晏，以食具告，改居，則請退可也。君子，謂卿、大夫及國中賢者也。志倦則欠，體倦則伸。問日晏，近於久也。具，猶辨也。改居，謂自變動也。古文「伸」作「信」，「早」作「蚤」。【疏】正義曰：注「及國中賢者也」「中」下，

《集釋》有「之」字。「問日晏」「日」下，敖氏有「蚤」字。「具猶辯也」「辯」，《釋文》作「辨」。張氏《識誤》云：「注曰：『具，猶辨也。』」案：《釋文》云：「辨，皮莧反。」從《釋文》。《校勘記》云：「案：張氏所見注作『辨』，與今本異。《說文》有『辨』無『辯』，則當以『辨』爲正，作『辨』非也，作『辯』尤誤。」今案：嚴本亦作「辯」，非。○此及下節論侍坐于君子之法。自欠伸以下數者，皆倦怠、厭客之意，故侍者可以退。敖氏云：「卑幼之於尊長，請見不請退，而此乃得請退者，緣君子意也。可者，許之之辭。」注云「君子，謂卿、大夫及國中賢者也」者，賈疏云：「禮之通例，大夫得稱君子；士賤，不得也。」又《鄉射禮》注云：「君子有大德行不仕者。」然則君子亦德位尊者之稱也。云「志倦則欠，體倦則伸」者，陳氏澠云：「氣乏則欠，體疲則伸。」郝氏敬云：「張口曰欠，舒體曰伸。」張氏爾岐云：「欠，引氣；伸，搖體。」皆足與注說相發明。云「問日晏，近於久也」者，謂其時之久也。云「具，猶辨也」者，《特性》「宗人告有司具」注同。「具」字不作器俱解。注云「猶辨」，解具爲備辨，與《廣雅》、《釋詁》訓具爲備同也。郝氏、張氏謂從者以食具告君子，敖氏則謂君子告從者。盛氏云：「『以食具告』，蒙上『君子』而言，亦謂君子告其從者。」案：此說是也。告從

者，即謂告以所食已具辨否也。若敖云所食之具，則解「具」字未的矣。云「改居，謂自變動也」者，謂君子不安其位，而自變動，是有倦意也。云「古文『伸』作『信』，『早』作『蚤』」者，胡氏承珙云：「《說文》：『伸，屈伸。从人申聲。』《禮記·儒行》『竟信其志』注云：『信，讀如屈伸之伸。』假借字也。信，或爲申，是屈伸字作伸，漢時已通行，故鄭、許皆從之耳。早，正字，蚤，古文假借字。《漢書》多借蚤爲早晚字。鄭注《王制》引《詩》『四之日其蚤』作『其早』，而箋《詩》不破『蚤』字者，殆以假借人所共識歟？此經鄭俱從今文，不從古文，取其當文易曉耳。」○《禮記·曲禮》曰：「侍坐於君子，君子欠伸，撰杖屨，視日蚤暮，侍坐者請出矣。」鄭注：「以君子有倦意也。撰，猶持也。」孔疏：「撰杖屨者，君子自執杖，在坐著屨，升堂脫之在側，若倦則自撰持之也。視日蚤暮者，君子或瞻視其庭影，望日蚤晚也。」《少儀》曰：「侍坐於君子，君子欠伸，運笏，澤劍首，還屨，問日之蚤莫，雖請退可也。」鄭注：「以此皆解倦之狀。伸，頻伸也。運，澤，皆玩弄也。金器弄之，易以汗澤。」孔疏：「還，轉也。謂君子自轉屨也。」今案：此二經皆言侍坐請退之事，而文與本篇有小異。又《玉藻》曰「侍坐則必退席；不退，則必引而去君之黨」云云，亦侍坐於尊長之法，

並錄於此，以備考。

夜侍坐，問夜，膳葷，請退可

也。問夜，問其時數也。膳葷，謂食之。葷，辛物，葱、薤

之屬。食之以止臥。古文「葷」作「薰」。【疏】正義曰：注

「膳葷謂食之」，敖氏無「葷」字。「食之以止臥」之下，《集釋》有「可」字。○此並言夜侍坐之法，問夜、膳葷皆有倦意，故可請退也。注云「問夜，問其時數也」者，亦因時之

久而問也。時數，賈疏謂若鐘鼓、漏刻之數也。云「膳葷，

謂食之」者，解膳爲食也。云「葷，辛物，葱、薤之屬」者，《禮

記·內則》：「膾，春用葱。」又云：「脂用葱，膏用薤。」又

「葱」亦作「蔥」，「薤」亦作「薤」。《爾雅·釋草》：「薤，鴻

薤。」郭注：「即薤菜也。」《釋草》又云：「薤，山蔥。薤，山

薤。」是葱、薤之產於山者，蓋二者其味作辛，故云「辛物」。

《說文》：「蒜，葷菜也。」《玉藻》注又以薑爲葷，是葷不止

葱、薤，故言「之屬」以該之。古所云不茹葷指此，非謂不食

肉也。云「古文「葷」作「薰」者，賈疏云：「《玉藻》：「膳於君

有葷桃、菊」作「此葷」。鄭注《論語》作「烹」，義亦通；若作

「薰」，則《春秋》「一薰一蕕」，薰，香草也，非葷辛之字，故疊

古文不從也。」臧氏琳云：「《禮記·玉藻》：「膳於君有葷

桃、菊。」注：「葷桃、菊，辟凶邪也。」大夫用葷桃、葷薑及辛

菜也。「葷」，或作「烹」。又《祭義》：「烹蒿悽愴。」注：

「烹，謂香臭也。」《說文·火部》無「烹」字，故鄭注《士相見

禮》從今文作「葷」，而不用古文。古文蓋以聲同通借，又注

《玉藻》從「葷」不從「烹」，則以「烹」爲俗字也。據《玉藻》

注，則《祭義》「烹」當作「葷」，賈疏謂鄭注《論語》作「烹」，

《論語》經無「烹」字，蓋鄭注中有此字。然鄭注《玉藻》既定

作「葷」，不宜復自用「烹」，當亦俗寫誤也。」章氏平云：

「案：《說文》亦以葷爲臭菜，薰爲香草，但古文假借依聲，

恐不得以後世字訓律之。」今案：今文作「葷」，是正字；古

文作「薰」，是借字。臧氏謂聲同通借，章氏謂假借依聲，其

說是也。

右侍坐於君子之法

若君賜之食，則君祭先飯，徧嘗膳，飲

而俟。君命之食，然後食。君祭先飯，於其祭食

臣先飯，示爲君嘗食也。此謂君與之禮食，膳，謂進庶羞。

既嘗庶羞，則飲，俟君之徧嘗也。今文「啗嘗膳」。【疏】正

義曰：注「於其祭食」，毛本「於其」作「食其」。敖氏作「謂

君」。程氏瑤田云：「食其」二字可疑。敖作「謂君」亦難

據信。盧氏云：宋本作「於其」。今案：嚴本、《集釋》亦俱

作「食其」。戴校《集釋》改「食」爲「於」。黃氏《校錄》云：「作『於其』爲是，謂於君祭食之頃也。『此謂君與之禮食』，嚴本及各本如是，楊氏『此』作『食』，《集釋》『與』下有『臣』字。『膳謂進庶羞』，敖無『進』字。今俱從嚴本。」○若君賜之食，謂侍坐於君，而君或賜之食也。此句直貫下節。本節是言無將食者之禮，下節是言有將食者之禮，不以客不客分也。夏氏斫云：「先飯者，飯黍稷也。徧嘗膳者，嘗庶羞也。飯、嘗畢，則以酒漱口而飲而俟。又必君命之食然後食者，黍稷庶羞已飯、嘗畢，若已食然，故必君命之食然後食也。」今案：盛氏疑「君命之食然後食」七字爲衍文，非矣。注云「君祭先飯，於其祭食臣先飯，示爲君嘗食也」者，《論語》：「侍食於君，君祭，先飯。」鄭注：「於君祭，則先飯矣，若爲君嘗食然。」案：此云「於其祭食臣先飯」，彼云「於君祭，則先飯矣」，二注義同，亦可證此注「於其祭食」之確爲「於」字也。賈疏云：「凡君將食，必有膳宰進食，則膳宰嘗君前之食，備火齊不得，下文是也。今此文謂膳宰不在，則侍食者自嘗自己前食。既不嘗君前食，則不正嘗食，故云『示爲君嘗食』也。」云「此謂君與之禮食」者，謂君與臣小小禮食法，仍非正禮食。正禮食，則公食大夫是也。彼君前無食，此君臣俱有食，故知小小禮食。此即《玉藻》

云：「若賜之食，而君客之，則命之祭，然後祭。」彼云「客之」，則此注「禮食」。但此文不云「客之」、「命之祭然後祭」，文不具也。《經義述聞》云：「《士相見》所記者，侍食之常禮，《玉藻》所記，則見客於君者也。常禮則臣不祭，故《士相見》但言君祭也；客禮則臣亦得祭，故《玉藻》言君命之祭然後祭也。二者不同，鄭注、賈疏強合之，非也。《論語》邢昺疏曰：『敵客則得先自祭，降等之客則後祭。若臣侍君而賜之食，則不祭；若賜食而君以客禮待之，則得祭。雖得祭，又須君命之祭，乃敢祭也。此言君祭先飯，則非客之之禮也。』邢氏之說足以正鄭、賈之失矣。又：侍食之常禮與見客於君之禮所異者，祭不祭耳。其餘則同。」今案：本篇言若君賜之食，則君祭先飯，明當君祭之時臣即先飯，與《玉藻》言客之、言命之祭而後言先飯者自殊，不得牽合爲一。《述聞》之說是也。褚氏云：「君若客之，則命之祭，即《玉藻》前一條是也。若不以客禮待之，而適無嘗食者，則此經『君祭先飯』云云是也。若有嘗食者，則此經『若有將食者』云云及《玉藻》『若有嘗羞者』一條是也。當分三節看，此經視《玉藻》少客禮待之一層，《玉藻》視此經少不以客禮待之而無嘗食者一層。兩經參考，始備始明。」今案：邢疏多本《玉藻》孔疏，唯云「此言君祭先飯，則

非客之之禮也」，乃邢氏斷語。《鄉黨圖考》常駁之，恐非。蓋《論語》言「侍食於君，君祭，先飯」，與此節正同，非客禮也。云「膳謂進庶羞」者，此云「徧嘗膳」，《玉藻》云「辯嘗羞」，知膳即羞也。然《周禮·膳夫》注云：「膳，牲肉也。羞，有滋味者。」是二字對文異，散則通。徧，正字；辯，假字也。云「既嘗庶羞，則飲」者，《玉藻》注云：「飲利將食也。」云「今云咕嘗膳」者，盧氏《詳校》改「云」爲「文」。臧氏琳云：「《釋文》引《穀梁傳》：『未嘗有咕血之盟。咕，嘗也。』今《穀梁》莊二十七年傳作「歃血」，無「咕，嘗也」語。惟《玉篇·口部》引《穀梁》與此同，知古本作「咕」。《說文·口部》無「咕」。《食部》有「𩚑」，云「相謁食麥也」。《穀梁傳》當本作「𩚑」，訓爲食，與嘗義合。《廣雅·釋詁》：「咕、嘗同訓爲食，則「𩚑」爲「咕」之本字無疑。咕既訓嘗，「咕」下不當更作「嘗」字，蓋古文「徧嘗膳」，今文「徧咕膳」。「今之咕嘗膳」當作「今文云咕膳」，「文」字脫，「嘗」字衍也。」案：此注疑有脫誤。如臧氏說，卻亦可通。○又《玉藻》曰：「侍食於先生，異爵者，後祭先飯。」言先生異爵，則非君也。此侍食得祭而云後者，以其爲降等之客，故後主人也。《少儀》曰：「燕侍食於君子，則先飯而後已。」此雖非專指侍君食言，然先飯後已，亦可爲先飯後食之證也。若有將食

者，則俟君之食然後食。將食，猶進食謂膳宰也。膳宰進食，則臣不嘗食。《周禮》：「膳夫授祭品，嘗食，王乃食。」【疏】正義曰：注「膳夫」下，《通解》、毛本有「授祭」二字，嚴、徐、《集釋》、楊、敖俱無。案：《周禮》原文有，鄭節引以證嘗食也。無者是。○此與上節皆是侍食之常禮，上節謂膳宰不在，此節謂膳宰在也。據此經言若有將食者，則上節是無將食者可知。《玉藻》曰：「若有嘗羞者，則俟君之食然後食。」飯飲而俟，與此節正同。此不言飯飲而俟者，省文也。夏氏炘云：「俟君之食然後食，不待命者，未嘗嘗食，君賜食之意未終，故不待命，俟君食即食也。此食亦謂黍稷。」《玉藻》又曰：「君命之羞，羞近者。命之品嘗之，然後唯所欲。」則食庶羞矣。又曰：「君未覆手，不敢飡。君既食，又飯飡。」飯飡者，三飯也。君既徹，執飯與醬，乃出授從者，皆《士相見》所不具，必合考之而君賜食之禮始畢矣。① 注云「將食，猶進食」者，將，猶進也。進食者，即指謂膳宰也。云「膳宰進食，則臣不嘗食」者，對上注「示爲君嘗食也」。《玉藻》注云：「不嘗羞，膳宰存也。」與此注義同。云《周禮》：「膳夫品嘗食，王乃食」者，彼

① 「畢」，《學禮管釋》作「全」。

注云：「品者，每物皆嘗之，道尊者也。」諸侯掌膳食之官謂之膳宰，天子謂之膳夫，其職掌正同，故引《周禮·膳夫》文以證也。餘詳《燕禮》「膳宰具官饌于寢東」下。若君賜之爵，則下席，再拜稽首，受爵，升席祭，卒爵而俟。君卒爵，然後授虛爵。受爵者於尊所，至於授爵，坐授人耳。必俟君卒爵者，若欲其醕然也。今文曰「若賜之爵」，無「君」也。【疏】正義曰：此謂侍君坐，而君或賜之飲也。《玉藻》曰：「君若賜之爵，則越席，再拜稽首，受，登席祭之，飲卒爵而俟。君卒爵，然後授虛爵。」與此節略同。孔疏謂此為朝夕侍者得賜爵法，非燕飲大禮，是也。《曲禮》曰：「長者舉未醕，少者不敢飲。」鄭注：「不敢先尊者。盡爵曰醕。」《燕禮》曰：「公卒爵而後飲也。」孔疏謂《曲禮》與《燕禮》合，而與《士相見》及《玉藻》違。案：《士相見》、《玉藻》二文皆先君卒爵，而此云後飲者，此據燕飲正禮，故引《燕禮》以證之。《玉藻》及《士相見》謂私燕之禮，故不同也。又《玉藻》孔疏云：「此經先再拜稽首而後受，《燕禮》與受爵，降席下奠爵，再拜稽首，則先受而後再拜。與此不同者，熊氏云：《燕禮》據大飲法，故先受爵而後奠爵，再拜。此經據朝夕侍君而得賜爵，

故再拜而後受。是本篇所云與《玉藻》合，與《曲禮》、《燕禮》異也。經云「下席」，又云「升席」。褚氏云：「據此知士於侍飲侍食時，堂上亦有席。」侍食不祭而侍飲祭者，方氏苞云：「君已祭，臣先飯而徧嘗膳，至食時又祭則褻矣。酒異爵則祭無嫌，饋食禮尸每獻必祭，祝佐食主人、主婦，又各祭酒是也。」敖氏云：「臣先卒爵，亦先飯嘗膳之意。君卒爵而授虛爵，則授爵亦先於君矣。」皆與大飲之禮異也。案：《玉藻》此下有云：「君子之飲酒也，受一爵而色洒如也，二爵而言言斯，禮已三爵而油油以退。」亦本篇所未具。又案：《左傳》云：「臣侍君燕，過三爵，非禮也。」若燕飲大禮，則有獻、有酢、有酬、有旅酬、有無算爵，非止三爵而已。故知此節為尋常侍飲法也。注云「受爵者於尊所」者，案：《曲禮》曰：「侍飲於長者，酒進則起，拜受於尊所。」鄭注：「降席拜受，敬也。燕飲之禮鄉尊。」孔疏前一說謂：「尊所者，以陳尊之處也。侍者起而往尊處拜受酒，是以尊為盛酒之尊。」後又引何氏云：「尊者，主人也。拜者在尊所，對主人也。嚮尊謂主人尊也，是以尊為主人。」二說不同，當從後說。云「至於授爵，坐授人耳」者，賈疏云：「見《曲禮》與《玉藻》並此文並無立授之文，故知坐授也。」敖氏以為興授，盛氏謂當從注說，是也。云「必俟君卒爵者，若

欲其醕然也」者，醕，盡爵也。言俟君卒爵，蓋欲其盡爵，亦勸飲之意也。云「今文曰『若賜之爵』，無『君』也」者，胡氏承珙云：「案：無『君』字，則不明所賜，且此文上下與《玉藻》文略同。彼有『君』字，故鄭從古文也。」退，坐取屨，隱辟而后屨。君爲之興，則曰：「君無爲興，臣不敢辭。」君若降送之，則不敢顧辭，遂出。謂君若食之飲之而退也。隱辟，俛而逡遁。興，起也。辭君興而不敢辭其降，於己大崇，不敢當也。【疏】正義曰：注「俛而逡遁」，《釋文》、《集釋》、楊氏「巡」俱作「遁」，嚴本作「巡」。○《玉藻》亦曰：「退則坐取屨，隱辟而后屨。」孔疏：「坐，跪也。初跪脫屨堂下爲敬，故退而跪取屨也。」《曲禮》曰：「戶外有二屨，言聞則入，言不聞則不入。」孔疏謂：「室有兩人，故戶外有二屨，此謂體敵者；若尊卑不同，則長者一人脫屨於戶內，故《少儀》云『排闥脫屨於戶內者，一人而已矣』是也。」今案：此謂熟客往來，故得入室；若平常行禮，則脫屨皆於堂下。《曲禮》曰：「侍坐於長者，屨不上於堂，解屨不敢當階。」《鄉飲酒禮》：「司正請坐于賓，賓、主人介、衆賓皆降，說屨，揖讓如初，升，坐。」《燕禮》：「賓及卿、大夫皆脫屨，升，就席。」故《少儀》又曰：

「凡祭於室中、堂上，無跣，燕則有之。」是初脫屨在堂下，退取屨亦在堂下也。《玉藻》此下有云「坐左納右，坐右納左」，亦本篇所未具。孔疏：「納，猶著也。若坐左膝，則著右足之屨；若坐右膝，則著左足之屨。」不敢顧辭，郝氏謂不回顧君告辭，是也。注云「謂君若食之飲之而退也」者，上言君賜食、賜爵，則此言退即謂食之飲之而退也。楊氏以此與上別爲一節，非矣。云「隱辟，俛而逡巡」者，《曲禮》曰：「就屨跪而舉之，屏於側。」此隱辟即謂屏於側也。又曰：「嚮長者而屨，跪而還屨，俯而納屨。」此而後屨即謂納屨也。俛與俯同，逡巡即釋「辟」字意。云「辭君興而不敢辭其降，於己大崇，不敢當也」者，張氏爾岐云：「君無爲興，臣不敢辭，即臣辭君興之語也。」今於君降送而不敢辭者，經云「君若降送之」，言「若」，不定之辭，明非常禮，故云「於己大崇，不敢當也」。大夫則辭退，下，比及門，三辭。下，亦降也。【疏】正義曰：注「亦」字，《通解》作「猶」。○敖氏云：「大夫起而退，則君興；下階，則君降；及門，則君送于此。三節皆辭之，故曰『三辭』。大夫位尊，不嫌與君爲禮，故得辭也。此著大夫，則上之不敢辭者爲士明矣。」今案：章氏平讀「大夫則辭」爲句，謂士不敢辭，大夫則辭也。褚氏謂當以「辭退下」三字連讀。案：

退下、及門皆指臣言，敖氏分析極細，若三字連讀，義難通矣。注云「下，亦降也」者，上經「君若降送之」「降」謂降階，此「下」亦謂降階也。

右臣侍坐賜食賜飲及退去之儀

若先生異爵者請見之，則辭。辭不得命，則曰：「某無以見。辭不得命，將走見。」

先見之。先生，致仕者也。異爵，謂卿、大夫也。辭，辭

其自降而來。走，猶出也。先見之者出先拜也。《曲禮》

曰：「主人敬賓，則先拜賓。」【疏】正義曰：先生異爵者尊

于士，前有士見于大夫之禮，此則先生異爵者特來見士，蓋

慕德而不以爵位拘也。辭不得命，謂辭之而不見許也。

「曰」字直貫至「將走見」句。「某無以見」，張氏爾岐謂無故

不敢輕見，姜氏謂無德可以辱見。盛氏則云：「以，因也；

言己欲見尊者而無因見，則「見」字指見先生異爵者言。」其

說較勝。注云「先生，致仕者也。異爵，謂卿、大夫也」

者，賈疏云：「此《士相見》本文是士，故以卿、大夫爲異爵

也。」然則先生亦即致仕之卿、大夫矣。云「辭，辭其自降而

來」者，以尊而請見卑，是自降也。云「先見之者出先拜也。」

《曲禮》曰：「主人敬賓，則先拜賓」者，前經主人出迎于門外再拜，賓荅拜，固是先拜矣。然彼之拜爲迎賓，此拜爲先見，其所以拜不同。張氏惠言云：「當出門北面再拜，如相見莫摯之拜與？」鄭解先見爲先拜，故引《曲禮》以證之。《曲禮》本文作「客」，此引作「賓」者，二字通也。吳氏《疑義》云：「以本欲往見，今先見之於家。曰先者，對往見爲後也。」其說亦通。敖氏謂「先見」之「先」當作「走」，^①非矣。

右先生異爵者見士

非以君命使，則不稱寡。大夫、士則曰

寡君之老。謂摯贊者辭也。不稱寡者，不言寡君之某，

言姓名而已。大夫、卿士其使則皆曰寡君之某。《檀弓》

曰：「仕而未有祿者，君有饋焉曰獻，使焉曰寡君之老。」

【疏】正義曰：注「不稱寡者」，毛本「者」作「君」，嚴、徐、《集

釋》作「者」，是也。○此節疑有譌舛。解者雖多，卻少確

詰。今惟擇其近是者錄之，以待後人考定焉。李氏云：

①「見」，原作「拜」，今據《儀禮集說》改。

《玉藻》曰：「大夫私事使，私人擯則稱名，公士擯則曰寡大夫、寡君之老。」公士爲擯，^①謂聘也。上大夫曰寡君之老，下大夫曰寡大夫。《儀禮紉解》引三禮館議云：「此經據《玉藻》釋之，文義自明，「非以君命使」句，所謂「大夫私事使」也。」「則不稱寡大夫」句，所謂「私人擯則稱名」也。」「士」一字爲句，所謂「大夫有所往，必與公士爲擯」也。」「則曰寡君之老」句，所謂「公士擯則曰寡大夫、寡君之老」也。」此說依文衍義，似屬可從，然「士」上必添「公」字，「士」下必添「擯」字乃明。且寡大夫、寡君之老皆爲奉命出使之稱，而上下分屬，亦少的義。戴氏震校《集釋》云：「《玉藻》篇：「上大夫曰下臣，擯者曰寡君之老；^②下大夫自名，擯者曰寡大夫。大夫私事使，私人擯，則稱名；公士擯，則曰寡大夫、寡君之老。」是上大夫自稱下臣，下大夫自名；擯者稱上大夫曰寡君之老，稱下大夫曰寡大夫。然必公士擯乃得稱之。此文當云：非以君命使則不稱寡大夫、寡君之老。正與《玉藻》「公士擯則曰寡大夫、寡君之老」互相爲義，衍「士則曰」三字耳。」「《經義述聞》以戴說爲是，云：「據賈疏，「大夫」下本無「士」字。經文「士」字，後人所加。」又云：「則曰」二字因下文「士大夫則曰下臣」而衍也。」今案：盧氏文昭、朱氏大韶亦俱從戴說。然唐石經及各本皆

有「士則曰」三字，未可必其爲衍也。汪氏中校本改「士」爲「使」，云：「據鄭注讀經「不稱寡」爲句，又云「其使則皆曰寡君之某」可證矣。注讀經「不稱寡」爲句者，謂大夫非以君命使，則不稱寡君之某也。云「大夫使」者，謂大夫以君命使，則當曰寡君之某也。二語反復相應，上不言大夫，下不言以君命，省文互相備耳。注「卿士」二字非釋經「士」字，乃指上大夫卿而言。古者通謂六卿爲卿士。」案：方氏苞亦謂「士」當作「使」，其說不如汪說之善，然經作「士」已久，改「使」亦嫌無據也。其餘敖、郝諸家之說尤無足取。此文似當在闕疑之列矣。注云「謂擯贊者辭也」者，言此皆擯贊稱謂之辭，非自稱也。云「不稱寡者，不言寡君之某，言姓名而已」者，盛氏云：「不言寡君之某，指大夫言，不兼士也。下大夫曰寡大夫，上大夫曰寡君之老，故言某以該之。」案：言姓名者，據《玉藻》云「大夫私事使，私人擯則稱名」也。云「大夫、卿士其使則皆曰寡君之某」者，案：卿士謂上大夫也。或謂「卿」字爲衍文，似無確據。云「《檀弓》曰：仕而未有祿者，君有饋焉曰獻，使焉曰寡君之老」

① 「士」，原作「事」，今據《儀禮集釋》改。
② 「君」，原作「者」，據《續清經解》本補。

者，盛氏云：「注引《檀弓》，蓋取『使焉曰寡君』之義，證公事使則稱其君曰寡君也。『之老』二字出處所無，傳寫者因經有『寡君之老』之文而衍耳。」今案：盛氏釋注俱是，此注與經亦未盡協，姑依文釋之。凡執幣者不趨，容彌蹙以爲儀。不趨，主慎也。以進而益恭爲威儀耳。今

文無「容」。**【疏】**正義曰：散文則玉亦稱幣，《小行人》：「合六幣」是也；對文則幣爲束帛、束錦、皮馬及禽摯之屬是也。此執幣亦指見君言，故容彌蹙，與執摯見君者同。不曰「執摯」而曰「執幣」者，蓋兼朝聘見他國之君言之，故云「凡」也。注云「不趨，主慎也」者，賈疏據《玉藻》謂趨有疾趨、徐趨二種，此經不趨者，謂不爲疾趨，故云「主慎也」。又謂徐趨，則下文「唯舒武」，^①舉前曳踵是也；此不爲疾趨，亦不爲徐趨，但徐疾之間爲之。案：《玉藻》曰：「圈豚行，不舉足，齊如流。」又曰：「執龜玉，舉前曳踵，縮縮如也。」鄭注皆以爲徐趨之事，賈說本此。云「以進而益恭爲威儀耳」者，案：「進而益恭」釋經「容彌蹙」之義也。云「今文無『容』」者，胡氏承珙云：「無『容』字則於義不明。《孟子》：『其容有蹙。』古文有『容』義長，故鄭從之。」執玉者則唯舒武，舉前曳踵。唯舒者，重玉器，尤慎也。

武，迹也。舉前曳踵，備蹠跲也。今文無「者」，古文「曳」作「拙」。**【疏】**正義曰：曳加點，非。注「唯舒」下，敖氏有「武」字，嚴本及各本俱無。朱子云：「案：注疏以『舒』字絕句，陸佃曰：容彌蹙同，唯武則舒，然則讀『武』字絕句矣。其說近是。」今案：注摘「唯舒」二字爲訓，非以「武」字屬下讀也。盧氏云：「上凡執幣節，疏明以『舒武』連讀。」《校勘記》云：「注疏實不以『舒』字絕句，是也。」案：《玉藻》曰：「君與尸行接武，大夫繼武，士中武，皆以『武』字爲句。『古文曳作拙』，嚴、徐、《釋文》、《集釋》、《通解》俱从手，毛本从木作「拙」。案：《說文·手部》有「拙」字，《木部》無「拙」字，从手爲是。○張氏爾岐云：「執玉本朝聘鄰國之事，因言執摯相見，遂兼及之。」今案：此及執幣兩節，皆因執摯類及也。注云「唯舒者，重玉器，尤慎也」者，玉視幣更重，故舒徐其武，較之不趨者爲尤慎也。云「武，迹也」者，《曲禮》曰：「堂上接武。」鄭注亦云：「武，迹也。中人之迹尺二寸。」云「舉前曳踵，備蹠跲也」者，《玉藻》孔疏云：「踵，足後跟也。謂將行之時，初舉足前，後曳足跟，行不離地，恐致蹠跲也。」云「今文無『者』」者，上執

①「武」，原脫，今據《儀禮注疏》補。

幣者有「者」字，此執玉者亦當有「者」字，無「者」，脫也。云「古文「曳」作「拙」者，案：「曳」、「拙」聲義並同。《檀弓》：「負手曳杖。」《釋文》：「曳」字作「拙」。鄭以《曲禮》諸篇多作「曳踵」，故不從古文也。凡自稱于君，士大夫則曰下臣。宅者在邦則曰市井之臣，在野則曰草茅之臣。庶人則曰刺草之臣，他國之人則曰外臣。宅者，謂致仕者也。致仕者去官而居宅，或在國中，或在野。《周禮》載師之職：以宅田任近郊之地。今文「宅」或爲「託」。古文「茅」作「苗」。刺，猶剗除也。【疏】正義曰：戴氏云：「經當作「上大夫」，唐石經「上」字摩滅，各本訛作「士」。攷前疏云：「《玉藻》上大夫曰下臣，與此同也。」盧氏云：「石經「士」字甚清楚，不如戴說。」今案：自稱于君，何以但言上大夫，而不及下大夫與士？如戴說，則此節有脫誤矣。各本作「士」，仍之。「草茅之臣」，毛本「草」作「艸」。唐石經、嚴、徐、閩本、《釋文》、《集釋》、《通解》、《要義》、敖氏俱作「草」。注「謂致仕者也致仕者」，《通解》、毛本脫下四字，嚴、徐、《集釋》俱有。「刺，猶剗除也」，此句嚴、徐、《集釋》、《通解》、陳、單注本俱在「任近郊之地」下，毛本在注末。「今文「宅」或爲「託」」，陳、單注本、毛本俱同。嚴、徐無「文」、「或」二字，《集釋》有「文」字，無「或」字，《通解》無「文」字，有「或」字。今從《集

釋》。○張氏爾岐云：「此與君言之時，其自稱有此數者之異。」今案：士大夫，敖氏謂「見爲臣者」，是也。統曰下臣而不分別者，與出使擯贊辭異也。他國之人，敖氏云「亦謂士大夫」，是也。注云「宅者，謂致仕者也。致仕者去官而居宅，或在國中，或在野」者，姜氏云：「此以市井、草茅之臣謂士大夫，而下別云「庶人曰刺草之臣」，故注以致仕者訓之，與《孟子》不同。」案：《孟子》：「在國曰市井之臣，在野曰草莽之臣。」皆謂庶人。此經先言宅者而後言庶人，則宅者與庶人異。若如敖說，以宅者爲未仕而家居者，則與庶人不傳質爲臣者正同，經何爲區別乎？故知市井、草茅，《士》相見與《孟子》文略同而實異。姜說是也。《周禮》每以「國中」與「野」對言，故知此在邦、在野爲或在國中、或在野也。云《周禮》載師之職：以宅田任近郊之地」者，鄭於彼注易先鄭之說以宅田爲致仕者之家所受田，而即引此經宅者在邦云云以證之，故于此經即引彼宅田爲證也。《儀禮釋官》云：「案：《書·酒誥》曰：「越百姓里居。」傳云：「於百官族姓及卿、大夫致仕居田里者。」彼言「里居」，即此經言「宅」之義。天子畿內，采地三等：大國九，^①三公致仕者之田三；次國二十一，卿致仕者之田六；小國六

① 「國」，原作「夫」，今據《續清經解》本改。

十三，大夫致仕者之田二十七。並見《王制》注。諸侯亦當有卿、大夫致仕者之田，但其數未聞耳。」云「刺，猶剷除也」者，《廣雅·釋詁》云：「剷，削也。」然則刺草即謂剷除其草矣。云「今文『宅』爲『託』」。古文「茅」作「苗」者，《經義述聞》以今文「託」字爲長，謂：「羈旅之人寄託於此國者也。襄二十七年《左傳》衛子鮮出奔晉，託于木門，終身不仕。是其證。託者若仕，則自稱于君，與士大夫同；不仕，則或曰『市井之臣』，或曰『草茅之臣』而已。《孟子》：『庶人不傳質爲臣，不敢見於諸侯。』今託於此國而不仕，亦是不傳質爲臣者，故其自稱于君者相若也。」案：宅者之義，當以鄭注爲正。此亦可存備一說。胡氏承珙云：《說文》：「侂，寄也。从人庀聲。」庀，古文宅。與《言部》「託」字音義略同，故今文假「託」爲「宅」。古文又假「苗」爲「茅」，《洛陽伽藍記》有魏時苗茨之碑，苗茨即茅茨也。鄭於經文，則皆從其正者。」○劉氏敞《補士相見義》曰：「自天子至于庶人皆有摯。摯者，致也，所以致其志也。天子之摯鬯，諸侯玉，卿羔，大夫鴈，士雉。鬯也者，言德之遠聞也；玉也者，言一度不易也；羔也者，言柔而有禮也；鴈也者，言進退知時也；雉也者，言死其節也。故天子以遠德爲志，諸侯以一度爲志，卿以有禮爲志，大夫以進退爲志，士以死節爲

志。明乎其志之義，而天下治矣。故執斯摯也者，致志者也。君之摯以事神，臣之摯以養人。唯君受摯者，唯君受養也。非其君則辭摯，不敢當養也。古者非其君不仕，非其師不學，非其人不友，非其大夫不見。士相見之禮必依于介紹，以言其不苟合也；必依于摯，以言其道可親也。苟而合，唯小人無恥者能之。君子可見也，不可屈也；可親也，不可狎也；可遠也，不可疎也。賓至門，主人三辭見，賓稱摯，主人三辭摯，所以致尊嚴也。大夫以禮相接，士以禮相諭，庶人以禮相同，然而爭奪興于末者，未之有也。人苟悅而相若者，未必爭；苟簡而相親者，未必怨。是故士相見禮者，人道之大也，所以使人重其身，而毋邇於辱也；所以使人慎其交，而毋邇於禍也。唯仕於君者召而往，未仕而見於君者冠而奠摯。在邦曰市井之臣，在野曰草莽之臣，君雖召，不往也。是故雖有南面之貴，千乘之富，士之所以結者，禮義而已矣，利不足稱焉。刑罰行於國，所誅者好利之人，未有好利而其俗不亂者也。無介而相見，君子以爲諂，故諸侯大國九介，次國七介，小國五介。」

右廣言稱謂及執幣玉之儀附士相見禮

儀禮正義卷五 鄭氏注

受業江寧楊大培補

鄉飲酒禮第四

鄭《目錄》云：「諸侯之鄉大夫三年大比，獻賢者、能者於其君，以禮賓之，與之飲酒。於五禮屬嘉禮。大戴此乃第十，小戴及《別錄》此皆第四。」【疏】正義曰：《釋文》「獻」上有「將」字。云「諸侯之鄉大夫三年大比，獻賢者、能者於其君，以禮賓之，與之飲酒」者，孔氏穎達《禮記正義》曰：「鄭云鄉飲酒有四事：一則三年賓賢能，二則鄉大夫飲國中賢者，三則州長習射飲酒，四則黨正蠟祭飲酒。總而言之，皆謂之鄉飲酒。鄉則三年一飲，州則一年再飲，黨則一年一飲。所以然者，天子六鄉，諸侯三鄉，各有鄉大夫，而鄉有鄉學，取致仕在鄉之中大夫為父師，致仕之士為少師，在於學中名為鄉先

生，教於鄉中之人謂鄉學。每年入學，三年業成，必升於君。若天子之鄉，則升學士於天子；諸侯之鄉，則升學士於諸侯。凡升之必用正月。將升用之，先為飲酒之禮，鄉大夫與鄉先生謀事，①擇學士最賢者使為賓，次者為介，又次者為眾賓，皆鄉大夫為主人，與之飲酒而後升之。故《周禮·鄉大夫職》曰：「三年則大比，考其德行道藝，而興賢者、能者。鄉老及鄉大夫帥其吏與其眾寡，以禮禮賓之。」若州一年再飲者，是春秋習射，因而飲之，以州長為主人也。若黨一年一飲者，是歲十二月，國於大蠟祭，而黨中於學飲酒，子貢觀蠟是也。亦黨正為主人。」張氏爾岐云：「鄉飲有四。此篇所載賓賢之禮，常以正月行之；將射而飲，②於春秋行之；黨正正齒位，於季冬蠟祭，鄉大夫飲國中賢者，則無常時。」盛氏世佐云：「此篇所陳乃侯國鄉大夫賓賢之禮，他如黨正正齒位、州長春秋習射及鄉大夫飲國中賢者，雖亦名鄉飲酒，而其禮固不能無異也。自呂氏大臨謂：「鄉人凡有聚會皆當行此禮，恐不止四事。《論語》

①「事」，原作「士」，今據《禮記正義》改。

②「飲」下，《儀禮鄭注句讀》有「下篇所列是也」六字。

載：鄉人飲酒，杖者出，斯出矣。亦指鄉人而言之。」其說見采於《通解》而後儒宗之，遂以爲鄉人聚會飲酒之通禮矣。然《論語》所載有尚齒之意，謂與《黨正》飲酒法相似則可，援以證此則不可。且其所謂鄉人者，鄉之人耳，與《鄉飲酒義》「鄉人、士、君子」之鄉人注以爲鄉大夫者亦別。」褚氏寅亮云：「此禮雖主興賢能，選有德者爲賓、介、三賓，而餘皆齒序。若有遵者，則席在賓東，而不與鄉人齒，是選賢之中仍寓尚齒、貴貴之義。州長習射，有賓無介。若有遵，則以公士爲賓。自賓而外，皆以齒序。雖日習射尚功，而兼貴貴，尚齒猶鄉飲也。其黨正飲酒，則專爲正齒位而行禮，故豆之多寡與年遞增，而五十以下俱立侍于堂下。然考《周官·黨正》之文曰：「一命齒于鄉里，再命齒于父族，三命不齒。」則尚齒之中仍存貴貴之義焉。案：天子三命以下皆士，故如此分別。若侯國，則自一命以上，苟位列大夫，即不以齒序，爲少異耳。以上三禮，皆行之於在官者也。至賈疏謂鄉大夫飲國中賢者，用鄉飲酒禮，此即《論語》所云「鄉人飲酒」也。竊意此禮雖曰飲賢，然不過在坐皆賢者耳，其賓、介等必以年之先後次第爲之。若以德，則近於標榜矣；若以貴，又非尊賢之義矣。玩

「杖者出，斯出矣」之文，不云賓而云「杖者」，蓋賓即杖者中年之最高者，^①故即以杖者名賓也。賓出而其餘杖者俱出矣，故孔子亦隨之而出矣。若尚德不尚年，年少者既爲賓，杖者安得不俟而先出乎？明乎此，則知此禮必兼年高、有德者爲之矣。或謂此禮不立賓、介。夫不立賓，則獻、酢、酬之事俱不可行矣。故《燕義》曰：立賓主，飲酒之義也。見凡飲酒必立賓也。其或有賓無介，如州長習射之儀，亦未可定，但賓必兼年、德耳。說《論語》者往往以鄉大夫賓賢、黨正正齒位之禮汨之，故詳辨焉。」方氏苞云：「將興賢能，其德之蓄、行之恒、藝之習，惟鄉先生教之久，知之深，故就而謀焉。若州長習射，黨正正齒位，則賓之爵、齒、德久著於衆，無待於謀。注謂鄉大夫興賢能，不可易也。習射、正齒位，乃平時所以教士，故可遵其禮。敖繼公乃謂此士與其同鄉士、^②大夫會飲于鄉學之禮，誤矣。三者皆國政，故有司掌之。若士、大夫會飲，^③無爲著於國典，亦

①「中」，原脫，今據《儀禮管見》補。

②「士」，原脫，今據《儀禮析疑》補。

③「士大夫」，《儀禮析疑》作「大夫士」。

不宜行於鄉學。賈疏謂《鄉飲酒義》乃黨正正齒位之法，不知通篇皆正解鄉大夫與賢能、習射、正齒位，有賓而無介也。中間覆舉鄉飲酒之禮，「五十者立侍，以聽政役」，特約略黨正之正齒位以附之耳。《經義聞斯錄》曰：「鄭氏《三禮目錄》於《鄉飲酒禮》云：『諸侯之鄉大夫三年大比，獻賢者、能者於其君，以禮賓之，與之飲酒。』於《鄉飲酒義》云：『記鄉大夫飲賓于庠序之禮，尊賢養老之義。』是禮專屬賓賢能，而義統釋四事為異矣。或曰：《戴記·冠義》以下數篇，先儒以為《禮經》之傳，經不具者傳詳之。孔氏亦云：「此鄉飲酒之義，說《儀禮·鄉飲酒》也。」似不當分而為二。且鄭氏以此篇專屬賓賢能者，因《鄉飲酒義》有「六十者坐，五十者立侍」，「六十者三豆，七十者四豆」諸文，而此篇無正齒位事耳。但篇內云：「主人西階上獻衆賓，衆賓之長升，^①拜受者三人。」注云：「長，其老者。」「命弟子俟徹俎。」注云：「弟子，賓之少者。」記又云：「衆賓之長一人辭洗，立者東面北上。」^②樂正與立者皆薦以齒，是未嘗不論齒，且明言有立者矣。《孟子》曰：「鄉黨莫如齒。」《王制》曰：「習鄉尚齒。」鄉人飲酒無不以齒為主。《儀禮》之禮，《戴記》之義互相證明也。曰：州長習射飲酒

有賓而無介，有合樂而無升歌、笙樂、間歌，豈與鄉飲酒之禮一一符合乎？黨正蠟祭飲酒之禮雖亡，亦未必絕無異同可知。至鄉大夫飲國中賢者，僅見于《鄉飲酒義》「鄉人、士、君子」注中，他無可考。即有此事，亦未必盡用鄉大夫之禮也。鄭氏以禮為賓賢能義為統釋四事，必本經師舊說，確不可易矣。曰：然則呂氏謂鄉人會聚、飲酒皆行此禮，其說非歟？曰：《周禮·族師》「春秋祭酺」注云：「族長無飲酒之禮，因祭酺而與其民以長幼相獻酬焉。」疏云：州長、黨正有飲酒禮，皆得官物為之；今此族卑，不得官物為禮。可見此禮止于州黨，族尚不用，況其餘乎？「云於五禮屬嘉禮」者，盛氏世佐云：「《鄉飲酒義》孔疏云：『案鄭《目錄》云：此於《別錄》屬吉事。』陸氏《釋文》亦引鄭云：『《別錄》屬吉禮。』則以此為吉禮之說蓋出於劉向，而鄭君見之於《禮記目錄》，不始於孔氏也。又案：《禮記》冠、昏、鄉飲酒、燕、聘諸義，孔疏引鄭《目錄》皆云：『《別錄》屬吉事。』惟鄉飲酒、射二義，《釋文》引鄭云：『《別錄》屬吉

①

「升」上，原衍「拜」，今據《儀禮析疑》刪。

②

「者」，原重文，今據《儀禮注疏》刪。

禮。《釋文》「禮」字蓋「事」字之誤，鄭注《儀禮》於《冠》、《昏》、《鄉飲酒》、《射》、《燕》云「嘉」，^①而《聘》云「賓」者，以《周官》五禮言之也。若以事言之，則吉者對凶之辭。嘉也，賓也，皆可以言吉也。此鄭於《禮記目錄》所以復存劉說歟？」

鄉飲酒之禮，主人就先生而謀賓、介。

主人，謂諸侯之鄉大夫也。先生，鄉中致仕者。賓、介，處士賢者。《周禮·大司徒之職》：「以鄉三物教萬民，而賓興之：一曰六德，知、仁、聖、義、中、和；二曰六行，孝、友、睦、婣、任、恤；三曰六藝，禮、樂、射、御、書、數。」鄉大夫以「正月之吉受瀼于司徒，退而頒之于其鄉吏，使各以教其所治，以考其德行，察其道藝」，及三年大比，「而興賢者、能者。鄉老及鄉大夫帥其吏與其衆寡，以禮禮賓之。厥明，獻賢能之書于王」。是禮乃三年正月而一行也，諸侯之鄉大夫貢士於其君蓋亦如此。云古者年七十而致仕，老於鄉里，大夫名曰父師，士名曰少師，而教學焉，恒知鄉人之賢者，是以大夫就而謀之。賢者爲賓，其次爲介，又其次爲衆賓，而與之飲酒。是亦將獻之，以禮禮賓之也。今郡國十月行此飲酒禮，以《黨正》每歲「邦索鬼神而祭祀，則以禮屬

民而飲酒于序，以正齒位」之說，然此篇無正齒位之事焉。凡鄉黨飲酒必於民聚之時，欲其見化，知尚賢尊長也。《孟子》曰：「天下有達尊三：爵也，德也，齒也。」【疏】正義曰：《校勘記》云：「注『賓介處士賢者』者」下，《通典》有「也」字。案：《通典》引諸經傳注往往增入「也」字。就此篇論之，如「明其德各特也」、「拜賓至此堂尊之也」、「進酒于賓也」、「復西階上位也」、「坐于席也」、「以右手也」、「酬之言周也」、「賓謙不敢居堂上也」、「不啻啐下賓也」、「就賓南授之也」、^②「下賓也」、「長其老者也」、「賤者禮簡也」、「謂歌與衆聲俱作也」、「示絜敬也」、「以察衆也」、「又以序相酬也」，此類甚多，豈古本俱有「也」字而今本盡刪之歟？凡類書徵引羣籍有刪無增，此或原本如是，今不能一一細校，聊誌其概於此。「孝友睦婣任恤」，徐本作「姻」，張氏曰：「案：《周禮》姻作婣。鄭氏引經多用古字。若《玉藻》視朔、視朝，鄭氏引作眡；《周頌》於穆清廟，鄭氏引作庶。此必不改婣爲姻。」案：後刊行之本，^③原非康成手

① 「燕」上，《儀禮集編》有「射」字。

② 「賓」，《儀禮注疏》作「尊」。

③ 「後」下，《儀禮注疏校勘記》以爲有「世」字。

迹，張說殊未確。「受灋于司徒」「灋」，徐、葛、《通解》俱作「法」。案：「法」、「灋」今本錯出。「蓋如此云」「蓋」下疏有「亦」字。「天下有達尊三」下，徐本誤作「不」，嚴、鍾俱不誤。」○張氏爾岐云：「此《鄉飲酒禮》有獻賓，有樂賓，有旅酬，有無算爵、樂，凡四大段而禮成。此下至「當楣北面荅拜」，則將飲酒之始事，初謀賓、戒賓，次陳設，次速賓、迎賓、拜賓凡三節。」方氏苞云：「先生，鄉之致仕而教于黨庠、州序者也。《周官》：黨正書德行道藝，而州長考之，以贊鄉大夫廢興。其法必二十五家之塾，歲升其秀民于黨，而庠之師聚教焉，是黨正所憑以書其德行道藝，而待州長之考者也；序之師則時會而問、試、省、察焉，是州長所憑以書其德行道藝，而贊鄉大夫之興者也。故三年大比，鄉大夫就之而謀賓、介，即《周官》所謂「使民興賢，出使長之，使民興能，入使治之」也。古者官得其人而事無不治，皆由於此。」韋氏協夢云：「賓即所貢之一人，將獻于君，以賓客禮禮之，因謂之賓。介，輔也，佐也，所以輔佐賓者。謀賓、介，謂謀其孰可爲賓、介也。謀之未必在行禮之日，蓋因記飲酒禮而追言之耳。主人戒賓以下，皆本日事也。」

注云「主人，謂諸侯之鄉大夫也」者，賈疏云：「大國三鄉，次國二鄉，小國一鄉。」《釋官》云：「《左傳》有鄉正，《國

語》有鄉長，韋、杜皆以鄉大夫釋之，則諸侯有鄉大夫矣。《周禮》：「鄉大夫，每鄉卿一人。」諸侯以大夫爲之，亦當鄉置一人。古者軍出于鄉，天子六軍出自六鄉。諸侯大國三軍，次國二軍，^①小國一軍。《費誓》：「魯人三郊三遂。」則賈氏大國三鄉、次國二鄉、小國一鄉之說信矣。孔穎達謂諸侯三鄉、卿二鄉、大夫一鄉，非也。《周禮》六鄉大夫皆屬於司徒，故其職曰「受教灋于司徒，退而頒之于其鄉吏」。諸侯則使卿分掌之，《左傳》宋二師令四鄉正，晉趙孟問其縣大夫，則其屬。《國語》：高子帥五鄉焉，國子帥五鄉焉，是諸侯之鄉大夫統於卿也。」引《周禮》·大司徒之職《與《鄉大夫》者，因諸侯鄉大夫經無明文，因以天子之官況之，故引《周禮》以證，而云「諸侯之鄉大夫貢士于其君，蓋如此云」也。「云古者年七十而致仕老于鄉里，大夫名曰父師，士名曰少師，而教學焉」者，《尚書大傳》云：「大夫七十而致仕而退，老歸其鄉里。大夫爲父師，士爲少師。」是注所本也。云「賢者爲賓，其次爲介，又其次爲衆賓，而與之飲酒。是亦將獻之，以禮禮賓之也」者，賈疏云：「據鄉貢一人，其介與衆賓不貢，但輔賓行禮，待後年還以貢之耳。大

① 「軍」，原作「君」，今據《續清經解》本改。

國三鄉，次國二鄉，小國一鄉，鄉送一人至君所，其君簡訖，仍更行鄉飲禮，賓之于王。」云「今郡國十月行此飲酒禮，以《黨正》每歲「邦索鬼神而祭祀，則以禮屬民而飲酒于序，以正齒位」之說，然此篇無正齒位之事焉」者，此舉漢時所行鄉飲酒禮，用《黨正》正齒位之說，與此篇不同。漢罷諸侯之國爲郡，郡有太守，而封王子母弟者仍爲國，故曰郡國。案：漢時鄉飲酒禮今不可考。建武時，伏湛奏行鄉飲酒禮，遂施行之。《禮儀志》：「明帝永平二年，郡國、縣、道行鄉飲酒于學校。至鄭君蓋尚遵而行之，故據所目見以證其相異也。」云「凡鄉黨飲酒必於民聚之時」者，程易田云：「十二月大蠟，乃民聚之時。此篇行于正月，與十二月相連，亦爲民聚之時。引《孟子·公孫丑》篇文，賓賢能爲尚德，正齒位爲尚齒，爵則連引之耳。」主人戒賓，賓拜辱。主人荅拜，乃請賓。賓禮辭，許。主人再拜，賓荅拜。戒，警也，告也。拜辱，出拜其自屈辱至己門也。請，告以其所爲來之事。不固辭者，素所有志。【疏】正義曰：「主人戒賓」，張氏爾岐云：「言主人往至賓門，欲相警告，非謂已戒之也。至請賓，方是發辭相戒耳。」江氏筠云：「賈疏云：『《冠禮》主人戒同寮，同寮尊，又使

之加冠於子，尊重之，故主人先拜，賓荅拜。此則鄉大夫尊矣；賓是鄉人，卑矣，又將貢己，宜尊敬主人，故賓先拜辱。」案：《冠禮》戒賓，亦賓先拜，主人荅拜。不言者，以有宿賓之儀見之也。果主人敬客而先拜，則何以速賓，賓西面再拜，主人東面荅拜乎？且疏於彼處已明謂與此同矣。彼疏云：「《鄉飲》、《鄉射》戒賓，皆與此文不同。此經文不具，當依彼文爲正。」何得於此又爲異說也？蓋緣下主人速賓，賓拜送之說故耳。下疏云：「《聘禮》：賓至近郊，使下大夫至賓館。下大夫遂以賓人，賓送不拜。《公食禮》：使大夫戒賓，大夫還，賓不拜送，遂從之。此獨拜送者，亦是鄉大夫尊，賓卑，又擬貢故也。」下既爲此說，故牽此以就之，然其說亦誤也。蓋不拜送者，爲從之不終事。此經雖云「賓及衆賓皆從之」，其實賓與介俱不得從主人。賓之所以不從主人者，緣主人速賓從更須速介也。速介後雖無事，然下文：「主人迎于門外，拜，賓拜，介揖衆賓。是賓、介、衆賓一時同來，介須挾衆賓隨賓偕行，亦不得獨從主人也。且《公食禮》疏云：『《鄉飲》、《鄉射》戒賓遂從之，而云拜辱、拜送者，以其主人先反，不相隨，故得拜辱、拜送。』則又與此違反，不知賈果以何說爲正也。」乃請賓，敖氏曰：「謂致戒辭于賓也，其辭卒曰『請子爲賓』。」韋氏協夢

云：「主人明是戒賓，而云請者，謙遜詞。」「主人再拜」，張氏曰：「拜其許己也。」盛氏世佐云：「賓先拜，主人荅拜者，考《士冠》宿賓、《鄉射》戒賓皆然，是亦禮之常也。《士冠》戒賓云：『賓禮辭，許。』主人再拜，賓荅拜。」主人之拜是拜賓之許己，非先拜也。方其始至賓家之時，仍當賓先拜。彼不言者，文不具耳，以宿賓禮例之可見也。蓋主人至賓家戒之，則主人為賓，賓為主人。賓既為主人，禮應先拜。疏家誤謂《冠禮》主人先拜，而其釋此賓先拜之故亦黏滯。」注云「拜辱，出拜其自屈辱至己門也」者，敖氏云：

「拜辱，即拜迎也。」方氏苞云：「主賓往來無稱拜辱者，惟此篇戒宿再言『拜辱』，示所舉不稱，恐為舉者之辱也。賓拜賜、主人報禮亦稱拜辱，示功罪榮辱彼此共之也。始出迎，賓主各一拜；既而許，^①則主人再拜，示為國求賢之重，使士進身之始，即知不可苟於自待也。《鄉射禮》主人戒宿，賓不言拜辱；而賓拜賜，主人荅之則稱拜辱，何也？習射，國政也。以公事相戒，非私禮於賓，無為稱拜辱。射禮或公士為賓，則非其屬也，不可不拜其辱。而既有此禮，即學士為賓亦不容異同，蓋其德行道藝異日宜與賓興之選，以貴下賤，辭過於恭，亦所以勵士節也。」盛氏云：「主人，鄉大夫也。賓，處士也。主人戒賓，當如先生異爵者請

見禮。先生異爵者請見，先見之，不敢拜迎。而此乃云「拜辱」者，當賓興大典，主人好善忘勢，而賓亦以道自重，故以處士而儼然與大夫抗禮，不為驕也。」案：古言拜辱者，以賤稱尊之辭。如《左傳》「敢拜君命之辱」，「子以君命辱于敝邑」，「無若諸侯之屬辱在寡君者何」，此類甚多。以君臨臣，則君為尊，臣為卑，謂之辱；以賓臨主，則賓為尊，主為卑，謂之辱。此主人，鄉大夫也；賓，處士也。主人至賓家戒之，則主人為賓，賓為主人，故為以卑稱尊之詞，而拜其自屈辱也。云「不固辭者，素所有志」者，此以《士相見禮》固辭例之也。朱子曰：「學成行修，進仕于朝，上以致君，下以澤民，此士之素所有志也。」張氏曰：「德業既成，欲及時而試也。」盛氏曰：「《士冠禮》、《鄉射禮》于主人戒賓，皆云「禮辭，許」，不聞有固辭者。一辭而許，為賓之道固然，此亦如其常而已。以為將貢己而固辭，君子惡其矯也。」

主人退，賓拜辱。退，猶去也。去又拜辱者，以送謝之。【疏】正義曰：敖氏云：「此拜辱即拜送也。拜迎、拜送，皆言『拜辱』者，蓋一儀而兼二義也。迎送者，據己言也；辱者，據彼言也。此經言戒賓之儀略者，亦以《士冠

①「既」下，《儀禮析疑》有「請」字。

禮《宿賓》之儀見之也。下「速賓」放此。」○程易田云：「注『退，猶去也』，謂主人出賓門，賓送出門，又拜其辱也。」盛氏世佐云：「凡賓主相見，始而拜迎，退而拜送，禮之常也。拜迎可名拜辱，拜送獨不可名拜辱乎？鄭君求其說而不得，因有以送謝之之解。疏又云：『將貢己，宜尊敬主人，是以去又拜辱，以送謝之。』何見之陋也？夫主人之於賓，即後世之所謂舉主也，所謂座主、門生也。古者鄉舉里選，一以德行道藝為主，而進退之權在舉之者自盡其職之所當爲，❶非以樹恩也。而所舉者亦必克副其實，而後應之。公義重而私恩輕，何僕僕而亟謝爲？爲此說者，習見漢世報舉主之厚而意之耳。夫以漢世篤交念故之誼，議者猶或非之，況自中唐而後，一蒙賞拔，名曰恩門，長奔競之風，胎朋黨之禍，其流弊可勝道哉！韓子曰：『吾未嘗聞有登第於有司而進謝其門者。』斯固有識者之所恥也，豈先王制禮而不慮及此乎？然則飲酒之明日，賓鄉服拜賜，何也？曰：謝其以禮禮己也。夫禮，未有見禮于人而不之謝者。鄉射非貢士，賓亦拜賜，是已。爲貢己而以送謝之，私也。爲貢己而明日不拜賜，避嫌也。避嫌，亦私也。此於士習官方頗有關係，故不敢不辨。」據此論甚正，❷但鄭君所謂「以送謝之」者，謂謝其以禮禮己：於其來拜而迎之，❸謝

其辱尊以就卑；於其退拜而送之，謝其秉禮以禮己，仍飲酒明日賓鄉服拜賜之意。彼謝於禮之成，此謝於禮之始。謂「將貢己，宜尊敬主人」，乃賈氏之無識，非鄭意也。且報舉主之厚，此自漢時之陋習，然如周舉之奏左雄、張陵之劾梁冀，伸公義以抑私情者未嘗無之，況鄭君乎？鄭君高尚，不受朝服之徵，詎至囿於時趨，而以習俗之見解先王之《禮經》乎？盛氏并詆之，昧於知人之法矣。介亦如之。如戒賓也。【疏】正義曰：注云「如戒賓也」者，張氏爾岐云：「謂如戒賓時拜辱，請許諸儀也。」

右謀賓戒賓

乃席賓、主人、介、席，敷席也。夙興往戒，歸而敷席，賓席牖前，南面；主人席阼階上，西面；介席西階上，東面。【疏】正義曰：注云「席，敷席也」者，經文「乃席」爲句，謂爲賓、主人、介敷席也。經不言敷席面位，注知之

❶「權」，《儀禮集編》作「故」。

❷「據」，《儀禮正義正義》作「案」。

❸「其」，原作「是」，今據《續清經解》本改。

者，《鄉飲酒義》云：「四面之坐，象四時也。天地嚴凝之氣始于西南，而盛于西北。此天地之尊嚴氣也，此天地之義氣也。」^①天地溫厚之氣始于東北，而盛于東南。此天地之盛德氣也，此天地之仁氣也。主人者尊賓，故坐賓于西北，而坐介于西南以輔賓。賓者，接人以義者也，故坐于西北。主人者，接人以仁，以德厚者也，故坐于東南。而坐僕于東北，以輔主人也。」又曰：「賓必南鄉，介必東鄉，主人必居東方。」注本此為說也。敖氏曰：「席賓于戶牖間，主人于東序，介于西序。《少牢》下篇：『席主人于東序，西面，席侑于西序，東面，侑、介之位同也。』方氏苞云：『自聘、饗、燕、射，下及冠、昏，賓席于戶牖之間，乃一定不移之位也。下文云：『衆賓之席，皆不屬焉。』《鄉射禮》曰：『衆賓之席繼而西。』則位與賓並明矣。下文又云：『尊兩壺于房戶之間。』《鄉射禮》曰：『尊于賓席之東。』則尊當房戶之中，賓席于戶西牖東，而遵席于尊東具見矣。蓋以尊為節，三賓則繼賓而西，諸公與大夫則相繼而東，位正相配，地始可容也。尊之左右，既無地可以席介，自當席于西序，而與主人相對矣。介之位不繼于賓，所以伸賓之尊也；不與三賓同列，又所以伸介之尊也。」衆賓之席，皆不屬焉。席衆賓於賓席之西。不屬者，不相續也。皆獨坐，明其德

各特也。【疏】正義曰：李氏如圭云：「衆賓，衆賓之長三人也。」楊氏復云：「《鄉飲酒禮》注『席賓于牖前』，與《周禮·司几筵》『筵國賓于牖前』似同而實異。賓席在西北，以天子、諸侯室有東、西房言之，則室前之中為中；此乃王位設扆之處，自中以西便為西北，又云牖前，^③如《司几筵》『筵國賓于牖前』是也。以大夫、士東房西室言之，房室之間為中，故戶西牖東西北之位，家、鄉、國皆以為重。《士冠》禮子，筵于戶西，《士昏》禮婦，席于戶牖間，《鄉飲》席于牖前，《鄉射》賓席在于戶牖之處，名雖不同，皆是一義。《鄉飲》雖是牖前，亦是牖東也。蓋戶西牖東，正西北之賓位也。《士冠》禮子，《士昏》禮婦亦在此位，敬禮之如賓客然，所謂『體于客位』者也。^④若牖前，則近于西北隅矣。果賓席在牖前，則三賓當如《鄉射·記》東面北上。今經云『衆賓之席，繼而西』，則賓席決不在牖前明矣。雖然，此特以鄭義大夫、士東房西室言之也。又案：陳祥道云：「《鄉

①「義氣」，原倒，今據《續清經解》本改。

②「禮」，《儀禮析疑》作「記」。

③「云」，原作「是」，今據《儀禮圖》改。

④「者」，《儀禮圖集注》作「是」。

飲酒《薦脯五挺出自左房，《鄉射·記》籩豆出自東房，《大射》宰胥薦脯醢由左房。夫鄉飲、鄉射、大夫禮、大射，諸侯禮，其言相類。蓋言左以有右，言東以有西，則大夫、士之房室與諸侯同可知。鄭謂大夫、士無西房，恐未然也。」
 敖氏云：「屬，連接也。必不屬者，為其升降皆由下也。以是觀之，則賓位在戶西牖東，而當兩楹之間明矣。此席亦東上，凡席皆有司設之。」郝氏敬云：「古者大饗，必於宗廟。廟堂後中為室，室東為房。室與房皆有牖，有戶，牖皆居中，戶皆在牖東，皆南向。故戶牖間為堂中，賓席在焉。賓所立位在堂西階上，東向；主席在堂東階上，西向。此廟中之禮也。鄉飲酒不行于廟，于學宮諸館舍，其位次與在廟殊。饌席皆在堂上，而拜立之位仍在東西階，故或退而復位、進而升席也。」方氏苞云：「《鄉射禮》：『衆賓之席，繼而西。』彼州民習射，故席相屬，以示鄉黨齒讓之風；此國興賢能，故不相屬，以彰朝廷尊賢之義。又於此經見《鄉射》之賓相屬，于《鄉射》見此衆賓之席亦繼而西也。」姜氏兆錫云：「鄉飲酒席位，經無明文，注蓋據《鄉飲酒義》而言也。但《鄉飲》、《鄉射》之席，賓與衆賓之席皆相繼而不屬，言其遞為位則相繼，言其各為位則不屬，二者參互推之，可見非有殊禮也。所以《鄉射》言『繼而西』；《鄉飲》言

「皆不屬」者，《鄉射》單以賓與衆賓言之，故言「繼而西」，而《鄉飲》合「席賓、主人、介、衆賓之席」凡十字為句，^①則賓與衆賓雖不屬而自相繼。主、介一東階，一西階，則不相屬而亦不相繼矣。而賈疏於句讀有差，因於義釋有誤，乃謂賓以將貢于君，有所殊別，故衆賓之席不屬而不相繼也。疎矣。」^②秦氏蕙田云：「衆賓席于賓西南面，賓長三人，即《鄉飲酒義》所謂三賓也。不屬者，謂衆賓之席不與賓相屬，所以尊賓也。《鄉射》主習民以禮樂，故衆賓之席繼賓而西，不相別異。若《鄉飲》主於興賢，賓則賢能中尤異者，故特貢之。衆賓既不與於貢，安得不與賓相別？注謂衆賓皆獨坐，似未得經旨。」盛氏世佐云：「此節當以『乃席賓』三字為句，『主人介衆賓之席』為句，郝氏、姜氏析句俱未安。經但言席賓，而不言位面，以見于《鄉射禮》者可參考也。《鄉射》無介，注知介席在西階上東面者，以《少牢》下篇席侑之處見之也。」^③《鄉射禮》衆賓之席繼而西，此則

①「合」下，《儀禮經傳》有「言」字。

②「疎矣」，《儀禮經傳》作「不亦率焉之說而使經義之盡晦哉」。

③「篇」下，《儀禮集編》有「所載」二字。

云「不屬」者，興賢大典，所以殊異賓于衆也。皆者，皆主人、介、衆賓也。主人也、介也，與賓之席遠矣。云「皆不屬」者，詞雖總承，而意則專主於衆賓也。敖氏謂爲其升降皆由下，姜氏謂言其遞爲位則相繼，言其各爲位則不屬，二說皆未得經意，當以《注疏》爲正。但注家誤看經文「皆」字，謂衆賓皆獨坐，則猶未盡也。經意蓋謂主人、介、衆賓之席皆不屬於賓耳，非謂衆賓各不相屬也。賓是所興賢能之人，故別異之。彼衆賓者既不得與於貢，則其德故相埒也，焉得人人而別之乎？又案：古人宮室之制，前堂後室，室之東西偏曰房，室與房皆有戶，室又有牖。戶在東，而牖在西。戶牖之間，堂之中也，故古人重之。室之有東、西房者，則以牖前爲賓位，取其在西北也，《司几筵》所云是也；室之有東房而無西房者，則以戶牖之間爲賓位，亦取其任西北也，《士冠禮》、《士昏禮》所云是也。鄭氏謂大夫、士東房西室，以其私家言之也。《鄉飲酒》行禮于庠，《鄉射》于序，庠、序皆學舍，與私家之制異，安見其必無西房乎？陳氏祥道之說極爲有據，然此注不曰賓席戶牖之間，^①而曰席賓牖前，則鄭氏固未嘗謂其無西房也。若無西房，則牖前乃堂之西北隅。賓既席于此，則賓西更無容席之地，不得云「衆賓之席，繼而西矣」。惟有西房，故賓席

雖在室之牖前，而其西尚可以容衆賓之席也。然則此注所云「牖前」，與《司几筵》所云「牖前」其實無以異也。楊氏因陳氏之言而疑鄭氏大夫、士無西房之說之誤，殆未明於庠、序與私家之異歟？《經義聞斯錄》曰：「注云「賓席牖前」，不知何本。或曰：牖在戶西，賓席牖前，正所謂「坐賓于西北」也。特古人賓位以戶西爲正，《士冠禮》醺子，筵于戶西，而記云「醺于客位」，《燕禮》「司宮設賓席于戶西」是也。《射義》云：「卿、大夫、士之射也，必先行鄉飲酒之禮。」考《鄉射禮》「席賓西南，東上」注云：「不言于戶牖之間。」此射于序，序無室，故不言戶牖，然賓位正中，即此可見。鄉飲酒在鄉學有室，賓席在戶西必然矣。乃以爲牖前，非自矛盾乎？揣鄭氏之意，不過欲會通《鄉飲酒義》之文耳。然《鄉飲酒義》皆約略之語，賓居戶牖之間，衆賓之席繼而西，大勢在堂之西北，即謂之坐賓西北奚不可者？曰：鄉飲酒之位似與《鄉射》微有不同。《鄉飲酒》賓、主人、介、衆賓之席皆不屬。《鄉射》則無介，「衆賓之席，繼而西」，亦其一也。《鄉射》賓在戶西，尊在賓東，遵在尊東。《鄉飲酒》：賓在牖前，遵在戶前，尊在遵東。若有諸公，則大夫又在尊

①「不曰」，原作「又云」，今據《儀禮集編》改。

東。《鄉射》言僕人，序于賓東。《鄉飲》言席于尊東。固不得以鄉射之位爲即鄉飲之位也。注說必有所受。先儒又謂賓在戶牖間，主人自阼階上望之，若在西北。誠如是，則介正在主人之西，大夫正在主人之北，何以一曰西南、一曰東北邪？」案：此節盛氏駁郝氏、姜氏析句之非，竊謂盛氏亦未爲得也。考注云「席，敷席也」，則以「乃席」爲句，「賓主人介衆賓之席」爲句，上席言敷席，下席言其所坐之席，「二席」字皆總賓、主人、介、衆賓言之。「皆不屬焉」句亦總承賓、主人、介、衆賓也。《鄉飲》不言席之面位，而《鄉射》著之；《鄉射》不言皆不屬，而《鄉飲》著之：互相見也。賓、主人、介席之不屬，其事易明。衆賓之席，或有疑其相屬者，故注以「皆獨坐」明之，是衆賓三人其席亦各不屬也。說者多不得其解而妄駁之。尊兩壺于房戶間，斯禁。有玄酒，在西。設筐于禁南，東肆，加二勺于兩壺。斯禁，禁切地無足者。玄酒在西上也。肆，陳也。【疏】正義曰：設尊之例，詳見《士冠禮》。「房戶間」，吳氏澄云：「東房之西，室戶之東，在賓主之間。雖主人之設，而賓亦以之酢主人也。」方氏苞云：「房戶間，東西之度。《鄉射禮》曰『尊于賓席之東』，則在戶外，而南北淺

深之度具見矣。賈疏：「冠醴子、昏醴婦，尊皆在房隱，^①見其質；冠醴子及《鄉飲》、《鄉射》、《特牲》、《少牢》，尊皆在顯處，見其文。」非也。房中、戶外辨于賓，賓親酌與否與酒體文質何涉乎？冠、昏洗在北堂，故尊于房中，以便事也。房中、北堂皆婦人所有事，醴唯一舉，使贊者洗酌以授賓于戶外可耳。醴則三洗三酌，賓皆親之，使賓數出入于房中、北堂，則幾於瀆矣。《鄉飲》、《鄉射》獻酬皆在堂階，自無尊于房中之義。《特牲》、《少牢》則尸、祝、賓、侑、主人、主婦之簋、豆、鉶、羹皆陳于房，而主婦、宗婦、贊者、女賓皆立而待事，故尊于戶外，寧使主婦時出而酌獻，即長賓、長兄弟非獻尸薦俎不得出入于房戶，^②況衆賓、衆兄弟之獻酬無算，而可使人酌于房中乎？凡此皆禮之以義起、顯著而無可疑者，不可以曲義汨之。」「斯禁，有玄酒，在西」，李氏如圭云：「凡尊必尚玄酒」，大夫尊用棖，士用禁。斯禁即棖也，無足似棖，故謂之棖。士禁有足。《少儀》曰：「酌者之左爲上尊。」尊南嚮，酌者北面，故西爲上

① 「隱」，原作「顯」，今據《續清經解》本改。

② 「出」，原作「主」，今據《儀禮析疑》改。

也。」吳氏澄云：「斯禁，一名櫨，長四尺，廣二尺四寸，^①深五寸，無足。大夫用櫨，士用禁，北面設尊，玄酒在左，^②在酒尊之西也。」設簋于禁南，東肆，李氏曰：「東肆者，簋首在西，向東陳之。」敖氏曰：「設簋于禁南，其間當容人，蓋酌者北面也。東肆，放尊之西上也。」凌氏《釋例》曰：「凡堂上之簋在尊南，東肆。堂上之簋，所以實獻酬爵觶也。《鄉飲酒禮》：『設簋于禁南，東肆。』《鄉射禮》：『尊于賓席之東，簋在其南，東肆。』《鄉飲酒》：『主人獻賓，坐取爵於簋，降洗，此堂上之簋也。』適洗，南面，坐奠爵于簋下，此堂下之簋也。賓酢主人，亦用此爵。主人受酢畢，奠爵于東序端。主人酬賓，坐取觶于簋。亦堂上之簋也。此觶賓奠于薦東，不舉。主人獻介，仍用前東序端之奠爵。獻介畢，介降洗，升，授主人爵于兩楹之間。主人實爵，自酢畢，奠此爵于西楹南，及獻衆賓，仍用此西楹南之奠爵。獻衆賓畢，主人始以此爵降，奠于簋。此則堂下之簋也。《鄉射》：『主人獻賓畢，奠爵于序端，酬賓後，即取序端之爵獻衆賓。無介故也。餘皆與《鄉飲酒》同。』《鄉射》：『主人獻賓，坐取爵于上簋，以降。』疏云：「凡取爵于簋以降者，皆是上簋。」《鄉飲酒》：『不言上者，文略也。』《燕禮》、《大射》：^③堂上不設簋，雖膳簋亦在堂下也。」又曰：「《鄉飲酒·記》：

「獻工與笙，取爵于上簋。既獻，奠于下簋。」注：「明其異器，敬也。如是，則獻大夫亦然。上簋三爵。」楊氏復曰：「上簋爵三，觶一：獻賓、獻遵、獻工皆異爵，三也；主人取觶酬賓，一也。下簋觶四：一人舉觶為旅酬始，一也；司正舉觶，二也；二人舉觶為無算爵始，四也。」敖氏云：「上簋爵三，觶一，下簋觶三。」說與楊氏異。蓋謂一人所舉之觶，旅酬畢，則仍奠于下簋，至二人舉觶時再取之，故云「下簋觶三」也。又云：^④「既獻工，則奠于上簋；既獻笙，則奠于下簋。」^⑤「加二勺于兩壺」，敖氏云：「記云：『尊給冪，賓至徹之。』則此二勺皆加于冪上矣，亦與祭禮微異。」張氏爾岐云：「兩壺，酒與玄酒各一也。斯禁以承壺，玄酒在酒之西。設簋貯爵，在禁之南，向東陳之，其首在西。壺各有勺，以備挹酌。」注云：「禁，斯禁，禁切地無足者」，吳氏廷華云：「賈疏引《玉藻》：『大夫側尊用櫨，士側尊用禁』注以

①「二尺四」，原作「四尺二」，今據《三禮考注》改。

②「玄」，原作「之」，今據《三禮考注》改。

③「大射」，原脫，今據《禮經釋例》補。

④「又」上，《禮經釋例》有「敖氏」二字。

⑤「則」，《禮經釋例》作「乃」。

檜爲斯禁；引《禮器》注又以斯禁無足似檜，即所謂漸盡之名，故知切地無足。據此，則斯禁即檜，本大夫器。注以士所用之禁解大夫之斯禁，則似同一無足矣。疏謂鄭以大夫、士雙言之者，此也。據《特性禮》曰「壺禁」，是禁也；記則曰「檜禁」，則又是斯禁。兩說不符，故彼注謂祭尚厭飫，^①得與大夫同器，不爲神戒也。愚案：《禮器》云：「禮有以下爲貴者。天子之尊廢禁，^②大夫、士檜禁。」所謂「廢禁」者，蓋合禁與斯禁並廢，是尊爲最下。檜雖無足，然尊之下尚有檜，比廢禁者爲稍上，故大夫用之。禁有足，則又上矣，故士用之。所謂以下爲貴也。若如此疏同名檜、禁之說，則混檜、禁而一之，既與《玉藻》大夫、士之說不符，又與《禮器》以下爲貴說不符。若以《禮器》、《玉藻》爲不足據，則《少牢禮》曰檜，《特性禮》曰禁，此則經之可據者，不得因《特性·記》檜禁說，遂謂《禮器》亦同名檜禁也。況據《少牢》疏謂《特性》用檜仍云禁，蓋因彼記與經不符，故曲爲合一之解。若謂彼經所謂禁者，其名曰禁者，其實用檜，記所謂檜禁者，其實亦用檜而名之爲禁。其說本屬牽合，然可見彼記所謂檜禁者，特名檜爲禁，非同名檜禁之謂，^③則其說禮器者謬矣。至豐與舟之說，據《燕禮》云「公尊瓦大兩，有豐」，形似豆，^④疏以爲承尊之物。又據《司尊彝》

裸時虎彝、雌彝皆有舟，注以爲尊下臺，若今時承盤。蓋亦檜禁之類，則與《禮器》廢禁之說又不符矣。^⑤褚氏寅亮云：「記言賓至而徹幕，《少牢禮》戶即位而徹幕，其節一也。第此則覆幕而即加勺，彼俟徹幕而始加勺，爲少異耳。」設洗于阼階東南，南北以堂深，東西當東榮。水在洗東，筐在洗西，南肆。榮，屋翼。

【疏】正義曰：設洗之例，詳《士冠禮》。張氏爾岐云：「南北以堂深，謂以堂廉北至屋壁之遠近爲洗去堂之遠近也。疏云『假令堂深二丈，洗去堂亦二丈，以此爲度』是也。堂上設筐，此復設筐者，上筐所貯三爵，每一爵行畢，即奠下筐，且貯餘觶也。」高氏愈云：「此時堂上、堂下設凡二筐：上筐以貯爵觶，凡獻酬者於是貯之；下筐則虛設之，凡以虛爵降者，則實之於其中也。」凌氏《釋例》曰：「凡堂下之筐，設于洗西，南肆。《鄉飲酒禮》：『筐在洗西，南肆。』《鄉

- ①「厭」，原作「燕」，今據《儀禮疑義》改。
- ②「天子」下，《儀禮疑義》有「諸侯」二字。
- ③「非」，原作「然」，今據《儀禮疑義》改。
- ④「形」上，《儀禮疑義》有「注謂豐」三字。
- ⑤「器」，原作「記」，今據《儀禮疑義》改。

射禮同。此皆堂上設篚，而于堂下又設篚者也。《士冠禮》：「醢用酒，洗有篚在西，南順。」注：「篚亦以盛勺觶，陳于洗西。南順，北爲上也。」《燕禮》：「篚在洗西，南肆，設膳篚在其北，西面。」注：「肆，陳也。膳篚者，君象觚所饌也，亦南陳，言西面，尊之，異其文。」《大射儀》：「篚在洗西，南陳，設膳篚在其北，西面。」注：「或言南陳，或言西面，異其文也。」疏云：「洗篚言南陳，亦西面；膳篚言西面，亦南陳。」《特性饋食·記》：「篚在洗西，南順，實二爵、二觚、四觶、一角、一散。」①《少牢饋食禮》：「設篚于洗西，②南肆。」此皆堂上不設篚，而但于堂下設篚者也。《燕禮》、《大射》二篚皆在堂下。盛氏世佐云：「二篚，一盛諸臣飲器，一盛君飲器。而無堂上篚者，蓋堂上之篚所以盛爵。燕禮輕，不用爵也。」考楊信齋謂《鄉飲》上篚爵三、觶一，是上篚亦盛觶也；《特性·記》下篚實爵二，是下篚亦盛爵也。盛氏之說恐非。蓋《鄉飲》、《鄉射》賓主皆尊，禮盛，故堂上、堂下並設篚。《燕禮》、《大射》君燕其臣，禮殺。《特性》、《少牢》祭畢而飲，禮更殺，故僅設堂下之篚歟？」

右 陳 設

羹定。肉謂之羹。定，猶孰也。【疏】正義曰：李氏如圭云：「肉孰即定止，不敢煩勞賓，故以羹定爲速賓節也。」○注云「肉謂之羹」者，《爾雅·釋器》文。敖氏謂肉與湑同在鑊，故謂之羹。云「定，猶孰也」者，王氏《述聞》曰：「定者，成也，言成熟也。《淮南·天文訓》：「秋分而禾菓定。」高注曰：「定，成也。」《晉語》：「謀既成矣。」韋注曰：「成，定也。」《孟子》：「苟爲不孰。」趙注曰：「孰，成也。」是定、成、孰三字同義，故曰「定，猶孰也」。案：漢儒訓詁凡云「猶」者，皆通其引申之義也。定訓爲成，成訓爲孰，孰與定義稍隔，故云「猶」以通之也。主人速賓，賓拜辱。主人荅拜，還，賓拜辱。速，召也。還，猶退。【疏】正義曰：盛氏世佐云：「拜辱，即拜送也。《聘禮》：「使下大夫至賓館。《公食大夫禮》：「使大夫戒賓。」二處賓皆不拜送者，以賓遂從之也。此處賓不遂從，故仍行拜送之禮。」案：上拜辱，拜迎也，辭主人之來速也；下拜辱，拜送也，於其還而拜以送之也，亦如戒賓之儀。注云「速，召

① 「散」下，原衍「四」，今據《續清經解》本刪。
② 「篚」，原脫，今據《禮經釋例》補。

也」者。敖氏云：「召之而云速者，欲其來之速也。」云「還，猶退」者，「戒賓」節云：「主人退，賓拜辱。」此云「還」，猶彼之云「退」也。介亦如之。如速賓也。【疏】正義曰：注

「速賓」，《校勘記》：「徐本、《集釋》俱作『賓速』。」○敖氏云：「衆賓亦戒速，而唯言賓、介者，^①亦以主人親爲之，其禮重，故著之爾。」^②蔡氏德晉云：「介亦如之，亦主人親速也。衆賓則但使人速之。」賓及衆賓皆從之。從，猶

隨也。言及衆賓，介亦在其中矣。【疏】正義曰：李氏如圭云：「《鄉飲酒義》曰『主人親速賓及介，而衆賓自從之』，則衆賓，主人不親速。」方氏苞云：「戒與速，《注疏》言及賓門而不言其所。」^③賓或取於一黨一庠之中，而衆賓散布五州二十五黨之內，若戒宿于其家，不惟異黨異州之士不能羣萃以待于賓之門，如賓、介各處一偏，則亦不能同日而戒，況羹定而後速乎？其法必州黨之師、賓介之當與與衆賓之觀禮者，前期聚於某州之序，而後鄉大夫就問焉。及期則賓、介、衆賓次於近序之庠，故可俟羹定，鄉大夫躬速，而賓及衆賓皆從之也。鄉不設學何也？鄉大夫以六卿攝，不能親教學，且以便學子，俾各近其家而省勞費耳。」主人一相迎于門外，再拜賓，賓荅拜；拜介，介

荅拜。相，主人之吏擯贊傳命者。【疏】正義曰：張氏爾

岐云：「主人于羣吏中立一人以相禮，與之迎賓于庠門外。」方氏苞云：「主賓之禮交擯傳辭，故《聘禮》上介問下大夫尚以三介從。鄉大夫，國卿也，而一相。以賓乃鄉民之秀，無擯可陳，承鄉大夫之命而相厭，以人無辭可傳。若陳擯以臨之，則非降尊以下賢之義，故惟用一相也。其不曰擯而曰相，以主于相禮，非接賓。鄉大夫不可以獨出與賢士接，又不可使胥吏問廁，故惟以相禮者從。」又曰：「賓主獻酬、進退、拜興之節會有目視不能及者，皆相者詔之，故於出門迎賓，特著一相，以見凡禮皆相贊也。《冠》、《昏》、《相見》無此文，其禮皆目視所能給。擯者，特傳詞耳。」敖氏曰：「拜介亦再拜，文省耳。」方氏苞云：「敖說非也。介于戒、速禮壹同于賓，故並曰介亦如之。惟迎賓再拜而介一拜，故特文以著之。蓋戒、速於私家，故同之以見用貴下賤之常；迎於公所，故異之以示爲國選賢之序：義並行而不相悖也。」注云「相，主人之吏擯贊傳命」者，盛

①「而」下，《儀禮集說》有「經」字。

②「故」下，《儀禮集說》有「特」字。

③「及」，《儀禮析疑》作「至」。

氏世佐云：「古者黨有庠，術有序。教民之職在鄉則掌于州長，黨正以下，而統于鄉大夫；在遂則掌于縣正，鄙師以下，而統于遂大夫。治民之官即教民之官，非若後世守令之外別有教職也。主人，鄉大夫也。自州長以至比長，皆其屬吏。此相恐是擇州長中一人爲之。《周禮·州長職》云：『三年大比，則大考州里，以贊鄉大夫廢興。』則相主人者，舍州長而誰？學中有司，如樂師、大小胥之屬，於國學則有之，鄉學則未之前聞也。」揖衆賓。差益卑也。拜介、揖衆賓皆西南面。【疏】正義曰：注云「差益卑」者，以上文再拜賓，一拜介，是介差卑於賓。此於衆賓不拜而揖，是衆賓卑於介，益卑於賓也。方氏苞云：「祭祀之衆賓半主人之屬吏，而主人拜送于門外。飲射之衆賓終不拜送，始則揖之而使自入，何也？祭者，主人之私事，故大夫雖尊，衆賓長之獻則交拜焉；衆賓之出，則拜送焉。同之于賓，所以報其勤也。興賢能、教射，則國政也。賓、介乃德行道藝之越衆者，故特申其敬，屈貴貴之禮以尊賢，而衆賓不得與之儕。異之於賓，所以厲其德行道藝也。然皆得獻于堂下，而主人拜之，^①以其亦後此之賢能，又所以別之於有司贊者也。」云「拜介、揖衆賓皆西南面」者，李氏如圭曰：「賓、介、衆賓門外人門及堂位，皆東面，北上。」主人

揖，先入。揖，揖賓也。先入門而西面。【疏】正義曰：

注「揖賓也」，《校勘記》云：「揖」下，《要義》有「衆」字。」

云「先入門而西面」者，賈疏云：「庠學唯一門，主人導賓

先入，至內雷西面待賓。」敖氏云：「不言入門右，可知也。

亦以賓入門左見之。」賓厭介，入門左。介厭衆賓

人，衆賓皆入門左，北上。皆入門西，東面，賓之屬

相厭，變於主人也。推手曰揖，引手曰厭。今文皆作「揖」。

又曰「衆賓皆入左」，無「門」。【疏】正義曰：注云「皆入門

西東面」者，《鄉射禮》云：「東面，北上。」此不言東面，故注

補著之。云「賓之屬相厭，變於主人也。推手曰揖，引手曰

厭。今文皆作「揖」者，方氏苞云：「唯《鄉飲酒》、《鄉射》

賓、介、衆賓有相厭而人之禮，何也？賓、介、衆賓皆鄉大

夫、州長所治所教之士民也，故主人先入，^②而相引以從

之，非主、賓之常禮也。賓、主獻酬交拜，無少退之禮，亦唯

《鄉飲酒》、《鄉射》有之，何也？學士見賓禮以致身，故重

其禮以荅主人。主人得賢才以報國，故重其禮以厲賓

① 「人」下，《儀禮析疑》有「汎」字。

② 「入」，原作「引」，今據《儀禮析疑》改。

也。^①鄉射之禮雖較輕於興賢能，然獨立一賓而無介，故賓、主之交相重，不異賓興，亦所以淬勵羣士、觀示鄉民也。君臣之禮更嚴於師長，而燕無此儀，何也？燕禮之主人代君獻也。若賓見其拜而少退，則疑於當君之禮矣。賓之拜，拜君賜也。若主人見其拜而少退，則疑於代君受禮矣。故主人之無變，乃自比於舉觶；賓之無變，乃自比於受酬也。又曰：「既曰『介厭衆賓入』，又曰『衆賓皆入門左』，^②見介引手以招衆賓，而衆賓序入，不復自相厭也。《鄉飲酒義》：「至于門外，主人拜賓及介，而衆賓自入。」可與此相證。」凌氏《釋例》曰：「凡推手曰揖，引手曰厭。《士冠》、《士昏》、《鄉飲酒》三揖至于階；《鄉射》三揖皆行；《聘禮》公揖入，及君與賓三揖，歸饗餼，問卿，三揖，皆行；《公食大夫》及廟門，公揖入，賓入，三揖；《覲禮》郊勞，三揖，至于階，皆推手曰揖也。《鄉飲酒》迎賓，賓厭介，入門左，介厭衆賓入。衆賓皆入門左，獻畢一人舉觶之時，揖讓，升，賓厭介升，介厭衆賓升；^③《鄉射》無介，^④餘同，皆引手曰厭也。又《覲禮》注引《司儀》文：「三揖，土揖庶姓，時揖異姓，天揖同姓。」疏云：「鄭彼注云：土揖，推手小下之也。時揖，平推手也。天揖，推手小舉之。」以推手曰揖，引手曰擻，故爲此解也。此疏「厭」作「擻」者，考《鄉飲酒》疏云：

「厭」字或作「擻」字者，古字義亦通也。詳疏意，「厭」字或作「擻」字，似是注文。今注無此句，蓋傳寫脫之。又鄭司農《大祝》注：「肅拜，但俯下手，今時擻是也。」亦作「擻」字。《鄉飲酒》、《鄉射》注「揖」、「厭」今文皆作「揖」、「揖」、「厭」三字對文則異，散文則通矣。又《鄉飲酒》疏「引手曰厭」者，以手向身引之，蓋推手、引手之別也。」胡氏承珙云：「段氏玉裁曰：厭，即《尚書大傳》之葉拱。《家語》注云：「兩手薄其心。」古文《禮》「揖」、「厭」分別。今文《禮》「厭」皆作「揖」，鄭不從之。而《禮經》有「厭」譌作「擻」。《周禮·大祝》疏竟作「引手曰擻」，斷不可從。承珙案：疏云「厭」字，或作「擻」字者，古字義亦通也。詳此疏意，蓋注文本有「厭，或作擻」之語，故《覲禮》疏亦云：「引手曰擻。」鄭司農注《周禮》以擻爲肅拜，自誤，然「擻」自是「厭」之或字。《說文》：「擻，舉手下手也。」舉而下之，即所謂引手也。蓋揖則舉手而推之，擻則舉手而下之。下之則必引

- ① 「厲」，原作「屬」，今據《儀禮析疑》改。
- ② 「左」，原作「右」，今據《儀禮析疑》改。
- ③ 「介」，原作「公」，今據《禮經釋例》改。
- ④ 「射」，原作「飲」，今據《禮經釋例》改。

手向身。^①《儀禮》古文作「厭」，《說文》小篆作「揅」，總之皆與「揖」別，故鄭從古文作「厭」，以「揅」爲或作，而不從今文作「揖」。《說文》：「揖，攘也。一曰：手著胸曰揖。」案：此「一曰」以下七字，疑後人羈入。《說文》「揖」下云：「攘也。」「攘」下云：「推也。」正與鄭君「推手曰揖」合。引之厭，自有「揅」字當之，不應「揖」下忽有「手著胸」語，致「揖」、「厭」漫無分別。段云許從今文，不從古文，是以推手、引手通謂之揖，非是。又云：「揅，當從《字林》爲舉首下手，謂跪而舉其首，惟下其手，是曰肅拜，漢人曰揅。亦非是。」案：《說文》：「拱，斂手也。」斂手與引手義近，故段氏以「厭」爲即《尚書大傳》之「拱」。「厭」之本字，蓋當作「摩」。《說文》：「摩，一指按也。」指按而下之，與手引而下之其義相通。《廣雅·釋詁》：「摩，按也。」《荀子·解蔽》篇：「厭目而視者。」注：「厭，指按也。」《文選·笙賦》：「厭焉乃揚。」注：「厭」，亦作「揅」。揅，謂指揅也。」是二字通用之證。聲轉作「揅」，故《禮經》別本或作「揅」。《說文》：「揅，舉手下手也。」義不可通。段氏《說文注》依《左傳》成十六年《釋文》引《字林》改作「舉首下手」，似覺可從。鄭司農注「肅拜」云：「肅拜，但俯下手，今時揅。」是漢人謂俯首下手之拜如揅，故許君據以解「揅」。《說文》於《周禮》多從

先鄭說也，非以「揅」即《禮經》之「厭」也。《禮經》今文皆作「揖」，而義或有別。《說文》：「揖，攘也。」「攘，推也。」此「推手曰揖」之說也。「一曰：手著胸曰揖」，此今文「賓揖介，介揖衆賓」、「引手曰揖」之說也。許君於《禮經》多從今文，可證者不一而足。今文於推手、引手統謂之「揖」，故《說文》亦於「揖」備載二義。段說似未可非。鄭君則以「揖」、「厭」無別，故從今文作「厭」。許、鄭於《禮經》所從本有異也。云「衆賓皆入左無門」者，今文蒙上「門左」之文而省下「門」字，鄭以無門則文不成義，故亦不從之。蔡氏德晉曰：「門左，謂門西。入門北面，以西爲左。北上，既入東面立，以北爲尊也。」既入門內，主人先以賓升，介及衆賓皆止於所立之位，俟酬賓後，乃以介升，介酢後，^②乃以衆賓升。主人與賓三揖，至于階，三讓。主人升，賓升。主人阼階上當楣北面再拜，賓西階上當楣北面荅拜。三揖者，將進揖，當陳揖，當碑揖。楣，前梁也。復拜，拜賓至此堂，尊之。【疏】正義曰：

① 「向身」，原脫，今據《儀禮今古文疏義》補。
② 「酢」，原作「酌」，今據《禮經本義》改。

注「當陳揖」，《校勘記》云：「張氏曰：『監、巾箱、杭本陳皆作楯，自嚴本以後，始正作陳。疏引《爾雅》陳，堂塗也，從嚴本。』案：《通典》作「塗」。塗即堂塗也，雖不如「陳」字之古，其義則同。」○褚氏寅亮云：「主賓入門後，各向北稍前。主西面，賓東面，是相鄉也。俟介及衆賓以次入門訖，乃相揖而轉相背，^①即注所云「將進揖」也。主人東行至階，階堂塗南，賓西行至西階堂塗南，各轉身向北，則由相背而相見矣，因又揖，注所謂「當陳揖」也。主賓各由東西陳向兩階行，於庭中行三分之二遙當碑處，則因有碑隔，而又揖，注所謂「當碑揖」也。凡揖皆緣向背而生，注極分明，敖氏汨之，不可從。」主人升，賓升，李氏如圭云：「主人尊，升一等，賓乃升也。賓主敵則俱升。」^②既洗，禮殺，雖不敵者亦俱升。主人與賓揖至于階，介及衆賓亦隨賓至西階下而序立。」案：「主人升，賓升」，李氏、敖氏、張氏皆據《鄉射禮》「主人升一等，賓升」，以主人大夫尊也，賓士卑也，非敵者，故不俱升。凌氏則謂經文但云「主人升」無「一等」二字，與《鄉射》不同。此賓主不敵而亦俱升者，盛其禮，尊賓，使與敵者同也。考《禮經》主人先升，賓後升者多著「一等」字，此經「主人升」、「賓升」并列，與《士昏禮》「主人升，西面。賓升，北面」文同，其爲俱升可知。凌說是也。《釋

例》詳《士冠禮》。注云「三揖者，將進揖，當陳揖，當碑揖」者，張氏曰：「陳，堂塗也。東西兩向堂之塗也。」凌氏曰：「將進揖，即入門將右曲揖也。當陳揖，即將北曲揖也。陳與門不相直，故入門必再曲然後當陳。」禮言三揖，義不異也。

右速賓迎賓拜至

主人坐取爵于筐，降洗。將獻賓也。【疏】正

義曰：張氏爾岐云：「此下至「以爵降奠于筐」，言主人獻賓、介、衆賓之儀，凡六節。」○蔡氏德晉云：「坐，跪也。古人席地陳設，取爵、奠爵必跪。」凌氏《釋例》云：「凡丈夫之拜坐，婦人之拜興；丈夫之拜奠爵，婦人之拜執爵。《鄉飲酒》、《鄉射》、《燕禮》、《大射》、《特牲》、《少牢》、《有司徹》：丈夫之拜皆坐而奠爵。蓋丈夫之拜，稽首也，頓首也，空首也，皆屈膝，故必坐而奠爵，然後拜也。《士昏禮》：婦見姑，奠筭于席；姑坐舉以興，拜，授人。又：贊醴婦，婦降席，東面，坐啐醴，建柶，興，拜。是婦人之拜則興也。《特

① 「轉」、「背」下，《儀禮管見》有「身」、「行」字。

② 「敵」下，《儀禮集釋》有「者」字。

牲饋食禮：主婦自酢，左執爵，拜，主人荅拜。《有司徹》：主婦受尸酢，立卒爵，執爵拜，尸北面荅拜。注：「執爵拜，變於男子也。」疏云：「凡男子拜卒爵，皆奠爵乃拜，故云：變於男子也。」是婦人拜則執爵也。^①蓋婦人之拜，肅拜也，不屈膝，故必興，兼可執爵拜也。又《士昏禮》：婦見舅姑，執筭棗栗，自門入，升自西階，進拜，奠于席。舅坐撫之，興，荅拜。此丈夫之拜，亦興而後拜，然則舅荅婦之拜其亦肅拜歟？《周禮·大祝》：「肅拜」鄭司農云：「但俯下手，今時禮是也。」丈夫亦有之。《左傳·成十六年》：「卻至，三肅使者而退」，即肅拜也。又婦人之拜不跪，見於《禮經》。宋王貽孫以爲始於唐武后時，非也。」案：「取爵于筐」，敖氏云：「取爵，蓋北面也。」「降洗」，蔡氏云：「降東階，往洗爵也。」韋氏協夢云：「降洗，亦題下事也。」^②坐取爵，必興而後降。不言興者，文略。」賓降。從主人也。

【疏】正義曰：蔡氏德晉云：「降西階，從主人也。」韋氏協夢云：「以主人爲己而降，己不敢獨安於堂上也。」凌氏《釋例》曰：「凡賓、主相敵者，^③降則皆降。《鄉飲酒禮》：主人獻賓，取爵于筐，降洗，賓降。卒洗，升，^④復降盥，賓亦降。賓酢主人，賓降洗，主人降，卒洗，升，復降盥，如主人禮。主人酬賓，降洗，賓降，升，主人卒觶，復降洗，賓降，如獻

禮。主人獻介，降洗，介降。介酢主人，降洗，主人復降階，降辭如初。《鄉射》同，惟無介。《燕禮》：主人獻賓，降洗，賓降，卒洗，升，復降盥，賓降。賓酢主人，賓以虛爵降，主人降，卒洗，升，復降盥，主人降。主人酬賓，主人降洗，賓降。《大射》同。《有司徹》：主人獻尸，主人降洗，尸、侑降，卒洗，復降盥，尸、侑降。主人受尸酢，尸降洗，主人降自阼階，卒洗，升，復降盥，主人降。主人酬尸，降洗爵，尸、侑降，卒洗，尸升，侑不升。主人先卒觶，降洗，尸降。《聘禮》：介面卿，介降，拜；大夫降，辭。此皆賓主相敵者，降則皆降也。《有司徹》：祭畢賓尸之禮，尸如賓，侑如介，則尸侑皆賓，不似正祭時尸尊，故亦與主人皆降，如《鄉飲酒》也。《鄉飲酒》、《鄉射》：主人獻衆賓，不備升降之禮者，衆賓卑也。《燕禮》：《大射》：主人獻公，公不降者，公尊也。《公食大夫禮》：公降盥，賓降，公辭。賓主不敵亦降者，主君尊賓也。主人獻卿、獻大夫皆云「主人洗升」，不云降者，蓋卿、

① 「婦人」下，《禮經釋例》有「之」字。

② 「下」，原作「上」，今據《儀禮蠡測》改。

③ 「相」，《禮經釋例》作「人」。

④ 「升」，原脫，今據《禮經釋例》補。

大夫之位本在堂下，主人酬賓之後，亦降復位也。獻士、獻庶子，不備升降之禮者，卑也。《有司徹》主婦獻尸，洗于房中。不降者，婦人之禮變於男子也。《聘禮》歸饗餼，聘賓饋使者，賓降堂，受老束錦，大夫止。注：「止不降，使之餘尊。」疏云：「凡賓主敵體之洗，主人降，賓亦降。今賓降，使者不降者，使之餘尊，當降而不降。」注蓋謂使者奉主君之命來，有主君之餘尊，故不降。疏但覆述注文而已，未能發明餘尊之義也。」主人坐奠爵于階前，辭。重以己事煩賓也。事同曰讓，事異曰辭。【疏】正義曰：注「事同曰讓，事異曰辭」，《校勘記》云：「張氏云：『監及巾箱，杭本曰作日，從嚴本。』」○敖氏云：「賓從降而主人辭，亦尚辭讓也。奠爵乃辭者，事異則不宜相雜，且爲敬也。」蔡氏德晉云：「主人臨階，跪而奠爵，起而辭賓之降。」賓對。對，荅也。賓主之辭未聞。【疏】正義曰：敖氏云：「對時亦少進位，下文云『賓對復位』是也。」韋氏協夢云：「賓對，對以己當降也。主人不再拜從降，非崇禮也。」主人坐取爵，興，適洗，南面坐，奠爵于篚下，盥洗。已盥乃洗爵，致潔敬也。今文無「奠」。【疏】正義曰：「適洗，南面」，敖氏云：「南面坐于洗北，乃奠爵于篚

南，不敢由便也。」「篚下」，李氏如圭云：「篚南也。未洗，奠爵于篚下；已洗，奠爵于篚。」張氏爾岐云：「篚下，當篚之下，非于篚也。」盛氏世佐云：「此篚謂堂下洗西之篚。」王氏引之云：「注不言篚下爲何所，敖繼公以爲篚南，其說曰：『南面坐于洗北，乃奠爵于篚南，不敢由便也。』」案：如敖說，主人在洗北，因不敢由便而奠爵于篚南，賓在洗南，①亦當不敢由便而奠爵于篚北。而《燕禮》、《大射儀》並云：「賓洗南，坐奠觚于篚下。」鄭注：「篚下，篚南。」賓在洗南，②而奠觚即于篚南，彼又何以由便乎？賓敢由便，而主又何以不敢由便乎？案：主人奠爵于篚下，謂篚北也。蓋篚在洗西，主人適洗南，③位在洗北，而下句遂云「坐奠爵于篚下」，則亦在篚北矣。此及《鄉射禮》並云：「賓進，東北面辭洗。」鄭注《鄉射禮》曰：「言東北面，則位南于洗矣。」洗與篚東西相值，賓東北面于洗篚之南，則主人南面于洗篚之北，身在篚北而奠爵于篚南，此勢所不能也。《鄉射禮》賓坐取爵，適洗，北面坐奠爵于篚下，興，盥洗。

①「南」，原作「東」，今據《經義述聞》改。

②「洗」，原作「篚」，今據《經義述聞》改。

③「南」下，《經義述聞》有「面」字。

鄭注：「賓北面盥洗，自外來。」疏曰：對主人自內出南面，然則賓適洗北面，則篚下爲篚南，主人適洗南面，則篚下爲篚北，正所謂賓自外來，主由內出也。篚在洗西，賓北面于洗南，則左手近篚，奠于篚南者，當以左手，主人南面于洗北，則右手近篚，奠于篚北者，當以右手：皆爲由便也。」

注云「已盥乃洗爵，致潔敬也」者，張氏爾岐云：「盥洗者，盥訖，取爵擬洗，非謂遽已洗也。下文因賓辭復置爵而對，對已，乃復取爵成洗。」韋氏協夢云：「盥洗爲洗而盥也，其實此時亦未洗，盥洗蓋立而盥也。下文云主人坐奠爵于篚，則此時立盥明矣。」案：盥洗例見《士冠禮》。云「今文無『奠』」者，胡氏承珙云：「上文：主人坐取爵，興，適洗，南面。今文蒙上『爵』字，但云『坐奠于篚下』。注當云『今文無奠下爵』，傳寫脫『下爵』二字。鄭以上文『主人坐奠爵于階前』，下文『主人坐奠爵于篚』，皆有『爵』字，故從古文。若無『奠』字，則『坐爵』連文不成辭矣。」賓進，

東北面辭洗。必進東行，示情。【疏】正義曰：注云

「必進東行，示情」者，張氏爾岐云：「賓降立當西序，至主人擬洗爵，乃進而東行，東北向主人辭洗。『示情』者，①示謙下主人之情也。」敖氏曰：「進者，少南行也。南於洗西，乃止而東北面向主人。辭洗之意，與辭降同。②凡言洗於

辭洗之前，皆將洗而未洗者也。若既洗，則何以辭爲？」盛氏世佐云：「敖說是也。賓初降時，立當西序，而此云『東北面辭洗』，則位已在洗南矣。其進而南可知也。」褚氏寅亮云：「賓降直西序之位，必稍南於洗，只須進而東行以辭。」吳氏廷華云：「賓西序南東向，與洗尚遠，東行則仍在東序之南，尚在洗北，如何得北面辭洗？則所謂進者，謂南行也。所謂東者，謂南行直洗西南，乃東行至洗南，北面辭也。」程氏瑤田云：「《鄉射禮》注云：言東北面，則位南於洗矣。案：賓主階下立位，據《士冠禮》云『主人立于阼階下，直東序，西面』，此主人位也；『賓辭，直西序，東面』，此賓位也。冠禮之賓位，即此經下文『賓復位，當西序，東面』者也。賓主兩位必相對，曰『階下』，曰『賓降』，則其位皆不宜遠於階。豈或南於洗乎？且賓、介、衆賓遞厭而入門左，曰『北上』者，蓋旋而東面。主人是時亦必旋而西面。賓主相向而立，此位蓋當門內雷，入門北行，至此即止而旋其面。曰『左』者，對主人在右言之，非至此又折而左行也。立訖，然後主人與賓三揖，至于階，是時介與衆賓依然立當

①「示」上，《儀禮鄭注句讀》有「注云」二字。

②「辭」，原作「拜」，今據《儀禮集說》改。

內雷，及主人獻賓，酢酬禮畢，然後主人以介揖，讓、升、拜，如賓禮。曰「如賓禮」者，當亦降而至內雷，三揖三讓而升也。由是言之，揖讓之先，其位不得北而至於洗南，階下之位亦必不能南過於洗。曰「東北面」者，辭洗必北面，洗在阼階東，賓位在西階西，故必東行，將近洗，乃旋而北面，非必位在洗南也。「主人坐，奠爵于筐，興對。賓復位，當西序，東面。」言復位者，明始降時位在此。

【疏】正義曰：此奠爵于筐，爲將洗而致敬也。當西序，東西節也。下文云：賓降立于階西，當序。方氏苞云：「但云『當西序，東面』，猶未見南北之節也。上言『賓進，東北面辭洗』，下言『主人坐，取爵，沃洗者西北面』，則知賓階下之位即洗之南矣。」蓋主人南面而洗，賓宜面向之，不宜退立其後也。韋氏協夢云：「前主人奠爵于筐下者，爲將盥也。既盥則主人取爵以興而將洗，因賓進辭洗，故又坐奠於筐中而興對也。」高氏愈云：「主人將辭降，不即辭，必俟奠爵乃辭之，賓辭洗，不即對，必俟奠爵乃對之。蓋古人行禮，其舒徐鄭重如此。」程氏瑤田云：「此初次取一爵於堂上之筐也。洗當東榮，更在東序之東。主人降洗，故有事於此，非其位也。主人降即適洗，卒洗即升，不即其位。賓降待事，故先即其位，及進而辭洗乃又復位，俟主人

卒洗然後俱升也。」主人坐取爵，沃洗者西北面。

沃洗者，主人之羣吏。【疏】正義曰：敖氏云：「沃洗，謂以料盥水而沃洗爵者也。沃洗者先亦沃盥。」張氏爾岐云：「古人盥洗並用人執器灌沃，下別有器承其棄水，故別有沃洗者西北面。」敖氏云：「西北面，宜鄉洗者也。既則西面於水東，主人南面洗而西北面沃。此則北面洗者，其西南面沃之歟？」吳氏廷華云：「沃洗者西北面，則在洗之東南，斜向主人。」方氏苞云：「沃者西北面，以洗者南面也。主人南面洗，以賓復位當西序東面，在洗筐之南也。」

《鄉飲酒》之洗爵別有沃洗者，③而《鄉射》則無之，何也？諸州之君子及羣士，④必德行道藝迴出於衆者。主人執自洗之，常禮可也。鄉大夫則國卿也，雖親洗以下賢能而別有沃洗者，使衆著於貴有常尊之義也。至於冠，則贊者洗酌而賓不與，以賓乃冠者之父行，不唯洗不親，酌亦不必親

①「即」，《儀禮析疑》作「在」。

②「向」，原作「面」，今據《儀禮疑義》改。

③「別」，原作「則」，今據《儀禮析疑》改。

④「取」，原作「彼」，今據《儀禮析疑》改。

也。輕重之權衡蓋如此。」卒洗，主人壹揖壹讓，

升。俱升。古文「壹」作「一」。【疏】正義曰：注「古文壹

作一」。《校勘記》云：「壹、一，徐本互易。《集釋》、①《通

解》、《要義》俱與今本同。張氏爾岐云：②《經》云：壹揖壹

讓，升。壹字當在上，③從經。」案：張氏云「從經」，則非有

別本可案也。④《通解》似即依張氏，而今本又依《通解》

耳。案：「古文壹作一」，鄭注屢見皆「壹」在上，「一」在下，

此處獨異。徐本誤也。」云「俱升」，案：上文「主人升，

賓升」為俱升，故知此亦俱升也。敖氏謂主人先升而賓從

之，諸家皆從其說，非是。「古文「壹」作「一」」，詳《士相見

禮》。凌氏《釋例》曰：「凡降洗，降盥皆壹揖壹讓，升。《鄉

飲酒》、《鄉射》主人獻賓，降洗，賓降，主人辭降，主人洗，賓

辭洗，主人卒洗，⑤壹揖壹讓，以賓升。又降盥，賓降，主人

辭降，賓不辭盥，卒盥，亦壹揖壹讓，升。賓酢主人，卒洗，

揖讓如初，升。降盥，如主人之初禮。主人酬賓，降，賓降，

主人辭降，賓不辭洗，卒洗，揖讓，升。主人卒饌訖，又降

洗，賓辭降，如獻禮，升。《鄉飲酒》獻介，《鄉射》獻遵，皆揖

讓，升。降洗如賓禮，升。不盥，不拜洗，殺於賓也。《特性》主人

獻賓，降，阼階西面拜賓，如初。洗，賓辭洗，卒洗，揖讓，

升。是皆壹揖壹讓也。《燕禮》、《大射》主人獻賓，賓酢主

人，降洗，降盥，皆賓揖先升，主人乃升。主人酬賓，降洗，

卒洗，亦揖升，不讓。《鄉飲酒》、《鄉射》是賓，主人正禮，故

揖讓俱升。《燕禮》、《大射》則宰夫為主人，故賓揖，不讓先

升也。《公食大夫》卒盥，壹揖壹讓，公升，賓升。此賓是異

國之臣，故公先升也。《有司徹》主人降洗，降盥，尸侑亦

降，卒洗，卒盥。經但云揖，不云讓，禮殺也。《鄉飲酒》、

《鄉射》主人獻眾賓，卒洗，升。《有司徹》主人受尸酢，卒

洗，卒盥，升。主人獻長賓，卒洗，升。皆不揖不讓，禮又殺

也。《燕禮》、《大射》獻卿，獻大夫，獻士，升不揖讓者，盛禮

不在己也。至於《鄉飲酒》獻賓畢，賓降立于階西，當序東

面。獻介畢，介降立于賓南。獻眾賓，眾賓之長升受者三

人，畢，降，復賓南東面位。《鄉射》同，但無介。至一人舉饌時

始揖讓，升，蓋亦壹揖壹讓也。」賓拜洗，主人坐奠

爵，遂拜，降盥。復盥，為手盥。【疏】正義曰：敖氏

①「釋」，原作「解」，今據《儀禮注疏校勘記》改。

②「氏」下，《儀禮注疏校勘記》無「爾岐」二字。

③「壹字」，原脫，今據張淳《儀禮識》補。

④「案」，《儀禮注疏校勘記》作「據」。

⑤「洗」，原脫，今據《續清經解》本補。

云：「謝其爲己洗也。」張氏爾岐云：「因事曰遂。」主人坐奠爵，因不起而遂拜也。後凡言遂者，皆因上事。」李氏如圭云：「將獻賓，拜手圜塵，不可酌酒也。」敖氏云：「必盥者，爲將酌也。既拜而盥，爲拜時以右掌據地，不無圜汙也。《內則》：「凡男拜，尚左手。」蔡氏德晉云：「復降階盥手，爲將酌酒也。高紫超謂因洗爵而盥，雖盥而未盥者，故此將酌酒於賓，復降盥以致潔誠也。」賓降，主人辭；賓對，復位，當西序。卒盥，揖讓升。賓西階上疑立。疑，讀爲「屹然從於趙盾」之「屹」。疑，正立自定之貌。【疏】正義曰：注「屹然從於趙盾之屹」兩「屹」字，徐本、《集釋》、《通解》俱作「疑」，閩、葛俱上作「屹」，下作「疑」。臧氏曰：「《公羊》注：「屹然，勇壯貌。」鄭所據《公羊》作「疑然」，乃立定之貌，不取勇壯義。蓋嚴、顏之異。注疏本改同何本，誤也。」疑然，立自定之貌「然」，徐、葛、閩本、《集釋》、《通解》俱作「正」，與疏合。張氏曰：「注曰「疑，正立自定之貌」，獨監本正作「止」。《鄉射》注曰：「疑，止也。」諸本皆同。案：《士昏禮》注曰：「疑，正立自定之貌。」《公食大夫》注曰：「疑，正立也。」傳寫者誤以「正」爲「止」，並從《士昏》及《公食大夫禮》。」

云「疑，讀爲「屹然從於趙盾」之「屹」。疑，正立自定之貌」者，案：《公羊》宣六年傳云：「屹然後乎趙盾而入，放乎堂下而立。」何休注：「屹然，勇壯貌。」鄭所據《公羊》本與何異，「屹然」作「疑然」，「後乎」作「從於」。段氏玉裁曰：「《說文》：「屹，未定也。」「未」爲衍字。《大雅》：「靡所止疑。」傳：「疑，定也。」箋：「止，息。」鄭於《士昏禮》云：「疑，正立自定之貌。」於《鄉射禮》云：「疑，正也，有矜莊之色。」與此而三。此三「疑」字，皆即《說文》之「屹」，非《說文》訓惑之「疑」。學者仞「屹」爲「疑」，因於許書「定也」之上增「未」字矣。胡氏承珙云：「段以《說文》之「屹」即《大雅》「止疑」，亦即此經「疑」，甚是。故鄭注《鄉射禮》：「疑，止也。」直訓疑爲止。然正立亦是止義，故注《士昏禮》及此《鄉飲酒禮》又皆以疑爲正立自定之貌，不必概從《鄉射禮》注改「正」爲「止」，至以「疑止」爲句絕，「立自定之貌」別爲一句，則於《公食大夫禮》注「疑，正立也，自定之貌」爲不可通矣。」案：《公羊傳》上言「疑然」，下言「立」，與此經「疑立」同意，亦止立自定之貌。①何氏謂：「屹然，勇壯貌。」《鄉射禮》注：「疑，止也，有矜莊之色。勇壯與矜莊義亦相

①「止」，疑當爲「正」。

近，「疑」爲「匙」之假借。鄭讀疑爲「疑然」之「疑」者，恐人誤認爲「疑惑」之「疑」^①，故讀從《公羊》，以明字之假借也。主人坐取爵，實之。賓之席前，西北面獻賓。獻，進也，進酒於賓。【疏】正義曰：敖氏云：「實

以酒，謂酌也。」蔡氏德晉云：「謂至尊所酌酒以實於爵也。」取爵實酒，獻必西北面者，李氏如圭云：「邪向席。」敖氏云：「以將授賓，不宜背之也。」張氏爾岐云：「賓在西階，欲其就席受爵，故西北向之也。」吳氏廷華云：「尊酒在席東，^②與席並。主人實爵來席前，故曰西，又兼北面者尊賓，故西向少南，^③遂西北面也。賓在西階上，而獻於席前者，席以尊賓。」注云「獻，進也，進酒於賓」者，^④凌氏《釋例》曰：「凡主人進賓之酒謂之獻。此燕飲之始也。《鄉飲酒禮》：『主人坐取爵，實之，賓之席前西北面獻賓。』」注：「獻，進也，進酒於賓。」《鄉射禮》：「主人坐取爵，實之，賓之席前西北面獻賓。」注：「進於賓也。凡進物曰獻。」《燕禮》：《大射儀》「主人酌膳，筵前獻賓。」《士虞》：《特性》、《少牢》、《有司徹》「主人初獻尸，主婦亞獻尸，賓長三獻尸。此皆獻禮之最尊者也。」《鄉飲酒》：「主人實爵，介之席前西南面獻介。」《鄉射》「遵者入，主人實爵，席前獻大夫。」《燕禮》、《大射儀》「主人盥洗象觚，升實之，東北面獻

于公。又主人洗，升，實散，獻卿于西階上。若有諸公，則先卿獻之。《有司徹》：「主人、主婦三獻，酌獻侑。此獻之次焉者也。」《鄉飲酒》、《鄉射》「主人升，實爵于西階上，獻衆賓。」《燕禮》、《大射儀》：「主人獻大夫，獻士于西階上，獻庶子于阼階上。又其次焉者也。」《鄉飲酒》「升歌三終，主人獻工，笙奏三終，主人獻之于西階上。」《鄉射》「合樂後獻工，獻笙。」《燕禮》「升歌畢，主人洗升，獻工，笙奏畢，主人洗升，獻笙于西階上。」《大射儀》「升歌《鹿鳴》三終，主人獻工。」《鄉射》「次射飲不勝後，司馬獻獲者，司射獻釋獲者。」《大射儀》：「次射飲不勝後，司馬正獻服不，司射獻釋獲者。」《士虞》、《特性》、《少牢》「獻祝及佐食。」《特性》「祭畢，獻賓，獻長兄弟、衆賓、衆兄弟、內兄弟。及《有司徹》「獻內賓于房中，獻私人于阼階上。皆執事之人，則其殺焉者也。蓋行禮時執事之大者，主人皆獻之，其餘至旅酬無算爵，乃得與也。」

- ① 「疑惑」，原重文，今據《續清經解》本刪。
- ② 「尊酒在」，《儀禮疑義》作「酒尊在賓」。
- ③ 「向」，《儀禮析疑》作「而」。
- ④ 「進」，原作「獻」，今據《儀禮注疏》改。
- ⑤ 「北」，原脫，今據《禮經釋例》補。
- ⑥ 「面」，原脫，今據《禮經釋例》補。

又《鄉飲酒·記》、《鄉射·記》皆云「獻用爵」，而《燕禮》、《大射》獻用觚，《大射》獻服不用散，禮殺故也。又案：主人獻賓，正禮也。《鄉飲酒》之獻介、獻衆賓，尊者人，公如賓，大夫如介。《鄉射》之獻衆賓、獻遵，《燕禮》、《大射》之獻公卿、獻大夫、獻士及庶子，皆次於賓者也。又《燕禮》、《大射》之主人獻公者，尊公，不使與賓同也。《士虞》、《特牲》、《少牢》之三獻，此室中事尸之禮，不與賓客同。唯《有司徹》之尸侑，乃賓尸于堂之禮，始以賓客事之，尸如賓，侑如介也。合樂畢，獻工及笙，猶之射禮之獻獲者及釋獲者，祭禮之獻祝及佐食也，非賓、主人正禮矣。祭禮之獻賓及衆賓，獻長兄弟及衆兄弟，獻內賓及私人，亦此類也。「聖人之心，精密如此。」賓西階上拜，主人少退。少退，少避。【疏】正義曰：注「少避」，《校勘記》云：「少，《釋文》作『小』。」避，《釋文》、徐、葛、閩本、《通解》、敖氏俱作「辟」。張氏云：「《鄉射》經曰：『主人少退。』」注曰：「少退，猶少避也。」經又曰：「賓少退。」注曰：「少退，少逡遁也。」案：《釋文》少退、少逡遁皆作小。蓋鄭氏以小稱少，^②改作小。從《釋文》。案：「避」，張本亦作「辟」，至監本始作「避」，而毛本因之。陸氏云：「辟，婢亦反，一音避。」然則「辟」字原有兩音，其音婢亦反者，即「辟易」之

「辟」也。今竟改作「避」，又仍依《通解》音曰「辟，音避」，晉亂之甚。」○敖氏曰：「主人西北面于賓席前，賓拜于西階上，而主人乃少退，則是凡拜皆有相之者矣。」蔡氏德晉云：「賓先拜而後敢受爵，敬主人之至也。主人少退，以執爵不得荅，故少逡巡退避也。」方氏苞云：「獻則主賓皆少退，酢與酬皆於拜受爵時少退，禮備於初，以漸而殺也。拜受爵時既少退，則拜送爵無庸再退矣。」賓進受爵，以復位。主人阼階上拜送爵，賓少退。復位，復西階上位。【疏】正義曰：賈疏云：「《鄉射》云：『賓進受爵于席前，復位。』此不言席前，文不具也。」張氏爾岐云：「賓進席前，受爵，復持此爵還西階上位。」方氏苞云：「主人拜送爵轉在賓拜受爵之後，何也？爵既實而以授之，^③非若未洗之先，既受之後，可因事之間而奠之也。故受者必先拜而後受，授者必既受而後拜。尊如尸，貴如君，其禮皆

① 「少」，原作「可」，今據《儀禮注疏校勘記》改。

② 「稱」，《儀禮注疏校勘記》作「釋」。

③ 「實」，原作「賓」，今據《儀禮析疑》改。「之」，《儀禮析疑》作「人」。

同。① 酬則先奠爵而後拜，自酢亦然，以其爵乃自飲而不以授人也。舉觶、騰爵，② 亦奠於薦側而不授。蓋《燕》與《大射》乃不敢煩君之受，而《鄉射》、《鄉飲酒》因用於賓大夫以致異敬，故賓大夫必辭而坐受，以示不敢當也。」案：主人拜送爵，賓在西階，以執所受之爵，不得荅拜，故亦少退。高氏愈云：「此主人獻賓第一爵。」薦脯醢。薦，進也。進之者，主人有司。【疏】正義曰：張氏爾岐云：「薦之席前。」注云「進之者，主人有司」者，案：《周禮》「膳宰薦脯醢」，知非主人自薦，故云「有司」也。賓升席，自西方。升，由下也。升必中席。【疏】正義曰：注「升，由下也」，《校勘記》云：「由下，《通典》作『猶上』。」○方氏苞云：「自西方，乃不與主人背。」凌氏《釋例》云：「凡賓升席自西方，主人升席自北方。《鄉飲酒》、《鄉射禮》：主人獻賓，賓皆升席自西方。《鄉射禮》主人獻，大夫升席。注：『大夫升席由東方。』是賓升席自西方，遵升席自東方也。《鄉飲酒·記》：『主人、介，凡升席自北方，降自南方。』《鄉飲酒》、《鄉射》賓酢主人，主人皆升席自北方，將立司正安賓及徹俎，主人皆降席自南方。《鄉飲》不云自南方，文不具也。《鄉飲酒》主人獻介，介升席自北方；旅酬，主人

酬介，介降席，自南方。經悉與記合。《燕禮》、《大射》但有升筵、降筵之文，不云升降自何所，蓋以禮已具於《鄉飲》、《鄉射》故也。《有司徹》主人獻尸，尸升筵自西方；③ 主人獻侑，侑升筵自北方，與《鄉飲酒》同。蓋祭畢饋尸，筵尸于戶西南面，如《鄉飲酒》之賓；筵侑于西序東面，如《鄉飲酒》之介，侑以輔尸，如介以輔賓也，故主人升筵自北方，亦與《鄉飲》同也。侑、主人降筵皆自北方，與《鄉飲酒》異者，少變於《飲酒》正禮也。《鄉飲酒》、《鄉射》主人獻賓，賓降席。注皆云「降席，席西也」。是賓升降皆自西方，然則遵升降皆自東方歟？注云「升，由下也」者，賈疏云：「《曲禮》：『席南鄉北鄉，以西方爲上。』今升席自西方，云「升，由下」者，以賓統於主人，以東方爲上也。」李氏如圭云：「凡升席由下，降席由上，賓席東上，統於主人。」凌氏廷堪云：「此注據《鄉射》經及「賓席東上」而言。《鄉飲酒·記》：主人、介升席自北方，降自南方。注：席南上，④

① 「皆」，原作「則」，今據《儀禮析疑》改。
② 「騰」，當作「賡」。
③ 「獻」下「尸」，原不重，今據《禮經釋例》補。
④ 「上」，原作「方」，今據《續清經解》本改。

升由下，降由上，由便。^①此據《曲禮》而言，皆因文釋之，非謂禮之通例如此也。故《鄉射禮》「賓升席自西方」注：賓升降由下也。賈疏不得注意，徵引雖繁，而膠葛不明。今但據見於經文及注者，取以爲例。經注無文者，不敢爲之說也。」乃設折俎。牲體枝解節折在俎。【疏】正義

曰：注「節折右俎」，《校勘記》云：「右，徐、葛、閔本，《集釋》、《通解》、《要義》、楊氏俱作「在」。」○凌氏《釋例》云：

「凡獻酒皆有薦，禮盛者則設俎。《鄉飲酒》、《鄉射》主人獻賓，薦脯醢。主人獻衆賓，衆賓之長升拜受者三人，每一人獻則薦諸其席，衆賓辨有脯醢。主人獻工，薦脯醢。主人獻筮，辯有脯醢。《鄉飲酒》主人獻介，薦脯醢。賓若有遵者，諸公如賓禮，大夫如介禮。《鄉射》司馬獻獲者，司射獻釋獲者，皆薦脯醢。《燕禮》主人獻賓，膳宰薦脯醢。主人獻公，士薦脯醢。^②主人獻卿，薦脯醢。主人獻大夫，胥薦脯醢。主人獻工，薦脯醢；獻筮，辯有脯醢。主人獻士，士長升，拜受觶，乃薦司正與射人一人，司士一人，執事一人，辨獻士，乃薦士，祝史、小臣師亦就其位而薦之。《大射》司馬正獻服不，有司薦。^③司射獻釋獲者，薦脯醢。《特牲饋食》主人獻賓，薦脯醢。《有司徹》主人獻尸，主婦自東房薦豆籩；主人獻侑，主婦薦豆籩。主婦獻尸，侑不薦者，前主人獻尸已薦

也。但設鉶加糗與服脩，司士羞豕胥而已。主人獻長賓，宰夫薦脯

醢。是凡獻酒皆有薦也。《鄉飲酒》主人獻賓、獻介，俱設

折俎。《鄉射》獻賓同。《燕禮》主人獻賓，膳宰設折俎。主人

獻公，膳宰設折俎。《大射》主人獻卿，^④庶子設折俎。《燕

禮》卿無俎。《特牲》主人獻賓，設折俎。《有司徹》主人獻尸，

賓長設羊俎。主人獻侑，司馬設羊俎。尸侑豕俎，至主婦獻時設

之。主人獻長賓，司士設俎。是禮盛者則設俎也。《鄉射》

獻獲者及釋獲者，《大射》獻服不及釋獲者，皆設折俎。服不

之俎，亦庶子設之。禮主於射，故亦盛其禮也。《鄉飲酒》賓酢

主人，薦脯醢，設折俎。《有司徹》主人受尸酢，主婦薦豆

籩，長賓設羊俎，主婦受尸酢，婦贊者薦豆籩，司馬設羊俎。

酢所以荅獻，^⑤故亦盛其禮與獻同也。《鄉飲酒》介酢主

人，無薦俎者，前賓酢時已具也。《燕禮》、《大射》賓酢主人

無薦俎者，宰夫爲主人，辟君也。《特牲》、《有司徹》主人自

①「由便」，原脫，今據《禮經釋例》補。

②「薦」，原作「羞」，今據《禮經釋例》補。

③「有司」上，《禮經釋例》有「宰夫」二字。

④「主人」，原脫，今據《禮經釋例》補。

⑤「獻」，原作「禮」，今據《禮經釋例》改。

酢于賓。無薦俎者，殺於尸也。《特性》主人獻衆賓，薦俎設于其位。獻長兄弟如賓儀，衆兄弟如衆賓儀，內兄弟如衆兄弟之儀。《有司徹》主人獻衆賓，其薦脯醢與胾設于其位。主人獻兄弟，其薦胾設于其位。主人獻內賓，獻私人，亦有薦胾，祭畢行神惠，不同於《飲酒》，故禮雖殺，亦薦俎並有也。至於《士虞禮》主人獻祝，薦菹醢，設俎；主人獻佐食，無薦俎。《特性》、《少牢》佐食皆有俎，則此亦當有之。《特性》主人獻祝，設菹醢俎；主人獻佐食，無薦。記云：「佐食俎，鰾折，脊、胾、膚一，離肺一。」《少牢》主人獻祝，薦兩豆，佐食設俎。主人獻兩佐食俎，設于兩階之間。主婦賓長獻祝，皆因主人之薦俎。蓋祝事神，故盛其禮，薦、俎並有。佐食事尸，故殺其禮，有俎而無薦。且正祭之獻，亦非飲食之通例也。於《冠禮》《醴辭》曰：「嘉薦令芳。」注：「嘉，善也。」嘉薦，謂脯醢。脯，籩實。醢，豆實。凡經所謂薦者，指脯醢也。」又曰：「凡薦脯醢在升席先，設折俎在升席後。《鄉飲酒》、《鄉射》主人獻賓，薦脯醢。賓升席自西方，乃設折俎。賓酢主人，薦脯醢。主人升席自北方，設折俎。《鄉飲酒》主人獻介，^①薦脯醢。介升席自北方，設折俎。《鄉射》主人獻大夫，乃薦脯醢；大夫升席，設折俎。《燕禮》主人獻賓，膳宰薦脯醢；賓升筵，膳宰設折俎。《大射》主人獻卿，乃薦脯醢；

卿升席，庶子設折俎。皆薦脯醢在升席先，設俎在升席後也。《有司徹》主人獻侑，主婦薦豆籩，侑升筵自北方，司馬設羊俎；主婦受尸酢，婦贊者薦豆籩，主婦升筵，司馬設羊俎。^②此祭畢飲酒，亦薦脯醢在升席先，設俎在升席後也。又《有司徹》主人獻尸，主婦薦豆籩，賓長設羊俎，尸升筵自西方，次賓羞匕涪，司馬羞羊肉涪，次賓羞羊燔，薦設，凡五事。主人受尸酢，主婦薦豆籩，主人升筵自北方，長賓設羊俎，次賓羞匕涪，司馬羞羊肉涪，次賓羞羊燔，薦設，亦五事。二者皆同，惟尸升筵在設俎後，主人升筵在設俎先爲小異。又《燕禮》、《大射》賓未升堂之時，公已升就席，故主人獻公、薦俎皆在升席後也。《特性》及《有司徹》賓皆無席，但有位而已，故主人獻賓薦俎時無升席之文也。^③至於《公食大夫禮》設正饌畢，賓始升席，則食禮異於飲酒之例矣。」主人阼階東疑立，賓坐，左執爵，祭脯醢。坐，坐於席。祭脯醢者，以右手。【疏】正義曰：敖氏云：「立于阼階上之東者，事未至，宜辟拜處也。」蔡氏德晉

① 「鄉飲酒」，原脫，今據《禮經釋例》補。
② 「設」，原作「升」，今據《禮經釋例》改。
③ 「賓」，原脫，今據《禮經釋例》補。

云：「主人於此亦疑立者，蓋敬賓之至，若以此酒未足以致敬，而不敢必賓之卒爵也。」凡執爵者皆左手，祭薦皆右手，例見《士冠禮》。程氏瑤田曰：「堂上立位，賓主皆立于序端，主人位在阼階東，賓在西階西。主人西面，賓東面。文已見於冠禮，是經堂上立位，見賓當西序之文，不見主人當東序之文，于堂上立位，見主人阼階東疑立之文。阼階東者，立于序端之謂也。及賓酢主人，降洗，主人降，一則曰「主人阼階東南面辭洗」，^①再則曰「主人復阼階東西面」，則主人堂下立位當東序又可知矣。然則賓西階上疑立，其立位亦當序端。不見者，可互足也。惟賓主拜位，東西皆在階上，上經當楣北面者是也。《士冠禮·記》：「凡拜北面于阼階上，賓亦北面于西階上荅拜。雖因孤子冠而言之，然於此發凡是其例矣。又案：《大射儀》賓酢主人畢，賓降立于西階西矣。擯者又以公命升賓，賓乃升，立于西序東面。而《燕禮》射人升賓，賓升，立于序內東面，皆不云序端者，蓋序端乃階上有事之立位，今賓已受獻，不敢安盛而降，復以公命升之，是時賓無事矣，不得在當事之位。」奠爵于薦西，興；右手取肺，卻左手執本，坐，弗繚，右絕末以祭，尚左手，濟之，興；加于

俎。興，起也。肺，離之。本，端厚大者。繚，猶紵也。大夫以上，威儀多。紵，絕之。尚左手者，明垂紵之，乃絕其末。濟，嘗也。【疏】正義曰：《校勘記》云：「惠氏棟云：

「依疏說，則弗字衍。」案：疏云：「弗繚，即弗紵，一也。」則「弗」字非衍文。《大祝》注引此經，亦有「弗」字，但此注及疏俱未明「弗」字之義。○李氏如圭云：「薦西，薦右也。凡奠者將舉於右。《少儀》云：「其有折俎者，取祭反之，不坐。」反之，加於俎也。卻，仰也。繚，繚祭也。絕，絕祭也。

繚祭，以手從肺本循之，至末，乃絕以祭。絕祭不循其本，直絕以祭。此實用土禮，故弗繚。主人亦從土禮，故下祭如賓禮也。」祭俎於俎內。《少儀》曰：「凡羞有俎者，則於俎內祭。」敖氏曰：「執本卻左手，則絕末覆右手矣。絕末以祭者，絕其末不沒之處，^②所以爲祭也。此與振祭之意相類。尚左手，濟之，謂舉其左手，而右手在下，以末授口濟之也。將濟乃尚左手，^③則祭時不然矣，加于俎以右手。」張氏爾岐云：「卻左手，仰其左手也。案：《鄉射禮》

① 「阼」，原脫，今據《續清經解》本補。

② 「沒」，原作「皮」，今據《續清經解》本改。

③ 「濟」，原作「祭」，今據《儀禮集說》改。

取矢于楅。卻手與覆手對。弗繚者，直絕末以祭，不必繚也。繚祭，以手從肺本循之，至末乃絕之。絕祭不循其本，但絕末而已。大夫以上威儀多，乃繚，士則否。經文言「弗繚」，以賓固士也。他事皆從士禮。^①注疏獨於此處解作繚祭，不敢從。盛氏世佐云：「注之誤在以『尚左手』三字連上句爲義。」以《鄉射禮》參觀之。《鄉射》云：坐絕祭，尚左手，嚙之。夫《鄉射》固所稱士禮也，絕祭而不繚者也，乃其經亦云「尚左手」，則「尚左手」當連「嚙之」爲句，而「弗繚」之「弗」當讀如字。吳氏廷華云：「卻，同却，縮也。右手取肺則伸，左手不伸而執本，故曰卻。《鄉射》肺離上爲本，下爲末。繚從肺本循之，至末乃絕之。又《鄉射》『尚左手嚙之』注云：『右手在下，絕以授口嘗之。』則『尚』當作『上』。左手在上執本，右手在下絕末也。肺離，離肺也。離者，離而未絕也。」褚氏寅亮云：「注訓繚爲垂紵，而不解「弗」字之義。案：《說文》：「弗，撝也。」又云：「撝，舉也。」然則鄭意蓋謂舉左手以垂紵肺，乃以右手絕其末以祭。弗字易明，故不釋也。但篇中俱從士禮，獨此從大夫禮，未詳。」凌氏《釋例》曰：「凡祭薦者坐，祭俎者興；祭薦者執爵，祭俎者奠爵。《鄉飲酒禮》主人獻賓，賓坐，左手執爵，祭脯醢。奠爵于薦西，興，^②右手取肺，卻左手執本，坐，弗

繚，右絕末以祭，^③尚左手，嚙之，興；加于俎。《鄉射禮》主人獻賓，賓坐，左執爵，右祭脯醢，奠爵于薦西，興取肺，坐絕祭，尚左手，嚙之，興，^④加于俎。二禮並同。惟《鄉飲酒》繚祭，《鄉射》絕祭爲小異耳。祭肺用兩手，故必奠爵；俎高於豆，故必興。祭用右手，執肺本用左手也。取肺興，祭時乃坐，祭畢加俎，又興也。《燕禮》、《大射儀》主人獻賓，皆奠爵于薦右，興取肺，坐絕祭，嚙之，興，加于俎。主人獻公，皆云「公祭如賓禮」。唯《燕禮》膳宰贊授肺，《大射儀》庶子贊授肺，較賓爲隆。蓋即《周官·大祝》九祭之共祭也，餘皆無俎。《大射儀》主人獻卿，乃薦脯醢。卿升席，庶子設折俎。卿坐，左執爵，右祭脯醢。奠爵于薦右，興，取肺，坐絕，祭，不嚙肺，興，加于俎。《燕禮》卿無俎，而《大射儀》卿有俎者，注謂「射禮尊也」。不嚙者，自貶於君。至於獻大夫以下，亦皆無俎，與《燕禮》同也。《公食大夫禮》：「三牲之肺不離，贊者辯取之，壹以授賓。賓興受，坐

①「皆」，原作「但」，今據《儀禮鄭注句讀》改。
 ②「興」，原脫，今據《禮經釋例》補。
 ③「右」，原作「左」，今據《續清經解》本改。
 ④「之興」，原脫，今據《禮經釋例》補。

祭。《士虞禮》：主人獻祝，祝奠爵，興取肺，坐祭，嘑之，興，加于俎。《特牲禮》：主人獻祝，又云「奠角者，文不具也」。又賓三獻，主婦致爵于主人。主人左執爵，祭薦。宗人贊祭奠爵，興，取肺，坐絕祭，嘑之，興，加于俎。主人獻賓，但不贊祭，餘皆同。《有司徹》：主人獻尸，司馬羞羊肉湑，尸坐奠爵，興，取肺，坐絕祭，嘑之，興，反加于俎。主人受尸酢，司馬羞羊肉湑，主人坐，奠爵于左，興，受肺，坐絕祭，嘑之，興，^①反加于湑俎。此祭畢饋尸之禮，尊主人，故與尸同也。主婦受尸酢，奠爵，興，取肺，坐絕祭，嘑之，興，加于俎。主婦受尸酢，與獻侑同，惟主婦祭肺奠爵為異耳。又不饋尸之禮，主婦致爵于主人，及賓致爵于主婦，皆左執爵，右祭豆籩後，奠爵，興，取肺，坐絕祭，嘑之，興，加于俎。以上並祭薦者坐，而執爵，祭俎者興而奠爵，蓋祭薦、祭俎之正禮也。」注云「繚，猶紵也。大夫以上，威儀多。紵，絕之。尚左手者，明垂紵之，乃絕其末者，《周禮》：大祝辨九祭，七曰絕祭，八曰繚祭。注云：「繚祭，以手從肺本循之，至於末，乃絕以祭。絕祭，不循其本，直絕以祭。」本同。禮多者繚之，禮略者絕則祭之。鄉飲酒為大夫禮，故用繚祭。云弗繚也，姜氏兆錫云：弗，蓋讀如「紉紉」之「紉」，拂戾之義。凌氏廷堪云：「《說文》：「弗，撝也。」其義可與經

注相證。案：《說文》：「弗，撝也。從丿，從省。」又：「丿，右戾也」，「左戾也」，「撝，舉手也」，是弗者舉手，而有了戾之形。繚，《說文》：「纏也。」又：「紵，轉也。」《孟子》：「紵兄之臂。」趙注：「紵，戾也。」《方言》：「軫，戾也。」郭注：「相了戾也。」軫與紵音義同。是弗、繚二字義相通。經文連言，注祇釋繚，不釋弗，以其義同也。左手執本，垂紵之，右手乃絕其末以祭，而復尚左手以嘑肺。「尚左手嘑之」五字連讀。姜說是也。諸家釋此經者多以弗繚為不繚，^②與注說違異，然經明出繚字為九祭之一，固無庸別為異議也。」坐撝手，遂祭酒。撝，拭也。古文「撝」作「說」。【疏】正義曰：「古文「撝」作「說」，《校勘記》云：「《釋文》：「坐撝，始銳反，拭也。注撝同。」今注中無「撝」字，疑「說」字本作「撝」，故賈疏以《內則》之「撝」釋之。浦鏜改「說」為「撝」，似有理。後凡言「古文撝作說」放此。」○李氏如圭云：「撝手，為絕肺染汙也。撝手以所佩帨巾，^③剗肺不撝手。」張氏爾岐云：「坐以帨巾拭手，遂執爵祭

① 「興」，原脫，今據《禮經釋例》補。

② 「釋」，原作「從」，今據《儀禮正義正誤》改。

③ 「帨巾」，原作「撝手」，今據《儀禮集釋》改。

酒。」凌氏《釋例》云：「凡祭薦不挽手，祭俎則挽手。祭薦不挽手，說見上。祭俎則挽手者，考《鄉飲酒》、《鄉射》主人獻賓，《燕禮》、《大射》主人獻賓，《大射》主人獻卿，皆祭肺、興、加于俎之後坐挽手，然後執爵祭酒。此見於嘉禮者也。《特牲禮》賓三獻，主婦致爵于主人，及主人獻賓。《有司徹》不償尸之禮，主婦致爵于主人，及賓致爵于主婦。亦皆祭肺、興、加于俎之後坐挽手，然後執爵祭酒。此見之於吉禮者也。蓋祭肺，或繚祭，或絕祭，並禮之盛，^①用兩手，故必奠爵挽手也。亦有祭俎不挽手者。《大射儀》司馬獻服不，司射獻釋獲，皆不奠爵，不挽手。《鄉射》司馬獻獲者，司射獻釋獲者，^②亦同。不奠爵，用一手，則非繚祭，絕祭可知。禮殺，不敢備也。《士虞禮》主人獻祝，祝奠爵祭肺；《特牲禮》主人獻祝，祝執角祭肺，皆不挽手。《少牢》祝俎無肺，禮更殺也。《有司徹》主人獻尸，主人受尸酢，主婦獻侑，主人獻長賓，祭俎，皆不挽手，亦不備禮也。至於《士虞》、《特牲》尸入九飯，舉肺、脊、幹、骼、肩。《少牢》尸入十一飯，舉肺、脊、幹、骼、肩。舉幹後，又舉魚與腊、肩，方士禮為盛。尸皆不挽手者，^③有佐食授之，尊尸也。《燕禮》公祭俎，膳宰贊授肺；《大射》公祭俎，庶子贊授肺，經並云「祭如賓禮」，不云挽手與否。既云「祭如賓禮」，或亦挽手歟？《公食大夫禮》「三

牲之肺不離，贊者辯取之，壹以授賓，賓興受，坐祭。挽手。」此有贊者授之而亦挽手，則《燕禮》、《大射》公祭俎皆挽手可知矣。」案：挽手之禮，為絕肺染汙也。絕肺之後，皆無不挽手而祭酒者，尊卑當同之也。故經不著其挽手之文，其有不言挽手者，文不具也。《鄉射》司馬獻獲者，雖不言奠爵，而注云「亦二手祭酒反注，如《大射》」，則非用一手可知。至《公食大夫禮》有贊者授之，而亦挽手，則《士虞》、《少牢》有佐食授之而亦挽手可知。禮以敬為主，挽手，所以敬也。凌氏之說似未確。注云「挽，拭也。古文「挽」

作「說」者，^④胡氏承珙云：「案：賈疏云：『《內則》事佩之中有挽，則賓客自有挽巾以拭手也。』據此，似經文「挽手」字本作「挽」。蓋《禮經》今文作「坐挽手」，古文作「坐說手」。鄭從今文，故疊古文云「挽作說」。《釋文》本今文仍作「挽」，^⑤與疏本異。「挽」字，《說文》訓「解挽」，與此無

①「並」，原作「燕」，今據《續清經解》本改。

②「獲者，司射獻」，原脫，今據《禮經釋例》補。

③「尸」，原脫，今據《禮經釋例》補。

④「作」，原作「似」，今據上文改。

⑤「今」，《儀禮正義正誤》作「經」。

涉。「帨」本「帥」之或字。《說文》：「帥，佩巾也。或作帨。」帨本所以拭手，而拭手遂謂之帨手，義自可通。^①《有司徹》「主婦坐帨手」注云：「帨手者於帨。帨，佩巾。」《內則》曰「婦人亦左佩紛帨」。古文帨作說。據此注知經文本當作「帨手」。鄭注《內則》云「巾以帨手」，注《少儀》引《鄉射禮》「興，加于俎，坐帨手」，皆作「帨」，不作「帨」。《公食大夫禮》：「賓興受，坐祭，帨手。」注：「帨，拭也。拭以巾。」疏云：「案：《內則》左佩紛帨。帨即佩巾。而云帨，拭，拭手以巾。似帨不名巾者，本名帨者，以拭手爲名，其實名巾，故鄭舉其實稱也。」據此，益知經文必皆作「帨手」。鄭訓帨爲拭，古文作「說」者，乃假借字，鄭所不從。「案：此說是也。《說文》「帨」、「帨」異義。「帥」爲佩巾之本字，「帨」爲「帥」之或體。許君於《禮經》多用今文。此據《禮經》今文佩巾字用「帨」從之也。許鄭此條同解，淺人疑於帨爲佩巾，不得訓拭，盡改經注「帨」字爲「帨」，不知帨巾，^②亦無拭義，且以帨拭手謂之帨，猶以巾拭手亦謂之巾，義本相成也。訓詁中此例甚多，如幘之本義爲幘，而以帷幔覆物即謂之幘；帖之本義爲帛書署，而以帛署相附即謂之帖，皆其類也。段氏玉裁《說文解字注》亦云：「《鄉飲酒禮》、《鄉射禮》、《燕禮》、《大射儀》、《公食大夫禮》、《有司徹》皆言

「帨手」。注：「帨，拭也。」「帨手者於帨，帨，佩巾。」據賈氏《鄉飲》、《公食》二疏，知經注皆作「帨」，別無「帨」字。「興」，

席末坐啐酒。啐，亦嘗也。【疏】正義曰：賈疏云：「於席末，謂於席之尾。《鄉飲酒義》：「祭薦、祭酒，敬禮也。」^③

啐肺，嘗禮也。啐酒，成禮也。於席末，言是席之正，非專爲飲食也。^④此所以貴禮而賤財也。」注云：「祭薦、祭酒、

啐肺於席中，唯啐酒於席末。」是也。啐酒於席末者，酒是財，賤財之義也。敖氏曰：「席末，席西端也。無後事而啐

酒者，欲知其旨而告之也。」凌氏《釋例》曰：「凡祭酒，禮盛者啐酒，不盛者不啐酒。祭肺，禮盛者啐肺，不盛者不啐

肺。《士冠禮》醺用酒，冠者祭酒，興，筵末坐啐酒。若禮，但啐之而已，不卒爵也。《鄉飲酒》、《鄉射》主人獻賓，賓皆祭酒，

興，席末坐，啐酒。《燕禮》、《大射》主人獻賓，亦皆祭酒，興，席末坐，啐酒。主人獻公，與賓同。皆禮之盛者。《鄉射禮》

主人獻遵，遵祭如賓禮，不啐酒。注：「殺於賓也。」《燕禮》

主人獻遵，遵祭如賓禮，不啐酒。注：「殺於賓也。」《燕禮》

主人獻遵，遵祭如賓禮，不啐酒。注：「殺於賓也。」《燕禮》

主人獻遵，遵祭如賓禮，不啐酒。注：「殺於賓也。」《燕禮》

主人獻遵，遵祭如賓禮，不啐酒。注：「殺於賓也。」《燕禮》

主人獻遵，遵祭如賓禮，不啐酒。注：「殺於賓也。」《燕禮》

主人獻遵，遵祭如賓禮，不啐酒。注：「殺於賓也。」《燕禮》

主人獻遵，遵祭如賓禮，不啐酒。注：「殺於賓也。」《燕禮》

主人獻遵，遵祭如賓禮，不啐酒。注：「殺於賓也。」《燕禮》

主人獻遵，遵祭如賓禮，不啐酒。注：「殺於賓也。」《燕禮》

主人獻卿，遂祭酒，不啐酒。《鄉飲酒》主人獻介，不啐酒。皆禮之殺者。《特牲》主人獻尸，尸祭酒，啐酒。尸醑主人，主人祭酒，啐酒。主人獻祝，祝祭酒，啐酒，主婦亞獻，賓三獻，主婦致爵于主人，嗣舉奠，皆同。《少牢》主人獻尸，尸醑主人；主人獻祝，賓長獻，祝上餽嘏主人。《有司徹》主人獻尸，主人受尸酢，主婦獻尸，主婦致爵于主人，主婦受尸酢。皆祭酒、啐酒。《士虞禮》主人獻尸，主人獻祝，經並云「祭酒，嘗之」。嘗酒即啐酒也。亦皆禮之盛者。《特牲》主人獻佐食，主人獻賓。《少牢》主人獻兩佐食，主婦獻尸，主婦獻兩佐食，^①賓長獻尸，尸酢賓長。《有司徹》主人獻侑，主人酬尸，主人獻長賓，上賓三獻。皆祭酒，不啐酒，亦皆禮之殺者。是禮盛者啐酒，不盛者不啐酒也。《鄉飲酒》、《鄉射》主人獻賓，皆祭肺，啐之。《燕禮》、《大射》主人獻賓，^②亦皆祭肺，啐之。皆禮之盛者。《鄉飲酒》主人獻介，不啐肺。《鄉射禮》主人獻遵，不啐肺。《大射》主人獻卿，不啐肺。注：「不啐、啐，自貶於君。」《燕禮》卿無俎，但不啐而已。皆禮之殺者。《士虞禮》尸九飯，佐食舉肺脊授尸，^③尸受，振祭，啐之。《特牲》尸九飯同。《士虞》、《特牲》主人獻祝；《特牲》主人獻賓；《有司徹》主人獻尸，主人受尸酢，主婦受尸酢；皆祭肺啐之。皆禮之盛者。《少牢》尸十

一飯，上佐食舉尸牢肺、正脊以授尸。經不云祭、啐者，文不具也。《有司徹》主人獻侑、主婦獻侑、主人獻長賓，皆祭肺，不啐肺，亦皆禮之殺者。是禮盛者啐肺，不盛者不啐肺也。《鄉飲酒》遵者人之禮，若公則如賓禮，啐酒、啐肺也；大夫則如介禮，不啐酒、不啐肺也。蓋《鄉飲》、《鄉射》之賓，猶之《燕禮》、《大射》之賓也。《有司徹》祭畢饋尸之尸，亦猶《飲酒》之賓也。故皆啐酒、啐肺，盛其禮。《燕禮》、《大射》之有公，亦猶《鄉飲酒》、《鄉射》之有遵也。諸公為遵，則如賓禮。故亦啐酒、啐肺，尊之與賓同。《燕禮》、《大射》之有卿，《鄉射》之有遵，《有司徹》之有侑，亦猶《鄉飲酒》之有介也，故不啐酒、不啐肺，殺於賓及尸也。《鄉飲》、《鄉射》之主人，《有司徹》之主人、主婦，皆尊，故亦啐酒、啐肺，如賓尸禮。《燕禮》、《大射》之主人，則以宰夫為之，遠下於賓，故不特不啐、啐，併亦無俎，但祭酒而已。祝尊於佐食，故《特牲》祝啐、啐，佐食不啐、啐。《少牢》祝啐酒，佐食不

① 「婦」，原作「人」，今據《禮經釋例》改。

② 「賓」，原脫，今據《禮經釋例》補。

③ 「脊」，原重文，今據《禮經釋例》刪。「尸」，原脫，今據《禮經釋例》補。

啐酒也。《少牢》祝及佐食俎皆無肺，故不祭、啐。嘉禮介與卿不啐，啐，則卑於介、卿皆不啐、啐也。吉禮侑與賓不啐、啐，則卑於侑、賓，皆不啐、啐也。」吳氏廷華云：「席末坐者，蓋不敢當南面正席，以主人賓賢，故不敢當重禮也。下階上卒爵，義同。」褚氏寅亮云：「《冠禮》，冠者啐醴不卒觶，亦在席末，^①則此之席末啐酒，不爲西階上卒爵起見明矣。」降席，坐奠爵，拜告旨，執爵興。主人阼階上荅拜。降席，席西也。旨，美也。【疏】正義曰：李氏如圭云：「席末啐酒，因降席便，故賓、主人升降皆由下。」^②敖氏云：「拜乃告旨，謝其以旨酒飲己也。降席即拜者，欲近於啐酒之處，且以別於拜既也。既拜，則坐以告旨。」凌氏《釋例》云：「凡獻酒，禮盛者則啐酒、告旨。《鄉飲酒》、《鄉射》主人獻賓，皆啐酒、告旨。《燕禮》、《大射》主人獻賓，亦皆啐酒、告旨。《有司徹》主人獻尸，亦啐酒、告旨。皆禮之盛者。《鄉飲酒》主人獻介、《鄉射》主人獻大夫，皆不啐酒、不告旨。《燕禮》、《大射》主人獻卿，亦皆不啐酒、不告旨。《有司徹》主人獻侑，亦不啐酒、不告旨。皆禮之殺者。蓋賓之告旨，猶主人之崇酒，禮盛者皆有之。至於《有司徹》主婦獻尸，尸不啐酒、不告旨者，則主人獻尸時已

啐酒、告旨矣。且主婦之禮殺，亦所以辟主人也。」又曰：「凡啐酒於席末，告旨則降席拜。《鄉飲酒》、《鄉射》主人獻賓，皆席末坐，啐酒。《燕禮》、《大射》主人獻賓，亦皆席末坐，啐酒。《有司徹》主人獻尸，^③尸亦席末坐，啐酒。是啐酒則於席末也。《鄉飲酒》、《鄉射》主人獻賓，皆降席，坐奠爵，拜告旨，執爵興，主人阼階上荅拜。《燕禮》、《大射》主人獻賓，亦皆降席，坐奠爵，拜告旨，執爵興，主人荅拜。于賓右拜也。《有司徹》主人獻尸，尸坐奠爵拜，告旨，執爵以興。主人北面，于東楹東荅拜。經不云降席者，文不具也。是告旨則降席拜也。蓋正獻時賓、主人各三拜：受爵送爵，一拜也；告旨，一拜也；卒爵，一拜也。受爵，送爵，卒爵皆拜于階上，惟告旨之拜則降席，而主人亦於階上荅拜也。」又曰：「凡獻酒，禮盛者受爵、告旨、卒爵皆拜，^④酢主人，禮殺，不拜告旨；又殺者，不酢主人。獻酒，拜受爵，拜告旨，拜卒爵，酢主人，如《鄉飲酒》、《鄉射》主人獻賓，

- ① 「席」，原作「序」，今據《儀禮管見》改。
- ② 「升」，原作「興」，今據《儀禮集釋》改。
- ③ 「尸」，原脫，今據《禮經釋例》補。
- ④ 「皆」，原脫，今據《禮經釋例》補。

《燕禮》、《大射》主人獻賓，《有司徹》主人獻尸是也。不拜告旨，如《鄉飲酒》主人獻介，《鄉射》主人獻大夫，《特性》主人獻賓、獻內賓，《有司徹》主人獻侑、主人獻長賓是也。不酢主人，如《鄉飲酒》、《鄉射》主人獻衆賓；《燕禮》、《大射》主人獻卿、獻大夫、獻士；《特性》主人獻衆賓；《有司徹》主人獻衆賓、主人獻兄弟、獻內賓是也。不拜卒爵，如《鄉飲酒》、《鄉射》主人獻衆賓、衆賓之長，獻工、工之長，獻筮、筮之長；《鄉射》獻獲者、釋獲者，《燕禮》、《大射》主人獻大夫、獻士、士之長，獻工、工之長，獻筮、筮之長。《大射》不獻筮。《大射》司馬正獻獲者，注不言拜既爵，司馬正已反位，不拜可知也。司射獻釋獲者，《特性》主人獻衆賓；《有司徹》主人獻衆賓、衆賓長，獻兄弟、兄弟之長是也。不拜受爵，如《鄉飲酒》、《鄉射》主人獻衆賓，^①衆賓之長，升拜受者三人，衆賓獻則不拜受爵。獻衆工，獻衆筮，《燕禮》、《大射》主人獻衆工，獻衆士，《燕禮》獻衆筮，《有司徹》主人獻衆賓，經云：「衆賓長升，拜受爵。」注云：「衆賓長拜，則其餘不拜。」獻衆兄弟是也。至如《燕禮》、《大射》獻庶子，則如獻士之禮；獻左右正與內小臣，則如獻庶子之禮也。獻庶子、左右正、內小臣，皆於阼階上；獻士，則於西階上。《特性》主人獻長兄弟于阼階上，則如賓儀；獻衆兄弟，則如衆賓儀；獻內兄弟于房中，則

如獻衆兄弟之儀也。若《燕禮》、《大射》主人獻公不告旨者，以酒是已物，非禮殺也。《有司徹》主婦受尸酢，不崇酒者，辟主人也。又主人獻私人于阼階上，拜于下，升受，主人荅其長拜。又云：「主人于其羣私人不荅拜。」是羣私人皆於階下拜受爵，^②主人唯於其長荅拜，^③與衆賓、衆工、衆筮、衆士、衆兄弟不拜，受爵之例不同也。賓西階上，北面坐卒爵，興；坐奠爵，遂拜，執爵興。主人阼階上荅拜。卒，盡也。於此盡酒者，明此席非專爲飲酒起。【疏】正義曰：敖氏云：「必西階上卒爵者，以歸者於此拜受故也。」凌氏《釋例》云：「凡禮盛者坐卒爵，禮殺者立卒爵。《鄉飲酒禮》主人獻賓，賓酢主人；主人獻介，介酢主人。《鄉射禮》主人獻賓，賓酢主人；主人獻遵，遵酢主人。《燕禮》、《大射》主人獻賓，賓酢主人，主人自酢于公，主人獻卿。《特性禮》主人獻賓，主人自酢。《有司徹》主人獻尸、獻侑，主人受尸酢，主婦獻尸、獻侑，致爵于主人，主人獻長賓，主人自酢于長賓，賓受尸酢。皆坐卒

① 「衆賓」，原脫，今據《禮經釋例》補。

② 「下」，原作「上」，今據《禮經釋例》改。

③ 「唯」，原脫，今據《禮經釋例》補。

爵。是禮盛者坐卒爵也。又《鄉飲酒》、《鄉射》主人獻衆賓，《燕禮》、《大射》主人獻大夫、獻士。獻庶子如獻士之禮，左右正、內小臣同。《大射》、《鄉射》獻獲者、釋獲者，《特牲》主人獻衆賓，衆兄弟、^①內兄弟同。《有司徹》主人辯獻衆賓、獻兄弟、獻內賓、獻私人，皆坐祭立飲，是禮殺者立卒爵也。《燕禮》、《大射》主人獻公立卒爵者，嫌與賓同也。《鄉飲酒》、《燕禮》獻筮立卒爵，獻工坐卒爵者，工不能備禮也。《特牲》、《少牢》獻祝與佐食皆坐卒爵者，以其接神事尸尊之，故盛其禮也。室中獻尸，不云「坐卒爵」者，蒙上文尸即席坐也。《少牢》云：「尸升筵，遂坐。」《士昏禮》婦餞畢，^②姑餞。《特牲》、^③《少牢》餞畢，主人酌酢。皆坐卒爵者，以其尊者之餘也。又《鄉飲酒》、《鄉射》主人酬賓，《燕禮》、《大射》主人酬賓，《有司徹》主人酬尸、酬賓，皆坐祭，遂飲。此酬禮之盛者也。《鄉飲酒》、《鄉射》一人舉觶，二人舉觶，皆坐祭，遂飲。《燕禮》、《大射》二大夫媵爵，皆坐祭，遂卒觶。《特牲》主人酬賓，坐祭，卒觶，此旅酬之發端，禮亦盛，故坐卒爵也。^④至於旅酬，無算爵，其禮殺，則皆立飲矣。獻酬用爵，自酬以下皆用觶，此又隆殺之義也。^⑤《鄉飲酒》記：「坐卒爵者拜既爵，立卒爵者不拜既爵。」注：「隆殺各從其宜，不使相錯，惟工不從此禮。」亦隆殺之例也。」高

氏愈云：「凡獻賓之禮，飲一爵而賓主各拜者四：拜洗，一也；拜送，二也；拜旨，三也；拜既，四也。○注「非專爲飲酒起」，《校勘記》云：「酒，徐本、《集釋》、《通解》、楊氏俱作「食」，與疏合。」云「卒，盡也」者，程氏易田云：「《燕禮》亦不在席盡爵，然則西階北面坐卒爵乃常禮也。」云「明此席非專爲飲酒起」者，盛氏世佐云：「《鄉飲酒義》曰：「是席之正，非專爲飲食也。」注蓋本此，謂卒爵於西階上即「啐酒於席末」之義也。此說深得禮意，赦說淺矣。」

右主人獻賓

賓降洗。將酢主人。【疏】正義曰：韋氏協夢

云：「此不言以虛爵降，《鄉射》不言降洗，皆互文。」主人降，亦從賓也。降，降立阼階東西面。【疏】正義曰：程氏易田云：「初疑洗當東榮，在東序之東矣；主人位若直東

- ①「衆」上，原衍「獻」字，今據《禮經釋例》刪。
- ②「畢」，原作「餘」，今據《禮經釋例》改。
- ③「特牲」，原脫，今據《禮經釋例》補。
- ④「坐」下，原衍「祭」字，今據《禮經釋例》刪。
- ⑤「隆殺」，《禮經釋例》作「卒爵」。

序，則賓洗、主人辭洗面皆不順。及細閱《鄉飲》、《鄉射》兩經，主人洗皆南面，辭賓洗亦皆南面，賓洗皆北面，^①辭主人洗亦皆北面。上經賓主辭主人洗也，進而東乃北面，以西階遠於洗，故東行以就主人。而賓之卒洗也，取爵適洗之南，乃北面，主人阼階東南面辭洗，^②賓奠爵于篚，興對。其對也，必少西於洗，乃得賓主南北相對。及主人復東階東西面之位，賓復少東行，然後北面盥而卒洗也。以主人位直東序，而洗又在其東，興對既少西於洗，則卒洗必東行而後可旋而北面也。若以「東」字屬下，作「東北面」，則《鄉射禮》明是北面盥洗，不得於《鄉飲》又別異也。據此，則主人堂下之位直東序益明，而上經賓進東北面辭洗。此經賓東北面盥，楊氏《圖》二「東」字並屬下讀，誤甚。「賓坐奠爵，興辭」。西階前也。【疏】正義曰：《鄉射》云：「賓西階前東面坐奠爵，興，辭。」此不言西階前東面，以見於《鄉射》，略之也。故注本以為說。韋氏協夢云：「獻賓時不言坐奠爵興，此不言坐奠爵階前，亦互文。」主人對，賓坐取爵，適洗南北面。【疏】正義曰：《校勘記》云：「賓」下，唐石經衍「上」字。○敖氏云：洗南北面，別於主人也。於賓之取爵也，主人復位。主人阼階東，南

面辭洗。賓坐奠爵于篚，興對。主人復阼階東，西面。【疏】正義曰：《校勘記》云：「阼階，唐石經脫「阼」字。」○李氏如圭云：「凡洗必盥，辭洗必既洗而後辭，爵已洗則奠之不於篚下。此經主人辭洗，賓奠爵于篚對，則既盥洗矣。盥又當如《鄉射禮》繫之於適洗南之下，互之於後耳。」敖氏曰：「南面辭洗，猶不離阼階東，示違其位而已。此主人辭洗在賓盥之先，與他禮微異，未詳。」張氏爾岐云：「前獻賓，主人既盥而後辭洗。此則賓未盥而已辭洗，故主人奠爵初在篚下，繼乃於篚，以初未聞賓命也。賓奠爵即于篚，以已聞主命也。」方氏苞云：「《鄉射》、《燕》、《大射》皆賓盥洗而後主人辭。」《燕》與《大射》膳宰以君命禮賓，自當待其盥洗而後禮辭。此則鄉大夫為國禮賢，故賓未盥而先辭過禮，^③以示下士之誠也。若州長習射，即賓為公士，亦州中有位於朝者，則循禮之常可矣。」盛氏世佐云：「盥而後辭洗，禮之常也；未盥而辭洗，變以示重也。於此可見古人尊賢之禮。」賓東北面盥，坐取爵，卒

①「皆」，原作「在」，今據《續清經解》本改。

②「南」，原作「北」，今據《續清經解》本改。

③「過」，原作「遵」，今據《儀禮析疑》改。

洗，揖讓如初，升。【疏】正義曰：敖氏云：「凡盥洗

於洗南者，皆北面。此云「東北」，未詳，疑「東」衍文也。」方氏苞云：「階下之位，主人在洗北，賓在洗南，故賓辭洗，少進東北面，而盥洗亦如之。主人辭洗，西南面，而盥洗亦如之。」盛氏世佐云：「土言沃洗者西北面，此不言者，可知也。主人在洗北，沃洗者在洗南，故主人南面，而沃洗者西北面，沃之便也。今賓者在洗南，沃洗者在其右，故賓方盥洗，必東北而邪向之，亦取其便也。敖氏以「東」爲衍文，非也。」如初者，謂一揖一讓也。主人拜洗。賓荅拜，

興，降盥，如主人禮。【疏】正義曰：敖氏云：「如上文『降盥』以至『坐取爵』之儀，但面位異耳。」張氏爾岐云：

「如其從降，辭對。」賓實爵主人之席前，東南面

酢主人。【疏】正義曰：主人在阼階，賓自主席前向之，故東南面。凌氏《釋例》曰：「凡賓報主人之酒，謂之酢。」

《鄉飲》、《鄉射禮》主人獻賓畢，賓實爵，主人之席前東南面

酢主人。《燕禮》、《大射》主人獻賓畢，賓升酌膳，以酢主人

于西階上。此賓酢主人也。《士虞禮》主人獻尸畢，祝酌授

尸，尸以醋主人；主婦亞獻，^①賓長三獻同。《特牲禮》：

「祝酌，^②授尸，尸以醋主人。」又主婦獻尸畢，醋如主人儀。

又賓三獻，尸卒爵酢。^③注：「酢於賓也。」《少牢禮》主人

獻尸畢，祝酌授尸，尸酢主人。又主婦獻尸畢，祝易爵，洗，

酌，授尸，主婦拜受爵，尸荅拜。又賓長獻尸畢，祝酌，授

尸，賓拜受爵，^④尸拜送爵。此正祭時尸酢主人、主婦、賓

長也。《有司徹》主人獻尸、侑畢，尸降盥，升，坐取爵，酌。

注：「酌者，將酢主人。」又：主婦獻尸、侑，致爵主人畢，尸

降筵，受主婦爵以降。注：「將酢主婦。」又：賓三獻畢，在

酌致主人後。尸降筵，受三獻爵，酌以酢之。不償尸之禮同。此

償尸時，尸酢主人、主婦、賓長也。此酢禮之盛者也。《鄉

飲酒》主人獻介畢，介揖讓，升，授主人爵于兩楹之間。介

西階上立，主人實爵，酢于西階上。自酢也，獻衆賓不酢。《鄉

射禮》主人獻大夫畢，大夫遵也。大夫授主人爵于兩楹間，

復位，主人實爵以酢于西階上。此即《鄉飲酒》介酢主人之儀。

《燕禮》主人獻公畢，洗，升，酌膳酒以降，酢于阼階下。^⑤亦

①「亞」，原作「竝」，今據《禮經釋例》改。

②「祝」，原作「尸」，今據《禮經釋例》改。

③「爵」，原脫，今據《禮經釋例》補。

④「拜」，原作「荅」，今據《禮經釋例》改。

⑤「下」，原作「上」，今據《禮經釋例》改。

是自酢。《大射》作「酢散」，餘儀同。《燕禮》酌膳，此酌散者，主於射，不主飲酒故也。此介、遵及公酢主人也。^①《特牲禮》主人獻賓畢，受爵酌酢。注：「主人酌自酢者，賓不敢敵主人，主人達其意。」《有司徹》獻長賓，衆賓畢，乃升長賓，主人酌酢于長賓。注：「主人酌自酢，序賓意，賓卑不敢酢。」此祭畢飲酒，賓酢主人也。^②皆酢禮之殺者也。下此則不敢酢矣。又《特牲禮》主婦致爵于主人畢，受爵酌酢。又主人致爵于主婦畢，主人更爵酌酢。又：賓致爵于主人，主婦畢，更爵酢于主人。又主人酌養畢，上養洗爵，升，酌酢主人。《少牢禮》：「主人受上養爵，酌以酢於戶內。」以及不償尸之致酢。^③則行於賓三獻與養時，^④亦禮之殺者也。「主人阼階上拜，賓少退。主人進受爵，復位。賓西階上拜送爵，薦脯醢。」【疏】正義曰：蔡氏德晉云：「主席在阼，而主人在席之南，故賓東南面酢主人。主人進受爵，^⑤則北面也。」高氏愈云：「主人獻賓則北面，賓酢主人則西面，主人自卑而尊賓之意也。拜送爵，此賓酢主人第二爵。」張氏爾岐云：「薦脯醢者，亦主人有司。」主人升席自北方，設折俎，祭如賓禮。祭者，祭薦俎及酒，亦嘑啐。【疏】正義曰：敖氏云：

「北方，席下也。主人、介席皆南上。」不告旨。酒，已物也。【疏】正義曰：敖氏云：「酒，主人之物也。其不告旨，不言可知。乃必言之者，宜別之如賓禮也。主人不告旨，乃亦啐酒者，若欲知其美惡以拜崇酒然。」自席前適阼階上，北面坐，卒爵，興，坐奠爵，遂拜，執爵興。賓西階上荅拜。自席前者，啐酒席末，因從北方降，由便也。【疏】正義曰：敖氏云：「從北方降，正也。」據敖氏以升降皆由下，故與注說異。注本啐酒席末言之，故知從北方降為由便。蓋主人當降自南方，以啐酒席末，因從北方降，是為由便，其義精矣。褚氏寅亮云：「凡升席由下，降席由上，正也；降亦有時而從下，由便也。東鄉，西鄉之席，以南方為上，則降從南方為正。今既啐酒於席末，則身在北矣。故即由便從北而降，轉過席前以適阼階。注云「由便」，明本非正也。敖氏謂升降皆由下，反以此從

①「遵」，原作「遂」，今據《禮經釋例》改。

②「賓」，原脫，今據《禮經釋例》補。

③「儻」，原作「賓」，今據《禮經釋例》改。

④「行」，原作「興」，今據《禮經釋例》改。

⑤「受」，原脫，今據《禮經本義》補。

北方降爲正，非也。後介不啐酒而自南方降席，則從降由上之正矣。敖氏欲護前說，乃云介尊，於禮輕者或得由便，則尤非。試思介身在席中，並非在南，此便何從生乎？案：《鄉射》「賓升席自西方」注云：賓升降皆由下。疏云：主人在東，降不由上，敬主人。然則升降皆由下惟賓耳。程氏易田云：「主人席在阼階上，據《鄉飲酒義》曰「坐于東南」，是已近堂廉矣。今自席前乃適阼階上，《鄉射禮》亦然。然則賓主拜位，卒爵之位，在階上，當楣者在主席南，幾垂堂廉，故主人坐奠爵于序端，其南北之節，即當拜位也。」主人坐奠爵于序端，阼階上北面再拜崇酒。賓西階上荅拜。東西牆謂之序。崇，充也，言

酒惡相充實。【疏】正義曰：《校勘記》云：「注『謂』，徐作『爲』。」云「東西牆謂之序」者，《爾雅·釋宮》文。敖氏云：「奠爵于序端，拜崇酒之禮然也。奠於其所而拜，則嫌若拜既爵；奠于筐而後拜，^①則嫌若禮畢而更端，故以奠於此爲節。」云「崇，充也，言酒惡相充實」者，《釋詁》文。崇酒之義，說者各異。敖氏云：「崇，重也。謂賓崇重己酒，不嫌其薄而飲之既也，故拜謝之。卒爵乃拜者，若曰已飲之，乃知其薄。」熊氏朋來曰：「崇，充也。添酌充滿之。」方氏苞云：《周官·酒正職》：「大祭三貳，中祭再貳，小祭壹

貳。注疏：五齊以祭，不敢副益。三酒人所飲，故就其尊而益注之。義取獻酢既畢，則尊中酒減，而益注以崇之。惟賓、介有崇酒之文，正所謂再貳，蓋比於中祭也。賓、介獻酢所減無幾，而以此爲崇酒之節者，旅酬無算爵，皆因賓、介而及之耳。」姜氏兆錫云：「此謝賓之酢爵也。崇之言隆。謂之崇酒者，謝賓酢之隆施耳。如以崇酒爲謝酒惡，當於獻賓、賓告旨之時，不當於酢主、主不告旨之後。」案：《釋詁》「崇」字三訓：「崇，充也」，注與熊說本之；「崇，重也」，敖氏本之；「崇，高也」，姜說近之。郝氏敬譏注說爲鑿。盛氏世佐云：「詳注意，蓋謂以惡酒充賓腹，故拜以謝也。於經義未爲大失，然訓崇爲充，充字並無酒惡之義，勢必添字乃通，固不如敖氏之直截也。」蓋主人崇酒當賓之告旨，主人獻賓而賓告旨，重主人之旨酒飲己也。賓酢主人，而主人崇酒，酒，己物也。卒爵而拜，重賓之不嫌其薄而飲之既也。其不於獻賓，賓告旨之時者，禮有其節，主人獻賓，賓以告旨爲節。賓酢主人，主人不告旨，則以崇酒爲節也。故崇在不告旨之後。高氏愈云：「酬獻之禮，賓主皆同。惟賓先拜旨酒而後拜既爵，主人先拜既爵而後拜崇

①「爵奠」，原倒，今據《儀禮集說》改。

酒，此爲小殊。」凌氏《釋例》曰：「凡酢如獻禮，崇酒，不告旨，禮殺者則以虛爵授之。」《鄉飲酒》、《鄉射》賓酢主人，賓爵于主人之席前，東南面酢主人。主人阼階上拜，賓少退。主人進受爵，復位。賓西階上拜送爵，薦脯醢。主人升席自北方，設折俎。祭如賓禮，不告旨。自席前適阼階上，北面坐卒爵，興，坐奠爵，遂拜，執爵興。賓西階上荅拜。主人坐奠爵于序端，阼階上北面再拜崇酒，賓西階上荅拜。《有司徹》主人受尸酢，尸升，坐取爵，酌。主人東楹東北面拜受爵，尸西楹西北面荅拜。至次賓羞匕湑後，主人席末坐，啐酒，執爵興。至次賓羞燔後，主人降筵自北方，北面，于阼階上坐卒爵，執爵以興，坐奠爵，拜，執爵以興。尸西楹西荅拜，主人坐奠爵于東序南，^①侑升，尸、侑皆北面于西楹西。主人北面于東楹東，^②再拜崇酒，尸、侑皆荅再拜。^③是酢酒唯不告旨而崇酒與獻禮異，^④餘皆同也。亦有不崇酒者。《燕禮》、《大射》賓酢主人，升酌膳，以酢主人于西階上。主人北面拜受爵，賓主人之左拜送爵。主人坐祭，不啐酒，不拜酒，不告旨，遂卒爵，興，坐奠爵，拜，執爵興。賓荅拜，主人不崇酒。此主人以宰夫爲之，酒是君物，故不崇酒。注「辟正君」是也。皆賓酌之以酢主人者。《鄉飲酒》介酢主人，升，授主人爵于兩楹之間，^⑤介西階上立。

主人實爵，酢于西階上介右，坐奠爵，遂拜，執爵興，介荅拜。主人坐祭，遂飲，卒爵，興，坐奠爵，遂拜，執爵興，介荅拜。主人坐奠爵于西楹南介右，再拜崇酒，介荅拜。《鄉射》大夫酢主人，升，大夫授主人爵于兩楹間，復位。主人實爵以酢于西階上，坐奠爵，拜，大夫荅拜。坐祭，卒爵，拜，大夫荅拜。主人坐奠爵于西楹南，再拜崇酒^⑥，大夫荅拜。與《鄉飲酒》介酢主人同，皆以虛爵授主人，不自酌，蓋禮之殺者。《鄉飲酒》注云：「介不自酌，下賓酒者，^⑦賓主共之。」是也。亦崇酒者，酒，己物也。《燕禮》、《大射》主人自酢于公，更爵，洗，升，酌膳酒以降，酢于阼階下，北面坐奠爵，再拜稽首，公荅再拜。主人坐祭，遂卒爵，再拜稽首，公荅再拜。則臣與君行禮也。《有司徹》主婦受尸酢，尸酌，主婦出于房，西面拜，受爵，尸北面于侑東荅拜。主婦

①「東」，原脫，今據《禮經釋例》補。

②下「東」字，原脫，今據《禮經釋例》補。

③「再」，原脫，今據《禮經釋例》補。

④「唯」，原作「雖」，今據《禮經釋例》改。

⑤「兩」，原作「西」，今據《禮經釋例》改。

⑥「再拜」，原脫，今據《禮經釋例》補。

⑦「賓」，原脫，今據《禮經釋例》補。

入于房，司宮設席于房中，南面。主婦立于席西，薦設畢，主婦執爵以出于房，西面于主人席北，立卒爵，執爵拜，尸西楹西北面荅拜。則男子與婦人行禮也。皆與酢之正禮異。至於《特牲》主人獻賓畢，受爵酌酢，奠爵拜，賓荅拜；主人坐祭，卒爵拜，賓荅拜。《有司徹》：「主人酌酢于長賓，西階上北面，賓在左。主人坐奠爵，拜，執爵以興，賓荅拜。坐祭，遂飲，卒爵，執爵以興，坐奠爵，拜，賓荅拜。」則皆祭畢。飲酒，禮又殺矣。又《有司徹》賓三獻，受尸酢，尸降筵，受三獻爵，酌以酢之，三獻西楹西，北面拜受爵，尸在其右以授之。^①尸升筵，南面荅拜，坐祭，遂飲，卒爵，拜。尸荅拜，亦尸親酌。不以虛爵授賓者，尊賓，故盛其禮也。」又曰：「凡賓告旨在卒爵前，于席西拜；主人崇酒在卒爵後，于階上拜。《鄉飲酒》、《鄉射》主人獻賓，皆席末坐，啐酒，降席，坐奠爵，拜告旨。注：「降席，席西也。」然後賓西階上北面，坐卒爵。《燕禮》、《大射》主人獻賓，亦皆席末坐，啐酒，降席，坐奠爵，拜告旨，然後賓西階上北面，坐卒爵。是賓告旨皆在卒爵前，于席西拜也。《有司徹》主人獻尸，亦席末坐啐酒，拜告旨，然後尸降筵，^②北面于西楹西，坐卒爵。饋尸之尸，如飲酒之賓，故其例同也。《鄉飲酒》、《鄉射》賓酢主人，皆自席前適阼階上，北面，坐卒爵，拜，然

後阼階上北面，再拜崇酒。^③《鄉飲酒》介酢主人，坐祭，遂飲，卒爵，然後介右再拜崇酒。《鄉射》大夫酢主人，坐祭卒爵拜，然後再拜崇酒，亦在大夫右拜。《有司徹》主人受尸酢，^④降筵自北方，北面于阼階上，坐卒爵，拜，然後北面于東楹東，再拜崇酒。是主人崇酒，皆在卒爵後，于阼階上拜也。《燕禮》、《大射》賓酢主人，主人卒爵拜後不崇酒者，主人本宰夫代公爲之，酒非己物，故其例異也。崇酒必再拜者，所以申主人之敬也。」

右賓酢主人

主人坐取觶于筐，降洗。賓降，主人辭降。賓不辭洗，立當西序，東面。不辭洗者，以其將自飲。【疏】正義曰：高氏愈云：「取觶者，將以酬賓也。凡所謂酬者，意欲其人之飲，而其不飲，則己先飲以倡之，而冀其人之亦飲，所謂導飲者也。不仍前爵而用觶者，

①「授」，原作「受」，今據《禮經釋例》改。

②「筵」，原脫，今據《禮經釋例》補。

③「再」，原脫，今據《禮經釋例》補。

④「主人受」，原作「授」，今據《禮經釋例》改。

一以示更新之敬，且器備而多儀，亦周之尚文然也。」李氏如圭云：「自飲而洗，禮貴絮。」敖氏云：「主人辭不言奠觶，又不言賓對者，如上禮可知。自飲乃洗者，亦象賓之飲己也。」韋氏協夢云：「《鄉射禮》『主人奠觶辭降』，^①此亦宜然。又《鄉射禮》『主人奠觶辭降』下，有『賓對東面立主人坐取觶洗』十一字，當以《鄉射》爲正。」程氏易田云：「此第二次取一觶於堂上之篚也。立當西席東面，賓堂下立位也。前主人降洗，賓降即立於此，故於其復位曰『當西席，東面』也。此與前經互相足。」注云「不辭洗者，以其將自飲」者，張氏爾岐云：「酬酒先自飲，乃酬賓，故注云『將自飲』。」^②獻用爵，酬用觶。一升曰爵，三升曰觶。「卒洗，揖讓，升。賓西階上疑立。主人實觶酬賓，阼階上北面，坐奠觶，遂拜，執觶興。賓西階上荅拜。酬，勸酒也。酬之言周，忠信爲周。」

【疏】正義曰：敖氏云：「此象賓之飲己，故其拜亦皆與受之於人者同。」張氏爾岐云：「先自飲，所以勸賓也。拜賓者，通其勸意也。荅拜者，荅其勸己也。」凌氏《釋例》云：「凡主人先飲以勸賓之酒謂之酬。」^③酬禮行於賓酢主人後，用觶不用爵，惟賓、主人乃行之。《鄉飲酒禮》：「賓酢主

人後，主人實觶酬賓。」注云：「酬，勸酒也。酬之言周，忠信爲周。」賈疏云：「酬酒先飲，乃酬賓。」《鄉射禮》：「賓酬主人後，主人實觶酬之。」此主人酬賓之正禮也。《燕禮》、《大射》：「主人自酢于公後，升媵觚于賓。此媵觚亦酬也。」宰夫爲主人，降于正主，故不曰酬而曰媵觚。又：「二人媵爵于公，公坐取大夫所媵觶，興以酬賓。媵觚是主人酬賓，此是公酬賓，宰夫代公爲主人，故公亦酬賓也。此觶，賓即用以旅酬。主人獻卿後，再請二人媵爵，公又行一爵，若賓若長，唯公所酬。此酬是卿舉旅之酒。若爲大夫、士舉旅，則曰賜，不曰酬。」《大射》爲卿舉旅亦作「賜」。此皆酬禮之殺者也。《特牲禮》：「獻衆賓後，主人洗觶酌于西方之尊，西階前北面酬賓。此觶即後賓旅酬之觶。」《有司徹》：「主人自酢于長賓後，宰夫洗觶以升，主人受酌，^④降，酬長賓于西階南。此觶即後無算爵之觶。」^⑤此祭畢飲酒之酬，亦禮之

①「射」，原作「飲」；「奠觶」原脫，今據《儀禮蠡測》改，補。

②「注」，原脫，今據《儀禮鄭注句讀》補。

③「之酒」，原脫，今據《禮經釋例》補。

④「受」，原作「升」，今據《禮經釋例》改。

⑤「即後」，原脫，今據《禮經釋例》補。

殺焉者也。又《有司徹》：賓三獻尸後，主人實爵酬尸。張氏爾岐云：「《特性》及下不償尸，皆無酬尸之事，此特有之，莫而不舉。」則正祭後以賓客事尸之禮，故獻酢之後主人酬之如賓也。又案：①獻酒逮及賤者，如工、笙、獲者、釋獲者、祝、佐食之類。酢主人惟賓、介及尊者有之，②酬酒雖介、遵亦無之，尊賓之意也。祭禮尸酢主人，而下及主婦長賓。若酬尸，亦惟主人而已。蓋酬禮惟賓、主人得行之。償尸則酬尸，如賓獻助祭之賓，則又酬之，上大夫償尸之禮，威儀多也。」坐祭，遂飲，卒觶，興，坐奠觶，遂拜，執觶興。賓西階上荅拜。【疏】正義曰：高氏愈云：「此主人自飲而亦拜者，蓋雖自飲，而實冀賓之飲，故拜以勸之也。此主人酬賓第三爵，主人飲。」張氏爾岐云：「主人導飲訖。」主人降洗，賓降，辭，如獻禮。升，不拜洗，不拜洗，殺於獻。【疏】正義曰：敖氏云：「如獻禮，如其降後升前之儀。」張氏爾岐云：「主人爲賓洗爵，故賓降辭如獻時，但升堂不拜耳。」凌氏《釋例》云：「凡酬酒不拜洗。案：獻酒禮盛者共四次拜：拜洗在未獻之前，一次也；拜受爵、送爵，二次也；拜告旨，三次也；拜卒爵，四次也。禮殺者，則不拜洗也。酢酒禮盛者，亦四次拜：拜洗在未酢之前，③一次也；拜受爵、送爵，二次也；拜卒爵，三次也；再拜崇酒，四次也。禮殺者，則不拜洗也。至於酬酒，雖是賓主人正禮，亦不拜洗，但有三次拜：主人自實觶之拜，一次也；主人自卒觶之拜，二次也；卒觶之後，主人降洗，如獻禮，升，不拜洗，至受爵送爵之時始拜，④三次也。酬酒奠而不舉，故亦無卒觶拜也。《鄉飲酒》、《鄉射》主人酬賓，《燕禮》、《大射》主人酬賓，《特性禮》主人酬賓，《有司徹》主人酬尸，主人酬賓，皆然。蓋酬酒之禮，又殺於獻酢矣。」賓西階上立。主人實觶賓之席前，北面。賓西階上拜。主人少退，卒拜，進，坐奠觶于薦西。賓已拜，主人奠其觶。【疏】正義曰：敖氏云：「席前北面，變於獻，⑤以其不授也。奠觶于薦西者，主人以此觶不舉不敢親授之，重勞賓也。凡酬酒有卒不舉者，有未即舉者，主人皆奠之而不

亦四次拜：拜洗在未酢之前，③一次也；拜受爵、送爵，二次也；拜卒爵，三次也；再拜崇酒，四次也。禮殺者，則不拜洗也。至於酬酒，雖是賓主人正禮，亦不拜洗，但有三次拜：主人自實觶之拜，一次也；主人自卒觶之拜，二次也；卒觶之後，主人降洗，如獻禮，升，不拜洗，至受爵送爵之時始拜，④三次也。酬酒奠而不舉，故亦無卒觶拜也。《鄉飲酒》、《鄉射》主人酬賓，《燕禮》、《大射》主人酬賓，《特性禮》主人酬賓，《有司徹》主人酬尸，主人酬賓，皆然。蓋酬酒之禮，又殺於獻酢矣。」賓西階上立。主人實觶賓之席前，北面。賓西階上拜。主人少退，卒拜，進，坐奠觶于薦西。賓已拜，主人奠其觶。【疏】正義曰：敖氏云：「席前北面，變於獻，⑤以其不授也。奠觶于薦西者，主人以此觶不舉不敢親授之，重勞賓也。凡酬酒有卒不舉者，有未即舉者，主人皆奠之而不

- ①「案」，原脫，今據《禮經釋例》補。
- ②「介及」，原倒，今據《禮經釋例》改。
- ③「酢」，原作「酬」，今據《禮經釋例》改。
- ④「送」，原作「卒」，今據《禮經釋例》改。
- ⑤「變」，原作「便」，今據《儀禮集說》改。

授，其意則同。《燕》與《大射》及《少牢》下篇，主人酬尸與賓，皆授觶，與士禮異。」張氏爾岐云：「奠觶西，欲賓舉此觶也。」①盛氏世佐云：「酬觶奠而不授，②亦殺於獻也。奠于薦西，③仍是欲賓舉此觶。若逆料其不舉而不親授，則非主人殷勤之意矣。」方氏苞云：「《燕》、《大射》薦西之酬觶，賓時不舉而相授受，備其儀以觀示衆人也。《少牢》饋尸之酬爵亦然。惟鄉大夫興賢能，州長教射，則主人奠觶于薦西。賓移置薦東而不相授受，以當其時不舉，則略其儀，教士以信直也。主人已奠觶，賓復遷之，以此觶終當取酬主人，④故更奠以示已受耳。」賓辭，坐取觶，復位。主人阼階上拜送，賓北面坐奠觶于薦東，復位。酬酒不舉，君子不盡人之歡，不竭人之忠，以全交也。【疏】正義曰：敖氏云：「辭，辭其奠觶也。奠觶，酬之正禮也。然奠而不授，亦不能無降等之嫌，故辭之。辭之而不獲命，乃坐取觶，示受也。辭及取觶，東面復位，待主人拜。」張氏爾岐云：「賓辭，賈疏以爲辭主人復親酌己。愚以主人方酌時不辭，殆非辭酌也。仍是辭其親奠，⑤如《鄉射》二人舉觶時耳。」盛氏世佐云：「奠觶于薦東，示不舉也。凡奠觶，將舉者於右，不舉者於左。辭是辭

奠。」敖、張二說得之。北面奠觶，敖氏云：「由便。凡賓於主人所奠之物，必取而遷之，⑥以示其不敢當之意，且爲禮也。堂上則左之，堂下則右之，亦各從其便也。」高氏愈云：「此主酬賓第四爵，賓不飲。」褚氏寅亮云：「注謂酬酒不舉，故奠於左，此通例也。即記所云：凡奠者于左，將舉者于右也。《集說》殊誤。試思左右之便，豈以堂上下而生別乎？又酬觶不舉，故奠而不授，又不敢必賓之不舉，故仍奠薦右，賓則遷於薦左，以示不舉。上經之辭，辭其奠薦右也。謂辭親酌己者，非；謂辭奠而不授者，亦猶未盡也。」凌氏《釋例》云：「凡酬酒先自飲，復酌，奠而不授，舉觶賡爵亦如之。」⑦《鄉飲酒》、《鄉射》主人酬賓，卒洗，揖讓，升，賓西階上疑立。主人實觶酬賓，阼階上北面坐奠觶，遂拜，執觶興。賓西階上荅拜。坐祭，遂飲，卒觶興，坐

- ①「賓」，原脫，今據《儀禮鄭注句讀》補。
- ②「觶奠」，原倒，今據《儀禮集編》正。
- ③「西」，原作「右」，今據《儀禮集編》改。
- ④「終」，原作「取」，今據《儀禮析疑》改。
- ⑤「是」，《儀禮鄭注句讀》作「上」。
- ⑥「取」，原作「坐」，今據《儀禮集說》改。
- ⑦「舉觶」，原脫，今據《禮經釋例》補。

奠觶，遂拜，執觶興，賓西階上荅拜。此主人先自飲也。又云：「賓西階上立，主人實觶，賓之席前北面。賓西階上拜，主人少退，卒拜，進，坐奠觶于薦西。賓辭，坐取觶，復位，主人阼階上拜送。」是主人復酌奠而不授也。《燕禮》、《大射》主人酬賓，升酌散，西階上坐奠爵，拜賓，賓降筵，北面荅拜；主人坐祭，遂飲，賓辭，卒爵拜，賓荅拜。此主人先自飲也。又云主人酌膳，賓西階上拜，受爵于筵前，反位，主人拜送爵。經但云賓受爵，不云主人授爵，奠爵，當亦如《鄉飲酒》、《鄉射》奠而不授之例。疏謂主人不坐奠於薦西者，非也。《有司徹》主人酬尸東楹東，北面坐奠爵，拜，尸西楹西，北面荅拜；坐祭，遂飲，卒爵拜，尸荅拜。此主人先自飲也。又云：「主人實觶，尸拜，受爵。主人反位，荅拜。」不云主人奠觶者，亦文不具也。主人酬賓亦然。考《特牲禮》主人酬賓，自飲訖，復酌，^①亦先奠觶於薦北。則酬酒之例皆奠而不授可知也。^②又《鄉飲酒》、《鄉射》一人舉觶于賓，實觶，西階上坐奠觶，遂拜，執觶興，賓席末荅拜；坐祭，遂飲，卒觶興，坐奠觶，遂拜，執觶興，賓荅拜；^③降洗，升實觶，立于西階上，賓拜，進，坐奠觶于薦西，賓辭，坐受以興，舉觶者西階上拜送，賓坐奠觶于其所。《鄉飲酒》二人舉觶于賓、介、洗，^④升，實觶于西階上，皆坐奠

觶，遂拜，執觶興。賓、介席末荅拜。皆坐祭，遂飲，卒觶興，坐奠觶，遂拜，執觶興，賓、介席末荅拜。逆降，^⑤洗，升實觶，皆立於西階上，賓、介皆拜。皆進，薦西奠之。賓辭，坐取觶以興。介則薦南奠之。介坐受以興，退，皆拜送，降。賓、介奠于其所。《鄉射》二人舉觶于賓，與大夫同。《特牲禮》兄弟弟子舉觶于長兄弟，如主人酬賓儀。賓弟子及兄弟弟子各舉觶于其長，奠觶，拜，長皆荅拜。舉觶者祭，卒觶，拜，長皆荅拜，舉觶者洗，各酌于其尊，復初位，長皆拜。舉觶者皆奠觶于薦右，長皆執以興，舉觶者皆復位，荅拜，長皆奠觶于其所。是舉觶之例，亦先自飲，復酌，奠而不授也。《燕禮》、《大射》下大夫二人媵爵于公，升自西階，序進酌散，交于楹北，降阼階下，皆奠觶再拜稽首，^⑥執觶興，公荅再拜。媵爵者皆坐祭，遂卒觶興，坐奠觶，再拜稽首，執觶興，公荅再拜。又云：「若君命皆致，則序進，奠

- ① 「酌」，原作「爵」，今據《禮經釋例》改。
- ② 「則」，原作「此」，今據《禮經釋例》改。
- ③ 「賓」，原脫，今據《禮經釋例》補。
- ④ 「洗」，原脫，今據《禮經釋例》補。
- ⑤ 「逆」，原作「遂」，今據《禮經釋例》改。
- ⑥ 「皆」，原脫，今據《禮經釋例》補。

觶于筐，阼階下皆再拜稽首，公荅再拜。媵爵者洗象觶，升實之，序進，坐奠于薦南，北上，降，阼階下皆再拜稽首送觶，公荅再拜。獻卿後，媵爵亦同。獻士後，賓媵觶于公，酌散，下拜，公降一等，小臣辭，賓升，再拜稽首，公荅再拜。賓坐祭，卒爵，再拜稽首，公荅再拜。賓降，洗象觶，升。①酌膳，坐奠于薦南，降拜，小臣辭。賓升成拜，公荅再拜。是媵爵之例，亦先自飲，復酌，奠而不授也。至於《有司徹》，主人酬賓，自飲畢，升酌，但云「賓拜受爵，主人拜送爵」，不云主人奠觶。又二人舉觶于尸侑，自飲畢，升酌，但云「尸、侑皆拜受爵，舉觶者皆拜送」，不云舉觶者奠觶。又兄弟之後生者舉觶于其長，自飲畢，升酌，但云「長拜受于其位，舉爵者東面荅拜」，不云後生奠觶。皆文不具也。②又云：「凡酬酒奠而不舉，禮殺者則用爲旅酬，無算爵始。《鄉飲酒》、《鄉射》主人酬賓，坐奠觶于薦西。主人拜送後，賓北面坐奠觶于薦東。《燕禮》、《大射》主人酬賓，拜送爵後，賓升席，坐祭酒，遂奠于薦東。《有司徹》主人酬尸，尸拜受爵；主人荅拜後，尸北面坐奠爵于薦左。是酬酒皆奠而不舉也。《特牲禮》主人酬賓，奠觶于薦北。賓坐取觶奠于薦南。賓位東面，薦北即薦左也，薦南即薦右也。此觶至嗣舉奠後，與兄弟弟子所舉之觶同爲旅酬發端。《有司

徹》主人酬賓，賓拜受爵。主人拜送爵，賓西面坐奠爵于薦左。此觶至旅酬後，與兄弟後生所舉之觶同爲無算爵發端。皆祭畢之飲酒，是酬酒禮殺者，即用爲旅酬，無算爵始也。③蓋《特牲》旅酬之禮同於《有司徹》無算爵之禮，而《有司徹》旅酬，則別使二人舉觶於尸與侑爲之始，是士禮殺於大夫也。漢儒推士禮而致於天子，④故鄭注《中庸》「旅酬下爲上」，引《特牲》以證之，而不引《有司徹》也。」

右主人酬賓

主人揖，降，賓降立于階西當序，東面。

主人將與介爲禮，賓謙，不敢居堂上。【疏】正義曰：敖氏云：「主人將降而揖，所以禮賓。賓降者，以主人將與介、與衆賓爲禮，⑤故不敢居堂上也。賓降之位，其南北之節皆於階西，至此始見之也。主人降，西面于門東。」張氏爾

- ①「升」，原重文，今據《禮經釋例》刪。
- ②「酒」下，原衍「者」，今據《禮經釋例》刪。
- ③「用」，原作「同」，今據《禮經釋例》改。
- ④「致」，原作「效」，今據《禮經釋例》改。
- ⑤「將」，原脫，今據《儀禮集說》補。

岐云：「揖降者，主人揖賓而自降，賓亦降，辟階西，俟其與介爲禮也。」程氏瑤田云：「賓堂下立，位當西序東面，前屢見之矣。曰當西序，則在階西可知。至此必見階西之文者，賓此時不與主人行禮，且明南北不以堂深，故與介辭洗之位不相觸。」下經主人降洗，介降必如賓，先立于其位以俟事及辭洗復位，自皆立于賓位之南，故下注獻酢畢云「介降立于賓南」也。」褚氏寅亮云：「將與介行禮，故揖賓，示自己將降之意，非揖使同降也。賓見主人降，亦遂自降矣。凡欲入、欲升、欲降，必先揖以示其意，禮也。」主人以介揖讓，升，拜如賓禮。【疏】正義曰：敖氏云：「介入門左，^①止於其位。」張氏爾岐云：「主人與賓三揖至階之時，^②介與衆賓亦相隨至階下。今此云「以介揖讓，升」，唯有升堂揖讓耳，無庭中三揖矣。拜如賓禮，謂亦拜至如賓也。」案：張說本於賈疏，諸家皆不從之。方氏苞云：「主人與賓三揖，至於階，三讓，以賓升。此時介與衆賓尚在門左，繼乃「以介揖讓，升，拜如賓禮」，則自門左三揖三讓，皆與賓同可知。凡賓主同升，有讓無揖。此篇及《鄉射》主人揖升，《燕禮》、《大射》賓揖升，皆獨升也。使無庭中三揖，則曰「以介讓，升，拜如賓禮」可也。《鄉射》無介，主人于衆賓初無三揖，是以與賓獻酬既畢，^③然後汎拜衆賓。」盛氏世佐云：「上

迎賓拜至節，不見介與衆賓隨至西階下之事，^④則介與衆賓尚在門西北上之位也。此云「揖讓，升，拜如賓禮」，謂三揖三讓及拜至之禮皆如賓也，何得無庭中三揖乎？疏誤，當以敖說爲正。」張氏惠言云：「記云「立者東面北上，若有北面者，則東上」，此謂衆賓也。注云「或統於堂，或統於門」，則立庭南近門可知。《鄉射》遵者入，賓及衆賓皆降復初位。注云：初位，門內東面，知不近堂也。介於入門後，主人未與殊禮，則隨衆賓俱在庭中東面，其位蓋在碑以南，此時主人至阼階前揖之。介東面于其位，揖；進東，當塗曲北面，又揖；當碑，又揖。此揖讓如賓禮也。疏非是。」蔡氏德晉云：「是時介猶在門左之位，故主人與之揖讓以升之。拜如賓禮，如賓主當楣北面之拜也。」主人坐取爵于東序端，降洗；介降，主人辭降；介辭洗，如賓禮。升，不拜洗。介禮殺也。【疏】正義曰：敖氏云：「爵，即歸之所奠者也。介統於賓，而其禮又

① 「介」、「左」，原脫，今據《儀禮集說》補。

② 「與賓」，原脫，今據《儀禮鄭注句讀》補。

③ 「賓」上，原衍「眾」字，今據《儀禮析疑》刪。

④ 「下」，原脫，今據《儀禮集編》補。

與之相接，故仍用其爵焉。賓禮者，「賓降」至「壹揖壹讓，升」之儀也。此時介降之位，在賓南，介不拜洗，下賓。」

注云「介禮殺也」者，《鄉飲酒義》云：「主人親速賓及介，而衆賓自從之。至於門外，主人拜賓及介，而衆賓自入，貴賤之義別矣。三揖，至於階，三讓，以賓升，拜至獻酬，①辭讓之節繁，及介省矣。至於衆賓升受，坐祭，立飲，不酢而降，隆殺之義辨矣。」據此，是衆賓之禮殺於介，介之禮殺於賓。上迎賓拜至節，雖無介與衆賓相隨至階下之文，然主人拜賓及介，而衆賓自入，則賓進而介無不相隨之理，介相隨而衆賓亦隨之矣。三揖三讓之節繁，及介而省，則介惟有升堂，揖讓及拜至，無庭中三揖可知。經於介禮同於賓者，多云如賓禮，禮殺於賓者皆明著之。諸家從敖說以駁賈疏，亦未考《鄉飲酒義》之文也。

介西階上立。不言疑者，省文。【疏】正義曰：李氏如圭云：「凡事未至者皆疑立。」

案：疑立者，致敬也。賓疑立，介下賓，不得不疑立，故知「不言疑者，省文」。蔡氏德晉以不疑立禮殺於賓，非是。

主人實爵，介之席前，西南面獻介。【疏】正義

曰：張氏爾岐云：「介席東面，介立西階上，在席南，故主人西南面鄉之。」介西階上北面拜，主人少退。

介進，北面受爵，復位。【疏】正義曰：敖氏云：「主

人西南面獻介，而介乃北面正方受爵。以是推之，則賓酢主人，主人亦北面受。主人獻賓，賓其東面受歟？」盛氏世佐云：「案：《儀禮圖》，主人獻賓，賓酢主人，受爵者皆北面。經於賓，主人受爵，雖不言其何面，而於此特見之，則其餘從同矣。《鄉射禮》主人西北面獻賓，賓西階上北面拜，主人少退，賓進，受爵于席前。夫拜既北面，則受亦北面可知矣。敖氏謂主人獻賓，賓東面受，非也。」主人介右北面拜送爵，介少退。主人拜於介右，降尊以就卑也。今文無「北面」。【疏】正義曰：敖氏云：「主人獻介，乃拜於其右者，以其尊降於賓也。凡堂上之獻酢，②皆分階而拜者，賓主二人而已，其餘則否。」方氏苞云：「主人獻介及荅拜皆就西階，何也？必正主人之位以拜者，惟賓一人，故禮介必少異於賓。又賓、介、衆賓、工、笙、大師序進爲禮，而主人徧獻酬，使一一反其位而拜，不勝其勞，故自賓以外漸損趨走之節，以息主人也。」高氏愈云：「主人

①「拜」，原脫，今據《儀禮注疏》補。

②「堂」，原作「壹」，今據《續清經解》本改。

介右北面拜送爵，不敢襲獻賓之位也。此主人獻介，乃第五爵，介飲。「今文無『北面』」，鄭不從者，胡氏承琪云：「凡堂上之拜皆北面，此主人獻介時西南面，介既北面拜受爵，主人當北面拜送爵。凡拜者同面，若無『北面』，嫌於主人尚西南面，故鄭從古文。」主人立于西階東。【疏】

正義曰：敖氏云：「此稍違其拜處，與既獻賓而立于阼階之東意同。西階上非其正位，故即辟之。」張氏爾岐云：「在介右而又稍東，以設薦之時，介方升祭，主人無事，故立於此。」程氏易田云：「此西階東在階上，即上下文『介右』之文不相遠也。與《冠禮》冠者立于西階東、賓字之之位，在階下者不同，而文不別異者，以前後有『介右』之文，又不見降文，可以互明也。自南方降席，即復西階上位，以介席敷於西階上也。」薦脯醢。【疏】正義曰：敖氏云：「下云

『介升席自北方』，是介席南上也。席南上，則此薦當脯在北方，與《少牢》下篇設侑之豆同矣。」介升席自北方，設折俎，祭如賓禮。不嘑肺，不啐酒，不告旨，自南方降席，北面坐卒爵，興，坐奠爵，遂拜，執爵興，主人介右荅拜。不嘑啐，下賓。【疏】正義曰：敖氏云：「凡所不者，下賓，不啐酒則必不告

旨矣。乃著之者，詳言之也。凡經文有詳言者，有略言者，其例不一。」方氏苞云：「不嘑肺，不啐酒，不告旨，示禮爲賓設，而已不敢當也。」自南方降席者，敖氏云：「降席，適西階上也。自南方降者，介尊，於禮輕者或得由便也，主人亦然。主人介右荅拜，復西就之。《有司徹》：『俛降席自北方。以其卑於介也。』『北面坐』者，張氏爾岐云：「西階上北面坐也。」秦氏蕙田云：「介位西階西北面，而主人立西階東，是爲在介右也。凡北面以東爲右。」②

右主人獻介

介降洗，主人復阼階，降辭如初。如賓酢

之時。【疏】正義曰：「洗，爲主人將自酢也。復，反也。初，謂賓酢之時。『主人降』以下至『坐取爵』，卒洗之禮也。」方氏苞云：「凡自酢，多由受獻者自卑，而不敢亢敵者之禮以相酢也。自酢者皆自洗自酌，惟鄉飲之介不敢抗禮以酢主人，又不敢煩主人親洗，故降洗而後以爵授主人，蓋

① 「徹」，《儀禮集說》作「曰」。

② 「面」，原作「方」，今據《五禮通攷》改。

《燕》與《大射》主人獻公而自酢，則更爵而自洗，宜也。《特牲禮》主人、主婦交致爵，則仍其爵以自酢，宜也。賓致爵于主人、主婦，更爵而自酢，亦宜也。介之義則宜洗爵以酢主人，主人之義則不宜洗爵以自酢，故其儀獨異焉。」褚氏寅亮云：「主人自酢而介乃降洗，恐已飲之爵不潔也。」①卒洗，主人盥。盥者，當爲介酌。【疏】正義曰：敖氏

云：「達介意也。」褚氏寅亮云：「注謂盥者，將爲介酌，疏謂自飲而盥者尊介，兩說相發明，惟尊介，故雖代之酌而亦盥也。此較達介意爲長。」介揖讓，升，授主人爵于

兩楹之間。就尊南授之。介不自酌，下賓。酒者，賓主

共之。【疏】正義曰：李氏如圭云：「賓主共之，故尊當在

兩楹間。介卑，故不敢自酌。」敖氏云：「以後篇大夫禮例

之，「介」字宜在「授」字上。於主人之盥也，介立于洗南以俟之，主人既盥，乃揖而行也。介授主人爵者，不敢酢也。

主人受之者，亦達介意也。凡受獻而親酢，一人而已，其餘則或所獻者自酢焉。此介雖尊，視賓爲殺，故其酢禮如此，

然其初乃得爲主人洗爵，亦其異者也。」張氏爾岐云：「揖讓，升，一揖一讓，升也。介但授虛爵不自酌者，②介卑，不

敢必主人爲己飲也。」程氏易田云：「兩楹間，賓主敵者授

受之常節也。惟獻爵必於席，故授受在席前。注謂就尊南授之，非也。然楹間爲敵者授受之節，謂賓在西階、主在阼階彼此往來授受之節。若賓主同階，則不以楹間爲節也。介不自酌爲下賓者，以酒者賓主共之，故賓自酌以酢主人也。」介西階上立，主人實爵，酢于西階上，介右坐奠爵，遂拜，執爵興，介荅拜。主人坐祭，遂飲，卒爵，興，坐奠爵，遂拜，執爵興，介荅拜。主人坐奠爵于西楹南，介右再拜崇酒，介荅拜。奠爵西楹南，以爵獻衆賓。【疏】正義曰：注「以爵」，《校勘記》云：「徐、葛、閻本，《集釋》、《通解》、楊氏俱作「當」。」○敖氏云：「主人拜于西階，而奠爵于西楹南，以其近也。其意則與歸之奠于序端者同。」③拜介崇酒，亦至是乃爲之者，因賓禮也。」高氏愈云：「此介酢主人，凡第六爵，主人飲。」

右介酢主人

①「已」，原作「己所」，今據《儀禮管見》改。

②「介」，原作「今」，今據《儀禮鄭注句讀》改。

③「歸」，原作「南鄉」，今據《儀禮集說》改。

主人復阼階，揖，降，介降立于賓南。

【疏】正義曰：介降立于賓南，賓立西階下當序，介次之也。

方氏苞云：「在禮，離坐離立，毋往參焉。況鄉大夫興賢能，州長教射，賓主相爲禮，而以無事者參其間，則無以爲儀，故將延介而賓降，將延衆賓而介降。設不降而疑立于堂，以視衆賓之交拜，^①則近於汰，故獻酢甫畢即降。」主人

人西南面三拜衆賓，衆賓皆荅壹拜。三拜，一

拜，示偏，不備禮也。不升拜，賤也。【疏】正義曰：敖氏

云：「是時衆賓皆在門內之西，主人少南行，近於門東，乃西南面鄉之而拜。拜衆賓爲將獻之，與賓升而拜至之意相類。三拜者，旅拜之法也。衆賓皆荅壹拜，亦荅旅拜之法也。此禮大夫、士同之。」盛氏世佐云：「主人與賓、介行禮

之時，衆賓固在門西北上之位，^②迨其行禮既畢，則衆賓皆進而立於賓、介之南矣。無庭中三揖者，賤不敢當主人之迎也。經不著其進立之節，文不具也。惟其已在賓、介之南也，故主人得於阼階下西南面拜之。敖說似太泥。三拜

衆賓與拜至之意相類，特不升之於堂而一一拜之，是亦以其賤略之也。」郝氏敬云：「升堂受爵，不拜于堂上，禮殺人

衆也。」方氏苞云：「衆賓長而外皆獻于堂下，故於堂下偏拜之。」○注「三拜一拜」，《校勘記》云：「一，徐本、《集釋》俱作「壹」。」云「三拜、一拜，示偏，不備禮也。不升拜，賤也」者，張氏爾岐云：「示偏，解主人三拜；不備禮，解衆賓荅一拜。不升拜，賤也。言主人不升衆賓於堂而拜之，^③以其賤，故略之。與賓、介升堂拜至者異也。」朱子曰：「賈疏云：衆賓各得主人一拜，主人亦偏得一拜。《鄉射》疏又云：衆賓無論多少，止爲三拜，是示偏也。然則主人之拜衆賓，不能一一拜之，但爲三拜以示偏，而衆賓之長者三人各荅一拜也。然經及注疏但言衆賓一拜，而無三人之文，未詳其說。」盛氏世佐云：「案：禮成於三，故旅拜之法，無論衆賓多少，但爲三拜以示偏，初不爲賓長三人而設也。經云「衆賓皆荅一拜」，亦統指衆賓而言，不專謂三賓也。疏欠分明，故朱子不能無疑。然即以經文證之，則其疑可釋矣。旅拜之法，大夫、士微有不同。大夫三拜衆賓，衆賓荅以一拜，此及《鄉射》、《少牢》、《有司徹》所陳是也。」

① 「交」，原作「受」，今據《儀禮析疑》改。

② 「固」，原作「同」，今據《儀禮集編》改。

③ 「之」，原脫，今據《儀禮鄭注句讀》補。

大夫尊，不敢備禮是也。士三拜衆賓，衆賓皆以再拜，《特牲》所陳是也。^①士卑，得備禮也。敖氏謂此禮大夫、士同之，殆未深考歟？「程氏易田云：『上經「主人與賓三揖，至于階」時，介與衆賓斷無隨至西階下之事，故獻介時以介揖、讓、升、拜如賓禮，可決其先之不隨，至階矣。至於將獻衆賓，主人降階西南面三拜者，此及《鄉射》俱無揖讓之文。』」蓋主人與衆賓不相偶而行，故不相揖讓也。案：

《有司徹》：「主人降，南面，拜衆賓於門東，三拜。衆賓門東北面，皆荅壹拜。」注云：「賓賤，純臣也，位在門東。」又云：「主人獻賓于西階上，長賓卒爵，取祭以降，西面坐，委于西階西南。」注：「取祭以降，反下位也。位在西階西南。」又云：「衆賓辯受爵，其薦脯醢與胾，^③設于其位。其位繼上賓而南，皆東面。」據此則衆賓有兩位，未獻位在門東，獻則拜而進之，其位在西階西南。由是言之，《有司徹》其主人卿、大夫，其賓純臣，初位在門東。鄉飲，賓賢能也。初位在門西，即上經所謂衆賓皆入門左北上之位也。然則南面三拜衆賓者，以其初位在門東；西南面三拜衆賓者，以其初位在門西。如此互相證明，則主人初與賓揖進時，介與衆賓決然在門左北上之位，而不隨至西階下也。三拜者，統衆賓而拜之。衆賓多，不專拜，其長，升受之三人也，

蓋示偏之禮止於三。《少牢》四人養，主人亦祇西面三拜養者也。賈氏疏此經，謂衆賓各得主人一拜，是以三拜爲拜升受者三人，誤矣。主人揖，升，坐取爵于西楹下，降洗，升實爵，于西階上獻衆賓。衆賓之長，升拜受者三人。長，其老者。言三人，則衆賓多矣。【疏】正義曰：「主人揖，升」，張氏爾岐云：「主人自升也，衆賓尚在堂下。至主人于西階上獻爵，衆賓始一一升受之耳。經文自明，疏以揖升爲揖衆賓升，非也。」方氏苞云：「主人揖，兼堂下不升之賓，^④故實爵後特言獻衆賓，以揭其義。既實爵，^⑤然後賓長三人升拜受耳。」坐取爵于西楹下，韋氏協夢云：「《鄉射禮》坐取爵于序端，而此取爵于西楹下者，彼無介，主人于阼階上受賓酢訖，奠爵于序端，故即于序端起之；此有介，主人既取爵于序端以獻介，而於介右受介酢訖，遂奠爵于西楹南，故于西楹下取

①「特牲所陳是也」，原脫，今據《儀禮集編》補。
②「鄉射」下，原衍「文」字，今刪。

③「脯醢」，原脫，今據《儀禮注疏》補。

④「兼」，原脫，今據《儀禮析疑》補。

⑤「爵」下，原衍「後」字，今據《儀禮析疑》刪。

之。西楹下，即西楹南也。「降洗，升實爵」，秦氏蕙田云：「降洗者，惟衆賓之長一人，其餘二人皆不降洗禮，又殺於介矣。」張氏爾岐云：「記云『衆賓之長一人辭洗如賓』，當亦從堂下東行辭之。疏以爲降辭，亦未是。」於西階上獻衆賓，敖氏云：「總言之也。此獻之儀，主人蓋執爵西南面于西階上，衆賓則以次升受之，不獻於席前，辟尊者禮也。『於』字衍。」衆賓之長，升拜受者三人，李氏如圭云：「賓、介以賢舉，衆賓以年序，而衆賓之長三人，是爲三賓。《鄉飲酒義》曰：『立賓以象天，立主以象地，設介僕以象日月，立三賓以象三光。』」敖氏云：「其拜者亦北面。長，其年之差尊者。」主人拜送。於衆賓右。【疏】正義曰：方氏苞云：「不言其地，介之獻猶就西階而拜於其右，則衆賓可知。注云『於衆賓右』，非也。」坐祭，立飲，不拜既爵；授主人爵，降復位。既，卒也。卒爵不拜，立飲，立授，賤者禮簡。【疏】正義曰：李氏如圭云：「《少儀》曰：『1 小子舉爵，則坐祭，立飲。』」下記曰：『2 立卒爵者不拜既爵。』」敖氏云：「不拜既爵，卒爵不拜也。獻而不拜既爵，差卑也。自別於尊者，且重勞主人之荅己也。不拜既爵，故但立飲。3 位，堂下之位，介之南也。於此云

復，則主人揖升之時衆賓其皆進歟？」盛氏世佐云：「衆賓皆進，當在主人與介行禮甫畢之時，不在主人揖升時也。敖氏誤。」張氏爾岐云：「一人飲畢，授爵，降，次一人乃升，拜受也。」衆賓獻，則不拜受爵，坐祭，立飲。次三人以下也。不拜，禮彌簡。【疏】正義曰：敖氏云：「自第四以下，又不拜受爵，愈自別於尊者也。」張氏爾岐云：「亦升受，但不拜耳。」方氏苞云：「不拜受爵，不敢煩主人拜送也。獻爵而不拜，可乎？主人之拜衆賓，衆賓皆荅一拜，正爲衆賓儀略，故總行拜獻，拜受之禮於階下。主人三拜，達其意於衆賓，衆賓各荅主人，4 所以止於一拜耳。」韋氏協夢云：「衆賓不拜受爵，主人亦不拜送爵矣。」每一人獻，則薦諸其席。謂三人也。【疏】正義曰：敖氏云：「此薦之節當在坐祭立飲之後，與《特牲》之衆賓同無俎矣。5 又既飲乃薦，遠下賓、介也。不言不祭者，可知

- ① 「曰」，原脫，今據《儀禮集釋》補。
- ② 「下」，原作「不」，今據《儀禮集釋》改。
- ③ 「但」，原作「當」，今據《儀禮集說》改。
- ④ 「各」，原作「如」，今據《儀禮析疑》改。
- ⑤ 「賓」，原脫，今據《儀禮集說》補。

也。」張氏爾岐云：「席次賓介西，前經云『衆賓之席皆不屬焉』是也。」衆賓辯有脯醢。亦每獻薦於其位，位在下。今文「辯」皆作「徧」。【疏】正義曰：敖氏云：「衆賓，三人之外者也。衆賓長以下，其堂下之位，繼賓、介之位而南。」盛氏世佐云：「是時賓降立于階西，當序東面。介降立于賓南，故敖知衆賓堂下之位當繼賓、介而南也。又案：此則衆賓自三人之外皆無席，亦無南面立于堂上者矣。而《儀禮圖》乃於賓長三席之西，復有衆賓之位，①云南面坐不盡，復有東面北上，似誤也。」案：張氏惠言《儀禮圖》賓長席西無衆賓之位，可正楊氏之失。注云「位在下」者，堂下立侍，不合有席，既不言席，故位在下。今文「辯」皆作「徧」者，顧氏炎武曰：「《曲禮》：『主人延客食載，然後辯般。』《內則》：『子師辯告諸婦諸母名』，『宰辯告諸男名』。《玉藻》：『先飯，辯嘗羞。』《樂記》：『其治辯者其禮具。』《左傳》定八年傳：『子言辯舍爵于季氏之廟而出。』《史記·禮書》：『瑞應辯至。』此皆以「辯」爲「徧」。惠氏棟云：「古「徧」字皆作「辯」。司馬遷從孔安國問，故遷書多古文。《左傳》多古字古言，故皆以「辯」爲「徧」。又云：「《鄉射禮》：『司射乃比衆耦辯。』注：『衆賓射者降，比之，耦乃徧。』是鄭亦讀「辯」爲「徧」。胡氏承珙云：「鄭於

注或用「徧」，或用「辯」，不盡依經文。如《鄉飲酒》云：「皆如賓酬主人之禮辯。」注：「辯，辯衆賓之在下者。」《有司徹》：「辯受爵。其薦脯醢與胥。」注：「徧獻乃薦。」是「辯」、「徧」二字，注則便文通用，惟於經則皆依古文作「辯」。鄭於古今文假借字多依本字，②此獨不然者，③疑徧乃後出之字，故鄭於經文必皆從「辯」，④以存古字古義也。案：《說文》云：「辯，治也」，「徧，巾也」。「徧」爲本義，鄭蓋以二字通用已久，故不改從今文，不得疑「徧」爲後出字。主人以爵降，奠于筐。不復用也。【疏】正義曰：郝氏敬云：「奠爵於堂下洗西之筐，示不用也。」韋氏協夢云：「爵亦虛爵也。凡既獻而奠者，皆虛爵，經多不見之。」

右主人獻衆賓自初獻賓至此爲飲酒第

一段

- ① 「復有」，《儀禮集編》作「則」。
- ② 此句，原作「鄭於今文假借多依本字」，今據《儀禮今古文疏義》補。
- ③ 「然」，原作「出」，今據《儀禮今古文疏義》改。
- ④ 「經」，原作「今」，今據《儀禮今古文疏義》改。

儀禮正義卷六 鄭氏注

受業江寧楊大培補

揖讓，升。賓厭介升，介厭衆賓升，衆賓序升，即席。序，次也。即，就也。今文「厭」皆爲「揖」。【疏】正義曰：張氏爾岐云：此下言一人舉觶，^①待樂賓後，爲旅酬之端也。○「揖讓，升」，敖氏云：「謂主人獨與賓一揖一讓而先升也。」張氏爾岐云：「揖讓，升，謂主人，蒙上『以爵降』之文也。」案：上人門云：「主人揖，先入。」注云：「揖賓也。」則此亦與賓揖讓，而主人先升，賓與介、衆賓以次而升也。「賓厭介升」，^②介厭衆賓升，衆賓序升，敖氏云：「賓既厭介，乃升，介厭衆賓升亦然。三賓長則不相厭，但以次序而升耳。」方氏苞云：「覆言『衆賓序升』，猶入門時覆言『衆賓皆入門左』，以示衆賓不相厭耳。」^③一人洗，升，舉觶于賓。一人，主人之吏。發酒端曰舉。【疏】正義曰：李氏如圭曰：「舉此觶爲旅酬之

始。」^④敖氏云：「亦相者使之也。獻禮既備，^⑤即舉觶爲旅酬始，示留賓之意也。一人，主人之贊者，既洗乃升，則用下簠之觶也。此舉觶者，代主人行禮耳。《中庸》曰：「旅酬下爲上，所以逮賤也。」舉觶，猶揚觶。」方氏苞云：「此觶用於樂畢之後，^⑥而舉於工笙未入之前，何也？工之升，降、拜、興也艱，故歌畢即獻，所以達情而便事也。衆賓既獻，樂宜作矣，而賓、介與主人酬酢未畢，衆賓皆未受酬，故先舉後酬之觶，以示工先受獻，乃禮以權制也。」盛氏世佐云：「舉觶者將自飲乃洗者，^⑦敖氏謂其意與主人酬賓之禮同，是也。」凌氏《釋例》云：「凡一人舉觶爲旅酬始，二人舉觶爲無算爵始。《鄉飲酒禮》主人獻衆賓畢，一人洗，升，舉觶于賓。《鄉射》亦然。此一人舉觶爲旅酬始也。至樂賓畢，立司正後，賓即取此觶以酬主人，少長以齒，終于沃

- ① 「一人」，原作「不」，今據《儀禮鄭注句讀》改。
- ② 「升」，原脫，今據上經文補。下「介厭衆賓」句同。
- ③ 「示」下，原衍「賓」，今據《儀禮析疑》刪。
- ④ 「觶」，原脫，今據《儀禮集釋》補。
- ⑤ 「禮既」，原作「始」，今據《儀禮集說》改。
- ⑥ 「於」，原脫，今據《儀禮析疑》補。
- ⑦ 「者」，原脫，今據《儀禮集編》補。

盟者，謂之旅酬。故注云「發酒端曰舉」也。旅酬畢，使二人舉觶于賓、介。《鄉射》則使二人舉觶于賓與大夫。此二人舉觶為無算爵始也。至徹俎、說屨、升、坐後，賓、介即取此二觶以酬主人與衆賓，爵行無算，執觶者皆與，謂之無算爵。此皆飲酒之正禮也。《特性禮》之旅酬、無算爵，則祭畢之飲酒也。西階前之一觶，即主人酬賓之觶。至嗣舉奠後，兄弟弟子復舉東階前一觶，^①為旅酬發端。是雖有二觶，實亦一人舉觶也。旅酬畢，賓弟子、兄弟、弟子洗，^②各酌于其尊，舉觶於其長，為無算爵發端。是亦二人舉觶也。皆與飲酒正禮同。亦有二人舉觶為旅酬始者。《燕禮》、《大射》主人獻賓後，使二大夫媵爵于公，公取一觶，為賓舉旅行酬。主人獻卿或獻孤後，又使二大夫媵爵于公。公若命長致，則一人奠觶于前，取酬賓之觶之空處，公又行一爵，為卿舉旅行酬。主人獻大夫後，升歌畢，公又行一爵，為大夫舉旅行酬。笙奏間歌畢，立司正。主人獻士後，賓媵觶于公。公舉之，為士舉旅行酬。此飲酒之正禮也。《有司徹》旅酬，^③是祭畢饋尸之禮，上賓三獻後，二人舉觶于尸、侑，尸舉一觶以酬主人，為旅酬發端。皆二人舉觶，惟賓媵觶于公為一人。《燕禮》、《大射》為賓、為卿、為大夫旅酬，雖二人媵爵，所行者實一觶。《有司徹》旅酬，雖二人

舉觶，所行者亦尸一觶也。亦有一人舉觶為無算爵始者。《有司徹》無算爵，賓所舉之一觶，即前主人酬賓之觶。至旅酬畢，兄弟之後生者舉觶于長，與前主人酬賓之觶交錯為無算爵。是雖一人舉觶，所行者實二觶也。《燕禮》、《大射》旅酬皆三次，初次為賓旅酬，此二大夫所媵二觶中之上觶也；二次為卿旅酬，此前二大夫所媵二觶中之下觶也；三次為大夫旅酬，此獻卿後，二大夫中一人所媵于旅賓空處之觶也。^④至合樂後，為士旅酬，則賓所媵之觶也。《鄉飲酒》、《鄉射》旅酬祇一次，用一人舉觶以發端，無算爵則用二人舉觶以發端，皆不用主人酬賓之觶，禮盛故也。若《特性》旅酬，賓酬長兄弟，即用主人酬賓西階前之一觶。《有司徹》無算爵，賓及兄弟交錯其酬，亦即用主人酬賓西階南之一觶，祭畢飲酒之禮殺故也。又案：《特性禮》主人酬賓節，主人洗觶，^⑤酌于西方之尊，西階前北面酬賓，賓

① 下「弟」，原作「之」，今據《禮經釋例》改。

② 「洗」，原作「復」，今據《禮經釋例》改。

③ 「旅酬」，原脫，今據《禮經釋例》補。

④ 「一人」，原脫，今據《禮經釋例》補。

⑤ 「觶」下，原衍「節」字，今據《禮經釋例》刪。

在左。主人奠觶，拜，賓荅拜。主人坐祭，卒觶，拜，賓荅拜。主人洗觶，賓辭。主人對，卒洗，酌，西面。賓北面拜。主人奠觶于薦南，揖，復位。戴氏震云：「上經：賓北面拜，主人奠觶于薦北。下云：主人荅拜。荅賓北面之拜也。賓坐取觶，還，東面下，不得有拜字，故注但云：還東面，就其位。況賓取觶未奠，亦無持觶拜之理。拜字不知何時誤衍，宋本已然矣。無賓兩拜主人荅一拜者，凡拜皆北面。」戴說是也。考下文旅酬，兄弟弟子洗，酌于東方之尊，阼階前北面舉觶于長兄弟，如主人酬賓儀。疏云：「如主人酬賓之儀者，長兄弟北面拜，弟子奠于薦南，長兄弟坐取觶，還，西面拜，弟子北面荅拜。長兄弟奠于薦北，揖復位。」此是賈氏由上節經文推出者。還西面拜，與上經還東面拜正同，則戴氏所謂拜字誤衍者，唐初本已有之，但賈氏未能訂正耳。又案：《特性》旅酬，用主人酬賓之觶發端；無算爵，用賓弟子、兄弟弟子二人所舉之觶發端。《有司徹》旅酬，用二人舉觶于戶侑之戶觶發端；無算爵，用主人酬賓之觶發端。是《特性》之旅酬如《有司徹》之無算爵，亦士禮殺於大夫之義也。「實觶，西階上坐奠觶，遂拜，執觶興，賓席末荅拜；坐祭，遂飲，卒觶，興，

坐奠觶，遂拜，執觶興，賓荅拜。降洗，升，實觶，立于西階上，賓拜。賓拜，拜將受觶。【疏】

正義曰：賈疏云：「賓席末荅拜，謂於席西南面，非謂席上近西爲末，^①以其無席上拜法也。已下賓拜皆然。」敖氏云：「舉觶者自飲，洗且拜，其意與主人酬賓之禮同。」^②賓席末拜，示違其位也。不降席荅之者，以其賤也。下二人舉觶放此。舉觶者拜亦當楣。盛氏世佐云：「降席而拜，故是常法，但經既云『席末荅拜』，與上文『席末坐啐酒』同，是于席之西端，不當仍指爲降席也。《史記》載魏其行酒，獨故人避席，餘半膝席，蓋以其失勢而忽之。此賓之席末荅拜，與半膝席相似，則以舉觶者賤故也。敖說似長。」案：韋氏協夢仍用疏說，謂：「荅拜必於席末者，蓋席上既無荅拜之法，而又不可降席以荅，故於席西南面拜之。」盛氏世佐以《史記》之半膝席況此經之賓席末，不知避席者自離席也，膝席不但未離席，膝尚在席也。況《史記》不言拜，此經「席末荅拜」，其非在席上可知。盛氏引以申明敖說，可謂擬不于倫矣。褚氏寅亮云：「席末，下端之末。凡言

①「爲」，原作「謂」，今據《儀禮注疏》改。

②「意」，原作「洗」，今據《儀禮集說》改。

席末者，未離席也；言降席者，已離席。故立文有別，疏似混而同之。」高氏愈云：「此一人舉觶自飲以導賓，爲第八爵。賓觶而拜，以將飲告于賓也；卒觶而拜，以既飲告于賓也。」程氏易田云：「此席末者，降席而在席之西也。」與席末啐酒而後降席者不同。」進，坐奠觶于薦西，賓辭，坐受以興。舉觶不授，下主人也。言坐受者，明行事相接，若親受，謙也。【疏】正義曰：敖氏云：「奠觶者，亦以賓未即飲故也。賓辭奠觶之意，亦略與上同。」○注云「舉觶不授，下主人也。言坐受者，明行事相接，若親受，謙也」者，敖云：「此實取之，而經云『受』，原賓意也。然經於此類亦或言取，則又指其事耳。云『坐受』，是賓已拜即興矣。凡此時之在席者，皆無事則興，經文略也。」張氏爾岐云：「案：主人酬賓，亦奠觶而不親授，似酬法當然。注以爲下主人，恐宜再議。」盛氏世佐云：「禮敵者親授，卑于尊則奠而不授，不敢也。主人酬賓亦奠而不授，禮之殺也，于獻固嘗親授矣。今舉觶者之奠而不授，自是卑于尊法，初不因禮之殺。注云『下主人』，良然。張氏議之，過矣。賓辭者，^①亦辭其坐奠也。」褚氏寅亮云：「前主人獻則授，酬則奠。此舉觶即奠，以下主人故也。賓不敢當，故辭。注云『下主人』，非特明奠觶之故，並明賓辭之故。」案：授受

之例，卑者于尊者皆奠而不授；若尊者辭，乃授。此奠而不授，是舉觶者以卑，不敢同于主人，故不授。賓辭，辭其不親授，即所謂謂尊者辭也。而舉觶者終不敢親授，故賓辭坐授。^②若彼親授而已親受者，賓之謙也。主人酬賓，奠而不授，禮之殺也；獻賓親授，禮之正也。凌氏授受釋例詳《士冠禮》。程氏易田云：「下主人者，謂舉觶者，主人之吏也。」舉觶者西階上拜送，賓坐奠觶于其所。所，薦西也。【疏】正義曰：敖氏云：「下經云『賓坐取俎西之觶』，即此觶也。其於薦西爲少南，乃云『其所』者，明其近於故處也。必奠于其所者，降於主人，且別於不舉者也。主人酬賓，奠觶于薦西，賓取而奠于薦東，其觶卒不復舉。」褚氏寅亮云：「其所，仍在薦西也。雖在薦西，已稍移在南而近俎西矣，故後云北面取俎西之觶。」高氏愈云：「此第九爵，奠于賓，賓不飲。」舉觶者降。事已。【疏】正義曰：秦氏蕙田云：「楊信齋《儀禮圖》移『賓若有尊者』一條於此文之下，蓋從《鄉射》之例。但尊者或來或否，既未可定，故經文或在前，或在後，亦不一例，不必改此以就彼

① 「賓辭」，原倒，今據《續清經解》本乙正。

② 「辭」，原作「坐」，今據《續清經解》本改。

也。」盛氏世佐云：「遵者之禮，《鄉射》文屬於此，而此篇則具書於賓出之後，非不言也。但以其或來或否，記載不同耳。《儀禮圖》移於此節之下，蓋以行禮之序序之。姜氏遂以此篇爲錯簡，非也。」

右一人舉觶

設席于堂廉，東上。爲工布席也。側邊曰廉。

《燕禮》曰：「席工于西階上，少東。樂正先升，北面。」此言樂正先升，立于西階東，則工席在階東。【疏】正義曰：張氏爾岐云：「此下作樂樂賓有歌，①有笙、有間、有合，凡四節。」注引《燕禮》者，賈疏云：「欲證工席在西階東，據樂正于西階東而立，在西，②則知工席更在階東。」此言近堂廉，④亦在階東；彼云階東，亦近堂廉也。」敖氏云：「此言『設席于堂廉』，言其南北節也。《鄉射》云『席工于西階上少東』，⑤言其東西節也。文互見耳。席東上而下者，當西階上少東。」盛氏世佐云：「工席北向，乃東上者，亦統於主人也。」工四人，二瑟，瑟先。相者二人，皆左何瑟，後首，跨越，內弦，右手相。四人，大夫制也。二瑟，二人鼓瑟，則二人歌也。瑟先者，將入，序在

前也。相，扶工也。衆賓之少者爲之，每工一人。《鄉射禮》曰：「弟子相工如初人。」天子相工使眡瞭者，凡工，瞽矇也，故有扶之者。師冕見，及階，子曰：「階也。」及席，子曰：「席也。」固相師之道也。後首者，變於君也。跨，持也。相瑟者則爲之持瑟。其相歌者，徒相也。越，瑟下孔也。內弦，側擔之者。【疏】正義曰：注「固相師之道」「道」下，《集釋》有「也」字。「側擔之者」，《集說》引無「者」字。○敖氏云：「士之飲酒乃有工有笙者，蓋以公家之樂官給學中飲射之事者歟？」方氏苞云：「相瑟者，以有何瑟之儀，故著之。瞽必有相，故於歌者不言。」○注云「四人，大夫制也」者，賈疏云：「此鄉大夫飲酒而曰四人，《大射》諸侯禮而云六人，故知四人者，大夫制也。燕禮亦諸侯禮，而云四人者，鄭彼注云：「工四人者，燕禮輕，從大夫制也。」鄉射是諸侯之州長，士爲之，其中兼有鄉大夫，以三物詢衆

① 下「樂」字，原作「之」，今據《儀禮鄭注句讀》改。

② 「工」，原作「上」，今據《儀禮注疏》改。

③ 「東」下，《儀禮注疏》有「北面可知」。

④ 「近」，原脫，今據《儀禮注疏》補。

⑤ 「階」，原脫，今據《儀禮集說》補。

庶行射禮法，故工亦四人，大夫制也。若然，則士當二人，天子當八人，以差次也。」云「瑟先者，將入序在前也」者，敖氏云：「瑟先歌後，行時以後爲尊，^①亦工禮之異者也。」引《鄉射禮》者，以鄉射之相爲弟子，證此之相爲衆賓之少者也。引《論語》者，《衛靈公》篇文，證工必有相，以工爲瞽矇者，必用視瞭者以扶之也。云「後首者變於君也」者，敖氏云：「後首，瑟之首在後也。」賈疏云：「《燕禮》：『小臣左何瑟，面鼓。』」注：「可鼓者在前面也。」此不面鼓，^②是變於君也。云「拊，持也。越，瑟下孔也」者，敖氏云：「拊，以指鉤之也。後越，去瑟廉差近，故以巨擘承下廉而三指拊越也。」褚氏寅亮云：「以左大指承瑟下廉，而以三指鉤入瑟底孔中。」案：《禮記·樂記》「朱弦而疏越」注：「越，瑟孔也。《鄉射禮》「越」注：「越，瑟孔，所以發越其聲也。」案：越之爲言闊也。闊其孔，以發其聲，因謂之越。故《周語》「越之匏竹」韋注「謂爲之孔」是也。《尚書大傳》：「大瑟練弦達越。」達即通達空闊之意。云「內弦，側擔之者」，敖氏云：「內弦，弦鄉身也。」樂正先升，立于西階東。正，長也。【疏】正義曰：敖氏云：「樂正當從工，^③乃先升者，變於尊者之重禮也。此先升而立於西階東，^④亦明其不與工序也。《鄉射禮》云「樂正先升，立于工席之西」，亦

與此文互見也。」又云：「天子樂師，以下大夫、上士、下士爲之。諸侯之樂師，惟當用上士、下士。然則此使之給事者，其下士歟？」方氏苞云：「《燕》及《鄉飲》、《鄉射》樂正皆先升，大射則從工師而升，何也？《鄉射》、《鄉飲》工與笙之人及獻各分先後，燕則中有閒事，^⑤使從升歌之工師而升，則似堂下之樂事非其所掌，故先升而並監視之。大射惟堂上之工師有獻，則從之而升，與之俱降，以監視堂下之工可矣。所以然者，燕及飲、射時暇則儀可展，大射事殷，則節必殺。觀下管之無獻，則其義益顯矣。燕及飲、^⑥射並稱樂正，而大射乃小樂正，何也？大射禮重，相工者僕人正，僕人師，而掌樂事者小樂正，則燕不待言矣。蓋惟宗廟社稷之祭，大樂正乃與焉。與《周官》祀五帝及大神示享先王，冢宰贊玉幣、玉爵，而餘皆小宰贊之，義同。以事實案之，惟鄉大夫興賢能，或公家之小樂正與焉。州長習

- ① 「行」，原脫，今據《儀禮集說》補。
- ② 「鼓」，原脫，今據《儀禮注疏》補。
- ③ 「正」，原脫，今據《儀禮集說》補。
- ④ 「西」，原作「阼」，今據《儀禮集說》改。
- ⑤ 「有閒」，原倒，今據《儀禮析疑》改。
- ⑥ 「飲」，原作「鄉」，今據《儀禮析疑》改。

射，必有司假其名以攝事，如司馬、司射、司士之類耳。況黨正之蜡祭？獻工而不及樂正，何也？長官不得與工同獻也。終篇無獻樂正之文，何也？樂正、司正、凡有司及弟子，並包於衆受酬者。《記》曰：「主人之贊者，無算爵然後與。則凡有司弟子皆與酬，明矣。」注云「正，長也」

者，賈疏：「《周禮》有大司樂、樂師、天子之官。此樂正者，諸侯及大夫、士之官，當天子大司樂。云「長」，樂官之長也。」《釋官》曰：「案：樂正亦公臣，見《燕禮》、《大射儀》。大夫、士不得有樂正之官，疏非是。古者教民之事，樂官主之。《虞書》：「命夔典樂，教胄子。」「《周禮》：「大司樂、樂師掌教國子。」「《王制》：①「樂正崇四術，立四教，②順先王詩書禮樂以造士。」「將出學，小胥、大胥、小樂正簡不帥教者以告於大樂正。」是以《鄉飲酒》賓賢能，③樂正與焉，非徒主告樂備也。」工入，升自西階，北面坐。相者東面坐，遂授瑟，乃降。降立於西方，近其事。

【疏】正義曰：《校勘記》云：「送，唐石經、徐、閩、葛本、《通解》、楊氏、敖氏俱作「遂」。案：《集釋》亦作「遂」。○李氏如圭云：「《樂記》：「樂師辨乎聲詩，故北面而弦。」「《鄉射禮》樂正適西方，命弟子贊工還樂，知相者降立西方。」敖氏云：「相者東面，坐于其席前之西也。授瑟，以瑟首向東授

之。」凌氏《釋例》云：「凡樂，瑟在堂上，笙、管、鐘、磬，鼓、鼗之屬在堂下。《鄉飲酒禮》：設席于堂廉，東上，工四人，二瑟，瑟先，相者二人，皆左何瑟，④後首，挾越，內弦，右手相。樂正先升，立于西階東。工入，升自西階，北面坐。相者東面坐，遂授瑟，乃降。《鄉射禮》席工于西階上，少東，樂正先升，北面立于其西。工四人，二瑟，瑟先，相者皆左何瑟，面鼓，執越，內弦，右手相，入，升自西階，北面東上。工坐，相者坐授瑟，乃降。《燕禮》席工于西階上，少東，樂正先升，北面立于其西。小臣納工，工四人，二瑟，小臣左何瑟，面鼓，執越，內弦，右手相，入，升自西階，北面東上坐。小臣坐授瑟，乃降。《大射儀》乃席工于西階上，少東。小臣納工，工六人，四瑟。僕人正徒相大師，僕人師相少師，僕人士相上工。相者皆左何瑟，後首，內弦，挾越，右手相。後者徒相，入。小樂正從之，⑤升自西階，北面東上。

①「王制」，原脫，今據《儀禮釋官》補。

②「崇四術立四教」，原作「立四教崇四術」，今據《儀禮釋官》改。

③「賓」下，《儀禮釋官》有「典」字。

④「瑟」，原重文，今據《禮經釋例》刪。

⑤「之」，原作「上」，今據《禮經釋例》改。

坐授瑟，乃降。小樂正立于西階東，是瑟在堂上也。燕飲之樂，有瑟有笙，故《鹿鳴》之詩云「鼓瑟吹笙」，與《禮經》合也。《鄉飲酒禮》：「^①笙入，堂下聲南，北面立。」《鄉射禮》：「笙入，立于縣中，西面。」注：「堂下樂相從也。」《燕禮》：「笙入，立于縣中。」《大射儀》樂人宿縣，鐘、磬、鐃、建鼓、應鼗、朔鼗、簫、執，皆陳于庭，是笙管、鐘、磬、鼓、鼗之屬在堂下也。樂貴人聲，故歌者在堂上，其餘皆在堂下。《有瞽》之詩，業、虞、應、田、縣鼓、執、磬、柷、圉、簫、管，皆云「在周之庭」，亦與《禮經》合也。○吳氏廷華云：「樂貴人聲，歌者宜先。曰『瑟先』者，道之坐則歌者先也。《儀禮》各經執事者皆可言賓，獨此賓興大典，賓、介、衆賓俱選擇而次第之，非執事者皆可言賓也。據《周禮·春官》則相者為眡瞭，據《鄉射》則此相者為弟子，眡瞭不必少，而注以少者言，則謂弟子也。弟子何得為賓興之衆賓？則注說非也。又此經言後首，《燕禮》言面鼓，故注以此為臣禮，變于君之面鼓。但大射亦君禮，而後首與此經同；《鄉射》亦臣禮，而面鼓與《燕禮》同，則避君之說不可通矣。故又為尚樂及略于樂以解之，說非不近似，然以此經為尚樂，又以避君而不盡尚樂，以《鄉射》為略于樂，又以避君而不盡略于樂，則支離不足為定論矣。」工歌《鹿鳴》、《四牡》、

《皇皇者華》。三者皆《小雅》篇也。《鹿鳴》，君與臣下及四方之賓燕、講道、修政之樂歌也。此采其已有旨酒，以召嘉賓，嘉賓既來，示我以善道。又樂嘉賓有孔昭之明德，可則倣也。《四牡》，君勞使臣之來樂歌也。此采其勤苦王事，念將父母，懷歸傷悲，忠孝之至，以勞賓也。《皇皇者華》，君遣使臣之樂歌也。此采其更是勞苦，自以為不及，欲諮謀於賢知，而以自光明也。【疏】正義曰：《校勘記》云：「『示我以善道』，楊氏『示』作『視』」。《釋文》「倣」作「設」，云：「本又作倣，同。」張氏云：「可則倣，《大射》、《燕禮》同此，蓋引《詩》是則是倣也，故好事者皆改為倣。」^②案：《釋文》云：「設，戶孝反。本又作倣。」《大射》云：「設，戶教反，亦作倣。」《燕禮》云：「倣，本又作設。」是必古文設、倣通用，宜各從其故。○蔡氏德晉云：「此記所謂『升歌三終』也。」凌氏《釋例》云：「凡樂皆四節：初謂之升歌，次謂之笙奏，三謂之間歌，四謂之合樂。《鄉飲酒》：一人舉觶畢，工入，升自西階，^③工歌《鹿鳴》、《四牡》、《皇皇者

① 「禮」，原脫，今據《禮經釋例》補。

② 「倣」，原作「設」，今據《儀禮注疏校勘記》改。

③ 「階」下，原衍「上」字，今據《禮經釋例》刪。

華》。此升歌也。謂瑟與人聲歌于堂上也。又云：「笙入堂下，磬南，北面立，樂《南陔》、《白華》、《華黍》。」此笙奏也，謂笙入奏于堂下也。又云：「乃間歌《魚麗》，笙《由庚》；歌《南有嘉魚》，笙《崇丘》；歌《南山有臺》，笙《由儀》。」此間歌也，謂堂上之歌與堂上之笙間作也。又云：「乃合樂《周南·關雎》、《葛覃》、《卷耳》、《召南·鵲巢》、《采芣》、《采芣》。」此合樂也，謂堂上堂下衆聲俱作也。凡四節。《鄉射禮》遵人獻酢之後，^①工人，升自西階，北面，笙人立于縣中，西面。乃合樂《周南·關雎》、《葛覃》、《卷耳》、《召南·鵲巢》、《采芣》、《采芣》，但合樂一節，無升歌、笙奏、間歌三節者，注云：「志在射，略于樂也。」《燕禮》獻大夫後，工人，升自西階，歌《鹿鳴》、《四牡》、《皇皇者華》，此升歌也。公爲大夫舉旅酬後，笙人，立于縣中，奏《南陔》、《白華》、《華黍》，此笙奏也。「乃間歌《魚麗》，笙《由庚》；歌《南有嘉魚》，笙《崇丘》；歌《南山有臺》，笙《由儀》。」此間歌也。「遂歌鄉樂，《周南·關雎》、《葛覃》、《卷耳》、《召南·鵲巢》、《采芣》、《采芣》。」此合樂也，亦四節。《大射儀》：獻大夫畢，工升自西階，乃歌《鹿鳴》三終。此升歌也。又云：「乃管《新宮》三終。」此笙奏也。但有升歌、笙奏兩節，無間歌、合樂兩節者，亦志在射，略于樂也。

- 經云《鹿鳴》三終，蓋統《四牡》、《皇皇者華》而言，故《鄉飲酒義》亦祇云「升歌三終」，此其證也。注謂：「不歌《四牡》、《皇皇者華》，主于講道，略于勞苦諮事。」恐非也。《燕禮·記》：^②「升歌《鹿鳴》，下管《新宮》，笙人三成，遂合鄉樂。」注言：「遂者，不問也。」疏據之以爲吹管者亦吹笙，是知下管即笙奏也。又案：李氏光地云：「據《儀禮》作樂凡四節：升歌，一也；笙入，二也；間歌，三也；合樂，四也。蓋堂上之樂工鼓琴瑟而歌，堂下之樂，或主笙，或主管，各以所宜，故曰歌者在上面，匏竹在下面，即笙管之謂也。上下迭作，則謂之間；上下并作，則謂之合。準此以求，則搏拊琴瑟以詠，升歌之樂也；下管鼗鼓，合止祝圉，下管之樂也；笙鏞以間，間歌之樂也；《簫韶》九成，合作之樂也。」其說是也。竊謂《論語》「師摯之始」謂升歌也。《大射》「工六人，大師、小師各一人，升歌爲樂之始也。《關雎》之亂，謂合樂也。樂之卒章爲亂，合樂爲樂之終也。不言笙奏間歌者，舉始終以該其全也。亦與《禮經》相發明。」盛氏世佐云：「《尚書》蔡氏傳曰：堂上之樂，唯取其聲之輕清者，與人聲。」
- ① 「酢」，原作「昨」，今據《禮經釋例》改。
- ② 「記」，原脫，今據《禮經釋例》補。

相比。則二人歌時，必二人鼓瑟，以合詠歌之聲，不言可知。敖氏乃謂工歌之時，亦奏堂下之樂以應之，則從古無此凌亂雜糅之樂也。《尚書》「戛擊鳴球，搏拊琴瑟以詠」，此堂上之樂也；「下管鼗鼓，合止祝圉，笙鏞以間」，此堂下之樂也。堂上之樂，以歌為主；堂下之樂，以管為主。歌發則堂下之樂不作，管奏則堂上之樂亦停，所謂「無相奪倫」者，此也。此篇所記，與《虞書》異者三：堂上有瑟無琴，一也；磬以石爲之，又在堂下，二也；堂下之樂無管、鼗諸器，而以笙爲主，三也。之三者，或因虞、周異制，或因天子宗廟，與大夫、士相飲隆殺不同。至上下迭奏之法，則古今一轍也。」注云「三者，皆《小雅》篇也」者，朱子曰：「《鹿鳴》即謂今日燕飲之事，所以道達主人之誠意，而美嘉賓之德也。《四牡》言其去家而仕于朝，辭親而從王事，于此乎始也。《皇皇者華》言其將爲君使而賦政于外也。《學記》曰：『《宵雅》肆三，官其始也。』正謂此也。蓋此三詩，先王所制以爲燕飲之樂，用之鄉人，用之邦國，各取其象而歌之也。」案：三詩爲《小雅》之始篇，作詩在前，用詩于樂在後，以詩之所言者有合于主人燕賓、臣下勤勞王事之意，故取以入樂，歌之以樂賓，而即以戒使習之也。此賓賢能爲出仕之始，故歌此三詩，《記》所謂官其始也。古人

歌《鹿鳴》者，自《鄉飲酒》外，如《燕禮》及始入學，《大戴禮·投壺》皆歌之，以歌詩斷章取義，所用最廣也。敖氏云：「《春秋》傳云：『《文王》、《大明》、《綿》，兩君相見之樂也。』兩君相見得歌《大雅》，則士、大夫相飲得歌《小雅》，差之宜也。此凡所歌者，皆不取其詩之義，但以其所得用者樂賓耳。」盛氏世佐駁之云：「歌詩不類，古人所誦。此凡所歌者，故是上下通用之樂，然既歌其詩，則必有取于詩之義。」②敖說非。「云《鹿鳴》，君與臣下及四方之賓燕、講道、修政之樂歌也」者，《小序》云：「《鹿鳴》，燕羣臣嘉賓也。既飲食之，又實幣帛筐篚以將其厚意，然後忠臣嘉賓得盡其心矣。」鄭本《小序》爲說，修政括詩中意也。③云「采其已有旨酒，以召嘉賓，嘉賓既來，示我以善道，④又樂嘉賓有孔昭之明德，可則倣也」者，彼《詩》云：「我有旨酒，以燕樂嘉賓之心。」又云：「人之好我，示我周行。」又云：「德音孔昭，視民不忮，君子是則是倣。」謂采此數語也。

①「學」，原作「樂」，今據《儀禮經傳通解》改。

②「有」，原脫，今據《儀禮集編》補。

③「政」，原作「改」，今據《儀禮正義正義》改。

④「示」，原作「云」，今據《續清經解》本改。

案：鄭氏注《禮》在前，箋《詩》在後，故《詩箋》與《禮注》說多不合。「示我周行」箋云：「示」，當作「真」。真，置也。周行，周之列位也。人有以德善我者，我則置之於周之列位，言己惟賢是用。」此注則謂人之好我，示我以善道，與《毛傳》「周，至也；行，道也」訓合。《禮記·緇衣》引此詩，注以爲示我忠信之道，與此注亦同。「君子是則是傲」箋云：「是乃君子所法倣。」謂嘉賓爲君子所法倣。此注則以君子即嘉賓，嘉賓有明德，爲人所則倣也，較《詩箋》爲優。云「四牡」，君勞使臣之來樂歌也。此采其勤苦王事，念將父母懷歸傷悲，忠孝之至以勞賓也」者，《小序》云：「《四牡》勞使臣之來也，有功而見知則說矣。」篇中有「豈不懷歸，王事靡盬，我心傷悲」、「不遑將母」、「將母來諗」等語，彼箋云：「君勞使臣，述序其情，^①而曰我豈不思歸乎？」^②誠思歸也，故作此詩之歌，以養父母之志，來告於君也。」是所謂「忠孝之至」也。云「《皇皇者華》，君遣使臣之樂歌也。此采其更是勞苦，自以爲不及，欲諮謀於賢知而以自光明也」者，《小序》云：「《皇皇者華》，君遣使臣也。送之以禮樂，言遠而有光華也。」篇中有「駉駉征夫，每懷靡及」、「周爰諮謀」等語，是欲諮謀賢知以自光明也。卒歌，主人獻工，工左瑟，一人拜，不興，受爵。主人阼

階上拜送爵。一人，工之長也。凡工賤，不爲之洗。

- 【疏】正義曰：吳氏廷華云：「工北面，以西爲左。主人實爵自東北來，^③在工之右，故左瑟以避之。歌者宜先，獨見瑟者，以有事著也。有大師，則先大師。一人拜，禮之殺也。」敖氏云：「主人亦坐授之，獨拜於阼階上者，以工拜受於其位，^④故不得拜於其右也。」^⑤凡主人與工爲禮，蓋亦有贊告之者。」凌氏《釋例》云：「凡獻工與笙於階上，獻獲者與釋獲者於堂下，獻祝與佐食於室中。《鄉飲酒禮》升歌畢，主人獻工，阼階上拜送爵。笙奏畢，主人獻之於西階上。《鄉射禮》合樂畢，主人獻工，阼階上拜送爵。獻畢，遂獻笙於西階上。《燕禮》升歌畢，主人獻工，西階上拜送爵。公在阼階，故獻於西階上，與鄉飲、鄉射不同也。笙奏畢，主人洗，升，^⑥獻笙於西階上。《大射儀》歌《鹿鳴》三終畢，主人獻
- ① 「使臣述序」，原作「其臣敘述」，今據《毛詩正義》改。
 ② 「而」，《毛詩正義》作「女」。
 ③ 「北」，原脫，今據《儀禮疑義》補。
 ④ 「受」，原作「授」，今據《儀禮集說》改。下「坐受爵」同。
 ⑤ 「右」，原作「左」，今據《儀禮集說》補。
 ⑥ 「升」，原重文，今據《禮經釋例》刪。

工，西階上拜送爵。是獻工與筮於西階上也。《鄉射禮》：「二次射飲不勝者後，司馬洗爵，升，實之以降，獻獲者於侯。又：司射洗爵，升，實之以降，獻釋獲者於其位，①少南。《大射儀》第二次射飲不勝者後，司馬正洗散，②遂實爵，獻服不。服不侯西北三步，北面拜受爵。司射洗觚，升，實之，降，獻釋獲者於其位，少南。是獻獲者與釋獲者於堂下也。《士虞禮》：尸人九飯，主人初獻，筵祝南面，主人獻祝畢，酌獻佐食。《少牢禮》：尸人十一飯，主人獻尸，致嘏畢，主人獻祝，設席南面，獻畢，獻上佐食，戶內牖東，北面拜，坐受爵，下佐食，亦如之。是獻祝與佐食於室中也。獲者，釋獲者有事於堂下，故獻於堂下。祝與佐食有事於室中，故獻於室中。工有事於階上，筮有事於階下，③而皆獻於階上者，統於工也。獻獲及釋獲者不用主人，而用司馬、司射，各以其職也。」注云：「一人，工之長也」者，敖氏云：「乃歌者也。」④盛氏世佐云：「一人，謂鼓瑟者之長。瑟賤而先得獻者，以其先就事也。」云「凡工賤，不爲之洗」者，以下文「大師則爲之洗」況之也。吳氏廷華云：「下記旅則不洗，不洗者不祭，此非旅當洗者也。下言「衆工不拜受爵祭」，則又當洗。鄭因此經不言洗，下又言「大師則爲之洗」，故謂衆工不爲之洗耳。要知所謂洗者，主人親洗也；

不洗者，主人不親洗，使人洗之也。」薦脯醢，使人相祭。使人相者，相其祭酒、祭薦。【疏】正義曰：敖氏云：「工雖賤，以其受爵于席，故每獻輒薦之，亦與成人之禮異也。」工飲，不拜既爵，授主人爵。坐授之。【疏】正義曰：郝氏敬云：「不備禮也。」方氏苞云：「祭酒、祭薦皆使人相，則工執爵而相者以適阼階可知。」衆工則不拜受爵，祭飲。辯有脯醢，不祭。祭飲，獻酒重，無不祭也。今文「辯」爲「徧」。【疏】正義曰：敖氏云：「不拜而受，差賤也，其意與不拜既爵同。祭飲，⑤祭酒乃飲也。」大師則爲之洗，賓、介降，主人辭降，工不辭洗。大夫若君賜之樂，謂之大師，則爲之洗，尊之也。賓、介降，從主人也。工，大師也。上既言獻工矣，乃言大師者，大師或瑟或歌也。其獻之，瑟則先歌則後。

- ①「獻」下，原衍「獲」字，今據《禮經釋例》刪。
- ②「正」，原脫，今據《禮經釋例》補。
- ③「下」，原作「上」，今據《禮經釋例》改。
- ④「乃」，原作「工」，今據《儀禮集說》改。
- ⑤「飲」，原作「酒」，今據《續清經解》本改。

【疏】正義曰：注云「大夫若君賜之樂，謂之大師」者，李氏如圭云：「天子、諸侯，有大師常官。大夫，君賜之樂與工，亦謂之大師。」敖氏云：「大師，工之長也。《周官》則以下大夫爲之，諸侯則宜用上士。」《釋官》曰：「能其事曰工，故凡樂人通謂之工。」①大師，樂工之長。《左傳》：叔孫穆子食慶封，使工爲之誦《茅鴟》。是大夫家有樂工矣。但此賓賢能，工及大師當是君之樂人來襄盛禮者。「大師或來或否不定。」②來，則爲之洗；不來而但使樂工來，則不爲之洗。」方氏苞云：「大師乃爲之洗，則衆工實爵而不親洗，終則使人以爵奠于筐，而主人不親具見矣。」云「賓、介降，從主人也」者，案：經不言主人降洗，則必降可知也，禮降則皆降，大師暨者不降，故賓、介從主人降。敖氏云：「同大師於己黨也。主人辭賓，亦對衆賓不降，別于賓、介也。工不辭洗亦不降，主人既洗，亦與賓、介揖而俱升。」云「工，大師也。上既言獻工矣，乃言大師者，大師或瑟或歌也。其獻之，瑟則先，歌則後」者，張氏爾岐云：「大師在瑟歌四人之內，③通謂之工。獻之亦依瑟先歌後之序，但爲之洗爲不同。」④盛氏世佐云：「大師乃君所賜有爵者，⑤無論或瑟或歌，必先獻，不當依瑟先歌後之序。經既言獻工，乃言大師者，以其出於君賜，不必有也。注誤。」焦氏以恕云：「大

師即國之大師，如有事於君所，則來者工而已，大師不與也；若無事於君所，⑥則亦來與此禮。《大射儀》先言「僕人正徒相大師」，下乃云「後者徒相人」，故注知後者爲大師，無瑟，是大師主歌也。此注「大師或瑟或歌」，未必然也。」江氏筠云：「經言獻工者四，俱云：「工不興，左瑟，一人拜受爵」。注於《大射儀》云：大師無瑟，言左瑟者，節也；一人，謂大師。是謂大師在歌而先得獻也。於《鄉射》云：「一人，無大師，則工之長者。」是謂有大師則獻，與《大射》同，但大師或有或無，又或瑟或歌爲異也。此及《燕禮》俱云：一人，工之長者。此禮據此節注所云，是指瑟工之長。《燕禮》雖無明文，然彼經至正歌畢，始見大師，與此俱言在後，則鄭亦是指瑟工言。二禮之先，俱瑟居先，但《燕禮》大師無瑟後獻，是其常。此則或無大師，或有在瑟中，而得先獻爲異耳。合數說詳之，鄭於大師之名，謂臣禮與

- ①「故」，原脫，今據《儀禮釋官》補。
- ②「大師」，原脫，今據《儀禮釋官》補。
- ③「師」下，原衍「亦」字，今據《儀禮鄭注句讀》刪。
- ④「爲」，原作「則」，今據《儀禮鄭注句讀》改。
- ⑤「所」，原脫，今據《儀禮集編》補。
- ⑥「若」下，《儀禮彙說》有「大師」二字。

君禮異，君有常官，其大師自在歌。臣，則君所賜者即得此稱，不論歌瑟。於獻工之節，謂射禮與燕飲禮異，大射辨尊卑，故大師亦先得獻，《鄉射》亦得同之。至燕飲之禮，則止如其人之先後耳。今案：大師之在歌與其先獻，自是定禮。蓋據經後者之受獻與先一人不同，先一人得拜受爵，得祭脯醢，後受者則不然。鄭於《鄉射》「瑟先」謂「賤者先就事」，則瑟之賤於歌，固甚明也。受獻之禮，賤者儀多，貴者儀簡，有是理乎？至歌之爲大師，更非尋常歌者之比。鄭謂工賤，不爲之洗，於大師洗獻者，尊之也。賤之而於禮得伸，尊之而於禮反屈，有是事乎？則獻禮之俱同大射無疑矣。知歌之必先瑟獻，知大師之必先衆工獻，則大師之在歌自明。且又有可證者，《大射樂》正命大師曰「奏《狸首》，間若一」，大師不興許諾。以其係徒相者，所主在歌故也。《鄉射》亦樂正東面，命大師曰「奏《騶虞》，間若一」，大師不興許諾。非君臣同在歌之明驗邪？然則經何以於獻工之後始言大師？曰：《鄉射》此文固在「工不興，左瑟」之上矣，以其臣禮或有或無不定。亦猶遵者之禮，《鄉射》言於席工之先，而此經言于送賓之後也。」高氏愈云：「遵則或有或無，故獻遵不數外。此獻工四人爲第十次行爵。工歌則必獻，獻則必拜，不敢以其瞽矇而易之，其不忽微賤

者有如此。」

右升歌三終及獻工

笙入，堂下磬南，北面立。樂《南陔》、

《白華》、《華黍》。笙，吹笙者也。以笙吹此詩，以爲

樂也。《南陔》、《白華》、《華黍》、《小雅》篇也，今亡，其義未

聞。昔周之興也，周公制禮作樂，采時世之詩以爲樂歌，所

以通情、相風切也，其有此篇明矣。後世衰微，幽厲尤甚，

禮樂之書，稍稍廢棄。孔子曰：「吾自衛反魯，然後樂正，

《雅》、《頌》各得其所。」謂當時在者而復重雜亂者也，惡能

存其亡者乎？且正考父校商之名頌十二篇於周大師，歸

以祀其先王。至孔子二百年之間，五篇而已，此其信也。

【疏】正義曰：郝氏敬云：「堂下之樂笙爲主，磬亦在堂下。

樂即笙磬。」敖氏云：「磬南，阼階西南也。北面立，蓋亦東

上，如工立。于磬南，近其所應之樂也。」①《詩》曰「笙磬同

音」，而《禮》有笙磬、笙鐘，則吹笙之時，亦奏鐘磬之屬以應

①「應」，原作「近」，今據《續清經解》本改。

之矣。^①不言者，主於笙也。」張氏爾岐云：「磬縣南面，其南當有擊磬者。此「笙入，磬南北面」，在磬者之南，北面也。」注云「以笙吹此詩以爲樂也。《南陔》、《白華》、《華黍》、《小雅》篇也，今亡」者，謂以笙吹此三詩以爲樂，不如

《鹿鳴》三詩以二人歌、以二人鼓瑟和之也。以笙吹此詩而不歌，故其辭遂亡。毛氏奇齡荅問云：「據問笙詩有詩，則《鄉飲酒禮》笙入三終，將以笙笙詩邪？抑亦別有歌詩者，而僅以笙應之邪？」此問最善。從來辨笙詩，^②未有辨笙其詩者。夫所謂笙詩，謂笙必有詩，非謂笙詩之必有歌也。^③凡詩可以歌，亦可以笙。笙與箛、管、簫四器皆主聲

詩，皆應歌之器，皆在堂下。原無徒器者，但有歌而器，有不歌而器，^④總必有詩。其歌而器，^⑤如《鄉射禮》之工歌于上，而堂上堂下之笙瑟皆應之，即《鄉飲酒禮》之合樂是也。^⑥此有歌之笙也。不歌而器，^⑦如大射禮之管《新宮》，始奏禮之管《象》，堂下俱不歌，而但以管笙聲，其詩即《鄉飲酒》之笙入間歌是也。此不歌之笙也。是以《春秋傳》有歌鐘，^⑧即頌鐘、頌磬，所以應歌。《尚書》有笙鏞，《周禮》有鐘笙，^⑨即笙鐘、笙磬，所以應笙。夫笙又有應，則笙即歌矣。「云其義未聞」者，《小序》云：「《南陔》，孝子相戒以養也。」《白華》，孝子之潔白也。」《華黍》，時和歲

豐，宜黍稷也。」有其義而亡其辭，是明有其義，而云未聞者，《鄭志》荅吳模云：「爲記注時就盧君耳，先師亦然，後乃得毛公傳記，^⑩古書義又且然。^⑪記注已行，不復改之。」是鄭注三禮在前，其時未見《毛詩》，不得《小序》之說，故云「未聞」也。云「昔周之興也」至「此其信也」者，此明周公制禮作樂時，三篇之辭具在，至更幽、厲之亂，禮樂廢棄，而三詩遂亡。引孔子言及正考父者，見三篇之亡在孔子之前也。案：《詩箋》云：「此三篇者，《鄉飲酒》、《燕禮》用焉，曰「笙入，立于縣中，奏《南陔》、^⑫《白華》、《華黍》」是

- ①「屬」，原作「篇」，今據《儀禮集說》改。
- ②「笙詩」下，原有「者」字，今據《西河集》刪。
- ③「詩」，原作「歌」，今據《西河集》改。
- ④「不歌而」，原作「歌而不」，今據《西河集》改。
- ⑤「其歌而器」，原脫，今據《西河集》補。
- ⑥「鄉」，原作「樂」，今據《續清經解》本改。
- ⑦「而器」，原脫，今據《西河集》補。
- ⑧「以」，原脫，今據《西河集》補。
- ⑨「周」，原作「同」，今據《續清經解》本改。
- ⑩「記」，原作「既」，今據《鄭志》改。
- ⑪「且」，原作「當」，今據《鄭志》改。
- ⑫「奏」，原作「樂」，今據《毛詩正義》改。

也。孔子論《詩》《雅》、《頌》各得其所，時俱在耳，遭戰國及秦之世而亡之。其義則與衆篇之義合編，^①故存。至毛公爲《訓詁傳》，^②乃分衆篇之義，^③各置于其篇端云。」與此注異者，其時未習《毛詩》，故有此語。後見《毛詩》，爲《詩箋》，遂改其說耳。蓋六詩孔子時俱存，而序詩者親見其辭，故能言其義。或謂：三百篇未嘗以命篇取義，六笙詩序詩者何以知其然？因題敷衍以補之也。姜氏炳璋《詩序廣義》駁之曰：「南陔，南隴也。《白華》，見于變雅，爲刺幽王，何以知爲孝子之詩？庚有更、償、續三義，何以見萬物得由其道？可想見作序者已誦全文，不然，即鑿空杜撰，豈能至是？序最簡樸，間與詩中字面偶同。如《漢廣》云「德廣所及」，「德廣」之「廣」非即「漢廣」之廣？《旄丘》云「刺衛伯」，「衛伯」之「伯」非即「伯兮叔兮」之「伯」？安見「孝子絜白」即爲「白華」之「白」也？三百篇亦有即其篇名已見詩旨者。如螽斯多子，以美其子孫衆多；葛屨涼薄，以刺儉；北風疾厲，以刺虐；碩鼠刺貪。此類不可更僕。如以序與篇相合，疑其不見全文，將謂作《螽斯》序者祇見「螽斯」二字乎？且序與篇名相戾，既以爲無理，序與篇名相合，又以爲順文，爲詩序者難矣。」案：笙詩有聲無辭，聚訟紛紛。《小序》云：「有其義而亡其辭。」

鄭君《詩箋》與此注皆以爲本有辭而亡之。至宋劉氏敞始謂亡其辭者，亡謂本無，非亡逸之亡也；《儀禮》曰笙、曰樂、曰奏，而不言歌，則有聲而無辭明矣。朱子《詩經集傳》本其說，且云：「意古經篇題之下必有譜焉，如《投壺》魯鼓、薛鼓之節，而亡之耳。」自是習詩之家如李氏樗、董氏迪、王氏質、黃氏震等，習禮之家如張氏爾岐、方氏苞、秦氏蕙田、蔡氏德晉等，皆從其說。然范氏家相《詩瀋》曰：「《儀禮》明云：『笙人，堂下磬南，北面立。』樂《南陔》、《白華》、《華黍》。樂之爲言比音而樂之也。」^④是禮文顯以爲有辭矣。^⑤嚴氏虞惇《讀詩質疑》曰：「升歌、笙人、間歌、合樂各三終，于是工告樂正曰『正歌備』。凡樂四節，爲詩十八篇，皆謂之歌，而可云六詩有聲無辭乎？」盛氏世佐云：「《書》曰：『詩言志，歌永言，聲依永。』又曰：『予欲聞六律、五聲、八音，在治忽，以出納五言。』然則有辭而後

① 上「義」，原作「篇」，今據《續清經解》本改。

② 「爲」，原作「而」，今據《續清經解》本改。

③ 「分」，原作「合」，今據《續清經解》本改。

④ 「言」，原脫，今據《詩瀋》補。

⑤ 「是」，原作「蓋」，今據《詩瀋》改。

⑥ 「書曰」，原脫，今據《儀禮集編》補。

有聲，聲之不可離辭而乃成樂也，自古然矣。又況古人名篇之例，或以詩之首二字，或一句，或次取篇中一二字以爲題，^①亦有舍篇中字而別命之者，要未有無其辭而可命之曰某詩某詩也。夫詩之逸者多矣。^②如《狸首》、《采齊》、《肆夏》見於《禮記》、《祈招》、《新宮》、《河水》見於《春秋傳》，^③《三夏》之名見《國語》，《九夏》之名見《周禮》。考其辭與義，必無夫子所刪者，而今《詩》皆不能具，其亡於夫子之前，而不及收與？抑亡於夫子之後，而今之所存或非其舊與？是皆未可知也。何獨於《南陔》以下六篇而保其非逸邪？若徒以其曰笙，曰樂，曰奏而不言歌，以爲有聲無辭之證。則《鄉射禮》云：「奏《騶虞》。」《國語》云：「金奏《肆夏》、《樊遏》、《渠》。」呂叔玉云：《肆夏》、《時邁》也。《樊遏》、《執競》也。《渠》、《思文》也。其說采於《詩集傳》，是皆有辭而亦云奏。《周禮》：籥章以籥吹豳詩。即《七月》也。《禮記》：「升歌《清廟》，下管《象》。」《象》即《維清》也。^④《燕禮》：「升歌《鹿鳴》，下管《新宮》。」而《左傳·昭二十五年》：「宋公賦《新宮》。」謂之賦，則有辭矣。《國語》又稱：「伶簫詠歌及《鹿鳴》之三。」^⑤是籥與簫、管所吹之詩皆有辭，而謂笙所吹者獨無辭可乎？張子曰：既無辭，安得有此篇？必是有其辭。所以亡者，良由施之於笙，^⑥

非若歌之可習。此言殆爲平允。」胡氏承珙云《毛詩後箋》曰：「劉原父《七經小傳》有云：『將舞《象》，則先歌《清廟》，是以前序曰奏《象》舞；將舞《武》，則先歌《武》，是以《武》之序曰奏《大武》。』」夫《禮·文王世子》、《祭統》皆以《象》與《武》爲下管之樂，是曰管、曰奏。劉氏既知其有辭矣，何於笙詩獨主本無其辭之說？以有辭者爲歌，無辭者曰笙，曰奏，豈不自相乖戾乎？《六經奧論》于笙詩引商份之說而申之，謂間歌之聲有義無辭，而其言管《新宮》則云管與笙一類，皆竹爲之。《燕禮》：「升歌《鹿鳴》，下管《新宮》。」《昭二十五年》：「宋公賦《新宮》。」謂之賦，則有辭矣。後漢明帝亦取焉，必見其辭，故得之以播歌詠，蓋未有詩而無辭者。《周禮》祈年吹《豳》于管、籥之類，必得有辭。既知管、籥有辭，而何以獨知笙詩無辭？亦可見不能自圓其說矣。若《集傳》所引魯鼓、薛鼓之節，則陳氏長發

- ① 「次」，原作「刺」，今據《儀禮集編》改。
- ② 「之」，原脫，今據《儀禮集編》補。
- ③ 「秋」下，《儀禮集編》有「左氏」二字。
- ④ 「象」，原脫，今據《儀禮集編》補。
- ⑤ 「及」，原脫，今據《國語》補。
- ⑥ 「良由」，原作「由其」，今據《儀禮集編》改。

云：魯鼓、薛鼓有譜無辭，則僅冠以國名，不能更立別名。若笙詩有聲無辭，則《南陔》、《由庚》等名何自來乎？承珙又案：《投壺》云：「命弦者曰：奏《狸首》，^①間若一。」注云：「弦，鼓瑟者也。《狸首》，《詩》篇名也，今逸。《射義》所云《詩》曰『曾孫侯氏』是也。『間若一』者，《投壺》當以爲志取節焉。^②然則下文魯鼓、薛鼓亦必隨所弦之《狸首》以爲節，是徒譜者當必有取節之詩，^③而謂《禮經》之笙奏乃無詩，而徒器乎？至王雪山以唐樂有上柱、鳳雛、平調、清調、瑟調、平折、命喙七曲有聲無辭，黃東發又引琴譜長清、短清、長側、短側之類以證無辭有義，不知有辭而後有聲，有聲而後有調，有調而後有譜。或以習其辭者其辭易存，習其聲者其辭易亡，^④理容有之。要其初未有有聲而無辭者，即如俗樂工尺，先亦必用曲詞譜出，後習之者但畱工尺耳。」主人獻之于西階上，一人拜，盡階不升堂。受爵，主人拜送爵，階前坐祭立飲，不拜既爵，升，授主人爵。一人，笙之長者也。笙三人，和一人，凡四人。《鄉射禮》曰：「笙一人拜于下。」【疏】正義曰：賈疏云：「前獻歌工，在阼階上，以工在西階東也；此獻笙，在西階上，以笙在階下也。」敖氏云：「主人獻

時亦西南面也。」^⑤方氏苞云：「以獻笙，見獻工亦于西階上；以獻工，見獻笙亦于阼階上。拜送爵，各舉一節以互相備也。于笙不言相，不言受獻，不言相祭，義同。」案：方說與疏異，疑非。工在西階東，則獻當在阼階上，拜送爵亦在阼階也。笙在階下，則獻在西階上，拜送爵亦在西階上也。「盡階不升堂」，敖氏云：「賤也。既受爵，階上少立，俟主人已拜，然後降。主人拜，亦北面。升，授主人爵，亦盡階不升堂。」注云「一人，笙之長者也。笙三人，和一人」者，《鄉射·記》曰：「三笙一和而成聲。」《爾雅》云：「笙小者謂之和。」《釋官》云：「笙以器名其官，亦公臣，見《燕禮》。」衆笙則不拜受爵，坐祭，立飲，辯有脯醢，不祭。亦受爵於西階上，薦之皆於其位，磬南。今文「辯」爲「偏」。【疏】正義曰：蔡氏德晉云：「衆笙，謂

- ①「奏」，原作「命」，今據《毛詩後箋》改。
- ②「志」，原作「去」，今據《毛詩後箋》改。
- ③「當」，《毛詩後箋》作「尚」。
- ④「辭」，原作「聲」，今據《毛詩後箋》改。
- ⑤「面」，原作「西」，今據《續清經解》本改。

一人外吹衆笙者。笙凡四人，^①則一人拜外有三人也。」陳氏暘曰：「工一人祭薦，餘則祭飲而已，笙則皆不祭，此又等降之別也。」高氏愈云：「此獻笙四人，爲第十一次行爵。」

右笙奏三終及獻笙

乃間歌《魚麗》，笙《由庚》；歌《南有嘉魚》，笙《崇丘》；歌《南山有臺》，笙《由儀》。

間，代也，謂一歌則一吹。六者，皆《小雅》篇也。《魚麗》，言太平年豐物多也。此采其物多酒旨，所以優賓也。《南有嘉魚》，言太平，君子有酒，樂與賢者共之也。此采其能以禮下賢者，賢者纍蔓而歸之，與之燕樂也。《南山有臺》，言太平之治以賢者爲本。此采其愛友賢者爲邦家之基，民之父母既欲其身之壽考，又欲其名德之長也。《由庚》、《崇丘》、《由儀》，今亡，其義未聞。【疏】正義曰《校勘記》云：

「《釋文》：『麗，本或作離，下同。』」燕，《釋文》作「宴」。

注云「間，代也，謂一歌則一吹」者，張氏爾岐云：「謂一歌畢，一笙繼之也。堂上歌《魚麗》方終，堂下笙即吹《由庚》。餘篇皆然。」蔡氏德晉云：「堂上鼓瑟一歌，堂下吹笙一曲，更代而作也。」案：《尚書》「憂擊鳴球，搏拊琴瑟以詠」，此

堂上之樂，以詠者，所謂「歌者在上也」也。「下管鼗鼓，合止祝圜，笙鏞以間」，此堂下之樂，所謂「匏竹在下」也。以間者，堂下之樂與堂上之樂間代而作。唐虞時，非周之詩，亦必有所歌之詩也。所奏者，非周之詩，亦必有所奏之詩也。

故王氏炎、陳氏大猷多據《儀禮》以證《尚書》，見樂之節次相合。乃陳氏櫟《書集傳纂疏》謂《儀禮》之「間歌」與《書》之「以間」初不相干，不過一「間」字同，間代更替之義亦同耳。其說太拘。云「《魚麗》，言太平年豐物多也。此采其物多酒旨，所以優賓也」者，《詩·小序》云：「《魚麗》，美萬物盛多，^②能備禮也。」篇中言：「魚麗于罍，^③君子有酒旨且多。」《毛傳》云：「太平而後，微物衆多。取之有時，用之有道，則物莫不多矣。」是也。云「《南有嘉魚》言太平，君子有酒，樂與賢者共之也。此采其能以禮下賢者，賢者纍蔓而歸之，與之燕樂也」者，《小序》云：「《南有嘉魚》，樂

① 「笙凡四人」，《禮經本義》作「鄭康成謂笙三人和一人凡四人」。

② 「美」，原作「言」，今據《毛詩正義》改。

③ 「鰾鰾」，原脫，今據《毛詩正義》補。

與賢也。大平之君子至誠，^①樂與賢者共之也。」彼箋云：

「樂得賢者而與共立于朝，^②相燕樂也。」篇中言：「南有樛木，甘匏纍之。君子有酒，嘉賓式燕綏之。」箋謂君子下其

臣，故賢者歸往，^③故有酒與嘉賓燕飲而安之。^④是也。

云「南山有臺」，言大平之治以賢者爲本。此采其愛友賢

者爲邦家之基，民之父母既欲其身之壽考，又欲其名德之

長也」者，《小序》云：「南山有臺」，樂得賢也。得賢，則能

爲邦家立大平之基矣。」篇中有「樂只君子，邦家之基」、「樂

只君子，萬壽無期」，又「樂只君子，民之父母」、「樂只君子，

德音不已」是也。案：彼箋云：「人君既得賢者，置之于

位，又尊敬，以禮樂樂之，則能爲邦家之本，得壽考之福。」

是以壽考爲人君得賢之效。注謂欲其身之壽考，與箋《詩》

異。朱子《詩集傳》以「萬壽無期」爲祝賢者之壽，本此注

也。云「《由庚》、《崇丘》、《由儀》，今亡，其義未聞」者，《小

序》云：「《由庚》，萬物得由其道也。《崇丘》，萬物得極其

高大也。《由儀》，萬物之生各得其宜也。有其義而亡其

辭。」賈疏云：「堂上歌者不亡，堂下笙者即亡，蓋當時方以

類聚，笙歌之詩各自一處，^⑤故存者并存，亡者并亡也。」盛

氏世佐云：「疏言笙詩并亡之，故不若張子『施之於笙，非

右間歌三終

乃合樂，《周南·關雎》、《葛覃》、《卷

耳》、《召南·鵲巢》、《采芣》、《采蘋》。合樂，

謂歌樂與衆聲俱作。《周南》、《召南》、《國風》篇也，王后、

國君夫人房中之樂歌也。《關雎》言后妃之德，《葛覃》言后

妃之職，《卷耳》言后妃之志，《鵲巢》言國君夫人之德，《采

芣》言國君夫人不失職，《采蘋》言卿大夫之妻能循其法度。

昔大王、王季居於岐山之陽，躬行《召南》之教，以興王業。

及文王而行《周南》之教，以受命。《大雅》云：「刑于寡妻，

至于兄弟，以御于家邦。」謂此也。其始，一國耳。文王作

邑于豐，以故地爲卿士之采地，乃分爲二國。周，周公所

食；召，召公所食。於時文王三分天下有其二，德化被於

①「至誠」，原脫，今據《毛詩正義》補。

②「共」，原脫，今據《毛詩正義》補。

③「往」，原作「德」，今據《毛詩正義》改。

④「飲」，原作「樂」，今據《毛詩正義》改。

⑤「處」，原作「家」，今據《儀禮注疏》改。

⑥「施」，原脫，今據《儀禮集編》改。

南土，是以其詩有仁賢之風者，屬之《召南》焉；有聖人之風者，屬之《周南》焉。夫婦之道，生民之本，王政之端。此六篇者，其教之原也。故國君與其臣下及四方之賓燕用之合樂也。鄉樂者，風也。《小雅》為諸侯之樂，《大雅》、《頌》為天子之樂。《鄉飲酒》升歌《小雅》，禮盛者可以進取也；燕合鄉樂，禮輕者可以逮下也。《春秋傳》曰：《肆夏》、《繁遏》、《渠》，天子所以享元侯也；《文王》、《大明》、《緜》，兩君相見之樂也。然則諸侯相與燕，升歌《大雅》，合《小雅》。天子與次國、小國之君燕亦如之。與大國之君燕，升歌《頌》，合《大雅》，其笙間之篇未聞。【疏】正義曰：《校勘記》云：「葛覃，張氏曰：『案：《釋文》，葛覃，大南反。《五經文字》云：《詩》『葛覃』亦作覃。《九經字樣》云：葛覃，經典或作覃。今不作覃，①非古也。後《燕禮》同。』案：今本《釋文》仍作「覃」。『謂歌樂，衆聲俱作』，②疏無「與」字，《通典》無「樂」字。『能循其法度』，「循」，徐本作「脩」，與疏合。案：《禮記·鄉飲酒義》正義引正作「脩」。『乃分為二國』，「二」，③監本作「三」，誤。」云「合樂，謂歌樂與衆聲俱作」者，李氏如圭云：「合樂，謂堂上歌瑟、堂下鐘磬合奏此詩也。《燕禮》曰：歌鄉樂《周南》、《召南》。《關雎》序曰：用之鄉人，用之邦國。『用之鄉人』，此禮是也；『用之

邦國』，燕禮是也。《鄉飲酒義》曰：工人升歌三終，④笙入三終，間歌三終，合樂三終。歌與笙每篇為一終，間歌，每間為一終。合樂，《鵲巢》合《關雎》，《采芣》合《葛覃》，《采蘋》合《卷耳》，每合為一終。」敖氏云：「合樂，謂合《周南》、《召南》而歌之，與歸之惟歌《小雅》者不同也。二風乃合而歌之者，⑤鄉樂于《小雅》為輕也。《雅》先而鄉樂後，先重後輕也。鄉飲酒，士禮之盛者也，故歌《小雅》與鄉樂。若其輕禮者，則惟鄉樂而已，下文息司正是也。《春秋傳》謂《文王》之三，⑥為兩君相見之樂，指其始歌者也。始歌《大雅》，則合《小雅》矣。諸侯相見，其歌如此，及與臣燕，則但自《小雅》而下。以是數者觀之，可以見君臣樂歌輕重之差矣。然則天子之燕享諸侯，亦當如國君相見之樂，⑦而《頌》則惟宜于祭用之與？大夫樂歌蓋如士。」張氏爾岐

- ①「覃」，原作「覃」，今據《儀禮注疏校勘記》改。
- ②「歌樂」下，《儀禮注疏校勘記》有「與」字。
- ③「二」，原脫，今據《儀禮注疏校勘記》補。
- ④「工」，原作「主」，今據《儀禮集釋》改。
- ⑤「風」，原作「南」，今據《儀禮集說》改。
- ⑥「傳」，原作「時」，今據《儀禮集說》改。
- ⑦「當」，「君」原作「但」，「家」，今據《儀禮集說》改。

云：「此合樂即《論語》所謂『《關雎》之亂』也。」凌氏《釋例》曰：「合樂之說，賈疏最確，謂堂上堂下笙歌並作也。《鄉飲酒義》合樂三終者，蓋堂上瑟歌《關雎》、《葛覃》、《卷耳》，則堂下亦笙奏《關雎》、《葛覃》、《卷耳》，是為《周南》三終。堂上瑟歌《鵲巢》、《采芣》、《采芣》，則堂下亦笙奏《鵲巢》、《采芣》、《采芣》，是為《召南》三終。故曰『合樂三終』也。孔穎達《正義》謂若工歌《關雎》，則笙吹《鵲巢》合之；若工歌《葛覃》，則笙吹《采芣》合之；若工歌《卷耳》，則笙吹《采芣》合之。不知孔氏所謂合之者，工歌《關雎》後始笙《鵲巢》以合之乎？抑工歌《關雎》時即笙《鵲巢》以合之乎？如工歌《關雎》時即笙《鵲巢》以合之，則堂上歌者此篇，堂下笙者彼篇，萬無可合之理。若工歌《關雎》後始笙《鵲巢》以合之，則仍是問歌，非合樂矣。且果歌者為《周南》，笙者為《召南》，則經文何不直云歌《關雎》、《葛覃》、《卷耳》，笙《鵲巢》、《采芣》、《采芣》而云合樂乎？蓋不若賈疏為得矣。」案：凌氏之辯至確。問歌亦六詩，經不言歌言笙，此總言合樂，則為同一詩而衆聲並奏可知也。然凌氏亦有所本。朱子云：「合樂，孔氏非是，當從賈疏。」毛氏奇齡云：「歌工在上，笙、管、鐘、磬皆列堂下，而皆可以應其歌。是以合樂之法，工歌《關雎》，則堂上之瑟，堂下之笙、管皆羣

起而應之；其歌《葛覃》、《卷耳》、《鵲巢》、《采芣》、《采芣》，皆然。舊注所謂合樂者，合金石、絲竹以歌之。金石者，鐘、磬；絲竹者，瑟與笙、管也。」^①如孔穎達說，「則世無有以張家之聲合李家響者是也。」云「《周南》、《召南》、《國風》篇也，王后、國君夫人房中之樂歌也」者，《燕禮·記》云：「有房中之樂。」注云：「弦歌《周南》、《召南》之詩，而不用鐘磬之節。謂之房中者，后、夫人之所諷誦，以事其君子也。」說詳《燕禮》。云「《關雎》言后妃之德」，至「能循其法度」者，《小序》云：「《關雎》，后妃之德也。」《葛覃》，后妃之本也。」《卷耳》，后妃之志也。」《鵲巢》，夫人之德也。」《采芣》，夫人不失職也。」《采芣》，大夫妻能循法度也。」注與《小序》說皆相合。《周南》，王者之風，故言后、妃之事；《召南》，諸侯之風，故言諸侯夫人、大夫妻之事。云「昔大王、王季」至「其教之原也」者，言周之初自近及遠，化家為國，是以詩有《周南》、《召南》之分，而六篇居二南之首，為教之原，是以合樂用之也。注中所言與《周南》、《召南》譜大略相同。《小序》云：「《關雎》、《麟趾》之化，王者之風，故繫之周公。」《鵲巢》、《騶虞》之德，諸侯之風，故繫

① 「笙管」，原倒，今據《西河集》改。

之召公。」而此云「有仁賢之風者，屬之《召南》」；有聖人之風者，屬之《周南》者，以周公、召公皆宣布文王之化，《周南》所言皆天子后妃之事，故曰「王者之風」，而周公治內，又聖人也，故又曰「聖人之風」；《召南》所言，皆諸侯、大夫室家之事，故曰「諸侯之風」，而召公治外，布文王之化於諸侯，又賢人也，故又曰「仁賢之風」。王者、諸侯，據所得之詩言；聖人、仁賢，據周、召言；兩說實相成也。云「鄉樂者，風也」至「未聞」者，盛氏世佐云：「案：饗、燕所用詩之差等，天子用《大雅》，諸侯用《小雅》，大夫用《風》，此其宜也。《春秋傳》曰：『《肆夏》、《繁遏》、《渠》，天子所以享元侯也。』《頌》是天子郊廟之樂歌，而享諸侯亦用之者，所謂『禮盛者可以進取』也。燕則升歌《大雅》，合《小雅》。合《小雅》者，^①所謂『禮輕者可以逮下』也。^②傳又曰：『文王』、《大明》、《緜》，兩君相見之樂也，亦謂享禮進取也。燕則升歌《小雅》，合鄉樂。合鄉樂者，亦逮下也。今鄉大夫享士，而升歌、笙間俱用《小雅》，亦進取也。注疏分別未安。敖氏不知《春秋傳》及此經所云皆是享禮進取，因謂諸侯宜歌《大雅》，大夫、士宜歌《小雅》，亦未是也。傳稱穆叔如晉，晉侯饗之，歌《鹿鳴》之三，三拜。饗也，而與燕同樂，諸侯于聘大夫之禮則然。賈疏據此遂謂饗、燕同樂，尤非。

《詩譜》云：天子、諸侯燕羣臣及聘問之賓，皆歌《鹿鳴》，合鄉樂，此則得之。凡笙間之詩皆與升歌同等，^③而諸侯以上又有以樂納賓之禮。^④以樂納賓，則升歌之後，下管乃笙所奏之詩，亦皆與升歌同等。《燕禮》具焉，其他則未之聞也。《仲尼燕居》以升歌《清廟》、下管《象》為兩君相見之樂，蓋記者譌也。《清廟》，祀文王之升歌也。魯以成王之賜得用之周公之廟，已為非禮，而謂大饗其可哉？「工告于樂正曰：『正歌備。』樂正告于賓，乃降。

樂正降者，以正歌備，無事也。降立西階東，北面。【疏】正義曰：敖氏云：「工，其長也。」《釋官》曰：「太師亦通稱工。」《鄉飲酒》太師或來或否不定，故言工，不言太師。賈疏謂大夫禮卑，無太師，非是。《禮記·鄉飲酒義》：「工告樂備。」注云：「工，謂樂正。」以此經工告樂正，樂正告于賓，故兼樂正言之。其實樂正當天子樂師之職，不謂之工也。鄭云：「凡工，瞽矇也。」《周禮》樂師與大司樂聯職，非瞽矇為之，不當稱工。」

- ① 「合小雅」，原脫，今據《儀禮集編》補。
- ② 「謂」，原作「以」，今據《儀禮集編》改。
- ③ 「升」，原作「笙」，今據《儀禮集編》改。
- ④ 下「以」字，原脫，今據《儀禮集編》補。

「正歌備」，^①敖氏云：「正歌，^②謂所歌者皆《風》、《雅》之正也。凡歌以既合樂爲備，故告備于合樂之後焉。惟告「正歌備」者，蓋以己之所有事者而言，故不及乎其他。」^③案：正歌者，以此歌爲樂賓，別於無算樂也，所謂禮樂之正也。敖說非。蔡氏德晉云：「正歌，獻酬正用之歌，異於燕終無算樂是也。」方氏苞云：「觀此，則無算樂不限於間、合之所歌明矣。必於正歌中取之，則不得爲無算，如以疊奏爲無算，則複而厭矣。」「樂正告于賓，乃降」，李氏如圭云：「告于賓者，作樂主爲樂賓。樂正降在笙磬西，^④如其堂上立位。」注云「降立西階東，北面」者，賈疏云：「以其在堂上時在西階之東，北面，知降堂下亦然。在笙磬之西，亦得監堂下之樂，故知位在此也。」

右合樂及告樂備此作樂樂賓是飲酒禮第二段並上段鄭氏以爲禮樂之正是也

主人降席自南方，不由北方，由便。【疏】正義

曰：張氏爾岐云：「此下言旅酬之儀，立司正以監酒，^⑤司正安賓表位，於是賓酬主人，主人酬介，介酬衆賓，衆賓以次相徧焉。」敖氏云：「降席自南方，其義與介同。」側降。

賓、介不從。【疏】正義曰：賈疏云：「側者，特也。賓、介不從，故言側。上文主人降，賓、介皆從降。此獨不從者，以其方燕，禮殺故也。」方氏苞云：「疏說非也。樂以樂賓，故主人爲大師降洗，^⑥賓、介從。遵者爲賓興而至，^⑦故主人迎，賓、介從。若立司正以監酒儀，則主人之事，主人自命之可矣。與賓無與，何爲而從降哉？」作相爲司正，司正禮辭，許諾。主人拜，司正荅拜。作，使也。禮樂之正既成，將畱賓，爲有懈惰，立司正以監之。拜，拜其許。【疏】正義曰：《校勘記》云：「懈，徐本、《集釋》俱作「解」。案：此二字諸本錯出，不悉校。」○賈疏云：「相，即前「一相迎賓門外」者，至此復使爲司正也。」^⑧敖氏云：「主人自作之者，辟君禮也。司正之職，亦主於相

- ① 「正」，原作「已」，今據《續清經解》本改。
- ② 「正歌」，原脫，今據《儀禮集說》補。
- ③ 「他」，原作「地」，今據《續清經解》本改。
- ④ 「笙磬」，原作「賓」，今據《儀禮集釋》改。
- ⑤ 「酒」，原脫，今據《儀禮鄭注句讀》補。
- ⑥ 「爲」，原作「如」，今據《儀禮析疑》改。
- ⑦ 「興」，原作「介」，今據《儀禮析疑》改。
- ⑧ 此引文出自張爾岐《儀禮鄭注句讀》。

爾，乃更其名者，禮異於上，宜新之也。自是以後，禮節凡五，司正皆有事焉。於此立之，亦云留賓之意也。」方氏苞云：「易相爲司正者，前此雖飲酒，而義主於相禮，後此雖行禮，而義主於謹酒，故以董正爲名。」《釋官》曰：「《國語》：晉獻公飲大夫酒，令司正實爵。注：「司正，正賓主之禮者。」其職無常官，飲酒則設之。《鄉飲酒義》：「一人揚觶，乃立司正焉。」注：「立司正以正禮，則禮不失可知。」《鄉飲酒》《鄉射》以主人之相爲司正。《燕禮》射人爲擯，則射人爲司正。大射大射正擯，則大射正爲司正。以其主於正禮，故皆使相禮者爲之。《鄉射》又轉司正爲司馬。」注云

「禮樂之正既成，將留賓。爲有懈惰，立司正以監之」者，如上行獻酬及酢禮暨升堂笙歌間歌合樂，皆禮樂之正者，禮樂之正既成，將留賓行旅酬之禮，恐有懈惰，或愆於儀者，故立司正以監之。《詩·賓之初筵》云：「既立之監，或佐之史。」蓋古人飲酒之法，必立監佐史以察其禮儀也。《戰國策》：淳于髡說齊威王曰：飲酒大王之側，執法在前，御史在後。是此法至戰國時猶行也。主人升，復席。司正洗觶，升自西階，阼階上北面受命于主人。主人曰：「請安于賓。」司正告于賓。賓

禮辭，許。爲賓欲去，留之，告賓於西階。【疏】正義

曰：方氏苞云：「時尚未請安於賓，賓尚未許而預洗觶者，司正之立，本以警怠察儀，以罰其不如法者，故執觶以請於賓。賓既許，即實之自飲，以爲儀法也。」「請安」，蔡氏德晉云：「留賓安坐也。」案：《爾雅·釋詁》曰：「安，止也。」因賓欲去，故止而留之。下文二人舉觶後，請坐於賓，始言坐。此請安，請其止耳。《左傳·襄公七年》：「吾子其少安。」亦謂其少止也。杜注以安爲徐，失之。「賓禮辭」，敖氏云：「蓋以主人有旨酒嘉穀，己已受賜爲辭也。執觶、①受命、贊辭，變於君。」焦氏以恕云：「敖氏說據《燕禮》：司正洗角觶，坐奠於中庭，升，東楹之東受命，西階上北面命卿大夫，司正降自西階，南面坐取觶，升酌散，降，南面坐奠觶，右還，北面少立云云。此司正洗觶，升受命於主人，以主人之命告於賓，不言奠觶，乃傳告，與《燕禮》異。又階間北面坐奠觶，不南面奠觶，亦變於君也。」司正告于主人。主人阼階上再拜，賓西階上荅拜。司正立于楹間以相拜，皆揖，復席。再拜，拜賓許

①「觶」，原作「摯」，今據《儀禮集說》改。

也。司正既以賓許告主人，遂立楹間以相拜。賓、主人既拜，揖，就席。【疏】正義曰：方氏苞云：「敖氏謂凡相拜皆有相之者，^①說似未安。立於楹間，則所相惟賓、介。主人之拜於衆賓曰相旅，^②則呼受酬者而進之，不相其拜之辭也。」褚氏寅亮云：「楹間，東西節也。其南，則近堂廉，北面立而相。」

右司正安賓

司正實觶，降自西階，階間北面坐奠觶；退共，少立。階間北面，東西節也。其南北當中

庭。共，拱手也。少立，自正，慎其位也。己帥而正，孰敢不正？《燕禮》曰：右還北面。【疏】正義曰：郝氏云：「介不得自實觶，司正得自實觶者，介不敢同於賓，而司正不妨同於主：司正得專罰也。」李氏如圭云：「奠觶者，以顯其事表其位也。」敖氏云：「奠觶不拜者，獨行禮則不象受觶之儀也。不南面奠觶，亦變於君禮。退而少立，以其位在是也。燕與大射，則其位少進，亦異者也。」注云「階間，北面東西節也。其南北當中庭也」者，敖氏云：「階間東西節亦所謂中庭也。」方氏苞云：「《燕》與《大射》奉君命以糾

儀法，故司正奠觶皆南面。《鄉飲》、《鄉射》以屬吏共事於長官之前，故皆北面也。」云「共，拱手也。少立，自正，慎其位也」者，賈疏云：「欲令賓主亦皆正慎其位也。」案：退而拱手，與賓主為禮也。少立自正其位，而令賓主共慎其位也。故下引《論語》以證。又引《燕禮》者，張氏爾岐云：「右還北面，謂降自西階，至中庭時右還就位。」坐取觶，

不祭，遂飲，卒觶興，坐奠觶，遂拜；執觶興，洗，北面坐奠觶于其所，退立于觶南。洗觶，

奠之，示潔敬。立於其南，以察衆。【疏】正義曰：賈疏云：「《鄉射》、《大射禮》皆直云「卒觶洗」，不云「盥」，此俗本有「盥」者，誤。」張氏爾岐云：「案：唐石經有此字。」^④盛氏世佐云：唐石經有「盥」，即賈氏所謂俗本也。監本無之，蓋從朱子《通解》本刪。秦氏蕙田云：吳澄《三禮考注》亦承唐石經之誤。《校勘記》云：「興」下，徐本、《集釋》、楊氏俱有「盥」字，唐石經「盥」字擠入，《通解》無。案：張

①「者」，原作「在」，今據《續清經解》本改。
②「衆賓曰」，原作「賓之」，今據《儀禮析疑》改。
③「辭」，原作「拜」，今據《儀禮析疑》改。
④「唐」，原脫，今據《儀禮鄭注句讀》補。

氏據疏去「盥」字，《通解》用張氏之說，而今本又依《通解》。然《士昏禮》疏云「凡洗爵者必先盥」，則「盥」字不去亦可。」○敖氏云：「坐取觶，亦進坐取觶而反坐也。不祭者，變於獻酬也。卒觶拜者，宜謝主人也。酒，主人之物也。主人不荅拜者，不與爲禮，則不敢當也。主人請立司正，而司正乃實觶自飲者，所以爲識，又欲因以虛觶識其位也。」^①洗觶奠之，不敢苟也。」方氏苞云：「自此以後，司正、賓、主人皆不祭。蓋主人、賓、介、衆賓畢飲，而以餘酒祭則褻矣。司正先自飲而拜，非爲酒謝也。如謝主人之酒，^②則主人宜荅拜，蓋自退共少立、取觶、卒觶、奠觶、洗觶、卒飲、拜、興、退立，皆以爲受酬者儀法，^③俾既醉而知其秩，故主人義不得荅拜耳。」又云：「莫虛觶於其所，^④雖衆無失儀，此觶終虛而不用也。《鄉射·記》：「射者有過則撻之。」則飲而失儀，罰以觥觥可知矣。《詩》云：「既立之監，或佐之史。」必史書其過，越日而行法，以正日禮殷，無暇及此，又事分彰瘅，不宜相干也。《周禮》：「閭胥掌觥撻罰之事。則鄉之飲射，掌罰者必閭胥。經不言行罰之地與時，必已見於春秋四時所讀之法也。燕、大射掌罰者亦必別見於邦國禮，而今皆無考耳。祭禮獻酬尤繁，而不立司正，以非德性安重而謹於儀者不得與於祭。《詩》所謂「奏假無言，時靡

有爭」是也。^⑤褚氏寅亮云：「未飲前則奠觶而退，共少立；既飲後則奠而拜、拜而洗、洗而奠、奠而復退立，皆一人獨自行禮，慎重其威儀以爲表也。」高氏愈云：「此又司正之導飲也，爲第十二次爵。鄉射之禮自此以後，遂行射禮。」

右司正表位

賓北面坐取俎西之觶，阼階上北面酬主人。主人降席，立于賓東。初起旅酬也。凡旅酬者，少長以齒，終於沃盥者，皆弟長而無遺矣。【疏】正義曰：敖氏云：「俎西，於薦西爲少南，上經惟云奠觶於其所，故此明之。賓于一人所舉之觶亦取而遷之者，以其代主人行禮故也。」注云「初起旅酬也」者，言此以下爲旅酬之初起也。云「凡旅酬者，少長以齒，終於沃盥者，皆弟

- ①「觶」，原作「爵」，今據《儀禮集說》改。
- ②「酒」，原作「禮」，今據《儀禮析疑》改。
- ③「受」，原脫，今據《儀禮析疑》補。
- ④「觶」，原作「爵」，今據《儀禮集說》改。
- ⑤「是」，原脫，今據《儀禮析疑》補。

長而無遺矣」者，《鄉飲酒義》云：「賓酬主人，主人酬介，介酬衆賓，少長以齒，終於沃洗者焉，知其能弟長而無遺矣。」孔穎達《正義》云：「此經據旅酬之時，其「少長以齒，終於沃洗者」，是無算爵之節也。」張氏爾岐云：「注言酬爵之無不徧，實連無算爵而言。下記云：「主人之贊者，西面北上不與，無算爵。然後與。」其實旅酬時尚未及沃洗也。」凌氏《釋例》云：「凡正獻既畢之酒，謂之旅酬。《鄉飲酒禮》合樂後，主人曰：「請安於賓。」司正告於賓。賓禮辭，許。此正獻禮成，^①賓欲去，主人命司正留之，將以旅酬也。又云：「賓北面坐取俎西之觶，阼階上北面酬主人。」賈疏云：「不及獻酒則旅酬，亦不與旅酬，所以酬正獻也。」又云：「鄭君連引無算爵與旅酬而言，終於沃洗，其實此時未及沃洗也。」^②《鄉射禮》射畢，賓北面坐取俎西之觶，興，阼階上北面酬主人。此《鄉飲》、《鄉射》之旅酬也。《燕禮》、《大射》主人獻賓、獻公，酬酢禮成，公取大夫所媵觶酬賓後，賓以旅酬於西階上，則爲賓舉旅行酬禮之初成也。又主人獻卿畢，二大夫再媵觶，公又行一爵，以旅於西階上，如初，則爲卿舉旅行酬禮之再成也。又主人獻大夫畢，升歌後，公又舉奠觶以旅於西階上，^③如初，則爲大夫舉旅行酬禮之三成也。又徹俎安賓後，主人始獻士，獻畢，賓媵觶於公，公坐取賓所

媵觶，興。唯公所賜。受者如初受酬之禮，則爲士舉旅行酬禮之終也。此《燕禮》、《大射》之旅酬也。《燕禮》、《大射》旅酬凡四次，與《鄉飲》、《鄉射》不同，皆行於正獻之後者也。^④《特性禮》賓與兄弟辯獻後，^⑤賓坐取觶，阼階前北面酬長兄弟。^⑥疏云：「此論旅酬之事。」《有司徹》三獻禮成，二人舉觶於尸、侑後，尸遂執觶以興，北面於阼階上酬主人。注：「三獻而禮小成，使二人舉爵，叙殷勤於尸、侑。」疏云：「此論旅酬之事。此祭畢飲酒之旅酬，亦行於正獻之後者也。」疏又謂旅酬後，仍有舉奠加爵等，終備，乃是禮之大成，故云小成也。考《有司徹》無嗣舉奠之文，^⑦《特性》有之，亦在加爵之後，旅酬之前。疏說蓋誤。又案：《禮記·燕義》：「獻君，君舉旅行酬，而後獻卿；卿舉旅行酬，而後獻大夫；大夫舉旅行酬，而後獻士；士舉旅

①「禮」，原脫，今據《禮經釋例》補。

②「實」，原作「賓」，今據《續清經解》本改。

③「上」，原脫，今據《禮經釋例》補。

④「正」，原作「止」，今據《續清經解》本改。

⑤「禮賓」，原倒，今據《禮經釋例》正。

⑥「北面」，原脫，今據《禮經釋例》補。

⑦「舉」，原脫，今據《禮經釋例》補。

行酬，而後獻庶子。」即據《禮經》之儀節言也。考《燕禮》、《大射》主人獻賓後，亦獻公。《燕義》云：「爲君即爲賓」，故上文亦云「君舉旅於賓」也。」賓坐奠觶，遂拜，執觶興，主人荅拜。不祭，立飲，不拜卒觶，不洗，實觶，東南面授主人。賓立飲卒觶，因更酌以鄉主人，將授。【疏】正義曰：凌氏《釋例》云：「凡旅酬皆拜，不祭，立飲。《鄉飲酒》旅酬，賓酬主人，坐奠觶，遂拜，執觶興，主人荅拜。不祭，立飲。主人酬介，介酬衆賓，及衆賓相酬，皆如賓酬主人之禮。《鄉射》旅酬，賓酬主人，主人酬大夫，大夫酬衆賓，及衆賓相酬亦同。《燕禮》：公舉賤爵，爲賓旅酬。賓降，西階下再拜稽首。公命小臣辭，賓升成拜。」公坐奠觶，荅再拜。又云：「賓以旅酬於西階上。」賓大夫之右坐，奠觶，拜，執觶興，大夫荅拜。」又云：「大夫辯受酬，如受賓酬之禮，不祭。」爲卿旅酬，爲大夫旅酬，爲士旅酬，皆如之。《大射》旅酬亦同。《特性禮》：祭畢飲酒，賓酬長兄弟，賓奠觶，拜，長兄弟荅拜。賓立卒觶。經不云祭，是亦不祭也。又云：「長兄弟酬賓，如賓酬兄弟之儀。」《有司徹》：旅酬，尸北面於阼階上酬主人，坐奠爵，拜，主人荅拜。不祭，立飲。又云：「主人以酬侑於西楹

西，坐奠爵，拜，侑荅拜。不祭，立飲。」又云：「乃升長賓，侑酬之，如主人之禮。至於衆賓，遂及兄弟，亦如之。」是旅酬皆拜，不祭，立飲也。至於《燕禮》、《大射》公爲賓旅酬，賓坐祭，立飲者，^②臣與君行禮，且膳酒也。故雖旅酬亦祭。若大夫辯受酬者，則不祭矣。」又云：「凡旅酬，不洗，不拜既爵。《鄉飲酒》旅酬，賓酬主人，不拜。卒觶，不洗。實觶，^③東南面授主人。主人酬介，介酬衆賓，及衆賓相酬，皆如賓酬主人之禮。《鄉射》旅酬，賓酬主人，卒觶，不拜，不洗，實之，進東南面。主人阼階上北面拜，賓少退。主人進受觶，賓主人之西，北面拜送。」^④賓揖，就席。主人以觶適西階上酬大夫。大夫降席，立於主人之西，如賓酬主人之禮。主人揖，就席。若無大夫，則長受酬亦如之。《燕禮》、《大射》公爲賓旅酬，^⑤賓以旅大夫於西階上，立卒觶，不拜。若膳觶也，則降，更觶洗。非膳觶則不洗可知。

- ① 「賓」，原脫，今據《禮經釋例》補。
- ② 「賓」，原脫，今據《禮經釋例》補。
- ③ 「實」，原作「賓」，今據《禮經釋例》改。
- ④ 「拜」，原作「荅」，今據《禮經釋例》改。
- ⑤ 「賓旅」，原倒，今據《禮經釋例》正。

爲卿旅酬，爲大夫旅酬，爲士旅酬，皆如之。《有司徹》旅酬，尸酬主人，主人酬侑，皆云「卒爵，不拜既爵」，不云「洗」。《特性禮》旅酬，賓酬長兄弟，經云「賓立卒觶」，不云「拜既爵」，亦不云「洗」。則皆不洗，不拜既爵可知也。若《燕禮》、《大射》公取大夫所賡爵以酬賓，公卒觶，賓下拜，小臣正辭，賓升，再拜稽首。公坐奠觶，荅拜。此卒觶亦拜者，臣與君行禮，故於卒觶時先拜，然後公乃荅拜也。又云：「易觶，興洗。」此酬賓之觶是膳觶，故易之，不敢襲君之爵也。既易之，^①則必洗，所以示新也。故下經云：「公有命，則不易不洗矣。」《鄉飲酒·記》、《鄉射·記》皆云：「凡旅不洗，不洗者不祭。」方氏苞云：「賓，鄉民之爲士者也，以己所飲觶授鄉大夫而不洗，何也？法之行必自貴者始，而後可以畏民志；禮之行必自貴者始，而後可以感人。度時量事，旅酬以後，必不能以洗爲禮，故不洗而授觶自鄉大夫始，而興教勸學之誠愾乎上下矣。一事之中，禮有相反而適相成者，賓、介相厭以人，主人之贊者不與於酬，禮之兼乎法以辨名分也；有順乎情以通和樂者，拜無不荅，酬皆不洗之類是也。凡此皆聖人運用天理之實也。」

主人阼階上拜，賓少退。主人受觶，賓拜送于主人之西。旅酬同階，禮殺。【疏】正義曰：李氏如

圭云：「《鄉射禮》拜皆北面。」注云「旅酬同階，禮殺」者，以上正酬時不同階，知此同階爲禮殺也。賓揖，復席。酬主人訖。【疏】正義曰：敖氏云：「揖而復席，禮之也。」高氏愈云：「此賓酬主人，爲第十三次爵。計賓所飲，始二爵矣。」

右賓酬主人

主人西階上酬介。介降席自南方，立于主人之西，如賓酬主人之禮。主人揖復席。其酌，實觶西南面授介。自此以下旅酬，酌者亦如之。【疏】正義曰：郝氏云：「主人得賓觶，未飲，西階上酬介。」張氏爾岐云：「主人以所受於賓之觶，往酬介，^②亦先拜介，自飲，實觶授介，拜送於其東。」注云「其酌，實觶西南面授介。自此以下旅酬，酌者亦如之」者，張氏爾岐云：「亦如之者，謂皆西南面授之也。」^③朱子曰：「賓、主、

①「之」，原作「名」，今據《禮經釋例》改。
②「往」，原脫，今據《儀禮鄭注句讀》補。
③「面」，原脫，今據《儀禮鄭注句讀》補。

介相酬，初皆北面，^①但實饌之後、授饌之時，賓、介則東南面授主人，^②主人則西南面授介。已授之後，即授者又還北面之位，賓、介則拜送於主人之西，^③主人則拜送於介之東，皆北面也。故下文受介酬者，亦既受乃還，北面拜送也。」^④高氏愈云：「此主人復酬介爲第十四次爵。計主人所飲，則四爵矣。」

右主人酬介

司正升相旅曰：「某子受酬。」受酬者降

席。旅，序也。於是介酬衆賓，衆賓又以次序相酬。某者，衆賓姓也。同姓，則以伯仲別之；又同，則以且字別之。【疏】正義曰：注「則以其序別之」，《校勘記》云：「其序，徐本作『且字』，與單疏合是也。《集釋》作『某字』，《通解》作『且序』，楊氏、敖氏俱作『其字』，皆非也。」案：毛本疏解注云：「則以某甫，且字，別之也。」作「且字」不誤。○敖氏云：「相旅，謂相旅酬之禮。曰『某子受酬』，即其事也。或言旅，或言酬，互見耳。於賓酬主人，主人酬介，司正不升，惟相之於下耳，尊之也。若有遵者，則先衆賓酬之，既則司正乃升也。」蔡氏德晉云：「賓、介及主人相酬，

司正惟相之於下而不升，尊之也。至介酬衆賓，衆賓又以次相酬，是謂旅酬。司正乃升堂相視旅酬之禮，所以察其失禮者也。曰『某子受酬』，以序呼而進之也。受酬者聞其呼已乃降席，未受者不得越次也。」方氏苞云：「此專呼受酬者，必受之於介無疑也。《鄉射》曰『某酬某子』，或大夫，或賓長，酬者無定，故必目其人。」案：旅酬以次相酬，此禮之定制。《鄉射》：「某酬某子。」上「某」字指酬者，下「某」字指受酬者，則兼酬者、受酬者而并相之。^⑤此第云「某子受酬」，與《鄉射》文互見也。方氏苞以爲受之於介，未必然。又云：「衆賓工笙畢獻主人，以一人而儔數十人之拜，興，^⑥雖強力者亦倦矣。故自介以下，酬爵必遞相致，然後衆賓、有司、弟子可徧，而主人得自息也。後此舉饌皆使人代，非惟禮殺，亦主人之力不能繼耳。」注云「某者，衆賓姓也」者，顧氏炎武云：「《鄉射禮》『某酬某子』注：『某子

①「初」，原脫，今據《儀禮經傳通解》補。

②「介」，原脫，今據《儀禮經傳通解》補。

③「介」，原脫，今據《儀禮經傳通解》補。

④「送」，原作「受」，今據《儀禮經傳通解》改。

⑤「者而並」，原作「而受」，今據《儀禮正義正誤》改。

⑥「興」，原脫，今據《儀禮析疑》補。

者，氏也。」古人男子無稱姓者，從《鄉射》注爲得。如《左傳》叔孫、穆子言叔仲子、子服子之類。「云」同姓，則以伯仲別之；又同，則以且字別之者，段氏《說文注》云：「凡有借之詞皆曰且。經注云『且字』者十有一。《鄉飲酒》注云：『同姓，則以伯仲別之；又同，則以且字別之。』言同姓之中有伯仲同者，則呼某甫也。《少牢禮》注：『伯某之某，且字也。』《士喪禮》『父某甫』注：『某，^①且字也，若言山甫、孔甫。』《士虞禮》『適爾皇祖某甫』注云：『^②某甫，^③且字也，若言尼甫。』又《曲禮》『有天王某甫』注：『某甫，且字也。』《檀弓》：『嗚乎哀哉，尼父』注：『因且字以爲之謚。』《雜記》『陽童某甫』注：『某甫，且字也。』《公羊傳·桓四年》^④『天王使宰渠伯糾來聘』^⑤注：『宰渠伯糾，天子下大夫，繫官氏，名且字。』^⑥古言表德之字謂之且字，可證者如是。蓋古二十而冠，祇云某甫，五十而後以伯仲。某甫者，所以借伯仲也。故鄭注禮之某甫如是，何注《春秋經》之札、卷、糾皆爲且字者，與鄭無不合。」司正退立于序端，東面。辟受酬者，又使其贊上贊下也。始升相，西階西北面。【疏】正義曰：李氏如圭云：「衆賓席在賓西，南面。司正始升，賓命之，故西階西，北面。衆受酬者受自左，故司正退辟之。」盛氏世佐云：堂上者北面作之，惟相、

介酬衆賓則然，其他則司正東面自若也。《鄉射禮》在下者皆升受酬於西階上，司正安得南面作之乎？敖氏謂堂下者南面作之，非也。^⑦褚氏寅亮云：「視西階西爲稍西，^⑧然亦在序端之南，非正立其處。蓋序端在介席西北，非俟事處也。」受酬者自介右，由介東也，尊介使，不失故位。【疏】正義曰：楊氏復云：主人酬介，介立于主人之西，是主人在介右也。及介酬某子，某子受酬，亦在介右。蓋尊介，使不失故位也。敖氏云：「受介酬者獨居介右，^⑨與他受酬者不同，明介尊不與衆賓序也。若尊者受介酬，亦然。自介右，則介當東南面酬之。」盛氏世佐曰：「自介

①「某」下，《說文解字注》有「甫」字。

②「注云」，原脫，今據《說文解字注》補。

③「某甫」，原脫，今據《說文解字注》補。

④「公羊傳」，原作「左傳」，今據《說文解字注》改。

⑤「王」，原作「子」，今據《說文解字注》改。

⑥「名」，原脫，今據《說文解字注》補。

⑦「下」，原作「上」，今據《續清經解》本改。

⑧第二「西」，原脫，今據《儀禮管見》補。

⑨下「介」，《儀禮集說》作「其」。

右，則介之酬衆賓也，當東北面。^①敖氏云東南面，非；注疏謂自主人酬介以下，皆西南面授之，亦不盡然。「衆受酬者受自左，後將受酬者，皆由西變於介也。今文無「衆」、「酬」也。【疏】正義曰：「今文無「衆」、「酬」也，」《校勘記》云：「也，徐本，《集釋》、《通解》俱作「者」，與單疏標目合。案：「衆」字疑當作「受」。○楊氏復云：自介酬某子之後，衆受酬者皆立於酬者之左，亦如賓酬主人立於主人之左。敖氏曰：「受自左，賓黨受酬者之正位也。」郝氏敬云：「受介酬者自介右，尊介在左也。衆人轉相酬，則受酬者在左，酬者尊者如賓也。」張氏爾岐云：「衆賓首一人受介酬，自介右受之，第二人以下，受其前一人酬，皆自其左受之也。授受之法，^②授由其右，受由其左，以尊介，故受由右，^③餘人自如常禮也。」云「今文無「衆」、「酬」也」者，胡氏承珙云：「注「衆」字當作「受」。今文但云「衆受自左」，古文多「受酬者」三字，承上文「受酬者自介右」而言。受酬者，謂衆賓之內爲首者一人。此衆受酬者，則疏謂第二人以下並堂下衆賓是也。文義較明，故鄭氏從古文。」拜、興、飲，皆如賓酬主人之禮。嫌賓以下異也。【疏】正義曰：敖氏云：「亦惟受酬者立於酬者之西，及酬

者既實觶，^④進西南面爲異耳。」盛氏世佐云：「堂上衆賓相酬當西北面，蓋酬者之于受酬者必向其位，^⑤所以通指也。賓酬主人東南面，主人酬介西南面，皆以是。三賓之位，在賓西，南面，則其自相酬，亦必西北面之可知。^⑥惟堂下衆賓，則當西南面酬之耳。受酬者皆北面。」辯，卒受者以觶降，坐奠于筐。辯，辯衆賓之在下者。《鄉射禮》曰：「辯，遂酬在下者，皆升受酬於西階上。」【疏】正義曰：注云「辯，辯衆賓之在下」者，張氏爾岐云：「謂既酬堂上，又及堂下，無不徧也。引《鄉射禮》證此，^⑦與彼同。」案：經文言「辯」，則兼堂下、堂上而言。長賓三人在堂上，介酬長賓，長賓第一人酬第二人，第二人酬第三人，此酬堂上者也。長賓之第三人，又酬堂下之衆賓，衆賓以次而酬

- ① 「也當東」，原脫，今據《儀禮集編》補。
- ② 「授受」上，《儀禮鄭注句讀》有「凡」字。
- ③ 「受」，原作「介」，今據《儀禮鄭注句讀》改。
- ④ 「實」，原作「受」，今據《儀禮集說》改。
- ⑤ 「于」，原作「與」，今據《儀禮集編》改。
- ⑥ 「面」，原作「向」，今據《儀禮集編》改。
- ⑦ 「禮」，原作「記」，今據《儀禮鄭注句讀》改。

及於卒受者，^①經以一「辯」字括之，而互見其義於《鄉射禮》，故注引以爲證。敖氏謂辯，辯衆賓之在上者，其後當言酬在下者之禮，然後及於卒受者，如《鄉射禮》所云是也，經蓋有脫文。其說非也。方氏苞又云：「辯」後不言遂酬在下者，^②與《鄉射禮》異也。鄉大夫，國卿也。以君命興賢能，則參用朝廷之禮。堂下之賓皆賢能之待興於再舉者，故得升堂受酬，而有司執事者不與，以示國之重典非賢能不得與獻酬也。^③若州長習射，黨正正齒位，主人位非甚尊，而其禮爲教法之常，^④其事爲少長貴賤所能習，故獻酬終於沃洗者，以洽衆情，而示禮教之無不徧，亦所以興起之也。若謂與《鄉射禮》同，而文不具，則執事者之受酬與否，乃禮之大閑。宜詳其受酬於此經，而《鄉射》從略，以見其皆同。非若面鄉行由之小節，可以彼此互見而昭然無疑者，以此知賓賢能之禮無遂酬在下者之事也。祭之末，燂、胞、翟、闔皆有畀焉，故主人之贊者無算爵亦得與。」案：《鄉射》注云：「在下，謂賓黨也。」則所謂「辯衆賓之在下者」，謂辯及於堂下之衆賓，非謂辯及於執事者也。執事者無算爵，始得與。《鄉射》言遂酬在下者，亦謂賓黨，非謂執事也。方氏知旅酬之不及執事者，而反謂《鄉飲》、《鄉射》有異，亦未即《鄉射》之法而細繹之也。司正降，復

位。觶南之位。【疏】正義曰：蔡氏德晉云：「旅畢也。」高氏愈云：「此介又以主人之觶酬衆賓，衆賓交錯以辯，各飲一爵，爲十五番爵也。」

右介酬衆賓衆賓旅酬此飲酒禮之第三段

- ①「受」，原脫，今據《儀禮正義正義正誤》補。
 ②「言」，原作「必」，今據《儀禮析疑》改。
 ③「典」，原作「賢能」，今據《儀禮析疑》改。
 ④「教」，原作「禮」，今據《儀禮析疑》改。

儀禮正義卷七 鄭氏注

受業江寧楊大培補

使二人舉觶于賓、介，洗，升，實觶于西階上；皆坐奠觶，遂拜，執觶興。賓、介席末荅拜。皆坐祭，遂飲，卒觶興，坐奠觶，遂拜，執觶興。賓、介席末荅拜。二人亦主人之吏。若有大夫，則舉觶於賓與大夫。《燕禮》曰：「媵爵者立於洗南，西面北上，序進，盥洗。」【疏】正義曰：張氏爾岐云：「此下言無算爵，初使二人舉觶，次徹俎，次坐燕，飲酒之終禮也。」○郝氏敬云：「使，司正以主人意使也。」敖氏云：「亦代主人行事也，至是乃併舉觶者，^①異之也。」方氏苞云：「俎尚未徹而觶先舉，何也？脫屢升堂後，拜、興、受、送之儀皆不可展，故先舉觶於賓、介以行酬，賓、介不飲而奠焉。至無算爵，則仍令二人舉此觶也。凡舉爵而奠

之，必下事更端，使請安。徹俎之後，舉此觶而行之，於事甚順，而必先舉，何也？君子勸禮則不敢緩，^②求安則不敢急，亦三揖而進，三讓而升之義也。鄉飲則舉觶於賓、

介，射則舉觶於賓、大夫，示主人不敢專惠，且遞酬而交錯，主人力不能徧，俾得少自休息焉耳。二人舉觶不於諸公而於介，何也？此禮爲賓、介而舉，諸公雖尊，乃爲觀禮而

來，自不得主舉酬之事。《鄉射》無介，則大夫與賓各舉一觶可矣。俎實則特存臠肫以薦公、大夫，而介薦以脍，又以明貴有常尊之義也。」注云「若有大夫，則舉觶於賓與大

夫」者，賈疏云：「以大夫尊於介故也。」敖氏云：「正言賓、介者，明雖有大夫猶及介。」^③盛氏世佐云：「鄉飲酒禮本以尊賢，^④非爲貴貴。大夫雖尊，不當先介。且《鄉飲義》

云：「坐僎於東北，以輔主人。」則遵者亦有主義焉。^⑤方主人舉觶留賓，豈得舍介而之大夫乎？注非，當以敖說爲

「乃」，原作「仍」，今據《儀禮集說》改。

「勸」，原作「行」，今據《儀禮析疑》改。

「介」下，原衍「後」字，今據《續清經解》本刪。

「本」，原作「專」，今據《儀禮集編》改。

「遵」，原作「尊」，今據《儀禮集編》改。

正。褚氏寅亮云：「大夫雖尊，不得越介而舉觶。《鄉射》無介，故及大夫。」韋氏協夢云：「飲酒主於尊賢，故賓居先，介次之。」^①觀升堂時，賓厭介，介厭大夫，則是大夫下於介矣。經云「舉觶於賓、介」，則既酬賓即當酬介。敖氏得之矣。」案：後賓若有尊者節，經云如賓禮，大夫則如介禮，是公尊而禮如賓，大夫尊於介而禮如介，禮以賓、介爲重，公、大夫皆來觀禮者，故不先賓、介也。敖說較注爲的。引《燕禮》者，賈疏云：「證二人舉觶將洗時，亦以次盥手也。」^②盛氏世佐云：「上一人舉觶洗而不盥，此亦同，避君，禮也。注引《燕禮》，證此舉觶者之位面、序進與彼同耳，非謂盥亦同也。疏誤。」高氏愈云：「此二人復各飲一觶導飲，爲第十六番爵。」^③逆降，洗；升，實觶，皆立于西階上，賓、介皆拜。於席末拜。【疏正義曰：李氏如圭云：「逆降，後升者先降。」郝氏敬云：「先升者後降。」張氏爾岐云：「二人先後之序，與升時相反。」敖氏云：「《鄉射禮》曰：『立於西階上，北面東上。』」郝氏敬云：「立於西階上，爲避賓、介拜也。」皆進，薦西奠之，賓辭，坐取觶以興，介則薦南奠之，介坐受以興，退，皆拜送，降，賓、介奠于其所。賓

言取，介言受，尊卑異文。今文曰「賓受」。【疏正義曰：張氏爾岐云：「此二人所舉之觶，待升坐後，賓、介各舉以酬，^④爲無算爵者，即此二觶。」注云「賓言取，介言受，尊卑異文」者，敖氏云：「經文錯綜以見其同也。介亦辭，文不具耳。《鄉射禮》云「賓與大夫辭」，介宜與彼大夫同也。」方氏苞云：「敖說非也。《鄉飲酒》之所興，羣士也，故凡事不敢與正賓同。若《鄉射》則無介，大夫之重過於賓，無所嫌而並辭，故經特著之。介不辭，所以尊賓也；不舉觶於遵，所以尊介也。」盛氏世佐云：「取、受二字，經往往互用。如上一人舉觶之時，云「賓辭，坐受以興」，而《鄉射禮》則云取，《鄉射禮》二人舉觶之時，云「賓與大夫辭，坐受觶以興」，而此則於賓言取，介言受。蓋取者指其實，而受者原其意也。注因取、受異文，遂生尊卑之解，殊爲牽率。敖氏改之，是也；而謂經有意錯綜以見其同，則亦非也。經所以複言介坐受以興者，正以見介之不辭與賓爲

① 「次」，原作「似」，今據《續清經解》本改。
② 「次」，原作「此」，今據《儀禮注疏》改。
③ 「上」，原脫，今據《儀禮集說》補。
④ 「介」，原作「升」，今據《續清經解》本改。

異，其義初不在此一字也。介何以不辭？^①蓋辭者，辭其

坐奠也。卑於尊者，不敢親授，故有坐奠之儀。賓與大夫尊，嫌以尊者自居，故辭之。介卑，無所嫌，故不辭也。」

案：取、受二字，散文則通，對文則有異。受對授而言，尊卑不相授受，賓雖不敢以尊自居，而奠之者則固以賓為尊也。故經於賓曰取，不以授受言也。介雖亦奠之，而介卑於賓，卑者可相授受，故經於介原其意曰受也。取與受對言，自有尊卑之別。鄭注未可非也。云「今文曰『賓受』」者，胡氏承珙云：「注語似今文『於賓取觶』之文作『賓受』，與介不別尊卑，故從古文。然經『薦西奠之』下，賓辭，然後坐取觶。若今作『賓受，坐取觶以興』，則不辭矣。此經似無由以賓、受二字連文。又案：宋本疏標目但有『賓言』至『異文』，似此節注文止十字。『今文曰賓受』，蓋誤衍歟？」案：此今文上下皆作「坐受」也。^②「今文曰『賓受』」，謂今文賓亦曰受，承上文「賓言取，介言受」言之耳。「曰」、「賓」二字，疑互倒。宋本賈疏標目但有「賓言」至「異文」者，此節疏止釋此十字，未釋「今文曰賓受」五字，故標目無文。胡氏遂疑其誤衍，失之矣。褚氏寅亮云：「此與《少牢》賓、尸二人舉觶儀略相似，但此二觶俱舉，彼尸舉而侑不舉耳。」高氏愈云：「此二人所奠，為第十七番爵，賓、介皆

不飲。」

右二人舉觶

司正升自西階，受命于主人。主人

曰：「請坐于賓。」賓辭以俎。至此盛禮俱成，酒

清肴乾，賓主百拜，強有力者猶倦焉。張而不弛，弛而不

張，非文武之道。請坐者，將以賓燕也。俎者，肴之貴者。

辭之者，不敢以禮殺當貴者。【疏】正義曰：注「強有力猶

倦焉」，校勘記云：「『力』下，徐本、《集釋》、《通解》、楊

氏、敖氏俱有『者』字。」○「請坐於賓」，賈疏云：「自此以上

皆立行禮，人皆勞倦，故請坐於賓。」敖氏云：「坐，謂燕坐

而飲也。」^③「賓辭以俎」，李氏如圭云：「骨體貴而肉賤。

《少儀》曰：飲酒者有折俎不坐。」^④敖氏云：「辭以俎者，^⑤

以俎辭其請坐之命，謂俎在此，不敢坐也。俎，肴之貴者，

①「辭」，原作「拜」，今據《續清經解》本改。

②「今」，原作「經」，今據《儀禮正義正誤》改。

③「燕」，原脫，今據《儀禮集編》補。

④「有」，原作「右」，今據《續清經解》本改。

⑤「以」，原作「其」，今據《儀禮集說》改。

燕坐則禮殺矣。當俎而燕坐，是褻之也。司正於是又反命於主人。」注云「賓主百拜者」，敖氏云：「此用《樂記》文也。亦甚言其拜之多耳，非謂真有百拜也。」云「張而不弛，弛而不張」，①非文武之道者，《雜記》文。云「俎者，肴之貴者。辭之者，不敢以禮殺當貴者」，案：禮盛者設折俎，禮既成而俎仍設者，主人尊賓，不敢以禮殺而略之也。賓辭以俎，不敢自尊，而以殺禮當貴者也。主人請徹俎，賓許。亦司正傳請告之。【疏】正義曰：蔡氏德晉云：

「主人請徹俎，順賓意以安賓也。司正復請於賓，而賓許，順主人意而許其坐也。」敖氏云：「賓鄉者辭以俎，今主人請徹俎而賓許之，是許其坐矣。」司正降，階前命弟子俟徹俎。西階前也。弟子，賓之少者。俎者，主人之吏設之，使子弟俟徹者，明徹俎，賓之義。【疏】正義曰：西階前命之，故知賓弟子。姜氏兆錫云：「以降自西階，決其為賓黨弟子，恐未然。司正凡升降皆西階，一以輔賓，一以監衆，安得以「西階」二字臆揣之邪？」味下文，弟子當是主黨為合。②蓋徹俎是賓一人所命，③而受俎非司正一人所辦，故司正首受俎，主黨弟子輔之，而賓、介若大夫之從者受於外也。④本紀賓、介、大夫之俎皆出授從者，而主俎則

弟子以東，明司正與弟子皆主黨，而從者則賓、大夫之從者可見也。」案：弟子位在西階，故司正降西階前以命之。衆賓位皆在西階，故知弟子為賓之少者。賓、介、大夫之從者不得稱弟子，不得列西階下，故必授諸弟子，弟子始出而授從者。下文主人取俎，⑤還授弟子，介取俎，亦還授弟子，何以明弟子之必為主黨？記賓、介、遵者之俎，受者以降，出授從者。主人之俎以東，謂主人之俎藏於東房，又何得以東決其為主黨弟子？是姜氏亦臆揣之辭也，不如注據經文「降階前」三字決其為賓黨弟子為確。敖氏云：「俟徹俎者，俟尊者徹俎乃受之也。」司正升，立于席端。待事。【疏】正義曰：「席端」，《校勘記》云：「席，唐石經、楊氏、敖氏俱作「序」，徐本、《集釋》、《通解》俱作「席」。《石經考文提要》云：「《鄉射禮》亦云：升，立於序端。」案：

①「張而不弛弛而不張」，原作「弛而不張張而不弛」，今據上文改。

②「為合」，原脫，今據《儀禮經傳》補。

③「賓一人」，原作「命」，今據《儀禮經傳》改。

④「介若」，原脫，今據《儀禮經傳》補。

⑤「主人」，原脫，今據《續清經解》本補。

《疏》內標目云「司正至席端」，^①《疏》云「即升立於席端」，^②皆誤也。然單疏本已如是，則誤久矣，非始於《通解》。今案：毛本《疏》無標目。賓降席，北面。主人降席，阼階上北面。介降席，西階上北面。尊者降席，席東南面。皆立，相須徹俎也。尊者，謂此鄉之人仕至大夫者也。今來助主人樂賓，主人所榮而遵法者也，因以為名。或有無，來不來，用時事耳。今文「遵」為「僕」，或為「全」。^③【疏】正義曰：「尊者降席東南面」，《校勘記》云：「唐石經、徐本、《集釋》、《通解》、楊氏、敖氏俱重「席」字。《石經考文提要》云：「《鄉射禮》：大夫降席，席東南面。大夫即遵者也，亦疊席字。」案：疏云：「遵不北面者，以其尊，故席東南面向主人。」是疏本亦疊「席」字。注云「皆立相須徹俎」者，敖氏云：「主人、介、遵皆近其席而立，俟取俎之節也。」云「遵者，謂此鄉之人仕至大夫者也。今來助主人樂賓，主人所榮而遵灋者也，因以為名。或有無，來不來，用時事耳」者，敖云：「遵者，乃此鄉之人仕至公、卿、^④大夫，主人請之來與此會者也。謂之遵者，以其遵承主人之命而來歟？或曰：遵之為言尊也。大夫尊於士，故以是名之。未知孰是。」案：遵

之為義，《爾雅·釋詁》云：「遵，循也。」《廣雅·釋詁》云：「遵，表也。」《毛詩·酌》傳云：「遵，率也。」是遵為儀表而可率循之義，^④故注以為「主人所榮而遵灋者」也。敖說非。云「今文「遵」為「僕」，或為「全」者，胡氏承珙云：「《禮記·冠義》云：「介，僕，象陰陽也。」注云：「古文《禮》僕皆作遵。」又《少儀》「僕爵」注云：「僕，或作騶。古文《禮》僕作遵。」^⑤古文《禮》者，皆指此《禮經》古文也。鄭於此注云：「主人所榮而遵灋者也。」於《鄉射》注云：「謂之遵者，方以禮樂化民，欲其遵灋之也。」是古文作「遵」者正字，今文假「僕」為之。「僕」或為「全」者，聲近假借。《論語》：「異乎三子者之撰。」鄭注云：「撰，讀為詮。」蕭該《漢書音義》引《字林》：「撰，音詮。」是其例也。」案：《史記·周本紀》：「遵修其緒。」徐廣曰：「遵，一作「選」。」亦遵、僕相通之一證。賓取俎，還授司正，司正以降，

- ①「云」，原脫，今據《儀禮注疏校勘記》補。
- ②「席」，原作「序」，今據《儀禮注疏校勘記》改。
- ③「卿」，原作「鄉」，今據《續清經解》本改。
- ④「而」，原作「尚」，今據《儀禮正義正誤》改。
- ⑤「僕」，原作「俱」，今據《儀禮今古文疏義》改。

賓從之。主人取俎，還授弟子。弟子以降自西階，主人降自阼階。介取俎，還授弟子。弟子以降，介從之。若有諸公、大夫，則使人受俎如賓禮。衆賓皆降。取俎者皆鄉其席，既授弟子，皆降，復初人之位。【疏】正義曰：「則使人受俎」，《校勘記》云：「受，唐石經、《集釋》俱作『授』。」○「賓取俎，還授司正」，敖氏云：「北面取俎，還，南面授司正。必言還者，明就而受之。司正受賓俎者，賓尊，宜異之。」方氏苞云：「惟賓之俎，以授司正，鄉民之秀者可以出而長之，故重其禮以厲羣士也。」韋氏協夢云：「《鄉射》司正以俎出授從者，此亦然。」主人取俎以下，敖氏云：「此取俎與升受俎者，皆以先者既降爲節。取俎不言所鄉，如賓可知。主人之俎乃以降自西階者，辟君禮也。」則使人受俎，敖氏云：「人，亦謂弟子。《鄉射禮》曰：『大夫取俎，還授弟子。』是也。」方氏苞云：「敖說非也。《鄉射》之大夫，不過本州中爵列少尊者，故俎授弟子，與主人同。《鄉飲酒》之遵者，諸公之下尚有諸卿，故使公士受俎，特異其文曰使人，又申之以如賓禮，謂如賓之俎使司正受，乃公士而非弟子也。若使弟子，則一與主人介同，更無所謂如

賓禮者，而經贅設此文，義無所取矣。」注云「取俎者皆鄉其席，既授弟子，皆降，復初人之位」者，張氏爾岐云：「向席取俎，轉身以授人。復初人之位，東階、西階相讓之位也。」敖氏云：「賓降立于西階西；主人降立于阼階東，介在賓南，^①大夫在介南，衆賓又在大夫南，少退。張氏惠言云：「初人，賓無位，介與三賓同，衆賓皆庭中西面。《鄉射禮》云：「賓降立于階西，東面；主人降自阼階，西面立；大夫降，立于賓南；衆賓降，立于大夫之南，少退，北上。彼無介，此有介。介當繼大夫而南。皆于阼階西當序以次而下，則介與三賓不復初人之位也。」凌氏《釋例》云：「凡無算爵必先徹俎、降階。《鄉飲酒禮》：二人舉觶畢，司正升自西階，受命于主人。主人曰：『請坐于賓。』賓辭以俎。主人請徹俎，賓許。司正降階前，命弟子俟徹俎。司正升，立于序端。賓降席，北面。主人降席，阼階上北面。介降席，西階上北面。遵者降席，席東南面。賓取俎，還授司正。司正以降，賓從之。主人取俎，還授弟子。弟子以降自西階，主人降自阼階。介取俎，還授弟子。弟子以降，介從之。若有諸公、大夫，則使人受俎如賓禮。衆賓皆降。」

① 「在」，原作「于」，今據《儀禮集說》改。

《鄉射禮》二人舉觶畢，司正升自西階，阼階上受命于主人，適西階上，北面，請坐于賓。賓辭以俎，反命于主人。主人曰：「請徹俎。」賓許。司正降自西階，階前命弟子俟徹俎。

司正升，立于序端。賓降席，北面。主人降席自南方，阼階上北面。大夫降席，席東南面。賓取俎，還授司正。司正以降自西階，賓從之降，遂立于階西，東面。司正以俎出，^①授從者。主人取俎，還授弟子。弟子受俎，降自西階以東。主人降自阼階，西面立。^②大夫取俎，還授弟子。弟子以降自西階，遂出，授從者。大夫從之降，立于賓南。衆賓皆降，立于大夫之南，少退，北上。此皆徹俎於旅酬之後，無算爵之前者也。《燕禮》：立司正訖，司正升自西階，東楹之東，請徹俎，降，公許。告于賓，賓北面取俎以出。膳宰徹公俎，降自阼階以東，卿大夫皆降，^③東面北上。《大射儀》：射畢，爲大夫舉旅酬訖，司馬正升自西階，東楹之東，北面告于公：「請徹俎。」公許。遂適西階上，北面告于賓。賓北面取俎以出。諸公、卿取俎如賓禮，遂出，授從者于門外。大夫降復位，庶子正徹公俎，降自阼階以東。此皆徹俎於爲大夫旅酬之後，獻士之前者也。獻士、獻庶子禮殺，故在徹俎後，與無算爵同矣。至於《特牲禮》宗人告祭，乃羞，在旅酬之前。《有司徹》：乃羞庶羞于賓兄弟、

內賓及私人，在旅酬之後。則祭畢飲酒之禮，不同於飲酒之正禮也。」

右徹俎

說屨，揖讓如初，升坐。說屨者，爲安燕當坐

也。必說於下者，屨賤，不空居堂。說屨，主人先左，賓先

右。今文「說」爲「稅」。【疏】正義曰：「揖讓如初，升坐」，

敖氏云：「謂主人與賓一揖一讓也。賓則厭介，介厭大夫，

大夫厭衆賓，亦以次而升。」郝氏敬云：「揖讓如初，升，謂三

揖三讓，如初迎賓時也。坐，主賓皆坐席上，跪而以股帖足

也。盛氏世佐云：「揖讓如初，當如敖說。」○注「不空居

堂」，《校勘記》云：「空，楊本作『宜』。」云「說屨者，爲安

燕當坐也。必說於下者，屨賤不空居堂」者，李氏如圭云：

「《少儀》曰：『堂上無跣，燕則有之。』」敖氏云：「說屨者各

於其階側北面。坐於堂而說屨於上者，惟尊長則然。此

賓、主人其尊相敵，故皆說於下。賓黨之屨亦北上也。」方

①「出」，原脫，今據《禮經釋例》補。

②「面」，原脫，今據《禮經釋例》補。

③「卿」，原脫，今據《禮經釋例》補。

氏苞云：「《燕》、《大射》但言賓、諸公、卿、大夫說屨，升，則君說於堂上明矣。」^①排闥，說屨於戶內，惟長者一人。卿、大夫、爵、齒並尊，以興賢能，與賓同說屨於階下，蓋降爵、齒以明尚德之義也。」云「說屨，主人先左，賓先右」者，敖氏云：「謂賓在主人之左，故主人先說左屨，主人在賓之右，故賓先說右屨。是亦鄭氏以意言之耳。」今文「說」爲「稅」，詳見《士昏禮》「說服」下。吳氏廷華云：「如初者，如上獻訖升堂也。」乃羞。羞，進也。所進者，狗戴醢也。鄉設骨體，所以致敬也。今進羞，所以盡愛也。敬之愛之，所以厚賢也。【疏】正義曰：注「鄉設骨體」，《校勘記》云：「《釋文》云：『鄉，本又作羴，②同。』《通典》作『享』。」云「羞，進也。所進者，狗戴醢也」者，李氏如圭云：「戴，切肉也。薦羞不踰牲，③此牲狗，則羞者狗戴也。醢則雜餘性兼作之。」敖氏云：「羞者，羞庶羞於凡有薦者也。此時衆賓亦當祭薦，文不具耳。注云：『所進者，狗戴醢也。』」^④《少牢》、《特性》之庶羞皆以其牲肉爲戴，又有醢，故知此禮當放之也。」凌氏《釋例》云：「凡無算爵皆說屨，升坐，乃羞。《鄉飲酒禮》：將行無算爵，主人請坐於賓，賓辭以俎。至徹俎畢，說屨，揖讓如初，升坐，乃羞，無算爵，無算樂。是無算爵皆說屨，升坐，乃羞也。《鄉射禮》徹俎畢，主人以

賓揖讓，說屨，乃升。大夫及衆賓皆說屨，升坐，乃羞。與《鄉飲酒》同。《燕禮》：徹俎畢，賓反入，及卿、大夫皆說屨，升，就席。公以賓及卿、大夫皆坐，乃安。羞庶羞。大夫祭薦，司正升受命，皆命。君曰：「無不醉。」賓及卿、大夫皆興，對曰：「諾，敢不醉！」皆反坐。《大射禮》：徹俎畢，賓、諸公、卿皆入門，東面北上。司正升賓。賓、諸公、卿、大夫皆說屨，升就席。公以賓及卿、大夫皆坐，乃安。羞庶羞。大夫祭薦。司正升受命，皆命。公曰：「衆無不醉。」賓及諸公、卿、大夫皆興，對曰：「諾，敢不醉！」皆反位坐。是《燕》、《大射》無算爵，說屨，升坐，乃羞，亦與《鄉飲酒》、《鄉射》同。惟《鄉飲酒》、《鄉射》升坐後即行無算爵，《燕禮》、《大射》升坐後先獻士，始行無算爵爲異耳。又《鄉射》疏云：「尊卑在室，則尊者說屨在戶內，^⑤其餘說屨於戶外。若尊卑在堂，則亦尊者一人說屨在堂，其餘說屨於

①「堂」，原脫，今據《儀禮析疑》補。

②「又」，原脫，今據《儀禮注疏校勘記》補。

③「羞」，原作「差」，今據《儀禮集釋》改。

④「醢」，原作「羹」，今據《儀禮集說》改。

⑤「戶內」，原作「室」，今據《禮經釋例》改。

堂下。是以《燕禮》、《大射》臣皆脫屣於階下。公不見說屣之文，明公烏在堂矣。」亦與《鄉飲酒》、《鄉射》異也。至於《特牲禮》無算爵，本於階下行之，故無說屣、升坐之文。祭畢飲酒，禮殺故也。不云「乃羞」者，前旅酬時已羞也。《有司徹》饋尸之禮，無算爵，雖行於堂上，^①然亦祭畢飲酒，故不云說屣、升坐，但於是時羞庶羞而已。其於《特牲》無算爵，雖有堂上、堂下之分，而其為禮殺則一也。不饋尸之禮，羞庶羞在賓自酢後，亦與《特牲禮》異也。」無算爵。

筭，數也。賓主燕飲，爵行無數，醉而止也。《鄉射禮》曰：「使二人舉觶於賓與大夫。」又曰：「執觶者洗，升實觶，反奠於賓與大夫。」皆是。【疏】正義曰：《校勘記》云：「算，

唐石經、徐、監皆作「筭」，下同。案：此二字諸本錯出，後不悉校。」^②注「使主人舉觶於賓」，徐、監、葛本、《集釋》、

《通解》俱作「二」，楊氏作「一」。○李氏如圭云：「晁二人所舉觶者，至此二觶並行，交錯以酬，辯旅在下者，主人之贊者亦與焉。復實二觶，反奠之，其爵無算。」楊氏復曰：

「《鄉飲酒》無算爵，其文略。案：《鄉射》無算爵，賓與大夫不興，取奠觶，飲卒觶，不拜，執觶者受觶，遂實之，賓觶以之主人、大夫之觶，衆賓長受而錯，皆不拜。注：「錯者，實主人之觶以之次賓，^③實賓長之觶以之次大夫。」此《鄉飲

酒禮》亦同，但《鄉射》有賓無介，《鄉飲酒》有賓有介，當實賓之觶以之主人，實大夫之觶以之介，及其交錯而行也，當實主人之觶以之衆賓長，實介之觶以之次大夫，又實衆賓長之觶以之第三次大夫，實次大夫之觶以之第二次次賓長，如此交錯以辯。卒受者興，以旅在下者於西階上。

及其辯也，執觶者洗，升實觶，反奠於賓與大夫，所以復奠之者，燕以飲酒為歡，醉乃止。此所以為無算爵也。」敖氏云：「無算爵者，行其奠觶，終而復始，無定數也。此異於《鄉射》者，舉觶及反奠者，不於大夫而於介耳。其實觶亦以之主人，介觶則以之大夫，其餘皆可以類推之也。」程氏易田云：「注引《鄉射禮》，乃約初使二人舉觶於賓與大夫之文，非引無算爵時使二人舉觶之文。彼經無算爵下則曰：使二人舉觶，賓與大夫不興，取觶飲，卒觶不拜，執觶者受觶，遂實之，賓觶以之主人，大夫之觶長受而錯，不拜。此經無算爵時，亦當略同。亦使二人舉觶，賓與介亦取前

①「雖」，原作「惟」，今據《禮經釋例》改。下「雖有堂上」之「雖」同。

②「校」，原作「據」，今據《儀禮注疏校勘記》改。

③「實」，原作「賓」，今據《續清經解》本改。

薦西、薦南受而奠於其所之二觶，飲卒觶，執觶者亦受觶，遂賓之，賓觶以之主人，介觶，衆賓之長受而錯也。如此，則賓、介奠於其所之觶，至是起而行之矣。」秦氏蕙田云：

「鄉射」無介，故以賓與大夫爲尊。《鄉飲酒》有介，當以賓與介爲尊。《鄉飲酒義》每以賓、主、介、僕相提並論，則無算爵自宜從賓、介始，由賓而之主人，由介而之大夫，如敖氏之說爲是。楊氏尚沿舊注之誤耳。」盛氏世佐云：「《鄉射禮》無介，故云「賓與大夫不興，取奠觶飲」；此篇有賓有介，上既言使二人舉觶於賓、介，則此時取奠觶而飲者，亦當爲賓與介矣。其行酒之法，敖說是也。及其交錯而行也，當實主人之觶以之衆賓長，實大夫之觶以之次賓長，又實衆賓長之觶以之次大夫，實次賓長之觶以之第三次大夫，循是而辯，此堂上旅酬之法也。其旅在下者於西階上之法，詳見下篇。楊氏惑於鄭注「若有大夫則舉觶於賓與大夫」之說，故持論如此。」凌氏《釋例》云：「凡旅酬既畢之酒，謂之無算爵。《鄉飲酒禮》旅酬畢，使二人舉觶，徹俎，說屨，揖讓如初，升坐，乃羞，無算爵。《鄉射禮》旅酬畢，使二人舉觶，徹俎。主人以賓揖讓，說屨，乃升。大夫及衆賓皆說屨，升坐，乃羞，無算爵。《燕禮》主人獻庶子後，無算爵。注：「筭，數也。爵行無次無數，惟意所勸，醉而止。」

疏云：「此對四舉旅以前皆有次有數，①此則無次無數也。」《大射儀》同。此燕飲正禮之無算爵者也。《特牲禮》旅酬畢，賓弟子及兄弟弟子舉觶後，②爵皆無算。注：「賓取觶酬兄弟之黨，長兄弟取觶酬賓之黨，惟己所欲，亦交錯以辯，無次第之數。因今接會，使之交恩定好，優勸之。」《有司徹》旅酬畢，兄弟後生舉觶，至賓一人舉爵於尸後，賓及兄弟交錯其酬，③皆遂及私人，爵無算。又不償尸之禮，次賓加爵後，賓、兄弟交錯其酬，無算爵。注：「此亦與償同者，在此篇。」此祭畢飲酒之無算爵也。皆行於旅酬之後者。《鄉飲酒·記》：「主人之贊者西面北上，不與。無算爵，然後與。」謂贊者不及獻酒，故不與旅酬，至無算爵乃得與也。《禮記·鄉飲酒義》：「降、說屨、升坐，脩爵無數。飲酒之節，朝不廢朝，莫不廢夕。賓出，主人拜送節，文終遂焉。」鄭注：「終遂，猶克備也。」④孔氏《正義》曰：「降、說屨、升坐者，此謂無算爵之初也，以前皆立而行禮。」又云：

- ①「對」，原作「時」，今據《禮經釋例》改。
- ②「後」，原脫，今據《禮經釋例》補。
- ③「其」，原作「以」，今據《禮經釋例》改。
- ④「克」，據《禮記正義》當爲「充」。

「脩爵無數者，謂無算爵也。熊氏云：『謂爵行無數矣。』然則飲酒之禮至無算爵乃備，可知矣。」無算樂。燕樂亦無數，或間或合，盡歡而止也。《春秋·襄二十九年》：「吳公子札來聘，請觀於周樂。」此國君之無算。【疏】正義曰：敖氏云：「爵行則奏樂，爵止則樂闋，故爵無算而樂亦無算也。」郝氏敬云：「向者獻酬有節，歌笙間合，皆三終。燕樂無算，不拘於三也。」方氏苞云：「舊說仍用前歌與間，但疊用數篇，周而復始，亦比於慢矣。疑若《春秋傳》所載，賓各賦詩，工以瑟與笙應之，其不歌者亦聽，以無定數，故謂之無算耳。以不出大師所陳十五國之風，故曰鄉樂。」案：諸家言無算樂，皆與注異。考注云「或間或合，盡歡而止」，蓋謂奏樂不定依獻酬之節，或用間歌，或用合樂，無一定之數。主賓盡歡爵止，而樂始止也。敖氏說可與注相發明。引《春秋傳》，盛氏世佐謂：「《左傳》載季札觀周樂之事，乃魯因札之請而備陳之。《聘禮》云「歸大禮之日，既受饗餼請觀」，^①是也，非國君之無算也。注引之，誤。」

右坐燕此飲酒第四段飲禮始畢

賓出，奏《陔》。《陔》，《陔夏》也。陔之言戒也。

終日燕飲，酒罷，以《陔》爲節，明無失禮也。《周禮·鍾師》：「以鍾鼓奏《九夏》。」是奏《陔夏》則有鐘鼓矣。鐘鼓者，天子、諸侯備用之，大夫、士鼓而已。蓋建於阼階之西，南鼓。《鄉射禮》曰：賓興，樂正命奏《陔》。賓降及階，《陔》作。賓出，衆賓皆出。【疏】正義曰：注云《陔》，《陔夏》也。陔之言戒也者，李氏如圭云：「《詩》亡篇六，序皆以篇名釋其義。《南陔》曰「孝子相戒以養」，與注「陔之言戒」義合。」案：《周禮·鍾師》「械夏」杜子春云：「械，讀爲陔鼓之陔。」《說文》曰：「宗廟奏《械》樂。」是《陔》即《械夏》。「賓醉而出，奏《械夏》。」是械之義取於戒。注通陔於械，故曰「陔之言戒也」。李氏似以《南陔》當此經之《陔》，未知所據。敖氏云：「《陔夏》，有聲無辭之樂，金奏之一者也，其名義未詳。」盛氏世佐云：「《周禮·鍾師》注云：「九夏，皆《詩》篇名，《頌》之族類也。此歌之大者，載在樂章，樂崩亦從而亡，是以《頌》不能具。」則《陔》亦《頌》之逸篇歟？然以大夫而送賓之樂儼然與天子同，何其無差等也？《鍾師》「《陔夏》之「陔」本作「械」，而此篇及《鄉射》、《燕禮》皆言奏《陔》，而不言夏，然則《陔》之與《械夏》同

① 「既」，原作「即」，今據《儀禮集編》改。

乎？否乎？今皆不可得而考矣。竊謂夏，大聲也，列之於《頌》，^①必非諸侯以下之所得干。諸侯、大夫所奏，蓋別爲一詩，而今亦亡之也。或以音節爲別，如《豳詩·七月》一篇而有《風》、《雅》、《頌》之異歟？《樂師》鄭司農注云：今時行禮於太學，^②罷出，以鼓《陔》爲節。則《陔》之音節至漢猶有存者。康成乃與《鍾師》之《祓夏》混而一之，至令天子、^③諸侯、大夫之樂尊卑莫辯，其誤甚矣。疏家乃爲之說曰：天子則九夏俱作，諸侯則不用三夏，得奏其《肆夏》以下。大夫以下據此用《陔夏》^④，以是爲尊卑不同。不知諸侯進取，僅得歌《大雅》；大夫進取，僅得歌《小雅》，未聞有歌《頌》者。魯之有《頌》，相傳以爲成王所賜，議者猶以爲僭。三家《雍》、《徹》，夫子譏之。彼金奏《肆夏》之三，諸侯之僭禮也。甯得以爲正而據之乎？「案：九夏之用，《周禮注》杜子春分析甚明。《陔》蓋宗廟中上下通得用之，故《說文》亦統云：宗廟奏《祓》樂。漢時大學罷出，猶以鼓《陔》爲節，其所奏若何？鄭君去司農未遠，豈不知之？特其詞既亡，僅傳其節耳。至呂叔玉以《肆夏》、《樊遏》、《渠》附合詩篇，則未敢以爲信也。主人送于門外，再拜。門東，西面拜也。賓、介不荅拜，禮有終也。【疏】正義曰：敖氏云：「再拜，送賓也。不拜送介，殺於初。」方氏苞云：

「主人禮先於賓者，十有三，其大節六。賓許，出迎，拜至，崇酒，立司正，拜送。皆再拜。一拜者，唯獻酬耳。賓之禮先於主人者十有二，皆一拜。蓋鄉大夫興賢能，^⑤士當以道自重，不敢重拜，疑喜於得舉而翕翕相附也。周公制禮，教士以難進易退，而公卿爲國求賢，致敬盡禮以相勗厲者，可謂切著矣。」又曰：「戒速，賓、介禮同，至拜送，則介不與焉，以是知賢能之書所獻惟賓也。蓋介乃德行道藝次於賓而可備後舉者，故戒、速壹與賓同，所以異之於羣士也，而登於天府者惟賓。至於後舉，則羣士之德行道藝，或有先於介者矣。故禮終惟賓得拜送，而介與衆賓不與。又所以儕之羣士，俾介與羣士，皆有所觀感而興起也。」《鄉射》賓出，衆賓皆出，主人拜送於門外。蓋習射乃有司之學政，^⑥凡在列者皆宜加禮，不可以分差等。此則送賓而不及介，以賓乃所興之賢能，而介仍鄉之學士也。敖氏乃謂此士、大夫私

①「列」，原作「別」，今據《儀禮集編》改。

②「行禮」，原倒，今據《儀禮集編》正。

③「令」，原作「今」，今據《禮經釋例》改。

④「夏」，原作「南」，今據《續清經解》本改。

⑤「興」，原作「賓」，今據《儀禮析疑》改。

⑥「習」，原脫，今據《儀禮析疑》補。

飲於學中之禮，固哉！」案：禮爲賓而設，介與衆賓所以輔賓也。禮之初，主人速賓及介，至於門外，主人拜賓及介。至於獻酬，而介禮少殺。燕畢而出，飲禮既成，而賓賢之禮備矣。經特言賓出，主人送於門外，再拜，不言介、衆賓，見此禮專以爲賓，所以重賓而略於介及衆賓也。《鄉飲酒義》云：「賓出，主人拜送節，文終遂焉。」亦不言介也。

右 賓 出

賓若有遵者，諸公、大夫則既一人舉觶，乃入。不干主人正禮也。遵者，諸公、大夫也。謂

之賓者，同從外來耳。大國有孤，四命謂之公。【疏】正義曰：張氏爾岐云：「此下言諸公、大夫來助主人樂賓，主人與爲禮之儀。遵不必至，故曰『若有』。」李氏如圭云：「賓主獻酬爲正禮，遵者無常，或來或否，故於此乃言之。」敖氏云：「此謂遵者先俟於門外，以一人既舉觶爲人之節。息司正之禮云：以告於先生君子。然則主人於遵者，其亦使人告之歟？」①公、大夫若皆來，則同時入，其人之節在一人舉觶之後，衆工未入之前。乃於是言之者，以其或有或無，或來或否，不定故也。」○《校勘記》云：「注『干』，徐本

作「于」，誤。」云「遵者，諸公、大夫也。大國有孤，四命

謂之公」者，《釋官》曰：「案：大國孤只一人，而《鄉飲》、

《鄉射》、《燕禮》、《大射儀》言「諸公」，②鄭氏謂：「言諸者，

容牧下有三監。」後儒以三監是殷法，③多疑其說，於是有

謂「諸」者不定之辭，有謂「諸」者統公卿大夫而言，④有謂

「諸公」兼寄公言之，有謂兼致仕者言之，紛紛不一。今

案：經文言「若有」，已是不定，則「諸」不得更爲不定辭。

下云：「無諸公，則大夫辭加席。」《燕禮》、《大射》皆云：

「若有諸公，先卿獻之。」則「諸」自專屬公而言，亦不統卿、

大夫也。《禮》云：「諸侯不臣寄公。」《大射》：「公命徹幕，賓

及諸公、卿、大夫皆降拜。言降拜，則亦在臣列，非寄公矣。

至致仕之說，在此篇未嘗不可通，但大射是將祭擇士之射，

皆就在位者言之，不得有致仕者，故惟鄭義爲允耳。⑤又

案：此經稱公者有二：一爲五等之國，其君皆曰公，《公食

①「人」，原作「之」，今據《儀禮集說》改。

②「儀」，《儀禮釋官》作「皆」。

③「以」，原作「謂」，今據《儀禮釋官》改。

④「者」，原作「公」，今據《儀禮釋官》改。

⑤「義」，原作「意」，今據《儀禮釋官》改。

大夫禮》及《燕禮》、《大射儀》、《聘禮》所言「公」者是也；一爲大國之孤稱公，此篇及《鄉射禮》、《燕禮》、《大射儀》、《士喪禮》言「諸公」、「公、卿、大夫」是也。天子有三孤，副三公，大國無公，惟有孤，故孤亦號爲公。又：凡臣尊其君皆曰公。《左傳》

鄭伯有之臣曰：「吾公在壑谷。」伯有卿，亦稱公。是也。春秋時，楚之縣大夫皆僭號稱公，是僭五等之公，比於諸侯，非公、卿之公也。」

案：楚之縣大夫稱公者，疑亦公卿之公，故齊之大夫未嘗僭諸侯之稱，而棠公亦稱公矣。是春秋及食邑之大夫皆得通稱公者也。席于賓東，公三重，大夫再重。席

此二者於賓東，尊之，不與鄉人齒也。天子之國，三命者不齒；於諸侯之國，爵爲大夫，則不齒矣。不言尊者，尊者亦卿、大夫。【疏】正義曰：敖氏云：「三重、再重，皆蒲席、緇布純者也。上下之席同物，故不必言加。」^①此重席亦兼卷而設之。○注「爵爲大夫」，《校勘記》云：「爵，監本誤作『爲』。」二云「席此二者於賓東」者，李氏如圭云：「賓在戶牖間，尊在戶東，席尊者又於尊東。」^②曰賓東者，繼賓而言耳。其席南面西上，統於尊。「張氏爾岐云：『賓在戶牖之間，酒尊在房戶之間，正在賓東，不容置席，則席尊者當又在其東，但繼賓而言耳，其實在酒尊東也。』」盛氏世佐云：「席於賓東者，東房戶牖之間也。尊者爲助主人樂賢而

來，^③故席之於此。《鄉飲酒義》云：「坐僎於東北，以輔主人。」是也。「云「尊之，不與鄉人齒也」者，李氏如圭云：「士來觀禮者，齒於堂下，《鄉飲酒》之禮所尚三：謀賓、介、尚德也；旅酬以齒，尚年也；大夫重席，坐於賓東，尚爵也。三者，天下之達尊也。又案：《周官·黨正職》云國索鬼神而祭祀，則以禮屬民而飲酒於序，以正齒位，一命齒於鄉里，再命齒於父族，三命而不齒。《鄉飲酒義》又曰：『鄉飲酒之禮，六十者坐，五十者立侍，以聽政役，所以明尊長也。六十者三豆，七十者四豆，八十者五豆，九十者六豆，所以明養老也。』此蓋黨正飲酒、正齒位之法。」^④敖氏云：「席此於賓東，尊之，不與正賓齒，亦不加尊於正賓也。」^⑤貴

貴，尊賢，尚齒三者之義並行而不悖，^⑥於斯見之矣。」盛氏世佐云：「注云「尊之，不與鄉人齒」，是解經不於賓西之故，義在貴貴，存之以備一解，於經義未必合也。又注所謂

①「加」，原作「如」，今據《續清經解》本及《儀禮集說》改。

②「席」，原脫，今據《儀禮集釋》補。

③「遵」下，原衍「北」字，今據《儀禮集編》刪。

④「法」，《儀禮集編》作「禮」。

⑤「尊」，原作「貴」，今據《儀禮集說》改。

⑥「貴」上，原衍「又」字，今據《儀禮集說》刪。

「鄉人」者，堂上三賓耳。敖氏以爲不與正賓齒，^①尤非。三賓德劣，以年之長幼爲序，故云不與之齒，正賓曷嘗論齒哉？「案：鄉飲酒禮專爲賓賢，旅酬以齒，席遵於賓東，皆因禮之自然，而意不在乎此也。諸家多以此禮兼爵、齒言，非是。注「尊之，不與鄉人齒」，謂諸公、大夫尊於衆賓，故不與並列，非以此爲貴貴之義也。盛氏說亦泥。張氏爾岐云：「不與鄉人齒者，衆賓之席繼賓而西，^②是與相齒。」此特爲位於酒尊東，不在衆人行列中，故云「不與齒」也。」說最合。吳氏廷華云：「此鄉飲酒爲賓賢而設，則賓爲專尊，非他人所可越。特因觀禮之卿、大夫，其位本尊，故爲尊東之席以存尊之意，然不席於戶牖之間，則視尊賓之禮又有間矣。蓋遵來觀禮，與賓、介、衆賓本自不同，不與鄉人齒者，固不可混之賓、介、衆賓之中，即與鄉人齒者，亦何嘗不置之賓、介、衆賓之外？要之，賓賢之禮與尚齒之禮本自不同。注謂「不與鄉人齒」，其說本合疏引《黨正》及《文王世子》之文，說固非舛，但與此經賓賢之意不相符耳。」公如大夫入，主人降，賓、介降，衆賓皆降，復初位。主人迎，揖讓升。公升如賓禮，辭一席，使一人去之。如，讀若今之若。主人迎之於

門內也。辭一席，謙自同於大夫。【疏】正義曰：敖氏云：「入，謂入門左也。復初位，階西以南之位。」待公入也。盛氏世佐云：「疏云：『復西階下東面位。』是也。蓋亦介在賓南，衆賓在介南矣。」案：經上云「入」，謂入門也；下云「迎」，謂迎於門內也。此復位自爲階下之位，主人降阼階，階位在東，賓、介、衆賓降西階，位在西。敖氏云：「迎不拜者，別於賓、介，亦以其在門內也。迎於門內而拜，降等者之禮也。公於主人爲踰等，乃後升者，非正賓也。升階正法，客尊則先升。」方氏苞云：「遵者宜先次於門外，一人舉觶，相者使人告，而公、大夫遂入。主人乃降而迎，迎而不拜，以遵有主道也。必要其節者，使早入，則主人之禮不得專於賓、介，故人於一人舉觶之後，示衆賓之酬爵既莫，禮之連而不相及，此類是也。」張氏惠言云：「《鄉射禮》云：『賓及衆賓皆降，復初位。』注云：『初位，門內東面。』疏云：入門左東面北上位。案：門左地狹，不足容賓及衆賓。門內東面，蓋衆賓立者之位也。賓初無位，在介北可也。」張氏爾岐云：「如賓禮者，謂拜至、獻爵、酢爵也。」

① 「不與」，原脫，今據《儀禮集編》補。

② 「賓」，原脫，今據《儀禮鄭注句讀》補。

注云「如，讀若今之若」者，朱子云：「此但謂如字讀之如今人所用之若耳。」張氏爾岐云：「公若大夫，言或公人，或大夫，其降迎皆如下文所云也。」韋氏協夢云：「如，若，同不定之辭也。公與大夫或來或不來，或皆來或不皆來，未可定也。」蔡氏德晉云：「如，猶及也。」此「公如大夫」之「如」，與《媒氏》「若無故而不用命者」之「若」同，皆訓爲及。《惠氏棟》《古義》曰：「《周禮·旅師》：『而用之以質劑致民。』」注云：「而，讀爲若，聲之誤也。」案：古而與如通用。如，猶若也，故如、而或讀爲若。鄭以爲聲之誤，則古讀而如若也。《胡氏承珙》云：「如，若一聲之轉，故二字義本相通。但如與若有訓爲相似者，如此、若此之類。《有司徹》若是以辯，^①今文「若」爲「如」，是也。有訓爲相及者。《論語》「宗廟之事如會同」，謂宗廟及會同。『方六七十如五六十』，謂方六七十及五六十也。《春秋傳》「請爲靈若厲」，謂謚靈及厲是也。此「公如大夫」，鄭讀如爲若者，猶言公及大夫耳，非謂公之人如大夫之人也。」云「讀若今之若」者，蓋當時之語，凡相及之詞多言若，故舉今以相況耳。《漢書·文帝紀》：「丞若尉致。」《武帝紀》：「爲復子若孫。」大夫則如介禮，有諸公，則辭加席，委于席端，主人不徹；無諸公，則大夫辭加

席，主人對，不去加席。加席，上席也。大夫席再重。【疏】正義曰：敖氏云：「如介禮者，亦如其獻禮耳。若其酢，則主人於公、大夫一也。《鄉射》言大夫之酢，其儀與此介同。諸公雖尊，禮宜如之，^②所以辟正賓也。」楊氏復云：「獻遵一條，經文所載差略，謂公升如賓禮，則自拜至以後其禮當與賓同。謂大夫如介禮，則不拜洗，不啻肺，不告旨。禮殺於賓，但無諸公，則獻大夫當如獻賓之禮。」張氏爾岐云：「如介禮，其入門、升堂、獻酢等，皆如介之殺於賓也。」方氏苞云：「疏謂如賓厭介而人之禮，非也。鄉之學士宜從鄉大夫以入，蓋主人雖敬執賓主之禮，而賓、介則不敢抗禮也。大夫與鄉大夫比肩事主，不宜使厭而升，尤不可使公厭大夫以升。^③如介禮，謂不拜洗、^④不啻肺、不啻酒、不告旨、送爵、崇酒、拜皆不於阼階之類，與介同耳。蓋介不敢正當禮以讓於賓，大夫不敢正當禮以讓於諸公，其義正同。經乃總言諸公之禮壹如賓，大夫之禮壹如

①「辯」，原作「辨」，今據《儀禮古今文疏義》改。

②「宜」，原作「亦」，今據《儀禮集說》改。

③「使」，原脫，今據《儀禮析疑》補。

④「不」，原脫，今據《儀禮析疑》補。

介，惟加席及辭席有異。疏說決不可通也。」盛氏世佐云：

「此云：公升如賓禮，大夫則如介禮。《鄉射禮》云：『若有諸公，則如賓禮，大夫如介禮；^①無諸公，則大夫如賓禮。』^②及考《鄉射禮》所載，遵者獻酢之禮僅與介同，不見所謂『如賓禮』者。諸公之禮既無明文可考，於是諸儒各以己意爲說。楊氏但謂自拜至以後當與賓同，言如獻而不及酢。^③敖氏謂如賓禮，如其獻禮耳，酢則仍與介同，辟正賓也。張氏則謂拜至、^④獻酢並如之。以經文斷之，則張說近是，而亦有所未備也。蓋經文簡而該，『如賓禮』三字足以槩括一章待公之禮，無事於繁複數陳也。既云『如賓禮』，則自拜至而獻而酢而酬無一不如之矣。^⑤《鄉射》所陳，特其所謂『大夫如介禮』者耳。言大夫，則諸公可知；言有諸公之大夫，則無諸公可知也。此蓋貴貴之禮，有必不可殺者，焉得以辟正賓爲辭乎？張言獻酢而不及酬，是其所未備也。如介禮，則無酬矣。」注云「加席，上席也。大夫席再重」者，敖氏云：「委，卷而置之也。席端，席北端也。不徹，不使人徹之也。主人對，不許其辭也。不去，亦謂不使人去之也。大夫辭加席，謙也。有諸公，則自委於席端者，公唯再重，已宜辟之。主人不徹，明其有爲而爲之，非正禮。無諸公則主人不聽其辭而去之者，士亦一重，

異爵者不可以無所別也。無諸公，則大夫之席在尊東，南

面；有諸公，則席在主人之北，西面。云「辭加席，委於席端」，則是凡辭席皆近席爲之也。此重席，乃云加席者，但取其在土故耳，非謂此席即加席也。凡加席與其下席異物，而長半之，重席則否。」又說前「辭一席，使一人去之」云：「諸侯之加席，與其下席而一。此席雖非加，而數則過於三焉，^⑥故辭之，而主人亦許而徹之也。」盛氏世佐云：

「案：《周禮·司几筵》：設席之法，天子惟三重，諸侯二重。此云：公三重，大夫再重。敖氏嫌其尊卑無辨，故設爲此席非加之說以通之。然下文明言加席，^⑦則此說固不可得而通之也。蓋天子以至大夫尊卑之辨，在五席之名物，不全係於席之重數也。五席者，次、纁、莞、蒲、熊也。天子三重，次也、莞也、纁也；諸侯再重，祭祀之蒲也、莞

- ① 「夫」下，原衍「則」字，今據《儀禮集編》刪。
- ② 「禮」，原脫，今據《儀禮集編》補。
- ③ 「言如獻」，《儀禮集編》作「見前獻賓圖」。
- ④ 「則」，原作「爾岐云」，今據《儀禮集編》改。
- ⑤ 「而酬」、「一」，原脫，今據《儀禮集編》補。
- ⑥ 「三」，原作「二」，今據《儀禮集說》改。
- ⑦ 「文」，原作「經」，今據《儀禮集編》改。

也；卿、大夫以下，則惟蒲筵、緇布純而已。加席以莞，不聞用纁，此則其差等也。若席之重數，豈有常乎？《禮器》云：「天子之席五重，諸侯之席三重，大夫再重。」此亦大概言之耳。《周禮疏》云：①「五重者，據天子大袷祭而言。若禘祭當四重，時祭當三重，諸侯三重，上公當四重，亦謂大袷祭時。若禘祭降一重，諸侯二重，禘與時祭同。卿、大夫以下，《特性》、《少牢》唯見一重耳。若爲賓饗，則加重數非常法，故不與祭祀同也。又諸侯相饗則三重。《郊特性》云：「大饗君三重席而酢焉。」是也。燕他國之臣則一重。《郊特性》云：「三獻之介，君專席而酢焉，以降尊以就卑也。」是也。《公食大夫禮》：「蒲筵緇布純，加莞席。」而《燕禮》：「筵賓於戶西，無加席。臣以君屈也。是席之重數，隨時變易，義各有主，不可執一而論也。」②即如此篇，主人鄉大夫也，然以賓故不敢有加席，亦是降尊以就卑之義。士一重，大夫再重，禮之正也。大國之孤又尊於大夫，故爲設三重以異之，猶諸侯三重而上公則四重也。然因其辭而即去之，則亦再重而已，豈可議其僭乎？又案：《公食大夫禮·記》云：③「蒲席常緇布純，④加莞席，尋。此公與大夫之加席，亦當與彼同。記不言者，文不具耳。敖氏謂上下之席同物，非。」

右遵者人之禮

明日，賓服鄉服以拜賜。拜賜，謝恩惠。鄉

服，昨日與鄉大夫飲酒之朝服也。不言朝服，未服以朝也。今文曰「賓服鄉服」。【疏】正義曰：「賓服鄉服，《校勘記》云：《通解》、敖氏俱無上「服」字，朱子曰：「注云今文曰賓服鄉服，明古經文無服，今有之，衍文也。」」○張氏爾岐云：「此下至篇末，言鄉飲明日拜謝勞息諸事。」注云「拜賜，謝恩惠」者，敖氏云：「拜謝其飲己之賜也。介不拜賜者，禮主於賓也。」云「鄉服，昨日與鄉大夫飲酒之朝服也」者，敖氏云：「鄉服，鄉飲酒之服，即朝服也。變「朝」言「鄉」，見其與昨日同也。鄉飲酒，士禮也。乃朝服者，放君之燕禮，故如其服也。」方氏苞云：「據經文，乃特著賓之鄉服，與鄉射之朝服異也。主人爲國興賢，朝服不言可知，故經略焉，而記乃詳之。而賓之服宜辨，故特著其爲鄉服，即

①「疏」，原作「既」，今據《儀禮集編》改。

②「而」，原脫，今據《儀禮集編》補。

③「記」，原脫，今據《儀禮集編》補。

④「常」，原作「長」，今據《續清經解》本及《儀禮集編》改。

修業於鄉之服，玄端是也。蓋《冠禮》可攝盛，^①即鄉射亦可攝盛。唯鄉大夫與賢能，則朝士與鄉民之分界也。故雖升於司徒，未入於國學，則仍鄉服，而鄉大夫之拜辱亦如之。蓋報禮於賢士，與之同服，示不敢以貴臨也。息司正，則改朝服以即事，示國政以嚴終也。若鄉射之賓，則宜多公士，即間用學士，亦可假以朝服。蓋春秋學政之常，假以朝服，亦以《騶虞》為射節之意耳。習射禮輕，故玄端以息司正，與鄉飲相變，各有當也。注說似未安。記獨補主人之服，正以賓之鄉服已見於經耳。」又曰：「經記玄端與朝服，每分言之。《士冠禮》三加朝服，既冠，改服玄冠玄端以見于君，則其別顯然矣。《特牲禮》「冠端玄」注：「玄冠有不玄端者。」蓋謂朝服則緇衣也。六人為玄，七人為緇，衣色稍異而冠則同。故注疏或混而一之。如《士冠》：主人玄冠朝服。注謂衣與冠同玄，是也。豈對文則有別，散文或可通歟？」盛氏世佐云：「於此云『鄉服』，^②則正行禮之日，賓蓋處士服矣。處士服，緇布冠、深衣、錦帶。」案：經鄉服之鄉，讀如晷日之晷。鄉服承明日而言。注「昨日」即解「鄉」字也。方氏謂士修業於鄉之服為鄉服，其說無據。拜賜、拜辱，所以終燕飲之盛禮，故服朝服以重其事。至息司正輕於禮賓，故釋朝服而服玄端。方氏謂拜賜、拜辱服

玄端，息司正服朝服，亦昧於輕重之宜矣。拜賜既服朝服，則正行禮之日亦服朝服，經「鄉服」二字總昨日之禮而言。盛氏謂正行禮之日，賓蓋處士服，亦非。」凌氏《釋例》云：「凡飲、射、燕食之禮，皆用朝服。《鄉飲酒·記》：『鄉，朝服而謀賓、介。』《鄉飲酒禮》：『明日，賓服鄉服以拜賜。』又云：『主人如賓服以拜辱。』《鄉射禮》：『主人朝服，乃速賓。賓朝服出迎。』疏云：『此主人與賓俱朝服。』又：射畢，明日，賓朝服以拜賜于門外。主人不見，如賓服，遂從之，拜辱於門外，乃退。是《鄉飲酒》、《鄉射》皆用朝服也。惟息司正，主人始釋朝服，更服玄端也。《燕禮·記》：『燕，朝服于寢。』《公食大夫禮》：『賓朝服即位于大門外，如聘。』又云：『公如賓服，迎賓于大門內。』又：禮畢，明日，賓朝服，拜賜于朝。若不親食，使大夫各以其爵、朝服以侑幣致之。賓朝服以受，明日，賓朝服以拜賜于朝。又：大夫相食，若不親食，則公作大夫朝服以侑幣致之。是燕食之禮皆用朝服也。《禮記·射義》：『古者諸侯之射，必先行燕禮。』呂氏大臨云：『諸侯之射，大射也。』燕禮

① 「禮」，原作「服」，今據《儀禮析疑》改。

② 「此」，原脫，今據《儀禮集編》改。

用朝服，則大射亦用朝服矣。又案：《鄉射》及《公食大夫》戒賓，注以爲皆用玄端，經無明文，疑不可從。」云「今文曰『賓服鄉服』者，鄭以鄉射明日，賓朝服以拜賜于門外決之，故從古文無上「服」字，今本經文亦作「服鄉服」，^①殆涉注文而誤衍。主人如賓服以拜辱。拜賓，復自屈辱也。」

《鄉射禮》曰：賓朝服以拜賜于門外。主人不見，如賓服，遂從之，拜辱于門外，乃退。【疏】正義曰：《校勘記》云：「復，《集釋》、楊氏俱作「服」。張氏云：「拜賓服，自屈辱也。」案：《釋文》：「復，扶又反。」近湖北本作「腹」，誤益甚。」案：張氏以嚴本爲據，楊氏又沿嚴本之誤。徐、鍾俱不誤。注云「拜賓，復自屈辱也」者，敖氏云：「辱，拜賜之辱也。主人往拜賓辱者，敵也。凡尊卑不敵，則不荅拜賜之禮。」引《鄉射禮》者，賈疏云：「明彼此賓、主俱不相見，造門外拜謝而已也。」主人釋服。釋朝服，更服玄端也。古文「釋」作「舍」。【疏】正義曰：注云「釋朝服，更服玄端」者，李氏如圭云：「服玄端，燕私輕也。」盛氏世佐云：「朝服以朝，玄端以夕，是朝服尊於玄端也。飲酒朝服，息司正當服玄端，^②隆殺之宜也。」凌氏《釋例》云：「凡《鄉飲酒》、《鄉射》之禮，^③息司正皆用玄端。《鄉飲酒禮》：明日拜賜，拜辱後，主人釋服，乃息司正。注：「釋朝

服，更服玄端也。」疏云：「昨日正行飲酒之禮，相尊敬，故朝服。此乃燕私輕，故玄端也。」^④《鄉射》經注同。疏云：「朝服之下，衣則次玄端，故知釋服，說朝服，服玄端也。」《鄉飲酒》、《鄉射》其禮盛，故用朝服。息司正，無介，^⑤不殺，不拜至，不拜洗，無俎。主人不崇酒，不拜衆賓，不旅酬，其禮殺，故用玄端也。又案：《鄉射禮》：「主人朝服，乃速賓。」注：「戒時玄端。」《公食大夫禮》：「賓朝服，即位于大門外。」注：「於是朝服，則初時玄端。」竊謂注說皆非也。考《鄉飲酒禮》經文不言何服，^⑥唯記云「鄉，朝服而謀賓、介」，故知《鄉飲酒》之爲朝服。《鄉射禮》惟速賓、拜賜、拜辱言朝服，他皆不言者，例見於此，故文不具也。則戒賓當亦朝服，如《鄉飲酒》，非若息司正，注以爲服玄端，經有「主人釋服」之文，爲可據也。《公食大夫禮》戒賓不言朝服

① 上「服」，原脫，今據《儀禮正義正義》補。
 ② 「當」，原脫，今據《儀禮集編》改。
 ③ 「酒」，原脫，今據《儀禮集釋》補。
 ④ 「玄」，原作「言」，今據《續清經解》本及《禮經釋例》改。
 ⑤ 「無」，原作「不」，今據《禮經釋例》改。
 ⑥ 「文」，原作「又」，今據《禮經釋例》改。

者，亦文不具，其實皆服朝服。食禮盛於燕禮，燕禮用朝服，^①豈有食禮戒賓反用玄端者？敖氏云：「禮，戒，速同服。此速賓朝服，則戒時亦朝服可知。」其說當矣。」云「古文『釋』作『舍』」者，惠氏棟《古義》曰：「《大射儀》『獲而未釋獲』注：『古文釋爲舍。』《周禮·大胥職》『春入學舍菜』注：『舍，即釋也。』《占夢職》云：『乃舍萌于四方。』注：『舍，讀爲釋。舍萌，猶釋菜也。』古書釋菜、釋奠多作舍字。」胡氏承珙曰：「鄭君於《周禮》既讀舍爲釋，此經即從今文作『釋』，^②疊舍字不用。蓋釋、舍同聲之轉，惟釋字於義訓較切耳。」乃息司正。息，勞也。勞賜昨日贊執事者。獨云司正，司正，庭長也。【疏】正義曰：敖氏云：「息，疑即燕之異名。《考工記》云：『張獸侯，則王以息燕。』是也。此禮亦於學宮行之。必息司正者，以昨日勞之，而待之之禮又殺於賓黨故也。釋服乃息之者，此無所放，故服其正服也。」案：「勞也」之「勞」，讀如「勞來」之「勞」。息有止義，勞而止息謂之息。《梓人》「則王以息燕」注：「息者，休農息老物也。」《禮記·樂記》「息焉游焉」注：「息，謂作勞休止之息。」《淮南·精神訓》「曷能久熏勞而不息乎」高誘注：「息，止也。勞而止息謂之息，故息其勞而勞之，亦謂之息。此一義之引伸也。韋氏協夢云：

「此勞賜鄉飲之贊者，司正爲贊者之長，舉司正則其餘皆勞矣。息司正亦當使人速之，觀《鄉射》可知。」凌氏《釋例》云：「凡鄉飲，鄉射明日息司正，略如飲酒之禮。《鄉飲酒禮》明日，主人釋服，乃息司正。無介，不殺，薦脯醢。羞惟所有，徵惟所欲。以告于先生、君子可也。賓、介不與，鄉樂惟欲。此《鄉飲酒》明日息司正之禮也。故注云：『息，勞也，勞賜昨日贊執事者。獨云司正，司正，庭長也。』無介，則但以司正爲賓；不殺，則無俎。皆殺於飲酒正禮。《鄉射》明日賓拜賜後，主人釋服，乃息司正。無介，不殺，使人速。迎于門外，不拜，入，升。不拜至，不拜洗。薦脯醢，無俎。賓酢主人，主人不崇酒，不拜衆賓。既獻衆賓，一人舉觶，遂無算爵。無司正，賓不與，徵唯所欲，以告於鄉先生、君子可也。羞惟所有，鄉樂惟欲。此鄉射明日息司正之禮也。與鄉飲息司正禮同，但經文較詳耳。『無介』下注云：『勞禮略，貶於飲酒也。』已下皆記禮之異者。又『遂無算爵』下注云：『言遂者，明其間闕也。賓坐奠觶於

① 「燕禮」，原脫，今據《禮經釋例》補。

② 「今」，原作「經」，今據《儀禮古今文疏義》改。

其所，擯者遂受命於主人，請坐於賓。賓降，說屨，升坐矣。^①不言遂請坐者，請坐主於無算爵。」又「無司正」注云：「使擯者而已，^②不立之。」蓋注又推經之所未詳者，皆殺於飲酒之正禮也。」無介，勞禮略也。司正爲賓。【疏】正義曰：知司正爲賓者，以司正是庭長，故以爲賓也。敖氏云：「是禮雖主於司正，未必以司正爲賓，公父文伯飲南宮敬叔酒，以路堵父爲客，是其徵矣。」盛氏世佐云：「司正蓋以州長爲之。諸侯之州長，士也。此乃大夫燕士之禮。敖氏所引《左傳》，蓋大夫族飲禮，故以異姓爲賓，非此比也。當以注說爲正。」方氏苞云：「據經文『以告于先生君子』，兼召知友，蓋先生、君子既不可屈爲司正之介，知友又不可爲介而先於先生、君子，故無介爲安。」不殺，市買，若因所有可也，不殺則無俎。【疏】正義曰：蔡氏德晉云：「不殺，不特殺也。」敖氏云：「無介、不殺，皆貶於飲酒。」薦脯醢，羞同也。【疏】正義曰：《校勘記》云：「案：敖氏注云『薦同』，雖非引鄭注，然竊疑鄭注『羞』字，亦『薦』字之誤。」案：賈疏亦作「羞」。《集釋》、楊氏皆同，則注自作「羞」，不得因敖氏而疑注亦作「薦」也。羞唯所有，在何物。【疏】正義曰：「羞」字承上言之，謂薦脯醢所用之

羞，視現在所有何物則用之。飲酒正禮用狗彘，此不殺，則無狗彘，故唯所有。徵唯所欲，徵，召也。【疏】正義曰：賈疏云：昨日正行飲酒，不得喚親友，故今禮食之餘，^③別召知友，^④故言「徵唯所欲」也。以告于先生、君子可也。告，請也。先生不以筋力爲禮，於是可以來。君子，國中有盛德者。可者，召不召唯所欲。【疏】正義曰：敖氏云：「君子，國中有德有爵者也，^⑤亦使人告之。云『可』者，嫌其禮輕，不必告也。惟言告，是不請矣。不請則不速可知，皆異於賓也。其來若否，則但語告者以復命於主人與？」^⑥先生、君子若與，其位蓋如遵。」方氏苞云：「但以告而不敢請，來與否聽焉，敬老尊賢之意也。鄉先生外別有君子，以是知先王興賢育材，有不敢強以仕者，必如是而後禮賢之義備也。《孟子》曰：大有爲之君必有所不

- ① 「坐」，原作「堂」，今據《禮經釋例》改。
- ② 「者」，原作「之」，今據《禮經釋例》改。
- ③ 「禮食」，原倒，今據《儀禮注疏》改。
- ④ 「別」，原作「則」，今據《儀禮注疏》改。
- ⑤ 「德有爵」，原作「爵有德」，今據《儀禮集說》改。
- ⑥ 「與」，原脫，今據《儀禮集說》補。

召之臣。春秋、戰國時猶有周豐、段干木、泄柳之儔，爲時君所不能屈。周公之教思可謂無窮矣。「周之士也肆」，其此之謂歟？」又曰：「遵者亦不告，以禮輕，不敢復煩尊者。」盛氏世佐云：「曩者主人就先生而謀賓、介，則興賢之典，先生與有勞焉。而昨日之禮，乃不以告，何也？蓋正行禮之時，酒清肴乾，賓主百拜，非強有力者不能勝也。敢以是煩長者乎？故不以告也。至是則禮已輕矣，又不敢請，而但使人告之，蓋不敢必其來也。古之鄉大夫待先生之忠且敬也，蓋如此。」褚氏寅亮云：「注云：『徵，召也。』」告，請也。』召之與請，不但見尊卑之等差，且見召者必欲其來也，而請者來否聽其自主，^①蓋既殺於正禮，則不敢必以屈先生、君子也。」王氏引之云：「上文：『主人就先生而謀賓、介。』注：『賓、介，處士賢者，即國中有盛德者也。』然下文云『賓、介不與』，則處士有德者但《鄉飲酒》之賓、介，而此日不與其事，豈得復告於處士有德者乎？君子蓋即上文之諸公、大夫也。」^②《鄉飲酒》之日，諸公、大夫或來或否，其不來者則可與於此日之息司正，故必以告焉。《鄉飲酒義》曰：「故聖人制之以道鄉人、士、君子。」士、君子，謂士、大夫也。賓、介爲士，主人爲大夫，大夫謂之君子，諸公、大夫亦謂之君子，故曰「以道鄉人、士、君子」也。此鄉

飲酒之諸公、大夫謂之君子之明證。^③《士冠禮》：「遂以摯見于卿、大夫、鄉先生。」卿、大夫則此所謂君子也。《士相見禮》：「凡侍坐于君子。」又曰：「若先生異爵者，請見之。」注云：「異爵者，謂卿、大夫也。」卿大夫則君子也。^④

《曲禮》曰：「侍坐于先生。」又曰：「侍坐于君子。」又曰：「侍坐於長者。」斷無不及侍坐於貴人之理。^⑤所謂君子者，即卿、大夫也。蓋卿、大夫之已致仕者爲先生，未致仕者爲君子。經言「告于先生、君子」，謂此二者也。先言「先生」，後言「君子」者，鄉黨莫如齒，先生七十而致仕，其齒最長，故先之也。《鄉射禮》之鄉先生、君子，義與此同。彼注云「君子有大德行不仕者」，亦失之。「賓、介不與。禮

瀆則變。古文「與」爲「預」。【疏】正義曰：《校勘記》云：「注『變』，徐本、《集釋》、《通解》、楊氏俱作『襲』。『古文與

- ① 「來否」，原脫，今據《儀禮管見》補。
- ② 「公」，原脫，今據《儀禮管見》補。
- ③ 上「之」字，原脫，今據《經義述聞》補。
- ④ 「也」，原脫，今據《經義述聞》補。
- ⑤ 「及」，原脫，今據《經義述聞》補。

爲「預」，「預」，^①徐本、《集釋》俱作「豫」，《通解》作「預」。今案：敖氏亦云：「古文「與」爲「豫」」。○敖氏云：「不敢以輕禮浼昨日之尊客。」^②方氏苞云：「不與者惟賓、介，示衆賓尚有與者。上經曰「微唯所欲」，則必德行道藝爲主人所心許，然後召之，非衆賓皆與也。人情於得失榮辱之界，^③可徵其器量，使周旋於鄉先生、君子之前，則有不能自掩者矣。此與「以五物詢衆庶」之義同，鄉先生、君子微辨其德器，衆庶明徵其行藝，皆所以振興羣士以爲後舉所依據也。若賓、介已受正禮，^④而又以飲食之道召之，則褻矣。」「古文「與」爲「預」」，詳《士昏禮》「我與在下」。案：《士昏禮》、《鄉射禮》、《聘禮》、《公食大夫禮》、《士虞禮》注皆云「古文「與」爲「豫」」，則此亦當作「豫」，作「預」誤也。鄉樂唯欲。鄉樂，《周南》、《召南》六篇之中，唯所欲作，不從次也。不歌《鹿鳴》、《魚麗》者，辟國君也。【疏】正義曰：敖氏云：「鄉樂者，凡《國風》皆是也。惟欲者，唯其所欲，則使工歌之，不如昨日之有節次也。蓋亦純用鄉樂之異者耳。《國風》爲大夫、士之樂，《小雅》爲諸侯之樂，《大雅》、《頌》爲天子之樂。禮盛者可以進取，故《鄉飲酒》升歌《小雅》也。息司正禮輕，故唯用其正樂耳。《鄉射禮》云：「一人舉觶，遂無算爵。」然則工人之節，其在無算爵之時乎？」

記

右拜賜拜辱息司正。此條張氏鄭注句讀無今補。

鄉，朝服而謀賓、介，皆使能，不宿戒。

鄉，鄉人，謂鄉大夫也。朝服，冠玄端，緇帶，素鞞，白屨。今郡國行鄉飲酒之禮，玄冠而衣皮弁服，與禮異。再戒爲宿戒。禮，將有事，先戒而復宿戒。【疏】正義曰：注「而復宿戒」，《校勘記》云：「復，徐本、《集釋》俱作「又」，與疏合；《通解》、楊氏俱作「復」。張氏云：「注曰：先戒而又宿戒。案：《釋文》復字注曰：而復同。此又必復字也。」今案：賈本作「又」，陸本作「復」，自不同耳。張氏《鄭注句讀》作「後」，以肥改也。云「鄉，鄉人，謂鄉大夫也」者，敖

①「預」，原脫，今據《儀禮注疏校勘記》補。

②「客」，原脫，今據《儀禮集說》補。

③「界」，原作「介」，今據《儀禮析疑》改。

④「介」，禮，原脫，今據《儀禮析疑》補。

⑤「氏」下，原衍「爾岐」二字，今據《儀禮注疏校勘記》刪。

氏云：「鄉，鄉飲酒也。不言飲酒，省文耳。孔子曰：『吾觀於鄉。』《王制》曰：『冠、昏、喪、祭、鄉、相見。』皆其徵也。於此云「鄉」者，如《燕禮》·記「先言「燕」、《特牲饋食》·記「先言「特牲饋食」之類也。」^①張氏爾岐云：「鄉，謂鄉飲酒之禮。注指人，恐義不盡。」方氏苞云：「《記》曰：『習射尚功，習鄉尚齒。』又曰：『觀於鄉而知王道之易易。』蓋古者唯飲酒之禮名曰鄉，以鄉大夫興賢能，退而以五物詢衆庶，^②黨正正齒位，皆鄉禮。獨言「鄉」，乃可以該之。其不言主人，何也？以經有明文，兼明所就謀賓、介之先生亦朝服也。」案：注以《記》「朝服而謀賓、介」，主鄉大夫言，故謂「鄉，鄉人，謂鄉大夫也」，然《記》「鄉」字總此一篇，下不言主人，方氏謂經有明文，是也。經與《記》非一人所作，古蓋別爲一卷，每篇題其名以別之，不與下文連讀也。敖、張諸說皆確。云「朝服、冠玄端、緇帶、素鞞、白屨」者，李氏如圭云：「冠玄端，玄冠、玄端也。冠與衣帶同色，屨與裳、鞞同色。」敖氏云：「謀賓、介爲飲酒之始，^③故即服其服。經不見其服，故《記》明之。」云「再戒爲宿戒。禮，將有事，先戒而後宿戒」者，張氏爾岐云：「宿戒之者，恐其人容有不能，^④令得肄習。今鄉飲賓、介皆使賢而能爲禮者，故不煩宿戒也。」方氏苞云：「興賢能，國政也，惟其人之可，無事

宿戒，故及期而速之。賓惟禮辭。」盛氏世佐云：「能，賢能也。使能者，即《周禮》·鄉大夫職云「考其德行道藝而興賢者，能者」是也。變「興」言「使」者，合衆而尊寵之謂之興。此以鄉大夫尊士卑，又其所治，故云「使」也。夫使民興賢，出使長之；使民興能，入使治之，一有不肖者得倖進，則殆矣。介亦後年擬貢者，云「皆使能」，蓋其慎也。不宿戒者，謂如《士冠禮》之類，三日前戒賓，至行禮前一日又宿之，而此則否也。所以然者，《冠禮》筮日、筮賓若不先期告戒，恐其至期或以他故不至，則不能成禮，故須戒而又宿。鄉飲酒之禮，則三年一行，必於正月，煌煌大典，誰不聞之？況幼學壯行，士之素志，^⑤詎有以他故而不至者，無事數數而戒宿也。蓋冠，一家之私禮；而鄉飲，一國之公禮：此其所以異也。二句義不相蒙，先儒乃混而釋之，殊失經意。若謂此以使能，故不宿戒，則凡禮之宿戒者，所

① 「特牲饋食記先言特牲饋食」，原作「特牲禮先言特牲」，今據《儀禮集說》改。

② 「五物」下，原衍「之禮」二字，今據《儀禮析疑》刪。

③ 「爲」，原作「如」，今據《儀禮集說》改。

④ 「恐」，原作「將」，今據《儀禮鄭注句讀》改。

⑤ 「士」，原脫，今據《儀禮正義正義正誤》補。

使者皆非能者乎？知其不能則不必使，使之而又逆料其不能，不敬孰甚焉？且古之君子禮樂未嘗斯須去身，冠禮又其習見者，亦何所不能而必宿之邪？」案：盛氏說能得禮之精意，注未釋「使能」，固以能即指賓戒也。敖氏之說亦不誤。

右記鄉服及解不宿戒

蒲筵，緇布純。筵，席也。純，緣也。【疏】正義

曰：賈疏云：「《公食大夫·記》云：①「蒲筵常，緇布純。」此不言「常」，文不具也。倍尋曰常，丈六尺也。」敖氏云：「此不言「常」，則其度或短與？」②尊給冪，賓至徹之。給，葛也。冪，覆尊巾。【疏】正義曰：《校勘記》云：

「冪，宋本《釋文》作「冪」。③案：當以「冪」為正。」○敖氏云：「賓至徹冪，臣禮之節也。《士昏禮》：夫婦入于室，贊者徹尊冪。《特牲禮》：尸即位而徹冪。皆與此異。」④方氏苞云：「凡事皆於諸篇互備，此經通例也。尊有蓋，蓋上加冪，冪上加勺，又反之以覆勺。此篇及《鄉射》皆賓至即徹，自獻酌至禮終不再覆。祭則陳饌時徹冪，酌奠，隨覆之，神事尤宜潔敬也。故酌尸之後，獻酢相繼，無復神事，

則徹而不覆。賓祭之尊，惟有司以時啟冪而已。《燕》、《大射》更有執冪者，⑤每酌於膳尊，旋啟而旋覆之。敬君之禮，不異於享神也。觀散尊徹冪，則不再覆，其義顯然矣。燕禮至無算爵，君命徹膳冪，亦不再覆。以酌無算，不可以旋啟而旋覆也。」韋氏協夢云：「給冪，葛之羸者。給冪，辟君禮也。《燕禮》用給冪。」其牲，狗也。狗取擇人。

【疏】正義曰：敖氏云：「用狗者，用《燕禮》之牲也，《鄉飲》與《燕》類也。而《燕》於君禮為差輕，《鄉飲》於臣禮為差重，故牲亦不嫌其同。」亨于堂東北。祖陽氣之所始也。陽氣主養。《易》曰：「天地養萬物，聖人養賢以及萬民。」【疏】正義曰：李氏如圭云：「《鄉飲酒義》：「亨狗於東方，祖陽氣之發於東方也。」祖，猶法也。」⑥敖氏云：「亨，⑦

- ①「記」，原作「禮」，今據《儀禮注疏》改。
- ②「與」，原作「焉」，今據《儀禮集說》改。
- ③「冪」，原作「冪」，今據《儀禮注疏校勘記》改。
- ④「異」，《儀禮集說》作「類」。
- ⑤「者」，原脫，今據《儀禮析疑》補。
- ⑥「法」，原作「發」，今據《儀禮集釋》改。
- ⑦「亨」，原作「言」，今據《儀禮集說》改。

煮也。堂東北，饗所在也，就而亨焉。凡學宮惟一門，故牲饗不於門外，而於堂東北。堂東北，即東夾之東北也。學宮有左、右房，則亦當有夾室。」郝氏敬云：「《易》象艮爲狗，東北艮方，陽氣所發生，飲以養生，故牲用狗亨於東北，象陽也。鄭解牲狗，爲取其擇人，迂也。」獻用爵，其他用觶。爵尊，不褻用之。【疏】正義曰：敖氏云：「其他，謂酬及舉觶之屬也。然《記》之文意，似失於不備。夫酢，亦用爵也，何獨獻哉？」此上筐之爵三，觶一，下筐之觶三。」張氏爾岐云：「其他，謂酬及旅酬。」秦氏蕙田云：「酢亦用爵，《記》但言『獻』者，酢統於獻也。敖氏以議《記》文之不備，^①過矣。」凌氏《釋例》云：「凡酌酒而飲之器曰爵。爵者，實酒之器之統名，其別曰爵、曰觶、曰觶、曰角、曰散。《士冠禮》疏：『《韓詩外傳》曰：一升曰爵，二升曰觶，三升曰觶，四升曰角，五升曰散。相對爵、觶有異，散文則通，皆曰爵也。』《考工記》：梓人爲飲器，勺一升，爵一升，觶三升。獻以爵而酬以觶，一獻而三酬，則一豆矣。後鄭曰：觶、豆字，聲之誤。『觶』，當爲『觶』。『豆』，當爲『斗』。《鄉飲酒·記》獻用爵，其他用觶。《鄉射·記》同。此爲《鄉飲酒》、《鄉射》而言也。若《燕禮》、《大射》雖獻亦用觶。宰夫爲主人，辟君也，至於酬、旅酬，無算爵，則同用觶矣。《特

牲禮》：主人初獻尸，尸酢主人，主人獻祝，獻佐食，皆用角。注：「不用爵者，下大夫也，因父子之道質而用角。」是也。又《大射》：司馬獻獲者則用散。經云：「司馬正洗散。《特牲》：佐食獻尸則用散。經云：『利洗散，獻于尸，酢，及祝，如初儀。降，實散于筐。』是也。《特牲·記》：『筐在洗西，南順，實二爵、二觶、四觶、一角、一散。』注：『二爵者，爲賓獻爵止，主婦當致也。二觶，長兄弟酌衆賓長爲加爵，二人班同，迎接並也。四觶，一酌奠，其三，長兄弟酬賓，卒受者，與賓弟子、兄弟弟子舉觶於其長，禮殺，事相接。《禮器》曰：貴者獻以爵，賤者獻以散，尊者舉觶，卑者舉角。』此注皆據《特牲》經文言之。二觶，賈氏無疏。敖氏曰：『二觶者，長兄弟以觶爲加爵，因以致於主人，主婦，既則更之以酢於主人也。』說與注異。經云「長兄弟洗觶爲加爵」，則衆賓長爲加爵亦當用觶。^②注說是也。觶卑於爵，觶卑於觶，角散又卑於觶，故代君爲主人之獻酢用觶，殺於正賓主之獻酢用爵也。^③酬、旅酬、無算爵用觶，

- ① 「以」，原脫，今據《五禮通考》補。
 ② 「長」，原脫，今據《禮經釋例》補。
 ③ 「賓」，原脫，今據《禮經釋例》補。

又殺於獻酢用爵觚也。^①若夫醴用罍而不用爵、觚者，禮事質故也。」薦脯五挺，橫祭于其上，出自左房。

挺，猶臠也。《鄉射禮》曰：「祭半臠，臠長尺有二寸。在東，

陽也，陽主養。房，饌陳處也。《冠禮》之饌，脯醢南上。

《曲禮》曰：「以脯脩置者，左胸右末。」【疏】正義曰：《校勘

記》云：「注，今本《釋文》：『猶臠，本亦作機。』」宋本云：「猶

機，本亦作臠。」張淳《識誤》載「機」字，而缺其說。蓋從《釋

文》作從木之「機」也。「在東」，「在上」，徐本、《集釋》、《通

解》、楊氏俱有「左」字。」云「挺，猶臠也。《鄉射禮》曰：

「祭半臠，臠長尺有二寸」者，李氏如圭云：「脯橫於人前，其

末居右，祭橫其上，於人則爲從也。脯五挺，通祭而六挺。」

敖氏云：「脯之祭者半挺，使人以爲祭也。云『橫祭』，是五

挺者縮籩也。然則籩亦有首尾歟？」張氏爾岐云：「薦脯

用籩，其挺五，別有半挺橫於上，以待祭。脯本橫設人前，

橫祭者，於脯爲橫，於人爲縮。」蔡氏德晉云：「數脯以挺，

脯乾則挺直也。籩實五挺，皆橫設，所謂『左胸右末』也。

而以祭之半挺直加其上，故曰『橫祭』。」案：挺，臠皆有直

義。《爾雅·釋詁》云：「挺，直也。《鄉射·記》注云：『古

文『臠』爲『載』。今文或作『植』。』載，直古聲通，故『載』或

通作『植』，「機」或通作『臠』，皆其類也。脯乾則直，因謂之

挺，或謂之臠，其義一也。云「在東，陽也，陽主養。房，饌

陳處也」者，敖氏云：「左房，東房也。有左房，則有右房可

知。」陳氏祥道云：「《鄉飲酒》：薦脯五挺，出自左房。《鄉

射》：籩豆出自東房。《大射》：『宰胥薦脯醢由左房。』夫

《鄉飲》、《鄉射》，大夫禮；《大射》，諸侯禮。其言相類，蓋

言左以有右，言東以有西，則士、大夫之房室與諸侯同可

知。」凌氏《釋例》詳《士冠禮》。俎由東壁，自西階

升。亨狗既孰，載之俎，饌於東方。【疏】正義曰：上云

「亨于堂東北」，而不別言陳俎之處，則是俎亦未離於其所

也，故其設時，由東壁而來。必言「由東壁」者，嫌俎當自門

入也。云「自西階升」者，明賓主同。郝氏敬云：「亨狗于

堂北，熟而實於俎，故自東壁出，由西階升堂也。」韋氏協夢

云：「俎爲賓設，故升自西階。」賓俎，脊、脅、肩、肺。

主人俎，脊、脅、臂、肺。介俎，脊、脅、胛、

肺。肺皆離，皆右體，進腩。凡牲，前脰骨三，肩、

臂、臠也；後脰骨二，膊、胛也。尊者俎尊骨，卑者俎卑骨。

《祭統》曰：「凡爲俎者，以骨爲上。骨有貴賤，凡前貴後賤。

① 「酢」，原作「酬」，今據《禮經釋例》改。

離，猶揜也。腩，理也。進理，謂前其本也。今文「胙」作「胙」。【疏】正義曰：朱子云：「印本「胙」上有「肫」字，然《釋文》無音，《疏》又云「有肫肫而介不用」，明本無此字也。成都石經亦誤。今據音、疏刪去。」敖氏云：「今印本與石經「胙」上有「肫」字。案：疏云：「介用胙。」又云「或有肫、胙兩言者」云云。又《釋文》此處無肫音，至下乃音之。今據《釋文》與疏之前說，則「胙」上固無「肫」字。又考疏之後說，則是作疏之時，或本已有兩言「肫胙」二字者矣。是蓋後人妄增之，而當時無有是正之者，故二本並行。其後石經與印本但以或本為據，所以皆誤。」今從《通解》刪之。^①

《校勘記》云：「唐石經、徐本、《集釋》、楊氏俱有「肫」字，《通解》、敖氏無。案：賈疏云：「肫胙兩見，亦是也。」又前疏云：下有介俎，脊、脅、肫、胙。仍有「肫」字，則賈氏所據之本雖無「肫」字，亦不以有「肫」為非。」案：注但言「膊、胙」，不云「肫、胙」，使經文為「肫」字，注必明言肫與膊之為一，其不言則鄭所據本無「肫」字可知也。別本蓋以注之膊胙即肫胙，因加「肫」字於「胙」字上。唐石經不察，遂從其本，要當以陸、賈為正。張氏爾岐《鄭注句讀》仍加「肫」字，宜為盛氏所譏也。「進腩」，《校勘記》云：「《釋文》作「奏」，云：「本又作腩，同。」^②注「膊、胙也」，《校勘記》云：「盧文

弼改「膊」為「膊」。案：膊即肫字，《說文》：「肫，面頰也。从肉屯聲。」膊，切肉也。从肉專聲。」皆非脰骨之義，蓋假借用之。專、肫同音，膊、肫同字。今《注疏》刊本俱誤作「膊」。^③膊以專為聲，不得與肫通用。^④《周禮·醢人》「豚拍」杜子春讀為膊。案：段氏《說文注》曰：「《儀禮》「牲體肫脰」，^⑤假借「肫」為「肫」字也。肫，腓腸也，^⑥析言為腓腸，統言之則以肫該全脰，如《禮經》之言「肫胙」是也。《禮經》多作「肫」，或作「膊」，皆假借字。」「以骨為上」，《校勘記》云：「上，徐本、《集釋》、《通解》、敖氏俱作「主」。謂其本也。《集釋》無「其」字。」「今文胙作脰」，《集釋》作「為」，與疏標目不合。○敖氏云：「皆，皆肩、臂、胙也。凡脊、脅不謂之體。」^⑦右體者，吉禮所尚，故於三俎用之。肺在後者，便其取之也。凡俎橫設，其後皆於所為設者為

- ① 據引文出自《南江札記》，「敖氏」當為「邵氏」之誤。
- ② 「同」，原脫，今據《儀禮注疏校勘記》補。
- ③ 「俱」，原作「既」，今據《儀禮注疏校勘記》改。
- ④ 「通」，原作「同」，今據《儀禮注疏校勘記》改。
- ⑤ 「體」，原脫，今據《說文解字注》補。
- ⑥ 「肫」，原作「肥」，今據《說文解字注》改。
- ⑦ 「脊」，原作「肩」，今據《儀禮集說》改。

右。」方氏苞云：「先脊、脅而後肩、臂，何也？鬼神不饗味而貴氣臭，故骨體以次升，生人所食惟肺、脊，故昏禮夕食及朝饋，舅姑所舉惟肺、脊，從其質也。賓禮所膾惟肺，而骨體之陳亦以平時所舉爲先，用別於神享也。」凌氏《釋例》云：「凡牲皆用右胖，惟變禮反吉，用左胖。」《鄉飲酒·記》：「賓俎，脊、脅、肩、肺。主人俎，脊、脅、臂、肺。介俎，脊、脅、肫、膈、肺。皆右體，進腠。」《鄉射·記》：「賓俎，脊、脅、肩、肺。主人俎，^①脊、脅、臂、肺。皆右體也，進腠。」注：「右體，^②周所貴也。」此嘉禮用右胖也。《特性·記》云：「尸俎，右肩、臂、肫、膈、肺，正脊二骨，橫脊，長脅二骨，短脅。」《少牢禮》：實鼎，司馬升羊右胖，髀不升。注：「上右胖，周所貴也。」又云：「司士升豕右胖，髀不升。」又：將祭載俎，上利升羊，載右胖，髀不升。又云：「下利升豕，其載如羊。」《有司徹》：「司馬牝羊，亦司馬載，載右體。」^③又云：「司士牝豕，亦司士載，亦右體。」此吉禮皆用右胖也。是凡牲皆用右胖也。《既夕禮》大遣奠陳鼎，其實，羊左胖，髀不升，豕亦如之。注：「反吉祭也。」《士虞禮》豚解，升左肩、臂、肫、膈、脊、脅。又云：「升腊左胖，髀不升。」是變禮反吉，始用左胖也。至於《特性·記》「賓骼」注：「骼，左骼也。」賓用左骼者，下尸也。《有司

徹》：「侑俎，羊左肩，左肫。」^④又云：「豕左肩折。」侑用左體者，亦下尸也。「主婦俎，羊左肫。」主婦用左體者，因阼俎無體，故下主人也。此皆禮之殺者，故不用右胖也。又案：《士冠禮》：「若殺，則特豚，載合升。」注：「煮於鑊曰亨，在鼎曰升，在俎曰載。載合升者，明亨與載皆合左右胖。」^⑤《士昏禮》初昏陳鼎，其實特豚，合升，去蹠。注：「合升，合左右胖升於鼎也。」《士喪禮》：大斂奠陳鼎，^⑥豚合升。注：「合升，合左右體升於鼎。」冠禮，人道之始；昏禮，男女之始；大斂，人道之終。故皆合升左右胖，異於他禮也。又《士冠禮》：「若殺」注：「凡牲皆用左胖。」疏云：《特性》、《少牢》皆用右胖。《少儀》云：大牢則以牛左肩折九箇。爲歸胙用左，則用右而祭之。《鄉飲酒》、《鄉射》用右體。與祭同，^⑦據周而言也。此云用左，鄭據夏、殷之

- ①「俎」，原脫，今據《禮經釋例》補。
- ②「右」，原作「左」，今據《禮經釋例》改。
- ③「載」，原脫，今據《禮經釋例》補。
- ④「左」，原作「右」，今據《禮經釋例》改。
- ⑤「亨」，原作「言」，今據《禮經釋例》改。
- ⑥「大斂」，原脫，今據《禮經釋例》補。
- ⑦「與」上當據《儀禮注疏》補「生人亦」三字。

法，與周異也。」竊謂注凡牲皆用左胙，當作「右胙」。「左」字，蓋傳寫之誤。^①疏以「若不醢，則醢用酒」爲夏、殷冠子之法，^②故爲此說以遷就之，不足信也。」陳氏祥道云：「豚則吉凶皆合升，用成牲則升其胙而去髀，吉升右而凶升左。」注「凡牲，前脰骨三，^③肩、臂、臠也；後脰骨二，膊、胙也。尊者俎尊骨，卑者俎卑骨」者，郝氏敬云：「凡俎貴骨，骨貴正與前。脊，正骨也。脅、肩，前骨也。臂、肩，下骨也。胙，後脰骨也。賓俎用貴，^④主人次之，介又次之。」敖氏云：「介俎用胙者，^⑤欲以臠爲諸公俎，肫爲大夫俎也。尊者若多，則自三以下皆用左體，是亦示其相下之意也。若無尊者，介俎猶用胙，不爲之變也。」案：李氏《集釋》、張氏《鄭注句讀》本「胙」上皆有「肫」字，故其說稍異。李氏云：「周人貴肩。」賓俎用肩，主人用臂，尊賓也。」大夫雖尊，不奪賓主正禮，其俎用臠、肫，卑於主人，而尊於介。介用胙，若大夫一人，則介得用肫，故介俎肫、胙兩見。」張氏曰：「肫、胙即注膊、胙，後脰二骨也，賓、主俎各一體，而介俎肫、胙並言者，以肩臂之下，留其貴者爲大夫俎，若有一大夫，則大夫用臠而介用肫，^⑥若有二大夫，則大夫用臠與肫，而介用胙。用體無常，故肫、胙兩見也。」盛氏世佐云：「介俎用胙，正也，不以尊者之多少而有所變。若謂有一大

夫，則介用肫；有二大夫，則介用胙，然則無大夫，則介當用臠矣。經何以不云介俎脊、脅、臠、肫、胙、肺也？且有三大夫，則介更何所用乎？其說固不可通也。」引《祭統》者，明骨有貴賤，而俎之尊卑視之也。注云「離，猶揜也。揜，理也。進理，謂前其本也」者，郝氏云：「周人尚肺，肺皆離割而不絕也。」「進腩，肉皮向上也。」云「今文「胙」作「骼」者，胡氏承珙曰：《說文》：「胙，亦下也。」「亦」即「腋」字。《亦部》云：「人之臂亦也。」《骨部》曰：「禽獸之骨曰骼。」是許書於「胙」、「骼」二字有人、獸之別。《儀禮》古文作「胙」，今文作「骼」。鄭於《鄉飲酒》從古文，於《有司徹》從今文者，對文則別，散文則通。經言牲體，獸骨自明，不必作「骼」始瞭，非同《說文》字書專明一字本義也。」段氏《說文注》「胙」下曰：「《禮經》牲體之胙，^⑦今文作「胙」，古

- ① 「字」，原作「氏」，今據《續清經解》本及《禮經集釋》改。
- ② 「爲」，原作「如」，今據《禮經釋例》改。
- ③ 「三」，原作「之」，今據《儀禮注疏》改。
- ④ 「俎」，原作「骨」，今據《儀禮節解》改。
- ⑤ 「介」，原作「今」，今據《儀禮集說》改。
- ⑥ 「介」，原作「可」，今據《儀禮鄭注句讀》改。
- ⑦ 「牲」，原作「特」，今據《說文解字注》改。

文作「髀」。鄭出古文於注，是注從今文也。許訓胙爲亦下，訓髀爲禽獸之骨，是從古文《禮》，不從鄭也。^①又「禽獸之骨曰髀」注云：「案：『骨』當作『髀』」。許據《儀禮》十七篇，故云「禽獸之髀曰髀」也。《儀禮》多言肫、髀。^②「肫」，^③亦作「膊」，皆《說文》之「肫」字也。髀，亦作胙，於人曰髀也。髀者，髀上也。^④牲前足體三：^⑤曰肩，曰肫，曰臂。肫於人爲左，^⑥肩下，臂上也。後足體三：^⑦曰髀，^⑧曰肫，曰肫。禮，髀賤，不升，故經多言肩、臂、肫，^⑨膊、胙，^⑩肫在臂上，胙在肫上，而先言臂、肫者，蓋四胙以下爲貴也。「胙」是本字，至《埤蒼》乃作「髀」，^⑪《廣雅》、《字林》變作胙，又或作胙，魚虞歌麻通轉之故也。云曰髀、曰肫者，所以別人禽之異名。《肉部》曰臂，羊豕曰肫，是其例也。許據十七篇爲言，^⑫故不敢謂髀爲人骨也。」案：段氏兩說自異，當以「髀」下爲正。鄭於此經曰「今文「胙」作「髀」」，於《有司徹》曰「古文「髀」作「胙」」，是古文作「胙」，今文作「髀」。段以爲今文作「胙」、古文作「髀」，顯與注悖。肉、骨，偏旁古多通用，如「膀」或作「髀」，「肫」或作「肫」，皆其類也。鄭於此注從古文，《有司徹》從今文，以其通用可便作耳。段以注從今文，非也。許君據十七篇爲言，故謂髀爲禽獸之骨，以《禮經》所言髀皆主牲體言也。許君於

《禮》多從今文，確有可證。段必以許從古文《禮》不同鄭，誤矣。《說文》於「胙」曰「亦下」，於「髀」曰「禽獸之骨」，分別言之。其實髀、胙一字也。

右記器具牲羞之屬

以爵拜者不徒作。作，起也。言拜既爵者不徒起，起必酢主人。【疏】正義曰：賈疏云：拜受爵者，有

- ① 「從」，《說文解字注》作「同」。
- ② 「髀」，原作「胙」，今據《說文解字注》改。
- ③ 「肫」，原脫，今據《說文解字注》補。
- ④ 「髀」，原作「脾」，今據《說文解字注》改。
- ⑤ 「足」，原作「是」，今據《說文解字注》改。
- ⑥ 「肫」，原脫，今據《說文解字注》補。
- ⑦ 「足」，原作「是」，今據《說文解字注》改。
- ⑧ 「肫」，原脫，今據《說文解字注》改。
- ⑨ 「臂」，原作「是」，今據《說文解字注》改。
- ⑩ 「膊」，原作「膊」，今據《說文解字注》改。
- ⑪ 「髀」，原作「髀」，今據《說文解字注》改。
- ⑫ 「據」，原作「案」，今據《儀禮正義正義》改。

不酢主人法，故此是拜既爵起，必酢主人者也。^①敖氏云：「以爵拜，蓋指賓、主、介、遵既卒爵而奠爵拜者也。既拜而興，則與飲己者爲禮，故曰「不徒作」。然此拜乃前禮之節，其意未必與後禮相通。《記》乃合之以生義，似失之。又經言「奠爵」，此乃言「以爵」，則其意亦可見矣。」盛氏世佐云：「以爵拜者，謂凡奠爵拜、^②執爵興者也。不徒作者，^③謂起必有所事，無空起也。試以經文考之，蓋一不爽。如主人獻賓，賓之告旨也，坐奠爵拜，執爵興，是以爵拜也。下即云：「賓西階上，北面坐，卒爵」，是不徒作也。其拜既爵也，亦然。又如賓酢主人，主人坐卒爵，興，坐奠爵，遂拜，執爵興，是以爵拜也。下文即言其再拜崇酒之事，是亦不徒作也。^④以是推之，凡介、遵之禮皆然。至於獻衆賓，衆賓不拜既爵，是不以爵拜也。下云：「授主人爵，降復位。」是徒作也。凡拜必奠爵，《記》乃言「以爵拜」，不言奠爵拜，何也？凡拜畢即執爵興者，謂之以爵拜，不執以興者，謂之奠爵拜。奠爵拜則有徒作者矣。如介酢主人，主人坐奠爵於西楹南，介右再拜崇酒。下云「主人復阼階」，是其徵也。若夫拜受爵之禮，先拜而後受爵。方其拜時，爵固未入手也，不得謂之以爵拜。注專以「拜既爵」訓「以爵拜」，以「酢主人」訓「不徒作」，固偏。^⑤敖氏雖兼賓、

主、介、遵而言，然但指其卒爵之拜，亦未備。且未知奠爵、以爵之分，而反疑《記》失，豈不謬哉？」案：下文有「拜既爵」、「不拜既爵」，故注探下爲言，知以爵拜謂拜既爵也。

坐卒爵者拜既爵，立卒爵者不拜既爵。降殺

各從其宜，不使相錯。唯工不從此禮。【疏】正義曰：敖氏

云：「此蓋於卒爵之時見其拜不拜之意。坐近於拜，故當

拜則坐飲，^⑥而不當拜則立飲也。是二儀者，經已具之，

《記》蓋言其例耳。又此與下條，惟以《鄉飲》、《鄉射》之禮

言之則可，若推於他禮，則有不盡然者矣。云「惟工不從

此禮」者，李氏如圭云：「工賤，不拜既爵，無目，不使立卒

爵耳。」凡奠者于左，不飲者，不欲其妨。【疏】正義

曰：賈疏云：「謂主人酬賓之觶，主人奠於薦右，客奠之於

①「必」，原作「以」，今據《儀禮注疏》改。

②「拜」，原脫，今據《儀禮集編》補。

③「作」，原脫，今據《儀禮集編》補。

④「亦」，原作「以」，今據《儀禮集編》改。

⑤「偏」，原作「徧」，今據《續清經解》本及《儀禮正義正誤》改。

⑥「坐」下，原衍「而」字，今據《儀禮集說》刪。

左，是不欲其妨後奠爵也。」將舉于右。便也。【疏】正

義曰：賈疏云：「謂若上文一人舉觶爲旅酬始，二人舉觶爲無算爵始，皆奠於右，是其將舉者於右，以右手舉之，便也。」李氏如圭云：「《少儀》曰：『客爵居左，其飲居右。』」

介爵，酢爵，僕爵，皆居右。客爵，主人酬賓之爵也。衆

賓之長，一人辭洗，如賓禮。於三人之中，復差有

尊者，餘二人雖爲之洗，不敢辭。其下不洗。【疏】正義

曰：敖氏云：「主人獻衆賓，惟於始長者一人爲之洗。」經

云：「主人取爵于西楹下，降洗。」是也。一人辭之者，^③禮

主於己也。張氏爾岐云：「主人統爲衆賓三人長一洗，^④

一人進與爲禮，餘二人不敢往參，非又爲二人各一洗也。

又案：經文「洗，升，實爵」後，始言「衆賓之長升，拜受者三

人」。此時三人尚未升堂，其辭洗亦自階下東行辭之。疏

於前經以主人揖升爲揖衆賓升，以此辭洗爲降辭，皆誤。」

盛氏世佐云：「案：經文主人獻衆賓唯有一洗，蓋爲衆賓

之長一人也，^⑤故此人辭之。餘二人並不爲之洗，何辭之

有？注誤。」立者東面北上。若有北面者，則

東上。賢者衆寡無常也。或統於堂，或統於門。【疏】正

義曰：張氏爾岐云：「立者，堂下衆賓也。東面北上，統於

堂也。賓多，東面立不盡，即門西。北面東上，統於門也。」

敖氏云：「此謂在門內位之時也。賓入門左，位近庭南，介

以下又居其南。衆賓若多，則容有北面者。北面者與東面

者相繼，當西上。云「東」者，字誤也。門西北面，而東上自

爲列者耳。韋氏協夢云：「此蓋言凡東面立者之位也，門

內及堂下並同。堂下之位若有北面者，亦當西上，蓋繼東

面而立也。若東上，則相背矣。敖氏以「東」爲「西」字之

誤，當從之。盛氏世佐云：「經云「衆賓辯有脯醢」，^⑥不見

其位面及上下之次，故記之。記在「一人辭洗」之下，其爲

堂下衆賓之位無疑。敖氏見朱子《通解》載此條於迎賓之

後，遂云「在門內位之時」，非也。《周禮·鄉大夫職》云鄉

老及鄉大夫帥其吏與其衆寡，^⑦以禮禮賓之，則行飲酒禮

之時，鄉人之善者皆在，故容有北面者。北面者與東面者

①「飲」，原作「餘」，今據《續清經解》本及《儀禮集釋》改。

②「長」「人」，原無，據《續清經解》本補。

③「辭」，原作「洗」，今據《續清經解》本及《儀禮集說》改。

④「人」，原無，據《續清經解》本補。

⑤「爲」，原作「以」，今據《儀禮集編》改。

⑥「經」，原作「注」，今據《儀禮集編》改。

⑦「寡」，原作「庶」，今據《儀禮集編》改。

相繼，^①當西上，乃云「東上」者，猶賓席南鄉，而以東爲上。說者以爲統於主人，是也。敖氏改「東」爲「西」，似未達此義。注云「統於門」，亦未的確。「樂正與立者皆薦以齒」。謂其飲之次也。尊樂正同於賓黨，不言飲而言薦，以薦明飲也。既飲，皆薦於其位，樂正位西階東，北面。【疏】正義曰：注「以明飲也」，《校勘記》云：「『以』下，《集釋》、敖氏俱有『薦』字。」○敖氏云：「此樂正乃公有司，非衆賓也。又不立於西方，嫌其禮異，故明之。」張氏爾岐云：「樂正本主人官屬，故以齒於賓黨爲尊之。」盛氏世佐云：「經文獻衆賓之時，不言樂正，故記之。立者，亦謂堂下衆賓也。」方氏苞云：「舉樂正司正之薦而不及弟子，何也？此日之弟子，即他日可爲賓、介，列衆賓者也。有司與酬，則弟子可知矣。不言與酬而言薦，何也？言薦則酬見，言酬則薦不見，而或疑於無薦也。」凡舉爵，三作而不徒爵，謂獻賓、獻大夫、獻工皆有薦。【疏】正義曰：敖氏云：「言此者，明獻禮重，無有不薦者也。」注云「獻賓」，謂賓、介及衆賓也。云獻工，兼笙者也。」郝氏敬云：「舉爵三作，謂獻賓、獻介、獻衆賓。不徒爵，謂樂作也。禮成於三，三爵既備，禮宜少變。尊者可入，尊者入而後樂作，以觀德

也。樂既作，則尊者不入。」盛氏世佐云：「舉爵，謂初取爵於筐也。作，起也。三作，^②謂奠爵之後，復取之而起三次也。徒，空也。不空爵，謂實之以酒。此禮獻賓獻大夫皆然，故云「凡」。試以獻賓禮證之。經云「主人坐取爵於筐」，即此所謂舉爵也。既因辭賓降而奠，賓對後復坐取爵，興，適洗，是一作也。既又因對賓辭洗而奠，賓復位後復坐取爵，卒洗，是二作也。既又因荅賓拜，洗而奠，盥後復坐取爵實之，是三作而不徒爵也。獻介，介不拜洗，^③則少盥後一作矣。獻衆賓無辭降之文，則又少賓對後一作矣。記此者，欲見獻賓及大夫禮隆，不與介以下同也。《鄉射·記》此句在「凡奠者于左」之上，見獻賓禮也。此記於「樂作大夫不入」之上，^④見獻大夫如賓禮也。獻介及衆賓皆仍獻賓之爵。不得謂之舉爵，獻大夫則易爵，故得以舉爵統之也。注於《記》中「凡」字，「而」字俱無所發明，且獻之有薦，經文明白，何待記乎？郝說初讀之似有理，及細

- ①「者」，原脫，今據《儀禮集編》補。
- ②「作」，原作「爵」，今據《續清經解》本改。
- ③「介」，原作「之」，今據《儀禮集編》改。
- ④「上」下，原衍「也」字，今據《續清經解》本刪。

考之，亦非。《鄉射禮》無介，獻賓及衆賓後，即遵人而樂作矣。是舉爵二作而不徒爵也，^①何以彼《記》亦云「舉爵，三作而不徒爵」乎？以此證之，則其紕繆顯然矣。」方氏苞云：「此謂無算爵也。古者于旅也，語既受三爵，則必以善言相告戒，或歌詩以見志，如以不徒爵爲薦，^②則衆賓辯有脯醢，^③立者皆薦，安得以獻賓、獻大夫、獻工爲三舉爵？且又去介而著工乎？」案：此記人各爲說，似皆未得其旨。注謂舉爵爲獻賓、獻大夫、獻工，不徒爵謂皆有薦，然獻介、獻衆賓亦皆有薦，遺介與衆賓而謂賓大夫與工之獻爲舉爵三作，未見其合也。盛氏專以獻賓、獻大夫言，雖傳會「三作」之文，然以「易爵」爲「舉爵」，仍爵爲非舉爵，似亦未得經意。至郝氏、方氏自立新說，尤於經無當也。今案：記言「舉爵」，爲經「一人舉觶」言也。云「凡」，兼「二人舉觶」言也。試以經文證之，經言一人舉觶于賓，云：「實觶于西階上，坐奠觶，^④遂拜，執觶興。」是一作也。又云：「坐祭，遂飲，卒觶興。」^⑤是二作也。又云：「坐奠觶，遂拜，執觶興。」是三作也。是所謂「舉爵三作」也。不徒爵者，謂其必實觶也。二人舉觶之禮亦同。一人舉觶，《鄉飲》在「奏樂」條之上，《鄉射》在「賓若有遵者」條之上，此《記》在「樂作，大夫不入」之上，與經之次正相合。《鄉射·記》此句於「凡

奠者于左」之上者，承上坐卒爵者拜既爵，立卒爵者不拜既爵，以類相從耳。樂作，大夫不入，後樂賢者。【疏】

正義曰：李氏如圭云：「大夫之來，助主人樂賢，故既樂作不入。」敖氏云：「此謂大夫之來也後，不及一人舉觶之節者也。樂作之時，不可亂之，故不入。若樂既作，則獻工與笙矣。大夫之獻，又不宜後於工也。」褚氏寅亮云：「其人之節在一入舉觶後，^⑥樂未作前，爲時亦無幾。注言「後樂賢」，深得禮意。敖氏謂樂作則獻工，^⑦大夫之獻不宜後於工，然則大夫專爲自己獻，不可後而不入也。失之遠矣。」獻工與笙取爵于上筐，既獻，奠于下筐。明其異器敬也。如是，則獻大夫亦然。上筐三爵。【疏】正義曰：李氏如圭云：「三爵，獻賓、介、衆賓一，獻工與笙二，

① 後「爵」字，原作「作」，今據《儀禮集編》改。

② 「爵」，原作「作」，今據《儀禮析疑》改。

③ 「辯」，原作「皆」，今據《儀禮析疑》改。

④ 「觶」，原作「爵」，今據《儀禮正義正義正誤》改，下「觶」字同。

⑤ 「卒」，原作「執」，今據《儀禮注疏》改。

⑥ 「後」，原脫，今據《儀禮管見》補。

⑦ 「工」，原作「上」，今據《儀禮管見》改。

獻大夫三也。」敖氏云：「既獻工則奠於上簠，既獻笙乃奠於下簠也。不仍用獻大夫之爵者，節異則不相因也。既獻大夫而酢，則奠爵於西楹南。又案：注云「獻大夫亦然」者，惟謂亦取爵於上簠耳。」其笙則獻諸西階上。謂主人拜送爵也。於工拜於阼階上者，以其坐於西階東也。古文無「上」。【疏】正義曰：李氏如圭云：「獻笙固於西階上矣，復記之者，嫌亦於阼階上拜送。」敖氏云：「此《記》乃與經同者，特因上文而言之耳。」^① 注云「古文無「上」」者，胡氏承珙云：「案：經言：主人獻笙於西階上。《鄉射禮·記》：『其笙，則獻諸西階上。』此亦當有「上」字，故從今文。」磬階間縮雷，北面鼓之，縮，從也。雷以東西爲從。鼓，猶擊也。大夫而特縣，方賓鄉人之賢者，從士禮也。射則磬在東。古文「縮」爲「蹙」。【疏】正義曰：李氏如圭云：「在堂下兩階之間，^②東西節也。」 注云「縮，從也。雷以東西爲從」者，李氏云：「縮雷者，上當堂之南雷南北節也。凡東西爲橫，南北爲從，南雷則以東西爲從，謂之縮雷。」敖氏云：「縮，如縮俎之縮。縮雷者，縮於雷也。前雷兩端，東西鄉，設磬，當其下，亦如之，故於雷爲縮。」郝氏敬云：雷，檐間承雷也。縮雷者，當雷東西設之，於雷爲從，於堂爲橫也。云「大夫而特縣，方賓鄉人之賢

者，從士禮也」者，張氏爾岐云：「《周禮·小胥》：『掌正樂縣之位，王宮縣，諸侯軒縣，卿大夫判縣，士特縣。』凡縣鐘磬，半爲堵，全爲肆。」宮縣四面皆縣，如宮有牆也。軒縣，去其南面。判縣，又去其北面。特縣，又去其西面，特立一面而已。鐘磬編縣之，十六枚在一虞，謂之堵。鐘一堵，磬一堵，謂之肆。諸侯之卿大夫，半天子之卿大夫，西縣鐘，東縣磬。士亦半天子之士，縣磬而已。此鄉飲酒本諸侯卿大夫，^③合鐘磬俱有，而直有磬者，以方賓賢，俯從士禮也。」敖氏云：「此禮特縣，則有磬、鐘、鑄及鼓、鼗。惟言磬者，以其爲縣之主而居首，且可以取節於雷故也。」^④陳氏暘曰：「磬之爲器，昔人謂之樂石，立秋之音，夷則之器也。蓋其用編之則雜而小，離之則特而大。叔之離磬，則專虞之特磬，非十二器之編磬也。古之爲鐘，以十有二聲爲之

①「之」，原脫，今據《儀禮集說》補。

②「在上」，《儀禮集釋》有「階間者」三字。下，原作「上」，今據改。

③「酒」下，原衍「之」字，今據《續清經解》本及《儀禮鄭注句讀》刪。

④「節」，原作「爵」，今據《續清經解》本及《儀禮集說》改。

齊量。^①其爲磬，非有齊量也，因玉石自然，以十有二律爲之數度而已。《爾雅》：「大磬謂之磬。」「徒鼓磬謂之卷。」《周官·磬師》：「掌教擊磬、擊編鐘。」則知有編磬矣。《爾雅》言大以見小，《磬師》言鐘以見磬。大則特縣，小則編縣。《儀禮》：「鼗倚於頌磬西紃。」^②則所謂絃者，其編磬之繩歟？《小胥》：「凡縣鐘磬，半爲堵，全爲肆。」鄭氏釋之，謂編縣之十六枚同在一簣謂之堵，鐘磬各一堵謂之肆。禮圖取其倍八音之數而因之，是不知鐘磬特八音之二耳。謂之取其數，可乎？《典同》：「凡爲樂器，以十有二律爲之數度，以十有二聲爲之齊量。」則編鐘、編磬不過十二耳，謂之十六，可乎？嘗讀《漢書》，成帝時於榑水濱得石磬十六枚，未必非成帝前工師附益四清而爲之，非古制也。康成之說，得非因此而遂誤歟？古有大架，二十四枚同一簣簣，^③通十二律正倍之聲，亦庶乎古也。」盛氏世佐云：「編縣之法，^④經無明文可考。鄭云：十六枚，取象八風而倍之也。服子慎云：十九枚，取十二辰加七律也。唐李沖用二十四枚，取十二律倍聲也。大周正樂用十四枚，取五聲二變之倍數也。諸說紛如。」鄭公之言頗與《樂緯》四清聲合，後世多祖之。蓋以十二律加四清，合二八之數也。四清者，半律也。十二律皆有半，而此缺其八，且無變律。朱

子嘗譏其法太疎略而用有不周，則其非古制明矣。馬氏端臨善李沖所用，謂其上不失之四清，下不失之二變。然考朱子《鐘律》篇所著十二律，正變倍半之法，有三十六聲，去其不用者八音，亦當有二十八聲。李氏僅取十二律正倍之聲，而不及其變與變半，則猶未備也。唯陳氏以《周禮·典同》之文定爲十二枚，其議發於范鎮，最爲有據。《尚書傳》曰：天子將出，撞黃鍾之鐘，右五鐘皆應；入則撞蕤賓之鐘，左五鐘皆應。則鐘之應乎十二律也古矣。大者如此，小亦宜然。陳氏之言殆得之矣。「古文「縮」爲「蹙」者，胡氏承珙云：「《說文》：「縮，亂也。」「一曰蹙也。」縮、蹙同聲爲訓。《手部》亦云：「蹙，^⑤蹙引也。」蹙與蹙同。《曲禮》：「以足蹙路馬芻有誅。」^⑥《釋文》：「本又作「足蹙」。」《文選·羽獵賦》注云：「蹙、蹙古字通。」經典蹙亦有蹙義。《小雅·節南山》：「蹙蹙靡所騁。」傳云：「蹙蹙，縮小之

①「聲」，原作「律」，今據《樂書》改。

②「鼗」下，原衍「鼓」字，今據《樂書》刪。

③「簣」，原作「簣」，今據《樂書》改。

④「縣」，原作「磬」，今據《儀禮集編》改。

⑤「蹙」，原作「縮」，今據《儀禮古今文疏義》改。

⑥「蹙」，原作「蹙」，今據《儀禮古今文疏義》改。

貌。」是縮、蹙二字，聲、義皆可通，惟《禮經》縮多訓從。今文作「縮」者，正字；古文作「蹙」者，同聲借字，故鄭從今文。」王氏引之云：「東西可謂之橫，不可謂之從，注說非也。縮，當從古文作「蹙」。蹙，近也。磬在兩階之間，^①其北則雷矣。磬雖不在雷而近於雷，^②故曰蹙雷。《考工記·弓人》：「夫角之本，^③蹙於剡而休於氣，夫角之末，遠於剡而不休於氣。」鄭注曰：「蹙，近也。」正與此蹙字同義。縮乃蹙之假借耳。」江氏筠云：「此經本未及樂縣，故《記》亦不於縣致詳，其言此者，特以經有「笙人，堂下磬南，北面立」之文，本顯磬南之所在，兼不辨磬之爲從爲橫，亦無以見笙之去堂遠近，故特明之。謂爲論樂縣者，非也。敖氏謂此禮特縣，則有磬、鐘、鐃及鼓、鼗說爲得之。其云惟言磬者，以其爲縣之主而居首也，則所見猶未達耳。」主人、介凡升席自北方，降自南方。席南上，升由下，降由上，由便。【疏】正義曰：敖氏云：「此儀各一見於經記。」云「凡」者，似爲不見者言也。二席南上，升降皆當由下。^⑤其降由上者，由便耳。若例指爲正禮，則似失之。且經于主人之酢云「自席前適阼階上」，是其降亦未必皆自南方也。乃言「凡」，何與？「方氏苞云：「主人及介升席自北方，經有明文而《記》復舉此，何也？主人之降席無文，

介之降席雖見於受獻，而將徹俎，賓、主、介降席，皆不目其方，^⑥故舉此以著升降之凡例，而賓降席之方，亦可於升席自西方比類而得之矣。」褚氏寅亮云：「此正禮也，即康成所云「升由下、降由上」也。其主人受酢而自席前適阼階上者，以啐酒在席北端，故由便而非正也。然則此《記》是正禮，何以注亦云「由便」？蓋升以自下而上爲便，^⑦降以自上而下爲便，因其便而禮節生，即以是爲正焉，指身在席正中者言也。^⑧若身在席北，而必拘由下之禮，則反躡席而不便矣。故經從北降，此則真由便也。注兩「由便」，須如此分別看乃得。敖氏云：「此儀各一見於經。」乃云「凡」，何與？蓋與彼升降皆由下之說不合，故并記駁之耳。夫駁記以申其說，何所不可？」司正既舉觶而薦諸其

- ① 「在」，原作「當」，今據《經義述聞》改。
- ② 「雖」，原作「非」，今據《經義述聞》改。
- ③ 「弓」，原作「工」，今據《經義述聞》改。
- ④ 「記」，原脫，今據《儀禮集說》補。
- ⑤ 「皆」，原脫，今據《儀禮集說》補。
- ⑥ 「目」，原作「自」，今據《儀禮析疑》改。
- ⑦ 「蓋」，原脫，今據《儀禮管見》補。
- ⑧ 「指」，原作「猶」，今據《儀禮管見》改。

位。司正，主人之屬也。無獻，因其舉觶而薦之。【疏】正

義曰：敖氏云：「無獻者，異於眾賓；^①有薦者，別於其

黨。」凡旅不洗，敬禮殺也。【疏】正義曰：凡，凡尊卑

也。方氏苞云：「與酬者衆每人而洗，日不暇給矣。」注說

未安。不洗者不祭。不甚潔也。【疏】正義曰：敖氏

云：「此承上文『惟爲旅者』言也。若獻酒，雖有不洗者亦

祭之。」既旅，士不入。後正禮也。既旅，則將燕矣。

【疏】正義曰：張氏爾岐云：「士本爲觀禮來。」敖氏云：「此

士亦主人請之爲衆賓，或有故而不及與賓、介同來者也。

經不言士人之節，而記見此，則未旅以前皆可以入也。士

賤於大夫，可以不獻，然不與旅，^②則與主人之贊同，故不

與旅則不入矣。云「既」者，終言之也。士亦謂當在堂下者

也，其人則以齒立於西方，主人不迎。」盛氏世佐云：「此

士，謂有爵命者。《周禮·典命職》：大國、次國之士一命。

是也。其人也以觀禮，亦遵者之類也。大夫尊，當與於獻，

故其人以一人舉觶爲節，樂作則不入矣。士賤於大夫，故

不得與於獻，然非主人之官屬，故得與於旅，其人當以司正

舉觶爲節。既旅，則不入矣。《王制》云：「命鄉論秀士，升

之司徒，曰選士。」即此經所貢之賓也。「司徒論選士之秀

者而升之學，曰俊士。」升於學者，不征於司徒，^③曰造

士。「大樂正論造士之秀者以告於王，而升諸司馬，^④曰進

士。」司馬辨論官材，論進士之賢者，以告於王，而定其論。

論定，然後官之。任官，然後爵之。爵，謂命爲大夫、士也。

然則此士與衆賓固不侔矣。敖氏一之誤甚，且謂未旅以前

皆可入，皆非也。其位亦在堂下，東面北上，與衆賓齒。

《黨正職》云：「一命齒於鄉里。」是也。」褚氏寅亮云：「敖

氏謂「不與旅則與主人之贊同」，其失與解大夫不入一也。」

徹俎，賓、介、遵者之俎。受者以降，遂出，

授從者。以送之。【疏】正義曰：《校勘記》云：「注『送」

上，徐本、《集釋》俱有「以」字。」○敖氏云：「授從者云

「出」，則是飲酒之禮，^⑤他人無事者皆不入門。」張氏爾岐

云：「從者，從賓、介、遵者來者也。」主人之俎以東。

藏於東方。【疏】正義曰：東，適東壁也。盛氏世佐云：

①「眾」，原作「正」，今據《儀禮集說》補。

②「旅」下，原衍「酬」字，今據《儀禮集說》刪。

③「徒」，原作「馬」，今據《儀禮集說》改。

④「馬」，原作「徒」，今據《儀禮集說》改。

⑤「酒」下，原衍「者」字，今據《儀禮集說》刪。

「此於賓、介、遵者之俎云『出，授從者』，而主人之俎不云授主人之贊者，則是受者為主黨弟子無疑矣。」樂正命奏《陔》，賓出，至于階，《陔》作。【疏】正義曰：敖氏云：「此見命之人與奏之之節也。」《鄉射禮》云：「賓降及階，《陔》作。」張氏爾岐云：「命，命擊鼓者。賓出至階，其節也。」若有諸公，則大夫于主人之北，西面，其西面者，北上，統於公。【疏】正義曰：賈疏云：「若無諸公，則大夫南面西上，統於遵也。」敖氏云：「有諸公則大夫位於此，尊諸公也。主人之贊者西面北上，不與。贊，佐也。謂主人之屬佐，助主人禮事，徹鼐、沃盥，設薦俎者。西面北上，統於堂也。與，及也。不及，謂不獻酒。【疏】正義曰：敖氏云：「此贊者蓋以學中之有司及私臣爲之。西面之位，其在洗東南歟？與，謂與其禮也。下言『無算爵，然後與』，則前此所謂『不與』者，獻及旅酬也。是句似有脫文。位西面，且不與獻酬，^①亦飲酒於學之禮異者也。《特性·記》云：「公有司，門西北面東上，獻次衆賓。私臣，門東北面西上，獻次兄弟。」盛氏世佐云：「記文雖似錯雜，然皆依經文之序，鱗次櫛比，固秩然而不紊也。間有數節之儀，^②該茲一記，則或見於前，或見

於後，俾讀者得以參考，要未有凌亂隔越而不相比者。此及下文一條，以經文訂之，當在「樂正與立者皆薦以齒」之下，否則依「既旅，士不入」之下。今在此，蓋脫簡也。不與者，謂薦與旅耳。今乃綴之於末，與上文之言薦，言旅者隔越不屬，則所謂不與者竟不知其何所指矣。敖氏疑有脫文，而不知其爲脫簡，殆未深考歟？^③案：主人之贊者總記助主人理事者，與上若有諸公條皆屬總記，不依經次，故列於末。^④此云「不與」，下云「無算爵，然後與」，則不與之爲不與旅酬，不言可知。盛氏謂上文隔越不屬，則「不與」竟不知其何指，亦未就記文而細繹之也。^⑤敖氏疑脫文，盛疑脫簡，其失正同。凌氏《釋例》云：「凡旅酬，不及獻酒者不與。《鄉飲酒·記》：『主人之贊者西面北上，不與。』又云：『無算爵，然後與。』是不及獻酒者不與旅酬也。《禮記·鄉飲酒義》：『賓酬主人，主人酬介，介酬衆賓，少長以

- ① 「獻」，原作「旅」，今據《儀禮集說》改。
- ② 「儀」，原作「議」，今據《儀禮集編》改。
- ③ 「殆」，原作「殊」，今據《儀禮集編》改。
- ④ 「列」，原作「引」，今據《儀禮正義正誤》改。
- ⑤ 「就」，原作「說」，今據《儀禮正義正誤》改。

齒，終於沃洗者焉。」孔穎達《正義》亦引《鄉飲酒·記》，證「少長以齒，終於沃洗者」是無算爵之節也。考《鄉飲酒》旅酬：「辯，卒受者以觶降，坐奠于筐。」注：「辯，辯衆賓之在下者。」《鄉射》旅酬：「辯遂酬在下者，皆升受酬于西階上。卒受者以觶降，奠于筐。」注：「在下，謂賓黨也。」是旅酬不及衆賓以下也。《燕禮》、《大射》公爲賓旅酬，云「大夫辯受酬，如受賓酬之禮」，「卒受者以虛觶降，奠于筐」。爲卿、爲大夫旅酬，皆如初，並不及大夫以下。至爲士旅酬，始云「卒受者以爵興，西階上酬士」。又云：「士旅于西階上，辯。」注：「祝史、小臣，旅食皆及焉。」蓋前主人獻士時，祝史、小臣師及旅食者皆與，故注云然也。《特性禮》祭畢飲酒，賓旅西階一觶，長兄弟旅阼階一觶，並衆賓及衆兄弟交錯以辯。《特性·記》又云：「主婦及內賓、宗婦亦旅。」前主人獻酒，至衆賓、衆兄弟、內賓而止，故旅酬亦不及衆賓、衆兄弟、內賓以下也。《有司徹》旅酬，尸、主人、侑相酬畢，至于衆賓，遂及兄弟皆飲于上，遂及私人，拜受者升受，下飲，卒爵，升酌，以之其位，相酬辯。前主人獻酒，辯及私人，故旅酬亦辯及私人也。皆不及獻酒者，不與旅酬，與《鄉飲酒·記》合也。亦有獻而不與旅酬者，如《鄉飲酒》、《鄉射》、《燕禮》、《大射》獻工、獻笙，《鄉射》、《大射》獻獲

者、獻釋獲者是也。獻工、獻笙，爲樂而獻，^①獻獲者，獻釋獲者，爲射而獻，非正獻之禮，故不與旅酬也。《燕禮》、《大射》獻庶子，獻左右正、內小臣，亦不與旅酬者，獻庶子，獻左右正、內小臣，在爲士旅酬之後也。^②無算爵，然後與。燕乃及之。【疏】正義曰：賈疏云：「以其主人之屬，^③非主人所敬，^④故無算爵乃得酒也。」敖氏云：「此遠下於賓黨也。《鄉射禮》曰：無算爵，執觶者皆與旅。執觶亦主人之贊者也。」^⑤方氏苞云：「《特性·記》公有司獻次賓，此則與酬而不獻，何也？彼以公有司而助己之私祭，義近於賓。此以公有司給公事，義不得比於賓也。《特性》私臣獻次兄弟，此無獻，並不與酬，何也？士之私臣，隸子弟也，義同於兄弟。此所興賢能，將使出長之、人治之者也。賓興之日，可使私臣與賓介同獻酬乎？」^⑥事各異，則

- ① 「獻」下，原衍「獲」字，今據《禮經釋例》刪。
- ② 「屬」，原作「黨」，今據《儀禮注疏》改。
- ③ 「非主人所敬」，原脫，今據《儀禮注疏》補。
- ④ 「執」，原作「酬」，今據《儀禮集說》改。
- ⑤ 「介」，原作「客」，今據《儀禮析疑》改。

義從而變也。《鄉飲酒義》：❶旅酬終於沃洗者。與此經異，何也？彼所釋《黨正》之「飲酒於序，以正齒位」也，故曰「六十者坐，五十者立侍，以聽政役」，而豆之數各以年爲差，安得以混賓興之禮乎？」案：《鄉飲酒義》終于沃洗者，爲無算爵之節，非與此經異也。方氏誤與敖氏同。

右記禮樂儀節隆殺面位次序

❶「酒」，原脫，今據《儀禮析疑》補。

儀禮正義卷八 鄭氏注

受業江寧楊大培補

鄉射禮第五

鄭《目錄》云：「州長春秋以禮會民，而射於州序之禮。謂之鄉者，州，鄉之屬，鄉大夫或在焉，不改其禮。射禮於五禮屬嘉禮。大戴十一，小戴及《別錄》皆第五。」

【疏】正義曰：《儀禮釋官》曰：「案：鄉射有二：一是州長會民習射；一是鄉大夫貢士後，以此射詢衆庶。其禮皆先行鄉飲酒禮，但諸侯之鄉射，鄉大夫是大夫，州長是士。《記》云：『大夫兕中，士鹿中。』又鄉大夫射於庠，州長射於序，爲少異耳。」張氏爾岐云：「據注，此州長射禮，^①而云『鄉射』者，《周禮》『五州爲鄉』，一鄉管五州，鄉大夫或宅居一州之內，來臨此射禮。又鄉大夫大比興賢能訖，^②而以鄉射之禮五物詢衆庶，亦行此禮，故名

鄉射禮也。」吳氏廷華云：「此當兼鄉大夫、州長之射言，注、疏各舉其一耳。州，鄉之屬，故亦曰鄉。」敖氏曰：「鄉射者，士與其鄉之士、大夫會聚於學宮，飲酒而習射也。此與上篇大同小異，惟多射一節耳。亦飲酒，而但以射言者，主於射也。」郝氏敬云：「洪荒之初，禽獸逼人。聖王以弧矢爲威，教民自衛，其來尚矣。此男子之業，故古者天子至庶人莫不有事於射。比其敝也，相角而爭。聖人制爲禮，以教之讓，於是乎射禮興焉。其爲鄉射，何也？朝廷之上謂之國，邦國之中謂之鄉。鄭氏附會《周禮》，以鄉飲酒爲鄉大夫賓興，鄉射爲州長教民。士、大夫欲習射，孰不可用此禮者？何必鄉大夫與州長？禮主善俗。冠、昏以士，飲酒、習射以鄉，皆化民成俗之意。鄭謂鄉飲於庠，庠，鄉學，習射於序，序，州學。庠、序學校同地異名，養則爲庠，射則爲序。豈養老一學，習射又一學也？」盛氏世佐云：「此篇陳天子之州長春秋習射之禮。鄉老及鄉大夫賓賢能訖，亦

① 「射禮」，原作「習射」，今據《儀禮鄭注句讀》改。
② 「大」，原脫，今據《儀禮鄭注句讀》補。

用此禮詢衆庶，侯國亦如之。注疏專指諸侯之州長，^①似未備。先儒或目爲士、大夫習射之通禮，非。蓋以禮屬民，而讀灋、飲、射皆有民社者之責也，豈士、大夫平居所常行乎？士、大夫相與燕飲，其事有類於射者，投壺是也。又案：庠序之說，經傳各異。《鄉飲酒義》云：「主人拜迎賓於庠門之外。」則庠爲鄉學矣。《周禮·州長》：「春秋以禮會民而射于州序。」《黨正》：「國索鬼神而祭祀，則以禮屬民，而飲酒于序。」則序爲州黨學矣。鄭說蓋本諸此。又《學記》云：「黨有庠，術有序。」術，鄭讀爲遂。孔疏云：「此蓋鄉之所居，黨爲鄉學之庠，不別立序。凡六鄉之內州學以下皆爲庠，^②六遂之內縣學之下皆爲序也。」又云：「庾氏云：黨有庠，謂夏殷禮，非周法。義或然也。」《孟子》則謂：「夏曰校，殷曰序，周曰庠，學則三代共之。」夫鄉學之設，但聞鄉、黨殊名，不聞殷周異號。且《王制》云：「有虞氏養國老於上庠，養庶老於下庠。夏后氏養國老於東序，養庶老於西序。殷人養國老於右學，養庶老於左學。周人養國老於東膠，養庶老於虞庠。」《明堂位》亦云：「魯之米廩，有虞氏之庠也。序，夏后氏之序也。瞽宗，殷學也。類宮，周學也。」然則國學之名亦代不相襲矣。乃云「三代共之」，

此皆不可曉。朱子《通解·學制》篇既並列諸說，而斷之曰：「《孟子》說與上下數條皆不合，未詳其故。」又云：「古者教人，其立法大意，皆萬世通行，不可得而變革。若其名號位置節文之詳，則自經言之外，出於諸儒之所記者，今皆無以考其實矣。然不敢有所取舍，姑悉存之。讀者亦不必深究也。」斯言真得闕疑之旨矣。然以諸說之時世先後考之，竊謂當以《鄉飲酒義》及《周禮》之言爲正。^③蓋周之學制，自春秋時已廢不復講，故佻達成風，《子衿》作刺；魯僖能修泮宮，史克至作頌以誇美之。及其季世，七國兵爭，此制益蕩然矣。故孟子所至，輒惓惓以興復學校爲勸說。然其名號沿革之詳，容有得之傳聞而失實者。又況漢儒攬摭灰燼之餘，難以夏、殷之禮，何怪其參差而不相符乎？乃若《儀禮》、《周禮》皆周公制作時所定，而《鄉飲酒義》即《儀禮》之義疏也，亦不容有誤。鄭君據此，極爲有見。郝氏乃執《孟子》之言而詆之，過矣。且謂庠、序學校同地異名，則於鄉學、

①「疏」，原脫，今據《儀禮集編》補。

②「庠」，原作「序」，今據《續清經解》本改。

③「言」，原作「禮」，今據《儀禮集編》改。

國學之辨尤欠分曉，不更爲無稽之譚乎？」褚氏寅亮云：「此篇及《鄉飲酒》，敖氏以爲士與同鄉之士、大夫飲酒於學宮之禮。案之各經，義都不合，故不可從。」

鄉射之禮。主人戒賓，賓出迎，再拜。

主人荅再拜，乃請。主人，州長也。鄉大夫若在焉，則稱鄉大夫也。戒，猶警也，語也。出迎，出門也。請，告也。告賓以射事，不言拜辱，此爲習民以禮樂，不主爲賓己也。不謀賓者，時不獻賢能，事輕也。今郡國行此禮以季春。《周禮》：鄉老及鄉大夫三年正月獻賢能之書于王，退而以鄉射之禮五物詢衆庶。諸侯之鄉大夫既貢士於其君，亦用此禮射而詢衆庶乎？【疏】正義曰：張氏爾岐云：

「此射禮，先與賓飲酒，如鄉飲酒之儀。及立司正，將旅酬，乃暫止不旅而射。射已，更旅酬坐燕，並如鄉飲。凡賓至之前，賓退之後，其儀節並不殊也。此下言將射戒賓，陳設，速賓，凡三節，皆禮初事。」○《校勘記》曰：「注『鄉大夫若在焉』，誤作『卿』。『不言拜辱』，『辱』下，疏有『者』字。」云「主人，州長也。鄉大夫若在焉，則稱鄉大夫也」者，賈疏云：「鄉大夫是諸侯鄉大夫，則此州長亦諸侯之州

長，以士爲之，是以經云：「釋獲者執鹿中。」記云：「士鹿中。」若天子州長，中大夫爲之。《釋官》曰：「案：鄭注《鄉飲酒義》亦以州長爲士。《周禮》州長次鄉大夫一等，諸侯之鄉大夫以下大夫爲之，則諸侯之州長當上士爲之。《內則》：『州史獻諸州伯，州伯命藏諸州府。』伯亦長稱，州伯即州長也。盛氏世佐云：『主人，謂天子及諸侯之州長也。若其詢衆庶與，則鄉大夫也。鄉大夫所居之州，雖春秋習射，亦鄉大夫爲主人。其戒賓也親之，不合使州長。疏謂大夫來臨禮，州長戒賓，不自稱，稱鄉大夫。非。』胡氏肇昕云：「注云：『鄉大夫若在焉，則稱鄉大夫也。』謂鄉大夫若在州之中，則習射鄉大夫主之。經所謂主人則稱鄉大夫，非稱州長也。疏誤會注意，宜爲盛氏所駁。」云「戒，猶警也，語也」者，張氏爾岐云：「賓以州中處士賢者爲之。若大夫來爲遵，則易以公士。」方氏苞云：「冠之賓，贊，始汎戒之，前期三日筮之。既筮而宿之，前期一日告之。鄉飲，鄉射則並戒宿於即事之日，何也？冠子，私家之事，雖前期宿戒，尚恐奪於公事。興賢能，習射則國政也，鄉大夫既就先生而謀賓，介，則衆賓之當與，諸公、卿、大夫之來觀

①「警」下，原衍「之」，今據注刪。

者預備之矣。^①春秋習射，其法有常，其人有定，故可以及期戒、速，同日而畢事也。」吳氏廷華云：「射爲行禮之事最重，理當先期戒賓。」^②此與鄉飲俱不言先期，亦文省耳。《鄉飲》注乃造作「夙興」字，遂有戒賓與射同日之說，不知戒者先期告之，使之致敬，何等鄭重。若與射同日，則召賓足矣，何必曰戒？此皆因《鄉飲酒》有「不宿戒」之說，^③故據之。不知彼所謂「使能不宿戒」者，^④蓋謂諸職事皆能而嫻於禮，故不必宿戒之。若以賓言，則何得曰使？「云」出迎，出門也」者，盛氏世佐云：「主人戒賓，必詣賓家請之。賓出己家大門外，迎主人。疏謂出序之學門，^⑤非。」云「請，告也。告賓以射事，不言拜辱，此爲習民以禮樂，不主爲賓己也」者，敖氏曰：「請亦謂致戒辭而請之爲賓也。『請』下似脫一『賓』字。」方氏苞云：「州長教民習射，故賓不宿戒，不固辭，『同鄉飲酒，但不言拜其辱。』蓋此賓或在朝公士，或不仕之君子，與鄉大夫所舉賢能不同，即或用庠序中學士，亦奉長吏之教令而習禮，無所爲拜其辱也。」盛氏世佐云：「《鄉飲酒禮》兩云『賓拜辱』，此則云迎送者，拜辱明其意，迎送指其事，無異也。注說似求之過矣。」云「不謀賓者，時不獻賢能，事輕也」者，郝氏敬云：「射必有賓，教民序也。不謀賓，無介，禮主射，將觀德焉，非專禮賓

也。」胡氏肇昕曰：「此賓賢能之後，將習射以合民儲材，不能遽繩以觀德，故注以不謀賓爲事輕也。」引《周禮》者，《鄉大夫職》文。五物者：一曰和，二曰容，三曰主皮，四曰和容，五曰興舞。注云：「和載六德，容包六行也。庶民無射禮，因田獵分禽，則有主皮。主皮者，張皮射之，無侯也。主皮、和容、興舞，則六藝之射及禮樂與？當射之時，民必觀焉，因詢之也。」馬融《論語》注曰：「一曰和志，言其平心志也；二曰和容，言其和威儀也；三曰主皮，言其審正鵠也；四曰和頌，言其合音節也；五曰興舞，言其中舞蹈也。與鄭說異。賓禮辭，許。主人再拜，賓荅再拜。主人退，賓送，再拜。退，還射宮，省錄射事。」【疏】正義曰：賈疏云：「射宮，鄉庠、州序也。省錄射事，下文張侯等事也。」無介。雖先飲酒，主於射也，其序賓之禮略。【疏】正義曰：《射義》曰：「古者諸侯之射也，必先行燕

- ①「諸」，原作「眾」，今據《儀禮析疑》改。
- ②「理」，原作「謂」，今據《儀禮疑義》改。
- ③「酒」，《儀禮疑義》作「記」。
- ④「所謂」上，原衍「無」，今據《儀禮疑義》刪。
- ⑤「門」下，原衍「外」，今據《儀禮集編》刪。

禮；卿、大夫、士之射也，必先行鄉飲酒之禮。鄉飲有介，此無介者，鄉飲主於禮賓，此主於射，序賓之禮略，故不立介以輔賓也。敖氏曰：「無介者，以介尊次於賓，同於大夫，射時難爲耦也。」方氏苞云：「注與敖說皆近似而未得其情也。謂略於序賓，則賓長三人皆得受獻，而獨略於介，何義乎？謂難與合耦，則大夫雖衆，皆與士爲耦，介必學士之越其曹者，乃不得儕於羣士而與大夫耦乎？蓋《大射》、《鄉射》、《公食大夫》、《燕禮》皆有賓無介。有介者，獨《鄉飲酒》耳。五州之中，德行道藝相次比者必有數人，故立賓及介，而介之禮亞從賓，俾衆賓觀感而益自矜奮焉。若州長習射，則立賓以與主人行禮而倡衆耦足矣，無所用介。《鄉射》無介，則黨正之正齒位可知。大射、燕禮則有位者皆在列，賢者衆多，不可以賓、介盡之。公食大夫則異國之臣，惟正客當此盛禮而介不與。禮以義起，各有所當耳。」案：此說可備一解。

右 戒 賓

乃席賓，南面東上。不言於戶牖之間者，此射於序。【疏】正義曰：賈疏云：鄉飲酒在庠，庠有室，此據

州長射於序，以其無室無戶牖，①設席亦當戶牖之處耳。敖氏云：「不言戶牖間者，②可知也。《記》云『出自東房』，③有東房、西房則中有室，而席賓於戶牖之間也明矣。凡席於此者，皆東上，經不悉見之也。惟爲神席則西上。」方氏苞云：「燕禮司宮席賓于戶西，東上，昏禮主人筵于戶西，西上；將醴賓，改筵，東上，則凡賓席皆在戶牖間可知矣。下經『尊于賓席之東』，則在戶牖間之常位明矣。注疏說非。」高氏愈云：「賓席南面，居尊位也。《鄉飲酒禮》不及布席之面，此詳之。」褚氏寅亮云：「下經云『尊于賓席之東』，而不言房戶間，似州序實無室者。」盛氏世佐云：「此賓席亦當在牖前。經不言者，容射於序也。鄉大夫射於庠，庠有室，云牖前可也；州長射於序，序無室，云牖前不可也。序何以無室也？州之學小於鄉，其堂淺，去其室壁之限，堂斯深矣，無室則無房。本《記》曰『出自東房』，爲射於庠言之也。敖氏據此決其有室，非。序雖無室，然其

①「室」，原作「堂」，今據《續清經解》本及《儀禮注疏》改。

②「間」，原脫，今據《儀禮集說》補。

③「房」，原作「方」，今據《續清經解》本改。

制亦三間五架，^①與大夫士之私室殊，而謂席賓於戶牖間，亦非。」衆賓之席繼而西。言繼者，甫欲習衆席，未有

所殊別。【疏】正義曰：敖氏云：「衆賓，亦衆賓之長三人也。繼，繼賓席也。云繼者，明其以次而西，衆賓之席亦皆

不屬而東上。」蔡氏德晉云：「衆賓之席以次相繼而西，皆南向，當西房之外也。」注云「未有所殊別」者，褚氏寅亮

云：「明所以相連屬之故。其不妨連屬者，升降可各由其席之西端，不必留隙地也。賓既升降由下，衆賓同可知。」

韋氏協夢云：「此所謂『繼』，即《鄉飲》所謂『不屬』。衆賓之席依次而西，不相接屬，以便升降也。」張氏惠言云：「賓

有席西拜，知席不與衆賓繼。又《禮》云：『西序之席北上。』疏謂大夫多，尊東不受則於尊西，賓近於西，則三賓

東面。案：賓位不可移，當如《大射》小卿之位，在賓西。衆賓之席繼而西，故有西序之席。」胡氏肇昕曰：「經言『繼而

西』，言衆賓之席皆在賓之西，相繼而西，非謂衆賓與賓席相連屬也。《鄉飲》言衆賓之席不屬，此言『繼而西』，互爲

詳略，非有異也。方氏苞謂鄉飲興賢能以獻於君，將出使長之，^③人使治之，故於興之日即辨其等列。若春秋習

射，即公士爲賓，亦宜與鄉之學士齒，無庸過爲區別，說似太泥。」席主人于阼階上，西面。阼階，東階。【疏】

正義曰：敖氏云：「阼階上，東西節也。南北當東序，凡主位皆然。」褚氏寅亮云：「在階上少東，而又少南，於東序端。」韋氏協夢云：「主人席當東序，則西面北上。鄉飲有

介席，與主人席對。此無介，則主人亦無對席矣。」胡氏肇昕云：「西序雖無介席，而衆賓多，則亦席於西序，但不得

與主人席對耳。」張氏惠言云：「《記》云：『西序之席北上。』疏謂大夫多，尊東不受則於尊西，賓近於西，則三賓

東面。案：賓位不可移，當如《大射》小卿之位，在賓西。衆賓繼而西，故有西序之席。」^④尊于賓席之東，兩

壺，斯禁。左玄酒，皆加勺。筐在其南，東肆。斯禁，禁切地無足者也。設尊者北面，西曰左，尚之

也。肆，陳也。【疏】正義曰：敖氏云：「賓席之東，即房戶之間也。」張氏爾岐云：「兩壺，酒與玄酒。筐，以貯爵、觶，

尊南東向陳之，首在西。」高氏愈云：「設尊於賓席之東者，賓與主人酌之皆便也。」盛氏世佐云：「《鄉飲酒禮》云：

①「間」，原作「門」，今據《儀禮集編》改。

②「禮」，《儀禮圖》作「記」。

③「將」，原作「使」，今據《儀禮析疑》改。

④此條張惠言引文，與上文重，疑爲衍文。

「尊兩壺于房戶間。」此不言房戶間而言「賓席之東」者，容或有射於序者，無房戶可言也。賓席隨地而移，故依之以見設壺之處，且與前互備。此古人立言之法。」設洗于阼階東南，南北以堂深，東西當東榮。水在洗東，筐在洗西，南肆。榮，屋翼也。【疏】正義曰：張氏爾岐云：「下筐亦以貯鬴。」縣于洗東北，西面。此縣謂磬也。縣於東方，辟射位也。但縣磬者，半天子之士，無鐘。【疏】正義曰：敖氏云：縣不近階者，宜辟東縣之正位也。《大射》東縣在阼階之東。蔡氏德晉云：「鄉飲無射事，則縣於階間。今辟射位，故縣於洗東北也。」韋氏協夢云：「水在洗東，縣又在水之北，於洗爲東北。」注云「此縣，謂磬也」，又云「但縣磬者，半天子之士，無鐘」者，賈疏云：《周禮·小胥職》云：「半爲堵，全爲肆。」鄭云：「鐘磬者編縣之二八十六枚而在一簾，謂之堵。鐘一堵，磬一堵，謂之肆。諸侯之卿、大夫半天子之卿、大夫。天子之卿、大夫判縣者，東西各有鐘磬爲肆；諸侯之卿、大夫判縣者，分一肆於兩廂，東縣磬，西縣鐘。若天子之士特縣者，直東廂有鐘磬二簾爲一肆。諸侯之士分取磬而已，故云「無鐘」。」敖氏云：「縣，謂縣鐘、磬與鑄於筍簾也。鼓

磬之屬亦存焉。《周官·小胥職》：「凡縣鐘磬，半爲堵，全爲肆。」又曰：「天子宮縣，諸侯軒縣，卿、大夫判縣，士特縣。」然則凡爲士者之樂皆得縣鐘與磬，惟以特而別於其上耳。《大射儀》言國君西方之縣，先磬，次鐘，次鑄，鼓磬在其南。下經云：「不鼓不釋。」《鐘師職》云：「掌以鐘鼓奏《九夏》。」《鑄師職》云：「掌金奏之鼓。」此與上篇皆實出奏《陔》。《陔夏》，金奏之一也。然則是禮亦有鐘、鼓、鑄明矣。褚氏寅亮云：《小胥》云「凡縣」者，「知縣亦有時而堵者矣。天子之宮縣，諸侯之軒縣，其爲肆不待言，①即天子卿、大夫之判縣，士之特縣，亦皆肆也。然則所謂堵者果何屬乎？經雖無明文，注及疏以義差次之，②故知諸侯之卿、大夫東縣磬，西縣鐘。士則有磬而無鐘也。東磬西鐘，合之乃成肆。就東西分言，則均之半爲堵。士無鐘，直半爲堵而已。無鐘，則無鑄矣。然則《陔夏》乃金奏之一，賓出奏《陔》而不用金奏，可乎？曰：禮所不得用者，雖專用鼓可也。《集說》謂飲、射皆有鐘、鼓、鑄，恐未的。」盛氏世佐云：「縣，編縣也。不言所縣者，所縣非一等也。天子之

① 「其爲肆」，原脫，今據《儀禮管見》補。

② 「次」，原脫，今據《儀禮管見》補。

鄉大夫、州長、遂大夫皆判縣，鐘磬二肆。諸侯之鄉大夫半之，鐘磬各一堵。^①天子之縣正特縣，鐘磬一肆。諸侯之州長半之，唯磬一堵。斯禮也，實兼此數者故也。大夫判縣，當東西分列。今皆在洗東北者，辟君也。《大射》君禮，本合三面皆縣，以辟射位闕其北，唯東西各一肆，故此宜辟之。^②又案：《春秋》襄十一年《左傳》云：鄭人賂晉侯歌鐘二肆，及其鑄、磬。晉侯以樂之半賜魏絳，於是始有金石之樂，^③禮也。孔疏云：「以魏絳蒙賜，始有金石之樂，知未賜不得有也。賜之而云禮也，知禮法得賜之也。」據此，諸侯之大夫未蒙君賜，在私家不得有鐘磬與鑄之樂。其有之者，蓋出於特典。此在公所行禮，雖未賜，亦合鐘磬俱有，鑄未聞。據賈疏，則卿、大夫以下皆無鑄也。下經云「不鼓不釋」，則鼓亦有之，以其非金石之樂，大夫、士皆可用也。此與上篇皆大夫、士之禮，敖氏雜引天子、諸侯禮釋之，誤。經云「西面」，則鼓之者東面矣。若有鐘在其南，鼓又在其南，皆西面也。鞀未聞。乃張侯，下綱不及地武。侯，謂所射布也。綱，持舌繩也。武，迹也。中人之迹尺二寸。侯象人，綱即其足也。是以取數焉。【疏】正義曰：敖氏云：「射布而曰侯者，王朝射之，以威不寧侯，遂以名之也。諸侯以下，則因其名而不改與？」下綱，謂已繫者也。

綱不及地武，則下个亦然。」張氏爾岐云：「侯制有中、有躬、有舌、有綱、有緝。中，其身也，方一丈。倍中以為躬。中之上下橫接一幅，各二丈，謂之躬。倍躬為左右舌，用布四丈，接於躬上，左右各出一丈為舌。下舌半上舌，用布三丈接躬下，左右各出五尺也。其持舌之繩謂之綱。維其綱於幹者，又謂之緝。上下各有綱，下綱去地之節則尺二寸。」程氏瑤田云：「《司裘職》王及圻內諸侯、卿、大夫，大射皆皮侯也。據《大射儀》，列國諸侯與其羣臣大射，亦張皮侯。故《司裘》注云：列國諸侯，射之三侯。即引《大射儀》謂皮侯也。然則大射未有用皮侯者。若賓射，天子亦張皮侯。據《射人職》王三侯五正，諸侯二侯三正，孤、卿、大夫一侯二正，士豢侯二正。注謂三侯者，五正、三正、二正之侯；二侯者，三正、二正之侯；一侯者，二正之侯。則天子亦張畫布之侯。《梓人職》所謂「張五采之侯」，注謂「五采畫正之侯」是也。又《梓人職》：張獸侯，則王以息燕。注云「畫獸之侯」，即此下記所謂白質、赤質布侯之等，

① 「各」，原作「為」，今據《儀禮集編》改。

② 「故」下，原衍「於」字，今據《儀禮集編》刪。

③ 「於是」下，《儀禮集編》有「魏絳」二字。

蓋皆以獸畫於布，是天子於燕射亦張布侯也。下記鄉侯，乃此經鄉射之侯，而不用下記之獸侯。注以鄉侯采法無正文，以其爲賓射之類，故約之爲二正之采侯也。獸侯詳是記者，注云：「天子諸侯之燕射，各以其鄉射之禮而張此侯。」然則雖詳是記，而非鄉射之侯也。又案：鵠、正二字，散文雖通，而實有別。故《司裘》張大侯則曰「設鵠」，《大射儀》張三侯則曰「見鵠」，《梓人》張皮侯則曰「棲鵠」。若《射人職》言正，則非皮侯也。是以注解「鵠」字云：「所射也，以皮爲之。」又云：「以虎、豹、熊、麋之皮飾其側，^①又方制之以爲辜，謂之鵠，著於侯中，所謂皮侯。」其解「正」字，但云「所射也」，以其爲布侯也。故孔沖遠《齊風·猗嗟》詩正義云：「正之廣狹無文。鄭於《周禮》考之，以爲大射則張皮侯而設鵠，賓射則張布侯而畫正也。」盛氏世佐云：「案：鄉侯以布爲之，侯中用布五幅。幅長一丈，廣二尺。古者布幅廣二尺二寸，以二寸爲縫。諸幅皆以二尺計之，又以一幅橫接於中之上下，謂之躬，躬各二丈。其接於躬者謂之舌，亦謂之个。上舌四丈，下舌三丈，上廣下狹也。合之，用布十六丈。下綱不及地武，則上綱去地丈九尺二寸矣。」焦氏以恕云：「侯之上下方，左右各有五尺之躬，其上方又各有一丈之舌，下方亦各有五尺之舌，必綴以綱，而

繫之於兩植，而後其侯得牢焉，所謂張也。」不繫左下綱，中掩束之。事未至也。【疏】正義曰：敖氏云：「侯以左爲尊，故事未至則不繫左下綱也。中掩束之者，中掩左下个，而以綱束之也。下个出於躬五尺，中掩之，是所掩者二尺五寸矣。」褚氏寅亮云：「以左下綱向上斜掩，過侯中而束於右上綱，故曰「中掩束之」也。」張氏爾岐云：「侯向堂爲面，以西爲左。射事未至，故且不繫左下綱，並綱與舌向東掩束之，待司馬命張侯，乃脫束繫綱也。」盛氏世佐云：「案：中，讀如字，《釋文》『丁仲反』，非。下舌三丈，中掩之，是所掩者丈五尺也。姜氏訓中爲侯中之中，謂掩其中而束之也，亦是一解。」焦氏以恕云：「謂之中掩者，侯中一丈，而左方之躬與舌合長一丈，^②引此一丈以向右方，則適與侯中相掩，故曰「中掩」也。不繫左下綱，猶若未張者然。故下文比三耦之後，更曰「司馬命張侯」也。」方氏苞云：「凡經文彼此互見者，其見之各有所宜，如畫物者，司空之屬，埽所畫者司宮。其升降皆自北階，義當於《大射》見之。《大射》既詳，則丹墨、尺度、升降所由不容有異，

① 「虎」，原作「席」，今據《續清經解》本改。

② 「方」，原作「右」，據《續清經解》本改。

而《鄉射》之畫者，埽者或州之有司，或州長之私人，不言而可知。侯綱去地之數，掩束左下綱之度，說束繫綱之節，^①義當於《鄉射》見之。俾學士私居習射，具知其儀法。《鄉射》既詳，則《大射》惟著三侯之高下與設張者量人與巾車而已。聖人制禮審則宜類，而使人曲得其情。聖人之文隨事異形，而措之各有其地。凡互見者，皆可以是以推之。『乏，參侯道，居侯黨之一，西五步。』容謂之乏，

所以爲獲者御矢也。侯道五十步，此乏去侯北十丈，西三丈。【疏】正義曰：注「此乏去侯」，《校勘記》云：「乏，監本誤作『之』。」○敖氏云：「《爾雅》曰：乏，謂之防。說者云：如今牀頭小曲屏風也。侯黨，指侯之西邊而言。此乏

參分侯道而居其一也，乃云『侯黨』者，明雖取數於侯道，實取節於侯黨也。西五步，亦謂侯黨之西也。然則此乏其南十丈，其東三丈，乃與侯黨相當與？」郝氏敬曰：「乏，以皮爲之，形如曲屏，唱獲者所隱蔽。」^②一名容，容身於內，以避矢。矢力至此乏竭，故名乏。黨，偏近也。《玉藻》云：

侍坐引去君之黨。鄉侯去射位五十步，蓋三十丈也。三分之，而乏偏近侯一分，則去侯十丈，去堂上二十丈也。西五步，謂去侯西三丈，避矢道也。『張氏爾岐云：「乏，狀類曲屏，以革爲之。唱獲者於此容身，故謂之容。矢力不及，故

謂之乏。黨，旁也。三分侯道而居旁之一偏西者五步，此設乏之節也。侯道五十步，步六尺，計三十丈。乏居三之一，^③西五步，故云「北十丈，西三丈」。必於此者，取可察中否，唱獲聲達堂上也。」盛氏世佐云：「此言設乏之法也。參侯道居侯黨之一者，其南北節也。西五步者，東西節也。黨，郝訓偏近，得之。蓋侯道三十丈，若第三分侯道而居其一，未知其近堂與？近侯與？惟云「居侯黨之一」，而後知其去侯十丈也。先儒以侯旁釋之，其義頗晦。且經云「西五步」，則其在侯西偏明矣，何必以黨爲旁乎？」高氏愈云：「侯道五十弓，參三之，而近侯身者居其一，則下以瞻中否，而上得聞唱獲聲，於近遠爲得中也。又居西偏五步，則爲矢所不及矣。」褚氏寅亮云：「聶氏崇義曰：乏，縱廣七尺有半，以牛革鞣，漆之。陳氏祥道云：「正面北，乏面南，故文反正爲乏。謂之容，以獲者所屏也。」鄉侯五十弓，則三十丈，侯外門內，又須有餘地以容往來。《記》云：「序則物當棟。」士制，棟下至堂廉約三丈六尺，庭深三於堂。

① 「束」，原作「左」，今據《儀禮析疑》改。

② 「獲」，原作「護」，今據《續清經解》本改。

③ 「一」，原作「十」，今據《續清經解》本改。

士堂之深，自室外至堂廉約五丈四尺，^①三之則十六丈二尺。合計不及二十丈，不足以容侯道。然則州長雖士，而州序之庭蓋深於士廟及寢之庭也。」胡氏肇昕云：「方氏苞亦云：『遠於堂而與侯近，故曰侯黨。』與郝說同。但以黨爲旁，既混於『西五步』之文，而以黨爲偏近，謂參分侯道而居侯偏近之一，義亦不顯。三分侯道而居其一，知其近侯非近堂者，經以『侯』字明之，非以『黨』字明之也。考經文以『侯黨』與『侯道』對言，皆實有所指。若以『黨』爲偏近，與上文『道』非同類矣。」今案：黨，所也。《左氏·哀五年傳》：「何黨之乎？」杜注：「黨，所也。」《公羊·文十三年傳》：「往黨衛侯何？」注：「黨，所也。」劉熙《釋名·釋州國》云：「上黨，黨，所也；在山上，其所最高，故曰上黨也。」然則參侯道居侯黨之一者，謂參侯道而居侯所三分之一也。王氏引之云：「之一」二字，當在「乏參侯道」下，讀「乏參侯道之一」爲句。乏參侯道之一者，乏之去侯之度參分侯道之一也。侯道三十丈，參分之一爲十丈。經言「乏參侯道之一」，故注言「此乏去侯北十丈」也。乏在其西五步，故云居侯黨西五步。六尺爲步，五六三丈。經言居侯黨西五步，故注言去侯西三丈也。不云北幾步者，參分侯道之一爲去侯北十六步又六分步之四，奇數不成步，不可

以步言，故不云北幾步，而云「參侯道之一」也。云「參侯道之一」，則南北之度已明，而猶未及東西之度，故又云居侯黨西五步也。」

右陳設

羹定。肉謂之羹。定，猶熟也。謂狗熟可食。

【疏】正義曰：注「猶熟也」。《校勘記》云：「熟，徐本、《通解》俱作『孰』，下同。案：此二字諸本錯出，宜從『孰』，後不具校。」主人朝服，乃速賓。賓朝服出迎，再拜。主人荅，再拜，退。賓送，再拜。速，召也。射賓輕也，戒時玄端。今郡國行此鄉射禮，皮弁服，與《禮》爲異。【疏】正義曰：敖氏云：「禮戒、速同服，此速賓朝服，則戒時亦朝服可知。鄉射而朝服，其義與鄉飲同。」盛氏世佐云：「於此乃言朝服，則戒時不朝服明矣。」《鄉飲酒禮》不言主人服，而其《記》云「朝服而謀賓、介」，是戒、速亦皆朝服也。主人待賓輕重之差於此可見。敖說非。」方氏苞云：「興賢能，國之重典也。故戒賓、宿賓皆不言所服，

①「外」，原脫，今據《儀禮管見》補。

舍朝服無可服也。^①會民習射，疑可以常服，故於速賓特舉朝服，則前此皆常服可知矣。」凌氏廷堪云：「考《鄉飲酒禮》經文不言何服，唯《記》云「鄉朝服而謀賓、介」，故知《鄉飲酒》之爲朝服。《鄉射禮》唯宿賓、拜賜、拜辱言朝服，他皆不言者，例見於此，故文不具也。則戒賓時當亦朝服，如《鄉飲酒》。非若「息司正」注以爲服玄端，經有主人釋服之文爲可據也。《公食大夫禮》戒賓不言朝服者，亦文不具。其實皆服朝服。食禮盛於燕禮，燕禮用朝服，^②豈有食禮戒賓反用玄端者？敖氏之說當矣。」韋氏協夢云：「《射義》曰：鄉大夫之射也，必先行鄉飲酒之禮。此篇自立司正以前，皆鄉飲禮也。既以鄉飲之禮，則戒賓之服自同。敖說是也。」胡氏肇昕云：「此經盛氏、方氏從注說。凌氏、韋氏從敖說，與注異。考《鄉射》雖先行鄉飲酒之禮，而其禮輕於鄉飲酒，《鄉飲》經文不言何服，則戒、宿同爲一服可知。《鄉射》於速賓特言朝服，則戒賓非朝服可知。如以《鄉射》唯宿賓、拜賜、拜辱言朝服，他皆不言者，例見於《鄉飲》，故文不具。夫《鄉飲》經文未嘗言朝服也，《記》始言朝服而謀賓、介耳。《記》在作經者之後，不得云例見於《鄉飲》也。《鄉飲》戒、^③速同朝服，《鄉射》與之同。則當於戒賓時特言朝服，以詳《鄉飲》之所略。不得於速賓始言朝

服，令人疑宿、戒之相殊也。注說甚精，不得據敖說而駁之。」賓及衆賓遂從之。【疏】正義曰：敖氏云：「主人既退，衆賓乃至於賓之門，而與之皆行也。云遂者，雖相去有間，而事則實相接也。」

右 速 賓

及門，主人一相出迎于門外，再拜；賓荅再拜。相，主人家臣，擯贊傳命者。【疏】正義曰：張氏爾岐云：「此下言飲賓之事，迎賓拜至；主人獻賓；賓酢主人；主人酬賓；主人獻衆賓；一人舉觴爲旅酬之端；遵人；主人獻遵，自酢；工笙合樂樂賓；主人獻工與笙，乃立司正以安賓察衆：凡十節，皆與《鄉飲酒禮》同。此爲射而飲，其後即詳射事。」○「及門」，敖氏云：「門，學門也。」韋氏協夢云：「鄉飲行禮於庠，鄉射行禮於序。庠、序唯有一門，故皆直言門而不言大門、內門。」注云「相，主人家

①「可」，原作「所」，今據《儀禮析疑》改。

②「燕禮」，原脫，今據《禮經釋例》補。

③「戒」，原作「介」，今據《續清經解》本改。

臣，擯贊傳命者」，盛氏世佐云：「若射於序，則爲之相者其黨正與？」吳氏廷華云：「飲射皆公事，不當用家臣。《鄉飲》注以相爲主人之吏，蓋以屬官言，是也。」揖衆賓。

差卑，禮宜異。【疏】正義曰：張氏爾岐云：「同是鄉人無爵者，唯據立爲賓者尊，故於衆賓云『差卑』。」主人以賓揖，先入。以，猶與也。先入，入門右西面。【疏】正義

曰：高氏愈云：「能左右之曰以」，此云「以」者，賓之進退視主人也。」①胡氏肇昕云：「以，與，聲之轉。主賓相接爲平等之稱，故曰與也。」賓厭衆賓，衆賓皆入門左，東面北上。賓少進。引手曰厭。少進，差在前也。

今文皆曰「揖衆賓」。【疏】正義曰：注云「少進，差在前也」者，敖氏云：少進，謂少東。方氏苞云：「少進而東，以獨與主人揖讓也。《鄉飲酒》之賓，介禮宜同。」盛氏世佐云：

「少進，謂少北。既云『北上』，又云『賓少進』者，衆賓雖皆北上，其實比肩而立，賓序在前，去衆賓差遠也。敖說非。」程氏瑤田云：「《鄉飲酒禮》注『皆入門西，東面』。疏以主人至門內雷待賓，則賓此時亦在門內雷矣。然云『北上，賓少進』者，則賓與衆賓堂下西階西之位準此矣。賓位直西序，衆賓以次而南，少退於賓。據賓降、辭洗、降洗、進退之

節擬之，則位不迫於階，而遠在階南矣。下經「賓辭洗」注云：「言東北面，則位南於洗矣。」案：位亦不得南於洗。賓位必與主人位相對，衆賓位必與兄弟位相對。主人及兄弟之位，見《士冠禮》「主人立于阼階下，直東序，西面。兄弟立于洗東，西面」。然則兄弟退於主人，既曰洗東，雖衆兄弟以次而南，其長必略當洗。主人位在兄弟上，雖近於洗，必少北於洗。準此以定賓位南北之節，北不迫於階，南不踰於洗矣。」主人以賓三揖，皆行。及階，三讓，主人升一等，賓升。三讓而主人先升者，是主人先讓於賓。不俱升者，賓客之道，進宜難也。【疏】正義曰：言「皆行」者，賈疏云：「賓主既行，衆賓亦行。」敖氏云：「皆行，言無先後也。」②郝氏敬云：「皆行，主人與正賓同行也。」方氏苞云：「主人接賓前後儀法，皆與《飲酒》同，惟此言「皆行」。《鄉飲酒》主人與賓揖讓而升，介及衆賓徐進至階下，③事不相連，《鄉射》則衆賓皆隨賓而行也。興賢能，則全用賓主之禮，故聽其自行。教射則兼用有司之

①「視」，原作「似」，今據《禮經本義》改。

②「無」，原作「皆」，今據《儀禮集說》改。

③「及」，原作「至」，今據《儀禮析疑》改。

法，故使之隨行。黨正之正齒位，賓入而衆賓從之，亦此義也。《鄉飲酒》之衆賓，主人不酬，而《鄉射》則衆賓長亦受酬，以大夫不與，則長正當介位也。敖氏似謂賓與主人同行。果爾，則宜稱「並」，不宜曰「皆」。胡氏肇昕云：「案：方氏從賈疏說，然此節究以敖氏、郝氏說爲當。」注云

「三讓而主人先升者，是主人先讓於賓。不俱升者，賓客之道，進宜難也」者，敖氏云：「主人升一等，賓乃升，敵者之禮也。」方氏苞云：「凡敵者讓登，『主人先登，客從之』，謂舉步少有先後耳。此賓，州民也，故州長先升一等，而後賓升。燕禮則賓升，公降一等而揖之，義亦類此。」胡氏肇昕云：「《鄉飲酒禮》：至於階三讓，主人升，賓升。此盛其禮，以尊賓爲敵者之禮也。此言『主人升一等，賓升』，射禮賓較卑，故不敢與主人並升，與鄉飲酒異也。舊說多誤。」吳氏廷華云：「主人有道賓之義，故先升，然不讓則疑於倨，故讓至於三。又主人既先道，賓自宜後升。注以爲進宜難，無謂。」主人阼階上，當楣北面再拜。賓西階上，當楣北面荅再拜。主人拜賓至此堂。

右迎賓拜至

主人坐取爵于上篚以降。將獻賓也。【疏】

正義曰：「主人坐取爵」，《校勘記》云：「《通解》無『坐』字。」○韋氏協夢云：「以降，降洗也。」賓降。從主人也。

主人阼階前西面坐奠爵，興，辭降。重以主人事煩賓也。今文無「阼階」。【疏】正義曰：韋氏協夢云：

「坐奠爵，奠爵於階前也。」

注云「今文無『阼階』」者，胡

氏承珙云：「今文無阼階」，似當作「今文無阼階前」。蓋今文但云「主人西面坐，奠爵」而已。若只無「阼階」二字，

則是以「主人前」爲句，讀爲「王前」、「闕前」之「前」，^①《禮經》無此文例矣。下文：「賓以虛爵降。主人降。賓西階

前東面坐，奠爵，興，辭降。」彼有「西階前」，此自當有「阼階前」，故鄭從古文。「賓對。對，荅。主人坐取爵，

興，適洗，南面坐奠爵于篚下，盥洗。盥手又洗

爵，飲潔敬也。古文「盥」皆作「浣」。【疏】正義曰：注「飲

潔敬也」，《校勘記》云：「飲，徐、陳、《通解》俱作『致』。」古

文「盥」皆作「浣」者，說詳《士冠禮》。賓進，東北面

辭洗。必進者，方辭洗，宜違位也。言東北面，則位南於

①「闕」，原作「蠲」，今據《儀禮古今文疏義》改。

洗矣。【疏】正義曰：張氏爾岐云：「《鄉飲酒》此處注異。彼於「東」字句，此於「進」字句。」主人坐奠爵于筐，興對，賓反位。反從降之位也。《鄉飲酒》曰：當西序東面。【疏】正義曰：「當西序東西」，《校勘記》云：「下『西』字，徐本、《通解》、敖氏俱作『面』。」主人卒洗，壹揖，壹讓，以賓升。賓西階上北面拜洗。主人阼階上北面奠爵，遂荅拜，乃降。乃降，將更盥也。古文「壹」皆作「一」。【疏】正義曰：高氏愈云：「《鄉飲》，主人奠爵，不言西面，賓拜洗，主人奠爵，不言北面，故此詳之。」賓降，主人辭降，賓對。主人卒盥，壹揖壹讓，升；賓升，西階上疑立。疑，止也，有矜莊之色。【疏】正義曰：朱子云：賓降，案：《鄉飲酒》曰「當西序東面」。主人坐取爵，實之賓席之前，西北面獻賓。進於賓也。凡進物曰獻。【疏】正義曰：《校勘記》云：「賓席之前」，敖氏云：「席之，當作之席。」注「進於賓也」，「進」下，徐本有「酒」字，與單疏標目合，《通解》無。「賓西階上北面拜，主人少退。少退，猶少辟也。【疏】正義曰：注「猶少辟也」，《校勘記》云：

「少，《釋文》作『小』。」賓進受爵于席前，復位。復位，西階上位。主人阼階上拜送爵，賓少退。【疏】正義曰：高氏愈云：「賓西階上拜受爵，北面，則主人阼階拜送爵，亦當北面矣。」薦脯醢。薦，進。賓升席自西方。賓升降由下也。乃設折俎。牲體枝解節折以實俎也。主人阼階東疑立。賓坐，左執爵，右祭脯醢，奠爵于薦西，興，取肺，坐絕祭。卻左手執本，右手絕末以祭也。肫離，上爲本，下爲末。【疏】正義曰：盛氏世佐云：「《鄉飲酒禮》云：『右手取肺，卻左手執本，坐弗繚，右絕末以祭。』此亦同，但文略耳。」胡氏肇昕云：「注「卻左手執本，右手絕末以祭」，用《鄉飲酒》文。不云弗繚者，以彼爲繚祭，此絕祭也。」尚左手臍之。臍，嘗也。右手在下，絕以授口嘗之。興加于俎，坐挽手，執爵，遂祭酒，興，席末坐啐酒。挽，拭也。啐，嘗也。古文「挽」作「說」。降席，坐奠爵，拜，告旨，降席，席西也。旨，美也。【疏】正

① 「但」，原作「故」，今據《儀禮集編》改。

義曰：「降席，坐奠爵」，方氏苞曰：「席南鄉北鄉，以西方爲上。」升席自下，賓不宜由西，以不欲與主人相背，變其常，故特著之。降席本宜自西，故不言。「告旨」者，張氏爾岐云：「告主人曰旨酒。」執爵興，主人阼階上荅拜。賓西階上，北面坐卒爵，興，坐奠爵，遂拜，執爵興。卒，盡。主人阼階上荅拜。

右主人獻賓

賓以虛爵降，將洗以酢主人。【疏】正義曰：注

以酢主人，《校勘記》云：「酢，《釋文》、《要義》俱作『醋』。」

○賈疏云：《鄉飲酒》不言虛爵，此不言洗，互見爲義，相兼乃備也。主人降。從賓也。降立阼階東，西面，當東

序。賓西階前東面坐奠爵，興，辭降。【疏】正

義曰：高氏愈云：《鄉飲酒》賓辭降，不言東面。今詳

之。主人對。賓坐取爵，適洗，北面坐奠爵

于篚下，興，盥洗。賓北面盥洗，自外來。【疏】正義

曰：高氏愈云：「篚下」，當作「下篚」，對前「上篚」而言。

以其設於阼階下，故云下篚也。」方氏苞云：「注疏：主人

自內出，故南面洗；賓自外人，故北面洗。非也。古者爲長之道通於師。①《鄉飲酒》、《鄉射》之主人，長也，師也；

賓，民也，弟子也。故雖執賓主之禮，而兼存師、弟子之義也。然則主人之獻賓西北面，賓酢主人東南面，何也？尊

賓之義既明著於戶牖間之面位矣，其餘儀節又各有時措之宜。主人實爵於尊南，而進獻賓之席前，自宜北面；賓實

爵於尊南，而降至主人之席前，自宜南面。然則《燕》與《大射》，主人代君賜爵，而洗皆北面，何也？君雖使膳宰爲獻

主，而膳宰所執則爲賓舉饌之禮。若南面，則嫌以主人自居。其升也，從賓之後，而由西階，亦此義也。」主人阼

階之東，南面辭洗。賓坐奠爵于篚，興，對。

主人反位。反位，從降之位也。主人辭洗，進也。【疏】

正義曰：注「主人辭洗，進也」，《校勘記》云：「徐本、敖本俱無「也」字，與單疏標目合。《通解》有。」云「反位，從

降之位」者，案：《鄉飲酒禮》云「主人復阼階東西面」，上文

「主人降」注云「降立阼階東西面」，故云「從降之位也」。云

「主人辭洗，進也」者，蓋主人降在阼階東西面，因辭洗進而

①「之」，原脫，今據《儀禮析疑》補。

東南面。今復反從降之位也。賈疏未明。賓卒洗，揖

讓如初，升。【疏】正義曰：張氏爾岐云：「如初者，一

揖一讓如獻賓時。」主人拜洗，賓荅拜，興，降

盥，如主人之禮。賓升，賓爵，【疏】正義曰：盛氏

世佐云：「升」字疑衍。《鄉飲酒禮》云：「賓實爵。」韋氏

協夢云：「賓既降盥，必升而實爵。《鄉飲酒》文略，當以此

經爲正。」主人之席前東南面，酢主人。酢，報。

【疏】正義曰：《校勘記》云：「酢，《要義》作『醋』，注同。魏

氏云：「賓以虛爵降，注：將洗以醋主人。賓東南面醋主

人，注：醋報，經與注以酢爲醋唯此。」如魏氏說，則「醋」字

經一見，注兩見也。《釋文》云：「醋主，才各反，報也。劉

云：與酢同音義。」此當爲前注作音，而不言下同，則此節

經注《釋文》仍作酢歟？「主人阼階上，拜，賓少退。

主人進受爵，復位。賓西階上，拜送爵，薦

脯醢。主人升席自北方，乃設折俎，祭如賓

禮。祭薦俎及酒，亦嚕啐。【疏】正義曰：注「亦齊啐」，

《校勘記》云：「齊，徐、陳、《通解》俱作『嚕』。」不告旨。

酒，已物。自席前適阼階上，北面坐卒爵，興，

坐奠爵，遂拜，執爵興。賓西階上北面荅

拜。自，由也。啐酒於席末，由前降，便也。主人坐奠

爵于序端，阼階上再拜崇酒。賓西階上荅

再拜。序端，東序頭也。崇，充也。謝酒惡相充滿也。

【疏】正義曰：張氏爾岐云：「奠爵序端，擬獻衆賓用之。」

韋氏協夢云：「《鄉飲酒》賓西階上荅拜，不言北面；此主

人阼階上再拜，不言北面；亦互文也。」

右賓酢主人

主人坐取觶于筐，以降。將酬賓。【疏】正義

曰：《鄉飲酒》云「降洗」，此降亦降洗也。賓降，主人

奠觶，辭降。賓對，東面立。【疏】正義曰：《鄉飲

酒》云：立當西序東面。主人坐取觶，洗，賓不辭

洗。不辭洗，以其將自飲。卒洗，揖讓，升。賓西

階上疑立。主人實觶，酬之，阼階上北面坐

奠觶，遂拜，執觶興。酬，勸酒。賓西階上北面

①「如」下，原衍「初」字，今據《儀禮鄭注句讀》刪。

荅拜。主人坐祭，遂飲，卒觶，興，坐奠觶，遂拜，執觶興，賓西階上北面荅拜。【疏】正義曰：張氏爾岐云：「主人先自飲，所以爲勸也。」韋氏協夢云：「《鄉飲酒》『坐祭』不言『主人』，賓兩『荅拜』不言『北面』，當從此文爲正。」主人降洗，賓降，辭，如獻禮。以將酌己。升，不拜洗。酬禮殺也。賓西階上立。主人實觶，賓之席前，北面。酬賓。賓西階上拜，主人坐奠觶于薦西。【疏】正義曰：盛氏世佐云：「《鄉飲酒禮》云：『主人少退，卒拜，進，坐奠觶于薦西。』」方氏苞云：「賓酢主人，主人拜，賓少退，與《鄉飲酒》同，主人酬賓，賓拜而主人不少退，與《鄉飲酒》異，何也？習射以明教，即公士爲賓，致敬於州長，亦宜與鄉大夫同。鄉大夫爲國求賢，故於賓、介受酬之拜皆少退，蓋過禮以明尊賢之義也。以施於習射之賓，則義無所取，故無此節。」賓辭，坐取觶以興，反位。賓辭，辭主人復親酌己。主人阼階上拜送。賓北面，坐奠觶于薦東，反位。酬酒不舉。

右主人酬賓

主人揖降。賓降，東面立于西階西，當

西序。主人將與衆賓爲禮，賓謙，不敢獨居堂。【疏】正義曰：高氏愈云：「《鄉飲酒》此下有主人獻介、介酢主人禮。今《射義》無介，其儀俱省，遂獻衆賓也。」主人西南面，三拜衆賓，衆賓皆荅壹拜。三拜，示徧也。壹拜，不備禮也。獻賓畢，乃與衆賓拜，敬不能並。【疏】正義曰：「壹拜」，《校勘記》云：「一，徐本，《通解》、《要義》俱作『壹』，敖氏作『一』，石經補缺亦誤作『一』。」○方氏苞云：「注『獻賓畢，乃與衆賓拜，敬不能並』，近似而實非也。禮有宜分致者，有宜合致者。賓主獻酢，自不宜使無事者立於其側。如謂『敬不可並』，則四時朝覲，諸侯旅見天子，與天子大合諸侯，爲壇於國外，五等之君傳擯、將幣、饗禮同時而卒事，君與臣皆爲相瀆矣。」主人揖升，坐取爵于序端，【疏】正義曰：盛氏世佐云：「序端之爵，即受酢時所奠者。」案：《鄉飲酒》云：「坐取爵于西楹下。」降洗，升，實爵西階上，獻衆賓。衆賓之長，升拜受者三人。長，其老者。言三人，則衆賓多矣。國以多

德行道藝爲榮，何常數之有乎？主人拜送。拜送爵

於衆賓右。坐祭，立飲，不拜既爵，授主人爵，

降復位。既，盡。【疏】正義曰：賈疏云：「降復賓南東

面位。」敖氏云：「位，亦堂下之位，賓之南也。」衆賓皆

不拜，受爵，坐祭立飲。自第四以下，又不拜受爵，

禮彌略。【疏】正義曰：張氏爾岐云：「亦升受，但不拜。」

每一人獻，則薦諸其席。諸，於。【疏】正義曰：賈

疏云：「此還據堂上三人有席者。」衆賓辯有脯醢。薦

於其位。【疏】正義曰：賈疏云：「還據堂下無席者。」主

人以虛爵降，奠于筐。不復用。

右主人獻衆賓

揖讓，升。賓厭衆賓升，衆賓皆升，就

席。一人洗，舉觶于賓。一人，主人之吏。升實

觶，西階上坐奠觶，拜，執觶興。賓席末荅

拜。舉觶者坐祭，遂飲，卒觶，興，坐奠觶，

拜，執觶興，賓荅拜。降洗，升實之，西階上

北面，將進奠觶。【疏】正義曰：「升實觶」，《校勘記》

云：「實，石經補缺，葛、閩俱作『賓』。」賓拜。拜受觶。

舉觶者進，坐奠觶于薦西。不授，賤，不敢也。

賓辭，坐取以興。若親受然。【疏】正義曰：敖氏

云：「前篇言『受』，此言『取』，互文也。」舉觶者西階上

拜送，賓反奠于其所，舉觶者降。【疏】正義曰：

張氏爾岐云：「射後，賓將舉之爲旅酬，故奠於薦西。」方氏

苞云：《特牲》、《少牢》之禮，異者詳之，同者則互見。此

篇自獻賓至舉觶於賓，與《鄉飲酒》同而一一復見，何也？

士、大夫之祭禮，衆所習知，故可互見。若《鄉飲酒》三年而

一舉，士不預教，則始與於衆賓者，或愆於儀。惟於州長教

射詳之，則進而與於賓興者，可益深於禮意，下而與於蜡賓

者，亦衆習其節文矣。」

右一人舉觶

大夫若有遵者，則入門左。謂此鄉之人爲

①「閩」，原作「閩」，今據《十三經註疏校勘記》改。

大夫者也。謂之遵者，方以禮樂化民，欲其遵法之也。其士也，於旅乃入。鄉大夫、士非鄉人，禮亦然。主於鄉人耳。今文「遵」爲「僕」。【疏】正義曰：「若有遵者」，敖氏云：「謂若有與此會而爲遵者也。」張氏爾岐云：「言『若有』者，或有或無，不定也。案：《鄉飲酒》於篇末略言遵者之禮，此經乃著其詳，正所云如介禮也。」「入門左」者，敖氏云：「入門左，則鄉者賓人之位也。不俟於門外，別於正賓。」注云「謂此鄉之人爲大夫者也」者，方氏苞云：

「《周官》以三公爲鄉老，鄉之地廣，興賢禮重，故諸公樂道化之行而臨觀焉。春秋習射，即有居是州者，亦無爲來觀，故遵者唯大夫耳。遵者之禮不詳於《鄉飲酒》，而具於是篇，何也？獻酬揖讓，大夫即與賓同。諸公雖貴，禮無以加，故獨著其加席、辭洗、去席之特異者。至所自執之禮，視賓、主人每殺，爲遵之道則然，公、大夫一也。」韋氏協夢云：「下記云：『有諸公則如賓禮。』可見諸公亦與焉。此直舉大夫者，大夫之爲遵者是其常。諸公特偶有之，故舉大夫以例遵者之禮也。」云「其士也，於旅乃入」者，盛氏世佐云：據注，則鄉中命士來觀禮者亦得謂之遵矣。韋氏協夢云：「《鄉飲酒·記》謂士既旅不入，則未旅以前皆可入矣。蓋士賤，既不得爲遵者，必主人請之爲衆賓，而後得與

其事，雖或有故，不能與賓同來，何必俟旅酬禮行而後入乎？注非是。」胡氏肇昕云：「《鄉飲酒禮》言遵者，有公、大夫，不言士，而記云『既旅士不入』，是士亦爲遵也。蓋遵者爲觀禮而來，不限夫貴賤，而行禮之節則有別也。此士謂命士，與爲衆賓之士不同。韋氏以爲衆賓之士，當爲遵者之士，用以駁注，謬矣。」云「鄉大夫、士非鄉人，禮亦然」者，盛氏世佐云：「謂他鄉之大夫、士偶來爲遵者，其待之之禮、隆殺之宜，亦如本鄉也。」^①主人降，迎大夫於門內也，不出門，別於賓。賓及衆賓皆降，復初位。不

敢居堂，俟大夫入也。初位，門內東面。【疏】正義曰：「初位，門內東面」者，賈疏云：「上文賓厭衆賓皆入門左，東面北上，故知之也。」敖氏云：「初位，階西以南當序之位。」吳氏廷華云：「初位，蓋上獻畢降立之位，在西階西，以次而南。」盛氏世佐云：「此亦與《鄉飲酒禮》同。復初位者，復初降時西階下東面位也。衆賓在賓南，鄭解爲初入門內之位，非。」韋氏協夢云：「注說非也。主人祇於門內迎大夫，而賓與衆賓何必降至門內乎？且主人與大夫揖進時，賓

① 「鄉」，原作「然」，今據《儀禮集編》改。

與大夫相等，既不可使賓厭大夫，亦不可使大夫厭賓。觀下文只言「主人揖讓，以大夫升」，而不言賓與大夫序升之禮，則賓及衆賓不降至門內可知。敖說較注爲長。」程氏瑤田云：「初位，門內東面，指謂賓入門左與主人相面之處也。竊以爲，此即賓與衆賓堂下直西席之位也。」注云

「不敢居堂，俟大夫人也」者，瑤田謂堂下之位，有堂事乃升也，事竟則復初位。初位者，堂下初立賓主直序之位也。先是主人酬賓之後，將獻衆賓，主人揖降，賓降，東面立于西階西，當西序。注云：「將與衆賓爲禮，賓謙，不敢獨居堂。」瑤田謂斯時賓蓋以事竟，復堂下之初位也。《冠禮》冠者見母，則堂事竟，故賓降於直西序之位，主人降復初位也。是時冠者方適東壁，賓主即降，非至字之之時始降也。賓言「直」，主人言「復」，互相足也。下經賓與主人及大夫取俎，授司正及弟子以降矣，必皆從之降者，亦以旅酬事竟，皆降而復堂下初位也。主人揖讓，以大夫升，拜至，大夫荅拜。主人以爵降，大夫降。主人辭降，大夫辭洗，如賓禮。【疏】正義曰：「主人揖讓，以大夫升」，敖氏云：「此賓禮自三揖三讓以至於一揖一讓，升之儀也。」①「主人以爵降」，盛氏世佐云：「亦取

爵於上筐也。」席于尊東，尊東，明與賓夾尊也。不言東上，統於尊也。【疏】正義曰：敖氏云：「此言「尊東」，《鄉飲酒》言「賓東」，亦文互見也。」盛氏世佐云：「遵者之席，於庠則在東房前之西；於序則在棟後第二架，當左楹之左；皆所謂尊東也。此亦謂無諸公則然。若有諸公，則大夫於主人之北西面。」方氏苞云：「《鄉飲酒禮》尊于房戶之間，遵席于賓東。或疑繼賓席而東，此曰「席于尊東」，然後東西之位次顯然，並遵席與賓正相對，而尊之設也少南，亦具見矣。蓋賓與遵之席必偏近於室，②尊必少南，然後出入於房戶者可通，而酌以獻酬亦便耳。」韋氏協夢云：「自大夫辭洗以前，與賓禮同。自升不拜洗以後，與介禮同。惟尊東之席，異於賓、介耳。大夫雖與賓相等，而《鄉射》以賓爲主，自辭洗以前同於賓禮，所以尊大夫也；自升不拜洗以後同於介禮，所以尊賓也。辭洗以前，大夫得如賓禮者，以諸公不在也。若諸公在，則亦如介。《禮記》云：「有諸公，則如賓禮，大夫如介禮。」是也。」升，不拜洗。主人實爵，席前獻于大夫。大夫西階上拜，

①「升」，原脫，今據《儀禮集說》補。

②「偏」，原作「偏」，今據《儀禮析疑》改。

進受爵，反位。主人大夫之右拜送。大夫辭加席，主人對，不去加席。辭之者，謙不以己尊加賢者也。不去者，大夫再重席，正也，賓一重席。【疏】正義曰：「升，不拜洗」者，高氏愈云：「凡所不者，皆不以縉禮煩之，所以優尊者也。」方氏苞云：「大夫之不拜洗，與介不拜洗，酬而賓不拜洗同。恐重勞主人之荅拜，非以其尊也。鄉大夫之尊，猶拜洗於學士。州長與大夫位相近，而以尊廢禮，非所安也。工則并不辭洗，義可參觀。」胡氏肇听云：「大夫如介禮。介不拜洗，非以其尊，則大夫之不拜洗亦非以其尊也。且不拜者，主於尊者爲言，則尊者自不以拜洗重勞主人之荅拜也。賈疏云以大夫尊，故不拜洗，不如方說之長。」主人實爵，席前獻於大夫者，敖氏云：「席前獻，其西北面與？主人既拜送，則亦立於階東。」盛氏世佐曰：「凡獻必向所獻者之位，獻大夫當東北面，以其位在東北故也。敖云西北面，非。」大夫西階上拜，進受爵，韋氏協夢云：「《鄉飲酒禮》獻介時，西階上北面拜，主人少退，介進，北面受爵。此云『進受爵』，則於大夫拜時，主人亦宜少退。不言者，文不具。」○注「謙不以己尊加賢者也」，《校勘記》云：「案：『不』下，疏有『敢』字。」云「不去者，大夫再重席，正也。賓『一重席』者，敖氏云：『《鄉飲

酒》云：大夫則如介禮，有諸公則辭加席，委于席端，主人不徹；無諸公則大夫辭加席，主人對，不去加席。此惟主言無諸公之大夫，則是《鄉射禮》諸公不與。」盛氏世佐云：「本記云：若有諸公，則如賓禮，大夫如介禮；無諸公，則大夫如賓禮。今觀此章所陳，正與上篇介禮相同，蓋爲有諸公之大夫而言也。有諸公則大夫之辭加席也，亦當如上篇所云『委于席端，主人不徹』。此乃云『主人對，不去加席』，是又與無諸公之禮同矣。何其互異若此歟？蓋遵者之來否，及諸公之有無，皆不可定。經故錯舉一二以示例。其隆殺信屈之詳，必待記而後備。記之所以有功於經也。然觀乎此，則其所謂如賓禮者，亦可以類推矣。敖氏據此遂謂《鄉射》之禮諸公不與，并訾記者之失，毋乃以辭害意歟？」乃薦脯醢，大夫升席，設折俎。祭如賓禮，不啻肺，不啻酒，不告旨，西階上卒爵，拜，主人荅拜。凡所不者，殺於賓也。大夫升席由東方。【疏】正義曰：韋氏協夢云：「《鄉飲酒禮》『不告旨』下

云：「自南方降席，北面坐，卒爵興，^①坐奠爵，遂拜，執爵興。」^②主人介右荅拜。』此與《鄉飲》小異，當以《鄉飲》爲正。介席東面，以南方爲上，^③故降自南方；大夫席南面，以東方爲上，當降自東方。但大夫於西階上卒爵拜，若降自東方，不若自西方之便，則當自西方矣。」敖氏云：「主人荅拜，亦於大夫之右。」注云「凡所不者殺於賓也」者，賈疏云：「凡所謂經中三事，以其殺於賓。若然，上云『不拜洗』，亦是殺於賓之類也。」胡氏肇昕云：「注云『凡所不』者，統上『不拜洗』爲言。據此，則不拜洗非以優尊者，其義益明。賈氏之說，前後自異，當以此疏爲正也。」大夫降洗。將酢主人也。大夫若衆，則辯獻，長乃酢。【疏】正義曰：盛氏世佐云：「大夫雖衆，然受獻後，須一一酢主人，如經所陳也。辯獻長乃酢，唯主人尊，賓賤乃可。今大夫尊於諸侯之州長，於鄉大夫爲敵，不可也。賈疏引《有司徹》爲證，非其倫矣。」主人復阼階，降，辭如初。卒洗，主人盥，盥者，雖將酌自飲，尊大夫不敢褻。揖讓，升。大夫授主人爵于兩楹間，復位。【疏】正義曰：敖氏云：「授主人爵于兩楹間者，大夫雖尊，若與鄉飲、鄉射之禮，則屈於正賓。其禮但比於介，故此授受之

節亦惟與介同。」主人實爵，以酢于西階上。【疏】正義曰：焦氏以恕云：「案：注『大夫若衆，則辯獻之，長乃酢。』賈疏：此經據一大夫而言，故獻大夫即酢。《有司徹》：主人洗爵，獻長賓于西階上，然後衆賓長升，拜受爵。宰夫贊，^④主人酌。若是以辯，乃升長賓，主人酌，酢于長賓，^⑤西階上北面。是爲辯獻，長乃酢也。又主人辯獻三賓，惟長拜洗，及主人辯獻衆大夫，惟長一酢，其義則一也。若然，則遵者兼有諸公，亦當辯獻諸公、大夫，而後諸公一酢，從可知矣。」坐奠爵，拜，大夫荅拜。坐祭，卒爵，拜，大夫荅拜。【疏】正義曰：韋氏協夢云：「坐奠爵，拜，坐奠爵於大夫右也。既拜，當如《鄉飲酒禮》執爵興，然後大夫荅拜。『卒爵』之下，亦當如《鄉飲酒禮》坐奠爵，遂拜，執觶興，然後大夫荅拜。」主人坐奠爵于西楹南。【疏】正義曰：賈疏云：「此受大夫酢不奠於篚者，

- ① 「爵」，原作「奠」，今據《儀禮蠡測》改。
- ② 「爵」，原作「觶」，今據《儀禮蠡測》改。
- ③ 「以」，原作「而」，今據《儀禮蠡測》改。
- ④ 「贊」，原作「獻」，今據《儀禮蠡說》改。
- ⑤ 「長」，原作「主」，今據《儀禮蠡說》改。

爲士於旅乃人，擬獻士，故奠爵於此也。」褚氏寅亮云：「疏說非也。旅用觶，不用爵。前奠東序端之爵，獻衆賓訖已奠于下簠。此更取上簠之爵獻大夫，獻訖亦不復用。至獻工，又別取上簠之爵。而今奠於此者，或暫奠之後，則奠於下簠而文略歟？」焦氏以恕云：「《鄉飲酒》之爵，其奠于西楹南，獻介之爵也，以其介右拜送故也。大夫拜送如介，故所奠同處。然彼西楹南之爵，其繼以獻衆賓，獻訖乃降奠于下簠。此禮於降奠一節，文不具。疑主人於復阼階揖降時，亦當以降奠歟？」再拜崇酒，大夫荅拜，主人復阼階，揖降。將升賓。大夫降，立于賓南。

雖尊，不奪人之正禮。【疏】正義曰：敖氏云：「必降者，宜與賓序升也。立於賓南，下之也。鄉射之禮，大夫若與，則下於賓，鄉飲之禮，公與大夫若與，則皆下於介；蓋其禮皆主於士故也。」張氏爾岐云：「賓及衆賓自大夫升堂時已立西階下。」程氏瑤田云：「大夫，謂尊者。其堂下西階西之位，在賓南。賓主之位必相對，若伸其尊，是奪正禮矣。觀下文大夫及衆賓皆升，則衆賓位又在尊者之南矣。又下經賓、大夫取俎降，大夫立于賓南；衆賓皆降，立于大夫之南，少退，北上。足以明其堂下之位矣。下記云：『大夫與，則公士爲賓。』注云：『不使鄉人加尊於大夫。』據此，則

易賓或不易衆賓歟？衆賓若猶處士，固不得加尊於大夫與？」主人揖讓，以賓升，大夫及衆賓皆升，就席。【疏】正義曰：敖氏云：「賓亦厭大夫，大夫亦厭衆賓，乃升也。衆賓，其長三人也。」

右遵人獻酢之禮

席工于西階上，少東。樂正先升，北面立于其西。言少東者，明樂正西側階，不欲大東，辟射位。【疏】正義曰：敖氏云：「少東，據工之下席而言也。樂正立於其西，猶未至階也。《鄉飲酒禮》云：『樂正先升，立于西階東。』」張氏爾岐云：「案：《鄉飲酒》不射，席工亦與此同。此注云『辟射位』，恐非經意。或是欲其當賓席耳。」盛氏世佐云：「案：蒲筵丈六尺，工四人，席六丈四尺也。即謂周以八寸爲尺，亦當今之五丈有奇。此豈西階上少東所能容乎？且《鄉飲酒》云『樂正先升，立于西階東』，此云『樂正先升，北面立于其西』：文互見也。樂正立于工席之西，猶于西階爲東，則工席更東可知。經云『少東』，據工席之最西者言也。工賤者先就事，布工席，亦先布其最西者，故經據之而言也。敖說得之。下記云『樂正適西方』，

命弟子贊工遷樂于下」，辟射也。夫將射乃辟，則此席不辟明矣。注云「辟射位」，固非；張云「欲其當賓席」，亦未爲得也。」褚氏寅亮云：「言少東，則西於《鄉飲酒》工席，故樂正逼近階而立。遷樂在後，此時已先辟其位者，禮主於射，示其意也。」方氏苞云：「《鄉飲酒》無射位，工升自西階，即北面坐，故不言少東。」工四人，二瑟，瑟先。相者皆左何瑟，面鼓，執越，內弦，右手相。人，升自西階，北面東上。工坐，相者坐授瑟，乃降。瑟先，賤者先就事也。相，扶工也。面，前也。鼓在前，變於君也。執越，內弦，右手相，由便也。越，瑟下孔，所以發越其聲也。前越言執者，內有弦結，手人之淺也。相者降，立西方。【疏】正義曰：注云「面，前也。鼓在前，變於君也」者，賈疏云：「鄉射與大射相對。大射，君禮，後首，此臣禮，前首。」燕禮與鄉飲酒相對，是以燕禮面鼓，^①又與鄉飲酒後首相變。」張氏爾岐云：「面鼓者，瑟首在前也。鼓，謂可鼓處。與鄉飲酒不同者，在鄉飲酒，欲其異於燕；在鄉射，欲其異於大射：皆爲變於君也。」姜氏兆錫云：「注疏變於君之說覺支。鄉射禮輕於鄉飲，燕禮輕於大射。鄉飲賓賢，大射選士，其禮重矣。故可鼓者皆

在後，上於將敬也。^②若鄉射只習藝，燕禮只達情而已，故可鼓者皆在前，以鳴豫也。」盛氏世佐云：「姜說與注疏合之，其義乃備。蓋以鄉飲與燕禮對，鄉射與大射對，則爲變於君；以鄉飲與鄉射對，大射與燕禮對，則又爲將敬與鳴豫之別。《儀禮》一書，此等至纖細之處亦精密周匝乃爾。橫說豎說，無所不通，信非聖人不能爲也。讀者幸以是求之。」云「執越，內弦，右手相，便也。越，瑟下孔，所以發越其聲也。前越言執者，內有弦結，手人之淺也」者，賈疏云：「瑟近首鼓處則寬，近尾不鼓處則狹。側持之法，近鼓持之，手人則淺；近尾持之，手人則深。是以此禮與燕禮面鼓，則云執之，手人淺也；大射與鄉飲酒後首，則云挾越，手人深也。」敖氏云：「前越去廉差遠，故不可挾，但執之而已。」盛氏世佐云：「瑟體首寬尾狹，內越孔雖長，^③廣狹亦等，但弦居瑟上，近首鼓處則寬，近尾不鼓處并而狹，此疏說也。若然，則側持之法，近鼓持之，手人得深，宜云「挾」；近尾持之，手人得淺，宜云「執」。今以經文考之，反

①「是以」，原脫，今據《儀禮注疏》補。

②「上」，原作「主」，今據《儀禮經傳》改。

③「孔」，原作「內」，今據《儀禮集編》改。

是。此與燕禮皆面鼓，乃云「執」；鄉飲酒與大射皆後首，乃云「拊」。鄭公內有弦結之說，不可通矣。當以敖說爲正。蓋瑟體尾狹，則後越去瑟廉差近，可拊；首寬，則前越去瑟廉差遠，故僅可執也。」○韋氏協夢云：「《鄉飲》：工人升歌，主人獻工，然後笙入。今射禮既不升歌，^①故工人笙即入，俟合樂之後始與笙並獻之。蓋主人之獻工與笙，特爲其有事於射而勞之耳。若工未歌而得獻，則與衆賓等矣。此所以俟既合樂而後獻與？」笙人，立于縣中，西面。堂下樂相從也。縣中，磬東立，西面。【疏】正義

曰：注云「縣中，磬東立，西面」者，賈疏云：「鄭知不在磬西西面者，若磬西西面，則笙者背磬，不可，故知在磬東西面也。」蔡氏德晉云：「笙者人，立于縣中，當鐘磬之間，與《鄉飲酒》磬南北面立之文互見也。縣在東階上，立者西面，蓋縣之東也。」盛氏世佐云：「案：縣中，磬南鐘北也。此主大夫判縣而言。《鄉飲酒》云：『笙入堂下，磬南北面立。』與此異。」褚氏寅亮云：「笙、磬相應，豈可背磬而立？《鄉飲酒》磬在階間，則立于其南，亦鄉磬也。敖氏欲與注異，謂立於磬西，不可從。」胡氏肇昕云：「敖氏謂縣中爲縣中之西，然縣在洗東北，而笙者立於縣之西，則與磬相背，既違笙、磬同音之義，且距階亦未嘗不遠也。自宜以注說

爲正。又敖氏謂此與《鄉飲》立于磬南之意同。考《鄉飲酒》云「磬南北面立」，此云「立于縣中西面」，其不同可知。又此與鄉飲磬所縣不同處，故盛氏不從其說。」乃合樂

《周南·關雎》、《葛覃》、《卷耳》、《召南·鵲巢》、《采芣》、《采蘋》。不歌，不笙，不問，志在射略

於樂也。不略合樂者，《周南》、《召南》之風，鄉樂也，不可略其正也。昔大王、王季、文王始居岐山之陽，躬行以成王業，至三分天下，乃宣《周南》、《召南》之化，本其德之初。

「刑于寡妻，至于兄弟，以御于家邦」，故謂之鄉樂。用之房中，以及朝廷饗燕，鄉射、飲酒。此六篇其風化之原也，是以合金石絲竹而歌之。【疏】正義曰：注「躬行以成王業」，

《校勘記》云：「『行』下，徐本有『召南之教』四字，《通解》無。瞿氏中溶云：『《燕禮》注有此四字，此亦宜有。』」胡氏

肇昕云：「《鄉飲酒》注云：昔大王、王季、文王居於岐山之陽，躬行《召南》之教，以行王業。及文王而行《周南》之教，以受命。《燕禮》注同。彼以《召南》之教屬大王、王季，《周南》之教屬文王，故「躬行」下有「召南之教」四字。此注合

① 「既」，原脫，今據《儀禮蠡測》補。

言大王、王季、文王，下總承云「乃宣《周南》、《召南》之化」。若於「躬行」下加「召南之教」四字，則上下文義不相通貫。《通解》無者，是也。瞿說不可從。」云「不歌，不笙，不間，志在射略於樂也。不略合樂者，《周南》、《召南》之風，鄉樂也，不可略其正也」者，方氏苞云：「獨奏合樂，不惟志在射也。鄉飲酒以興賢能，故升歌、間歌備陳君臣相悅，上下志同之樂，使觀感而興起焉。學士習射，則歌二南，使盡志於修身齊家之要可矣。」江氏筠云：「此禮與大射俱以射，故略於樂，而大射不略升歌而略笙、間、合，此禮不略合樂而略笙、歌、間。注疏謂《二南》是卿、大夫之正，《小雅》是諸侯之正，不可略其正是也。但二禮於歌、笙、間、合中既各取其一而用之，而《大射》何以於升歌外別添下管一節？彼既樂有二節，則此宜亦如之，又何以只用合樂一節？豈以笙、間二者俱係《雅》詩之故邪？玩下「無算樂」之文，與息司正所云「鄉樂惟欲」者，固不同也。況鄉飲酒既得備用四節，則此宜亦可以上取，以與大射儀相配矣。曰大射儀雖二節，實足當此之一節；此雖一節，實不下大射之二節。蓋大射《鹿鳴》三終，《新宮》三終，此則《周南》三終，《召南》三終。節雖不同，篇則惟一，此其所以異也。然則《鄉飲酒義》孔疏合樂之說，其不如賈疏之為可信

者，此亦其一證乎？又鄭氏於大射工歌，謂所歌惟《鹿鳴》，而《四牡》二篇則不之及。合之此鄉射之樂，可以定其失矣。工不興，告于樂正，曰：「正歌備。」不興者，瞽矇禮略也。【疏】正義曰：注「瞽矇」，《校勘記》云：「矇，諸本俱誤作「矇」，唯徐本不誤。案：單疏正作「矇」。」○盛氏世佐云：「正歌，謂鄉樂也。大夫、士以歌《風》為正，鄉飲酒升歌笙間用《小雅》，禮盛者進取也，於此益可見矣。」敖氏云：「凡歌，至於合鄉樂乃為備。此合鄉樂矣，故雖不歌《小雅》，亦可謂之備。」方氏苞云：「《鄉飲酒》之樂，四缺其三，而曰「正歌備」，何也？凡樂歌必與禮事相應，鄉大夫為國興賢，必為忠為孝，使民物安阜，上下和樂，然後可為邦家之基，故必備升歌、笙歌、間歌、合樂而其義始全。修業於鄉學之士，則所以養其德行而烝於門內者。二南備矣，故正歌不過合樂也。」樂正告于賓，乃降。樂正降者，堂上正樂畢也。降立西階東，北面。【疏】正義曰：「樂正告于賓」，《校勘記》云：「張氏爾岐曰：監本「樂」字，誤細書，混疏文內。」注云「樂正降者，堂上正樂畢也」者，賈疏云：「云「正樂」者，對後無算樂非正樂也。下射雖歌《騶虞》，亦是堂下，非堂上，故以「堂上」決之也。」○韋氏協夢云：「鄉飲有歌有笙，故歌畢即獻工，笙畢即獻

笙，更越間合二節乃告備。此不歌、不笙、不間而即合樂，故合樂即告備。告備降，然後獻工獻笙也。」

右合樂樂賓

主人取爵于上筐，獻工，大師則爲之洗。尊之也。君賜大夫樂，又從之以其人，謂之大師也。

【疏】正義曰：注「謂之大師也」，《校勘記》云：「徐本無『也』字，與疏合。《通解》有。」云「君賜大夫樂，又從之

以其人，謂之大師也」者，方氏苞云：「州長習射不宜有大師。或大師即其州之人，會公事之間，樂與於斯禮。又或

公卿有賜樂而從以工師者，使來襄事耳。《儀禮釋官》云：

「案：公賜大夫樂，於傳有之；從之以其人而謂之大師，無所據也。此工及大師，皆君之樂人。鄉飲、鄉射主於教民，

乃公家之事，非若冠昏喪祭爲私事者可比。或疑州射而君使樂人共其事，恐官有不給。不知一鄉五州，大國三鄉，爲

州十五。《周禮》：「大師，下大夫二人。小師，上士四人。

瞽矇，上瞽四十人，中瞽百人，下瞽有百六十人。」諸侯樂工之數雖無可考，然人數必多，當亦足供其事。且諸侯之州

長是士，未必有賜樂之法。下經云：「一人拜受爵。」注：

「二人，無大師，則工之長者。」然則大師來否原自不定。鄭氏以意爲說，似未可從。「賓降，主人辭降。大夫不

降，尊也。【疏】正義曰：注云「大夫不降，尊也」者，敖氏繼

公曰：「大夫不降，亦別於賓。」盛氏世佐云：「經不言大夫

降，以大夫或來或否也。若來，亦當從主人降。大夫不尊

於賓也，注非。《鄉飲禮》云「賓、介降，大夫如介禮」，亦不

得云「別於賓也」。方氏苞云：「凡辭而終降者，必有對；

對後必更見降者階下之事。唯主人爲工洗，賓降，則有辭

而無對，並不見賓階下之事。蓋賓以降表意，主人辭焉，而

遂止也。使三賓、大夫皆不降，而賓獨降，則其升也，不可

與主人同，又不可後於主人。與主人同升，是與身受主人

之獻無別也；後主人而升，則主人無以自安，故惟辭焉而

遂止爲宜。」胡氏肇昕曰：「注以『大夫不降，尊也』，微論大

夫如介禮，不尊於賓。且階上尚有賓長三人，經亦不言衆

賓降，豈得亦以爲尊乎？」郝氏敬云：「獻大師洗爵，主賓

皆降。不言大夫者，有至有不至，禮重主賓也。」盛氏本此

爲說，較注爲確。褚氏寅亮云：「明無大師，主人不降洗，賓

亦不降也。工不辭洗，卒洗，升實爵。工不興，左瑟，一人拜受爵。左瑟，辟主人授爵也。一人，無

大師則工之長者。【疏】正義曰：注「辟主人授爵也」，《校勘記》云：「辟，陳、閩、監、葛俱誤作『辭』。」○敖氏繼公云：「主人卒洗，亦與賓揖讓乃升。此以上著大師之禮異也，餘則與非大師者同。」張氏爾岐云：「左瑟者，身在瑟右，向主人也。」主人阼階上，拜送爵，薦脯醢，使人相祭。人，相者。工飲，不拜既爵，授主人爵。衆工不拜，受爵，祭飲辯有脯醢，不祭。祭飲，不興受爵，坐祭，坐飲。不洗，遂獻笙于西階上。不洗者，賤也。衆工而不洗矣，而衆笙不洗者，笙賤於衆工，正君賜之，猶不洗也。【疏】正義曰：注「而衆笙不洗」者，《校勘記》云：「衆，徐本作『著』，與單疏述注合。《通解》作『衆』。」胡氏肇昕云：「敖氏《集說》亦云：『乃著笙不洗者。』似所據鄭注亦作『著』字。然賈疏述注後又云：『況衆笙乎？』又云：『不取衆笙，不爲洗也。』兩出『衆笙』字，正解注之『衆笙不洗』也。當以作『衆』字爲正。」○敖氏繼公云：「非大師，則工之長亦不洗矣，乃著笙不洗者，正使笙師猶不洗也。諸侯之笙師，蓋以下士爲之。言遂者，承工後也。《鄉飲酒禮》：笙人，樂《南陔》、《白華》、《華黍》，乃獻之。此不笙亦獻之者，主人自爲射，故而略於

樂耳。不可以其無事而廢禮也。」江氏筠云：「歌笙間合四節，首二節係兩者分奏，後二節係兩者並爲。間則其所爲者各三，合則其所爲者各六，乃是自然之次第。敖氏何得謂合樂無笙？且間字、合字經俱蒙上立文。始分奏者，至是而間代爲之，故云『乃間』。間，猶其事兩分。至末而二者并合爲之，故云『乃合樂』。謂合，非工笙之合，則間亦非一歌一吹之相間邪？據此經先著工之人，次著笙之人，而云『乃合樂』以承之，其爲笙工之合奏甚明。又考經之著『笙人』，因樂《南陔》而著者，《鄉飲禮》、《燕禮》與《燕禮·記》文是也。因合鄉樂而著，此經是也。不合樂，則不復著，故《大射儀》無『笙人』文。若謂無算樂時所用，則《大射》亦無算樂，何以經不言笙人乎？況諸凡樂工之獻俱以有事而獻，未有無事獻者亦俱於即事後獻，未有先事獻者，其必不然明矣。蓋敖氏泥於《燕禮》「遂歌鄉樂」之文。考經所云「歌」者，實皆不止歌之一事。《鄉飲》、《燕禮》樂備四節，而工告樂備，但云「正歌」，《鹿鳴》三篇，歌、瑟並用，而經唯云「工歌」。云「升歌」，蓋樂貴人聲，以歌爲主，言歌則足以該餘事也。乃問之所以必言笙者，以其歌笙異詩，故須著之。合樂則歌笙共之，言歌可包笙在內，故《燕禮》之文然耳。且《鄉飲酒》之禮歌、笙並著，而其義但云「間歌

三終」，益可見矣。又案：合樂《周南》、《召南》之樂，即樂《南陔》、《白華》、《華黍》樂也。據注唯於笙以樂言，《鹿鳴》三詩未有云樂者，然則此樂之一字非以合笙而得名邪？且樂謂人之樂之，則所云合者，明是指工言，而非指詩言矣。笙一人拜于下，盡階，不升堂，受爵。主人拜送爵。階前，坐祭，立飲，不拜既爵，升，授主人爵。衆笙不拜受爵，坐祭，立飲，辯有脯醢，不祭。主人以爵降，奠于筐，反升，就席。亦揖讓以賓升，衆賓皆升。【疏】正義曰：注云「亦揖讓以賓升，衆賓皆升」者，賈疏云：「云亦者，亦前主人共大夫行禮訖，主人揖讓，以賓升，大夫及衆賓皆升就席也。上賓降時，雖不言衆賓降，衆賓卑，從降可知。故今從賓升也。」褚氏寅亮云：「獻工奠爵訖而反升，乃與賓揖讓而升，故注釋於此時。《集說》謂卒洗時以賓升者，誤也。方行實爵獻工之禮，何得又參以與賓揖讓升之禮？且尚有降奠爵事，賓此時亦未便即升。」盛氏世佐云：「主人揖讓以賓升之節當在此。經不言者，以大師或有或無也。若無大師，不爲之洗，賓亦不降也。」方氏苞云：「注謂兼以賓及衆賓升，非也。賓雖欲降，以主人之辭而止，三賓則並無

欲降之文，則反升就席者惟主人耳。樂以樂賓，故大夫、三賓不言欲降，不敢與賓同受禮也。蓋賓及三賓之爲大夫而降，不獨以其尊也。主人將與大夫爲獻酢崇酒之禮，賓及衆賓席位偪介於大夫，不宜無事而相參。若獻工與笙，則賓與大夫三賓位在戶牖間，而主人別獻工於西階之上，絕不相礙。且其儀甚簡，賓、大夫、衆賓何故又相牽率而辭降讓升？費時失事，以促正射之節，使旅酬、舉觶、升堂、無算爵之禮，皆汲汲若不可逮乎？」胡氏肇昕云：「經「反升，就席」，承「主人以爵降，奠于筐」，則專指主人可知。前獻工賓降，主人辭降，賓之因辭而即止，不終降也。方說似可從。」

右獻工與笙

主人降席自南方。禮殺，由便。【疏】正義曰：注云「禮殺，由便」者，上文主人受酢爵時，禮盛，故主人降席自北方。此禮殺，故降席自南方。《鄉飲酒禮》注：「不由北方，由便。」是也。方氏苞云：「惟賓酢主人，主人

升席自北方，用升席之正禮尊賓也。^①立司正，及將徹俎，主人降席自南方，臨屬吏及弟子，乃特變其方以尊主人。注皆曰「由便」，似非禮意。胡氏肇昕云：「臨屬吏及弟子，是禮殺於賓也。特變其方，不用升席之正禮，此主人之所以可由便也。注自可通。」褚氏寅亮云：「此降席之正。」注云「禮殺由便」，未詳。^②側降。賓不從降。【疏】正義曰：方氏苞云：「具樂以樂賓，故主人洗，獻工，而賓從降，不敢坐視主人之勤而自安也。立司正以旅酬，則主人側降而賓不從，不敢謂禮專為己也。義不宜降，而注以大夫尊為義，失之矣。」作相為司正，司正禮辭，許諾。主人再拜，司正荅拜。爵備，樂畢，將留賓以事。為有懈倦失禮，立司正以監之，察儀法也。《詩》云：「既立之監，或佐之史。」【疏】正義曰：注「為有懈倦失禮」，《校勘記》云：「懈，《釋文》、徐、陳、《通解》俱作『解』。」○韋氏協夢云：「司正為旅酬立也，今未行旅酬禮先立司正者，蓋相必主人作之為司正，然後以司正行司馬之事，若未作，則固不得干其事也。」主人升就席。司正洗觶，升自西階，由楹內適阼階上，北面受命于主人。洗觶者當酌以表其位，顯其事也。楹內，楹北。【疏】正義

曰：賈疏云：「受命于主人者，謂受主人請安賓之命。」注云「楹內，楹北」者，敖氏繼公云：「楹，謂兩楹。」盛氏世佐云：「楹，謂前楹。由楹內，言其入堂之節也。」蔡氏德晉云：「由楹內適阼階者，以樂工坐階際故也。」^②西階上北面，請安于賓。傳主人之命。【疏】正義曰：敖氏繼公云：「賓為射事而來，此時未射，若無嫌於不安，乃亦請安于賓者，飲酒之節宜然也。」方氏苞云：「立司正以糾儀，而曰『請安于賓』，蓋指不祭立飲、不拜、卒觶不洗而為言，禮辭之體然也。而此篇更有隱義焉。教射禮嚴，司射執扑以臨不勝者，以觥代扑，賓、大夫皆就不勝者之位而飲。方是時，賓、大夫酬主人之禮未備，衆賓皆未受酬，先舉罰爵而後舉酬，所以愧厲之者切矣。故先以主人之意請安于賓，^③以示主人急於酬賓，而會有司之請射。禮之旁皇周浹，曲得其次序，類如此。」賓禮辭，許。司正告于主人，遂立于楹間以相拜。相，謂贊主人及賓

① 「賓」，原作「禮」，今據《儀禮析疑》改。

② 「工」，原作「正」，今據《儀禮本義》改。

③ 「故」，原脫，今據《儀禮析疑》補。

相拜之辭。【疏】正義曰：敖氏繼公云：「賓辭者，亦不敢必主人之終行射事也。」盛氏世佐云：「主人所以請安于賓者，爲行禮既久，恐賓身或有不安全也。賓辭，亦恐主身有不安全也。禮之體人情也至矣。如第曰爲賓欲去留之，則此賓爲射而來，事未至而故留之，賓故辭，毋乃文繁而詐乎？」胡氏肇昕云：「主人請安于賓，賓必禮辭，皆禮之節次宜然也。盛氏泥於「安」字，望文生訓，非是。」主人阼階上再拜，賓西階上荅再拜，皆揖就席。爲己安也。今文「揖」爲「升」。【疏】正義曰：注云「今文「揖」爲「升」者，胡氏承珙《古今文疏義》云：「案：上文云：賓升席，主人升席。言升則不言就，言就則亦不必言升。又云大夫及衆賓皆升就席者，謂自堂下升也。此賓主皆在階上，不必言升。今文蓋涉上主人升就席而誤，故鄭從古文。」胡氏肇昕云：《鄉飲酒禮》「皆揖復席」注不云「今文揖爲升」，則《鄉飲》今文亦作「揖」可知。此作「升」，乃字之誤也，故鄭不從之。」司正實觶，降自西階，中庭北面坐奠觶，興，退，少立。奠觶，表其位也。少立，自修正，慎其位也。古文曰「少退立」。【疏】正義曰：「中庭北面坐奠觶」，敖氏繼公云：「此「中庭」，其阼階前南北之中與？蓋

射時司正爲司馬，至誘射之後，方易位於司射之南，則此位必不在階間，如鄉飲酒司正之位也。」盛氏世佐云：「案：司正奠觶處，《鄉飲酒禮》云「階間」，此云「中庭」，互見也，其位同。及其爲司馬也，乃位於司射之南，辟射也。敖說誤。」焦氏以恕云：「鄉射司正中庭北奠觶，及北面立于觶南，此爲階間之中庭，與鄉飲一例，無可疑也。記「司正既舉觶而薦諸其位」，即此觶南之位也。燕禮立司正，南面坐奠于中庭，大射立司正，南面坐奠于中庭，亦在階間，與鄉飲同位也。至將射，則司正爲司馬。下經設楅于中庭，亦司馬暫立於其南者，正其處也。至射事畢，命弟子退楅，則司馬反爲司正，退復觶南而立，此即前者階間奠觶之所也。記云：「司馬階前命張侯，遂命倚旌。」階前者，西階前西面也。弟子與獲者俱在西方，故於此命之爾。記又云「命負侯者由其位」，則司射誘射之後，又命獲者執旌以負侯。鄭云：「於賤者禮略。」賈氏疏：司馬自在己位遙命之。此亦階間中庭之位耳。迨初射之時，司馬降自西階，適堂西，釋弓襲，反位，立於司射之南。此則司馬離階間之位，而始定西方東面之位於司射之南也。若阼階前中庭之位，則敖氏鑿空說之而無所依據，蓋有心於異同而不知其非也。」又

曰：「鄭之主於階間者，^①以《鄉飲》經文可證也。燕禮、大射皆不言其位於何所，則皆主階間為東西節矣。若敖氏之謂阼階前，直自為此說耳。且司正為司馬，易位於司射之南，乃西階前三耦之北也。其未為司馬之時，位於階間，如鄉飲禮，固無妨也。何以決其必不在階間乎？若燕禮、大射立司正時，猶未射也。臨射而始辟，似亦無妨也，何以決其必不在階間乎？然則經文於《燕》、《射》之禮，只言「中庭」，而不言「階間」者，已見《鄉飲》，則文不具也。《鄉飲》之禮只言「階間」，而不言「中庭」者，互見《燕》、《射》故也。」朱氏大韶云：「敖此節注云：『中庭，其阼階前南北之中歟？蓋射時司正為司馬，至誘射之後，方易位於司射之南，則此位必不在階間，如鄉飲酒司正之位。』案：中庭，據南北東西言：南北之中，謂之中庭；東西之中，亦謂之中庭。敖以為阼階前南北之中，與經不合。經凡言「中庭」，無有偏指一階者。且司正為司馬，易位於司射之南，乃在西階前三耦之北。其未為司馬之前，經但言「階間」，言「中庭」，不言「阼階前」。鄭於《鄉射》「北面，立於觶南」^②注曰：「立觶南，亦其故擯位。」疏云：「^③《聘禮》擯者退中庭。」是擯者在中庭有位。《燕》、《大射》皆擯者為司正，此作相為司正，相即擯也，故知觶南者，中庭故擯位也。至將

射，則司正為司馬。《鄉射》：「司馬遂適堂前，北面立於所設楅之南，命弟子設楅，乃設楅於中庭。此司馬暫立於南者，正其處也。射事畢，命弟子退楅，則司馬反為司正，退復觶南而立，此即階間奠觶之處也。並在階間中庭。惟初射時，司馬降自西階，適堂西，釋弓，襲，反位，立於司射之南。此則司馬離階間之位，始定西方東面之位，在司射之南。若阼階前中庭之位，經無此說。^④《鄉射》云：「司馬命張侯，又命獲者「倚旌于侯中」。記云：「司馬階前命張侯，遂命倚旌。」又云：「命負侯者，由其位。」敖云：「階前即觶南之處，此云階前，下云由其位，文互見也。案：階前者，西階前也。以經不言其處，故記著之曰階前。蓋弟子及獲者皆在西方，故司馬於西階前西面命之。至負侯之命，則仍自階間中庭觶南也。故疏云「司馬自在己位，遙命之」，是也。若在阼階前，則離西方太遠。況張侯倚旌之命，其節次在司射降自西階、階前西面、命納射器下，則其在西階

① 「間」，原作「前」，今據《儀禮彙說》改。

② 「觶」，原作「阼」，今據《續清經解》本改。

③ 「云」，原脫，今據《實事求是齋經義》補。

④ 「經」，原作「固」，今據《實事求是齋經義》改。

前又可知。乃移西階之前以就其阼階之說，強爲之解，曰：「此與前二命皆不離其位。」則記文於前二命，何以云「階前」？於命負侯，何以云「由其位」？蓋敖以奠觶之位，在阼階中庭，遂一誤而無不誤。「韋氏協夢云：「堂下至門內雷，皆謂之庭。通一庭言之，則東西南北之中爲中，以南北向言之，則或東或西，凡在南北之中者，皆謂之中，以東西向言之，則或南或北，凡在東西之中者，亦謂之中。此中庭，蓋指東西之中而言，即《鄉飲酒》所謂「階間」也。注知階間與中庭爲一，而以階間爲東西節，中庭爲南北節，則誤矣。中庭，蓋東西節也；階間，乃南北節耳。」椿氏寅亮云：「亦當階間南北之中，而不在阼階前南北之中。」《鄉飲酒》曰「階間」，此曰「中庭」，互文見義。」注云「古文曰「少退立」者，胡氏承珙《古今文疏義》曰：「案：《鄉飲酒禮》云：『司正實觶，降自西階，階間北面坐奠觶；退，共，少立。』」注云：「共，拱手也。少立，自正慎其位也。」《燕禮》云：「司正降自西階，南面坐取觶，升酌散降，南面坐奠觶，右還，北面少立。」注云：「少立者，自嚴正，慎其位。」《大射儀》云：「司正降自西階，南面，坐取觶，升酌散降，南面坐，奠觶，興，右還。北面少立。」蓋此所奠之觶，將以察儀，須少立自慎而後取觶，以副司正之義，故言少者以爲

立節，❶非以爲退節。「少」下「立」上，不當有「退」字。鄭以《鄉飲酒》、《燕禮》、《大射》決，知當從今文作「少立」也。」進，坐取觶；興，反坐，不祭，遂卒觶；興，坐奠觶，拜；執觶；興，洗，北面坐奠于其所。

今文「坐取觶」，無「進」。又曰：「坐奠之拜。」【疏】正義曰：注云「今文「坐取觶」，無「進」。又曰：「坐奠之拜」者，胡氏承珙《古今文疏義》曰：「案：『進』者，蒙上「退」文，有「進」爲是。《鄉飲酒》「退，共，少立」下但云「坐取觶」，不言「進」者，文不具耳。又「執觶」、「取觶」皆言「觶」，此不應變「觶」爲「之」，故二者鄭並從古文。」興，少退，

北面立于觶南。立觶南，亦其故擯位。【疏】正義

曰：注云「立觶南，亦其故擯位」者，賈疏云：「《射禮》「擯者退中庭」，是擯者在中庭有位。《燕禮》、《大射》皆擯者爲司正，此及《鄉飲酒》作相爲司正。相，即擯也。故曰「故擯位」。未旅。旅，序也。未以次序相酬，以將射也。旅則禮終也。【疏】正義曰：「未旅」，《校勘記》云：「未，徐本作「末」，注同，恐誤。」○張氏爾岐云：「《鄉飲酒》：立司正，

❶「立」，原作「少」，今據《儀禮古今文疏義》改。

即行旅酬。今此禮主於射，故且未旅，急在射也。」敖氏繼公云：「《大射儀》亦司正，已定位，即行射事，然則射之正禮，以此爲節，上下同也。經於射事既畢，始見旅酬之儀，則是時未旅可知。乃言之者，亦經文過於詳耳。」方氏苞云：「司正所奠，旅酬之觶也。直待三射事畢，然後賓取所奠之觶以行酬，故於此曰『未旅』，以明射事未舉而預請安于賓之義。又《鄉飲酒》：立司正之後即舉旅。故此言『未旅』以別之。若不言『未旅』，直承以『三耦次于堂西』，則事之節次不明，而辭氣亦不相貫。敖氏之說，前後皆失之。」

右立司正

三耦俟于堂西，南面東上。司正既立，司射選弟子之中德行道藝之高者以爲三耦，使俟事於此。【疏】正義曰：注「司射選弟子之中」，《校勘記》云：「選，誤作『遷』。」○張氏爾岐云：「自此以下，始言射事。射凡三番：

第一番，三耦之射，獲而不釋獲；第二番，賓、主、大夫、衆賓耦射，釋獲，升飲；第三番，以樂節射。此下至乃復求矢加于楅，言三耦之射。司射請射于賓，命弟子納射器，比三耦，司馬命張侯，又命倚旌，樂正遷樂器，三耦取弓矢，司射

誘射，乃作三耦射，司馬命設楅取矢：凡九節，射之第一番也。」○郝氏敬云：「凡射，二人爲耦。天子六耦，諸侯四耦，大夫、士三耦，謂之正耦。鄉射正耦三，用六人。司射選賓子弟有行藝者充之，①未旅酬，先俟于堂下之西，南面立，長幼以東爲上，序立而西，雖有三耦之數，尚未定同耦之人。立於此，待司射比耦也。」司射適堂西，袒決遂，取弓于階西，兼挾乘矢，升自西階。階上北面，告于賓曰：「弓矢既具，有司請射。」司射，主人之吏也。於堂西袒決遂者，主人無次，隱蔽而已。袒，左免衣也。決，猶闔也，以象骨爲之，著右大擘指，以鉤弦闔體也。遂，射韉也。以韋爲之，所以遂弦者也。其非射時，則謂之拾。拾，斂也，所以蔽膚斂衣也。方持弦矢曰挾。乘矢，四矢也。《大射》曰：「挾乘矢于弓外，見鏃于楅，右巨指鉤弦。」古文「挾」皆作「接」。【疏】正義曰：「有司請射」者，敖氏繼公云：「示已不敢擅其事也。」○注「右巨指鉤弦」，《校勘記》云：「右，諸本俱誤作『南』，唯徐本與此同。」胡氏肇昕云：「案：敖氏引注亦作『右』。」云

①「子弟」，原脫，今據《儀禮節解》補。

「司射，主人之吏也」者，賈疏云：「大射，諸侯禮，有大射正爲長，射人次之，司射又次之，小射正又次之，皆是士爲之。則此大夫、士禮不得用士，故知是主人之吏爲之。」《儀禮釋官》曰：「案：《射義》：孔子射於矍相之圃，使子路執弓矢出，延射。注謂子路於時爲司射，大夫、士無射人之官，臨事立一人以掌射事，亦謂之司射也。」《大射》以射人爲司射，又有大射正、小射正共贊射事，俱與此異。」方氏苞云：「注於『相』曰『主人之家臣』，於『司射』曰『主人之吏』，辭未別白，以義裁之，皆非也。」《周官》王朝大禮，皆大宗伯相。《戴記》有發則命大司徒教士以車甲，司徒搢扑，北面誓之。州長會民而習射於序，亦禮事之大者，相與司射，必於黨正取之。主人之吏與家臣，可使與賓、大夫相揖讓，且搢扑以涖羣士乎？」程氏瑤田云：「此經挾矢，矢在弓外，居附下，故云『見鏃』；下經執矢，矢兼諸弦，則在弦上，故云『尚鏃』也。右手持矢且鉤弦，而見鏃於附，則弦矢中矩，故曰『方持』；左執弓，右執矢，後開前合，而以鏃交於弦，則弦矢不中矩，故曰『側持』也。疏云：有司，謂司馬。故《大射》云：『爲政請射。』注云：『謂司馬。司馬，政官，主射禮。』諸侯之州長無司馬官，直言有司，以比司馬也。案：此經之相，注云主人家臣，司正作相爲之，司馬，司正爲之，是三官一人兼也。」

惟司射注云：主人之吏。今有司請射爲司射告賓之詞，其非司射爲之明矣。州長無司馬官，則司正所作之司馬，亦假借之稱。然則有司以比司馬，或即指爲司正歟？若《大射儀》大射正爲擯，遂爲司正，與此經相爲司正略同。此經命張侯，命獲者倚旌，執旌，負侯，去侯，命設楅，設中，取矢，乘矢，復求矢，皆司馬所職，而《大射儀》則「司馬師命負侯」注云：「司馬師，正之佐也。」「司馬正命去侯」注云：「司馬正，政官之屬。」司馬命取矢，負侯者因之負侯，命設楅，司馬師乘矢，司馬正命復求矢。此初一番射也。其第二番射，則命去侯者，①司馬也。第三番射，公將射，則司馬師命負侯，司馬命去侯。「云於堂西袒決遂者，主人無次，隱蔽而已」者，賈疏云：主人無次，對大射人君禮有次在東方，不須適堂西也。云「袒左，免衣也」者，郝氏敬云：「袒，露左臂也。賈疏云『凡事無問吉凶，皆袒左』，『唯有受刑袒右』。」云「決，猶闔也。以象骨爲之，著右大擘指，以鉤弦闔體也」者，案闔與開同。決鉤弦以利發，故云「猶闔也」。《小雅·車攻》毛傳曰：②「決，鉤弦也。」云「遂，射鞬」

①「命」，原脫，今據段校補。

②「傳」，原作「詩」，今據《毛詩正義》改。

也。以韋爲之，所以遂弦者也。其非射時，則謂之拾。拾，斂也，所以蔽膚斂衣也。案《文選·李陵答蘇武書》注引《說文》云：①「韠，臂衣也。」《周禮·繕人》注云②：「韠扞著左臂，裹以韋爲之。」《說文》但言「臂衣」，而不言「射韠」者，段氏玉裁《說文注》云：「凡因射著左臂，謂之射韠，非射而兩臂皆著之，以便於事謂之韠。許不言射韠者，言臂衣則射韠在其中矣。」胡氏肇昕云：「韠从韋，故知以韋爲之。韠著於臂，以斂袖，所以利弦也。《禮經》作「遂」，《小雅》作「拾」，即一物也。故《小雅》《毛傳》曰：「拾，遂也。」又案：《詩·衛風》：「童子佩韠。」《毛傳》：「韠，袂也。能射御，則佩韠。」③鄭箋云：「韠之言沓，所以彊沓手指。」段氏玉裁云：「毛公釋韠爲決，而箋云「韠之言沓」，此以《禮經》之「極」釋「韠」也。《大射》云：「朱極三。」注：「極，猶放也，所以韠指利放弦也，以朱韋爲之。」食指、無名指、將指各一，小指短，不用。鄭意以「韠極沓」三字雙聲，且極用韋爲之，故字从韋，決則用象骨爲之，故不從毛，而易其義。」凌氏次仲亦以鄭義爲長。胡氏肇昕云：「鄭此注云：『決，猶闔也。拾，斂也。』決著右臂指以鉤弦，拾以蔽膚斂衣，是一物用處不同。《大射》注云：「極，猶放也。」放義與闔相近，與斂相反。極所韠指，以利放弦，即此經所謂「決」

也。段氏據「以朱韋爲之」，遂謂鄭以韠、沓、極爲一，非矣。《說文》：「韠，射決也，所以拘弦，以象骨，韋系，箸右巨指。从韋柴聲。」《詩》曰：「童子佩韠。」從《毛傳》，以韠、決爲一。陳氏長發《稽古編》曰：「案：《射禮》右巨指著決以鉤弦，食指、中指、無名指著沓以放弦。決用棘及骨及象爲之。沓用朱韋爲之，亦名極。極取其中於指，沓取其沓於指也。韠之爲決、爲沓，《禮》皆無明文，④而毛說較古，又有許說相輔，當得其真。」胡氏肇昕云：「謂沓、極，所以彊指，自與決爲一類，與拾之斂臂者有殊。賈疏亦引《大射》「朱極三」證決，當有所本也。又按段氏玉裁云：「決，即今人之扳指也。」胡氏承珙云：「《毛傳》：「韠，袂也。」今之扳指，如環無端。古之袂，則如環而缺。其缺處當聯以韋系，所以著指，亦可以佩。」凌氏《釋例》云：「凡射者之器曰弓、曰矢、曰決、曰拾。」《鄉射禮》：「司射降自西階，階前西面，命弟子納射器。」注：「射器，弓、矢、決、拾、旌、中、籌、楅、

①「注」，原脫，今據《續清經解》本補。

②「繕」，原作「膳」，今據《續清經解》本改。

③「韠」，原作「袂」，今據《毛詩正義》改。

④「禮」，原脫，今據《毛詩稽古編》補。

豐也。《詩·小雅·車攻》：「決拾既飲，弓矢既調。」是弓、矢、決、拾皆射者之器也。《周禮·夏官·司弓矢》：「恒矢、庫矢，用諸散射。」後鄭注：「恒矢，弓所用也。庫矢，弩所用也。」又云：「二者皆可以散射也，謂禮射及習射也。」考《禮經》之射用弓不用弩，其矢蓋恒矢歟？又《夏官》：「繕人掌王之用弓弩，①矢箠，②矰弋，決拾。」鄭司農云：「決者，所以縱弦也。拾者，所以引弦也。《詩》云：決拾既飲。《詩》家說或謂：決謂引弦彊也，拾謂轉扞也。」決拾，即決拾也。」云「方持弦矢曰挾。乘矢，四矢也。」《大射》曰：「挾乘矢于弓外，見鏃于弣右，巨指鉤弦」者，案：方持弦矢曰挾。方持者，並持也。下文「左執弓，右執一个」注云：「側持弓矢曰執。」側持者，獨持也。《莊子·山水篇》：「方舟而濟於河。」司馬彪注：「方，猶並也。」《漢書·叙傳下》晉灼注亦云：「方，並也。」兼弦矢而並持之，故曰方持。此解「挾」之義。下記云：「凡挾矢，于一指之間橫之。」「橫之」別為一義。賈疏引「橫之」以釋「方持」，非是。盛氏世佐云：「案：挾矢之法，蓋以左手執弣右，大指鉤弦，而并夾四矢於第二、第三指間，於弓外見鏃於弣，如大射之儀也。」吳氏廷華云：「注以拾為蔽膚，蓋誤認袒為肉袒耳。據《曲禮》注「袒而即衣曰楊」。《孟子集說》又以袒

楊為露臂，蓋袒去左袖，露臂衣，非肉袒也。凡人見射必袒，因謂射用力，故肉袒，不知禮射本不尚力，左臂亦無所用力也。且據「司射著遂」注，以遂為射鞬，著之所以遂弦。蓋因發矢時左臂衣袖礙弦，故著此以遂之。若既肉袒，則無礙於弦，何必著遂？則射者之袒，不過去上服左臂楊衣。必去左臂楊衣者，以楊衣是禮服，不宜夾禮服著遂，故去之。記人因大夫曰袒纁縹，公曰袒朱縹，士以下不言縹，故誤以為肉袒耳。不知此止以辨縹之色，士以下縹色相似，故不言色。惟以公與大夫有纁與朱之別，故特言之。非士以下無縹也。」云「古文「挾」皆作「接」者，胡氏承珙《古今文疏義》曰：「《儀禮》之挾矢，《周禮》之挾日，音皆子協反。挾日，干本作市日，③《左傳》作浹，謂十日徧也。《禮注》：方持弦矢曰挾。謂矢與弦成十字形也。皆自其交會處言之。古文《禮》挾皆作接，然則接矢為本字，挾矢為假借字與？」④承珙案：「挾」與「接」同聲亦同義。《說

- ①「繕」，原作「膳」，今據《續清經解》本及《禮經釋例》改。
- ②「箠」，原作「以服」，今據《周禮注疏》改。
- ③「市」，原作「市」，今據《儀禮古今文疏義》改。
- ④「矢」，原作「弓」，今據《儀禮古今文疏義》改。

文：「挾，俾持也。」《孟子》：「挾貴而問。」趙注：「挾，接也。」此「挾貴」、「挾長」，謂有所挾持，^①訓接似不相近。考《廣雅》云：「接，持也。」是接、挾皆有持義。蓋交接之處，必有所持而後固，故接得有持義。趙注訓挾爲接，猶訓挾爲持耳。但挾之訓持是本義，接訓持乃引申之義，故鄭從今文作「挾」耳。《大射儀》云：「卒射，右挾之。」鄭注：「右挾之，右手挾弦。」案：卒射則無矢可挾，故知爲挾弦。是挾即持也。徒弦亦可曰挾，不必矢與弦接而後言挾也。段說殊泥。」○凌氏《釋例》云：「《鄉射禮》：初射請射，司射升自西階，階上北面告于賓曰：『弓矢既具，有司請射。』又曰：『司射適阼階上，東北面告于主人曰：請射于賓。賓許。』三耦卒射，司射升堂，北面告于賓。再射，請射，請釋獲，司射皆升告于賓。卒射，及數獲畢，釋獲者皆升自西階，盡階不升堂，告于賓。三射，司射升，請以樂樂于賓，賓許諾，餘皆如初。《大射》初射請射，司射自阼階前曰：爲政請射。三耦卒射，司射適阼階下，北面告于公。再射，請射，司射升自西階東面，請射于公。公許，遂適西階上，命賓御于公。又司射適阼階下，北面請釋獲于公。卒射，及數獲畢，釋獲者皆阼階下北面告于公。三射，司射適阼階下，請以樂于公，公許，餘皆如初。《鄉射》告于賓者，尊賓

也；《大射》告于公者，尊公也。《鄉射》初射，告賓復告主人者，賓、主人敵也。《大射》再射告于公，遂命賓者，尊賓以耦公也。告賓于西階者，賓在西階也。告公于阼階者，公在阼階也。《大射》再射，升自西階，請射于公者，便于命賓也。告賓于階上，告公于階下者，君臣之義也。此《鄉射》、《大射》之別也。」賓對曰：「某不能，爲二三子許諾。」言某不能，謙也。二三子，謂衆賓已下。【疏】正義曰：注云「言某不能，謙也」者，敖氏繼公云：「不能，謂不善射也。」高氏愈云：「賓辭不能，不欲以德藝先人也。」云「二三子，謂衆賓已下」者，賈疏云：「謂除三耦之外通射者而言。」韋氏協夢云：「二三子，謂有司也。司射告賓以有司請射，故賓言某本不能，特爲二三子之請，不得不許耳。注專指衆賓，恐未備。」胡氏肇昕云：「鄉射本爲衆庶習禮，非爲賓一人，故賓辭，言某本不能，特爲衆庶習射，已不得不許耳。注言「衆賓已下」，則已通射者而言矣。韋說失之。」敖氏云：「爲二三子許諾，見所以不辭而即許之意。向者賓爲射而來，故至是不敢辭，但謙遜而已。」高氏

①「所」，原脫，今據《儀禮古今文疏義》補。

愈云：「爲二三子，則以衆賓樂此，不能獨異也。」司射適阼階上東北面，告于主人曰：「請射于賓。賓許。」【疏】正義曰：敖氏繼公云：「不請射于主人，惟告以賓許者，緣主人尊賓之意也。」^①賓許之辭，主人與聞之矣。必告之者，禮當然也。阼階上告主人當北面，^②「東」似衍文。上言司正「阼階上北面，受命于主人」，足以見之矣。北面告，變於君也。《大射儀》：「司射東面，請射于公。」褚氏寅亮云：「觀此經，^③知主人之席在阼階上少東矣。敖氏謂「東」字衍文，非也。」

右司射請射

司射降自西階，階前西面，命弟子納射器。弟子，賓黨之年少者也。納，內也。射器，弓、矢、決、拾、旌、中、籌、楅、豐也。賓黨東面，主人之吏西面。【疏】正義曰：注「籌楅豐也」，《校勘記》云：「楅，監本誤作『福』，後並同。」云「納，內也」者，案：內義與人同。吳氏廷華云：「與射及執事者皆庠序中人，何賓黨之可言？至投壺爲燕法主歡，此亦有飲酒，何獨不主歡？即曰習禮，何賓黨習而主黨獨不習邪？」況此事是公事，主人亦是

公主人，弟子斷應在習禮之內，蓋鄉學中之學士，不當以賓黨言也。據疏以賓黨在西，經言西面命之，故知爲賓黨。不知射事諸執事皆在西，此納器於西，故弟子在西以待事，非賓黨在西之謂。」乃納射器，皆在堂西。賓與大夫之弓倚于西序，矢在弓下，北括。衆弓倚于堂西，矢在其上。上，堂西廉。矢亦北括。

【疏】正義曰：「乃納射器，皆在堂西」者，敖氏繼公云：「初納之時，總置於堂西，未有所分別。既則陳其弓矢，如下文所云也。」賓與大夫之弓倚于西序，矢在弓下，北括。^④衆弓倚於堂西，矢在其上者，敖氏云：「此以弓位之上下，見尊卑也。下文云「東序東」，^⑤則此「序」下似脫一「西」字也。序西、堂西之弓，其亦皆北上與？」埤案：敖說是也。堂西者，西堂下也。東序東者，東夾之東也；西序西者，西夾之西也。即東垂、西垂。衆弓倚於西堂下，而矢在堂廉，

- ①「意」，原作「義」，今據《儀禮集說》改。
- ②「當」，原作「惟」，今據《儀禮集說》改。
- ③「經」，原脫，今據《儀禮管見》補。
- ④「北」，原作「此」，今據《續清經解》本及注文改。
- ⑤「序」，原作「房」，今據《續清經解》本及《儀禮集說》改。

賓、主人、大夫之弓則倚於東西堂廉之上，故下文曰：「主人堂東袒決遂，執弓；賓于堂西，亦如之。」謂賓、主人各在堂下，取弓于堂廉而執之也。卒射，賓序西，主人序東，皆釋弓，謂釋於故處也。則賓與大夫之弓在西序西，明矣。若西序，則西夾之牆。不應賓與大夫之弓獨在堂。既在堂，賓何以在西堂下執弓？自唐石本始脫，各本因之。郝氏敬云：「西序，堂上西牆。括，矢端受弦處。括言會也，矢與弦會也。括向北，鏃向南順也。衆耦之弓倚于堂西階下，矢在階上。」主人之弓矢在東序東，亦倚於東序也。^①矢在其下，北括。【疏】正義曰：姜氏兆錫云：「賓與大夫之弓矢亦在西序西，^②主人之弓亦倚於東序，矢在其下，北括，皆互文也。」高氏愈云：「倚弓矢，各有其地，主賓不相混，貴賤不相錯，蓋禮貴有別如此。」

右弟子納射器

司射不釋弓矢，遂以比三耦于堂西。

三耦之南，北面，命上射曰：「某御于子。」命

下射曰：「子與某子射。」比，選次其才相近者也。

古文曰「某從于子」。【疏】正義曰：郝氏敬云：「司射自初

取弓挾矢，至是不釋，執所事也。凡耦，尊者立右爲上射。武事尚右，左爲下。」張氏爾岐云：「御，進也，侍也。進而侍射於子，尊辭也。」盛氏世佐云：「某，字也。某子，氏也。下射稱字，上射稱子，亦尊卑異辭也。」埤案：《義疏》云：「堂西，蓋堂之西偏，所謂西堂下也。《大射》有次在東，故三耦俟于次，次西出，故耦亦西面。此無次，射位則猶彼經之次，堂西之位則猶彼經之次北也。堂西當南出，故耦亦南面。《大射》西面北上，尚右。此南面東上，乃尚左者，《大射》之次與此經射位東西相向。《大射》次中北上，此經射位亦北上，雖東西異面，其北上則一。堂西之位，在未就射位之先與射位別，則亦率其上射在左之常而已。」注云「比，選次其才相近者也」者，^③敖氏繼公云：「比，猶合也。謂合之而爲耦也。上下射相配謂之耦，命上下射之辭異，示尊卑也。其命之，惟以所立之序爲先後，故不復變位。既命耦乃定，所謂比也。」胡氏肇昕云：「敖氏解『比』字與注爲異，然必選次其才相近者，乃可合之爲耦。《周

①「序」，原作「房」，今據注文改。

②下「西」字，原脫，今據《儀禮經傳》補。

③上「者」字，原脫，今據注文補。

禮·大司馬《比軍衆》注：「比，校次之也。」又《宮正》：「以時比宮中之官府、次舍之衆寡」注：「比，校次其人之在否。」此比耦與《周禮》同義，故云「選次其才相近者也」。云「古文曰『某從于子』」者，胡氏承琪《古今文疏義》曰：「案：《大射儀》云：『遂告曰：大夫與大夫，士御于大夫。』鄭彼注云：『御，猶侍也。』大夫與大夫爲耦，不足則士侍於大夫，與爲耦也。《華嚴經音義》引《倉頡》云：『侍，從也。』故古文作『從』。鄭以《大射》決之，故從今文。」

右司射比三耦

司正爲司馬，兼官，由便也。立司正，爲泄酒爾。

今射，司正無事。【疏】正義曰：敖氏繼公曰：「以其始與射事，故名爲司馬。此時之位，其西面於觶南歟？」司正爲司馬，遠辟君，禮也。《大射儀》：司馬二人，司正如故。郝氏敬云：「前立司正爲旅酬，今未旅而射，即以司正充司馬，供射事。」高氏愈云：「飲則爲司正，射則爲司馬，蓋才之優者無不宜，故皆使其人爲之。」《儀禮釋官》曰：「司正主飲酒之禮，司馬主射禮，以其同主禮事，故職相兼。此大夫、士之禮。《大射儀》則別有司馬，不使司正爲之，與此異

也。」韋氏協夢云：「此時司馬之位已在司射虛位之南。下唯云反位，則反已立於此矣。不著之者，是時司射位未定，不得先見司馬位也。」司馬命張侯，弟子說束，遂繫左下綱。事至也。今文「說」皆作「稅」。【疏】正義

曰：敖氏繼公云：「命之繫左下綱耳，乃云『張侯』者，以張侯之事成於此故也。」注云「事至也」者，賈疏云：「上張

侯時不繫左下綱，中掩束之。今命弟子說其束，不致地，遂繫左下綱於植，事至故也。」云「今文『說』皆作『稅』」者，詳見《士昏禮》。司馬又命獲者，倚旌于侯中。爲

當負侯也。獲者亦弟子也，謂之獲者，以事名之。【疏】正

義曰：郝氏敬云：「射中曰獲，^①報中之人曰獲者。旌，獲者所執。矢中揚旌唱獲。時司射將誘射，司馬命獲者取旌，倚侯北正中。」獲者由西方，坐取旌，倚于侯中，乃退。【疏】正義曰：敖氏繼公云：「坐取旌，見其偃

於地也。侯中，侯之中央也。倚之於此，若示射者以中地然。退，反於西方之位也。倚旌而未負侯，蓋當誘射之節，則異於耦射也，且行事亦宜有漸。」郝氏敬云：「取旌由西

①「曰」，原作「者」，今據《儀禮節解》改。

方，射器在堂西也。」

右司馬命張侯倚旌

樂正適西方，命弟子贊工，遷樂于下。

當辟射也。贊，佐也。遷，徙也。【疏】正義曰：敖氏繼公云：「適西方，自西階東而往西階前也。樂，謂瑟也，亦西面命之。」郝氏敬云：「樂正前降立西階，至是適堂西，命弟子相贊遷樂于下，辟射位也。」吳氏廷華云：「弟子，工之弟子，即上相者也。上縣於洗東，則不必遷。此云遷者，蓋指瑟云。」弟子相工，如初人，降自西階，阼階下之東南，堂前三筓，西面北上坐。筓，矢幹也。今文無「南」。【疏】正義曰：敖氏繼公云：「如初人，謂何瑟之儀與後先之序也。堂，東堂也。堂前三筓，坐處之北也。必空三筓者，^①辟主人往來堂東之路也。位於堂下而坐，惟工耳，亦無席。」盛氏世佐云：「坐必於席，蓋遷樂時并工席亦遷之也。敖云無席，非。」方氏苞云：「鄉飲酒禮著工之降，而不見所坐之地，故互見於此。彼注云「降立於西方」，誤。」注云「筓，矢幹也」者，賈疏云：「《矢人》注：矢幹長三尺。是去堂九尺也。」胡氏肇昕云：「《考

工記》「以其筓厚爲之羽深」注：^②「筓，讀爲橐，謂矢幹。古文假借字。」又「紛胡之筓」注：「筓，矢幹也。」是矢幹謂之筓也。「云「今文無「南」」者，胡氏承珙《古今文疏義》曰：「敖氏謂堂爲東堂。案：阼階下之東南，即堂前，不必以堂爲東堂。但其南去堂之節，以三筓爲度。疏引《矢人》注：「矢幹長三尺。」三筓是去堂九尺。然則經文「堂前三筓」正緣上「南」字而設。今文無「南」字，非是。」樂正北面立于其南。北面，鄉堂，不與工序也。【疏】正義曰：賈疏云：「工西面北上，以南北爲序。樂正北面，則東西爲列，故云「不與工序也」。敖氏繼公曰：「北面者，蓋變於堂上之位。堂上則樂正與工同面。」盛氏世佐云：「以上三節皆一時事，當司射比三耦之時，司馬即命張侯倚旌，而樂正命遷樂矣。經文序事不得不爾，非真有先後也。」

右樂正遷樂

司射猶挾乘矢，以命三耦：「各與其耦

①「者」，原作「也」，今據《儀禮集說》改。

②「其」，原脫，今據《周禮注疏》補。

讓取弓矢，拾！」猶有故之辭。拾，更也。【疏】正義

曰：敖氏繼公云：「讓者，下讓其上也。取云拾者，謂更迭而取之也。司射以此二者命之。」韋氏協夢云：「讓，與『至於階三讓』之讓同，謂上射讓下射也。司射既比三耦，三耦上射先行，下射從之。上必讓下，敵者之禮也。敖氏謂下讓其上，未確。」郝氏敬云：「三耦既比，司射先自射教之。射者禮儀未閑。司射挾乘矢，命各與其耦揖讓，迭取弓矢，勿相雜越，皆司射命也。」姜氏兆錫云：「命各與其耦讓者，射以觀德，命之揖讓，以審其比禮、比樂之意。此《鄉大夫》所謂『退而以五物詢衆庶』者也。拾取弓矢，亦其中和容之一徵，故首命之。」張氏爾岐云：「各與其耦讓取弓矢，拾，即司射之所以命三耦者。」胡氏肇昕云：「郝氏、姜氏皆於『讓』字絕句。張氏於『矢』字絕句，『拾』字別一句。盛氏世佐以郝、姜爲得。今案：當以張氏爲長。各與其耦讓取弓矢，^①此命其取弓矢之辭。拾者，言其取之有次，不相雜越也。」注云「猶有故之辭」者，案：上文云：「司射兼挾乘矢。又云：『司射不釋弓矢。』此云『猶挾乘矢』，故云『有故之辭』。」三耦皆袒決遂。有司左執弣，右執弦而授弓。有司，弟子納射器者也。凡納射器者，皆執

以俟事。【疏】正義曰：郝氏敬云：「弣，弓把也。」敖氏繼公云：「有司，弟子主授受弓矢者。如此授之，是並授也。」

注云「有司，弟子納射器者也」者，方氏苞云：「經於前後弟子所有事皆質言之，而別言有司獲者，則非弟子明矣。注疏並以爲弟子，^②非也。禮必有義，弟子所有事皆簡便而易供。若授弓矢，唱獲，必有司習事乃能無愆於儀度。使以弟子任之，^③設倉皇失措而取觥撻，非所以誘教也。」遂授矢。受於納矢而授之。【疏】正義曰：敖氏繼公

云：「云遂，^④則亦授弓者授之也。上云：『衆弓倚于堂西，矢在其上。』是既納射器則陳之矣。弟子乃留于堂西，主授受之事，故此時復執以授之。」胡氏肇昕云：「經凡言『遂』者，皆相因之辭。上文言有司授弓，授弓訖，因遂授矢，即一人也。當以敖說爲正。」三耦皆執弓，搯三而挾一个。未違俟處也。搯，插也，插於帶右。【疏】正義

曰：郝氏敬云：「插三矢於帶間，挾一矢於第二指間，備先

①「與」，原作「以」，今據《儀禮正義正義正誤》改。

②「疏並」，原脫，今據《儀禮析疑》補。

③「任」，原作「易」，今據《儀禮析疑》改。

④「云」，原脫，今據《儀禮集說》補。

射也。一个，謂一矢。凡奇曰个。○《校勘記》云：「注兩『插』字，《釋文》、陳本、《通解》、《要義》俱作『捷』。」^①案：今本《釋文》亦作『插』，唯宋本作『捷』，見張淳《士冠禮》識誤。」云「搢，插也，插於帶右者，賈疏云：『以其左手執弓，右手抽矢而射，^②故知插於帶右。』故《詩》云：『左旋右抽。』」案：「插」，《釋文》作「捷」。捷與插古字通用。《樂記》注亦云：「搢，猶捷也。」《釋文》：「捷，本亦作『插』。」插又與扱通。《士冠禮》鄭注：建柶，扱柶於體中。《釋文》：「扱，作『捷』，本又作『插』。」後人知搢之爲插，不知捷之與插本同義也。因改注中「捷」爲「插」，幸有《釋文》，猶可見鄭注之舊也。司射先立于所設中之西南，

東面。【疏】正義曰：敖氏繼公云：「下經云：『設楅于中庭，南當洗。』又云：『設中，南當楅，西當西序。』然則此時司射之位，少南於洗而西當榮與？司射先立於此，欲三耦知其位也。」張氏爾岐云：「中，謂鹿中。以釋獲者，其設之處，南當楅，西當西序。此時尚未設中，云『所設中之西南』者，擬將來設中之處也。」三耦皆進，由司射之西，立于其西南，東面北上而俟。【疏】正義曰：敖氏繼公云：「進亦每耦並行，上射在左，如退適堂西之儀

也。立于其西南，又以司射所立處爲節也。俟，俟作射。」案：三耦本俟於堂西，至此始違俟處，進而立於司射之西南，以俟射也。

右三耦取弓矢俟射

司射東面立于三耦之北，搢三而挾一个。爲當誘射也。固東面矣，復言之者，明卻時還。【疏】正義曰：《校勘記》云：「一『个』，單疏本標目作『箇』。」

注云「固東面矣，復言之者，明卻時還」者，賈疏云：「司射先在中西南，東面。今三耦立定，卻來向三耦之北，東面，明司射卻時右還西南，東面也。」敖氏繼公云：「復云『東面』者，以其違於舊處，^③且明既還而後搢三挾一也。三耦之北，其正位之西也。立於此者，示三耦以揖進之節耳。」張氏爾岐云：「據注及疏言，司射本立于中之西南，今命三耦已，復還立此。經上文『先』字非先後之先，乃舊先之先。

①「捷」，原作「定」，今據《十三經注疏校勘記》改。

②「矢」，原作「捷」，今據《儀禮注疏》改。

③「違」，原作「遠」，今據《儀禮集說》改。

愚詳經文，似當作先後字爲妥。此復言之者，欲言其將誘射，故復從立處說起耳。」姜氏兆錫云：「司射原在中之西南，東面，因三耦來，立於其西南。其時司射卻身遜避，以便其進立，至三耦立定，隨復回向三耦之北，東面而立。注云：『復言之者，明卻時還也。』」味文義，當是如此，而疏說未明，故順其意而發之。」盛氏世佐云：「司射自請射之後，即於階前命弟子納射器，比三耦于堂西，又命三耦取弓矢，其初固未有定位也。經云『先立』者，謂先三耦而立于所設中之西南，以示射位也。下經云『司射先反位』，與此『先』字義同，其非舊先之先明矣。張氏辨之甚當，然其自爲說亦非也。案：上經三耦立于司射之西南，見司射之位在其東北也。此云『立于三耦之北』，則進而西矣。既違故位，嫌其所面亦異，故復云『東面』以決之，非複出也。由三耦東北，進而立于其北，未嘗有所退卻回還也。注云『卻時還』，亦非。」堵案：司射本位在三耦之東北，至是將誘射，故就射位，立于三耦之北。及射畢，搢扑反位，則反於本位，不復向射位。兩位蓋各自別。揖進，當階北面揖，及階揖，升堂揖。豫則鉤楹內，堂則由楹外。當左物，北面揖。鉤楹，繞楹而東也。序無

室，可以深也。周立四代之學於國，而又以有虞氏之庠爲鄉學。《鄉飲酒義》曰「主人迎賓於庠門外」是也。庠之制，有堂有室也。今言豫者，謂州學也，讀如「成周宣謝災」之「謝」。《周禮》作「序」。凡屋無室曰謝，宜從謝。州立謝者，下鄉也。左物，下物也。今文「豫」爲「序」。序乃夏后氏之學，亦非也。【疏】正義曰：敖氏繼公云：「自『揖進』以下，皆教三耦以射儀也。誘射而就左物者，亦以其爲主黨也。序，州黨之學堂，即庠也。鄭氏以爲鄉學，是也。黨屬於州，州屬於鄉，以此言之，則三者之學其小大深淺可知矣。序則鉤楹內，謂繞楹之東而北，^①以其物當棟也；堂則由楹外，謂循楹之南而東，以其物當楣也。蓋射者必履物，而物之在堂有深有淺故爾。夫此篇以「鄉射」爲名，而其禮乃及於州黨之學者，其故何哉？蓋君子之居是鄉，或有近於庠者，或有近於序者，故其射也，各隨其居之所近而因便會聚於其中，以行禮焉。此其所以不容不異也。」郝氏敬云：「司射東面立以下，皆司射自射以教射也。揖進，即所立之次，東向一揖，進當西階塗，北向一揖，及西階下一揖：此堂下三揖也。楹，即今廳中四柱負棟者。鉤楹，

①「謂」，原脫，今據《儀禮集說》補。

謂近檐兩楹，內可鉤行。古人堂、牖、戶皆在後楹間，室與房在堂之北。後楹中間，戶牖室也；後楹東間，戶牖房也。所謂東西階位，皆在堂深處，而前當兩階，非就檐下布席也。」凌氏《釋例》云：「凡射未升堂之前三揖：曰耦進揖，曰當階北面揖，曰及階揖。《鄉射禮》司射誘射，東面立于三耦之北，搢三而挾一个，揖進，當階北面揖，及階揖。《大射儀》司射誘射，入于次，搢三挾一个，出于次，西面揖，當階北面揖，及階揖。此升堂之前三揖也。《鄉射》初射，上耦揖進，上射在左，並行，當階北面揖，及階揖。再射，一耦揖升，如初。又云：「賓、主人、大夫揖，皆由其階，降揖。主人堂東袒決遂，執弓，搢三挾一个，賓于堂西亦如之。」^①皆由其階，階下揖。」賓、主人、大夫揖，猶耦進揖也。由其階降揖，猶當階揖也。由其階，階下揖，猶及階揖也。又云：「大夫袒決遂，執弓，搢三挾一个，由堂西出于司射之西，就其耦。大夫爲下射，揖進，耦少退，揖如三耦。」三射皆如初。此《鄉射》升堂之前三揖也。《大射》：初射，上耦出次西面，揖進，上射在左，並行，當階北面揖，及階揖。再射，一耦揖升如初。又云：「諸公卿取弓矢于次中，袒決遂，執弓，搢三挾一个，出，西面揖，揖如三耦。」三射皆如初。此《大射》升堂之前三揖也。司射誘射者，教射也，故

其儀與耦射同也。《大射》有次在洗東南，故「出次，西面揖」。《鄉射》無次，但於堂西袒決遂，故耦進東面揖也。《大射》賓侍君射，不揖者，君尊，不降階，賓不敢與之耦也。」○《校勘記》云：「注「而」又以有虞氏之序爲鄉學」「序」，徐本、《通解》俱作「庠」。敖氏作「序」。案：敖引鄭注雖作「序」，然其說云：「序，州黨之學堂，即庠也。鄭氏以爲鄉學，是也。」是敖氏所見本亦作「庠」，偶誤寫作「序」耳。「讀如成周宣榭災之榭」「榭」，^②徐本、《通解》、《要義》、楊氏俱作「謝」，^③下並同。案：《春秋左氏》經作「成周宣榭火」，《公羊》經作「成周宣謝災」。鄭引《公羊》經，而疏以《左氏》經釋之，非鄭意也。且《說文》無「榭」字，^④《左氏》、《穀梁》之作「榭」，未必非後人所改，當從言爲正。」云「鉤楹，繞楹而東也。序無室，可以深也。周立四代之學於國，而又以有虞氏之庠爲鄉學。《鄉飲酒義》曰「主人迎賓於庠門外」是也。庠之制有堂有室也。今言豫者，謂州

①「西」，原脫，今據《禮經釋例》補。

②「榭」，原作「謝」，今據《十三經註疏校勘記》改。

③「謝」，原作「榭」，今據《十三經註疏校勘記》改。

④「榭」，原作「謝」，今據《十三經註疏校勘記》改。

學也。讀如「成周宣謝災」之「謝」。《周禮》作「序」。凡屋無室曰謝，宜從「謝」。州立謝者，下鄉也。今文「豫」爲「序」。序乃夏后氏之學，亦非也者，賈疏云：「注云『今言豫者，謂州學也』者，《周禮》·地官·州長職云『春秋以禮會民而射于序』是也。」云「凡屋無室曰榭，宜從榭，序乃夏后氏之學，亦非也」者，「鄭廣解榭名。《爾雅》云：『閣謂之臺，有木者謂之榭。』及『成周宣謝』及此州立榭皆是無室，故云『凡』以該之。不得從豫及序，故云『宜從榭』也。『今文豫爲序。序乃夏后氏之學，亦非也』，不從今文者，以其虞庠、夏序皆是有室，州之序則無室，故云『非』。言『亦』者，古文爲「豫」已非，今文作「夏后氏之序」亦非。」盛氏世佐云：「《禮記·學記》云：『術有序。』《周禮·州長職》云『春秋以禮會民而射于序』，本記云『序則物當棟』，^①皆作「序」。此古文作「豫」，誤也。鄭公從之者，取其與「榭」字略似，便改讀以求合於《爾雅》『無室曰榭』之文耳。詎知榭是臺上之屋，所以臨觀講武，與此州黨學舍絕不相干，不可援以爲據也。若夫序之無室，其證有三，而《爾雅》不與焉。蓋序爲州黨學，其規模制度必狹小於鄉學之庠，而其器席陳設一與庠同，又須留餘地以通行禮者之往來。若復去其四分之一以爲室，^②其勢必不能容。一也。庠大於序，而

射者所履之物止於當楣。楣，棟前一架也。序小於庠，而物反當正中之棟，若其有室，則室之牖前爲賓席，席前又設薦俎，與物同在一架之內，能無礙乎？一二也。又以經文證之，序本與庠對，今以堂對言者，互文也。堂者，對室之稱。無室不可以言堂，故言序則知堂之爲庠矣，言堂則知序之無室矣。其言簡而義該如此。三也。之三者，皆足以明序之無室。鄭公不一爲拈出，而輕改經文以申己臆，過矣。若以序爲夏后氏之學，其說出於《王制》、《明堂位》，與《孟子》異，未知孰是。然即謂周人立夏之學於州，去室而仍取序名，亦無不可，何必改「序」爲「榭」邪？「凌氏《釋例》云：『注既云《周禮》作序矣，復以『今文豫作序』爲非，且下記云『序則物當棟』，正作「序」字。疑注說不然也。』胡氏承珙云：『鄭於經「豫」字，但讀如「謝」，不即破其字爲「謝」，所以存古字、古音。此既以「序」爲非，而於《禮記·學記》、《周禮·州長》并下記諸「序」字，皆不破之者，蓋以序、謝字本通耳。』^③《經義聞斯錄》曰：「案：鄭氏之意，蓋以豫、序

①「棟」，原作「楣」，今據《儀禮集編》改。

②「其」，原脫，今據《儀禮集編》補。

③「謝」，原作「榭」，今據《儀禮古今文疏義》改。

同爲假借字，本字當作「榭」，故後注有云：「或言堂，或言序」，亦爲庠、榭互言，自作庠榭。然周以有虞氏之庠爲鄉學，安知不又以夏后氏之序爲州黨學邪？記云：「序則物當棟，堂則物當楣。」記與禮之堂皆謂庠。古人屋皆五架，中爲棟，棟之前有楣有庋，棟之後亦有棟有庋。序無室，庠則後楣之南爲堂，北爲室，故序則物當棟，後餘兩架，庠則物當楣，後亦餘兩架。而侯之入庭深淺亦視此爲率，以侯道之五十弓爲定也。楹當楣下，物當棟，在兩楹北，故鉤楹內，物當楣在兩楹之間，故由楹外。此篇司正洗觶升階，亦由楹內適阼階，受命于主人。司馬升堂命去侯，命去矢，亦皆鉤楹內立於物間。蓋此篇本州序習射之事也，而鄉大夫詢衆庶亦用此禮，故并庠之物當楣，由楹外言之。或疑鄉庠州序之內各有序有堂，似非。」胡氏肇昕云：「案：諸家皆泥於『州長射於序』之文，故說多窒礙而難通，不知庠有室，序無室，此定制也。而經於《鄉射》兼言堂者，以禮或有兼行於庠者，其制與序有異，故因序而并及之。玩經文，豫則鉤楹內，堂則由楹外。豫言序，堂言庠，二「則」字明是分言庠、序，非專爲州長習射而言也。《鄉射·記》：「射自楹間。」注云：「自楹間者，謂射於庠也。」此鄉射亦行於庠之明證。《禮經》古文作「豫」，今文作「序」。「豫」、「序」皆從

予得聲，古相通用。鄭讀「豫」爲「榭」者，以《爾雅》「無室曰榭」，豫亦無室，故讀從之。《說文》無「榭」字，古借「謝」爲之，故《春秋》「成周宣榭火」，《公羊》經「宣謝災」。鄭此注即本《公羊》之文。謝與豫、序古音亦相近。《孟子》曰：「庠者，養也。校者，教也。序者，射也。」皆取同音爲訓。序之訓爲射，猶豫之讀如謝也。「云「左物，下物也」者，張氏爾岐云：「物者，以丹若墨畫地作十字形，射者履之以射。左物下射所履，故云「下物」也。」姜氏兆錫云：「物者，猶物色之物。《大射禮》云：「若丹若墨，度尺而午。」^①是也。」及物揖，左足履物，不方足，還視侯中，俯正足。方，猶併也。志在於射，左足至，右足還。併足，則是立也。南面視侯之中，乃俯視，併正其足。【疏】正義曰：凌氏《釋例》云：「凡射，既升堂之後三揖：曰升堂揖，曰當物北面揖，曰及物揖。《鄉射禮》：司射誘射，升堂揖。豫則鉤楹內，堂則由楹外。當左物，北面揖。及物揖。左足履物，不方足，還視侯中，俯正足。不去旌。誘射，將乘矢。《大射儀》：司射誘射，升堂揖，當物北面揖，及物揖。由下

①「度尺」，原作「畫物」，今據《儀禮經傳》改。

物少退，誘射。射三侯，將乘矢，始射干，又射參，大侯再發。此升堂之後三揖也。《鄉射》：「初射，上射先升三等，下射從之，中等。上射升堂，少左，下射升，上射揖，並行。皆當其物，北面揖，及物揖。皆左足履物，還視侯中，合足而俟。再射，賓、主人射，升堂揖。主人爲下射，皆當其物，北面揖，及物揖。三射如初。此鄉射升堂之後三揖也。《大射》：始射，上射先升三等，下射從之，中等。上射升堂，少左。下射升，上射揖，並行。皆當其物北面揖。皆左足履物，還視侯中，合足而俟。再射，諸公、卿升射如三耦。三射如初。此大射升堂之後三揖也，又：始射，司射命曰：「毋射獲，毋獵獲。」上射揖。司射退，反位。再射，司射命曰：「不貫不釋。」上射揖。司射退，反位。三射，司射射皆同。此揖亦在升堂之後，然唯第一耦之上射有之，餘耦皆無也。《鄉射》或於庠，或於序，故曰「鉤楹內」、「由楹外」。《大射》用三侯，故曰「始射干，又射參，大侯再發」。其禮既殊，故誘射亦異也。」注云「方，猶併也。志在於射，左足至，右足還。併足，則是立也。南面視侯之中，乃俯視，併正其足」者，朱子曰：「注意若曰：左足履物，而右足不併，便還足南面，視侯之中也。若便併右足，則是立

矣。以志在相射，故未暇立而先視侯。既視侯，而後俯併其足也。」敖氏繼公云：「左足履物，履從畫也。《大射儀》曰司射「由下物少退」，則履物者當履其從畫也。不方足，未暇北面而立也。他時，凡欲還者必先立，故言此以明之。還，謂右還而南面也。右還者，爲下射宜向上射也。既視侯中，乃俯視而正足，則視侯中之時，右足其亦在從畫而少退與？正足，謂左右各履橫畫之兩端也，亦左先而右次之。」張氏爾岐云：「左足履物，不及併足，右足初旋已。南面視侯，乃俯正足而立，是其志在於射也。」吳氏廷華云：「還者，北面及物，履物後，乃還而西面立，又轉首南視侯也。不方足者，未及併足即視也。據此，則古射者亦側立西向，左手把弣向南，與今同。惟併足而立，與今之不下不八者異。《記》所謂「志正體直」者，非必正面向侯也。」褚氏寅亮云：「向北履物之時，左足必履橫畫之距，還身正足之時，右足必履橫畫之隨。其縱畫則虛而不履，蓋兩足之間也。敖氏謂履縱畫者，非。左足履物，勢必右還其身而後向南。謂下射向上射者，亦非。誘射無分上下也。」盛氏世佐云：「射之立法與他時異：他時併足而立可也，而射者之足則不可併，併則不可射。聖人於此恐人或有未嫻也，故先於射位畫爲一縱一橫之物，而使之取正焉。司射

於誘射之時既視侯中，即俯而視足，以察其合法與否，皆所以教也。方足者，併足而立也，此常法也。正足者，正其足於物也。物一縱一橫，履之者亦左足縱而右足橫，如其所畫也。至今射者之立取象於丁，猶古人畫午之遺意。注於正足、方足之分茫然莫辨，而敖氏遂以左右各履橫畫之兩端釋之。若然，則其身正南面而立矣，將何以支左詘右而射乎？蓋自文、武殊科，而射爲武事，於是習於射者既不能講明容體以證於經，而儒生、學士游於藝者蓋寡，又徒守紙上之空言，謬誤相承，莫能是正，而經義遂晦矣。^①此愚之所以讀之而慨然也。至於疏說之誤，則由讀注之不審。云「左足至，右足還」者，謂志在於射，故左足甫至物，右足即還，不及併足而立也。又云「併足則是立也」者，反言以明之耳。疏以「右足還」三字連下爲句，則非矣。得朱子之解，注意始明，而近世又有謂「左足至」爲句，「右足還併足」爲句，「則是立也」三句皆是反言者，亦失注意。「不去旌，以其不獲。」【疏】正義曰：賈疏云：「以其旌擬唱獲，今以三耦誘射，不唱獲，故不去旌也。」敖氏繼公云：「倚旌於侯而不去者，以誘射不主於中，且不獲也。」郝氏敬云：「凡射獲者持旌，侯西唱獲。此教射不計獲，故旌倚侯不去也。」褚氏寅亮云：「旌倚侯中，蓋在正下。誘射者必善射，

其中侯也，必不中旌，故可不去。其不去也，非不主於中也。蓋見中侯，不中旌也。注以「不獲」釋之，微矣。」方氏苞云：「注謂以不獲，敖氏謂不主於中，皆非也。發而不中，尚可以教射乎？疑旌之高不揜正鵠，倚於侯之中央，在正鵠之下。惟司射發必中的，不失分寸，故不去旌以爲表儀，使人則倣，是以誘射畢，始命獲者執旌以負侯。三耦射則去之，正恐矢或集於旌而貫於侯也。」胡氏肇昕云：「方氏憑臆說經，未可據，當以舊說爲正。」誘射，誘，猶教也。【疏】正義曰：誘，引導也，亦有教之之意。將乘

矢。將，行也。行四矢，象有事於四方。【疏】正義曰：敖氏繼公云：「言此者，明四矢盡發也。」《大射儀》誘射以四矢射三侯。胡氏肇昕云：「《射義》云：『男子生，桑弧蓬矢六，以射天地四方。天地四方者，男子之所有事也。』是注所本。」執弓不挾，右執弦。不挾，矢盡。【疏】正義曰：敖氏繼公云：「執弓，左執弣也。挾弓者，以右巨指

①「經」，原脫，今據《儀禮集編》補。

②「明」，原作「必」，今據《儀禮集說》改。

鉤弦也。^①此不挾，則但執弦而已也。」南面揖，揖如升射，降，出于其位南，適堂西，改取一个，挾之。改，更也。不射而挾之，示有事也。今文曰「適序西」。**【疏】**正義曰：「改作一个」，《校勘記》云：「作，唐石經、徐本、《通解》、敖氏、楊氏俱作『取』，是也。」○敖氏繼公云：「南面揖，揖退也。揖如升射，謂如其當物升堂之揖也。」云「出于其位南」，見是時未有司馬西方之位也。自賓與大夫之外，凡南行而適堂西與堂西出而北行者皆由於此，惟發於其位及反位者則否。」張氏爾岐云：「司射位在所設中之西南，^②東面。今乃出其位南，北迴適堂西者，疏以為教衆耦威儀之法故也。衆耦射畢，皆當自此適堂西，釋弓，脫決拾也。」吳氏廷華云：「上司射立于中之西南，東面。三耦又立于司射之西南，東面北上。司射升堂誘射畢，降階，南行出于其位之南，則當與三耦立處相當。蓋三耦本立於其位之西南也。司射至此，乃西面行，與上耦對，至上耦前，乃轉而北行，至堂西，取一个，挾之，即從堂西取扑，然後反位。其反位仍由故處，自階西至堂西，自堂西南行至上耦前，西向作之，乃轉身東行，轉北反位。」褚氏寅亮云：「乘矢已射訖，故更取一矢以挾，非與上相變之意。」

注云「今文曰『適序西』」者，胡氏承珙《古今文疏義》曰：「案：上文惟賓與大夫之弓倚于西序，主人之弓矢在東序，衆弓則皆倚于堂西，矢在其上。此司射取矢，自當云『適堂西』。又《大射儀》司射誘射畢，亦云『遂適堂西，改取一个挾之』。鄭以彼決此，故從古文。」遂適階西，取扑，搯之，以反位。扑，所以撻犯教者。《書》曰：「扑作教刑。」**【疏】**正義曰：敖氏繼公云：「搯扑者，以三耦將射也。」張氏爾岐云：「反位，所設中之西南東面也。」方氏苞云：「扑作教刑」，平時庠序之所用也。至習射，則必有大過而後撻，其不中者，飲之而已。而司射非有事於堂上，必搯扑正以示衆射者，容體不比於禮，節不比於樂，皆由平時不盡志於此，本當用扑而姑以觥代也。而賓、大夫、主人亦因此各釋己之志矣。《周官·閭胥》「掌觥撻罰」。蓋功事、役事，庶人則以撻罰，禮事，則吏、士以觥罰耳。」

右司射誘射

- ① 「右」，原作「大」，今據《儀禮集說》改。
② 「設」，原作「射」，今據《儀禮鄭注句讀》改。

儀禮正義卷九 鄭氏注

受業江寧楊大培補

司馬命獲者執旌以負侯。欲令射者見侯與

旌，深有志於中。【疏】正義曰：張氏爾岐云：「上文命張

侯，倚旌，疏云「同是西階前」。至此未有他事，當亦西階前

命之也。」盛氏世佐云：「下記云「命負侯者由其位」，正謂

此也。張氏云「西階前命之」，非。」敖氏繼公云：「使之執

旌於侯中，以示射者。若謂中侯，則舉此而言獲然。」郝氏

敬云：「旌先倚侯，三耦將射，乃命獲者執旌，北向背侯立，

侯司馬命也。」獲者適侯，執旌負侯而侯。侯，待

也。今文「侯」爲「立」。【疏】正義曰：注云「侯，待也」者，

賈疏云：「待司馬命去侯。」云「今文「侯」爲「立」」者，胡氏

承珙《古今文疏義》曰：「案：《大射儀》云：「負侯者皆適

侯，執旌負侯而侯。」《鄉射禮》三耦侯於堂西，南面東上。

鄭以彼此互決，故皆從古文。」胡氏肇昕云：「今文侯爲

立」，「立」，蓋「俟」之壞字，此經當今文作「俟」，古文作

「俟」。《說文》：「俟，大也。从人矣聲。」「俟，待也。从立

矣聲。」古文多假借，故作「俟」；今文用本字，故作「俟」。

《說文》於《禮經》多用今文，云「俟，待也」，蓋本今文也。此

經及《大射儀》三耦侯於次北，今文「侯」作「立」，皆即「俟」

之脫壞也。《大射儀》：「皆適次而俟。」今文「侯」作「待」，

字雖異而義同，知此亦不爲「立」字也。經典「俟」字少見，

唯《爾雅·釋詁》云：「俟，待也。」《左傳》哀元年：「日可俟

也。」用「俟」字。《爾雅釋文》云：「俟，又作俟。」《詩·齊

風》「俟我于著乎」，^①而《漢書·地理志》引作「俟」，是

「俟」、「俟」古相通用也。後世不知「俟」之本訓爲大，而以

待義當之，則俟失其本義，而反以「俟」爲「俟」之古字，故

《漢書》俟待之字多作「俟」，而師古於賈誼、終軍、彭宣、司

馬遷等傳皆云「俟，古俟字」。釋玄應《衆經音義》亦云：

「俟，古文俟，俟，𠂔三形。」幾不知「俟」、「俟」之爲二字矣。」

司射還，當上耦，西面作上耦射。還，左還也。

作，使也。【疏】正義曰：敖氏繼公云：「當，謂當上下射之

①「齊」，原作「鄭」，今據《續清經解》本改。

間。」^①張氏爾岐云：「三耦在司射之西南，東面，今欲西面命射，故知左還。」蔡氏德晉云：「還，左轉而西向也。時三耦猶在西階下西南，與司射俱東面立，司射還向上耦二人，使之升堂而射也。」褚氏寅亮云：「經明云『當上耦』，『作上耦射』，敖氏云『當上下射之間』，與經違矣。作之，必正對之而後作。獨作上耦，則下耦亦隨之而並行矣。下經：司射西階之東北面，命上射曰『無射獲，無獵獲』。亦專命上射，亦正對上射，而下射自喻。若在上下射之間，則宜云『階間』，而何以云『西階之東』邪？」司射反位。上耦揖，進，上射在左，並行；當階，北面揖；及階，揖。上射先升三等，下射從之，中等。中，猶間也。【疏】正義曰：敖氏繼公云：「上射在左，以其當就上物也。上射差尊，故先升。中等，空一等也。同階升者前後相當，宜空一等，以相遠為敬。與異階升者之義不同，其降亦然，然則凡升階者，必於其中間與？」吳氏廷華云：「揖進時東行，以北為左，當階轉北以西。中等者，上射已升三等，^②下射乃升一等，中空一等也。」上射升堂，少左；下射升，上射揖，並行。並，併也，併東行。【疏】正義曰：云「少左者，賈疏云：辟下射升階

也。敖氏繼公云：「為下射升堂則當在右也。」^③吳氏廷華云：「北面以西為左，東行以北為左。升階少左，蓋略向西，讓下射升位也。既升並行，則轉而東行也。」張氏惠言云：「上下射並行，中間相去如兩物，容弓，升階相隨行，及上堂而後左右併，階隘故也。」皆當其物，北面揖；及物，揖。皆左足履物，還視侯中，合足而俟。【疏】正義曰：張氏爾岐云：「當物，上射當右物，下射當左物；履物，還視侯中：皆倣誘射之儀。」敖氏繼公云：「不云不方足，省文耳。合足左右，^④並立於橫畫，即上所謂正足也。」吳氏廷華云：「當物時，上、下射尚東向。上射先當左物，乃俱轉身，北面揖畢，乃北行，及物並揖，以左足履物，尚北向也。既履物，乃轉身西向，即南面向侯，所謂『還』也。還即俟侯中，乃并足正立俟者，侯司馬、司射兩命然後射也。此當與誘射參看。又《大射》言『執弓，右挾之』，此無文，可知。」盛氏世佐云：「合足，猶正足

- ① 下「當」字，原脫，今據《儀禮集說》補。
 ② 「射」，原作「揖」，今據《儀禮疑義》改。
 ③ 「當」，原作「皆」，今據《儀禮集說》改。
 ④ 「足」，原作「卒」，今據《續清經解》本改。

也。謂俯察其足之縱橫，必合於所畫之物。」胡氏肇昕云：

「左足履物，右足還，不及方足也。至視侯中，乃合足而俟。

合足而俟，即併足而立也，上文所謂方足也。盛氏謂合於

所畫之物，解「合」字義迂曲。賈疏云：「俟，俟司馬命去

侯。」司馬適堂西，不決遂，袒執弓。不決遂，因

不射，不備。【疏】正義曰：敖氏繼公云：「惟云「適堂西」，

是猶未出於司射之南也。云「執弓」，是亦不挾也。不決

遂，不挾弓，變於大射也。云「袒執弓」，則固不決遂矣。乃

先言之者，嫌執弓者袒必決遂也。經文亦或言「袒」以包二

者，故以此明之。」褚氏寅亮云：「注云「因不射不備」，蓋此

經之不挾矢而并不決遂，與大射之雖決遂而仍不挾矢者，

俱以不射故也。其不挾矢與大射同，而不決遂與大射異

者，變於君禮也。」方氏苞云：「教射而會鄉民，儀可略。不

與射則不決遂，執弓而不挾可矣。大射則擇士以祭，君親

臨之，故不射而決遂，執弓而右挾，禮宜嚴也。」出于司

射之南，升自西階，鉤楹，由上射之後，西南

面，立于物間，右執簫，南揚弓，命去侯。鉤

楹，以當由上射者之後也。簫，弓末也。《大射》曰：「左執

弣。」揚，猶舉也。【疏】正義曰：敖氏繼公云：「去，離也。

命去侯者，令辟射且當獲也。」郝氏敬云：「時獲者南負侯，

所居乏在西，故西南面命之。」

注云「鉤楹，以當由上射

者之後也」者，賈疏云：「於西楹西而北，東行過，由上射之

後也。」云「簫，弓末也。《大射儀》曰：「左執弣。」揚，猶舉

也」者，敖氏云：「右執簫，為欲揚弓也。至是乃云「執簫」，

則初執弓之時左執弣，右執弦矣。南揚弓，以弓之上端南

向而舉之也。必南之者，為獲者在侯故也。」吳氏廷華云：

「去侯，以將射也。司馬不徑從堂西至階下，升階，乃從堂

西南行，出司射之西南，然後轉東，至當階，乃轉北行，升

階；既升，又不徑從階上東行，乃從西楹西而北，始轉東，

由上射之後，立於其後，俱與司射示威儀之義同。又上射

在西，下射在東，司馬從西來，故止由上射後立於其中也。

獲者在侯中西南面者，^①令去侯至乏，乏在西也。在物間

易隱，故揚弓示之。南揚者，獲者在南也。」方氏苞云：「命

去侯，則揚弓揮之使行，故高舉以為招也。命取矢，則揖弓

俯拾於地，故下指以示意也。」胡氏肇昕云：「《禮記·曲

禮》云：凡遣人弓者右手執簫。注：「簫，弣頭也。」^②《釋

①「西」，原作「面」，今據段校改。

②「頭」，原作「須」，今據《禮記正義》改。

名《云》：「弓，其末曰簫。言簫，梢也。」是簫爲弓末也。「獲者執旌，許諾，聲不絕，以至於乏；坐，東面偃旌，興而俟。聲不絕，不以宮商不絕而已，鄉射威儀省。偃，猶仆也。」【疏】正義曰：賈疏云：「而俟者，待射者發矢，當坐，故下云『獲者坐而獲』也。」注云：「聲不絕，不以宮商不絕而已，鄉射威儀省」者，賈疏云：《大射》云：「負侯皆許諾，以宮趨，直西，及乏南，又諾以商，至乏聲止。是其威儀多。此不者，威儀省故也。」敖氏繼公云：「此去侯，亦宜趨直西，乃折北而就乏，東面，偃旌，是旌亦東首矣。」胡氏肇昕云：「蔡氏德晉以『執旌許』爲句，『諾』字屬下讀，蓋以《大射》之『諾以宮』、『又諾以商』也。然考《鄉射》、《大射》二篇，如『賓許諾』、『大史許諾』，皆以二字連讀。蓋諾者，應之聲。僅云『執旌許』，則文義不了。當以舊讀爲是。」司馬出于下射之南，還其後，降自西階，反由司射之南，適堂西，釋弓，襲，反位，立于司射之南。圍下射者，明爲二人命去侯。

【疏】正義曰：「襲」，敖氏繼公云：「復衣也。此『襲』對『袒』而言。上衣雖裼，猶爲襲也。」《玉藻》曰：「尸襲，執玉龜襲。」非是，則皆裼矣。」凌氏《釋例》云：「凡有事於射則

袒，無事於射則襲。《鄉射禮》：司射請射，三耦將射，三耦拾取矢；衆賓將射，賓、主人、大夫將射，賓、主人拾取矢；大夫就其耦，兼取矢。皆袒決遂。司馬命獲者去侯，命取矢，司射命飲不勝者，皆袒執弓。《大射儀》：司射請射，三耦射，司馬正命獲者去侯，命取矢，三耦拾取矢，君與賓射，諸公、卿將射，三耦及諸公、卿、大夫、衆射者拾取矢，皆袒也。遂再射，司馬命取矢，司射命飲不勝者，皆袒執弓。是有事於射則袒也。《鄉射》：司馬命去侯訖，命取矢加楅訖，賓、主人、大夫卒射，飲畢，賓、主人、大夫拾取矢訖，射畢，司射退射器，皆襲。《大射》：司馬正命去侯訖，命取矢，加楅訖，三耦卒射，君、諸公、卿卒射，衆耦拾取矢訖，飲畢，射畢，司射退射器，皆襲。是無事於射則襲也。《鄉射》：司馬獻獲者，《大射》：司馬正獻服不，皆襲。《鄉射》、《大射》：司射獻釋獲者，亦襲。此皆飲酒之禮，無事於射者也。司馬乘矢襲，司射數獲襲者，皆既射以後之事也。飲罰爵，勝者皆袒決遂，示能射也。不勝者皆襲，說決拾，示不能射也。《鄉射》三射，司射請以樂射則襲。《大射》不云襲，文不具也。與前初射、再射、請射袒決遂不同者，禮射異於能中，故袒，襲不相因而相變也。」反位，立于司射之南者，敖氏云：「反，謂復其故道也。司射之南，皆指其虛位言也。是時，

司射不在此。反位而著其在司射之南，則前此猶在顰南之位也。方有此位而言反，以向者由是而往故也。」褚氏寅亮云：「經先言『出於下射之南』，則是由物間而出，從下射南向東行也。繼云『還其後』，則是過下物折向北，又折向西，而還下射之後也。疏似倒釋經文，且失注中『圍下射』之義。」又：「襲，復衣也。對袒而言，故謂之襲，與《聘禮》之襲有別。司射之南之位，司馬至此時，乃改顰南之位，而位於是焉，不曰『復初位』而曰『反位』者，位雖其位，於此始立焉爾。」盛氏世佐云：「云『反位』，則其在此位也，不自此始矣。方其爲司正也，位在顰南；及爲司馬，則位在司射之南。反爲司正，復就顰南之位。蓋顰南之位，當階間中庭，故射則遷之也。必於司射之南，從其類也。不於其爲司馬時著之者，以司馬之位取節於司射，彼時未見司射位，故至此始言之也。敖云『前此猶在顰南之位』，非。」注云「圍下射者，明爲二人命去侯」者，敖氏云：「圍下射而降者，往來交變以爲儀也。」^①盛氏世佐云：「圍下射者，威儀之法應爾也。」^②下文司射命取矢之時，上下射皆不在，亦圍左物而降，則可見矣。鄭解似迂，當以敖說爲正。」方氏苞云：「司馬升降，皆紆道而由司射之南，何也？升降徑由堂東西者，^③惟賓、主人，大夫不敢上擬，又司馬位在司射

之南，三耦衆賓卒射而降，皆由司馬之南，適堂西，釋弓，說決拾，故司馬先爲之儀。又云司馬命去侯，升由上射之後，立於物間，故降還下射之後，以適堂西。與再射命去侯，升自右物之後，降還左物之後同。理當如此，別無深意，注推說似迂遠。」司射進，與司馬交于階前，相左；

由堂下西階之東，北面視上射，命曰：「無射獲！無獵獲！」上射揖，司射退，反位。射

獲，謂矢中人也。獵，矢從傍。【疏】正義曰：相左者，賈疏云：「相左之時，在西階之西。司馬由北而西行，司射由南而東行，各以左相近，故云『相左』也。」敖氏繼公云：「司射進與司馬交於階前，著其進之節也；相左，著其行之方也。司馬南行，司射北行而相過，故謂之交。司馬在西，司射在東，故謂之相左。蓋南行者以東爲左，北行者以西爲左也。」盛氏世佐云：「凡升堂者，皆自其位東行，當階前，乃直北至階，反位亦如之。上經云：出於司射之南，升自西階。是其徵矣。若然，則相左之說當如敖解，疏誤也。」江

①「交」，《儀禮集說》作「相」。

②「應」，原作「宜」，今據《儀禮集編》改。

③「徑」，原作「經」，今據《儀禮析疑》改。

氏筠云：「仍是司馬由東而南行，司射由西而北行，蓋司射由其位進，行至堂塗，則折而北，及行至近階，始折而東耳。」「由堂下西階之東」者，敖氏云：「由堂下者，自堂下而少東行也。西階之東，當上物之南也。其於堂中爲少西，故取節於西階也。惟命上射者，以其先發而下射從之，且下射共聞之矣，故不復戒。戒其射獲，獵獲而不及其他者，獲近於侯，舉近以見其遠也。揖，以揖受其戒。」○注「獵，矢從傍」，《校勘記》云：「陸氏曰：『傍，或作旁。』案：敖氏作『旁』。」云「射獲，謂矢中人也。獵，矢從傍」者，賈疏云：「人謂獲者。」郝氏敬云：「司射不升堂，由西階東，北向上射命曰：射無計獲。善射者正己，無爭勝之心，則發必中度。獵，猶爭也。不由拾發，獵次爭勝，射者所戒。蓋初射誘習，不釋算計獲，故以此曉之。」盛氏世佐云：「無射獲，戒其傷人也；無獵獲，戒其驚人也。郝說非。」胡氏肇昕云：「射獲、獵獲，皆射不中度之最甚者，故舉以爲戒。射主於中，不得戒其無計獲，且射無計獲，亦不得云無射獲也。獵之言捷也。《文選·景福殿賦》：『獵捷相加。』注：『獵捷，相接之貌。』矢從人傍而過，是與人相接之兒。皆恐其傷人也，故戒之。」乃射，上射既發，挾弓矢而後；下射射，拾發，以將乘矢。后，後也，當從后。

【疏】正義曰：敖氏繼公云：「『弓』字，衍文。挾矢則挾弓可知，不必言也。《大射儀》無『弓』字。既發而挾矢，是射時乃傳矢也。此亦可以見其節矣。云『拾發』者，亦見下射既發挾矢，而後上射射也。古之射者，其序整齊而不紊，其儀從容而不迫，大抵類此。」張氏爾岐云：「上射發第一矢，復挾二矢，下射乃發矢，如是更發，以至四矢畢。」盛氏世佐云：「『弓』字非衍也。謂上射既發第一矢，復於帶間取第二矢傳於弓而挾之也。《大射儀》無『弓』字，省文耳。」蔡氏德晉云：「上射先發一矢，俟再挾矢於弓，而後下射發，拾更迭也。下射既發，再挾矢於弓，而後上射又發。」「各行四矢也。」○《校勘記》云：「注『古文而后作後，非也。』《孝經》說然后曰后者，後也。當從后」，徐本如是，與單疏標目合。《要義》節錄注云：「古文后作後，非。」《通解》與今本同。案：依疏當作《孝經》說「說然后曰」，各本少一「說」字。」云「后，後也，當從后」者，案：此注缺脫，當從徐本。賈疏云：「引《孝經》說者，取《孝經》緯·援神契」文。臧氏琳云：「案：《說文》，先後字作『後』，君后字作『后』。《儀禮》古文作『後』，與《說文》合；今文作『后』，當是同聲假借字。」胡氏承珙云：「案：經傳多借后爲後，鄭非不知后爲後之假借。《聘禮·記》：『君還而后退。』注云：『而后，猶然後』」

也。」此注必云「當從后」者，正以古文多假借，當本作「后」。《孝經》亦古文，故引以爲證。又《大射儀》「而后下射射」，彼今古文蓋皆作「后」，故以此古文作「後」者爲非，謂是傳古文者之誤。古文當本作「后」，不作「後」也。」胡氏肇昕云：「此說是也。鄭君於《禮經》多從古文，許君於《禮經》多從今文。古文多用假借字，今文多用本字。此經古文作「後」，故鄭君辨之，謂古文當作「后」，不作「後」也。云后者，後也，非以後釋后，謂后即後之假借耳，亦以通古今字之異也。古文訓詁多有此例。如《毛詩·汝墳》「怒如調飢」傳云：「調，朝也。」非以朝訓調，謂調即朝之假借耳。《文選注》引薛君《章句》曰：「朝飢最難忍。」是《毛詩》作「調」，用假借字；《韓詩》作「朝」，用本字也。又《采芣》「于沼于沚」傳云：「于，於。」「于」、「於」二字，經典多通用，而有古今文之別，故經文多用「于」，傳注多用「於」。以「於」釋「于」，所以通古今字異也。舉此而此注之從后，不從後，以後釋后之故可推矣。」獲者坐而獲。射者中，則大言獲。獲，得也。射，講武、田之類，^①是以中爲獲也。【疏】正義曰：敖氏繼公云：「獲者於射時，則坐以俟其中也，中乃獲之。必坐而獲者，旌在地，須坐乃舉之以獲也，且示有所變。」○注「則大言獲」，敖氏《集說》載鄭注作「坐言獲」。

「講武、田之類」，《集說》「田」上有「師」字。案：《校勘記》不載各本有如此者，敖以意增改耳。舉旌以宮，偃旌以商；宮爲君，商爲臣。聲和律呂相生。【疏】正義曰：敖氏繼公云：「此一中而兩言獲也。」蔡氏德晉云：「舉旌之聲高爲宮，偃旌之聲下爲商，蓋一唱而聲再變也。」獲而未釋獲。但大言獲，未釋其算。【疏】正義曰：注「大言獲」，敖氏《集說》引注無「大」字。○敖氏繼公云：「是時未立釋獲者，則未釋獲可知。」張氏爾岐云：「釋算，所以識中之多寡。注上下文皆言「大言獲」，賈疏乃以宮爲大言獲，商爲小言獲，是一矢而再言獲，恐未是。或一聲漸殺，各有所合與？」盛氏世佐云：「《大射儀》云：負侯皆許諾以宮，^②及乏南，又諾以商。此獲者受去侯命之聲也。亦宮、商爲二聲，非一聲而漸殺。注兩言「大言獲」者，據第一聲而言也。張氏以此非疏，誤。」韋氏協夢云：「上獲，唱獲也；下獲，獲之算也。未釋獲者，三耦之射不主於中也。」蔡氏德晉云：「初射雖有中否，而不計勝負，但唱獲而不釋

^① 「田」上，原衍「師」字，今據《儀禮正義正義正誤》刪。

^② 「負」，原作「三」，今據《儀禮集編》改。

算，故曰「未釋獲」。卒射，皆執弓，不挾，南面揖，揖如升射。不挾，亦右執弦，如司射。【疏】正義曰：敖氏繼公云：「不挾者，變於大射。」吳氏廷華云：「卒射，承上將乘矢，但每發必唱獲，故夾叙之。如升射者，前揖處皆當揖也。」上射降三等，下射少右，從之；中等，並行，上射于左。降，下。【疏】正義曰：敖氏繼公云：「堂上並行，下射在左。今降階必少右，乃當上射之後也。並行，上射于左者，謂上射先降，少左，下射降，乃並行，而上射於左也。上射必於左者，進時，上射在左，退亦宜然。堂上各發於其物，不可得而變。降時有先後，故因既降而爲之。此將適堂西也。上射乃不於右，便其反位者，以有釋弓等事而未即反故也。」吳氏廷華云：「卿、大夫階五等，降三等即是中等，與大射又不同。」又云：「從之，隨上射後降階也。中等並行者，既降乃並也。上、下射離物南行，轉西，當階，轉南時，上射在西，下射在東。南以西爲右，少右，隨上射後降階也。既降中等，下射乃前，至上射之西，並行，上射在左。」褚氏寅亮云：「當發位並行向西階時，上射南，下射北，上射已於左矣。不待降階時始易位，經於階下著之者，明仍在左也。」張氏爾岐云：「並行，

既降階而並行。」盛氏世佐云：「上經云「上射升堂，少左」，此云「下射稍右，從之」，互文也。凡獨升者，中階而升也；共升，則差尊者在左，差卑者在右，雖間一等，如其並行之節也。並行，上射于左，兼在堂上、堂下言也。張云既降階而並行，敖云堂上並行、下射在左，皆非。」胡氏肇昕云：「上經云：「上射升堂，少左，下射升，上射揖，並行。」此既升堂而並行也。此經云：「上射降三等，下射少右，從之；中等並行，上射于左。」乃既降階而並行也。張說不誤。盛氏駁之，非是。」與升射者相左，交于階前，相揖。

【疏】正義曰：敖氏繼公云：「進退者交則相揖，以其事同也。」張氏爾岐云：「相左者，降者由西，升者由東也。」蔡氏德晉云：「相左交者，初耦自堂上降，次耦自堂下升，交遇于西階前。」^①南下就西，以東爲左，北升趨東，以西爲左也。」凌氏《釋例》云：「凡射後二揖，曰卒射揖，曰降階與升射者相左交於階前揖。《鄉射禮》初射，三耦乃射，上射既發，挾弓矢，而后下射射，拾發，以將乘矢。卒射，皆執弓，不挾，南面揖，揖如升射。上射降三等，下射少右，從之；中等，並行，上射于左。與升射者相左，交于階前，相揖。

① 「遇」下，原衍「乃」字，今據《禮經本義》刪。

再射、三射，皆如初。此《鄉射》之射後二揖也。《大射儀》：初射，三耦乃射，上射既發，挾矢，而后下射射，拾發以將乘矢。卒射，右挾之，北面揖，揖如升射。上射降三等，下射少右，從之；中等，並行，上射于左。與升射者相左，交于階前，相揖。再射，諸公、卿卒射，降如三耦。^①三射，如初。此大射之射後二揖也。大射卒射北面揖，不同鄉射南面揖者，君在堂上故也。司射誘射，卒射，北面揖。注：「不南面者，為不背卿。」考下文諸公、卿、大夫卒射，亦揖如三耦。此時卿已降矣，則非為卿可知。敖氏繼公云：「北面揖者，為下射與君同物，不可南面揖于楹間，嫌也。」《鄉射》：賓、主人卒射，南面揖，皆由其階，階上揖，降階揖。賓序西，主人序東，皆釋弓，說決拾，襲，反位，^②升，及階揖，升堂揖，皆就席。賓、主人分階，故多階上一揖。既降復升就席，故又有及階、升堂二揖也。又大夫卒射，揖如升射，耦先降。降階，耦少退。皆釋弓于堂西，襲。耦遂止于堂西，大夫升就席。大夫降，無與升射者交于階前之揖者，大夫既降，復升就席，然後繼射者始升也。《鄉射》：司射誘射，卒射，南面揖。揖如升射，降。此無升射，故無交于階前之揖也。《大射》：司射誘射，卒射，北面揖，及階降，如升射之儀。卒射揖後，復有降階揖者，大射，諸侯

禮，威儀多也。誘射無耦而亦揖者，教衆射者以行禮之節也。由司馬之南適堂西，釋弓，說決拾，襲而俟于堂西，南面，東上。三耦卒射，亦如之。司射去扑，倚于西階之西，升堂，北面告于賓曰：「三耦卒射。」去扑乃升，不敢佩刑器即尊者之側。【疏】正義曰：「升堂北面」，《校勘記》云：「北」字誤在「司射」上。○敖氏繼公云：「司馬之南，即鄉者所謂「司射之南」也。此時已有司馬之位，又在司射之南，正當往來者之北，故以之為節耳。釋弓，說決拾，以己初射之事畢也。說遂而言拾者，別於用時也。俟，俟司射命也。」^③，當作「二」，字之誤也。二耦，謂次耦、下耦也。下耦與此異者，無與升揖者相左、相揖之事耳。胡氏肇昕云：「下三耦拾取矢節云：「三耦拾取矢亦如之。」敖氏亦云：「三，當作二。」考《大射》三耦卒射亦如之，作「三」。二耦拾取矢亦如之，作「二」。細釋經文，當以作「二耦」為是。蓋「三」與「二」字畫相似，又涉下「三耦卒射」而誤耳。蔡氏

① 「如」，原作「加」，今據《禮經釋例》改。
② 「反」，原作「及」，今據《禮經釋例》改。

《本義》本之，徑改經文爲「二耦」。注云「去扑乃升，不敢佩刑器即尊者之側」者，敖氏云：「扑，刑器也。將告尊者必去之，敬也。士之射禮，賓主之，故司射獨以是告賓。」賓揖。以揖然之。

右三耦射

司射降，搯扑，反位。司馬適堂西，袒執弓，由其位南，進，與司射交于階前，相左，升自西階，鉤楹，自右物之後，立于物間；西南面，揖弓，命取矢。揖，推之也。【疏】正

義曰：敖氏繼公云：「司射將反位，司馬將升堂，而交于階前，則是其去扑與袒執弓之事，亦相接爲之。」褚氏寅亮云：「司馬適堂西，在司射未降先。司射甫降，而司馬已至階，故於此得相交。」增案：《義疏》云：「司射降自西階，司馬方升，南北相值，經曰『相左』，^①則司馬在東，司射在西也。」盛氏世佐云：「命取矢，命取彘誘射及三耦射之矢。」

注云「揖，推之也」者，賈疏云：「推手曰揖，引手曰厭。」

故《周禮·司儀》天揖、時揖、土揖，鄭注皆以推手解之。揖弓者，向侯而推之，以其命取矢故也；揚弓者，向乏而揚

之，以其命去侯故也。」敖氏云：「揖弓與揚弓，相變爲文，則揖者其推而下之之謂，與去侯取矢之事異，故上下其弓以別之。揖弓，繼西南面而言，^②是弓亦西南鄉矣，蓋以獲者與弟子皆在西南故也。揖弓者，蓋右執弦。」盛氏世佐云：「揖弓與揚弓相變。揚者，舉之向上也；揖者，推之向外也。《論語》曰：『上如揖。』蓋揚則高而揖則平與？敖以揖爲推而下之，非。」獲者執旌許諾，聲不絕，以旌負侯而俟。俟弟子取矢，以旌指教之。【疏】正義曰：敖氏繼公云：「獲者許諾者，取矢之事，己主之也。獲者審於視矢，雖不親取而主其事。」司馬出于左物之南，還其後，降自西階，遂適堂前，北面立于所設楅之南，命弟子設楅。楅，猶幅也，所以承筈齊矢者。【疏】正義曰：敖氏繼公云：「司馬立于所設楅之南，示弟子以設處也。凡言所設某者，皆謂器之未設者也。鄉者射器納于堂西，楅在其中。今司馬北面命設之，則是時弟子已奉楅而出與？弟子在西，司馬北面，不必鄉而命

① 「經」，原作「故」，今據《儀禮義疏》改。

② 「面」，原脫，今據《儀禮集說》補。

之。」張氏爾岐云：「所設楅，謂所擬以設楅之處。」埤案：先命取矢，後命設楅者，蓋楅自堂西一設即是。矢則合三耦及誘射者，總二十八矢，須一一取之，不能促致，故必先命之，使二事並舉於一時。及設楅後，又釋弓堂西，襲而反位，弟子乃得取矢，加楅，遂進撫而乘之，庶幾禮成於敏焉。其獲者負侯，本為弟子取矢而設，注所謂「以旌指教之」是也。^①若北面負侯，侯在其背，何能指之以旌？意必轉而向侯，始可指示之。又命取矢，不言弟子應諾者，可知已。又弟子方委矢于楅，及不備，又必升堂西南面命之者，^②據下云弟子自西方應諾，則委矢後，弟子已西反故也。」韋氏協夢云：「下射履左物，此云「出于左物之南」，即上「出于下射之南」也。弟子位在西南，此時奉楅而出，已至堂前，但未即設耳，故司馬北面鄉而命之。」○注「所以承筭齊矢」者，《校勘記》云：「徐本無「齊」字，聶氏、《通解》、楊氏俱有。朱子曰：「注脱齊字，據疏補之。」「云「楅，猶幅也，所以承筭齊矢者」，賈疏云：「義取若布帛，有邊幅整齊之意，故云「所以承筭齊矢」。」胡氏肇昕云：「《大射儀》：「總衆弓、矢、楅。」注：「楅，承矢器。」《說文》無「楅」字，本字作「箠」。「箠，弩矢箠也。」《周禮·司弓矢》曰：「中秋獻矢箠。」注：「箠，盛矢器也，以獸皮為之。」蓋承矢之器，本以

竹木為之，而以獸皮為飾，故其字从竹為箠，或从木為楅。服與冪偏旁古多通用。《詩·生民》「誕實匍匐」《釋文》：「匍，本亦作服。《爾雅·釋鳥》：「蝙蝠，服翼。」《方言》：「蝙蝠，自關而東謂之服翼。」皆其證也。故「幅」通作「輶」，猶「覆」訓為「服」也，「偏」通作「伏」，猶「服」通作「伏」也，「楅」通作「備」，猶「服」通作「備」也。」乃設楅于中庭，南當洗，東肆。東肆，統於賓。【疏】正義曰：敖氏繼公云：「中庭，東西節也。南當洗，不言北，文省也。東肆，龍首在西也。必東肆者，以上射在西也。司馬不以弓為畢者，辟大射禮也。」盛氏世佐云：「中庭，兩階之間也。南當洗，亦南北以堂深也。東肆，向東陳之，首在西也。」褚氏寅亮云：「陳祥道云：「考之於禮，^④奉楅者坐奠，委矢者坐委，乘矢者坐撫，取束矢者坐說，則楅卑而無足可知。舊圖楅有足，誤矣。」竊謂楅應有足，但不高耳。南當洗，亦大判言之，未必尺寸不爽。如在洗西而稍南，亦

①「是」，原脱，今據《儀禮義疏》補。

②「必」，原作「命」，「面」，原脱，今據《儀禮義疏》補。

③「誕」，原作「覃」，今據《毛詩正義》改。

④「禮」，原作「初」，今據《儀禮管見》改。

可云「當」。凌氏《釋例》云：「凡設楅于中庭，南當洗，東肆。《鄉射禮》初射畢，司馬適堂西，袒執弓，由其位南進，與司射交于階前，相左，^①升自西階。鉤楹，自右物之後，立于物間，西南面，揖弓，命取矢。獲者執旌許諾，聲不絕，以旌負侯而俟。司馬出于左物之南，還其後，降自西階，遂適堂前，北面立于所設楅之南。命弟子設楅，乃設楅于中庭，南當洗，東肆。《大射》：初射畢，司馬正袒決遂，執弓，右挾之，出，與司射交于階前，相左。升自西階，自右物之後，立于物間，西南面，揖弓，命取矢。負侯許諾，如初去侯，皆執旌以負其侯而俟。司馬正降自西階，北面命設楅。小臣師設楅。司馬正東面以弓爲畢。注：『《鄉射禮》曰：^②乃設楅于中庭，南當洗，東肆。』是大射設楅之處，與鄉射同也。《鄉射》：既設楅，司馬由司射之南退，釋弓于堂西，襲，反位。弟子取矢，北面坐，委于楅，北括，乃退。司馬襲，進，當楅南，北面坐，左右撫矢而乘之。若矢不備，則司馬又袒執弓如初，升，命曰：『取矢不索。』弟子自西方應曰：『諾。』乃復求矢，加于楅。《大射》：既設楅，司馬正適次，釋弓，說決拾，襲，反位。小臣坐委矢于楅，北括。司馬師坐乘之，卒。若矢不備，則司馬正又袒執弓，升，命取矢如初。曰：『取矢不索。』乃復求矢，加于楅。卒，司馬正

進坐，左右撫之，興，反位。蓋楅者，承筭齊矢之器，故設于中庭，以備取矢委之，且爲行禮之節。又《鄉射》：再射畢，取矢加楅。大夫之矢，則兼束之以茅，上握焉。三射同。《大射》：再射畢，取矢加楅，賓、諸公、卿、大夫之矢，皆束之以茅。三射同。此則與衆耦異者也。又案：《鄉射·記》云：「楅，檠，橫而奉之，南面坐而奠之，南北當洗。」此言設楅之儀也。」司馬由司射之南，退，釋弓于堂西，襲，反位。弟子取矢，北面坐委于楅；北括，乃退。司馬襲進，當楅南，北面坐，左右撫矢而乘之。撫，拊之也。就委矢，左右手撫而四四數分之也。上既言襲矣，復言之者，嫌有事即袒也。凡事升堂乃袒。【疏】正義曰：敖氏繼公云：「司馬所由者，亦其位南也。是時，司射在其位之北，故以司射爲節。」盛氏世佐云：「委，加矢于楅上也。北括，則於楅爲橫也。楅之東西設也，於茲益信。」注云「撫，拊之也。就委矢，左右手撫而四四數分之也」者，賈疏云：「撫者，撫拍之義。以

① 「左」，原作「交」，今據《禮經釋例》改。

② 「禮」，《禮經釋例》作「記」，並有小字注：「當作禮。」

右手撫四矢於東，以左手撫四矢於西，是四四數而分之也。胡氏肇昕云：「《釋名》云：『撫，敷也，敷手以拍之也。拍，搏也，手搏其上也。』是左右撫矢而乘之者，左右手相撫拍，而四四數分之也。」云「上既言襲矣，復言之者，嫌有事即袒也」者，敖氏云：「司馬是時不執弓，無嫌於不襲。此『襲』字蓋衍。」胡氏肇昕云：「上襲以命弟子設楅，退而釋弓，是無事即襲也；此進則有事矣，而云襲者，以在堂下也，故曰『嫌有事即袒也』。經文所以詳言之。敖氏謂爲衍文，非是。」云「凡事，升堂乃袒」者，賈疏云：「堂下雖有事，亦不袒。若司射，不問堂上、堂下，有事即袒。司馬與司射遞行事恐同，故明之也。」凌氏《釋例》云：「凡射者之事及釋獲者之事，皆司射統之。」《鄉射禮》：「司射適堂西，袒決遂，取弓于階西，兼挾乘矢，升自西階。階上北面告于賓曰：『弓矢既具。有司請射。』賓對曰：『某不能，爲二三子許諾。』司射適阼階上，東北面告于主人曰：『請射于賓。』賓許。」《大射儀》：「司射適次，袒決遂，執弓，挾乘矢，于弓外見鏃于弣，右巨指鉤弦，自阼階前曰：『爲政請射。』遂告曰：『大夫與大夫，士御于大夫。』此初射請射也。《鄉射》：「司射倚扑于階西，升請射于賓，如初，賓許諾。」《大射》：「司射適西階西，倚扑，升自西階，東面請射于公，公許。」此再射請射也。《鄉射》：「司射去扑，倚于階西，升，請射于

賓，如初，賓許。」《大射》：「司射倚扑于階西，適阼階下，北面請射于公，如初。」此三射請射也。《鄉射》：「司射不釋弓矢，遂以比三耦于堂西，三耦之南，北面，命上射曰：『某御于子。』命下射曰：『子與某子射。』」《大射》：「畫物畢，司射西面誓之曰：『公射大侯，大夫射參，士射干。射者非其侯中之不獲，卑者與尊者爲耦，不異侯！』大史許諾，遂比三耦。三耦俟于次北，西面北上。司射命上射曰：『某御于子。』命下射曰：『子與某子射。』此初射比三耦也。《鄉射》：「賓、主人、大夫若皆與射，司射則告于賓，適阼階上告于主人：『主人與賓爲耦。』遂告于大夫。大夫雖衆，皆與士爲耦。以耦告于大夫，曰：『某御于子。』又云：『司射降，搯扑，由司馬之南，適堂西立，比衆耦。』」《大射》：「司射適西階上，命賓御于公，諸公、卿則以耦告于上，大夫則降，即位而後告。司射自西階上，北面告于大夫，曰：『請降。』司射先降，搯扑，反位。大夫從之降，適次，立于三耦之南，西面北上。司射東面于大夫之西比耦，大夫與大夫，命上射曰：『某御于子。』命下射曰：『子與某子射。』卒，遂比衆耦。衆耦立于大夫之南，西面北上。若有士與大夫爲耦，則以大夫之耦爲上。」①命大夫之耦曰：『子與某子射。』告于大

①「上」，原作「正」，今據《禮經釋例》改。

夫曰：某御于子。命衆耦如命三耦之辭。」此再射比衆耦也。《鄉射》、《大射》司射誘射，皆將乘矢。此誘射也。《鄉射》：初射，^①司射還，當上耦，西面，作上耦射。《大射》：初射，司射適次，作上耦射，再射，三射，作射如初。此作射也。《鄉射》、《大射》：初射，司射命曰：無射獲，無獵獲。再射命曰：不貫不釋。三射命曰：不鼓不釋。此命射也。《鄉射》：「司射去扑，倚于西階之西，升堂北面，告于賓曰：三耦卒射。」《大射》：「適阼階下，北面告于公。」此告卒射也。皆射者之事也。《鄉射禮》請射後，司射降自西階，階前西面命弟子納射器。乃納射器，皆在堂西。《大射儀》：司射請射後，遂適西階前，東面，右顧，命有司納射器，射器皆入。君之弓矢適東堂，賓之弓矢與中、簫、豐皆止于西堂下。衆弓矢不挾。總衆弓、矢、楅，皆適次而俟。此命納射器也。《鄉射》：司射命三耦拾取矢，再射，三射如初。《大射》同。此命拾取矢也，亦射者之事，而司射命之也。故曰：射者之事，皆司射統之也。又《鄉射》司射立于中南，北面視算。《大射》同。此視算也。《鄉射》、《大射》再射畢，司射襲，適洗，洗爵，升實之，降。獻釋獲者于其位，少南。薦脯醢，折俎，有祭。釋獲者薦右東面拜受爵，司射北面拜送爵。釋獲者就其薦坐，左執爵，祭脯醢，

興，取肺，坐祭，遂祭酒，興，司射之西，北面立飲，不拜既爵。司射受爵，奠于筐。釋獲者少西辟薦，反位。此獻釋獲者也。皆釋獲者之事也。《鄉射》：司射命釋獲者設中。《大射》同。此命設中也。《鄉射》數獲後，司射命設豐，三射如初。《大射》同。此命設豐也。《鄉射》三射畢，司射命釋獲者退中與算而俟。《大射》同。此命退中與算也。亦釋獲者之事，而司射命之也。故曰：釋獲者之事，皆司射統之也。凡獲者之事，皆司馬統之。《鄉射禮》初射後，弟子取矢，委楅，司馬襲，進，當楅南，北面坐，左右撫矢而乘之。再射，三射，司馬乘矢如初。《大射儀》初射後，小臣委矢于楅，司馬師坐乘之，卒。若矢不備，則司馬正又袒執弓，升，命取矢如初，曰取矢不索。乃復求矢加于楅，卒，司馬正進坐，左右撫之。再射，司馬正坐，左右撫之。三射，司馬師乘之。此乘矢也。《鄉射》飲不勝者後，司馬洗爵，升實之以降，獻獲者于侯。薦脯醢，設折俎，俎與薦皆三祭。獲者負侯，北面拜受爵，司馬西面拜送爵。獲者執爵，使人執其薦與俎從之，適右个，設薦俎。獲者南面坐，左執爵，祭脯醢，執爵興，取肺，坐祭，遂祭酒。興，適左个，

①「初射」，原脫，今據《禮經釋例》補。

中亦如之。左个之西北三步，東面設薦、俎。獲者薦右東面立飲，不拜既爵。司馬受爵，奠于筐。《大射》：飲不勝者後，司馬正洗散，遂實爵，獻服不。服不侯西北三步，北面拜受爵。司馬正西面拜送爵，反位。宰夫、有司薦，庶子設折俎。卒錯，獲者適右个，薦俎從之。獲者左執爵，右祭薦俎，二手祭酒。適左个，祭如右个，中亦如之。卒祭，左个之西北三步，東面。設薦俎，立卒爵。司馬師受虛爵，洗，獻隸僕人與巾車、獲者，皆如大侯之禮。卒，司馬師受虛爵，奠于筐。此獻獲者也。皆獲者之事也。又《鄉射禮》：乃張侯，下綱不及地武。不繫左下綱，中掩束之。將射，司馬命張侯，弟子說束，遂繫左下綱。《大射》：張三侯，亦不繫左下綱。將射，不云司馬命張侯者，文不具也。此命張侯也。《鄉射》：「司馬又命獲者倚旌于侯中。」《大射》：不云，亦文不具。此命倚旌也。《鄉射》：「司馬命獲者執旌以負侯。」《大射》：「司馬師命負侯者執旌以負侯。」此命負侯也。《鄉射》：耦升堂履物後，司馬適堂西，不決遂，袒，執弓，出于司射之南，升自西階，鉤楹，由上射之後，西南面立于物間，右執簫，南揚弓，命去侯。獲者執旌，許諾，聲不絕，以至于乏，坐，東面偃旌，興而侯。再射，三射去侯，皆司馬命之。《大射》：耦升堂履物後，司馬正適次，袒決遂，執弓，

右挾之，出，升自西階，適下物，立于物間，左執弣，右執簫，南揚弓，命去侯。負侯皆許諾，以宮趨，直西，及乏南，^①又諾以商，至乏聲止。再射、三射及公射去侯，皆司馬命之。此命去侯也。《鄉射》：初射畢，司馬適堂西，袒執弓，由其位南進，與司射交于階前，相左，升自西階，鉤楹，自右物之後，立于物間，西南面，揖弓，命取矢。獲者執旌許諾，聲不絕，以旌負侯而侯。再射、三射皆如初。《大射》：初射畢，司馬正袒決遂，執弓，右挾之，出，與司射交于階前，^②相左，升自西階，自右物之後立于物間，西南面，揖弓，命取矢，負侯許諾，如初，去侯。皆執旌以負其侯而侯。再射、三射皆如初。此命取矢也。《鄉射》：司馬命弟子設楅。《大射》：司馬正北面命設楅。此命設楅也。鄉射畢，司馬命弟子說侯之左下綱而釋之，命獲者以旌退，命弟子退楅。大射畢，司馬正命退楅、解綱，小臣師退楅，巾車、量人解左下綱，司馬師命獲者以旌與薦俎退。此命退楅、說侯綱、退旌也，亦獲者之事，而司馬命之，蓋獲者之事統於司馬。射時獲者去侯，至射畢，取矢委楅時，獲者又許諾負侯，故取

① 「南」，原脫，今據《禮經釋例》補。

② 「于」，原脫，今據《禮經釋例》補。

矢，設楅，退楅，亦司馬命之也。又案：射器九，注所云「弓、矢、決、拾、旌、中、籌、楅、豐」是也。弓、矢、決、拾四者，射者之器也。旌，獲者之器也。中、籌二者，釋獲者之器也。取矢，必獲者許諾，以旌負侯，然後設楅，則楅亦獲者之器也。飲不勝者，必釋獲者數獲，然後設豐，則豐亦釋獲者之器也。凡射者之事，統於司射。如請射、比耦、誘射、作射、命射、告卒射，皆司射之事。而納射器，拾取矢，亦司射命之也。凡獲者之事，統於司馬。如乘矢、獻獲者，皆司馬之事，而張侯、獲者倚旌、負侯、去侯、及取矢、設楅、退楅、說侯綱、退旌，亦司馬命之也。凡釋獲者之事，亦統於司射，如視算、獻釋獲者，皆司射之事，而設中、設豐、飲不勝者、退中，亦司射命之也。射禮繁縟，《鄉射》、《大射》二篇，司射與司馬迭爲進退，學者幾於心目俱眩，昌黎所以苦《儀禮》難讀也。今比其例而觀之，雖微文瑣節，井井然若網在綱，有條不紊，始知《禮經》廣大精深，非聖人必不能作也。」若矢不備，則司馬又袒執弓，如初，升，命曰：「取矢。」不索。索，猶盡也。【疏】正義曰：敖氏繼公云：「此自適堂西以至揖弓，皆如初也。適堂西，亦由其位南。」郝氏敬云：「矢不備，有遺也，三耦，二十四矢乃備。」方氏苞云：「必餘於所用之數，以備鉤折，不

可索盡，及時求之而莫給也。至此而後發命，何也？初射惟三耦，矢有定數，再射則衆耦皆辯。又初射之矢或有鉤折，故宜多取以備乏匱也。」案：此宜以「取矢」爲句，「不索」爲句。命曰「取矢」，即上文之「命取矢」也。矢有定數，取之者不容不給。此云「若矢不備」者，恐有鉤折之虞，不可不備也。不索者，不令矢之盡也。矢僅給所用之數，則盡矣。不索，乃復命取矢之故。弟子自西方應曰：「諾！」乃復求矢，加于楅。增故曰加。晁獲者許諾，至此弟子曰諾，事同，互相明。【疏】正義曰：敖氏繼公云：「弟子已應，即往取矢。司馬乃降，由司射之南，執弓反位如初。弟子既加矢于楅，司馬進，撫之如初，此經文略也。」褚氏寅亮云：「不盡之矢，必棲於隱蔽處，須求乃得。」案：求，亦取也。《孟子》：「勿求於心。」趙注：「求者，取也。」注云「晁獲者許諾，至此弟子曰諾，事同，互相明」者，敖氏云：「此時獲者猶負侯，而取矢之弟子已退在西方之位，故獨應之。」

右取矢委楅第一番射事竟

司射倚扑于階西，升，請射于賓，如初。

賓許諾。賓、主人、大夫若皆與射，則遂告于賓。適阼階上告于主人，主人與賓爲耦；言若者，或射或否，在時欲耳。射者，繹己之志，君子務焉。大夫，遵者也。告賓曰：「主人御于子。」告主人曰：「子與賓射。」【疏】正義曰：張氏爾岐云：「自此至釋獲者少西辟薦反位，言賓、主、大夫、衆賓耦射，釋獲、升飲之儀，射之第二番也。司射請射，比耦，三耦取矢于楅，衆耦受弓矢序立，乃設中，爲釋獲之射，三耦射，賓、主人射，大夫射，衆賓射，司馬取矢，乘矢，司射視釋獲者數獲，設豐飲不勝者，獻獲者，獻釋獲者，凡十三節。」○「請射于賓，如初者，敖氏繼公云：『請射，請三耦之外皆射也。其辭蓋曰『有司請射』耳。』」如初，升自西階，階上北面告也。此請射與下請釋獲，亦示聽命於賓之意。」韋氏協夢云：「鄉射以賓爲主，故卒射必告，始射必請。」則遂告於賓，敖氏云：「言遂者，謂承賓許諾之後也。賓若不與射，則雖許諾，而司射亦不告。然則上言請射于賓者，非獨爲請賓射明矣。」注云「言若者，或射或否，在時欲耳。射者，繹己之志，君子務焉」者，敖氏云：「若皆與射而後告，是其或欲或不欲，固已前告司射矣。主人與賓爲耦，禮也。假令或

有一人不欲射，則缺一耦，蓋不可與餘人爲耦故爾。」焦氏以恕云：「記云『衆賓不與射者不降』，是凡在堂上者，或射或否，各順其欲，初無一定也。」《義疏》云：「案：主人以射故而請賓，賓以射故而應主人之請，必無不與之事；而經云若者，蓋不爲必然之詞，^②且爲大夫及三賓言之耳。」愚案：射者，繹己之志，君子務焉。是射者其宜也。特此禮爲鄉人習射，則賓、主、大夫及衆賓無妨以不能自謙也。云「必無不與」者，明與經戾矣。又《義疏》云：「案：大夫與三賓之或射或否，疑已前定於納射器之時，故此時司射得據以告于賓。」愚案：納射器在初請射之後，司射堂下命之，弟子納之堂西及東西序也。當請射于賓。賓對曰「某不能爲二三子許諾」，則賓一己之射否尚未定也。蓋姑陳射器，而射否則俟其自擇。前定之說，恐未然也。然則與射及否，直定於司射升階再請射之後，未告賓之前，而經不具言之耳。大夫、三賓蓋亦如之。」胡氏肇昕云：「初請射節，司射告于賓曰：『弓矢既具，有司請射。』賓對曰：『某不能爲二三子許諾。』此云：『請射于賓，如初。賓許諾。』

① 「蓋」，原作「亦」，今據《儀禮集說》改。

② 「不爲必然之詞」，《儀禮義疏》爲「君子不必之意」。

是賓之或射或否，即于賓對司射時明之。經文固顯著之矣。至若主人與大夫衆賓之射否，蓋即繼賓而告于司射，注所謂「在時欲耳」是也。下文賓、主人、大夫若皆與射，若者，承賓許諾言之，許諾則告，有一不許諾者，則不告其人也。蓋主人、大夫、衆賓之許諾與否，皆於賓許諾中括之。經文簡而義該，當以意推之也。遂告于大夫，大夫

雖衆，皆與士爲耦。以耦告于大夫，曰：「某御于子。」大夫皆與士爲耦，謙也。來觀禮，同爵自相與耦，則嫌自尊別也。大夫爲下射，而云「御于子」，尊大夫也。士，謂衆賓之在下者，及羣士來觀禮者也。禮，一命已下，齒於鄉里。【疏】正義曰：《校勘記》云：「『告于大夫』，『告』上，石經、徐、陳、《通解》、楊氏、敖氏俱有『以耦』二字。」○注「及羣士來觀禮者也」，「來」，徐誤「未」。云「大夫皆與士爲耦，謙也」者，敖氏繼公云：「大夫不自爲耦者，變於君所之射也。此賓、主人皆士，於衆耦之上下射，不敢俱以大夫爲之。」郝氏敬云：「主人耦賓，尊賓爲上射也。大夫耦士，以貴下賤也。」韋氏協夢云：「大射大夫與大夫爲耦，此大夫與士爲耦。在大夫則爲自謙，在主人則爲尊君。兼鄭、敖兩說乃備。」云「士，謂衆賓之在下者，及羣士

來觀禮者也。禮，一命已下齒於鄉里」者，敖氏云：「士，謂衆賓也。大夫宜與衆賓長爲耦。若衆，則以次而爲之；不足，乃及於堂下者焉。」盛氏世佐云：「士，謂命士來觀禮者，非衆賓也。敖云『衆賓長』，亦非。然觀此注所言，則士之來觀禮者，亦與衆賓齒可見矣。讀《鄉飲酒禮》者，亦當參考也。」褚氏寅亮云：「有大夫則以公士爲賓，然則衆賓之中無士矣。蓋既爲士，則不在詢衆庶之中也。若堂下，一命之士齒於鄉里者有之，故鄭以此士解與大夫爲耦，蓋亦觀禮而非習射者也。敖氏誤以衆賓爲士，不知此固秀民而非士矣。」方氏苞云：「士當爲學士之有德行、道藝者。注疏必以爲在官之士，非也。鄉大夫之尊，可與所興之學士爲賓主，州之良士，即異日所賓興也。大夫雖尊，而爲遵則有主道焉，故可與學士耦而爲下射。若在官之士而居大夫之右，則悖矣。」西階上北面，作衆賓射。作，使。

【疏】正義曰：敖氏繼公云：「作衆賓射，使之降而爲射事也。」盛氏世佐云：「衆賓，謂堂上三賓也。」案：衆賓，盛氏專謂堂上三賓，以下文衆賓將與射者皆降，衆賓在堂上，故降也。然此節爲司射比衆耦，當兼堂下衆賓言之爲是。司射降，搯扑，由司馬之南適堂西，立，比衆

耦。衆耦，大夫耦及衆賓也。命大夫之耦曰：「子與某子射。」其命衆耦如三耦。【疏】正義曰：敖氏繼公云：「立比衆耦，謂立於此，爲比衆耦耳。比之事，俟衆賓降而後爲之。」盛氏世佐云：「是時衆耦猶未比也，先言之者，明司射立此之意耳。經中比例間有之，如《鄉飲酒》及此篇，獻賓禮皆云「南面坐奠爵于篚下，盥洗」，亦非謂遽已洗也。敖說是。此注若移於下經「司射乃比衆耦」之下，則得矣。」吳氏廷華云：「上倚扑升，此復摺之也。衆賓在堂，乃至堂西比之者，蓋將比未比，俟皆降始比之。下經衆賓皆降適堂西，司射乃比衆耦是也。此注疏宜在彼下。又大夫之耦，上經已告大夫，不待比。注兼及之，以其與比者一時同命之也。」衆賓將與射者皆降，由司馬之南適堂西，繼三耦而立，東上。大夫之耦爲上，若有東面者，則北上。言若有者，大夫士來觀禮及衆賓多，無數也。【疏】正義曰：敖氏繼公云：「將與，則或不與者矣。記曰：『衆賓不與射者不降。』是也。降者由司馬之南，適堂西，而堂下之衆賓皆從之。不言者，可知也。此雖未執弓矢，亦必由司馬之南者，異於大夫也。繼三耦而立，居其西也。衆賓之立以齒，則大夫之耦爲上可

知。乃著之者，嫌其不與耦並立，則或變於有耦者也。衆賓若多，堂西南面之位，不足以盡之，則當東面於西壁而北上也。言若有者，見堂下之士多寡無定數也。」張氏爾岐云：「司馬位在司射之南。若有東面者，或賓多，南面列不盡也。」賓、主人與大夫皆未降，言未降者，見其志在射。【疏】正義曰：敖氏繼公云：「尊者事至乃降也。」賈疏云：「言未降，後有降階之理，故下云三耦卒射，賓、主人、大夫揖，皆由其階降，與耦俱升射也。」注云「見其志在射」者，盛氏世佐云：「注意蓋曰：經不言不降，而言未降者，見其志在於射，俟三耦卒射乃降也。此於義未爲失，疏家不曉而爲之說曰：言志在射者，以其射在堂上故也。郝氏遂從而詆之，其誣鄭公也實甚，故特爲白之。《大射儀》云：『諸公、卿皆未降。』鄭注亦云：『言未降者，見其志在射。』疏云：『言未者，後當降，故云未。若終不射，不得言未。』則得注意矣。」司射乃比衆耦，辯。衆賓射者降，比之耦乃徧。【疏】正義曰：敖氏繼公云：「乃者，言其方有事也。衆耦，謂衆賓自爲耦者也。大夫之耦亦存焉。是時衆賓皆已立于司射之北若西，然後可比之，不言命之辭者，如上耦可知也。大夫之耦則先命之，其辭曰「子與某子射」，與他耦上射之辭異。云辯者，爲下節。」

右司射請射比耦

遂命三耦拾取矢，司射反位。反位者，俟

其袒決遂來。【疏】正義曰：張氏爾岐云：「遂命者，承上比耦畢，遂命之也。」郝氏敬云：「始誘射三耦與司射，^①共矢二十八箇，是三耦餘一乘也。皆收委於楅，故就楅取之。拾取，上射取一，下射取一，彼此更迭至四也。」注云「反

位者，俟其袒決遂來」者，蔡氏德晉云：「反立西階東面，司馬北之位也。」三耦拾取矢，皆袒決遂，執弓，進立于司馬之西南。必袒決遂者，明將有射事。【疏】

正義曰：朱子曰：「此『拾取矢』，疑衍。」王氏引之云：「上文既云『命三耦拾取矢』，則自『皆袒決遂』以下，皆言三耦拾取矢之事，故承上文以起下文，曰『三耦拾取矢』，言三耦之拾取矢也，始而袒決遂，執弓以待拾取矢，既而上耦拾取矢，既而中、下二耦相繼拾取矢，是之謂『三耦拾取矢』矣。『三耦拾取矢』五字之意，直貫至下文『三耦拾取矢亦如之』句，非特爲『皆袒決遂』三句而設也。皆袒決遂之時，尚未拾取矢也，而其事歸於拾取矢，則統謂之『三耦拾取矢』。且下文衆賓未拾取矢，皆袒決遂，執弓，與此『三耦拾取矢』

皆袒決遂，執弓」相對爲文，不得以爲衍字。」吳氏廷華云：

「袒決遂在堂西，乃至司馬西南之位，蓋即上未射時立於司射西南之位也。」^②盛氏世佐云：「於此言拾取矢者，明其袒決遂、執弓擬爲此事耳，即上文司射立比衆耦之例也。」

韋氏協夢云：「三耦拾取矢，題下事也。下乃序其事而言之，與前一人洗舉觶于賓同意。」敖氏繼公云：「惟云『執弓』，是亦不挾也。亦變於大射者與？此所立者，即其故

位，更以司馬爲節近故爾。鄉者司馬未在此，故以司射爲節。」賈疏云：「案：上司射位在中西南，司馬位在司射南。

今立於司馬之西南，亦東面北上也。」^③案：《義疏》云：三耦取矢位，即是前番射位。司馬已就位，故經云「司馬之西南」。賈疏以爲異位，非也。注云「必袒決遂者，明將有

射事」者，賈疏云：「始取未有射事而袒決遂者，以其取矢訖即有射，故豫著之。」司射作上耦取矢。作者，還

當上耦，如作射。【疏】正義曰：上司射作射時，左還當上耦，西面作上耦射。今作上耦取矢，亦如之。司射反

①「與」，原作「命」，今據《儀禮節解》改。

②「未」，原脫，今據《儀禮疑義》補。

③「面」，原作「南」，今據《續清經解》本改。

位。上耦揖進，當楅北面，揖；及楅，揖。當楅，楅正南之東西。【疏】正義曰：敖氏繼公云：「當楅北面揖者，當楅南則折而北行，故北面揖也。及楅揖者，爲上下射將折而西東也。」張氏爾岐云：「上耦發位東行時，①一南一北並行，及至楅南，北面向楅，亦一東一西相並也。」姜氏兆錫云：「及楅揖，不言北面者，②下賓、主人及楅揖，注所謂當楅之東西，主西面、賓東面相揖也。③前後互推之可見。」盛氏世佐云：「及楅揖，謂及楅之東西而揖也。姜說得之。下云「上射東面，下射西面」，即謂此揖之時也，經文句法倒耳。敖說非。」凌氏《釋例》曰：「凡拾取矢前四揖：曰耦進揖，曰當楅北面揖，曰及楅揖，曰上射進坐揖。《鄉射禮》初射畢，三耦拾取矢，上耦揖進，當楅北面揖，及楅揖。此拾取矢以前之三揖也。又云：「上射東面，下射西面，上射揖進，坐。」此揖唯上射有之，下射進坐不揖也。再射畢，三耦拾取矢如初。又云：「大夫袒決遂，執弓，就其耦；揖皆進，如三耦。耦東面，大夫西面。大夫進，坐，說矢束。興，反位。而后耦揖進，坐。」大夫爲下射，故耦進坐揖，大夫不揖也。三射畢，拾取矢如初。此鄉射拾取矢前之四揖也。賓、主人拾取矢，皆進階前揖，及楅揖，拾取矢如三耦。此時賓東面，主人西面，故無當楅北面揖也。

《大射儀》：初射畢，三耦拾取矢，一耦出，西面揖，當楅北面揖，及楅揖。此拾取矢以前之三揖也。又云：「上射東面，下射西面。上射揖，進坐。」此上射之進坐揖也。再射畢，三耦拾取矢如初，諸公、卿、大夫皆降，如初位，與耦入于次，皆袒決遂，執弓，皆進當楅，進坐，說矢束。上射東面，下射西面，拾取矢，如三耦。若士與大夫爲耦，士東面，大夫西面。大夫進坐，說矢束，退，反位。耦揖進，坐。三射畢，拾取矢如初。此大射拾取矢前之四揖也。諸公、卿、大夫耦，進當楅，進坐，不云揖者，文不具也。蓋拾取矢耦進揖，猶射時耦進之揖也；當楅北面揖，猶射時當楅北面揖也；及楅揖，猶射時及階揖也。拾取矢在庭，不升堂，且無物，故無升堂、當物、及物三揖也。進坐獨上射揖者，亦猶射時司射命射、上射揖也。然命射之揖，唯第一耦之上射有之。此拾取矢、進坐之揖，凡耦之上射皆有之，則與射時異也。」上射東面，下射西面。【疏】正義曰：敖氏繼公云：「上射在西，下射在東，如其物之位也。」胡氏肇昕

①「行」，原作「西」，今據《儀禮鄭注句讀》改。

②「面」，原脫，今據《禮經經傳》補。

③上「面」字，原脫，今據《儀禮經傳》補。

云：「經文此二句，盛氏以爲與上『及楅揖』爲倒裝句法，是也。蓋經文於此必倒引者，上以明『及楅揖』爲上射在楅之西而東面，下射在楅之東而西面，下以領起上下射之進坐亦一東面、一西面也。」上射揖進，坐，橫弓；卻手自弓下取一個，兼諸弣，順羽且興；執弦而左還，退反位，東面揖。橫弓者，南踣弓也。卻手由弓下取矢者，以左手在弓表，右手從裏取之，便也。兼并矢於弣，當順羽，既又當執弦也。順羽者，手放而下，備不整理也。不言毋周，在阼非君，周可也。【疏】正義曰：敖氏繼公云：「進坐不言北面，可知也。矢南鄉，人于楅南，北面取之，便也。」盛氏世佐云：「此揖進，謂自其楅西東面之位，揖進，就楅也。此時上射仍東面，于楅西取矢。敖說非。取矢必坐者，以楅卑故也。以下記楅制考之，則其不高大可見矣。」注云「橫弓者，南踣弓也。卻手由弓下取矢者，以左手在弓表，右手從裏取之，便也」者，敖氏曰：「橫弓，踣弓也。此橫弓覆手也。『覆手橫之，以上端向下射，敬之也。』弓下，弦弣之下也。」盛氏世佐云：「橫弓，注云『南踣弓』，是也。蓋東西向者，以南北爲橫。卻，仰也。手，右手也。弓下，弓弦之下也。東面坐而南踣弓，則執弓

之手必覆。覆者，手在弓背之上而弦向下也。左手覆弓上執之，而仰右手自弓下取矢，兩手相對爲便也。經言右手之卻，則左手之覆可知。言右手自弓下，則左手在弓上亦可知。此立言之法也。」焦氏以愬《彙說》曰：「敖云：上射覆手橫弓，以弓之上端向下射者，敬之也。下射卻手橫弓，以弓之上端向上射也。人北面，弓東西，俱爲橫也。案：《義疏》云：『弓之兩端皆簫也，而有上端、下端之別者，附側有撻。《士喪·記》：『設依撻焉。』是也。撻在上則爲上端，執弓者必以上端向人爲敬。」愚案：敖氏依此以釋，則爲特見。然君子於射事則尚敬，楅處侯之北，亦統於侯也。故上射卻手取矢，則覆手執弓；下射覆手取矢，則卻手執弓。並以弓之上端鄉侯，亦所以著其敬，而不徒相變爲容之謂矣。」褚氏寅亮云：「拾取矢時，經無北面之文，因不必還周，異於大射，故於反位時著其面位，而曰東面揖。然則取矢東西面位不改，不過進而近楅耳，非北面也。唯取矢者，一向東，一向西，故左手踣弓，有卻手、覆手之異勢；右手取矢，亦有弓上、弓下之不同。若皆北面，則其儀不異矣。敖氏以上端向人爲敬之說，似是實非。」吳氏廷華

① 「記」，原作「禮」，今據《儀禮彙說》改。

云：「東西面，以在楅之兩旁也。言進者，從楅兩旁東西面至楅也。疏云：卻，仰也。謂左手執弣，右手取矢也。弓上下者，楅橫矢直，北括而南鏃，括有羽，未向括取矢者，執鏃則羽順出於當而無損，執括則逆矣。東面者，右手當鏃，便於弓下取之。仰手者，以手在矢下也。不覆手者，弓下矢上無餘地也。西面者，右手羽不可執，故必從弓上向左執鏃，順羽而出之，矢在手下，故手覆也。右手仰，則左手當在弓上而覆，右手覆，則左手當在弓下而仰也。兼矢於弣，便再取也。順羽者，以手順之，恐委矢或逆也。且興者，隨順隨興也。左還者，上射左手向外轉而南，乃西，反東面位。下射轉左向南，乃東，反西面位也。又上射東面，當西踏弓而橫于南北。若南踏弓，則弓在楅矢外，尚何弓上下之可言？」云「兼并矢於弣，當順羽，既又當執弦也。順羽者，手放而下備，不整理也」者，敖氏云：「兼諸弣，明左手并執矢也。凡執弓者左執弣，兼矢於弣，即順羽，興。則是橫弓者惟取矢之時則然也。執弓者，言不挾也。」盛氏云：「兼，并也。弣，弓弣也。并矢於左手弓弣間，而以右手順其羽且興者，疏云謂順羽之時則興也。」郝氏敬云：「矢羽在北，右手卻取矢，^①身左轉向南，羽順在北。」非執弦亦右手也。云「不言毋周，在阼非君，周可也」者，《大射》

云：「左還毋周，反面揖。」注云：「左還，反其位。毋周，右還而反東面也。君在阼，還周則下射將背之。」此對彼為言。彼有君在阼，周則背君，此在阼非君，故周可也。敖氏曰：「左還者，以左體向右而還也。于楅前必左還者，以楅東肆，宜順之。反位不言毋周，是亦左還也。此與順羽且興，皆變於大射云。」盛氏世佐云：「左還，向左而還也。敖氏云『以左體向右而還』，非。反位，反其楅西東面之位也。復云『東面』者，嫌其因左還而變也。蓋東面者以北為左，左還則面北矣。於是遂西轉南向，至其故處，而仍東面焉。此則左還而周也。與大射異者，大射威儀多，此則惟取其便故也。注『在阼非君』之說似迂。」焦氏《彙說》曰：「《通解》朱子曰：『燕禮』：司正右還。疏云：以右手向外者，以奠饌處為內也。此三耦左還，疏云：以左手向外者，以所立處為內也。《大射》云毋周者，既以左手向外，繞其所立之處，及至將匝之時，乃復以右手向外而轉身也。此注云周可也，則以左手向外繞其立處，以至於匝，乃不復以右手向外而即便轉身也。《燕禮》則右還而未至於匝，故不言周與不周。」案：朱子此條，論還周最為明析，而注家下

①「卻」，原作「仰」，今據《儀禮節解》改。

射背阼之由，正可由此思之也。」又曰：「《燕禮》：司正南面坐奠觶，右還北面，及少立，左還，南面坐取觶。鄭云：右還，必從觶西，爲君之在東也。北面而左還者，亦從觶西也。敖氏謂堂上堂下，背君毋嫌，而南面右還，北面左還，皆從觶東往來，則不惟鄭異解，而鄭之右還，正敖之左還，敖之右還，乃鄭之左還，其左右適相反也。然考毋周之戒，大射於上射，下射皆詳之，不言其他如上射也。此必非無關得失而但取相變爲容者矣。況皆內還者，言東西殊面，而內還則同，故特辭以明之也。如皆北面，則當言左還，而無取乎異其文而曰「內」還也。」又曰：「大射毋周，《義疏》云：『毋周，變於鄉射之周者也。君在堂上，取矢者在堂下，固無背之之嫌。且司射、司馬師亦時有南面者，不嫌也。』案：司射與司馬師亦時有南面者，此只一人，微背於君，則何所嫌？若取矢于楅，先弟子之三耦，繼乃諸公卿大夫之衆耦，多人還周而背君，安得不爲嫌邪？敖之立義，其與鄭異而失之者，莫此爲甚矣。」又曰：「天體至圓，繞地左旋，常一日一周而過一度。日行少遲，故一日繞地一周，而在天爲不及一度。月行尤遲，一日不及天十三度，二十八宿左轉，故春則中星南方朱鳥七宿也，夏爲東方蒼龍，秋爲北方玄武，冬爲西方白虎。中星迭移，是從東而左

行也。依此言之，則鄭之左還爲合。敖之左還與鄭正相反者，謬可知矣，未知何所依據也。敖箋《燕禮》南面右還而北面云：①從觶東而行，及北面左還而南面云：亦從觶東而行。是直目左還爲右還，目右還爲左還耳。」下射進，坐，橫弓；覆手自弓上取一个，興；其他如上射。覆手由弓上取矢者，以左手在弓裏，右手從表取之，亦便。【疏】正義曰：注云「以左手在弓裏，右手從表取之，亦便」者，張氏爾岐云：「亦南路弓，左手執弓，仰而向上，故右手覆搭矢爲便也。」朱子曰：「上文東向覆手，南路弓，則弦向身；此云西向卻手，南路弓，②則弦向外。」敖氏繼公云：「此橫弓卻手也。卻手橫之，亦以上端向上射也。人北向，弓東西向，于人于弓皆爲橫也。弓上，弦附之上也。凡覆手、卻手而橫弓，其弦皆向身與？」盛氏世佐云：「下射進，謂自其楅東西面之位而進也。不云揖者，文省耳。坐，西面坐也。橫弓，亦南路弓也。西面坐而南路弓，則執弓之手自仰矣。仰手執弓者，手在弓下而弦向上也。

①「禮」，原脫，今據《儀禮彙說》補。

②「南」，原作「西」，今據《續清經解》本改。

執弓之手既仰，則取矢之手不得不覆，亦取其便也。弓上，弓弦之上也。」案：朱子弦向身向外之說，即自注中手在弓表弓裏悟來，今不從者，蓋以卻手與覆手相對。卻手取矢，則執弓之手必覆；覆手取矢，則執弓之手必卻。若謂上射橫弓之法，手在弓表而弦向身，是左手未全覆也。謂下射橫弓之法，手在弓裏而弦向外，是左手未全卻也。與經覆卻相對之意未合，故不敢棄經而任傳也。敖云：凡覆手卻手而橫弓，其弦皆向身，亦非。「其他如上射」者，敖氏云：「他，謂兼諸附而下也，惟西面揖異爾。」吳氏廷華云：「此東路弓也，如上射者左還退反位是也。惟揖則西面，與上不同。」盛氏云：「所異者位面耳，西面者以南爲左，則其左還之法正與上射相反也。」凌氏《釋例》曰：「凡拾取矢，上射、下射各四揖；若兼取矢，則上射、下射各一揖。《鄉射禮》初射畢，三耦拾取矢，上射揖進，坐，橫弓，卻手，自弓下取一個，兼諸附，順羽且興，執弦而左還，退反位，東面揖。此上射取第一矢之揖也。又云：「下射進坐，橫弓，覆手，自弓上取一個，興，其他如上射。」此下射取第一矢之揖也。取第二、第三、第四矢，經雖無文，皆揖可知。再射畢，三耦拾取矢如初。賓、主人拾取矢如三耦，三射畢，拾取矢如初。是鄉射拾取矢，上射、下射各四揖也。又：再射畢，大

夫與其耦拾取矢，大夫進坐，說矢束。興，反位。而后耦揖，進坐，兼取乘矢，順羽而興，反位，揖。此上射兼取四矢之揖也。又云：「大夫進坐，亦兼取乘矢，如其耦。」此下射兼取四矢之揖也。三射畢，如初，是鄉射兼取矢，上射、下射各一揖也。《大射儀》：初射畢，三耦拾取矢，上射揖進，坐，橫弓，卻手，自弓下取一個，兼諸附，興，順羽，且左還，毋周，反面揖。此上射取第一矢之揖也。又云：「下射進，坐，橫弓，覆手，自弓上取一個，兼諸附，興，順羽，且左還，毋周，反面揖。」此下射取第一矢之揖也。亦四矢皆揖。再射畢，三耦拾取矢如初。又：諸公、卿、大夫拾取矢如三耦，三射畢，拾取矢如初。是大射拾取矢亦上射、下射各四揖也。又：再射畢，諸公、卿、大夫拾取矢。若士與大夫爲耦，士東面，大夫西面。大夫進坐，說矢束，退，反位。耦揖進，坐，兼取乘矢，興，順羽，且左還，毋周，反面揖。此上射兼取四矢之揖也。又云：「大夫進坐，亦兼取乘矢，如其耦。」此下射兼取四矢之揖也。三射畢，如初。是大射兼取矢，亦上射、下射各一揖也。大射毋周者，恐背君也。上射取矢自弓下，下射取矢自弓上，禮相變也。以禮例考之，與相敵者爲耦則拾取矢，卑者與尊者爲耦則兼取矢，示不敢與之拾也。又案：《鄉射》、《大射》初射，三耦拾取矢畢，後

者遂取誘射之矢，兼乘矢而取之，以授有司。是誘射之矢，未耦之下射代爲取之，亦兼取矢也。《鄉射·記》：「取誘射之矢者，既拾取矢，而后兼誘射之乘矢而取之。」注：「謂反位已禮成，乃更進取之，不相因也。」既拾取乘矢，揖，皆左還；南面揖，皆少進；當楅南，皆左還，北面，搯三挾一个；楅南，鄉當楅之位。【疏】

正義曰：張氏爾岐曰：「拾取乘矢，更遞而取，各得四矢也。」敖氏繼公云：「不搯矢，不兼挾，皆左還，亦變於大射進，謂東西行而相近也。」盛氏世佐云：「進，謂各自其楅東西之位而南行也。當楅南，將折而西矣，故以是爲搯挾之節也。」吳氏廷華云：「四矢俱拾畢，左還反位，然後南面揖，並左還，上射東南行，下射西南行。將至楅南，並左轉而北，搯且挾，然後轉而南行，下經「左還，上射于右」，是也。敖氏謂上當楅之地，尚在南，此特上及楅之地，以經言「少進」，則去楅近也。若向當楅處，則遠矣，不可言「少進」也。」褚氏寅亮云：「「北面」下，「搯三」上，《大射儀》有「揖」字，此似脫。方南面揖時，①上下射皆已離東西之位，一在楅西南，一在楅東南矣。至少進，則西南者向東，東南者向西，仍俱至鄉者當楅揖之處。於是皆左還，北面揖，而搯三

挾一焉。當北面時，上射在西，是于左也；下射在東，是于右也。至再左還而並行，向西以反位，下射乃退，而從上射之南，並行，則反在上射左矣。故經於「皆左還」之下，而明之曰：「上射于右」。注云：「下射左還，少南行，乃西面也。」敖氏云「上射固已居右」，殊不可解。又取矢時，上射在北，是居左，反位時，上射仍在北，是居右，猶升階進射時，上射在西，是居左，及南面射時，上射履西物，是居右也。」注云「楅南，鄉當楅之位」者，張氏云：「楅南前者，進時北面揖之位也。今退至此，皆左還北面，搯三矢而挾一矢。」②胡氏肇昕云：「敖氏以當楅南，爲歸及楅之位，故與鄭異。不知經明云「當楅南」，是爲鄉當楅之位無疑。以爲及楅之位，固已與經文相戾矣。」揖，皆左還，上射

于右；上射轉居右，使其反位也。下射左還，少南行，乃西面。【疏】正義曰：注云「上射轉居右，使其反位也」者，張氏爾岐云：「搯挾已而揖，皆左還，西面並行，前者進時，上射在北，是在左，今仍在北，是于右，取其反位北上爲便也。」敖氏繼公云：「上射固居右矣，復言之者，嫌或當如卒

①「揖」，原作「射」，今據《續清經解》本改。

②下「矢」字，原作「个」，今據《儀禮鄭注句讀》改。

射而退，轉居左也。凡每耦既射，若既取矢而退者，其曲折皆與進時同。云「下射左還，少南行，乃西面」者，賈疏云：「以其初北面時，東西相當，今西行宜並，故下射少南行乃西面。」吳氏廷華云：「揖，爲將左還也。左還者，左手向外，自北面而西而南也。南面以西爲右，上射本在西，又言之者，嫌降在左也。又上射本在右，嫌降或居左，故特明之。」注云「上射轉居右，若上射本左，至此始轉而右」者，誤矣。「下射左還，少南行」云云，其說亦合，但係西折時事，此時方南行，亦不可遽以爲說。與進者相左，相揖；退反位。相左，皆由進者之北。【疏】正義曰：

《校勘記》云：「經文『揖』下，唐石經有『退』字。案：錢氏大昕云：宋本亦有之。《大射》云：『退者與進者相左，相揖退，釋弓矢于次，說決拾，襲，反位。』較此文稍詳。此處『退』字亦不可少。」○敖氏繼公云：「相揖者，亦以事同也。」盛氏世佐云：「位，司馬西南之位。」注云「相左，皆由進者之北」者，張氏爾岐云：「進者自南東行，反位者，自北西行，故得相左。」凌氏《釋例》云：「凡拾取矢後四揖：曰既拾取矢揖，曰左還揖，曰北面揖三挾一个揖，曰既退與進者相左揖。《鄉射禮》初射畢，三耦既拾取乘矢，揖。皆左還，南面揖。皆少進，當楅南。皆左還，北面，揖三挾一

个，揖；皆左還，上射于右。與進者相左，相揖，退反位。再射畢，三耦拾取矢如初。又云：「衆賓繼拾，取矢皆如三耦。」此鄉射拾取矢後之四揖也。《大射儀》：初射畢，三耦既拾取矢，捆之。兼挾乘矢，皆內還，南面揖。適楅南，皆左還，北面揖。揖三挾一个，揖，以耦左還，上射于左。退者與進者相左，相揖。退，釋弓矢于次，說決拾，襲，反位。再射畢，三耦拾取矢如初。又云：諸公、卿、大夫拾取矢如三耦。又云：「衆射者繼拾取矢，皆如三耦。」此大射拾取矢後之四揖也。《鄉射》：三射畢，三耦及賓、主人、大夫、衆賓，皆袒決遂，拾取矢，如初。矢不挾，兼諸弦弣以退，不反位，遂授有司于堂西。《大射》：三射畢，三耦及諸公、卿、大夫衆射者，皆袒決遂，以拾取矢，如初。矢不挾，兼諸弦，面鋹，退適次，皆授有司弓矢，襲，反位。矢不挾，則無北面揖三挾一个之揖。射禮終，故節文亦異也。《鄉射》：再射畢，賓、主人拾取矢，卒，北面揖三挾一个，揖，退。賓堂西，主人堂東，皆釋弓矢，襲，及階揖，升堂揖，就席。賓、主人拾取矢畢，皆升就席，故無與進者相左之揖，而有及階升堂二揖也。又云：「大夫兼取乘矢，如其耦，北面，揖三

挾一個，揖，退。耦反位。^①大夫遂適序西，釋弓矢，襲；升，即席。」此大夫獨升，耦不升，故并無及階升堂之揖也。《大射》：再射畢，拾取矢。若士與大夫爲耦，大夫亦兼取乘矢，如其耦，北面搢三挾一個，揖，進。大夫與其耦皆適次，釋弓，說決拾，^②襲，反位。此即《鄉射》大夫與其耦兼取矢之例，故亦無與進者相左之揖也。」三耦拾取矢，亦如之。後者遂取誘射之矢，兼乘矢而取之，以授有司于西方，而后反位。取誘射之矢，挾五個，弟子逆受於東面位之後。【疏】正義曰：《校勘記》云：「而后反位」「后」，誤作「後」。○敖氏繼公云：「三」，亦當作「二」。《大射》云「二耦」是也。」朱子曰：「後者兼取誘射之矢，^③則是下耦之下射也。」張氏爾岐云：「以授者，以誘射之矢授之也。」注云「取誘射之矢，挾五個，弟子逆受於東面位之後」者，賈疏云：弟子即納射器者，下耦將司射乘矢來向位，西面，弟子即往逆受之，下射乃反東面。」敖氏繼公云：「下耦之下射，於既拾取之後，又兼取誘射之四矢，皆兼諸附，至楅南乃北面，搢三挾五個，至西方，以四矢授有司，而挾一個以反位，此見其異者也。此西方即堂西也。《士喪禮》以東堂下，西堂下爲東方，西

方，亦其徵也。有司，即弟子之納射器者，因留主授受于堂西，故此下射出於其東面位之後，以乘矢就而授之也。^④《大射儀》曰：以授有司于次中，皆襲反位。亦謂就而授之。」盛氏世佐云：「以授有司于西方，而后反位，則是下耦之下射就而授之也。注云「弟子逆受」，非。」褚氏寅亮云：「逆受者，卑賤之分也。此往則彼逆矣，未有傲然俟其至而受者。」胡氏肇昕云：「經云「以授」，就後者言；注云「逆受」，就弟子言：相互成文也。蓋後者就而授之弟子，弟子逆而受之，與經文義正相成。敖氏說殊偏，而盛氏反據以駁注，非也。」

右三耦拾取矢

衆賓未拾取矢，皆袒決遂，執弓，搢三挾一個，由堂西進，繼三耦之南而立，東面，

- ① 「反」，原作「及」，今據《禮經釋例》改。
 ② 「決」下，原衍「矢」字，今據《禮經釋例》刪。
 ③ 「兼」，原作「遂」，今據《儀禮經傳通解》改。
 ④ 「授」，原作「受」，今據《儀禮集說》改。

北上。大夫之耦爲上。未，猶不也。衆賓不拾者，未射，無楅上矢也。言此者，嫌衆賓三耦同倫。初時有射者，後乃射，有拾取矢禮也。【疏】正義曰：注云「未，猶不也。衆賓不拾者，未射，無楅上矢也」者，賈疏云：「以第一番唯有三耦射，無賓射法，不得云『未』，是以轉爲『不』，以其全不拾取矢也。」敖氏云：「未拾取矢，謂于堂西取矢不拾也。堂西取矢固不拾矣，乃言之者，以繼三耦拾取之後，嫌當如之也。其後取矢于楅乃拾，故此云『未』也。是時雖未拾取矢，亦讓取弓、矢、拾，如鄉者三耦之爲。進立射位，以射事至也。」張氏爾岐云：「衆賓初射，當于堂西受弓矢于有司，故不拾取矢。案：三耦初射時，亦云『各與其耦讓取弓、矢、拾』，則衆賓不拾取矢，又不僅以未射也。」盛氏世佐云：「此衆賓于堂西受弓、矢于有司，^①皆如三耦初取弓、矢之儀，其取之之法，亦更迭取之。上經云『三耦各與其耦讓取弓、矢、拾』，是其徵也。云『未拾取矢』者，謂不如三耦之拾取矢于楅耳。不言『不』而言『未』者，以第三番射時，亦有拾取矢于楅之事故也。張云：『衆賓不拾取矢，^②不僅以未射。』非。」云「嫌衆賓三耦同倫。初時有射者，^③後乃射，有拾取矢禮也」，胡氏肇昕云：「此節賈疏說多未明析，詳注意，蓋以經言衆賓未拾取矢者，以上言三耦拾取

矢，此繼言衆賓受弓矢事，嫌與三耦同倫，以衆賓亦拾取矢也。故經特著之曰「衆賓未拾取矢」。拾取矢之禮，必初時有射者，後乃有此禮，故上有三耦射，後乃有三耦拾取矢之禮。此時衆賓未射，故不拾取矢。至第三番衆賓射，乃亦有拾取矢之禮也。經文「衆賓未拾取矢」，對上「三耦拾取矢」爲言，至三射衆賓亦拾取矢，是不以其全不拾取矢，故不曰「不」而曰「未」。注就本節言之，故轉「未」爲「不」，而下又推言之，以盡其義也。」

右衆賓受弓矢序立

司射作射如初。一耦揖升如初。司馬命去侯，獲者許諾。司馬降，釋弓反位。司射猶挾一个，去扑，與司馬交于階前，升，請釋獲于賓。猶，有故之辭。司射既誘射，恒執弓挾矢以掌射事，備尚未知，當教之也。今三耦卒射，衆足以知之

① 「于」，原作「如」，今據《續清經解》本改。

② 「拾」，原作「矢」，今據《續清經解》本改。

③ 「者」，原脫，今據《儀禮注疏》補。

矣。猶挾之者，君子不必也。【疏】正義曰：「如初」者，蔡氏德晉云：「謂與誘射之儀同也。」方氏苞云：「射事畢，皆以弓矢授有司于堂西，誘射之矢，三耦之後者，以授有司，則司射之射事畢矣。故再射第舉作射如初，示不復誘射也。三耦三射皆與，賓、主人、大夫與再射、三射，司射則一射而止，何也？誘射者，教之射也。賓、大夫、主人與焉，則不敢教也。弟子筋力方進，故三射皆與，以強教之。賓、大夫、主人、三賓，則有年長者矣。故射止於再，而不欲與者亦聽焉，皆禮之曲盡乎人情也。」「命去侯」不言「如初」者，敖氏繼公云：「可知也。」胡氏肇昕云：「賈疏云：『此臣禮，威儀省。司馬初命去侯時，獲者許諾聲不絕，以至于乏。再番、三番命去侯，直許諾，無不絕聲，故不言如初。』」《大射》君威儀多，故第二番與前同。獲者亦官商趨之，故言如初。於第三番禮殺，復不以官商，直許諾，又不得言如初。賈氏推究頗詳，較敖說為精。」「去扑，與司馬交于階前」者，敖氏云：「先去扑乃進，與司馬交于階前，則去扑當于西方，而于階下矣。不言相左，不言升及堂上所立處，亦文省。」吳氏廷華云：「司馬降反位，司射將升，故交于階前，亦當相左。去扑，亦當倚于西階。」「釋獲」者，郝氏敬云：「釋籌於地，計射者所中。獲，射中也。」埤案：大射以

弓爲畢，此經無文，辟君禮也。○注「衆足以知之矣」，《校勘記》云：「『侯』，徐本、《通解》、楊氏俱作『矣』，陳本作『矣』。」案：「矣」即「矣」之譌。今本據此，遂誤作「侯」。胡氏肇昕云：「疏述注亦作『矣』。」云「猶，有故之辭。司射既誘射，恒執弓挾矢以掌射事，備尚未知，當教之也」者，敖氏云：「司射于誘射之後，改挾一个，至此時猶然也。必云「猶」者，嫌既久則可以不挾也。官以司射爲名，故執弓必挾矢，以掌射事也。」云「今三耦卒射，衆足以知之矣。猶挾之者，君子不必也」者，言君子不必人之已知，而遂不挾也，故必猶挾一个，備尚未知，當教之也。賓許。降，搯扑，西面立于所設中之東；北面命釋獲者設中，遂視之。視之，當教之。【疏】正義曰：敖氏繼公云：「西面立於所設中之東，亦示以設之之處，如前設楅之爲也。」釋獲者在堂西，故北面命之，既則復西面視之。中，實算之器也。名之曰中者，取其中於侯而後釋算也。此不以弓爲畢，亦辟大射禮。注云「視之，當教之」者，賈疏云：「謂教其釋算安置左右，及算數告勝負之事。」釋獲

①「也」，原作「之」，今據《儀禮集說》改。

者執鹿中，一人執算以從之。鹿中，謂射於謝也，

於庠當兕中。【疏】正義曰：張氏爾岐云：「中，形如伏獸，鑿其背以受八算。算，射籌也。」敖氏繼公云：「釋獲者自執中而不執算，亦變於君禮。」注云「鹿中，謂射於謝也，

於庠當兕中」者，敖氏曰：「鹿中者，以主人士也。記曰：

「士鹿中。」盛氏世佐云：「鹿中，特爲諸侯之州長言耳。

若天子之州長射于序，亦兕中。」吳氏廷華云：「鄉大夫、州

長皆大夫，其待賓大概皆大夫禮，至射則各有其算。主人

及大夫同兕中，士用鹿中。賓、衆賓不在三等士中，則攝用

鹿中，可也。二者當兼有，經第言鹿中者，蓋據賓言之。」

釋獲者坐設中，南當楅，西當西序，東面；興

受算，坐實八算于中，橫委其餘于中西，南

末；興，共而俟。興還北面受算，反東面實之。【疏】

正義曰：「坐設中，南當楅，西當西序，東面」者，盛氏世佐

云：「中蓋東西設之，首在東也。知者，①以經言餘算委于

中西，其末在南，而于中爲橫，則中之東西設可知矣。下記

云：鹿中，釋獲者奉之先首。而此云：釋獲者坐設中，東

面。則其首在東亦可知矣。」凌氏《釋例》云：「凡設中，南

當楅，西當西序，東面。《鄉射禮》再射，司射西面立于所設

中之東，北面命釋獲者設中，遂視之。釋獲者執鹿中，一人

執算以從之。釋獲者坐設中，南當楅，西當西序，東面，興，

受算，坐實八算于中，橫委其餘于中西，興，共而俟。《大射

儀》再射，司射命釋獲者設中，以弓爲畢，北面。大史釋獲。

小臣師執中，先首，坐設之，東面，退。大史實八算于中，橫

委其餘于中西，興，共而俟。注：《鄉射禮》云：設中，南

當楅，西當西序。」是《大射》設中之處，與《鄉射》同也。又

《鄉射》、《大射》司射命射訖，釋獲者坐取中之八算，改實八

算于中，興，執而俟，乃射。若中，則釋獲者坐而釋獲，每一

個釋一算。上射于右，下射于左。若有餘算，則反委之。

又取中之八算，改實八算于中，興，執而俟。此釋獲也。卒

射取矢加楅訖，司射立于中南，北面視算。釋獲者東面于

中西坐，先數右獲。二算爲純，一純以取，實于左手，十純

則縮而委之。每委異之。有餘純則橫于下。一算爲奇，奇

則又縮諸純下。興，自前適左，東面坐，兼斂算，實于左手，

一純以委，十則異之。其餘如右獲。司射復位，釋獲者遂

進取賢獲，執以升，自西階，盡階，不升堂，告于賓。若右

勝，則曰「右賢于左」。若左勝，則曰「左賢于右」。以純數

①「者」，原作「此」，今據《儀禮集編》改。

告。若有奇者，亦曰奇。若左右鈞，則左右皆執一算以告，曰「左右鈞」。此數獲也。蓋中者，實算之器，設之當西序，以爲行禮之節也。「算」者，郝氏敬曰：「籌也。中制鑿背，可容八算，一耦八矢，一算直一矢也。」南末」者，敖氏繼公云：「南末，象矢之北括而南鉞也。」褚氏寅亮云：「實算者東面，算于庭爲縱，于人爲橫。矢北括則南首，算則南末，與矢相變。」吳氏廷華云：「東面，言釋獲者東面設之也。」《大射》執中先首，則中亦東面也。南末，末在南也。算有本末。下《記》《握素》，其本也。又云：中當西序，西序之西爲西堂。又西爲西堂下。釋獲者來自西堂下，當東南行，及東面設中，執算者亦應東面隨其後。釋獲者當西南取之。」蔡氏德晉云：「南末則算縱矣，而曰橫委者，統于中而言也。蓋算于庭則縱，于中則橫也。」共而俟」者，敖氏云：「待其將射乃執算。」注云「興還北面受算，反東面實之」者，賈疏云：「以其所納射器皆在堂西，②執中與算皆從堂西來，向西序之南，南面，故執中者既東面坐，設訖，興，還向北面受算，迴向東面實之也。」③胡氏肇昕云：「注知北面受算者，以設中既東面，而必興者，知還北面而受算也。敖氏謂「興受算，東面並受也」，非。」司射遂進，由堂下北面命曰：「不貫，不釋！」貫，猶中也。不

中正不釋算也。古文「貫」作「關」。【疏】正義曰：盛氏世佐云：「司射亦於西階之東，視上射命之，經文省也。」

注云「貫，猶中也。不中正，不釋算也」者，敖氏繼公云：「貫，謂中而不脫。言此者，明雖中而不貫，猶不釋算。」褚氏寅亮云：「中而又脫，則巧力俱全，安有不釋算之理？命辭蓋期其貫，不期其必脫也。敖氏求深，反失。」郝氏敬云：「不貫矢，不穿布也。禮射布侯，中必貫布，則釋算，不中不貫則不釋。」盛氏世佐云：「《鄉射》射質，不貫質不釋算。」方氏苞云：「注謂「不中正不釋」，是也；而於貫之義尚未切著。蓋必射甲革，楯質而後可貫，必矢貫於鵠的，而後有白矢襄尺刺注井儀之形，故詩曰「四鍔如樹」也。《王制》鄉簡不帥教者，習射尚功，習鄉尚齒；州長之習射，黨正正齒位，正簡不帥教者之法也。曰尚功，則當以貫革爲賢。《尚書傳》所云「貫革之射，閑于蒐狩」者，謂甲革也。《周官》：圉人充楯質，以習射于澤宮。州長習射宜用澤宮之禮，則所貫楯質也。疑士、大夫雖畫布爲侯，必以木爲

① 「釋」，原作「實」，今據《儀禮疑義》改。

② 「在堂」，原作「云當」，今據《儀禮注疏》改。

③ 「向」，原作「而」，今據《儀禮注疏》改。

匡，蒙以布，實草於其中，而著於侯之背面以受矢，故以剪草之工充樞質也。若但畫布以爲正，則數貫之後，不可復射。且所謂貫者，特穿之而過，無所謂白矢襄尺剡注井儀之式矣。^①「古文『貫』作『關』者，惠氏棟《古義》曰：『《呂氏春秋》云：『中關而止。』謂關弓弦正半而止，即《儀禮》所謂不貫也。貫與關古字通。《史記·伍子胥傳》云：『五胥貫弓執矢嚮使者。』注云：『貫，烏還反。』《後漢·祭彤傳》：『能貫三百斤弓。』司馬貞曰：『滿張弓一曰貫，謂上弦也。古串與患通，又讀爲貫，故古文『患』作『悶』，从心關省聲也。』胡氏承珙《古今文疏義》曰：『案：惠說非是。鄭注云：『貫，猶中也。不中正不釋算也。』此貫即貫革之貫。《詩·猗嗟》：『射則貫兮。』傳亦云：『貫，中也。』貫从冊。《說文》：『冊，穿物持之也。从一橫貫，象寶貨之形。凡冊之屬皆从冊。』《禮記注》云：『貫革，謂射穿甲革也。古文作『關』者，亦穿物橫持之義。《說文》：『關，以木橫持門戶也。』《禮記·雜記》：『見輪人以其杖關轂而輅輪者』疏云：『關，穿也。』若呂覽之『中關』，《史》、《漢》之『貫弓』，則皆彎字之借。《說文》：『彎，持弓關矢也。』故《孟子》：『越人關弓而射之』，《文選》注引作『彎弓』。賈誼《書》：『士不敢彎弓而報怨』，《史記·陳涉傳》引作『貫弓』。要皆非訓中之義。

也。胡氏肇昕云：「字有正義，有借義，有引申之義，而皆以聲爲主，聲近而義亦隨之也。古音貫與關相近，滿張弓謂之貫，亦謂之關；因之而張弓中革謂之貫，亦謂之關；義本相成。此經當用中革義。如惠說謂不滿張弓者則不釋獲，其義未顯。胡氏駁之，是也。戚氏學標用惠說以解《孟子》關弓，本不誤，而依惠氏云「即《儀禮》所謂不貫也」，牽合《禮經》，則不惟誤解《儀禮》，并誤解《孟子》矣。又案：張弓本字作『彎』，彎亦有橫持之義。《說文》：『彎，持弓關矢也。』是也。又《說文》：『冊，讀若冠。冊可讀爲冠，猶貫可讀爲關也。』上射揖。司射退反位。釋獲者坐取中之八算，改實八算于中，興，執而俟。執所取算。【疏】正義曰：賈疏云：「八算者，人四矢，一耦八矢，雖不知中否，要須一矢則一算。改實八算，擬後來者用之。」敖氏繼公云：「右取算以予左手。」執，二手共執之也。俟，謂俟射中乃釋算。」

右司射作射請釋獲

①「謂」，原脫，今據《續清經解》本補。

乃射。若中，則釋獲者坐而釋獲，每一個釋一算。上射于右，下射于左，若有餘算，則反委之。委餘算，禮尚異也。委之，合於中西。

【疏】正義曰：敖氏繼公云：「乃射，謂堂上拾發矢也。」^①若中，則獲者言獲，此則釋之。釋，謂置算於地。獲則用此算，故因名此算曰獲。坐而釋獲，既釋則興。^②云「每一個釋一算」，覆言釋獲之法也。一个，謂一矢中也。于右，于左，象其堂上南面之位也。下言數獲，謂奇者縮之，然則此每釋一算亦縮之與？蓋中西之算橫，則釋者縮亦宜也。餘算，釋之不盡者也。於一耦卒射乃反委之，既則興，共而俟。吳氏廷華云：「釋者，釋於手，置地以待算也。上二耦射，上射在右，下射在左，尊右也，故釋亦如之。八矢不必盡中，故有餘。反委之者，釋算于中西之位，委之也，亦南末。」張氏爾岐云：「釋，猶舍也。以所執之算，坐而舍於地，中首東向，其南爲右，其北爲左，中西，其後也。」注云「委餘算，禮尚異也」者，謂餘算釋之不盡者，委之於地，別取中內八算，以禮尚異，不用其餘也。云「委之，合於中西」者，敖氏云：「中西，謂中西之算。」胡氏肇昕云：「中西，中之後也。中後，故云「反委之」。每一個釋一算，上射

釋于中之右，下射釋于中之左，此謂矢之中者。矢不中，則不釋算，故手中得有餘算。餘算則反委之，合於中西也。合於中西，謂不於左右，於中西爲宜也。賈疏謂橫委其餘於中西，手中餘者與之合。夫中西本無算，以手中餘者委之方有算也。而云「與之合」，非已。」又取中之八算，改實八算于中，興，執而俟。三耦卒射。【疏】正義曰：敖氏繼公云：「言此者，著繼射者之節也。自上耦乃射至二耦卒射，皆不言其儀，亦不以「如初」蒙之者，亦以其可知，故省文也。」吳氏廷華云：「改後言興，則取時坐也。俟，俟下耦射也。下耦射與中耦同，故經不言，第言卒射也。卒射下當有司射告賓之文，與第一番同。」

右三耦釋獲而射

賓、主人、大夫揖，皆由其階降，揖。主人堂東袒決遂，執弓，搯三挾一个。賓于堂西亦如之。【疏】正義曰：敖氏繼公云：「司射不告賓，

^① 「上」，原作「下」，今據《續清經解》本改。

^② 「釋」，原作「獲」，今據《儀禮集說》改。

主人射者，辟君禮也。皆由其階，謂主人東階，賓、大夫西階也。堂東，東堂之下也，堂西亦然。賓、主人之弓各倚於其序，矢在其下，而二人乃皆於堂下執弓，挾矢，蓋有司取以授之。大夫亦降者，別於不與射者也。」盛氏世佐云：「賓、主人之弓矢本在東西牆之外，堂廉之下，^①豈得於堂上取之哉？敖說殆誤矣。」皆由其階，階下揖，升堂揖。主人爲下射，皆當其物，北面揖，及物揖，乃射。【疏】正義曰：敖氏繼公云：「復言『皆由其階』者，賓主射禮，嫌主人從之而升降於西階也。既揖，乃升階，此豫言之耳。」^②主人爲下射者，尊賓，且不失其位也。不言履物及射之儀者，如三耦可知。」盛氏世佐云：「復言『皆由其階』者，三耦同階而升，嫌此亦如之也。」增案：《義疏》云：「衆射者升降皆由司馬之南，惟賓、主人第言『階』，而無『司馬之南』之文，則升降皆近於堂，與衆別也。」卒，南面揖，皆由其階，階上揖，降階揖。

【疏】正義曰：敖氏繼公云：「凡耦之升降，皆上射先而下射後。此賓爲上射，主人爲下射，乃分階而行，又不別見其升降之序，則是主人先而賓後如常禮，亦與其他爲耦者不同也。」賓序西，主人序東，皆釋弓，說決拾，

襲，反位；升，及階揖，升堂揖，皆就席。或言堂，或言序，亦爲庠、謝互言也。賓、主人射，大夫止於堂西。【疏】正義曰：敖氏繼公云：「賓序西，主人序東，自釋弓於故處也。反位，升，謂反位而後升也。位者，主人階東，賓階西當序之位也。反立於此，相待而升也。此升堂揖，揖就席也。凡自側階升降者，經皆不見之。」江氏筠案：經於賓、主人之祖決遂，則言堂東、堂西；於大夫，則執弓、釋弓俱言堂西；至下拾取再射加于楅之矢，賓、主人之祖決及襲，亦俱言堂東、堂西。其言序者，獨此大夫之取矢，揖進耳。記云：「凡適堂西，皆出入于司馬之南，惟賓與大夫降階遂西取弓矢。」蓋以尊者宜逸故也。然則既有有司主授受，何以勞賓、主、大夫之自釋？前後釋弓已明見優尊之法，何以獨此時不然乎？則鄭謂堂、序互言，自是不易之論矣。蓋說者多泥序東、序西，惟堂上得稱，不知經固不專以目堂上也。《士喪禮》：「襲經于序東。」注：「序東，東夾前。」疏釋曰：經云主人降自西階，更無升降之

① 「下」，原作「上」，今據《儀禮集編》改。

② 「此」，原作「乃」，今據《儀禮集說》改。

文，而云「序東，東夾前」者，謂嚮堂東，東西當序牆之東，又當東夾之前，非謂就堂上東夾前也。觀此說可以知之矣。」

注云「或言堂，或言序，亦爲庠，謝互言也」者，《經義聞斯錄》云：「注意蓋以堂屬庠，以序屬謝。然考古人鄉與州黨之學，皆有堂有序。平地謂之庭，尚上謂之堂。有階爲堂，無階爲庭。此篇州序之禮，而屢言升階、降階、當階、及階、阼階、西階，是有堂矣。《爾雅》云：「東西牆謂之序。」此篇凡言序端、東序、西序、序東、序西，皆非州序之義，乃堂上之東西牆耳。《士冠禮》主人直東序，賓直西序。亦與此篇之序同。觀納射器，賓與大夫之弓倚于西序，矢在弓下；衆弓倚于堂西，矢在其上。主人之弓矢在東序東，則主人堂東，賓堂西，以弓矢在序東、序西也。故射畢而主人與賓釋弓，仍在序東、序西。後文又云：賓堂東，主人堂西，皆釋弓矢，襲。與此經文異而事正同。不然，豈賓、主、大夫之弓矢據州學言？衆賓之弓矢又據鄉學言乎？堂東、堂西，指堂廉下言；序東、序西，指堂廉上言。倚于東西序，則在序外堂廉之上。衆弓倚于堂西，矢在其上，則弓在堂廉下，而矢在堂廉上耳。云「賓、主人射，大夫止於堂西」者，案：記云：大夫降立于堂西以俟射。注以此決之也。

右賓主人射

大夫袒決遂，執弓，搯三挾一个，由堂西出于司射之西，就其耦。大夫爲下射。

【疏】正義曰：敖氏繼公云：「大夫與賓同降，止于堂西，至是乃袒決遂，執弓矢，亦尊者事至而後爲之也。大夫執弓，亦有司授之于堂西，就其耦，亦由其西而立于其南也。」大夫爲下射者，以貴下賤之義也。大夫于土尊固尊矣，若復爲上射，則大不敵，故與士爲耦則必爲之下射。」方氏苞云：「大夫雖尊爲遵，則有主道，故於衆賓亦遜焉。」案：《義疏》云：「大夫尊與賓主等，乃一升一降由司馬之南者，蓋就其耦於射位，不得不與衆射者同。至釋弓堂西，其耦已止，則大夫自當徑至階下，如賓主之禮，不必由司馬之南也。又大夫弓矢倚于序，^①此執搯挾乃在堂下者，案：賓、主人，有司自東西堂上授之，大夫當亦然。」揖進，耦少退。揖如三耦。及階，耦先升。卒射，揖如升射，耦先降。降階，耦少退。皆釋弓于堂

① 「矢」下，《儀禮義疏》有「在堂上」三字。

西，襲。耦遂止于堂西，大夫升就席。耦於庭下，不並行，尊大夫也。在堂如上射之儀，近其事，得申。【疏】正義曰：敖氏繼公云：「此經言士與大夫爲耦之儀，其異於三耦者，惟於庭少退耳，則其他皆同可知。」褚氏寅亮云：「耦先升三等而大夫從之，上射之禮也。皆釋弓于堂西，亦過司馬之南而後爲之，以與耦俱行故也。」○注「耦於庭下」，《校勘記》云：「徐本、《通解》、楊氏俱無『下』字。」云「耦於庭下，不並行，尊大夫也」者，謂揖進耦少退，降階耦少退，不與大夫並行，所以尊之也。云「在堂如上射之儀，近其事，得申」者，謂及階耦先升，升三等而大夫從之，揖如升射，謂堂上三揖，耦先降與先升同，皆上射之儀也。以近射事，故得申上射之禮也。

右大夫與耦射

衆賓繼射，釋獲皆如初。司射所作唯上耦。於是言唯上耦者，嫌賓、主人射亦作之。《大射》：三耦卒射，司射請於公及賓。【疏】正義曰：衆賓繼射，韋氏協夢云：「此衆賓，謂不與大夫爲耦者。」敖氏繼公云：「不言如三耦，可知也。」釋獲皆如初，敖氏曰：「皆，

皆賓、主人以下也。」注云「於是言唯上耦者，嫌賓、主人射亦作之」者，敖氏曰：「嫌作射亦在如初中，故以明之。」韋氏曰：「司射作上耦，則二耦、三耦至賓、主，衆賓皆與聞矣，故不必更作之。」案：經言「司射所作唯上耦」在「衆賓繼射」下，明衆賓射非一耦，而所作唯上耦，其餘耦不更作也。唯上耦對衆耦言，不對賓主言也。注推及賓主，明餘耦不作，賓主亦不作也。引《大射》者，賈疏曰：「記云：『賓、主人射，則司射擯升降。』是雖不作，猶爲擯相之，但不請也。」卒射，釋獲者遂以所執餘獲，升自西階，盡階不升堂，告于賓曰：「左右卒射。」降，反位，坐委餘獲于中西；興，共而俟。司射不告卒射者，釋獲者於是有事，宜終之也。餘獲，餘算也。無餘算，則空手耳。俟，俟數也。【疏】正義曰：敖氏繼公云：「後射者，既由司馬之南而適堂西，釋獲者乃告卒射也，執獲以告已所有事者也。不升堂，降於司射也。左右，猶言上下射也。此亦據其所立之物而言之。」注云「司射不告卒射者，釋獲者於是有事，宜終之也」者，以前番射，司射告卒射；此不告，是使釋獲者終其事也。云「餘獲，餘算也。無餘算，則空手耳」者，以一耦八矢，盡中則釋

八算，無餘算則空手以告，無所執也。云「俟，俟數也」者，敖氏云：「謂俟司射視算乃數之。」

右衆賓繼射釋獲告卒射

司馬袒決，執弓，升命取矢如初。獲者許諾，以旌負侯如初。司馬降，執弓反位。弟子委矢如初。大夫之矢，則兼束之以茅，上握焉。兼束大夫矢，優之，是以不拾也。束於握上，則兼取之，順羽便也。握，謂中央也。不束主人矢，不可以殊於賓也。言大夫之矢，則矢有題識也。肅慎氏貢楛矢，銘其括。今文「上」作「尚」。【疏】正義曰：敖氏云：「《禮》無『決而不遂』者，此『決』字當爲衍文。上經云：『司馬適堂西，不決遂，袒執弓。』此宜如之也。司馬降亦由司射之南，釋弓于堂西，襲乃反位。」○注「貢楛矢」，《校勘記》云：「『楛』，《釋文》作『枯』，云「字又作楛」。云「兼束大夫矢，優之，是以不拾也」者，郝氏敬云：「大夫之矢束以茅，使大夫并取，不煩拾取也。」盛氏世佐云：「矢兼束之以茅者，大夫之禮宜然，非以其不拾取故也。《大射儀》：賓、諸公、卿、大夫之矢，皆異束之以茅，而其取之也。亦拾則可

見矣。《大射》云「異束」，以每人各一束而言也，此云「兼束」，以四矢共一束而言也。」姜氏兆錫疑此誤，當從《大射》作「異束」。非。云「束於握上，則兼取之，順羽便也。握，謂中央也」者，朱子云：「注疏上握之說未明。疑束之之處當在中央手握處之下，^①使握在上，則去鏃近而去羽遠，取之便易也。」敖氏云：「上握，謂上於手握之處也。矢以鏃爲上，括爲下，下經云「面鏃」是也。」盛氏云：「上矢鏃也，四寸曰握。下《記》云：「箭籌八十，長尺有握。」是也。上握焉者，謂束之之處去鏃四寸也。矢筈長三尺，羽六寸，刃二寸，束之，去鏃四寸，則去羽尺有八寸矣。必於此者，恐其傷羽也。」褚氏寅亮云：「取矢必先脫束，然當其束時，亦必遠羽而近鏃，斯不損羽，故云「上握」。焦氏以恕云：「大夫爲下射，則西面取矢，所謂覆右手自弓上取北括之矢者也。然必進坐說束而後取之，則敖氏上於手握之說爲得之。」胡氏肇昕云：「握在手之中央，故云「握，謂中央也」。束於握上，謂以茅束之於手所握處之上，即敖氏所謂「上於手握之處」也。盛氏據《穀梁》注「握四寸」之文，解說雖新，然非經上握之意矣。」云「不束主人矢，不可以殊於賓也」

①「疑」，原作「宜」，今據《儀禮經傳通解》改。

者，韋氏協夢云：「兼束大夫矢者，以異爵尊之也。主人，士也，安得束之？」注以不束主人矢爲不殊於賓，殆指鄉大夫賓賢能時，行此禮者亦不束主人矢與？」盛氏云：「雖鄉大夫爲主人亦不束者，以賓故俯從士禮也。」云「言大夫之矢，則矢有題識也」者，敖氏云：「《周官·鄉師職》曰：『黨共射器，州共賓器，鄉共吉凶禮樂之器。』然則古之射于學宮者，其射器亦皆公家共之與？此大夫之矢未必大夫所自有也，但於衆矢之中取乘矢而兼束之，即爲大夫之矢矣。」胡氏肇昕云：「案：盛氏謂當從敖說。今案：前弟子納射器云：『賓與大夫之弓倚于西序，矢在弓下，北括。衆弓倚于堂西，矢在其上。主人之弓矢在東序東。』賓、大夫、主人、衆賓弓矢各分別言之，是其弓矢皆必有所題識始可知也。雖其弓矢不必皆其所自有，然其有識別而不混於所施，則有可懸擬者。注云未可非也。『肅慎氏貢楮矢，銘其括』，事見《國語》，注引以證矢之有題識也。」云「今文『上』作『尚』」者，胡氏承珙《疏義》云：「案：上下字作『上』，尊尚字作『尚』。鄭於『上握』從古文作『上』，於《覲禮》尚左『從今文作『尚』者，皆取其當文易曉耳。』司馬乘矢如初。【疏】正義曰：敖氏繼公云：『乘矢惟言『如初』，則是不進束矣，亦異於大射禮也。』」

右司馬命取矢乘矢

司射遂適西階西，釋弓，去扑，襲；進由中東，立于中南，北面視算。釋弓去扑，射事已。

【疏】正義曰：敖氏繼公云：「遂者，由釋獲者之西而北行也。由中東，明于階西直進也。」盛氏世佐云：「司射視說中，命上射訖，即反中西南之位，至是云『遂適西階西』者，謂自其位而北行也。進由中東，則于階西東行，而出于中之北矣。」注云「釋弓去扑，射事已」者，視算既在射之後，射訖而視其算，故云「射事已」也。敖氏云：「釋弓并矢去之。去扑而視算，爲算中有尊者之獲，不敢佩刑器以視之，敬也。必釋弓矢者，射事已矣，因去扑之時可以并去之也。不執弓，則不宜袒，故襲。不言說決拾，文省。」韋氏協夢云：「司射命取矢之時，本未決遂，故此不云『說決拾』。敖謂文省，非。」褚氏寅亮云：「注云『射事已』，明甚。敖氏謂『不敢佩刑器以視之』，迂甚。中西之地有算，而釋獲者又在，故由中東。釋獲者東面于中西坐，先數右獲。固東面矣，復言之者，爲其少南就右獲。【疏】正義曰：張氏爾岐云：『右獲，上射之獲。』敖氏繼公云：『先數

右獲，尊上射也。」二算爲純。純，猶全也。耦陰陽。

【疏】正義曰：耦陰陽者，謂陰陽相合也。一純以取，

實于左手；十純，則縮而委之。縮，從也。於數

者東西爲從。古文「縮」皆爲「蹙」。【疏】正義曰：敖氏繼

公云：「取，謂以右手數即取之。委之，當在所釋右獲之

南。」注云「於數者東西爲從」者，賈疏云：凡言從橫者，

南北爲從，東西爲橫。今釋算者東面，則據數算東爲正，故

云「於數者東西爲從」也。云「古文「縮」皆爲「蹙」」者，詳

《鄉飲酒禮》。每委異之。易校數。【疏】正義曰：敖氏

繼公云：「異之者，又在其南。」有餘純，則橫于下。

又異之也。自近爲下。【疏】正義曰：賈疏云：「此則以南

北爲橫也。」敖氏繼公云：「有餘純，不成十者也。下，謂委

之西。橫之者，宜變於上。純自二以上，則亦每純異之，以

次而西。此橫者，亦南末也。其縮者東末與？」盛氏世佐

云：「橫，南北設也。下，中西少南也。純之縮者，順中而

設，故亦以西爲下。敖氏云「縮者東末」，^①非。注云「自近

爲下」者，謂以近釋獲者爲下也。」一算爲奇，奇則又

縮諸純下。奇，猶虧也。又從之。【疏】正義曰：盛氏

世佐云：「純下，謂餘純之南也。」興，自前適左，東

面。起由中東就左獲，少北於故，東面鄉之。【疏】正義

曰：「起由中東」，案：《集釋》本「由中西」，誤。《集說》本

「更端故起由中東」更端故「三字」，當是敖氏所添。注云

「少北於故」者，賈疏云：「故，則又算也。又移至左算之

後，東面鄉之。」坐，兼斂算，實于左手；一純以

委，十則異之。變於右。【疏】正義曰：《校勘記》云：

「十」，誤作「實」。注云「變於右」者，張氏爾岐云：「於

右獲，則自地而實于左手，數至十純則委之；于左獲，則自

左手而委于地，數至十純則異之；是其變也。其縱橫之法

則同。」其餘如右獲。謂所縮所橫。【疏】正義曰：敖

氏繼公云：「謂如其所縮所橫及每委異之也。異之，則次

而北與？」盛氏世佐云：「敖說「每委」二字，當作「十純」。

司射復位。釋獲者遂進取賢獲，執以升，自

西階，盡階不升堂，告于賓。賢獲，勝黨之算也。

齊之而取其餘。【疏】正義曰：注云「賢獲，勝黨之算也」

者，敖氏云：「勝黨所餘之算也。言賢者，因下文也。」張氏

①「末」，原作「設」，今據《儀禮集編》改。

爾岐云：「賢，猶多也。賢獲，所多之算。」云「齊之而取其餘」者，敖氏云：「既數左獲，少退，當中之正西，校其算之多寡，卒，進，取其餘者，二手共執之以升。」若右勝，則曰「右賢于左」；若左勝，則曰「左賢于右」。以純數告；若有奇者，亦曰奇。賢，猶勝也。言賢者，射之以中爲雋也。假如右勝，告曰：「右賢于左若干純、①若干奇」【疏】正義曰：賈疏云：「若干者，數不定之辭。凡數法一二已上得稱若干，②奇則一也。一外無若干，鄭亦言「若干」者，因純有若干，奇亦言「若干」。奇言「若干」者，衍字也。」孔氏穎達《投壺》正義曰：勝者若雙數，則曰若干純；隻數，則曰若干奇，猶十算則云五純，九算則云九奇也。朱子曰：「孔說差勝。然恐或是九算，③則曰四純一奇也。」盛氏世佐云：「孔疏與注合。若朱子所言，則奇仍不可言若干矣。又案：《投壺》曰：「遂以奇算告曰：某黨賢于某黨若干純。奇則曰奇。」若然，則釋獲之取賢獲無論多寡，止一算而已，亦不盡所餘而執之。」胡氏肇昕云：「《投壺》：「某黨賢于某黨若干純，奇則曰奇。」純言若干，奇不言若干者，承純而省之也。蓋所餘之算盡純數，則曰若干純；若有奇數，則不除其純數，而唯曰若干奇

也。賈疏疑爲衍文，非是。」褚氏寅亮云：「告則分左右而總計之，飲則仍視各耦之勝負。假令十算，則曰五純；假令九算，則曰四純一奇。蓋算有二即曰純矣。孔氏穎達謂九算則曰九奇，恐未然。」若左右鈞，則左右皆執一算以告，曰「左右鈞」。降復位，坐，兼斂算，實八算于中，委其餘于中西；興，共而俟。

【疏】正義曰：賈疏云：「此將爲第三番射，故豫設之，或實或委，一如前法。」敖氏繼公云：「兼斂算者，兼斂左右之算，及橫于中西者而執之也。」○凌氏《射禮數獲即古算位說》一篇，今錄於後，曰：「《鄉射》、《大射》數獲之位，即古籌算之位也。《禮記·投壺》卒投請數，鄭氏亦引《射禮》以注之。考《鄉射禮》第二次射畢數獲，釋獲者東面于中西，坐，先數右獲，二算爲純，一純以取，實于左手，十純則縮而委之。鄭注：「縮，從也。于數者東西爲從。」④孔氏穎達《投壺》疏：滿十純，則從而委之，每十雙，則東西縮爲一

①「賢」，原作「勝」，今據《儀禮注疏》改。

②「二」，原作「一」，今據《儀禮注疏》改。

③「恐」，原脫，今據《禮經釋例》補。

④「西」，原作「面」，今據《禮經釋例》改。

委。經又云：「每委異之。」鄭注：「易校數。」案：此籌皆東西直列也。^①經又云：「有餘純則橫于下。」鄭注：「又異之也。自近爲下。」孔穎達《投壺》疏：「有餘謂不滿十雙，或八雙九雙以下，則橫于純下，謂橫在十純之西，南北置之。」案：此籌皆南北橫列也。經又云：「一算爲奇，奇則又縮諸純下。」鄭注：「奇，猶虧也，又從之。」孔穎達《投壺》疏：「若唯有一算，則縮之零純之下，在零純之西，東西置之。」案：此籌又東西直列也。數右獲畢，則數左獲，亦東面。『坐，兼斂算，實于左手。一純以委，十則異之。』鄭注：「變於右。」賈疏：「右則一一取之于地，實于左手。此則總斂于左手，一一取之于左手，委于地，是變也。必變之者，禮以變爲敬也。」經又云：「其餘如右獲。」鄭注：「謂所縮所橫。」楊信齋曰：「釋算之法，先數右獲，其算在地，以右手取之于地，二算爲純，實于左手，十純則縮而委之于地，有餘純則橫于下，奇則又縮諸純下。及其數左獲也，總斂其算于左手，以右手取之，二算爲純，即委之于地，十純則異之，其餘如右獲。謂有餘純則橫于下，奇則縮于純下，如右獲之法也。是數右獲、左獲雖有于地、于手之異，而其先直列，次橫列，又次復直列，則皆同也。《大射儀》數獲亦然。其法滿十位則直橫遞列，恐其易淆也。蓋古九數布籌列位

之本法，凡算皆用之，不獨射禮數獲也。故《既夕禮》云：「讀書釋算則坐。」鄭注：「必釋算者，榮其多。」然則數多皆釋算可知也。元郭若思《授時草》乘除之位正如此，唯其位平列爲小異耳。自珠算盛行，古算籌算位皆已不傳。僅此見于《禮經》者，尚可推見聖人遺制。梅氏《古算器考》但引《周易》揲著以證古算籌，而不及此，蓋未之深考也。」

右數獲

司射適堂西，命弟子設豐。將飲不勝者。

設豐，所以承其爵也。豐，形蓋似豆而卑。【疏】正義曰：敖氏繼公云：「命設豐，乃不摺扑者，以尊者亦當飲此豐上之觶故也。」褚氏寅亮云：「敖說非也。賓、主、大夫之飲，固執爵者酌授于席前，卒觶而授執爵者也，不在豐。」埤案：設豐不言面位，據《大射儀》「司宮士奉豐由西階升，北面坐，設于西楹西」，則此亦北面設之也。注云「設豐，所以承其爵也。豐，形蓋似豆而卑」者，蔡氏德晉云：「豐，以木

①「列」，原作「引」，今據《禮經釋例》改。下二「列」字同。

爲之，其形似豆，所以承罰爵者。」聶氏崇義《禮圖》曰：①「舊《圖》引《制度》云：射罰爵之豐作人形。豐，國名，其君坐酒亡國，戴杆以爲戒。張氏鎰云：『鄭注《鄉射》與《燕禮》義同，以明其不異也。制度之說，何所據乎？且聖人一獻之禮，賓主百拜，此其所以備酒禍也。豈獨於射事而以亡國之豐爲戒哉？恐非也。』」弟子奉豐升，設于西楹之西，乃降。勝者之弟子洗觶，升酌，南面坐奠于豐上；降，袒執弓，反位。勝者之弟子，其少者也。耦不酌，下無能也。酌者不授爵，略之也。執弓反射位，不俟其黨，已酌有事。【疏】正義曰：注「酌者不授爵」，《校勘記》云：「授」，誤作「校」。云「勝者之弟子，其少者也」者，賈疏云：「以其執弟子禮使令，故知少者也。」敖氏曰：「弟子不待司射命之而洗觶升酌者，設豐實觶，其事相因可知也。此不命之而弟子知其爲勝黨者，蓋於釋獲者升告之時已與聞之矣。勝者之黨實觶者，主于飲不勝者也。然亦惟發端以見其意耳，故後有執爵者爲之。」云「耦不酌，下無能也」者，方氏苞云：「注非也，非獻非酬，本無親酌之義。投壺禮勝者曰『敬養』，而亦使他人酌，則非下無能審矣。蓋勝者張弓而先升，不勝者弛弓而

先降，彼此相形，實有難爲情者，雖法行於有司，而同儕猶略見獻酬之意，故使子弟洗酌，坐奠于豐，亦曰「敬養」之義耳。」吳氏廷華云：「少，謂勝者之少者。卒射已，立于堂西，升酌畢，降立于堂西，與衆射者同。奉司射北面之命，遂俱袒決拾，執張弓，反于司射西南之位，不言決拾，張弓，可知。」又云：「耦不酌說，可解不可解。罰爵自取飲，故不授，非略之也。凡射者儀節，皆俟有司之命行之。弟子之升酌，因設豐之命也，則執弓反射位，亦當在下司射命之之後，②與衆俱袒而反位也。」云「酌者不授爵，略之也」者，敖氏云：「辟飲尊者之禮也。」云「執弓反射位，不俟其黨，已酌有事」者，敖氏云：「反位，反堂西之位。此時袒執弓，於禮無所當，三字疑衍。」③《大射儀》無之。」盛氏世佐云：「勝者之弟子亦與于射者也，其洗觶、升酌也，自堂西而來，則其反位也，亦反于堂西耳。注乃以爲反射位者，因經「袒執弓」三字在「反位」之上而誤也。夫衆射者之弓，皆釋于堂西。禮未有于階前袒執弓者，敖氏所以有衍文之疑也。

①「義」，原作「儀」，今據文義改。

②「司」，原脫，今據《儀禮疑義》補。

③「三字」，原脫，今據《儀禮集說》補。

以愚考之，則亦非衍也。蓋云「降，袒執弓」，則其適堂西可知矣。反位者，反南面東上之位，就其耦也。先祖執弓而後反位者，爲其耦已執弛弓而俟也。經言此者，遂著司射遂袒執弓以下事，與此洗觶、升酌同節也，且以見此弟子之亦與射也。不言決遂，文省也。褚氏寅亮云：「經云勝者之弟子，則即射賓中之年少者矣。以是勝黨，故袒執弓。降時始執者，前洗酌有事也。先反射位者，事畢也。注皆依經立訓。」敖氏以此弟子爲設楅、設豐之輩，位在堂西而不與射，故以「袒執弓」三字爲衍文，而以反位爲反堂西之位，非也。司射遂袒執弓，挾一个，搯扑，北面于三耦之南，命三耦及衆賓：「勝者皆袒決遂，執張弓。」執張弓，言能用之也。右手執弦如卒射。【疏】正義曰：敖氏云：「司射袒亦決遂，經文省耳。」方氏苞云：「不言決遂，下適階西、釋弓矢、說決遂，有明文也。」注云「執張弓，言能用之也。右手執弦如卒射」者，上文卒射執弓，不挾，右執弦，此亦如之也。敖氏曰：「執張弓，射時執弓之常法也。」不勝者皆襲，說決拾，卻左手，右加弛弓于其上，遂以執附。固襲說決拾矣，復言之者，起勝者也。執弛弓，言不能用之也。兩

手執附，又不得執弦。【疏】正義曰：敖氏云：「此亦司射以是命之也。」注云「固襲說決拾矣，復言之者，起勝者也」者，以前降堂時，既襲說決拾矣，此復言之者，以不勝者之襲說決拾，起勝者之袒決遂也。敖氏曰：「不勝者固襲、脫決拾矣，復言之者，承命勝者之後，宜明言之。不然，則嫌亦袒決遂，與之同也。」云「執弛弓，言不能用之也」者，案：《說文》：「張，施弓弦也。」②「弛，弓解弦也。」是張弓爲施弦之弓，故言能用之也；弛弓爲解弦之弓，故言不能用之也。云「兩手執附，又不得執弦」者，敖氏云：「左手卻執附，則右手其覆執簫與？」③司射先反位。居前，俟所命來。【疏】正義曰：「俟所命來」者，張氏爾岐云：「所命，謂三耦衆賓。」三耦及衆射者皆與其耦進立于射位，北上。【疏】正義曰：敖氏云：「三耦以下，皆如司射所命而後進也。大夫之耦亦當進立于三耦之南。」郝氏敬云：「射位，始序立作射之位，司射與司馬位之西南也。」司射作升飲者，如作射。一耦進揖，如

①「皆」下，原衍「因」，今據《儀禮集說》刪。

②「施」，原作「弛」，今據《說文解字》改。下「施」字同。

③「與」，原作「焉」，今據《儀禮集說》改。

升射，及階，勝者先升，升堂，少右。先升，尊賢也。少右，辟飲者也，亦相飲之位。【疏】正義曰：凌氏《釋例》云：「凡飲不勝者，未升堂之前三揖：曰耦進揖，曰當階北面揖，曰及階揖。《鄉射禮》：再射，飲不勝者，司射作升飲者，如作射。一耦進揖，如升射。三射，飲不勝者，如初。《大射儀》：再射，飲不勝者。小射正作升飲射爵者，如作射。一耦出，揖如升射。三射，飲不勝者，如初。經云「揖，如升射」，則亦當如射時未升堂之前，耦進揖，當階北面揖，及階揖之三揖也。」注云「先升，尊賢也」者，敖氏云：「先升，道之，勝者升三等，而不勝者從之也。上下射在庭，如初儀；至階，乃以勝負分先後，蓋屈信之節然爾。」韋氏協夢云：「耦不酌不授，而同升者，不敢自矜其功也。但勝者先升，則已有別矣。」云「少右，辟飲者也」者，朱子曰：「右，自北面而言則東也。所以辟當飲者，使得升取觶也。」①敖氏云：「少右，辟飲者，變於射時也。」云「亦相飲之位」者，賈疏云：「相飲者皆北面于西階，授者在東，飲者在西。」朱子曰：「相飲之位，謂飲之者立於飲者之右也。」不勝者進，北面坐取豐上之觶；興，少退，立卒觶；進，坐奠于豐下；興，揖。立卒觶，不祭不

拜，受罰爵，不備禮也。右手執觶，左手執弓。【疏】正義曰：敖氏云：「進固北面矣，乃言之者，嫌南面奠觶，則亦當南面取觶也。少退者，欲與勝者並乃飲也。豐下，豐下之南。」方氏苞云：「投壺禮，不勝者奉爵勝者，跪曰敬養，主賓相歡，無所謂榮辱也。此則同耦相視，絕無禮與辭。有司行法，私禮無所施。」注云「右手執觶，左手執弓」者，賈疏云：此無正文，以祭禮左手執爵，用右手以祭，此亦可知也。不勝者先降，後升，先降略之，不由次。【疏】正義曰：敖氏云：「後升者先降，亦變於射時也。此禮以勝者為主，故勝者先升，不勝者先降。勝者從降，亦中等。不勝者若下射也，則既降而少右。上射則少左。庭中之行如射時。」與升飲者相左，交于階前，相揖；出于司馬之南，遂適堂西；釋弓，襲而俟。俟復射。【疏】正義曰：凌氏《釋例》曰：「凡飲不勝者，既飲之後二揖：曰卒觶揖，曰降階與升飲者相左交于階前揖。《鄉射禮》再射，飲不勝者，耦進，及階。勝者先升堂，少右。不勝者進，北面坐取豐上之觶，興，少退，立卒

①「得」，原作「當」，今據《儀禮經傳通解》改。

觶，進，坐奠于豐下，興，揖，不勝者先降，與升飲者相左，交于階前，相揖，出于司馬之南，遂適堂西，釋弓，襲而俟。三射，飲不勝者如初。《大射儀》：再射，飲不勝者，耦出，及階。勝者先升，升堂，少右。不勝者進，北面坐取豐上之觶，興，少退，立卒觶，進，坐奠于豐下，興，揖。不勝者先降，與升飲者相左，交于階前，相揖，適次，釋弓，襲，反位。又云：「衆皆繼飲射爵如三耦。」三射，飲不勝者如初。是飲不勝者既飲之後二揖也。此二揖，猶射時卒射揖，降階與升射者相左交于階前揖，及拾取矢時，既拾取矢揖，既退與進者相左揖也。拾取矢在庭，故曰進退，射與飲在堂，故云升降也。此飲在西楹之西，勝者不與，故無升堂揖，當物揖，及物揖三揖，與升射時不同也。又《鄉射》：賓，主人不勝，則不執弓，執爵者取觶，降洗，升，實之，以授于席前，受觶，以適西階上，北面，立飲，卒觶，授執爵者，反就席。《鄉射·記》：主人亦飲于西階上。疏云：「此謂主人在不勝之黨，受罰爵之時也。」賓，主人飲罰爵，其禮異於衆耦者，優之也。」敖氏繼公云：「不勝者釋弓而已，勝者又說決拾而襲也。經文省耳。」注云「俟復射」者，謂俟第三番射。敖氏曰：「俟，謂南面東上以俟司射之後命。」有執爵者。主人使贊者代弟子酌也。於既升飲而升自西階，

立於序端。【疏】正義曰：注云「主人使贊者代弟子酌也」者，案：弟子亦與於射者，故主人使贊者代之。贊者，不射者也。方氏苞云：「尚有三射，弟子多與焉，如每耦之弟子皆升洗酌，費時而失事矣，故別使執爵者代之。惟於初升之一耦見其義。執爵與獲者同稱，則亦州之屬士耳。」云「於既升飲而升自西階，立於序端」者，敖氏繼公云：「執爵者之升，似當在上耦未升飲之時，立於序端以俟之也。」胡氏肇听云：「弟子洗觶升酌，南面坐奠于豐上，以後階上弟子無事，遂降。至上耦升飲既訖，將飲衆耦，於是有取觶實之事，而執爵者代弟子以升自西階，立于序端，以執其事，不必於上耦未升飲之時，而立以俟之也。敖說與鄭異，非是。」執爵者坐取觶，實之，反奠于豐上，升飲者如初。每者輒酌，以至於徧。【疏】正義曰：敖氏繼公云：「取觶北面，奠之亦南面。」注云「每者輒酌，以至於徧」者，敖氏曰：「注意蓋謂每人既飲，則執爵者輒爲酌之，以至於徧也。」三耦卒飲，賓、主人、大夫不勝，則不執弓。執爵者取觶降洗，升實

①「謂」，原脫，今據《儀禮集說》補。

之，以授于席前。優尊也。【疏】正義曰：敖氏繼公

云：「上射勝則酌主人、大夫，下射勝則酌賓。授于席前，

賓、主人則於其右，大夫則於其左，皆邪鄉之。」注云「優

尊也」者，郝氏敬云：「賓、主人、大夫飲，不執弛弓，不親取

觶，觶必洗，必授之席前，不反奠，殊尊也。」方氏苞云：「雖

優尊者，實與不勝者同罰。蓋古者武事莫重於射，君臣長

幼莫不盡志於此。無事則以習禮樂，有事則以決戰勝，所

以保國衛民，將於是乎在。大夫、州長即有事時之軍帥、師

帥也。故老病不能射者，可辭於請射之初，而與於射則不

敢寬其罰。蓋法不行於貴者，則無以肅其下也。」又曰：

「騰酬爵，以奠而不敢授為敬，舉射爵則反之，何也？以飲

為罰，非獻酬以將愛敬之比，故奠于豐，俾自取飲，使尊者

自降而取飲，則義不安，故又使執爵者升授也。」受觶以

適西階上，北面立飲。受罰爵者，不宜自尊別。

【疏】正義曰：敖氏云：「西階上亦楹西少南，此飲罰爵者

之正位也。以是禮主于罰爵，故雖尊亦當就此而飲。」郝氏

敬云：「飲不于席，于西階，亦北面，亦立飲，其示罰同也。」

胡氏肇昕云：「執爵者實觶授于席前，優尊者，若不敢罰之

也。受觶以適西階上，不敢以尊者自別，故不于席飲，而必

適西階上，從其罰也。」卒觶，授執爵者，反就席。

大夫飲，則耦不升。以賓、主人飲，耦在上，嫌其升。

【疏】正義曰：敖氏云：「不升，立于射位也。大夫既飲，則

徑適堂西而釋弓與？」褚氏寅亮云：「耦不升堂，徒執張弓

立于射位，甚無謂也。況大夫之耦不勝，大夫並不執張弓

也，而謂大夫不勝耦乃執張弓乎？既不執，又何釋？敖

氏說似臆撰。」胡氏肇昕云：「上文賓、主人、大夫不勝則不

執弓，是大夫與賓、主人同禮也。大夫既飲，亦反就席不執

弓也。敖說非。」郝氏云：「大夫飲，耦不升，賓、主人飲，勝

者同升可知。」若大夫之耦不勝，則亦執弛弓，

特升飲。尊者可以孤，無能對。【疏】正義曰：敖氏云：

「言『特升飲』，明大夫在席自若也。大夫飲而耦不升，則耦

飲而大夫不與亦宜爾。執弛弓而升飲，衆賓之不勝者其禮

然，故不得以所與為耦者之異而變也。」郝氏敬云：「大夫

耦飲，大夫不同，^①則賓、主人耦飲同可知。」○注「無能

對」，《校勘記》云：「徐本無『對』字。」云「尊者可以孤，

無能對」者，盛氏世佐云：「注意蓋謂不勝者特升飲，是以

①「同」，原作「升」，今據《儀禮節解》改。

其無能而孤之也。大夫與其耦尊卑不敵，故可耳。其敵者，則必與之偕也。」衆賓繼飲射爵者辯，乃徹豐與觶。徹，猶除也。設豐者反豐於堂西，執爵者反觶於筐。【疏】正義曰：《校勘記》云：「衆賓繼飲」繼，誤作「既」。敖氏云：「衆賓繼飲，皆如三耦也。自『命設豐』以下，皆言勝者飲不勝者之禮。若左右鈞，則無此而即獻獲者與？」郝氏敬云：射爵，即罰爵也。

右飲不勝者

司馬洗爵，升，實之，以降，獻獲者于侯。鄉人獲者賤，明其主以侯爲功得獻也。【疏】正義

曰：敖氏云：「獲者受命于司馬，故司馬主獻之。」注云「鄉人獲者賤，明其主以侯爲功得獻也」者，敖氏云：「是時獲者負侯未退，就而獻之，辟君禮也。獻時蓋西南面。大射之禮，獻獲者于侯西北三步。」吳氏廷華云：「大射服不與獲者並稱，則二者等耳。卿大夫不備官，此獲者亦當以其屬攝之。《周禮》服不下士。攝者雖卑，未必賤於下士。但大射設尊，此不設尊；大射獻服不于侯西北三步，^①此即獻之于侯者；彼諸侯禮詳，此大夫禮略也。注以賤爲

說，非是。」增案：獲者之位八，負侯也，右个也，左个也，侯中也，左个之西北三步也，薦右也，再負侯也，乏南也。八者以負侯始，亦以負侯終。方氏苞云：「獲者不宜得獻，且有俎，獻于侯，示以侯而得獻也。大射則服不先受獻于侯之西北，設薦俎而後轉以祭侯，示不寧侯本不當祭，而服不私獻之也。示獲者以侯得獻，宜於鄉人校射見之。明不寧侯本不宜祭，宜於諸侯之大射見之。禮之變必有義而置之，各有其所以然。」薦脯醢，設折俎，俎與薦皆三祭。皆三祭，爲其將祭侯也，祭侯三處也。【疏】正義曰：

敖氏云：「先設薦俎乃受爵，亦變於君禮也。其設之亦當侯中，在獲者之前。」注云「皆三祭，爲其將祭侯也，祭侯三處也」者，賈疏云：「三處，下文右與左、中是也。」敖氏曰：「皆三祭，爲其將祭於侯之三處也。薦有三祭，謂脯之半臠者三也。俎祭，謂判肺也。薦俎，皆北面設之，俎在薦南。」吳氏廷華云：「諸經獻後乃設薦俎，此在獻前者，蓋將設猶未設。下左、右、中及西北三步乃設之，下注「薦之於位」是也。薦祭脯醢，俎祭肺脯，則下《記》「祭半臠橫于上」是也。祭，祭食也。禮食必有祭也。三祭者，注所謂獲者

①「北」，原脫，今據《儀禮疑義》補。

以侯爲功也。侯有中及左右，故必歷三處祭薦俎及酒，示三處皆其所也。又經明言獻服不，其受爵乃祭酒、祭薦、祭俎，皆獻禮耳。注因此經「祭」字，遂以祭侯言之。《周禮注》亦以此爲說。據《夏官·射人》「祭侯則爲位」，則祭侯固有其禮，但不可以獻服不卽爲祭侯。據此，爵及薦俎皆一，蓋專爲獲者設耳。若謂祭侯三處，則應三爵三薦俎，不應止用一爵一薦俎，爲移此就彼之計。且獲者亦不應代侯卒爵。以尸禮言，則侯北面，尸亦不應南面也。又據經先獻獲者，後獻釋獲者，兩獻俱有祭。若以此祭爲祭侯，豈下釋獲者亦可謂之祭中乎？「張氏爾岐云：『皆三祭，脯之半脰、俎之離肺皆三也。』」蔡氏德晉云：「三祭，謂祭侯之左、右、中三處，故俎之肺與脯之半臟皆用三也。」獲者負侯，北面拜受爵。司馬西面拜送爵。負侯，負侯中也。拜送爵不同面者，辟正主也。其設薦俎，西面錯，以南爲上。爲受爵於侯，薦之於位。古文曰「再拜受爵」。

【疏】正義曰：敖氏云：「固負侯北面矣，復言之者，明其還而倚旌乃拜，且嫌受獻或異面也。」注云「拜送爵不同面者，辟正主也」者，賈疏云：「上文正主獻賓、獻衆，賓皆北面，與受獻者同面。今此與受獻者不同面，故云「辟正主」也。」敖氏云：「拜送爵不同面，明其異於常禮也。」云「其設薦俎，西面錯，以南爲上。爲受爵於侯，薦之於位」者，賈疏

云：「此云「負侯，北面拜受爵」，是受爵於侯。下云「左个之西北三步東面，設薦」，是薦之於位也。經云「東面」，注云「西面錯」者，據設人而言。」盛氏世佐云：「注意蓋謂上文設薦俎之法，設者西面錯之，以南爲上。俎在薦南也，知西面錯者，以送爵者亦西面故也。先設於此者，爲其受爵於侯，故亦於其負侯之位薦之也。獲者北面而設俎在薦南者，以其暫錯於此，且變於祭侯也。疏誤。」吳氏廷華云：「《儀禮》之例，獻受在階上及席前，受訖就席，乃設薦俎，是注所謂薦之於位，不在此受爵之所也。」又云：「設薦俎，薦在內，俎在外，注所謂錯，謂俎錯出在外，則是由南而北錯，注以爲西面錯，失之矣。又陳設必因乎位，獲者北面，則薦俎當以北面爲準。北面以東爲上，注以爲南上，亦不合。」據疏云「據文東面」，蓋指下文左个西北之設言，不知彼是獲者東面，故可以爲南上，且亦不可謂之西面錯也。疏爲之解曰：「據設人而言。」然據此經，獲者北面，送爵者不南面相向，則下文獲者東面，薦者亦未必西面相對也。《少牢》、《特牲》戶東面，故南上，與下獲者東面同，①但下設在左个西北，②此射在侯，焉得以彼證此？」云「古文曰「再拜

①「與」，原作「爲」，今據《續清經解》本改。

②「个」，原作「於」，今據《續清經解》本改。

受爵」者，胡氏承琪《古今文疏義》曰：「案：《大射儀》「獻服不」云：「服不侯西北三步，北面拜受爵。」與此獻獲者事同。知古文「再」字衍也。」獲者執爵，使人執其薦與俎從之，適右个，設薦俎。獲者以侯爲功，是以獻焉。人，謂主人贊者，上設薦俎者也。爲設，籩在東，豆在西，俎當其北也。言使設，新之。【疏】正義曰：郝氏敬云：「侯北向，以東爲右，偏側爲个。」①姜氏兆錫云：「獻爵於侯，負侯拜受，謂居侯北三步而不西耳。若謂於侯拜受，則侯中與左、右个皆一侯之內也，相去幾何？何以云「使人執其薦與俎從之，適右个」邪？惟去其侯三步，東往右个，故曰執而從之，又曰適。」盛氏世佐曰：「經云「獻獲者於侯」，又云「獲者負侯北面拜受爵」，則其於侯中明矣。侯中與右个在一侯之內，乃云「使人執其薦與俎從之」而「適」者，禮以變易爲敬，不徑自中而移於東也。下經云「適左个，中亦如之」，然則自右而移於左，自左而復移於中，皆使人執其薦俎從之而適也，豈必去侯三步而後可云「適」哉？姜說誤矣。」注云「獲者以侯爲功，是以獻焉」者，敖氏曰：「獲者因射侯而得獻，故就侯而祭其薦俎與酒焉，示不忘本也。」云「人，謂主人贊者，上設薦俎者也」者，以前使爲獲者設薦俎，是主人贊者，故知此亦同也。云「籩在東，豆

在西，俎當其北」者，賈疏云：「侯以北面爲正，依《特牲》、《少牢》皆籩在右，故知籩在東右廂，豆在西左廂也。」敖氏云：「下言獲者南面坐，祭薦，乃祭俎，則是俎在侯北，薦在俎北，而獲者又在薦北，如常禮矣。其設薦之位，亦脯西而醢東，蓋上右也。薦俎不統於侯者，此獻主於獲者，非爲侯故耳。」焦氏以恕云：「祭侯之祭，以今時例之，亦如旗纛神之祭相似，但今則加嚴敬，而古之祭侯頗略，直與始爲飲食之祭相準。然始之設薦蓋設之於侯，而不在西北三步之位。繼之設薦，宜統於侯，以北面爲正，而籩在右者得之矣。至於獻獲之禮不參祭侯者，殆非禮意也。經云獻獲者於侯，乃通下文而言之，不必過泥此一語也。」云「言使設，新之」者，賈疏云：「鄭意嫌更使人設之，其實薦此者仍前人，而云使人設薦俎，示新之而已。」獲者南面坐，左執爵，祭脯醢，執爵興，取肺坐祭，遂祭酒。爲侯祭也，亦二手祭酒反注，如大射。【疏】正義曰：注「反注」，《校勘記》云：「『反』，徐本作『及』。《通解》、楊氏俱作『反』。」○敖氏曰：「必云「執爵興」者，見其所取者非離肺

①「側」，原作「則」，今據《儀禮節解》改。

也。取離肺者，必奠爵乃興。」注云「爲侯祭也」者，賈疏云：「此正祭侯，故獲者南面鄉侯祭也。」云「亦二手祭酒反注，如大射」者，《大射儀》云：「獲者左執爵，又祭薦俎，二手祭酒。」此不云「二手」者，文不具耳。」興，適左个，中亦如之。先祭左个，後中者，以外即之，至中，若神在中也。【疏】正義曰：「中亦如之」，《校勘記》云：「『亦』，唐石經、徐本、楊氏俱作『皆』」，《通解》、敖氏作「亦」。案：敖

云：「謂適左个又適侯中，皆如適右个而祭之儀也。」則敖所見本亦作「皆」，刻《集說》者誤改爲「亦」耳。」注云「先祭左个，後中者，以外即之，至中，若神在中也」者，敖氏曰：「先右，次左，後中，禮之序然爾。《士喪禮》曰：主人扱米，實于右三，實一貝，左，中亦如之。其序正與此同。」左个之西北三步，東面設薦俎。獲者薦右

東面立飲，不拜既爵。不就乏者，明其享侯之餘也。立飲薦右，近司馬，於是司馬北面。【疏】正義曰：敖氏云：「左个之西北三步，獲者受獻之正位也。歸以有爲而受於侯，今執爵宜居正位。故執爵先立於此而東面，執薦俎者又從之而西面設於其東也。薦右，脯南也。飲於薦右，亦變於《大射禮》也。以違其位而南，故復言東面。」盛

氏世佐云：「東面設薦俎，謂主人之贊者東面設也。舊說獲者東面，設者西面，非。張氏《句讀》以此五字爲句，今從之。」褚氏寅亮云：「左个西北三步，獲者之位也。注以爲受爵於侯，薦之於位，獻薦異處。敖氏謂獻薦皆在侯。細玩此經及《大射儀》，其言獻也，則異其文。此則曰「獻獲者於侯」，又曰「獲者負侯北面拜受爵」，^①明其在侯也。《大射儀》則曰「獻服不氏，服不侯西北三步，北面拜受爵」，明獻之於位也。兩處經文不同也，至其言薦也則同。於獲者將祭時俱曰「薦俎從之」，於既祭後俱曰「左个之西北三步，東面設薦俎」，並無異詞。然則兩禮所設薦俎，俱在其位明矣。如薦俎先設於侯中，乃獲者不先祭中，反令徹其薦俎，先祭右个、左个，然後仍設故處而祭中，何邪？故當以注爲正。至所以獻薦，雖主獲者，實兼爲侯，是以俎有三祭。既有三祭，則當爲侯祭矣。故注於其祭酒而曰反注。反注者，向身內注，與凡禮外注異，所以明其爲侯祭也。然則祭侯時，薦俎之設亦當順侯北面之位，而不當從南面之位矣。敖氏亦誤。大射之獻亦當在侯，因大侯前參于二侯，故移獻就其位，異於此。」注云「立飲薦右，近司馬，於是司馬

①「受」，原脫，今據《儀禮管見》補。

右司馬獻獲者

北面」者，《欽定義疏》云：「是時獲者東面，司馬必北面，乃得受爵於獲者之右也。受爵必於其右者，以送爵時由其右故也。」司馬受爵，奠于筐，復位。獲者執其薦，使人執俎從之，辟設于乏南。遷設薦俎就乏，明已所得禮也。言辟之者，不使當位，辟舉旌，偃旌也。設於南，右之也。凡他薦俎，皆當其位之前。【疏】正義曰：敖氏云：「司馬於此方言復位，則是既獻獲者於侯之後，即北面立於侯之西北，以俟獲者之來與？獲者於此自執其薦者，已授爵則不敢徒手而勞人也。」注云：「遷設薦俎就乏，明已所得禮也」者，賈疏云：「前設近侯，見享侯之餘。此近乏者，已所有事之處，遷近乏，是明其已所得禮故也。」云「言辟之者，不使當位，辟舉旌，偃旌也。設於南，右之也」者，敖氏云：「辟如『辟奠』之『辟』，謂離於故處也。此改設于乏南，故云『辟設』。必就乏者，宜近其位也，不當其位，辟旌。」云「凡他薦俎，皆當其位之前」者，凡他薦俎，謂燕及食并祭祀之薦俎，皆當其位之前，與射異也。獲者負侯而俟。【疏】正義曰：敖氏云：「事未畢而受獻，故反而卒之。俟，俟命去侯。」張氏爾岐云：「俟後復射也。」

司射適階西，釋弓矢，去扑，說決、拾、襲，適洗，洗爵，升，實之，以降，獻釋獲者于其位少南，薦脯醢折俎，有祭。不當其位，辟中。

【疏】正義曰：敖氏云：「釋弓矢，說決拾，為將洗酌而行禮也。不執弓矢，則當襲矣。去扑者，獻則不可佩刑器也。說決拾、襲當於堂西，不言者，文省也。釋獲者聽命於司射，故司射主獻之。獻時蓋西北面，既授乃北面也。『折』上當有『設』字，蓋文脫也。有祭脯與切肺也。獲者與釋獲者皆賓之弟子，以有勤勞之事，於此乃得獻，則其他弟子於獻衆賓之時亦不與明矣。」盛氏世佐云：「司射作升飲者訖，即為此獻釋獲者之事，亦與司馬獻獲者同節也。經中此類甚多，若必一事畢乃為一事，則一日之間有不能終禮者矣。階西，司射倚弓矢與扑之所。說決拾、襲當于堂西，不言者，從省文。」方氏苞云：「賓、主人、大夫而外，衆賓薦惟脯醢，而獲者、釋獲者乃有俎有祭，何也？以祭侯宜有薦俎也。獲者、釋獲者有俎，而司馬、司射無俎，何也？事有所專，以主祭侯而有加俎，猶《大射》所先薦者，惟司正與

射人，而司馬則與羣士徧獻薦。《燕》所先薦，司正、射人、司士、執幕者，而大射正則與羣士徧獻薦也。《特牲》、《少牢》、《衆賓》兄弟皆有薦胥，何也？祭自尸食以後，皆與祝侑賓兄弟獻酬之時，三射禮成，餘時無多，人人皆備祭肺祭酒之節，日亦不暇給矣。《燕禮》若射，則不獻庶子，義可類推也。《增案》：釋獲者之位在中西，本位也。少南，就其薦也。薦右也，司射之西也，辟薦少西也。注云「不當其位辟中」者，賈疏云：「以釋獲者位在中西，故獻之於其位少南，所以辟中也。」釋獲者薦右東面拜受爵，司射北面拜送爵。釋獲者就其薦坐，左執爵，祭脯醢；興，取肺，坐祭，遂祭酒；興，司射之西，北面立飲，不拜既爵。司射受爵，奠于筐。釋獲者少西辟薦，反位。辟薦少西之者，爲復射妨司射視算也，亦辟俎。【疏】正義曰：敖氏云：「就其薦，謂於薦西也。司射之西，則又少南於薦右之位矣。」蓋與司射俱北面，則宜並立也。拜受，立飲不同面者，異於堂上之獻也。獲者亦然。」注云「亦辟俎」者，據上獻獲者，「獲者執其薦，使人執俎從之辟，設于乏南」，是辟薦兼辟俎也。此但云「辟薦」，不云「辟俎」，省文耳。以與獲者同，故云

「亦辟俎」。敖氏云：「辟與上經『辟設』之意同。惟云『辟薦』，據釋獲者所執而言也。辟俎則有司爲之。」

右司射獻釋獲者第二番射事竟

司射適堂西，袒決遂，取弓于階西，挾一个，搯扑以反位。爲將復射。【疏】正義曰：張氏

爾岐云：「司射獻釋獲者，事畢反位，自此下至『退中與算而俟』，言以樂節射之儀。司射又請射命耦，三耦、賓、主人、大夫、衆賓皆拾取矢，司射作上射升射，請以樂爲節。三耦、賓、主人、大夫、衆賓卒射，又命取矢、乘矢，又視算、數獲，又設豐、飲不勝者，又拾取矢、授有司，乃說侯綱，退旌，退楅，退中與算，共九節。射之第三番也。」○韋氏協夢云：「司射既奠爵于筐，即適堂西，釋獲者亦即辟薦。此二節蓋同時爲之。經因叙獻釋獲者禮，而先言釋獲者辟薦之儀，非謂釋獲者既辟薦，然後司射適堂西也。」司射去扑，倚于階西，升，請射于賓如初。賓許，司射降，搯扑，由司馬之南適堂西，命三耦及

①「右」，原作「西」，今據《儀禮集說》改。

衆賓，皆袒決遂，執弓，就位。位，射位也。不言

射者，以當序取矢。【疏】正義曰：注云「位，射位」者，賈疏

云：「下云各以其耦反于射位，故知此是射位，在司射之西南、東面者也。」張氏爾岐云：「位，司馬之西南、東面位

也。」司射先反位。言先三耦及衆賓也。既命之即反

位，不俟之也。曷不言先三耦，未有拾取矢位，無所先。

【疏】正義曰：注云「鄉不言先三耦，未有拾取矢位，無所先」者，張氏爾岐云：「初三耦在司射西南，及司馬立司射之南，三耦拾取矢，移位於司馬之西南，是拾取矢時射位始定，故注云「未有拾取矢位，無所先」也。又射者堂下凡三位：堂西南面，比耦之位；司射西南東面，三耦初射之位；司馬西南東面，則拾取矢以後至終射之位也。」盛氏世佐曰：「上經于三耦初取弓矢之時，已云「司射先立于所設中之西南」。及其將飲不勝者也，又云「司射先反位」。并此，凡三言「先」矣，其義一也。第二番將射，「命三耦拾取矢，司射反位」，不言「先」，文有詳略耳」，注說非。「又案：射者堂下止有二位：堂西南面比耦之位，一也；司射之西南射位，二也。司馬之西南，即司射之西南也，疏以此位分爲二，非。」韋氏協夢云：「疏謂鄉射有堂西取矢及比耦之位，有三耦射位，在司射西南有拾取矢及再番射位，是三

位。考經文初番射時，射位在司射西南；再番射時，射位

在司馬西南，拾取矢位亦在司馬西南。疏以司射、司馬之

文異，遂分爲二位，不知司馬西南之位即司射西南之位。

觀司馬既命去侯之後，立于司射之南，而再番射時，遂云

「立于司馬之西南」。蓋始射司馬未有定位，故以司射爲

節，再射遂以司馬爲節也。若然，則鄉射唯有二位而已。

較大射少一位者，大射有次，此無次故也。」三耦及衆

賓皆袒決遂，執弓，各以其耦進，反于射位。

以，猶與也。今文「以」爲「與」。【疏】正義曰：注云「以，猶

與也。今文「以」爲「與」者，賈疏云：「《春秋》之義，能東

西之曰以。若存「以」字，謂言尊卑不同，任意以之，故轉爲

與，則平敵之義也。」胡氏承珙云：「疏說是也。上文：「主

人以賓揖。《大射儀》：「以耦左還。」注皆云：「以，猶與

也。」胡氏肇昕云：「敖氏云：「以其耦進，謂上射先而下

射從之也。進亦並行。若大夫之耦，則亦以序而獨進。下

文云大夫就其耦是也。」敖蓋因經「以」字因有先後之別，不

知「以」、「與」一聲之轉，故古多通用。鄭君以今文之「與」

注古文之「以」，以其音義相同，不煩改字也。」

右司射又請射命耦反射位

司射作拾取矢，三耦拾取矢如初，反位。賓、主人、大夫降，揖如初。主人堂東，賓堂西，皆袒決遂，執弓，皆進，階前揖。

南面相俟而揖行也。【疏】正義曰：蔡氏德晉云：「作拾取矢，就射位西南使之也。所作亦惟上耦，其餘以次進也。」

郝氏敬云：「前射委楅惟二十八矢，故三耦拾取，餘皆取諸堂西。今賓、主、大夫、衆耦矢皆委楅，故自三耦至衆賓，皆取矢于楅。三耦爲正，先拾如初，反射位。」注云「南面

相俟而揖行也」者，盛氏世佐云：「賓、主人各於堂下之東西方袒決遂，執弓訖，乃皆進。賓進而東，主人進而西，及階，各於其階前南面揖而行。蓋楅在中庭之南當洗，故自堂東西來者皆須南行就之也。疏云「各於堂上北面相見而揖」，非。」及楅揖，拾取矢如三耦。及楅，當楅東

西也。主人西面，賓東面，相揖拾取矢。不北面揖，由便也。【疏】正義曰：注云「及楅，當楅東西也」者，賓、主人東西行，及楅所，主人乃西面，賓乃東面，拾取矢。敖氏曰：「階前揖而南，及楅揖而止，所止之處即拾取矢之位也。是其位猶未離乎階前矣。然則衆耦於楅東西之位，亦宜如是也。」云「不北面揖，由便也」者，以三耦及衆賓皆於楅南北

面揖，賓、主人各由東、西，是由便也。褚氏寅亮云：「階前之揖，各向南揖也，及楅之揖，則東西相向矣。敖氏謂亦南面揖，非。」吳氏廷華云：「據上三耦拾取矢，先東行，當楅南，北面揖，然後上射東面，下射西面，進拾取矢。此經先言階前，乃言及楅，是從堂東西逕至階前，南行直東西當楅之處，主人轉向楅西行，賓轉向楅東行，及楅乃揖，則與三耦面位不同。三耦在楅之南，故須北面揖，此在楅之東西，故無北面揖。由便之說非也。疏謂賓主出堂，則不可解矣。」卒，北面搢三挾一个。亦於三耦爲之位。

【疏】正義曰：注云「亦於三耦爲之位」者，張氏爾岐云：「與三耦搢三挾一之處同也。」敖氏云：「此儀異於三耦者，蓋退於北，與退於南者不同也。」案：盛氏以敖說爲是。揖退。皆已揖左還，各由其塗反位。【疏】正義曰：賈疏

云：「賓主北面揖退之時，皆左還相背，各向堂塗，反堂東西之位。」盛氏世佐云：「賓、主人北面揖訖，各由其故道而反堂東西之位。此進而北行也，乃云「退」者，自楅而言也。注云「已揖左還」，非。」案：拾取矢以上，經固以如三耦說

① 「北」，原作「南」，今據《儀禮集編》改。

該之矣。迨既拾取矢，據三耦當有南面揖、少進「當楅」之文。經第言「北面搢三挾一个，揖退」而已，省文可知。賓

堂西，主人堂東，皆釋弓矢，襲，及階揖，升堂揖，就席。將祖先言主人，將襲先言賓，尊賓也。

【疏】正義曰：敖氏云：「賓，主人釋弓矢，不於序之西，東者，變於卒射時也。不言說決拾者，可知也。」○注「尊賓也」，《校勘記》云：「尊，閩誤作『是』。」云「尊賓也」

者，以上將祖先言主人祖，是盡敬之事也，此將襲，先言賓襲，是修容之禮也。大夫袒決遂，執弓，就其耦。

降袒決遂於堂西，就其耦於射位，與之拾取矢。【疏】正義曰：敖氏云：「袒決遂，蓋於賓既出堂西而爲之。」揖皆

進，如三耦。【疏】正義曰：敖氏云：「如三耦，則耦不少退也。以其行事於庭，無堂上、堂下之異，故不得如升射之儀也。」耦東面，大夫西面。大夫進，坐，說

矢束。說矢束者，下耦，以將拾取。【疏】正義曰：注云

「說矢束者，下耦，以將拾取」者，盛氏世佐云：「注蓋原大夫說矢束之意，亦欲如三耦之拾取，是以敵者之禮待其耦，故云『下耦』也。」吳氏廷華云：「注『下耦』，下同於耦也。」

束矢，以尊大夫也。①說之，不敢當其尊也，故曰下於耦。」

敖氏曰：「凡大夫之取矢于楅者，必說其矢束以當拾取也。

其自爲耦者並行至楅南即爲之，其與士爲耦者即位而後爲之，此其異者也。說矢束不言北面，亦文省。」盛氏云：「此

大夫之說矢束，言於『西面』之下，則亦西面說也。敖云北面，非。」興，反位，而後耦揖進。【疏】正義曰：「而

後」，《校勘記》作「后」，云「后」，作「後」。○敖氏云：「大夫進及反位皆不揖，以非與耦行禮之事也。」②方氏苞云：

「自大夫以上矢有束，必矢與其人之志慮血氣相應，而不可混也。脫束，以矢當拾取也。其自爲耦，則並行至楅南而

脫之，以拾取而同升就席也。與士爲耦，則脫束而反位，其耦乃進取矢，俟耦反其位，而後大夫釋弓矢以升，故取矢時

即分先後也。大夫先脫束，示欲與耦拾取也。耦進而兼取乘矢，示不敢與之拾也。然後大夫亦兼取焉，則尊不陵而

卑不偪矣。」坐兼取乘矢，順羽而興，反位，揖。兼取乘矢者，尊大夫，不敢與之拾也。相下相尊，君子之所

以相接也。【疏】正義曰：敖氏云：「耦兼取乘矢，不敢拾

①「以」，原作「亦」，今據《儀禮疑義》改。

②「與」，原作「及」，今據《儀禮集說》改。

取者，以其非敵也。凡敵者共取矢于楅，則拾以爲儀。言「順羽」，是亦兼諸附矣。此與三耦異者，惟不拾取矢耳，餘則同。大夫進坐，亦兼取乘矢，如其耦。北面搯三挾一个。亦於三耦爲之位。揖退，耦反位，大夫遂適序西，釋弓矢，襲，升即席。大夫不序於下，尊也。【疏】正義曰：韋氏協夢云：「耦反位，反司馬西南之位也。大夫不與耦同反位，故遂釋弓矢于序西，而升即席，優尊者也。」增案：言耦反位，大夫不反位可知；言大夫適序西，耦不適序西可知。反位者，反射位也，必取道于司馬之南。上經大夫與其耦射，其可證者。此大夫獨適序西，則揖退之後，耦自南行，轉西以反位。大夫則自轉而西行，北折至堂西。衆賓繼拾取矢，皆如三耦，以反位。

右三耦賓主人大夫衆賓皆拾取矢

司射猶挾一个以進，^①作上射如初，一耦揖升如初。進，前也。歸言「還當上耦，西面」，是言「進」，終始互相明也。今文或言「作升射」。【疏】正義曰：

敖氏云：「進，由司馬之東而進也。此以適南爲進者，凡進退之文無常，大抵以有事於彼爲進，卒事而反爲退也。」

注云「歸言「還當上耦，西面」，是言「進」，終始互相明也」

者，賈疏云：「上番將射時，云「司射還，當上耦西面，作上耦射」，不言「進」，明還當上耦時者，進近上耦乃作之。此直進作射，不言「還當上耦」，明進時亦還當上耦而作之，故言「終始互相明也」。云「今文或言「作升射」者，敖氏曰：

「經文「上」字似衍，否則其下當有「耦」字。今文或言作升射」，蓋後人亦疑其誤而易之矣。」胡氏承珙曰：「敖謂「上」字衍，是也。疏云「此直進作射」，似經文但言作射如初，^②

本無「上」字。鄭不從今文「作升射」者，《大射儀》：「司射猶挾一个以作射，如初。」亦不言作升射也。」司馬升，命去侯，獲者許諾。司馬降，釋弓，反位。司

射與司馬交于階前，去扑，襲，升，請以樂樂于賓，賓許諾。【疏】正義曰：敖氏云：「司射惟去扑

耳，其決遂、執弓、挾矢自若也，似不宜襲。此言「襲」，蓋衍

① 「射」，原作「正」，今據《儀禮注疏》改。

② 「言」，原作「云」，今據《儀禮古今文疏義》改。

文。以樂樂者，用樂爲歡樂也。以此請之於賓，故曰「請以樂樂于賓」。《大射儀》曰：「請以樂。」盛氏世佐云：「此『襲』字非衍也。蓋射，武事也，故請射則袒；樂，文事也，故請樂則襲。言襲，則其說決拾可知矣。不釋弓矢者，射未畢也。」方氏苞云：「初射，再射，欲其容體比於禮也。至三射，又欲其節比於樂。初射，再射，欲其不失正鵠也。至三射，又欲其循聲而發。射之初，弓矢未調。三射而後樂作，俾循序而益致其精也。射之終，筋力既乏，三射而樂始作，俾嚴終而彌斂其氣也。孔子曰：「射者何以射？何以聽？」其事至難，故聖人陶冶羣材而磨礪其德性者，如是其曲盡焉。其辭曰「請以樂賓」，不敢質言之也。賓喻其意，故不辭而遂諾。」案：《義疏》云：「凡司射升堂，惟去扑而已，其袒決遂如故，未聞變袒而爲襲也。注疑『襲』爲衍文，^①是也。」司射降，搯扑，東面命樂正曰：「請以樂樂于賓，賓許。」東面，於西階之前也。不就樂正命之者，傳尊者之命於賤者，遙號命之可也。樂正亦許諾，猶北面不還，以賓在堂。【疏】正義曰：敖氏云：「必搯扑而後命樂正者，辟併敬也。」《義疏》云：「《大射》：司射東面命樂正，樂正應曰『諾』。此經亦『諾』可知。注謂樂正猶北面不還，^②蓋上遷樂時樂正立於工南，北面，至是聞命

許諾，位猶未變，與《大射》同也。」○注「號命之可也」，《校勘記》云：「『命』，徐、陳、《通解》、楊氏俱作『令』。」云「樂正亦許諾」者，據《大射儀》有「樂正曰『諾』」也。云「猶北面不還，以賓在堂」者，賈疏云：「樂正位東階東南，北面。大師位東北，西面；賓在堂，南面。樂正猶北面，不還西面，是以下文特云『東面命大師』，明此時不西面受命矣。」吳氏廷華云：「經不言樂正受命面位，下東面命大師，是正面相向，以示所命之重也，則受命亦當西面向司射，與《大射》同可知，但文不具耳。」司射遂適階間，堂下北面命曰：「不鼓不釋！」不與鼓節相應，不釋算也。鄉射之鼓五節，歌五終，所以將八矢，^③一節之間當拾發，四節四拾，其一節先以聽也。【疏】正義曰：注云「鄉射之鼓五節，歌五終，所以將八矢」^④者，《周禮·射人》云：王以《騶虞》九節，諸侯以《貍首》七節，卿、大夫以《采蘋》五節，士以《采芣》五節。鄉射爲大夫、士禮，故鼓五節，歌五

- ① 「注」，《儀禮義疏》作「鄭康成」，當據段校改作「敖」。
- ② 「不」，原作「未」，今據《儀禮義疏》改。
- ③ 「八」，原作「入」，今據《續清經解》本改。
- ④ 「八」，原作「入」，今據《儀禮注疏》改。

終者，下《記》云「歌《騶虞》，若《采蘋》，皆五終」是也。云「二節之間當拾發，四節四拾，其一節先以聽也」者，賈疏云：「尊卑樂節雖多少不同，四節以盡乘矢則同。其餘外皆以聽，以知樂終始長短也。王九節者，五節先以聽；諸侯七節者，三節先以聽；卿、大夫、士五節者，一節先以聽。皆四節拾將乘矢，但尊者先以聽則多，卑者先以聽則少，優至尊，先知審故也。」敖氏云：「鄉射之歌五終而鼓五節，其三節先以聽，而二節之間拾發乘矢焉。《射人職》所謂「五節二正」是也。王之大射九節五正，諸侯七節三正，卿大夫與士同。」盛氏世佐云：「此當以疏說爲正。敖氏好立異，而引《周禮·射人職》爲證。以愚考之，則不然。蓋自敖說推之，則王之九節五正，五節之間，拾發乘矢，而其先以聽者四節也。諸侯之七節三正，三節之間，拾發乘矢，而其先以聽者亦四節也。夫天子以下，降殺以兩，禮之大凡也。今其先以聽者，天子、諸侯同爲四節，而大夫、士僅減其一焉，固已不倫矣。且其拾發乘矢一也，而乃有五正、三正、二正之不同，是節之多者似促數，而節之少者反舒長，此亦理之不可通者。蓋《射人》所云九節、七節、五節者，以其樂節言也；所云五正、三正、二正者，以其候采言也。鄭注蓋不可易矣。」上射揖。司射退，反位。樂正東

面，命大師曰：「奏《騶虞》，間若一。」東面者，進還鄉大師也。《騶虞》，《國風·召南》之詩篇也。《射義》曰：「《騶虞》者，樂官備也。」其詩有「壹發五豝」、「五豝」、「于嗟騶虞」之言，樂得賢者衆多，嘆思至仁之人以充其官。此天子之射節也，而用之者，方有樂賢之志，取其宜也。其他賓客、鄉大夫則歌《采蘋》。間若一者，重節。【疏】正義曰：《校勘記》云：「樂正東面命大師曰『命』字，誤在『東』上。」○敖氏曰：「言『命大師』者，見所命者必其長也。此惟據有大師者言之。」注云「《射義》曰：『《騶虞》者，樂官備也。』其詩有『壹發五豝』、『五豝』、『于嗟騶虞』之言，樂得賢者衆多，嘆思至仁之人以充其官」者，朱子曰：「據《詩》，但取『壹發五豝』之義耳。騶虞則爲仁獸之名，以庶類蕃殖，美國君之仁如之也。『樂官備』云者，諸儒有以騶爲文王之囿，虞爲主囿之官，故立此義，而鄭注因之與？其《詩箋》自相違異。」胡氏肇昕云：「《周禮·鍾師》疏引《異義》，今《詩》韓、魯說，騶虞，天子掌鳥獸官。《文選·魏都賦》注引《魯詩傳》云：『古有梁騶。梁騶者，天子之田也。』賈誼《新書·禮》篇云：『騶者，天子之囿也。虞者，囿之司獸者也。』凡此諸說皆與《毛詩》異，而與《射義》合。《鄭志》：「張逸問：傳曰：白虎黑文。又《禮記》曰：樂官

備。何謂？答曰：白虎黑文，《周書·王會》云備者，取其壹發五狔，言多賢也。考《異義》，許慎從毛說，而鄭無駁，亦以毛爲是。注《禮》則用韓、魯說者，以與樂賢之意相近也。褚氏寅亮云：「《詩》孔疏謂《射義》注引《詩》斷章，斯言最的，可釋朱子箋，注相異之疑。然注云「思得仁如騶虞之人以充其官」，則未始以騶虞爲官，與《箋》義亦無大異。至賈誼《新書》云：「騶者，文王之囿；虞者，囿之司獸。」又云：「騶，廐官；虞，山澤之官。二者皆不失人，官備可知。」則以官備釋《騶虞》，與小序異。鄭固未嘗取其說以注《禮》也。」云「此天子之射節也，而用之者，方有樂賢之志，取其宜也」者，案：鄉射得奏《騶虞》，說者不一。郝氏敬云：《國風》、《小雅》，上下或可通用也。高氏愈云：意其音節有可相假用者也。蔡氏德晉云：《周官·射人》：王射以《騶虞》九節，大夫以《采蘋》，士以《采芣》，皆五節。今雖奏《騶虞》而仍如《采蘋》、《采芣》之五節，則其等未嘗亂，^①且《周南》、《召南》爲鄉樂，用之鄉人，用之邦國。天子歌《騶虞》亦不必天子獨用，不可以僭禮律之也。」盛氏世佐云：「禮射有三：大射、賓射、燕射是也。士無大射，大夫以下無燕射，有鄉射。《射義》及《射人職》所言以樂節射之差，皆賓射也，故與此異。鄉射得歌《騶虞》者，二南爲鄉

樂。《騶虞》篇次在《召南》內，故得用之。且大夫、士去天子遠，無嫌於僭也。若諸侯之大射，與賓射同。《大射儀》云「奏《貍首》」是也。以是推之，則天子及大夫之大射，亦與其賓射同樂可知矣。又《投壺》云：「命弦者曰：請奏《貍首》。」投壺，大夫、士燕射之類也。^②乃奏《貍首》者，燕禮殺，故變而與諸侯之賓射同，所謂「禮窮則同」也。然但以瑟奏之，而不用金石之樂，亦其異也。^③鄉射與投壺雖奏《騶虞》、《貍首》，而其節則止於五。下《記》云「歌《騶虞》，若《采蘋》，皆五終」是也。」胡氏肇昕云：「《騶虞》爲鄉樂，故鄉樂得用之，且與樂賢之志相宜也。盛氏推論說多未確，不如蔡說爲精矣。」云「其他賓客、鄉大夫則歌《采蘋》」者，賈疏云：「《采蘋》是鄉大夫樂節。其他，謂賓射與燕射，若州長他賓客自奏《采芣》。此篇有鄉大夫、州長，射法則同用《騶虞》，以其同有樂賢之志也。」云「間若一者，重節」者，賈疏云：「間若一，謂五節之間長短希數皆如一，則是重樂節也。」大師不興，許諾。樂正退，反位。

① 「亂」，原作「辯」，今據《禮經本義》改。

② 「類」下，原衍「是」字，今據《儀禮集編》刪。

③ 「其」，原脫，今據《儀禮集編》補。

【疏】正義曰：盛氏云：「反位，反工南北面位也。」

右司射請以樂節射

乃奏《騶虞》以射。三耦卒射，賓、主人、大夫、衆賓繼射，釋獲如初。卒射，降。

皆應鼓與歌之節，乃釋算。降者，衆賓。【疏】正義曰：注云「降者衆賓」者，賓、主人、大夫卒射皆升堂，惟衆賓降也。敖氏曰：「降指衆耦之最後者而言，以見釋獲者升告之節也。」吳氏廷華云：「次番射，賓、主、大夫亦降，脫決拾乃升，則降者不獨衆賓也。」釋獲者執餘獲，升告「左右卒射」，如初。卒，已也。今文曰「告于賓」。【疏】正義曰：注云「今文曰『告于賓』」者，胡氏承珙《古今文疏義》曰：「案：上文已云『卒射，釋獲者遂以所執餘獲，升自西階，盡階不升堂，告于賓曰：『左右卒射』矣。此云『升告左右卒射，如初』，亦是告于賓，不言可知。猶《大射儀》於再射時，既云『卒射，釋獲者遂以所執餘獲適阼階下，北面告于公曰：『左右卒射』，其後三射既畢，亦但云『釋獲者執餘獲進，告左右卒射，如初』，不復言『告于公』矣。」胡氏肇昕云：「『升告左右卒射』六字爲句，謂以左右卒射，升告之

也。若作「告于賓」，當有「曰」字。如上文「告于賓曰：左右卒射」，其義方顯。若僅作「告于賓」，似左右卒射爲告賓後事矣。故鄭不從今文。」

右三耦賓主人大夫衆賓以樂射

司馬升，命取矢，獲者許諾。司馬降，釋弓，反位。弟子委矢，司馬乘之，皆如初。

右樂射取矢數矢

司射釋弓視算如初。算，獲算也。今文曰「視數」也。【疏】正義曰：注云「今文曰『視數』」者，胡氏承珙曰：「《說文》云：『算，長六尺，計歷數者。从竹从弄。言常弄乃不誤也。』「算，數也。从竹具聲，讀若算。」是二字音同而義別。《禮經》執算、受算之類，當作「算」；無算爵、無算樂之類，當作「算」。然經典每多錯出，算是計數之物，雖亦可通爲數義，究不得即以「數」字代「算」字。鄭此注云「算，獲算也」。今文「視算」作「視數」，則是以訓詁字代經文者，故不用與？」釋獲者以賢獲與鈞告如初。

降復位。【疏】正義曰：敖氏云：「言『如初』，又言『降復位』，爲司射命設豐之節也。亦以見其所如者，止於此，無復實算於中之事矣。蓋以其不復射故也。」

右樂射視算告獲

司射命設豐，設豐、實觶如初。遂命勝者執張弓，不勝者執弛弓，升飲如初。【疏】正

義曰：《校勘記》云：「《通解》『設豐』二字不重出。案：《大射》設豐不重，《通解》因彼而誤。敖氏注《大射》云：『當更有設豐二字，如《鄉射》之文。』」胡氏肇昕云：「『升飲如初』下，敖氏云：『《大射儀》云：卒，退豐與觶，如初。此脫一句也。』」

右樂射飲不勝者

司射猶袒決遂，左執弓，右執一个，兼諸弦，面鏃；適堂西，以命拾取矢，如初。側持弦矢曰執。面，猶尚也。并矢於弦，尚其鏃，將止，變於射也。【疏】正義曰：賈疏云：「言猶袒者，亦是有故之辭，

以其常袒，恐不袒，故言『猶』以連之也。」盛氏世佐云：「司射之請以樂樂於賓也，經既云『襲』矣，至是言『猶袒』者，蓋自其命勝者不勝者之時而袒也。其間命樂正及視算皆襲。」胡氏肇昕云：「以樂樂賓節，敖氏以『襲』爲衍文。韋氏協夢據此節『猶袒決遂』，明司射前此皆袒。以敖說爲是。然考初番射訖數獲，司射適西階西，釋弓矢，去扑，襲，則三番射訖視算亦必襲矣。經不言者，互文相見也。視算既襲，命勝者、不勝者又袒，而此因之云『猶袒決遂』也。盛氏說推究頗精當，從之。」注云「側持弦矢曰執」者，對方

持弦矢曰挾而言。張氏爾岐云：「方持弦矢曰挾者，矢橫弦上而持之；側持弦矢曰執者，矢順并於弦而持之。」云「面，猶尚也」者，「尚」與「向」通。「尚其鏃」者，張氏曰：「鏃向上也。」司射反位。三耦及賓、主人、大夫、衆賓皆袒決遂，拾取矢，如初；矢不挾，兼諸弦弣以退，不反位，遂授有司于堂西。不挾，亦皆執之如司射也。不以反射位授有司者，射禮畢。【疏】正義曰：注云「不挾，亦皆執之如司射也」者，謂亦側持弦矢也。賈疏云：「兼諸弦弣，則與司射異。司射直執一个，無三矢兼於弣。三耦以下，則執一个並於弦，又以三

矢并於附。」敖氏曰：「拾取時猶皆兼諸附，至幅南北面，則不挾矢，但取一矢兼諸弦，餘三矢則兼諸附自若，亦象摺三挾一之儀，且如司射之戒也。賓與主人，則亦于幅東西之位爲之。」云「不以反射位授有司者，射禮畢」者，敖氏云：

「不反位，但由司馬之南而過也。授有司，授之以弓矢也。

必授之者，射事止，則宜反於所受者也。此文主于三耦及衆賓也，大夫與其耦亦存焉。若賓，則自階下以授有司于堂西，主人則以授有司于堂東也。」辯拾取矢，揖，皆升就席。謂賓、大夫及衆賓也。相俟堂西，進立於西階

之前。主人以賓揖升，大夫及衆賓從升，立時少退於大夫。

三耦及弟子自若留下。【疏】正義曰：注云「衆賓」，謂堂上

三賓也。云「相俟堂西，進立於西階之前」者，以上授有司弓矢于堂西，故知相俟於此也。云「主人以賓揖升，大夫及

衆賓從升，立時少退於大夫。三耦及弟子自若留下」者，賈

疏云：「皆依上文獻後升及留在下之法。」敖氏曰：「揖，皆

升就席，謂衆賓三人也。衆賓三人必俟拾取矢者，辯而後

升。若主人、賓、大夫，則既授弓矢即升，如初禮，固不俟其

辯也。」胡氏肇昕云：「經文云『皆』，自謂賓、主人、大夫及

衆賓也。正承上文賓、主人、大夫、衆賓而言，不得專屬衆

賓也。敖氏故與鄭立異，非。郝氏敬亦曰：賓、主、大夫以

下席在堂上者，皆復升。」盛氏世佐云：「賓、主人、大夫必俟辯拾取矢而後升者，以射事至是而終，故變於初也。」

右拾取矢授有司

司射乃適堂西，釋弓，去扑，說決、拾，

襲，反位。【疏】正義曰：司射之扑在階西，今來去扑于

堂西之等，以其不復射也。敖氏曰：「反位，其猶在中西南

與？不言釋矢可知也。」司馬命弟子，說侯之左下

綱而釋之，說，解也。釋之，不復射，掩束之。【疏】正義

曰：注「掩束之」，《校勘記》云：「『掩』，諸本俱作『奄』。」

云「說，解也。釋之，不復射，掩束之」者，敖氏曰：「釋，則

是不束也。說而釋之，變於射與未射之時。」郝氏敬曰：

「凡侯未射，左下綱不繫，掩束之；射畢，又脫繫，復掩之。」

盛氏世佐云：「說侯之左下綱，異於射時也。釋之，謂不掩

束，異於未射時也。其不全去之者，見此禮主爲射也。疏

云「備復射，非也。」命獲者以旌退，命弟子退幅。

司射命釋獲者退中與算，而俟。諸所退皆俟堂

西備復射也。旌言以者，旌恒執也。獲者、釋獲者亦退其

薦俎。【疏】正義曰：注云「備復射」者，張氏爾岐云：「謂旅酬後容欲燕射也。」云「獲者、釋獲者亦退其薦俎」者，敖氏曰：「此據《大射儀》而言也。退薦俎，各當其位之前與？」

右退諸射器射事竟

司馬反爲司正，退復觶南而立。當監旅

酬。【疏】正義曰：張氏爾岐云：「此下言射訖飲酒之事，旅酬，二人舉觶，徹俎，坐燕，送賓，以至明日拜賜，息司正諸儀，並同《鄉飲酒禮》。」○敖氏曰：「射事已而復其故職也。云「復觶南」，見射時觶不徹，^①是時司射亦當復東方之位。」郝氏敬云：「初司正揚觶，退立于中庭觶南，未旅而射，改爲司馬。今射畢旅行復爲司正，仍立觶南以監旅也。」張氏爾岐云：「觶南者，司正北面監衆之位。」樂正命弟子贊工即位。弟子相工如其降也，升自西階，反坐。贊工遷樂也。降時如初人。樂正反自西階東，北面。【疏】正義曰：《儀禮釋官》曰：「案：樂正，公臣，見《燕禮》、《大射儀》。《周禮·樂師職》曰「令相」，與此經合。」敖氏曰：「命弟子，亦適西方命之也。」郝氏敬云：「樂正初自西階，命弟子贊工遷東階下，辟射。今射

畢，復命弟子贊工升西階東，北面坐，如初。^②不言樂正者，^③正樂告備則降，立堂下。今工反，而樂正仍立階下懸間可知也。」注云「降時如初人」者，敖氏云：「謂後先及相之之儀也。」郝氏曰：「如其降，謂如降往東階時左荷右相也。」云「樂正反自西階東北面」者，張氏爾岐云：「西階東北面，樂正告樂備後降立之位。遷樂於下，則立阼階東南，北面。今當命弟子，又復來此也。遷工反位，爲旅酬後將有無算樂也。」敖氏曰：「反坐，謂反其故位而坐也。工既坐，弟子亦降立于西方。」高氏愈云：「反坐，復其舊時之坐也。前因將射，工降坐于阼階下之堂前矣，此則因行旅酬，而工復升，各復其舊時之坐以待舉樂也。」賓北面坐，取俎西之觶，興，阼階上北面酬主人。主人降席，立于賓東。賓坐奠觶，拜，執觶興，主人荅拜。賓不祭，卒觶，不拜，不洗，實之，進東南面。所不者，酬而禮殺也。賓立飲。

① 「時」，原作「者」，今據《儀禮集說》改。

② 「如」，原脫，今據《儀禮節解》補。

③ 「不言樂」，原重，今據《儀禮節解》刪。

【疏】正義曰：俎西之觶，張氏爾岐云：「將射前，一人舉觶於賓，賓奠于薦西者也。」主人阼階上北面拜，賓少退。少退，少逡遁也。主人進受觶，賓主人之西，北面拜送。旅酬而同階，禮殺也。【疏】正義曰：

據獻酬之時，賓、主各於其階也。賓揖，就席。主人

以觶適西階上酬大夫。大夫降席，立于主人之西，如賓酬主人之禮。其既實觶，進西南面，

立晷所酬。【疏】正義曰：注「晷所酬」，《校勘記》云：

「晷」，徐、陳、《通解》、楊氏俱作「鄉」。云「其既實觶，

進西南面，立晷所酬」者，賈疏云：「以上賓酬主人，阼階上

實觶，進東南面，則知此主人酬大夫，西階上實觶而亦進西

南面也。」主人揖，就席。若無大夫，則長受酬

亦如之。長，謂以長幼之次酬衆賓。【疏】正義曰：注云

「長，謂以長幼之次酬衆賓」者，謂堂上三賓以長幼之次而酬也。敖氏云：「此惟據注人所酬者而言。大夫若衆，則

相酬辯乃及長。」盛氏世佐云：「大夫若衆，則大夫長受主

人酬訖，即實觶酬衆賓長。衆賓長酬次大夫，交錯以辯也。

敖說非。」蔡氏德晉云：「此主人酬大夫及衆賓之長也，與

《鄉飲酒》酬介之禮同。」司正升自西階，相旅，作受酬者曰：「某酬某子」。某者，字也；某子者，氏也。稱酬者之字，受酬者曰某子。旅酬下爲上，尊之也。

《春秋傳》曰：字不若子。此言某酬某子者，射禮略於飲酒。飲酒言某子受酬，以飲酒爲主。【疏】正義曰：敖氏

云：「此謂大夫酬長若長相酬之時也。」盛氏世佐曰：「此

謂無大夫而衆賓長相酬之時也。賓、主人及大夫旅酬皆不相，至衆賓乃相之。若主人酬長，相之之辭當曰「主人酬某

子」，猶主人與賓爲耦而告賓曰「主人御于子也」。若大夫

酬長，辭當曰「某子酬某」，猶大夫爲射，而以耦告之曰

「某御于子也」。受酬者自大大夫右，大夫如介禮也。」○注

「此言某酬某子者」，《校勘記》云：「此」，葛本誤作「化」。

云「稱酬者之字，受酬者曰某子，旅酬下爲上，尊之也」

者，敖氏云：「司正稱酬者之字，稱受酬者曰某子，彼此之

辭也。此主爲酬者命受酬者，緣酬者意欲尊敬之，故於此

言字，於彼言子，所以不同。」引《春秋傳》曰者，莊公十年

《公羊傳》文，以證子之尊於字也。云「此言某酬某子者，射

①「爲」下，原衍「下」字，今據《儀禮集編》刪。

禮略於飲酒。飲酒言某子受酬，以飲酒爲主者，明射禮之異於飲酒也。吳氏廷華云：「此特主人及大夫獻賓長之禮，即尊之亦非下爲上之可言。敖氏謂稱字稱子，彼此之辭，是也。要之，司正作受酬者，則某子是相對者之稱，故辭有彼此；且酬者與受酬者較，則又以酬者爲主，^①故稱其字也。」方氏苞云：「有司教射，自當序賓以齒，而射者私家之行輩，又各有少而尊、長而卑者。設以父族、母族之尊行次酬卑者，而司正代爲尊之之稱，義無所取。況以次相酬，受酬者必少，而轉爲尊稱，亦未見其安。夫子孫祭告，以字呼祖考，則不得爲卑稱明矣。蓋因衆賓姓同者甚多，設曰某子酬某子，則不辨其誰何。惟酬者稱字，則所酬者雖以姓舉而不慮其相混矣。但其中有同姓遞酬者，則宜並稱字。而《記》無文，蓋既明於異姓相酬之稱，則同姓之不得更稱姓者並以字舉可知矣。」韋氏協夢云：「某子受酬」，據受酬者而言也；此云「某酬某子」，據酬者而言也。其意蓋曰：「某酬某子，某子受酬。」經特互文見義耳。注非。」胡氏肇昕云：「旅酬之禮以次相酬，則此酬者即先受酬之人，故司正但作受酬者，而受酬者之爲某子，不稱其字，而但稱其氏，緣酬者之意以尊之也。要之，酬者之爲某，受酬者之爲某子，其叙本自秩然，不至相混，而司正必

作之者，禮貴防其未然也。」受酬者降席。司正退立于西序端，^②東面。退立，俟後酬者也。始升相，立階西北面。【疏】正義曰：注云「退立，俟後酬者也」者，以酬時司正不與其事，故必退立，至後酬者，又始升相也。衆受酬者拜、興、飲，皆如賓酬主人之禮。辯，遂酬在下者；皆升，受酬于西階上。在下，謂賓黨也。《鄉飲酒·記》曰：「主人之贊者西面北上，不與。無算爵，然後與。」此異於賓。【疏】正義曰：引《鄉飲酒·記》者，賈疏云：欲見主黨不與酬之義。吳氏廷華云：「在下，謂諸執事，即《鄉飲酒·記》謂主人之贊者。賓興禮重，故酬不及贊。此詢衆禮輕，故亦與酬耳。」卒受者以觶降，奠于筐。

右 旅 酬

司正降，復位，使二人舉觶于賓與大

① 「酬」上，原衍「受」字，今據《儀禮疑義》刪。
② 「正」下，原衍「者」字，今據《續清經解》本刪。

夫。二人，主人之贊者。【疏】正義曰：張氏爾岐云：「以起無算爵。」韋氏協夢云：「大夫若衆，亦唯舉觶於其長。若有諸公，則舉觶於諸公，而大夫亦不與矣。」褚氏寅亮云：「舉者二人所舉之觶，賓與大夫奠于薦右，未飲。今仍使二人終此上事，俟其飲畢，受觶，酌酬主人及長。」埤案：「使二人舉觶」，使之者未詳。敖氏謂司正使之，是也。至二人所舉，即前奠於賓與大夫薦西之觶。舉此二觶以發之，後之交錯以辨，皆其所舉可知。舉觶者皆洗觶，升實之；西階上北面，皆坐奠觶，拜，執觶興。賓與大夫皆席末荅拜。舉觶者皆坐祭，遂飲，卒觶，興；坐奠觶，拜，執觶興。賓與大夫皆荅拜。舉觶者逆降，洗，升實觶，皆立于西階上，北面東上。賓與大夫拜。舉觶者皆進，坐奠于薦右。坐奠之，不敢授。【疏】正義曰：注云「坐奠之，不敢授」者，對獻酬時皆親授。此云「坐奠」，以贊者卑，不敢授也。賓與大夫辭，坐受觶以興。辭，辭其坐奠觶。【疏】正義曰：必辭者，賓與大夫不敢以尊自居也。舉觶者退，反位，皆拜

送，乃降。賓與大夫坐，反奠于其所，興。不舉者，盛禮已崇。古文曰「反坐」。【疏】正義曰：《校勘記》云：「大夫」下，石經、徐本、《要義》、楊氏、敖氏俱有「坐」字，《通解》無。」注云「不舉者，盛禮已崇」者，此釋經「反奠」之義。敖氏云：「此奠於其所，亦皆少違其故處，而在其俎之西也。」方氏苞云：「未請安于賓，未命弟子徹俎，而預奠酬觶，何也？進退、拜送、坐興之禮，說屢，升堂後不可復行，故預拜送，坐奠于其所，然後升坐而取飲，可以不興不拜也。」吳氏廷華云：「舉觶者堂上無位，此云「反位」者，其西階上立位與？」①云「古文曰「反坐」者，胡氏承珙《古今文疏義》曰：「此賓與大夫，當舉觶者奠于薦右之時，既坐受觶以興矣，至此乃坐而反奠于其所。反奠者，謂還奠于薦右。上文一人舉觶亦云：「舉觶者西階上拜送，賓反奠于其所。」彼不言坐者，省文。然「反」、「奠」連文，與此正同。古文作「反坐」者，誤倒，鄭所不從。」若無大夫，則唯賓。長一人舉觶，如燕禮媵爵之爲。【疏】正義曰：燕禮初，二大夫媵觶，至旅酬，復使二人，君命長媵一

①「立」，原作「之」字，今據《儀禮疑義》改。

爵於君。此若無大夫，則唯賓一人，其一人舉觶之禮當如燕禮之賡一爵，故引以況之。敖氏云：「言此者，明不舉觶于賓長。此二人舉觶，雖曰正禮，然若無大夫，則缺一人，以其禮唯當行於尊者耳。」方氏苞云：「大夫不與，衆賓長可同於介之受酬，而不可同於爲介舉觶，何也？鄉飲酒之介，乃德行道藝亞於賓以待後舉者，故禮多同於賓，而與大夫等。鄉射之衆賓長，非必德行道藝遠過其曹也。主人繼賓而酬之，乃所以達其意於衆賓。若特爲舉觶，則義無所取，而受者轉不能安矣。」

右司正使二人舉觶

司正升自西階，阼階上受命于主人，適西階上，北面請坐于賓。請坐，欲與賓燕，盡殷勤也。至此盛禮已成，酒清肴乾，強有力者猶倦焉。【疏】正義曰：注「至此盛禮已成」，《校勘記》云：「已」，徐本，《通解》俱作「以」。」云「酒清肴乾，強有力者猶倦焉」者，本《禮記·聘義》之文，引以證請坐于賓之意也。賓辭以俎。俎者，肴之貴者也。辭之者，不敢以燕坐褻貴肴。反命于主人。主人曰：「請徹俎。」賓許。

【疏】正義曰：韋氏協夢云：「上言『請坐于賓』，亦傳主人之辭也。下言『主人曰』，亦傳辭于賓也。此與《鄉飲酒》皆互文。」司正降自西階，階前命弟子俟徹俎。弟子，賓黨也。俎者，主人贊者設之。今賓辭之，使其黨俟徹，順賓意也。上言請坐于賓，此言主人曰，互相備耳。【疏】正義曰：注「順賓意也」，《校勘記》云：「賓」，重脩監本誤作「濱」。」云「上言請坐于賓，此言主人曰，互相備」者，以上言請坐于賓，亦司正傳主人之辭。此言主人曰，亦傳主人之辭于賓也。互相備，文乃相足也。司正升立于序端。賓降席，北面。主人降席自南方，阼階上北面。大夫降席，席東南面。俟弟子升受俎。賓取俎，還授司正。司正以降自西階，賓從之降，遂立于階西，東面。司正以俎出，授從者。授賓家從來者也。古者與人飲食必歸其盛者，所以厚禮之。【疏】正義曰：注云「古者與人飲食必歸其盛者，所以厚禮之」者，以《鄉飲酒》、《燕射》皆有徹俎之禮。俎爲肴之貴者，徹以歸之，故云「歸其盛者」。主人取俎，還授弟子。弟子受俎，降自西階以

東。主人降自阼階，西面立。以東，授主人侍者。

【疏】正義曰：敖氏云：「主人取俎，未必在司正出門之後。

上文蓋終言之耳。」注云「以東，授主人侍者」者，盛氏世

佐云：「鄭爲此說者，所以成其爲賓黨弟子耳。姜云：弟

子當是主黨，則其以俎而東也，無授主人侍者之事矣。」大

夫取俎，還授弟子。弟子以降自西階，遂出

授從者。大夫從之降，立于賓南。凡言還者，

明取俎各自鄉其席。【疏】正義曰：韋氏協夢云：「此三節

皆同時爲之，蓋賓取俎之時，主人與大夫即皆取俎授弟子。

經特各終言其事耳，非有先後也。」衆賓皆降，立于大

夫之南，少退，北上。從降，亦爲將燕。

右請坐燕因徹俎

主人以賓揖讓，說屨，乃升。大夫及衆

賓皆說屨，升，坐。說屨者，將坐，空屨褻賤，不宜在

堂也。說屨則摳衣，爲其被地。【疏】正義曰：韋氏協夢

云：「賓、主人說屨之時，大夫及衆賓亦皆說屨，畢，主人乃

揖賓，升。賓厭大夫，大夫厭衆賓。衆賓亦序升也。」注

云「說屨則摳衣，爲其被地」者，賈疏云：「《曲禮》云：『摳衣趨隅。』彼謂升席時，^①引之證說屨低身亦然。^②若不摳衣，恐衣被地履之。」案：《少儀》云：「排闥說屨於戶內，一人而已矣。」注云：「雖衆敵，猶有所尊也。」彼尊卑在室，則尊者說屨在戶內，其餘說屨於戶外。若尊卑在堂，則亦尊者一人說屨在堂，其餘說屨於堂下。是以燕禮、大射臣皆說屨於階下。公不見說屨之文，明公爲在堂矣。此及鄉飲酒，臣禮，賓、主人行敵禮，故皆說屨於堂下也。」乃羞。

羞進也。所進者，狗醢醢也。燕設啗具，所以案酒。無

算爵。使二人舉觶。賓與大夫不興，取奠

觶飲，卒觶，不拜。二人，謂舉者二人也。使之升，立

于西階上。賓與大夫將旅，當執觶也。卒觶者固不拜矣，

著之者，嫌坐卒爵者拜既爵。此坐於席，禮既殺，不復崇。

【疏】正義曰：注云「使之升，立于西階上，賓與大夫將旅，當執觶也」者，敖氏云：「使之亦司正也。此舉觶，謂取而

①「時」，原作「者」，今據《儀禮注疏》改。

②「亦然」，原脫，今據《儀禮注疏》補。

③「恐衣」，原脫，今據《儀禮注疏》補。

酌之，即下文所云「執觶者受觶，遂實之」之事也。」方氏苞云：「二人舉觶，即舉賓、大夫前奠于其所之二觶也。」^①賓、大夫不興而取奠觶飲，則命舉觶者取之明矣。敖說失之。」胡氏肇昕云：「賓、主人、大夫、衆賓說屢升飲，則興拜之儀多省，故必使二人舉觶。凡堂上舉觶執觶之事，皆其所掌。鄭注故渾括言之。」云「卒觶者固不拜矣，著之者，嫌坐卒爵者拜既爵」，據上正旅酬時，賓酬主人，卒觶不拜，故云「卒觶者固不拜矣」。又獻酬時，皆坐卒爵，拜既爵，此則卒觶不拜，故云「著之者，嫌坐卒爵者拜既爵」。云「此坐于席，禮既殺，不復崇」者，據正獻酬時言之也。凌氏《釋例》云：「凡無算爵不拜，唯受爵于君者拜。案：《鄉飲酒》、《鄉射》旅酬以前，《燕禮》、《大射》爲大夫舉旅行酬以前，皆是立行禮。禮盛，故拜至無算爵時，^②則坐行禮。禮殺，故不拜。考《鄉射禮》：『無算爵。使二人舉觶。賓與大夫不興，取奠觶飲，卒觶，不拜。執觶者受觶，遂實之。賓觶以之主人，大夫之觶長受而錯，皆不拜。辯，卒受者興，以旅在下者于西階上。長受酬，酬者不拜，乃飲，卒觶，以實之。受酬者不拜受，^③辯旅，皆不拜。執觶者皆與旅。卒受者以虛觶降，奠于筐。執觶者洗，升實觶，反奠于賓與大夫。無算樂。』是無算爵皆不拜也。以《鄉射》推之，則《鄉飲酒》

無算爵，是賓與介取奠觶，餘當與鄉射儀同。經不云者，文不具也。《燕禮》、《大射》無算爵，卒受爵者興，以酬士于西階上，士升，大夫不拜，乃飲，實爵，士不拜受爵，大夫就席，士旅酌亦如之。又云：「士終旅于上如初，無算樂。」是《燕禮》、《大射》無算爵亦不拜也。《特牲饋食禮》：「賓弟子及兄弟弟子，各舉觶于其長，長皆奠觶於其所，皆揖其弟子。弟子皆復其位，爵皆無算。注：『賓取觶酬兄弟之黨，長兄弟取觶酬賓之黨，唯己所欲，亦交錯以辯，無次第之數。』《有司徹》：「賓尸之禮，賓及兄弟交錯其酬，皆遂及私人，爵無算。不賓尸之禮，賓兄弟交錯其酬，無算爵。經雖不云不拜，準以飲酒正禮，則皆不拜可知也。唯受爵于君者始拜。《燕禮》、《大射》無算爵，士也。有執膳爵者，有執散爵者。執膳爵者酌以進公，公不拜受，是酌膳進公，公不拜也。又云：『執散爵者，酌以之公命所賜。所賜者興，受爵，降席下，奠爵，再拜稽首，公荅拜。受賜爵者以爵就席

① 「二」，原脫，今據《儀禮析疑》補。

② 「時」，原脫，今據《禮經釋例》補。

③ 「酬」，原作「觶」，今據《禮經釋例》改。

坐，公卒爵，^①然後飲。執膳爵者受公爵，酌，反奠之。受賜爵者興，授執散爵者，執散爵者乃酌行之。唯受爵于公者拜。然亦降席拜，而不降階拜，則已殺於旅酬之禮矣。《鄉射》：無算爵，受酬者不拜受。注：「禮殺，雖受尊者之酬，猶不拜。」而《燕禮》、《大射》受君之酬則拜者，君尊異於常人也。又《燕禮》、《大射》公有命徹幕，則賓及諸公、卿、大夫皆降，西階下北面，東上，再拜稽首。公命小臣辭，公荅再拜。大夫皆辟，遂升，反坐。此則命徹幕之拜，而非無算爵之拜也，此拜亦降階拜。公雖命小臣辭，而不升成拜，示禮有終也。執觶者受觶，遂實之。賓觶以之主人，大夫之觶長受，長，衆賓長。而錯，皆不拜。錯者，實主人之觶，以之次賓也。實賓長之觶，以之次大夫，其或多者，迭飲於坐而已，皆不拜受，禮又殺也。【疏】正義曰：張氏爾岐云：「大夫與衆賓等，則得交相酬。或大夫多於賓，或賓多於大夫，則多者無所酬，自與其黨迭飲也。」敖氏云：「錯，謂以次更迭而受也。大夫若惟一人，則衆賓長先受其觶，以次錯行之。大夫若有二人以上，則皆及於大夫，乃及衆賓，蓋先尊而後卑也。云「大夫之觶長受，而錯」，則賓觶但至主人而止與？所以然者，以二觶並

行難爲旅也。若無大夫，乃行主人之觶，爲其無二觶故爾。墳案：注曰「實」曰「以」，則皆執觶者爲之矣。大夫之觶長受，雖不言「以」，亦二人以之可知。至旅在下者於西階上，卒受者既奠爵于篚，始云執觶者洗酌，反奠于賓與大夫，則堂上相酬皆自酌也。胡氏肇昕云：「經文「賓觶以之主人，大夫之觶長受」二句相對而錯，總承賓觶大夫之觶言之。敖氏乃讀「長受而錯」爲句，而爲賓觶但至主人而止之言，以與注爲異。不知錯之爲義言其交錯也。以二觶交錯相酬，始易盡旅酬之法，乃云「二觶並行難爲旅也」，何哉？若無大夫，止有一人舉觶，則以次迭相酬耳。」辯，卒受者興，以旅在下者于西階上。衆賓之末，飲而酬主人之贊者，大夫之末，飲而酬賓黨，亦錯焉。不使執觶者酌，以其將旅酬，不以己尊孤人也。其末若皆衆賓，則先酬主人之贊者，若皆大夫，則先酬賓黨而已。執觶者酌在上辯，降復位。【疏】正義曰：注「衆賓之末」，《校勘記》云：「之」，誤作「至」。「末」，徐、葛俱作「末」，似誤。下兩「末」字，徐亦俱作「末」，葛本「其末」仍作「末」。^②「不以己

① 「卒」，原作「坐」，今據《禮經釋例》改。

② 「末」，《十三經註疏校勘記》作「末」。

尊於人也」於，徐、葛、陳、閩、《通解》、楊氏俱作「孤」，與單疏合，是也。」云「不使執觶者酌，以其將旅酬，不以己尊孤人也」者，盛氏世佐云：「堂上皆坐飲，故使執觶者酌；在下者于西階上立飲。若使坐者自若，而飲者特升，是以己之尊孤人也。所以卒受者，必升自酌，以旅在下者。此當與大夫之耦不勝則特升飲參看。」^①彼是罰爵，故云「尊者可以孤無能」；此方旅酬，義取弟長而無遺，故云「不以己尊孤人也」。凌氏《釋例》云：「凡無算爵，堂上、堂下執事者皆與。案：《鄉射禮》無算爵，卒受者興，以旅在下者于西階上。又云：『執觶者皆與旅。』此注主人之贊者，即《鄉飲酒·記》所謂『主人之贊者，西面北上不與，無算爵，然後與』，是也。注云『贊，佐也，謂主人之屬，佐助主人禮事，徹鼐、沃盥，設薦俎者。』蓋據《鄉飲酒義》『終於沃洗者』言之也。以此推之，則《燕禮》、《大射》執膳爵者、執散爵者，亦皆與於無算爵也。《特性饋食·記》：『^②宗人獻與旅，齒於衆賓，佐食，於旅齒於兄弟。』《有司徹》：『遂及私人，爵無算。』是祭畢飲酒，堂上堂下執事者，皆得與於無算爵，與飲酒之正禮同也。《中庸》云：『旅酬下爲上，所以逮賤也。』鄭注：『謂逮賤者，宗廟之中，以有事爲榮，亦謂宗廟之中，堂上堂下，雖執事之賤者，亦得以與於無算爵爲

榮也。』長受酬，酬者不拜，乃飲，卒觶，以實之。言酬者不拜者，嫌酬堂下異位當拜也。古文曰「受酬者不拜」。^③【疏】正義曰：盛氏世佐云：「長，謂堂下衆賓之長也。酬者，即三賓之卒受者。」胡氏肇昕云：「長當兼主人贊者之長言。」○注「古文曰酬者不拜」，《校勘記》云：「曰」下，徐本、《通解》俱有「受」字。」云「嫌酬堂下異位當拜也」者，以堂上酬者不拜，上已明之。此酬堂下異位，嫌其當拜，故復著之。故云嫌親酬當拜也，非。云「古文曰『受酬者不拜』者，胡氏承珙云：『此酬者，謂堂上酬堂下者。下乃云『受酬者不拜受』，則此古文『受』字衍也。』受酬者不拜，受。禮殺，雖受尊者之酬，猶不拜。【疏】正義曰：注「雖受尊者」，《校勘記》云：「『雖』，^④徐本、楊氏、俱作『進』，《通解》作『雖』。」○敖氏曰：「曷者旅酬有拜而飲者，拜而受者，故於此一一明之。」韋氏協夢云：「『受酬

- ①「之」，原作「三」，今據《儀禮集編》改。
- ②「記」，原作「禮」，今據《禮經釋例》改。
- ③「受」，原脫，今據《儀禮注疏》補。
- ④「雖」上，原衍「禮殺」二字，今據《十三經註疏校勘記》刪。

者不拜」，指長受酬而言也；下「皆不拜」，指其次受酬者以下而言。「方氏苞」云：「日暮人倦，受酬而拜，尊者將荅焉，故轉以不拜爲敬。」辯旅，皆不拜。主人之贊者於此始旅，嫌有拜。【疏】正義曰：《鄉飲酒·記》云：「主人之贊者不與，無算爵，然後與。」故云「於此始旅」。贊者統諸執事以及於沃洗者，尤卑，嫌有拜，故著之。執觶者皆與

旅。嫌已飲不復飲也。上使之勸人耳，非逮下之惠也，亦

自以齒與於旅也。【疏】正義曰：上文舉觶者于西階上卒

觶，是已飲也。《中庸》曰：「旅酬下爲上，所以逮賤也。」所謂逮下之惠也。卒受者以虛觶降，奠于筐；執

觶者洗，升實觶，反奠于賓與大夫。復奠之者，

燕以飲酒爲歡，醉乃止。主人之意也。今文無「執觶」及賓

觶，大夫之觶，皆爲爵。實觶，觶爲之。【疏】正義曰：張氏

爾岐云：「旅于西階上，故卒受者降，奠觶。」敖氏云：「此

以降者一觶也，然則主人所飲之觶，執觶者其先以奠于筐與？」盛氏世佐云：「上文及此兩言「卒受者」，依注，二觶

並行，則卒受者二人也。敖氏主唯行大夫之觶，故云然，今亦不取。竊謂堂上旅酬皆執觶者酌以送之，受者各於其席

坐飲，故二觶可以並行。至於旅在下者之時，同在西階上，

酬者又須親酌。若復二觶並行，頗覺其雜糅而無次。況一

階之上，而行禮者常四人，焉能曲盡其進退雍容之度乎？

然則旅在下者，蓋用一觶也。所用之觶，毋論賓與大夫，但

取行至三賓之末者，三賓之末飲而酬堂下衆賓之長，堂下

賓長飲而酬主人之贊者，亦以次交錯而辯也。其一觶，則

執觶者以降，奠于筐。注云：「執觶者酌在上者辯，降復

位。」其在斯時與？敖謂堂上唯行一觶，注謂堂下亦行二

觶，皆未合。讀者試以上下經文反復玩味，必有能辨之

者。褚氏寅亮云：「俟再舉也。飲酒至末，雖不行酬，亦必

酌而奠之，蓋不敢必其不舉也。」胡氏肇昕云：「盛氏自立

新說，謂堂上行二觶，堂下行一觶，非也。考堂上既二觶並

行，則卒受者各執一觶以旅在下者，安見其雜糅而無次？

且經言旅酬，而終之以執觶者皆與旅酬，則受酬終於執觶

者，執觶者二人，二觶並行，二人既各受酬，乃各以虛觶降

奠于筐，而復洗升，以反奠于賓與大夫，其始終之序不相淆

亂宜如此。上文注云：「執觶者酌在上者辯，降復位。謂執

觶者將與旅酬。」而盛氏遂據以爲以一觶降奠于筐，其在斯

時。殊屬牽合。要之，敖氏故與鄭立異，盛氏又斟酌於鄭、

敖之間，均無當也。自宜以注說爲正。」注云「復奠之

者，燕以飲酒爲歡，醉乃止，主人之意也」者，敖氏云：此後

酒行終而復始，至醉而止，所謂無算爵也。云「今文無『執觶』及賓觶、大夫之觶，皆爲爵。實觶，觶爲之」者，賈疏云：「今文此經云『執觶者』，無此『執觶』；又今文無執觶及賓觶、大夫之觶，皆爲爵，不從者，以其皆在無算爵之科，明不爲爵。云『實觶，觶爲之』者，亦不從也。」胡氏承珙《古今文疏義》曰：「此節注、疏皆譌錯，不可讀。許氏宗彦云：此注『今文無執觶及賓觶大夫之觶皆爲爵』十五字，當在上執觶者節下。」^①承珙案：此經「卒受者」以下，並無賓觶、大夫觶字，注何得爲此語？自是上節執觶者受觶以下之注誤移於此。但云「今文無執觶」，亦誤。彼經云：「執觶者受觶，遂實之。賓觶以之主人，大夫之觶長受而錯，皆不拜。」注當云：「^②今文執觶及賓觶大夫之觶皆爲爵。蓋總言執觶以下諸觶字。今文皆爲爵，『今文』下衍『無』字耳。若今文無『執觶』二字，則『者』字無所屬，不成文義矣。至此節注文，或謂但當有『今文實觶觶爲之』七字。承珙案：疏云：『實觶，觶爲之者，亦不從也。』言『亦』，則不止此語可知。詳疏意，此經『執觶者洗，升實觶』注云：『今文無執觶者；實觶，觶爲之。鄭以『無執觶者』，嫌於卒受者洗升，固所不從；『實觶，觶爲之』，則今文字誤，亦所不從。故疏云：『亦不從也。』章氏平云：注『今文無執觶』，案：『執觶』

上疑脫『虛觶』二字。今文蓋作卒受者以降，奠于篚，執爵者洗，升實之。疑者，今文若無執觶，則亦必無者字；既無執觶者，則下文洗字是卒受者洗，即上文不當云奠于篚，又注及字連執觶，故疑注文有脫字。案：此說亦通，然於賓觶大夫之觶，終無說以解矣。『無算樂。合鄉樂無次數。』

右坐燕無算爵無算樂射後飲酒禮竟

賓興，樂正命奏《陔》，《陔》，《陔夏》，其詩亡。

《周禮》賓醉而出，奏《陔夏》。《陔夏》者，天子、諸侯以鐘鼓，大夫、士鼓而已。【疏】正義曰：引《周禮》者，《鐘師》注。杜子春云：「客醉而出，奏《陔夏》。」賓降，及階，

《陔》作。賓出，衆賓皆出。主人送于門外，再拜。拜送賓於門東，西面。賓不荅拜，禮有終。【疏】

正義曰：敖氏云：「降，謂降堂。及階，至階上也。」韋氏協夢云：「降，謂降席也。」胡氏肇昕云：「降與及階連，當以

① 「者」，原脫，今據《儀禮古今文疏義》補。

② 「當」，原作「皆」，今據《儀禮古今文疏義》改。

敖說爲是。」方氏苞云：「拜送衆賓異於鄉飲酒禮，^①何也？鄉大夫，國卿也。^②惟既獻於王之賢能，^③乃以賓禮寵異之，故雖介，不拜送。若州長教射，則概執主賓之禮可矣。」韋氏協夢云：「大夫之出當在賓及衆賓之後。主人既送賓與衆賓，然後入，揖大夫，乃出，再拜送之。下《記》云：大夫後出，主人送于門外，再拜。是也。」

右賓出送賓

明日，賓朝服以拜賜于門外。拜賜，謝恩

惠也。【疏】正義曰：盛氏世佐云：「朝服者，據公士爲賓言也。處士則曰鄉服。」方氏苞云：「賓爲公士，則朝服其正也。即州之學士而攝用之，亦《宵雅》《肄三》之義。惟隱居之君子不宜朝服，但既抱道不仕，自不得以鄉射之賓強之。」主人不見，如賓服，遂從之，拜辱于門外，乃退。不見，不褻禮也。拜辱，謝其自屈辱。【疏】正義曰：注云「不見，不褻禮也」者，賈疏云：「禮不欲數，數則瀆。」主人不見，恐相褻也。」方氏苞云：別《記》云：「無辭不相接也。」鄉飲酒及射禮既畢，更無辭可致，故拜于門外而不見。士相見禮，主人復見，以還贊有禮與辭

也。」敖氏云：「拜賜之禮，賓至於門外，擯者出請入告。主人辭，不見，賓乃拜。主人拜辱亦如之。」

右明日拜賜

主人釋服，乃息司正。釋服，說朝服，服玄端也。息，猶勞也。勞司正，謂賓之與之飲酒，以其昨日尤勞倦也。《月令》曰：勞農以休息之。【疏】正義曰：注引《月令》者，見息司正者，亦勞以休息之也。江氏筠云：「飲立司正，至射則轉爲司馬，正射時有司馬，又有司射。二者皆主人之吏。司射主射事，其勞較司馬殆有甚焉。又擯相係司正之職，而賓、主人射，則司射擯其升降，似勞之宜亞於司正，而殊於餘執事者矣。士冠禮，有賓有贊冠者，至醴賓時，則贊冠者爲介。嫌此禮或當放之而用司射爲介，故經特明之也。」無介。勞禮略，貶於飲酒也。此已下皆記禮之異者。【疏】正義曰：注云「勞禮略，貶於飲酒也」者，賈疏云：「謂貶於鄉飲酒。鄉飲酒有介，此無介也。」敖氏

①「賓」下，原衍「異」字，今據《儀禮析疑》刪。

②「國」，原作「同」，今據《儀禮析疑》改。

③「王」，原作「主」，今據《儀禮析疑》改。

曰：「昨日正禮已無介，則此可知矣。乃言之者，嫌不射而飲，或用介也。」不殺。無俎故也。使人速。速，召

賓。【疏】正義曰：賓即司正，敖氏云：「亦當使人戒，乃

速，經文略也。」方氏苞云：「司正無所用戒，故速亦不必親也。」迎于門外，不拜；人，升。不拜至，不拜

洗。薦脯醢，無俎。賓酢主人，主人不崇

酒，不拜衆賓；既獻衆賓，一人舉觶，遂無算

爵。言遂者，明其間闕也。賓坐奠觶于其所，擯者遂受命

于主人，請坐于賓。賓降，說屨，升坐矣。不言遂請坐者，

請坐主於無算爵。【疏】正義曰：敖氏云：「言不殺，復言

無俎者，嫌不殺者亦有俎也。《士冠》、《士虞》以乾肉折

俎。主人不崇酒，則賓亦不告旨矣。不拜衆賓，謂不拜之

於庭，指將獻之時也。若獻，則衆賓亦拜受爵，而主人荅

之。」注云「言遂者，明其間闕也」者，敖氏云：「謂舉觶

之後，無算爵之前，其間工人、升歌等禮皆闕也。此一人舉

觶在獻衆賓之後，雖與正禮之舉觶爲旅酬始者同，實爲無

算爵始也。言遂無算爵，明其說屨、升坐即取此觶飲

也。」**無司正。**使擯者而已，不立之。【疏】正義曰：方

氏苞云：「息司正而更立司正，則於敬賓之義微若有嫌，不

若無之爲安。」賓不與。昨日至尊，不可褻也。古文

「與」作「豫」。徵唯所欲，徵，召也。謂所欲請呼。以

告于鄉先生、君子可也。告，請也。鄉先生，鄉大

夫致仕者也。君子，有大德行不仕者。【疏】正義曰：方氏

苞云：「《鄉飲酒》、《鄉射》至息司正乃告于君子，何也？

君子抱道不仕，賓興、習射自不敢相屈，至息司正，則聞鄉

之後進，有成有造，未必不惠然肯來耳。鄉先生，宜兼大夫

以公事不得爲遽及樂作而未入者。《鄉飲酒》疏謂老人教

於鄉學者尚未該。教於鄉學，唯士、大夫退休者耳。」羞

唯所有。用時見物。【疏】正義曰：謂其時所有之物，即

用之也。鄉樂唯欲。不歌《雅》、《頌》，取《周》、《召》之

詩，在所好。

右息司正

① 「飲」，原作「故」，今據《儀禮集說》改。

儀禮正義卷十 鄭氏注

受業江寧楊大培補

記

大夫與，則公士爲賓。不敢使鄉人加尊於大

夫也。公士，在官之士。鄉賓主用處士。【疏】正義曰：賈

疏云：「鄉射使處士無爵命者爲賓，有大夫來，不以鄉人加尊於大夫，^①故易去之，使公士爲賓。」敖氏云：「《記》言此

者，恐其或用處士也。所以不可用處士者，以處士去大夫之尊遠故也。鄉飲酒之禮，大夫若與，其賓、介亦當以公士

爲之；大夫不與，則公士若處士皆可。舊說謂鄉飲酒、鄉

射大夫自來觀禮，非也。大夫於一人既舉觶於賓乃入，主

人必無臨時易賓之理。然則大夫之與此會者，乃亦主人請

之明矣。」江氏筠云：「疏說以上篇專是賓賢能禮，此固未

必然。但彼云「主人就先生而謀賓、介」，則彼爲賓，與此異

矣。此賓爲主人所自定，故不敢使人加尊於大夫。彼賓、

介定於先生，於主人可以無嫌也。且既經先生審定，主人

亦何得更改易之？敖氏以主人當預知大夫之來否，然恐

未必先請大夫而後就先生也。竊詳注疏於《大射儀》有射

禮辨貴賤之說，觀賓主立于門外北面等文，顯與燕禮之主

歡者有殊。此鄉射雖不與彼同，疑亦當因其禮，故其爲賓

如此。惟其如此，故主人不就先生謀之。」盛氏世佐云：

「公士，鄉人之爲命士者，明非主人之屬也。大夫雖入於一

人舉觶之後，而其有無來否，主人必預知之。其用公士、處

士，蓋自戒賓之時而已定矣，非俟大夫至而後易之也。此

與鄉飲酒異者，^②彼所以賓賢，不可以大夫故易也。」方氏

苞云：「注以公士爲在官之士，似未盡。將取於國中上、

中、下士，則彼有官中之士，不能棄其職業而爲鄉遂之賓。

且春秋習射，三鄉之賓十有五人，遂亦如之，公邑則又倍

焉，安得每州皆有六官之士？若本州在官者，則惟黨正、

族師，乃州長之屬，助主人以蒞事者也，不可以爲賓。然則

所謂公士者，蓋鄉大夫所興之賢能，升於國學而未升於司

① 「鄉人」，原脫，今據《儀禮注疏》補。

② 「酒」下，《儀禮集編》有「禮」字。

馬，故作以爲賓，俾羣士取法焉。注又謂不敢使鄉人加尊於大夫，故使在官之士，益誤矣。^①大夫與衆士耦，且爲下射，以遵有主道也。乃慮其爲賓屈乎？敖氏謂《記》言此明不可用處士，大夫尊，處士去之遠。亦非也。處士，抱道者，經所謂「君子」是也。不敢以國法戒，速，乃尊賢之道宜然，故息司正必以告，而至與否聽之。至則當與大夫之遵者同禮。《儀禮釋官》曰：「案：公士有二義：對處士無爵命者言，則公士爲有位之士，此經是也；^②對士臣於大夫者言，則公士爲公家之士，《玉藻》云「公士擯，則曰寡大夫，寡君之老」是也。」胡氏肇昕云：「方氏不知注「公士，在官之士」之謂，而妄爲辨駁，至其所自言者，又於經典無據；敖氏故與注相反，而與經文多相違戾：皆非也。蓋鄉射之賓，本用處士。若大夫與，則以有位之士易之。大夫之來，或因主人之請，則其來否，主人已預知之，而先使公士爲賓，無慮於臨時易賓也。若鄉飲，則處士爲賓，大夫雖與亦不易。」又韋氏協夢云：「此據《州長春秋》以禮會民而射于州序」，用此鄉射禮者也。若行此禮於賓興賢能之後，則賓即鄉飲所舉之賓，烏可易乎？」使能，不宿戒。能者敏於事，不待宿戒而習之。【疏】正義曰：亦云「使能」者，此賓雖輕，然必以有才德者爲之，不可使不賢而居尊位也。

不宿戒者，亦以國之公禮，詢衆庶，習射皆有定期故也。注誤。方氏苞云：「不能則不能與於射，不待勝負分而已有所愧厲矣。能者始得與於射，則鄉大夫興賢能，非德行道藝有可觀不得與於衆賓可知矣。州長教射而徵學士，事有故常，無用先期而戒之。」其牲，狗也。狗取擇人。

【疏】正義曰：敖氏云：「用狗者，因大射之牲也。」^③其義與鄉飲酒同。方氏苞云：「注與敖說皆未安。狗，所以養老。『鄉黨莫如齒。』即興賢能三賓，遵者必有耆老，故曰「習鄉尚齒」。射雖尚功，而爲鄉禮。燕與大射，則國之老臣必與焉，故牲皆以狗。」胡氏肇昕云：「注說當有所本。若方說，則失之鑿矣。」亨于堂東北。《鄉飲酒義》曰：祖陽氣之所發也。【疏】正義曰：《校勘記》云：「祖」，徐本作「俎」。尊，綌冪。賓至，徹之。以綌爲冪，取其堅潔。蒲筵，緇布純。筵，席也。純，緣。西序之席北上。衆賓統於賓。【疏】正義曰：張氏爾岐云：「堂上

①「益」，原作「蓋」，今據《儀禮析疑》改。

②「也」，原脫，今據《儀禮釋官》補。

③「因」，原脫，今據《儀禮集說》補。

自正賓外，衆賓三人而已，今乃有西序東面之席，豈三人非定法與？賈疏以爲大夫多，尊東不受則於尊西，賓近於西，則三賓東面。未知然否。要之，爲地狹不容者擬設耳。」褚氏寅亮云：「衆賓三人耳，今乃有西序之席者，豈以無介而賓不拘於三與？然決非位遵於此，如疏說也。北上固統於賓，亦見異於介席。」吳氏廷華曰：「賓在尊西，南面東上。此中堂之位，所以尊賓也。大夫席于尊東者，蓋大夫在賓之西，則非所以尊大夫；在賓之東，又非所以尊賓。故以尊問之，使各成其尊而不相礙。然大夫在東，而賓居中位，則兩尊之中仍以尊賓爲主。即大夫多，尊東不足容，則亦當以上經堂西東面之條例之，尊東南面之外，以次轉而東序西面。此理之正者。」張氏惠言云：「賓位戶牖間，不得以公、卿、大夫多而移近西，當如大射小卿之席在賓之西，衆賓繼而西，故有東面席也。」盛氏世佐云：「此爲射於州序言之也。序之制狹於庠，賓席有定位，不可移而東。三賓之席四丈八尺，有非右一間所能容者，於是又繼而南，所以有西序之席也。疏說非。大夫若多，亦當席於主人之北，西面北上。其不於尊西，于賓之正位也必矣。」胡氏肇昕云：「《記》此句，解者多不得其故。賈疏之說本不可從，而敖氏直決以衆賓三人南面，未必有西序之席北

上者，是以《記》爲不可信矣。蔡氏德晉謂如賓多，容有席於西序者，堂上衆賓祇三人，不得云如賓多也。方氏苞謂《記》所述乃西階下衆賓立位而誤爲席，則尤非矣。細釋《記》與注之文，張氏、盛氏謂由地狹不容，因又繼而南，所以有西序之席，其說當矣。」張氏惠言《儀禮圖》云：「案：賓位不可移，當如大射小卿之位，在賓西，衆賓繼而西，故有西序之席。」焦氏以恕云：「筵席之制，短不過尋，長不過常，中者不過九尺，匠人「度九尺之筵」是也。今庠序之制，未詳東西闊狹之數，宜亦不一其制。賓之位於中者，既無可易矣。繼賓而西者，當設三席，則地不可以狹明矣。或者三賓之席亦有繼之而東西，未可知也。」獻用爵，其他用解。爵尊，不可褻也。【疏】正義曰：《校勘記》云：「《通解》句首有「凡」字。」以爵拜者，不徒作。以爵拜，謂拜既爵。徒，猶空也。作，起也。不空起，言起必酢主人。薦，脯用籩，五臟，祭半臟，橫于上。醢以豆，出自東房。臟長尺二寸。脯用籩，籩宜乾物也。醢以豆，豆宜濡物也。臟，猶脰也。爲記者異耳。祭橫於上，殊之也。於人爲縮。臟廣狹未聞也。古文「臟」爲「臠」，今文或作「植」。【疏】正義曰：注「臟，猶脰也」，

《校勘記》云：「『職』，陳本作『職』」。案：《釋文》曰：「『職』，音職。」若以《鄉飲·記》音義正之，此「職」乃「機」之誤。」

云「職，猶脰也。爲記者異耳」者，案：脰與挺同。《鄉飲酒·記》作「五挺」。注云：「挺，猶職也。」此記作「五職」。

注云：「職，猶脰也。」見職與脰同物，爲記者異，故一作「職」，一作「挺」耳。云「祭橫於上，殊之也。於人爲縮」者，

敖氏云：《曲禮》曰：「以脯脰置者，左胸右末。」是職長尺二寸而中屈之也。^①《士虞·記》有乾肉折俎，亦曰「胸在南」，此可以見其制矣。祭半職，則不屈之。」云「古文『職』

爲『載』，今文或作『植』」者，胡氏承琪《古今文疏義》曰：「案：『職』，當作『機』，『脰』、『挺』皆當作『挺』。宋本《鄉飲酒·記》《釋文》云：『猶機，本亦作職。』可見注文原作『機』

字。《鄉飲》、《鄉射》注挺、機互訓。《說文》：「機，杙也。」「挺，一枚也。」二字皆从木，凡从才、从肉者，皆誤。《聘禮·記》注：「職脯如板然者，或謂之脰，皆取直貌焉。」蓋

職、脰無正字，从其直貌，故取訓杙之機，一枚之挺名之。後人因其爲脯脰，改木从肉耳。「古文機爲載者，段玉裁

云：「戠聲，戠聲同部也。」惟載爲大鬻，與脯義別，故鄭不從。「今文或作植」者，直聲，戠聲亦同。鄭注《考工記》讀

「機」如「脂膏臄敗」之「臄」，是也。」俎由東壁，自西階

升。狗既亨，載於東方。賓俎，脊、脅、肩、肺。主人俎，脊、脅、臂、肺。肺皆離。皆右體也。

進脰。以骨名肉，貴骨也。賓俎用肩，主人用臂，尊賓也。離，猶搯也。脰，膚理也。進理，謂前其本。右體，周所貴也。若有尊者，則俎其餘體也。【疏】正義曰：注「謂前其本」，《校勘記》云：「『前』，陳、閩、監、葛俱誤作『首』。」

云「以骨名肉，貴骨也」者，俎用脯皆肉也，而以脊、脅、肩、臂名之，是以骨名肉。《祭統》曰：「凡爲俎者，以骨爲上。」故云「貴骨也」。云「賓俎用肩，主人用臂，尊賓也」者，肩、臂、脯爲前三體。《祭統》云：「周人貴肩。」賓用肩，是尊賓也。云「右體，周所貴也」者，此對左股而言也。云「若有尊者，則俎其餘體也」者，張氏爾岐云：「尊者」，當作「尊者」。經云「大夫若有尊者」，此所指正大夫也。餘體，謂臠若膊、若胐也。」凡舉爵，三作而不得爵。謂獻賓、獻大夫、獻工，皆有薦。凡奠者于左，不飲，不欲其妨。將舉者于右。便其舉也。衆賓之長，一人辭洗，如賓禮。尊之於其黨。【疏】正義曰：張氏爾岐

① 「尺二寸」，原作「二尺」，今據《儀禮集說》改。

云：「疏云：『獻三賓之時，主人唯爲長者一人洗爵。』」愚謂此爲衆賓統一洗，但辭之者一人耳。」若有諸公，則如賓禮，大夫如介禮。無諸公，則大夫如賓禮。尊卑之差。諸公，大國之孤也。【疏】正義曰：敖氏

云：「賓禮、介禮亦謂其受獻時之儀耳。云『有諸公，則如賓禮，大夫如介禮』，其言略與《鄉飲酒》之經合似也。云

「無諸公，則大夫如賓禮」，其言大與此經違，則非矣。此經

所言遵者、大夫之儀，正指無諸公者也。而其儀亦無以異於介，烏在其爲如賓禮乎？蓋大夫之禮宜降於賓，固不以

諸公之有無而爲隆殺。又經惟屢見大夫禮，而略不及公，則無諸公明矣。記乃著有諸公之禮，皆似失之。」盛氏世佐

云：「經不見如賓禮之儀，略也。猶賴此記之存，得以考其隆殺之大凡，而敖氏反疑之，過矣。」張氏爾岐云：「鄉射無

介，此以飲酒禮中之賓、介明其差等也。」樂作，大夫不入。後樂賢也。樂正與立者齒。謂其飲之次也。

尊樂正同於賓黨。《鄉飲酒·記》曰：「與立者皆薦以齒。」

【疏】正義曰：《鄉飲酒·記》注云：「不言飲而言薦，以明飲也。既飲皆薦於其位。」此記不言薦，故引《鄉飲酒·記》

以證之。三笙一和而成聲。三人吹笙，一人吹和，

凡四人也。《爾雅》曰：「笙小者謂之和。」【疏】正義曰：敖氏云：「三人吹笙，而一人歌其所吹之詩以和之。而後笙之辭顯，且成聲也。此其在無算樂之時乎？笙之人也，以將射之，故不奏之。」郝氏敬云：「三笙一和，謂三人吹笙，一人歌以和之也。鄭據《爾雅》笙小爲和，《爾雅》多後人附會，三大笙、一小笙於義何取？豈四笙并吹，無一歌者乎？」盛氏世佐云：「此當以注說爲正。《爾雅》曰：『笙，十九簧曰巢，十三簧曰和。』傳曰：『大笙，音聲衆而高也，小者音相和也。』《說文》曰：『笙，正月之音，物生，故謂笙。』『列管匏中，施簧管端。』『官管在中央，三十六簧曰筥，官管在左旁，十九簧至十三簧曰笙。其他皆相似也。』陳氏《樂書》曰：「笙爲樂器，其形鳳翼，其聲鳳鳴，其長四尺。大者謂之巢，以衆管在匏有鳳巢之象也；小者謂之和，以大者唱則小者和也。」以上諸說，皆此記之箋疏也，豈鄭一人之私言哉？蓋聲者，宮、商、角、徵、羽也。笙之管應乎律，大小相調，五聲乃成。此吹笙之法，所謂「律以平聲」也。《國語》曰：「匏，竹利制。」又曰：「匏，竹尚議。」韋昭注曰：「利制，以聲音調利爲制；議，從其調利也。」然則大小

①「爲」，原作「謂」，今據《儀禮鄭注句讀》改。

相調，匏竹之器類然。若竽、若簫、若簞、若管、若篴，皆有大小，豈以笙而獨無之？今其音雖不可考，其義猶可推而知也。宋李照作巢笙，合二十四聲以應律呂正倍之聲；作和笙，應笙等合清濁之聲。識者稱其能復古制。若謂於義無取，後人何以能師其意而作，作而調乎？若夫敖說之誤，有不得不辨者。夫有志而後有詩，有詩而後有歌，於是五聲以依之，十二律以和之，然後被之八音而爲樂。此帝舜命夔之言所以爲千古論樂之原本也。笙特八音之一耳，歌乃人聲也。謂笙以和歌則可，謂歌以和笙可乎哉？其誤一也。記曰：「歌者在上，匏竹在下，貴人聲也。」堂下安得有歌？其誤二也。況此篇無升歌、笙間，但有合樂，謂堂上歌瑟，堂下笙，磬合奏二南六篇之詩也。堂上既有二人之歌，安得堂下又有一人歌乎？其誤三也。敖氏亦自知其說之不可通，而謂此在無算樂之時，則其辭遁矣。郝氏襲其謬，而反譏鄭失，豈公論乎？「胡氏肇昕云：『盛氏駁敖，郝以伸注說，其識逮矣，但其所引證亦多謬誤。案：《爾雅·釋樂》云：『大笙謂之巢，小者謂之和。』舍人注云：『大笙音聲衆而高也，小者聲相和也。』郭璞注云：『列管匏中，施簧管端，大者十九簧。小者十三簧者，《鄉射·記》曰：三笙一和而成聲。』《說文》云：『笙十三簧，象鳳之

身也。笙，正月之音，物生，故謂之笙。大者謂之巢，小者謂之和。古者隨作笙。』盛氏所引皆非。」獻工與笙，取爵于上筐。既獻，奠于下筐。其笙則獻諸西階上。奠爵于下筐，不復用也。今文無「與笙」。

【疏】正義曰：注云「今文無『與笙』」者，胡氏承琪云：

「案：經文云：『主人取爵于上筐，獻工。』其下云：『遂獻笙于西階上。』其下又云：『主人以爵降，奠于筐。』此記：取爵上筐，奠于下筐。當總記獻工與笙。《鄉飲酒禮·記》亦云：『獻工與笙。』故鄭不從今文無『與笙』也。」立者東面北上。賓黨。【疏】正義曰：賈疏云：「此謂來觀禮者，與堂下衆賓齒。」盛氏世佐云：「此謂堂下衆賓也，士之來觀禮者亦在焉。」司正既舉觶而薦諸其位。薦於觶南。三耦者，使弟子司射前戒之。弟子，賓黨之少者也。前戒，謂先射請戒之。【疏】正義曰：賈疏云：「謂請射之前戒之。」敖氏云：「三耦射則在先，立則居前，乃以弟子爲之者，爲司射當誘射故也。誘射有教之意，故以少者爲三耦而誘之。不使長者，嫌其待之淺也。惟前戒，故不待命而先俟于堂西。」張氏爾岐云：「請射于賓之

前，即戒之也。」司射之弓矢與扑，倚于西階之西。便其事也。【疏】正義曰：司射取弓、挾矢、取扑，經皆著其在階西。惟誘射訖，改取一个挾之，則著其適堂西。蓋堂西與階西相近，記故統而言之。司射既袒決遂而升，司馬階前命張侯，遂命倚旌。著並行也。

古文曰「遂命獲者倚旌」。【疏】正義曰：敖氏云：「階前，即觶南之處也。」盛氏世佐云：「階前，西階前也。觶南位在中庭，敖說非。」注云「著並行也」者，敖氏云：「謂此時司射、司馬同時行事，非相繼爲之。經不明言，故記著之也。經言司馬命張侯及倚旌，乃在司射比三耦之後。記言此，以明其在司射升、請射于賓之時，非若經文之次也。然經文所以如彼者，欲終上事，乃言下事故爾。」張氏爾岐云：「司射升堂、告賓請射之時，司馬階前即命張侯倚旌。經文序司射事訖，乃及司馬，故記著其行事相並也。韋氏協夢云：「射禮同時行事者似不止此，如司馬命張侯，司樂即當命遷樂，司馬獻獲者，司射即當獻釋獲者。大約二人所行之事不至相窒礙者，皆可同時而行。若一人行一事，必相繼爲之，則日力有不給矣。記蓋舉一以見其餘耳。」云「古文曰「遂命獲者倚旌」者，胡氏承珙云：「案：經文

云：「司馬命張侯。弟子說束，遂繫左下綱。司馬又命獲者倚旌于侯中。」記又言此者，疏云：「司馬命張侯與命倚旌，其事相因，故云遂，明同是西階前。」然則今文不言獲者，從可知也。」凡侯，天子熊侯，白質；諸侯麋侯，赤質；大夫布侯，畫以虎豹；士布侯，畫以鹿豕。此所謂獸侯也，燕射則張之。鄉射及賓射當張采侯二正。而記此者，天子、諸侯之燕射，各以其鄉射之禮而張此侯，則經「獸侯」是也。由是云焉，白質、赤質，皆謂采其地。其地不采者，白布也。熊、麋、虎、豹、鹿、豕，皆正面畫其頭象於正鵠之處耳。君畫一，臣畫二，陽奇陰耦之數也。燕射射熊、虎、豹，不忘上下相犯；射麋、鹿、豕，志在君臣相養。其畫之，皆毛物之。【疏】正義曰：《校勘記》云：「注「則經獸侯是也」。徐本、《通解》、楊氏俱無此句。案：此乃疏文誤入。『皆謂采其地』『地』誤作『也』。『射熊、虎、豹』『熊』，閩、監俱誤作『燕』。『不忘上不相犯』下『不』字，徐本、《通典》、聶氏、《通解》俱作『下』。朱子曰：「疏解忘爲苟，然則乃妄字也。」案：疏云：「不苟相從，輒當犯顏而諫。」正是不忘相犯之意，似非「妄」字。又案：《禮記·射義》疏引作「上下相犯」。『志在君臣相養』，徐本

「養」下有「也」字，與《射義》疏引亦合。」云「此所謂獸侯也，燕射則張之。鄉射及賓射當張采侯二正」者，張氏爾岐云：「侯制有三：大射、賓射、燕射。大射之侯用皮。王三等：虎、熊、豹。諸侯二等：熊、豹。卿、大夫用麋，所謂棲皮之鵠，《梓人》云「張皮侯而棲鵠，則春以功」是也。賓射之侯用布，畫以爲正。王五正：中朱，次白，次蒼，次黃，而玄在外。諸侯三正，損玄、黃。大夫、士二正，去白、蒼，畫朱、綠，所謂「畫布曰正」，《梓人》云「張五采之侯，則遠國屬」是也。燕射之侯畫獸以象正鵠，此記所言是也。《梓人》亦云：張獸侯以息燕也。」胡氏肇昕曰：「《周禮·司裘職》曰：『王大射則共虎侯、熊侯、豹侯，設其鵠。諸侯則共熊侯、豹侯，卿、大夫則共麋侯，皆設其鵠。』」注：「大射者，爲祭祀射，王將有郊廟之事，以射擇諸侯及羣臣與邦國所貢之士可以與祭者。諸侯謂三公及王子弟封於畿內者，卿、大夫亦皆有采地焉，其將祀其先祖，亦與羣臣射以擇之。凡大射各於其射宮。侯者，其所射也。以虎、豹、熊、麋之皮飾其側，又方制之以爲臺，謂以鵠著於侯中，所謂皮侯。王之大射，虎侯，王所自射也；熊侯，諸侯所射；豹侯，卿、大夫以下所射。諸侯之大射，熊侯，諸侯所自射；豹侯，羣臣所射。卿、大夫之大射，麋侯，君臣共射焉。」又

《射人職》曰：「王以六耦射三侯，三獲三容，樂以《騶虞》，九節五正。諸侯以四耦射二侯，二獲二容，樂以《貍首》，七節三正。孤、卿、大夫以三耦射一侯，一獲一容，樂以《采蘋》，五節二正。士以三耦射豻侯，一獲一容，樂以《采芣》，五節二正。」先鄭注云：「三侯，虎、熊、豹也。正，所射也。《詩》曰：終日射侯，不出正兮。二侯，熊、豹也。豻侯，豻者，獸名也。獸有羆、豻、熊、虎。」後鄭注云：「三侯者，五正、三正、二正之侯也。二侯者，三正、二正之侯也。一侯者，二正而已。」此皆與賓射於朝之禮也。《考工·梓人職》曰：「張五采之侯，則遠國屬。」遠國，謂諸侯來朝者也。五采之侯，即五正之侯也。正之言正也，射者，內志正則能中焉。畫五正之侯，中朱，次白，次蒼，次黃，玄居外。三正，損玄、黃。二正，去白、蒼，而畫以朱、綠。其外之廣，皆居侯中參分之一，中二尺。《大射禮》「豻作干」，讀如「宜豻宜獄」之豻。豻，胡犬也。士與士射，則以豻皮飾侯，下大夫也。大夫以上與賓射，飾侯以雲氣，用采各如其正。又《梓人》「張五采之侯，則遠國屬」注云：「五采之侯，謂以五采畫正之侯也。《射人職》曰：以射法治射儀，王以六耦射三侯，三獲三容，樂以《騶虞》，九節五正。下曰：若王大射，則以貍步張三侯。明此五正之侯，非大射之侯明矣。」

其職又曰：諸侯在朝，則皆北面。遠國屬者，若諸侯朝會，王張此侯與之射，所謂賓射也。」又「張獸侯，則王以息燕」注云：「獸侯，畫獸之侯也。」引此記爲證。又云：「息者，休農息老物也。燕，謂勞使臣，若與羣臣飲酒而射。」孔氏穎達《射義》正義曰：「凡天子、諸侯及卿、大夫、士禮射有三：一爲大射，是將祭擇士之射；二爲賓射，諸侯來朝天子而與之射也，或諸侯相朝而與之射也；三爲燕射，謂息燕而與之射。天子、諸侯、大夫三射皆具，士無大射。故《司裘職》云大射惟明王及諸侯、卿、大夫，不及於士。其賓射、燕射，士皆有之。故《射人》云士射豸侯二正，是士有賓射也。又《鄉射》·記云：士布侯，畫以鹿、豕。是士有燕射矣。其侯，天人大射，則張虎侯、熊侯、豹侯；畿內諸侯大射，則張熊侯、豹侯。若畿外諸侯大射，亦張三侯：一曰大侯，二曰鵠侯，三曰豸侯。若畿內卿、大夫射麋侯，其畿外卿、大夫射侯無文。於諸侯既得三侯，其卿、大夫蓋降君一等，則鵠侯、豸侯也。大射之侯皆有鵠，鵠則三分侯中而居其一，其賓射之侯謂之正。天子賓射用五正、三正，二正之侯，諸侯用三正、二正之侯，卿、大夫用二正之侯。士亦用二正之侯，又飾以豸。畿外諸侯以下賓射，其侯無文。若天子以下燕射，則尊卑皆用一侯。此三射之外，又有鄉

射，其侯並同賓射之法。故鄭注云：鄉侯二正。」云「而記此者，天子諸侯之燕射，各以其鄉射之禮而張此侯」者，此謂記言鄉射而以燕射之獸侯爲言，故明之也。張氏曰：「此鄉侯當張采侯二正，而記燕射之侯者，以燕射亦用此鄉射之禮，但張侯爲異耳。」盛氏世佐云：「記曰：『古者，諸侯之射也，必先行燕禮；卿、大夫、士之射也，必先行鄉飲酒之禮。』《燕禮》曰：若射，則如鄉飲酒之禮。蓋諸侯以上無鄉射，其燕射之侯，則自鄉射等而上之也；大夫以下無燕射，其鄉射之侯，則自燕射等而下之也。故獸侯之名通乎上下，而《鄉射》之記兼及王侯，皆以此耳。《圖說》曰：『大射射鵠，賓射射正，鄉射射質，而燕射則因鄉射之侯。』注以燕張獸侯，鄉射當張采侯，誤矣。」云「由是云焉，白質、赤質皆謂采其地。其地不采者，白布也」者，盛氏世佐云：「凡侯中棲之以皮曰鵠，《司裘》所云『設其鵠』是也；畫之以采曰正，《射人》所云五正、三正、二正是也；塗之以土曰質，此記所云白質、赤質、丹質是也。各隨其所宜而命之，其實皆射之的而已。《梓人》云『參分其廣而鵠居一焉』，則鵠又侯中之總名也。鄭解此質爲質地之質，非。凡侯皆以布爲之，而飾之以皮。此於鄉射之侯獨曰布者，明其不以皮飾也。於鄉射之侯曰布，則熊、麋二侯之非純布

可知矣，於鄉射之侯曰畫，則熊、麋二侯之非畫可知矣。或謂：「凡侯皆以布爲之，而飾之以皮，則三射之侯何別乎？」曰：別之以其侯中而已。皮侯以鵠，采侯以正，獸侯以質。或又謂：「燕射之侯，既不畫，何以謂之獸也？」曰：若以其所飾而謂之皮，則無以別於大射也。且其中，未嘗棲皮也。以其所塗而謂之采，則無以別於賓射也，且其中未嘗盡采也。燕侯雖不畫，而熊、麋之屬皆獸名，故以其名命之，且大夫、士之畫者，則固有獸象焉。又以見此名之通乎下也。皮侯、采侯取義於中，獸侯取義於側，亦相變也。《經義聞斯錄》曰：「案：射侯皆以布爲地，故《大射儀》注云：『侯，謂所射布也。』天子、諸侯以皮飾側，故《考工記》謂之獸侯，惟大夫、士不飾皮，故此記云『大夫布侯』，『士布侯』也。然云『畫以虎豹』，『畫以鹿豕』，則熊侯、麋侯非畫可知。畫者丹質，故非畫者，則白質、赤質也。人有大夫、士之異，獸有虎、豹、鹿、豕之分，故曰『凡』以統之。人有天子、諸侯及大夫、士之異，侯有飾皮及畫皮之分，故曰『凡畫者』以別之也。《小雅·賓之初筵》篇：『發彼有的。』傳云：『的，質也。』毛公解是詩爲燕射，則所謂質者即指白質、赤質、丹質之質。漢初訓詁簡括，不備引此經耳。質，侯中，志射之處，其猶大射之鵠、賓射之正與？注解爲地，

非矣。」又云：「熊侯用熊皮，麋侯用麋皮。將何以別於大射之皮侯乎？」《考工記》何以特謂之獸侯乎？蓋大射用虎、熊、豹、麋之皮飾侯側，而中又方制皮以爲鵠，側中皆皮，故曰皮侯。賓射亦用虎、熊、豹、麋之皮飾侯側，而中用布畫五采以爲正，故曰五采之侯。燕射則天子、諸侯張熊、麋皮，而中設質焉。大夫、士則畫虎、豹、鹿、豕於布，亦有獸之形，故統曰獸侯。」又云：「禮謂之質，《詩》謂之『的』，《說文》謂之『壇』，云：『射臬也，讀若準。』案：《司裘》注云：『侯者，其所射也。以虎、熊、豹、麋之皮飾其側，又方制之以爲臬，謂之鵠，著於侯中，所謂皮侯。』疑臬乃壇之誤，故《釋文》云『本亦作準也』。疏解臬作質，云『質者，正也，所射之處，故名爲質』。又案：《小爾雅》謂之槩。槩即臬也。《說文》：『臬，射準的也。』云「熊、麋、虎、豹、鹿、豕，皆正面畫其頭象於正鵠之處耳」者，賈疏云：「案：《梓人》云：『參分其廣而鵠居一焉。』據大射之侯若賓射之侯，則三分其侯，正居一焉；若燕射之侯，則獸居一焉。故云象其正鵠之處。」胡氏肇昕云：「經於熊、麋侯不言畫，則以熊、麋之皮飾其側耳。畫者唯虎、豹、鹿、豕。」云「君畫一，臣畫二，陽奇陰耦之數也」者，以天子、諸侯唯熊與麋，大夫則有虎、豹，士則有鹿、豕，是取陰陽奇耦之數也。《經義聞

斯錄曰：「其云大夫畫以虎、豹，士畫以鹿、豕者，大夫或虎或豹，士或鹿或豕耳。非大夫兼虎、豹，士兼鹿、豕也。注說涉附會。」胡氏肇昕云：「案：郝氏亦云：『畫虎則無豹，畫鹿則無豕。』非一侯畫二物也。敖氏云：『一侯而畫獸二者，亦宜夾其質也。不畫一獸者，變於用皮者也。』其說亦非。」云「燕射射熊、虎、豹，不忘上下相犯；射麋、鹿、豕，志在君臣相養」者，此鄭謂用熊、虎、豹、麋、鹿、豕之意也。胡氏肇昕云：「鄭氏《司裘》注云：『用虎、熊、豹、麋之皮，示服猛討迷惑者。射者大禮，故取義衆也。』較此注爲精。」云「其畫之，皆毛物之」者，謂所畫者皆毛物也。方氏苞云：「謂象其淺深、純駁之物色也。」凡畫者丹質。賓射之侯，燕射之侯，皆畫雲氣於側以爲飾。必先以丹采其地，丹淺於赤。【疏】正義曰：案：注以畫爲畫雲氣。凡畫者，總天子、諸侯、大夫、士而言。丹質，謂丹采其地，非也。考經文於熊侯曰白質，麋侯曰赤質，則丹質者，自謂大夫、士之布侯也。大夫與士同爲布侯，則同爲丹質，而虎、豹、鹿、豕又皆以畫，故以凡畫者統之質，謂其識射之處也。此注多誤，後儒故多駁之。敖氏云：「凡畫者丹質，謂畫虎、豹、鹿、豕之侯皆以丹質，言其質同也。」^①姜氏兆錫云：「據本記，白質爲天子之熊侯，赤質爲諸侯之麋侯，則

丹質當屬大夫、士虎、豹、鹿、豕之侯。經云「凡」者，凡大夫與士，非並凡王侯也。」孔氏廣森云：「此質謂侯中受矢之處。《毛詩》『發彼有的』傳曰：『的，質也。』《考工記》曰：『利射革與質。』」蓋獸侯有質，猶皮侯有鵠，采侯有正矣。天子熊皮爲侯，白塗中以爲質；諸侯麋皮爲侯，赤塗中以爲質；凡大夫、士皆布侯而但畫爲獸象，丹塗中以爲質。於大夫、士獨言「布侯」，明君之獸侯亦真獸皮爲之，所別於皮侯者，在質與鵠耳。」射自楹間，物長如筈，其間容弓，距隨長武。自楹間者，謂射於庠也。楹間，中央東西之節也。物，謂射時所立處也。謂之物者，物猶事也，君子所有事也。長如筈者，謂從畫之長短也。筈，矢幹也，長三尺，與跬相應，射者進退之節也。間容弓者，上下射相去六尺也。距隨者，物橫畫也。始前足至東頭爲距，後足來合而南面爲隨。武，跡也，尺二寸。【疏】正義曰：注云「自楹間者，謂射於庠也。楹間中央東西之節也」者，張氏爾岐云：「榑鉤楹內，堂由楹外，雖不同，皆以楹中央爲東西之節。注云『謂射於庠』，^②恐未是。」云「長如筈者，

① 「同」，原作「異」，今據《儀禮集說》改。

② 「云」，原脫，今據《儀禮鄭注句讀》補。

謂從畫之長短也。筈，矢幹也。長三尺，與跬相應，射者進退之節也」者，郝氏敬云：「物長如筈，與人步一跬相應。三尺爲跬，六尺爲步，從長半步，不言橫，同也。」云「間容弓者，上下射相去六尺也」者，敖氏云：「其間容弓，爲從畫言也。」胡氏肇昕云：「物長如筈，爲從畫言。其間容弓者，謂上下射各履一物，兩物之間相去容弓。弓，六尺也。敖說非。」郝氏云：「其間，謂兩物相去。中間可容弓。六尺曰弓，即一步也。兩人麗立，中空一步，以便射也。」云「距隨者，物橫畫也。始前足至東頭爲距，後足來合而南，面爲隨。武，跡也，尺二寸」者，敖氏云：「射者南面，還視侯中之後，先以左足履物之東端，乃以右足履其西端而合之，故名東端爲距，西端爲隨，取其左足至則右足隨之也。」^①距，至也。隨，猶從也。」郝氏云：「左足先履物距其外曰距，^②右足來合曰隨，足跡曰武。武長尺有奇，兩足收斂迫狹，方可容一武也。」盛氏世佐云：「名橫畫曰距隨者，蓋先以左足距從畫之南端，而後以右足隨之，履其橫畫。」胡氏肇昕云：「距」之本字當作「距」。距，《說文》云：「止也。」又「止」下云：「止，下基也。象草木出有趾，故以止爲足。」是古亦謂足爲止。故《士昏禮》「北止」注云：「止，足也。」距訓爲止，亦可爲足之稱也。隨，讀如「父之齒隨行」之隨。」

序則物當棟，堂則物當楣。是制五架之屋也。正

中曰棟，次曰楣，前曰廡。【疏】正義曰：敖氏云：「當棟、當楣，其以庭之深淺而異與？堂之庭深於序，故進退其物以合侯道之數。此侯道五十弓。」張氏爾岐云：「序無室，堂有室，故物深淺異設，此物南北之節也。」吳氏廷華云：「大射大侯九十，此諸侯之侯道也。《司裘》注本之，而又以天子之侯道亦九十。案：《白虎通》「天子之侯道百二十步」，雖俱無可考據，而《白虎通》之說爲長。」命負侯者由其位。於賤者禮略。【疏】正義曰：賈疏云：司馬自在己位，遙命之，由負侯者賤，略之故也。敖氏云：「位，顰南也。此與前二命皆不離其位者，以射事未至，略之，由便也。」盛氏世佐云：「此謂「司馬命獲者執旌以負侯」之時也。位，司射之南也。此時司馬位已不在顰南矣。敖說非。」吳氏廷華云：「司射請射後，司馬初命倚旌，次命負侯，皆不言位，則皆由其位也。不言命去旌，可知。又位北面，而獲者在西，是即其位西向命之也。」凡適堂西，

① 「隨」，《儀禮集說》作「從」。

② 「曰距」，原作「而」，今據《儀禮節解》改。

皆出入于司馬之南。唯賓與大夫降階，遂西取弓矢。尊者宜逸，由便也。【疏】正義曰：敖氏

云：「凡，凡司射、司馬、三耦、衆耦也。必出入於此者，近於其位也。此於司射、司馬之位爲南，於耦之射位爲北，故以之爲節。云賓無射位，大夫不立於射位，故取弓矢於堂西，不由之。大夫卒射而退，乃由此者，統於上射，非正禮也。」郝氏敬云：「凡司射、三耦、衆耦往來堂西，皆由司馬之南而西，惟賓與大夫取弓矢於堂西，下階即折而西，不由司馬之南，尊者可直遂，不出卑者之下也。賓、大夫非取弓矢不往堂西，故申明之。」盛氏世佐云：「凡適堂西，皆出入於司馬之南」，蓋威儀之法有不得由便者，唯賓與大夫則否，優尊也。敖氏「近於其位」之說失之。旌各以其物。旌，總名也。雜帛爲物，大夫、士之所建也。言各者，鄉射或於庠，或於謝。【疏】正義曰：注云「旌，總名也」者，《周禮·司常》云：九旗，通帛爲旛，雜帛爲物，全羽爲旟，析羽爲旌。物與旌別，云「旌，總名」者，賈疏謂「散文則通」是也。云「雜帛爲物，大夫、士之所建也」者，本《司常》文。賈疏云：「通帛者，通體並是絳帛；雜帛者，中絳，緣邊白也。」云「各者，鄉射或於庠，或於謝」者，賈疏云：「大夫、士

同建物而云「各」者，大夫五仞，士三仞，不同也。」吳氏廷華云：《周禮·司常》惟有大夫、士建物及雜帛之文。以此記言之，則「物」字當即《司常》所謂「九旗之物」，蓋交龍、熊、虎九者及下龍旛之類。若止以雜帛言，非各以之義。

要知此卿、大夫禮，如鄭、賈說，又有州長、鄉大夫，是卿當在孤、卿建旛中，州長當在州里建旛中，豈得專以雜帛爲訓？至五仞、三仞之說，據《司常》疏謂本《禮緯》，則尤不可以緯訓經；且記亦止言物，不言杠也。要之，人各有物，故曰「各」，不必辨其物之異同也。」張氏爾岐云：「旌，射時獲者所執，各用平時所建，故云「各以其物」也。」敖氏云：「記據士之爲主人者言也。士之物云「各」，則是三等之士其物亦有不同者矣。《士喪禮》云「爲銘各以其物」，亦此意也。」胡氏肇昕云：「敖氏之說，盛氏謂其非記意也。」無物，則以白羽與朱羽糴，杠長三仞，以鴻脰韜上二尋。無物者，謂小國之州長也。其鄉大夫一命，其州長士不命，不命者無物。此翻旌也，翻亦所以進退衆者。糴者，雜也。杠，檀也。七尺曰仞。鴻，鳥之長脰者也。八尺曰尋。今文「糴」爲「縮」，「韜」爲「翻」。【疏】正義曰：注云「無物者，謂小國之州長也。其鄉大夫一命，其州

長士不命。不命者無物」者，郝氏敬云：「《周禮·司常》云：『析羽爲旌』，『雜帛爲物』，『大夫、士建物』。《春秋傳》曰：『采，謂之物。』無物，謂士之未命者。旌無帛，則不得畫物。」姜氏兆錫云：「『旌各以其物』，即《司常職》掌九旗之名物之物，故云『各以其物』。而無物，則以朱白羽糒。杠乃因不命之士，無九旗之名物而爲之也。注誤解『物』爲『雜帛曰物』之物，則『各』字不可通。而疏乃以杠之長短別之，則所謂順而爲之詞，而不自知其率矣。」盛氏世佐云：「《春秋傳》曰：『采，謂之物。』采，即雜帛也。雜帛，非一色也，郝謂帛上畫物，似失之。姜以物爲名物之物，而究不能指言何物，不如仍以『大夫、士建物』之文爲證也。」云「此翻旌也，翻亦所以進退衆」者，賈疏云：「此據下文『士鹿中，翻旌』也。下云：『國君中射，則皮樹中，以翻旌獲。』此不命士與國君同者，士卑不嫌，命士以上尊卑自異也。翻非直用之於獲。《喪大記》君葬時，執翻居前詔傾虧，亦所以進退衆人也。」云「糒者，雜也」者，敖氏云：「以白羽、朱羽相雜，而綴於杠之首，亦象『析羽爲旌』之意也。」張氏爾岐云：「不命之士，不得用物，則以赤白雜羽爲翻旌以射。」姜氏兆錫云：「糒訓爲雜，不可解。糒，謂交纏之也。」胡氏肇昕云：「姜說無據。大夫、士建物，雜帛爲物，無物則以白

羽、朱羽雜綴爲旌，亦象其雜帛之物也。故注訓糒爲雜，《說文》無「糒」。錢氏大昕以爲即「粗」字。考《說文》：「粗，雜飯也。」段氏玉裁曰：「《食部》曰：『粗，雜飯也。』《廣韻》曰：『粗，亦作糒。』然則粗、糒」字，今之糒雜字也。」^①是粗本爲雜飯之名，引申之，凡雜亦可曰粗。丑聲與柔聲古音同部也。」云「杠，檀也」者，《後漢書·馬融傳》注云：「檀者，旗之竿也。」故《禮記·檀弓》「以練綢旌之杠」注又云：「杠，竿也。」云「七尺曰仞」者，賈疏云：「此無正文。王肅則依《小爾雅》四尺曰仞，孔君則八尺曰仞，所見不同也。」胡氏承珙《小爾雅疏證》曰：「仞數，諸儒各異，《漢書·食貨志》注又引應劭以五尺六寸爲仞，此仍與『七尺曰仞』者合。蓋用八寸爲尺，以七乘八，故爲五尺六寸。」褚氏寅亮云：「鄭云『七尺曰仞』，蓋本包咸《論語注》，不從趙岐《孟子注》『八尺爲仞』，尋八尺則仞七尺矣。《小爾雅》四尺爲仞，如是則仞有三尺之牆止高七尺，尤難信。」云「鴻，鳥之長脰者也」者，郝氏曰：「脰，頸也。鴻，大鴈，長頸。」云「八尺曰尋」者，賈疏云：「此亦無正文。」胡氏肇昕云：「《小爾雅》云：『四尺謂之仞，倍仞謂之尋。尋，舒兩肱也。』《說

① 「雜」，原作「飯」，今據《說文解字注》改。

文》云：「尋，度人之兩臂爲尋，八尺也。」《一切經音義》引《淮南·天文訓》曰：「音以八相生。人修八尺，尋自倍，故八尺而爲尋。」是皆以八尺爲尋也。張氏爾岐云：「其杠三仞，又以鴻脰韜杠之上長二尋。鴻脰之制，注疏皆不言，^①疑亦縫帛爲之，其圓長若鴻項然也。」盛氏世佐云：「杠長三仞」以下，又言旌竿之制度，物與無物者所同也。以鴻脰韜者，執旌所以唱獲，故取其飛鳴之象。說者謂縫帛爲之，非。上二尋，謂在其杠二尋之上也。此與經云「上握焉」句法相似。或以「上」字絕句，非。杠長二丈一尺，韜於二尋之上，則所韜者五尺矣。方氏苞曰：「二尋以上乃韜，則所韜五尺也。曰「韜上二尋」，其制已明。而曰「以鴻脰」，則五尺中必微曲如鴻之脰也。」云「今文「韜」爲「縮」，「韜」爲「翻」者，胡氏承珙《古今文疏義》曰：「注云：「韜，雜也。」《一切經音義》：「韜，古文粗，鈕二形。《說文》：「粗，雜飯也。」引申之，爲凡相雜之偁，丑聲，柔聲並通，故又變爲韜。《今文韜爲縮」者，如《周禮·甸師》：「祭祀共蕭茅。」鄭大夫云：「蕭，或爲茜。茜，或爲縮。」是也。鄭以韜、縮聲雖近，而縮字無雜義，故不從。今文「韜」爲「翻」者，亦聲近假借。鄭以韜義爲正，故亦不從今文。」凡挾矢，于一指之間橫之。二指，謂左右手之第二指，此以食指，將指

挾之。【疏】正義曰：賈疏云：「第二指爲食指，《左傳》云『子公之食指動』是也。第三指爲將指，《左傳》云吳王闔廬傷將指是也。」敖氏云：「云凡者，謂挾矢或多或寡，其法皆然。寡則挾以食指，將指，多則以餘指分挾之。凡挾矢，有挾一矢者，有挾四矢、五矢者。」韋氏協夢云：「食指，將指之外，除兩擘指有拓弓、鉤弦之事，^②其無名指、小指皆可挾矢。挾一個者，挾於食指、將指之間，挾四個，則分挾將指、無名指之間，挾五個，則又分挾無名指、小指之間也。」褚氏寅亮云：「無問矢之多寡，挾之，總於第二指、第三指之間，故不曰「指間」，而曰「二指之間」。敖氏謂多則餘指分挾之，失記憶。」司射在司馬之北。司馬無事不執弓。以不主射故也。【疏】正義曰：敖氏云：「司馬將升堂而有事，乃執弓。非是則亦有事而不執弓之時，記蓋大略言之耳。」始射，獲而未釋獲；復，釋獲；復，用樂行之。君子取人以漸。【疏】正義曰：敖氏云：「始射，謂第一番三耦射時。復，又射也。前言

①「疏皆」，原脫，今據《儀禮鄭注句讀》補。

②「擘」，原作「臂」，今據《儀禮蠡測》改。

復，謂第二番射時。後言復，謂第三番射時。三耦始射，志在於中，中則當言獲，未釋獲者，此如習射然，未宜較勝負，且三耦之外皆未射，難以相飲，亦不可以徒釋之也。至次射，則賓主而下皆繼射，乃可以釋獲。及第三射，則其事已熟，乃可以樂爲節也。此皆行事有漸，且示先質後文之意。」吳氏廷華云：「第一番射未釋獲，第二番射始釋獲，第三番射又釋獲。故曰復。復當據第三番射言，又第三番始用樂，曰復者，對樂賓時言。」上射于右。於右物射。

【疏】正義曰：韋氏協夢云：「上射于右，則下射當於左。不言者，可知也。」楅長如筈，博三寸，厚寸有半，

龍首，其中蛇交，韋當。博，廣也。兩端爲龍首，中

央爲蛇身相交也。蛇、龍，君子之類也。交者，象君子取矢於楅上也。直心背之衣曰當，以丹韋爲之。司馬左右撫矢而乘之，分委於當。【疏】正義曰：《校勘記》云：「注『司馬左右』，誤作『左右司馬』。」云「博，廣也」者，敖氏云：

「長如筈，①兩端相去之度也。」盛氏世佐云：「楅，承矢架也，長如筈，博三寸，厚寸有半，皆謂其乘矢之橫木也。蓋楅身屈曲如蛇交，必以此木橫設於上，乃可以安矢。」云「兩端爲龍首，中央爲蛇身相交也」者，楊氏復曰：「兩端爲龍

首，所以限矢也。其中爲蛇身兩兩相交相對，則置之於地

而安也。」敖氏云：「龍首者，刻其上端作龍首之狀爲識，且以飾也。上端爲首，則下端爲尾明矣。經云東肆，是其証也。蛇交者，兩木屈曲爲之，狀如蛇交然。以屈曲爲之者，

象弓也。」盛氏云：「其中蛇交，則兩端皆爲龍首。鄭必有所傳矣，敖說非。」云「蛇、龍，君子之類也」者，賈疏引《易》

「龍戰于野，其血玄黃」，鄭注云「聖人喻龍，君子喻蛇」是也。云「直心背之衣曰當，以丹韋爲之」者，聶氏崇義引舊

圖云：「楅長三尺，有足，置韋當於背。」郝氏云：「韋，皮也。當，中也。與襠通。中衣袴曰襠，兩腹如半圍，交處脊

起如衣襠。撫矢乘之，則分委兩腹；以韋鞮之，如襠衣也。」姜氏兆錫云：「以當爲楅衣固似，但謂當爲直心背之

衣，則當須讀作襠。而歷攷字典，初無襠作當之文。即當字義解數十條，又無通當作襠之義也。況本記以「楅」字領

起全文，下文又著「楅」字，覺上下文義不協；而獨以「楅槩」二字合於下節，義例彌復未安。或讀當爲當車之當，

「當楅」爲句，「槩」句，謂韋當楅中，而色則槩也。此於義爲穩，宜從之。」盛氏云：「當，底也。《韓非子》曰『玉卮無當』

①「筈」，原作「苛」，今據《儀禮集說》改。下「如筈」字同。

是也。以皮爲底，防傾欹也。注誤，姜說尤鑿。」^①胡氏筆听云：「《釋名·釋衣服》云：『衿襜，其一當胸，其一當背。』是『直心背之衣曰當』也。鄭以當爲襜者，蓋古人字少，得相假借。且衿襜之爲名，以一當胸，一當背，故曰衿襜。是襜正由當得名也，古蓋即以當字爲之。姜氏據後世之字書律古人之借義，可謂妄矣。又《後漢書·鮑永傳》有『當匈』。李賢注云：『當匈，以韋爲之。』是襜之通作當，又有明証。姜氏何考之未審邪？考楊氏《禮圖》衿之制，兩端作龍首，中爲蛇身兩兩相交，以丹韋爲當，設於其上，以承矢。楊氏本於注說，注必有據也。敖氏乃以上端爲首，下端爲尾，不知衿者橫設，非直設也，有兩端之形，無上端下端之形也。盛氏以當爲底，引《韓非子》以爲據，竟不知當之形何若，其用韋於何所也。且衿之分承乘矢者，經不得不一明之也。是其說皆不可從，當以注說爲是。」云「司馬左右撫矢而乘之，分委於當」者，楊氏云：以丹韋爲當，則四四分矢，而委之於其上也。衿，髹，橫而奉之，南面坐而奠之，南北當洗。髹，赤黑漆也。【疏】正義曰：「衿橫而奉之」，《校勘記》云：「『奉』，《釋文》、《唐石經》、徐本俱作『拳』，《通解》、楊氏、敖氏俱作『奉』。」朱子曰：「拳，當作奉，字之誤也。」陸氏音拳亦非是。^②《石

經考文提要》曰：「拳訓曲，言制衿之法漆而橫曲之，其蛇交之處著地，龍首尾拳曲向上，更設韋當於其背，與上蛇交韋當文義相屬，非設衿時兩手奉之也。《釋文》明注：拳音權。《通解》但云：拳，當作奉。而注仍作拳，不改字。」案：朱子云：「拳，當作奉。」則未嘗改經也。今本《通解》經文竟作「奉」，卻於疏末綴「衿橫而拳之」五字，疑非朱子原文。○盛氏世佐云：「此再言衿者，以其通體言也。若以韋當衿爲句，則衿但爲韋色，不知衿體更作何色邪？」

注云「髹，赤黑漆也」者，案：髹之本字作「髹」，云：「髹，漆也。」段氏玉裁注曰：「韋昭曰：『髹曰髹。』師古曰：『以漆漆物謂之髹。』今關東俗謂之捎漆，捎即髹聲之轉耳。以漆漆物皆謂之髹，不限何色也。《鄉射禮》注云：『赤黑漆也。』《巾車》注云：『髹，謂亦多黑少之色韋也。』《漢書》：『中庭彤朱，殿上髹漆。』《西都賦》謂之「彤庭玄墀」。然則或赤或黑，或赤黑兼，或亦多黑少，皆得云髹。」張氏爾岐云：「衿用漆爲飾，設之者橫而奉之，南面坐奠中庭，其南北與洗相直。」射者有過，則撻之。過，謂矢揚中人。

① 「姜」，原作「敖」，今據《儀禮集編》改。

② 「音」，原作「云」，今據《儀禮注疏校勘記》改。

凡射時矢中人，當刑之。今鄉會衆賢以禮樂勸民，而射者中人，本意在侯，去傷害之心遠，是以輕之，以扑撻於中庭而已。《書》曰：「扑作教刑。」【疏】正義曰：敖氏云：「射時司射搯扑以泄事，然則撻之者，其司射與？」注云「過，謂矢揚中人。凡射時矢中人，當刑之者，以矢中人爲過之大者，本當刑之，但其本意在侯，非故有傷害人之心也，故僅用扑撻於中庭。鄭引漢時鄉會衆賢事以證之也。引《書》者，古文《尚書·堯典》文。吳氏廷華云：「過本不一，注特舉其重言之。賓、主、大夫無撻理，或爲三耦及諸執事設也。」衆賓不與射者不降，不以無事亂有事。古文「與」爲「豫」。【疏】正義曰：敖氏云：「衆賓在三人之中者也。經言賓、主人、大夫若皆與射之禮，則是賓、主人、大夫或有不與矣。此記又言「衆賓不與射者不降」，①皆以堂上者言也。以是觀之，則堂上者可以不與，而在下之衆賓無有不與者乎？」褚氏寅亮云：「大夫尊，不與射不降可知。嫌衆賓不與射，因賓、主、大夫降而亦降，故特明之。」取誘射之矢者既拾取矢，而后兼誘射之乘矢而取之，謂反位已禮成，乃更進取之，不相因也。

【疏】正義曰：賈疏云：「不相因者，既自拾取己之乘矢，反

位，東西望訖，上射乃更向前，兼取誘射之矢。禮以變爲敬，故不相因。」朱子曰：「上經云：『後者遂取誘射之矢。』此注乃云：反位禮成，乃更進取之。似相矛盾。其「上射」字亦與「後者」二字不相應，當作下耦之下射。」敖氏云：「經云「後者遂取誘射之矢」，此則見其於既拾取己矢乃爲之。」吳氏廷華云：「己之四矢，一遞一取，故曰拾。後者既拾取己矢訖，又進兼四矢取之。以一人取，故不言拾。疏云「東西望」者，謂東西面位相望也。」張氏爾岐云：「注所謂「反位已」者，非司馬西南東面之位，乃耦東西取矢之位。前經所云「上射東面，下射西面」者也。但彼處疏云：是下射取之。此乃云上射，未審何者爲是。」盛氏世佐云：「此注顯與經背，當以朱子及敖說爲正。」賓、主人射，則司射擯升降，卒射即席，而反位卒事。擯賓、主人升降者，皆尊之也。不使司馬擯其升降，主於射。【疏】正義曰：敖氏云：「擯謂以辭贊之。射時擯升降，則取矢亦當然也。將擯而去扑，搯之，乃反位。」注云「不使司馬擯其升降主於射」者，賈疏云：「司馬本是司正，不

①「降」，原作「與」，今據《儀禮集說》改。

主射事也。」鹿中，髻，前足跪。鑿背，容八算。釋獲者奉之，先首。前足跪者，象教擾之獸受負也。

【疏】正義曰：張氏爾岐云：「先首，首向前也。」盛氏世佐曰：「此於奉之者爲縮。」注云「前足跪者，象教擾之獸受負也」者，賈疏云：「服不氏教擾，猛獸不堪受負。其有合負物者，教擾則屈前足以受負，若今馳受負則四足俱屈之類也。」胡氏肇昕云：「孔穎達《禮記·投壺》正義曰：『中之形，刻木爲之，狀如兕鹿而伏，背上立圓圈以盛算。』」

大夫降，立于堂西以俟射。尊大夫，不使久列於射位。

【疏】正義曰：張氏爾岐云：「賓、主人、大夫同時降，賓主先射，大夫且立於堂西，其耦在射位，俟當射，大夫乃就其耦，升射。」韋氏協夢云：「尊者事至乃爲之，故大夫立於堂西，而不立於射位，優之也。若然，則大夫未射，俟射至乃降亦可。必先降者，賓、主人既降，而大夫獨立於堂上，則是以尊者自處矣。此又自謙之意也。」大夫與士射，袒纁纁。不肉袒，殊於耦。

【疏】正義曰：「袒纁纁」，《校勘記》云：「『纁』，唐石經、徐本、《通解》、楊氏、敖氏俱作『薰』」。案：宋本《釋文》亦作「薰」，前有司請射「疏亦引作『薰』」。據《士冠禮》「纁裳」注云「今文纁皆作薰」，則

此「薰」當作「薰」。盛氏世佐云：「『纁』，石本作『薰』，張氏以爲誤。敖同石本，且釋之曰：『薰，讀爲纁，古字通用也。』殆不免郢書而燕說矣。」胡氏肇昕云：「據敖說，正可證古本皆爲『薰』，非石本之誤。盛氏反斥敖之非，適見其陋。」○敖氏曰：「袒纁纁，尊者不見體也。襦先著於衣內，袒時則出之。大夫非射於君所，固不肉袒矣。乃以與士射爲言者，嫌爲下射，或當統於上射，不宜異之也。」吳氏廷華云：「裏衣上加襦，襦上加遂，經第言袒，故記之。」耦少退于物。下大夫也，既發則然。

【疏】正義曰：郝氏云：「耦，謂士爲大夫耦，則士居右物爲上射，每既發一矢，輒少退，辟尊也。」敖氏云：「經言耦於大夫，射時之禮，在下則屈，在上則伸，然則似未必有此少退於物之儀也。且侍射於君，乃退於物，尊君也。大夫之耦，此禮亦不宜與君之耦同，記似過矣。」盛氏世佐云：「此亦貴貴之禮則然，然云『少退』，則與侍君射之禮有間矣。敖氏議之，非也。」司射釋弓矢，視算，與獻釋獲者釋弓矢。惟此二事，休武主文，釋弓矢耳。然則擯升降不釋。

【疏】正義曰：敖氏云：「司射於射未畢而釋弓矢，惟此二事，故記者併言之也。視算而去弓矢者，爲射事已因去扑之節而并去

之也。獻釋獲者，而釋弓矢者，爲有洗酌荅拜等事故也。二者之意義不同。禮射不主皮。主皮之射者，勝者又射，不勝者降。禮射謂以禮樂射也，大射、賓射、燕射是矣。不主皮者，貴其容體比於禮，其節比於樂，不待中爲雋也。言不勝者降，則不復升射也。主皮者無侯，張獸皮而射之，主於獲也。《尚書傳》曰：「戰鬪不可不習，故於蒐狩以閑之也。閑之者，貫之也。貫之者，習之也。凡祭，取餘獲陳於澤，然後卿、大夫相與射也。中者雖不中也，取；不中者雖中也，不取。何以然？所以貴揖讓之取也，而賤勇力之取。嚮之取也於囿中，勇力之取；今之取也於澤宮，揖讓之取也。澤，習禮之處，非所於行禮，其射又主中，此主皮之射與？天子大射，張皮侯；賓射，張五采之侯；燕射，張獸侯。」【疏】正義曰：注「不待中爲雋也」，《校勘記》云：「雋」，徐本、《要義》俱作「備」。案：「備」，蓋「雋」字之誤。「則不復升射也」，《要義》脫「升」字。「凡祭取餘獲陳於澤」，「凡」，《要義》作「已」，與單疏述注合。「取」上，《要義》有「則」字。案：「凡祭」，當從《要義》作「已祭」。案：段玉裁云：「《射義》：天子將祭，必先習射於澤。下文又云：射中者得與於祭，不中者不得與於祭。是射澤必在祭之先，況禽待祭後而班，則委積日久，已字，非也。」

許氏宗彥云：「苟非已祭，何稱餘乎？當作已。」「嚮之取也」，「嚮」，《釋文》作「鄉」。「勇力之取」，「取」下，徐本、《通解》、《要義》俱有「也」字。「云「禮射謂以禮樂射也，大射、賓射、燕射是矣」，敖氏云：「禮射，謂此篇所載與大射、燕射之類也。」云「不主皮者，貴其容體比於禮，其節比於樂，不待中爲雋也」者，以其合於禮樂爲主，不以中爲雋，故曰「不主皮」也。云「言不勝者降，則不復升射也」者，此主皮之射。若禮射二番不勝，三番仍升射也。云「主皮者無侯，張獸皮而射之，主於獲也」者，敖氏曰：「禮射則張皮侯，若采侯與獸侯而加正鵠。主皮之射則不用正鵠，但欲射中其皮耳。此皮與所謂皮侯者之皮不同，蓋以中甲之革爲之。《周官》云：「射甲革。《樂記》云：「貫革之射。」皆指此而言也。中甲之革，犀兕若牛之皮也。其爲物堅厚，惟強有力者乃能貫之，故禮射則不主皮，爲力不同科故也。」張氏爾岐云：「不主皮，當依《論語》作主於中而不主於貫革爲確。」胡氏肇昕云：「《論語》：「禮射不主皮。」馬融注曰：主皮能中質，言射者不但以中皮爲善，亦兼取和容。是馬氏亦不以主皮爲貫革也。《周禮》：鄉大夫以鄉射之禮五物詢衆庶，三曰主皮。鄭注云：庶人無射禮，因田獵分禽則張皮射之。是主皮爲田獵之射，亦在鄉射五物

之中，特爲庶人言之耳。陳氏祥道謂主皮之射，庶人之禮也。鄉大夫或用之於澤宮，或用之以詢衆庶，用之於詢衆庶，在一曰和、二曰容之後，則主皮之射，雖君子之所不廢，亦非其所尚也。晚周之時，射尚主皮，故孔子譏之是也。至貫革之射，見於《樂記》，乃軍旅之射也。《周禮·司弓矢》所謂「射甲革楯質」是也。與主皮之射各別。朱子注《論語》「合主皮貫革爲一，不及馬，鄭說之精。敖氏、張氏從之，誤矣。」引《尚書傳》者，此伏生《尚書大傳》之文。自「戰鬪」至「揖讓之取也」，鄭引之，疑其爲主皮之射言也。云「凡祭取餘獲陳於澤，然後卿、大夫相與射也。中者雖不中也，取；不中者雖中也，不取」者，朱子曰：「蓋謂取蒐狩之餘獲陳於澤。今之中者，鄉雖不中亦取也；今之不中者，鄉雖中亦不取也。」云「澤，習禮之處，非所於行禮，其射又主中，此主皮之射與」者，言澤雖習禮之處，而其射則又主於中，是非所於行禮，故疑其爲主皮之射也。主人亦飲于西階上。就射爵而飲也。己無俊才，不可以辭罰。

【疏】正義曰：賈疏云：「此謂主人在不勝之黨受罰爵之時也。」獲者之俎，折脊、脅、肺、臠。臠，若膊、胙、鬴之折，以大夫之餘體。【疏】正義曰：《校勘記》云：「敖氏

刪經「臠」字，其正誤曰：「今本肺下有臠字。繼公謂臠在肺下，非其次，且與折文不合，蓋傳寫者因注首言臠而衍也。」《大射》注引此無「臠」字，今據以刪之。周學健云：「臠在折中，不應又出臠字，但賈疏自作有臠字解，故仍其舊而加圈別之。」案：此與《鄉飲酒》介俎「肫」字同意，皆以用體無常，故立文不定。且此文變例，「臠」在「肺」下，其意尤明。故《鄉飲酒》「肫」字可刪，而此經「臠」字不可去。又《大射》注云：「卿折俎，用脊、脅、臠、折肺。與此正同，明無衍字。」注云「臠，若膊、胙、鬴之折，以大夫之餘體」者，張氏爾岐云：「見科取其一定，有臠則用臠，無臠則三者皆可用之。唯視大夫之有無多寡，取其餘體而已。」吳氏廷華云：「記止言臠，則不用膊、胙可知。蓋折不用全體，大夫用臠，亦折不全用，則獲者亦得用臠，不必易臠用膊。」盛氏世佐云：「《士虞》：『用專膚爲折俎。』注云：『折俎，謂主婦以下俎也。體盡人多，折骨爲之。』又《特牲》：『主婦俎鬴折，佐食俎鬴折。然則體盡人多，乃折牲體以充俎。今此唯賓、主人用肩臂，其餘體尚多，而獲者之俎用折者，獲者賤也。折謂自臠以下也，脊、脅骨多，不須折。言臠於肺下者，舉所折之例也。此特謂無大夫言之耳。若有大夫，則以大夫之餘體也。記若云：獲者之俎，脊、脅、臠、折肺。豈不

文順而意顯？今其文若此者，欲見此俎之折於禮爲宜，不因大夫多而然也。又以見自牖以下，皆可折以爲俎，不限於牖也。」**東方謂之右个。**侯，以鄉堂爲面也。【疏】正義曰：韋氏協夢云：「此明經之左个，右个，東方謂之右个，則西方謂之左个矣。」○《校勘記》云：「注『鄉堂』『堂』，誤爲『黨』。」**釋獲者之俎，折脊、脅、肺。皆有祭。**皆，皆獲者也。祭，祭肺也。以言肺，謂判肺不離，嫌無祭肺。【疏】正義曰：注云「皆，皆獲者也」者，謂獲者與釋獲者之俎同也。云「祭，祭肺也。以言肺謂判肺不離，嫌無祭肺」者，敖氏云：「經於二俎，已見其有祭。記復言之者，以此云『肺』，嫌爲祭肺也，是以明之。二俎有離肺，復有祭肺者，爲獲者祭於三處而加之。釋獲者俎，遂因之亦加祭肺一也。」盛氏世佐云：「此及上文所謂肺，皆舉肺也，祭則祭肺也。祭祀之時，二肺俱有，其他則惟有舉肺而已。舉肺亦皆以祭，今此有舉肺復有祭肺者，爲獲者之祭侯而設也。釋獲者亦有祭，則又因獲者之禮也。獲者之祭肺三，釋獲者之祭肺一。」**大夫說矢束，坐說之。**明不自尊別也。【疏】正義曰：張氏爾岐云：「謂拾取矢時。」歌《騶虞》，若《采蘋》，皆五終，射無算。謂衆賓繼

射者，衆賓無數也。每一耦射，歌五終也。【疏】正義曰：賈疏云：「上用《騶虞》以化民，①下用《采蘋》，大夫之樂節亦可。皆五終者，大夫、士皆五節，一節一終，故云『五終』也。」方氏苞云：「疑賓、主人、衆賓之射，皆歌《騶虞》，有司、學士並宜助流王化也。大夫則歌《采蘋》，以職位既有定耳。疏以上下爲別，義不可通。」韋氏協夢云：「經止言『歌《騶虞》』，此云『歌《騶虞》』，若《采蘋》者，補經所未及也。疑行鄉飲禮於賓賢能，則用《騶虞》，注所謂『有樂賢之志，取其相宜』是也。若州長春秋以禮會民而射于州序，行此鄉射之禮，則用《采蘋》，以鄉大夫或來也。」盛氏世佐云：「《騶虞》說見前。《采蘋》，卿、大夫賓射所歌也，故亦得用之。然則諸侯之州長歌《騶虞》，若《采蘋》與？五終即《周禮》所謂五節。《騶虞》亦五終何，嫌於僭乎？」蔡氏德晉云：「案：先儒皆以此爲與《周官》異，不知此正與《周官》互相發明耳。《周官》王射以《騶虞》九節；大夫射以《采蘋》，士射以《采蘋》，皆五節。今鄉射乃士禮，則用《采蘋》五節宜矣。然二南乃鄉樂，自天子以至於士皆可通用，則《騶虞》可下達於大夫、士，但其節當五終耳。推之，則

①「上」，原脫，今據《儀禮注疏》補。

《采蘋》、《采芣》可上達於天子，但其節則當九終可知也。」胡氏肇昕云：「方氏謂賓、主人、衆賓射皆歌《騶虞》，大夫則歌《采蘋》，其說疑可從。大夫或來或不來，未定，故經但言歌《騶虞》，記則爲補言之耳。」古者于旅也語。禮成樂備，乃可以言語，先王禮樂之道也。疾今人慢於禮樂之盛，言語無節，故追道古也。【疏】正義曰：《校勘記》云：「注『禮成樂備』，諸本俱作『種成樂億』，唯徐本同此。」○敖氏云：「言古者，以見周禮之不然。古，謂殷以上也。于旅而語，以敬殺也。」盛氏世佐云：「此云『古者』，蓋謂周之盛時也。然則記之作也，其在春秋之際乎？」胡氏肇昕云：「敖氏以《禮經》爲周公所作，故謂古爲殷以上也。但經爲周公所作，記則孔子與七十子之所作也。觀《論語》：『子曰：禮，射不主皮，爲力不同科，古之道也。』與此之追道古初以慨今時者相似，則古當謂周之盛時爲是。」

凡旅不洗。敬殺。不洗者不祭。不盛。既旅，士不入。從正禮也。既旅則將燕矣。士人，齒於鄉人。

【疏】正義曰：注「從正禮也」，《校勘記》云：「『從』，徐本作『後』，《通解》作『從』。」張氏爾岐云：「『從正禮』，當是『後正禮』。」大夫後出。下鄉人，不干其賓主之禮。【疏】正

義曰：《校勘記》云：「注『不干』，誤作『于』。」○敖氏云：「大夫後出，與其後人之意同，亦欲使主人各得盡其待賓與大夫之禮，而賓與大夫亦各得伸其尊也。主人送賓入門，大夫乃出。」主人送于門外，再拜。拜送大夫，尊之也。主人送賓，還入門，揖。大夫乃出，拜送之。【疏】正義曰：敖氏云：「大夫雖多，亦唯拜送其長而已。鄉飲酒，尊者之禮，亦當如此。」胡氏肇昕云：「敖氏推《鄉飲酒》主人拜送賓，于介則否，以解此經唯拜送大夫之長，其說未安。」方氏苞云：「鄉射，衆賓出，主人皆拜送，況衆大夫乎？」韋氏協夢云：「再拜送大夫，合衆大夫而拜送也。」

鄉侯，上个五尋。上个，謂最上幅也。八尺曰尋，上幅用布四丈。【疏】正義曰：注云「用布四丈」者，以五乘八得四丈也。張氏爾岐云：「橫長之數。」中十尺。方者也，用布五丈。今官布幅廣二尺二寸，旁削一寸。《考工記》曰：梓人爲侯，廣與崇方。謂中也。【疏】正義曰：張氏爾岐云：「中，即正也。」^①盛氏世佐云：「此謂侯中也。鄉侯之質居侯中三分之一，蓋方三尺三寸有奇矣。正鵠亦

①「正」，原作「方」，今據《儀禮鄭注句讀》改。

然，但其尺寸則隨侯中之大小以爲準耳。張說非。」郝氏云：「中，中幅侯心也。十尺，方一丈也。侯中心視侯道遠近爲廣狹。」褚氏寅亮云：「布幅之廣，當以《漢志》二尺二寸爲正，故注據之。《淮南子》云二尺七寸，巡狩禮以爲三尺二寸，俱未的。」○注《考工記》，《校勘記》云：「『工』，誤作『功』。」云「方者也，用布五丈」者，張氏曰：「廣崇皆十尺，布幅廣二尺，故用布五丈。」云「今官布幅廣二尺二寸，旁削一寸者」者，敖氏云：「蓋謂周布之廣當如漢布也。」賈疏云：「此言十尺，用布五幅，幅廣二尺二寸，兩畔各削一寸爲縫，幅各二尺在，故五幅爲一丈也。漢法，幅二尺二寸，亦古制存焉，故舉以爲況。引《考工記·梓人》之文者，證中之爲方者也。」侯道五十弓，弓二寸以爲侯中。言侯中所取數也。量侯道以狸步，而云「弓」者，侯之所取數，宜用射器也。正二寸者，較中之博也。今文改「弓」爲「肱」也。【疏】正義曰：注「宜用射器也」，《校勘記》云：「『用射』，徐作『於躬』，聶氏、《通解》、楊氏俱作『於射』。『正二寸者』，諸本俱無『者』字，唯監本同此。」云「量侯道以狸步，而云『弓』者，侯之所取數，宜用射器也」者，《大射儀》云：以狸步張三侯，是量侯道以狸步也。六尺爲步，弓之制與步相應。侯之取數宜於射器，故此經不

云「狸步」而云「弓」也。云「正二寸者，較中之博也」者，《考工記·弓人》云：「茭解中有變焉。」注云：「茭，讀如『齊人名手足擊爲較』之較。」謂弓附把側骨之處，博二寸。鄭氏此注作較，用其所改之字也。正之數取於較中之博，故二寸。褚氏寅亮云：「此中一丈，三分其一以爲鵠，則三尺三寸有奇，七十弓之侯，中丈四尺，鵠四尺六寸有奇。九十弓之侯，中丈八尺，鵠六尺。」張氏爾岐云：「侯之遠近五十弓，每弓取二寸，以爲侯中之數，故中十尺也。」①云「今文改『弓』爲『肱』者，胡氏承珙《古今文疏義》曰：『案：古肱字本作左，與弓字爲同音假借。故駢臂子弓，駢，姓，臂，名；當字左，而作子弓。』《左傳》『邾黑肱』，《公羊》作『黑弓』，皆其例。鄭云：『侯之所取數，宜用射器。』故不從今文改作『肱』也。」②倍中以爲躬，躬，身也，謂中之上下幅也，用布各二丈。【疏】正義曰：賈疏云：身爲中，上、中、下各橫接一幅布者也。倍躬以爲左右舌。謂上、中、下各橫接一幅布者也。居兩旁謂之个，左右出謂之舌。【疏】正義曰：張氏爾岐云：「即最上四丈之橫幅，隨所目而異名，左右出各一

① 「中」，原脫，今據《儀禮鄭注句讀》補。

② 「今」，原作「古」，今據《儀禮古今文疏義》改。

丈。』下舌半上舌。半者，半其出於躬者也。用布三丈。所以半上舌者，侯，人之形類也。上个象臂，下个象足。中人張臂八尺，張足六尺，五八四十，五六三十，以此爲衰也。凡鄉侯用布十六丈，數起侯道五十弓以計，道七十弓之侯，用布二十五丈二尺，道九十弓之侯，用布三十六丈。【疏】正義曰：《校勘記》云：「注『半其出於躬者也』」躬，徐本作「射」，似誤。「用布二十五丈二尺」用，徐本作「田」，誤。」云「半者，半其出於躬者也，用布三丈」者，張氏爾岐云：「用布三丈，橫綴下躬之下，^①左右出於躬各五尺。」云「所以半上舌者，侯，人之形類也。上个象臂，下个象足，中人張臂八尺，張足六尺，五八四十，五六三十，以此爲衰也」者，敖氏曰：「下舌所以半上舌者，慮其植之妨於往來者也。下舌之長，若如上舌，則兩植相去五丈六尺有餘矣，故須半之也。」盛氏世佐云：「侯制，上廣下狹，便射也。蓋侯植於庭，而射者從堂上射之，則其所平視者，侯中以上而已，其下無取乎廣也。《禮器》云：『天子之堂九尺，諸侯七尺，大夫五尺，士三尺。』此堂高於庭之度也。侯之下綱，去地僅尺二寸，下舌所以半上舌者，殆爲是與？注說非，敖說亦似迂。」胡氏肇昕云：「鄭注《考工記·梓人》亦云：『侯制上廣下狹，蓋取象於張臂八尺，張足六尺，

是取象率焉。』考侯之爲字，从人从厂，厂象張布，矢在其下，人則取象於人也。凡侯之名曰躬，曰左右舌，上舌，下舌，皆於人身取之。則象人之說，鄭有所受之矣。盛氏駁之，非也。」云「凡鄉侯用布十六丈，數起侯道五十弓以計」者，賈疏云：「中五幅，幅一丈，用布五丈。上下躬總用布四丈。上个四丈，下个三丈，是通用布十六丈也。」云「道七十弓之侯，用布二十五丈二尺」者，賈疏云：「中七幅，幅丈四尺，用布九丈八尺。上下躬總用布五丈六尺，上个五丈六尺，下个四丈二尺，通用布二十五丈二尺也。」云「道九十弓之侯，用布三十六丈」者，賈疏云：「中九幅，幅丈八尺，用布十六丈二尺。上下躬總用布七丈二尺，上个亦七丈二尺，下个五丈四尺，通用布三十六丈也。」箭籌八十。箭，篠也。籌，算也。籌八十者，略以十耦爲正，貴全數。其時衆寡從賓。【疏】正義曰：《校勘記》云：「注『箭篠也』」篠，誤从竹。「籌八十者」籌，徐本、楊氏俱作「筭」。「其時衆寡從賓」上「賓」字，徐本、《通典》、《通解》俱作「寡」。

云「箭，篠也。籌，算也」者，張氏爾岐云：「箭，竹也。以竹爲籌，釋獲者所執之算也。」云「籌八十者，略以十耦爲

①「躬」，原作「弓」，今據《儀禮鄭注句讀》改。

正，貴全數，其時衆寡從賓者，張氏云：「人四矢，耦八籌也。」敖氏云：「上記云射無算，而箭籌惟止於八十，則是此射者雖多，亦不過十耦也。釋獲者之執算，各視射者之矢數。」盛氏世佐云：「經云：『釋獲者執鹿中，一人執算從之。』此記云：『箭籌八十。』以一人所執言也。中一個，釋一算，射者未必皆中，故經又云：『若有餘算，則反委之。』則此八十籌固不止供十耦之用矣。如不足，則射器之納於堂西者可復取也。豈必以十耦爲限哉？敖說非。」長尺有握，握素。握，本所持處也。素，謂刊之也。刊本一作膚。【疏】正義曰：注「刊本一作膚」，《校勘記》云：「徐本、《通解》、楊氏俱無『作』字，與單疏標目及述注合。《通典》作『刊本一云膚』，敖氏作『刊一本膚』。許氏宗彥云：『此猶云刊本四寸耳，與下經文刊本尺義同。《禮》作扶，鄭用《公羊》膚字，故疏述《公羊》而曰引之者，証握、膚爲一也。』」云「握，本所持處也」者，敖氏云：「尺有握，猶言尺有四寸也。必云握者，亦見其爲所持處也。」張氏爾岐云：「握四指，即四寸，算長尺四寸。」云「素，謂刊之也」者，郝氏云：「握素，謂手捉處，刊削使素，外加髹飾也。」張氏云：「其四寸，則刊之使白也。」云「握，本一作膚」者，惠氏棟《古義》曰：「張稷若《節解》云：『握，本以作膚，以字疑

誤；別本『刊本一作膚』。亦費解。或『刊本』一讀，義屬上句。一作膚，指握字有作膚者。四指曰膚，與握義同。愚謂：案：文當云：『握本，或作膚。』張氏以爲『刊本』一讀，屬上句，非也。」胡氏肇昕云：「惠說非也。張氏謂『握本』一讀，是也；謂『一作膚，指握字有作膚者』，非也。『作』字係淺人不得其解而妄加之也。下記云『刊本尺』，此注云『刊本一膚』，句法相同。盛氏謂『刊本一膚』謂刊此箭籌之本一膚耳，是也。賈疏云：《公羊傳》僖三十一年云：『膚寸而合。』何休云：『側手爲膚。』又《投壺》云：『室中五扶。』注云：『鋪四指曰扶，一指案：寸。四指則四寸。』引之者，証握膚爲一也。」楚扑長如筭。刊本尺。刊其可持處。【疏】正義曰：《校勘記》云：「注『可』，《通典》作『所』。」○韋氏協夢云：「長如筭，亦如筭長三尺也。刊本尺，亦刊之使白也。」胡氏肇昕云：「楚扑者，《學記》云：『夏、楚二物收其威也。』扑與夏、楚，蓋其物相同，故扑亦曰楚扑也。」君射，則爲下射。上射退于物一筭，既發，則荅君而俟。荅，對也。此以下，雜記

儀禮正義卷十 鄭氏注 鄉射禮第五

① 「節解」，當爲「儀禮鄭注句讀」。

② 「所」，原作「持」，今據《十三經註疏校勘記》改。

也。今文「君射則爲下」。【疏】正義曰：敖氏云：「君爲下射者，降尊以就卑，則不宜與卑者序，而從尊卑爲耦之常法也。」且下射之物在東，亦不失其主位也。上射，賓也。荅君，謂東面立而對之。射時進，左手微背於君，故既射則還對之。俟待君發也。」注云「此以下，雜記也」者，韋氏協夢云：「雜記燕射、大射之儀，蓋因射而類及也。」云「今文「君射則爲下」者，胡氏承珙云：「言「君射，則爲下射」者，謂君就下射之物。《大射儀》：「公將射，則賓降，適堂西，袒決遂，執弓，搯三挾一个，升自西階，先待於物北，一筈，①東面立。」②注云：不敢與君併，東面立，鄉君也。即此記所謂「君射則爲下射，上射退於物一筈」者也。③若如今文無「射」字，於義不明，故鄭從古文。」君樂作而后就物。君袒朱繻以射。君尊。【疏】正義曰：郝氏云：「君樂作而后就物，爲耦者先就物待也。君射袒朱繻，爲耦者肉袒也。」敖氏云：「樂，謂奏《狸首》也。」④此記先言樂，乃後見君之射儀，則是君之燕射於再射，即用樂行之，亦變於大射也。投壺之禮，因飲酒而爲之，於其再投即用樂，此意其類之乎？鄉射三射，乃用樂行之。」方氏苞云：「敖說未安。記於鄉射附載君射之儀，即謂大射之禮，三射樂作，君乃就物耳。燕禮附載燕射，語亦甚略。然曰

如鄉射之禮，則亦至三射然後用樂，何所據而知再射即以樂行乎？」小臣以巾執矢以授。君尊，不搯矢，不挾矢，授之稍屬。【疏】正義曰：敖氏云：「以巾執矢，敬君物，不敢褻也。《大射儀》曰：小臣師以巾內拂矢，而授矢於公。稍屬，蓋以巾拂之，而又藉手以執之也。」《儀禮釋官》曰：「小臣見《大射儀》。《周禮·大僕職》云：「王射則贊弓矢。」注：「贊，謂授之、受之。」諸侯小臣兼大僕之職，故君射，執矢以授。」若飲君如燕，則夾爵。謂君在不勝之黨也。賓飲君如燕，賓媵觚於公之禮，則夾爵。夾爵者，君既卒爵，復自酌。【疏】正義曰：敖氏云：「夾爵，謂夾君爵而自飲也。以《大射儀》考之，飲君之禮，其所以異於燕賓之媵觚者，非獨夾爵而已，記但以此言之，亦大略之說也。」盛氏世佐云：「如燕，謂自降洗，升酌以至酌膳，下拜諸儀皆如之也。則夾爵，此異於燕者也。侍射者，先酌散自飲，乃酌膳奉君，君飲訖，又酌自飲，故曰夾爵。《燕

①「上」，據《儀禮注疏》當有「北」字。

②「面」，原作「西」，今據《儀禮古今文疏義》改。

③「退」，原作「待」，今據《儀禮注疏》改。

④「謂」，原作「爲」，今據《儀禮集說》改。

禮》：賓餼觶于公，惟先自飲而已。敖云：「非獨夾爵而已」者，燕禮賓酌膳，坐奠于薦南，拜畢反位。此則酌膳以致，俟公卒觶而進受之，亦其異也。」君國中射，則皮樹中，以翻旌獲，白羽與朱羽糅。國中，城中也，謂燕射也。皮樹，獸名。以翻旌獲，尚文德也。今文「皮樹」爲「繁豎」，「糅」爲「紹」。古文無「以」。【疏】正義曰：《校勘記》云：「以翻旌獲」「翻」，誤作「割」。今文皮樹爲「繁豎」，徐本無「爲」字，「豎」作「豎」。《通解》兩見，二十一卷有「爲」字，二十卷無「爲」字，豎俱从豆。「古文無以」文，鍾本誤作「今」。注知城中是燕射者，賈疏云：以賓射，大射不在國中，故國中是燕射，燕在寢故也。云「以翻旌獲，尚文德也」者，賈疏云：「燕主歡心，故旌從不命之士。」云「今文「皮樹」爲「繁豎」，「糅」爲「紹」。古文無「以」者，胡氏承珙云：「古音皮讀爲婆，繁讀爲擊。皮，繁，聲之轉。樹與豎音義並同。鄭以皮樹爲獸名，必有所受之。今文「繁豎」蓋假借字，故不從。「糅」爲「紹」者，《詩·生民》：「或簸或蹂」。《說文·臼部》引作「或簸或舀」。糅之爲紹，猶蹂之爲舀，亦聲近故借，鄭亦不從之。古文無「以」，文不備，故又從今文。」胡氏肇昕云：「皮樹，未詳何獸。鳥獸之名字多假借，如此之類，鄭據古文即從古文作

之，非必以今文爲假借，而古文爲本字也。」於郊，則間中，以旌獲。於郊，謂大射也。大射於大學。《王制》曰：「小學在公宮之左，大學在郊。」間，獸名，如驢，一角。或曰：「如驢，歧蹄。」《周書》曰：「北唐以間。析羽爲旌。」【疏】正義曰：《校勘記》云：「注「如驢」，《通典》作「大於驢」。」歧蹄，陳本、《通解》作「歧」，徐、閩、監本作「歧」。案：《釋文》宋本亦作「歧」，是俗字。」云「大射於大學」者，賈疏云：「據諸侯而言也。天子大射則虞庠小學，以天子大學在國中，小學在郊。」云「間，獸名，如驢，一角。或曰：「如驢，歧蹄」者，案：《山海經》：「縣雍之山，其獸多間。」郭璞注云：「間，即羆也。似驢而歧蹄，角如靈羊。一名山驢。」引《周書》者，《逸周書·王會解》文。於竟，則虎中，龍旌。於竟，謂與鄰國君射也。畫龍於旌，尚文章也。通帛爲旌。【疏】正義曰：《校勘記》云：「虎中」下，《通典》有「以」字。」注云「於竟，謂與鄰國君射也」者，賈疏云：「此則賓射也，以其君有送賓之事，因送則射。」盛氏世佐云：「諸侯相朝，於是乎有賓射，賓射不必於竟也。天子賓射在朝，則諸侯可知矣。於竟，會遇也。」《曲禮》曰：「諸侯未及期相見曰遇，相見於卻地曰會。」是也。因會遇而射，其禮亦以賓射行之，記蓋據此而言也。《春秋

傳云「嘉樂不野合」，謂燕享也。射雖亦以樂節，然非合樂之謂，故得行於竟與？」大夫兕中，各以其物獲。

兕，獸名，似牛一角。【疏】正義曰：敖氏云：「其指大夫而言，大夫有上、中、下之異，故物亦有差。」張氏爾岐云：「大國、小國，大夫命數不同，故云『各以其物』。」注云「兕，

獸名，似牛一角」者，《爾雅·釋獸》云：「兕，似牛。」劉氏欣期《交州記》云：「兕出九德，有一角，角長三尺餘，形如馬

鞭柄。」是也。《說文》云：「兕如野牛，青毛，其皮堅厚，可

制鎧。古者射兕以服猛，故《鄉射禮》云：「大夫兕中。」兕善舐觸，故又以比戰士。士鹿中，翻旌以獲。謂小

國之州長也。用翻爲旌以獲，無物也。古文無「以獲」。

【疏】正義曰：《校勘記》云：「記七字，唐石經、徐本、《通典》、《通解》、楊氏、敖氏字俱有，今本並脫。注二十一字，

今本俱脫，徐本、《通解》俱有。《通典》引「謂小」至「無物」

十五字。」敖氏云：「翻旌，即白羽與朱羽糅者也。上記言

士禮云：旌各以其物，無物則以白羽與朱羽糅。此直見翻旌而已。」注云「古文無『以獲』」者，胡氏承珙云：「無以

獲，則文不備，故鄭不從。」唯君有射于國中，其餘

否。臣不習武事於君側也。古文「有」作「又」，今文無「其

餘否」。【疏】正義曰：敖氏云：「其餘否，謂人臣不爲射主

於國中也。君有射於國中者，以其於公宮爲之也。若人臣之家，其庭淺隘，器用又未必備，故射則必於鄉州之學行事焉。①是雖居於國，而欲射於其中，亦不可得也。此不惟見尊君之意，亦其勢然爾。」胡氏肇珙云：「注『臣不習武事於君側也』一語，立尊卑之準，定君臣之分，得先王制禮之精意。敖氏之說故與鄭異，乃不自知其謬也。」焦氏以恕曰：「春秋二百年中，臣凌其君者有之。臣不習武事於國中，設爲此制，以杜漸防微。以此坊民，猶有跋扈恣睢、尾大不掉者。若之何而有中庭淺隘、器用不備之說也？謬亦甚矣。」云「古文『有』作『又』」，今文無「其餘否」者，胡氏承珙云：「古『有』、『又』字多通，此有射於國中，對大夫、士不得在國射，故當作『有』。今文無『其餘否』，亦文不備，故鄭不從。」胡氏肇珙云：「有之言或也。君有射於國中者，言君或射於國中也。若大夫、士，則否矣。」君在，大夫射則肉袒。不袒纁繡，厭於君也。今文無「射」。【疏】正義曰：胡氏承珙云：「不從『今文無射』者，亦以文不備。」

①「學」，原作「國」，今據《儀禮集說》改。

儀禮正義卷十一 鄭氏注

受業江寧楊大培補

燕禮第六

鄭《目錄》云：「諸侯無事，若卿、大夫有勤勞之功，與羣臣燕飲以樂之禮。燕禮於五禮屬嘉禮。大戴第十二，小戴及《別錄》皆第六。」【疏】正義曰：賈疏云：「案：上下經注，燕有四等。《目錄》云：諸侯無事而燕，一也；卿、大夫有王事之勞，二也；卿、大夫有聘而來還與之燕，三也；四方聘客與之燕，四也。」方氏苞云：「疏所分四類似未安。本國之臣入貢，獻功於王朝，出聘於鄰國而還，勞之，一也；有大勳勞，功伐而特燕賜之，二也；無事而燕羣臣，三也；燕聘賓，四也。聘賓則入大門而奏《肆夏》，以主君出迎於大門之內也；本國之臣入至庭而奏《肆夏》，以君於是時始降階而揖之也。無事及

出聘者，不宜以樂納，其諸有大勳勞者與？」《儀禮釋官》曰：「《周禮·大宗伯》：『以饗燕之禮親四方之賓客。』賈疏：『饗，亨大牢以飲賓，獻依命數，在廟行之。燕者，其牲狗，行一獻，四舉旅，降，脫屣，升，坐，無算爵，以醉爲度，行之在寢。』饗禮今亡。此篇所載是諸侯燕其臣之禮，其天子之燕禮亦亡矣。又有與族人燕及祭畢之燕，皆與此禮別。」褚氏寅亮云：「待賓之禮有三：饗也，食也，燕也。饗重於食，食重於燕。饗主於敬，燕主於歡，而食以明養賢之禮。」^①饗則體薦而不食，爵盈而不飲，設几而不倚，致肅敬也。食以飯爲主，雖設酒漿，以漱不以飲，故無獻儀。燕以飲爲主，有折俎而無飯，行一獻之禮，脫屣，升坐以盡歡。此三者之別也。饗，食於廟，燕則於寢，其處亦不同矣。考之諸經，諸侯於己臣有燕而無饗、食。意者饗之禮，自待賓客外，惟施之於耆老孤子歟？」吳氏廷華云：「大射亦行燕禮，注遺之耳。抑以大射之燕別見於彼經，故未及之歟？」又注疏以此燕禮兼己臣與聘使言，下記及庭之賓當亦合己臣及聘使言之。鄭以王事之勞爲重，故詳

① 「養」，原作「善」，今據《儀禮管見》改。

重而略輕耳。據《郊特牲》疏，亦以己臣及聘賓爲說，則二說本無異同也。此疏因此記言「及庭」，彼言「入門」，遂斷爲己臣及聘使之分。不知禮莫重於《九夏》，既並許其奏《肆夏》，則及庭、入門，其輕者耳，而必致辨於其間，恐制禮者不如是之煩也。」

燕禮。小臣戒與者。小臣相君燕飲之法。戒

與者，謂留羣臣也。君以燕禮勞使臣，若臣有功，故與羣臣樂之。小臣則警戒、告語焉，飲酒以合會爲歡也。【疏】正義曰：張氏爾岐云：「自此至『公升，就席』，皆燕初戒備之事，有戒與設具，有納諸臣立於其位，有命大夫爲賓，有請命執役，有納賓，凡五節。」○「戒與者」，《校勘記》云：「徐本無『戒』字，《集釋》、《通解》、楊氏俱有。」注云「小臣相君燕飲之法」者，賈疏云：「《周禮》·大僕職云：『王燕飲，則相其法。』《小臣職》云：『凡大事佐大僕。』則王燕飲，大僕相，小臣佐之。此諸侯禮，降於天子，故宜使小臣相。是以下云：『小臣師一人在東堂下。』」注云：「師，長也。小臣之長一人，猶天子大僕，正君之服位者也。」是諸侯小臣當大僕之事。」云「戒與者，謂留羣臣也」者，賈疏：「謂羣臣留在國不行者。」朱子曰：「留羣臣，謂羣臣朝畢將退，君欲與

之燕，使小臣留之。疏說非是。」李氏如圭云：「留羣臣，謂羣臣留在國不出使者。若君臣無事，亦有燕，《魯頌》·振鷺之詩是也。」敖氏云：「與者，羣臣之與此燕者也，君所主與之燕者亦存焉。」郝氏敬云：「與燕諸臣未定爲賓，皆曰與。」焦氏以恕云：「燕之正賓，則卿、大夫、士聘來還者；至於與燕之臣，乃留在國不行者，故鄭云『留羣臣』是也。」①至朱子所云，則不同於注疏之說也。」吳氏廷華云：

「下卿、大夫入門後，君始命賓。此時尚無賓也，廣戒之耳。」膳宰具官饌于寢東。膳宰，天子曰膳夫，掌君

飲食膳羞者也。具官饌，具其官之所饌，謂酒也、牲也、脯醢也。寢，路寢。【疏】正義曰：「寢，路寢」，《校勘記》云：

「『路』，徐本作『露』。張氏云：『注云：寢，露寢。案：疏露作路，後記之注亦作路。從疏。』案：後注『路堵父』，《國語》作『露』，露，路古多通用。」○褚氏寅亮云：「此禮先設君與賓之席，獻後乃設卿、大夫之席，故具饌之文在設席前。《大射儀》則君、賓、卿、大夫、諸公皆同時先定位，故官饌之文在設席後，實皆止一次饌也。敖氏因《少牢禮》有改饌之節，遂謂先具諸官所當饌之物，既設賓席，官乃改饌

①「云」，原作「公」，今據《儀禮彙說》改。

之。恐未然。玩「官饌」二字，專指諸臣薦羞而言。諸臣薦羞，無論貴賤，皆在寢東。《大射儀》「官饌不言其處，以在學也。」饌公薦俎之處，兩篇俱空其文，尊君也。然《大射儀》云：「宰胥獻脯醢，由左房；庶子設折俎，升自西階。則知君之薦俎饌于東房矣。此篇但云「士薦脯醢，膳宰設折俎，升自西階」，而不言由左房，以互見於《大射儀》也。至《公食禮》「宰夫之具饌于東房」者，尊賓而同於君饌也。庶羞自門外人，則又食禮之異於燕禮也。」埤案：《義疏》云：「《儀禮》具饌，或在房，或在東，西堂下，或在門外東西，經俱分別言之。如云薦脯出自左房，又云「亨于堂東北」，又云視饔西堂下，又云「亨于門外東方」，「側亨于廟門外之右」，皆是也。此經明言寢東，而不言門及堂，則在寢外東壁之東可知。」注云「膳宰，天子曰膳夫，掌君飲食膳羞者也」者，李氏如圭云：「天子之宰夫，下大夫，膳夫，上士。諸侯膳宰蓋亦卑於宰夫。燕禮膳宰具饌，而公食大夫宰夫具饌者，彼食異國之大夫，敬之，異於己臣子也。」《釋官》曰：「天子曰膳夫，諸侯曰膳宰，名異實同，與宰夫無涉。春秋時，侯國宰夫之官廢，因通謂膳宰爲宰夫。注家不能辨別，二職由是遂亂。不知周公制禮時，諸侯有膳宰，有宰夫，職守不同，此經固自可證也。膳宰見《禮記·文王

世子》、《玉藻》、《左傳》、《公羊傳》、《國語》，皆當天子膳夫之職。」云「具官饌，具其官之所饌，謂酒也、牲也、脯醢也」者，敖氏云：「具官饌，具諸官所當饌之物也。此時所具者，其薦羞乎？及既設賓席，官乃改饌之。《大射》云「官饌」是也。」方氏苞云：「官饌，謂籩人、醢人、庖人、外饗所共薦羞牲體也。不曰命諸官共饌，^①而曰「膳宰具官饌」，見膳宰親監視而具陳寢東，以俟時而進也。」韋氏協夢云：「此膳宰具官饌，具之而未設。大射儀設席後之官饌，乃設之也。」云「寢，路寢」者，賈疏云：「以其饗在廟，服朝服。下記云：「燕，朝服于寢。」正處在路寢，不在燕寢可知。」敖氏云：「寢東，蓋其東壁之東也。」郝氏云：「^②「寢東，路寢東房。《鄉飲》亦云「東壁」，云「左房」，羞由東出也。」樂人縣。縣，鐘磬也。國君無故不撤縣。言縣者，爲燕新之。【疏】正義曰：《校勘記》云：「注「縣鐘磬也」「鐘」，徐、葛、《集解》、《通解》俱作「鍾」。後「賓執脯以賜鍾人于門內雷」，周氏學健云：「鍾鼓之鍾，古皆作鍾。三禮無鍾字。俗本或作鐘，皆後人所改也。」案：後凡「鍾」字放此，不悉

① 「共」，原作「具」，今據《儀禮集說》改。

② 「云」，原脫，今據《儀禮正義正誤》補。

校。『磬』，徐本作『磬』，後同。『官縣者』，『官』，徐本、《集釋》、楊氏俱作『言』，與單疏合。○賈疏云：『《周禮·春官·大司樂》云：「凡樂事宿縣。」又《樂師》云：「凡樂成，則告備。」是天子有大司樂，并有樂師之官。諸侯無大司樂，直有大樂正、小樂正，以其諸侯兼官，此二者皆當天子樂師縣樂之法。《周禮·眡瞭職》云：「掌大師之縣。」鄭注云：「大師當縣，則爲之。」案：下僕人相大師，則諸侯無眡瞭，則使僕人縣樂，大師以聲展之，樂師又監之。」盛氏世佐云：「此縣亦使眡瞭，疏誤。說見後。」韋氏協夢云：「疏說，盛氏已辨之矣。然則所謂樂人者，即眡瞭與？眡瞭而謂之樂人者，以其爲掌樂事之人而已。人者，賤辭也。」方氏苞云：「燕與大射使小臣、僕人相工，所以崇賓祭。大射所相不過大師、小師、上工耳。燕禮，工四人，瑟二人，小臣不能偏相，非眡瞭孰任之？且小臣授瑟而降，相祭者何人乎？凡大祭祀，聲樂備具，即事之工甚多，非用眡瞭，不能使有位者偏相。小祭祀及學校中樂事，君或不親，則小臣、僕人未必與。且眡瞭所自共之樂事，將孰使之？」《釋官》云：「案：《周禮·樂師》：「凡樂，掌其序事。」《小胥》：「正樂縣之位。」是縣樂諸官皆有其事，故總言樂人。疏謂諸侯無眡瞭，非是。《周禮·眡瞭職》云：「凡樂事相瞽。」

《序官》：「瞽矇，上瞽四十人，中瞽百人，下瞽百有六十人。」共三百人。眡瞭之數亦如之。然則每瞽一相自不可少。諸侯眡瞭之數不可知，亦必有專其職者。燕禮小臣相工，大射僕人相工，因賓射重其事耳，非其常職。且考之於經，小臣相工，不過納工之頃。至工既升堂，小臣授瑟而降，主人獻工，西階上相祭者又何人乎？是工別有相明甚。《左傳》：「師慧過宋朝，將私焉。」相曰：「朝也。慧曰：無人焉。相曰：朝也，何故無人？」是諸侯樂工亦有相可知。夫瞽之於相，不可須臾離。周公設官，使眡瞭專其職，因兼習樂事。庶作樂之際，工與相兩相諳熟，而器數之用亦從而亂。此相工所以使眡瞭之意也。《周禮注》云：「瞭，目明者。」官名眡瞭，當即取爲瞽眡之義。若小臣、僕人之屬，因各有其職，^①安得專以相工爲事乎？」注云「縣，鐘磬也」者，敖氏云：「此縣蓋在階間，磬在阼階西南面，鐘、鐃次而西，建鼓在西階東南，鼓鞀在其東。國君燕禮，輕於大射，故不備樂，且於其日乃縣之，而與常時同。《鄉飲酒·記》曰：「磬，階間縮雷，北面鼓之。」盛氏云：「縣，軒縣也。軒縣之法，見《大射禮》。敖引《鄉飲酒

①「因」，原作「固」，今據《儀禮釋官》改。

禮《特縣況之，非。」張氏惠言《儀禮圖》云：「『樂人縣』不言所縣，^①注以爲常縣新之，則此軒縣也。《大射禮》：『一建鼓在西階之東，南面。』注云：『備三面耳。無鍾磬，有鼓而已。』疏云：諸侯軒縣，皆有鼓與鍾、磬、鐃。然則大射阼階西之建鼓、應鼗本東縣之鼓，西階東之建鼓則北縣之鼓。以東西縣例之，蓋北縣東上。磬、鍾、鐃、鼓，以次而西，故鼓在西階東也。《大射》注又云：『應鼗，應朔鼗也。先擊朔鼗，應鼗應之。』則東西縣兩鼗相應。若北縣，不知有鼗與否。以無南縣相應，故疑闕之。又襄十一年《左氏傳》鄭賂晉侯歌鍾二肆及其鐃磬。疏云：『歌鍾二肆兼有磬。』編縣之鐃是大鍾，磬是大磬，皆特縣之。據鄭玄禮圖如此也。案：此則縣中當有特磬，但不知每縣有否，今唯於北縣著之。東西縣且依大射，以俟考正。又《大射》疏云：周人縣鼓、建鼓，殷法略於射，故用先代鼓。則此常縣當用縣鼓。」張氏惠言云：《大射》：建鼓在阼階西南，^②應鼗在其東。^③注：『在東，便其先擊小、後擊大也。』然則鼓鼗之設，必鼗在鼓右。又《鄉射》云：縣于洗東者，洗當榮。則樂縣東於堂。鄉射辟射位，移階間之縣於東方，宜即判縣位也。縣云階東西者，遙繼言之。云「國君無故不徹縣」者，《曲禮》云：「大夫無故不徹縣。」不言國君，鄭以大夫推

之，知國君亦然也。云「言縣者，爲燕新之」者，李氏如圭云：「燕在路寢，有常縣之樂，今更整理之而已。大射在學宮，學宮不常縣，故前射一日縣，且具辨樂縣之位。」設洗簋于阼階東南，當東雷。壘水在東，簋在洗西，南肆。設膳簋在其北，西面。設此不言其官，賤也。當東雷者，人君爲殿屋也。亦南北以堂深。肆，陳也。膳簋者，君象觚所饌也，亦南陳。言西面，尊之，異其文。【疏】正義曰：「設洗簋」，敖氏云：諸篇於此但云「設洗」，無連言「簋」者，而此有之，衍文耳。又下別云「簋在洗西」，則於此言「簋」，文意重複，似非經文之體；且簋在洗西，亦不可以東雷爲節，其衍明矣。褚氏寅亮云：「若果司宮設之，則此經宜云『司宮設洗簋』。下經宜蒙此經，而直云『尊于東楹之西』矣，何以此不言司宮，^④而下始言司宮？故注云『不言其官，賤也』。《集說》據《大射儀》以決司宮設洗，但彼亦無明文也。『洗簋』二字不妨連言，何

①「縣」，原作「賜」，今據《續清經解》本改。

②「建」、「南」，二字原脫，今據《儀禮圖》補。

③「東」下，《儀禮圖》有「南鼓」二字。

④「此」，原脫，今據《儀禮管見》補。

必武斷「簠」爲衍文？」○敖氏云：「洗與疊，蓋瓦爲之。下云君尊瓦大，則此可知矣。」盛氏世佐云：「賈云：洗，士用鐵，大夫用銅，諸侯白銀，天子黃金。夫一承棄水之器，而以金銀爲之，侈矣。敖氏說蓋得之矣。疊字從缶，亦瓦可知也。鄭云：『尊卑皆用金疊。』此酒器也，以木爲之，而飾以金，《詩》云『我姑酌彼金疊』是也。盛水之疊，豈其比哉？」又敖氏云：「先設洗西之簠以爲節，故膳簠後設也。」

注云「設此不言其官，賤也」者，賈疏云：「《少牢》：『司官設疊水，大夫兼官。此國君禮，或可別人爲之，但無文，故鄭不細辨。』敖氏云：『設四器，亦司官也。見《大射》與《少牢禮》，此經省文耳。』云「當東雷者，人君爲殿屋也」者，賈疏云：「漢時殿屋四向流水，故舉漢以況周。言東雷，明亦有西雷。」李氏如圭云：「雷，屋檐滴水處也。殿屋四向流水，所謂四阿，故有東雷。此設洗處與士禮處同。」^①大夫以下無東雷，洗當東榮耳。云「膳簠者，君象觚所饌也」者，君物而曰膳者，以其善於諸臣所用者而言也。云「亦南陳，言西面，尊之，異其文」者，韋氏協夢云：「設洗簠云『南肆』，設膳簠云『西面』，互文也。」盛氏云：「此二簠在堂下，一盛諸臣飲器，一盛君飲器。而無堂上簠者，蓋堂上之簠所以盛爵，燕飲輕，獻不用爵故也。」司官尊于東楹之

西，兩方壺，左玄酒，南上。公尊瓦大兩，有豐，冪用綌若錫，在尊南，南上。尊士旅食于門西，兩圜壺。司官，天子曰小宰，聽酒人之成要者也。尊方壺，爲卿、大夫、士也，臣道直方。於東楹之西，予君專此酒也。《玉藻》曰：「唯君面尊。」玄酒在南，順君之面也。瓦大，有虞氏之尊也。《禮器》曰：「君尊瓦甒。」豐，形似豆，卑而大。冪用綌，若錫，冬夏異也。在尊南，在方壺之南也。尊士旅食者用圜壺，變於卿、大夫也。旅，衆也。士衆食，謂未得正祿，所謂庶人在官者也。今文「錫」爲「綌」。【疏】正義曰：《校勘記》云：「《左玄酒南上》『南』，韋氏作『東』。『冪用綌若錫』『冪』，徐本、楊氏作『甒』，《通解》、敖氏作『冪』。」注云「司官，天子曰小宰，聽酒人之成要者也」者，張氏爾岐云：「諸侯之司官與天子之小宰所掌同。」盛氏世佐云：「司官，即天子之宮人也。《周禮·宮人職》云：『掌王之六寢之修。』又云：『凡寢中之事，埽除、執燭、共爐炭，凡勞事。四方之舍事亦如之。』此燕於路寢，六寢之一，而設尊、筵賓又皆勞事，故以司官

① 上「處」，原作「者」，今據《儀禮集釋》改。

爲之。下經云「司宮執燭于西階上」，是其執燭之證矣。大射於郊而亦用司宮者，所謂「四方之舍事亦如之」也。宮人中士，則司宮下士也。小臣於天子爲上士，以小臣設公席，以司宮設臣席，亦其差也。鄭乃以小宰當之，誤矣。小宰，諸侯之小卿也。以尊官而執賤役，可乎？又主人獻卿之時，經云：「司宮兼卷重席，設于賓左，東上。」疏云：「案：《大射》：席小卿，賓西東上。」注云：「席於賓西，射禮辨貴賤也。以此言之，燕禮主歡，不辨貴賤，小卿與大卿皆在賓東。」若然，則小宰爲小卿之首，是時亦當受獻，乃爲己設席，且爲次於己者設席，必無是理。豈可以聽酒人之成要而遂當設尊之役乎？」《釋官》曰：「案：《公食大夫禮》注云：「司宮，大宰之屬，掌宮席者。」疏以《周禮》宮人當之，是也。此注及疏釋爲小宰，^①誤矣。小宰，卿貳之官，秩尊職重，不得以司宮當之。諸侯五大夫，司徒下置小宰。《曾子問》明有小宰之官。疏謂「諸侯無小宰」，^②非矣。《周禮》：「宮人，中士四人，下士八人。」諸侯降天子一等，當以下士爲之。《左傳》襄九年：「令司宮，巷伯儆宮。」杜注、孔疏解爲內小臣奄人者，^③亦誤。」吳氏廷華云：「小宰爲大宰之貳，掌六典，其職重。若行禮陳設，不過小臣之事。所謂司宮，當是宮人及司尊彝之屬耳。鄭以司宮爲小宰，賈

疏舉《小宰》經文以解之。不知小宰所掌不一，官刑特其一耳，烏得遽以司宮比之？又下言「司宮執燭」，則直與宮正執燭等，烏得以爲小宰？至所謂成要即月要，歲會計簿耳。受酒正之計，即可以設尊傳會之，則太宰掌羞服之式，注以羞爲飲食，豈亦可以設尊歸之？「云「尊方壺，爲卿、大夫、士也，臣道直方。於東楹之西，予君專此酒也」者，敖氏云：「先尊方壺於楹西以爲節，乃設公尊。與上文後設膳簠之意同。臣專用壺，又以方者，且無冪，爲與君尊相屬，宜遠別之也。」張氏爾岐云：「公席阼階上西向，尊在東楹之西，南北並列，尊面向君設之，與鄉飲酒賓主共之者不同，故注云「予君專此酒也」。」胡氏肇昕云：「臣道直方，解經專用方壺之故。《易·坤卦》云：「妻道也，臣道也。」又云：「君子敬以直內，義以方外。」注意本此。」引《玉藻》者，賈疏云：「欲見尊面向君，順君面，非賓主共之意。」李氏如圭云：「鄉飲酒尊于房戶之間，賓主共之。此尊近東者，君尊，專大惠也。君西鄉，尊東面，以君之左爲上，故玄酒皆

①「及疏」，原脫，今據《儀禮釋官》補。

②「謂」，原脫，今據《儀禮釋官》補。

③「小」，原脫，今據《儀禮釋官》補。

在南。」^①敖氏云：「左玄酒，據設尊者而言也。蓋凡設尊者，皆面其鼻。《玉藻》云：『惟君面尊。』是尊鼻東向也。此設尊者西面，故玄酒在南而爲左。若以尊言之，則爲右矣。」凌氏《釋例》云：「案：疏云：『《少儀》云：尊壺者面其鼻。鄭注云：鼻在面中，言嚮人也。』據《燕禮》向君而言。『《少儀》又云：尊者以酌之左者爲上尊。《鄉飲酒》云：尊兩壺于房戶之間，玄酒在西。又《鄉射》云：尊于賓席之東，兩壺，斯禁，左玄酒。鄭注云：設尊者北面，西曰左。此皆據酌者北面而言。若據設尊之人及尊面而言，即南面，以右爲尊。』詳疏意，以爲《鄉飲》、《鄉射》設玄酒之位，與《燕禮》若有異者。考《鄉飲》、《鄉射》尊面向南，則以西爲上；《燕禮》、《大射》尊面向東，則以南爲上。經例固不異也。又案：疏云：『若據酌者，不得背君而西面，當尊西東面，則酌者之右爲上尊，是以下文媵爵于公者交於東楹北也。』^②考《燕禮》主人酌賓訖，二人媵爵于公，升自西階，序進，酌散，交于楹北，降，阼階下皆奠觶，再拜稽首。注：『楹北，西楹之北也。交而相待於西階上，既酌，右還而返，往來以右爲上。』注云西楹北，而前疏云東楹北。據此節疏云：『二大夫盥手洗爵訖，先者升西階，由西楹之北向東楹之西，東面酌酒訖，右還，由西楹北向西階上，北面。後者

升西階，亦由西楹之北向東楹之西。酌酒訖，亦由西楹之北向西階上，北面相待，乃次第而降。」^③蓋媵爵者二人升降皆由西階，故注云交于西楹北，而酌酒則在東楹之西，往來皆折旋，故前疏云「交於東楹北」。不然則前疏「東」字，或是「西」字之誤也。「云「瓦大，有虞氏之尊也」者，《明堂位》云：「泰，有虞氏之尊也。」有虞氏上陶，故用瓦大。引《禮器》者，證瓦大即瓦甗也。云「豐，形似豆，卑而大」者，案：豐以承尊，故卑而大，欲其安穩也。云「冪用綌，若錫，冬夏異也」者，葛之纍者曰綌。《喪服傳》云：「錫者何也？麻之有錫者也。錫者十五升，抽其半，無事其纒，有事其布，曰錫。」夏宜綌，冬宜錫，故云「冬夏異也」。云「在尊南，在方壺之南也」者，朱子曰：「謂瓦大在方壺之南耳。疏云：冪未用而陳於方壺之南，不雜於方壺、瓦大之間。誤也。若然，則正在二者之間矣，何得言不雜邪？」云「尊士旅食者，用鬯壺，變於卿、大夫也」者，李氏曰：鬯壺無冪，以尊厭卑也。敖氏曰：「此尊，士旅食之尊，亦當北面，與

①「玄」，原作「言」，今據《儀禮集釋》改。

②「以」，原脫，今據《禮經釋例》補。

③「乃」，原作「及」，今據《禮經釋例》改。

《大射》同，惟設之深淺異耳。方、圜壺亦皆瓦爲之。」張氏曰：「圜壺，無玄酒。」云「旅，衆也。士衆食謂未得正祿，所謂庶人在官者也」者，賈疏云：「庶人在官者，謂府史胥徒。」盛氏曰：「士旅食者，蓋下士也。下士與庶人在官者同祿，故謂之「士旅食」與？」《周禮》云：「旅下士。」方氏苞云：「注說非。士有不與燕，而府史胥徒乃得與獻酬，慎矣。《周官·司士職》：凡會同、賓客，作士從。此經所謂士即《司士》之所作也。蓋升於司馬而未授官之士，雖未受職而已不家食，又羣萃而食於公所，故謂之旅食也。《諸子職》：「會同、賓客，作羣子從。」^①下經所獻庶子，即《諸子》所謂羣子也。會同賓客皆使觀禮，則燕羣臣、大射以擇士，必使觀禮而習事可知矣。升於司馬，入於國學，乃異日公、卿、大夫之選也。故雖無職事而得獻，所以興起之。」《釋官》曰：「士旅食，謂未得爵命之士。《王制》云：「大樂正論造士之秀者，以告於王而升諸司馬，曰進士。司馬辨論官材，論進士之賢者，以告於王，而定其論。論定然後官之，任官然後爵之，位定然後祿之。」蓋上士、中士、下士，此正爵也。下士食九人以上，此正祿也。學校之士升於司馬，隸於司士，論定後官而未得正爵、正祿者，則羣食於公，謂之旅食。《檀弓》所謂「仕而未有祿者」，《司士職》所謂

「以久奠食」，即此。但未得正爵，故謂之「庶人在官」。趙注《孟子》亦云：「庶人在官者，未命爲士者。」非謂府史胥徒也。此士旅食，即卿、大夫、士之子，國之後選之士，後日任爲卿、大夫、士者，故特尊以圜壺，所以寵異之。若府史胥徒，官長所除，不命於國君，當爲燕之所不及，安得與諸臣相獻酬乎？」吳氏廷華云：「經「旅食」本不可解。據宮伯掌士庶子宿衛，諸子掌國子戒令，諸子又名庶子，則國子即士庶子也。無祿而有稍食，故謂之「士旅食」與？此及《大射》皆有庶子一官，或率之觀禮，又寢其宿衛地。《外饗》有饗士庶子禮，其與於燕亦宜。案：《義疏》云：大射尊士旅食於西鑄之南，疏云亦鼓南，即燕禮門西。案：大射辟射位，故西繼鑄南。《燕禮》云門西，則當塾者，或射則當如大射也。」胡氏肇昕云：「盛氏以下士當之，非。方氏說是，但不明辨賈疏之誤，而反以詆注，亦非是。」云「今文「錫」爲「錫」者，《說文》：「錫，細布也。」段氏玉裁注云：「《燕禮》注：「今文錫爲錫。」錫，易也。治其布，使滑易也。今文「錫」，其本字；古文「錫」，其假借字。《子虛賦》「被阿錫」即《列子》之「衣阿錫」。古者布十五升爲最細，十五升

① 「從」，原脫，今據《儀禮析疑》補。

布成，治之使滑易，是曰錫。若《喪服傳》則半十五升而治之，故錫衰之錫與細布之錫其實不同。」胡氏承珙云：「案：錫與錫古字通，皆取滑易之義，同爲細布，或作「錫」，或作「錫」耳。鄭注《大射儀》云：「錫，細布也。」與《說文》「錫」訓同。至錫衰，乃謂衰之滑易者亦得錫名，非錫名專屬之衰。故《喪服傳》注云：「謂之錫者，治其布使之滑易。」鄭非不知錫衰之非即此錫也。」司宮筵賓于西，東上，無加席也。筵，席也。席用蒲筵，緇布純。

無加席。燕，私禮，臣屈也。諸侯之官無司几筵也。【疏】

正義曰：蔡氏德晉云：「戶西，室戶之西，牖間南向，賓位也。東上，席首在東也。」盛氏世佐云：「戶西，牖前也。寢

亦有東西房，當以牖前爲客位。若戶牖之間，則堂之中矣。

郝氏云：室戶西牖間，客位也。非。據經公席設於將即位

之時，與《大射儀》異。敖氏云：「設賓席當後於公席，乃先

言之者，終言司宮之事耳。」非。注云「筵，席也。席

用蒲筵，緇布純」者，敖氏云：「此以《公食大夫》及《鄉飲》、

《鄉射》記定之也。」蔡氏云：「案：《詩》：「肆筵設席。」先儒

謂下鋪爲筵，上加爲席。然筵、席亦通稱矣。以此節考之，

其說不易。梅氏誕生乃謂重曰筵、單曰席者，誤也。」云「無

加席，燕，私禮，臣屈也」者，盛氏曰：「大射賓有加席，而此

無之，燕禮輕也。公食大夫有加席，異國之臣得伸也。」褚氏寅亮云：「兩君相見各三重席，不待言矣。其待異國之臣，則食禮有加席，而燕禮無加席。以食爲聘使，而燕則以介爲賓也。賓無加席，故主君亦無加席，即《郊特牲》所云：三獻之介，君專席而酢，示降尊以就卑。是也。饗重於食，食有加席，饗更可知。若飲已臣，則大射賓有加席，禮重也；燕賓無加席，禮輕也。公則仍有加席矣，以賓非外臣也。莞筵一重，加纁席再重，合爲三重。注云「私禮」，對公食、大射而言也。」方氏苞云：「燕以閒暇爲須臾之歡，故卿重席，賓無加，一循其常。大射辨等威，則特加席以致隆於賓，示尊賢之義與貴貴同也。」云「諸侯之官無司几筵也」者，賈疏云：「對天子有司几筵、布席，諸侯兼官，使司宮設尊并設席。」《釋官》曰：「注謂諸侯司几筵無專官耳，未嘗云以司宮兼之也。疏誤申注意。《燕禮》司宮設賓席，小臣設公席。《大射》亦然。《聘禮》：禮賓，宰夫徹几改筵。《公食大夫禮》：「宰夫設筵，加几席。」不盡司宮掌之也。射人告具。告事具於君，射人主此禮，以其或射也。【疏】正義曰：賈疏云：「《大射》『告具』之上有「羹

①「終」，原作「中」，今據《續清經解》本改。

定」。此不言者，文不具也。」敖氏云：「是時公蓋在阼階東南，南鄉。射人北面告之。」張氏爾岐云：「《周禮·射人》掌三公、孤、卿、大夫之位，又以射法治射儀。」吳氏廷華云：「《周禮·射人》：『祭祀則贊射牲，相孤、卿、大夫之法儀。』此經以射人主之，則相法儀不獨祭祀矣。注以『或射』言之。案：下文『若射』之云，則射否未定，焉有射未定而先用此主射之官邪？」

右告戒設具

小臣設公席于阼階上，西鄉，設加席。

公升，即位于席，西鄉。《周禮》：諸侯酢席，莞筵紛

純，加纁席畫純。後設公席者，凡禮，卑者先即事，尊者後也。【疏】正義曰：注「諸侯酢席」，《校勘記》云：「酢」，

徐、陳、《集釋》、楊氏俱作「肸」，嚴、閩、監本、《通解》、敖氏俱作「昨」。○敖氏云：「加席別言『設』，見其更取而設之

也，亦可見設加席之法矣。」①高氏愈云：「公不南面而西

鄉，從賓主之禮也。賓無加席，而公設加席，君臣之義辨矣。」方氏苞云：「君常南面疑立，席雖西鄉，而即席仍南面，故再言『西鄉』以著其位。」焦氏以恕云：「居主位則不

南面，故復言『西鄉』以明之。」注引《周禮》者，張氏爾岐

云：「《司几筵》文。昨，音義如酢。酢席，祭祀受酢之席

也。引之者，欲見燕席與酢席同。」云「後設公席者，凡禮，

卑者先即事，尊者後也」者，朱子曰：「此篇與《大射》雖設

席先後不同，然皆公先升即位，然後納賓，非卑者先即事

也。但其言偶不同耳，不當據此便生異義也。」盛氏世佐

云：「大射之禮重於燕，燕禮之賓卑於大射，於加席之有無

見之矣，惟設席之次亦然。大射先設公席，後設賓席，賓猶

得與公序也。②此設公席在告具之後，則不與賓序矣。君

益尊而賓益卑，此其所以異與？注說宜不為朱子所取

也。」小臣納卿、大夫，卿、大夫皆入門右，北

面東上。士立于西方，東面北上。祝史立

于門東，北面東上。小臣師一人，在東堂

下，南面。士旅食者立于門西，東上。納者，

以公命引而入也。自士以下，從而入即位耳。師，長也。

小臣之長一人，猶天子大僕，正君之服位者也。凡入門而

①「亦」，原脫，今據《儀禮集說》補。

②「益」，原作「蓋」，今據《續清經解》本改。

右，由闌東；左則由闌西。【疏】正義曰：賈疏云：「卿、大夫入門右，北面東上，此是擬君揖位。君爾之，始就庭位。士立於西方，東面北上，此士之定位。士賤，不待君揖即就定位也。」李氏如圭云：「立者，位於此也。西方，堂下位也。門東、門西，門內位也。凡位堂下東方者西面，西方者東面；位門內者皆北面。小臣師在東堂下南面，則東堂下在堂之東。」注云「納者，以公命引而入也。自士以下從而入，即位耳」者，敖氏云：「納卿、大夫之辭蓋曰：『君須矣，二三子其人也。』卿、大夫入門右之位，蓋近庭南而當階。士西方之位亦宜於庭少南，而東西則當西序；門東之位近於門也，門西亦如之。此北面者東上，東面、西面者北上，皆統於君。」韋氏協夢云：「鄉飲、鄉射，皆主人既速賓，然後賓入。燕禮不速賓，故小臣出納之。」埤案：《義疏》云：「大夫初在門右，少進，則視入門之位爲少北。賓初在大夫中，聞命少進，禮辭，則視前少進之位又北矣。蓋由南漸北，凡三易位。又門外賓位當在門西。若卿、大夫應入門右，則未入門時在門東可知。又注以納爲引而入，則納者當先傳命於門外；納賓者當西面鄉賓，①納卿、大夫者當東面鄉卿、大夫；人則少先於賓、卿、大夫也。」云「師，長也。小臣之長一人，猶天子大僕，正君之服位者也」者，方

氏苞云：「天子小臣四人，侯國宜半之，特標一人明一正一師也。《大射禮》：小臣正相君，小臣師佐之。此篇相工授瑟者，小臣二人在東堂下者，師；則設公席納卿、大夫者，必正也。無事不升堂，故小臣師立於東堂下南面，預擬公降立，則待公之右，猶大射席孤於阼階北面，而待公之左也。公降，小臣正宜從降，與師並立東堂下，而文略。以公升之後，小臣自阼階下北面請事，則其位在東堂下可知矣。《釋官》曰：「案：注疏謂諸侯兼官，無大僕，以小臣當之，是矣；謂此經小臣師一人爲小臣之長，恐非。《周禮·大僕職》曰：『王燕飲則相其灋。』諸侯既以小臣之長一人當天子大僕，則相君燕飲正其職，安得其長反無事在堂下也？大射有小臣師，又有小臣正。《周禮·宰夫職》：『一曰正，掌官灋以治要；二曰師，掌官成以治凡。』則師自是正之佐，非其長。經凡言司馬正、司馬師、僕人正、僕人師者，例皆然，不當此獨以師爲長，而移易其名也。經云：『小臣納卿、大夫。』又云：『小臣師一人在東堂下。』《大射儀》云：『小臣師納諸公、卿、大夫。』又云：『小臣師從者在東堂下。』與此異者，大射事繁，正與師各有其事，故在東堂

①「賓」，原作「面」，今據《續清經解》本改。

下，唯言從者。《燕禮》則戒與者，設公席納卿、大夫，請執冪者，與羞膳者，請媵爵者，請致者，以及辭臣下拜之事，皆小臣正爲之。而小臣師無事，故特著其位在東堂下也。言一人者，據《士喪禮》諸侯小臣雖有四人，以《燕禮》及《大射》行禮時考之，止一人爲正，一人爲師也。凡正與師，皆隨事分別長貳之稱，非其官之本號。此言小臣師，則上言『小臣』者爲小臣正明矣。例見《大射》『小臣』下。」吳氏廷華云：「此注以師爲長，謂小臣師爲小臣之長；《大射》注又以正爲長，謂小臣師爲正之佐；二說不同。愚謂師固有長義，亦有衆義，正則止有長義。既有正，則師止當以衆言，《大射》注以師爲正之佐是也。此注又以師爲長，是一官有二長矣。賈謂此小臣師即小臣正，非也。」張氏惠言云：「《大射儀》：『小臣師從者在東堂下。』注：『小臣師，正之佐也。正相君，出入君之大命。』與此注不同。疏云：燕禮小臣師，即射禮小臣正。大射小臣正相君，小臣師佐之，常在君之左右，不在堂下之位，故惟云小臣師者在堂下。燕輕，宜有小臣師及從者相君燕飲，小臣正一人無事，得在堂下。案：此云小臣師與射禮小臣師正同。射禮小臣正相君，小臣師佐之，故經分言正與師。燕禮皆小臣正爲之，故凡事唯言小臣，不明爲正。小臣正職事皆在阼階下，其

立位當在階前北面，故此及射禮皆小臣師獨在東堂南面之位，而正之位不著。注爲二說，似失之。射禮從者在小臣師東，此不見從者，下經小臣納工相工人者，即小臣從者也。其位當在西縣北，如射禮僕人也。下經獻左右正與納小臣于阼階上注云：「左右正，謂樂正、僕人正也。」小樂正立于西縣之北；僕人正、僕人師、僕人士立于其北，北上；大樂正立于東縣之北。此鄭取射禮爲說，以校經之左右正者，當云：小樂正立于西縣之北，小臣從者立于其北。大樂正立于東縣之北，而無僕人正。又大射正爲擯，擯者遂爲司正。又有司射注云：射人則小射正也。《燕禮》射人納賓，射人請立司正，射人遂爲司正。下云「若射」，則大射正爲司射，然則射人爲司正，非大射正。疏云：「或大射正爲擯，或小射正爲擯。」非也。射人者，小射正。小臣師者，小臣之佐。射、燕禮所用雖異，其名不殊。獻士時乃薦司正與射人一人，此一人當是大射正。亦云射人者，略之。燕禮略於射，故射人告具，即射人爲擯，至射而後大射正親其事。大射主於射，故射人告具，大射正爲擯，遂爲司正以監射也。至小臣正君之服位，皆正親其事，不得有異。射人、司士獻在饌南，其始位亦宜在此。」云「凡人門而右，由闕東；左則由闕西」者，賈疏云：「凡人門而右，由闕東」

者，臣朝君之法；「左則由闕西」者，聘賓入門之法。」敖氏云：「凡己之臣子入門而左右，皆由闕東。」盛氏世佐云：「士立于西方，是入門左矣，然亦由闕東。」《曲禮》云：「士、大夫出入君門，由闕右，是也。」公降立于阼階之東南，南鄉。爾卿，卿西面北上；爾大夫，大夫皆少進。爾，近也，移也。揖而移之，近之也。大夫猶北面少前。【疏】正義曰：《曲禮》云：「揖人必違其位。」故公將揖卿、大夫，而降立也。褚氏寅亮云：「公立阼階東南，而南鄉對卿，則卿初位遙直東序而不當東階明矣。」敖氏云：「古文爾、邇通。爾，揖之使進而近於己也。公俟其入，乃降而揖之，明降尊之義也。大夫不西面，自別於卿也。君於卿與大夫各旅揖之。《大射儀》：「小臣師詔揖諸公、卿、大夫。」」

右君臣各就位次

射人請賓。

命當由君出也。

【疏】正義曰：《校勘

記》云：「射人」「人」，誤作「入」。○賈疏云：「不辨射人面位者，以其君南面，射人北面可知，故不言。」敖氏曰：「請於君，謂使誰為賓也。」《釋官》曰：「案：大射官多，辨

尊卑，有大射正、小射正，故云「大射正擯」。此燕不主於射，無尊卑之分，故直云「射人」。其實射人亦大射正，以其為擯同也。疏謂司射次於小射正。案：下云「若射」，則大射正為司射。《大射》注云：「小射正，司射之佐。」則疏說非也。」公曰：「命某為賓。」某，大夫也。【疏】正義曰：郝氏云：「卿不為賓，嫌逼也。」方氏苞云：「《燕義》曰：「不以公卿為賓，而以大夫為賓，為疑也。」此「義耳。才德之大小不限於名位，故春秋時子產，叔向自始仕而聞望重於諸卿。故以大夫為賓，尊賢之義彰焉。天子之宰夫為下大夫，降殺以等，則諸侯之宰夫，士也。使與公卿為敵者之禮，則非所安，蓋貴貴之義寓焉。饗、食、燕、射，國之大政也。君卿實共主之，故不以公卿為賓，體國之義著焉。故曰：「禮者，義之實也。」」《釋官》曰：「疏云：「知大夫非卿者，以其賓主相對，既以宰夫為主人，是大夫，明賓亦是大夫。」案：下記云：「與卿燕則大夫為賓，與大夫燕亦大夫為賓。」賓之為大夫，記有明文，其義則《燕義》詳之。非緣主人為大夫而賓亦使大夫也。此主人為膳宰，非宰夫，諸侯宰夫亦上士，非大夫。疏甚誤。」射人命賓，賓少進，禮辭。命賓者，東面南顧。禮辭，辭不敏也。【疏】

正義曰：注云「命賓者，東面南顧」者，盛氏云：「嫌背君也。此時君尚南面，射人在君右。」敖氏云：「命賓者，南面鄉之。」非。「云「禮辭，辭不敏也」者，敖氏云：「以士冠之賓辭曰：『某也不敏。』」故意此賓亦然。」吳氏廷華云：「注蓋倣《大射》命納射器言之，所謂『東面南顧』是也。但彼經命之而已。此命賓後尚有賓辭之節，則當南面向賓也。疏以在君右爲說者，蓋君南鄉，在君之右，西也。在西，則東面說非不合，但此命賓與詔辭略有不同。」反命。射人以賓之辭告於君。又命之。賓再拜稽首，許諾。又復。【疏】正義曰：敖氏云：「公不許其辭，故射人復命之。賓再拜稽首，爲受君命也。」射人反命。告賓許。賓出，立于門外，東面。當更以賓禮人。【疏】正義曰：前大夫以臣禮人，此當更以賓禮人，故出立於門外也。敖氏云：「《大射儀》云『北面』，此『東』字蓋誤也。」褚氏寅亮云：「大射辨尊卑，故北面；燕主歡心，仍寓賓主之義，故東面。敖氏據彼改此亦爲北面，泥矣。」公揖卿、大夫，乃升就席。揖之，人之也。【疏】正義曰：敖氏云：「揖之乃升，禮之也，亦異揖之。」郝氏云：「公揖卿、大夫，公將升揖也。乃升，君升阼階也。就席，君先就席也。」

盛氏世佐云：「此揖卿、大夫，共一揖也，蓋略於爾之之時矣。敖氏亦異揖之，恐未是。」焦氏以恕云：「觀下文，知惟公升，卿、大夫未升。」注云「人之也」者，謂以人意相存偶也。

右 命 賓

小臣自阼階下，北面，請執冪者與羞膳者。執冪者，執瓦大之冪也，方圓壺無冪。羞膳，羞於公，謂庶羞。【疏】正義曰：敖氏云：「士之掌此二事者有常職，乃請之者，蓋白之於君，然後敢命之也。」盛氏世佐云：

「羞膳，執冪，皆以士。必請之者，諸侯兼官，士之掌此二事者無常職，惟君所命故也。」焦氏以恕云：「秦制，階下侍衛之士非有命不得上殿。執冪，羞膳之士雖有常職，非出君命不敢升階，^①是以必白於君而命之也。」胡氏肇昕云：「焦氏以暴秦之制，取以說經，非矣。盛氏說近是。」注

云「羞膳，羞於公，謂庶羞」者，李氏如圭曰：「羞，進也。君物曰膳。凡薦謂脯醢，羞謂庶羞。」盛氏云：「羞膳者，謂進

① 「出」，原作「由」，今據《儀禮彙說》改。

膳於公者也。君物曰膳，謂脯醢也。知不兼庶羞者，下記云：「凡薦與羞者，小膳宰也。」則是有常職矣。」乃命執冪者，執冪者升自西階，立于尊南，北面東上。以公命於西階前命之也。東上，玄酒之冪爲上也。羞膳者從而東，由堂東升自北階，房中西面南上。不言之者，不升堂，略之也。【疏】正義曰：注云「以公命於西階前命之也」者，賈疏云：「下記曰：『羞膳者與執冪者皆士也。』士位在西方東面，故知西階前命之。」云「羞膳者從而東，由堂東升自北階，房中西面南上」者，李氏如圭云：「羞膳者無升文，以羞在房，知由堂東自北階升也。」《士冠禮》脯醢在房，贊者薦脯醢，立于房中，西面南上。」盛氏世佐云：「房中西面南上者，薦脯者在南，薦醢者在北也。羞膳者不由前堂升，以其士賤，且所事者在房故也。」云「略之也」者，吳氏廷華云：「執冪與羞膳者並命之，則二執事當同升。升後則執冪者自立於尊南，羞膳者自立於房中，雖文不具，其理可知。」盛氏云：「解經不言之故。疏云：『解不由前堂升。』非。」膳宰請羞于諸公卿者。小臣不請而使膳宰，於卑者彌略也。禮以異爲敬。【疏】正義曰：賈疏云：「膳宰卑於小臣，故云『彌略』也。」《釋官》曰：

「案：諸侯之官，降於天子。膳宰當是中士。請羞諸公卿使膳宰，①不使小臣，注謂『以異爲敬』，得之。疏因此較量尊卑，殊未了了。且此篇獻賓薦與設俎皆膳宰，大射獻賓及公，皆宰胥薦脯醢，②庶子設折俎，則疏謂禮之大例，薦羞者尊於設俎者，亦未然矣。」盛氏世佐云：「大國之孤曰公。君稱公，臣稱諸公，一字而尊卑辨矣。」案：《義疏》云：「射人爲擯，請賓，擯者事也。小臣，近臣，請執冪與羞膳，③近臣事也。膳宰具官饌，請羞諸公卿，具饌者事也。」又云：「射人告具，及射人請賓，④膳宰請羞於諸公卿，經不言面位。今皆北面者，以小臣請執冪爲準也。」

右請命執役者

射人納賓，射人，爲擯者也。今文曰「擯者」。

【疏】正義曰：注云「射人，爲擯者也」者，李氏如圭云：「《大射儀》：『大射正擯，擯者請賓。』《春秋傳》：『王以鞶」

①「卿」，原脫，今據《儀禮釋官》補。

②「脯」，原脫，今據《儀禮釋官》補。

③「膳」下，原衍「者」字，今據《儀禮義疏》刪。

④「及」，原脫，今據《儀禮義疏》補。

伯宴，使相告之。』相，相禮者，即擯者也。』云『今文曰『擯者』者，胡氏承珙云：「此經請賓、命賓皆射人，若如今文云『擯者納賓』，則嫌異人，故鄭從古文耳。』賓人，及庭，公降一等揖之。及，至也。至庭，謂既入而左，北面時。【疏】正義曰：注云「謂既入而左，北面時」者，李氏如圭云：「出堂塗時也。客人門而左。」敖氏云：「一等者，階也，并堂爲二等矣。揖之者，使之升也。《大射儀》云：『賓辟。』公升就席。以其將與主人爲禮，不參之也。【疏】正義曰：宰夫代公爲主人，故公升就席。」

右 納 賓

賓升自西階。主人亦升自西階，賓右北面至再拜；賓荅再拜。主人，宰夫也。宰夫，大宰之屬，掌賓客之獻飲食者也。其位在洗北西面。君於其臣，雖爲賓不親獻，以其尊，莫敢伉禮也。至再拜者，拜賓來至也。天子膳夫爲獻主。【疏】正義曰：《校勘記》云：「『賓右北面』『右』，誤作『又』。『大宰之屬』，張氏云：『巾箱杭本大作人，從監、嚴本。』」○張氏爾岐云：「主人亦升自西階者，代君爲獻主，不敢由阼階也。自此至『以虛爵降

奠于篚』，主人獻賓，賓酢主人，主人獻公，主人受公酢，主人酬賓，二人媵饌于公，公取媵饌酬賓，遂旅酬，凡七節。此初燕之盛禮也。」注云「主人，宰夫也」者，《燕義》云：

「使宰夫爲獻主。」是也。云「宰夫，大宰之屬，掌賓客之獻飲食者也」者，《釋官》云：「案：主人當爲膳宰。注據《燕義》訓爲宰夫。春秋時，膳宰亦通稱宰夫。如《左傳》稱「膳宰屠蒯」，而《禮記·檀弓》載此事云「賁也，宰夫也」；《左傳》稱「宰夫胹熊蹯不熟」，《公羊傳》云「膳宰熊蹯不熟，是其確證。《禮記》雜出於漢儒之手，故宰夫亦沿《春秋》之稱。然鄭注《燕義》云：「宰夫，主膳食之官。」則固明以膳宰釋之矣。此注及疏引《周禮·宰夫》，甚誤。《周禮》宰夫爲大宰之考，職掌較尊。王燕飲酒，則膳夫爲獻主，不使宰夫。諸侯亦當使膳宰爲獻主。《文王世子》云：「公與族燕，膳宰爲主人。此其證也。蓋周公設官，天子有宰夫，又有膳夫。諸侯亦有宰夫，而稱膳夫爲膳宰。《玉藻》云：「皆造於膳宰。《國語》云：「膳宰不致饌。」是也。春秋時，宰夫官廢。《左傳》所云「宰夫將解鼈」、「宰夫和之」之類，皆指謂膳宰，而《周禮》之宰夫職無聞焉。鄭注《周禮·膳夫》引《燕義》「使宰夫爲獻主」，注《大祝》云：「宰夫授祭。」韋昭注《國語》云：「膳宰，掌賓客之牢禮。」以宰夫職釋膳宰，皆由後

世膳宰通稱宰夫，不能辨別，遂誤合爲一，不知諸侯別自有宰夫也。《大射》、《聘禮》、《公食》諸篇所言宰夫，皆《周禮》宰夫之職，與膳宰異。云「其位在洗北西面」者，敖氏云：「諸侯之宰夫蓋以士爲之，其位亦在西方，故賓進則主人因從而升也。」盛氏世佐云：「宰夫，士也，初位在西方。敖說得之。洗北西面，乃其受薦之位耳，不可援以爲證。」云「君於其臣，雖爲賓不親獻，以其尊，莫敢伉禮也」者，《燕義》云：「設賓主飲酒之禮也。使宰夫爲獻主，臣莫敢與君伉禮也。」注本此爲說。云「至再拜者，拜賓來至也」者，李氏如圭云：「至再拜者，賓至乃拜之，有尊卑不敵之義。體敵者皆言拜至。」**主人降洗，洗南，西北面。**賓將從降，鄉之。【疏】正義曰：李氏如圭云：「洗南當北面，今西北面者，當辭賓降也。鄉飲酒賓主異階，故主人在階下辭賓降，宰夫代君爲獻主，升降不由阼階，與賓同，由西階升降，故於洗南辭降。」吳氏廷華云：「洗南則北面矣，爲賓降，故兼言西北面。」**賓降，階西東面。主人辭降，賓對。**對，荅。【疏】正義曰：敖氏云：「階西東面，東西亦當序。此賓降而主人於洗南辭之，則其降之節亦可見矣。賓對亦少進，既則復位。」主人北面盥，坐取觚

洗。賓少進，辭洗。主人坐奠觚于筐，興，對。賓反位。賓少進者，又辭，宜違其位也。獻不以爵，辟正主也。古文「觚」皆爲「觶」。【疏】正義曰：《校勘記》云：「莫觚于筐」「于」，誤作「與」。注云「賓少進者，又辭，宜違其位也」者，敖氏云：「賓少進者，少南行而東面也。」云「獻不以爵，辟正主也」者，以宰夫爲主人，非正主，故用觚不用爵。敖氏云：「獻公用象觚，則此觚乃角觚也。」張氏爾岐云：「凡觴，一升曰爵，二升曰觚，三升曰觶，四升曰角，五升曰散。」云「古文「觚」皆爲「觶」者，胡氏承珙云：「案：《特性·記》：「筐在洗西，南順，實二爵，一觚，四觶，一角，一散。蓋飲酒之器，爵最貴，①觚次之，觶又次之，角散爲下。故《禮器》曰：「貴者獻以爵，賤者獻以散，尊者舉觶，卑者舉角。」此獻辟正主，不用爵，宜降一等而用觚，故不從古文作「觶」也。」**主人卒洗，賓揖，乃升。**賓每先升，尊也。【疏】正義曰：賓每先升者，以宰夫是士，且非正主也。**主人升，賓拜洗；主人賓右奠觚荅拜，降盥。**主人復盥，爲拜手坩塵也。賓降，主

①「最」，原作「散」，今據《儀禮古今文疏義》改。

人辭，賓對。卒盥，賓揖升，主人升，坐取觚。取觚，將就瓦大酌膳。○大培案：卒洗，降盥俱言

「賓揖」，而不言主人揖。要之，主人亦揖也。執冪者舉

冪，主人酌膳，執冪者反冪。君物曰膳，膳之言善

也。酌君尊者，尊賓也。【疏】正義曰：郝氏云：「反冪，既

酌，反冪於尊上。」注云：「酌君尊者，尊賓也」者，敖氏

云：「賓者，君之所命者也，故主人代君飲之，則酌君尊，蓋

達君之意也。酌膳東面。」主人筵前獻賓，賓西階

上拜，筵前受爵，反位，主人賓右拜送爵。賓

既拜，前受觚，退復位。【疏】正義曰：李氏如圭云：「通言

之，則觚亦稱爵。」敖氏云：「獻賓蓋亦西北面，與鄉飲酒

同，故不著之。」高氏愈云：「主人送爵不於阼階，而於賓

右，辟君位也。」吳氏廷華云：「賓宜東南面受爵，拜則俱西

階上北面也。反位，亦西階上位也。」膳宰薦脯醢，賓

升筵，膳宰設折俎。折俎，牲體骨也。《鄉飲酒·

記》曰：「賓俎，脊、脅、肩、肺。」【疏】正義曰：《釋官》云：

「上既以主人爲膳宰，此文主人獻賓又云膳宰薦脯醢，設折

俎者，蓋天子膳夫，上士二人，中士四人，下士八人。諸侯

當中士二人爲之長，一爲主人，而一仍供膳宰之職，如此篇射人既爲司正，又云「乃薦司正與射人一人」是也。吳氏廷華云：「膳宰既爲主人，不得又設薦俎。大射宰胥薦，則此兩膳宰皆宰胥也。大射庶子設俎，此並使膳宰，燕禮輕也。」蔡氏德晉云：「賓升時，主人亦升自西階賓右，故其後也，遂以西階賓右爲主人定位。」注引《鄉飲酒·記》者，

鄭以《燕禮》不言賓牲體之數，故引《鄉飲酒·記》以證之，

明與之同也。案：敖氏繼公謂公俎似當用肩，賓俎用臂，

與鄉飲酒賓主之俎異。說與注殊，盛氏世佐從之。賓

坐，左執爵，右祭脯醢，奠爵于薦右，興取

肺，坐絕祭，啐之，興，加于俎，坐挽手，執

爵，遂祭酒，興，席末坐啐酒，降席，坐奠爵，

拜告旨，執爵興，主人荅拜。降席，席西也。旨，

美也。【疏】正義曰：注「旨，美也」，《校勘記》云：「《集釋》

無「也」字。」○敖氏云：「此賓乃大夫也，亦絕肺以祭。而

下文又云「公祭如賓禮」，則是自上至下，此禮同也。舊說

謂大夫以上繅祭，惟士絕祭，其不考諸此乎？」盛氏世佐

云：「絕祭、繅祭之分本《周禮·大祝職》文。康成謂禮多

者繅之，禮略者絕則祭之，是也。考之此經，祭肺之儀但見

其絕，未聞其繚。說者欲以鄉飲酒禮當之，誠誤。然《鄉飲酒禮》云「弗繚」，明大夫以上固有繚者矣。其繚也必於饗。饗禮雖亡，以類推之可知也。鄉飲、鄉射絕祭，士賤也。《燕禮》、《大射》亦絕祭，禮略也。尊於士，詳於燕，其惟大夫以上之饗禮乎？若以此經無繚祭之文，遂謂自上至下同絕祭，則汰矣。《鄉飲酒禮》疏云：燕禮、大射雖諸侯禮，以賓皆大夫爲之，臣在君前，故不爲繚祭，皆爲絕祭也。此說近之。褚氏寅亮云：「當以《鄉飲酒》疏臣在君前，不繚祭皆絕祭之說爲正。下文云：『公祭如賓禮。』祭則皆同，祭肺之繚，絕則不同，勿泥。」案：《義疏》云：「賓拜俱在西階上，拜告旨獨在筵西者，承上『降席』來，又下始言『西階上』，則告旨之拜不在階上也。」注云「降席，席西」，不言面者，賈疏云：「前例，降席，席西拜者皆南面，拜訖則告旨。」賓西階上北面坐卒爵，興，坐奠爵，遂拜，主人荅拜。遂拜，拜既爵也。【疏】正義曰：敖氏云：「執爵興，主人乃荅拜。凡荅拜皆於所荅者興乃爲之。經或不言其興，文省耳。」高氏愈云：「此就席第一爵，賓飲之。」

右主人獻賓

賓以虛爵降，將酢主人。【疏】正義曰：賈疏云：「自此以下盡序內東面，論賓酢主人之事。」主人降。賓洗南坐奠觚，少進，辭降。主人東面對。上既言爵矣，復言觚者，嫌易之也。《大射禮》曰：「主人西階西，東面，少進，對。」今文從此以下，「觚」皆爲「爵」。【疏】正義曰：敖氏云：「坐奠觚，興，少進，皆西北面。主人降立於階西，固東面矣。乃言『東面對』者，嫌進而對，或易鄉也。」注云「上既言爵矣，復言觚者，嫌易之也」者，以主人獻賓云「取觚」，洗云「奠觚」，至將酢主人云「賓以虛爵降」，嫌爵與觚異，故此經又云「坐奠觚」，見觚、爵對文則異，而散文相通也。引《大射禮》者，以經無西階西少進之文，故引以補之，蓋大射必先行燕禮也。云「今文從此以下，『觚』皆爲『爵』」者，今文以觚即爵，故不復言觚。胡氏承珙云：「爵者，飲酒之器之總名。今文從散文之通稱，鄭所不用。」賓坐取觚，奠于篚下，盥洗。篚下，篚南。【疏】正義曰：敖氏云：「此言奠于篚下，則歸者少南奠之矣。」主人辭洗。謙也。今文無「洗」。【疏】正義曰：敖氏云：「辭亦宜少進如賓也。於賓，既對則反位。」注云「今文無『洗』」者，胡氏承珙云：「案：鄭從古文有

「洗」者，取其文義備。」賓坐奠觚于篚，興對，卒洗，及階，揖升。主人升，拜洗如賓禮。賓降盥，主人降，賓辭降，卒盥，揖升。酌膳，執冪如初，以酢主人于西階上。主人北面拜受爵，賓主人之左拜送爵。賓既南面授爵，乃之左。【疏】正義云：敖氏云：「及階乃揖，以己當先升也。賓揖主人，乃離其位，然則賓於主人卒洗之時，①固不待其及階而揖升矣。如賓禮謂迭拜。酌膳者，主人酌此獻賓，故賓酢亦如之，亦以其代君飲已尊之也。執冪，執冪者舉反之節也。」盛氏世佐云：「酢主人亦於西階上，以公在阼也。」注云「賓既南面授爵，乃之左」者，賈疏云：「以經言『主人北面拜受爵』，②明賓於東楹之西，東面酌膳訖，而西階南面授主人。可知受爵訖，③乃之主人之左，北面拜送爵。」敖氏云：「賓酢主人，蓋亦西南面授之，乃之左。賓親酢者，伸其尊，亦以君不親酢，故無所辟也。」胡氏肇昕云：「案：鄉飲酒、鄉射酢主皆席前東南面授爵。此經雖無明文，蓋亦與飲、射同也。經云『主人北面拜受爵』，則賓之南面授爵，推之可知。敖氏故與鄭異，非是。」案：《義疏》云：「卒洗不言主人揖，賓盥、辭降不言主人對，④其揖

與對可知。」主人坐祭，不啐酒。辟正主也。未薦者，臣也。【疏】正義曰：注云「辟正主也」者，例以鄉飲、鄉射，皆是正主。經云：祭如賓禮啐酒，則主人亦啐酒也。下又云「不告旨」，惟言不告旨，則仍啐酒可知也。故此不啐酒，鄭知是辟正主也。云「未薦者，臣也」者，李氏如圭云：「凡獻則薦，宰夫代君行禮，雖受酢而不薦。至獻大夫，乃薦於其位。」張氏爾岐云：「正主人皆有啐酒，唯不告旨。賓獻訖，即薦脯醢。此主人是臣，故酢時不薦。至獻大夫後，乃薦於洗北。」盛氏世佐云：「不於此時薦主人者，亦辟正主之義，且以其士賤也。」褚氏寅亮云：「注云『未薦者，臣也』，蓋鄉飲、鄉射主賓敵，故主人受獻後即薦；此臣代君為主，故未即薦。」案：《義疏》云：「正主酢則必薦。此未薦者，以主人堂上無位，堂下又未定洗北之位，無所薦之。且公卿未薦，不得輒薦主人，非但以臣而已。」不拜酒，不告旨。主人之義。【疏】正義曰：敖氏云：「拜

①「於」，原脫，今據《儀禮集說》補。

②「經」，原作「既」，今據《儀禮注疏》改。

③「可知」，原脫，今據《儀禮注疏》補。

④「辭」，原脫，今據《儀禮義疏》補。

酒，謂拜謝其以旨酒飲己也。酒非賓物，則無是二禮可知。」盛氏世佐云：「拜酒、告旨，本是一意。上經云「降席，坐奠爵拜，告旨」，即其禮也。凡言不告旨，則不拜酒可知。此並著之者，文詳也。」遂卒爵，興，坐奠爵，拜，執爵興，賓荅拜。主人不崇酒，以虛爵降，奠于筐。崇，充也。不以酒惡謝賓，甘美君物也。【疏】正義曰：注「不以酒惡謝賓」，《校勘記》云：「徐本、《集釋》俱無『惡』字，似誤。」胡氏肇昕云：「《通解》作『不以酒惡充滿謝賓者』，多『充滿者』三字。考《鄉飲酒》注云：「崇，充也。言酒惡相充實。」則鄭氏原不作充滿解。《通解》所引，蓋以意增，非注本如是也。」○敖氏曰：「不崇酒者，無崇酒之拜也。酒非己物，故是禮亦不可得而行。」方氏苞云：「崇酒，敵者所以致渥洽也。君專大惠，而膳宰拜崇酒，是代君尸惠，故不敢也。」○高氏愈云：「此就席第二爵，主人飲之也。」

右賓酢主人

賓降，立于西階西。既受獻矣，不敢安盛。

【疏】正義曰：敖氏云：「己之獻酢禮畢，而主人又將與君

為禮，故不敢居堂。」射人升賓，賓升，立于序內，東面。東西牆謂之序。《大射禮》曰：「擯者以命升賓。」

【疏】正義曰：敖氏云：「升賓者，優之也。序內，東面，鄉君也，然則君位亦在東序內明矣。」吳氏廷華云：「入序稍深，故曰『內』。」注云「東西牆謂之序」者，《爾雅·釋宮》文。引《大射禮》者，證升賓亦以君命升之也。主人盥

洗象觚，升賓之，東北面獻于公。象觚，觚有象骨飾也。取象觚者東面。【疏】正義曰：「升賓之」，《校勘記》云：「『賓』，唐石經、徐、陳、《集釋》、《通解》、《要義》、楊氏、敖氏俱作『實』。」○敖氏云：「亦酌膳執冪如初，不言者，可知也。酒乃君物，主人進之於君而曰『獻』者，以主人為獻主故也。公在席而東北面獻之，亦因獻賓之儀而為之也。經言獻醕在席者多矣，獨此與大射見獻公之儀，若是，則其他之獻醕者皆正鄉其席與？」方氏苞云：「敖說非也。鄉飲酒、鄉射主人皆於賓之席前西北面獻賓。蓋賓席在西階，自宜西面；公席在阼階，自宜東面。而進獻自席南，故皆北面耳。」注云「象觚，觚有象骨飾也」者，敖氏云：「注云『象骨』，恐當作『象齒』。」案：骨為總名，齒乃骨之類也。敖氏易之，非是。蔡氏德晉云：「象觚，觚以象骨為

飾，實於膳筐者也。主人獻公，更用象觚，君臣不敢同爵也。」云「取象觚者東面」者，李氏如圭云：「南面取，則背君，膳筐之南有臣筐，不得北面取，故因自西階來，東面取也。」公拜受爵，主人降自西階，阼階下北面拜送爵。士薦脯醢，膳宰設折俎，升自西階。薦，進也。《大射禮》曰：宰胥薦脯醢，由左房。【疏】

正義曰：賈疏云：「凡此篇內，公應先拜者，皆後拜之，尊公故也。此公先拜受爵者，受獻禮重故也。」敖氏云：「拜於下者，臣也。此惟一拜而已，蓋荅公拜也，一拜則不稽首。荅公拜而不稽首，亦獻禮然也，其他則否。凡臣先拜其君，皆再拜稽首。」郝氏曰：升降不敢由阼，辟君位也。《釋官》云：「獻賓脯醢，折俎皆膳宰薦設，獻公使士薦脯醢者，蓋以異爲敬。君尊，不敢全以賓主之禮行之也。設俎則膳宰之職，故不變。大射公及賓之脯醢，皆使宰胥薦者，以士亦與射，故紓其力。士即上立於西方東面北上者。賈疏因下注云「膳宰卑於士」，遂謂士尊，故使士薦。非也。」褚氏寅亮云：「獻禮之受爵，送爵固皆一拜，但臣與君行禮無不再拜稽首者。且既下拜矣，又何獨不遵再拜稽首之禮乎？經不言者，可知矣。《集說》謂一拜不稽首，未然。又

案：下文自酢兩言「再拜稽首」。獻酢禮均，則此豈宜獨異？又云「公荅再拜」，則此一拜受之說亦未然矣。」李氏如圭云：「賓之薦俎皆使膳宰，公之薦俎異人者，公尊故也。大射公與賓之薦俎同人者，略於飲酒主於射也。」方氏苞云：「私家燕飲之禮，主人親饋，故燕禮獻賓脯醢、折俎，皆膳宰薦設，正其爲賓主也。獻君則士薦脯醢，不敢用賓主之禮而少變之也。大射則君及賓之薦設皆使宰胥，蓋小膳宰皆君之親臣，祭祀有常職焉，故息其筋力，使得盡志於射。自大夫以下皆不獻，亦此意也。」敖氏云：「升自西階者，俎也。著之者，嫌設公俎宜由阼也。膳宰既設俎，則少退，東面而俟。既贊授肺，乃降。」注引《大射禮》者，

賈疏云：「證此脯醢從左房來。天子諸侯有左右房，故言左房。大夫、士無右房，故言東房而已。」公祭如賓禮。【疏】正義曰：敖氏云：「祭謂祭薦、祭肺、祭酒也。其異者於下見之。」膳宰贊授肺，不拜酒，立卒爵，坐奠爵，拜，執爵興。凡異者，君尊，變於賓也。【疏】正義曰：敖氏云：「贊授肺者，以授肺而贊之也。君尊，不與取肺。未祭則授之，既祭則受之。惟言「授」，但見其一耳。不拜酒者，以其爲已物也。不拜酒，則亦不啐酒。凡男子

之坐卒爵者，奠爵乃拜。婦人之尊者，立卒爵而執爵拜。此立卒爵而奠爵拜，其君禮與？公於其臣乃先拜既者，亦獻禮重也。」主人荅拜，升，受爵以降，奠于膳筐。【疏】正義曰：敖氏云：「奠于膳筐」，見歸者取之亦在此也。吳氏廷華云：「膳筐西面，取觚者當對面取之，故注以爲東面。疏謂膳南有臣之筐，據上筐在洗西，南肆，膳筐在其北，不得北面隔筐取象觚是也。至所以不南面及西面者，蓋南面嫌與主同也。」○高氏愈云：「此就席第三爵，宰夫獻公，公飲之。」

右主人獻公

更爵洗，升酌膳酒以降，酢于阼階下，北面坐奠爵，再拜稽首，公荅再拜。更爵者，不

敢襲至尊也。①古文「更」爲「受」。【疏】正義曰：賈疏

云：「主人受公酢而自酌者，不敢煩公，尊君之義。」楊氏

云：「君尊不酢其臣，主人自酢，成公意也。雖更爵亦酌君

之膳酒者，明酢之之意出於君也。」方氏苞云：「公受爵而

拜，卒爵而拜，主人荅拜，皆不稽首，循獻禮之常也。至代

公自酢，則賓主之禮，臣下所不敢望於君。故再拜稽首，以

比於君賜之爵，而不敢以主人自居也。」注云「更爵者，

不敢襲至尊也」者，賈疏云：「襲，因也。獻君自酢同用觚，

必更之者，不敢因君之爵。《喪服傳》云：「君，至尊也。」

敖氏云：「更爵者，改取南筐之觚，蓋不敢用君器也。」云

「古文「更」爲「受」者，惠氏《古義》曰：「《周禮·巾車》

云：「歲時受讀。」杜子春云：「受，當爲更。」《春秋》昭二十

九年《傳》云：「以更豕韋之後。」《史記》「更」作「受」。知古

文「更」字皆爲「受」。胡氏承珙云：「更」與「受」聲義皆不

相近。古文作「受」者，字之誤。鄭所不從。」主人坐祭，

遂卒爵，再拜稽首。公荅再拜。主人奠爵

于筐。【疏】正義曰：敖氏云：「亦興，坐奠爵，乃再拜稽

首，執爵興。」○高氏愈曰：「此主人飲之第二爵也。」

右主人自酢於公

主人盥洗，升，媵觚于賓，酌散，西階

上，坐奠爵，拜賓，賓降筵，北面荅拜。媵，送

也，讀或爲揚，揚，舉也。酌散者，酌方壺酒也，於膳爲散。

①「也」，原作「者」，今據《儀禮注疏》改。

今文「賸」皆作「騰」。【疏】正義曰：「拜賓，賓降筵」，《校勘記》云：「『賓』，唐石經、敖氏俱不重，徐本、《集釋》、《通解》、《要義》、楊氏俱重。《石經考文提要》云：『《大射禮》當此節曰：西階上坐奠爵拜賓，西階上北面荅拜。不疊賓字，例同。』按：①『疏無降筵二字。』」注云「賸，送也，讀或爲揚，揚，舉也」，又云「今文『賸』皆作『騰』者，《說文》：『併，送也。從人弁聲。古文以爲訓字。』段氏玉裁注云：『併，今之賸字。送爲賸之本義，以姪娣送女，乃其一專耳。』②訓與併音部既相距甚遠，字形又不相似，如疋、足、艸、亏、亏之比。今案：『訓』，當作『揚』。由揚譌詠，由詠復譌訓，始則聲誤，終則字誤耳。據鄭《檀弓》注，知《禮經》作『賸』，記作『揚』。賸爲古文揚字。若今文《禮》『賸』作『騰』，騰正與揚義協。」胡氏承珙云：「《禮經》言賸者訓送，是其本義。《說文·貝部》『賸』下：『一曰送也。』賸與賸聲、義並同，賸讀爲揚，則聲轉而義亦異。鄭注《檀弓》以有謂之『杜舉』，舉與揚義相近，故云『揚近得之』。此注云：『賸，送也，讀或爲揚。』則是以送爲賸之本義，揚爲禮家異讀。賈疏云：『揚訓爲舉，義勝於賸送，故讀從之。』以說《檀弓》則可，以疏此注則非。『今文賸皆作騰』，騰義近揚。《禮記》本今文，故作『揚觶』。鄭注《儀禮》以賸從古文送義

爲正，故不從今文作「騰」。賈疏又謂騰與賸皆是送義，亦非。至賸讀爲揚者，《釋名》：「賸，承也。」承與繩通。《詩·抑》：「子孫繩繩。」《韓詩外傳》作「承承」。繩本从蠅，省聲。《方言》：「蠅，東齊謂之羊。」郭注：「今江東呼羊聲如蠅。」賸讀爲揚，此其聲例。段云賸即古文揚字，恐未必然。胡氏肇昕云：「胡說是也。古文作『賸』，今文作『騰』，《禮記》今文宜作『騰』。經師以訓詁字易之爲『揚』，故曰『揚觶』。騰可訓爲揚，賸不得訓爲揚。注『或讀爲揚』者，讀賸爲騰，義得爲揚耳。賸送一義，揚舉一義，注自分明。段氏乃合賸、揚爲一字，誤矣。」郝氏云：「賸言醕，嗣舉也。初獻爲正，再酌爲賸。賸，副也，與賸通。貳嫡曰賸，獻而又酬，所以爲賸。」盛氏世佐云：「賸，送也，副也。合二義乃備。」胡氏肇昕云：「《說文》訓併爲送，義自賅括。諸家拘於賸爲貳嫡之稱，遂於送之外更加副義。不知《禮經》多言『送爵』。賸觶者，猶云送爵也。獻而又酬，所以爲賸，說雖巧而非經義也。」褚氏寅亮云：「凡獻以爵者則酬以觶。今獻既辟正主而不用爵，則酬亦不用觶矣，安可以

①「按」，原作「又云」，今據《十三經註疏校勘記》改。

②「專」，原作「端」，今據《說文解字注》改。

改「觚」爲「觶」？「朱大韶曰：『唐石經作「坐奠爵，拜賓，降筵」，不重「賓」字，是也。禮於獻酬酢，但言坐奠爵拜，未有言拜主人，言拜賓者。《鄉飲》、《鄉射》二禮皆云：「阼階上北面坐，奠觶，遂拜，執觶興，賓西階上荅拜。飲，射主賓分階，燕，大射公席於阼，故賓、主人皆於西階。《大射儀》與此同，儀節盡同，作西階上坐奠爵拜，賓西階上荅拜，亦不言拜賓。』云「酌散者，酌方壺酒也，於膳爲散」者，李氏如圭云：「賓酢主人酌膳，不敢卑主人。主人酬賓酌散，不敢自尊也。《少儀》：君之乘車，君綏曰良綏，副綏曰散綏。散義同此。」主人坐祭，遂飲。賓辭。卒爵，拜。賓荅拜。辭者，辭其代君行酒，不立飲也。此降於正主酬也。【疏】正義曰：朱子曰：「正主之酬，皆坐卒爵。此代君酬，當降禮而立飲。今不立而坐，則是不降，故辭不敢當也。」張氏惠言云：「《大射儀》注則云：『比於正主酬也。』疏各爲之說。案：正主酬賓，坐祭，遂飲，卒觶，興，坐，奠觶，拜，無立飲之禮。此以公卒爵立飲，決主人代君行酒亦宜立飲，今坐卒爵，故辭之。注又言所以坐飲之故，乃比於正主酬也。大射注爲是，此注誤耳。」敖氏云：「賓見主人將飲，故辭之，蓋欲即受此觶，不敢復煩主人之更酌己，且遠辟賤爵於公之禮也。賤爵於公者，亦皆先自飲乃

更酌之。云「卒爵，拜」，省文也。《大射禮》曰：「卒爵興，坐奠爵，拜，執爵興。」盛氏世佐云：「賓辭之意，敖蓋得之。如注說則主人之代君久矣。鄉受賓酢，亦不立飲，賓何以不辭邪？」褚氏寅亮云：「注謂辭其代君飲酒不立飲，蓋君臣酬酢，君立飲，而臣坐飲。賓以尊君之禮尊代君飲者，故辭其坐飲也。敖說殊牽強，豈有酬而不先自飲者乎？下經云酬賓亦立飲，可見君當立飲。」吳氏廷華云：「正主當指公，公立飲，主人坐，故曰「降於正主」。若《鄉飲酒》、《鄉射》正主本坐飲，與此同，何得謂之降？」焦氏以恕云：「注解甚當，敖說非禮意，不可從也。○高氏愈云：「此主人飲之第三爵。」主人降洗，賓降。主人辭降。賓辭洗，卒洗，揖升，不拜洗。不拜洗，酬而禮殺。【疏】正義曰：據獻禮盛則拜洗也。主人酌膳，賓西階上拜。拜者，拜其酌也。【疏】正義曰：注「拜其酌也」，《校勘記》云：「徐、陳、《集釋》、《通解》、楊氏「也」俱作「己」。」云「拜者，拜其酌也」者，賈疏云：「案：鄉飲酒、鄉射主人酬賓，皆主人實觶席前北面，賓始西階上拜。此及大射，主人始酌膳時，賓已西階上拜者，以其燕禮、大射皆是主人代君勸酒，其實是臣，急承君勸，不敢安暇，故先

拜也。」案：疏說分析甚明。而敖氏云：「拜爲將受之，是時主人已在筵前北面。」盛氏謂此與鄉飲酒禮亦同，但文有詳略，當以敖說爲正。恐不可從。韋氏協夢云：「賓西階上拜，主人宜少退，卒拜，然後授賓爵於筵前。」吳氏廷華云：「禮無拜酌之例，此言拜，下即言受爵，則仍是拜受爵，非拜酌也。」受爵于筵前，反位，主人拜送爵。賓升席坐祭酒，遂奠于薦東。遂者，因坐而奠，不北面也。奠之者，酬不舉也。【疏】正義曰：敖氏云：「主人酬賓不奠，乃授之者，亦與士禮異者也。主人拜，亦於賓右。」《少牢》下篇酬尸、酬賓，亦皆親授觶。「方氏苞云：「鄉飲酒，鄉射主人酬賓，奠爵而不授，以此觶不用，不煩賓以親受也。燕則君賜，故親相授受，以致其嚴恭。」郝氏云：「賓不飲酬酒，猶必坐祭後奠，敬君也。」韋氏協夢云：「鄉飲酒、鄉射旅酬之禮，賓主之，故主人酬賓，奠而不授，爲將以此觶舉旅也。燕禮公主旅酬之禮，故主人酬賓，授受如常禮。」○高氏愈云：「此飲賓第二爵，賓莫不舉。」李氏如圭云：「於酌膳時賓即拜，且手受而祭之，急承主人之酌，重君物也。此皆異於鄉飲酬禮。」褚氏寅亮云：「授而不奠，異於士禮。」《少牢》下篇酬尸賓皆然，豈此乃大夫以上之酬禮歟？又代君行酬，即是尊者之賜矣。故尊之而祭

與？先拜之義一也。」主人降復位，賓降筵西，東南面立。賓不立於序內，位彌尊也。位彌尊者，其禮彌卑，《記》所謂「一張一弛」者，是之類歟？【疏】正義曰：注「其體彌卑」，《校勘記》云：「體」，徐、陳、《集釋》、《通解》、楊氏俱作「禮」。案：《大射》疏引亦作「禮」。胡氏肇昕云：「此疏述注，亦作《禮記》所謂「一張一弛」者。」「一弛」，《釋文》作「壹弛」。○「主人降復位」，李氏如圭云：「下經薦主人於洗北，則洗北者，主人之位。」敖氏云：「位，西方東面也。此時未有洗北西面位，至既獻大夫而薦乃有之。賓降，降筵也。曩者賓降於階下，而君命升之，故此時惟降筵而已，恐褻禮而重煩君命也。」李氏微之云：「東南面立，鄉君也。」敖氏云：「不立於序內者，升降異處，以相變爲敬。」注云「賓不立於序內，位彌尊也。位彌尊者，其禮彌卑」者，賈疏云：「賓初得獻立序內。此酬訖立席西，漸近賓筵，是位彌尊，酬禮漸殺，故云「禮彌卑」也。引《記》「一張一弛」者，《禮記·雜記》文。案：《義疏》云：「主人復位，經不言其方。據下胥薦主人於洗北，似洗北其位也。然經明言「復」，則其初位矣。入門時，未聞有洗北之位。考《周禮》膳夫、士，前入門，士在西，東面，復位，當指此言。」

右主人酬賓

小臣自阼階下請媵爵者，公命長。命長，

使選卿、大夫之中長幼可使者。【疏】正義曰：李氏如圭

云：「媵爵者，獻酬禮成，更舉酒於公，以爲旅酬之始。」

注云「命長，使選卿、大夫之中長幼可使」者，張氏爾岐云：

「長幼可使」，當云「年長而可使者」。敖氏云：「長，謂下

大夫之長也。此但云「命長」，不言「下大夫」者，其以下大

夫媵觶有常職故與？」盛氏云：「長官之長，非年之長也。

下大夫五人，以屬於司徒者爲長，蓋「朝廷莫如爵，鄉黨莫

如齒」，其義異也。」韋氏協夢云：「如注說，則賓乃大夫，豈

可使卿媵爵乎？敖說較長。」褚氏寅亮云：「注中『卿』字

衍，觀《大射儀》注『卿則尊，士則卑』，鄭君之意便明。」《義

疏》云：「賓以大夫，則媵爵自無使卿之理。長如『達官之

長』之長，非以年計也。注兼卿言，且并幼以立說，非也。」

小臣作下大夫二人媵爵。作，使也。卿爲上大夫，

不使之者，爲其尊。【疏】正義曰：敖氏云：「以公命作之

也。二人，所謂長也。大夫在入門左之位北面，則小臣作

之者其亦南面與？」韋氏協夢云：「小臣作媵爵者，宜東南

面。若南面，則背君矣。」注云「卿爲上大夫，不使之者，爲其尊」者，盛氏云：「注意蓋謂媵爵之事賤，不可使尊長爲之也。此與命大夫爲賓、宰夫爲主人義異。」韋氏云：

「大夫有三等，上大夫卿，固不可使；而中大夫乃副於卿

者，《大射儀》謂之『小卿』是也；惟下大夫爵位稍卑，故使

之。」吳氏廷華云：「獻畢未樂賓，即行旅酬之禮者，重飲

也。南面者，大夫在門右，少進北面，故向之。二大夫皆最

長者也，君命長而使二大夫，其爲常法可知。」媵爵者阼

階下皆北面，再拜稽首，公荅再拜。再拜稽首，

拜君命也。【疏】正義曰：敖氏云：「北面亦東上。」方氏苞

云：「主人及媵爵者，皆代君行禮，而君禮之則異，何也？

膳宰，士也，且爲獻主，職素定矣，故臨事無加命。媵爵者，

大夫也。小臣作之，必進受命於君，故荅其拜也。主人獻

賓、獻公，酬酢始畢，即作媵爵者，俾主人得暫息，然後獻

公、卿、大夫也。」媵爵者立于洗南，西面北上，序

進，盥，洗角觶，升自西階。序進，酌散，交

于楹北，降阼階下，皆奠觶，再拜稽首，執觶

興，公荅再拜。序，次第也，猶代也。楹北，西楹之北

也。交而相待於西階上，既酌右還而反，往來以右爲上。

【疏】正義曰：賈疏云：「西面北上者，是未盥相待之位。序進盥，則北面向洗。」注云「序，次第也，猶代也」者，

《禮記·祭義》：「卿、大夫序從。」注：「序，以次第從也。」

又《郊特牲》：「昏禮不賀，人之序也。」注：「序，猶代也。」

案：《公食大夫禮》序進注：「序，猶更也。」更，代同義。

更代與次第義互相成，故兼言之。云「楹北，西楹之北也。

交而相待於西階上，既酌右還而反，往來以右爲上」者，賈

疏云：「二大夫盥洗訖，先者升西階，由西楹之北，向東楹

之西，東面酌酒訖，右還由西楹北，向西階上，北面。後者

升西階，亦由西楹之北，向東楹之西，酌酒訖，亦由西楹之

北，西階上北面相待，乃次第而降。故云「交而相待於西階

之上」。敖氏云：「序進之節，先者既洗，後者乃進也。先

者既洗，即升立於西階上，以俟後洗者也。酌散更言「序

進」，明其復發於西階上也。交於楹北，交相右也。凡經文

惟言「交」者，皆謂相右也。階上之位，退者在東，進者在

西，以相右爲便。降時亦先者降三等，後者乃降，蓋同階而

同時俱降之法然耳。張氏惠言云：「下經云：「序進，坐奠

於薦南。」注：「往來由尊北，交於東楹之北。」疏以爲先者

於南西過，後者於北東行。案：《大射》注云：「先者既

酌，右還而反，與後酌者交於西楹北，相左。俟於西階上，

乃降，往來以右爲上。」又云：「既酌而代進，往來由尊北，

交於東楹北，亦相左。」若如疏說，則是相右，非。蓋誤會注

以右爲上之文也。凡往來無相右者，鄉射禮可證。鄭云

「以右爲上」者，謂階下並行時，來既上，賡居由右，及其升

堂，上賡，由階上之東，進奠饌，右還與進者相左，則在西方

而降又居右也。韋氏協夢云：「始言序進者，以序而盥

也；後言序進者，以序而酌也。先者既洗，當退立於階下

而立俟；後者既洗，與之以序而升也。升亦先者升三等，

後者從之。敖氏謂先者既洗，即升立於西階。恐未然。」褚

氏寅亮云：「前之序進，進而盥洗也；後之序進，進而酌

也，故兩言之。若如敖氏先者立於西階上，以俟後洗者，則

酌散時肩隨而行，安得有交於楹北節次？凡相交者必相

左，吉事皆然，經不盡言耳。」吳氏廷華云：「注云「往來以

右爲上」，賈疏合洗南西面及階上北面言之。愚謂在洗南

時，先者既洗而還，後者又往洗，往來相交時，先者在東南

行，後者在西北行，先者在後者之右，後者在先者之右。賈

疏以楹南西面言之，不知楹南爲暫立之位，雖有左右，何往

來之有？至階上亦暫立相待之右，亦無往來。」又云：「此

及下若君命皆致二節，凡四言「序進」，其兩序進在洗南者，

不必言矣。其堂上之節，據經酌散者升階即言「序進」，實

觚者既酌始言「序進」，則酌散者之序進，在階上始發步而

頃。據此，則酌散者既升階，^①即序長幼爲先後，長者先進，少者待於階上，長者既東面酌散，乃退，由其右西面，還，^②視其初進酌之道爲少南，初進酌之道則在其北也。後者當先者既酌而退之時，即發步，循先者初進酌之道而進，當西楹之北，轉而東行，乃與退者東面相值。退者西面，以北爲右，進者東面，以南爲右，彼此相爲右，所謂交也。然後先者待後者反而並降焉。酌散者之序進相交者如此。實觚者升階即東西並行，當尊乃轉而東行，及尊，並實觚然後序進。後者待於瓦大尊所，先者由方壺之西，轉方壺之北，又轉而南，當公席，乃東面奠於薦南，既奠亦退，從其右，由西南而北而西還，及方壺之北，即東楹之北，視初進奠之道，亦在其北。後者當先者既奠而退時，亦從尊所，循先者初進奠觚之道而進，轉及方壺之北，亦與退者東西相值，而彼此相爲右，與酌散者同。及階上，待後者並降而拜送。實觚者之序進相交又如此。合而計之，進退先後凡四道也。」**媵爵者皆坐祭，遂卒觶，興，坐奠觶，再拜稽首，執觶興，公荅再拜。**【疏】正義曰：方氏苞云：「鄉飲酒，鄉射，媵爵者皆先自卒爵，示欲代賓大夫導飲也。而賓、大夫更卒觶，必自致其敬而後安也。燕、射，宰夫代君以獻大夫，似可代君以酬。而公酬賓

亦自卒觶，以君之於臣，不可以獻，而酬以導飲，則無妨也。至酬賓以後，三舉酬，不復卒觶，則義當有節耳。」○蔡氏德晉云：「此下大夫二人媵爵於公，各飲一觶以導飲也。」**媵爵者執觶待于洗南。**待君命也。【疏】正義曰：敖氏云：「洗南西面，歸者之位。」吳氏廷華云：「待於洗南者，以將奠觶於篚也。」小臣請致者。請使一人與？二人與？優君也。【疏】正義曰：敖氏云：「致如『致爵』之『致』。酒，君物也，以進於君，故謂之致。」張氏爾岐云：「或皆致，或一人致，取君進止。」吳氏廷華云：「優字未安。」《大射》注云：「不必君命。」若君命皆致，則序進奠觶于篚，阼階下皆再拜稽首。公荅再拜。媵爵者洗象觶，升實之，序進，坐奠于薦南，北上，降阼階下，皆再拜稽首，送觶，公荅再拜。序進，往來由尊北，交於東楹之北，奠於薦南，不敢必君舉也。《大射禮》曰：媵爵者皆退反位。【疏】正義曰：

①「階」，原作「皆」，今據《續清經解》本改。

②「還」，原作「遠」，今據《儀禮疑義》改。

「升賓之」，《校勘記》云：「『賓』，唐石經、①徐、陳、《集釋》、《通解》、楊氏、敖氏俱作『賓』。」○敖氏云：「皆，皆一人也。言若者，不定之辭。下文云『若命長致』，與此互見也。亦小臣命之乃序進。又實之乃云『序進』，見其既酌而並立於尊所，乃行也。此進退皆不相待於西階上，蓋急於為君酌與拜送也。」注云「序進往來，由尊北交於東楹之北」者，賈疏云：「前二人酌酒降自西階，故交於西楹之北；此酌酒奠於君所，故交於東楹之北。交於東楹北者，先酌者東面酌訖，由尊北又楹北，往君所，奠訖右還而反。後酌者亦於尊北，又於楹北，與反者相交。先者於南西過，後者於北東行，奠訖亦右還而反，相隨降自西階。」褚氏寅亮云：「婦執角觶待於洗南，俟後命也。既得命，則先奠觶於篚，乃拜命。既拜，乃洗象觶，禮之次第宜然。此經始言『序進』，在奠觶前；次言『序進』，在升賓後，不在西階上立俟明矣。又先酌者西行，宜在北；後酌者東行，宜在南。如是乃得相左而交於楹北。疏似倒說。」云「奠於薦南，不敢必君舉也」者，賈疏云：「《鄉飲》、《鄉射》皆云：『莫者於左，將舉者於右。』是鄉飲酒一人舉觶及二人舉觶，皆奠於薦右。今言賡爵於公，是將舉旅，當奠於薦右，而奠於薦左，故云『不敢必君舉也』。」江氏筠云：「二大夫賡爵，疏於交于楹北無明

文。至序進坐奠於薦南，疏則謬。案：《大射》『交於楹北』注：『先者既酌，右還而反，與後酌者交於楹北相左。』於序進奠於薦南，則云：『既酌而代進往來由尊北，交於東楹北，亦相左。』疏云：『言亦者，亦前酬酌自飲時，相左於西楹之北，時後者南相東向，先者北相西向，向西階右還，北面待後至降也。今此二人先升於尊西，東面酌訖，於東楹之北東向，向公前奠之，右旋於東楹之北，北畔西過。後者亦於尊西，東面酌訖，於東楹之北，南過東向，於公前奠之。是亦交於楹北相左也。』較《燕禮》疏為是也。敖氏釋交於楹北云：「階上之位，退者在東，進者在西，以相右者為便。」然由楹北至尊後，由尊北至君席前，俱南相行為疾，而北相行較緩。臣趨君命，理宜由疾，其先者酌訖，奠訖既得將事，其後者方進將事，則後者之進，先者於時宜少北以便之。疏說不如鄭義也。」李氏如圭云：「尊在東楹之西，以執罍者在尊南，故既酌，由尊北楹北往奠於君所。薦南，君左也。」盛氏云：「公席在阼階上，西鄉，薦南即其左也。奠於薦南，與《鄉飲酒·記》所謂『將舉者於右』之義異，故注

①「經」下，原衍「作賓」二字，今據《十三經註疏校勘記》刪。

以「不敢必君舉」釋之。」引《大射禮》者，張氏爾岐云：「見此二人阼階下拜訖，亦反門右北面位也。」

右二人媵爵於公

公坐取大夫所媵觶，興以酬賓，賓降西階下，再拜稽首。公命小臣辭，賓升成拜。

興以酬賓，就其階而酬之也。升成拜，復再拜稽首也。先時君辭之，於禮若未成然。【疏】正義曰：李氏云：「此君為賓舉旅行酬也。」敖氏云：「曷者君與賓各受主人之獻，其情意猶未接，至是公乃酬賓，而與之為禮也。」注云

「興以酬賓，就其階而酬之也」者，李氏云：「酬賓就西階，降尊以就卑也。」盛氏云：「公酬賓于西階上，以貴下賤也。」胡氏肇昕云：「敖氏云：『興以酬賓，謂興立于席，舉觶鄉賓而酬之也。酬賓亦不下席，君尊也。』說與注異，解禮者多據以駁注。方氏苞云：『凡獻酬，主人就賓之階，賓就主人之階，經皆明著之，況以君而就臣之階，以酬以拜，無不特書之理。敖說於文義脂合。』韋氏協夢云：『如注說，則當云降適西階上酬賓，不當祇言興矣。且公若降酬賓，則於賓之拜，公可自辭之，不必使小臣矣。』案：經文簡

質，多互文見義。云「興」、云「賓降西階下」，則公之就西階可知也。賈疏云：「賓降拜，不于阼階下，而言西階下，故知公在賓西階上也。不言西階者，以公尊，空其文也。」發明鄭義，最為明顯。云「升成拜，復再拜稽首也。先時君辭之，於禮若未成然」者，上云「再拜稽首」，此云「升成拜」，是升而復再拜稽首也。蔡氏德晉云：「謂之成拜者，以堂下再拜，而君辭之，若未成然，故復升堂，再拜稽首以成之也。」敖氏云：「西階下再拜稽首，雖為賓，不敢不盡臣禮也。辭者，不受其拜下之禮，賓之也。賓升成拜，順君賓己之意也。」埤案：小臣以公命辭賓，不於阼階遙辭之，乃至西階東且西面者，準上命執事者必就其西方之位。又：《聘禮》賓在東，則使命東面致命，此經賓在西，故西面。公坐奠觶，荅再拜，執觶興，立卒觶，賓下拜，小臣辭，賓升，再拜稽首。不言成拜者，為拜故下，實未拜也。下不輒拜，禮殺也。此賓拜於君之左，不言之者，不敢敵偶於君。【疏】正義曰：注云「不言成拜者，為拜故下，實未拜也。下不輒拜，禮殺也」者，敖氏云：「賓未卒拜，而小臣辭之，異於初也。此不言成拜者，未卒拜於下，無所成也。」吳氏廷華云：「下時將拜，未拜君即辭之，因而升拜，非下後遲回未拜也。」韋氏協夢云：「上云『升成

拜」，此云「升，再拜稽首」者，升降時已再拜稽首，特升以成之耳，故云「成拜」；此降未拜，升始拜，必言「再拜稽首」者，嫌祇升拜而不再拜且稽首也。「云「此賓拜於君之左，不言之者，不敢敵偶於君」者，賈疏云：「上云「公酬賓於西階上」，則此賓升再拜者，拜於君之左可知。不言者，不敢敵偶於君，闕其文也。」盛氏云：「奠觶荅拜，皆於西階上。敖云：「奠於薦右。」郝云：「荅於阼階上。」皆非也。君無北面之禮，雖就賓階酬之，然其西面自若也。賓之拜也，於其西北面，則不得云「拜於君之左」矣。注疏說亦未是。」^①

公坐奠觶，荅再拜，執觶興，賓進，受虛爵，降奠于筐。【疏】正義曰：敖氏云：「賓受虛爵於君席

之前，故云「進」。必就而受之者，臣事君之禮也。受時蓋東面於薦北。」方氏苞云：「觀此，則公不就西階益明矣。凡經言「進」，體例不一。於揖、讓、行、趨而言「進」者，各指其事，表其地也。於受爵而言「進」者，皆至其席前。《鄉飲酒》：「賓拜，進，坐奠觶於薦西。」《鄉射》：「賓進，受爵於席前。」是也。於授物而言「進」者，婦見舅姑執筭，^②進拜，奠於席，是也。公酬不言就西階，飲不言降席，而賓受虛爵曰「進」，則進受於公之席前明矣。」案：盛氏云：「賓於此云「進」，則拜時於西階上少西矣。受虛爵亦北面。敖說

非。公既受觶，反位。」○高氏愈云：「公復卒觶以導賓飲，蓋公飲第二爵矣。」易觶洗。君尊，不酌故也。凡爵，不相襲者也。於尊者言「更」，自敵以下言「易」。更，作新；

易，有故之辭。進受虛爵，尊君也。不言公酬賓於西階上及公反位者，亦尊君，空其文也。【疏】正義曰：注云「凡爵，不相襲者也。於尊者言「更」，自敵以下言「易」者，賈疏云：「謂受尊者爵，與尊者爵，皆言「更」；受卑者爵，與卑者爵，皆言「易」。此公酬賓與卑者爵，故言「易」也。」

案：朱子謂更、易本無異義。敖氏云：「易觶者，謂更取角觶也。或言「更」，或言「易」，互文耳。」張氏爾岐云：「易，猶更也。注於更、易二義太生分別。賈疏援證雖多，亦未見確據。」胡氏肇昕云：「《少牢》「更爵」注亦云：「更，猶易也。」蓋散文則通，對文則異。鄭以篇中或言「更」，或言「易」，故通校前後經文，而分別之如此。」公有命，則不易不洗，反，升，酌膳觶，下拜，小臣辭，賓升，再拜稽首。下拜，下亦未拜，凡下未拜有二：或禮

① 「疏」，原脫，今據《儀禮集編》補。

② 「筭」，原作「筭」，今據上文改。

殺，或君親辭。君親辭，則聞命即升，升乃拜，是以不言成拜。【疏】正義曰：敖氏云：「命謂使之，仍用象解也。賓則不易之，不敢違君意也。不洗者，嫌也。承尊者後而復洗之，則嫌若不以為絜然。」○注「是以不言成拜」，《校勘記》云：「以」，徐本、《集釋》、《通解》、楊氏俱作「亦」。

云「凡下未拜有二：或禮殺，或君親辭」者，賈疏云：「禮殺者，謂若酬時，是也。云『或君親辭』者，^①謂若《公食大夫》：公拜至，賓降，西階東北面，荅拜，公降一等辭，賓升，階上北面，再拜稽首。是階下未拜，不得言升成拜也。」公荅再拜。拜於阼階上也。於是賓請旅侍臣。【疏】正義

曰：注云「於是賓請旅侍臣」者，李氏如圭云：「請行酒於羣臣也。」記曰：「凡公所酬，既拜，請旅侍臣。」賈疏云：

「大射於此時，賓請旅於諸臣。此不言者，文不具。」賓以旅酬于西階上。旅，序也，以次序勸卿、大夫飲酒。

【疏】正義曰：方氏苞云：「公卿先受酬而後獻，何也？君不可親酌以獻臣。若酬，則自飲以相導，故可親也。公卿，君之所敬，故既親酬賓，因藉手於賓以酬之。士為獻主，而賤爵者以大夫，何也？君親酬賓暨公、卿、大夫，禮重於宰夫之獻也。」射人作大夫長升受旅。言作大夫，則

卿存矣。長者，尊先而卑後。【疏】正義曰：注云「言作大夫，則卿存矣」者，李氏如圭云：《王制》曰：「上大夫，卿。」通言之，則卿亦大夫。」方氏苞云：「周有六卿之貳，皆中大夫。記又云：諸侯之上大夫，卿也。下經分獻公、卿及大夫，則此大夫包公、卿明矣。」云「長者，尊先而卑後」者，吳氏廷華云：「此經皆卿、大夫分言之，則上大夫在卿中，大夫則惟中、下大夫耳。此注又以大夫中有卿者，蓋經祇言旅大夫，不言旅卿，故謂卿即在大夫中。下經所謂賓以酬長，是也。與上下經單指中、下大夫異。」張氏爾岐云：「卿稱上大夫，旅三卿徧，次至五大夫。」敖氏云：「長如若長之長，大夫長謂上卿若諸公也。此惟據受賓酬者而言，若有諸公，則先酬之。」賓大夫之右坐奠觶拜，執觶興，大夫荅拜。賓在右者，相飲之位。【疏】正義曰：注「左右者」，《校勘記》云：「左」，諸本俱作「在」。

云「賓在右者，相飲之位」者，賈疏云：賓在西階上酬卿，賓與卿並北面，賓在東，卿在西，是賓在大夫之右。賓位合在西，今在東者，相飲之位也。敖氏曰：「惟云大夫

①「云」，原脫，今據《儀禮注疏》補。

者，諸公與卿亦大夫耳。大夫未獻乃先受旅者，此酬禮不主於己，故無嫌。」韋氏協夢云：「敖氏既謂若有諸公先酬之，則此所云大夫，惟三等大夫而已。且《王制》云：「諸侯上大夫，卿」，未聞稱諸公大夫者。敖謂諸公亦大夫，非是。」賓坐祭，立飲，卒觶不拜。酬而禮殺。【疏】正義曰：注云「酬而禮殺」者，賈疏云：「對酢之時，坐卒爵，拜既爵，是禮盛也。」敖氏云：「賓獨祭酬酒者，以此酒爲公所酬，異之也。」若膳觶也，則降更觶洗，升實散，大夫拜受。賓拜送。言更觶，卿尊也。【疏】正義曰：注云「言更觶，卿尊」者，與卑者爵稱易，與尊者爵稱更。賓爲大夫卑於卿，故言更觶者，卿尊也。敖氏云：公優所酬者，或使得用象觶，而不可以及乎他，是以更用角觶。旅酬而洗者，亦爲更觶新之也，餘則不洗。賓既拜送，則就席。張氏爾岐曰：「膳觶，本非臣所可襲，以君命故得用。至酌他人，則必更矣。注釋「更」字義亦未可信。」盛氏世佐云：「此爲「公有命則不易不洗」者言也。若既易，則不更不洗而竟實散矣。不復酌膳者，異於公所酬也。」吳氏廷華云：「所以易觶者，蓋君本以不易者優賓，賓既飲訖，不敢輕用之大夫也。」高氏愈云：「此賓酌觶自飲，而因

以導大夫飲，蓋賓飲之第二爵也。凡諸大夫皆飲一爵。」大夫辯受酬，如受賓酬之禮，不祭。卒受者以虛觶降，奠于筐。卒，猶後也。《大射禮》曰：「奠於筐，復位。今文「辯」皆作「徧」。【疏】正義曰：辯受酬如受賓酬之禮者，敖氏云：「如射人作、升、受旅以下之儀也。」方氏苞云：「一如公卿受賓酬之禮而無殺也。」「不祭」者，賈疏云：「酬禮殺也。」敖氏云：「此見其異者也。酬酒不祭，乃其正禮。賓之祭者，有爲爲之耳。」張氏爾岐云：「辯受酬，皆拜受拜送。但賓之初酬有坐祭，後酬者則不祭爲異。」「卒受」者，敖氏云：「下大夫之末者也。無所酬，獨飲於西階上。」張氏云：「大夫辯受酬，不及於士也。」吳氏廷華云：「下燕時大夫卒受者，有酬士之文，此亦當然，今依經闕之。」蔡氏德晉云：「堂上無士席，三旅皆自大夫止，不及於士，至三旅後乃徧及也。」注引《大射禮》者，張氏云：「奠觶復位，復門右北面之位。」

右公舉媵爵酬賓遂旅酬初燕盛禮成

主人洗，升，實散，獻卿于西階上。酬而後獻卿，別尊卑也。飲酒成於酬也。【疏】正義曰：張氏爾

岐云：「自此至『降奠於篚』，主人獻卿；又二大夫媵觶於公；公又舉媵酬賓若長，遂旅酬：凡三節。此獻卿而酬，燕禮之稍殺也。」○敖氏云：「實散，降於賓也。凡獻於西階上，皆西南面。」韋氏協夢云：「獻卿實散者，非公所命獻之人也。凡公命獻者皆酌膳。」注云「酬而後獻卿，別尊卑也。飲酒成於酬也」者，賈疏云：「此酬非謂尋常獻酬，乃是君爲賓舉旅行酬。飲酒之禮成於酬，酬辯乃獻卿，以君尊卿卑，^①是以君禮成，卿乃得獻，故云「別尊卑也」。」楊氏曰：「卿者，君之股肱腹心，燕禮之所當先也。獻禮後卿，何也？《燕義》云：「不以公卿爲賓，而以大夫爲賓，爲疑也，明嫌之義也。」既命大夫爲賓，故先獻賓，獻賓而後獻公。又獻禮成於酬，禮成而後獻卿。此事之序、禮之宜，非後於卿也。」褚氏寅亮云：「凡旅者不洗，此洗者，爲更爵也。」吳氏廷華云：「此《燕義》所謂公舉旅行酬而後獻卿也。卿不與賓同獻者，卿與鄉飲尊者等，至此乃獻，亦待尊者意也。」胡氏肇昕云：「卿尊於大夫而親於君，不以卿爲賓者，如子不爲父尸之例，以子親於父也。此即《燕義》所謂「明嫌之義」也。既以大夫爲賓，則大夫雖卑，而爲賓則尊，故獻賓必先於獻卿。飲酒成於酬，既旅酬則獻賓之禮已成，乃特獻卿焉，亦以尊卿也。注所謂「別尊卑」者，指賓

與卿言。疏謂「君尊卿卑」，非是。」司宮兼卷重席，設于賓左，東上。言兼卷，則每卿異席也。重席，重蒲筵緇布純也。卿坐東上，統於君也。席自房來。【疏】正義曰：注云「言兼卷，則每卿異席也。重席，重蒲筵緇布純也」者，敖氏云：「兼卷，謂以兩席相重而並卷之也。其卷亦自末。」^②執時兼卷，是設時亦兼布之矣。此固異於設加席之法。亦以其二席之長短同，故得由便爲之爾。」張氏爾岐云：「重席，但一種席重設之，故注云「重蒲筵緇布純也」。加席則於席上設異席，如《公食大夫·記》云「司宮具几與蒲筵常，緇布純，加萑席，尋，玄帛純」是也。」《經義聞斯錄》曰：「經云「兼卷」，則上下長短同，其爲一種席可知。若上經「司宮筵賓於戶西，東上，無加席」。賓，大夫也。下經若有諸公，獻之，如獻卿之禮，席於阼階西，北面東上，無加席，爲近君屈也。《鄉飲酒禮》賓若有尊者，席於賓東，公三重，大夫再重，大夫如介禮。有諸公則辭加席，委於席端；無諸公則大夫辭加席，^③主人對，不去加席。《鄉射

① 「卿」，原作「臣」，今據《儀禮注疏》改。

② 「自」，原作「是」，今據《儀禮集說》改。

③ 「公」，原脫，今據《經義聞斯錄》改。

禮《大夫若有遵者，席於尊東，大夫辭加席，主人對，不去加席，皆非一種席矣。》吳氏廷華云：「《周禮·司几筵》：『大朝覲，疏云：初在地者一重謂之筵，重在上者謂之席。』上經司宮筵賓，疏說亦然。此經筵賓無加席，是就初在地一重言之，故只曰『筵』。《鄉射·記》言『蒲筵，緇布純』，《公食·記》『蒲筵常，緇布純』同，當俱指在地一重。其上一重，則據《司几筵》，設莞筵，加纁席，加次席。《公食·記》蒲筵加萑席，是加席，與下一重之筵不同。此注以重爲重蒲筵，非也。蓋因鄉飲酒有加席，而彼經只言蒲筵，故以重蒲筵意會言之。要知此經重席，當即是加席。《鄉飲酒禮》先曰『重』，後曰『加』，蓋重即加耳。」埤案：《義疏》曰：「燕以尊賓爲節，故席於中堂。卿雖貴於賓，而不敢以尊干正禮，^①故後賓獻，而位於賓東。」又：「布席、徹席者，須在席之上下爲之，乃便於卷布。今司宮席卿西面，從上布之也。卿辭重席，^②當在將就席之先，則北面近席時也。楊圖皆誤。敖云：拜送不言卿，可知。」「賓東即鄉飲酒之尊東，蓋遵者之位也。彼尊在房戶間，故以尊爲節，而謂之尊東；此房戶間無尊，故以賓爲節，而謂之賓東。」云「卿坐東上，統於君也」者，盛氏曰：「卿席於賓左，猶鄉飲酒禮之遵者席於賓東也，惟東上爲異。遵，席西上，遵亦主也，故統於

賓，卿席東上，卿亦臣也，故統於君。《鄉飲酒禮》尊於房戶之間，故遵在賓東，實在尊東。^③此雖尊於東楹之西，而席卿之處亦如之。知不繼賓而東者，以賓東戶牖之間爲王設扆之處，宜辟之也。三卿之序，^④亦以東爲上，司徒最東，次司馬，次司空也。」云「席自房來」者，《公食大夫》云「宰夫筵出自東房」是也。卿升，拜受觚，主人拜送觚。卿辭重席，司宮徹之。徹，猶去也。重席雖非加，猶爲其重累去之，辟君也。【疏】正義曰：注云「重席雖非加，猶爲其重累去之，辟君也」者，敖氏云：「謂徹去上席也。卿以重席爲辭，故去其上席。爲卿設重席，正禮也。必辭之者，去君差近宜辟之。」張氏爾岐云：「以君有加席兩重，此雖蒲筵一種重設，嫌其兩重，與君同也。」乃薦脯醢。卿升席坐，左執爵，右祭脯醢。遂祭酒，不啐酒，降席，西階上北面坐，卒爵。

①「干」，原作「於」，今據《儀禮義疏》改。

②「席」下，原衍「者」字，今據《儀禮義疏》刪。

③「實」，《儀禮正義正誤》作「賓」。

④「序」，原作「席」，今據《儀禮集編》改。

興，坐奠爵，拜，執爵興。主人荅拜，受爵。

卿降，復位。不酢，辟君也。卿無俎者，燕主於羞。

【疏】正義曰：敖氏云：「不啐酒則不拜酒，不告旨，可知。」

此亦降於賓者也。卿升降席，皆自西方。」盛氏云：「復位，

復堂下西面位也。」吳氏廷華云：「此經與《大射》不同，《大

射》爲祭而設，賓無專屬，故卿與賓同設俎。此經如聘賓勞

臣，賓有專屬，卿不得與賓同，故無俎也。或問：上有無事

而燕之禮，賓亦宜無專屬，與大射同，而卿亦無俎，何也？

曰：有專屬者當以此禮爲準，無屬者則可以大射禮通之。

如聘使之燕，應有戒宿。此經請賓，但就已臣言。蓋經文

不能徧具，以理爲斷，可也。」注云「不酢辟君也」者，張

氏爾岐云：「獻公，主人酢於阼階下。此不酢者，嫌與獻公

同也。」韋氏協夢云：「卿不酢主人者，非正賓也。主人亦

不自酢者，嫌與君禮同也。」云「卿無俎者，燕主於羞」者，敖

氏云：「無俎者，燕禮輕於大射，故卿遠下賓也。」方氏苞

云：「大射大夫有胥，而燕則卿無胥，何也？唯食禮有茹

牲體，饗，燕皆祭而不舉。大射將祭而辨尊卑，義近於饗，

故備設薦俎以見其文。燕示慈惠，庶羞畢陳以致滋味，故

公及賓而外不設薦俎，以見其質也。」○高氏愈云：「此主

人獻卿，而卿各飲一爵也。」辯獻卿，主人以虛爵

降，奠于筐。今文無「奠于筐」。【疏】正義曰：敖氏

云：「辯獻卿，如實散以下之儀，惟不洗耳。主人既奠爵，

復位于西方。」注云「今文無「奠于筐」」者，胡氏承珙

云：「上文賓進受虛爵，降奠于筐；大夫卒受者以虛觶降，

奠於筐。又下獻工云：主人受爵，奠于筐。知此亦當有奠

于筐。《大射儀》亦云：「辯獻卿，主人以虛爵降，奠于筐。」

鄭以彼決之，故從古文。」射人乃升卿，卿皆升就

席。若有諸公，則先卿獻之，如獻卿之禮。

諸公者，謂大國之孤也。孤一人，言諸者，容牧有三監。

【疏】正義曰：注云「諸公者，謂大國之孤也。孤一人，言諸

者，容牧有三監」者，張氏爾岐云：「鄭司農注《典命》云：

上公得置孤卿一人。後鄭從之，是孤卿本一人也。《王制》

云：「天子使其大夫爲三監，監于方伯之國，國三人。」是方

伯之國，或有三公，故云「諸公」也。賈疏又云：立三監是

殷法，周使伯佐牧，不置監。其有監者，因殷不改者也。故

鄭云「容」，容有異代之法也。」敖氏云：「此禮通五等侯國

言之，故於諸公云「若有」，蓋上公之國乃有四命之孤，侯國

以下則無之也。」褚氏寅亮云：「獻雖先卿，其升席亦必俟

射人命之，亦與卿序升。敖氏謂獻即先升，恐未是。」吳氏廷華云：「公舉二大夫媵爵者三：上公爲賓舉旅，一也；下若賓若長惟君所酬，二也；筮人之先，公又舉奠，三也。外此則舉賓所媵爵者一，下公坐取賓所媵觶興，惟公所賜是也。若無算爵曰酌膳爵者，酌以進公，酌散爵者，酌以之公命所賜，二者雖曰公賜，而不言公舉，是二大夫所媵止須三爵，上一人所媵既有二爵，則此一爵已足。命長之義如此，且可知經言若者，雖是無定之辭，實以上須三觶，前媵兩，則後媵必一；前媵一，則後媵必兩，故云「若」。則所謂「若」者，名曰無定，實則有定耳。注以命長爲優，蓋謂命長則少一觶，少一觶則公少一舉耳。不知三觶皆公舉，何論優與不優乎？」又曰：「三監之說，雖本之《王制》，然是殷法，於周制無考。此言諸者，當兼致仕者言之。」盛氏云：「孤一人而曰諸公者，以別於其君之稱公也。諸，衆也，若曰猶是衆臣云爾。《周禮·典命職》云：「公之孤四命，以皮帛，眡小國之君。」注云：「眡小國之君者，列於卿、大夫之位而禮如子、男也。」惟其禮如子、男，故亦得稱公；惟其列於卿、大夫之位，故加「諸」以別之。亦有言公而不加諸者，《鄉飲酒禮》云「公三重」，是也。以其在鄉里言之也。天子之上公亦有稱諸公者，《曲禮》曰「諸公東面」是也。以其在王廟言之也。正名之義，各有攸當。注乃引殷法以釋之，

誤矣。」胡氏肇昕云：「諸公之說，各家不同。《釋官》以注說爲允，詳《鄉飲酒禮》。」今案：盛氏說亦明析，可備一解。蓋對公而言，則別之曰諸公，此經是也；不對公而言，則亦曰公，《鄉飲酒禮》是也。此亦散文則通，對文則異之例耳。席于阼階西，北面東上，無加席。席孤北面，爲其大尊，屈之也。亦因阼階西位近君，近君則屈，親寵苟敬私昵之坐。【疏】正義曰：注云「席孤北面，爲其大尊，屈之也」。亦因阼階西位近君，近君則屈「者，敖氏云：「席之於此，以其尊於卿，而不與之序也。阼階之西，於君席爲西南，直其左也。諸公在君之左，卿在君之右，蓋以左爲尊也。東上者，亦統於君也。無加席者，以太近於君，故設時即不敢與之同，而不待其辭也。上爲卿設重席而已，而於公乃云「無加席」者，明其尊於卿。若或於君所用兩席焉，則當有加席而非重也。禮，加席尊於重席。」方氏苞云：「諸公乃天子有加命，而禮絕於同僚者也。故席於阼階西，所以別於卿、大夫，而并無加席，以示下不敢過於賓，上不敢擬於君也。」褚氏寅亮云：「此同於賓也，不設之而待其辭者，敖氏謂位近於君是也。不言無重席而言無加席者，別言之則席同者曰重，異者曰加，統言之則重亦名加，此經是也。」

右主人獻卿或獻孤

小臣又請媵爵者，二大夫媵爵如初。

又，復。【疏】正義曰：敖氏云：「上經云『皆致』，是猶有一奠，未舉也。小臣又請之者，此媵爵之節耳。蓋歸者公命皆致，今猶有一奠。若惟命長致，^①則奠無矣。故於是時，不以奠之有無，皆當媵爵，蓋以爲節也。」方氏苞云：「公若命長致，則仍有奠而不舉之爵，而再請媵爵者，以此爲公、卿、大夫舉酬之始，不可仍酬賓未用之爵也。曰『二大夫媵爵如初』，見媵爵者，始終惟此二大夫也。爲君行酬則致爵者大夫，坐而飲則執爵者士，輕重之衡也。」張氏爾岐云：「二大夫媵爵，自阼階下，皆北面再拜稽首。至執觶待於洗南，皆與前二人媵爵者同也。」請致者，若命長致，則媵爵者奠觶于筐，一人待于洗南。長致，致者阼階下再拜稽首，公荅再拜。命長致者，公或時未能舉，自優暇也。古文云「阼階下北面再拜」。【疏】正義曰：注「古文」以下十字，今本並脫。徐本、《集釋》、《通解》俱有。注云「命長致者，公或時未能舉自優暇也」者，李氏如圭云：「若者，不定之辭。前所媵二觶，上觶以爲賓舉旅，下觶以爲卿舉旅，今所媵一

觶，以爲大夫舉旅所用，唯此三觶，而言『若命長致』者，優君之辭。」敖氏云：「長，二人中之尊者。命長致云『若』，則或有命皆致者矣。蓋脫屢、升坐以前，君凡三行酬，則大夫所致者當有三爵。然大夫致爵之節惟止於再，故公之命致爵者或前多則後寡，或前奇則後偶，皆互爲進退，以取足於三觶之數，使之無過與不及耳。此經之所明言者，乃前多後寡者也。其所不見者，則皆言『若』以包之。若然，則此時之當致者蓋有定數，而小臣猶請之者，當由君命而不敢自專也。」張氏爾岐云：「前媵爵云『若命皆致』，此媵爵云『若命長致』，皆不定之辭，非謂前必二人，後必一人也，欲互見其儀耳。」褚氏寅亮云：「上經云『若君命皆致』，此云『若命長致』，作不定之辭，似任公之意，乃所以優公也。若論禮意，則初命二人致，次命一人致，乃隆殺之節宜然。」云「古文云『阼階下北面再拜』」者，胡氏承珙云：「案：上文『媵爵者阼階下皆北面，^②再拜稽首」注云：『再拜稽首，拜君命也。』又云：『若君命皆致，則序進，奠觶於筐，阼階下皆再拜稽首。』蓋凡拜君無不稽首者。此一人致爵與上皆

① 「致」，原作「觶」，今據《儀禮集說》改。
② 「者」，原脫，今據《儀禮古今文疏義》補。

致同爲拜君，不應獨無稽首。《大射儀》云：「長致者阼階下再拜稽首。」注亦云：「再拜稽首，重君命。」鄭以彼決之，故不從古文。」洗象鬴，升實之，坐奠于薦南，降，與立于洗南者二人皆再拜稽首，送鬴。公荅再拜。奠於薦南者，於公所用酬賓鬴之處。二人俱拜，以其共勸君。【疏】正義曰：注云「奠於薦南者，於公所用酬賓鬴之處」者，張氏爾岐云：「前二人媵鬴，奠二鬴於薦南，公取上鬴爲賓舉旅，下鬴仍在。今又媵一鬴，奠於薦南，知其在公所用酬賓鬴之空處也。」云「二人俱拜，以其共勸君」者，上云「媵鬴者，二大夫媵鬴如初」，是共勸君也。敖氏云：「不致者亦拜，以始者並受君命，宜終之也。亦拜於阼階下。」

右再請二大夫媵鬴

公又行一爵，若賓若長，唯公所酬。一

爵，先媵者之下鬴也。若賓若長，則賓禮殺矣。長，公卿之尊者也。賓則以酬長，長則以酬賓。【疏】正義曰：注云「一爵，先媵者之下鬴也」者，以前二人媵鬴，奠二鬴于薦南，其上鬴已爲賓舉旅，今爲卿舉旅，又行一爵，故知爲先

媵者之下鬴也。敖氏云：「先若二人致，^①則此一爵乃先致者之下鬴，先若一人致，則此乃後致者之上鬴也。」云「若賓若長，則賓禮殺矣」者，對前爲賓舉旅，爲賓禮盛。云「長，公卿之尊者也」者，有諸公則公爲尊，若無則卿爲尊也。而諸公三卿中，又自有長者。云「賓則以酬長，長則以酬賓」者，經言「若賓若長」，未定之辭，注故兼言之。敖氏云：「長，公若卿之尊者也。至是云『若長』者，公卿已在堂，故君得酬之。君酬之，是亦賓之也，故其爲禮與正賓同。此酬主于公若卿，乃或又酬賓者，容遂尊者之所欲耳。公卿既受獻，君乃爲之舉酬，禮之序也。下於大夫之禮亦然。旅者，賓則以酬長，長則以酬賓。」方氏苞云：「賓前已受酬矣，長之中若有諸公及師保之卿，則宜先，故所酬無定也。公舉酬爵，經文凡三變，此不曰『舉鬴』而曰『又行一爵』，『唯公所酬』者，前已再卒鬴矣，能更勝酒，則仍親卒鬴。若不能勝，可竟以此鬴授賓若長，而使自行酬也。」吳氏廷華云：「上已酬賓，此爲卿舉，所謂卿舉旅行酬而後獻大夫也。經兼言賓者，明或有加禮。」《義疏》曰：「此之舉旅爲卿也，爲卿則以酬長，正也。而亦或由賓以及長，是仍

①「致」，原作「鬴」，今據《儀禮集說》改。下「一人致」同。

優賓也。」以旅于西階上，如初。大夫卒受者以虛觶降，奠于筐。【疏】正義曰：賈疏云：「言『如初』者，一如上爲賓舉旅之節。」敖氏云：「在堂者酬訖，大夫乃升受旅以辯。言大夫卒受，以見士不與也。」楊氏曰：「經云『如初』，謂如前公爲賓舉旅時禮也。前君命二人皆致有兩觶，奠於薦南，後命長致有一觶，奠於薦南：前後凡有三觶。燕禮自立司正以前，凡有三舉旅，用此三觶也。初酬賓時，公坐取所媵一觶以酬賓，是行一觶也。此公又行一爵，若賓若長，唯公所酬。注云：公又行一爵，先媵者之下觶也。下觶未舉，今舉之，是行二觶也。工歌之後，笙人之前，公又舉奠觶，唯公所賜，以旅於西階上如初，是行三觶也。又主人獻士之後，賓媵觶於公，公取此觶爲大夫舉旅。此又在三觶之外也。」

右公又行爵爲卿舉旅燕禮之再成

儀禮正義卷十二 鄭氏注

受業江寧楊大堉補

主人洗，升，獻大夫于西階上。大夫升，拜受觚，主人拜送觚。大夫坐祭，立卒爵，不拜既爵。主人受爵。大夫降，復位。

既，盡也。不拜之者，禮又殺。【疏】正義曰：敖氏云：主人洗，升，不言酌散者，可知也；大夫升拜，拜位亦如獻賓。郝氏云：「不祭脯醢，至終燕脫屣升席而後祭也。降復位，反堂下北面東上之位也。」吳氏廷華云：「大夫未獻，故於此獻之，不敢先卿獻也。」注云「既，盡也。不拜之者，禮又殺也」者，賈疏云：前卿受獻不酢，已是禮殺；今大夫受獻，不但不酢，又不拜既爵，故云「禮又殺」。張氏爾岐云：

「自此下至樂正告公，主人獻大夫，未及旅而樂作，獻工後乃舉旅，旅已奏笙，間歌合樂，爵樂更作，以成三旅，禮又

殺，而樂大備，所以致和樂之情也。」胥薦主人于洗

北，西面，脯醢，無胥。胥，膳宰之吏也。主人，大夫

之下。先大夫薦之，尊之也。不於上者，上無其位也。胥，

俎實。【疏】正義曰：注云「胥，膳宰之吏也」者，李氏如圭

曰：「胥，庶人在官爲什長者。薦羞者皆膳宰，知胥，膳宰

之吏也。」云「主人，大夫之下。先大夫薦之，尊之也」者，

《釋官》曰：「主人以膳宰爲之，是士。注云「大夫之下」，正

明其士耳。《大射》注云：「主人，下大夫也。」謂主人之爵

下於大夫也。」吳氏廷華云：「禮有一時並行者。主人自獻

大夫，胥自薦主人，一時並行，故經特載之獻大夫之中。文

雖若有先後，其實並行，無所謂先後也。」褚氏寅亮云：「薦

主人不於賓酢時者，公未獻也；不於獻卿時者，爵卑於卿

也。薦於獻大夫時者，亦大夫也。同爵而先薦者，則如注

所云「尊之也」。^①於此經而知主人之爲大夫也益決。既

是大夫，而注云上無位者，堂上非本無位也。案：《大射

儀》注云：因辟正主，^②故不薦於上。不薦於上，則上無其

位矣。其始也，與大夫同立中庭北面之位，至從賓升階後，

① 「注」，原作「經」，今據《儀禮管見》改。

② 「因」，原脫，今據《儀禮管見》補。

則遂定位於洗北，非至薦時方易位也。《集說》亦誤。」云「不於其上者，上無其位也」者，張氏爾岐云：「此主人是宰夫，代君爲獻主。君在阼階上，則已不得干正主之位，而薦之堂下，故注云「上無其位也」。敖氏云：「宰夫，士也。先大夫薦之者，以其爲主人異之也；不於賓酢而薦之者，以其爵本賤也。宰夫之位本在西方，亦以其爲主人，故至是而薦之於洗北，因使之易位焉，其意與卿、大夫、士既獻而易位者同。洗北，於正主阼階東之位爲近，主人居之亦宜也。薦西面，主人在其東也。」盛氏云：「宰夫，天子以下大夫爲之，在諸侯當爲士也。天子膳夫爲獻主，膳夫亦是上士。敖說蓋得之。」①云「胥，俎實」者，賈疏云：「胥者，升也。升特牲體於俎，故云「俎實」也。」敖氏云：「無胥者，賤也。自卿已下，已無胥矣。乃於主人見之者，嫌其與賓行禮，或當有之。」辯獻大夫遂薦之，繼賓以西，東上。徧獻之乃薦，略賤也。亦獻而後布席也。【疏】正義曰：注「而後布席」，《校勘記》云：「『後』，徐、葛、陳、閔、監本、《集釋》、《通解》俱作「后」。」○賈疏云：「凡大夫升堂受獻，得獻訖即降。」②獻徧，不待大夫升，遂薦於其位，大夫始升，故言「遂」也。」注云「徧獻之乃薦，略賤也」者，對上卿與賓得獻即薦爲貴也。方氏苞云：「自大夫以下，皆

徧獻後同薦，省其節以便事也。隨獻而薦，則費時多矣。」云「亦獻而後布席也」者，敖氏云：「辯獻乃布席，布席然後薦，是皆變於卿者也。繼賓以西東上，言其薦之次也，其席亦如之。主人辯獻大夫，則降奠爵於筐，而立於洗北之位。」褚氏寅亮云：「辯獻乃布席，布席乃薦之。經言卿席設於賓左，大夫繼賓以西，則賓西無卿，與《大射禮》異。孔氏穎達《燕義》疏謂小卿在賓西者，非。主人辯獻大夫，方有事，安得遽薦之？經雖言於辯獻太夫之前，實待一一獻訖，乃薦主人，不過在布大夫之席之先耳。」盛氏云：「繼賓以西，若卿射三賓之位然，從其類也。賓東之席惟三卿，小卿亦在賓西，言大夫則兼之矣。」卒，射人乃升大夫，大夫皆升就席。【疏】正義曰：《校勘記》云：「『皆』下，唐石經、徐本、《集釋》、楊氏、敖氏俱有「升」字，《通解》無。《石經考文提要》云：「前主人洗升節，疏述經起訖云：自此盡皆升就席。明有升字。」案：《大射》亦有「升」字。」

右主人獻大夫兼有胥薦主人之事

①「蓋」，原脫，今據《儀禮集編》補。
②「得」，原作「後」，今據《儀禮注疏》改。

席工于西階上，少東。樂正先升，北面

立于其西。工，瞽矇歌諷誦詩者也。凡執技藝者稱工。

《少牢饋食禮》曰：「皇尸命主祝。」《樂記》：「師乙曰：『乙，

賤工也。』樂正，於天子樂師也。凡樂，掌其序事，樂成則

告備。【疏】正義曰：敖氏云：「樂正先升，變於射禮也。

北面立于其西，亦與《大射儀》樂正立于西階東之文互見

也。」方氏苞云：「燕與鄉飲酒，樂正先升，大射則後工而

升，何也？此二禮笙入，間歌，合樂備舉，而後樂正告樂

備，故先升，以示並監堂上下之樂也。大射惟歌《鹿鳴》，故

樂正從工師而升，旋隨而降，以監下管。禮略，故其辭亦略

也。鄉射惟合樂，而樂正先升，卒告樂備，何也？鄉大夫

興賢能，故笙歌、間歌宜備舉，以厲羣士。州長教射，則但

舉鄉樂，而鄉之正歌亦可云備矣。若大射，則國政也。禮

宜備樂，而射事殷繁。工歌《鹿鳴》，管惟《新宮》，故不得告

樂備耳。」褚氏寅亮云：「所主爲燕者，或卿或大夫，不定，

故必辯俟其升席後，乃以樂樂之，禮之序也。」○注「瞽矇」，

《校勘記》云：「『矇』，嚴、鍾、葛本俱从目，徐本誤从月。」^①

「云」工，瞽矇歌諷誦詩者也。凡執技藝者稱工，又引《少

牢饋食禮》與《樂記》者，瞽矇諷誦詩，本於《周禮》；執技藝，見於《王制》。《釋官》云：「鄭引《周禮》：『瞽矇』，解工爲

瞽無目者，^②引《王制》、《少牢》，解稱工之義；引《樂記》，

證師與工亦通稱。《國語》：「江、史書世。」韋注：「工，瞽

師官也。《左傳》：「工誦，箴諫。」孔疏云：「《儀禮》通謂樂

人爲工，工亦瞽也。」樂官必以瞽矇爲之，取其精於音聲。

《周禮》：大師、小師爲瞽矇官之長。《左傳》：屠蒯酌以飲

工。而《檀弓》云：「曠也，大師也。」則是大師以下，通謂之

工也。云「樂正，於天子樂師也。凡樂，掌其序事，樂成則

告備」者，《釋官》曰：「《周禮》無樂正，而見於《禮記》·王

制》、《文王世子》者有大樂正、小樂正。《文王世子》云：

『小樂正學干。』注：『小樂正，樂師也。』孔疏云：「諸侯謂

之小樂正，天子謂之樂師。此有大樂正及小樂正，《周禮》

有大司樂，有樂師，故知小樂正當樂師也。但此經多有諸

侯之禮，故謂之大樂正、小樂正也。」今案：《文王世子》所

記多文王以前爲諸侯時事。^③周公制禮，別立大司樂、樂

① 「本」下，《十三經註疏校勘記》有「亦」字。

② 「工」，原脫，今據《儀禮釋官》補。

③ 「時」，原脫，今據《儀禮釋官》補。

師，爲天子之官，而以樂正爲諸侯之職。故此經《燕》、《射》諸篇並言樂正，而不言樂師。《王制》雜陳天子、諸侯之禮，故亦言大樂正、小樂正也。《周禮》：大司樂、樂師同官，諸侯樂正兼彼二職。小樂正當天子樂師，則大樂正當天子大司樂也。大射禮重，有大樂正監其事，故特言小樂正告樂備以別之。燕禮輕，無大樂正，故不言小，其實亦小樂正。以《周禮》樂成告備使樂師，不使大司樂；又饗食諸侯，序其樂事，燕射帥射夫以弓矢舞，皆樂師掌之，知諸侯燕禮亦使小樂正也。《周禮》：「大射，王出入，令奏《王夏》；及射，令奏《騶虞》。」皆大司樂掌之。知諸侯大射雖小樂正告樂備，亦當有大樂正監之也。樂正掌教國子及造士，其職較尊。《周禮》：大司樂，中大夫二人；樂師，下大夫四人。諸侯之官降天子一等，大樂正當下大夫爲之，小樂正當上士爲之。又案：《鄉飲》、《鄉射》二篇樂正不言小，亦小樂正可知。以《大射》特言「小樂正從之」，則知前三篇升堂者，皆小樂正也。但對大樂正，則稱小；不對大樂正，則小樂正亦通言樂正。例在《大射》「小臣」下。「小臣納工，工四人，二瑟。小臣左何瑟，面鼓，執越，內弦，右手相。人，升自西階，北面東上坐。」

小臣坐授瑟，乃降。工四人者，燕禮輕，從大夫制也。面鼓者，燕尚樂，可鼓者在前也。越，瑟下孔也。內弦，弦爲主也。相，扶工也。後二人徒相，天子大僕二人也。小臣四人，祭僕六人，御僕十二人，皆同官。【疏】正義曰：「注「案：禮輕」，①《校勘記》云：「案」，徐本、《集釋》、《通解》、楊氏俱作「燕」，與疏合。」云「工四人者，燕禮輕，從大夫制也」者，以《大射儀》「工六人爲禮重，從諸侯制也。賈疏云：「《公羊傳》：「諸公六，諸侯四。」若然，知非大射，是諸公制，此燕禮是諸侯制者。案：鄉射皆工四人，是大夫制，則諸侯不得有工四人，五等諸侯同六人。彼《公羊》「六人，四人不同者，自是舞人之數，不得以彼決此也。」吳氏廷華云：「此經工四人，《大射》「工六人，《鄉射》「工皆四人。四與六，若有諸侯、大夫之分。故《鄉飲》疏謂天子八，諸侯六，大夫四，士二，非確有所據也。若以此疏引《公羊傳》舞列例之，則此四人，正是諸侯之禮；大射六人，是諸公之禮。燕與射或兩舉之，所謂互文見義，未可知也。」又云：「注以面鼓爲燕尚樂之故，疏以面鼓較鄉飲後首爲臣降於君之故，兩說各別，然注說爲近。」云「面鼓者，燕尚樂，

①「案」，《十三經註疏校勘記》作「按」。下一「案」字同。

可鼓者在前也」者，對《鄉飲酒》「左何瑟，後首」而言也。云「後二人徒相，天子大僕二人也。小臣四人，祭僕六人，御僕十二人，皆同官」者，此《周禮·序官》文。《釋官》云：「《大射》云：『僕人正徒相大師，僕人師相少師，僕人士相上工。』此言『小臣納工』，又云『小臣左何瑟』，不別正與師者，^①蓋總舉其官之辭。鄭引《周禮·序官》，見諸侯小臣下亦有僕人同官，^②大射小臣事繁，故不相工，而專使僕人相工；燕禮事省，小臣與僕人同相。小臣爲官之長，故總言小臣，以燕不主辯尊卑，略之也。又案：此篇單言「小臣」者，唯此爲統舉全官之辭，餘皆謂小臣正也。」胡氏肇昕云：「此經說者不一。如敖氏云：『此諸侯之小臣，乃多於《周官》所言天子小臣之數，亦其異者也。』郝氏云：『《周禮·夏官》小臣四人，公燕小臣相工四人，其他請媵、辭賓之類又小臣，則諸侯小臣不多於天子乎？故禮言難盡合也。』蔡氏德晉云：『案：《周官·大僕》：下大夫二人，小臣上士四人。而祭僕、御僕、隸僕中下士凡二十人，天子之制也。今諸侯之制，小臣相工者四人，而請媵、辭賓之類亦皆小臣，則小臣之數幾多於天子矣。然以《大射儀》考之，小臣納工，工六人，四瑟。僕人正徒相大師，僕人師相少師，僕人士相上工。既稱小臣，又稱僕人，則是大僕之屬，俱得

以小臣稱之，其數固未嘗多也。」盛氏世佐云：「小臣止四人，而盡用之相工，鄭疑其不足於他用，故引《周禮·序官》之文，以見其同官者衆，或可兼攝遞換也。殊不知此相工之小臣即歸之請媵辭賓者，蓋小臣之職，掌王之小命，詔小法儀，正燕服位，於諸侯當亦不異。今以此篇考之，其始戒羣臣，設公席，納卿、大夫，既而請執事及羞膳者，請媵，請致，辭賓下拜，皆以小臣爲之。至是又納工爲之相，前後執事，各不相妨，雖四人何慮其不給乎？若謂其不止於四人，則諸侯設官，必無多於天子之理，適足以滋後人之惑，亦愚所不取也。又案：小臣相工，方行禮之時則然耳，非專司其事也。專司其事者，眡瞭也。舊說諸侯無眡瞭，使小臣代之，非。蓋瞽者不可一刻無相，《周禮》上瞽、中瞽、下瞽共三百人，眡瞭之數亦如之。每瞽一相，必不可少也。諸侯之眡瞭雖減於天子，亦豈小臣所能充其數乎？且眡瞭非官也，而小臣則以上士爲之，於諸侯亦當爲中士，豈得以羣僕侍御之臣而親茲細事乎？然則《眡瞭職》云凡樂事相瞽，常職也。此篇及《大射儀》納工之時，相以小臣等官

① 「者」，原脫，今據《儀禮釋官》補。

② 「見」，原脫，今據《儀禮釋官》補。

以樂賓，故重其事也。若以暫時之相而廢其常職，有以知其必不然矣。小臣降立於西方，東面北上，士之位也。」
 工歌《鹿鳴》、《四牡》、《皇皇者華》。三者，皆《小雅》篇也。《鹿鳴》，君與臣下及四方之賓宴，講道、修政之樂歌也。此采其已有旨酒，以召嘉賓；嘉賓既來，示我以善道；又樂嘉賓有孔昭之明德，可則效也。《四牡》，君勞使臣之來樂歌也。此采其勤苦王事，念將父母，懷歸傷悲，忠孝之至，以勞賓也。《皇皇者華》，君遣使臣之樂歌也。此采其更是勞苦，自以爲不及，欲諮謀於賢知，而以自光明也。【疏】正義曰：《校勘記》云：「注『可則效也』」效，《釋文》、徐本、《集釋》、《通解》、《要義》俱作「傲」。陸氏云：「傲，本又作諂，同。」「更是勞苦」是，徐本作「自」，《集釋》、《通解》、《要義》俱作「是」。○解歌《詩》與《鄉飲酒》篇同。

右升歌

卒歌，主人洗，升獻工。工不興，左瑟，一人拜受爵。主人西階上拜送爵。工歌乃獻之，賤者先就事也。左瑟，便其右。一人，工之長者也。工

拜於席。【疏】正義曰：敖氏云：「此不辯工之爲大師與否，皆爲之洗，以其取觚於洗西之筐，宜因而洗之也。下洗獻笙，其義亦然。鄉飲酒，鄉射非獻大師則不洗者，以其取爵于上筐，故不特爲賤者降也。」盛氏云：「鄉飲，鄉射人臣禮，大師之有無未可知，故或洗或不洗。燕、大射，人君禮，大師無不在，故皆洗也。」韋氏協夢云：「鄉飲、射，臣禮，可略；燕禮則有事公宮，不可不敬。且燕禮之主人非正主，故不妨爲之洗也。然亦爲長者一人洗，觀拜受爵惟一人，則洗亦一人可知。主人西階上拜送爵。」褚氏寅亮云：「凡不洗者不祭，下衆工皆祭酒，則皆洗可知。皆洗、皆祭，君禮之異者也；獻笙同。」江氏筠云：「獻工、獻笙，疏謂皆爲之洗，謬也。《鄉飲》云：『大師則爲之洗。』而其羣工、羣笙，悉皆言祭。此經相祭及坐祭之文，有一與彼異者乎？且疏於彼處亦引記文彼『衆工祭飲』注云：『獻酒重，無不祭也。』疏云：『得獻酒者無有不祭，其正酬亦祭。至旅酬以下，則不祭而已。故下記云：『凡旅不洗，不洗者不祭。』注云：『酬禮殺也，不甚潔也。此衆工不洗而祭，是以云：『獻酒重，無不祭也。』然則不洗有祭而記所云者，不可以例正獻明矣。又案：此經之所洗獻者，恐工與笙俱各於其長一人，工之一人則大師也。鄉飲大夫無常官，必君賜之樂，

并樂人與之，乃有大師。此則諸侯有常官，自有大師，卒歌後自先得獻。《大射儀》「一人拜受爵」注云：「謂大師也。」是也。然其所以爲之洗者，卻非如鄉飲酒專以其爲大師而尊之。蓋彼是尊君賜，此則發端之禮宜然，亦以此主非正主故也，故其於筮亦洗獻。筮之於此宜洗獻者，鄉飲工歌獻工，筮入獻筮，其事相承；此則工歌之後，筮獻之前，間公爲大夫舉旅一節，以其禮更端，故與彼異也。疏謂羣工、衆筮皆爲之洗，殆未必然。」方氏苞云：「鄉飲酒，鄉射主人獻工于西階，及阼階上拜送爵，賓主正禮也。獻筮即拜送爵于西階，禮殺也。燕，大射獻工亦拜送爵于西階。工賤，代君賜爵，不得全用賓主之禮。」韋氏云：「鄉飲，鄉射主人皆阼階上拜送爵，燕禮之主人亦在西階，故即于西階上拜送爵。」注云「左瑟，使其右」者，李氏如圭云：「工北面，酒從東來，故空其右以受獻。《詩·簡兮》曰：『左手執籥，右手秉翟。』赫如渥赭，公言錫爵。」謂此獻工之爵。「云「工拜於席」者，以拜必降席。經不言降席，知拜於席也。薦脯醢。輒薦之，變於大夫也。【疏】正義曰：注云「輒薦之，變於大夫也」者，李氏如圭云：「禮尚異，非謂貴工。」張氏爾岐云：「大夫徧獻乃薦。此獻一人即薦，禮尚異，故變於大夫也。」方氏苞云：「公及賓與公卿獻薦相隨，而工亦

然，何也？工數少，儀略，故歌、奏、獻、薦同時而畢，事同而義異也。」盛氏云：「每獻輒薦，自是獻工之常禮。注說鑿。」使人相祭。使扶工者相其祭薦、祭酒。【疏】正義曰：李氏云：「相祭」文承「薦下」，則長一人祭薦。」胡氏肇昕云：「扶工者，即上文之小臣也。小臣坐授瑟，乃降，使之相，則必升。經不言升相，省文也。」卒爵，不拜。賤不備禮。主人受爵。將復獻衆工也。【疏】正義曰：韋氏協夢云：「受爵亦工授主人，而主人受之也。《鄉飲酒禮》云：『授主人爵。』」注云「將復獻衆工也」者，明此爲獻工長一人，下乃獻衆工之事。衆工不拜，受爵，坐祭，遂卒爵。辯有脯醢，不祭。主人受爵，降奠于筐。遂，猶因也。古文曰「卒爵不拜」。【疏】正義曰：敖氏云：「工之長云「不興」，此云「坐祭，遂卒爵」，文互見也。」注云「古文曰「卒爵不拜」」，鄭不從者，胡氏承珙云：「上文「主人獻，工一人拜受爵，卒爵不拜」注云：『一人，工之長者，賤不備禮。』是工之長者以賤，故祇受爵拜，卒爵不拜。此衆工更賤，受爵且不拜矣。

①「注」，原脫，今據《儀禮古今文疏義》補。

言「遂卒爵」，無庸更言不拜。《大射儀》亦云：「衆工不拜受爵，坐祭，遂卒爵。」鄭以彼決之，故不從古文。」

右 獻 工

公又舉奠觶，唯公所賜，以旅于西階上，如初。言賜者，君又彌尊，賓長彌卑。【疏】正義

曰：張氏爾岐云：「奠觶，賡爵者莫於薦南之觶也。公舉之，爲大夫旅酬也。如初，如爲賓、爲卿舉旅之節也。」^①方氏苞云：「爲大夫舉旅，不於獻後，而介於獻工、獻笙之間，何也？正禮再獻，再酢，一酬，公與賓尚有間，而獻主無時休息，雖強力者亦倦矣，故別使大夫賡觶以休獻主。自是以後，公爲賓舉旅，而主人獻公卿，公爲公卿舉旅，而主人獻大夫，皆賡觶者與獻主，遞代而即事。獻大夫禮略，獻工尤略，故同時而畢，然後公爲大夫舉旅，而主人獻笙，仍與賡觶者事相間耳。」吳氏廷華云：「此所舉蓋再賡所奠者，經不言大夫。據《燕義》「大夫舉旅行酬，而後獻士」，此在獻士前，故疏以大夫言之。」褚氏寅亮云：「受賜者無論卿、大夫，^②必先以酬賓，乃以次而下。」注云「言賜者，君又彌尊，賓長彌卑」者，對上爲賓舉旅、爲卿舉旅，皆言酬，不

言賜也。敖氏云：「賜與酬其禮同，特經之立文異耳。」方氏云：「上經：公又行一爵，^③唯公所酬。或親卒爵，或徑以授賓若長，不定之爵也。此曰「唯公所賜」，則唯舉奠觶以賜受酬之大夫，而公不自飲之辭也。蓋公既三卒爵矣，即能勝亦不宜多勝，以自檢於威儀。故下經賡象觶，公亦不自卒觶，而以賜大夫。蓋無算爵之始，又不可不自飲以導之，故不得不預爲劑度之耳。」

右公三舉旅以成獻大夫之禮

卒，旅畢也。【疏】正義曰：盛氏世佐云：「言此者，

爲下節也。」笙人，立于縣中，奏《南陔》、《白華》、《華黍》。以笙播此三篇之詩。縣中，縣中央也。《鄉飲酒禮》曰：磬南北面，奏《南陔》、《白華》、《華黍》。皆《小雅》篇也，今亡，其義未聞。昔周之興也，周公制禮作樂，采時世之詩以爲樂歌，所以通情相風切也。其有此篇，

① 「卿」，原作「鄉」，據《續清經解》本改。

② 「受」，原作「言」，今據《儀禮管見》改。

③ 「公」，原作「云」，今據《儀禮析疑》改。

明矣。後世衰微，幽、厲尤甚。禮樂之書，稍稍廢棄。孔子曰：「吾自衛反魯，然後樂正，《雅》、《頌》各得其所。」謂當時在者而復重雜亂者也。惡能存其亡者乎？且正考父校商之名《頌》十二篇於周大師，歸以祀其先王。至孔子二百年之間，五篇而已。此其信也。【疏】正義曰：注「宜正考父」，《校勘記》云：「『宜』，徐、陳、《集釋》、《通解》、《要義》俱作「且」。」云「縣中，縣中央也」者，賈疏云：「諸侯軒縣，闕南面而已，故得言縣中。鄉飲酒唯有一磬，縣不得言『縣中』而云『磬南』。注引《鄉飲酒》者，欲見此雖軒縣，近北面縣之南也。」敖氏云：「此云『縣中』，蓋與《鄉飲酒》『磬南』之文互見也。磬南而云『縣中』者，縣主於磬也。」餘詳《鄉飲酒禮》。

右 奏 笙

主人洗，升，獻笙于西階上。一人拜，盡階，不升堂，受爵，降。主人拜送爵。階前坐祭，立卒爵，不拜既爵，升授主人。一人，笙之長者也。《鄉射禮》曰：「笙一人拜于下。」【疏】正義曰：韋氏協夢云：「獻笙之爵，即獻工之爵也。獻笙爲之

洗，亦以其有事於公，敬之也。」注引《鄉射禮》者，證一人拜，亦拜於下也。《鄉飲酒》注同。衆笙不拜，受爵，降，坐祭，立卒爵。辯有脯醢，不祭。

右 獻 笙

乃間歌《魚麗》，笙《由庚》；歌《南有嘉魚》，笙《崇丘》；歌《南山有臺》，笙《由儀》。間，代也。謂一歌則一吹也。六者，皆《小雅》篇也。《魚麗》，言太平年豐物多也。此采其物多酒旨，所以優賓也。《南有嘉魚》，言大平君子有酒，樂與賢者共之也。此采其能以禮下賢者，賢者纍蔓而歸之，與之宴樂也。《南山有臺》，言大平之治以賢者爲本也。此采其愛友賢者爲邦家之基，民之父母，既欲其身之壽考，又欲其名德之長也。《由庚》、《崇丘》、《由儀》，今亡，其義未聞。【疏】正義曰：詳見《鄉飲酒義》。遂歌鄉樂，《周南·關雎》、《葛覃》、《卷耳》、《召南·鵲巢》、《采芣》、《采蘋》。《周南》、《召南》、《國風》篇也，王后、國君夫人房中之樂歌也。《關雎》言后妃之德，《葛覃》言后妃之職，

《卷耳》言后妃之志，《鵲巢》言國君夫人之德，《采芣》言國君夫人不失職也，《采蘋》言卿、大夫之妻能脩其法度也。昔大王、王季居於岐山之陽，躬行《召南》之教以興王業。及文王而行《周南》之教以受命。《大雅》云：「刑于寡妻，至于兄弟，以御于家邦。」謂此也。其始一國爾。文王作邑於豐，以故地爲卿士之采地，乃分爲二國：周，周公所食也；召，召公所食也。於是文王三分天下有其二，德化被於南土，是以其詩有仁賢之風者，屬之《召南》焉；有聖人之風者，屬之《周南》焉。夫婦之道者，生民之本，王政之端。此六篇者，其教之原也。故國君與其臣下，及四方之賓燕，用之合樂也。鄉樂者，《風》也。《小雅》爲諸侯之樂，《大雅》、《頌》爲天子之樂。鄉飲酒升歌《小雅》，禮盛者可以進取；燕合鄉樂者，禮輕者可以逮下也。《春秋傳》曰：《肆夏》、《繁遏》、《渠》，天子所以享元侯也；《文王》、《大明》、《緜》，兩君相見之樂也。然則諸侯之相與燕，升歌《大雅》，合《小雅》也。天子與次國、小國之君燕，亦如之。與大國之君燕，升歌《頌》，合《大雅》。其笙、間之篇未聞。【疏】正義曰：《校勘記》云：「《葛覃》『覃』，宋本《釋文》作『覃』。《采芣》『芣』，陳、閩、監本俱作『繁』。注『能脩其法度也』，盧氏文弼改『脩』爲『循』。金曰追云：『脩，《鄉飲》

作循，《詩序》亦作循。」案：《鄉飲》注之「循」，徐本作「脩」；此注之「脩」，諸本無作「循」者。「於時文王」「時誤作「是」。『德化被於西土』『西』，徐、陳、《集釋》、《通解》、《要義》俱作「南」，鍾本「西土」作「南山」。『夫婦之道者』，《集釋》無「者」字。「然則諸侯之相與燕」，徐本、《集釋》、《要義》俱無「之」字，《通解》有。○李氏如圭云：「歌者，亦與衆聲俱作而歌之。《鄉飲酒》自歌其樂，故不言鄉樂也。」蔡氏德晉云：「謂之鄉樂者，《關雎》、《葛覃》諸篇所言皆修身齊家之事。自天子至於庶人無異道，故鄉飲酒、鄉射士、大夫家皆得用之，而遂以爲鄉樂也。」餘詳《鄉飲酒·記》。大師告于樂正曰：「正歌備。」大師，上工也，掌合陰陽之聲，教六詩，以六律爲之音者也。子貢問師乙曰：「吾聞聲歌各有宜也，如賜者宜何歌也？」是明其掌而知之也。正歌者，升歌及笙各三終，間歌三終，合樂三終，爲一備。備，亦成也。【疏】正義曰：《校勘記》云：「『大師告樂正』『告』下，唐石經、徐本、《集釋》、《要義》、楊氏、敖氏俱有「于」字，《通解》無。注『大師以六律』『大師』，徐本、《集釋》、《通解》、楊氏俱作「六詩」，是也，與單疏述注合。陳、葛俱誤作「六師」，疏同。○楊氏云：「燕禮歌、笙、間、合四節，與鄉飲酒禮同。鄉飲酒禮則四節相繼而作，燕禮於工

歌三終之後，公爲大夫舉旅。既舉旅之後，乃笙入三終，間歌三終，合樂三終，而後樂備。蓋燕尚飲酒，故於工歌之後，笙入之前有旅酬之禮。」注云「大師，上工也」者，《釋官》曰：「《大射》有大師，又有上工。此注云『大師，上工』者，散文大師既通稱工，大師爲樂工之長，則亦稱上工也。」云「掌合陰陽之聲，教六詩，以六律爲之音者也」者，此約《周禮·大師職》文。六詩，謂風、賦、比、興、雅、頌也。刊本注「六詩」，或誤作「六師」。張氏爾岐據誤本以爲之說云：「六師，《周禮》磬、鍾、笙、鐃、簫等六師也。」謬矣。「子貢問師乙」云云，見《禮記·樂記》，鄭引以爲證也。云「正歌者，升歌及笙各三終，間歌三終，合樂三終，爲一備。亦成也」者，樂必合此四節爲一備。《周禮·樂師職》云：「凡樂成則告備。」是備亦成也。樂正由楹內，東楹之東告于公，乃降復位。言由楹內者，以其立於堂廉也。復位，位在東縣之北。【疏】正義曰：注云「言由楹內者，以其立於堂廉也」者，李氏如圭云：「工席在樂正東，故樂正由楹內以適東楹之東也。」敖氏云：「由楹內，堂上東行者之節也。必著之者，以其立於堂廉，嫌或由便而自楹外過也。」蔡氏德晉云：「由楹內者，①樂正立工西，工坐階際，故由楹內而往堂東也。東楹之東，往君阼階上

西面之位也。」②云「復位，位在東縣之北」者，張氏爾岐云：「初樂正與工俱在堂廉，今告樂備，復降在東縣北，北面也。」敖氏云：「云『復位』，③則是反其初位矣。初位，未詳其處。《鄉飲酒》注云：樂正降立西階東，北面。」盛氏云：「上經不見樂正所立處，而此云『復位』，則亦在西方東面北上之位矣。蓋樂正於天子爲樂師。樂師，下大夫，則樂正，士也。士之位已見上，故於此言『復』。注蓋出於臆說，故亦未確。」《釋官》曰：「此注殊可疑。樂正之位總與工相近。《鄉飲酒禮》云：設工席于堂廉，東上；樂正先升，立于西階東。《鄉射禮》及此篇云：『席工于西階上，少東，樂正先升，北面立于其西。』是樂正在堂上，則位在工西，而立於西階東。其降也，亦立於西階東，北面，以其工猶在堂上西階東，則仍與工相近。故《鄉飲》、《鄉射》、《樂正告于賓，乃降」注皆云：「降立西階東，北面。」是也。此經云「復位」者，即西階東北面之位。樂正與工升降俱自西階，其入而未升也，當先位於此，故降云「復位」。《鄉飲》、

①「者」，原脫，今據《禮經本義》補。

②「位」，原作「面」，今據《禮經本義》改。

③「云」，原作「降」，今據《儀禮集說》改。

《鄉射》二篇不言者，文有詳略耳，其實亦與此同。《燕禮》告于公，公在阼階上，故由楹內轉而之東。其降也，仍自西階，無緣位在東縣之北。《鄉射》：將射，工遷于下，降自西階，阼階下之東南，堂前三筭，西面北上坐，樂正北面立于其南。射畢，工升自西階，樂正反自西階東，北面。然則樂正之位總與工近明矣。所以必與工近者，以凡樂事皆樂正主其令故也。此時工在堂上，樂正安得離而位於東？賈疏引《大射》況之，不知燕時之射亦與大射異。且燕禮止有小樂正，無大樂正，皆緣下「左右正」注而誤。《義疏》云：「由楹內而東，其節應爾。楹南儘寬，非以其窄而無過處也。樂正之位不離乎工，在堂則北面於工之西；樂備而工猶未降，則西階東北面乃近之。蓋工初入而將升時，樂正即位乎此，故云「復」也。注良由以樂正爲有二人故致誤，不知大射儀亦無兩樂正也。」

右歌笙間作遂合鄉樂而告樂備

射人自阼階下請立司正，公許。射人

遂爲司正。君許其請，因命用爲司正。君三舉爵，樂備作矣，將留賓飲酒，更立司正以監之，察儀法也。射人俱相

禮，其事同。【疏】正義曰：張氏爾岐云：「自此至無算樂，①皆坐燕盡歡之事。既立司正安賓，次主人獻士及旅食，次或射以樂賓，次賓媵觶于公，爲士舉旅酬，次主人獻庶子以下諸臣，乃行無算爵、無算樂，凡六節，而燕禮備。」

注云「君許其請，因命用爲司正」者，以射人請立司正，而公即命用射人爲司正也。蔡氏謂射人即自爲司正，不待君命者，以有常職故。不知射人無不待君命自爲司正之理，蓋經文「公許」之中即兼用爲司正之意，經未明言，故注明之也。云「君三舉爵，樂備作矣，將留賓飲酒，更立司正以監之，察儀法也」者，李氏如圭云：「三舉爵者，爲賓、爲卿、爲大夫舉旅也。《晉語》云：『獻公飲大夫酒，令司正實爵與史蘇，曰：飲而無肴。』」郝氏云：「初燕禮嚴終則易懈，②初酬賓、卿、大夫，人少，終酬士，人衆，故正之以司正也。」司正洗角觶，南面坐奠于中庭，升，東楹之東受命，西階上北面命卿、大夫。君曰：「以我安。」卿、大夫皆對曰：「諾！敢

①「樂」，原作「爵」，今據《儀禮鄭注句讀》改。
②「嚴」，原作「廢」，今據《儀禮節解》改。

不安？」洗，奠角觶於中庭，明其事以自表，威儀多也。

君意殷勤，欲留賓飲酒，命卿、大夫以我故安。或亦其實不主意於賓也。【疏】正義曰：敖氏云：「中庭，亦南北之中，蓋阼階前也。司正不位於階間者，以燕亦有時而射，宜辟之也。」盛氏曰：「司正奠觶之處與鄉飲酒、鄉射禮同，皆在兩階之間、庭之中也。《鄉射禮》云：『設楅于中庭，南當洗。』當洗既為南北之節，則中庭為東西節明矣。此惟言『中庭』，則南北之中亦因以可見。敖云『阼階前』，非。階前為堂塗，何云『中庭』也？若射，則司正為司馬，遷位於司射之南，說見《鄉射》、《鄉飲》。鄉射，司正奠觶皆北面。此獨南面者，立司正所以監衆，君在堂，北面嫌於監至尊，故南面以示監堂下諸臣也。」焦氏以恕云：「《鄉飲酒》立司正。經文云：『階間北面坐奠觶。』《鄉射禮》此條無注，亦主階間為東西之節，與《鄉飲》正同。《燕禮》、《大射》云：『南面坐奠于中庭。』不別著階間者，已見《鄉飲》故也。敖氏阼階前之說，鑿空言之，不特與鄭異，并與經文違背，斷不可從。」○注「不主意於賓也」，《校勘記》云：「徐本、《集釋》、楊氏俱無『也』字，與單疏標目合；《通解》有。」云「洗，奠角觶於中庭，明其事以自表，威儀多也」者。敖氏云：「洗角觶，為將酌也。奠之，乃升受命者，君命尊，不

敢執觶由便以受之也。」云「君意殷勤，欲留賓飲酒，命卿、大夫以我故安」者，張氏爾岐云：「司正述君之言以命卿、大夫。我者，君自我也。言我欲留賓，當為我安坐以留之也。」吳氏廷華云：「鄉飲司正執觶升堂，蓋以示愆儀有罰之義，如屠蒯揚觶是也。受命於君，不敢以罰爵向君，故奠之。君曰者，舉君命命之也。以我安卿、大夫者，以我命安之也。不言賓，賓亦大夫也。」埤案：經言安公、卿、大夫而不言賓，諸亦言公、卿、大夫而不言賓。要之，賓重於卿、大夫，舉輕則重者可知。敖氏云：「以我安」云者，若曰：以我為司正，所以安汝也。蓋達君之意，而自為之辭。《大射儀》曰：「命賓、諸公、卿、大夫。」此不言賓、諸公者，文省耳。」方氏苞云：「立司正，恐既醉而號呶，俾謹其禮法也，而不可以為禮辭，故曰：君命我為司正，乃所以安卿、大夫，使坐而行酒耳。言卿、大夫，則賓可知矣。不及諸公，燕禮輕，非大射擇士以祭之比，或不以煩諸公也。」胡氏肇昕云：「敖氏以我為司正，自我與注說異，而方氏從之，其說非也。經文『君曰以我安』，明司正述君之命，我，為君自我也。下文『卿、大夫皆對曰：諾，敢不安』，因聞君命，故

①「並」，原脫，今據《儀禮彙說》補。

對之敬謹如此。司正不尊於卿、大夫，且在君之前，而侈然自稱曰：「以我爲司正，所以安汝。有是理乎？」考《詩·南有嘉魚》序云：「樂與賢也。」其詩云：「嘉賓式燕綏之。」箋云：「綏，安也。」引《燕禮》曰：「以我安。」又《湛露》序云：「天子燕諸侯也。」其詩云：「厭厭夜飲。」傳云：「厭厭，安也。」皆此經「以我安」之意也。」郝氏云：「以我安，即命辭以，猶與也。我，君自謂也。賓安則我安，望諸臣共留，安賓因以安君，殷勤誠切之至也。」盛氏云：「一獻之禮，賓主百拜」，非強有力者弗能勝，故於禮成樂備之後，設有請安一節。君尊，唯恐其臣或以己故而不敢久留也，故命司正告之曰：「子大夫，其與我而俱安乎？」蓋示以留之之意也。於是賓、卿、大夫不復辭，而直應之曰「諾」。敢，不敢也。敢不安者，言君安孰敢不安也。詩人之愛其君也，曰：「大夫夙退，無使君勞。」君之禮其臣也，曰：「以我安。」古之君臣藹然，家人父子之情，一體相關之誼，於斯可觀矣。」①云「或亦其實不主意於賓也」者，此以「以我安」兼有二意。上言欲留賓飲酒，故命卿、大夫，是意主於賓；此言其意亦欲卿、大夫共安，意不專主於賓，故推言之也。

司正降自西階，南面坐取觶，升酌散，降，南面坐奠觶，右還，北面少立。坐取觶，興，坐

不祭，卒觶，奠之，興，再拜稽首。右還，將適觶南，先西面也。必從觶西，爲君之在東也。少立者，自嚴正，慎其位也。【疏】正義曰：注「自嚴正，慎其位也」，《校勘記》云：「徐本、《集釋》、楊氏俱無「也」字。嚴、鍾併無「慎」字。《通解》有。案：無「也」字，與單疏標目合。」○方氏苞云：「鄉飲，鄉射主人作司正，故許諾，而主人拜焉，司正荅焉。燕與大射則官事有常，故司正自請而不拜也。惟卒觶之拜，則皆無荅而其義各別。飲、射之觶，將糾旅酬者之儀法，而先自飲以爲式。若主人與賓荅拜，則似與司正共監衆賓，故不敢荅，示己亦在所糾之列也。燕與大射則有司共其常職，君無庸荅拜，而主人亦不敢荅，示共稟於君命，與衆賓同也。」褚氏寅亮云：「注疏從觶西往來之說確不可易。敖氏謂由觶東，則與經文左右適相反矣。日月五星右還，亦自北向西，自西向南也。天左還，亦自南向西，自西向北也。如何以右還爲自北向東，②左還爲自南向東邪？其以中庭位爲阼階前南北之中，而非階間南北之中，誤與鄉飲同。阼階前之中庭，公立處也，臣可立乎？」吳氏

①「觀」，原作「見」，今據《儀禮集編》改。

②「向」，原作「而」，今據《儀禮管見》改。

廷華云：「南面奠觶，則在觶北，從觶西右還，至觶南則又北面，卒奠之。」又從觶西還於觶北，故又南面。蓋南面者以西爲右，故曰右還；北面者以西爲左，故曰左還。洗者，洗於阼東南。反者，反於中庭，其所亦中庭也。奠觶本在中庭，故曰其所。右還則右手向外。其說是也。必從西行者，東爲主位，當避之，故升降皆由西也。」注云「右還，將適觶南，先西面也。必從觶西，爲君之在東也」者，賈疏

云：「右還，謂奠時南面，乃以右手向外而西面，乃從觶西南行而右還北面。若從觶東而左還，北面則背君，以其君在阼故也。」敖氏云：「將於觶南北面則右還，於觶北南面則左還。」皆欲從觶東往來也。必從觶東者，變於在堂者升席降席之儀，而由上也。司正之位，東上，少立者，定其位也。」案：敖說故與注異。焦氏以恕謂：「辟君當從觶西，古注本無漏義，而敖氏不遵用，謂變於堂上。凡敖氏往往言某禮變於某禮，愚謂禮惟其宜，實不須屑屑示變，以著其新異。敖氏憑臆逞私，幾欲自爲一經，謂宜分別觀之焉。」①盛氏世佐亦謂敖云「從觶東」非，而謂注爲君在東之說亦未然，云「於觶南乃北面者，爲當取觶而飲，鄉堂而拜，以示受命於君之意也。」左還，南面坐取觶，洗，南面反奠于其所。反奠虛觶，不空位也。【疏】正義

曰：張氏爾岐云：「司正奠觶，取觶皆南面，明將監堂下酒儀也。北面拜者，明監酒出君命也。」吳氏廷華云：「虛觶必洗而奠之者，蓋以待愆儀之罰也。」升自西階，東楹之東請徹俎，降，公許，告于賓。賓北面取俎以出。膳宰徹公俎，降自阼階，以東。膳宰降自阼階，以賓親徹，若君親徹然。【疏】正義曰：敖氏云：「臯者司正受命安賓，諸公、卿、大夫、賓奉命，而不敢辭以俎。今司正請徹之，所以達其意。告於賓，亦西階上北面告之，既則降。燕，賓乃執俎而出者，臣也，出授從者。」方氏苞云：「鄉飲酒，鄉射，賓請而後主人命徹，尊賓也。君臣之禮，則有司要其節而請於君宜也。」盛氏云：「司正於此不請坐於賓，而遽請徹俎於公，亦君禮之異者也。」注云「膳宰降自阼階，以賓親徹，若君親徹然」者，李氏如圭云：「《鄉飲酒》：『主人取俎，還授弟子。弟子以降自西階，主人降自阼階。』《燕禮》公不降，故膳宰降自阼階也。」郝氏云：「人臣升降由西階，膳宰徹君俎，降由阼階，重君物，別於諸臣也。以東，歸東壁也。」盛氏云：「鄉

①「謂」，原脫，今據《儀禮彙說》補。

飲、鄉射，主人之俎亦降自西階，從賓也。燕，公俎降自阼階，君尊，得自由其階也。《釋官》曰：「《周禮·膳夫職》曰：『凡王祭祀賓客食，則徹王之胾俎。』」褚氏寅亮云：「『降』字似宜在『告于賓』下，非衍也。」《義疏》云：此說是也。《大射》云：司馬正升自西階，東楹之東，北面告于公，請徹俎，公許。遂適西階上，北面告于賓，不降。案：司正告公，告賓前後皆在階上，不應於徹俎獨降也。卿、大夫皆降，東面北上。以將坐，降待賓反也。【疏】正義曰：李氏如圭云：「降立西階下。」賓反入，及卿、大夫皆說屨，升就席。公以賓及卿、大夫皆坐，乃安。凡燕坐必說屨，屨賤，不在堂也。禮者尚敬，敬多則不親。燕安坐，相親之心也。【疏】正義曰：《校勘記》云：「『凡燕坐』，陳本、《通解》俱作『座』，非也。『相親之心也』，徐本、《集釋》、楊氏俱無『也』字，與單疏標目合；《通解》有。」注云「凡燕坐必說屨，屨賤，不在堂也」者，李氏如圭云：「不言公降說屨於堂上席側也。」①凡坐於堂者說屨於堂下，於室者說屨於戶外。《少儀》曰：「說屨於戶內者，一人而已矣。」謂尊者也。此君尊，在堂上說屨於席側可知。《春秋傳》：衛侯與諸大夫飲酒，褚師聲子職而

登席，公怒。蓋古者見君以解鞵為敬也。敖氏云：「賓入，少立於卿之北，司正升賓，賓乃及卿、大夫說屨而升也。」盛氏云：「《大射儀》云：司正升賓，賓、諸公、卿、大夫皆說屨，升，就席。此不言司正升賓者，文略也。」云「禮者尚敬，敬多則不親。燕安坐，相親之心也」者，此釋經燕安坐之義。案：《爾雅》：「安，止也。」又云：「安，定也。」又：「妥，安坐也。」《詩》：「嘉賓式燕綏之。」妥與綏古相通。是安之義謂止而坐之也。今人猶謂設席燕賓，請賓入席曰安坐，即是此意。響主於敬，燕主於樂，樂則相親。鄭云：「燕安坐，相親之心也。」敖氏謂：「乃安，謂賓及卿、大夫之心至是乃安也。」失其義矣。敖氏又云：「自此以後，有升降而行禮者皆跣也，至醉而退乃屨。」褚氏寅亮云：「《少儀》曰：『凡祭於室中堂上無跣，燕則有之。』」此禮說屨即跣矣，然亦未嘗見膚也。深衣，連衣裳為之，而曰「短無見膚」，則殊衣裳者制亦可知。吳氏廷華云：「公以皆坐，則就席時未坐也。」羞庶羞。謂腍肝、狗臠也。骨體，所以致敬也。庶羞，所以盡愛也。敬之愛之，厚賢之道。【疏】正義曰：注云「腍肝、狗臠也」者，李氏如圭云：「案：《內

①「於」上，《儀禮集釋》有「則公降說屨」五字。

則：「肝膋，取狗肝一，蒙之以其膋。」《燕禮》：「牲用狗。」知有肝膋、狗載醢也。以經云「庶羞」，知不但載醢而已。」方氏苞云：「牲以狗而羞則庶。觀《六月》、《韓奕》二詩所陳品味，惟嘉惟偕，可羞無不薦也。此西周之詩，可以證周公之典禮。」敖氏云：「亦先賓乃及公，而後及其餘，未獻士而羞，此則是不及於在下者矣。」《義疏》云：「肝膋非速致之具，此未必有。吳氏廷華云：『《周禮·膳夫》羞與珍並言，肝膋爲八珍之一，不得雜入庶羞。』盧氏文弨云：『庶羞，衆羞也。必不止於狗載醢。記所云「庶羞不踰牲」者，謂用豕，則不必以羊爲庶羞。』若魚鼈之類，非所得踰者也。」大夫祭薦。燕乃祭薦，不敢於盛成禮也。【疏】正義曰：李氏如圭云：「受獻禮成於祭薦，五行禮爲盛。」敖氏云：「獻時不得祭薦，至是乃爲之。必祭之者，宜終此禮，然後可以食庶羞也。」郝氏云：「初獻大夫於西階上，未升席，故未祭，至是升席乃祭也。」司正升受命，皆命。君曰：「無不醉！」賓及卿、大夫皆興對曰：「諾！敢不醉？」皆反坐。皆命者，命賓、命卿大夫也。起對必降席，司正退立西序端。【疏】正義曰：注云

興「知之也。案：《南有嘉魚》末章云：「君子有酒，嘉賓式燕又思。」箋云：「又，復也。」以其壹意，欲復與加厚之。據上云「嘉賓式燕綏之」，「綏」爲安，即此經之「無不安」。下云「又」之「又」，即此經之「無不醉」也。又與侑古音相近通用，言其舉酒以相勸侑也。又《湛露》云「不醉無歸」，亦即此經之「無不醉」也。云「司正退，立西序端」者，盛氏云：「注蓋約《鄉飲酒禮》言之，然非也。西序端者，相旅之位。此下方獻士，未須相況。獻士之時，司正亦將與焉，則其降復解南之位以俟可知也。」敖氏云：「惟云「受命，皆命」，又不著其所，如上文可知。既對，則司正降而復位。」當以此說爲正。褚氏寅亮云：「究以注「退立西序端」之說爲正。蓋既爲司正，則獻酬時俱當立堂上以察儀。迨其受獻，乃降復解南位。獻訖，仍升立序端也。」

右立司正命安賓

主人洗，升，獻士于西階上。士長升，拜受觶，主人拜送觶。獻士用觶，士賤也。今文

① 「則」，原脫，今據《儀禮注疏詳校》補。

「觶」爲「觚」。【疏】正義曰：「主人拜受觶」，《校勘記》云：「受」，唐石經、徐本、《集釋》、《通解》、《要義》、楊氏、敖氏俱作「送」。○李氏如圭云：「士堂上無位，故燕坐乃獻之。」郝氏云：「樂終而後獻士，士卑也。士長，士之尊者，如司正、司士等是也。」注云「獻士用觶，士賤也。今文「觶」作「觚」者，敖氏云：凡獻無用觶者，當從今文。盛氏云：「觴以小爲貴，故獻用爵，其他用觶，鄉飲酒之禮是也。燕禮輕，故獻用觶，觶大於爵也。大夫以上既用觶，則獻士用觶，禮亦宜之。今文作「觶」者，以「觶」字角旁著氏，與「觚」相涉致誤也。敖氏定從今文，非。《禮器》云：「貴者獻以爵，賤者獻以散。」夫宗廟之祭獻以散者，有之矣。燕禮以觶獻士，何以決其必無哉？」胡氏承珙云：「鄭注《特牲饋食·記》引舊說云：『爵一升，觶二升，觶三升，角四升，散五升。』此鄭以前儒家治《禮經》者相承之師說也。《禮器》正義及《梓人》疏引許氏《五經異義》云：『今《韓詩》說：一升曰爵，二升曰觶，三升曰觶，四升曰角，五升曰散。古《周禮》說亦與之同。許君謹案：《周禮》：一獻三酬當一豆。即觶二升，不滿豆矣。』鄭駁之云：『觶字角旁著氏，汝、穎之間師讀所作。今禮角旁單，古書或作角旁氏，角旁氏則與觶字相近。學者多聞觶，寡聞觶，寫此書亂之而作

觶耳。」又南郡太守馬季長說：「一獻而三酬則一豆，豆當爲斗，與一爵三觶相應。《禮器制度》云：觶大二升，觶大三升。是故鄭從二升觶，三升觶也。」據此，知鄭君所引《儀禮》舊說與《韓詩》說、古《周禮》說、叔孫通《禮器制度》、馬季長說皆同。惟許叔重獨自爲說。《說文》云：「觶受四升。」又云：「觴三升者謂之觶。此蓋師承之異，鄭以與經不相應，故爲此駁。至「觶」、「觚」二字之誤，則由「觶」、「觚」形近易譌言之，尤爲明晰。《儀禮》古文多作「觶」，故雖「觶」字亦爲「觶」，今文多作「觶」，故雖「觶」字亦爲「觶」。鄭參校古今文，以義定之。上文獻辟正主，不用爵而用觶，古文作「觶」，此古文之誤也。此獻士用觶者，士賤也。賈疏云：「對大夫已上獻用觶，旅酬乃用觶。此獻士即用觶，故云「士賤」也。今文作「觶」，此今文之誤也。其他今文多誤「觶」爲「觚」，又有古今文皆誤者，如《燕禮》：「賓降洗，升腍觶于公。」注云：「此當言腍觶，酬之禮皆用觶。言觶者，字之誤也。古者觶字或作角旁氏，由此誤爾。《大射儀》：「賓降，洗象觶。」注云：「此觶當爲觶。」此則「觶」本作「觶」，字形近「觶」，古今文皆因之而誤者也。鄭於注一一是正，可謂精審之至矣。」士坐祭，立飲，不拜既爵。其他不拜，坐祭，立飲。他，謂衆士也，亦升

受爵，不拜。【疏】正義曰：注云「他，謂衆士也」者，郝氏云：「謂長以下，即祝、史、小臣等。」云「亦升受爵，不拜」者，李氏如圭云：「笙長受爵於階上，知士亦升受爵。」吳氏廷華云：「《周官》：『笙師，中士二人，下士四人。』此注「衆士」大約與笙師等。上文：『獻笙于西階上。』一人拜，盡階，不升堂，受爵，降。」彼何嘗升堂邪？乃薦司正，與射人一人，司士一人，執冪二人，立于顰南，東上。天子射人，司士，皆下大夫二人。諸侯則上士，其人數亦如之。司正爲上。【疏】正義曰：李氏如圭云：「司正在上，庭長也。此皆有事者，故別在顰南，北面而先薦。司士，士中之尊者。」敖氏云：「此皆士也。獻與士序，每獻則薦之。薦不與士序者，亦異之也。司士之位正當顰南，射人而下以次而西。執冪者既薦，則復立於尊南。」郝氏云：「乃薦，謂既獻於西階上，乃以脯醢各薦於其位，先薦司正等四人，先長也。司正即射人爲之，故曰一人。」盛氏云：「此五人者，皆士長也。得獻在先，故因獻而薦之。射人，大射正也。司士二人，此在顰南者，又其長也。觀司士之先得薦，可見士受獻亦以尊卑爲序，不以齒矣。賈疏云：「此經三者當官雖多，皆取長先薦，其餘在於衆位，依

齒也。」非。」褚氏寅亮云：「司正庭長於獻士時而先薦之，益可明薦主人於獻大夫時者，亦以爵同也。獻司正等仍與士序，獻訖即薦，不待辯獻乃薦，所以殊之於羣士中，其位則司正正當顰南。射人而下以次而西，俱北面。」吳氏廷華云：「司士本不言位，而亦薦於此者，據《周禮》『司士掌朝儀之位，爲之擯』，據《聘禮》『擯相幣在中庭』，則司士固有在庭之位，經文不具耳。則其與司正並薦，宜也。執冪固是士，位在尊南，亦薦於此者，或以分卑而近公，不敢薦於其位，故就堂下近其位之地，與司正並薦之耳。」方氏苞云：「司正，射人也，而稱司正，以特薦宜首庭長也。鄉射之司正，司射，司馬，皆以州之屬士攝事，而假以是稱。燕則皆以大射正爲之，故下經特標『若射，則大射正爲司射』，以明篇首之射人。此特薦之司正，皆大射正，而同薦之射人，則小射正也。司射反爲司正，不見於經，何也？以鄉射作相爲司正，司正爲司馬，司馬反爲司正，義可互見也。大射正爲司正，又爲司射，則射畢之後反爲司正者，非大射正而誰哉？燕而射，則不立司馬。而凡禮事皆射人主之，何也？《周官》：『射人掌公、卿、大夫、士之朝位，詔相其儀法。君行必從，則燕、射之禮事，惟射人掌之爲宜。』注云「天子射人，司士皆下大夫二人，諸侯則上士，其人數亦

如之者，《釋官》曰：「注引天子射人者，謂天子射人下大夫二人，諸侯以上士爲之長，亦有二人，一爲司正，一仍供射人之職。故經云：『乃薦司正，與射人一人。』」又云：「《周禮》：『司士，下大夫二人，中士六人，下士十有二人。』諸侯司士，上士爲之。《文王世子》云：『其在外朝，^①則以官司士爲之。』」注：「司士，亦司馬之屬，掌羣臣之版，正朝儀之位。」是諸侯司士所掌與天子司士同。《左傳》成十八年：「荀賓爲右，司士屬焉。」服注：「司士，主右之官。」孔疏以爲即《周禮》司右，與此司士別。《左傳》官名多出於東遷後所增改，此亦一證也。」辯獻士，士既獻者，立于東方，西面北上，乃薦士。每已獻而即位於東方，蓋尊之。畢獻，薦於其位。【疏】正義曰：方氏苞云：「其文正與『辯獻大夫，遂薦之』相對，^②明大夫於獻之時遂薦；士則辯獻畢立於西方，而後同時齊薦也。」注云「每已獻而即位於東方，蓋尊之」者，賈疏云：「庭中之位卿東方西面，大夫北面，士西方東面，是東方尊。今卿、大夫得獻升堂，位空，士得獻，即東方卿位，是尊之也。」祝史小臣師亦就其位而薦之。次士獻之，已，不變位，位自在東方。【疏】正義曰：注云「位自在東方」者，賈疏云：

「上設位之時，祝史在門東，小臣在東堂下，是先在東方也。」^③主人就旅食之尊而獻之，旅食不拜受爵，坐祭立飲。北面酌，南鄉獻之於尊南。不洗者，以其賤，略之也。亦畢獻乃薦之。主人執虛爵，奠於篚，復位。【疏】正義曰：敖氏云：「不洗者，因獻士之爵而遂用之，不復別取於篚也。凡取爵於下篚，雖所爲酌者賤，亦必爲之洗，旅食者與士異尊矣，乃繼士獻之，而遂因士爵，且不殊其長，皆略賤也。」方氏苞云：「就其尊而獻者，在禮，侍飲於長者，拜受於尊所。士旅食者，位卑人衆，而禮不可廢，故體主人之勤而簡其節也。」褚氏寅亮云：「當依注尊後北面酌向君之義爲長。獻之，或西南面，敖說可從。」義疏云：「惟君面尊，酌者於尊背酌之。若非君尊，則酌者鄉尊面酌之。」^④如尊于房戶之間者，尊南面，酌者則北面也。此門西之尊北面，則酌者南面可知。【義疏】云：^⑤

- ① 「外」，原脫，今據《儀禮釋官》改。
- ② 「對」，原脫，今據《儀禮析疑》補。
- ③ 「先」，原脫，今據《儀禮注疏》補。
- ④ 「面」，原作「而」，今據《儀禮義疏》改。
- ⑤ 此引文當出自張惠言《讀儀禮記》。

「《大射》注則云：『主人既酌，西面。士旅食，^①北面受之。』不同。案：燕旅食，尊在門西，旅食立于其南，主人獻之于尊南。有尊在北，不嫌背君，故得南面。《大射》注云：凡授爵向所受者，是其正也。大射避射位，旅食尊設於樂縣之南。旅食者位在士南。是不當尊南，若南面獻，則是背君。故西面獻而北面受也。」

右主人辨獻士及旅食

若射，則大射正爲司射，如鄉射之禮。

大射正，射人之長者也。如鄉射之禮者，燕爲樂卿、大夫，宜從其禮也。如者，如其「告弓矢既具」至「退中與算」也。納射器而張侯，其告請先於君，乃以命賓及卿、大夫，其爲司正者亦爲司馬，君與賓爲耦。《鄉射·記》曰：「自『君射』至『龍旌』，亦其異者也。薦旅食乃射者，是燕射主於飲酒。」疏正義曰：注「記曰」，《校勘記》曰：「『曰』，《集釋》作『云』。案：戴氏以『云』爲衍文。」云「大射正，射人之長者也」者，《釋官》曰：「司射之爲大射正，於此經見矣。賈疏以爲大射之時大射正不同爲司射，非也。說詳《大射儀》。」云「如鄉射之禮者，燕爲樂卿、大夫宜從其禮也。如

者，如其告弓矢既具，至退中與算也」者，敖氏曰：「此記及《鄉射·記》言君燕、射之儀，與《大射儀》略同。乃云「如鄉射之禮」者，以其惟一侯，侯道五十弓，而射器皆在堂西也。如是，則自君射之外，^②凡他禮與鄉射大同小異，而於大射則或有不可以相通者，此所以惟蒙鄉射禮也。先徹階間之縣，遷於東方，乃張麋侯，納射器，其再射即用樂行之，亦其異者。」案：鄉射告弓矢既具，是初射時事；退中與算，是三番射訖時事。注舉此者，明經如此自初射至射訖，皆如鄉射之禮也。云「納射器而張侯，其告請先於君，乃以命賓及卿、大夫，其爲司正者亦爲司馬，君與賓爲耦。《鄉射·記》曰：自『君射』至『龍旌』，亦其異者也」者，敖氏曰：「注云『納射器而張侯』，其爲司正者亦爲司馬，君與賓爲耦」，言其與鄉射同者也。云「其告請先於君，乃以命賓及卿、大夫」，言其與鄉射異者也。又云：「《鄉射·記》自君射至龍旌，亦其異者也。」詳其意，蓋謂國中，若郊，若竟，君皆得而燕射，如鄉射之禮，惟旌與中則異於鄉射者也。此意與彼記之注不同，疑此爲得之。但其前以鄉射禮爲據，謂此亦

① 「士」，原脫，今據《讀儀禮記》補。
② 「射」，原脫，今據《儀禮集說》補。

納射器乃張侯，似未爲當。《鄉射》於納射器之後云「命張侯」者，謂繫左下綱耳。非謂始張侯也，恐不必以之爲據。此禮則當先徹階前之縣遷於東方，乃始張麋侯，赤質，并繫左下綱，其侯道亦惟五十弓而已。既張侯，乃納射器，其節蓋與鄉射不得不異。鄭氏於此，蓋偶考之不詳耳。」云「薦旅食乃射者，是燕射主於飲酒」者，李氏如圭曰：「大射主於射，大夫未舉旅則射。《行葦》之詩，王肅以爲燕射於燕旅酬後爲之。《春秋傳》襄公二十九年：晉范獻子來聘，公享之，射者三耦。亦燕射也。」張氏爾岐曰：「若者，不定之辭。或射或否，唯君所命。若不射，則主人獻旅食後，賓即媵觶舉酬。注云「薦旅食乃射，是燕射主於飲酒」者，以大射主於射，①未爲大夫舉旅即射也。」褚氏寅亮曰：「亦大判言之，如鄉射耳。其實異者正多，即注亦略舉其一二端，餘則讀者以意求之可也。」吳氏廷華曰：「大射先行燕禮，此因燕而射，乃不行大射禮，而如鄉射之禮者，蓋大射禮既重且繁，不如鄉射之稍省也。」案：《義疏》曰：「注據『庭中無侯』至『納射器，乃張之』，非如鄉射之繫左下綱也。賈疏以大射納射器無張侯之事，故特言之。非矣。大射始張侯不繫左下綱，則納射器後亦必有張左下綱之事，文不具耳。」②

右因燕而射以樂賓

賓降洗，升媵觚于公，酌散，下拜。公降一等，小臣辭。賓升，再拜稽首。公荅再拜。此當言媵觶，酬之禮皆用觶。言觚者，字之誤也。古者觶字或作角旁氏，由此誤爾。【疏】正義曰：李氏如圭曰：「賓受公賜多矣，禮將終，故媵觶以序厚意。」敖氏曰：「媵觶于公乃下大夫之事，而賓於是時爲之者，不敢以賓自處，恭敬之至也。執觶以下，如下大夫媵觶者之爲，但拜於西階下異耳。公降一等者，重其媵觶之禮也。賓從命，則公升矣。」凌氏《釋例》曰：「前三次舉旅行酬，皆二大夫媵觶。」③此以賓媵觶者，禮以相變爲文也。」吳氏廷華云：「賓主獻酬，不敢亢禮於君也。但公既酬賓，賓亦當酬公，彼此相酬，仍近於亢。故於旅酬之末行之，不言酬而言媵，謙若下大夫之爲，亦不敢亢之意。」案：《義疏》曰：「媵觶於

①「以」，原作「對」，今據《儀禮鄭注句讀》改。

②此引文出自張惠言《讀儀禮記》。

③「觶」，原脫，今據《禮經釋例》補。

無算爵之先，其禮已殺，乃賓必下拜，公且降一等辭者，尊賓。三荅拜俱應降席，而經無文，則禮漸殺可知。據下受公賜者亦就其席坐行之，此其證也。至受者就席，未詳其人，要不外卿及大夫耳。又《鄉飲酒禮》：「受酬者自介右，衆受酬者受自左。」此經士受酬與衆等，則受自左也，故右大夫。執爵者序端，蓋待事處，^①司正其準也。注云：「賡

觚爲賡觶」者，說已見前。賓坐祭，卒爵，再拜稽首。公荅再拜，賓降，洗象觶，升，酌膳，坐，奠于薦南，降拜。小臣辭，賓升，成拜。公荅再拜，賓反位。反位，反席也。今文曰「洗象觚」。

【疏】正義曰：敖氏曰：「賓坐祭，卒爵，再拜稽首。」此拜不下者，拜受，拜既本同一節，不敢再煩君命也。賓降，奠角觶于筐，乃洗象觶。此降拜已再拜稽首，故下云「成拜」。盛氏曰：「此降拜亦未拜也。凡賓下拜之禮，無論已拜未拜，聞君命即升，升又再拜。經於此或言升成拜，或言升，再拜稽首，文互異耳。敖說太泥。賓於下必再拜稽首而後升成拜者，惟初受公酬之時爲然，餘則否。」褚氏寅亮云：「前公酬賓，升成拜，與君行禮之始。此賓賡公而升成拜，與君行禮之終。」公坐，取賓所賡觶，興，唯公

所賜。至此又言興者，明公崇禮不倦也。今文「觶」又爲

「觚」。【疏】正義曰：敖氏曰：「此酬主於士，而所賜則不及之，以其賤而在下也。」郝氏曰：「此君爲士舉旅，而不即賜士，由貴逮賤也。前此君三舉旅，一爲賓，再爲卿，三爲大夫，未及士以下，故因賓賡之爵再舉旅，以終惠也。」方氏苞云：「賓尊獨伸，卿、大夫莫與之並，故旅酬之終，賓賡觶以致敬於君，君即取所賡之觶以賜卿、大夫，使遞酬以及於士，以示君於羣下一視同仁，而賓之敬亦達於上下矣。」

注云「至此又言興者，明公崇禮不倦也」者，李氏如圭曰：「既燕坐而又言興，明不倦矣。」方氏苞曰：「二大夫賡觶之始，君坐取觶，至是復坐取觶，禮以嚴終，說屢升堂，坐而行爵無算，易至怠忽，故君先自力於禮以教之肅也。」受者，如初受酬之禮。【疏】正義曰：敖氏曰：「初受酬者，賓也。」張氏爾岐曰：「如其自「賓降」至「進受虛爵」也。」降，更爵洗，升酌膳，下拜。小臣辭。升，成拜。公荅拜，乃就席坐行之。坐行之，若今坐相勸酒。【疏】正義曰：敖氏曰：「歸者三舉觶，其末

①「處」，原作「者」，今據《儀禮義疏》補。

皆云「如初」，此乃別云「更爵洗」。蓋先時公或命之勿易觶，此則全不命之，亦以禮殺也。」注云「坐行之，若今坐

相勸酒」者，韋氏協夢云：「旅酬禮坐行之者，以是時已燕坐也。燕坐則飲酒不立行禮。」有執爵者，士有盥升主

酌授之者。【疏】正義曰：李氏如圭曰：「前舉旅皆酬者自

酌，至此有士執爵行之。」敖氏曰：「坐而行酒，故須有執爵者代酌授之。」唯受于公者拜。公所賜者也，其餘則

否。【疏】正義曰：郝氏曰：「唯最初一人受公賜爵者拜，

其餘執爵者所送，皆就席坐飲，不拜也。」司正命執爵

者爵辯。卒受者興以酬士。欲令惠均。【疏】正

義曰：敖氏曰：「爵辯，卒受者興以酬士，謂行爵已辯於堂

上，則告大夫卒受者，使之興以酬士，司正以是命執爵者

也。必命執爵者告之者，備有未知者也。是後則司正不

命，而執爵者亦不復告之。」張氏爾岐曰：「前三舉旅皆止

於大夫，今爲士舉旅，故命之。相旅，固司正職也。」執爵

者爵辯，卒受者興以酬士，即其命之之辭。」盛氏世佐曰：

「是時司正蓋升于西階西，北面，命執爵者，命訖，退立序端

以相旅與？」吳氏廷華曰：「執爵者非大夫，卒受者乃大

夫。命，命執爵者轉命大夫也。使卒受者，酬士耳。下節

即所命之實也。」大夫卒受者以爵興，西階上酬

士。士升，大夫奠爵拜，士荅拜。興酬士者，士

立堂下，無坐位。【疏】正義曰：敖氏曰：「於是執爵者降，

以己亦當與旅也。」大夫立卒爵，不拜，實之。士

拜受，大夫拜送。士旅于西階上。辯。祝史、

小臣旅食皆及焉。【疏】正義曰：李氏如圭曰：「庶子以下

未獻，故亦未酬，無算爵乃及之。」敖氏曰：「其旅皆如大夫

酬士之儀，卒受者亦以觶降奠于筐。」焦氏以恕曰：「案：

下章主人獻庶子于阼階上，如獻士之禮。又獻左右正與內

小臣，皆于阼階上，如獻庶子之禮。又鄭氏謂獻正下及內

小臣，則磬人、鍾人、鑄人、鼓人、僕人師、僕人正盡獻可知

也。夫阼階、西階，所以別外內臣也。而均之在堂上則同。

若拘旅食不升獻，亦不升旅之說，則凡爲外內之從官，皆得

升旅於堂上，而獨置旅食者，恐非爲士舉旅之禮意，故鄭說

爲不易矣。」褚氏寅亮曰：「旅食已得獻，則旅酬宜及之，故

注云「皆及焉」。但細玩經文，上云「士旅于西階上，辯」者，

似專指士，故言辯而不言卒；至士旅酌卒，始指旅食言

①「職」，原作「執」，今據《儀禮鄭注句讀》改。

耳。」士旅酌，旅，序也。士以次序自酌相酬，無執爵者。

【疏】正義曰：焦氏以恕云：「有疑此節專指旅食之士而言，謂旅食當在堂下，不與羣士升旅于西階上也。愚案：無算爵云「士旅酌亦如之」，承上酬士于西階上之文。又云「士終旅于上，如初」，解者謂徹幕之時，士蓋先大夫而降，至是升旅于上如初，不異也。必言此者，嫌既降則宜遂旅於下也。觀此，則旅食者之旅酌于西階上益明矣。」卒。

【疏】正義曰：盛氏世佐云：「旅畢，司正降復位。」

右賓媵解於公公爲士舉旅酬

主人洗，升自西階，獻庶子于阼階上，如獻士之禮。辯，降洗，遂獻左右正與內小臣，皆于阼階上，如獻庶子之禮。庶子，掌正六牲之體及舞位，使國子修德學道，世子之官也，而與膳宰、樂正聯事。樂正亦教國子以舞。左右正，謂樂正、僕人正也。小樂正立於西縣之北，僕人正、僕人師、僕人士立於其北，北上。大樂正立於東縣之北。若射，則僕人正、僕人士陪於工後。內小臣、奄人掌君陰事、陰令，后夫人之官也，皆獻於阼階上，別於外內臣也。獻正下及內小臣，則磬人、

鍾人、鐃人、鼓人、僕人之屬盡獻可知也。凡獻皆薦也。

【疏】正義曰：《校勘記》云：「注「立於東縣之北」「立」，誤作「令」。「鐃人」，陸氏曰：「本又作鐃，下同。」案：諸本鐃、鐃雜出，後不悉校。「凡獻皆薦也」「薦」，誤作「爵」。胡氏肇昕云：「亦學國子以舞」「學」，當作「教」，各本作「教」。云「庶子掌正六牲之體及舞位，使國子修德學道，世子之官也」者，此約《周禮·諸子職》之文。云「而與膳宰、樂正聯事。樂正，亦教國子以舞」者，以掌正六牲之體，是與宰聯事，掌舞位，使國子修德學道，是與樂正聯事也。敖氏曰：「庶，猶衆也。庶子，謂卿、大夫、士之子。」

《周官》亦多以庶子繼士而言，正指此者也。①《燕義》以此爲諸子之官，似失之。獻之于阼階上，變於其父所飲之處也。庶子未必皆有爵，乃先左右正獻之者，明不與之序也。盛氏曰：「《周禮·宮伯職》云：『掌王宮之士庶子凡在版者。』《大司馬職》云：『王弔勞，士庶子則相。』又云：『大會同，則帥士庶子而掌其政令。』《司士職》：『周知卿、大夫、士庶子之數。』《酒正職》：『共饗士庶子之酒。』凡此皆以庶子繼士而言，謂卿、大夫、士之支庶也。以其貴遊子

① 「正」，原脫，今據《儀禮集說》改。

弟，且有宿衛之勞，故獻之；以其未有爵命，故得獻在士後；以其爲官衆，故獻于阼階上。若《燕義》所謂庶子官，即《周禮》之諸子也。爲其掌庶子之戒令教治，故以名其官，其職與司士相連。其爵爲下大夫，於諸侯則上士也。其位當在西方東面，亦當在西階上，不於此也。《釋官》曰：「庶子見《禮記·文王世子》及《燕義》，其職與《周禮》：諸子同。《燕義》云：『古者周天子之官有庶子官，職諸侯、卿、大夫、士之庶子之卒，掌其戒令與其教治，別其等，正其位。』鄭注：『庶子，猶諸子也。』《燕禮》有庶子官，是以《義》載此以爲說。今案：《燕義》本釋燕禮之事。《燕禮》有庶子執燭及獻庶子之文，記人欲釋其義，故取天子諸子職解庶子。諸、庶訓皆爲衆。天子之諸子、諸侯之庶子皆掌國子。國子衆多，故云諸，或言庶，諸、庶通名。《燕義》因諸侯言庶子，欲見庶子與諸子一耳。《文王世子》云：「庶子之正於公族者，教之以孝弟、睦友、子愛，明父子之義、長幼之序。」諸侯之庶子兼掌公族子弟及卿、大夫、士之適子。《詩·魏風》有公族之官，即此。以其主正於公族，故又名公族。春秋時，唯晉有此官，而爵爲大夫，不如禮也。經云「如獻士之禮」，則庶子爲士明矣。獻不于西階、于阼階上者，下云「庶子執燭于阼階上」，則其位在此，

以庶子主公族同姓之官，又設折俎與膳宰聯職，故屬主黨也。《經義聞斯錄》曰：「或疑鄭以此經庶子如《周禮》之諸子，故賈疏云：天子謂之諸子，諸侯之庶子也。但考《周禮》：諸子，下大夫二人，掌國子之戒令、教治。職既重而位亦尊矣。且其職云：『大祭祀正六牲之體。』未嘗云王燕則正六牲之體也。使諸侯之官降于天子一等，亦當爲上士。今乃於士旅酌卒始獻之，而云「如其禮」。《大射儀》又云：士旅酌，若命曰復射，則不獻庶子。是其人更輕於士，故與左右正、內小臣相次也。《大射》獻賓獻公，皆宰胥薦脯醢，庶子設折俎。獻服不則宰夫有薦，庶子諸折俎。《燕》與《大射》又皆云：「宵則庶子執燭于阼階上，司宮執燭于西階上，甸人執大燭于庭，閭人執大燭于門外。」夫府史胥徒，庶人在官者，內小臣、閭人，又刑餘之輩耳。柰何天子教國子之大夫在侯國者名同職同，而位顧下儕於庶人在官及刑餘之輩哉？考之《周禮》，宮正、宮伯皆宮中之官。《宮伯職》云：「掌王宮之士庶子。」後鄭云：「王宮之士，謂王宮中諸吏之適子也。庶子，其支庶也。」殆即此經之庶子與？曰：官有長有貳，燕與大射禮大事繁，故在公者長、貳及府史胥徒皆趨事。篇中有長、貳並言者，大射正、小射正、大樂正、小樂正、大史、小史、司馬正、司馬師、

小臣正、小臣師、僕人正、僕人師是也。亦有不並言者。長事多而貳事少，則貳別言之。如《燕禮》「小臣師一人在東堂下」，即知其餘言小臣皆長也。《燕禮·記》云：「羞卿者，小膳宰也。」又云：「凡薦與羞者，小膳宰也。」禮不備者，記補之。貳事多而長事少，則長別言之。如《大射》「庶子正徹公俎」，即知其餘言庶子皆貳也。考天子諸子，下大夫二人，中士四人。諸侯降等，則庶子長當爲上士，貳當爲下士。下士則獻於獻士之後，而與司宮同掌執燭，不亦宜乎？況禮有胥，有宰胥，有宰夫，有司，有小臣師，從者，及工人士、隸、僕人等，皆其官之屬吏，府史胥徒之類，則安知設俎執燭者非庶子之屬吏而文有不備邪？庶子非官，故獻之在士之後，如士禮耳。或疑司宮即《周禮》之《宮正職》云「宮中、廟中則執燭」者。考宮正有上士二人，中士四人，下士八人，府二人，史四人，胥四人，徒四十人。則執燭者或亦其屬爲之，故與庶子聯事也。褚氏寅亮曰：「庶子官，《燕義》有明文，不知後儒何故必不信《禮記》，而以卿、大夫、士之子當之。卿、大夫、士之子苟無其位，必不與燕。既有列於位，獻當從其爵，豈宜在旅食後？注是也。唯注以左右正爲樂正，則未敢深信。蓋獻大、小樂正亦不應在旅食後。竊疑左右正如宮正等官，與內小臣一類，夫人之

官也。庶子爲世子之官，左右正、內小臣爲夫人之官，故不論爵而最在後獻之，且不與旅。」云「左右正，謂樂正、僕人正也。小樂正立於西縣之北，僕人正、僕人師、僕人士立於其北，北上。大樂正立於東縣之北。若射，則僕人正、僕人士陪於工後」者，李氏如圭曰：「云『左右正』，則二樂正分居東西，各監一縣也。僕人亦相工者，工席在西階上，僕人宜近其事，故立於西縣北，北統於堂。案：《鄉射禮》射時遷樂于下，工降阼階下之東南，西面北上坐，樂正北面立于其南。《燕禮》若射，則是時僕人陪于工後，亦在樂正之北也。」張氏爾岐曰：「左右正，據庭中之位而言。大樂正在東縣北，故曰左正；僕人正在西縣北，故曰右正。」《釋官》曰：「此篇以經考之，不見有兩樂正。注誤。賈疏引《大射》、《鄉射》況之，不知燕時或射或否不定，未可據爲左右之名。《鄉飲酒·記》云：「衆賓立者東面北上，樂正與立者皆薦以齒。《鄉射·記》云：「樂正與立者齒。」注：「尊樂正同於賓黨。」然則樂正之位當在西方，不當于阼階上獻之明矣。經獻左右正與內小臣同處，疑左右正即小臣、僕人之官侍從於君，而位在阼階上者，《周禮》有大僕、小臣，皆僕官。諸侯以小臣兼大僕掌正君之服位，在君左右，故謂之左右正。《書·立政》云：「左右攜僕。」是其證也。又

案：上云「祝史、小臣師亦就其位而薦之」，是小臣既受獻矣。此所獻者蓋其正。小臣正相君，出入君之大命，在君左右，故于阼階上獻之。不然，此篇及《大射》俱云獻小臣師，而不及小臣正，何與？以此益見左右正為小臣之屬矣。胡氏肇昕曰：「敖氏、郝氏說皆與注殊。敖氏曰：『左右正未詳其官，然與內小臣同獻，則意其亦為內臣也。』」郝氏曰：「左右，君左右。《詩》曰：『膳夫左右。』正，長也。」盛氏亦曰：「左右者，侍御近習之臣，而正則其長也。左右非一，故不言其官。然以《詩》、《書》考之，《雲漢》以膳夫共稱，《立政》與攜僕並數，則其職掌亦略可見矣。」云「內小臣、奄人掌君陰事、陰令，后夫人之官也」者，《周禮·內小臣職》文。《釋官》曰：「案：《周禮》內小臣與寺人別官，諸侯亦有內小臣，與寺人別。《詩·秦風》云：『寺人之令。』」《毛傳》云：「寺人，內小臣。」非也。內小臣，又謂之巷伯。箋云：「巷伯，內小臣也。奄官，上士四人，掌王后之命，于宮中為近，故謂之巷伯。」是也。《左傳》襄九年：「令司宮巷伯儆宮。」杜注、孔疏解司宮為內小臣，而以巷伯為寺人，皆誤。又案：內小臣，《左傳》、《國語》亦單言「小臣」。《左傳》僖四年云：「與小臣，小臣亦斃。」《晉語》說此事云：「飲小臣酒，亦斃。」韋注：「小臣，官名，掌陰事、陰令，

闔士是也。」又《公食大夫禮》稱「內官之士」即此。云「皆獻於阼階上，別於外內臣也」者，張氏爾岐曰：「在鄉遂采地者為外臣，在朝廷者為內臣。庶子以下皆人君近習，故云『別於外內臣也』。」案：張氏惠言曰：「《大射》注云：三官獻於阼階上，別外內臣也。是以三官為內臣，別於卿、大夫之外臣也。此非鄭意。」盛氏曰：「庶子以下，皆扈衛親近之臣，故皆獻之於阼階上。經不著其入門位次者，以其本在門內故也。其位蓋在東方，西面北上。」云「獻正下及內小臣，則磬人、鍾人、鐃人、鼓人、僕人之屬盡獻可知也」者，《周禮》：「磬師，中士四人，下士八人；鐃師，中士二人，下士四人；鼓人，中士六人。」諸侯並以下士為之。

右主人獻庶子以下於阼階

無算爵。算，數也。爵行無次無數，唯意所勸，醉而止。士也，有執膳爵者，有執散爵者。【疏】

正義曰：敖氏曰：「亦各序進，盥洗其觶以升。」郝氏曰：「士也，謂執爵皆士也。膳爵，君之爵。散爵，賓、卿、大夫

①「箋」上，《儀禮釋官》有「詩巷伯」三字。

之爵。」方氏苞曰：「特表其爲士，以事之終。或疑使無位者代其勤也。自大夫以上，皆得親與君爲禮。士則受酬於大夫，並不得與公卿接，故於禮終使二士執無算爵。不惟執膳爵者得徑進于公，即執散爵亦先進于公，而公親命之，以賜公卿，所以作其志氣而厲其節行也。士位在堂下，而獻必于阼階上，亦此義也。獻執爵者無文，何也？該於上經「辯獻士」也。」褚氏寅亮曰：「上媵觶以大夫，此則以上且變文曰執爵，禮殺者也。」執膳爵者酌以進公，公不拜，受。【疏】正義曰：郝氏曰：「酌以進公，酌膳尊，不拜送也。」韋氏協夢曰：「前大夫媵觶及賓媵觶皆于阼階下，再拜稽首。公荅再拜，然後奠觶于薦南。此士不拜送，故公亦不拜受。不拜送者，士賤，不敢與公爲禮也。」執散爵者，酌以之公命所賜。【疏】正義曰：郝氏曰：「酌以之公，酌方壺，往俟君命也。」所賜者興，受爵，降席下，奠爵，再拜稽首。公荅拜。席下，席西也。古文曰「公荅再拜」。【疏】正義曰：敖氏曰：「降，降席也。此不降階而惟拜於席下者，宜別於公所親酬者也。」注云「席下，席西也」者，李氏如圭曰：「前受公爵者，皆降拜，升成拜，至此拜席下而已，^①席以東爲上，統

于君。」注引古文作「再拜」者，姜氏曰：「《大射》嚴君臣之禮尚有「再」字，《燕禮》可知，當從古文。」盛氏曰：「案：經但云「荅拜」者，荅一拜也。燕禮貴和，君子臣皆荅再拜。姜說得之。」胡氏承珙曰：「案：此經注疑有脫誤。經文當是「公荅再拜」，注云「古文曰公荅拜」。蓋凡臣再拜稽首，公皆荅以再拜。有但言「公荅拜」者，省文耳。若古文明云「公荅再拜」，鄭不應反從今文去「再」字。又《大射儀》此節亦云：「公荅再拜。」知此經文亦必有「再」字，但賈疏標目已如今本，則其誤久矣。」褚氏寅亮曰：「古文云「公荅再拜」，注不從者，以此時禮殺，止荅降席之拜也。」受賜爵者以爵就席坐，公卒爵，然後飲。不敢先虛爵，明此勸惠從尊者來也。【疏】正義曰：敖氏曰：「異觶並行而代舉，君臣之禮，受賜爵者不先卒爵而俟者，膳酒之酌久矣，不必先飲之也。《士相見禮》言「卒爵而俟」者，始飲酒，若爲君嘗之者然。」執膳爵者，受公爵，酌，反奠之。宴歡在於飲酒，成其意。【疏】正義曰：敖氏曰：「未當公飲之節，故奠之。此不言所奠之處，則亦在薦南與？」

① 「席」，原脫，今據《儀禮集釋》補。

士既終旅，則君自舉之。」盛氏云：「公既卒爵，不以降奠于簠，而復實之者，欲公重舉此觶也。不與散爵並行，而反奠于君所者，象觶非臣所飲也。」方氏苞曰：「此爵公終不舉而奠之，何也？奠之而公不舉，以示飲有秩節而無醉飽之心也。」受賜爵者興，授執散爵。執散爵者乃酌行之。予其所勸者。【疏】正義曰：敖氏曰：「《大射》云：『授執散爵者。』此脫一『者』字。」案：戴校《集釋》補「者」字。○敖氏曰：「必興授者，以歸者亦興受也。非賜爵者，受授則皆坐。酌者酌散也。行之，謂每授之於席也。受賜爵者若賓也，則此觶先以之諸公若卿；受賜爵者若諸公若卿若大夫也，則此觶先以之賓，餘皆以次行之。惟己飲賜爵者，則不復授之。」褚氏寅亮曰：「此禮無算爵，止一爵序酬，無兩爵錯酬之儀。」吳氏廷華曰：「興授爵者，尊君賜也。」唯受爵于公者拜。卒受爵者興，以酬士于西階上。士升，大夫不拜乃飲，實爵。乃，猶而也。【疏】正義曰：李氏如圭曰：「卒受爵者自酌酬士，不使執爵者，不以己尊孤人也。前爲士舉旅時，大夫猶拜，至此不拜，禮又殺。」《義疏》曰：「公所賜諸節亦借卿席以明之。卒受者，經未詳其人，據下言大夫，故以爲大夫

之節。」敖氏曰：「大夫自實爵，旅酬之禮也。於是執爵者降，以酬者自酌，且己亦與旅也。」張氏曰：「此實爵，當是大夫自酌與之，不使人代。」士不拜受爵，大夫就席，士旅酌亦如之。【疏】正義曰：敖氏曰：「如其不拜而飲，不拜而受及自酌也。」張氏爾岐曰：「亦旅于階上而不拜也。」公有命徹冪，則卿、大夫皆降西階下，北面東上，再拜稽首。公命小臣辭，公荅再拜，大夫皆辟。命徹冪者，公意殷勤，必盡酒也。小臣辭，不升成拜，明雖醉，正臣禮也。不言賓，賓彌臣也。君荅拜於上，示不虛受也。【疏】正義曰：敖氏曰：「冪，兩甌之冪也。命徹冪者，命執冪者遂徹之也。徹之者，示與臣下同此酒，不自異也。在堂者皆降，拜謝君意也。士不拜，賤，不敢與君爲禮也。云『有命』，又云『則』，見其然否不定也。徹冪之節，其在大夫就席之時乎？辭者，辭之使升拜，辭之而不敢從命。小臣以復于公，公乃荅拜。卒拜于下，而不升成拜，臣之正禮也。必辭之者，以賓在其中也。賓與羣臣皆卒拜于下，禮宜然也。於此云『辟』者，嫌旅拜則不必辟也。不言賓及諸公，文省。凡小臣辭，皆公命之。經特於始末兩著之，以見其餘也。」褚氏寅亮

曰：「徹幕在大夫旅畢，士初行旅之時。」韋氏協夢云：「則者，承上之辭，見公有命徹幕，卿、大夫即降拜也。敖氏謂見其然否不定之辭，似未然。」方氏苞曰：「君命徹幕，使羣臣盡膳尊，而卿、大夫降拜反坐，不復行爵，士終旅，是至此士亦酌膳以相酬也。蓋賓與卿、大夫各受特賜之膳爵，脫屢升堂，又酌膳坐行以徧，故不敢專君之惠，而均諸羣士，貴臣推賢讓能，不敢賴寵之義也。燕之初，卿、大夫獻酬皆以散，至末而羣士皆飲膳，示君之馭臣，名分則親貴不敢假，恩義則疎賤不敢遺。惟嚴於始乃可以厚終也。」禮之起教於微渺，類如此。」注云「命徹幕者，公意殷勤，必盡酒也」者，李氏如圭曰：「鄉飲酒賓至，則徹幕者，酒，賓主共之。君專大惠，其尊恐塵加之，故有命乃徹之。」云「小臣辭，不升成拜，明雖醉，正臣禮也」者，方氏苞曰：「公不命升成拜，何也？此禮終而總拜君之賜也。異國之賓，明日拜賜，君不復見，而聽其稽首于門外。故本國之臣聽其稽首于階下，而不復命之升成拜。蓋以朝夕君所之人而拜賜于明日，是自同於國客也，故必變其節而後各明其義焉。」云「不言賓，賓彌臣也」者，以經但言卿、大夫，不言賓，是賓彌自卑，同於臣也。云「君荅拜於上，示不虛受也」者，《燕義》云：「禮無不荅，言上之不虛取於下也。」是也。遂

升，反坐。士終旅于上，如初。卿、大夫降而爵止，於其反席卒之。【疏】正義曰：張氏爾岐曰：「士方酌旅，以卿、大夫降而遂止。及其拜訖反席，士復終旅于西階上。」褚氏寅亮曰：「上已言『士旅酌亦如之』矣。復言此者，見士旅時有公命徹幕，卿大夫降拜，士暫止爵之事，故俟其反坐而終旅也。」朱子曰：「案：此士方旅酌而大夫降，則爵止不行。公辭而大夫復升，士乃終旅於上也。」無算樂。升、歌、間、合無數也，取歡而已，其樂章亦然。【疏】正義曰：注云「其樂章亦然」者，明所用者不但鄉樂已也。

右燕末無算爵無算樂

宵，則庶子執燭于阼階上，司宮執燭于西階上，甸人執大燭于庭，閭人爲大燭于門外。宵，夜也。燭，燋也。甸人，掌共薪蒸者。庭大燭，爲位廣也。閭人，門人也。爲，作也。作大燭以俟賓客出。【疏】正義曰：《校勘記》曰：「『閭人爲大燭于門外』，唐石經無『大』字。案：《大射》亦無『大』字。」注云「宵，夜

也」者，歐陽氏修曰：「《燕禮》有宵則設燭之禮，是古雖以禮飲酒，有至夜者，所以申燕私之恩，盡殷勤之意。」盛氏曰：「燕禮行於朝退之後，而賓主獻酢之節又繁，不繼以火則不能盡歡，故《詩》與《禮》皆有夜飲之事。若飲於臣家，則不可。《春秋傳》載齊敬仲飲桓公酒，而曰「臣卜其晝，未卜其夜」，是也。」云「燭，燠也」者，《少儀》云：「主人執燭抱燠。」鄭注：「未熟曰燠。」但在地曰燎，執之云燠。《詩》「庭燎之光」傳云：「庭燎，大燠也。」箋云：「於庭設大燠。」《周禮·司烜氏》云：「凡邦之大事，共墳燭庭燎。」故書「墳」爲「蕢」。鄭司農曰：「蕢燠，麻燠也。」賈疏云：「古者未有麻燠。庭燎所作，依慕容所爲，以葦爲中心，以布纏之，飴蜜灌之，若今蠟燭。」陳氏奐《毛詩傳疏》曰：「賈說非也。《巷伯》傳：「使執燭，放乎旦而蒸盡。」^①是薪蒸與麻蒸皆爲燠。庭燎爲大燠，亦猶是爾。」吳氏廷華曰：「注以燠爲燠。疏引《少儀》『抱燠』注謂「未熟曰燠」，是燠特燠之未熟者耳。此云「執燠」，則已熟矣。據《司烜氏》疏，謂人所執者，用荆燠爲之。案：《周禮·華人》注引《喪禮》「楚燠」證之，以楚燠即契所用灼龜，燠謂炬，其存火。則燠是已灼之炬。此注以燠爲燠，亦指已熟者，與《少儀》未熟之說不符。據《曲禮》注云：古未有燠，以大炬照夜。此疏亦謂古無麻燠而

用荆燠。則燠當如蕢氏燠契，蓋樵薪之樵即木耳。彼疏謂鄭音爲爵，取《莊子》「燠火」之義瑩瑩然也。荆燠爲可然之木，未熟則爲木，其名曰燠，已熟則爲燠。此注以燠爲燠，蓋推其未熟者言之。要知燠與大燠皆是荆燠之已熟者，但大小有別耳。至大燠、庭燎之分，據此經「大燠在庭」，則門內亦曰大燠，不必曰庭燎矣。余謂諸經多言執燠，不聞有執庭燎者，大約燠可執，燎不可執。《司烜氏》「墳燠」，可執之燠也；「庭燎」，不可執之燠也。在庭故稱庭，《詩》及《司烜氏》「庭燎」是也。若在門則亦稱門，《閭人》「門燎」是也。則《司烜氏》注門內、門外之說固不足憑。毛、鄭《詩》說亦有未盡也。《釋官》曰：「先鄭注《周禮》云：「庶子，宿衛之官。」《周禮·宮正職》云：「國有故，則令宿。」後鄭注引《文王世子》曰：「公若有出疆之政，庶子以公族之無事者守於公宮，正室守太廟，諸父守貴宮貴室，諸子諸孫守下宮下室。」是諸侯之庶子掌宿衛，與宮正同。此經云「執燠于阼階上」，《周禮·諸子職》無「執燠」之文。《宮正職》曰：「宮中、廟中則執燠。」然則諸侯兼官庶子，又兼《周禮》宮正之職與？」云「甸人，掌其薪蒸」者，《釋官》曰：「《左傳》云：

① 「蒸」，原作「薪」，今據《詩毛氏傳疏》改。

「甸設庭燎。」是執燭于庭其職也。《周禮》：甸師掌帥其徒，以薪蒸役外內饗之事。《國語》：「甸人積薪。」韋注：「甸人，掌薪蒸之官。」與注合。「云「閹人，門人也」者，《釋官》曰：「《周禮》·閹人職」曰：「大祭祀喪紀之事，設門燎。凡賓客亦如之。」閹人所掌同。鄭注《周禮》云：「閹人，司昏晨以啟閉者，刑人，墨者使守門。」《春秋》：「閹弑吳子餘祭。」《公羊》以爲近刑人。《左傳》：鬻拳自刖，楚人以爲大閹。是諸侯閹人亦使刑人爲之也。」賓醉，北面坐，取其薦脯以降。取脯，重得君賜。【疏】正義曰：郝氏曰：「賓醉，燕以醉爲節。衆出，以賓爲節也。取薦脯，榮君惠也。」盛氏曰：「《詩》云：『厭厭夜飲，不醉無歸。』」又曰：「醉而不出，是謂伐德。」故賓出必以醉爲節也。」奏《陔》。《陔》，《陔夏》，樂章也。賓出奏《陔夏》，以爲行節也。凡《夏》，以鍾鼓奏之。賓所執脯，以賜鍾人于門內雷，遂出。必賜鐘人，鐘人掌以鍾鼓奏《九夏》。今奏《陔》以節己，用賜脯以報之，明雖醉不忘禮。古文「賜」作「錫」。【疏】正義曰：注云「必賜鐘人，鐘人掌以鍾鼓奏《九夏》者，《釋官》曰：「《周禮》：『鐘師掌金奏，凡樂事以鍾鼓奏《九夏》。』諸侯鐘人所掌同。」云「今奏《陔》以節己，用賜脯以報之，明雖醉不忘禮」者，敖氏曰：「此非擊鐘

以奏《陔》之鐘人，乃其黨之在旅食之位者，先立於此，因過而賜之，以其同事也。」方氏苞曰：「工笙並受獻，不宜獨遺於金奏，故賓以薦脯賜之。《九夏》皆以鐘鼓奏，而所賜惟鐘人，以鍾師掌金奏之鼓，別無鼓人也。賓及門內雷，則奏《陔》者尚未離庭中之位，所受特其黨之立于門內者耳。蓋以爲禮也，非飲食之道也。一人受則與衆同之矣。」又云：「凡薦之實皆不舉，則既徹，府、史、胥、徒皆取分焉，故以賓脯賜鐘人見其凡。」焦氏以恕曰：「賓出奏《陔》，以金聲玉振例之，迨其至門內雷之時，則終擊而親授之。此一說也。或賓出至此，明言賜之，置諸鐘人之旁側，俟其終擊而取之。亦一說也。鐘人設有從者相之，賓過而予之，以賜鐘人，如敖氏所擬。又一說也。賓自命從者，徐以賜鐘人，而已先至于門外。亦又一說也。經不具說耳。」胡氏肇晰曰：「此不過言以薦脯賜掌鐘鼓奏《九夏》者耳，言「鐘人」以概其餘也。不然，奏《九夏》者非獨一鐘人，賓何爲獨用賜脯以報之？敖氏擬議過拘，焦氏尤爲詞費。」古文「賜」作「錫」者，胡氏承珙曰：「案：賜，正字；錫，假借字。」卿、大夫皆出，隨賓出也。公不送。賓禮訖，是臣也。【疏】正義曰：敖氏曰：「公與其臣燕而不送者，以其不爲獻主也。若於異國之臣，雖不爲正賓，君雖不爲獻主，猶送之。」郝氏曰：「賓本臣，始無迎，終亦無送也。」凌氏

《釋例》曰：「凡君與臣行禮，皆不送。《燕禮》、《大射儀》：賓出，公不送。《覲禮》侯氏出，經不云送。」^①天子尊，故不送也。是臣與君行禮皆不送也。又《士相見禮》：士見于大夫，若嘗爲臣者，賓出，使摯者還其贊于門外。考經文但云還贊于門外，不云送，是主人不送也。士見于大夫，賓退，送再拜，是賓主之禮。此嘗爲臣者不送，則君臣之禮也。又：君賜之食，君若降送之，則不敢顧辭，遂出。大夫則辭退，下，比及門三辭。注：「不敢辭其降，於己太崇，不敢當也。」下，亦降也。疏云：「士卑，不敢辭降。大夫之內，兼三卿、五大夫，臣中尊者，亦得辭降也。」竊謂《燕禮》、《大射》賓人不迎，及庭，公但降一等揖之，然則賓出不送，公亦當降一等揖之。此經之賜食，亦是燕類。經云君降送之，蓋亦降一等與？敖氏曰：「送之亦當至門。」又曰：「大夫起而退則君興，下階則君降，及門則君送。於此三節皆辭之，故曰三辭。」其說皆非也。經云「三辭」，即終辭也。終不敢當君之降，及門，指大夫而言，非君送至門也。君但降而已，不送至門，證以《燕禮》、《大射》，則禮之通例明矣。又《士昏禮》：親迎，賓出，婦從，降自西階，主人不降送。注：「主人不降送，禮不參。」此因婿與女行禮，故女父不送，非君臣之禮也。」

右燕畢賓出

公與客燕，謂四方之使者。【疏】正義曰：賈疏

云：「此下論與異國臣將燕，使卿、大夫就館戒客之辭事，但燕異國卿、大夫與臣子同。唯戒賓爲異，故於禮末特見之也。」曰：「寡君有不腆之酒，以請吾子之與寡君須臾焉，使某也以請。」君使人戒客辭也。禮，使人各以其爵。寡，鮮也。猶言少德，謙也。腆，善也。上介出請人告。古文「腆」皆作「殄」。今文皆曰「不腆酒」，無「之」。【疏】正義曰：注云「禮，使人各以其爵」者，《公食大夫》云：「使大夫戒，各以其爵。是也。」云「上介出請人告」者，亦約《公食大夫》之文。云「腆，善也」，又云「古文「腆」皆作「殄」。今文皆曰「不腆酒」，無「之」者，胡氏承珙曰：「腆，正字；殄，古文假借字。《詩·新臺》：「籩籛不殄。」箋云：「殄，當作腆。腆，善也。」與此訓同。《毛詩》古文假殄爲腆，與《禮經》古文亦同。」胡氏筆听曰：「此鄭參合古今文而酌用之也。古文作「殄」，假借字，故從今文作

①「云」，原脫，今據《禮經釋例》補。

「腆」。今文無「之」，文不備，故從古文有「之」。對曰：

「寡君，君之私也，君無所辱賜于使臣，臣敢辭。」上介出荅主國使者辭也。私，謂獨受恩厚也。君無

所爲辱，賜於使臣，謙不敢當也。敢者，怖懼用勢決之辭。

【疏】正義曰：《校勘記》曰：「注『謂獨受恩厚也』『受』，徐本作『有』，《集釋》、《通解》俱作『受』。『謙不敢當也』『敢』，誤作『告』。」云「私，謂獨受恩厚也」者，李氏微之曰：

「私之言屬也，謙詞也。《春秋傳》載叔孫穆子之言曰：

「邾、滕，人之私也。我，列國也。何故視之？」茅夷鴻告吳

人之言曰：「魯賦八百乘，君之貳也；邾賦六百乘，君之私

也。」此可見矣。」敖氏曰：「客自謙，不敢以敵國之使自處，

故云然。」云「敢者，怖懼用勢決之辭」者，謂聞命怖懼用勢

直決之辭也。褚氏寅亮曰：「或晉使聘于邾、滕，豈有反自

稱其君爲私屬之謂？」敖氏同誤。「寡君固曰不腆，

使某固以請」。「寡君，君之私也。君無所

辱賜于使臣，臣敢固辭。」重傳命。固，如故。【疏】

正義曰：張氏爾岐曰：「使者重傳命戒客，客重使上介致

辭。」「寡君固曰不腆，使某固以請。」「某固辭，

不得命，敢不從？」許之也。於是出見主國使者，辭

以見許爲得命。今文無「使某」。【疏】正義曰：張氏爾岐

曰：「使者三請，而客許之。」「今文無「使某」，鄭不從者，

無「使某」則文不備，且上兩「請」皆有「使某」也。致命

曰：「寡君使某，有不腆之酒，以請吾子之與

寡君須臾焉。」親相見，致君命辭也。「君貺寡言

多矣，又辱賜于使臣，臣敢拜賜命！」貺，賜

也，猶愛也。敢拜賜命，從使者拜君之賜命，猶謙不必辭

也。【疏】正義曰：此賓對使者之辭也。敖氏曰：「賓既

對，遂再拜稽首，所謂拜賜命也。於是大夫還，賓遂從之。」

右公與客燕

記

燕，朝服，于寢。朝服者，諸侯與其羣臣日視朝

之服也。謂冠玄端、緇帶、素鞞、白屨也。燕於路寢，相親

昵也。今辟雍十月行此燕禮，玄端而衣皮弁服，與《禮》異

也。【疏】正義曰：注云「謂冠玄端、緇帶、素鞞、白屨也」者，此言朝服，據《士冠禮》之文。敖氏曰：「朝服，兼君臣而言也。玄端、玄冠、素裳、緇帶、素鞞、白屨，士之朝服也。大夫冠、衣之屬皆與士同，惟雜帶以玄、黃爲異。若人君，則又朱綠帶也，其餘亦與士同。《玉藻》曰「大帶四寸。雜帶：君朱綠，大夫玄黃，士緇，辟二寸，再繚四寸」，是其異也。」云「燕於路寢，相親昵也」者，燕以娛賓，取其和樂，故饗於廟，而燕則於寢，相親昵之義也。引漢法者，見所服者與經所言或異也。吳氏廷華曰：「據士冠禮素裳、白屨，乃皮弁服之制。朝服並未言白屨也。案：《特性·記》：朝服，玄冠、緇帶、緇辟。可見朝服鞞色原無一定。《玉藻》：諸侯朝服視朝，爲玄冠、緇衣、素裳。鄭主裳屨同色之說，故注此云「白屨」，非也。」其性，狗也。狗，取擇人也，明非其人不與爲禮也。【疏】正義曰：《校勘記》曰：「此節經注，今本並脫。經，唐石經、徐本、《集釋》、楊氏、敖氏俱有，注，徐本、《集釋》、楊氏俱有。《通解》經注皆無。」亨于門外東方。亨于門外，臣所掌也。【疏】正義曰：賈疏云：「此與公食皆君禮，故言「于門外」。鄉飲亨于堂東北，不在外者，臣禮，宜主人親供也。」敖氏曰：「門外東方，

饗所在也，故於焉亨之。古者寢廟之門外皆有饗，吉則在東，凶則在西。」若與四方之賓燕，則公迎之于大門內，揖讓，升。四方之賓，謂來聘者也。自戒至於拜至，皆如《公食》，亦告饌具而後公即席，小臣請執事，請羞者，乃迎賓也。【疏】正義曰：張氏爾岐曰：「告饌具，請執事等，①又《公食》所無。」凌氏《釋例》曰：「凡燕四方之賓客，略如燕其臣之禮。」賓爲苟敬，席于阼階之西，北面。有胥，不啻肺，不啻酒。其介爲賓。苟，且也，假也。主國君饗時，親進醴於賓。今燕，又宜獻焉。人臣不敢褻煩尊者，至此升堂而辭讓，欲以臣禮燕，爲恭敬也。於是席之如獻諸公之位。言苟敬者，賓實主國所宜敬也。胥，折俎也。不啻，啻，似若尊者然也。介門西北面西上。公降迎上介以爲賓，揖讓，升，如初禮。主人獻賓，獻公，既獻苟敬，乃腍觚，羣臣即位，如燕也。【疏】正義曰：《校勘記》曰：「注「主國君饗時」「饗」，徐本作「鄉」。《釋文》、《集釋》、《通解》、楊氏俱作「饗」。陸氏曰：「或作鄉，非。」案：疏亦作「鄉」，然以《聘禮·記》「賓爲苟

①「請」，原作「設」，今據《儀禮鄭注句讀》改。

敬」注考之，作「饗」爲是。彼注與此注文異義同。彼言饗食，此專言饗者，《春秋》僖二十五年《左氏傳》曰「晉侯朝王，王饗醴，命之有」，是饗有進醴之事，與燕同類，故對言之。且饗，食與燕其事相連。若聘後禮賓自爲一事，何容相較乎？且《聘禮》注云「今文饗皆作鄉」，則鄉，饗古通用。此注即作「鄉」，亦當讀爲「饗」，不當讀爲「歸」也。「今燕又且獻焉」「且」，徐本、《集釋》、《通解》、楊氏俱作「宜」。」○李氏如圭曰：「饗食在廟，燕在寢，饗重而燕輕。饗既親獻也，故燕以介爲賓，而席賓於諸公之坐。以介爲賓，而後公可以無親獻也。苟敬之席，在公之左。《春秋傳》：宋公與魯叔孫昭子宴，飲酒樂，宋公使昭子右坐。右坐者，居公之右，改禮坐也。不啻，啐，如卿之禮。苟者，聊且粗略之意。苟敬，猶曰殺敬也。」敖氏曰：「苟，誠也，實也。苟敬者，國君於外臣所燕者之稱號也。其類亦猶鄉飲酒之介，遵矣。此燕主爲賓而設，賓於是時雖不爲正賓，而實爲主君之所敬，故以賓爲苟敬也。此席當有加席，與食禮者同而東上。公與賓既揖讓，升，公拜至，賓荅拜。公乃揖，賓各就其席。公降。擯者以命命上介爲賓，上介禮辭，許，再拜稽首。公荅拜，上介出。公乃升就席，擯者納賓，皆如羣臣爲賓之禮。必以上介爲賓者，禮，君與臣燕，其爲賓者，

不以公卿而以大夫，雖燕異國之臣宜亦如之。賓，卿也。上介，大夫也。此其不以賓爲賓，而以上介爲賓也與？阼階之西，諸公之位也。席苟敬於是，皆有晉，皆尊異之。不啻，啐者，辟正賓。又下記言：與卿燕則大夫爲賓，與大夫燕亦大夫爲賓。此以介爲賓，固足以明其卿爲聘使之禮。若大夫爲聘使，則燕賓其以主國之大夫爲之與？」盛氏曰：「苟敬之義，敖氏得之，而其解以賓爲苟敬，以介爲賓之故，則非也。蓋燕禮輕於饗，而外臣與己國之臣又有間。若以聘賓爲燕賓，公親獻與？則賓意既有所不安，又非所以申款曲、致殷勤也。使宰獻與？則與待己國之臣無異，又非所以尊賓也。於是席之於君側諸公之位，不啻，不啐，其禮似殺於賓，而折俎之設又有非己國諸公所得同者，則其敬之也，不以文而以實矣。故以是名之與？必以介爲賓者。《聘禮》云：于賓，壹食再饗，介，壹食壹饗。其與賓行禮之時，介每爲賓所厭，而不得以伸我敬焉，故必特爲介設食饗之禮，至燕則合之，而以介爲正賓，則其所以待介者亦不薄也。此其斟酌尊卑、豐殺之宜，化裁乎賓主、君臣之道，洵有非聖人不能爲者。蓋禮以義起，而義由內出。

①「又」，原作「且」，今據《儀禮集編》改。

《孟子》所謂「庸敬在兄，斯須之敬在鄉人」，亦此意也。豈必卿爲聘使而後以其介爲賓哉？「褚氏寅亮曰：『如敖說，則反主爲客矣。即以聘使爲賓，亦無所嫌，但無苟敬之席耳。苟敬之席，在外臣則聘賓也，在本國則諸公也。二者之外則無矣。若公所與燕者，或卿或大夫，自各從其本位耳。朱子謂所與燕者雖不爲賓，亦當如苟敬。恐未然。倘有諸公，位之於何處邪？不啐酒，則亦不告旨矣。』胡氏肇昕曰：『此經苟敬，人各爲說，訖無定論。鄭注且假之義，郝氏極排之，而戴氏震別自爲說，以爲《說文》『苟，自急敕也。音棘，从羊省』，與苟且字不同。近時說經者，如翁氏方綱、陳氏壽祺、洪氏頤煊等皆從其說。而王尚書《經義述聞》則云：『敖氏、戴氏之說皆非也。下文與卿燕則大夫爲賓，與大夫燕亦大夫爲賓。注曰：不以所與燕者爲賓者，燕爲序歡心，賓主敬也。是主人於賓，惟主恭敬而少歡心。今賓既辭爲賓，而就諸公之位，則歡心多而敬少。既不可專事恭敬，又不可全不恭敬，故謂之苟敬也。《聘禮·記》：燕則上介爲賓，賓爲苟敬。注曰：燕，私樂之禮，崇恩殺敬也。賓不欲主君復舉禮事禮已，於是辭爲賓，君聽之，從諸公之席，命爲苟敬。苟敬者，主人所以小敬也。是苟敬有崇恩殺敬之義，命爲苟敬者，所以別於正賓之全主

敬也。若訓爲主君之所誠敬，及自急敕而敬賓，則與正賓之全主敬者無以異矣，非經意也。』胡氏肇昕曰：『此解推求經注之義，與情事恰合。蓋賓席於諸公之位，其禮已殺，其敬亦殺，與鄉飲酒之尊者相等。飲酒之禮，遵者不啐肺，不啐酒。此注云「不啐」，似若遵者然也。尊者即遵者，謂此賓似若遵者然也。戴氏以《說文》苟字說之，義雖新而與經不合。敖氏之說亦牽強。至方氏苞謂「苟」當作「考」，則益穿鑿矣。張氏爾岐曰：『苟敬者，坐近君側，而簡於禮儀，疑於苟矣，實則敬之，故立以爲名。』是也。』無膳尊，無膳爵。降尊以就卑也。【疏】正義曰：注云「降尊以就卑」者，《郊特牲》云：「三獻之介，君專席而酢焉。此降尊以就卑也。」注本於此。李氏如圭曰：「不自尊別於外臣。」敖氏曰：「膳尊，瓦大也。膳爵，象觶也。所燕者非己臣子，故不宜自異，然則尊簠之數皆減矣。」張氏爾岐曰：「欲敬異國之賓，故不自殊異也。」與卿燕，則大夫爲賓；與大夫燕，亦大夫爲賓。不以所與燕者爲賓者，燕爲序歡心，賓主敬也。公父文伯飲南宮敬叔酒，以路堵父爲客，此之謂也。君恒以大夫爲賓者，大夫卑，雖尊之，猶遠於君。今文無「則」，下無「燕」。【疏】正義曰：注

「君但以大夫爲賓」者，《校勘記》曰：「但」，徐本，《集釋》、《通解》、楊氏俱作「恒」，與單疏述注合；陳本誤作「恒」。

○賈疏云：「此謂與己臣子燕法。」朱子曰：「公所與燕者雖不爲賓，亦當如異國之賓爲苟敬也。」敖氏曰：「云『與卿燕，則大夫爲賓』者，嫌爲賓或當以所燕者也。公與大夫燕亦大夫爲賓者，嫌爲賓者或當降於所燕者一等，如上例也。必以大夫爲賓者，賓位於堂，且與君爲禮，宜用稍尊者也。不以公卿爲之者，以其太尊於主人故也。」盛氏曰：「不以公卿爲賓，自是明嫌之義。敖云『以其太尊於主人』，似曲。賓爲苟敬，唯燕四方聘客則然。若己國之臣，各有位次，降階西北面之位，非諸公莫敢居也。朱子之說亦未能以爲然。」注引公父文伯者，事見《魯語》。「今文無『則』，下無『燕』」，鄭不從者，以其文不備，故從古文也。吳氏廷華曰：「《聘禮》上介，鄭注以爲大夫，則上介爲賓，即大夫爲賓也。」方氏苞曰：「賈疏云：不以公卿爲賓者，恐逼君。古者五十方爲大夫，累日積久，以至孤、卿年必過者，七十不與賓客之事，亦量其筋力難勝。如畏逼，^①則聘賓之受饗，本國公卿之禮食，君親與爲賓主之禮，又何以不畏逼乎？」羞膳者與執冪者皆士也。尊君也。膳宰卑於士。【疏】正義曰：敖氏曰：「經但云請執冪者與羞膳者

耳，而不見其爵，故記明之。」^②

注云「尊君也。膳宰卑

於士」者，盛氏曰：「士，上士也。諸侯上士二十七人。凡位於西方者皆是膳宰，即《周禮》膳夫也。膳夫，上士，則膳宰非上士明矣。故注云『膳宰卑於士』。《釋官》曰：「天子膳夫有上士、中士、下士。諸侯之膳宰以中士爲長，亦當下士爲之佐。小膳宰蓋下士之屬。經不見羞膳者與執冪者之爵，故記特著其爲士。羞膳者即膳宰，以下云『羞卿者，小膳宰』參之，可見羞膳有常職，而執冪者無常職，故經特言命執冪者而不言命羞膳者。下文薦司正、射人及執冪而不及羞膳者，正以其膳宰，故不自薦。又下主人亦膳宰，得薦者以其爲主人異之。」褚氏寅亮曰：「惟薦則公以士，賓以膳宰，以見等差。至設折俎，則同以膳宰矣。此言羞膳者士，而不別言羞賓之人，則亦同君而以士可知。下文云：『凡薦與羞者，小膳宰也。』言『凡』，見自賓而外，卿、大夫同，豈專指大夫以下乎？」羞卿者，小膳宰也。膳宰之佐也。【疏】正義曰：張氏爾岐曰：「以經不辨其人，故記者指言之。」注云「膳宰之佐也」者，方氏苞曰：「特

①「如」，原脫，今據《儀禮析疑》補。

②「記明」，原倒，今據《儀禮集說》改。

著小膳宰，明着膳與賓者皆膳宰正也。」若以樂納賓，則賓及庭，奏《肆夏》。賓拜酒，主人荅拜而樂闋。公拜受爵而奏《肆夏》，公卒爵，主人升受爵以下而樂闋。《肆夏》，樂章也，今亡。以鍾鑄播之，鼓磬應之，所謂「金奏」也。記曰：「入門而縣興，示易以敬也。」卿、大夫有王事之勞，則奏此樂焉。【疏】正義曰：敖氏曰：「君與臣燕，不以樂納賓，常禮也。其或於此用樂者，在君所欲耳。及庭而奏《肆夏》，尊賓也。未卒爵而樂闋，辟君也。必於此而樂闋者，亦以其為獻禮一節之終也。公受爵而奏，以其獻禮始於此也。卒爵乃闋，獻禮之終也。此蓋以樂與其禮相為終始，亦足以見尊君之義矣。」盛氏曰：「以樂納賓，亦謂與四方之賓燕也。賓，即其上介也。聘賓為苟敬，公迎之于大門內，而不以樂。其介為賓，則亦賓者納之，及庭，公降一等揖之，而以樂，所以寵異之也。注云「卿、大夫有王事之勞，則奏此樂」，非。蓋卿、大夫有王事之勞，是公所與燕者也，賓則他大夫也，既不以所與燕者為賓，何取乎納賓之時而奏此樂以尊之乎？《肆夏》，逸詩也。《周禮·大司樂職》云：「尸出入則令奏《肆夏》。」又《鐘師職》：以鐘鼓奏九夏，其二曰《肆夏》。與

此名雖同而音節必異。若皆《頌》之族類，必非諸侯所敢用。且彼是迎尸、送尸之樂歌，而王出入於大寢，亦用以為行節。燕禮納賓，於義何取？鄭即以「金奏」釋此，亦誤。拜酒，謂賓既啐酒而拜告旨之時也。闋，止也，樂終曰闋。必於此時樂闋者，升堂而樂闋，則嫌於兩君相見也；卒爵而樂闋，則嫌於獻公也。故以是為節與？獻公亦以樂，因賓也。賓於獻時樂未闋，獻公若否，則非尊君之義矣。卒爵乃闋，明此樂為獻而奏也。」金氏鶚曰：「燕聘賓，及庭而奏《肆夏》；兩君相見，則入大門即奏《肆夏》；此其異也。且樂章亦殊。禮謂燕他國大夫奏《肆夏》，而《左傳》穆叔如晉，金奏《肆夏》之三，不拜，以為使臣不敢與聞。蓋諸侯燕聘賓唯用《肆夏》一章，而兩君相見，及天子享諸侯，乃得備三章，故《左傳》不言《肆夏》而言三夏也。《外傳》謂金奏《肆夏》、《繁遏》、《渠》。《肆夏》其一，《繁遏》其二，《渠》其三，以《肆夏》統之，故曰《肆夏》之三。猶《文王》、《大明》、《緜》三篇稱《文王》之三，《鹿鳴》、《四牡》、《皇皇者華》稱《鹿鳴》之三也。又樂闋亦有異。記言：「賓拜酒，主人荅拜而樂闋。」是賓未卒爵也。《郊特牲》言：「卒爵而樂闋。」當兼賓主言，蓋諸侯為賓，其禮宜隆，故樂闋必待卒爵也。」升歌《鹿鳴》，下管《新宮》，笙入三成。《新

宮，《小雅》逸篇也。管之人三成，謂三終也。【疏】正義曰：敖氏曰：「歌《鹿鳴》之三也，《大射》云「三終」是也。凡升歌，皆歌三篇，不止一篇而已。歌者降而以管奏《新宮》，亦三終。《大射儀》曰：「大師及少師，上工皆降，立于鼓北，羣工陪于後。乃管《新宮》三終。」足以明之矣。舊說謂管如籥而小，併兩而吹之。三成，謂奏《南陔》、《白華》、《華黍》也。於歌與管，但言篇名，於笙言三成，文互見也。」褚氏寅亮曰：「此見納賓以樂之，異於常燕也。常燕則工歌《鹿鳴》之三，而笙奏《南陔》三詩。此則升歌同，而堂下所奏之詩，①所用之器不同，故別言之。考《周官》笙師，管、笙等皆其所掌，②則管奏亦屬笙師，故「笙人」承「下管」之文，③管指器，笙指職，一也。若謂管《新宮》後而始入，則吹管者何人？三成者何詩？俱不可通。周公時已有《新宮》，其非《斯干》可知。宋公享叔孫昭子，賦《新宮》，其有辭可知。故注云《小雅》逸篇。」吳氏廷華曰：「或謂新宮乃宮之子聲，以之奏《南陔》、《白華》、《華黍》也，將終則和以笙而樂成。」江氏筠曰：「經言升歌者四，而文有不同。此經與《鄉飲酒禮》皆云：「《鹿鳴》、《四牡》、《皇皇者華》。」《大射》云：「乃歌《鹿鳴》三終。」此記云：「升歌《鹿鳴》。」於此無注，於《大射》則謂「歌《鹿鳴》三終，而不歌《四牡》、

《皇皇者華》」。敖氏於此云：「歌《鹿鳴》之三也。《大射》云三終，是也。」於《大射》云：「謂歌《鹿鳴》之什」三篇，篇各一終，如《春秋傳》所謂「工歌《鹿鳴》之三」是也。《鄉飲酒》之禮歌《鹿鳴》、《四牡》、《皇皇者華》，而其義曰「工歌三終，則益可見矣。」案：敖正鄭之失，明矣。然鄭於《大射》與敖說異，其於此記當與敖說同。蓋其所以無注者，以記所用之篇數與經不殊。注已詳於經，則於此不言可知也。知鄭意如此者，鄭謂大射不歌下二篇，略於勞苦與諮事耳。此無射事，本於樂，不略。又鄭謂所燕為卿、大夫有王事之勞者，而《四牡》、《皇皇者華》一為勞使臣之詩，一為遣使臣之詩。鄭論用此二詩之義，於《四牡》云：「采其勤苦王事，念將父母，懷歸傷悲，忠孝之至，以勞賓也。」於《皇皇者華》云：「采其更自勞苦，自以為不及，欲諮謀于賢知，而自以光明也。」則以用之於賓，較諸經所燕之賓，尤於事情為切合，有不三詩並用者乎？此記視《大射儀》並少「三終」二字，而鄭猶不得歧經、記而言，而反於彼為異說，則即鄭之

①「下」，原脫，今據《儀禮管見》補。

②「皆」下，原衍「用」字，今據《儀禮管見》刪。

③「承」，原作「取」，今據《儀禮管見》改。

於此足以正彼注之非，又即此記之文足以明彼文之義矣。」

注云：「《新宮》，《小雅》逸篇也」者，李氏如圭曰：「宋公享叔孫昭子賦《新宮》，與此所笙奏，或謂即《斯干》之詩。」

江氏筠曰：「樂賓有笙、歌、間、合四節，四節之外，別有下管。經言下管者二，^①此記「下管《新宮》」，《大射》「乃管

《新宮》三終」是也。此記樂共四節，始升歌，次下管，次笙入，次合樂。疏則管、笙爲一節。云「笙入三成」者，謂笙奏

《新宮》三終，申說下管之義也。《大射》升歌，後惟下管一節，而別無「笙入」文。注云：「笙從工而入」，^②吹蕩以播《新

宮》之樂也。敖氏謂管與《新宮》爲二，於此云：「歌者降而以管奏《新宮》，亦三終。」笙入三成者，奏《南陔》、《白華》、

《華黍》也。於《大射》云：「文承大師、少師降立之下，明是降者管之。」《春官》大師、小師職皆云：「登歌下管。」是也。

案：敖說是也。蓋大射乃管《新宮》。上云：「大師、少師、上工皆降立于鼓北，羣工陪于後。」考《鄉射禮》工之遷樂，

在司馬命張侯、命倚旌後，今何以司正猶未立而即行遷樂于下？是明爲管故而降堂早也。其下云：「卒管。大師

及少師、上工，皆東牀之東南，西面北上，坐。」考《鄉射禮》工于降時即就阼階之東南，堂前三筵，西面北上坐。今何

以先立西縣鼓北，至卒管而後遷于東？是明爲管故而就

位遲也。又既管後，經不云獻，注以爲略下樂。通考全經，

凡工於就事訖，無不得獻者。此燕與鄉飲升歌獻工，笙奏

獻笙。鄉射唯有合樂，笙工並爲，亦俱有獻，惟得獻訖而後

就事者，其於事訖之時，則不復重獻，故此燕與鄉飲間合不

獻。然則即經之不云獻，而管者之即爲大師益明矣。蓋自

來於「下」字，俱以地言。鄭意以此「下管」之「下」，爲「笙入堂下」之「下」。案：《郊特牲》云：「歌者在堂，匏竹在下。」

匏指笙，竹指管，義非無據。然就此記文案之，於歌言升，

於管言下，於笙言入，則所謂下者，明是指人言之，謂下堂

而非堂下也。又《仲尼燕居》云「下而管象」，益可明矣。遂合鄉樂。鄉樂，《周南》、《召南》六篇。言遂者，不問

也。【疏】正義曰：李氏如圭曰：「不問歌。」敖氏曰：「不問者，或以樂已盛於上，故於此殺之與？獻時不奏《肆夏》，則不下管，乃有間。」盛氏曰：「燕樂只四節，謂歌、笙、間、合也。此則有管而無間，亦取合四節之數與？」褚氏寅亮

曰：「此無間歌，亦異常燕。經云「遂」，明不用間之意。」若舞，則《勺》。《勺》，《頌》篇，告成《大武》之樂歌也。

① 「經」，原作「輕」，今據《儀禮正義正義》改。

② 「工」，原作「上」，今據《續清經解》本改。

其詩曰：「於鑠王師，遵養時晦。」又曰：「實維爾公允師。」既合鄉樂，萬舞而奏之，所以美王侯，勸有功也。【疏】正義曰：《校勘記》曰：「注『大武』武，誤作『舞』。」○張氏爾岐曰：「升歌不盡《鹿鳴》以下三篇，而但歌《鹿鳴》。下管不奏《南陔》、《白華》、《華黍》，而管《新宮》。不用間歌，笙入三終，而遂合鄉樂，又或爲之舞，而歌《勺》以爲節，皆與常燕異。初既以樂納之，及作正樂，又有此異節，以其有王事之勞，故特異之也。」盛氏曰：「張說歌管之法與敖異，當以敖爲正。」注云「《勺》、《頌》篇，告成《大武》之樂歌也」者，《周頌·酌》篇序文，鄭以《勺》即《酌》也。云「既合鄉樂，萬舞而奏之」者，賈疏引宣八年《公羊傳》云：「萬者何？干舞也。」謂秉干以奏《勺》詩也。盛氏曰：「《內則》：『十三舞《勺》，成童舞《象》。』注：『先學《勺》，後學《象》，文武之次也。』疏家謂以其年尚幼，故習文武之小舞，然則《勺》蓋文舞之小者，故燕禮得用之。朱子《詩集傳》云：「萬者，舞之總名。武用干戚，文用羽籥。」是舞《勺》當用羽籥。疏引《公羊傳》以爲干舞，蓋非。先儒以《象》爲《維清》，《勺》爲《酌》，皆《周頌》之篇，而舞時歌以爲節。今亦相承解之，然未見其必然也。」^①惟公與賓有俎。主於燕，其餘可以無俎。【疏】正義曰：《校勘記》曰：「『惟』，

徐本作「唯」，單疏、《通解》俱作「惟」。案：諸本「惟」、「唯」錯出，不悉校。」注云「主於燕，其餘可以無俎」者，李氏如圭曰：「《大射》公，卿皆有俎。」敖氏曰：「經文已明，記復言之者，嫌所與燕者或當有俎，如異國之賓然也。」獻公曰：「臣敢奏爵以聽命。」授公釋此辭，不敢必受之。【疏】正義曰：敖氏曰：「奏，進也。命，謂君受與否之命。」注云「授公釋此辭，不敢必受之」者，賈疏云：「謂主人獻公，賓媵觶于公，雖非獻，亦釋此辭也。」盛氏曰：「主人親授公爵，故釋此辭。二大夫及賓媵觶，皆奠于薦南，示不敢必君舉之意，無庸釋此辭也。疏誤。」凡公所辭，皆栗階。栗，蹙也。謂越等，急趨君命也。【疏】正義曰：敖氏曰：「辭之而升，其禮則然。越等而上曰栗階，下曰蹙階。栗與歷聲相近。」郝氏曰：「凡公所辭，辭拜下也。栗階，猶歷階。凡升階，兩足並一級更進曰拾，一足一級曰歷。」張氏爾岐曰：「辭者，辭其拜下，命之升也。」凡栗階不過二等。其始升，猶聚足連步；越二等，左右足各一發而升堂。【疏】正義曰：賈疏云：「凡堂及階，

①「未」下，《儀禮集編》有「有以」二字。

尊者高而多，卑者庫而少。案：《禮器》云：「天子之堂九尺，諸侯七尺，大夫五尺，士三尺。」《士冠禮》「降三等，受爵弁」鄭注云：「降三等，下至地。」則士三等階。以此推之，則一尺爲一階，大夫五尺五等階，諸侯七尺七等階，天子九尺九等階可知。今云「凡栗階不過二等」，言「凡」，則天子九等已下至士三等皆有栗階之法。栗階不過二等，據上而言，故鄭云「其始升猶聚足連步」也。故《曲禮》云：「涉級聚足，連步以上。」鄭注云：「涉等聚足，謂前足躡一等，後足從之併。連步，謂足相隨，不相過也。」此即聚足，一也。①天子以下皆留上等爲栗階，左右足各一發而升堂。其下無問多少，皆連步。《雜記》云：「主人之升降散等。」鄭注云：散等，栗階。則栗階亦名散等。凡升階之法有四等：連步，一也。栗階，二也。歷階，三也。歷階，謂從下至上，皆越等，無連步。若《禮記·檀弓》云「杜蕢入寢，②歷階而升」是也。越階，四也。越階，謂左右足越三等。若《公羊傳》云：趙盾辟靈公，蹻階而走。是也。敖氏曰：「凡，凡公所辭者也。不過二等，明雖急趨君命，猶有節也。二等，階之上二等也。以諸侯七等之階言之，則至五等，左右足乃各一發，盡階則復聚足，然後升堂。」凌氏《釋例》曰：「凡升階皆連步，唯公所辭則栗階。考連步是升階常

法，猶之平敵相拜也。栗階于君辭則然，猶之再拜稽首也。見諸《禮經》，惟此二節。平敵升階，經不云連步者，猶之平敵相拜不云頓首也。若疏所云「歷階」、「越階」，皆《禮經》所無。敖氏曰：「越等而上曰栗階，下曰蹻階。」栗與歷聲相近。竊謂歷階當即是栗階，疏不必強生分別。若趙盾蹻階，疑非行禮常法。敖氏乃以下階當之，似未可從。蓋《禮經》降階，無君辭之事也。又《雜記》：「祭，主人之升降散等，執事者亦散等，雖虞附亦然。」鄭注：「散等，栗階。」此言練祥及虞附之祭。考《士虞禮》，升降本不散等，以有兄弟之戚，故鄭云「略威儀」也。以栗階爲略，與《燕禮》不同。《經義聞斯錄》曰：「案：注意，將至堂二等乃栗階。其下如天子堂九尺，階九等，則七等以下仍連步。諸侯堂七尺，階七等，則五等以下仍連步。故云「左右足各一發而升堂」也。考古人升堂止二法。《曲禮》：「拾級聚足，連步以上。」注云：「涉等聚足，謂前足躡一等，後足從之併。連步，謂足相隨不相過也。」此尋常之法。若急趨君命，則栗階。栗，猶歷也。左足升一等，則右足升二等；左足升三

①「一」，原脫，今據《儀禮注疏》補。

②「記」，原脫，今據《儀禮注疏》補。

等，則右足升四等。足不相併，閱歷而上，故曰栗階。但不得超越而過，故曰「不過二等」也。疏謂升降有四種，非也。」**凡公所酬，既拜，請旅侍臣。**既拜，謂自酌升拜時也。擯者阼階下告於公，還西階下告公許。旅，行也。請行酒於羣臣。必請者，不專惠也。【疏】正義曰：敖氏曰：「凡，凡四舉旅之禮。請，請於擯者。侍臣，侍飲之臣也。其禮見《大射儀》。」注云「既拜，謂自酌升拜時也」者，張氏爾岐曰：「賓受公虛爵，自酌，升，拜，公荅拜。於是時請之。」「擯者」已下，約《大射》之文。**凡薦與羞者，小膳宰也。**謂於卿、大夫以下也。上特言「羞卿者，小膳宰」，欲絕於賓。羞賓者亦士。【疏】正義曰：《校勘記》曰：「凡薦與羞者」，《通解》無「與」字。注「小膳宰」「宰」下，徐本、《集釋》、《通解》俱有「者」字。案：有「者」字與疏引注合。注云「謂於卿、大夫以下也。上特言「羞卿者，小膳宰」，欲絕於賓。羞賓者亦士」者，敖氏曰：「謂於大夫以下者也。上言「羞卿者，小膳宰」者，釋經文也。此無所釋，故并薦言之，文法宜然也。然則經言羞膳、羞卿之類，亦并薦言之明矣。」盛氏曰：「經云「羞庶羞」，不言其人，故記著之。凡，凡公、賓、卿、大夫也。士以下無羞。

薦，進也。與，猶以也。或曰：衍文。羞，庶羞也。謂以庶羞進者，皆小膳宰也。獻禮重，故薦脯醢者異之。脫屣升坐以後，禮益殺，故薦庶羞者同之。觀此則經記中所謂羞膳、羞卿者，皆專指薦脯醢言之明矣。經於賓云「膳宰薦脯醢」，於公云「士薦脯醢」。記亦云：羞膳者，士。士尊於膳宰也。於卿之薦，經不言其人，而記著之曰：「羞卿者，小膳宰也。」小膳宰卑於膳宰也。經於主人云「胥薦」。胥又卑於小膳宰也。於大夫以下皆不言薦之之人，記亦不著之者，以胥是最卑，主人既用胥，則薦在主人之後者可知也。薦脯醢者尊卑之差如此。《釋官》曰：「上言：「羞卿者，小膳宰。」所以別於賓，見羞賓與君者皆膳宰也。此復言「凡薦與羞者，小膳宰」，又推而廣之，見大夫以下與卿同也。」**有內羞。**謂羞豆之實，醢食、糝食；羞籩之實，糗餌、粉資。【疏】正義曰：敖氏曰：「內羞，即房中之羞也。祭禮尊者之庶羞、內羞，同時進之。」注云「羞豆之實，醢食、糝食」者，《周官·醢人》文；「羞籩之實，糗餌、粉資」者，《籩人》文。敖氏曰：「注以《周官·醢人》、《籩人職》所言羞豆、羞籩之實爲此內羞，禮恐或然，但未必其皆用之也。」郝氏曰：「內羞，自中饋女工出者，外庖所煎和曰庶羞。」盛氏曰：「《周禮·籩人》、《醢人》皆以奄及女奴爲之，此郝

說之所本也。」君與射，則爲下射，袒朱襦，樂作而后就物。君尊。【疏】正義曰：敖氏曰：「言與射，則

君於燕射，或時不與矣。」小臣以巾授矢，稍屬。君

尊，不措矢。【疏】正義曰：敖氏曰：「稍屬者，稍與發矢時

相連屬也。」①每於將發之節，則授之。郝氏曰：「稍屬，四

矢稍稍連屬不絕，以授君也。」張氏爾岐曰：「稍屬者，發一

矢，復授一矢也。盛氏曰：「稍，猶漸也。屬，猶付也。稍

屬，謂以四矢稍稍付公，不并授也。張說得之，蓋以下記及

《大射儀》考之，公既發一矢，必使人執弓以俟其耦，耦亦一

發，而后公再發，則以爲接續而授者，誤矣。不以樂

志，辟不敏也。【疏】正義曰：敖氏曰：「古文志，識通。

不以樂志者，言其每發不以樂之節爲識，而必欲應之也。

此亦優君也。盛氏曰：「不以樂志者，謂雖不與鼓節相應，

亦得釋算也。凡射者不鼓不釋，而君獨否，所以優之也。」

既發，則小臣受弓，以授弓人。俟復發也。不使

大射正，燕射輕。【疏】正義曰：敖氏曰：「受弓以授弓人，

蓋卒射之事也。記於既發言之未詳，其或有脫文與？」郝

氏曰：「凡射，俟同耦揖降，發畢弓猶在手。惟君既發，小

臣即受弓以授弓人，不俟同耦也。」盛氏曰：「《大射儀》

云：「公既發，大射正受弓而俟，拾發以將乘矢。」此以弓人代大射正之役，故注云「燕射輕」也。必由小臣授之者，弓人疎且賤，不敢親受之於君也。然則其授弓也，亦小臣受之於弓人以授公與？②每發必使人執弓而俟，亦君禮之異者也。敖疑此有脫文，非。既發，發一矢也。郝以爲發畢，亦非。【釋官】曰：「弓人，注疏未詳其職。以《周禮》繕人考之，③疑即其官。《繕人職》云：『掌王之用弓弩、矢

箛、矰弋、挾拾，掌詔王射，贊王弓矢之事。』注：「贊，授之受之。」疏：「案：《大僕職》已授之、受之，此又焉者，④大僕

尊，大僕贊時此官助贊也。」諸侯以小臣當大僕之官，此云

「既發」，則小臣受弓以授弓人。故知弓人即《周禮》繕人。

《考工記》有弓人爲弓，不預射事，與此別也。」上射退于

物一筭，既發，則荅君而俟。荅，對。【疏】正義

曰：《校勘記》曰：「注『荅對』，徐本、《集釋》俱有此注，《通

解》無，各本並脫。」注云「荅，對」者，張氏爾岐曰：「面

解》無，各本並脫。」

①「屬」，原作「續」，今據《儀禮集說》改。

②「公」，原作「弓」，今據《儀禮集編》改。

③「繕」，原作「膳」，今據《續清經解》本改。

④「焉」，當據《儀禮注疏》作「爲」。

鄉君也。」若飲君，燕則夾爵。謂君在不勝之黨，賓飲之如燕，賸觚，則又夾爵也。【疏】正義曰：賈疏云：「夾爵者，將飲君，先自飲，及君飲訖，又自飲爲夾爵。」胡氏肇昕曰：「鄉射·記」云：「若飲君如燕，則夾爵。」據注云「賓飲之如燕，賸觚」，則經文「燕」上當亦有「如」字。君在，大夫射，則肉袒。不纁襦，厭於君。【疏】正義曰：《鄉射》大夫與士射則袒纁襦，此對君則肉袒，故云「厭於君」。若與四方之賓燕，賸爵曰：「臣受賜矣，臣請贊執爵者。」受賜，謂公鄉者酬之，至燕，主人事賓之禮殺。賓降洗，升賸觚於公，荅恩惠也。【疏】正義曰：注「謂公卿者酌之」，《校勘記》曰：「卿」，諸本俱作「鄉」，唯嚴、鍾、楊氏與此同。「酌」，徐本、《集釋》、《通解》、楊、敖俱作「酬」。案：此本雖作「卿」，而仍載「許亮反」之音，明係「鄉」字，偶失校耳。○敖氏曰：「賓，謂介爲賓者也。執爵，似指歸之賸觚者而言。贊，猶佐也。」盛氏曰：「賓賸觚于公之時，則釋此辭也。」吳氏廷華曰：「不敢斥言賸觚于公，故謂贊執爵者，蓋若執爵者賸公而賓贊之耳。」注云「至燕，主人事賓之禮殺」者，張氏爾岐曰：「賓賸爵，在坐燕之後，故云『事實之禮殺』也。」相者對曰：

「吾子無自辱焉。」辭之也。對，荅也。亦告公以公命荅之也。【疏】正義曰：敖氏曰：「此下當有賓再請而相者許之辭，記不備見之也。」有房中之樂。弦歌《周南》、《召南》之詩，而不用鐘磬之節也。謂之房中者，后夫人之所諷誦，以事其君子。【疏】正義曰：注「弦歌」，《校勘記》曰：「絃」，徐本作「弦」，與單疏標目合。○陳氏暘曰：「《周禮·磬師》：『教縵樂、燕樂之鐘磬。』《詩》云：『窈窕淑女，鐘鼓樂之。』然則房中之樂非無鐘磬也。毛萇、侯苞、孫毓皆云有鐘磬，是已。鄭康成、王肅謂弦歌《周南》、《召南》而不用鐘磬。蕭統云：婦人尚柔，以靜爲體，不宜用鐘。是不深考《關雎》、《磬師》之過也。賈公彥亦謂以祭祀，^①則有鐘磬，以燕，則無鐘磬。是以文先儒之過，又從而爲之辭也。唐禮書：房中之樂不用鐘鐃，以十二大磬代之。是不知一音不備不足以爲樂也。」敖氏云：「奏之于房，故云『房中之樂』，蓋別於堂上、堂下之樂也。」郝氏曰：「房中之樂，所謂縵樂也。無鐘鼓而有管弦，奏之房中。《詩》云：『左執簧，右招我由房。』《周禮·春官》：『旄人掌」

①「謂」下，《樂書》有「房中之樂」四字。

散樂，賓客以舞其燕樂。」即房中之樂也。又曰：「席中之樂繫之末簡。其非盡雅樂可知。鄭必以二南當之，亦非也。」張氏爾岐曰：「疏云：承上文『與四方之賓燕』乃有之。愚謂常燕有無算樂，恐亦未必不有也。」盛氏曰：「鄭氏樵云：『古之達禮三：一曰燕，二曰享，三曰祀。所謂吉、凶、軍、賓、嘉，皆主此三者以成禮。古之達樂三：一曰《風》，二曰《雅》，三曰《頌》。所謂金、石、絲、竹、匏、土、革、木，皆主此三者以成樂。禮樂相須以爲用：禮非樂不行，樂非禮不舉。』然則作樂以行禮，舍《風》、《雅》、《頌》莫由也。《頌》爲郊廟祭祀之樂歌，《大雅》之體亦肅穆宏達，諸侯以下用者鮮焉。其上下通用者，不過《小雅》、《鹿鳴》、《南陔》以下十二詩及二南耳。《詩》云：『以雅以南，以籥不僭。』非是則不免於僭也。《湛露》、《彤弓》亦屬《小雅》，而諸侯歌以燕客，猶取議焉，矧其他乎？《燕禮》升歌、笙間以《小雅》，合以《二南》。若以樂納賓，升歌、管笙以《小雅》，亦合以《二南》。以是差之，則房中之樂其爲《二南》無疑也。程子曰：『《二南》之詩爲教于衽席之上、閨門之內，上下貴賤之所同也，故用之鄉人，用之邦國，而謂之正風。』朱子亦謂：『周公制禮作樂，采文王之世，風化所及，民俗之詩，被之箎弦，以爲房中之樂，而又推之以及于鄉黨、邦國，所以著明

先王風俗之盛，而使天下後世之修身、齊家、治國、平天下者，皆得以取法焉。」其旨蓋深遠矣。郝氏乃謂其非盡雅樂，是以後世之黃帳外樂疑聖人也，何其陋哉？至其用鐘磬與否，則先儒之說各有異同。今又後之數千載，音樂久失傳，將何以定其孰非而孰是？然以義推之，則康成、王肅之論亦未可盡非也。蓋古者樂縣之制必視其人以爲之等，是故天子諸侯鐘、磬、鐃俱有，大夫以下無鐃，諸侯之士又無鐘。其卿、大夫之有金石，必待有功而後賜之，誠以樂主乎散，而地道尚靜故也。后、夫人之德，尤以幽閒貞靜爲主，其於金石之樂，似非所宜，一也。樂之設也，各有其地。歌者在上，匏竹在下，琴瑟在堂，鐘鼓在庭，皆一定之，謂毋相亂也。此樂奏之于房，房非設縣之所，二也。《梁書》曰：「周備六代之樂，至秦餘《韶》、《房中》而已。」《漢書》亦云：「《房中祠樂》，高祖唐山夫人所作也。周有《房中樂》，至秦名曰《壽人》。孝惠二年，使樂府令夏侯寬備其簫管，更名曰《安世樂》。」然則漢之《安世》，即《房中》之遺響也。史臣但云「備其簫管」而不及其他，此亦無鐘磬之一證矣。或謂《安世房中歌》有云：「高張四縣，樂充宮廷。」何以知其無鐘磬邪？曰：《安世樂》蓋用之於禱祠。此特序其祭祀之時，張此樂縣耳，非謂歌此詩者必奏此樂也。且其言曰

「樂充宮庭」，則又可見其宮縣之在庭，而不在房矣。然則《周禮》所謂燕樂，鄭即以房中之樂釋之，何邪？曰：燕樂有鐘磬、有舞，教於磬師，掌於旄人，皆謂在庭之樂，非房中也。特是祭祀賓客之時，房中之弦歌既作，則在庭之樂皆應之，而舞者亦取節於是焉，猶合鄉樂之意也。以其因燕而作，故皆謂之燕樂。燕之爲樂也，既有在庭之樂，又有房中之樂；其羞也，既有庭羞，而又有內羞。此可以見君之厚其臣者，蓋有加而無已矣。內羞與房中之樂皆不見於經，而記著之，以其爲禮樂之小者也。且云「有」者，見其出於君之加厚，非常典也。《關雎》之卒章曰「鐘鼓樂之」者，詩人以既得淑女，而狀其懽欣和悅之意耳。先儒以朝廷贊見之際釋之，是已。若援以爲房中之樂之證，則出於傳會，而陳氏取之，過矣。唐人采蕭統之說，去鐘而用磬，亦一偏之見也。」

儀禮正義卷十三 鄭氏注

受業江寧楊大培補

大射儀第七

鄭《目錄》云：「名曰大射者，諸侯將有祭祀之事，與其羣臣射以觀其禮。數中者得與於祭，不數中者不得與於祭。大射儀於五禮屬嘉禮。大戴此第十三，小戴及《別錄》皆第七。」【疏】正義曰：「大射儀第七」，《校勘記》曰：「陳、閩、監、葛俱無『儀』字，與單疏合。《釋文》、《唐石經》、徐本俱有『儀』字。《目錄》『以觀其禮』，戴校《集釋》本『以觀其德者也』，云：『案：今注疏本脫也字，據宋本補。』」案：《校勘記》不言諸本有異，未知戴校何據。云「名曰大射者，諸侯將有祭祀之事，與其羣臣射以觀其禮。數中者得與於祭，不數中者不得與於祭」者，此《射義》文，鄭本之以爲說也。孔氏穎達《禮記正義》

曰：「凡天子、諸侯及卿、大夫禮射有三：一爲大射，是將祭擇士之射。二爲賓射，諸侯來朝，天子與之射；或諸侯相朝，與之射。三爲燕射，謂息燕而與之射。天子、諸侯、大夫三射皆具，士無大射。其賓射、燕射皆有之。」此三射之外，有鄉射、有主皮之射。凡主皮之射有二：一是卿從君田獵，班餘獲而射，《書傳》云「凡祭取餘獲陳于澤，然後卿、大夫相與射也」，鄭注《鄉射》云「主皮者無侯，張獸皮而射之，主於獲也」。二是庶人主皮之射，鄭注《周禮》云「庶人無侯，張獸皮而射之」是也。又有習武之射。《司弓矢》云：「弧弓以授射甲革、楯質者。」是也。敖氏曰：「此諸侯與其羣臣飲酒而習射之禮也。言大射者，別於賓射、燕射也。」盛氏世佐曰：「《射義》云：『諸侯之射也，必先行燕禮。』又云：『諸侯君臣盡志於射，以習禮樂。』此篇所陳是也。蓋古者天子以射選諸侯、卿、大夫、士，即有虞氏「侯以明之」之遺法。貢士之取舍，諸侯之黜陟，繫焉，故諸侯與其臣相與盡志於此，以求安譽而免流亡也。將祭而擇士，習之於澤，試之於射宮，唯天子之制則然。篇內無擇士之意，鄭乃引《射義》所言天子之制釋之，誤矣。亦曰大射者，別於鄉射也。鄉大夫與其民習射於鄉學，謂之鄉射；諸

侯與其臣習射於大學，謂之大射。其與賓射、燕射異者，彼是因賓燕而射，射否惟欲主於序歡情也；此則射而燕，主於習禮樂也。」胡氏肇昕曰：「盛氏之說分晰明確。考大射之禮，《周禮·司裘職》云：『王大射則共虎侯、熊侯、豹侯，設其鹄。』諸侯則共熊侯、豹侯，卿、大夫則共麋侯，皆設其鹄，是諸侯、卿、大夫皆有大射也。此篇所言皆諸侯之禮。諸侯將有祭祀之事，與其羣臣習射，此特大射之一事耳。」褚氏寅亮曰：「聖王之重射義有二：選諸侯也，擇士也。《禮記·射義》曰：『射者，^①射爲諸侯也。射中則得爲諸侯，射不中則不得爲諸侯。』此所謂選諸侯也。其曰：『天子之制，諸侯歲獻貢士於天子，天子試之於射宮。其容體比於禮，其節奏比於樂而中多者，得與於祭；其容體不比於禮，其節奏不比於樂而中少者，不得與於祭。』此所謂擇士也。又云：『數與於祭而君有慶，數不與於祭而君有讓。數有慶而益地，數有讓則削地。』以所貢者之得人與否定其君之賞罰。此則於擇士之中，而即寓黜陟、操諸侯之微權也。因并令在朝諸臣共有事於射，以習禮樂而觀盛德。序賓以賢，序賓以不侮，豈獨在會同時乎？至諸侯大射取士，則上以貢天子，下以助己祭，而即於其時

令羣臣共習焉。故逸《詩》：『大夫君子，凡以庶士。小大莫處，御于君所。以燕以射，則燕則譽。』而《射義》所云：『君臣盡志於射，以習禮樂。』可以免流亡之患者也。

乃論者疑必射中始得與祭，即大臣中容有不得與贊襄者。不知擇士助祭不過如後世所謂陪位者耳，並無職司，非若百執事者之有一定而不可缺，若贊玉幣者、奉玉盥者、奉六牲者之等。在朝諸臣各揚其職，廢職則有常刑，奚待於擇之哉？亦安得以擇之哉？蓋百官衆矣，除祭祀有常職外，其餘固不能一一入廟也。於是焉射以擇之，令其陪位，固非專擇夫所貢之士；而諸侯大射亦非專擇夫所欲貢之士也。明乎此，然後知擇士以助祭，與夫駿奔走、執豆籩之各有司存者，固並行而不悖矣。然則祭祀有常職者與射否乎？曰「射人戒公、卿、大夫，司射、司士戒士射」，經文明言之矣，安得不與？特不專爲助祭而擇耳。此篇鄭注所云「得與祭」者，蓋亦指陪位言。敖氏謂諸侯飲酒而習射之禮，則仍是燕射而非大射矣。」蔡氏德晉曰：「諸侯凡有朝、覲、會、盟諸大事，亦當與羣臣習射，擇士以從，不特祭爲

① 據《禮記正義》「射」下當有「侯」字。

然。」是也。

大射之儀。

【疏】正義曰：敖氏曰：「他篇於此言

「禮」，是乃言「儀」者，以其儀多於他篇，故特顯之。禮者，總名；儀，則其節文也。」郝氏曰：「不曰『禮』曰『儀』，射主儀也。射者，爭之器，行之以揖讓，故貴儀。子曰：射者何以聽？何以射？循聲而發，發而不失正，惟賢者乎！射有儀，所以難也。」盛氏曰：「不曰『禮』而曰『儀』，以其威儀之法比鄉射尤詳也。」君有命戒射。將有祭祀之事，當射。宰告於君，君乃命之。言君有命，政教宜由尊者。【疏】正義曰：張氏爾岐曰：「自此至『羹定』，皆射前戒備之事。戒諸官，張射侯，設樂縣，陳燕具：凡四節。」○蔡氏德晉曰：「戒射，預告有司以將射也。」高氏愈曰：「古人臨事而懼，故必戒。戒則人心警惕，執事虔恭矣。」①盛氏曰：「《考工記》云：『張皮侯而棲鵠，則春以功。』然則王大射以春矣，諸侯大射之時未聞。」吳氏廷華曰：「射爲祭設。將祭，先擇與祭者；與祭者定，乃於祭前旬有一日卜日，遂戒：次第如此。賈疏以此戒爲祭前旬有一日，誤矣。」宰戒百官有事于射者。宰，於天子冢宰，治官卿也。

作大事則掌以君命，戒於百官。【疏】正義曰：注「冢宰」，《校勘記》曰：「冢」，徐本作「家」，誤。」云「宰，於天子冢宰，治官卿也者，賈疏云：《周禮·大宰職》云「掌百官之誓戒」，此言宰戒百官，其事同，故鄭以天子冢宰言之也。其實諸侯無冢宰，立地官司徒以兼之。云「作大事則掌以君命，戒於百官」者，《大宰職》云「作大事，則戒於百官，贊王命」，是鄭所本也。《釋官》曰：「案：崔氏靈恩云：諸侯三卿，立司徒兼冢宰之事，立司馬兼宗伯之事，立司空兼司寇之事。本鄭氏《內則》「諸侯並六卿爲三」及《聘禮》「諸侯謂司徒爲宰」之注推之，孔、賈疏《禮》俱用其說。今以《尚書》、《戴記》、《左傳》所言卿制考之，自確。諸侯三卿，本無冢宰之官，特上卿執政者亦以宰稱之，如《左傳》稱薦敖爲宰，「武請于冢宰」，《國語》「使鮑叔爲宰」之類，皆謂執政之稱，非實設此官。《周禮》六卿，大宰爲長；諸侯三卿，司徒爲長。遂以宰爲長卿之號。《詩》孔疏云：經傳單稱「宰」者，皆大宰，若小宰、宰夫之屬無單言「宰」者，故鄭以此宰比天子冢宰也。春秋時，宋、鄭、吳、楚諸國皆有大宰之官，而宋之大宰在六卿下，鄭之大宰石臬爲良霄之介，楚以令

①「恭」，原作「共」，今據《禮經本義》改。

尹執政而有太宰子商、大宰伯州犂見於傳，則是別立其官，非此經言「宰」之義。以侯國三卿律之，皆僭也。」射人戒諸公、卿、大夫射。司士戒士射與贊者。射人掌以射法治射儀；司士「掌國中之士治，凡其戒命」；皆司馬之屬也。殊戒公、卿、大夫與士，辨貴賤也。贊，佐也。謂士佐執事不射者。【疏】正義曰：注「凡其戒命」，《校勘記》曰：「『命』，閩、監俱作『令』，與疏合。案：《周禮》原文亦作『令』。」○賈疏云：「上文宰官尊，總戒，此射人司士色別，^①重戒之。」注云「射人掌以射法治射儀」者，《夏官·射人》文。云「司士『掌國中之士治，凡其戒命』者，《司士職》文。射人、司士皆屬於夏官司馬，故云『皆司馬之屬也』。殊戒者，謂射人與司士分戒之也。」云「贊，佐也。謂士佐執事不射者，方氏苞曰：『曰『戒士射』，則知贊者不射矣。觀此，則士旅食乃升于司馬，掌于司士而未受職者，作之以贊射事明矣。用此推之鄉射，贊者，有司之類射皆不與。」吳氏廷華曰：「此言『贊者』，下公射則曰小臣正贊袒，贊饗，則凡量人、樂人、司宮、小臣師之屬，皆所謂贊者也。」

右戒百官

前射三日，宰夫戒宰及司馬、射人，宿視滌。宰夫，冢宰之屬，掌百官之徵令者。司馬，於天子政官之卿，凡大射，則合其六耦。滌，謂溉器、埽除射宮。【疏】正義曰：敖氏曰：「宰夫戒此三官，以當宿視滌也。宿，謂前射一日爲之。」張氏爾岐曰：「前者宰已戒百官，至此宰夫又以射期將至，來告於宰，上下交飭也。」^②又及司馬者，此日量道張侯，司馬職也。射人宿視滌、埽除、濯漑，又在前射三日之前一夕，故云「宿」。^③盛氏曰：「復戒此三官者，以宰是百官之長，司馬、射人皆於射有職守故也。六卿分職，故司馬言『及』、射人不言『及』者，以其即司馬之屬也。量道、張侯，皆射前一日事。張云即此一日，非。」^④韋氏協夢云：「前射三日，亦空一日也。宿則射前一日，與樂人設縣同日也。張氏以宿爲前射三日之前一夕，非是。」注云「宰夫，冢宰之屬，掌百官之徵令者」，《釋官》云：「《周禮·宰夫職》云：『凡朝覲、會同、賓客，以牢禮之法，掌其牢禮、委積、膳獻、賓賜之飧牽與其陳數。』」注云：「凡此禮

① 「色」，原作「區」，今據《儀禮注疏》改。

② 「飭」，原作「節」，今據《續清經解》本改。

③ 「非」上，《儀禮集編》有「亦」字。

陳數存可見者，惟有《行人》、《掌客》，及《聘禮》、《公食大夫》。『案：《聘禮》宰夫設飧，歸乘禽。《公食大夫禮》：「凡宰夫之具，饌于東房。」宰夫設黍、稷、膳、稻，然則諸侯之宰夫掌賓客飲食之事，與《周禮》正同。又《聘禮》：「命宰夫官具。」《周禮·宰夫職》：「凡禮事，贊小宰比官府之具。」《既夕》：「公使宰夫贈玄纁束帛。」《周禮·宰夫職》：「凡邦之弔事，掌其幣器財用。」是此經之宰夫即《周禮》之宰夫，與膳宰無涉。《燕義》因春秋時膳宰通稱宰夫，遂云「使宰夫爲獻主」，鄭注亦承其說。不知《儀禮》一經有膳宰、有宰夫，其職各不相亂也。《周禮》：「宰夫，下大夫」，則諸侯宰夫是士，當以下「宰夫有司」疏爲正。《聘禮》歸饗饌，卿饋賓，下大夫饋上介，宰夫饋士介，皆以同爵者致之，足證宰夫爲士矣。《周禮》宰夫四人，而《雜記》：「祫禮云：「宰夫五人，舉以東」者，《周禮》宰夫下尚有上士八人，中士十有六人，旅下士三十有二人，諸侯之宰當上士爲之，^①其下亦有中士、下士也。」云「司馬，於天子政官之卿，凡大射，則合其六耦」者，《周禮》大司馬掌邦政，又云「若大射，合諸侯之六耦」，是也。此謂諸侯之卿職，兼宗伯者。云「滌，謂溉器、埽除射宮」者，《釋官》云：「《周禮·射人職》：「不掌視滌，此云射人視滌者，以其主於射。」胡氏肇昕曰：「案：射人無視滌

之事，此經當以「宰夫戒宰及司馬射人」爲句，「宿視滌」爲句，「宿視滌」承上「宰夫」而言，亦宰夫事也。張氏以「射人宿視滌」爲句，非是。知視滌爲宰夫事者，盛氏曰：「《周禮·宰夫職》云：「從太宰而視滌濯」是也。此惟宰夫視之，宰不親者，射異於祭也。必視之者，以學中器具、房舍皆不常用故也。燕於寢，則無庸視矣。」方氏苞曰：「此篇主於射而言視滌，則燕視不待言矣。戒三官之地、所滌之器、滌之法、滌者之儀，皆不載，必已見於祭禮也。」司馬命量人量侯道與所設乏以狸步，大侯九十，參七十，干五十，設乏，各去其侯西十、北十。量人，司馬之屬，掌量道、巷、塗數者。侯，謂所射布也。尊者射之，以威不寧侯。卑者射之，以求爲侯。量侯道，謂去堂遠近也。容謂之乏，所以爲獲者之禦矢。狸之伺物，每舉足者，止視遠近，爲發必中也，是以量侯道取象焉。《鄉射·記》曰：「侯道五十弓。」《考工記》曰：「弓之下制六尺。」則此狸步六尺明矣。大侯，熊侯，謂之大者，與天子熊侯同。參，讀爲糝。糝，雜也。雜侯者，豹鵠而麋飾，下天

①「之宰」，《儀禮釋官》作「宰夫」。

子大夫也。干，讀爲豻。豻侯者，豻鵠，豻飾也。大夫將祭於己，射麋侯，士無臣，祭不射。【疏】正義曰：《校勘記》曰：「注『掌量道巷塗數者』『塗』，《釋文》作『涂』。案：塗，涂古今字。『正視遠近』『正』，陳、閩、監、葛、《通解》、楊氏俱作『止』，徐本、聶氏俱作『正』。案：《周禮·射人》注云：「狸，善搏者也，行則止而擬焉，其發必獲。」「近」，誤作「所」。『大侯熊侯』『大侯』下，《通解》有「者」字。」云「量人，司馬之屬，掌量道巷塗數」者，《周禮·量人職》文。《釋官》曰：「《周禮》：『量人，下士二人。』諸侯當士旅食爲之。」云「侯，謂所射布也」者，以三侯皆以布爲之，而以皮爲鵠，旁又飾以皮也。云「尊者射之，以威不寧侯；卑者射之，以求爲侯」者，《周禮·梓人》云「毋或者汝不寧侯，不屬於王所，故抗而射汝」，《禮記·射義》云「射侯者，射爲諸侯也。射中則得爲諸侯，射不中則不得爲諸侯」，是注所本也。云「容謂之乏，所以爲獲者之禦矢」者，以《周禮·射人》作「容」，此云「乏」，知容、乏同物也。云「狸之伺物，每舉足者，止視遠近，爲發必中也，是以量侯道取象焉」者，《射人》注云「狸，善搏者也，行則止而擬焉，其發必獲」者，此注所以明量侯道取象之意。云《鄉射·記》曰「侯道五十弓」，《考工記》「弓之下制六尺」，則此狸步六尺明矣」者，

先鄭注《射人》云「狸步，謂一舉足爲步，於今爲半步」，鄭不從，故引《考工記》以非之，明狸步爲六尺也。敖氏云：「侯道，去物之步數也。所畫物在兩楹間，正當楣也。此時未有物，當以楣間爲節也。步者，蓋量器長六尺者之名，如丈、尺、尋、引之類。刻畫狸形於其上，以爲識，故云「狸步」。盛氏曰：「量侯道之法，鄭得之，蓋不數堂上也。」云「大侯，熊侯，謂之大者，與天子熊侯同」者，賈疏云：「《司裘職》云：『王大射，則共虎侯、熊侯、豹侯，設其鵠。諸侯，則共熊侯、豹侯。』彼畿內諸侯二侯，以熊侯爲首；此畿外諸侯，亦得用三侯。其數上同於天子，而非畿內諸侯所可比，故於熊侯加大以別之。然不嫌於逼上者，天子三侯，則虎侯、熊侯、豹侯；諸侯不得用虎侯，而以熊侯、糝侯、豻侯爲三侯；若畿內，則但有熊侯、豹侯：此其所以別也。」敖氏曰：「大侯者，以其大於二侯名之也。大侯，熊侯也。《周官·司裘職》言諸侯大射共熊侯、豹侯，《射人職》云諸侯以四耦射二侯，亦謂熊侯、豹侯也。其侯數少於此，則侯道未必有九十步者矣。蓋作經有先後，故禮制有隆殺，所以異也。舊說謂《周官》言畿內之諸侯，非也。《周官》凡言諸侯，皆謂畿外者耳。畿內安得有諸侯之國哉？」盛氏曰：「此與《司裘職》文異者，彼是畿內諸侯法，則此畿外

也。畿內亦有諸侯乎？曰：有。《王制》云：「天子縣內諸侯祿也」是也。祭伯、凡伯之類見於《春秋》者多矣，豈鄭氏一人之私言哉？外諸侯設三侯者，以遠尊得伸也。君射熊侯，謂之大者，別於臣所射也。」云「參，讀爲糝。糝，雜也。雜侯者，豹鵠而麋飾，下天子大夫也」者，《周禮·射人》鄭注同。敖氏云：「參，讀如『毋往參焉』之參，謂介於二者之間也。參侯，以其參於二侯名之也。參侯，其豹侯歟？」郝氏曰：參，謂參於二侯之間，即孤、卿、大夫所射之麋侯。盛氏曰：「參，讀如字，以其參用豹侯、麋侯之制而名之也。不敢純用豹者，辟天子也。亦不純用麋者，以是諸侯之卿、大夫所射，又當下天子之卿、大夫也。敖、郝二說皆非。」胡氏肇昕曰：「參侯雜用豹侯、麋侯之制，故注易『參』爲『糝』，以其義較明顯也。敖以爲豹侯，郝以爲麋侯，皆失『參』字之義矣。」云「干，讀爲豳。豳侯者，豳鵠、豳飾也」者，《射人》「以三耦射豳侯」，注：「《大射禮》『豳』作『干』，讀爲『宜豳宜獄』之豳。豳，胡犬也。士與士射，則以豳皮飾侯。」蓋豳，正字；干，假借字。鄭以《周禮》決之，故讀干爲豳。敖氏曰：「九十、七十、五十，其步數也。君至尊而侯道反遠於卿、大夫、士者，蓋位尊則所及者遠，位卑則所及者近，故侯道象之，^①以見其義也。設乏之處各去

其侯之北十步者，以其當三侯相去之中，故以爲節也。去其侯之西亦十步者，則因其北之成數而用之，亦以公宮之庭寬廣故耳。」張氏爾岐曰：「三侯共道，遞近以二十步爲率。尊者射遠，卑者射近。侯遠則鵠大，侯近則鵠小。設乏西十、北十，西與北各去其侯六丈也。」方氏苞曰：「筋力不可強，而侯道之遠近壹以貴賤爲差，何也？皋陶陳謨，以六德、三德爲有邦、有國之差。蓋居君、卿之位而德器才識不能及遠，則無以馭其衆、臨其屬，故寓其義於射。傳曰：『爲人君者以爲君鵠，爲人臣者以爲臣鵠。』志力不足以中鵠，則君、卿與有司同罰，以示才德不足以稱位，則不足以任國社，而亦無以安於四民之上矣。此義明，則苟非至愚，必將撫躬而自懼，求賢以自助，尚敢荒寧以自恣於民上乎？位卑者雖力能中遠，而非其鵠不獲，亦教以職思其居而無越志也。傳所謂『射者各射己之鵠』，「繹者各繹己之志」，其此義也夫？」○吳氏廷華曰：「二侯、三侯，所以異者，蓋《司裘》止言卿、大夫而不言士，其言諸侯之熊侯與卿、大夫所射之豹侯，而不言士之豳侯。《射人》所謂豳侯，蓋以補《司裘》所不及，其實兩經無不同也。然則此經之大

①「侯道」，原作「諸侯」，今據《儀禮集說》改。

侯，固是《司裘》之熊侯，參侯亦當是《司裘》之豹侯。干之言豸，又不必言矣。案：《賓之初筵》詩傳以大侯爲君侯，天子、諸侯皆君也。在天子以虎侯爲大侯，在諸侯則以熊侯爲大侯。《注疏》謂其與天子熊侯同，故稱大，其說是也。豹侯謂之參者，敖氏云：「即《曲禮》『毋往參』之參，據下言大侯之鵠見於參，參見鵠于干，蓋三侯疊張，豹侯在二侯之中，故謂之參也。」遂命量人、巾車張三侯：大侯之崇，見鵠于參；參見鵠于干，干不及地武。不繫左下綱。設乏西十、北十，凡乏用革。巾車，於天子宗伯之屬，掌裝衣車者，亦使張侯。侯，巾類。崇，高也。高必見鵠。鵠，所射之主。①《射義》曰：「爲人君者以爲君鵠，爲人臣者以爲臣鵠，爲人父者以爲父鵠，爲人子者以爲子鵠。」言射中此乃能任己位也。鵠之言較，較，直也。射者，所以直己志。或曰：「鵠，鳥名，射之難中，中之爲俊，是以所射於侯取名也。」《淮南子》曰：「鵠鵠知來。」然則所云正者，正也，亦鳥名。齊魯之間名題肩爲正。正，鵠皆鳥之捷黠者。《考工記》曰：「梓人爲侯，廣與崇方，參分其廣，而鵠居一焉。」則大侯之鵠方六尺，參侯之鵠方四尺六寸大半寸，豸侯之鵠方三尺三寸少

半寸。及，至也。武，迹也。中人之足長尺二寸，以豸侯計之，參侯去地一丈五寸少半寸，大侯去地二丈二尺五寸少半寸。凡侯北面，西方謂之左。前射三日，張侯，設乏，欲使有事者豫志焉。【疏】正義曰：注「一丈五寸少半寸」，《校勘記》曰：「徐本『寸』下有『也』字，《通解》無。」○賈疏云：「上文直命量人量侯道及乏遠近之處，此經論張侯高下之法也。」敖氏曰：「張侯之序以大侯爲先，參次之，干爲後。乃云某見鵠于某者，蓋先以尺寸計而張之。及既張之後，則遠侯之鵠自各見於近侯之上，非謂先張近侯乃張遠侯也。」②二侯之高俱見鵠，而不盡見其鵠下之中。是射者唯以貫鵠爲中，而其外則否，於此見之矣。此張侯之法，大而遠者則高，小而近者則下，乃其勢之不得不然者，而尊卑之義亦存焉。禮意之妙，大抵類此。郝氏曰：「再言西十、北十，前言量，此言設也。乏用革，用皮蔽矢也。」張氏爾岐曰：「設乏西十、北十，西與北各去侯六丈也。云凡乏，三侯各有乏也。」褚氏寅亮曰：「陳氏祥道云：『鄭衆、馬融、王肅以正在鵠內，賈逵以鵠在正內，說皆無據。要之，大射

①「射」，原作「設」，今據《儀禮注疏》改。

②「非」，原脫，今據《儀禮集說》補。

之侯棲鵠，賓射之侯設正，燕射之侯畫獸。」此其別也。」

注云「巾車於天子宗伯之屬，掌裝衣車者，亦使張侯。侯，巾類」者，《釋官》曰：「《周禮·巾車》：『下大夫二人，上士四人，中士八人，下士十有六人。』諸侯當上士爲之。鄭注《周禮》云：『巾，猶衣也。巾車，車官之長。』《周禮》又有車僕，其職云：『大射供三乏。』此經命巾車張侯，并設乏，然則諸侯之巾車或兼車僕之職歟？」引《射義》者，欲明射以鵠爲主也。云「鵠之言較。較，直也。射者，所以直己志」者，明鵠取義於直，故《射義》云：「射者內志正，外體直。《爾雅·釋詁》：『梏，較同。』訓爲直，梏與鵠皆諧告聲，其義亦相近也。又引或說以爲鳥名者，以正、鵠皆鳥之捷點者，名正、名鵠，或亦取象於此，備異說也。引《考工記·梓人》之文者，欲明鵠之義，當先知侯、鵠廣狹之度也。云「大侯之鵠方六尺，參侯之鵠方四尺六寸大半寸，豢侯之鵠方三尺三寸少半寸」者，吳氏廷華曰：「《鄉飲酒·記》及《考工記》侯制有中、有躬、有舌。中以侯道爲準，侯道以弓計，中以寸計。侯道每弓得二寸爲侯中。大侯九十弓，侯中丈八尺；參侯七十弓，侯中丈四尺；豢侯五十弓，侯中一丈。以侯中三分之一爲鵠。大侯鵠六尺，參侯鵠四尺六寸六分有奇，干侯鵠三尺三寸三分有奇，上下各一分。侯中之上

爲躬，躬上爲舌，各高二尺，下躬，下舌亦如之。上舌之上爲上綱，下舌之下爲下綱，合三侯較之，躬舌相等，惟侯中及下綱去地高卑不同。若以侯中論，則大侯之中高參侯四尺，參侯之中高干侯四尺，其數有定。若武之去地，則經惟言干不及地武，義蓋以干侯下綱，去地如武之數，注以武爲尺二寸是也。以尺二寸合上下二躬二舌，共八尺。侯中一丈，則干侯上綱及地，共一丈九尺二寸。大侯、參侯去地之數雖無明文，然經明言大侯見鵠于參，參見鵠于干，則當由干侯上舌去地之數意會言之。蓋所謂「見鵠」者，疏以爲參鵠下半與干侯上綱齊，大侯鵠下半與參侯上綱齊也。案：大侯鵠六尺，鵠上六尺，上躬、上舌共四尺，則高於參侯當一丈六尺。參侯鵠四尺六寸六分，鵠上四尺六寸六分，上躬、上舌共四尺，則高於干侯當一丈三尺三寸二分。但干侯高一丈九尺二寸，則參侯自鵠以下至地亦應有一丈九尺二寸，掩於干侯之後，而參侯鵠下只四尺六寸六分，下躬、下舌則四尺，共八尺六寸六分，尚少一丈五寸四分，此即參侯下綱去地之數，^②注所謂「參侯去地一丈五寸少半寸」

① 「梏」，原作「曰」，今據《儀禮正義正義》改。

② 「參」，原作「參」，今據《續清經解》本改。

也。參侯本高二丈二尺，又下綱去地一丈五寸四分，共高三丈二尺五寸四分，則大侯自此以下至地亦應有三丈二尺五寸四分，掩於參侯之後。而大侯鵠下則六尺，下躬、下舌共四尺，共一丈，尚少二丈二尺五寸四分，此即大侯下綱去地之數，注所謂「大侯去地二丈二尺五寸少半寸」是也。又去鄉射乏參侯道，居侯黨之一西五步，注謂「去侯北十丈，西三丈」，是也。此經又言：「乏去侯西十、北十。」兩說不一。大約鄉侯卑，遠則報捷難，故須近；大侯、參侯高，乏可遠視，故一侯與三侯之乏遠近不同也。干與鄉侯等，侯等則報獲乃不至於差錯，乏之去侯當亦如之。經特連類及之，其實干侯之乏獨近也。又云量人主量道路，故命之計侯道，若巾車與侯道無涉，而並命之者，或謂《周禮·車僕》

「大射共三乏」，疏謂車用皮，乏亦用皮，故車僕爲之，然可見其乏爲車人之職也。巾車，車僕之長，使巾車者，使之命車僕也。」案：《義疏》云：「大侯上舌長七丈二尺，①下舌長五丈四尺，殺於上舌一丈八尺，兩植漸殺而下當鵠之處約長六丈餘，其旁出於參侯上舌之外者左右約各五六尺。參侯上舌長五丈六尺，下舌長四丈二尺，殺於上舌丈四尺，兩植漸殺而下當鵠之處約長四丈八九尺，其旁出於干侯上舌之外者約各長三四尺。雖三侯相去各二十步，其旁出之舌

隱然可見也。」云「前射三日張侯，設乏」者，鄭以此文皆承上「前射三日」也。胡氏肇昕曰：「注是也。此數節皆承上『前射三日』之文，因宰夫戒司馬、射人，司馬遂命量侯道、張侯，設乏，而宿視滌、宿縣皆射前一日事，故以「宿」字別之。以宿視滌廁於量侯道之前者，以視滌亦是宰夫事，承上宰夫而言，下則司馬之事也。」

右前射三日戒宰視滌量道張侯

樂人宿縣，于阼階東，笙磬西面，其南笙鐘，其南鑄，皆南陳。笙，猶生也。東爲陽中，萬物以生。《春秋傳》曰：「大簇，所以金奏，贊陽出滯；姑洗，所以脩絜百物，考神納賓。」是以東方鐘磬謂之笙，皆編而縣之。《周禮》曰：「凡縣鐘磬，半爲堵，全爲肆。」有鐘有磬爲全。鑄，如鐘而大，奏樂以鼓鑄爲節。【疏】正義曰：注「姑洗」，《校勘記》曰：「姑」，《釋文》、徐本俱作「沽」。○敖氏曰：「宿縣，謂前一日縣之也。明日當射，故此日云「宿」。宿縣者，亦重其事也。然則國君平常日用之縣，皆

①「上」，原作「之」，今據《儀禮義疏》改。

於其日縣之明矣。《大司樂職》曰：「大祭祀宿縣，遂以聲展之。」盛氏曰：「燕禮縣與燕同日，此亦於射前一日爲之者，大射重於燕也。」張氏爾岐曰：「諸侯軒縣，三面各有一肆。此其東一肆也。」褚氏寅亮曰：「東爲陽中，萬物以生」，故東方曰「笙鐘、笙磬」；西爲陰中，萬物以成，故西方言其成功，曰「頌鐘、頌磬」。聖人取名之義精矣。因其在東，故以之應笙，震爲竹也。因其在西，故以之應歌，兌爲言也，因又名歌。鐘磬之鼓與股，皆就一面言。蓋磬如句股形，其不鼓者謂之股，其鼓處謂之鼓。股短而闊，其長二，其闊一。鼓長而狹，其長視股一而有半，其博則三分股之二，其股與鼓之厚，則各得鼓博三分之一，其方積則均，故縣之而無敝側。敖氏分股鼓爲兩面，誤。鑄大於編鐘，而小於特縣之鐘，蓋特縣鐘中又自有大小也，並非小於編鐘。」江氏筠曰：「敖氏謂笙是與笙相應者，頌之言誦，與歌樂相應者。如所說，則鄉飲禮是特縣，將應笙則不能應歌，應歌則不能應笙，豈以在階間之故而兩者俱應邪？抑以大夫、士之制異而於兩者俱不應邪？案：此說本諸宋葉氏，見《書》『戛擊鳴球』節《蔡傳》中。蓋宋人都不識字，止知頌有誦音，不知頌有容音。《說文》云：「頌，兒也。」籀文作「頌」。又云：「兒，頌儀也。」然則頌本是古之容兒字。

又《詩叙》：「頌者，美盛德之形容，以其成功告于神明者也。」則頌又兼成義，故注云「言成功曰頌」，又云「古文頌爲庸」，可見「頌」與「庸」意義皆同也。又《尚書》云：「笙庸以間。」鄭注亦引此經以說，是也。」注云「笙，猶生也。東爲陽中，萬物以生」者，賈疏云：「陽氣起于子，盛于午，故東方爲陽中也。萬物以生，以其正月三陽生，大族用事，故萬物生焉。」引《春秋傳》者，《國語》伶州鳩對周景王辭。鄭引以證東方鐘磬名笙之義也。云「大族，所以金奏，贊陽出滯」者，韋昭注引賈、唐云：「大族，正聲爲商，故爲金奏，所以佐陽發、出滯伏。《明堂月令》曰：「正月，蟄蟲始震。」云「姑洗，所以脩絜百物，考神納賓」者，韋注云：「三月曰姑洗，《乾》九三也。管長七寸一分，律長七寸九分寸之一。姑，絜也。洗，濯也。考，合也。言陽氣發生，洗濯枯穢，改柯易葉也。於正聲爲角，是月百物脩絜，故用之宗廟，合致神人；用之鄉宴，^①可以納賓也。」是二律爲東方陽管取發生之義，故東方鐘磬謂之笙也。敖氏曰：「笙磬、笙鐘，皆與笙相應者也。」義本陳氏暘，與注說異。盛氏曰：「笙磬、笙鐘，以其在東而名之；頌磬、頌鐘，以其在西而名之。鄭

①「鄉宴」，原作「燕享」，今據《國語解》改。

解蓋得之矣。獨是編縣十二枚，備十有二律之數度。鄭乃引《春秋外傳》以證此，似東縣獨協大族，姑洗二律，西縣獨協夷則，無射二律，所以啟後人之疑耳。陳氏以笙磬爲應笙之磬，頌磬爲應歌之磬，諸儒多右其說，竊恐亦未的也。蓋樂以人聲爲貴，故歌者在上方，匏竹在下。就堂下樂中亦有差等。笙管，聲之發乎人者也。磬鐘之屬，聲之發乎器者也。故有時以笙爲主，而磬以下應之，所謂「笙奏」也。《詩》所謂「笙磬同音」是也。有時以管爲主，而磬以下應之，所謂「下管」是也。《詩》曰「嘒嘒管聲」。既和且平，依我磬聲」是也。下經云「乃管《新宮》三終」，則大射樂以管爲主矣。何以但有應笙之鐘磬，而無應管之鐘磬邪？且歌者在上方，西方安得有歌？而云頌磬歌乎西，是亂上下之列矣。至於合樂之時歌瑟與衆音並作，亦豈唯西縣爲與歌相應也？云「皆編而縣之」者，《磬師》云「掌教擊磬、擊編鐘」，注云「磬亦編於鐘」，以磬與鐘同十六枚而在一處也。案：陳氏陽謂編磬在西，而以頌磬名之；特磬在東，而以笙磬名之；以特磬、編磬爲頌、笙之別，其說與注異。盛氏非之，而引《詩毛傳》云：「笙磬，東方之樂也。」則鄭說傳之有自矣。引《周禮》者，《小胥職》文。云「鑄，如鐘而大，奏樂以鼓鑄爲節」者，《郊特牲》注亦云「鑄，如鐘而大」，又《周

禮·鑄師》云「掌金奏之鼓」，注云「謂主擊晉鼓以奏其鐘、鑄也」。敖氏曰：「鐘、鑄皆南陳，亦以其北上也。其面有二，故不言西面，而擊者亦與磬同也。」盛氏曰：「南陳，謂向南陳之，以虞首在北也。皆，皆鐘磬鑄也。陳之於堂爲縮。」建鼓在阼階西，南鼓；應磬在其東，南鼓。建，猶樹也。以木貫而載之，樹之附也。南鼓，謂所伐面也。應磬，應朔磬也。先擊朔磬，應磬應之。磬，小鼓也。在東，使其先擊小後擊大也。鼓不在東縣南，爲君也。

【疏】正義曰：注「應磬應之」，《校勘記》曰：「徐本無『應磬』二字，《通解》、楊、敖俱有。」○云「建，猶樹也。以木貫而載之，樹之附也」者，賈疏曰：「《明堂位》云：『殷楹鼓，周縣鼓。』」注云：「楹爲之柱，貫中上出也。縣，縣之於簨簴也。周人縣鼓，今言建鼓，則殷法也。主於射，略於樂，故用先代鼓。」陳氏祥道曰：「楹鼓，蓋爲一楹而四棱，貫鼓于其端。《周官》：『大僕建路鼓于大寢之門外。』《莊子》曰：『負建鼓而求亡子。』」建鼓可負，則以楹貫之可知。」方氏苞曰：「建鼓即楹鼓，以木貫而建之，遂以建名。若以樹

①「求亡子」，原作「止」，今據《禮書》改。

詁，則下云一鼓在其南，一鼓在西階之西，簫在鼓西，可矣。皆特標建鼓，義無所處，於文爲贅。」胡氏肇昕曰：「注以樹訓建者，以建鼓之名取於樹也。鄭固亦以建鼓爲楹鼓也，以明堂位注證之可知。方氏駁之，非也。」云「應鼗，應朔鼗也。先擊朔鼗，應鼗應之，鼗，小鼓也」者，《爾雅·釋樂》「大鼓謂之鼓，小者謂之應」，《詩·有瞽》「應田縣鼓」《毛傳》「應，小鞀也」。鞀與鼗古字通。陳氏奐《傳疏》云：「應鼗在東面，以應西面之朔鼗，故謂之應。又先擊小鼓，乃擊大鼓，小鼓爲大鼓先引，故亦謂之應。」云「鼓不在東縣南，爲君也」者，張氏爾岐曰：「此鼓本在東縣之南，與磬、鐘、鐃共爲一肆，移來在此者，鄭以爲爲君，以君在阼階上，近君設之，故云「爲君也」。下建鼓言一，此不言一，因移並言之。」敖氏曰：「此鼓、鼗，乃在東縣南者也。以君當於阼階東南揖卿、大夫，且主人之位亦在洗北，皆當鐃之南，故移鼓、鼗於此以辟之也。鼓、鼗若在東縣南，則鼓在左，鼗在右。今設於此，乃反之者，明其變位也。」盛氏曰：「注說似迂，當以敖說爲是。」西階之西，頌磬東面，其南鐘，其南鐃，皆南陳。一建鼓在其南，東鼓，朔鼗在其北。言成功曰頌，西爲陰中，萬物之所

成。《春秋傳》曰：「夷則，所以詠歌九則，平民無忒；無射，所以宣布哲人之令德，示民軌義。」是以西方鐘磬謂之頌。朔，始也。奏樂先擊西鼗，樂爲賓所由來也。鐘不言頌，鼗不言東鼓，義同，省文也。古文「頌」爲「庸」。【疏】正義曰：張氏爾岐曰：「此西一肆也。」注云「西爲陰中，萬物之所成」者，西方爲秋，陰氣始盛，故曰「西爲陰中」。《尚書·堯典》曰：「平秩西成。」萬物成熟之時，故曰「萬物之所成」。引《春秋傳》者，亦《國語》文。云「夷則，所以詠歌九則，平民無忒」者，《國語》「忒」作「貳」。「貳」，當爲「貳」之誤。韋注曰：「七月曰夷則，①《乾》九五也。管長五寸六分，律長五寸七百分二十九分，之四百五十一。夷，平也。則，法也。言萬物既成，可法則也。故可以詠歌九功之則，成民之志，使無疑貳也。」云「無射，所以宣布哲人之令德，示民軌義」者，韋注曰：「九月曰無射，乾上九也。管長四寸九分，律長四寸六千五百六十一分寸之六千五百二十四。宣，徧也。軌，道也。義，②法也。九月陽氣收藏，萬

①「曰」，原作「爲」，今據《國語解》改。

②「義」，《國語解》作「儀」。

物無射見者，故可以宣布前哲之令德，^①示民道法也。」是二律爲西方陰管，取成功之義，故西方鐘磬謂之頌。云「奏樂，先擊西磬，樂爲賓所由來也」者，賈疏云：「賓向外來，位在西，其樂主爲樂賓，故先擊朔磬，應之也。」云「鐘不言頌，磬不言東鼓，義同，文省也」者，以上東方言笙鐘，應磬言南鼓。此不言者，省文耳，義同於上也。云「古文「頌」爲「庸」者，胡氏承珙曰：「《周禮·大司樂》疏引鄭注《尚書》「笙庸以間」云：「東方之樂謂之笙。笙，生也。東方，生長之方，故名樂爲笙也。西方之樂謂之庸。庸，功也。西方物熟，有成功，亦謂之頌。頌，亦是頌其成也。」^②《眡瞭職》云：「擊頌磬、笙磬。」注云：「磬在東方曰笙。笙，生也。在西方曰頌。頌，或作庸。庸，功也。」是《尚書》、《二禮》三注略同。賈疏云：「古文頌爲庸。」此雖疊古文不從，義亦通，是也。」胡氏肇昕曰：「《周禮·大師》注：「頌之言誦也，容也。」《史記·周本紀》：「成王名誦。」《竹書紀年》作「名庸」。是頌、誦、容三字古義通用，故今文作「頌」，古文作「庸」。鄭君參考古今文，訓笙爲生，訓頌爲言成功，其義致精。後儒謂鐘磬之應笙者曰笙鐘、笙磬，應歌者曰頌鐘、頌磬，緣文生訓，義不可通。如以頌爲歌樂，以釋今文之作「頌」可也，而古文之作「庸」又何說乎？此以見舊說之不

可輕改也。」一建鼓在西階之東，南面。言面者，國君於其羣臣，備三面爾。無鐘磬，有鼓而已。其爲諸侯則軒縣。【疏】正義曰：軒縣三面皆縣，北面合有一肆，以其與羣臣射，故闕之以辟射位，猶設一建鼓者，姑備三面耳。故言「南面」，與笙磬、頌磬同例。而與上文之自東縣移來者異文也。敖氏曰：「國君合有三面樂，東方、西方與階間也。階間之縣東上，其鼓則西上，與在東方、西方者之位相類也。大射盛於燕，宜備樂。乃以辟射之故，去其階間之縣，但設其鼓於故位而已。上言南鼓、東鼓，惟此言南面，蓋闕其中縣，則不擊此鼓，故異其文以見之。此鼓不擊，乃設之者，明有爲而去其縣，非禮殺也。」盛氏曰：「此闕其北一肆，辟射也。猶設鼓者，別於判縣也。北縣南面，故此鼓亦南面。不云南鼓者，見其當一面也。既設之，亦須擊。敖云鼓不擊，非。既因辟射，雖賓射亦當闕之。若不爲射，雖於其臣亦當設。注說非。燕禮縣法宜與此同，爲燕亦有時而射也。」韋氏協夢曰：「敖氏謂「以辟射之故，去其階間之縣」，是也。若然，則大射及賓射皆當闕一面，

① 「宣」，原作「徧」，今據《國語解》改。

② 「成」下，原衍「功」字，今據《周禮注疏》刪。

注謂其爲諸侯則軒縣。賓射輕於大射，烏有賓射備縣而大射不備者乎？蓋射禮之縣以主射者而別，不以所與射者而別。注以所與射者之尊卑，而定縣之闕與不闕，誤矣。」胡氏肇昕曰：「案：上文於笙磬言西面，於頌磬言東面，故於建鼓言南鼓、東鼓，不言面。此無鐘磬，惟有鼓，故於鼓言南面，明鼓之在北也。敖氏因經不言鼓，遂謂此鼓不擊，穿鑿甚矣。」褚氏寅亮曰：「注云『君於其臣，備三面耳』，此即降尊就卑之義。階間之縣，何妨於射而必徹之乎？且賓射亦軒樂，又何獨不徹乎？」案：《義疏》云：「樂之差次，以用樂者之尊卑而殊，不以賓客之尊卑也。此闕一縣，自爲辟射。至屆射時而遷樂者，所遷者，工與瑟而已，不開并其縣而遷之也。簠在建鼓之間。簠，竹也，謂笙簠之屬，倚於堂。」【疏】正義曰：注云「簠，竹也，謂笙簠之屬」者，下文「乃管《新宮》」注云「管，謂吹簠」，是簠謂管也。管與笙簠皆用竹，故云「笙簠之屬」。云「倚於堂」者，敖氏曰：「簠即工之所管者，故近工位設之。」盛氏曰：「建鼓之間，即兩階之間也。設於此者，以管爲堂下樂之主也。」胡氏肇昕曰：「案：阼階之西，西階之東，各一建鼓，故云『建鼓之間』。管爲工所執以吹者，於階間設之，故知倚於堂也。」鼗倚于頌磬，西紃。鼗，如鼓而小，有柄，賓至，

搖之以奏樂也。紃，編磬繩也。設鼗於磬西，倚於紃也。《王制》曰：「天子賜諸侯樂，則以祝將之；賜伯、子、男樂，則以鼗將之。」【疏】正義曰：注云「鼗，如鼓而小，有柄，賓至，搖之以奏樂也」者，《周禮·小師》注云：「鼗，如鼓而小，持其柄搖之，旁耳還自擊。」又《眡瞭職》云：「凡樂事，播鼗，擊頌磬、笙磬。」是鼗亦所以節樂也。上經注云：「奏樂先擊西鼗，樂爲賓所由來也。」以賓在西，故先擊西鼗。此鼗亦在西，故知賓至搖之以奏樂也。云「紃，編磬繩也。設鼗於磬西，倚於紃也」者，郝氏曰：鼗，小鼓，有耳有柄，搖擊之，不縣設，倚置於頌磬東。紃，鼗兩旁縣耳繩，如冠之有紃。鼗倚于磬簠東，故其紃西委也。盛氏曰：「西紃之說，郝氏爲長。若從注說，則經『西紃』二字當乙，編磬繩不可言東西也。以聶氏《三禮圖》考之可見。」胡氏肇昕曰：「案：經云『倚』，以東西言，不以南北言。編磬繩可言南北，不可言東西，且繩亦非可倚之物也。注：『設鼗於磬西，倚於紃。』則鼗在磬後。鼗，所以節奏。賓至，先擊鼗，則鼗當在磬前。郝謂『倚于頌磬東，其紃西委』，說最確。」陳氏免《毛詩傳疏》謂：「紃，維也。維，亦繩也。古者鐘、磬、縣鼓皆不縣，惟鼗鼓乃縣之。東西兩肆皆有磬、鐘、鐃、建鼓，自北而南陳之，則西肆不得多設一器。鼗鼓在西肆

頌磬之西，而特縣之，所以象西方功成。《禮器》曰：「廟堂之下，縣鼓在西。」其義證也。」胡氏肇昕曰：「陳氏以鼗當縣鼓。考《詩》·有瞽》云：『應田縣鼓，鞀磬祝圉。』言『縣鼓』，又言『鞀』，則鞀非縣鼓明矣。《毛傳》云：縣鼓，周鼓；鞀，鞀鼓也。亦不以爲一物也。蓋《詩》之應即此經之應，應，《詩》之田即此經之朔，朔，《詩》之縣鼓即此經之建鼓。鞀即鼗也。以田爲即朔，朔者，田與陳同音，陳與引同訓。先擊朔，有引導之義焉。陳氏以《詩》之田，爲即此經之建鼓，而以縣鼓爲此經之鼗，盡翻前儒舊說，別立新義，未見其有當也。且此經云『倚于頌磬』，以其非縣，故云『倚』。若如陳說，則經之倚字尤難通矣。引《王制》者，證鼗鼓所以爲節樂之器也。」○張氏惠言曰：「經云『樂人宿縣』，則左右正久在縣北矣。僕人、庶子、內小臣皆內臣宿衛，當先君入，故不見其位。射人、小臣恒在君左右，君入則隨而入，君至阼階，射人告具。大射正當先就饌南之位，俟公升。射人亦當退中庭位也。小臣正無常位，恒在階前向君。其小臣師初入，亦隨小臣正，至納公、卿、大夫後，乃就東堂下位，故經特著之。膳宰官是時已在堂東，主人亦是膳宰之長，宜先在其位。」

右射前一日設樂縣

厥明，司宮尊于東楹之西，兩方壺，膳尊兩甌在南，有豐。罍用錫若絺，綴諸箭。蓋罍加勺，又反之。皆玄尊。酒在北。膳尊，君尊也。後陳之，尊之也。豐，以承尊也。說者以爲若井鹿盧，其爲字從豆曲聲，近似豆，大而卑矣。罍，覆尊巾也。①錫，細布也。絺，細葛也。箭，籥也。爲罍，蓋卷辟，綴於籥，橫之也。又反之，爲覆勺也。皆玄尊，二者皆有玄酒之尊，重本也。酒在北，尊統於君，南爲上也。惟君面尊，言專惠也。今文「錫」或作「絺」，「絺」或作「綌」。古文「箭」作「晉」。【疏】正義曰：《校勘記》曰：「罍用錫若絺」，陸氏曰：「絺，劉作綌，音卻。」盧氏文弼疑「綌」爲「綌」誤。②注「爲罍，蓋卷辟，綴于籥」，宋本《釋文》作「罍」。○張氏爾岐曰：「諸侯將射，先行燕禮，故此下皆陳燕具。」蔡氏德晉曰：「此設尊也。厥明，設樂之明日，射之朝也。」注云「膳尊，君尊也。後陳之，尊之也」者，兩方

①「巾」，原作「中」，今據《儀禮注疏》改。

②「綌」下，原衍「日」字，今據《十三經註疏校勘記》刪。

壺爲臣尊，故知膳尊爲君尊也。韋氏協夢曰：「設器之法，尊者先設，卑者次之。此臣尊，設在君尊之前者，先尊方壺于東楹之西以爲節，乃設膳尊與燕禮同。注謂「後陳之，尊之」，非是。」云「豐，以承尊也。說者以爲若井鹿盧，其爲字從豆幽聲，近似豆，大而卑矣」者，賈疏云：「此謂上形下聲之字，年和穀，豆多有，故從豆爲形也。幽者，承尊之器，象形也。是以豐年之字，「幽」下著「豆」，今諸經皆以承尊爵之幽，不用本字之幽，而用豐年之「豐」，故鄭還依「豐」字解之。」胡氏承珙曰：「幽不成字，《儀禮》多古文，當本作「豐」。戴侗《六書故》引唐本《說文》：「豐，從豆，從山幷聲。」蜀本云：「丰聲。從山，取其高大。古文豐不從山，《汗簡》亦只作「豐」。蓋「幷」即「丰」字。《說文》「丰」訓艸盛。黃公紹《韻會》云：《說文》本作「幷」。據此，知古文豐字，本從幷，亦兼取盛義，許、鄭並同。但鄭以古文豐不從山，故但云幷聲。傳寫誤加「山」作「幽」。賈疏遂謂別有「幽」字，象形，爲承尊之器，以此「豐」爲「豐年」字。又以「穀，豆多有」增成其義，皆臆說也。」胡氏肇昕曰：「賈疏說中「豐」字，其謬不一而足。近儒解此經鄭注者，亦人各一說。段氏玉裁謂注「聲」是衍字。案：以《鄉射》鄭注校之，疑注「聲」當是「形」之譌也。考《鄉射》注「豐形蓋似豆而卑」，此注云「說

者以爲若井鹿盧，其爲字從豆幽聲，近似豆，大而卑矣」。「聲近似豆大而卑」，當作「形近似豆大而卑」，即《鄉射》注之「豐形蓋似豆而卑」也。從《說文》：「豐，豆之豐滿也。从豆，象形。」从豆者，其義象形，謂幽象豐形也。《說文》之例，成字者則曰从某，不成字者則譬之曰象形。此象形之字，非諧聲之字。《六書故》所引唐本、蜀本，不足爲據。注云「若井鹿盧」，正謂幽之形也，惟其若井鹿盧，故其字從豆幽，而其形則近似豆大而卑矣。校者疑注謂豐从豆幽聲，遂改「形」爲「聲」，而不知幽不成字，且未即《鄉射》注參考之也。古文作「豐」，即「豐」之省。古瓦作「幷」，又「豐」之省，要皆非諧聲之字也。」云「錫，細布也」者，《喪服·記》曰「錫者十五升，抽其半，無事其縷，有事其布曰錫」，是錫爲細布也。云「箭，篠也。爲幕，蓋卷辟，綴於篠，橫之也。又反之爲覆勺也」者，敖氏曰：「幕橫綴於箭，而從蓋於輿，勺亦從加於幕上，西枋，與箭而于，乃以餘幕反蓋於勺，亦如塵之著於勺也。蓋以君飲此酒，故謹重之如是。」張氏爾岐曰：「綴諸箭者，綴錫若絺於箭而張之，以覆也。蓋幕加勺，又反之，此覆尊之法。勺加幕上，復撩幕之垂者以覆

① 「於」下，原衍「瓦」字，今據《續清經解》本刪。

勺。盛氏曰：「郝氏以『綴諸箭蓋』爲句，非。當從張氏。」云「酒在北，尊統於君，^①南爲上也」者，敖氏曰：「《燕禮》曰：『尊南上。』」此云：「酒在北。」文互見爾。」云「今文『錫』或作『錫』，『絺』或作『綌』」。古文「箭」作「晉」者，「錫」見《燕禮》。胡氏承珙曰：「葛之精者曰絺，麤者曰綌。」《燕禮》：「冪或用綌。」敖氏曰：見其貶於大射，鄭不從今文作「綌」，殆爲此歟？《釋文》：「絺，劉作綌，音卻。」盧氏文弼曰：「綌」字無考，云「音卻」，疑即「綌」字之譌。承珙案：劉本蓋仍從今文作「綌」，非是。「古文箭作晉」者，^②《周禮·職方氏》「其利金錫竹箭」，注「箭，篠也。故書箭爲晉」。^③杜子春曰：晉，當爲箭。《書》亦或爲箭，段氏玉裁曰：「《吳越春秋》：晉竹十度。晉竹正謂箭竹，所謂會稽竹箭也。箭，矢竹也，本小竹之名。中矢，因名矢爲箭。《說文·木部》曰：櫜，木也。從木晉聲。《書》曰：竹箭如櫜。案：此當云《周禮》曰：竹櫜，讀如箭。今本傳寫譌亂也。許所見《周禮》故書字从木。」惠氏棟曰：「古讀晉如箭，故摺紳亦作薦紳。」^④承珙案：《周禮·典瑞》：「王晉大圭。」鄭司農云：「晉，讀如薦申之薦。」尊士旅食于西鑄之南，北面，兩圓壺。旅，衆也。士衆食未得正祿，謂庶人在官者。圓壺，變於方也。賤無玄酒。【疏】正義

曰：敖氏曰：「鑄南，言東西節也。鑄南有鼓，此不以鼓爲節者，鼓高而鑄下，圓壺在地，取節於其下者，宜也。燕禮旅食與其尊皆在門西，^⑤此旅食者在西方之南，於燕位爲少西，則此尊之南北，亦宜近之。」郝氏曰：「士旅食者之尊，燕禮設於門西，旅食者立門西也。大射較鄉射侯道遠，逼近門，旅食者皆立堂下土南，避射也。故尊改設堂下西鑄之南。」盛氏曰：「鑄南有鼓，此尊又在鼓南。^⑥舍鼓而取節於鑄者，^⑦以鼓之在西者有二，故以鑄爲識也。敖云『取節於其下』，非。」又尊于大侯之乏東北，兩壺獻酒。爲隸僕人、巾車、糝侯豢侯之獲者。獻，讀爲沙。沙酒濁，特沛之，必摩沙者也。兩壺皆沙酒。《郊特牲》曰：「汁沙沯於醖酒。」^⑧服不之尊，俟時而陳於南，統於

- ①「統」，原作「綴」，據上注文改。
- ②「古」，原作「今」，今據《儀禮古今文疏義》改。
- ③「爲」，原作「如」，今據《儀禮古今文疏義》改。
- ④「亦」，原作「一」，今據《儀禮古今文疏義》改。
- ⑤「食」，原脫，今據《儀禮集說》補。
- ⑥「尊」，原脫，今據《儀禮集編》補。
- ⑦「舍」，原作「金」，今據《續清經解》本改。
- ⑧「沙」，原作「酒」，據《續清經解》本改。下「汁沙」字同。

侯，皆東面。【疏】正義曰：注云「獻，讀爲沙」。沙酒濁，特沛之，必摩沙者也。兩壺皆沙酒。《郊特牲》曰：「汁沙浼於醖酒」者，胡氏承珙曰：「《郊特牲》注云：『謂沛拒鬯以醖酒也。獻，讀當爲沙，齊語聲之誤也。拒鬯者，中有糗鬱，和以盎齊，摩沙沛之，出其香汁，因謂之汁沙。』」鄭蓋以《記》義定《周》、《儀》二禮，故於《周禮·司尊彝》「鬱齊獻酌」注云：「獻，讀爲摩沙之沙，齊語聲之誤也。糗鬱和拒鬯，以醖酒摩沙，沛之，出其香汁也。」與此經注義略同。《明堂位》「獻尊」，鄭亦讀爲「娑」，古音元，寒與歌、戈兩部多通轉，如「司尊彝獻尊」，鄭司農讀爲犧；「獻酌」，鄭司農讀爲儀，犧本讀如莎，儀本讀如俄也。又《詩·東門之枌》「原」與「婆」韻，《谷風》「悲」與「萎」韻，亦其聲類也。」張氏爾岐曰：「注引《郊特牲》以證沙酒之義。浼，沛也。沛沙酒者，和以醖酒，而摩沙之，以出鬱鬯之汁也。以其祭侯，故用鬱鬯。」云「服不之尊，侯時而陳於南，統於侯，皆東面」者，張氏曰：「設服不之尊，在飲不勝者以後，故注云「侯時」，明此尊不爲服不氏設也。」^①案：此節後儒多不從注說。敖氏曰：「此尊侯時而設，經蓋因上禮而連言之耳。獻酒，獻三侯之獲者，及巾車、僕隸人之酒也。於此獨云「獻」者，^②嫌其爲祭侯，且見不他用也。壺亦圜壺。」盛氏

曰：「下經云司空尊侯於服不之東北，即此尊也。是時未設而先言之者，從其類而備舉之，以見尊卑之差也。如諸公、卿、大夫之席，亦皆未設而先言之，是其徵矣。獻酒之解，亦當從敖說。舊以爲鬱鬯，非也。鬱鬯之酒，天子以爲摯，諸侯未賜圭瓚，不敢爲，豈宜以獻僕隸下人乎？即云祭侯，亦非所宜也。且酌鬱齊，以彝不以尊。」方氏苞、蔡氏德晉、韋氏協夢說皆略同。吳氏廷華曰：「注以「獻」爲「沙」，不確。蓋鬱鬯止嚼啐而不飲，下既云「卒爵」，其非鬱鬯可知。則「獻」當如字，敖說是也。」又云：「下云：司宮尊侯于服不之東北，兩獻酒，東面南上，司馬正洗散，^③實爵，獻服不。又云：司馬師獻僕隸人與巾車獲者，皆如大侯之禮。鄭以司宮尊爲獻服不之尊，故以此爲獻僕隸人等之尊，又謂服不之尊待時而陳，蓋經兩言「尊」，其文似複，故爲解之如此。不知經明言「尊于大侯之乏」，服不爲大侯獲者，居大侯之乏，則焉有設尊於此，反舍服不而言隸僕之理？若如下疏謂不必君射，故不於初設之，是以君若不

①「明」，原作「時」，今據《續清經解》本改。

②「云」，原作「三」，今據《續清經解》本改。

③「正」，原脫，今據《儀禮疑義》補。

射，則無服不之尊，故此注不言服不耳。不知君苟不射，不但無服不之尊，亦且無大侯之乏，此經文義，作何著落？敖氏謂此尊特連類及之，尚未設尊，至獻服不時始設耳。其言是也。」褚氏寅亮曰：「細案：乏東北止有二尊，無四尊也。敖氏說可從。祭侯而神之，不妨用鬱鬯。『獻酒』『獻』字，依鄭讀爲是。」設洗于阼階東南，疊水在東，筐在洗西，南陳。設膳筐在其北，西面。或言南陳，或言西面，異其文也。【疏】正義曰：注云「異其文」者，以互文見義也。蔡氏曰：「此設洗筐也。」又設洗于獲者之尊西北，水在洗北，筐在南，東陳。亦統於侯也。無爵，因服不也。有筐，爲奠虛爵也。服不之洗，亦俟時而陳於其南。【疏】正義曰：敖氏曰：「此云『又設洗』，亦因上禮而連言之，其實未設也。獲者即服不之屬。惟云『水』，是不用疊也。君禮而水不用疊，以所獻者賤故爾。」郝氏曰：膳筐西向，以君席在東也；獻獲者之洗，水、筐皆東向，以獲者在西也。張氏爾岐曰：「此筐中不設爵，將因獻服不之爵而用之也。」盛氏曰：「獲者之尊，即設於大侯之乏東北者，下經云『設洗于尊西北』，即謂此洗也。筐中所實者，一散也，亦未設而先言之。注以此與

服不之洗分爲二，而張氏從之。非。」高氏愈曰：「尊兩壺于侯東，爲獻獲者故也。復爲設洗者，洗以致潔，雖於獲者賤人亦不敢略也。」吳氏廷華曰：「爵在筐，言筐則有爵可知。注以爲奠虛爵而設，非也。」小臣設公席于阼階上，西鄉。司宮設賓席于戶西，南面，有加席。卿席賓東，東上。小卿賓西，東上，大夫繼而東上。若有東面者，則北上。席工于西階之東，東上。諸公阼階西，北面，東上。惟賓及公席布之也，其餘樹之於位後耳。小卿，命於其君者也。席於賓西，射禮辨貴賤也。諸公，大國有孤卿一人，與君論道，亦不典職如公矣。【疏】正義曰：蔡氏曰：「此設席也。」敖氏曰：「賓有加席，亦蒲筵加莞席也。公不言設加席，如燕禮可知，或亦蒙有加席之文也。」射禮重於燕，故賓有加席。」方氏苞曰：「大射之賓，大夫也。以爲賓而加席，②與卿同。猶燕主人，③士也，以爲獻主，

①「或」，原脫，今據《儀禮集說》補。

②「而」下，《儀禮析疑》有「有」字。

③「燕」下，《儀禮析疑》有「之」字。

而與大夫偕薦也。卿之重席陳而不設，以卿終辭，且諸公無加席，而卿之加席久設於其位，^①非所宜也。」^②「若有東面，^③則北上」者，敖氏曰：「東面者在西序下，少北。此言若有者，國有大小，則大夫亦有衆寡也。方氏曰：『惟大射卿、大夫在國者無不與，小卿位於賓西，五大夫繼之，戶西不足以容其席位，故有東面者。燕則無此文。衰老及有事於國中者，可不與也。』」注云「惟賓及公席布之也，其餘樹之於位後耳」者，敖氏曰：「此惟公席及賓席布之，其餘猶在房，俟時乃設。言之於此者，亦因設公席、賓席而遂及之耳。」韋氏協夢曰：「《燕禮》『設卿席』注云：『席自房來。』此云：『樹於位後。』彼燕禮輕，故俟臨時乃設，^④大射重於燕，故先設卿位，而樹席於其後以爲識也。不即設之者，貶於公與賓也。」焦氏以恕曰：「席自房來，原其始也。樹於位後，記其中也。俟時乃設，要其終也。故兩說皆通。」云「小卿，命於其君者也」者，《釋官》曰：「案：《王制》云：『次國之上卿，位當大國之中，中當其下，下當其上大夫。小國之上卿，位當大國之下卿，中當其上大夫，下當其下大夫。』諸侯三卿，分爲上、中、下，執政一人爲上卿，亦曰冢卿；其次爲小卿，亦曰介卿。《左傳》：『冢卿無路，介卿以葬。』是也。然三卿下五大夫亦謂之小卿。《公羊傳》

云：「古者上卿、下卿。」何注云：「古者，諸侯有司徒、司空，上卿各一，下卿各二。司馬事省，上、下卿各一。」故崔氏云：司徒下置小卿二人：一是小宰，一是小司徒。司空下置二小卿：一是小司寇，一是小司空也。司馬下惟置一小卿，小司馬也。案：經上云「卿席賓東，東上」，則卿非一人；此云「小卿賓西，東上」，則小卿亦非一人。若以小卿爲命於其君之卿，則諸侯卿止三人，經不當皆云「東上」，然則小卿即謂三卿下五大夫明矣。五大夫爲卿之副貳，故謂之小卿。經又云「大夫繼而東上」。若有東面者，^⑤則北上」者，諸侯大夫不止五人，惟三卿下五大夫謂之小卿，其餘大夫不稱小卿。故云「大夫繼而東上」。通言之，小卿亦曰大夫也。下文主人獻卿，司宮兼卷重席，設於賓左，東上。獻大夫繼賓以西，^⑥東上。若有東面者，則北上。更不見小卿之文。又獻大夫直云「繼賓以西，東上」，不云繼小卿，是

① 「久」，原作「文」，今據《儀禮析疑》改。
 ② 「宜」，原作「負」，今據《儀禮析疑》改。
 ③ 「面」下，據經文當有「者」字。
 ④ 「故俟」，原脫，今據《儀禮蠡測》補。
 ⑤ 「者」，原脫，今據《儀禮釋官》補。
 ⑥ 「獻」，原作「繼」，今據《儀禮釋官》改。

右射日陳燕具席位

大夫即兼小卿言之，足證此小卿爲大夫矣。注非是。①諸公說詳《鄉飲酒禮》。褚氏寅亮曰：「《燕禮》至獻卿後，始云『司宮兼卷重席，設于賓左』。而于設公賓席下，無設卿、大夫席文，故彼注云『席自房來』。此禮於設賓席後，即繼以『卿席賓東』云云。至獻卿後，復云『司宮兼卷重席，設于賓左』，明此時席雖未設，已先定其位，故注云『樹之於位後』。見兩禮微異也。敖氏俟時而設之說，存參。有加席，專指賓，不兼公，蓋對《燕禮》賓無加席而言。若公與己臣燕，而有加席不待言矣。注以命於其君者爲小卿，所以別於天子命卿也。《集說》言中大夫爲小卿，非是。卿可通稱大夫，大夫不得稱卿。經文大夫繼而東上，蒙小卿在賓西，文極明，不必於「繼而」下添「西」字。」官饌。百官各饌其所當共之物。【疏】正義曰：敖氏曰：「官各饌之於其所也。《燕禮》曰：膳宰具官饌於寢東。與此互見其先後之節耳。」盛氏曰：「此亦膳宰總具之於堂東，而官乃分饌之於其所也。所饌之物見《燕禮》注。」吳氏廷華曰：「此注以百官言之，賈疏謂非獨宰，可知《燕禮》所謂官者，亦是百官。此經官饌，亦是膳宰具之，故褚氏寅亮曰：「射宮無寢，故闕其饌所而不言。」②羹定。烹肉熟也。《射義》曰：「諸侯之射也，必先行燕禮。」燕禮，牲用狗。

射人告具于公。公升，即位于席，西鄉。小臣師納諸公、卿、大夫，諸公、卿、大夫皆入門右，北面東上。士西方，東面北上。大史在干侯之東北，北面東上。士旅食者在士南，北面東上。小臣師從者在東堂下，南面西上。大史在干侯東北，士旅食者在士南，爲有侯，故人庭深也。小臣師，正之佐也。正相君，出入君之大命。【疏】正義曰：《校勘記》曰：「大夫在干侯之東」，此「夫」字，《釋文》、《唐石經》、徐本、《通解》、楊俱作「史」。《石經考文提要》云：「《釋文》大史，音泰，足以證夫字之誤。」注「大夫在干侯東北」，「夫」字，徐本、《通解》、楊氏俱作「史」，是也。與單疏標目合。「故人庭深也」，徐本、《通解》、楊氏俱無「故」字，與疏合。○張氏爾岐曰：「自此至「南面反奠于其所，北面立」，皆將射先燕之事。公

①「注」下，《儀禮釋官》有「疏」字。

②「闕」，原作「關」，據《續清經解》本改。

命賓、納賓以來，主人獻賓，賓酢主人，主人獻公，主人受公酢，主人酬賓，二人舉觶，公取觶酬賓，遂旅酬，主人獻卿，二人再舉觶，公爲卿舉旅酬，主人獻大夫，工人奏樂，凡十二節，皆與燕禮同。容有小異，主於射故也。」注云「大史在干侯東北，^①士旅食者在士南，爲有侯，故人庭深也」者，敖氏曰：「大史在干侯東北，爲有事，故深入，東上。小史在西也，不著祝位者，與史異處，故略之，其位自在門東。士旅食者在士南者，爲辟射也。門西之位，其東西稍近於侯。」盛氏曰：「大夫與士旅食者之位，皆與燕禮異者，辟射也。大史釋獲，故移於干侯之東北，近其事也。云「東上」，謂與祝序也。不言祝者，以其無事略之也。敖云祝位自在門東，非。士旅食者移於士南，從其類也。觀此則士旅食者，即《周禮》旅下士，益可見矣。^②云「小臣師，正之佐，正相君，出入君之大命」者，賈疏云：「下有小臣正，正，長也。故以師爲佐。小臣正，小臣中尊如天子大僕，故引《大僕職》解之也。」《釋官》曰：「注疏謂諸侯無大僕，以小臣兼之。《周禮·大僕職》曰：「王燕飲則相其法，王射則贊弓矢。」此《燕》、《射》二篇不見有大僕之官，皆小臣掌其事，則注疏之說信矣。《周禮》小臣下有祭僕，其職云：「大喪復于小廟。」《喪大記》：君夫人之喪，小臣復。則諸侯小臣又

兼祭僕之職矣。諸侯無大僕，而《左傳》云：「韓獻子將新中軍，且爲僕大夫。」杜注以爲大僕，則東遷後所添設，不如古也。《周禮·大僕》：「下大夫二人，小臣上士四人。」諸侯以小臣兼大僕，則亦上士爲之也。《士喪禮》：君視斂，小臣二人執戈先，二人後。《喪大記》：君之喪，浴，小臣四人抗衾。然則諸侯小臣亦四人也。」又云：「燕禮小臣師無事，故云「小臣師一人，在東堂下」。此篇小臣師納諸公、卿、大夫，故惟小臣師從者在東堂下。據《士喪禮》小臣雖有四人，以《燕禮》及此篇考之，正與師止各一人也。《周禮·司士職》曰：「大僕從者在路門之左。」注云：「大僕從者，小臣、祭僕、御僕、隸僕。」然則此小臣師從者，蓋亦僕人之屬與？」胡氏肇昕曰：「盛氏謂小臣師及其從者皆立于東堂下，非是。」褚氏寅亮曰：「燕、射朝服，記言之，《大射》經無文，據天子大射與享先公同鷩冕，則五等諸侯亦各服其祭宗廟之冕服也。又《司士職》有大僕從者，其屬也。此從者，小臣之屬也。」公降，立于阼階之東南，南鄉。小臣師詔揖諸公、卿、大夫，諸公、卿、

① 「干」，原脫，今據《儀禮注疏》補。

② 「益」，原作「蓋」，今據《儀禮集編》改。

大夫西面北上；揖大夫，大夫皆少進。詔，告

也。變「爾」言「揖」，亦以其入庭深也。上言「大夫」，誤衍

耳。【疏】正義曰：注云「變「爾」言「揖」，亦以其入庭深也」

者，以《燕禮》言「爾卿」、「爾大夫」，此變「爾」言「揖」，以其

入庭深，揖之使近也。云「上言「大夫」，誤衍耳」者，以下云

「揖大夫」，則上止揖公卿，故《燕禮》亦上止言「爾卿」，無

「大夫」。以彼決此，知上文「公卿」下，兩誤衍「大夫」字也。

郝氏曰：「言「揖諸公、卿、大夫」，又言「揖大夫」者，卿爲上

大夫也。」胡氏肇昕曰：「卿爲上大夫，經既云「公、卿」，^①

不得復云「大夫」，蓋卿可稱上大夫，不得連稱卿大夫也。

郝說非是。」大射正擯。大射正，射人之長。【疏】正義

曰：韋氏協夢曰：「大射重於燕。燕禮用射人擯，故此用

射人之長。大射正爲射人之長，則燕禮之射人，其大射正

之佐與？」《釋官》曰：「大射正，亦射人也。大射正對小射

正爲長，不對射人爲長。賈疏謂大射正對射人爲長，失

之。」擯者請賓，公曰：「命某爲賓。」某，大夫名。

擯者命賓，賓少進，禮辭。命賓者東面，南顧辭，辭

以不敏。反命，以賓之辭告於君。又命之。賓再

拜稽首，受命。又，復。擯者反命。賓出，立

于門外，北面。【疏】正義曰：《燕禮》云「東面」，此「北

面」者，盛氏曰：大射辨尊卑，故賓于門外執臣禮也。公

揖卿、大夫，升就席。小臣自阼階下北面，

請執冪者與羞膳者。請，可使執君兩甌之冪，及羞

脯醢庶羞於君者。方罍壺獻無冪。【疏】正義曰：吳氏延

華云：「脯醢是薦而非羞。」乃命執冪者。執冪者

升自西階，立于尊南，北面東上。命者於西階

前，以公命命之。東上，執玄尊之冪爲上。羞膳者從而東

由堂東，升自北階，立於房中，西面南上。不言命者，不升

堂，略之。膳宰請羞于諸公卿者。膳宰請者異於

君也。【疏】正義曰：盛氏云：「下經主人獻公之時云「宰

胥薦脯醢」，則羞膳者非士矣。執冪及羞於諸公卿者，經無

明文，以類求之，蓋亦宰胥也。是與燕禮請雖同，而所命者

則異。」擯者納賓，賓及庭；公降一等揖賓，賓

辟；及，至也。辟，逡遁不敢當盛。【疏】正義曰：敖氏

曰：「凡受公禮者皆辟，經不盡見之也。」方氏苞曰：「公之

① 「公」，原作「云」，今據《儀禮正義正義正誤》改。

降揖同，而燕則賓不辟，何也？燕主溥惠於羣臣，而立一人以爲賓，禮猶輕。大射擇士以祭，賓有加席，與卿同升，奏《肆夏》。^①與異國之賓同。奠爵、執爵興而樂闋，且上擬於君，初接見時退辟，以見其不敢當禮也。」胡氏肇昕曰：「案：大射之禮重於燕，而燕射之賓皆臣也。臣受公禮，未有不辟者。燕不言賓辟，可知也。經不著賓辟於燕，而著於射者，大射之賓禮，隆於燕禮，愈盛而賓愈肅。不敢以客禮自處，大射如是，則燕更可知也。公升，即席。以賓將與主人爲禮，不參之。」

右命賓納賓

奏《肆夏》。《肆夏》，樂章名，今亡。呂叔玉云：

「《肆夏》，《時邁》也。《時邁》者，大平巡守祭山川之樂歌，其詩曰：「明昭有周，式序在位。」又曰：「我求懿德，肆于時夏。」奏此以延賓，其著宣王德勸賢與？」《周禮》曰：「賓出入奏《肆夏》。」【疏】正義曰：注云《肆夏》，樂章名，今亡者，賈疏云：「《周禮》鍾師云：「以鍾鼓奏《九夏》。」杜子春引呂叔玉以爲《肆夏》，《時邁》也；《繁遏》，《執競》也；《渠》，《思文》也。後鄭云：「以《文王》，《鹿鳴》言之，

則《九夏》皆詩篇名，《頌》之族類也。此歌之大者，載在樂章，樂崩亦從而亡，是以《頌》不能具。」鄭彼注足破呂叔玉。此注亦云：「《肆夏》，樂章名，今亡。」又引呂叔玉於下者，以無正文，叔玉或爲一義，故兩解之。」胡氏肇昕曰：「《時邁》肆于《時夏》鄭箋云：「樂歌大者稱夏。」《思文》陳常于《時夏》箋同。服子慎注《左傳》云：「《車鄰》，《駟鐵》，《小戎》之歌，與諸夏同風，故曰夏聲。」是樂章名夏之證，故《周禮》有《九夏》也。」引呂叔玉者，解《時邁》所以用於延賓之意。《詩序》云：「《時邁》，巡守告祭柴望也。」故以爲大平巡守祭山川之樂歌。敖氏曰：「《周官》言《九夏》，次曰《肆夏》，《春秋》言《肆夏》之三曰：《肆夏》，《樊遏》，《渠》。然則每夏之中各有篇數，如《肆夏》之類，乃其首篇名耳。穆叔聘于晉，晉侯享之，金奏《肆夏》之三。穆叔曰：「三《夏》，^②天子所以享元侯也，使臣不敢與聞。」此惟奏《肆夏》而不及《樊遏》，《渠》，其辟天子之享禮與？」胡氏肇昕曰：「敖說是也。《國語》云：「金奏《肆夏》，《繁遏》，《渠》。」是《肆夏》，《樊遏》，《渠》合爲《肆夏》之三，所謂「三

① 「肆」，原作「陔」，今據《儀禮析疑》改。
② 「三」，原作「肆」，今據《儀禮集說》改。

夏」是也。賓出入《奏肆》夏而穆叔譏之者，孔氏廣森《經學厄言》謂諸侯惟用《肆夏》一章，天子享元侯乃得備《昭夏》、《納夏》，非謂僭《肆夏》，謂僭《肆夏》之三耳。本合奏《肆夏》，今并奏《樊遏》、《渠》，猶本合歌《鹿鳴》，今并加歌《文王》，穆叔故從而譏之也。」盛氏曰：「鄭引《周禮》易「尸」爲「賓」，非。天子宗廟之中，尸出入以鍾鼓奏之，《詩》云「鼓鍾送尸」是也。《周禮》謂之「金奏」，此及《燕禮》但云「奏《肆夏》，不聞以金，蓋即賓出鼓《陔》之意，明與天子異矣。傳言晉侯金奏《肆夏》之三，是僭天子也。」胡氏肇昕曰：

「此說非也。天子與諸侯異者，在於《肆夏》之三與《肆夏》耳，不在於金奏也。《左傳》言「金奏《肆夏》，《周禮》言「以鍾鼓奏《九夏》，則奏《肆夏》者必以金奏之可知也。《禮經》於賓出入言奏《肆夏》，故鄭引《周禮》易「尸」爲「賓」，以此禮亦同於尸出入也。賈疏曰：「《燕禮》·記云：若以樂納賓，則賓及庭奏《肆夏》」。鄭云「卿、大夫有王事之勞，則奏此樂焉」，此亦同彼注也，若臣無王事之勞，則如常燕，無以樂納賓法也。」盛氏曰：「燕禮輕，^①故不以樂納賓，惟與四方之賓燕則奏之。大射禮重，故雖以己之臣子爲賓，而納之必以樂，豈問其有王事之勞與否哉？疏誤矣。」方氏苞曰：「燕以示慈惠，^②宜略於儀節，故納賓、公即席及受

獻，皆不用樂。大射以辨尊卑、別賢能，宜詳於度數，故公即席、受獻皆以樂，尊尊也；納賓以樂，賢賢也。大夫以下無胥，而獲者釋獲有胥，報勤也。《肆夏》之詩曰：明昭有周，式序在位。又曰：我求懿德，肆于《時夏》。與大射辨尊卑、別賢能之義相應，燕而擯用《肆夏》以納賓，其必臣有勳勞、功伐而加隆焉，以厲羣臣與？」案：此說與疏合。

賓升自西階。主人從之，賓右北面至再拜，賓荅再拜。主人，宰夫也，又掌賓客之獻飲食。君於

臣，雖爲賓，不親獻，以其莫敢抗禮。【疏】正義曰：韋氏協

夢曰：主人從之，從之升西階也。《燕禮》言「主人亦升自西階」，與此文互備也。方氏苞曰：「主人從賓之後，既升

堂，則北面而立，俟賓就席，然後拜其至。故不曰拜至，而

曰「至再拜」也。」注云「主人，宰夫也」者，《釋官》曰：

「主人，膳宰也。注誤。辨見《燕禮》。」主人降洗，洗

南，西北面。賓將從降鄉之，不於洗北，辟正主。【疏】

正義曰：注云「不於洗北，辟正主」者，以《鄉飲酒》、《鄉射》

① 「輕」，原作「經」，今據《續清經解》本改。

② 「示」，原作「云」，今據《儀禮析疑》改。

主人降洗，洗北南面，是正主。此不於洗北，是辟正主也。

賓降階西，東面。主人辭降，賓對。對，荅。

主人北面盥，坐取觚，洗。賓少進，辭洗。

主人坐奠觚于筐，興對。賓反位。賓少進者，

所辭異，宜違其位也。獻不用爵，辟正主。主人卒洗。

賓揖，乃升。賓每先升，揖之。【疏】正義曰：《校勘記》

曰：「乃升」，唐石經、徐本、《通解》、敖氏俱無「乃」字。注

「揖之」，徐本、《通解》俱作「尊也」。主人升，賓拜洗。

主人賓右奠觚荅拜，降盥。賓降，主人辭

降，賓對。卒盥，賓揖升。主人升，坐取觚。

取觚，將就瓦甌酌膳。執冪者舉冪，主人酌膳，執

冪者蓋冪。酌者加勺，又反之。反之，覆勺。

【疏】正義曰：敖氏曰：「舉冪之儀，當與蓋冪者相類。蓋

主人取觚而適尊所，執冪者則進而發其冪之反者。主人取

勺，執冪者乃舉冪也。又反之，亦執冪者也。」筵前獻

賓。賓西階上拜，受爵于筵前，反位。主人

賓右拜送爵。賓既拜，於筵前受爵，退復位。【疏】正

義曰：注云「賓既拜，於筵前受爵」者，以經文「受爵於筵前」爲倒句法也。《燕禮》曰：「筵前受爵。」宰胥薦脯

醢。宰胥，宰官之吏也。不使膳宰薦，不主於飲酒，變於

燕。【疏】正義曰：敖氏曰：「宰胥，宰之屬也。薦賓者與

公同，亦盛之。」盛氏曰：「宰胥，膳宰之吏也。《周禮·序

官》膳宰下云「胥十有二人」是已。《燕禮》：膳宰薦賓，胥

薦主人。今薦賓乃使胥者，主於射而略於燕也。」韋氏協夢

曰：「觀下設折俎亦不以膳宰，而以庶子，則宰胥、庶子特

攝膳宰之事耳。」《釋官》曰：「下獻公亦宰胥薦脯醢，不使

士薦，亦爲變於燕。」賓升筵，庶子設折俎。庶子，司

馬之屬，掌正六牲之體者也。《鄉射·記》曰：「賓俎，脊、

脅、肩、肺。」不使膳宰設俎，爲射變於燕。【疏】正義曰：

「庶子，司馬之屬，掌正六牲之體者也」者，《周禮·諸子職》

文。《釋官》曰：「諸侯庶子與諸子同。」云「不使膳宰設俎，

爲射變於燕」者，燕禮設賓俎亦膳宰，此用庶子，變於燕也。

賓坐，左執觚，右祭脯醢。奠爵于薦右；興

取肺，坐絕祭，嚼之；興加于俎，坐挽手，執

爵，遂祭酒，興；席末坐啐酒，降席；坐奠

爵，拜，告旨，執爵興。主人荅拜。降席，席西

也。旨，美也。樂闋。闋，止也。樂止者，尊賓之禮盛於上也。【疏】正義曰：張氏爾岐曰：「惟盛得有樂也。《燕禮·記》云：『賓及庭而奏《肆夏》。』^①賓拜酒，主人荅拜而樂闋。」亦謂啐酒、告旨時。此燕已臣子法。《郊特牲》云：「賓人大門而奏《肆夏》，卒爵而樂闋。彼燕朝聘之賓法也。」吳氏廷華曰：「盛於上，謂堂上飲酒之禮盛，不以堂下之樂爲盛，故樂闋也。」賓西階上北面坐，卒爵，興；坐奠爵，拜，執爵興。主人荅拜。【疏】正義曰：韋氏協夢曰：「凡奠爵拜者皆執爵興，然後荅拜者荅拜之。經或不言執爵，可以例見之也。」

右主人獻賓

賓以虛爵降。既卒爵，將酢也。主人降。

賓洗南西北面坐奠觚，少進，辭降。主人西階西東面，少進，對。賓坐取觚，奠于筐下，盥洗。筐下，筐南。【疏】正義曰：敖氏曰：「西階西，非主人之正位，以從降暫立於此耳。主人既對，不言反位，亦文省。」方氏苞曰：「禮與燕同，而於賓增『北面』，於主人增

『西階』，然後賓主所立之位愈明。」主人辭洗。賓坐奠觚于筐，興對，卒洗；及階，揖升。主人升，拜洗如賓禮。賓降盥，主人降。賓辭降，卒盥，揖升。酌膳、執冪如初，以酢主人于西階上。主人北面拜受爵。賓主人之左拜送爵。賓南面授爵，乃於左拜。凡授爵，鄉所受者。主人坐祭，不啐酒，辟正主也。未薦者，臣也。不拜酒，主人之義。《燕禮》曰：「不拜酒，不告旨。」【疏】正義曰：此不云「不告旨」者，不拜酒，則不告旨矣。遂卒爵，興；坐奠爵，拜，執爵興。賓荅拜。主人不崇酒，以虛爵降，奠于筐。不崇酒，辟正君也。崇，充也。謂謝酒惡相充實。【疏】正義曰：注「正君」，《校勘記》曰：「君」，徐本作「主」。賓降，立于西階西，東面。既受獻矣，不敢安盛。擯者以命升賓。賓升，立于西序，東面。命，公命也。東西牆謂之序。

① 「肆」，原作「陔」，今據《儀禮鄭注句讀》改。

【疏】正義曰：方氏苞曰：「《燕禮》射人案節而升賓。不復請於君也。此曰『以命』，蓋君重其禮而特命之。」胡氏肇昕曰：「《燕禮》注引此經，則鄭於《燕禮》亦謂以命升賓也，特文省耳。方說非。」

右賓酢主人

主人盥，洗象觚，升酌膳，東北面獻于公。象觚，觚有象骨飾也。取象觚東面，不言實之，變於燕。

【疏】正義曰：注「觚有象骨飾也」，《校勘記》曰：

「『飾』下，徐本、《通解》俱有『者』字。」公拜受爵，乃奏

《肆夏》。言乃者，其節異於賓。【疏】正義曰：注云「其

節異於賓」者，賓及庭奏，君受爵乃奏也。主人降自西

階，阼階下北面拜送爵。宰胥薦脯醢，由左

房。庶子設折俎，升自西階。自，由也。左房，東

房也。人君左右房。《鄉射·記》曰：「主人俎，脊、脅、臂、

肺也。」【疏】正義曰：敖氏曰：「凡堂上之薦，皆由左房，特

於君見之耳。」公祭，如賓禮；庶子贊授肺。【疏】

正義曰：盛氏曰：「《燕禮》：士薦，膳宰設，且贊授肺。此

皆與之異者，亦為主於射而略之也。」不拜酒，立卒爵；坐奠爵，拜，執爵興。凡異者，君尊，變於賓。【疏】正義曰：謂不拜酒、立卒爵等皆變於賓也。主人荅拜。樂闋。升受爵，降奠于筐。

右主人獻公

更爵洗，升酌散以降；酢于西階下，北面坐奠爵，再拜稽首。公荅拜。更，易也。易爵，不

敢襲至尊。古文「更」爲「受」。【疏】正義曰：敖氏曰：「此亦

當酌膳。云「酌散」，誤也。」郝氏曰：「燕禮酌膳，此酌散。燕

禮主飲，故叨君惠；大射主禮，不敢同於君也。」姜氏曰：酌

方壺酒曰酌散。燕禮酌膳，而此酌散者，燕禮賓主之情；大

射，君臣之義也。方氏苞曰：「燕禮酌膳，志恩禮渥洽，而不

可忘也；①大射酌散，示等級分明，而不敢苟也。」案：後三

說皆與敖異。吳氏廷華曰：「上文賓酢主人酌膳，此主人自

酢于公，所以達公意，亦酌膳也。敖說得之。『公荅拜』，《燕

①「可」，原作「敢」，今據《儀禮析疑》改。

禮》作「公荅再拜」。姜氏曰：此下《燕禮》多「荅再拜」，而《大射》但「荅拜」，義亦如之。」主人坐祭，遂卒爵，興；坐奠爵，再拜稽首。公荅拜。主人奠爵于篚。

右主人受公酢

主人盥洗，升媵觚于賓，酌散，西階上坐奠爵，拜。賓西階上北面荅拜。媵，送也。散，方壺之酒也。古文「媵」皆作「騰」。【疏】正義曰：注

「古文「媵」皆作「騰」」，胡氏承珙曰：「此注「古文」疑當作「今文」，傳寫誤耳。鄭注《檀弓》云：「《禮》揚作媵。」《禮》即《禮經》，謂《禮經》古文皆作「媵」。若《禮記》則今文，其作「揚」，①與《禮經》今文作「騰」者義合，故知此作「騰」者必今文也。」主人坐祭，遂飲。賓辭。卒爵興，坐奠爵，拜，執爵興。賓荅拜。辭者，辭其代君行酒不立飲也。比於正主酬也。主人降洗，賓降。主人辭降，賓辭洗。卒洗。賓揖升，不拜洗。不拜洗，酬而禮殺也。主人酌膳。賓西階上拜，受爵于筵前，反位。主人拜送爵。賓升

席，坐祭酒，遂奠于薦東。遂者，因坐而奠之，不北面也。奠之者，酬不舉也。【疏】正義曰：方氏苞曰：「凡奠于薦東之觶不飲，何也？燕與大射，公卿皆未得獻，賓已受獻，且隨當受君之酬，故不飲主人之酬爵，以示不敢再先於公卿。俟受君之酬，而以酬公、卿、大夫，然後事順而情安也。主人之酬爵，君不可用以酬賓，故別舉媵觶，而薦東之觶又不得他用，則俟禮終而徹之可矣。鄉飲，鄉射不用薦東之觶，義與此同。其舉薦西之觶以旅，則以事各不同，而節文亦少異耳。」主人降，復位。賓降筵西，東南面立。賓不立於序內，位彌尊。

右主人酬賓

小臣自阼階下請媵爵者，公命長。命之，使遷於長幼之中也。卿則尊士則卑。【疏】正義曰：方氏苞曰：「長，謂五大夫爵列之尊者。故小臣以次作二大夫，而不復請於君也。公為公卿舉旅曰「若賓若長」，則非以長幼言可知。」小臣作下大夫二人媵爵。作，使。媵

①「與」字原重，今據胡承瑛《儀禮古今文疏義》刪。

爵者阼階下皆北面再拜稽首，公荅拜。再拜稽首，拜君命。媵爵者立于洗南，西面北上，序進，盥洗角觶，升自西階，序進，酌散，交于楹北，降，適阼階下，皆奠觶，再拜稽首，執觶興。公荅拜。序，次第也，猶代也。先者既酌，右還而反，與後酌者交於西楹北，相左，俟於西階上，乃降，往來以右爲上。古文曰「降造阼階下」。【疏】正義曰：「皆奠觶，再拜稽首」，方氏苞曰：「上稽首拜媵爵之命也，此稽首拜飲觶之賜也。賓未酬而先賜媵爵者飲，何也？凡酬必先自飲，而後致爵於人。媵爵者之飲，乃代君也。酬爵四舉，非有代者，君豈能勝？」褚氏寅亮曰：「《燕禮》及此注俱云「往來以右爲上」，各居右即相左矣。故凡往來相交通例，無論堂上堂下，經或言相左，或不言相左，俱無有不相左者。其向西者必在北，向東者必在南，向南者必在西，向北者必在東，自不至履錯然矣。賈氏此經疏及《鄉射》司馬、司射相交疏甚明，《燕禮》疏誤。《集說》言經不言相左者俱相右，故以此爲退者在東、進者在西，則尤非。經於往來相交之儀無二例，惟凶事則變於吉而相右，故鄭注《既夕禮》云：「吉事交相左，凶事交相右。」如敖說，則混吉于凶

矣，可乎？」注「古文曰「降造阼階下」」，鄭不從者，胡氏承珙曰：「案：《說文》：「適，之也。」「造，就也。」義本相近。故《小爾雅》：「造，適也。」「造亦訓適。然《禮經》多用「適」，少用「造」。惟《士喪禮》：「新盆、槃、瓶、廢敦、重鬲皆濯，造于西階下。」注云：「造，至也，猶饌也。以造言之，喪事遽。」是鄭意以「造」字義別，故於此不從古文與？「媵爵者皆坐祭，遂卒觶，興；坐奠觶，再拜稽首，執觶興。公荅再拜。」【疏】正義曰：姜氏曰：「此亦荅再拜者，蓋重祭也。」方氏苞曰：「燕禮主人自酢，賓受酬，二大夫媵觶，公皆荅再拜。大射皆荅一拜，惟此荅再拜，何也？燕示慈惠，^①故過禮以明恩。大射辨名分。主人，士也。君於士不荅拜，以爲獻主而拜荅焉，禮已過矣。賓與媵觶，大夫也，本當荅拜，故一循其常，而於二大夫卒觶時，問荅再拜，以別於士。賓則公飲射爵而夾爵及媵觶于公，并荅再拜，以別於衆大夫，又所以稱禮之輕重而爲之隆殺也。」^②胡氏肇昕曰：「二說皆不足據。」盛氏世佐曰：

① 「示」，原作「主」，今據《儀禮析疑》改。

② 「隆」，原作「降」，今據《儀禮古今文疏義》改。

「此云「荅再拜」，衍一「再」字耳。」韋氏協夢曰：「凡臣拜君再拜者，君亦荅再拜。上兩「公荅拜」不言再拜者，文不具。」媵爵者執觶待于洗南。待，待君命。小臣請致者。請君使一人與，二人與。不必君命。若命皆致，則序進，奠觶于筐，阼階下皆北面再拜稽首，公荅拜。媵爵者洗象觶，升實之；序進，坐奠于薦南，北上；降，適阼階下，皆再拜稽首送觶。公荅拜。既酌而代進，往來由尊北，交於東楹北，亦相左。奠於薦南，不敢必君舉。【疏】正義曰：注云「既酌而代進，往來由尊北，交於東楹北，亦相左」者，賈疏云：「言「亦」者，亦前斟酌自飲時，①相左於西楹之北時，後者南相東向，先者北相西向，向西階右旋，北面待後至降也。今此二人，先者於尊西東面酌訖，於東楹之北東向，向公前奠之，右旋於東楹之北，北畔西過，後者亦於尊西東面，酌訖，於東楹之北南過，東向於公前奠之，是亦交於楹北相左也。」韋氏協夢曰：「交於楹北有相右、相左二義：賈疏疏《燕禮》以相右言，②此因注有相左之文，又以相左言。二說相兼而旨始備。」焦氏以恕曰：「上注言：「先者既酌，右還而反，與後酌者交於西楹北，相左，

俟於西階上，乃降。往來以右爲上。」考鄉射、大射，凡射者升降皆言相左，而燕禮媵爵則交相右，明係二禮互變可知。敖氏以經不言相左，但言交者皆相右，而燕射不變者，良爲允矣。鄭於禮學最精，必審諦而後出之。況射者之交相左見於前後者非一，恐非率爾釋此，當可兩通云。「媵爵者皆退反位。反門右北面位。【疏】正義曰：郝氏曰：「反位，反庭中北面之位。大夫初與卿皆入門右，北面，及公揖卿西面北上，揖大夫少進，則大夫北面進至庭中矣。鄭云反門右北面之位，非也。」

右二人媵觶將爲賓舉旅酬

公坐取大夫所媵觶，興以酬賓。賓降，西階下再拜稽首。小臣正辭，賓升再拜。公起酬賓於西階，降尊以就卑也。正，長也，小臣長辭，變於燕。升成拜，復再拜稽首。先時君辭之，於禮若未成然。【疏】正義曰：「賓升成拜」，《校勘記》曰：「案：顧炎武、張

①「前」，原作「相」，今據《儀禮注疏》改。

②「疏疏」，原作「疏」，今據《儀禮蠡測》補。

爾歧俱云唐石經「拜」誤作「敗」，然石經實作「拜」。○「正，長也。小臣長辭，變於燕者，鄭以《燕禮》使小臣辭，此使小臣正辭爲變也。《釋官》曰：「燕禮亦小臣正辭。注云『變於燕』，非也。燕禮所行事，皆小臣正掌之，而小臣師無事，故不須言正。此篇正與師皆有事，故須言正以別之。前此設公席、請執事者與羞膳者，請媵爵者作下大夫二人，媵爵請致者，皆直云「小臣」，不別言正者，以前此小臣事省，但於小臣師別之。曰「小臣師納諸公、卿、大夫」，「小臣師詔揖諸公、卿、大夫」，而其餘單言「小臣」者爲小臣正可知。射時小臣事繁，若設楅、委矢、設中、公射贊袒、贊襲、拂矢、授矢之類。正與師皆同時有事，故必須別之，曰正、曰師。此時公酬賓，小臣雖無事，而亦必別言「正辭」者，以射時飲公侍射者降拜，別之曰「小臣正辭」，故此亦著其爲正，以見辭下拜之事前後皆小臣正主之。此經文屬詞之義。」敖氏曰：「小臣正辭亦公命之。」方氏苞曰：「拜下禮也，故主人獻公、大夫媵，饌皆聽其稽首於階下而不辭，惟於賓則略君臣之分，而執賓主之禮，故命小臣辭而升成拜，且始猶拜於下而後辭，既則不待其拜而升之，皆異敬也。公以賓所媵饌賜人，亦不待其拜而升之，蓋所賜必諸公若諸卿之長，或君之師保，故與賓同禮。然君雖有異敬，而臣

宜守常禮，故至君命徹幕，則賓與公、卿、大夫皆降拜稽首。公雖命辭而終不升成拜。」公坐奠饌，荅拜，執饌興。公卒饌，賓下拜，小臣正辭，賓升，再拜稽首。不言成拜者，爲拜故下，賓未拜也。下不就拜，禮也。下，亦降也。發端言降拜，因上事言下拜。【疏】正義曰：「下不就拜，禮也。」《校勘記》曰：「就」，徐本、《通解》俱作「輒」。「禮」下徐本、《通解》俱有「殺」字。○韋氏協夢曰：「上言「賓降西階下，再拜稽首」，此言「賓下拜」，降與下特記者偶異其文耳。注謂「發端言降，因上事言下拜」，則賓媵饌于公，何以發端言「下拜」，繼言「降拜」乎？」又曰：「此下凡言小臣正辭者，亦不俟公命即辭之也。知不俟公命者，上賓降拜，公命小臣正辭，小臣正受公命，然後降辭賓，則賓已再拜稽首矣。故升以成之。此賓甫降，小臣即辭之，故降而未拜，遂升，再拜稽首。若俟公命，則賓亦已再拜稽首矣，何以直言下拜乎？」褚氏寅亮曰：「上經公于媵爵者，或言「荅拜」，或言「荅再拜」，則皆再拜可知。不言再，省文耳。此經公荅賓亦同。疏謂大射辨尊卑，故

①「師」，原脫，今據《儀禮釋官》補。

公荅一拜。恐未然。」公坐奠觶，荅拜，執觶興。

賓進，受虛觶，降，奠于筐，易觶，興洗；賓進

以臣道也，君受虛爵，君不親酌。凡爵不相襲者，於尊者言

更，自敵以下言易。更作新，易有故之辭也。不言公酬賓

於西階上及公反位者，尊君，空其文也。【疏】正義曰：注

「賓進以臣道也」，《校勘記》曰：「也」，徐本、《通解》俱作

「就」，陳、閩、監、葛俱無。」○敖氏曰：「言興洗」，見洗則

立也。」張氏爾岐曰：「公授賓爵，即反位。」公有命，則

不易不洗。反升酌膳，下拜。小臣正辭。

賓升，再拜稽首。公荅拜。不易，君義也。不洗，

臣禮也。【疏】正義曰：張氏爾岐曰：「公荅拜於阼階

上。」^①賓告于擯者，請旅諸臣。擯者告于公，

公許。旅，序也。^②賓欲以次序勸諸臣酒。【疏】正義

曰：敖氏曰：「旅，旅酬之也。賓因君所賜，請旅諸臣，所

以廣君賜也。公許，擯者又以告賓，乃旅也。」方氏苞曰：

「祭祀賓客獻酬本無或遺，而燕，射舉旅必使賓請者，自賓

言之，則不敢專惠；自君言之，則推惠於賓而使浹於上下

也。公卿之請，所以推惠於公卿，而使浹於諸大夫也；大

夫之請，所以推惠於大夫，而使浹於羣士也。士舉旅而後

獻庶子有司，則士之請又推惠於士，而以浹於庶子有司也。

惟賓之請見於經，而《燕禮·記》曰：「凡公所酬，既拜，請

旅侍臣。」蓋據爲公、卿、大夫、士舉旅，受爵者皆曰「如初」。

請酬之文，惟見《大射》，何也？大射禮重於燕，於燕舉之。

或疑大射辨尊卑，簡賢能一稟於君命，或無此節。於大射

舉之，則燕不待言矣。以告於擯者，以射者無自請於君之

儀也。」賓以旅大夫于西階上，擯者作大夫長

升受旅。作，使也。使之以長幼之次，先孤、卿，後大

夫。【疏】正義曰：《校勘記》曰：「注『卿後大夫』四字，今

本脫，徐本、《通解》俱有。」賓大夫之右，賓在右，相飲

之位。【疏】正義曰：《校勘記》曰：「今本脫注，徐本、《通

解》俱有。案：《釋文》有「相飲」二字。」坐奠觶，拜，執

觶興。大夫荅拜。賓坐祭，酬而禮殺。【疏】正義

曰：《校勘記》曰：「今本脫注。徐本、《通解》俱有。」立卒

觶，不拜。若膳觶也，則降，更觶，洗，升，賓

散。大夫拜受。賓拜送，言更觶，尊卿，尊卿則賓

① 「公」，原作「君」，今據《儀禮鄭注句讀》改。

② 「序」，原作「命」，今據《儀禮注疏》改。

禮殺。【疏】正義曰：《校勘記》曰：「今本脫注，徐本、《通解》俱有。」遂就席。【疏】正義曰：盛氏曰：「賓初立於西序，東面。既乃於筵西東南面立，至是始就席，禮以漸而殺也。《燕禮》無此三字，文略耳。」大夫辯受酬，如受賓酬之禮，不祭酒。卒受者以虛觶降，奠于篚，復位。卒，猶已也。今文「辯」作「徧」。【疏】正義曰：《校勘記》曰：「今本脫注，徐本、《通解》俱有。」

右公取媵觶酬賓遂旅酬

主人洗觚，升實散，獻卿于西階上。酬賓。

而後獻卿，飲酒禮成於酬。【疏】正義曰：《校勘記》曰：

「洗酬」「酬」，唐石經、徐本、《通解》、敖氏俱作「觚」。注今

本脱，徐本、《通解》俱有。」司宮兼卷重席，設于賓左，東上。言兼卷，則每卿異席。重席，蒲筵緇布純席。

卿言東上，統於君。席自房來。【疏】正義曰：《校勘記》

曰：「今本脱注，徐本、《通解》俱有。案：《釋文》有『布純』」

二字。」卿升，拜受觚。主人拜送觚。卿辭重席，司宮徹之。徹，猶去也。重席雖非加，猶爲其重。

累，辭之，辟君。【疏】正義曰：方氏苞曰：「賓有加席，而卿轉辭，因其辭而遂徹之，何也？」上則體君之意以致隆於

賓，下則不敢過諸公也。」乃薦脯醢，卿升席，庶子

設折俎。卿折俎未聞，蓋用脊、脅、臠、折肺。卿有俎

者，射禮尊。【疏】正義曰：薦脯醢，不言其人。盛氏曰：

「蓋亦宰胥也。」注云「卿折俎未聞，蓋用脊、脅、臠、折肺」

者，賈疏云：「若有諸公，公用臑，卿宜用膊也。」盛氏云：

「注云卿用臚，謂上卿耳。其下二人者，則又折以上卿之餘。」

體也。」云「卿有俎者，射禮尊」者，盛氏曰：「卿有俎，**①**別

之於大夫也，亦辯尊卑之義。」卿坐，左執爵，右祭脯

醢，奠爵于薦右；興取肺，坐絕祭，不齊肺；

祖，且，坐，說，手，叔，爵，遂，祭，酉，執，爵，祖；

聖帝，百皆二乙而全五尋，與；全五尋，手，

附
附
二
口
二
五
頁
身
二
頁
頁
手

報質與
陳海峽
君之惠也
不啻
亦自其方君

【疏】正義曰：《校勘記》曰：「注『不躋啐』，陳、閩、監、葛俱

「亦自貶於君」，從本《通解》俱作「事」。在射

臣之意與單疏標目合」姜氏曰「祭肺不擘猶祭酒不

①「俎」，原作「折」，今據《儀禮集編》改。

啐，皆降於賓也。不言不啐酒，蓋省文。」韋氏協夢曰：「此禮詳於燕者，燕無俎而射有俎也。既祭酒即執爵興，則亦不啐酒，不告旨可知。」主人荅拜，受爵。卿降，復位。復西面位，不酢辟君。辯獻卿。主人以虛爵降，奠于筐。擯者升卿，卿皆升，就席。若有諸公，則先卿獻之，如獻卿之禮；席于阼階西，北面東上；無加席。公，孤也。席之北面爲大尊，屈之也。亦因阼階上近君，近君則親寵苟敬私昵之坐。【疏】正義曰：燕與大射諸公皆無加席，與卿辭重席之意同，以成君致隆於賓之義也。又位在阼階，若加席，則上擬於君，故設席時本無加席，不待其辭。

右主人獻卿

小臣又請媵爵者，二大夫媵爵如初。請致者。若命長致，則媵爵者奠觶于筐。命長致者，使長者一人致也。公或時未能舉，自優暇。一人待于洗南，不致者。長致者阼階下再拜稽首，公荅拜。再拜稽首，拜君命。洗象觶，升實

之，坐奠于薦南，降，與立于洗南者二人皆再拜稽首，送觶。公荅拜。奠于薦南，先媵者上觶之處也。二人皆拜如初，共勸君飲之。

右二人再媵觶

公又行一爵，若賓若長，惟公所賜。一爵，先媵者之下觶也。若賓若長，禮殺也。長，孤卿之尊者也。於是言賜，射禮明尊卑。以旅于西階上，如初。賜賓則以酬長，賜長則以酬賓。大夫長升，受旅以辯。大夫卒受者以虛觶降，奠于筐。

右公又行一觶爲卿舉旅

主人洗觶，升，獻大夫于西階上。大夫升，拜受觶。主人拜送觶。大夫坐祭，立卒爵，不拜既爵。主人受爵，大夫降復位。既，盡也。大夫卒爵，不拜，賤不備禮。胥薦主人于洗北，西面。脯醢，無胾。胾，宰官之吏。主人，下大

夫也。先大夫薦之，尊之也。不薦於上，辟正主。胥，俎實。辯獻大夫，遂薦之，繼賓以西，東上；若有東面者，則北上卒，擯者升大夫，大夫皆升，就席。辯獻乃薦，略賤也。亦獻後布席也。【疏】正義曰：注云「辯獻乃薦，略賤也」者，張氏爾岐曰：「每獻一人訖降階，獻偏，擯者乃總升之就席。就席訖，乃薦之。」

右主人獻大夫

乃席工于西階上，少東。小臣納工，工

六人，四瑟。工，謂瞽矇善歌諷誦詩者也。六工，大

師，少師各一人，上工四人。四瑟者，禮大樂衆也。【疏】正

義曰：敖氏曰：「大射差重於燕，又加瑟者二人，然則諸侯之祭饗，歌與瑟者各四人與？」以是推之，天子之制，其隆

殺之數亦可知矣。盛氏曰：「工六人，諸侯之正禮也，然則

天子蓋用八矣。《春秋》隱五年《左傳》云：「公問羽數于衆

仲。對曰：天子用八，諸侯用六，大夫四，士二。」亦其例

也。敖說非。僕人正徒相大師，僕人師相少

師，僕人土相上工。徒，空手也。僕人正，僕人之

長。師，其佐也；士，其吏也。天子視瞭相工，諸侯兼官，

是以僕人掌之。大師、少師，工之長也，凡國之瞽矇正焉。杜蒯曰：「曠也，大師也。」於是分別工及相者，射禮明貴賤。【疏】正義曰：敖氏曰：「上工，即上瞽。《周官》上瞽百人。盛氏曰：「上工，即堂上之工也，對下羣工爲堂下之工而言。敖云「即上瞽」，非。」案：《釋官》亦云：「《周禮》瞽矇有上瞽、中瞽、下瞽。此上工，當彼上瞽也。」注云

「僕人正，僕人之長。師，其佐也；士，其吏也。天子視瞭相工，諸侯兼官，是以僕人掌之」者，盛氏曰：「僕人正，僕

人師，皆於天子爲大僕也。《周禮》：「大僕，下大夫二人。」

諸侯則上士也。一爲正，其一爲師，僕人土則祭僕以下，與

以此等官相全，重其事也。分別相之，辨尊卑也。燕禮皆

以小臣，注云以僕人掌視瞭，非也。《釋官》曰：「案：《周

禮》小臣下有御僕，此經僕人與小臣聯職，疑即御僕之官。

《左傳》：「晉魏絳授僕人書。」杜注：「僕人，晉侯御僕。」

《國語》韋注云：「僕人掌傳命。」又《魯語》：「宣公使僕人

以書命季文子。《周禮·御僕職》云：「掌羣吏之逆及庶民

之復。」鄭司農云：「復謂奏事，逆謂受下奏。」①又云：「掌

①「逆」原作「送」，今據《續清經解》本及《周禮注疏》改。

王之燕令。』^①是《左傳》、《國語》所言僕人，其職與《周禮》御僕正合。天子有大僕、小臣、祭僕、御僕，皆同官。諸侯無大僕，惟有小臣及僕人，亦當同官，共府、史、胥、徒。《周禮》御僕下士，此注以僕人士爲吏，則正與師當是士，以諸侯小臣下無祭僕，故僕人正，僕人師亦以下士爲之也。」又曰：「僕人、小臣，皆侍從之官，與僕馭官別。《周禮·大僕》注云：『僕，侍御於尊者之名。』《周禮》有大僕、小臣等官，又別有大馭、中大夫，與戎僕、齊僕、道僕、田僕、馭夫，皆掌馭車。《左傳》諸侯有僕人，又別有戎御等官，其職各不相通。《漢書·百官公卿表》云：『大僕，秦官，掌輿馬。』注：『應劭曰：周穆王所置，蓋大御衆僕之長，中大夫也。』是秦制以大僕掌輿馬，而後之言官制者遂誤合兩職爲一矣。」^②云「大師、少師，^③工之長也，凡國之瞽矇正焉」者，《釋官》曰：「案：《論語》有大師摯、少師陽，是諸侯亦有大師、少師之官。凡言工，皆瞽矇也。大師、少師，亦瞽者爲之，故通稱工。注云：『大師、少師，工之長。』最確。大師，樂工之長，非樂官之長。《周禮·春官·叙官》有大司樂、樂師同官，^④其職掌教國子，與《尚書》典樂官同，非瞽者爲之。鄭注云：『大司樂，樂官之長。』^⑤是也。又別有大師、少師、瞽矇，皆同官。鄭注云：『凡樂之歌，必使瞽矇爲焉，

命其賢知者以爲大師、少師。」故《周禮·大史職》注云：「大師，瞽官之長。」是也。韋昭注《國語》曰：大師，樂官之長。杜預注《左傳》云：「大師，掌樂大夫。」皆由忘卻大師上尚有掌樂之官。天子謂之大司樂，諸侯謂之樂正也。」云「杜蒧曰：『曠也，大師也』」者，《禮記·檀弓》文。引之以證大師爲樂工之長也。云「射禮明貴賤」者，以燕禮皆小臣相工，不分別工及相者，與此異也。吳氏廷華曰：「僕人士無考，大概大僕之屬，如上、中、下士耳。注以爲吏，疏以爲府、史、胥、徒，若然，則烏得與僕人正等同在相者之列邪？」相者皆左何瑟，後首，內弦，跨越，右手相。謂相上工者後首，主於射，略於此樂也。內弦，跨越，以右手相工，由便也。越，瑟下孔，所以發越其聲者也。古文「後首」爲「後手」。【疏】正義曰：注云「後首主於射，略於此樂也」者，韋氏協夢曰：「燕禮面鼓執越。此後首跨越

- ①「令」，原作「命」，今據《儀禮釋官》改。
- ②「一」，原作「之」，今據《儀禮釋官》改。
- ③「少」，原作「小」，今據上文改。
- ④「大」，原脫，今據《儀禮釋官》補。
- ⑤「司」，原作「師」，今據《儀禮釋官》改。

者，蓋變於燕也。大射之必變於燕者，亦猶鄉射之必變於鄉飲也。但鄉飲後首跨越，鄉射面鼓執越，此燕面鼓執越，大射後首跨越，二者相反耳。」云「古文「後首」爲「後手」者，胡氏承珙曰：「鄭此注云：「後首，主於射，略於此樂。」《鄉飲酒》：「二人皆左何瑟，後首。」注：「後首者，變於君也。」《燕禮》：「小臣左何瑟，面鼓。」注云：「燕尚樂，可鼓者在前面也。」《鄉射禮》：「相者皆左何瑟，面鼓。」注：「面，前也。鼓在前，變於君也。」案：鼓，即首也。瑟可鼓之處近首，不鼓之處近尾，故當作「首」，不作「手」。《春秋》「曹公子首」，《公羊》、《穀梁》作「曹公子手」。《漢書古今人表》「敷手」，《說文》作「敷首」。此古文「首」爲「手」者，假借字，鄭所不從。」吳氏廷華曰：「鄭知瑟在前者，《鄉飲禮》所謂「瑟先」也。」後者徒相人。謂相大師、少師者也。上列官之尊卑，此言先後之位，亦所以明貴賤。凡相者以工出入。【疏】正義曰：「上列官之尊卑，此言先後之位，亦所以明貴賤」者，謂上先言僕人正與大師，後言僕人土與上工，是列官之尊卑。此言上工與瑟在前，大師、少師在後，是先後之位，所以明尊卑也。盛氏曰：「賤者先就事，工之通禮也。燕禮亦然，但文有詳略耳。注說似曲。」云「凡相者以工出入」者，賈疏云：「欲見人時如此，出時亦然。」小

樂正從之。從大師也。後升者，變於燕也。小樂正，於天子樂師也。【疏】正義曰：注云「從大師也。後升者，變於燕也」者，賈疏云：「燕禮樂正先升，又不使小樂正，彼主於樂，此則略於樂故也。」敖氏曰：「諸侯之小樂正，下士也。前三篇不言小，以此見之也。此樂盛於彼，且用小樂正，則彼可知矣。大射乃亦不使大樂正者，其辟祭饗之類與？」①盛氏曰：《周禮·序官》云：「樂師，下大夫四人，上士八人，下士十有六人。」然則諸侯之樂正上士，小樂正下士，明矣。燕禮使樂正，此乃云「小樂正」者，疏以爲略於樂，是也。工用六人，以示其禮之重，樂正使下士，以示其樂之略，意各有主也。從大師而升者，以其卑也。其序又與工相變也，鄉飲酒、鄉射皆使樂正者，彼是大夫之樂正也。大夫之樂正皆以下士爲之，無大小之別，故射與飲酒禮同也。《釋官》曰：「案：燕禮亦使小樂正，以無大樂正，故不須言小以別之。疏未的。」升自西階，北面東上。工六人。坐授瑟，乃降。相者也。降立於西縣之北。【疏】正義曰：相者降位，蓋亦在西方。盛氏曰：

①「辟」，原作「餘」，今據《儀禮集說》改。

「僕人正以下皆士也，其位當在西方，注說非。」褚氏寅亮曰：「注謂立於西縣北者，取近其事。敖氏云西方，大遠矣。」小樂正立于西階東。不統於工，明工雖衆，位猶在此。【疏】正義曰：張氏爾岐曰：「燕禮工四人，樂正升立於工之西，在西階東。此工六人，數衆，疑位移近西，乃樂正猶立西階東不變，是統於階而不統於工也。」盛氏曰：「燕禮樂正北面，立於工西，此云「立於西階東」，亦文互見也。」吳氏廷華曰：「上言「從」，此言「立」，敖氏以爲後升，是也。此禮重於燕，而樂正乃後升，則正禮先工也。」乃歌《鹿鳴》三終。《鹿鳴》，《小雅》篇也，人君與臣下及四方之賓燕，講道修政之樂歌也。言已有旨酒，以召嘉賓。與之飲者，樂嘉賓之來，示我以善道；又樂嘉賓有孔昭之明德，可則倣也。歌《鹿鳴》三終而不歌《四牡》、《皇皇者華》，主於講道，略於勞苦與諮事。【疏】正義曰：注「可則倣也」，《校勘記》曰：「倣，《釋文》作「設」，云「亦作倣」。」云「歌《鹿鳴》三終而不歌《四牡》、《皇皇者華》，主於講道，略於勞苦與諮事」者，《四牡》勞使臣，《皇皇者華》言諮謀、諮諏、諮度、諮詢，此不用之，是略也。」敖氏曰：「三終，謂歌《鹿鳴》之什三篇，篇各一終，如《春秋傳》所謂「工歌《鹿鳴》之三」，是也。鄉飲酒之禮歌《鹿鳴》、《四牡》、

《皇皇者華》，其義曰：工歌三終。則益可見矣。」韋氏協夢曰：「凡歌詩皆連歌三篇，無止歌一篇者，況射重於燕。燕歌三篇，而射歌一篇，此必無之事也。注謂「歌《鹿鳴》三終而不歌《四牡》、《皇皇者華》，非是。」胡氏肇昕曰：「射略於燕，故祇歌《鹿鳴》三終，就《鹿鳴》一篇而三次歌之也。經不云歌《四牡》、《皇皇者華》，可證也。下文「乃管《新宮》三終」，亦就《新宮》一篇而三次以管奏之也。《燕禮·記》亦云「下管《新宮》，笙人三成」，未聞於《新宮》之外別有二詩也。韋氏說非是。」褚氏寅亮曰：「若謂兼歌《四牡》、《皇皇者華》，則《鄉射·記》之《騶虞》五終果何詩乎？其謬顯然。」主人洗，升實爵，獻工。工不興，左瑟。工歌而獻之，以事報之也。洗爵獻工，辟正主也。獻不用觚，工賤，異之也。工不興，不能備禮。左瑟，使其右。大師無瑟，於是言左瑟者，節也。【疏】正義曰：注云「洗爵獻工，辟正主也」者，賈疏云：「《鄉飲酒》、《鄉射》云：大師則爲之洗，其餘工不爲之洗。是正主法。此工六人皆爲之洗，故云「辟正主也」。」方氏苞曰：「鄉飲酒，鄉射惟爲大師洗，以衆工不過族黨中知音樂者，或國之中瞽、下瞽耳。燕

與大射，則歌者必大師、少師，即上工亦異日之大師、少師也，^①故皆洗以獻，而並及於笙。大射禮繁，故省獻笙之節耳。」盛氏曰：「洗者亦以其大師敬之也。此惟爲大師一洗耳。疏非。」韋氏協夢曰：「下云『一人拜受爵』，則此爲之洗者亦僅一人而已。其餘工五人，即以此一人之爵遞獻之，不別爲之洗，^②賤也。」胡氏肇昕曰：「盛、韋二說是也。下『一人拜受爵』注云『謂大師也』，是亦大師則爲之洗也。經不明著之者，文省耳。」云「獻不用觚，工賤，異之也」者，以獻賓、獻卿大夫皆用觚，而獻工則用爵，是異之也。敖氏曰：「爵即觚也。不言觚者，可知耳。」韋氏曰：「爵者，觚解之通稱。《禮器》謂貴者獻用爵，賤者獻用散。豈工賤而轉獻以貴者之爵乎？敖說是也。」云「大師無瑟，於是言左瑟者，節也」者，敖氏曰：「謂獻大師之時，瑟者猶未受獻，而其左瑟則以此時爲節也。」盛氏曰：「謂工四人之左瑟，皆以主人實爵獻工爲節，非必受獻乃然也。」一人拜受爵。謂大師也。言一人者，工賤，同之也。工拜於席。主人西階上拜送爵。薦脯醢，輒薦之，變於大夫。使人相祭。使人相者，相其祭薦祭酒。卒爵，不拜。主人受虛爵。衆工不拜，受爵，坐

祭，遂卒爵。辯有脯醢，不祭。相者，相其祭酒而已。主人受爵，降，奠于筐，復位。【疏】正義曰：敖氏曰：「位，洗北之位也。」○盛氏曰：「燕禮於升歌之後，公即爲大夫舉旅。」^③此篇乃移在射後者，急於射而緩於飲酒也。」方氏苞曰：「燕禮爲大夫舉旅在獻工之後，笙人之前，以其事與無算樂獻士相連，故使賡爵者遞進而代獻，^④以息獻主。大射爲大夫舉旅，退於既射之後，獻主之事至獻大夫、獻工而中止，則連而舉之可也。」大師及少師、上工皆降，立于鼓北，羣工陪于後。鼓北，西縣之北也。言鼓北者，與鼓齊面，餘長在後也。羣工陪于後，三人爲列也。於是時小樂正亦降，立於其南，北面。工立，僕人立於其側，坐則在後。《考工記》曰：「鼓人爲皋陶，長六尺有六寸。」【疏】正義曰：方氏苞曰：「既無間歌、合樂，則堂上之事畢矣，故大師、少師、上工皆降也。」注云「鼓北，西縣之北也」者，賈疏云：「以下文大師、少師

①「少」，原作「小」，今據《儀禮析疑》改。

②「別」，《儀禮蠡測》作「另」。

③「公」，原脫，今據《儀禮集編》補。

④「遞」，原作「遲」，今據《儀禮析疑》改。

始遷向東，明此降者降在西縣之北。」敖氏曰：「鼓北，鑄南也。不云鑄南者，嫌與尊旅食者之意同也。不取節於鼗者，鼓大鼗小也。」盛氏曰：「立者，謂大師以下六工爲一行，北面東上也。知北面者，以鄉飲酒及燕禮笙人之位推之可見。鼓北，^①西階東建鼓之北也。立於此者，以當奏管，近其事也。注云「西縣之北」，非。若在西縣之北，何得近舍頌磬而遙取節於鼓邪？」疏云：「取形大，又面向東。」皆飾說也。知亦不在鑄南者，以鼓、鑄間有鼗，設縣之時鱗次櫛比，其間未必有餘地。就有餘地，豈能容此衆工及相者之位哉？且蕩在建鼓之間，即大師之所管者，亦不宜舍之而遠立他所也。」胡氏肇昕曰：「敖說必不可通。考下文接言『乃管《新宮》三終』，則立於鼓北者，當以盛說爲是。鄭以鼓北爲西縣之北者，蓋欲取節於西階之建鼓，以建鼓面向南，不向北也，故云「言鼓北者，與鼓齊面，餘長在後也」。張氏惠言曰：「蓋鼓長六尺六寸，設之後與縣齊，則前出於縣五尺許。工之稍前於縣，故以鼓爲節。餘長在後者，餘長其地，使後空也。」云「羣工陪于後，三人爲列也」者，賈疏云：「大師、少師二人，上工四人，今若立時三人爲列，則大師後有工二人，少師後亦有工二人也。」張氏惠言曰：「此言大師、少師爲一行，羣工爲一行。經文所以特立

「上工」，疏誤。案：敖氏、郝氏亦皆以羣工爲上工。敖云：「羣工即上工，謂瑟者四人也。陪于後者，其以鼓鑄之間不足爲一行與？前列二人，後列四人皆當北上。」郝云：「大師立與鼓齊，少師及四工皆陪立于後，以俟奏管。」惟盛氏、方氏謂羣工爲堂下之工，即衆管者。案：此之降立，爲奏管故也。大師、少師、上工皆堂上之工，上工兼包四瑟者，其羣工則衆管者也。經不言笙之人，即此羣工是也。其行列之數不可考。盛氏謂立者，大師以下六工爲一行，陪于後者亦六人爲一行，知亦六人者，以上三篇歌瑟四人，堂下笙者亦四人，推之可見。但大師、少師并瑟者四人，笙者四人，止十人，不得每行六人也。疑十人爲三行，大師、少師一行，四瑟者一行，四笙者一行。或十人爲三行，上工六人爲一行，羣工四人陪于後爲一行。疑不能明也。」云「於是時小樂正亦降，立於其南，北面」者，謂小樂正立於上工六人之南也。盛氏曰：「小樂正降立於其西，^②北面。」云「工立，僕人立於其側，坐則在後」者，僕人，相工者，故立與坐皆不離工也。引《考工記》者，證「與鼓齊面，

① 「北」下，原衍一「面」字，今據《續清經解》本刪。

② 「其」，原脫，今據《儀禮集編》補。

餘長在後」之說也。賈疏云：「彼云：『鞀人爲皋陶。』先鄭云：『鞀，書或爲鞀。』後鄭謂鞀者，以皋陶名官，鞀即陶字，從革。今云『鼓人』者，誤，當作『鞀人』。鞀人掌鼓，後人誤言鼓。鼓人自在地官掌教六鼓矣。」褚氏寅亮曰：「自堂而降則立於西縣北，自西而東則坐於東縣北，皆在縣北也。安有立於縣中鑄南鼓北之理，如敖氏所云邪？鑄南鼓北餘地無幾，焉能容兩列之位？至謂歌工降而下管，其誤也尤不待言。」乃管《新宮》三終。管，謂吹蕩以播《新宮》之樂。其篇亡，其義未聞。笙從工而入，既管不獻，略下樂也。立于東縣之中。【疏】正義曰：注云「管，謂吹蕩以播《新宮》之樂」者，敖氏曰：「此承上文言之，^①是降者管之明矣。《春官》《大師》、少師職皆云『登歌』，^②『下管』，然蕩一而已。」^③其大師管之與三終者，「管《新宮》并及其下二篇也。二篇之名未聞。《書》曰：『下管鞀鼓。』《詩》曰：『鞀鼓淵淵，嘒嘒管聲。』既和且平，依我磬聲。」則管時亦奏此西方之樂以應之矣。此不笙，不合鄉樂者，爲射故，略於樂也。不略《小雅》者，《小雅》爲諸侯之正樂，故不略其正，亦如鄉射之不略鄉樂矣。」盛氏曰：「管之者，大師諸人也。管數未聞，然以《鄉射·記》『三笙一和』推之，^④則管亦不止於一矣。管奏，則堂下諸樂並奏以應之。敖但云奏西方

之樂，非。《書》曰：『下管鞀鼓，合止柷敔，笙鏞以間。』奏管之時，亦吹笙。經不見笙人之文者，以其不爲樂主，略之也。或云：上經云「蕩在建鼓之間」，注云：「蕩，笙簫之屬。」然則笙與管蓋並設也。愚謂笙是匏屬，不可云蕩。或說恐未是。又案：疏引《燕禮·記》云「下管《新宮》，笙入三成」，以爲吹管者亦吹笙之證，非也。彼是管畢而後吹笙，此則笙管並奏，管畢而樂終矣。詎與《燕禮·記》同乎？「云笙從工而入，既管不獻，略下樂也」者，盛氏曰：「既管不獻者，以奏管者既受獻，羣工賤，又不奏管故也。」胡氏肇昕曰：「案：注云『既管不獻，略下樂也』，則以管之者，非大師諸人也。上云『笙從工而入』，殆以奏管者亦吹笙也。」云「立於東縣之中」者，張氏爾岐曰：「注此句可疑。案：《燕禮》『笙入，立于縣中』注云：『縣中，縣中央也。』《鄉飲酒禮》曰：『磬南北面。』疏云：『諸侯軒縣，闕南面而已，故得言縣中。《鄉飲酒》唯以磬縣而已，不得言縣中，而

①「言之」，《儀禮集說》作「而言」。

②「職」，原脫，今據《儀禮集說》補。

③「然」，原脫，今據《儀禮集說》補。

④「推」，原作「吹」，今據《儀禮集編》改。

云磬南。注引《鄉飲酒》者，欲見此雖軒縣，近北面縣之南也。此經初設樂，無北面縣，但移東縣建鼓在阼階西，又設一建鼓在西階東，正當北面一縣之處。「簫在建鼓之間」注云：「簫，謂笙簫之屬，倚於堂。」又與燕禮笙人所立之位同，疑設之在此奏之亦於此。至此「管《新宮》三終」，注乃云「立於東縣之中」，不知於經何據。若云辟射位，射事未至，無可避也。且上文大師等立於鼓北，^①亦當是此建鼓之北。注以爲西縣之北，不知西縣何以單名爲鼓。竊疑大師等立此，或亦以將奏管故臨之，非徒立也。至下管三終，乃相率而東耳。既從工而入，工升堂笙即立堂下，亦其宜也。」胡氏肇昕曰：「張氏所論是也。經云：『羣工陪於後。』羣工，正指衆笙與大師諸人同立於建鼓之北，近簫之處。《春官》大師、少師職皆云「登歌」、「下管」，則管之者，大師；而吹笙者，笙四人也。《燕禮·記》「下管《新宮》，笙入三成」，證以《書》「下管鞀鼓，合止祝故，笙鏞以間」，是管與笙間奏。此經不言笙入，不言笙入三成，皆略耳。非與《燕禮·記》有異也。簫設而笙不必設，以笙四人自執笙，與瑟者何瑟相同，盛氏及或說皆非是。《新宮》三終亦就《新宮》一篇而三管之。敖氏謂別有二篇，殊屬無據。卒管。大師及少師、上工，皆東拈之東南，西

面北上。坐。不言縣北，統於堂也。於是時大樂正還，北面立於其南。【疏】正義曰：注「於是時」，《校勘記》曰：「『于』誤作『工』。」○賈疏云：「不言去堂遠近，當如鄉射遷工阼階之東南，堂前三筭，西面北上。」敖氏曰：「拈東南當在東縣之東北，射事未至，工既管，乃不復升而遂遷於此者，堂上之樂畢故也。」郝氏曰：「拈，堂下閣物處。冠禮有西拈，是堂東西皆有拈也。」盛氏曰：「東拈之東南，蓋在東縣之東也。注與敖說似非。」注云「於是時大樂正還北面，立於其南」者，盛氏曰：「注『大樂正』，當是『小樂正』之譌。樂終而不告備，亦以其略也。」敖氏曰：「於是小樂正北面立於其南，相者退立于西房。」吳氏廷華曰：「拈在堂角，此則東南角之拈也。」

右作樂娛賓射前燕禮備

①「等」，原脫，今據《儀禮鄭注句讀》補。

儀禮正義卷十四 鄭氏注

受業江寧楊大培補

擯者自阼階下請立司正。三爵既備，上下

樂作，君將留羣臣而射，宜更立司正以監之，察儀法也。

【疏】正義曰：敖氏曰：「君再舉旅而即請立司正，爲射故也。」公許，擯者遂爲司正。公許其請，因命用之。

不易之者，俱相禮，其事同也。【疏】正義曰：褚氏寅亮

曰：「擯者，即大射正也。鄉射司正至射時轉爲司馬，諸侯

更有司馬正、司馬師等官，故司正始終不變其職。下文司

射亦以大射正爲之，故敖氏謂諸侯之大射正二人。」司正

適洗，洗角觶，南面坐奠于中庭；^①奠觶者，著

其位，以顯其事，威儀多也。【疏】正義曰：吳氏廷華曰：

「中庭，當在中堂下南北之中。」升，東楹之東受命于

公，西階上北面命賓、諸公、^②卿、大夫。公

曰：「以我安！」賓、諸公、卿、大夫皆對曰：

「諾，敢不安？」以我安者，君意殷勤，欲留之，以我故

安也。【疏】正義曰：敖氏曰：「此羣臣皆爲射而來，是時

猶未射，固無嫌於不安。而司正乃受命以安之者，緣其意，

若不敢必君之終行射事然也。受命亦北面，與請徹俎同。」

張氏爾岐曰：「公曰『以我安』，即司正命衆之辭，言公有命

如此也。」司正降自西階，南面坐取觶，升酌

散；降，南面坐奠觶；奠於中庭故也。【疏】正義

曰：《校勘記》曰：「南面坐奠觶」「奠」，石經補缺、敖氏俱

誤作「取」。注云「奠於庭故也」「也」，徐本、《通解》、楊氏俱

作「處」。興，右還，北面少立；坐取觶，興；

坐，不祭，卒觶，奠之，興；再拜稽首，左還，

南面坐取觶，洗；南面反奠于其所，北面立。

皆所以自昭明於衆也。將於觶南北面則右還，於觶北南面

則左還，如是得從觶西往來也。必從觶西往來者，爲君在

阼，不肯之也。【疏】正義曰：《校勘記》曰：「南面坐取觶

①「奠」下，原衍「立」字，今據《儀禮注疏》刪。

②「諸」上，原衍「與」字，今據《儀禮注疏》改。

洗六字，石經補缺脫。注「得從觶西往來也」「從」，《通解》作「於」。○敖氏曰：「北面立，亦在觶南。」

右將射立司正安賓察儀

司射適次，袒決遂，執弓，挾乘矢于弓外，見鏃于弣，右巨指鉤弦。司射，射人也。次，若今時更衣處，帳幃席爲之。耦次在洗東南。袒，左免衣也。決，猶闔也，以象骨爲之，著右巨指，所以鉤弦而闔之。遂，射韉也，以朱韋爲之，著左臂，所以遂弦也。方持弦矢曰挾。乘矢，四矢。弣，弓把也。見鏃焉，順其射也。右巨指，右手大擘。以鉤弦，弦在旁，挾由便也。古文「挾」皆作「接」。【疏】正義曰：《校勘記》曰：「袒決遂」「袒」，唐石經作「袒」，誤。注「帳幃席爲之」「帳」，徐本、《通解》、楊、敖俱作「張」。案：「張」是也。「所以遂弦也」「所」，聶氏作「裏」。「弣，弓把也」「把」，《釋文》、楊氏俱作「把」。○張氏爾岐曰：「此下方及射事，有三耦不釋獲之射，有三耦衆耦釋獲之射，有以樂射，共三番射，亦略如鄉射之節。自此至「左右撫之，興，反位」，皆言三耦不釋獲之射。司射納器、比耦，司射誘射，三耦乃射，射已取矢，凡四節。」注云

「司射，射人也」者，敖氏曰：「亦大射正也。《燕禮》曰：大射正爲司射。」^①是其徵矣。諸侯之大射正蓋上士二人。」盛氏曰：「大射正與射人尊卑蓋有間矣。燕射以大射正爲司射，此以射人爲司射。不同者，燕本不爲射，故其初但以射人爲擯，又爲司正，及射而後以大射正爲司射；此禮專爲射，故其初即以大射正爲擯，爲司正，至是則以射人爲司射也。敖引《燕禮》釋此，誤。」案：盛氏駁敖說，非也。《釋官》亦云：「司射當亦大射正爲之。」云「耦次在洗東南」者，賈疏云：此無正文。案：《鄉射·記》云：設楅楠南北當洗。此下三耦拾取矢，出次西行，又北行鄉楅，則次在洗東南也。云「弣，弓把也。見鏃焉，順其射也」者，敖氏曰：「執弓，左手執弣也。挾乘矢于弓外，謂挾四矢，而矢在弦弣之外也。見鏃于弣，明其方執而左鄉，及指間前後之節也。」自阼階前曰：「爲政請射。」爲政，謂司馬也。司馬，政官，主射禮。【疏】正義曰：姜氏曰：「鄉射先請賓，次請主人，主於尊賓；大射不請賓，但請公，主於尊君。」

注云「爲政，謂司馬也」者，敖氏曰：「爲政，爲射政者也。言此者，亦示己不敢擅其事也。階前北面白於公。」方氏苞

① 「爲」，原作「如」，今據《續清經解》本改。

曰：「爲，去聲。言爲政典而請射主于事，非指其人也。『國之大事在祀與戎』，故於禮辭特著其義曰『爲政』。若鄉射以教學士，燕射以樂賓，無庸及此。注以爲司馬之稱，則司馬當自請於君，不宜使司射請，且君前臣名，不宜隱其名，而曰『爲政』也。」案：「爲政」當以方說爲長。遂告

曰：「大夫與大夫，士御于大夫。」因告選三耦於君。御，由侍也。大夫與大夫爲耦，不足則士侍於大夫，與爲耦也。今文「於」爲「于」。【疏】正義曰：《校勘記》曰：「遂告曰『曰』，石經補缺誤作『于』。注『猶侍也』『猶』，陳、閩、監、葛、《通解》俱作『由』。」注云「因告選三耦於君」者，敖氏曰：「此以在堂上者爲耦之法告公也。」張氏爾岐曰：「既請射得命，遂告君以比耦也。」盛氏曰：「敖說得之，注非。云『大夫與大夫爲耦，不足則士侍於大夫，與爲耦也』者，敖氏曰：『此大夫亦兼諸公、卿而言。不言士與士者，略賤也。』方氏苞曰：『侯國三卿、五大夫，或從王事，或交于友邦，或疾或喪，不能成耦，故以士御之。公卿不能成耦者，亦以大夫御可知。敖云：不言士與士，略賤。非也。與尊者作耦，自宜特文以見之。上經云『戒士射』，則皆與射，而自爲耦不待言矣。」韋氏協夢曰：「大夫與大夫爲耦，常禮也。但耦必兩人，若餘一大夫，則以大夫爲上

射，而以士爲下射，故曰『士御于大夫』。諸公不得稱大夫，說已見《燕禮》。此大夫亦祇謂三等大夫也。不言諸公者，諸公非常有。若有諸公，亦諸公爲上射，大夫爲下射與？」胡氏肇昕曰：「此言在堂上者爲耦之法。在堂上者不足，則以在堂上者之士御于大夫，故特告之。若公、卿、大夫之盡在堂上者，其爲耦自有一定之法，無待告矣。」褚氏寅亮曰：「敖氏以此爲堂上爲耦之法告公，似較注『告選三耦』之義爲長。蓋三耦以士爲之，而所貢之士容與其中，故司射誘射有教之之意，未必以大夫爲也。且此時大夫已就席矣，下比三耦而不著大夫降文，可見三耦之爲士也。」吳氏廷華曰：「三耦當是鄉遂所貢士，必無用士大夫之理。鄉射與此經三耦外俱別有士大夫之耦，則不當混而一之矣。此方在請射之初，不但未比士大夫之耦，且未比三耦，烏得遂有大夫與大夫、士御于大夫之說？且如鄉射請射後，即命弟子納器，然後比三耦，則此二語自不應在請射、納矢之間。疑此當在下文第二番射比耦節中，諸公卿皆未降之下，蓋錯簡耳。注謂『告選三耦於君』，不知三耦未比，烏得以所選告君？」遂適西階前，東面，右顧，命有司納射器。納，內也。【疏】正義曰：賈疏曰：「言有司，則前文『司士戒士射與贊者』注云『謂士佐執事不射者』是也。」

鄉射，西階前西面，命弟子納射器。此言東面者，君在阼，宜向之。」「右顧者，以有司是士，士在西階南東面，是以右顧向之。」敖氏曰：「東面而右顧者，爲有司在南也。此有司，其旅食者與？」上經云：「士旅食者在士南，北面東上。」命之之儀如是者，以其賤也。」盛氏曰：「東面右顧者，示命出於君也。有司，敖說近是。」射器皆入。君之弓矢適東堂，賓之弓矢與中、籌、豐皆止于西堂下。衆弓矢不挾。總衆弓矢、楅，皆適次而俟。中，間中，算器也。籌，算也。豐，可奠射爵者。衆弓矢，三耦及卿大夫以下弓矢也。司射矢亦止西堂下。衆弓矢不挾，則納公與賓弓矢者挾之。楅，承矢器。今文「俟」作「待」。【疏】正義曰：注「司射矢亦止西堂下」，《校勘記》曰：「案：疏所據本『矢』上似有『弓』字，故賈氏辨其誤，然述注仍無『弓』字，未詳。」○敖氏曰：「總，謂以物合而束之也。衆弓衆矢，異束之。賓之弓與矢皆不在堂上，遠下君也。衆弓矢不挾，亦以其多也。中、籌、豐在堂西，楅在次，各近其所設處也。俟者，兼指射器之在三處者也。」盛氏曰：「東堂，謂東序東也。弓倚于東序，矢在其下，北括。」注云「中，間中」者，賈疏云：「《鄉射·記》云：『于郊則間中。』據此，大射，故知間中。」敖氏曰：「此射

于公宮，則中乃皮樹中也。《鄉射·記》曰：「君國中射皮樹中。」盛氏曰：「大射在郊，敖說非。」云「司射矢亦止西堂下」者，賈疏云：「下文云：『司射卒誘射』，遂適堂西，改取一个挾之。是也。」云「今文『俟』作『待』者，胡氏承琪云：『俟，當作『俟』。《說文·人部》俟訓大，與此無涉。《疾部》云：『俟，待也。』《彳部》云：『待，俟也。』二字義相轉注，聲亦同部，故可通用。然《禮經》多用『俟』，少用『待』，故鄭從古文。」工人士與梓人升自北階。兩楹之間疏數容弓，若丹若墨，度尺而午。射正莅之。工人士、梓人，皆司空之屬，能正方圓者。一從一橫曰午，謂畫物也。射正，司射之長。【疏】正義曰：《校勘記》曰：「射正莅之，『莅』，陳、閩、監、葛俱作『蒞』。案：蒞、蒞、蒞、蒞，諸本錯出，後不悉校。注「一從一橫曰午」，《釋文》「一」作「壹」。○敖氏曰：「北階，北堂之階也。兩楹之間，言當楣也。疏數，猶廣狹也，言二物從畫相去廣狹之度也。射正升階，蓋自西階。」郝氏曰：「蒞，臨視也。」方氏苞曰：「南堂之前，射者，①正司禮事者、掌射政者、共獻薦者、樂器、射器皆陳焉。工人士、梓人、司宮畫物外別

①「者」，原脫，今據《儀禮析疑》補。

無所共之事，故並立北階下。升自北階，自北堂由東房，以至於堂也。宗廟之祭，婦人由北堂以入東房。冠之日，贊者入北堂，以洗爵而酌于房中，則東房與北堂相通明矣。」

注云「工人士、梓人，皆司空之屬，能正方圓者」，《釋官》

曰：「《左傳》諸侯有工正之官，工人士疑即其屬。」《考工記》云：「梓人爲侯。」侯有采畫之事，故與工人士主畫物也。「云「一從一橫曰午，謂畫物也」者，賈疏云：「度尺者，即《鄉射·記》從如筭三尺，橫如武尺二寸」是也。」①王氏引之《述聞》曰：「案：度尺者，其度一尺也。度尺而午者，從度一尺，橫度亦一尺也。大射爲諸侯之禮，故不與鄉射同。若仍以鄉射之物解之，則經文何不云「從三尺，橫尺二寸」，而但云「度尺」邪？《考工記》：玉人之事，璧羨度尺。鄭彼注：「羨，猶延。其袤一尺。」是度尺爲度一尺之明證。再以設乏例之。鄉射之乏去侯北十丈，西三丈，從長而橫短；猶物之從三尺，橫長尺二寸，亦從長而橫短也。大射之乏去侯西、北皆十步。十步爲六丈，從與橫等，猶物之度尺而午，亦從與橫等也。大射之物與鄉射異度，猶大射之乏與鄉射異度也。鄭注《鄉射·記》不引「度尺而午」，注《大射儀》不引「物長如筭」、「距隨長武」，則其不同可知。賈氏未達鄭意耳。」案：王氏解度尺是也。云「一從一橫曰

午」者，《史記·律書》云：「午者，陰陽交，故曰午。」是午爲陰陽交互，因之縱橫交互亦謂之午也。午與五聲同，古相通用。《周禮·壺涿氏》：「則以牡槀午貫象齒而沈之。」

注：「故書「午」爲「五」。」又《左氏》成十七年傳：「晉夷羊五。」《晉語》作「夷羊午」。故五亦有交午之義。《說文》：「五，五行也。从二，陰陽在天地間交午也。」「五」字古文作「×」，象陰陽交午之形。「一從一橫曰午」，正「五」字古文之形也。古之物象，蓋取諸此。說者謂若十字形，非是。

褚氏寅亮曰：「工人士與梓人非內官，北堂下恐無其位，注侯考。一從一橫曰午。從畫爲射者兩足間之界，橫畫爲射者兩足立處，即距隨也。二物皆然。」《疏數容弓》，乃指二物橫畫兩端中間空地言，容六尺，則司馬往來不礙矣。敖氏指爲從畫相去之數，不太偏乎？射正，疑即司射，畫物以前尚仍本官之稱，至西面誓耦則改稱司射，猶擯者之改爲司正也。」卒畫，自北階下。司宮埽所畫物，

自北階下。埽物，重射事也。工人士、梓人、司宮位在

北堂下。【疏】正義曰：注云「埽物，重射事也」者，郝氏

①「武」，原作「式」，今據《續清經解》本改。

曰：「埽畫物處，使分明。」張氏爾岐曰：「既畫，復埽之，取略辨從橫而已。」云「工人士、梓人、司宮位在北堂下」者，賈疏云：「其人升降自北階，明位在北堂下。」盛氏曰：「工人士、梓人、司宮，蓋皆下士也，其位當在士南。」注云「在北堂下」，非。天子宮人以中士爲之，則諸侯司宮爲下士明矣。工人士、梓人與司宮皆升降于北階，知其亦賤矣。」大史俟于所設中之西，東面以聽政。中未設也，太史俟焉，將有事也。《鄉射禮》曰：「設中，南當楅，西當西序，東面。」【疏】正義曰：注云「中未設也，大史俟焉，將有事也」者，敖氏曰：《鄉射禮》曰：「設中，南當楅，西當西序。」又曰：「乃設楅于中庭，南當洗。」是時中與楅皆未設，大史蓋南當洗，西直西序之西而立也。政，即司射所誓之事。張氏爾岐曰：「中尚未設，而云『所設中之西』，謂其擬設中之地之西也。」《周禮·春官·大史職》云：「凡射事，飾中舍算，執其禮事。」司射西面誓之曰：「公射大侯，大夫射參，士射干。射者非其侯，中之不獲！卑者與尊者爲耦，不異侯！」大史許諾。誓，猶告也。古文「異」作「辭」。【疏】正義曰：敖氏曰：「釋獲之事，未至乃誓之，欲其豫識之也。」郝

氏曰：「時司射立西階前，①轉向大史誓之。」張氏爾岐曰：「侯以尊卑異，同耦則卑者得與尊者共侯也。」注云「古文『異』作『辭』」者，胡氏承珙曰：案：異與辭雖聲可通，而形義皆不相近。經言同耦，則同射一侯，故鄭從今文作「不異」。案：《義疏》曰：「《鄉射》：初張侯，不繫左下綱；將射，則命弟子繫之。此張侯之初，亦云「不繫左下綱」。及將射，經不言繫，可知也。」遂比三耦。比，選次之也。不言面者，大夫在門右北面，士西方東面。【疏】正義曰：賈疏云：天子大射，賓射六耦三侯，畿內諸侯二侯四耦，②畿外諸侯三耦三侯。若燕射，則天子、諸侯同三耦一侯而已。卿、大夫、士例同一侯三耦。盛氏曰：《周禮》云：以四耦射二侯，內諸侯之賓射也。此以三耦射三侯，外諸侯之大射也。其賓射亦當用四耦。《春秋》襄二十九年《左傳》云：范獻子來聘，公享之，射者三耦。蓋與他國之臣射故爾。疏誤。又案：《周禮·大司馬職》云：「若大射，則合諸侯之六耦。」此諸侯大射不使司馬比耦，而使司射者，遠下天子也。」注云「大夫在門右北面，士西方東

①「前」下，《儀禮節解》有「東面」二字。

②「侯四耦」，原作「耦四侯」，今據《儀禮注疏》改。

面」者，盛氏曰：「是時大夫在堂。注云『在門右』，非。」張氏惠言曰：「注以三耦大夫爲之，司射就門東比耦；不足，乃就西方比士。案：大夫皆升就席，門東無大夫。經言『遂比三耦』，明西面比士也。」吳氏廷華曰：「鄉射三耦，爲習射之弟子，與賓主及衆射者不同。此經三耦儀節位次與鄉射等，豈澤宮亦有習降之弟子與？敖氏則以三耦爲士，但西方諸士下所謂大夫之耦等，自人卿、大夫射中，不在三耦之列，或初試爲士者，使習射於此，是未可知。要之，與射人六耦、四耦各異也。即如射人言諸侯四耦，此大射固諸侯禮，而經第言三耦，其不同可知矣。據傳，不能備二耦，說本指正射者言，則射人所謂六耦、四耦者，正射者也。此及鄉射所謂三耦者，習射者也。注乃以大夫、士言之，以門右北面等說釋不言面之義，蓋據鄉射三耦南面，司射北面相向比之，則此比大夫當南面，比士當西面也。不知上經明言三耦西面北上，則非北面、東面之大夫、士可知。且三耦既西面，則司射東面又可知。乃以大夫、士之位爲說，不惑甚乎？」三耦俟于次北，西面北上。未知其耦。今文「俟」爲「立」。【疏】正義曰：注云「未知其耦」者，張氏爾岐曰：「但知爲三耦，未知孰與孰耦也。」敖氏曰：「三耦皆士也，亦司射前戒之。故先立於此以待比也。俟

于次北，便其入也。此乃未比時之位，若既比，則位於次中矣。」郝氏曰：「三耦始誘射，皆士。次在堂下東南，士立次外之北，西鄉以俟。鄉射三耦立堂西，此立堂東者，大射射器在東，統於君也；鄉射射器在西，統於賓也。」盛氏曰：「大夫自受獻之後，皆升就席，至此經不見其降，①而直云『三耦俟于次北』，則三耦以士爲之明矣。且鄉射三耦使弟子，大射使士，亦其宜也。」案：注以三耦有大夫，故云「未知其耦」。考司射之誓云公、云大夫、云士，則三耦宜有大夫。但經未明著大夫降席，或初射之三耦皆以士爲之與？司射命上射曰：「某御于子。」命下射曰：「子與某子射。」卒，遂命三耦取弓矢于次。取弓矢不拾者，次中隱蔽處。【疏】正義曰：注云「取弓矢不拾」者，張氏爾岐曰：「鄉射堂西取矢，則拾取。拾取，更迭而取也。」敖氏曰：「亦命之讓，取弓矢、拾，經文省耳。」盛氏曰：「注說非也。於顯露處則修儀，於隱蔽處則廢禮，豈聖人制作之意哉？」當以省文之說爲正。」敖氏曰：「此下當有三耦袒決遂、拾取弓矢之事，亦文不具也。三耦既

①「其」，原重文，今據《續清經解》本刪。

取弓矢，遂立于次中，而西面北上。褚氏寅亮曰：「注蓋言非不拾也，拾而人不見之，故不著其文。」

右請射納器誓射比耦

司射入于次，搢三挾一个，出于次，西面，揖，當階北面，揖；及階，揖；升堂，揖；當物北面，揖；及物，揖。由下物少退，誘射。搢，扱也。挾一个，挾於弦也。个，猶枚也。由下物而少退，謙也。誘，猶教也。「夫子循循然善誘人。」【疏】

正義曰：方氏苞曰：「《大射》有次，非獨以國君具官有張耦次者也。州長會民于序，習射尚功，以角材力習威儀，與射者皆少壯強有力之士，無所用次。大射，則公、卿、大夫皆與焉。老者立而待事，必有所休息，以安其筋骸；貴者降于階庭，必有所隱蔽，以肅其體貌。又鄉射舉於春秋，而擇士以祭則兼冬夏，嚴風烈日，勢不可以無次。若鄉射禮亦宜然，則黨共射器，何難具幄、幙、帟、案哉？」敖氏曰：「既搢挾，則立于三耦之北，而後出次。出次乃西面，是由次北出矣。此射三侯，故不言視侯中；不在物，故不言俯正足。」注云「由下物而少退，謙也」者，敖氏曰：「由下物

少退，以其亦射大侯，故不敢履下物，辟君也。」引《論語》，又以證誘之義也。吳氏廷華曰：「敖氏謂不履下物爲辟君，但據下經，上射亦履下物，何也？自當以注說爲是。」

案：《義疏》云：「《鄉射》三耦初在堂西，且未取弓矢，故誘射之先，有取弓矢及進立于射位之節。此比耦入次即取弓矢，又次即射位，司射位亦在次，與彼經先立于所設中之西南，後又就射位于三耦之北者不同。故亦止以入次、出次爲節。」射三侯，將乘矢，始射干，又射參，大侯再發。將，行也。行四矢，象有事於四方。《詩》云：「四

矢反兮，以禦亂兮。」【疏】正義曰：始射干，誘射主於三耦也。三耦，士也，故先射士侯，乃次及其上。大侯再發，以其尊異之也。盛氏曰：「始射干，亦以司射士也。」卒射，北面揖。揖於當物之處。不南面者，爲不背卿。【疏】

正義曰：敖氏曰：「北面揖者，爲下射與君同物，不可南面揖于楹間，嫌也。」郝氏曰：「卒射北面揖，敬君事，殊於鄉射揖南面也。」盛氏曰：「此北面者，執臣禮也。雖爲上射，亦然。觀下經三耦卒射之儀，可見矣。注說固曲說，後二說亦未爲得也。」方氏苞曰：「卒射大節，故北面揖，示爲誘射而射君之侯，如復於君也。鄉射之主人，州長也，故司射

南面而揖。大射君在阼，司射在堂，而南面對君以揖，則義必不可。蓋臣在君所，奉命而執事，時或南面，司馬揚弓、箠人抱著之類是也。行禮則未有不北面者，故雖聘賓啐醴必降筵北面。注謂「不背卿」，則鄉射公卿之位亦在尊東，而南面揖。敖氏曰：「爲下射與君同物，不可南面。」然司射少退，乃不敢踐君之射位，非北面揖之正義也。」褚氏寅亮曰：「誘射者，南面而射即南面揖亦可，而必北面者，鄭謂「不背卿」是也。如敖說，則三耦射時上射不履君物，何以亦北面揖？」及階，揖降，如升射之儀。遂適堂西，改取一个挾之。改，更也。不射而挾矢，示有事也。【疏】正義曰：敖氏曰：「如升射之儀，爲堂上所不見之揖言也。降而遂適堂西，則不由其所立位之南矣。此射者不在堂西，射位又不在西方，故其儀與鄉射異。」盛氏曰：「如升射之儀者，如其堂上三揖、堂下三揖也。每至故揖處皆北面揖，及將折而北行，適堂西則東面揖歟？若然，則降階亦南行，當洗南，而後西向北折以適堂西也。經不以其位爲節者，此時司射未有位也。云「遂」者，見其間無他事也。若自階下適堂西，則堂下祇有二揖矣。且非所以教衆耦威儀之法也。敖說恐未是。西階西有樂縣，豈得由縣間往來乎？《鄉射》注云：「南面揖，揖如升射。」故每

至故揖處，皆南面揖，及北折而適堂西，則西面揖。皆與此異。遂取扑搯之，以立于所設中之西南，東面。扑，所以撻犯教者也。於是言立，著其位也。《鄉射·記》曰：「司射之弓矢與扑倚于西階之西。」【疏】正義曰：「遂取扑」，《校勘記》曰：「盧文弨曰：『唐石經初並作扑，後改從扌。』」○敖氏曰：「遂取扑，則扑亦在堂西矣。所設中之西南，其南北亦南于洗，而東西則直西雷與？此禮三耦之位，在東方，故司射至是乃得定其位於此，與鄉射異也。」方氏苞曰：「鄉射無次，故司射先立於中之西南，使三耦先立於西南以俟射。大射先比三耦於次，北面命取弓矢，俟誘射畢，然後定位於中之西南也。」

右司射誘射

司馬師命負侯者：「執旌以負侯。」司馬師，正之佐也。欲令射者見侯與旌，深志於侯中也。負侯，獲者也。天子服不氏，下士一人，徒四人，掌以旌居乏待獲。析羽爲旌。【疏】正義曰：《校勘記》曰：「注「欲令射

①「從」，原作「作」，今據《十三經註疏校勘記》改。

者」，《通解》無「欲」字。「深志與侯中也」「與」，徐本，《通解》、楊氏俱作「於」。「掌以旌居乏待獲」「旌」，陳、閩、監、葛俱誤作「族」。「云「司馬師，正之佐也」者，盛氏曰：「司馬師，蓋軍司馬之佐也。」《釋官》詳下「司馬正」。注

云「負侯，獲者也。天子服不氏，下士一人，^①徒四人，掌以旌居乏待獲」者，賈疏云：「引天子服不氏者，欲見諸侯亦三侯，亦使服不氏與徒爲獲者也。」《釋官》曰：「《周禮·服不氏職》曰：『射則贊張侯，以旌居乏而待獲。』服不主唱獲，故經又謂之獲者。」^②據下注，負侯與獲者是二人，但對文有異，散文則其事均主於獲。負侯亦謂之獲者，是以注云「負侯，獲者也」。盛氏曰：「負侯者主負侯及取矢之事，於天子射鳥氏也。《周禮·射鳥氏職》云：『射則取矢，矢在侯高，則以并挾取之。』是其徵矣。諸侯蓋以庶人在官者爲之，三侯各一人。注以爲即獲者，非。」胡氏肇昕曰：「《服不氏職》有『射則贊張侯，以旌居乏而待獲』之文，而《射鳥氏》僅云『射則取矢』，不足爲此經之證。當以注說爲是。」云「析羽爲旌」者，《周禮·司常》文。敖氏曰：「旌，謂翻旌。《鄉射·記》曰：君國中射，以翻旌獲。」盛氏曰：「凡獲者所持，皆謂之旌。《司常職》曰：凡射供獲旌。是也。三侯之旌各不同。大侯之旌，以析羽爲之。《鄉射·

記》云：于郊，則以旌獲。是也。參侯、干侯之旌，以雜帛爲之。《鄉射·記》曰：『旌各以其物。』是也。其旌杠之長短亦異。約《鄉射·記》言之，鄉侯上綱去地丈九尺二寸，而旌杠長三仞。依鄭說，七尺曰仞，則旌蓋出侯尺八寸矣。由斯而推，干侯與鄉侯同。參侯去地三丈二尺五寸少半寸，其旌當長三丈四尺三寸少半寸，爲五仞而弱也。大侯去地四丈八尺五寸少半寸，其旌當長五丈三寸少半寸，爲七仞而強也。旌必出于侯尺八寸者，欲射者見而識之，且以爲別也。敖以旌爲翻旌，固非。鄭統以析羽釋之，而不知其別，於經旨豈盡得哉？」^③褚氏寅亮曰：「命時立位宜在西階前南北之中，大射在郊學，中以間，獲以旌。敖氏欲與注異，而并違經。」增案：《義疏》云：「鄉射命張侯，遂命倚旌。此上經未聞有倚旌之命，下經言『適侯執旌』，則旌固在侯上。經不言命倚旌，文省耳。又三耦不言『袒決遂』可知也。」負侯者皆適侯，執旌負侯而俟。司射適次，作上耦射。作，使也。【疏】正義曰：敖氏

①「一」，原作「二」，今據注文改。

②「又」，原作「文」，今據《儀禮釋官》改。

③「旨」，原脫，今據《儀禮集編》補。

曰：「東面作之。」盛氏曰：「鄉射射位在西，故作射者西面。」大射次在東，故作射者東面也。」韋氏協夢曰：「作上耦，亦當上下射之間而作之也。」司射反位。上耦出次，西面揖進。上射在左，並行。當階北面揖，及階揖。上射先升三等，下射從之，中等。上射在左，便射位也。中，猶間也。【疏】正義曰：注云「上射在左，便射位也」者，張氏爾岐曰：「發位並行及升，上射皆居左；履物，南面，上射乃在右，右物爲上也。」盛氏曰：「鄉射三耦，東面北上。上射本在下射之左，大射三耦，西面北上。立時上射在右，及發位並行，則上射轉居左。必居左者，以便其就右物也。下射在右，就左物亦便。」褚氏寅亮曰：「鄉射耦東行，上射在左，則居北。此耦西行，上射在左，則居南。及階，則上射總在西。」上射升堂，少左。下射升，上射揖，並行。並，併也。併東行。皆當其物北面揖，及物揖。皆左足履物，還，視侯中，合足而俟。視侯中，各視其侯之中。大夫耦則視參中，參中十四尺。士耦則視干中，干中十尺。【疏】正義曰：《校勘記》曰：「還視侯中」「視」，

《通解》誤作「俟」。注「則視參中」「視」誤作「射」。○敖氏曰：「侯中，干侯之中也。」盛氏曰：「三耦皆士，皆當射干。敖說是。」司馬正適次，袒決遂，執弓，右挾之，出；升自西階，適下物，立于物間；左執弣，右執簫，南揚弓，命去侯。司馬正，政官之屬。簫，弓末。揚弓者執下末。揚，猶舉也。適下物，由上射後東過也。命去侯者，將射當獲也。《鄉射禮》曰：「西南面立于物間。」【疏】正義曰：「命去侯」，《校勘記》曰：「侯，石經補缺、閩、監、葛本俱誤作「俟」。案：《提要》云：「監本沿唐石經之誤，今石經已缺，後人所補不足憑，俟得舊本攷之。」注云「司馬正，政官之屬」者，賈疏云：「案：天子有大司馬、卿一人，小司馬、中大夫二人。此雖諸侯禮，亦應有小司馬，號爲司馬正也。」敖氏曰：「司馬正與司馬師乃射時所立之官，如司射之類也。」盛氏曰：「《周禮·序官》云：「政官之屬：大司馬、卿一人；小司馬、中大夫二人；軍司馬，下大夫四人。諸侯司馬，卿；小司馬，下大夫，各一人。」軍司馬，蓋上士二人矣。此云「司馬正」，即軍司馬之長也；上云「司馬師」，即其佐也。司射以射人爲之，則司馬二人皆以士爲之，亦其宜也。知非司馬及小司

馬者，以三卿、五大夫之位皆在堂，不在下故也。司馬正袒而決遂，且挾弓，大射禮重也。《鄉射禮》云：「司射適堂西，不決遂，袒執弓。」方氏苞曰：「《周官》：『一曰正，掌官法以治要；二曰師，掌官成以治凡』，謂六官之正與貳也。此經司馬正與司馬師，敖氏以爲射時所立之官，經旨始明，注義亦可通。《周官》大司馬教振旅，辨鼓、鐸、鐃、鐃之用。伍長與二十五人之長，皆得假以公司馬、兩司馬之名，則因射而立監，得假以正與師之名明矣。知非司馬之卿與貳者，卿、貳席位在堂上，此正與師射時與司射聯事，而終獻獲者則非卿、貳決矣。《周官》：「軍司馬，下大夫四人。與司馬，上士八人。行司馬，中士十有六人。」侯國爵制雖降，員數雖減，而職司必具。司馬正宜取諸軍司馬，司馬師宜取諸與司馬、行司馬。《釋官》曰：「案：諸侯五大夫有小司馬。疏謂『號爲司馬正』，非也。此司馬正，司馬師射時所使監射事者，正與師皆臨事設立之名，非其官之本號。諸侯小司馬，卿貳之官，席位在堂上，即經云『小卿賓西東上』者，是此正與師射時與司射聯事，又主獻服不，不當以卿貳爲之。」①《周禮》小司馬下有軍司馬、與司馬、行司馬，《左傳》晉有中軍司馬、上軍司馬，《國語》又有元司馬、與司馬。然則諸侯亦當有軍司馬、與司馬之官，以士爲之。正與師，

蓋取諸此也。又案：《鄉射》以司正爲司馬止一人，此篇別有司馬之官，不以司正爲之，又正與師各一人，與《鄉射》異也。云「適下物，由上射後東過也」者，敖氏曰：「適下物，由上射後而少南行也。此行而立於物間，乃云『適下物』者，下言司馬正出於下射之南，還其後，故於此惟據下物而言。」負侯皆許諾，以宮趨，直西；及乏南，又諾以商；至乏，聲止。宮爲君，商爲臣，其聲和相生也。《鄉射禮》曰：「獲者執旌許諾。」古文「聲」爲「聲」。【疏】正義曰：敖氏曰：「宮、商，皆謂諸聲也。宮大商小，趨直西，至乏南，乃折而北，不自侯西北行者，不敢由便也。古人步趨有法，雖賤者猶謹之而不苟如此，則其上者可知矣。先宮後商乃止，亦有漸也。」注云「宮爲君，商爲臣」者，《樂記》文。引《鄉射禮》者，證與此不同之意。「古文『聲』爲『聲』」者，胡氏承珙曰：「古文『聲』爲『聲』者，字之誤。」授獲者，退立于西方。獲者興，共而俟。大侯，服不氏負侯，徒一人居乏，相代而獲。參侯、干侯，徒負侯居乏，不相代。《鄉射禮》曰：「獲者執旌，許諾，聲不

①「當」，原脫，今據《儀禮釋官》補。

絕，以至于乏。坐，東面偃旌，興而俟。」古文「獲」皆作「護」，非也。【疏】正義曰：注云「大侯，服不氏負侯，徒一人居乏，相代而獲。參侯，干侯，徒負侯居乏，不相代」者，張氏爾岐曰：「授獲者，謂以旌授代己而獲之人，指大侯也。餘二侯，則負侯獲者本一人，但偃旌而俟。如《鄉射》所云也。」《釋官》曰：「案：鄉射止一侯，負侯獲者以一人爲之，大射三侯，大侯則服不負侯，其徒代負；參侯，干侯，則負侯獲者亦一人，與大侯異也。」敖氏曰：「授獲者以旌也。或曰『者』下當有『旌』字，蓋文脫耳。授旌而退，三侯者皆然，則其負侯居乏者之相代，亦宜同也。退立于西方，各當其乏之西與？獲者既偃旌於地，乃興。」盛氏曰：「獲者，大侯服不也。《周禮·服不氏職》云：『射則以旌居乏而待獲。』諸侯其以庶人在官者爲之與？參侯，干侯，則其徒二人也。《孟子》云：『庶人在官者，其祿以是爲差。』則其尊卑亦微有辨矣。負侯者各以其旌授獲者而退，事畢也。立于西方，蓋在土南，東面南上與？知在土南者，不敢與土序也。東面，異於土旅食者也。南上，統於侯也。以負大侯者爲上。負侯者位在西方，獲者位在乏，不相侵也。舊說負侯居乏相代，恐未然。鄉射以獲者兼負侯，臣禮省也。」云「古文『獲』皆作『護』，非也」者，胡氏承珙曰：

「古文『獲』作『護』者，聲之誤。」司馬正出于下射之南，還其後，降自西階；遂適次，釋弓，說決，拾，襲，反位。拾，遂也。《鄉射禮》曰：「司馬反位，立于司射之南。」【疏】正義曰：注引《鄉射禮》者，證此反位立處與之同也。褚氏寅亮曰：「上云『適次』，①下云『反位』，其位蓋近于次，然在次外，非即次中也。下經大夫立于三耦之南，諸公卿繼三耦以南，俱次外之位。三耦最北，其南諸公、卿，其南大夫也。又言諸公、卿取弓矢于次中，明從次外而入。若先在次中，則經不言于次中矣。又經於三耦之拾取矢而退也，曰釋弓矢于次，說決、拾、襲、反位；于諸公、卿之卒射也，文亦同。益可決次自次，而位自位矣。敖氏以三耦及公、卿、大夫、士，俱於次中有所立之位，不知設次止以隱蔽袒襲，且以委弓矢楅等，豈有位乎？自此一誤，②凡遇射者，於入次、出次之節無不誤矣。」司射進，與司馬正交于階前，相左；由堂下，西階之東，北面，視上射，命曰：「毋射獲！毋獵！」

①「次」，原脫，今據《儀禮管見》補。

②「誤」，原作「誤」，今據《續清經解》本改。

獲！」上射揖。司射退，反位。射獲，矢中乏也。

從旁爲獵。【疏】正義曰：「交于階前」，《校勘記》曰：「于陳、閩、監、葛俱誤作『與』。」○張氏爾岐曰：「司射位在所設中之西南，東面。」乃射，上射既發，挾矢，而后下射射，拾發以將乘矢。拾，更也。將，行也。獲者坐而獲。坐言獲也。【疏】正義曰：謂射者中，則獲者坐而言獲也。敖氏曰：「此指在干侯之乏者也。大侯、參侯者，亦坐而不獲。」盛氏曰：「此時大侯、參侯之獲者共立自如，不唱獲，不坐也。敖云『亦坐』，非。」舉旌以宮，偃旌以商，等言獲也。【疏】正義曰：注「等言獲也」，

《校勘記》曰：「等，徐本、楊氏俱作『再』，《通解》作『等』。」獲而未釋獲。但言獲未釋算。古文「釋」爲「舍」。卒

射，右挾之，北面揖，揖如升射。右挾之，右手挾弦。【疏】正義曰：郝氏曰：「卒射右挾之，謂矢發盡，左手執弓，右手大二指挾弓弦，就物內轉向北揖，異於鄉射也。」方氏苞曰：「鄉射皆執弓不挾，而此右挾，擇士以祭，儀彌謹也。」上射降三等，下射少右，從之，中等，並行，上射于左，與升射者相左，交于階前，相

揖。適次，釋弓，脫決拾，襲，反位。上射于左，

由下射階上少右，乃降待之。言襲者，凡射皆袒。【疏】正義曰：《校勘記》曰：「上射降二等」「二」，唐石經、徐本、《通解》、楊、敖俱作「三」，是也。《石經考文提要》曰：「疏明釋三等及下文中等之義。」上射于左「于」，陳、閩、監、葛俱誤作「與」。○敖氏曰：「位，次中之位也。亦西面北上。下凡言三耦之位，皆放此。」盛氏曰：「案：上經云：『司射適次，作上耦射。司射反位，上耦出次。』則三耦位在次中明矣。郝氏云反次北西面北上之位，非。」吳氏廷華曰：「必少右者，爲並行計耳。既並行，則亦並降可知。何降而待之之有？」三耦卒射亦如之。司射去扑，倚于階西，適阼階下，北面告于公，曰：「三耦卒射。」反，搯扑，反位。【疏】正義曰：敖氏曰：「去扑者，與尊者言，不敢佩刑器也。」姜氏曰：「鄉射卒射告于賓者，尊賓也。此不告于賓者，公尊也。鄉射，賓揖，司馬乃降、搯扑、反位。此不揖者，君非賓比也。」

右三耦射

司馬正袒決遂，執弓，右挾之，出，與司

射交于階前，相左。出，出於次也。袒時亦適次。

【疏】正義曰：注云「袒時亦適次」者，賈疏云：「凡袒、襲皆於隱處。」敖氏曰：「不言司馬正適次者，以下言『出』，則適次可知。亦以上有成禮，故於此省文也。」升自西階，

自右物之後，立于物間，西南面，揖弓，命取矢。揖，推之。【疏】正義曰：「揖弓」「揖」，楊氏作「挾」，

注同。注「推之」之「誤作」也。負侯許諾，如初去

侯，皆執旌以負其侯而俟。俟，小臣取矢，以旌指

教之。【疏】正義曰：敖氏曰：「此負侯，即獲者也。如初

去侯，謂許諾以宮、商，至乏聲止也，惟去來異耳。三耦所射，干侯而已。而三侯之負侯者，皆執旌以往者，卑統於尊，且矢亦有遠近故也。」張氏爾岐曰：「負侯許諾，如

初去侯」，如去侯時之諾以宮，又諾以商也。」盛氏曰：「此負侯，即立于西方者。云『如初去侯』，則諸聲起於乏，自西方至乏，不諾也。『如初』之下復云『去侯』者，以別於初負

侯之時不諾也。云『皆執旌』，則獲者又以旌授之矣。」褚氏

寅亮曰：「每侯負侯者，獲者固各有一人矣。然獲者常居於乏，負侯者則去侯而乏之，自乏而趨侯，各司其事，似未可謂之代。前經云：『授獲者退立于西方，獲者興，共而

俟。」此不相代之明證。又注謂參、干無代，以服不官止一人耳。然亦可使徒爲之，似三侯皆有二人之說爲長。如初，言其聲之宮商同耳。其實，則以宮趨直南至乏西，又諾以商。」朱氏大韶曰：「案：經言『如初』，皆事在上，『如初』在下。如敖說，則當云『去侯如初』。」今案：「去侯」二字似衍。下第二次射云：「司馬命去侯，負侯許諾如初。」司馬命取矢，「負侯許諾，以旌負侯，如初」。蓋未射，則負侯者執旌，負其侯而俟；將射，則去侯取矢，又執旌以負侯。三番射皆然。上文司馬命去侯，負侯皆許諾，以宮趨直西，及乏南，又諾以商，至乏聲止。授獲者退立于西方。此既射，司馬命取矢，負侯者從乏西進，而負侯以俟，不得云「去侯」，故疑爲衍。司馬正降自西階，北面命設楅。

此出於下射之南，還其後而降之。【疏】正義曰：《鄉射禮》

曰：「司馬出於左物之南，還其後，降自西階。」注本之以爲說也。敖氏曰：「北面於所設楅之南。」郝氏曰：「設楅中庭，南與洗齊，故司馬正北面立其南，使設者止，勿過南

也。」小臣師設楅。司馬正東面，以弓爲畢。

畢，所以教助執事者。《鄉射·記》曰：「乃設楅于中庭，南

當洗，東肆。」【疏】正義曰：《校勘記》曰：「東面」「面」，

《通解》誤作「南」。注「鄉射記曰」，浦鏜云：「禮誤記。」乃

設楅「楅」誤作「幅」。○敖氏曰：「司馬正東面，立于所設楅之西也。此楅亦南面坐設之。」郝氏曰：「小臣師設楅，司馬正又轉西，東面立，使設者勿偏西也。」注云「畢，所以教助執事」者，賈疏云：「畢是助載鼎實之物，故司馬執弓爲畢，以指授，若《周禮》投殳以爲鞭度然。」①敖氏曰：

「畢，所以指畫處置之器，以木爲之，其長三尺。此以弓指畫設楅之處，象畢之用，故曰『以弓爲畢』云。凡以畢指教者，皆立於所設器之側。」郝氏云：「畢，竹簡，笏類，形如畢星，即今如意。執以止物曰畢，與蹕通，止也。臣當君前不敢指搗，故以弓當笏止其處。」②張氏爾岐曰：「以弓爲畢，謂以弓指授如載鼎之用畢然。」胡氏肇昕曰：「《特性饋食禮》：『宗人執畢，先入。』注：『畢，狀如叉，蓋爲其似畢星取名焉。』《禮記·雜記》曰：『畢用桑，長三尺。』注：『畢，所以助主人於載者。』是畢長三尺，狀如叉，有似於弓。畢又所以助主人於載者，故以弓爲畢，指授執事者，如載鼎之用畢然。此鄭氏注意也。司馬正以弓爲畢者，指示小臣師以設楅之處。畢有止義。郝氏謂執以止物曰畢，其說亦通。」韋氏協夢曰：「鄉射不言以弓爲畢。此君禮，威儀盛；彼臣禮，可略也。」引《鄉射禮》者，張氏曰：「證此設楅之處也。」既設楅，司馬正適次，釋弓，說決拾，

襲，反位。小臣坐委矢于楅，北括；司馬師坐乘之，卒。乘，四四數之。【疏】正義曰：「卒」字，今

本脫。《校勘記》曰：「唐石經、徐本、《通解》、楊、敖俱有「卒」字。」○盛氏曰：「《鄉射禮》曰：『司馬襲進，當楅南，北面坐，左右撫矢而乘之。』此文省耳。」《釋官》曰：「此當云『小臣師坐委矢于楅』，疑經脫「師」字。上云『小臣師設楅』，則委矢于楅者亦小臣師可知。《鄉射禮》曰：『命弟子設楅，乃設楅于中庭。』又曰：『弟子取矢，北面坐委于楅，北括，乃退。』然則設楅與委矢即一人爲之明矣。以經文考之，此篇射時凡設楅、委矢、設中、退楅之事，皆小臣師主之，而小臣正則惟公射時贊袒、贊襲及飲公時辭賓下拜而已。蓋小臣正位在君之左右，掌正君之服位，出入君之大命，故凡請命贊公釋拜之事皆正掌之，而設楅、委矢之事以使小臣師也。後言小臣委矢者，皆當有「師」字，亦沿此而脫耳。」若矢不備，則司馬正又袒執弓，升，命取矢如初，曰：「取矢不索！」乃復求矢，加

①「度」，原作「庭」，今據《儀禮注疏》改。

②「弓」，原脫，今據《儀禮集編》補。

于楅。卒，司馬正進坐，左右撫之，興，反位。左右撫，分上下射，此坐皆北面。【疏】正義曰：敖氏曰：「又袒執弓，不言決遂，右挾之者，^①可知也。司馬師既乘矢，其備若否，皆以告于正。若不備，則正命取矢。若備，則正亦進撫之也。左右撫者，左手撫其左，右手撫其右，以審定其數耳。」盛氏曰：「司馬師既乘之矣，司馬復進而撫之，慎其事也。」

右三耦射後取矢射禮第一番竟

司射適西階西，倚扑；升自西階，東面請射于公。倚扑者，將即君前，不敢佩刑器也。升堂者，欲諸公、卿、大夫辯聞也。【疏】正義曰：張氏爾岐曰：「此下言三耦、衆耦之射。其在方射時者，^②有命耦，有三耦取矢于楅，有三耦再射釋獲，有公與賓射，有卿、大夫、士皆射，凡五節，其在射以後者，有取矢，有數獲，有飲不勝者，有獻服不、隸僕、巾車、獲者，有獻釋獲者，亦五節，射之「二番也。」注云「升堂者，欲諸公、卿、大夫辯聞也」者，敖氏曰：「請射乃升者，以其後有告耦等事，宜在上爲之故也。東面亦與他儀異。下經云：司正東楹之東，北面告于

公。」公許。遂適西階上，命賓御于公，諸公、卿則以耦告于上，大夫則降，即位而後告。告諸公卿於堂上，尊之也。【疏】正義曰：「即位而後告」，《校勘記》曰：「後，唐石經、徐、陳、監、葛、《通解》、楊、敖俱作「后」。」○敖氏曰：「耦者，謂公、卿自爲耦也。以耦告，亦如命三耦之辭。大夫則降，即位而後告，見其貶於諸公、卿也，下文所云是其事已。若卿與大夫爲耦，則其告亦當有上下之別。諸公、卿、大夫爲耦，亦各以其次爲之。」郝氏曰：「命賓御于公，以公命令也。」司射自西階上，北面，告于大夫，曰：「請降！」司射先降，搯扑，反位。大夫從之降，適次，立于三耦之南，西面北上。適次，由次前而北，西面立。【疏】正義曰：敖氏云：「於此云「北面」，則是命賓及告諸公、卿，皆鄉其位也。三耦，士也，而在大夫之上者，以其先射尊之。三耦之南、大夫之北宜有間地，以待諸公、卿之降。」胡氏肇昕曰：「三耦在大夫之上，以射之先後爲次也。三耦先射，

①「者」，原脫，今據《儀禮集說》補。

②「在」，原作「北」，今據《儀禮鄭注句讀》改。

次及大夫，敖謂「尊之」，非。公卿之降，宜立於大夫之南，以射又後於大夫也。謂在「三耦之南、大夫之北」，亦非。」

注云：「適次，由次前而北，西面立」者，賈疏云：「上云司射等適次，謂入次中。此適次者，大夫降自西階，東行適次，所過向堂東，西面立，因過次爲適次，華人次也。」敖氏曰：「適次，亦謂進而至於次也。」盛氏曰：「是時三耦位在次中之北。大夫適次，亦謂入於次也。注疏說誤。」焦氏以恕曰：「以經文證之，納射器節云：『總衆弓矢楅，皆適次而俟。』有司亦在次內，則一次之所容不爲小矣，於是一切祖決遂、執弓者，及釋弓矢、脫決拾、襲者皆入次中隱處爲之，故曰次之設，猶之更衣處也。若合諸公、卿、大夫、士，盡改其位於次中，恐不足以容焉。凡禮之改，必有所爲。位於次外，整齊畫一，恐無失碍，而必次中之更變者，其意云何耶？」^①敖之臆說，恐不足據也。」胡氏肇昕曰：「以上文證之，遂比三耦，三耦俟于次者，西面北上，是未比之先，比耦之時，皆在次外。又云：『遂命三耦取弓矢于次。』是取弓矢在次中也。至司射作射，射者方出次，故又云：『司射適次，作上耦射。司射反位。上耦出次。』經文節次分明。敖氏盡改鄭說，而盛氏從之，非是。此時大夫立于三耦之南，爲未比之先，下文司射命之，而遂比衆耦，皆在次

外也。司射東面于大夫之西北，耦大夫與大夫，命上射曰：「某御于子。」命下射曰：「子與某子射。」卒，遂比衆耦。衆耦，士也。【疏】正

義曰：「于大夫之西北耦」，《校勘記》曰：「北，《釋文》、唐石經、徐本俱作『比』，《通解》、楊、敖俱作『北』。許宗彥云：『比』誤也。下云『耦大夫與大夫』，有『與大夫』三字，則句首不必有『比』字可知。又司射居大夫之西北，不正向大夫者，大夫尊也。」○敖氏曰：「司射東面，亦在次中。不言適次者，可知也。」盛氏曰：「司射東面，向大夫也。大夫之西北，蓋當諸公卿之虛位。」^②必於此者，命當自上下也。合耦曰耦。耦大夫與大夫者，謂大夫與大夫射，司射命之，以定其耦也。其命之之辭，如下文所云。」案：大夫之西北，盛氏謂當諸公、卿之虛位，說本上文敖氏，非也。司射於大夫其位已降，無自居公卿之位之理，許氏謂「不正向大夫者，大夫尊也」，其說近是。韋氏協夢曰：「士之爲大夫耦者，宜於命大夫後即命之。其辭亦當曰：子與某子

① 「耶」，原脫，今據《儀禮彙說》補。

② 「當」，原作「與」，今據《儀禮集編》改。

射。」注云「衆耦，士也」者，敖氏亦曰：「士耦也，士與大

夫爲耦者亦存焉。」盛氏曰：「是時司射少南東面，於衆耦之西北比之。」衆耦立于大夫之南，西面北上。

若有士與大夫爲耦，則以大夫之耦爲上。爲

上，居羣士之上。【疏】正義曰：敖氏曰：「立于大夫之南，

則在次可知，故經亦不言適次。若士與大夫爲耦，亦其長

者也。乃著其爲上者，意與鄉射同。大夫之耦雖爲上射，

猶立于大夫之後者，射事未至，明其不並立也。及將射，乃

轉居右而並立云。」郝氏曰：「大國諸侯臣，一孤、三卿、五

大夫，三耦自有餘，而時或有與有不與，故大夫不足則以士

比之。」盛氏曰：「經云『若有』者，亦兼次國以下無諸公而

言。無諸公，則有大夫與卿爲耦者，有士與大夫爲耦者，以

一大夫爲賓故也。大夫之耦惟一人耳。《鄉射禮》云：『大

夫雖衆，皆與士爲耦。』與此異。」吳氏廷華：「或云：鄉射

大夫爲遵，故與士耦爲下射，以明其謙。若此經士與大夫

爲耦，不過上節大夫耦大夫之外，有無耦之大夫，則下與士

耦，非於大夫中擇其尊者使與士耦也。蓋此大夫不居尊東

而居賓西衆賓之位，則與遵不同，自應以大夫爲上射，士爲

下射，其說亦是。但下拾取矢，明言士東面、大夫西面，則

大夫爲下射矣。」命大夫之耦曰：「子與某子

射。」告于大夫曰：「某御于子。」士雖爲上射，其

辭猶尊大夫。【疏】正義曰：注云「士雖爲上射，其辭猶尊

大夫」者，指「告于大夫曰：某御于子」而言，某謂士也，子

謂大夫也，命大夫之耦，大夫與大夫爲耦者也。告于大夫，

士與大夫爲耦者也。命衆耦，如命三耦之辭。諸

公卿猶未降。言未降者，見其志在射。【疏】正義曰：

敖氏曰：「諸公卿尊，宜事至乃降也。此時之降者，爲比耦

也。鄉者既以耦告公卿于上，則耦定矣，故可以未降。」

右將射命耦

遂命三耦各與其耦拾取矢，皆袒決遂，

執弓，右挾之。此命人次之事也。司射既命而反位，

不言之者，上射出，當作取矢，事未訖。【疏】正義曰：敖氏

曰：「司射既于次中東面，以次命之，即反西方之位。不言

者，亦以其可知也。司射於取矢者惟命之而不復作之者，

以其取矢亦發于次中，與鄉射異。」盛氏曰：「三耦擲在次

矣。注云「此命人次之事」，非鄉射比耦位在堂西射位，在

司馬之西南，故司射於取矢者既於堂西命之，又於司馬之西南作之。大射惟有次中位，故司射命取矢訖，即及中西南之位，而使小射正作之也。以下經證之，此處蓋有闕文。」方氏苞曰：「鄉射命三耦拾取矢，後司射反位，此經無之，注疏推說義皆無據。蓋未詳繹上下經文，而考其事義也。大射三耦，衆耦位皆在次，大夫立於三耦之南，司射東面於大夫之西，以命衆耦，一人取矢未畢，司射不得反庭中之位；及衆耦皆還，反次中，以俟射，則司射作之以升，遂適阼階下，請釋獲于公，備命射事，直至命上射不貫不釋之後，然後退反庭中之位，中間實無反位之事，安得有此文哉？鄉射始命三耦取矢，司射即反位者，司馬之位，在司射之南，三耦之位，在司馬之西南，衆耦繼三耦而立，司射適堂西，比衆耦，命三耦取矢後，必反其庭中之位，乃可作。三耦，衆耦取矢于楅，而次第作之，以升其所立之位。命事之地絕不相同，而欲以彼例此，宜乎皆不得其義也。」案：《義疏》云：「三耦既比矣，何待司射命之而後入次哉？」又下經云：「小射正作，取矢如初。」則此亦當有小射正作之文，脫耳。」一耦出，西面揖，當楅北面揖，及楅揖。三耦同入次，其出也一。上射出，西面立。司射作之，乃揖行也。當楅，楅正南之東西。【疏】正義曰：《校勘

記》曰：「注『一上射出』，徐本重『一』字，《通解》不重。」○韋氏協夢曰：「此出次取矢于楅之儀也。」盧氏文弼曰：「『上射』二字，必傳寫之譌。細玩注意以入次則三耦同，而出次則一耦先出耳。舊皆以爲鄭誤，鄭不應若是。」上射東面，下射西面。上射揖進，坐橫弓，卻手自弓下取一个，兼諸附，興，順羽，且左還，毋周，反面揖。橫弓者，南踣弓也。卻手自弓下取矢者，以左手在弓表，右手從裏取之，便也。兼，并也。并矢於附當順羽，既又當執弦順羽者，手放而下，備不整理也。左還，反其位。毋周，右還而反東面也。君在阼，還周，則下射將背之。古文「且」爲「阻」。【疏】正義曰：《校勘記》曰：「注『右手』『右』誤作『有』。『并矢于附』『附』誤作『跗』。」○韋氏協夢曰：「楅南面，上射東面，下射西面，則上射在楅之右，下射在楅之左也。」注云「左還反其位毋周，右還而反東面也。君在阼，還周，則下射將背之」者，敖氏曰：「既順羽，則鉤弦而左還也。自西面而東面，若皆左還，則謂之周。此先左還，而後右還，是毋周也。必毋周

① 「哉」，原脫，今據《儀禮義疏》補。

者，以相變爲容。」盛氏曰：「鄉射未興而順羽，^①故云「順羽且興」；此則既興而順羽，故云「順羽且左還」，其節亦小變也。毋周，威儀多也。注說似迂。」褚氏寅亮曰：「上射本東面，下射本西面，惟還時稍背，至本位，則各如初，故云「反面」，且見毋周之義也。鄉射左還而周，故直云「東面揖」。吳氏廷華曰：「楅在中庭，君在堂上，爲中庭之東北，上射左還由南而西之頃，其身已西南向，爲背君。若下射西面，左還西面，由西而北之頃，原未嘗背君。至若還由東面而南，由南而西之頃，則西南向，背君。是惟上射不可左還而不可周，下射則不但不當周，且不當右還也。乃經上下射俱言右還毋周，則背君之說非矣。」案：《義疏》云：「進坐、橫弓時皆北面興，則上射已東面矣。不因而遂揖，又左還毋周，而後東面者，以順羽故，因而爲之儀也。始取矢時，鉞在右手，則羽逆，轉括之一端於右手，而以鉞向外，乃順矣。毋周，變於鄉射之周者也。君在堂上，取矢者在堂下，固無背之之嫌，且司射、司馬師亦時有南面者，不嫌也。注言不背君，亦贖義耳。」云「古文「且」爲「阻」」者，胡氏承珙曰：「案：「且」，本古文「祖」字。^②惠氏棟曰：古鍾鼎文「祖」皆作「且」，如祖乙卣盃、^③和鍾、文王命癸鼎、師毳敦皆然。承珙案：孟祖辛彝作「且」，瞿祖丁卣作「且」，

二文尤與今「且」字相近。^④至小篆始从示作「祖」。《尚書》：「黎民阻飢。」今文作「祖飢」。孟康曰：「古文言阻。」蓋《尚書》本作「且」，故今文家作「祖」，古文家作「阻」。此《儀禮》古文與《尚書》古文同，鄭以當文易曉，故從今文。」下射進，坐橫弓，覆手自弓上取一个，兼諸弣，興；順羽，且左還，毋周，反面揖。橫弓，亦南路弓也。人東西鄉，以南北爲橫。覆手自弓上取矢，以左手在弓裏，右手從表取之，便也。【疏】正義曰：反面，自東面而反西面。韋氏協夢曰：「敖氏橫弓之說詳見《鄉射禮》。此注謂「人東西鄉，以南北爲橫」，若橫弓之時東西鄉，則上射左還，南面折而右還，乃北面；下射左還，北面，折而右還，乃南面，烏得相鄉而揖乎？」案：《義疏》曰：「橫弓時上射、下射皆北面，以楅上之矢鉞鄉南，必北面乃可取也。既取，乃東西鄉耳。人北面，則弓以東西爲橫矣。」

① 「興」，原作「還」，今據《儀禮集編》改。

② 「祖」，原作「阻」，今據《儀禮古今文疏義》改。

③ 「卣」，原作「酉」，據《續清經解》本改。

④ 「近」，原作「合」，今據《儀禮古今文疏義》改。

注說非也。」既拾取矢，梱之。梱，^①齊等之也。古文

「梱」作「魁」。【疏】正義曰：「梱」，徐、陳、唐石經本俱作

「梱」。○郝氏曰：「梱，叩也。叩四矢，^②使齊也。」張氏爾

岐曰：「「梱」，疑當作「捆」。《孟子注》：「捆，猶叩椓也。」叩

椓有取齊之義，若梱則門槨耳。」胡氏承珙曰：「梱與捆同。

《說文》無「梱」字，祇當作「捆」。《孟子》作「捆」。《淮南·

修務訓》「梱纂組」，字仍作「梱」。高注云：「梱，叩椓。」下

文「梱復」之「梱」，亦當訓叩。叩，擊也。謂矢擊侯不中，激

而還射也。魁與梱一聲之轉，古文同聲假借。鄭所不從。」

胡氏肇昕曰：「《說文》：「梱，門槨也。」亦假借字，本字當

作「捆」。《說文》：「梲，梱木薪也。」梱，梲木未析也。」《一

切經音義》四引《通俗文》曰：「合薪曰梱。」又十二引《纂

文》曰：「未判爲梱。」《爾雅·釋木》「髡梱」郭注云：「未

詳。」攷《爾雅》之「髡梱」，即《說文》之「梲梱」。「梲梱」爲合

薪之義。此注云「齊等之」者，謂合四矢使齊等之，與合薪

同義。梱、捆聲相近，古通用。「梱」字或譌作「捆」，或譌作

「捆」。張氏正「梱」爲「捆」，是也；而盛氏反譏之，非矣。」

兼挾乘矢，皆內還，南面揖。內還者，上射左，下

射右，不皆右還，亦以君在阼，嫌下射，故左還而背之也。

上以陽爲內，下以陰爲內，因其宜可也。【疏】正義曰：敖

氏曰：「亦揖乃皆內還，經文不具也。上射左還，下射右

還，皆向內，故總以內言之。皆內還者，由便也。」盛氏曰：

「內還者，先以身向堂而還也。上射東面，左還則向堂；下

射西面，右還則向堂。必皆內還者，取其相向，且威儀之法

不敢由便也。注說似迂晦。敖氏由便之說尤非。凡敖氏

所解左旋、右還，皆與注疏相反，不可從。」方氏苞曰：「觀

此南面揖，則司射卒射北面揖之義益顯著矣。司射在堂，

君在阼階，雖不正對君，而揖則君見之，故不可以南面。君

在阼階上，射耦在庭中，雖南向而揖，君不見其面。又揖

後，始適楅南，則出次時，在楅北，進而及楅，面必南，故因

之南面而揖也。」吳氏廷華曰：「此亦上注意，姑即其說論

之。下射左還，則由西面將南未南之頃，向西南而背東北，

固爲背君矣。若上射左還，由東面而北面，而西面、而南

面，其將南未南之頃，何嘗不向西南而背東北邪？且下射

西面初，何向君之有？」適楅南，皆左還，北面揖，

搯三挾一个。楅南，鄉當楅之位也。揖，以耦左

還，上射于左。以，猶與也。言以者，耦之事成於此，

① 「梱」，原作「相」，今據《儀禮注疏》改。

② 「叩」，原作「扣」，今據《儀禮節解》改。

意相人耦也。上射轉居左，便其反位也。上射少北，乃東面。【疏】正義曰：注「以，猶與也。言以者，耦之事成於此，意相人耦也」者，以經云「以」者，見其相與爲耦也。相與爲耦有相親之意。相人耦，猶言相親也。云「上射少北，乃東面」者，賈疏云：「次在楅南，北面揖時已在次西，故知上射少北，乃東面，得東當次也。」敖氏曰：「以，如「以賓射」之「以」，謂上射以其耦左還也。此左還者，^①上射先而下射後，故言「以」。」盛氏曰：「上射自楅西，下射自楅東，皆南行適楅南，上射在右，至是將轉南居左，故云「以耦左還」，能左右之曰「以」，言易位之事，上射實主之也。《鄉射禮》云「皆左還」，^②不云「以耦」者，上射仍在右，不須易位也。鄉射射位在西，故其反位也，上射于右爲便。大射次在東，故其反位也，上射于左爲便。蓋西行者以北爲右，東行者以北爲左也。敖云「于左」當作「于右」，非。」吳氏廷華曰：「此轉而東行，反次也。初，上射在西，南面，以西爲右。此當東行，東行，以南爲右。上文三耦立于次，北上，此時下射讓上射於北，東行，以北爲左。又注所謂「上射轉居左，便其反位」者，蓋次中之位，北上，東行，以北爲左，上射位在此。今東行居左，與北上之位相當，故曰「便」也。賈又以次北西面言之，謂居左便於右還西面，何弗思之甚

邪？又注所謂「上射少北，乃東面」者，蓋上下射向南並行，上射在西爲右，下射在東爲左，折而東面，則右在南，左在北，不便於反位，故必轉而居左，居左，便矣，而又必少北者，蓋將東折時，下射尚在左，若即東面，則下射仍在北，故必下射少南行，上射乃東至下射行處稍立，俟下射既南，然後並轉而東，乃得上射在北，下射在南。所謂少北者，蓋待下射南行之頃言之耳。」褚氏寅亮曰：「上射位在北，下射位在南，兩禮同也。但鄉射位在楅西，從楅向西，則北爲右，故云「上射于右」。大射次在楅東，從楅向東，則北爲左，故云「上射于左」。敖氏乃改「左」字爲「右」字，謂與鄉射同，亦昧於東西之別矣。」《義疏》曰：「「左」字是也。鄉射上射于右，此于左者，鄉射之耦位，于右乃當其位，此則在東，于左乃當其位也。」退者與進者相左，相揖，還，退，釋弓矢于次，說決、拾、襲，反位。【疏】正義曰：「相揖還退」，《校勘記》曰：「唐石經、徐本、《通解》、楊、敖俱無「還」字。」○相左，謂退者由進者之南也。反位，反次中西面北上位。方氏苞曰：「鄉射三耦及衆耦

①「者」，原脫，今據《儀禮集說》補。

②「禮」，原作「記」，今據《儀禮集編》改。

自始至終皆拾取矢，執弓立而俟。大射之初則取矢於次而不拾，再射、三射皆取矢於楅，退釋弓矢，反位，何也？有司教射，則宜使久立待事，以固其筋骸。將祭而擇士，則宜休其神氣，使盡志於當射之時也。鄉射之終，賓、主人、大夫獨釋弓矢，反位，待事至，旋取以升。大射至再，諸公、卿皆取矢於次中，三射雖取矢於楅，與大夫同，而隨升就席，則釋弓矢，臨事而後取，以優尊者明矣。於尊者優，則於衆耦爲休其神氣，而使盡志於射益明矣。」案：《義疏》曰：「退者東行，以北爲左，進者西行，以南爲左。此進退相左，是進者在北，退者在南也。意次中迫狹，出者一途，入者一途，①上耦所出之途，次耦即經之以出而已。②其退者反位，又爲一途，故次耦進者得在上耦退者之北也。」三耦拾取矢，亦如之。後者遂取誘射之矢，兼乘矢而取之，以授有司于次中。皆襲，反位。有司納射器，因留，主授受之。【疏】正義曰：張氏爾岐曰：「三耦反位，反次北西面北上之位。」

右三耦拾取矢於楅

司射作射如初。一耦揖升如初。司馬

命去侯，負侯許諾如初。司馬降，釋弓，反位。【疏】正義曰：「司射作揖，《校勘記》曰：「揖，唐石

經、徐、陳、《通解》、楊氏、敖氏俱作「射」。」「司射作射如初」，敖氏曰：「如初，亦適次作上耦射也。其異者，三耦於既作，乃袒決遂，取弓矢也；司射既作，即反位，不俟之。」

②耦揖升如初，盛氏曰：「謂自出次至合足而俟之儀，皆如初射也。」司馬命去侯，負侯許諾如初，敖氏曰：「司馬，司馬正也。」盛氏曰：「如初，謂自司馬正適次至負侯者退立於西方，皆如初命去侯之儀也。是時獲者亦興，共而俟。」《釋官》曰：「此司馬亦司馬正，自後凡單言司馬者皆是，與上宰夫戒宰及司馬，司馬命量人量侯道者別。據經文，則射時命去侯，③命取矢，命設楅，撫矢，獻服不，命退楅，解綱者，司馬正也；命負侯，乘矢，獻隸僕人巾車，參侯，干侯之獲者，命獲者以旌與薦俎退者，司馬師也。司馬正，經亦稱司馬，亦稱正。」司射猶挾一个，去扑；與司馬交于階前，適阼階下，北面請釋獲于

①「者」下，原衍「一者」二字，今據《儀禮義疏》刪。

②「經」，《儀禮義疏》作「腫」。

③「侯」下，原衍「命負侯」三字，今據《儀禮釋官》刪。

公；猶，守故之辭。於此言之者，司射既誘射，恒執弓挾矢，以掌射事，備尚未知，當教之也。今三耦卒射，衆以知之矣，猶挾之者，君子不必也。【疏】正義曰：注「衆以知之矣」，《校勘記》曰：「以，誤作『已』，徐本、《通解》以上俱有『足』字。」公許。反，搯扑；遂命釋獲者設中，以弓爲畢，北面。北面，立於所設中之南，當視之也。《鄉射禮》曰：「設中，南當楅，西當西序。」【疏】正義曰：敖氏曰：「太史前立於所設中之西，於是司射當之，西面命之。西面命之既，則少西南行而北面，以弓爲畢，指畫以示其處。」郝氏云：「北面，示設中者不得過南也。」盛氏曰：「北面於所設中之南」，示設中者以南北節也。《鄉射禮》曰：「西面立於所設中之東，^①北面命釋獲者。」此命釋獲者亦北面。不西面立者，以大史既立於所設中之西，東面則設中，東西之節可見矣，不須司射更示之也。」大史釋獲。【疏】正義曰：敖氏曰：「言此者，明上所謂釋獲者之爲大史也。」小臣師執中，先首，坐設之；東面，退。大史實八算于中，橫委其餘于中西，興，共而俟。先，猶前也。命太史而小臣師設之，國君

官多也。小臣師退，反東堂下位。《鄉射禮》曰：「橫委其餘於中西南末。」【疏】正義曰：此不言執算者，又不言大史受算，則是大史自執算矣。實算則坐，故於後言興。是時大史位於中西，小史之位亦宜近之。注云「先，猶前也」

者，張氏爾岐曰：「中形爲伏獸，竅其背以置獲籌，執之則前其首，設之則東其面，面、首一也。」盛氏曰：「首據中言也，面據設中者言也。執之先首，設之東面，則中之東西設而首在東也明矣。」^②云「命大史而小臣師設之，國君官多也」者，方氏苞曰：「鄉射一人執算以從，而大射無之，何也？事輕人微，鄉射獲者自執中，尚有執算以從者。太史釋獲，小臣師執中，則有一人執算不待言，故文略耳。」云「小臣師退，反東堂下位」者，《釋官》云：「篇首惟言小臣師從者在東堂下，不言小臣師者，以小臣師納諸公、卿、大夫故也。但小臣師無事時，其位亦在此。」《燕禮》云：「小臣師一人在東堂下。」此篇云：「小臣師在東堂下。」互見也。」引《鄉射禮》，證算亦南末也。司射西面，命曰：「中離維綱，揚觸，梱復，公則釋獲，衆則不與！」

① 「西」，原作「北」，今據《儀禮集編》改。
② 「首」，原作「其」，今據《續清經解》本改。

離，猶過也，獵也。侯有上下綱，其邪制躬舌之角者爲維。或曰：「維」，當爲「絹」。絹，綱耳。「揚觸者，爲矢中他物，揚而觸侯也。柎復，謂矢至侯，不著而還復。復，反也。公則釋獲，優君也。衆當中鵠而著。古文「柎」作「魁」。【疏】正義曰：《校勘記》曰：「注『躬舌之角』，『躬』誤作『射』。」①「絹，綱耳」，「綱」上，通解有「爲」字。「爲矢至侯不著」，「爲」，徐本，《通解》、楊、敖俱作「謂」。「公則釋獲」，「則」誤作「而」。○敖曰：「西面亦於中東。」注云「離，猶過也，獵也。侯有上下綱，其邪制躬舌之角者爲維。或曰：『維，當爲絹。絹，綱耳』者，朱子曰：『綱耳，即籠綱，以布爲之。《梓人》謂之『縕』，而此謂之『絹』，字雖異而音則同。』」敖氏曰：「離，麗也。中而離於維綱，言其去鵠遠也。或曰：『維，謂躬與舌也。躬、舌，所以維持侯。』」②未知是否。案：注之「絹」字恐是「縕」字之誤。《梓人》云：「縕寸焉。」郝氏曰：「侯舌曰維，繫侯繩曰綱。」盛氏曰：「維，當以敖氏所引或說爲正。麗於維，去鵠猶近；麗於綱，則尤遠矣。維與綱，侯之上下皆有之，而大侯、參侯則惟見其上耳。《校勘記》曰：「敖謂注『絹』字是『縕』字之誤，是也。《釋文》於《周禮》『縕』字不云與『絹』同，於此『絹』字復不云與『縕』同，而音則無異。又此疏引《周禮》處，單疏本皆作

「縕」，至述注則仍作「絹」，似縕與絹爲二物者，皆足以滋後人之疑，不可以不辨。」胡氏承珙曰：「鄭司農注《梓人》云：『縕，讀爲竹中皮之縕。』《說文·糸部》云：『縕，持綱紐也。从糸，員聲。』《周禮》曰：『縕寸。』是此字以「縕」爲正，此注「維」當爲「絹」。③應本作「縕」，不作「絹」。然《周禮釋文》：「縕，于貧反，或尤紛反。劉侯犬反，或古犬反。」侯犬，古犬二反，皆冒聲。是劉昌宗所見本「縕」字必已有作「絹」者矣。鄭注《儀禮》破「維」爲「縕」，云「或曰」者，猶疑不能定之辭，蓋維與綱皆用繩爲之者。《說文》：「綱，網紼也。」紼者，網之大繩，名綱，故持綱之大繩亦名綱。《說文》又云：「縕，維綱中繩也。從糸，耑聲。讀若畫，或讀若維。」是綱爲大繩，縕爲持綱之繩。《儀禮》之維，蓋所以維持侯者。鄭云「其邪制躬舌之角爲維」，疏云「維持侯」者，持侯與持綱微有別，但維之名不見《梓人》，故又引或說破維爲縕，以縕爲綱耳。縕乃籠綱者，籠綱猶言貫綱。④縕，

①「躬」，原作「射」，今據《十三經註疏校勘記》改。

②「侯」，原脫，今據《儀禮集說》補。

③「維」，原作「縕」，今據《儀禮古今文疏義》改。

④「猶」，原脫，今據《儀禮古今文疏義》補。

蓋如環，綱貫其中，故《周禮注》謂之「籠綱」，《儀禮注》謂之「綱耳」，其實一也。賈疏《儀禮》云：「綱，以布爲之，籠綱」，又云「絹，綱耳」者，以絹爲綱耳，則似謂綱與絹有用布、用絹之別，故云「鄭更爲一解」，不知鄭引或說者謂維與綱別，非謂綱與絹別。賈因字或作「絹」，而有布爲絹爲之說，於經無徵，恐不可從。云「揚觸者，謂矢中他物，揚而觸侯也。捆復，謂矢至侯不著而還復。復，反也」者，盛氏曰：「捆，猶款也，扣也。人物出人多扣觸之。」則捆有扣觸之義矣。復，如「雨星不及地尺而復」之「復」。捆復，謂矢扣觸侯而還復也。或曰：捆，謂矢觸侯之左右，如捆之門兩旁也；復，謂矢至侯而還復也。」方氏苞曰：「捆謂植之橫於上者，仰觸於捆下，落而經正鵠也。」^①王氏引之述聞曰：「注：『捆復，謂矢至侯，不著而還復。』注內『至』字正釋『捆』字。《廣雅》曰：『捆，至也。』捆與捆同聲。捆之爲至也，^②疏及《釋文》皆不之及，蓋未達注意。」胡氏肇昕曰：「中離維綱，揚觸捆復王句爲四事，中而麗于維而綱爲二事，^③揚觸一事，捆復一事也。離維綱言中者，維、綱皆所以持侯者，離於維、綱，雖不中鵠，而中於維持侯者矣，故曰中。揚觸、捆復皆至侯而不中者，蓋揚觸矢著他物，揚而觸於侯，捆復矢射至侯，扣侯不著，激而還復也。古文『捆』

亦作「魁」，則與上文捆之義不相遠，合矢而齊等之爲捆，然必先扣擊而始可合而齊之，故捆又有扣擊之義。此捆復之義正取扣擊也。有此四事，而公則釋獲者，所以優君，異於衆也。張氏惠言曰：「注蓋謂矢絹繞於綱，謂中綱也。耳字，語辭。《梓人》繫後於植者字作綱，非絹也。疏誤以綱爲絹字，謂綱則維也。又以耳爲耳目字，謂以絹爲綱耳，謬甚。」惟公所中，中三侯皆獲。」值中一侯則釋獲。

【疏】正義曰：敖氏曰：「此愈優君也。中亦兼離維綱與揚觸捆復者而言。皆獲者，中一侯，則其侯之獲者主獲之也。此命亦傳告於獲者，故以獲言之。上云『釋獲』，下云『獲』，互文也。」郝氏曰：「君射不拘大侯、參侯、干侯，中皆釋獲。衆射非其侯中，不算。」盛氏曰：「上經云『射者，非其侯中之不獲』，所以辨其等者嚴矣。此則告以優尊之義，亦爲上得兼下也。」胡氏肇昕曰：「惟公所中」，與「惟公所命」、「惟公所賜」句法正同。中三侯皆獲，正以申明上句也。姜氏乃以「惟公所中」爲句，失之遠矣。」釋獲者命小

① 「落」，原作「仰」，今據《儀禮析疑》改。

② 「也」下，《經義述聞》「猶捆之爲至也」六字。

③ 「事」，原作「句」，今據《儀禮正義正義正誤》改。

史，小史命獲者。傳告服不，使知此司射所命。【疏】

正義曰：《釋官》曰：「春秋列國皆有大史之官。《左傳》：

『南史氏聞大史盡死，執簡以往。』孔穎達謂南史是佐大史者，當是小史，是諸侯有小史也。《周禮·大史職》曰：「凡

射事，飾中，舍算，執其禮事。」大史於射禮主釋算，故經又謂之釋獲者。小史則凡事主佐大史，故傳命服不也。」盛氏

曰：「釋獲者，謂大史也。必以此命傳告獲者，以其唱獲與釋獲聯事，故須使其聞之。不親往告者，獲者賤，且方有

事，不可暫離中側也。」司射遂進，由堂下北面，視

上射，命曰：「不貫不釋！」上射揖。司射

退，反位。貫，猶中也。射不中鵠，不釋算。古文「貫」

作「關」。【疏】正義曰：方氏苞曰：「以耦告，則先公、卿、

大夫，而後及三耦，尊卑之序也。取矢以射，則三耦先公、

卿并先君，仍前誘射之義也。不貫不釋，賓與公、卿之所

同，面於三耦命之，言各有當也。」釋獲者坐取中之

八算，改實八算，興，執而俟。執所取算。乃

射。若中，則釋獲者每一个釋一算，上射于

右，下射于左。若有餘算，則反委之。委餘

算，禮貴異。又取中之八算，改實八算于中。興，執而俟。三耦卒射。

右三耦再射釋獲

賓降，取弓矢于堂西。不敢與君併，俟告，取

之以升，俟君事畢。【疏】正義曰：注云「不敢與君併，俟

告」者，張氏爾岐曰：「君待告乃取弓矢。」云「取之以升，俟

君事畢」者，賈疏云：「下云：『公將射，①則賓降，適堂西，

袒決遂，執弓，搯三挾一个，升自西階。』俟君事畢。②君事

畢，賓降，袒決遂，乃更升。若然，賓於此不即袒決遂者，去

射時遠，不可即袒也。」敖氏曰：「此言降而不言升，似有闕

文。賓降，取弓矢以升者，明其將侍君射。」郝氏曰：「賓與

君爲耦，君將射，賓先自堂上西序東面降，立階西東面也。」

盛氏曰：「賓降，謂自其席而降也。公爲賓舉旅之時，賓既

就席矣。郝云「自堂上西序東面降」，非。不言其升者，俟

於堂西未升也。取弓矢之儀，詳見下文。先言之者，與下

①「射」，原作「升」，今據《儀禮注疏》改。

②「俟」，《儀禮注疏》作「是」。

爲節也。」諸公、卿則適次，繼三耦以南。言繼三耦，明在大夫北。【疏】正義曰：敖氏曰：「不言降者，可知也。」郝氏曰：「初納射器，賓弓矢在堂西，諸臣弓矢在東次，故賓適堂西，諸公、卿適次，各取弓矢。」①張氏爾岐曰：「此適次亦過次前，至堂東三耦之南西面立也。」韋氏協夢曰：「諸公、卿不言降，承上賓降之文也。蓋賓降，諸公、卿俱從之降；賓適堂西，諸公、卿則適次。非謂賓既取弓矢升，②然後諸公、卿降也。」公將射，則司馬師命負侯，皆執其旌，以負其侯而俟。君尊，若始焉。【疏】正義曰：此云「皆執其旌」，則旌之不同益可見矣。亦獲者授之於乏。司馬師反位。【疏】正義曰：郝氏曰：「位在西階下東面，③司馬正之南也。」隸僕人埽侯道。新之。【疏】正義曰：隸僕人，《周禮》司隸之屬。盛氏曰：「隸僕人，即《周禮》隸僕也。隸僕，下士二人，屬夏官，掌五寢之埽除糞灑之事。故使之給埽侯道之役。諸侯蓋亦以庶人在官者爲之也。司隸掌五隸之法，屬秋官。郝氏乃引以當之，誤矣。」《釋官》曰：「此即《周禮》隸僕之職，諸侯當士旅食者爲之。」注云「新之」者，爲君將射也。《既夕》云「隸人涅廁」，則秋官司隸之屬，與此異也。司

射去扑，適阼階下，告射于公；公許。適西階東，告于賓；告當射也。今文曰「阼階下」，無「適」。【疏】正義曰：「告當射也」，《校勘記》曰：「也，《通解》作「之」。」○敖氏曰：「告射輕於請射，故不升堂。」盛氏曰：「此時賓在堂西，故適西階東告之。郝云「賓立西階下西，東面」，非。告公北面，告賓蓋西面歟？」○注云「今文曰「阼階下」，無「適」」，鄭不從者，胡氏承珙曰：「案：《鄉射》云：司射去扑，倚於西階之西，升堂北面，告於賓曰：三耦卒射。此經上文云：司射去扑，倚於階西，適阼階下，告於公曰：三耦卒射。又云：司射適西階西，倚扑，升自西階，東面，請射於公。蓋凡去扑皆倚於西階西，則至阼階下當有「適」字，故鄭從古文。」吳氏廷華曰：「上賓降取弓，注謂取之以升，則賓已反中堂之位，故於西階東向賓，告之亦東階下之東。」遂搯扑，反位。小射正一人，取公之決拾于東坫上。一小射正授弓，拂弓，皆

①「各」，原脫，今據《儀禮節解》補。

②「謂」，原作「諸」，今據《儀禮鄭注句讀》改。

③「位」，原作「侯」，今據《儀禮節解》改。

以俟于東堂。授弓，當授大射正。拂弓，去塵。【疏】

正義曰：敖氏曰：「云『小射正一人』，又云『一小射正』，則小射正亦多矣。《周官》射人，下大夫二人，上士四人。然則諸侯之大射正，上士，亦二人；小射正，中士，亦四人與？」盛氏曰：「東堂，東序東也。俟者，俟公就物。則一小射正奉決拾以從，一小射正以弓授大射正。大射正惟爲司正者一人，其餘皆小射正也。敖云大射正二人，非。」《釋官》曰：「此篇大射正、司射、小射正、擯者、司正皆是射人，特因事異名以別尊卑耳。《周禮·射人職》曰：『玉射立於後，以矢行告。』此篇云：『大射正立於公後，以矢行告於公。』則大射正即射人也。又《射人職》曰：『與大史數射中。』此篇云：『司射適階西，釋弓，去扑，襲，進由中東，立於中南，北面，視算。』則司射即射人也。《燕禮》云：『若射，則大射正爲司射。』則司射，大射正爲之。此篇云：『大射正擯。』又云：『擯者請立司正，公許，擯者遂爲司正。』則司正亦大射正爲之。《燕禮》注云：『天子射人，下大夫二人。』諸侯則上士，其人數亦如之。然則諸侯當上士二人爲長，謂之大射正；一爲司正，一爲司射，其下亦當有中士、下士之屬，謂之小射正也。鄭注『大射正』云：『射人之長。』注『司射』云：『射人。』注『小射正』云：『司射之佐。』然則司射非

小射正爲之，明矣。」注云「授弓，當授大射正」者，敖氏

曰：「『授』，當作『受』。受弓者，受於有司也。受弓亦於東堂。」盛氏曰：「初納射器，君之弓矢適東堂。至是小射正受而拂之，與奉決、①拾者同俟於此。『授』，當從敖氏作『受』。蓋受之於弓人也。」胡氏肇昕曰：「言『授弓』，則先受弓於有司可知也。言『授』不言『受』，文省。敖氏謂經當作『受』，非是。鄭云『當授大射正』者，以下文大射正執弓以袂以授弓，知此授弓爲小射正授於大射正也。」云「拂弓，去塵」者，韋氏協夢曰：「拂弓者，大射正也。小射正既授之，大射正即拂之。」案：經先言「授」，後言「拂」，則授者小射正，拂者大射正。注云「當授大射正」，爲經文補其義也。褚氏寅亮曰：「小射正授大射正，大射正執之以從。經文甚明，何必改『授』爲『受』？」公將射，則賓降，適堂西，袒決遂，執弓，搯三挾一个；升自西階，先待于物北，北一筈，東面立。不敢與君併。筈，矢幹。東面立，鄉君也。【疏】正義曰：賈疏云：「前文賓降適堂西取弓矢，無賓升堂之文，但文不具，其實即升

①「決」，原作「挾」，今據《儀禮集編》改。

矣。是以此文云「賓降」。^①郝氏曰：「賓降即前取弓矢降，^②再言以明待君之儀。疏非。」盛氏曰：「此當以郝說爲正。」^③蓋三耦卒射，則公將射矣。公將射，則賓及諸公、卿皆降。自司馬師命侯，至小射正俟於東堂，皆一時事也。觀此經復言「公將射」，則「賓降」亦是復言可知。必復言之者，見其與上諸事同節也。舊說前降取弓矢，此降又爲袒以下諸儀，則經何以前言降而不言升？宜後儒疑其有闕文也。夫一弓矢也，既取之而升，復以之而降，降而又升，其儀不亦繁複乎？此云「袒決遂，執弓，搯三挾一个」，即取弓矢之儀也。鄉者取弓矢以升，其儀當復何如？且公之弓矢尚俟於東堂，而賓乃先取之以升，亦無是理也。以是數者推之，則其謬誤顯然矣。^④胡氏肇昕曰：「盛氏推闡郝氏之說，以明賓降即前賓降，其意甚精。但以注說釋之，則鄭意亦如此，其誤實始於賈疏也。此注云「不敢與君併」，與上「賓降」注正同，則鄭以兩「賓降」爲一也。上云：「不敢與君併，俟告，取之以升。」謂俟司射告射，而後取弓矢以升也。升即指此經「升自西階」而言。自賈疏不得其說，^⑤而說者多誤矣。」案：《義疏》云：「賓之弓矢在堂西，上經公未降，^⑥賓先降取弓矢，而不言升；及將射，又言賓降，故賈疏謂前賓降即升，文不具也。由此言之，則賓之弓

矢前已取之，升堂及又降，^⑤乃言搯三挾一者，^⑥蓋前此只取弓矢而未袒決遂，至是乃復搯弓矢適堂西，故執弓挾矢與袒決遂並行也。」注云「筈，矢幹」者，《周禮·矢人》：

「矢幹長三尺。」北一筈，敖氏曰：「物北空一筈地也。必退於物北一筈者，遠下君，亦爲司馬當由物後而適物間也。」褚氏寅亮曰：「司馬適物間時，必不由此所空一筈之地。當以注不敢與君併立之說爲正。」司馬升，命去侯如初；還右，乃降，釋弓，反位。還右，還君之右也。猶出下射之南，還其後也。今文曰「右還」。【疏】正義曰：敖氏曰：「還右，謂圍右物也。既命去侯，則由右物之南適其右，乃降。來由物北，去適物右，是還之也。不還左物者，以君將爲下射故也。是時君未立於物而先辟

①「降」，原脫，今據《儀禮節解》補。

②「正」，原作「主」，今據《儀禮集編》改。

③「疏」，原作「說」，今據《儀禮正義正義正誤》改。

④「公」，原作「云」，今據《儀禮義疏》改。

⑤「及」，原脫，今據《儀禮義疏》補。

⑥「言」下，《儀禮義疏》有「執弓」二字。

之，敬之至也。」郝氏曰：「司馬命去侯還右乃降者，賓物居右，司馬出右物南，即西轉下堂，不還左物也。」盛氏曰：「還右，言於『如初』之下，見其異於初也。敖說得之。位，司射之南也。」注云「今文曰『右還』」者，賈疏云：「若右還，則右還於上射，不得還君，故不從也。」盛氏曰：「今文曰『右還』，義似長。蓋由右物之南適西階，即右還也。」胡氏承珙曰：「敖氏云：『還右，謂圍右物也。既命去侯，則由右物之南適其右，①乃降。來由物北，去適物右，②是還之也。』詳敖意，蓋以上射西就右物，下射東就左物。司馬升堂，初由右物之後，立於物間，以命獲者。既乃出下射之南，由物左以還其後，乃降，凡升皆然。此經公爲下射，當就左物，司馬在物間命去侯時，原在公右。若依常節，出下射之南，還其後，則還在公左，不得謂之還右，故以還右爲圍右物，蓋初從右物之後至物間，既又從右物之前還其右以降，以君將爲下射，故先避之，不敢仍如出下射南，還其後之常節也。承珙案：敖說非也。此時君未就物，蓋猶在阼階上西面之位，司馬命揚侯訖，由君之北而東而南，然後西鄉，降自西階，故曰『還右』，謂由君之右而還也。此與初射時出下射之南而還其後者有別。賈疏以『出下射之南，還其後』爲圍下射之後，繞下射之東，南行而適西階，語亦

誤。鄭云「猶」者，謂去侯之命本不專爲上射，故《鄉射》「司馬出於下射之南，還其後」注云：「圍下射者，明爲二人命去侯。」此君爲下射，更當明爲君命去侯，故云「猶」也。仍以注疏爲正，敖說似不可從。」吳氏廷華曰：「還右，謂還於下物之南，乃右而西也。若去君之右，則物間矣。」褚氏寅亮曰：「右還者，我自右而還也；還右者，還人之右也；有彼我之分。君立下物南鄉，其西爲右。司馬從物間向南出，而東過以繞其後，是還其右也，故注云「猶出於下射之南，還其後」，同義也。疏未甚分明。若敖氏云「來由物北，③去適物右」，則何以謂之還？」公就物，小射正奉決，拾以筥，大射正執弓，皆以從于物。筥，萑葦器。大射正舍司正，親其職。【疏】正義曰：注云「筥，萑葦器者，敖氏曰：『筥，蓋竹器。決，拾在拊上，時亦宜用筥，至是始見之耳。』」云「大射正舍司正，親其職」

①「由」，原作「圍」，今據《儀禮古今文疏義》改。

②「去」，原作「云」，今據《續清經解》本及《儀禮今古文疏義》改。

③「由」，原作「猶」，今據《續清經解》本改。

者，^①「射時大射正爲司正如故，至是暫舍其職，而爲君執弓，重其事也。弓，射器之主也。」張氏爾岐曰：「大射正初爲擯者，復自擯者立爲司正，至是又舍司正來執弓也。」案：《義疏》曰：「上云『一小射正授弓，拂弓』，即公射時大射正執以授公者，東堂之俟尚未授也。」^②又「小射正受弓」以下，^③別無與大射正授受之文，此乃云「大射正執弓」，則其授之小射正可知。」小射正坐奠筭于物南，遂拂以巾，取決，興，贊設決，朱極三。極，猶放也，所以韜指利放弦也，以朱韋爲之。三者，食指、將指、無名指。無極，放弦契於此指，多則痛。小指短，不用。【疏】正義曰：敖氏曰：「拂者，拂決、極與拾也。贊設決與極者，爲君設之也。下言贊者，放此。君極朱而用三，若臣則用二，其物色亦未聞。《士喪禮》曰：『續極二。』蓋死時變用續，而數則與生時同。」陳氏祥道曰：「生者以韋，所以致其用也；死者以續，所以明其不用也。」極，亦謂之韠。《詩》「童子佩韠」是也。小臣正贊袒，公袒朱襦。卒袒，小臣正退俟于東堂。小射正又坐取拾，興；贊設拾，以筭退奠于坵上，復位。既袒乃設拾，拾當以韠襦上。【疏】正義曰：敖氏曰：「此袒於設

決之後，亦異於臣。」郝氏曰：「小射正復位，與小臣正同立俟於東堂也。」盛氏曰：「俟者，俟公卒射，當贊襲也。小射正復位者，亦俟公卒射，以筭受決拾也。」《釋官》曰：「案：經不著小臣正之位，此云『退俟於東堂』，則小臣正無事時，其位在此矣。蓋小臣主相君，須在君左右，東堂與君相近也。」注云「既袒乃設拾，拾當以韠襦上」者，賈疏云：「《鄉射》云『袒決遂』，以其無襦，故遂與決同時設。若大夫對士射袒纁襦，設遂亦當在袒後。」盛氏曰：「此言設拾而不言遂者，以君不肉袒，故取斂衣之義。」大射正執弓，以袂順左右限，上再下壹，左執弣，右執簫，以授公。公親揉之。順，放之也。限，弓淵也。揉，宛之，觀其安危也。今文「順」爲「循」。古文「揉」爲「紐」。【疏】正義曰：注云「順，放之也。限，弓淵也」者，敖氏曰：「限者，弓之曲處也。《考工記》曰『凡角之中，恒當弓之畏。畏也者必撓』是也。順之者，所以審其厚薄，而驗其詳略

①「者」下，據段校有「敖氏曰」三字。

②「俟」下，《儀禮義疏》有「則」字。

③「射正」，《儀禮義疏》作「臣」。

也。^①詳上而略下，以其上下之厚薄均。」郝氏曰：「袂，衣袖。順，即拂也。以衣袖順弓上下兩隈拂之，示整潔也。弓仰執，故上隈之裏，左右再拂，下隈之背，一拂之。」盛氏曰：「順之以袂，亦拂拭之意，郝得之。前小射正既於東堂拂之矣，至是大射正又順之者，敬君物也。隈分左右，則弓之仰執明矣。上再下壹，左右各三也。上弓裏，下弓表。」胡氏肇昕曰：「《考工記》，故書『畏』作『威』。杜子春云『威，謂弓淵』，玄謂『畏』讀如『秦師入隈』之『隈』。此云『隈，弓淵也』，是注以此『隈』即《考工記》之『畏』。《釋名》：『簫附之間曰淵。淵，宛也，言曲宛也。』敖氏謂弓之曲處，是也。」云「揉，宛之，觀其安危也」者，賈疏云：「《考工記》·弓人云『其弓安』、『其弓危』者，^②以弓弱者為危，强者為安，則此云『觀安危』者，謂試其弓之強弱。」云「今文『順』為『循』。古文『揉』為『紐』者，胡氏承琪曰：『順、循聲義並同。』^③《莊子·天下篇》：『己之大順。』《釋文》云：『順，本作『循』。』揉為紐者，揉當本作『燖』。《說文·火部》：『燖，屈申木也。』《易》：『揉木為末。』《漢書·食貨志》作『燖』。《古今人表》『公山不狃』顏師古曰『即公山不擾』，《史記索隱》又作『蹂』，皆以聲同而通者也。鄭以揉為宛之觀其安危。宛，猶屈也，故不從古文作『紐』。」小臣

師以巾內拂矢，而授矢于公，稍屬。內拂，恐塵及君也。稍屬，不搯矢。【疏】正義曰：注云「內拂，恐塵及君也」者，敖氏云：「授矢亦以巾也。《燕禮·記》曰：『小臣以巾授矢。』凡授弓矢皆當於公右。」^④《釋官》曰：「《周禮·大僕職》：『王射則贊弓矢。』此篇大射正授弓，小臣師授矢，^⑤與天子異也。」云「稍屬，不搯矢」者，張氏爾岐曰：「稍屬者，發一矢，乃復授一矢，接續而授也。」^⑥大射正立于公後，以矢行告于公：若不中，使君當知而改其度。【疏】正義曰：方氏苞曰：「不中而以其矢告，俾君自省以勉於後也。人君於事物之理不中，常苦不自知。射失其宜而不中，則易明於心，亦所以示君當繹思已過也。凡此皆所以防縱弛、養德性，事近而義深矣。」下曰留，上曰揚，左右曰方。留，不至也。揚，過去也。方，

- ① 「詳略」，《儀禮集說》作「強弱」。
- ② 「危者」，原作「也危」，今據《儀禮注疏》改。
- ③ 「義」，原脫，今據《儀禮古今文疏義》補。
- ④ 「當」，原作「留」，今據《續清經解》本改。
- ⑤ 「矢」下，原衍「實」字，今據《儀禮釋官》刪。
- ⑥ 「續」，原作「屬」，今據《儀禮鄭注句讀》改。

出旁也。【疏】正義曰：注云「方，出旁也」者，敖氏曰：「左右曰方者，左則曰左方，右則曰右方也。」盛氏曰：「方與旁通。矢行或左或右，皆曰旁。敖說非。」公既發，大射正受弓而俟，拾發以將乘矢。公，下射也，而先發不留，尊也。【疏】正義曰：注云「先發不留，尊也」者，敖氏曰：「云『拾發以將乘矢』，則是賓先公後，亦如其他上下射之爲也。」盛氏曰：「敖說非。」《燕禮·記》於公既發之後，乃云：「上射退於物一筭，^①既發則荅君而俟，是亦公先發之證矣。」案：韋氏、焦氏皆以敖爲是。褚氏寅亮曰：「君尊，故於其射也事事不同。」《鄉射·記》曰：「上射既發，而後下射射，拾發以將乘矢。拾發在上射發之後。此拾發在公既發之後。兩處立文迴別，安得以此爲上射先發？」公卒射，小臣師以巾退，反位。大射正受弓。受弓，以授有司於東堂。【疏】正義曰：盛氏曰：「小臣師反東堂下之位。」注云「受弓，以授有司於東堂」者，《釋官》曰：「《燕禮·記》：君射既發，則小臣受弓以授弓人。此大射正受弓者，大射與燕射之射又異也。」注「有司」，蓋即謂弓人。」胡氏肇昕曰：「大射正受弓，亦當授小射正。小射正以授有司於東堂也。」上云「小射正授弓」，此云「大

射正受弓」，文互見也。「小射正以筭受決、拾，退奠于玷上，復位。大射正退，反司正之位。小臣正贊襲。公還而后賓降，釋弓于堂西，反位于階西，東面。階西，東面，賓降位。【疏】正義曰：小射正復位者，盛云：小射正之位，「郝云『於東堂』，竊謂諸侯之小射正，蓋中士、下士也。其位本在西方，東堂乃其將射俟事之位。上經云『皆以俟於東堂』是也。事畢，則仍反西方之位與？」「大射正退，反司正之位」者，敖氏曰：「云『反司正之位』，是射時其位自若也。然則此司正之位不當東西之中，而與鄉飲酒異者，明矣。」盛氏曰：「此時司正之位，蓋亦遷於司射之南，如《鄉射禮》也。經不言者，文不具耳。敖氏據此而改經中庭爲阼階前，泥矣。」《釋官》曰：「上注云『大射正舍司正，親其職』，即以此經知之。大射正初爲擯者，又爲司正。君射時，又舍司正親其職，至是仍反爲司正。是此篇所言大射正、擯者、司正實一人也。」「公還而后賓降」者，敖氏曰：「公退云『還』，是其進退亦不由物前也。賓因降而不敢即升，若以是時未有上事

①「於」，原作「而」，今據《儀禮集編》改。

也。」方氏苞曰：「諸公、卿降反位，皆如三耦，惟君初曰就物，事畢曰還。凡要節而揖，君皆無之也。蓋惟燕、食，賓初入，君揖而進之。大射之賓亦然。及正射則無爲對羣臣而揖，亦無爲向物而揖也。君不揖而賓揖，則疑於揖君，故不揖與君同。若兩君好會而射，則揖當各循其節矣。」

注云「階西，東面，賓降位」者，以上文賓受獻訖，賓降立於階西、東面決之也。公即席，司正以命升賓；賓

升復筵，而後卿、大夫繼射。【疏】正義曰：韋氏

協夢曰：「司正以命升賓，尊賓也。賓必俟命，然後敢升，尊君也。卿、大夫必俟賓升復筵而後射者，以賓在階西，難以爲儀也。」

右君與賓耦射

諸公、卿取弓矢于次中，袒決遂，執弓，搯三挾一个，出；西面揖，揖如三耦，升射；卒射，降如三耦；適次，釋弓，說決拾，襲，反位。衆皆繼射，釋獲皆如初。諸公、卿言取弓矢，衆言釋獲，互言也。【疏】正義曰：敖氏曰：「反位亦在次，

於取弓矢之處爲少北耳。衆謂大夫而下，此不分別士與大夫爲耦之儀，是如三耦也。其以君在，故耦不得盡其尊大夫之禮與？釋獲皆如初，亦指君以下言也。」褚氏寅亮曰：「上經言諸公、卿適次，繼三耦以南，至此始言取弓矢於次中，則射位在次外明矣。」吳氏廷華曰：「公、卿同在次，又言次中者，嫌如賓取於堂西也。」卒射，釋獲者

遂以所執餘獲適阼階下，北面告于公，曰：

「左右卒射。」司射不言告者，釋獲者於是有事，宜終之也。餘獲，餘算也。無餘算則無所執。古文曰「餘算」。

【疏】正義曰：注「司射不言告」者，《校勘記》曰：「徐本、《通解》俱無「言」字。」注云「古文曰「餘算」」，鄭不從者，

胡氏承珙曰：《鄉射》云：「卒射，釋獲者遂以所執餘獲升自西階，盡階不升堂，告於賓曰：左右卒射。」鄭以彼決此，故從今文。」反位，坐，委餘獲于中西，興，共而俟。

右公卿大夫及衆耦皆射

儀禮正義卷十五 鄭氏注

受業江寧楊大堉補

司馬袒執弓，升，命取矢如初。負侯許諾，以旌負侯如初。司馬降，釋弓如初。小臣委矢于楅如初。司馬，司馬正，於是司馬師亦坐乘矢。【疏】正義曰：方氏苞曰：「命取矢以下六節，皆三射之始事也。再射之算尚未視，獲未數，賢獲未告，中算未釋，豐未設，射爵未舉，侯與有事於侯者未獻，而汲汲於此，何也？以此時儀節甚繁，閱時甚久，而司馬與司射所掌之事與所用之地各異，故乘司射發命之隙，使有司各供其事，並行而不相悖，而司射既請三射於公，可直入次而命三耦矣。禮之所謂「連而不相及」、「茂而有間」，此其可驗者也。」賓、諸公、卿、大夫之矢，皆異束之以茅；卒，正坐，左右撫之，進束，反位。異束大

夫矢，尊殊之也。正，司馬正也。進，前也。又言「束」，整結之，示親也。【疏】正義曰：敖氏曰：「此文主於束矢而言，蓋見其不在如初之中者也。」盛氏曰：「異束之者，人一束也。束之亦於楅上。卒，束畢也。敖云衍，非。」韋氏協夢曰：「束亦束其上握也。《鄉射記》：『兼束之以茅，上握焉。』」^①注云「異束大夫矢，尊殊之也」者，賈疏云：

「公卿皆異束，但言大夫者，三耦之內，大夫以士耦之，士矢不束，大夫束之，故云「尊殊之」。云「進，前也。又言「束」，整結之，示親也」者，郝氏曰：「左右撫之，數衆矢也。進束，謂既數衆矢，而後進所束之矢於楅。」^②反位，反中西南東面之位。盛氏曰：「撫矢之位，《鄉射禮》云「當楅南，北面」，此宜亦如之。委矢於楅，北括，束茅於矢上握，則束矢之處於撫矢者爲近矣。既撫而復親束之，乃云「進」者，蓋撫手及之而已。束則於當楅之位，又少進也。郝氏云：「進所束之矢於楅。」然則未進之前，賓、諸公、卿、大夫之矢，豈皆委之於地邪？其說蓋不可通矣。」賓之矢，則以授矢人于西堂下。是言矢人，則納射器之有司，

① 「記」，《儀禮蠡測》作「禮」。

② 「所」，原作「不」，今據《續清經解》本及《儀禮節解》改。

各以其器名官職。不言君矢，小臣以授矢人於東堂下可知。【疏】正義曰：注云「是言矢人，則納射器之有司各以其器名官職」者，《釋官》曰：「《周禮》司弓矢職」曰：「大射、燕射，共弓矢如數。」此矢人疑如其職。《考工記》有矢人爲矢，不預射事，與此別。韋氏協夢曰：「矢人，猶謂執矢之人爾，非遂以矢人之官目之也。注猶未盡善。」胡氏肇昕曰：「此篇如負侯、釋獲者、獲者之類，多以事目其職。此矢人即有司，而云矢人者，以器名其官，猶以事目其職也。」云「不言君矢，小臣以授矢人於東堂下可知」者，方氏苞曰：「再射，賓取矢於堂西，故以矢授於西堂下，以備三射之取也。舉賓之矢以見例，則公之矢以授於東堂，公卿、大夫之矢以授於次中可知矣。射畢，凡與射者皆授有司弓矢，故不列數也。」司馬釋弓，反位，而后卿、大夫升，就席。此言其升，前小臣委矢於楅。【疏】正義曰：注云「此言其升，前小臣委矢於楅」者，張氏爾岐曰：「方司馬釋弓，反位，卿、大夫即升就席，是其升在小臣委矢之前。以上文類言如初諸事，故至此始特言之。」

右射訖取矢

司射適階西，^①釋弓，去扑，襲；進由中東，立于中南，北面視算。釋弓，去扑，射事已也。釋獲者東面于中西坐，先數右獲。固東面矣，復言之者，少南就右獲。二算爲純，純猶全也，耦陰陽也。一純以取，實于左手。十純則縮而委之，縮，從也。於數者東西爲從。古文「縮」皆作「蹙」。每委異之。易枚數。【疏】正義曰：「枚」，徐本、《通解》俱作「校」，陳、閩、監、葛俱誤作「效」。有餘純，則橫諸下。又異之也。自近爲下。一算爲奇，奇則又縮諸純下。又從之。興，自前適左，從中前北也。更端，故起。東面坐。少比於故。【疏】正義曰：「比」，《校勘記》曰：「徐、陳、《通解》俱作「北」。○敖氏曰：「此「坐」字衍文，《鄉射》無之。」坐，兼斂算，實于左手；一純以委，十則異之。變於右也。其餘如右獲。謂所縮、所橫者。【疏】正義曰：張氏爾岐曰：

① 「射」，原作「馬」，今據《儀禮注疏》改。

「案：釋獲者在中西，東面而釋獲，其右獲之算在中南，左獲之算在中北，故此數右獲，則注云「少南就右獲」；數左獲，則注云「從中前北」，又云「少比於故」也。」^①司射復

位。釋獲者遂進，取賢獲，執之。由阼階下

北面告于公。賢獲，勝黨之算也。執之者，齊而取其

餘。【疏】正義曰：「北面告於公」，《校勘記》曰：「陳、閩、

監、葛俱脫「告」字。」○盛氏曰：「此亦君禮之異者也。《鄉

射禮》云：「升自西階，盡階不升堂，告於賓。」若右勝，

則曰「右賢于左」；若左勝，則曰「左賢于

右」。以純數告，若有奇者，亦曰奇。告曰：某

賢於某若干純若干奇。若左右鈞，則左右各執一

算以告，曰「左右鈞」。還復位，坐，兼斂算，

實八算于中，委其餘于中西；興，共而俟。

【疏】正義曰：「實八算於中」，《校勘記》曰：「實，石經補闕誤作「賓」。盛氏曰：「此算獲及飲不勝者之法，皆與鄉射

無異，則亦以習禮樂，而非別賢否可見矣。若果為將祭擇士之禮，豈可不分各耦而較其中之多少哉？」

右數左右獲算多少

司射命設豐。當飲不勝者射爵。【疏】正義曰：

敖氏曰：「亦適堂西命之也。」張氏惠言曰：「司射命設豐，

無面位。案：司宮士位在北堂，司射宜由堂東至北堂下，

東面命之。」司宮士奉豐，由西階升，北面坐設

于西楹西，降復位。【疏】正義曰：敖氏曰：「司宮

士，司宮之屬也。此時之位，亦當在堂西。」盛氏曰：「司宮

而曰士，別於庶人在官者也。《周禮·宮人》：「中士四人，

下士八人。」諸侯蓋以下士及庶人在官者為之。」韋氏協夢

曰：「司宮士位本亦在西方，知將奉豐，故先俟於堂西也。

復位，則復西方位矣。」《釋官》曰：「司宮士，以僕人士例

之，亦司宮之屬，府、史、胥、徒也。」勝者之弟子洗觶，

升，酌散；南面坐奠于豐上，降，反位。弟子，

其少者也。不授者，射爵猶罰爵，略之。【疏】正義曰：盛

氏曰：「弟子，謂士之少者也。位在西方。」韋氏協夢曰：

「勝者之弟子，即《燕禮》所言之庶子，《周官》宮伯所掌者

也。庶子在宮中，如宿衛之官，宜亦隨公出入。射以有事

①「北」，原作「比」，今據《儀禮鄭注句讀》改。

爲榮，故使勝者之弟子洗觶、酌散，其亦「旅酬下爲上」之意與？」方氏苞曰：「《鄉射禮》執弓反位，以弟子皆與射也。」

大射弟子不與，故反位不執弓，蓋洗觶本未執弓也。」案：

《義疏》云：「《鄉射禮》言勝者之弟子洗觶、升酌，此乃言『酌散』者，鄉射一尊，故無所別；此君禮，有膳有散，故於酌、射爵之始明之。下僕人師繼酌，不言散，以此準之，亦酌散也。及賓飲公夾爵，皆酌散。惟公爵酌膳，其義可知已。故經凡六酌方壺，獨載其五。」注云「不授者，射爵猶罰爵，略之」者，賈疏云：「《詩》云：『兕觥其觶，旨酒思柔。』」注云：「觶，陳設貌。」①觥，罰爵不手授。②此飲射爵亦不手授，故云「猶罰爵」也。獻酬之爵，皆手授之。此不手授，故云「略之」也。」司射袒執弓，挾一个，搯

扑，東面于三耦之西，命三耦及衆射者：「勝者皆袒決遂，執張弓。執張弓，言能用之也。右手挾弦。」【疏】正義曰：「司射袒執弓，《校勘記》曰：『袒」

上，唐石經、徐本、楊、敖俱有『遂』字。』○敖氏曰：「司射袒亦決遂，文省耳。東面命之於次中。」○方氏苞曰：「出師之禮，司徒搯扑，北面誓之。故《鄉射禮》司射搯扑，北面于三耦之南。以三耦州之子弟，可以師長之道臨之。大射之

三耦皆士，而公、卿、大夫並列射位，故司射之面位必異。」不勝者皆襲，說決、拾，卻左手，右加弛弓于其上，遂以執弣。」固襲，說決拾矣。復言之者，起勝者也。不勝者執弛弓，言不能用之也。兩手執弣，無所挾也。【疏】正義曰：注云「固襲，說決拾矣。復言之者，起勝者也」者，以射畢之時，降堂皆就次、襲，說決拾矣。此復言之者，以不勝者之襲，說決拾，起勝者之更袒決遂也。司

射先反位。居前，俟所命人次而來飲。三耦及衆射者皆升，飲射爵于西階上。不勝之黨無不飲。

【疏】正義曰：賈疏云：大射者，所以擇士以助祭。今若在於不勝者之黨，雖數中亦受罰，及其助祭，雖飲射爵亦得助祭，但在勝黨雖不飲罰爵，若不數中，亦不得助祭。飲罰據一黨而言，助祭取一身之藝，義固不同也。盛氏曰：「疏爲此說以護注耳，其實非也。算獲既以左右計之矣，其數中、不數中，亦孰從而辨之哉？」褚氏寅亮曰：「鄉射之三耦及衆射者，先止於堂西，及飲射爵，乃進立於射位。此則射畢

①「貌」，原作「見」，今據《儀禮注疏》改。

②「不」，原脫，今據《儀禮注疏》補。

而即已立於次北之位，故不言進立也。」小射正作升飲射爵者，如作射。一耦出，揖如升射。及階，勝者先升，升堂少右。先升，尊賢也。少右，辟飲者，亦因相飲之禮然。【疏】正義曰：「勝者先升，升堂少右」，《校勘記》曰：「升，《通解》不重。」○方氏苞曰：「《鄉射》曰『一耦進』，以立於中之西南也；此曰『一耦出』，以位在次中。」注云「少右，辟飲者，亦因相飲之禮然」者，相飲之禮，謂獻酬之禮也。獻酬之禮，獻者在右，酬者在左。褚氏寅亮曰：「司射既命其升飲之儀，小射正乃作其升飲。異人爲之，亦諸侯官多也。」不勝者進，北面坐，取豐上之觶，興；少退，立卒觶，進；坐奠於豐下，興，揖。立卒觶，不祭，不拜，受罰不備禮也。右手執觶，左手執弓。【疏】正義曰：注云「右手執觶，左手執弓」者，上云「卻左手，右加弛弓於其上」，是受罰爵手未釋弓，執觶於右手爲便，故知左手執弓也。不勝者先降，後升先降，略之，不由次也。降而少右，復並行。與升飲者相左，交于階前，相揖；適次，釋弓，襲，反位。【疏】正義曰：方氏苞曰：「耦次在洗東南。《鄉射

禮》相揖出於司馬之南，遂適堂西。彼射者，州之學士也。必過於司馬之前，以察其儀度。大射之耦則公、卿、大夫、士，降階而徑適次，^①於禮乃宜。」僕人師繼酌射爵，取觶實之，反奠於豐上，退俟于序端。僕人師酌者，君使之代弟子也。自此以下，辯爲之酌。【疏】正義曰：「退俟於序端」，《校勘記》曰：「俟，誤作『次』。」敖氏曰：「僕人師不言命之者，則是此乃其常職，俟時而共之耳。」升飲者如初。三耦卒飲。若賓、諸公、卿、大夫不勝，則不降，不執弓，耦不升。此耦，謂士也。諸公、卿或闕，士爲之耦者不升。其諸公、卿、大夫相爲耦者不降席，重恥、尊也。【疏】正義曰：敖氏「耦謂士與大夫爲耦者也。不升，則立於射位也。大夫既飲，耦乃釋弓而反位。」朱大韶曰：「『賓』，字之衍也。賓與公爲耦者也。耦不升，謂士與大夫爲耦者也。《鄉射》曰『大夫飲則耦不升』，與此同。賓之耦則公也，安得云不升？此云『諸公、卿、大夫不勝，則不降，不執弓，耦不升』者，尊諸公、卿、大夫也。下云『賓、諸公、卿、大夫受觶於席，以

①「徑」，原作「經」，今據《儀禮析疑》改。

降，適西階上，北面立飲」者，著賓及諸公、卿、大夫飲之節也。此「賓」涉下而衍。「僕人師洗，升實觶以授；

賓、諸公、卿、大夫受觶于席，以降，適西階上，北面立飲，卒觶，授執爵者，反就席。」雖尊

亦西階上立飲，不可以己尊枉正罰也。^①授爵而不奠豐，尊大夫也。【疏】正義曰：「洗，升實觶」，《校勘記》曰：

「賓，唐石經、徐本、《通解》、楊、敖俱作「實」。○敖氏曰：

「洗者，以承賤者後，新之，其次則不洗矣。降，降席也。西

階上，臣飲罰爵之位也。授執爵者，宜反於其所受者也。」

韋氏協夢曰：「授，亦授之於席前也。《鄉射禮》：「洗，升

實之，以授於席前。」若飲公，則侍射者降，洗角

觶，升酌散，降拜；侍射，賓也。飲君則不敢以爲罰，

從致爵之禮也。【疏】正義曰：張氏爾岐曰：「角觶，賈疏

以爲以兕角爲之，對下文飲君象觶而言，仍是三升之觶，

非「四升曰角」之「角」也。」盛氏曰：「賓將自飲，故用角

觶。」云「從致爵之禮也」者，凌氏《釋例》曰：「凡大射飲公，

略如賓媵爵於公之禮。《燕禮》、《大射》：獻士後，賓降洗，

升，媵觶於公，酌散，下拜。公降一等，小臣辭。賓升，再拜

稽首，公荅再拜。賓坐祭，卒爵，再拜稽首，公荅再拜。賓

降，洗象觶，升，酌膳，坐奠於薦南，降拜，小臣辭。賓升成拜，公荅再拜。賓反位，公坐取賓所媵觶，興，^②惟公所賜。

二禮大略相同，惟飲公之禮，公卒此觶；媵觶之禮，公取此觶爲士舉旅，爲小異耳。《鄉射·記》：「若飲君，如燕則夾爵。」注：「如燕，賓媵觶于公之禮。」是也。「公降一等，

小臣正辭，賓升，再拜稽首，公荅再拜。賓

坐祭，卒爵，再拜稽首，公荅再拜。賓降，洗

象觶，升酌膳以致，下拜，小臣正辭，升，再

拜稽首，公荅再拜。公卒觶，賓進受觶，降

洗散觶，升實散，下拜，小臣正辭，升，再拜

稽首，公荅再拜。賓復酌自飲者，夾爵也。但如致

爵，則無以異於燕也。夾爵，亦所以恥公也。所謂「若飲

君，燕則夾爵」。【疏】正義曰：敖氏曰：「賓坐祭」以下，此

與媵觶之禮同者也。以致者，亦奠於薦南。「公卒觶」以

下，此與媵觶之禮異者也，所以謂之射爵也。方氏苞曰：

「公酬賓，賓再拜稽首。公荅一拜，至飲射爵，賓致爵，則荅

① 「枉」，原作「在」，據《儀禮注疏》改。

② 「興」，原作「與」，今據《禮經釋例》改。

再拜者四。不惟荅賓之親獻及夾爵，陰以事有未當，雖尊者宜爲禮屈，重自抑下，所以養成其德性，俾凡事不敢自是，而求助於賢臣，所謂各繹己之鵠也。」又曰：「公、卿、大夫飲射爵亦於西階，所以示法行於貴，而後可以齊衆也。君則卒觶於阼階之位，貴有常尊也。公、卿、大夫之飲耦不升，君則賓親獻而夾爵，上下之辨則然，而飲不勝之爵，與衆耦同，又使君知罰不敢行，而躬宜自省也。」注云「夾爵，亦所以恥公也」者，韋氏協夢曰：「凡飲罰爵者，皆不勝者自飲，而勝者不飲。此賓復酌自飲者，嫌公獨飲有示罰之意也，注未當。」云「所謂若飲君，燕則夾爵」者，張氏爾岐曰：「注末引《鄉射》文，若云：若飲君，用燕禮致爵之法，其異者，夾爵耳。」賓坐，不祭，卒觶，降奠于筐，階西東面立。不祭，象射爵。擯者以命升賓，賓升就席。擯者，司正也。今文「席」爲「筵」。

【疏】正義曰：注云「今文『席』爲『筵』」者，胡氏承珙曰：「《周禮·司几筵》注云：『筵，亦席也。鋪陳曰筵，藉之曰席。然其言之筵，席通矣。』疏云：『設席之法，先設者皆言筵，後加者爲席，故其職云：設莞筵紛純，加繅席畫純。假令一席在地，或亦云筵。《儀禮·少牢》云：司宮筵於奧。」

是也。」然所云筵席，惟據鋪之先後爲名，其筵、席止是一物。承珙案：筵、席散文固通，然此經上下文多言「席」，惟上文「司正以命升賓，賓升復筵」，^①彼古今文既皆作「筵」，即不必破爲「席」。此即古文作「席」，故疊今文不用也。」又見《士虞禮·記》。若諸公、卿、大夫之耦不勝，則亦執弛弓，特升飲。此耦亦謂士也。特，猶獨也。以尊與卑爲耦，而又不勝，使之獨飲，若無倫匹，孤賤也。

【疏】正義曰：「以尊爲耦」，《校勘記》曰：「尊」下，徐本、楊氏俱有「與卑」二字，《通解》無。」注云「此耦亦謂士也」者，敖氏曰：「比耦之時，大夫有與士爲耦者，諸公、卿無與士爲耦者。此「諸公卿」，衍文。」韋氏協夢曰：「耦亦謂卿與公爲耦，大夫與卿爲耦，士與大夫爲耦者也。注獨指士而言，義猶未盡。」褚氏寅亮曰：「經無諸公、卿不與士爲耦之明文，則安得衍此三字？」衆皆繼飲射爵，如三耦。射爵辯，乃徹豐與觶。徹，除也。

右飲不勝者

①「賓」，原作「之」，今據《儀禮今古文疏證》改。

司宮尊侯于服不之東北，兩獻酒，東面南上，皆加勺；設洗于尊西北，筐在南，東肆，實一散于筐。爲大侯獲者設尊也。言尊侯者，獲者之功由侯也。不於初設之者，不敢必君射也。君不射，則不獻大侯之獲者。散，爵名，容五升。【疏】正義曰：敖氏曰：「爲三侯之獲者及隸僕人、巾車設尊，而言尊侯者，以其功皆由侯也。兩，兩壺也。或脫一「壺」字耳。兩壺皆酒而云「南上」，是先酌所上者與？加勺束枋，此在大侯之乏東北，乃云「服不」者，見此時服不在乏也。不於初設之者，因事而獻，故其尊亦俟時而設，所以別於正獻者也。此所設尊洗之類，即篇首之所言者也。上言獲者之尊，此云「尊侯」；上言大侯之乏，此云「服不」，文互見耳。又文亦有詳略，則以設與未設而異也。」盛氏曰：「敖說當矣。注以此尊專爲大侯獲者設，非。三侯之獲者，其功同，其人相去亦不遠，何必異尊？」上經云「大侯之乏東北」，此云「服不之東北」，此其地一也，一地而兩尊，或先或後，亦理之所無者。注又云「君不射，則不獻大侯之獲者」，尤屬飾說。因燕而射，君或可以不與，未聞大射而君不與者也。君若不射，《射義》何以言「諸侯君臣盡志於射，以習禮樂」乎？

云「南上」，是亦有玄酒矣。獻獲者而有玄酒，以祭侯，故重之也。韋氏協夢曰：「此即前經司宮「尊於大侯之乏東北」者，彼歷言其地而已，至是乃陳之，猶卿、大夫之席前已言其地，至既獻乃布之也。注以此尊與前爲二尊，此洗與前爲二洗，服不與獲者僅六人耳，而必異尊與洗，有是理乎？」褚氏寅亮曰：「司馬正、司馬師各酌一壺，故有兩。」朱氏大韶曰：「侯」，字之衍也。鄉射、大射並獻獲者與釋獲者，此獻也，與獻工同，非爲侯祭也。《考工記·梓人》曰：「祭侯則爲位。」經不言爲位，知非祭侯也。云服不、云負侯、云獲者，異名而同實。《鄉射》曰：「司馬命獲者執旌以負侯。」以其唱獲，謂之獲，以其執旌背侯而侯，謂之負侯。《大射》則謂之服不，舉其官也。下文「獲者適右个」，即服不也。注不言服不言獲者，國君大侯，服不負侯，其徒居之持獲，變其文，容二人也。司馬正皆獻之。案：經言實一散，下服不祭侯云「司馬師受虛爵」，虛爵即此散也。蓋司馬正但獻服不，其二侯之獲者，司馬師獻之，下文所云「洗獻隸僕與巾車獲者」是也。①司馬正所獻者，祇服不一人，以其通稱，故云「獲者」耳。篇首云「尊於大侯之乏東

①「僕」下，《儀禮注疏》有「人」字。

北」，即此云「尊於服不之東北」。大侯之乏，即服不之位也。篇首云「設洗於獲者之尊西北」，即此云「設洗於尊西北」，尊即獲者之尊。篇首目其事，此則當事而設也。尊爲服不設，非爲侯設，故疑爲衍。」案：《義疏》云：「此經大概與《鄉射》同，其異者，《鄉射》一洗一尊，釋獲與獲者共之；此獻釋獲與鄉射同，獻獲者，則侯之西北又別有尊及洗，^①其尊上下仍有等焉。^②又《鄉射》一侯，此用三侯，則獲者亦三。以壺言之，經明兩獻酒東面南上，^③有上則有下可知；^④上者尊，則下者卑又可知。服不，司馬皆尊，以司馬正而獻服不，則應酌上尊，隸僕人與巾車獲者則卑於服不，司馬師又卑於司馬正，其獻也，應酌下尊。此兩壺之別也。」又云：「此設尊洗之處近於侯，乏之間。獲者執旌時往來於此。若早設之，亦虞室礙。故侯時而設，非關君之射不射也。既張三侯，君雖不射，大侯之獲者亦當獻之。」

司馬正洗散，遂實爵，獻服不。言服不者，著其官，尊大侯也。服不，司馬之屬，掌養猛獸而教擾之者。洗，酌皆西面。【疏】正義曰：注「言服不者，著其官，尊大侯也」者，張氏爾岐曰：「服不，即獲者也。前此皆言獲者，以其事名之；至此乃著其官，是尊大侯也。」敖氏曰：「服不爲大侯之獲者，故先獻也。司馬正獻，亦異之，獻時蓋亦

西南面。」服不侯西北三步，北面拜受爵。近其所爲獻。【疏】正義曰：注云「近其所爲獻」者，張氏爾岐曰：「服不得獻，以侯之故，則侯是其所爲獻也，故近侯而不近乏。」司馬正西面拜送爵，反位。不侯卒爵，略賤也。此終言之，獻服不之徒乃反位。【疏】正義曰：敖氏曰：「既拜送而反位，亦爲其不拜既也，是後則司馬師代之行事。於司馬正既反位，獲者亦反東面。」張氏爾岐曰：「此注可疑，當以經文爲正。服不之徒，或在司馬師所獻之中耳。」韋氏協夢曰：「注非也。服不爲三侯獲者之長，而位爲下士，獻以司馬正，宜也。若其徒雖爲大侯之獲者，與參侯、干侯之獲者等耳。豈可與服不同獻乎？且上經云「實一散於筐」，服不卒爵之後，司馬師即受虛爵，獻隸僕巾車與獲者，司馬正復用何爵獻其徒乎？蓋服不一人，司馬正獻之，而其徒則與參侯、干侯之獲者，皆受司馬師之獻也。」宰夫有司薦，庶子設折俎。宰夫有司，宰夫

①「北」，原脫，今據《儀禮義疏》補。

②「等」下，《儀禮義疏》有「倫」字。

③「明」下，《儀禮義疏》有「言」字。

④「有」，《儀禮義疏》作「言」。

之吏也。《鄉射·記》曰：「獲者之俎，折脊、脅、肺。」【疏】正義曰：敖氏曰：「薦於服不之東，俎在薦東。」注云「宰夫有司，宰夫之吏也」者，《釋官》曰：「《周禮》宰夫下有『府史』。」①注云：「府治藏，史掌書。」各有專司，故謂之有司。《左傳》哀公三年：「命宰人出禮書。」杜注：「宰人，冢宰之屬。」《國語》韋注云：「宰人，吏人也。」疑即此。大射，凡薦皆使宰胥，此獻服不獨使宰夫有司者，以此經有祭侯之禮。《周禮·宰夫職》掌祭祀之薦羞，故使宰夫有司薦也。」引《鄉射·記》者，以此經俎實無文，故引此以爲證。盛氏曰：「獲者之俎，折以卿之餘體。獲者而有俎，亦以祭侯故也。《鄉射禮》曰：「俎與薦皆三祭。」卒錯，獲者適右个，薦俎從之。不言「服不」，言「獲者」，國君大侯，服不負侯，其徒居乏待獲，變其文，容二人也。司馬正皆獻之。薦俎已錯，乃適右个，明此獻已，已歸功於侯也。適右个，由侯內。《鄉射·記》曰：「東方謂之右个。」【疏】正義曰：注云「不言『服不』，言『獲者』，國君大侯，服不負侯，其徒居乏待獲，變其文，容二人也。司馬正皆獻之」者，敖氏曰：「此獲者，即服不也。變『服不』言『獲者』，見服不亦在乏而獲也。」張氏爾岐曰：「信如注言，司馬正並獻二人，②當用二爵。經文明言『實一散於簠』，安得有二爵乎？司

馬正所獻，決是服不氏一人，其徒則司馬師獻隸僕巾車後乃獻之。」盛氏曰：「案：上下注意蓋謂國君大侯，服不與其徒負侯居乏相代，司馬正獻服不訖，即獻其徒而后反位，亦非謂二人並獻也。但玩前後經文，負侯及獲者，三侯皆有之。負侯者主負侯及取矢，蓋《周禮》射鳥氏之職，以其取矢知之也。諸侯兼官，即以服不氏攝之。獲者專主唱獲，與負侯者並不相代。司馬正所獻，惟服不之長一人，其參侯、干侯之獲者及三侯之負侯者，皆司馬師獻之也。而注說之誤了然矣。」云「薦俎已錯，乃適右个，明此獻已，已歸功於侯也」者，敖氏曰：「有司與庶子既錯薦俎於地，獲者則以爵適右个，而二人復執薦俎從之，薦錯於獲者之南，俎在薦南。」方氏苞曰：「司馬獻服不，薦俎錯焉，亦非爲侯設也。服不祭啐而適右个，不敢以己之餘祭侯也。終則仍設薦俎於乏南，明獲者雖以祭侯，而薦俎本爲獲者設也。」褚氏寅亮曰：「獲者祭侯所設薦俎，當如侯北面之位，薦南面俎北。注云「薦俎之設，如於北面人焉」，是也。」獲者左執爵，右祭薦俎，二手祭酒；祭俎不奠爵，

①「下」，原脫，今據《儀禮釋官》補。

②「正」，原脫，今據《儀禮鄭注句讀》補。

不備禮也。二手祭酒者，獲者南面於俎北，當爲侯祭於豆間，爵反注，爲一手不能正也。此薦俎之設，如於北面人焉。天子祝侯曰：「唯若寧侯，無或若女不寧侯，不屬於王所，故抗而射女。彊飲彊食，貽女曾孫諸侯百福。」諸侯以下祝辭未聞。【疏】正義曰：《校勘記》曰：「注『如於北面人焉』『北』誤作『此』。『故抗而射女』『射』，陳、閔、監、葛俱誤作『設』。『彊飲彊食』『彊』，徐本俱作『強』。」○敖氏曰：

「祭俎者，興，取刲肺以坐祭也。二手祭酒，爲散大酒多，一手注之，難爲節也。」褚氏寅亮曰：「亦爲代侯祭酒，向自身而反注於內也。必二手者，散大容五升，一手難反注。」注引「天子祝侯」者，《周禮·梓人》文。方氏苞曰：「五帝三王之世，凡寇賊奸宄，聽斷於士師，其阻兵倡亂，敢爲不寧者，皆強橫之諸侯，故射之正鵠，取義於不寧侯，使貴賤少長同心於貫之，以示敵王所愾之義。義取於不寧侯，而又祭之，何也？祭有非報功而以聲其罪者。《考工記》所載天子祭侯之辭，乃《周官·太祝》、《詛祝》所謂『攻說』也。《燕義》所稱，則諸侯燕射樂歌，非祭侯之辭。師禡所祭，於經傳無考，而後儒以爲祭黃帝、蚩尤。祭黃帝則禱祈也，祭蚩尤則必以攻說之辭。《記》曰：『禡於所征之地。』必以蚩尤爲戒，使不寧之方毋侮毋忽也。」適左个，祭如右

个，中亦如之。先祭个，後中者，以外即之至中，若神在中。①《鄉射禮》曰：獻獲者，俎與薦皆三祭。【疏】正義曰：注「俎與薦」，《校勘記》曰：「薦，誤作『俎』。」○引《鄉射禮》者，證左右个及中爲三祭也。卒祭，左个之西北三步，東面。北鄉，受獻之位也。不北面者，嫌爲侯卒爵。【疏】正義曰：注「北鄉」，《校勘記》曰：「北，徐本、楊、敖俱作『此』，與單疏標目合；鍾本、《通解》俱作『北』。」案：張氏《句讀》作「北」，盛氏《集編》正作「此」。作「此」是也。云「不北面者，嫌爲侯卒爵」者，以獻服不受獻之時在侯西北面。此東面，不北面者，敖氏曰：「變於受爵之時也。卒爵與受爵不同面，自是一禮耳。下釋獲者亦然。」設薦俎，立卒爵。不言不拜既爵，司馬正已反位，不拜可知也。《鄉射禮》曰：「獲者薦右東面立飲。」【疏】正義曰：引《鄉射禮》者，以獲者亦薦右東面立也。敖氏曰：「卒爵於薦西，東面自若也。是時司馬師蓋已北面於其東。」司馬師受虛爵，洗，獻隸僕人與巾車、獲者，皆如太侯之禮。隸僕人，埽侯道。巾車，張大

①「若」，原作「右」，今據《儀禮注疏》改。

侯。及參侯、干侯之獲者。其受獻之禮，如服不也。隸僕人、巾車，於服不之位受之，功成於大侯也。不言量人者，此自後以及先可知。【疏】正義曰：敖氏曰：「承服不後而洗，則是每獻皆洗矣。隸僕人與巾車，皆聽命於司馬，故亦司馬并獻之。」褚氏寅亮曰：「此獲者祭參、干二侯，隸僕人等則無所祭。云『皆如大侯之禮』，實不盡如也。」注云

「及參侯、干侯之獲者」，盛氏曰：「獲者，謂參侯、干侯之獲者也。三侯之負侯者亦存焉，於是乃統言獲者，亦其事相聯也。」《釋官》曰：「司馬正獻服不，大侯之獲者也。」司馬師獻獲者，參侯、干侯之獲者也。云「隸僕人、巾車，於服不之位受之，功成於大侯也」者，賈疏云：「隸僕人、巾車素無其位，而經云『如大侯之禮』，明就大侯之位受獻也。」吳氏廷華曰：「經言『如大侯之禮』，而不獻於大侯可知。敖氏曰：言『如大侯』，則各就其侯獻之矣。其說是也。且三侯皆射，何得僅言成功於大侯？」云「不言量人者，此自後以及先可知」者，張侯之時，量人在巾車之先，及君射而隸僕人掃侯道，隸僕人、巾車得獻者，自後以及先也。經雖不言量人，其得獻可知也。敖氏曰：不言量人，或不與此獻。方氏苞曰：「注與敖說指皆未明。蓋大射自公、卿、大夫、庶士以及士旅食者，庶子皆受獻，隸僕人、巾車、參干二侯

之獲者，職卑事銳，^①疑不得與於獻，故特著之。若量人制燔脯與鬱人舉罍瀝，於祭有常職，當與卿、大夫並受主人之獻於適士中，若使司馬師與僕隸等，同獻於侯側，非其倫矣。」卒，司馬受虛爵，奠于筐。獲者之筐。【疏】正

義曰：「司馬」下，唐石經、徐本、《通解》、楊、敖俱有「師」字。注云「獲者之筐」者，盛氏曰：「即服不之筐也。」獲

者皆執其薦，庶子執俎從之，設于乏少南。

少南，為復射妨旌也。隸僕人、巾車、量人，自服不而南。

【疏】正義曰：盛氏曰：「獲者，謂三侯之獲者及負侯者，凡六人也。乏，亦謂三侯之乏也。於是不別言服不者，以其

事同也。」吳氏廷華曰：「獲者居之，故設於其南。若巾車、

僕人，未嘗居乏，何必亦設於乏南？且經第言獲者，則隸

僕人等雖同時獻之，或別獻於三侯之前，而薦於其位，未必

有俎，未必有三祭。所謂如者，特大概言之耳。」服不復

負侯而俟。【疏】正義曰：盛氏曰：「此負侯者也，謂之

服不者，著其以服不之徒兼之也。《周禮·服不氏》下士及其徒凡五人，而茲乃有六人者，以其兼射鳥氏之職也。是

① 「銳」，原作「統」，今據《儀禮析疑》改。

時，三侯之獲者皆居乏。」

右獻獲者

司射適階西，去扑；適堂西，釋弓，說決拾，襲；適洗，洗觚，升實之；降，獻釋獲者于其位，少南。獻釋獲者，與獲者異，文武不同也。去扑者，扑不升堂也。少南，辟中。【疏】正義曰：《校勘記》曰：「司射適階西」「適」，誤作「釋」。注「辨中」「辨」，徐本、《通解》、楊、敖俱作「辟」。注云「獻釋獲者，與獲者異，文武不同也」者，釋獲者為大史，是又^①與獲者文武不同也。^②韋氏協夢曰：「不言『獻大史』，而曰『獻釋獲者』，容小史亦獻也。小史佐大史，大史獻，亦當獻之。猶獻服不，而并獻參侯、干侯之獲者，其禮與服不同，則獻小史亦與大史同矣。《釋官》曰：「獲者，司馬獻之；釋獲者，司射獻之。小史佐大史釋獲，則獻亦當及也。」敖氏曰：「洗觚，升實之」，與獲者異，蓋釋獲者無事於侯，且尊於獲者，故獻之不酌獲者之尊，而酌上尊也。」方氏苞曰：「不近酌獻獲者之尊，^③而實之於堂上，則別設獻獲者之尊，以祭辭稱『不寧侯』，不可與堂上同尊益明矣。」云「少南，辟中」者，

張氏爾岐曰：「獻釋獲者於其位之南，欲其稍遠乎中，與獻獲者近侯有異也。」薦脯醢、折俎，皆有祭。俎與服不同，惟祭一為異。【疏】正義曰：服不之俎與薦皆有三祭，以其祭侯三處，各用其一也。敖氏曰：「不言所設之人，蓋亦有司與庶子與？」釋獲者薦右東面拜受爵，司射北面拜送爵。釋獲者就其薦坐，左執爵，右祭脯醢，興，取肺，坐祭，遂祭酒。祭俎不奠爵，亦賤不備禮。興，司射之西，北面立卒爵，不拜既爵。司射受虛爵，奠于篚。釋獲者少西，辟薦，反位。辟薦少西之者，為復射妨司射視算，亦辟俎也。司射適堂西，袒決遂，取弓，挾一个，適階西，搯扑以反位。為將復射。【疏】正義曰：盛氏曰：「此司射倚扑之處與鄉射同，倚弓矢之處與鄉射異。」韋氏協夢曰：「下文云『司射倚扑于階西』，則

①「又」，《儀禮正義正義》作「文」。

②「文」，《儀禮正義正義》作「是」。「武」，原作「式」，今據

《續清經解》本改。

③「獲」，原脫，今據《儀禮析疑》補。

此時司射可直由階西適阼階下。必搢扑反位者，以獻釋獲者之事未終，不敢由便也。」

右獻釋獲者第二番射事竟

司射倚扑于階西，適阼階下，北面請射

于公，如初。不升堂，賓、諸公、卿、大夫既射矣，聞之可知。【疏】正義曰：張氏爾岐曰：「此下言第三番射，以樂爲節之儀。射前有諸公、卿、大夫拾取矢，正射，不鼓不釋，射後，三耦及衆射者又拾取矢。此三事爲異，其餘並如釋獲之射。」○敖氏曰：「阼階下請射于公，正禮也。晁之升者，有爲爲之耳。此言「如初」，未詳，疑衍。」盛氏曰：「初，謂第一番射。」^①如初者，謂其請射之辭也。敖以爲衍文，非。方氏苞曰：「再射升堂而後請，特見於經。此如初，謂如初之請於階下耳。」韋氏協夢曰：「「如初」二字，疑作「公許」。傳寫者因三射多言「如初」，而鄉射三請射又曰「如初」，由此誤耳。」案：《義疏》曰：「初請射時，本自阼階下。」云「如初」者，如其初，不如其再也。」反搢扑，適次，命三耦皆袒決遂，執弓，序出取矢。晁言「拾」，是言「序」，互言耳。【疏】正義曰：敖氏曰：「執弓，

亦右挾之。序，謂每耦以次而出也。」司射先反位，言先，先三耦也。司射既命三耦以入次之事，即反位。三耦入次，袒決遂，執弓挾矢，乃出反次外西面位。晁不言司射先反位，三耦未有次外位，無所先也。【疏】正義曰：注「反次外西面位」位，楊氏作「立」；「三耦未有次外位」，徐本無「外」字，《通解》有，與疏合。云「晁不言司射先反位，

三耦未有次外位，無所先也」者，謂第一番射時，但言司射反位，不言先，以三耦未有次外位故也。盛氏曰：「三耦袒決遂之所與其射位，皆在次中，但有南北之異耳。司射位自在中之西南，云「先」者，謂其不俟三耦之袒決遂而即反位也。注誤。」方氏苞曰：「方命三耦取矢，即反位，與再射異，何也？再射，司射之事皆在次中；三射則事在庭中，不得不先反位也。再射時，大夫、羣士始即事，恐其或愆於儀，故就次中監視之。至三射，則次中之儀皆前見矣。而諸公、卿始繼三耦而出就楅，與衆耦同拾取矢。司射命三耦後，宜先反庭中之位以待事。且再射止見大夫、庶士次中之儀，而未見其取矢於楅之儀，至是始一一監視之。」褚

① 「射」下，《儀禮集編》有「時」字。

② 「下」，《儀禮義疏》作「前」。

氏寅亮曰：「此時三耦尚未拾取矢，注中『挾矢』二字，衍也。」三耦拾取矢如初，小射正作取矢，如初。

小射正，司射之佐。作取矢，禮殺，代之。【疏】正義曰：

「三耦」，《校勘記》曰：「三，誤作二。」○敖氏曰：「小射正作取矢如初」，此句似衍。大射之禮，司射惟命拾取矢而不復作，與鄉射異，以前後經文微之可見。又言此於「拾取矢」之後，似非其次。且上無作取矢之事，亦不宜言「如初」，其爲衍也明矣。」盛氏曰：「上云：三耦皆袒決遂，執弓，序出，取矢。此司射命之之辭，非謂三耦已爲之也。司射命訖反位，於是三耦皆自射位適次南少東，袒決遂，執弓，右挾之，反射位，而后小射正作上耦取矢也。此皆與第一番取矢之儀同，故以『如初』蔽之。三耦拾取矢，言於小射正作取矢之上者，以其有袒決遂之事，在作取矢前也。云『小射正作取矢如初』，則第一番取矢之時，固有成禮矣。而上經不見之者，文闕也。敖氏不悟上經之闕，而反以此爲衍，誤矣。注謂以小射正代司射，亦臆說也。」韋氏協夢曰：「初取矢時不見小射正作射之節者，與此文互備也。小射正作矢，當在三耦拾取矢之前。退其文於下者，以初取矢時無此文也。言『作取矢如初』，則初亦作之可知矣。」凌氏《釋例》曰：「凡大射，三耦拾取矢，則司射命之；諸

公、卿、大夫拾取矢，則小射正作之。此篇第二次射事竟，^①司射倚扑于階西，適陴階下，北面請射于公如初。此請第三次射也。如初者，如第一次射竟請射之儀也。又云：「反摺扑，適次，命三耦皆袒決遂，執弓，序出，取矢。」此言司射命三耦拾取矢也。又云：「司射先反位。三耦拾取矢如初。」此言三耦承司射之命拾取矢也。如初者，如第一次射竟拾取矢之儀也。^②故曰：「三耦拾取矢，則司射命之也。」又云：「小射正作取矢如初。」此言小射正作諸公、卿、大夫取矢也。如初者，如司射命三耦之儀也。第一次射竟，但有三耦拾取矢，無公、卿、大夫，故不云小射正作取矢也。又云：「三耦既拾取矢，諸公、卿、大夫皆降，如初位。」此言諸公、卿、大夫承小射正之作，降階在三耦既拾取矢之後也。如初位者，如第一次射竟諸公、卿、大夫降即位之位也。又云：「與耦人于次，皆袒決遂，執弓，皆進當楅，進坐，脫矢束。上射東面，下射西面，拾取矢如三耦。」此言諸公、卿、大夫拾取矢也。又云：「若士與大夫爲耦，士東面，大夫西面。大夫進坐，脫矢束，退反位。耦揖進，坐，兼

① 「此篇」，《禮經釋例》作「大射儀」。

② 「竟」下，《禮經釋例》有「三耦」二字。

取乘矢，興，順羽，且左還，毋周，反面揖。大夫進坐，亦兼取乘矢如其耦，北面搢三挾一个，揖進。大夫與其耦皆適次，釋弓，脫決拾，襲，反位。」此言士與大夫爲耦，則兼取乘矢，不拾也。又云：「諸公卿升就席，衆射者繼拾取矢皆如三耦，遂入於次，釋弓矢，說決拾，襲，反位。」此言公卿升就席後，衆射者拾取矢也。故曰：「諸公、卿、大夫拾取矢，則小射正作之也。」經文節次甚明，下經三次射竟，不云小射正作取矢者，文不具也。鄉射初次射竟，司射命拾取矢，又云：「司射作上耦取矢。」二次射竟，但云「司射作拾取矢」，不云司射命之者，鄉射禮簡也，鄉射命與作皆司射一人爲之。大射威儀多，故三耦拾取矢，則司射命之，諸公、卿、大夫及衆射者拾取矢，則小射正作之也。經文「小射正作取矢如初」，注以爲禮殺代之，似未得經意。敖氏以爲衍文，則更非矣。」胡氏肇昕曰：「凌氏此條甚精，足正鄭氏、敖氏之誤。盛氏雖駁敖氏，而其謂上經爲文闕，仍無異敖氏謂此經爲衍文也。得凌說而諸家之解皆爲贅矣。」三耦既拾取矢，諸公、卿、大夫皆降，如初位；與耦入于次，皆袒決遂，^①執弓，皆進當楅，進坐，說矢束。上射東面，下射西面，拾取矢，如

三耦。皆進當楅，進三耦揖之位也。凡繼射，命耦而已，不作射，不作取矢，如初。【疏】正義曰：敖氏曰：「如初位者，適次繼三耦以南也。云「如初位」，又云「入于次」，見其所進者又深也。凡經云「適次」而已者，兼深、淺而言也；云「入于次」者，見其深入也。先言「適」，乃言「入」。若次中者，則皆先淺而後深也。執弓亦右挾之，皆進，謂出次而西面之時也。上下射當楅而進坐，說矢束，是俱北面說之也。然則鄉射之大夫說矢束，亦北面明矣。既說，則上射少西而反東面，下射少東而反西面，乃拾取之。」盛氏曰：「適次、入次之辨，敖氏論之詳矣，而其說矢束之法則非也。北面說矢束，既說而后各就楅西東之位者，大夫與大夫之禮也。既就楅東之位而后說矢束，說之亦西面者，大夫爲下射之禮也。經文甚明，奈何混而一之邪？」褚氏寅亮曰：「先言「如初位」，後言「入于次」，位之在次外也益明。」

注云「凡繼射，命耦而已，不作射，不作取矢，如初」者，張氏爾岐曰：「注繼射，謂繼三耦而射；如初，謂從三耦之法。繼射者皆從耦法，故不再命之也。」若士與大夫爲

① 「皆」，原作「當」，今據《續清經解》本及《儀禮注疏》改。

耦，士東面，大夫西面。大夫進坐，說矢束，退反位。說矢束，自同於三耦，謙也。【疏】正義曰：方

氏苞曰：「再射言爲耦之上下，三射言所面之東西，互見且相證也。士與大夫耦，再射即有之，而至此始見，以君射之儀，賓與諸公、卿、大夫升降，進反，揖讓之數，具詳於再射，禮重文繁，^①無暇及士與大夫耦之末節，故補叙於三射，亦列事之義法宜然。」褚氏寅亮曰：「大夫爲下射也，亦西面說之，不北面。」注云「自同於三耦」者，欲與其耦拾取

也。耦揖進，坐兼取乘矢，興；順羽，且左遷，毋周，反面揖。兼取乘矢，不敢與大夫拾。大

夫進坐，亦兼取乘矢，如其耦；北面搢三挾一个，揖進。大夫與其耦皆適次，釋弓，說決拾，襲，反位。諸公、卿升就席。大夫反位，

諸公、卿乃升就席，大夫與己上下位。【疏】正義曰：敖氏曰：「後『揖進』之『進』當作『退』，《鄉射》云『揖退』是也。

大夫既反位，諸公、卿乃與之序升。『公、卿』之下，不言大夫者，文脫耳。又此上下文皆言卿、大夫升就席，不應此時獨否也。然則此有脫文明矣。」張氏爾岐曰：「諸公、卿、大夫自爲耦者，拾取矢在前；大夫與士耦者，取矢在後。前

取矢者，待於三耦之南，至大夫與耦取矢，反位乃與之同升就席，以爵同，故相待也。」褚氏寅亮曰：「與反位之大夫同升也，其義已明，不必更添『大夫』二字。」衆射者繼拾取矢，皆如三耦；遂入于次，釋弓矢，說決、拾，襲，反位。【疏】正義曰：《校勘記》曰：「『繼拾取矢』，誤作『既』。」

右將以樂射射者拾取矢

司射猶挾一个以作射，如初。一耦揖升如初。司馬升，命去侯；負侯許諾。司馬降，釋弓反位。司射與司馬交于階前，倚扑于階西，適阼階下，北面請以樂于公。公許。請奏樂以爲節也。始射，獲而未釋獲，復釋獲，復用樂行之。君子之於事，始取苟能，中課有功，終用成法，教化之漸也。射用應樂爲難。孔子曰：「射者何以聽？循聲而發，發而不失正鵠者，其惟賢者乎？」【疏】正義曰：注

①「文」，原作「又」，今據《儀禮析疑》改。

「君子之於事」，《校勘記》曰：「『事』下，徐本、《通解》、楊氏俱有『也』字。」○始射獲而未釋獲者，謂第一番射；復釋獲者，謂第二番射；復用樂行之者，謂此第三番射。始取苟能，中課有功，終用成法，總上三番射，言教化之漸也。「孔子」以下，《禮記·射義》文，引以證射用應樂為難之意也。司射反，搯扑，東面命樂正曰：「命用樂！」言君有命用樂射也。樂正在工南，北面。【疏】正義曰：注云「樂正在工南，北面」者，賈疏云：「此時工在洗東，西面。樂正在工南，北面。司射在西階下，東面。經云『命樂正』者，東面遙命之。」《釋官》曰：「上別言『小樂正』，則直云『樂正』為大樂正可知。《周禮·大樂正》：王大射，令奏《騶虞》。諸侯大射，亦當大樂正令奏《騶虞》。下疏謂『單言樂正者，謂大樂正』，是也。」樂正曰：「諾。」司射遂適堂下，北面眡上射，命曰：「不鼓不釋！」不與鼓節相應，不釋算也。鼓亦樂之節。《學記》曰：「鼓無當於五聲，五聲不得中和。」凡射之鼓節，投壺，其存者也。《周禮》射節，天子九，諸侯七，卿、大夫以下五。【疏】正義曰：《校勘記》曰：「『北面眡上射』，『眡』，唐石經、徐本、《通解》、楊、敖俱作『視』。案：《釋文》於前『視算』作『眡』，注云『本亦作視』，於此無釋，則亦作『視』也。眡當

从目，今从耳，非也。注「不得中和」「不得」上，徐本、《通解》、楊氏俱有「五聲」二字，是也。」○引《學記》者，證鼓亦樂節之意。云「凡射之鼓節，投壺其存者也」者，《投壺》篇在《禮記》中，其篇圖出魯鼓、薛鼓，云「取半以下為投壺節，盡用之為射節」是也。引《周禮》者，《射人》、《樂師職》皆云：「天子《騶虞》九節，諸侯《騶虞》七節，大夫《采蘋》，士《采芣》，皆五節。」上射揖，司射退反位。樂正命大師，曰：「奏《騶虞》，間若一！」樂正西面受命，左還東面，命大師以大射之樂章，使奏之也。《騶虞》，逸詩《曾孫》也。狸之言不來也。其詩有射諸侯首不朝者之言，因以名篇。後世失之，謂之《曾孫》。「曾孫」者，其章頭也。《射義》所載詩曰「曾孫侯氏」是也。以為諸侯射節者，采其既有弧矢之威，又言「小大莫處，御于君所。以燕以射，則燕則譽」，有樂以時會君事之志也。間若一者，調其聲之疏數重節。【疏】正義曰：注云「《騶虞》，逸詩《曾孫》也」者，以《騶虞》是逸詩篇名。「曾孫」，其章頭也，因亦謂之曾孫耳。云「狸之言不來也」者，解詩篇名狸之意。狸與來古音相近，不來即狸之合聲，猶終葵之為椎、邾婁之為鄒也。云「其詩有射諸侯首不朝者之言，因以名篇」者，以狸為不來首，為諸侯不朝者，故其詩因以名篇。中有射諸侯首不朝

者之言，故用其詩爲《大射》樂章也。云「後世失之，謂之《曾孫》。曾孫者，其章頭也。《射義》所載詩曰『曾孫侯氏』是也」者，此據《射義》所引曾孫侯氏之言，知爲此詩章頭，故後世又名《狸首》爲《曾孫》。云「以爲諸侯射節者，采其既有弧矢之威，又言『小大莫處，御于君所。以燕以射，則燕則譽』，有樂以時會君事之志也」者，此據《射義》所引曾孫之文，明其所以爲諸侯射節之意也。盛氏曰：「《狸首》之詩，今無以考其名篇之義，然以《騶虞》、《采蘋》之類推之，亦必其首章有此二字，而取以名之耳。《射義》所載曾孫侯氏數語，未知其果是與否。即使果是，亦未必其章頭也。鄭君諱所不知而強爲之說，妄矣。又案：《大戴禮·投壺》篇末亦載曾孫侯氏之詩，比《射義》特詳。又雜以《考工記》祭侯祝辭有『嗟爾不寧侯，爲爾不朝于王所，故亢而射女』之言，或鄭說之所本與？凡以樂節射者，但取其節，而不取其詩之義也。今案：大、小《戴記》所載曾孫侯氏之詩，皆序射事，與《騶虞》、《采蘋》之類不協，疑非《狸首》本篇也。《大戴禮》既言『曾孫侯氏』，又云『干侯既亢』，尤屬不倫，蓋其所拊拾者廐矣。」韋氏協夢曰：「《騶虞》、《采蘋》、《采蘋》皆未嘗明言射事，而射節以之。《狸首》之詩應與三詩相類，詎必拘拘以射爲辭乎？《射義》曾孫侯氏之

云，蓋後人附會而爲之說。注既以《狸首》爲逸詩，而又以曾孫侯氏當之，殊不必。」又云：「劉氏敞因篆文『狸』似『鵲』，①『首』似『巢』，謂《狸首》即《鵲巢》。《騶虞》、《采蘋》、《采蘋》、《二南》篇名，則《狸首》亦必其儔。劉氏之說，非不可從，但無明文可據，不免穿鑿。仍從注作逸《詩》爲長。」②「注說原本《射義》。攷《射義》云：『天子以《騶虞》爲節，諸侯以《狸首》爲節，大夫以《采蘋》爲節，士以《采蘋》爲節。《騶虞》者，樂官備也。《狸首》者，樂時會也。《采蘋》者，樂循法也。《采蘋》者，樂不失職也。』是凡取以爲節者，皆有其義。盛氏謂以樂節射，但取其節，不取其詩之義，顯與《記》文相悖。又《射義》引《詩》曰：『曾孫侯氏，四正具舉。大夫君子，凡以庶士。大小莫處，御于君所。以燕以射，則燕則譽。』言君臣相與盡志於射，以習禮樂，則安則譽也，是以天子制之而諸侯務焉。此天子所以養諸侯而兵不用，諸侯自爲正之具也。詳繹記文，此節明言諸侯相與盡志於射之事，所引詩言，亦與樂時會之義相合，是此詩爲《狸首》之詞甚明。故鄭得據以當《狸首》之詩，非鑿空而

①「似」，原作「形」，今據《儀禮蠡測》改。

②據《儀禮正義正誤》，引文前有「胡氏肇昕曰」。

妄說也。盛氏、韋氏駁之，非是。劉氏敞別自爲說，謂《狸首》爲《鵲巢》，取其與《騶虞》、《采蘋》、《采芣》皆《二南》篇名。夫不顧其義，而惟取於《二南》之中，則《二南》豈止此四篇乎？且篆文狸鵲，首巢形并不相類，何得妄取而當之？此真違不知蓋闕之義也。」云「間若」者，調其聲之疏數重節」者，張氏爾岐曰：「聲之疏數，必使勻適如一，以射禮所重，在於能循此節也。」大師不興，許諾。樂正反位，奏《狸首》以射，三耦卒射。賓待于物如初。公樂作而后就物，稍屬，不以樂志。其他如初儀。不以樂志，君之射儀，遲速從心，其發不必應樂，辟不敏也。志，意所擬度也。《春秋傳》曰：「吾志其目。」【疏】正義曰：《校勘記》曰：「而后」「后」誤作「後」。注「辟不敏也」，葛本無「也」字。「意所擬度也」【擬】，徐本、《釋文》俱作「人」，①與單疏述注合。○賈疏云：「此經云「如初」者，皆如上第二番射法，惟作樂爲異。」敖氏曰：「稍屬，謂授矢于公稍屬也。然此當蒙「如初儀」之中，似不必獨見之；且語句不全，②亦恐非作經者之意，蓋衍文也。」盛氏曰：「稍屬」，當從敖氏作衍文。或謂「稍屬不以樂志」爲句，非。」方氏苞曰：「再射於授矢言稍屬，

三射於樂作言稍屬，蓋以君之血氣有強弱，志慮有緩急，且無暇專勤藝事，故四矢之行，不過與拾發之節稍相屬而已。求以疏數如一，不可必得也。不過與鼓樂之節稍相屬而已。求以循聲而發不可必得也，故少寬之，亦所以使自循省而知職任之重且大也。」胡氏肇昕曰：「稍屬仍謂授矢于公耳，不言授矢者，省文耳。注云「辟不敏也」者，以君之遲速與樂節相應，不以樂志，則不見其不敏，是辟不敏也。」引《春秋傳》者，定八年《左傳》文，③引以證志爲意所擬度之意。吳氏廷華曰：「注謂不必應樂，於文似矣。若以理論，則比禮比樂，君臣皆然。以諸侯而不必應樂，則《狸首》爲虛奏矣。或云：公自以樂爲志，臣下尊君，不敢必君之以樂志爾。存參。」卒射如初，賓就席。諸公、卿、大夫、衆射者皆繼射，釋獲如初；卒射，降反位。釋獲者執餘獲進告。左右卒射如初。

【疏】正義曰：敖氏曰：「卒射如初」，謂公卒射以至賓反位於階西之儀。「賓就席，諸公、卿、大夫、衆射者皆繼射，

①「作」，段校改爲「從」。

②「全」，原作「合」，今據《儀禮集說》改。

③「文」，原作「反」，今據《續清經解》本改。

釋獲如初」，三事皆如初也。降反位，指衆射之最後者而言，以見釋獲者升告之節也。」

右以樂節射

司馬升，命取矢，負侯許諾。司馬降，釋弓反位。小臣委矢，司馬師乘之，皆如初。司射釋弓、視算，如初。釋獲者以賢獲與鈞告，如初。復位。

右樂射後取矢數獲

司射命設豐，實觶，如初。遂命勝者執張弓，不勝者執弛弓，升、飲如初；卒，退豐與觶，如初。【疏】正義曰：敖氏曰：當更有「設豐」二字，如《鄉射》之文。朱氏大韶曰：「敖說是也。命設豐者，司射是也。設豐者，司宮士也。實觶，則弟子也。上經云：司射命設豐，司宮士奉豐，勝者之子弟洗觶升酌。是也。司射但命設豐，實觶乃弟子爲之，無待司射之命。若不重「設豐」二字，似以「司射命設豐實觶」作一句讀，失之。

矣。唐石經脫，各本因之，當據《鄉射》補。《通解》反於《鄉射》刪下「設豐」二字，則失之甚者也。」

右樂射後飲不勝者

司射猶袒決遂，左執弓，右執一个，兼諸弦，面鏃；適次，命拾取矢，如初。側持弦矢曰執。面，猶尚也，兼矢於弦尚鏃，將止變於射也。【疏】正義曰：注云「側持弦曰執」者，上文皆云「挾一个」，注云「方持弦，矢曰挾」，此云「執一个」，是側持弦、矢也。司射反位。三耦及諸公、卿、大夫、衆射者皆袒決遂，以拾取矢，如初。矢不挾，兼諸弦，面鏃；退適次，皆授有司弓矢，襲，反位。不挾，亦謂執之，如司射。【疏】正義曰：吳氏廷華曰：「矢不挾，以不復射也。」卿、大夫升就席。【疏】正義曰：敖氏曰：「不言諸公者，可知也。諸公、卿、大夫既就席，則士亦當反西方之位矣。」

右樂射後拾取矢

司射適次，^①釋弓，說決、拾，去扑，襲，

反位。司馬正命退楅、解綱。小臣師退楅、巾車、量人解左下綱。司馬師命獲者以旌與薦俎退。解，猶釋也。今文「司馬師」無「司馬」。

【疏】正義曰：敖氏曰：「退楅亦于次，司馬正於此命解綱，則俎亦命繫之明矣。《鄉射》曰：「說侯之左下綱而釋之。」」注云「今文「司馬師」無「司馬」者，胡氏承琪曰：

「案：《鄉射》惟司馬一人，而司馬即前之司正。此則大射正爲司正，不爲司馬而別有司馬正一人，司馬師一人。《鄉射》命弟子說侯，命獲者以旌退，皆司馬命之。此則司馬正命解綱，司馬師命退旌。師者，正之貳也。此外有小臣師，又有僕人師。若如今文無「司馬」，單言「師」，未明何人，故鄭從古文。」吳氏廷華曰：「此下當有司馬復爲司正語，文省。」司射命釋獲者退中與算而俟。諸所退射器皆俟，備君復射。釋獲者亦退其薦俎。【疏】正義曰：敖氏曰：「亦小臣執中、大史執算也。退中與算亦於西堂下，既則大史、小史俱復位於門東。」盛氏曰：「大史當復於侯東北之位。」

右三番射竟退諸射器將坐燕以終禮

公又舉奠饌，惟公所賜。若賓若長，以

旅于西階上，如初。大夫卒受者，以虛饌降，奠于筐，反位。【疏】正義曰：敖氏曰：「此一舉

饌，當在未立司正之前，乃降於此者，爲射故也。」陳氏暘曰：「燕禮工歌之後、笙奏之前，即爲大夫舉旅。大射至射畢，爲大夫舉旅者，主於射故也。」吳氏廷華曰：「此是長饌之第三饌。」褚氏寅亮曰：「前饌三饌，公舉其二，餘其一，至射畢旅大夫，公乃舉之。」

右爲大夫舉旅酬

司馬正升自西階，東楹之東，北面告于公，請徹俎，公許。射事既畢，禮殺人倦，宜徹俎燕

坐。【疏】正義曰：韋氏協夢曰：「鄉射請徹俎，司正之職。則此請徹俎，亦當以司正。李氏寶之謂「司馬正」當作「司正」，今從之。」遂適西階上，北面告于賓。賓北

①「射」，原作「馬」，今據《儀禮注疏》改。

面取俎以出。諸公、卿取俎如賓禮，遂出，授從者于門外。自其從者。【疏】正義曰：如賓禮，謂

亦如鄉其席取之也。諸公南面，卿北面。大夫降復

位。門東北面位。【疏】正義曰：賈疏云：「大夫雖無俎，

以賓及公、卿皆送俎，不可獨立於堂，故降復位。」注云

「門東北面」者，謂初小臣納卿、大夫，門東北面揖位。敖氏

曰：「復位于門東者，以諸公、卿亦以俎出故也。燕禮諸

公、卿無俎，故與大夫降而同立于西階下。」盛氏曰：「復

位，門右少進之位。」庶子正徹公俎，降自阼階，以

東。降自阼階，若親徹也。以東，去藏。【疏】正義曰：敖

氏曰：「正，庶子之長者也。燕禮膳宰設公俎，^①亦膳宰徹

之。然則上之設公俎者，亦庶子正矣。」《釋官》曰：「此徹

公俎獨言「正」，則上設賓俎及卿俎不皆正可知。」賓、諸

公、卿皆入門，東面北上。諸公、卿不入門而右，以

將燕，亦因從賓。【疏】正義曰：敖氏曰：「入門，人自闌東

也。入門而不左不右，即東面而立，變於常位也。將與大

夫同升，宜近之。」盛氏曰：「東面北上，與燕禮卿、大夫降

位同，蓋近西階下也。敖說非。」吳氏廷華曰：「東面北上，

以將自西階升也。鄉射卿、大夫皆降，東面北上，即此位耳。」司正升賓。賓、諸公、卿、大夫皆說屨，升就席。公以賓及卿、大夫皆坐，乃安。歸命

「以我安」，臣於君尚猶踟躕，至此乃敢安。【疏】正義曰：

《校勘記》曰：「皆說屨」「屨」誤作「履」。羞庶羞。羞，

進也。庶，衆也。所進衆羞，謂臠肝膋、狗臠醢也。或有炮

鼈、膾鯉、雉、兔、鶉、鴛。【疏】正義曰：注「炮鼈膾鯉」

「炮」，嚴本作「魚」，《釋文》、徐本俱作「炮」。《釋文》云：

「炮，或作炆、魚。」注云「所進衆羞，謂臠肝膋、狗臠醢也」

者，《內則》云：「肝膋，取狗肝一，臠之以其膋，臠炙之，舉

燂其膋，不夢。」又《公食大夫禮》有牛臠炙、羊臠炙、豕臠

炙。《大射》先行燕禮，燕禮其牲惟狗，故知衆羞謂臠肝膋、

狗臠醢也。云「或有炮鼈、膾鯉、雉、兔、鶉、鴛」者，「炮鼈、

膾鯉」見《詩·六月》篇，「雉、兔、鶉、鴛」見《公食大夫禮》。

鄭據《禮》推之，疑其或亦有此也。大夫祭薦。燕乃祭

薦，不敢於盛成禮。【疏】正義曰：注云「不敢於盛成禮」

者，盛指獻時。賓及公、卿皆於獻時祭薦。大夫稍卑，至燕

①「宰」，原脫，今據《儀禮集說》補。

乃祭薦，以不敢於盛成禮也。司正升受命，皆命。

公曰：「衆無不醉！」賓及諸公、卿、大夫皆興，對曰：「諾！敢不醉！」皆反位坐。皆命者，命賓、命諸公、命卿大夫、皆鄉其位也。興對必降席，^①敬也。司正退立西序端。【疏】正義曰：注云「興對必降席」者，賈疏曰：「經直云「興」，^②不言降席。鄭知降席者，以爲反坐，故知降席也。」云「司正退立西序端」者，賈疏云：「司正監酒，此將獻士事未訖，亦如鄉飲酒監旅時，立于西序端也。」吳氏廷華曰：「言皆命，則北面總命之也。」

右徹俎安坐

主人洗、酌，獻士于西階上。士長升，拜受觶，主人拜送。獻士用觶，士賤也。今文「觶」作「觚」。【疏】正義曰：「獻士用觶，士賤也」者，對上獻大夫用觚。觚小而觶大，用大者賤，用小者尊。士賤，宜用觶，故今文作「觶」，鄭不從也。士坐祭，立飲，不拜既爵。其他不拜，坐祭，立飲。其他，謂衆士也。升不拜受爵。乃薦司正與射人于觶南，北面東

上，司正爲上。司正，射人士也。以齒受獻，既乃薦之也。司正，大射正也。射人，小射正，略其佐。【疏】正義

曰：賈疏云：「案：《燕禮》薦司正與射人一人，司士一人，執冪一人。此不言其數，又不言司士與執冪者，以射人是小射正，非一人互見執事。執事皆同獻，不言其數，不言執冪者二人，文不具。」盛氏曰：「此言射人而不著其數，^③則不止一人矣。蓋小射正之俟於東堂者皆與也。皆與也者，以其有事也。不言司士者，以其爲士中之尊，不可位於小射正之下也。不言執冪者，執冪者非士也。凡此皆與燕禮異。疏以爲文不具，非。」方氏苞曰：「司正即大射正也。司馬之事與司射等，而不與於特薦，^④以大射主於習禮觀德，而義不兼於立武也。司馬且不與，況司正與執冪者？疏謂文不具，非也。又案：上下經文，似羣士皆受獻，立於東方，而後徧薦焉。^⑤司正、射人執射政之總，故獻時獨薦

① 「降」，原脫，今據《儀禮注疏》補。

② 「興」下，原衍「對」字，今據《儀禮注疏》刪。

③ 「著」，原作「言」，今據《儀禮集編》改。

④ 「特」，原作「射」，今據《儀禮析疑》改。

⑤ 「焉」，原作「於」，今據《儀禮析疑》改。

於禪南，以優異之。猶燕禮之主人，士也，而與大夫同薦。舊說俱難通。燕以示慈惠，故并及司士與執事者。大射以辨名位、程德器，故惟射人特薦，義之宜也。《釋官》曰：「大射以射為主，故司射與射人特薦。射人，當兼司射、小射正言之。凡射時有事者皆得薦，故不言其數。燕禮則射人之供事者少，故云「一人」。注疏俱未的。又案：大射正、小射正分別尊卑長貳之稱。司射，臨事設立之名；射人，其官之本號也。此篇射人戒諸公、卿、大夫射，射人宿視滌，射人告具于公，以直云「射人」，則其官之長可知。且是時射人供事者少，無煩辨別尊卑也。擯獨言大射正者，以自後皆言擯者，恐人不辨其為長為貳，故特著之也。司射不著為大射正、小射正者，以《燕禮》經云：「若射，則大射正為司射。」已有明文，從可知也。自後皆言擯者，司正、司射、大射正、小射正，不復言「射人」。此又云「薦司正與射人」者，以射事既畢，無須辨其長貳，故總言「射人」，見有事於射者皆得薦也。司正仍云「司正」，不總屬射人者，以是後司正猶有事，故從其設立之名，而別言之也。此射人一官稱名錯出之故，於此求之，可以得其緒矣。又案：射時雖有司射、大射正、小射正，而始終皆司射主其事。如初次射請射，命納射器，蒞畫物，^①比三耦，命取弓矢，誘射，

作射，命射，告卒射。第二次釋獲之射，請射，比衆耦，命拾取矢，作射，請釋獲于公，命設中，命射，視算，命設豐，命飲，獻釋獲者。第三次樂射，請射，命拾取矢，作射，請樂于公，命射，視算，命設豐，命飲，命拾取矢，命釋獲者退中與算，皆司射事也。大射正惟公射時，授弓、受弓以矢行告。小射正惟作升飲，作取矢，及公射時贊決拾，授弓於大射正而已。張氏惠言曰：「司正，^②庭長，其位是士，故獻士先薦之，猶主人是大夫，獻大夫時先獻主人也。賈疏以為既獻士，乃薦司正，非也。」褚氏寅亮曰：「以齒受獻，薦則先士，於獻示同，於薦示異也。鄭於上經司射，指為射人，此經注云「射人，小射正」，然則司射蓋小射正矣。但據《燕禮》，大射正為司射，則此似不應以小射正為之。敖氏謂亦大射正，或燕射異於大射與？」辨獻士。士既獻者立于東方，西面北上。乃薦士。士既獻易位者，以卿、大夫在堂，臣位尊東也。畢獻薦之，略賤。祝史、小臣師，亦就其位而薦之。亦者，亦士也。辯獻

① 「蒞」，原作「位」，今據《儀禮釋官》改。

② 「正」，原作「士」，今據《讀儀禮記》改。

乃薦也。祝史門東北面，東上。【疏】正義曰：《釋官》曰：「此經與《燕禮》同，則知《燕禮》之小臣師非其長明矣。」

注云「祝史門東北面，東上」者，《釋官》曰：「經不著祝史之位，故注言之。」敖氏曰：「此獻史蓋小史也。大史釋獲，歸已受獻。」盛氏曰：「祝史位在干侯之東北，注非。」韋氏協夢云：「《周禮·大史》：下大夫二人，上士四人；小史，中士八人，下士十有六人。諸侯降等，亦當有其半。射禮釋獲用大史、小史各一人，皆於釋獲時獻之。其不主釋獲者，至此始受獻。」張氏惠言曰：「疏以獻旅食西面授，決大史等北面，主人亦西面授。小臣師南面，主人北面授。案：旅食別於士，故別尊獻之。祝史、小臣師皆士也，獻之當在士中，薦之於其位，如司正例耳。經云「就其位而薦之」，非就其位而獻之也。疏妄說。案：此經諸官有始人不言其位，而後可見及注明言之者。主人在洗北，薦時見之；小臣師在東堂下，其先人時不言。大射正至爲司正，然後有位。司射、司馬、服不、矢人至射，然後有位。大樂正、小樂正、僕人正、僕人師、僕人士、庶子正、庶子、內小臣、工人士、梓人、司宮、祝，則注皆言其位；量人、巾車、隸僕人，注言其受獻之位，是也。又有經注皆不言其位者，小臣正、小射正、司馬師、小史、宰胥、甸人是也。以義推之，前射時，

量人巾車張三侯，樂人宿縣，司空設尊布席，射人宿視滌，膳宰具饌，此皆有事先在射宮者。樂正、僕人、內小臣，皆內臣之屬。庶子宿衛，主人，宰夫是膳宰之長，及工人士、梓人、^①隸僕人，皆掃除之官，必先就位而俟，不隨君入，故入門後不著其位。案：《公食》宰東夾北，西面南上，內官之士在宰東北，西面南上。此賓，諸公、卿之屬，不自房來，則宰位不在北堂。《燕禮》「宰夫官具饌于寢東」，注又以「內小臣在東堂下，南面西上」，則宰、胥及有司在東堂，南面西上，少退於小臣師、庶子，內小臣又少退於膳宰可知也。量人、巾車、隸僕人及服不皆是司之屬。司射命有司納射器，在西階前，東面右顧，則有司在西方士南可知。服不事在於乏，宜在乏後俟事，三官得獻次服不，則其位在門西旅食後，東面北上，可知也。射人爲擯者，擯者位在中庭，又將爲司正、小射正薦之，亦在顰南，則未爲擯及未爲司射時，大、小射正皆中庭北面東上可知也。大射正既爲司正，一小射正爲司射，贊公射時有二小射正。第三番射作取矢、作升飲，皆小射正爲之，其事與司射相代，則小射正二人次司射，立於大史之南可知也。小臣正詔相君禮，

①「梓」，原作「櫬」，今據《續清經解》本改。

小臣師佐之，及其從者俱當隨君而入。小臣正恒近君，君在庭，則左右，君有事則升贊，君在堂則當階下北面，比於祭禮之宗人，其位無定，故不言位。小臣師及從者，初從小臣正至阼階下，公升之後，則就東堂下位可知也。司馬正、司馬師皆司馬之士，其始人在士中，及射時司馬位司射南，司馬師行事，司馬相代，則次司馬而立司射南可知也。小史者，大史之佐。經云大史在干侯東北，北面東上，則史非一人，小史在其中矣。至射時，大史位在中西，司射命大史，大史則命小史，小史命獲者，則小史次大史而立中西可知也。司宮士即司宮之長，位北堂下。甸人亦有司也，位西方士南。有司不與射，閭人守門，鐘人守鐘懸，賓賜脯於門內雷者，蓋鐘人往受之，非樂懸得至門也。又司正位在觶南，及射時不見司正所立。案：君射畢云：大射正退，反司正之位。司正惟有二位，堂下位觶南，堂上位在西序端。先時工人士、梓人畫物，射正莅之。是司正在堂，或者即在序端乎？又僕人正及師與士相工者，隨工遷東陪於工後。仍有不相工者，在西懸北，為士舉旅，僕人師升酌是也。」

主人就士旅食之尊而獻之。旅食不拜受爵，坐祭，立飲。主人既酌，西面，士旅食，北面受之。不洗者，於賤略之也。【疏】正義曰：注「於賤略之也」，《校

勘記》曰：「徐本、《通解》俱無「也」字。與疏標起訖合。」○方氏苞曰：「鄉射之射事及獻薦，弟子所共實多。國君官備，燕與大射獻酬射事，皆官共之。庶子惟設折俎，弟子惟洗射爵酌奠而已。庶子執事有列，而門內無位。士旅食者一無所事，而位在士南，特為設尊，繼士而獻，則為升於司馬之士，司馬作之以從會同賓客者無疑矣。蓋士旅食者及庶子，即他日之命士、卿、大夫也，猶鄉射之弟子，即他日之學士可賓興者也。使之觀禮，則志氣有所感興；使之習事，則政事日以練達，所以成其德、達其材者，①即於是乎寓焉。至於祭祀之有旅酬，所以盡賓主之敬，又以使族姻鄉黨情意周洽，而潛消其怨爭鬭辨之萌。燕、大射之有旅酬，所以溥君公之恩，又以使少長尊卑分誼詳明，而即是為協恭和衷之本。聖人緣情制禮，徧布周密，本末兼該，而一以貫之如此。又云燕禮有士旅食，而庶子弟子不與焉，何也？射節禮容，辭命威儀，莫詳於大射，乃庶子弟子所未見，而宜早知者，燕則君臣相樂，惟將仕者使觀禮可矣。」

主人執虛爵，奠于筐，復位。

右主人獻士及旅食

①「者」，原脫，今據《儀禮析疑》補。

賓降洗，升，媵觶于公，酌散，下拜。公降一等，小臣正辭。賓升，再拜稽首，公荅再拜。賓受公賜多矣。禮將終，宜勸公，序厚意也。今文「觶」爲「觚」，公荅拜，無再拜。【疏】正義曰：注云今文「公荅拜，無再拜」者，《校勘記》曰：「無再拜」「拜」字疑衍。」姜氏曰：「荅再拜者，蓋賓致爵與臣異，而既徹俎安坐，又與其前異與？」^①當以古文爲正。」方氏苞曰：「《燕禮》公荅賓，主人媵爵者，卿、大夫皆再拜。大射皆一拜，惟荅賓前後兩再拜，於飲射爵見救過之道在，自下於賓。媵觶見禮賢之義，當厚終也。然賓始升及卒爵荅再拜，而奠爵仍荅一拜，輕重之衡寓焉。外此惟始媵觶者，卒觶後荅再拜，以此觶乃代公飲酬爵也。無算爵受賜爵者，荅再拜，以受者非賓，則公、卿亦禮厚於終之義。」胡氏承珙曰：「案：《燕禮》云：『賓降洗，升媵觶于公，酌散，下拜。公降一等，小臣辭。賓升，再拜稽首，公荅再拜。』鄭以彼決此，故從古文。」賓坐祭，卒爵，再拜稽首，公荅再拜。賓降，洗象觚，升酌膳，坐奠于薦南，降拜。小臣正辭。賓升成拜，公荅拜，反位。

反位，反席也。此「觚」當爲「觶」。【疏】正義曰：「公荅拜反位，《校勘記》曰：『反』上，唐石經、徐本、《通解》、《要義》、敖氏俱有「賓」字。《石經考文提要》云：『上云賓升成拜，升與反位相承。』」注云「此「觚」當爲「觶」者，賈疏云：「凡旅酬皆用觶，獻士尚用觶，故知「觚」當爲「觶」。下經「觚」亦當爲「觶」。胡氏承珙曰：「疏說是也。」「又案：疏云：『下經觚亦當爲觶者，指下文「公坐取賓所媵觚」而言。今十行本則作「公坐取賓所媵觶」，蓋因疏說改之，賈所見本作觚也。』公坐取賓所媵觚，興。惟公所賜。受者如初受酬之禮，降，更爵，洗，升酌膳，下，再拜稽首。小臣正辭，升成拜，公荅再拜。乃就席，坐行之。坐行之，若今坐相勸酒。【疏】正義曰：「受酬之禮，《校勘記》曰：『酬，誤作「成」。』有執爵者。士有盥升，主酌授之。惟受于公者拜。公所賜者拜，其餘則否。司正命執爵者爵辯，卒受者興以酬士。欲令惠均。【疏】正義曰：張氏爾岐曰：「司正以酬士命大夫，下文方言酬節，此其命之辭

① 「與」，原脫，今據《儀禮經傳》補。

也。大夫卒受者以爵興，西階上酬士。士升，大夫奠爵拜，士荅拜。興酬士者，士立堂下，與上坐者異。【疏】正義曰：《校勘記》曰：「注『士立堂下』，徐本無『士』字，《通解》有；『與上坐者異』，『異』下，徐本《通解》俱有『也』字，與單疏標目合。」大夫立卒爵，不拜，實之。士拜受，大夫拜送。士旅于西階上，辯。祝史、小臣師旅食皆及焉。士旅酌。旅，序也。士以次自酌相酬，無執爵者。【疏】正義曰：注云「無執爵」者，對上文卿、大夫有執爵者而言也。

右賓舉爵爲士旅酬

若命曰「復射」，則不獻庶子。獻庶子，則正禮畢後無事。【疏】正義曰：敖氏曰：「命，君命也。不，猶未也。此雖非正射，然亦當於正禮中行之，故其節在未獻庶子前也。」張氏爾岐曰：「士旅酬後當獻庶子等，如下節所陳。若復射，則暫止。俟射畢乃獻。」盛氏曰：「此又因燕而射也。燕禮射於獻士之後，今移於此者，以前有三番正射，其節宜少間也。」韋氏協夢曰：「不獻庶子，非謂終

不獻也。蓋不獻庶子，即行復射禮；既復射，然後獻之也。」司射命射，惟欲。司射命賓及諸公、卿、大夫射，欲者則射，不欲者則止。可否之事，從人心也。【疏】正義曰：敖氏曰：「以其非正射也。人之力量強弱不齊，或有至是而不欲射者，故以惟欲命之。然則正射之時，自諸公以至於士，無有不與射者矣。」卿、大夫皆降，再拜稽首，公荅拜。拜君樂與臣下執事無已。不言賓，賓從羣臣禮在上。【疏】正義曰：敖氏曰：「降拜，拜君命也。公不辭之而即荅拜者，以賓不在其中也。賓不與此拜者，以與君爲耦，射否宜由君，不敢從惟欲之命也。」盛氏曰：「皆降拜者，拜君復射之命也。雖將不與射者亦拜，賓亦在焉，而公不辭之者，以其非與公爲禮也。凡因受命而拜者，公皆不辭其下拜。敖說非。」案：《義疏》曰：「命復射而拜，非爲樂與執事也。賓與君爲耦，不可從羣臣之類矣。壹發，中三侯皆獲。其功一也。而和者亦多，尚歡樂也。矢揚觸，或有參中者。【疏】正義曰：《校勘記》曰：「注『而和者亦多』，亦，徐本、《通解》、楊氏俱作『益』，與疏合。『尚歡樂也』，『歡』，陳本作『勸』。」○上文惟公中三侯皆釋獲，至此燕後復射，禮殺，臣與君同，故云「和者益多」也，尚歡樂

也。云「矢揚觸，或有參中者」，以卿、大夫、士因矢揚觸，或有中非其侯者，亦皆獲也。敖氏曰：「以其非正射，故上下射惟拾發一矢而已。以其壹發，故雖中非其侯而亦獲，是禮亦相因而然也。中，亦謂中其鵠耳。惟公則離維綱，揚觸、捆復而皆獲。」上云「退中與算而俟」，至是則亦設中執算而釋獲矣。釋獲則有飲射爵之事也。」郝氏曰：「壹發惟發一矢，中三侯，皆釋獲，以一矢獲難也。」盛氏曰：「此著其禮之異者，其他皆如初可知。凡射必將乘矢，因燕而射亦然。《詩》云「四鍬既鈞」是也。敖氏、郝氏皆以爲惟發一矢，恐非。壹發中三侯皆獲者，燕射君臣同一侯。此雖仍大射三侯，而射者每發一矢，值中一侯，皆得唱獲釋算，亦取同侯之義也。」

右坐燕時或復射

主人洗，升自西階，獻庶子于阼階上，如獻士之禮。辯獻。降洗，遂獻左右正與內小臣，皆于阼階上，如獻庶子之禮。庶子既正六牲之體，^①又正舞位，授舞器，與膳宰、樂正聯事；又掌國子戒令，教治世子之官也。左右正，謂樂正、僕人正

也。位在中庭之左右。小樂正在頌磬之北，右也。工在西，即北面。工遷於東，則東面。大樂正在笙磬之北，左也。工在西，則西面。工遷於東，則北面。僕人正相大師，工升堂，與其師士降立於小樂正之北，北上。工遷於東，則陪其工後。國君無故不釋縣。二正，君之近官也。內小臣，奄人，掌君陰事陰令，后夫人之官也。獻三官於阼階，別內外臣也。同獻更洗，以時事不聯也。獻正下及內小臣，則磬人、鐘人、鑄人、鼓人、僕人師、僕人士盡獻可知也。庶子、內小臣位在小臣師之東，少退，西上。【疏】正義曰：《校勘記》曰：「注「后夫人」「后」誤作「後」。」○《釋官》曰：「左右正辨見《燕禮》。鄭氏兼樂正釋之，誤。經有小樂正，又有樂正。疏謂：「單言樂正者，謂大樂正。」是也。但此篇有小樂正，故單言樂正者爲大樂正。若散文，則小樂正亦通言樂正。」^②《燕禮》諸篇無大樂正，所言樂正皆小樂正也。此篇則大、小樂正俱有。小樂正主告樂備。經云：「小樂正從之，升自西階，北面東上。」又云：「小樂正立于西階東。」是也。大樂正主射時命工奏樂。經云：「司射東

① 「正」，原作「掌」，今據《儀禮注疏》改。

② 「亦」，原作「而」，今據《儀禮釋官》改。

面命樂正曰：命用樂。樂正曰：諾。又云：「樂正命大師曰：奏《狸首》，間若一。」是也。注謂小樂正在頌磬之北爲右，大樂正在笙磬之北爲左，其言無所據。《鄉射禮》將射，樂正適西方，命弟子贊工遷樂於下，降自西階，阼階下之東南，堂前三筭，西面北上。坐，樂正北面立於其南。射畢，樂正命弟子贊工即位，弟子相工如其降也。升自西階，反坐。此篇不言者，文不具耳，其實亦與彼同。樂正之位，總與工相近，工在西則立於西，工在東則立於東，大、小樂正皆然。以《鄉射》參之，此篇工人時大、小樂正皆當立於西階下，特主告樂備者爲小樂正，故言小樂正從之。及遷樂於東之時，大、小樂正皆當立於其南。鄭氏之說，考之於經無所依據，蓋緣誤解左右正爲樂正，故意造其說，以牽合左右之文耳。」

右主人獻庶子等獻禮之終也

無算爵。算，數也。爵行無次數，惟意所勸，醉而止。【疏】正義曰：注「惟意所勸」，張氏勸作歡。士也，有執膳爵者，有執散爵者。執膳爵者酌以進公，公不拜，受。執散爵者酌以之公命所

賜。所賜者興，受爵，降席下，奠爵，再拜稽首；公荅再拜。席下，席西。【疏】正義曰：方氏苞曰：「公爲賓舉旅，再拜稽首。公荅一拜，則爲卿、大夫舉旅皆荅一拜可知矣。而無算之受賜者，獨荅再拜，示君之待臣宜厚於終也。猶燕禮公命徹幕，公、卿、大夫皆降拜稽首，而不復升拜，示臣之事君於終彌謹也。」受賜爵者以爵就席坐，公卒爵，然後飲。酬之禮，爵代舉。今爵並行，嫌不代也。並行猶代者，明勸惠從尊者來。【疏】正義曰：《校勘記》曰：「注『今爵並行』『爵』誤作『即』。」執膳爵者受公爵，酌，反奠之。燕之歡在飲酒，成其意也。受賜者興，授執散爵者。執散爵者乃酌行之。與其所歡者。【疏】正義曰：褚氏寅亮曰：「不言爵，可知也，何必添人？」惟受于公者拜。卒爵者興，以酬士于西階上。士升。大夫不拜乃飲，實爵；乃，猶而也。士不拜，受爵。大夫就席。士旅酌，亦如之。【疏】正義曰：張氏爾岐曰：「亦如大夫之不拜而飲，飲畢遂實爵也。」公有命徹幕，則賓及諸公、卿、大夫皆降，西階下

北面東上，再拜稽首。命徹罍者，公意殷勤，欲盡酒。【疏】正義曰：「北面東上」，《校勘記》曰：「石經補闕誤作『北北面上』。」^①公命小臣正辭，公荅拜。大夫皆辟。升，反位。升不成拜，於將辭正臣禮。士終旅于上，如初。卿、大夫降而爵止，於其反席卒之。無算樂。升歌間合無次數，惟意所樂。^②

右燕末盡歡

宵則庶子執燭于阼階上，司宮執燭于西階上，甸人執大燭于庭，閽人爲燭于門外。宵，夜也。燭，燋也。甸人，掌共薪蒸者。庭大燭，爲其位廣也。爲，作也。作燭候賓出。【疏】正義曰：「候賓出」，《校勘記》曰：「候，徐、陳、《通解》俱作『俟』。」賓醉，北面坐取其薦脯以降。取脯，重得君之賜。奏《陔》。《陔》，樂章也。其歌，《頌》類也；以鐘鼓奏之，其篇今亡。賓所執脯，以賜鐘人于門內雷，遂出。必賜鐘人，鐘人以鐘鼓奏《陔》，賜之脯，明雖醉，志

- 禮不忘樂。卿、大夫皆出。從賓出。公不送。臣也，與之安燕交歡，嫌亢禮也。公人，《驚》。《驚》，樂章也。以鐘鼓奏之，其詩今亡。此公出而言人者，射宮在郊，以將還爲人。燕不《驚》者，於路寢無出入也。【疏】正義曰：注云「此公出而言人者，射宮在郊，以將還爲人，燕不《驚》者，於路寢無出入也」者，《鄉射·記》於郊，則間中。鄭云諸侯大學在郊，是諸侯大射所，故云大射在郊也。《燕禮·記》云燕朝服于寢，是燕於路寢也。敖氏曰：「人，謂降而入於內也。『驚』上似脫『奏』字。《燕禮》不言公人，此言公人者，爲奏《驚》而見之也。公人而奏《驚》，亦盛射禮也。出時不奏，遠辟天子之禮也。《大司樂職》曰：大射，王出入，令奏《王夏》。」盛氏曰：「公人當依鄭解，後儒據此而謂大射亦在公宮，非也。然此言於『卿、大夫皆出』之後，則公之自大學而歸也，蓋獨後於羣臣矣，亦可見公之勤禮而不倦也。《周禮·鐘師》：『掌以鐘鼓奏《九夏》。』其卒曰《驚》，未詳何用。杜子春以爲公出入奏之，蓋據此言也。然此惟見公人，而出則無文；又言『驚』，而不言
- ① 「面」，原作「東」，今據《十三經註疏校勘記》改。
② 「樂」，原作「欲」，今據《儀禮注疏》改。

「夏」，則杜說亦未可盡信。大抵公人奏《鵲》，猶賓出之奏《陔》，其所歌之詩與奏之之節，必與天子之樂有別，而今皆不可考矣。」褚氏寅亮曰：「敖氏總誤認射在路寢，故以爲降入於內，不知諸侯路寢之庭不能容九十弓之侯道也。」又曰：「此篇無記，見於《鄉射》篇矣。」

儀禮正義卷十六 鄭氏注

績溪胡培學

聘禮第八

鄭《目錄》云：「大問曰聘，諸侯相於，久無事，使卿相問之禮。小聘使大夫。《周禮》曰：『凡諸侯之邦交，歲相問也，殷相聘也，世相朝也。』聘於五禮屬賓禮。大戴第十四，小戴第十五，《別錄》第八。」【疏】正義曰：「相問之禮」下，毛本無「也」字。《釋文》、《集釋》俱有。「於五禮」上，《集釋》有「聘」字，毛本無，今從《集釋》。○云「大問曰聘」者，聘之與問，對文異，散則通。《詩·采芣》《毛傳》云：「聘，問也。」《白虎通》云：「聘者，問也。」《曲禮》曰：「諸侯使大夫問于諸侯曰聘。」是聘、問義

通。鄭以此篇是言大聘之禮，故云「大問曰聘」，對下「小聘曰問」言也。云「諸侯相於」者，《呂覽》注云：「於，猶厚也。」言聘為諸侯相親厚之道也。云「久無事，使卿相問之禮」也者，據下記「久無事則聘焉」，注云：「事謂盟會之屬也。」知大聘使卿者，賈疏云：「《大行人》云：『上公九介，侯伯七介，子男五介。』又云：『凡諸侯之卿，其禮各下其君二等。』《聘義》：『上公七介，侯伯五介，子男三介。』是諸侯之卿介各下其君二等者也。此聘禮是侯伯之卿大聘，以其經云五介，「上介奉束錦，士介四人，皆奉玉錦」。又云人竟張廬，孤卿建廬，據侯伯之卿之聘者。周公作經，互見為義，此見侯伯之卿大聘。《玉人》云：「瑑圭璋八寸，璧琮八寸，以覲聘。」上公之臣，《公食大夫》俎實云「倫膚七」，據子男之臣。是各舉一邊而言，明五等俱有，是其互見為義也。」盛氏云：「大國聘禮，見於《周禮·司儀職》文，所謂「諸公之臣相為國客」是也。《周禮》舉大國，此舉次國，蓋互相備。」今案：郊勞，經云：「賓揖先人，受于舍門內。」注云：「不受於堂，此主於侯伯之臣也，公之臣，受勞於堂。」則鄭固以此篇為侯伯大聘之禮矣。然要其聘之儀節，五等皆同，所異者唯禮物度數耳。云「小聘使大夫」

者，以大聘使卿，明知小聘使大夫。下經「小聘曰問。其禮如爲介，三介」，是又下其卿二等，故知使大夫也。云《周禮》曰「凡諸侯之邦交，歲相問也，殷相聘也，世相朝也」者，此《周禮·大行人》文。彼注云：「小聘曰問。殷，中也。久無事，又於殷朝者及而相聘也。父死子立曰世。凡君即位，大國朝焉，小國聘焉。此皆所以習禮考義，正刑一德，以尊天子也。必擇有道之國而就脩之。鄭司農說殷聘，以《春秋傳》曰「孟僖子如齊殷聘」是也。」今案：《周禮》言「殷相聘」，與下記「久無事則聘」義合，謂中間久無事則行聘禮。《爾雅·釋言》「殷，齊，中也」，故鄭、服皆訓殷爲中。鄭注云「又於殷朝者及而相聘也」者，謂於朝之中及時相聘也。蓋諸侯之相朝，世一行之，聘則無數，故於其中酌擇無事之時而行之，使不失之疏，亦不失之數也。若方有盟會之事，而又行聘，則數矣。是言「殷相聘」，與言「久無事則聘」，義正同也。《聘義》曰：「故天子制諸侯，比年小聘，三年大聘。」鄭注：「比年小聘，所謂『歲相問也』。『三年大聘』，所謂『殷相聘也』。」《王制》曰：「諸侯之于天子也，比年一小聘，三年一大聘，五年一朝。」鄭注：「此大聘與朝，晉文霸時所制。」兩注似異者，褚氏云：

「比年、三年，乃周公所制邦交之禮，非行於天子之禮也。《王制》則指諸侯之于天子，故鄭據《左傳》辨之。」今案：昭三年《左傳》曰：「昔文、襄之霸也，其務不煩諸侯，令諸侯三歲而聘，五歲而朝。」此鄭所據之文也。又昭十三年《左傳》曰：「明王之制，使諸侯歲聘以志業，間朝以講禮。」亦與《周禮》不合。《三禮札記》云：「《周禮》有天子聘諸侯之禮，《大行人》云：『問問以諭諸侯之志。』又云：『歲徧存，三歲徧覲，五歲徧省。』是也。有諸侯聘天子之禮，《大宗伯》云：『時聘曰問，殷覲曰視。』《大行人》云：『時聘以結諸侯之好，殷覲以除邦國之慝。』是也。《儀禮》但有諸侯聘諸侯之禮，而無諸侯聘天子及天子聘諸侯之禮，蓋皆闕而不存耳。」○《禮經釋例》云：「凡聘問覲皆于廟，會同于壇，士相見于寢。案：《聘禮》聘賓至于朝，主人曰：『不腆先君之桃，既拚以俟矣。』桃，始祖廟也。又聘時，及廟門，公揖入。又云：『几筵既設，摯者出請命。』注：『有几筵者，以其庙受宜依神也。』聘禮重，故主國之君受之于始祖廟也。又云：『賓朝服問卿，卿受于祖廟。』問卿，聘賓奉其君命來，其禮亦重，故主國之卿受之于祖廟也。雖庙受而不几筵，辟君也。《覲禮》：『諸侯前朝，皆受舍于朝。』

注：「受舍於朝，受次於文王廟門之外。」《曲禮》曰：「天子當依而立，諸侯北面而見天子曰覲。」鄭注：「諸侯春見曰朝，受摯于朝，受享于席。秋見曰覲，一受之于席。」《周官·大行人》：「公、侯、伯、子、男皆廟中將幣三享。」亦指朝宗覲遇而言。所謂廟者，皆祧廟也。是聘、問、覲皆受之於廟也。《覲禮》：「諸侯覲于天子，爲官方三百步，四門。壇十有二尋，深四尺。」注：「四時朝覲，受之於廟。此謂時會殷同也。」又引《司儀職》曰：「將會諸侯，則命爲壇三成。」是會同則於壇也。至于士相見禮，非問卿可比，其禮殺。行禮之處，經無明文。考《士昏禮》：「若不親迎，壻見」，注：「壻見於寢。」壻見之禮，略如士相見之禮，則士相見當亦於寢矣。」

聘禮。君與卿圖事。圖，謀也。謀聘故及可

使者。謀事者必因朝。其位，君南面，卿西面，大夫北面，士東面。【疏】正義曰：自此至「不辭」，言命使人之事。○卿，謂三卿也，三卿皆國之大臣主政事者，故與圖之。《周禮·大宰職》曰：「乃施典于邦國，設其參，傳其伍，陳其殷，置其輔。」鄭注：「參謂卿三人，伍謂大夫五人。殷，衆也，謂衆士也。輔，府史庶人在官者。」《禮記·王制》曰：

「諸侯之上大夫卿，下大夫，上士，中士，下士，凡五等。」鄭注：「上大夫曰卿。」《王制》又曰：「大國三卿，皆命于天子，下大夫五人，上士二十七人。次國三卿，二卿命于天子，一卿命于其君，下大夫五人，上士二十七人。小國二卿，皆命于其君，下大夫五人，上士二十七人。」鄭注：「小國亦三卿，一卿命于天子，二卿命于其君，此文似誤脫耳。」《儀禮釋官》云：「大宰施典于邦國，設其參，不言小國有異，則小國亦三卿明矣。《鄉飲酒義》曰：『建國必立三卿』是也。」《釋官》又云：「天子六卿，諸侯之制半天子，故卿止三人也，若大夫則不止五人。經云『傳其伍』，蓋指副於卿者言之。《周禮》六官之屬，卿止六人，而中大夫不止小宰、小司徒等十二人，是其明證。士亦不止二十七人，《王制》但就上士言之，其中士、下士則無文也。」今案：諸侯卿、大夫、士之制，略具於此。注云「圖，謀也」者，《爾雅·釋詁》文。云「謀聘故及可使者」，聘故，謂謀所聘之國。古之聘者必擇有道之國而行之，此常聘也。又如告糴、乞師之類，亦行聘禮，皆所謂「聘故」也。可使，謂謀出聘之人，即使、介是也。云「謀事者必因朝」者，古者諸侯每日視朝，君臣相見，故因朝謀之。天子、諸侯皆有三朝：其一在路門內，謂之燕朝，即路寢也。其二在路門外，謂之治朝，即正

朝也。其三在皋門之內、庫門之外，謂之外朝。諸侯無皋門，外朝亦在庫門外。三朝唯路寢燕朝有堂，治朝、外朝皆無堂。《論語》「攝齊升堂」，謂燕朝也。燕朝又名內朝，見《文王世子》。治朝對庫門外之朝言，亦曰內朝，《玉藻》「朝服以日視朝于內朝」是也；對路門內之朝言，亦曰外朝，《文王世子》「其在外朝則以官」是也。江氏永云：「此圖事命使者，當在路寢之朝。後夕幣，乃在路門外正朝也。」又云：「古者視朝之儀，臣先君入，君出路門，立于左，偏揖羣臣，則朝禮畢。於是君退適路寢聽政，諸臣至官府治事，處治文書。如議論政事，君有命，臣有進言，則於路門內朝。」又云：「路寢門內之朝，君之視之也當有四：一爲與宗人圖嘉事，《文王世子》「公族朝于內朝」，鄭云「謂以宗族事會」是也。一爲與羣臣燕飲，《燕禮》所言是也。一爲君臣有謀議，臣有所進言，則治朝既畢，復視內朝，《鄉黨》所記是也。《聘禮》：「君與卿圖事，遂命使者。」亦是在內朝也。一是羣臣以玄端服夕見，亦是有所謀議也。四事外，則君與四方之賓燕亦在寢，非朝禮。又或臣燕見于君，《士相見禮》所謂「君在堂升見，無方階，辨君所在」，亦非朝禮。孔子侍坐、侍食、對問政、對儒行，皆是燕見時也。」今案：此聘禮略見諸侯三朝之制。圖事命使，在燕朝也。及期夕

幣，管人布幕于寢門外，注云「寢門，外朝也」，則是治朝。又「賓皮弁聘，至于朝，賓入于次」，注云「次在大門外之西」，則是外朝。其餘行禮在治朝、外朝者尚多，各隨文解之。賈疏以大射爲射朝，不知大射在射宮，不在朝也。又謂《儀禮》不見路門外正朝，皆誤。云「其位，君南面，卿西面，大夫北面，士東面」者，案：《燕禮》：「小臣納卿大夫，卿大夫皆入門右，北面東上。士立于西方，東面北上。公降，立于阼階之東南，南鄉。爾卿，卿西面北上；爾大夫，大夫皆少進。」蓋三卿、五大夫初入門右，同北面，得揖。卿西面，大夫少進，北面不改。鄭以燕禮行于路寢，其面位如是。此圖事在燕朝，故約《燕禮》之文，知亦君南面、卿西面、大夫北面、士東面也。江氏永曰：「王朝禮三公北面，而諸侯禮大夫北面，變于王朝也。又天子、諸侯路寢，南面聽政，燕在阼階西面，見《檀弓》疏。」遂命使者。遂，猶因也。既謀其人，因命之也。聘使卿。【疏】正義曰：注云「遂，猶因也。既謀其人，因命之也」者，此使者，卿也。在謀事之中，故因與謀定而命之也。《書序》傳云「因事曰遂」，是遂與因義通。云「聘使卿」者，姚氏範云：「《左傳》鄭游吉對晉士景伯：「先王之制，嘉好聘享之事，于是乎使卿。」魯所使聘于諸侯者，如公子友、公子遂、季孫行父、仲

孫蔑、叔孫豹等皆卿，則使卿正也。」吳氏廷華云：「變卿言使者，以所事名之也。」使者再拜稽首，辭。辭以不

敏。【疏】正義曰：敖氏云：「使者少進而北面乃拜，君親

命之，故拜而後辭，異於傳命之儀也。」又云：「使者與上介

必辭者，不敢以專對之才自許，謙敬也。」注云「辭以不

敏」者，凡使才須敏，《左傳》「禮成而加之以敏」是也，故以

不敏辭。君不許，乃退。退，反位也。受命者必進。

【疏】正義曰：「不許」者，不許其辭也。云「退，反位也」

者，言此退是反其西面之位，非退出也。必知退是反位者，

以受命者必進而近君，違其位也。《曲禮》曰「揖人必違其

位」，況拜君命乎？不許乃退，不再辭者，臣惟君所使，雖

懼弗勝任而亦不敢避也。既圖事，戒上介，亦如

之。既，已也。戒，猶命也。已謀事，乃命上介，難於使者

易於介。【疏】正義曰：蔡氏云：「上介大夫爲之，所以副

使者，或聘使有故，則上介攝其事，是其任亦重，故亦稽首

辭，如使者。」今案：「亦如之」，如其「再拜」以下至「不許，

乃退」也。注云「戒，猶命也」者，《儀禮》內言「戒」者不

一，義有訓警者，有訓告者。此戒上介，亦是命之爲上介，

與命使者同，故云「猶命也」。云「已謀事，乃命上介，難於

使者易於介」者，上遂命使者，即於圖事時命之，此圖事既

畢乃戒，明不與使者同命，是有難易之分也。敖氏云：「使

者言「命」，上介言「戒」，異尊卑也。」宰命司馬戒衆

介，衆介皆逆命，不辭。宰，上卿，貳君事者也。諸

侯謂司徒爲宰。衆介者，士也，士屬司馬。《周禮》司馬之

屬司士，掌作士適四方使，爲介。逆，猶受也。【疏】正義

曰：黃氏丕烈云：「張氏淳於此注「爲宰」「宰」上，及下注

「宰之屬也」上，皆增「大」字，據陸也。案：單疏述注無

「大」字。」今案：嚴本及各本俱無「大」字，《集釋》載此注

云：「諸侯謂司徒爲大宰。」有「大」字，下注無。○宰命司

馬，蓋以君任命之。必命司馬戒衆介者，衆介卑，君不親命

之也。注云「宰，上卿，貳君事者也」者，案：《王制》「次

國之上卿，位當大國之中，中當其下」云云，是於三卿中更

分爲上中下也，故《左傳》有冢卿、介卿、亞卿之稱，冢卿即

上卿也。「貳君事」，謂執政也。云「諸侯謂司徒爲宰」者，

案：《內則》：「后王命冢宰，降德于衆兆民。」鄭注：「一云

冢宰，記者據諸侯也。諸侯并六卿爲三，或兼職焉。」《王

制》疏引崔氏靈恩云：「三卿者，依周制而言，謂立司徒兼

冢宰之事，立司馬兼宗伯之事，立司空兼司寇之事。故《春

秋左傳》云季孫爲司徒，叔孫爲司馬，孟孫爲司空，此三卿

也。以此推之，故知諸侯不立冢宰、宗伯、司寇之官也。下大夫五人者，謂司徒下二人，一小宰，一小司徒。司空下二人，一小司寇，一小司空。司馬事省，惟置一人，一小司馬也。《儀禮釋官》云：「諸侯三卿，其來已久。《詩》曰：『乃召司空，乃召司徒。』《牧誓》及《立政》言文、武未得天下以前制，皆曰司徒、司馬、司空。至武王有天下，立六卿，而三卿遂定為諸侯之制，是以《酒誥》、《梓材》俱云司徒、司馬、司空也。春秋時有可考者，如襄十年《左傳》云：『子國為司馬，子耳為司空，子孔為司徒。』二十五年《傳》云：『子產入陳，司徒致民，司馬致節，司空致地。』昭四年《傳》云：『吾子為司徒，夫子為司馬，孟孫為司空。』此三卿為司徒、司馬、司空之證也。」今案：諸侯不立冢宰之官，以司徒兼之，故亦謂司徒為宰也，互詳《大射儀》「宰戒百官」下。云「衆介者，士也」者，衆介，下經亦稱士介，明以士為之，則上介為大夫益明矣。云「士屬司馬」，《周禮》司馬之屬司士，掌作士適四方使，為介「者，此釋經所以命司馬戒之義也。

《司士職》曰：「掌國中之士治，凡其戒令。」司士為司馬之屬官而掌士，故云「士屬司馬」也。「作士適四方使，為介」，亦《司士職》文。彼注分使與介為二，謂士使自以王命使也。此注引之則取為介之文，以證衆介為士。《玉藻》曰：

「大夫有所往，必與公士為賓也。」云「逆，猶受也」者，《爾雅》、《說文》皆云：「逆，迎也。」《禹貢》「同為逆河」，鄭注言「相向迎受」，故此注云「猶受也」。衆介受命不辭者，蔡氏云：「衆介無應對危辱之責，為君奔走，職也，故直受不辭。」○王氏士讓疑諸侯三卿：「經言『宰命司馬戒衆介』，是二卿皆在國理事，堪使者惟司空耳。」今案：諸侯司徒下有小宰、小司徒，司馬下有小司馬，宰與司馬若出使，自有小宰等官攝其命與戒之事，不必泥也。

右命使

宰書幣。書聘所用幣多少也。宰又掌制國之用。

【疏】正義曰：自此至「所受書以行」，言授幣之事。注云

「書聘所用幣多少也」者，經所云「幣」，兼聘、享、問卿等玉帛言，注專云「聘」者，舉聘以該之也。《周禮·司儀職》曰：「凡諸侯之交，各稱其邦而為之幣。」注謂：「于大國則豐，于小國則殺。」是用幣有多少也。郝氏敬云：「幣，所齎玉帛皮馬之類。書，記數也。」云「宰又掌制國之用」者，是申言宰書之義，《王制》曰「冢宰制國用」是也。敖氏云：「《周官》冢宰以九式均節財用，六曰幣帛之式，故此主書幣

也。」「命宰夫官具。宰夫，宰之屬也。命之，使衆官具

幣及所宜齋。【疏】正義曰：云「宰夫，宰之屬也」者，詳《大射儀》。云「命之，使衆官具幣及所宜齋」者，張氏爾岐云：

「命之者，宰也。宰既書用幣之數，遂命宰夫使官具之。」吳氏廷華云：「官具，謂衆官各備其所宜具也。」^①今案：注既

云「使衆官具幣」，而又云「及所宜齋」，則官具者不獨幣而已。齋與資通，下記「問幾月之資」，注：「資，行用也。」《周

禮》：「外府共其財用之幣齋。」鄭注：「齋，行道之財用也。」是凡出聘所宜用者，皆使其所掌之官具之。《周禮》：

「宰夫掌百官府之徵令。」又曰：「凡禮事，贊小宰比官府之具。」故以官具命之也。及期，夕幣。及，猶至也。夕

幣，先行之日夕，陳幣而視之，重聘也。【疏】正義曰：期，行期也。敖氏云：「此云「及期」，則上亦當有請期、告期之

禮，文略耳。」姚氏範云：「命使之後，夕幣之前，中間具齋幣，治行李、庀家事，容有旬日。《皇皇者華》、《詩序》曰：

「君遣使臣，送之以禮樂。」燕送之節，當在此時。」今案：據此則行無定期，故經但云「及」也。又敖氏以「夕幣」二字爲

題下事，其說是也。注云「及，猶至也」者，鄭注《燕禮》、《大射》俱云「及，至也」，此云「及，猶至也」，義同。云「夕

幣，先行之日夕，陳幣而視之，重聘也」者，案：下云「厥明，

釋幣于櫺」，是行日。此夕是先行一日之夕也。高氏愈

云：「厥明將受幣啟行，故先於夕展數而示使者，重其事也。」方氏苞云：「視幣必以夕，何也？陳之即載而舍于

朝，明日乃可與使者同時就道也。《禮》：「已受命，君言不宿于家。」使者朝服，帥衆介夕。視其事也。古文

「帥」皆作「率」。【疏】正義曰：此「夕」爲暮見于君之名，《左傳》「右尹子革夕」是也，與上「夕」字義異。衆介，兼上

介言。使者朝服，則衆介亦朝服可知。帥以暮見，因陳幣視之，故注云「視其事也」。盛氏云：「案：此暮夕於君，而

君臣皆朝服，重其事也。常時夕玄端。」云「古文「帥」皆作「率」者，胡氏承珙云：《說文》：「帥，佩巾也。」「率，捕鳥

畢也。」其「統帥」之「帥」作「衛」，云「將衛也」。「率領」之「率」作「達」，云「先導也」。後世衛、達二字廢不用，而佩巾

之帥、鳥畢之率，借爲將帥、率由之字，二字又互相通借。段氏玉裁曰：「《周禮·樂師》：燕射，帥射夫以弓矢舞。

故書帥爲率。鄭司農云：率當爲帥。大鄭以漢人帥領字通用帥，與周時用率不同故也。」案：鄭於經字則皆從

「帥」，而出「率」字於注，或如段說以漢時通用之故。」今

①「官」，《儀禮章句》作「執事」。

案：《覲禮》「帥乃初事」，注亦云「古文「帥」作「率」」，嚴本不誤，詳《覲禮》。管人布幕于寢門外。管，猶館也。

館人，謂掌次舍帷幕者也。布幕以承幣。寢門外，朝也。古文「管」作「官」，今文「布」作「敷」。【疏】正義曰：云「管」猶館也。館人，謂掌次舍帷幕者也。案：下記曰：「管人爲客，三日具沐，五日具浴。」注云：「管人，掌客館者也。」《士喪禮》「管人汲」，注云：「管人，有司主館舍者。」《儀禮釋官》云：「《左傳》：楚公子圍聘于鄭，將入館。子羽辭曰：『敝邑，館人之屬也。』」杜注：「館人，守舍人。」是管人即館人，其職掌館舍明矣。故鄭云：「管，猶館也。」又以此經「管人布幕」謂爲「掌次舍帷幕」者，賈疏云：「天官有掌舍、掌次、幕人等。《掌次》云：有邦事，則張幕設案。《掌舍》云：爲帷宮設旌門。又《幕人》云：掌帷幕幄帘綬之事。鄭云：在旁曰帷，在上曰幕。幕或在地，展陳於上，即此布幕是也。館人即彼掌舍，以諸侯兼官，故鄭總言之也。」《釋官》云：「考《周禮》無管人之官，而掌舍與幕人、掌次聯職，或當如賈所云也。《喪大記》曰「管人汲」，又曰「管人授御者沐」，是掌沐浴亦其職也。此經《釋文》云：「管人，掌館舍之官。」《禮記·喪大記》釋文云：「管人如字，掌管簫之人。又古亂反，掌館舍之人。」則所傳異也。」

云「布幕以承幣」者，張氏爾岐云：「此幕非在上之幕，乃布之地以爲藉者。」今案：陳幣必先布幕以爲藉，不敢褻也。云「寢門外，朝也」者，此寢門即路寢門，路寢門外爲治朝之地，故云「朝也」。云「古文「管」作「官」」者，惠氏棟云：「《易·隨》初九云「官有渝」，蜀才本「官」作「館」。《穆天子傳》云「官人陳牲義」，作「館」。據此，則「官」與「管」通。鄭不從古文者，以此記及《士喪禮》、《禮記·喪大記》諸文皆作「館」，不作「官」也。云「今文「布」作「敷」」者，《詩》「敷于下土」，《毛傳》：「敷，布也。」又《書》「敷重蔑席」，《說文·首部》引作「布」，是「敷」、「布」二字通。鄭以此經布席字多作「布」，故此布幕亦從古文作「布」也。官陳幣：皮，北首西上，加其奉于左皮上，馬則北面，奠幣于其前。奉，所奉以致命，謂束帛及玄纁也。馬言「則」者，^①此享主用皮，或時用馬，馬人則在幕南。皮馬皆乘。古文「奉」爲「卷」，今文無「則」。【疏】正義曰：注「馬言「則」者」，《校勘記》云：「則，徐本誤作「用」。」○賈疏云：「官陳幣者，即上文「官具」者也。館人布幕于地，官陳

①「則」，原作「用」，據《續清經解》本改。

幣于其上。」敖氏云：「陳皮不言幕上，可知也。北首，變于執也。西上，放設時之位也。此皮若馬之位，其享主君者在西，享夫人者在東。」王氏士讓云：「皮北首，馬北面，皆鄉君。左皮，皮西上者。」今案：馬言面。馬，生物也。皮北首，故以西爲左，皮西上則馬亦然。此「官陳幣」三字總皮、馬、束帛言，下乃別言陳皮、陳馬之法也。注云「奉，

所奉以致命，謂束帛及玄纁也」者，案：享時皮馬皆在堂下，使者親奉束帛加璧，升堂致命。享夫人則奉玄纁加琮，故謂束帛玄纁爲奉也。賈疏云：「不言璧琮者，璧琮不陳，厥明乃授之也。」今案：此夕幣時圭璋亦不陳，故楊氏復云：「圭聘，禮之重者也。聘圭不可以預授，俟使者明日受命于朝，于是君朝服南鄉而授之。」吳氏廷華云：「不陳玉者，重器不暴于外也。」云「馬言」則「者」，此享主用皮，或時用馬者，有皮之國主用皮，無皮之國乃用馬，故經先言陳皮之法，而後言陳馬之法。於馬言「則」，以見非皮馬竝用也。云「馬人則在幕南」者，馬不可陳于幕上，故在幕南而北面也。經云「馬則北面，奠幣于其前」，「則」字直貫下七字。奠幣之幣，即指束帛玄纁言。蓋束帛等可加于皮上，不可加于馬上，故用馬則奠于馬北幕上也。馬北面，以北爲前，故云「奠幣于其前」。云「皮馬皆乘」者，物四曰乘。

賈疏云：「下賓覲時，云『總乘馬』，又云『禮，玉束帛乘皮』，是皆乘也。」云「古文『奉』爲『卷』」，今文無「則」者，胡氏承珙云：「據《雜記》注，束帛本有卷稱，鄭不從者，以下文行禮凡幣皆言『奉』故也。馬言「則」者，賈疏引下「庭實，皮則攝之」，鄭注：「皮言則者，或用馬也。」與此互明。今文無「則」，於義不備，故鄭亦不從也。」使者北面，衆介立于其左，東上。既受行，同位也。位在幕南。【疏】正義曰：王氏士讓云：「左，西方也。東上，則使者在介上介東，次介在上介西。」注云「既受行，同位也」者，常時在朝，卿、大夫、士面位各異。此既受出使之命，則皆北面，故云「同位」，下記云「使者既受行日，朝同位」是也。云「位在幕南」者，以經云「北面」，故知在幕南，於視幣便也。卿、大夫在幕東，西面北上。大夫西面，辟使者。【疏】正義曰：此卿、大夫謂處者也。大夫本北面，以使介北面，乃辟之而與卿同西面，故云「大夫西面，^①辟使者」也。宰人，告具于君。君朝服出門左，南鄉。入告，入路門而告。【疏】正義曰：敖氏云：「具，謂所陳者已

①「西」，原作「北」，據經注及文意改。

具。今案：出門左者，由闌東也。注云「入告，入路門而

告」者，以夕幣在路門外，故知入者入路門也。史讀書

展幣。展，猶校錄也。史幕東西面讀書，賈人坐撫其幣。

每者曰在。必西面者，欲君與使者俱見之也。【疏】正義

曰：注云「展，猶校錄也」者，謂取幣一一校數也，賈疏云：

「幣謂官具之者，非直所奉而已。」云「史幕東西面讀書，賈

人坐撫其幣。每者曰在」者，謂史依書讀之，賈人依所讀校

之。「每者曰在」，驗其相符與否，恐有遺忘也。《儀禮釋

官》云：「書即上宰所書用幣之數者。《周禮·大史職》

曰：『大會同、朝覲，以書協禮事。及將幣之日，執書以詔

王。』是讀之者，大史也。」云「必西面者，欲君與使者俱見之

也」者，以君南面，使者北面，史于西面讀之，是欲其俱見之

也。賈疏云：「賈人當在幕西，東面撫之，①亦欲俱見之

也。」敖氏云：「史蓋幕西東面讀書，有司北面展之。」褚氏

云：「史與卿大夫同在幕東西面，故展畢即以書授宰。如

在幕西，則必越幕而授宰矣。宜從注。」今案：褚說是也。

吳氏《疑義》云：「此經第言官，下行時受圭乃言賈，則夕幣

無賈人可知。」今案：敖氏以展幣為有司，是也。但當西

面，不北面耳。宰執書，告備具于君，授使者。

使者受書，授上介。史展幣畢，以書還授宰，宰既告

備，以授使者。其受授皆北面。【疏】正義曰：盛氏云：

「告備具者，言其幣一一與書符，無闕少也。敖以「具」字為

衍，非。」注云「史展幣畢，以書還授宰」者，史與宰皆在

幕東西面，讀書展幣畢，史乃以書還授宰也。云「宰既告

備，以授使者。其受授皆北面」者，賈疏云：「宰以書來至

使者之東，北面授使者，使者北面授介，三者皆北面，向君

故也。」李氏云：「據下文宰授使者圭，授受同面。」公揖

人。揖，禮羣臣。【疏】正義曰：人者，入路寢，以展幣禮

畢故也。官載其幣，舍于朝。待旦行也。【疏】正義

曰：此朝，即寢門外朝也。舍于朝，官守之。李氏云：

「官，從行之官，入竟展幣之有司是也。」敖氏云：「載謂載

之於車，幣亦兼皮言也。古者載幣之車以人推之，《春秋

傳》曰：『用幣必百兩，百兩必千人。』蔡氏云：「舍于朝

者，公幣不可以入私家也。」注「待旦行也」，謂俟厥明，

賓受命行，乃隨之行也。上介視載者。監其安處之，

①「撫」，原作「讀」，今據《續清經解》本及阮刻《儀禮注

疏》改。

畢乃出。【疏】正義曰：官載幣而上介監視之，重其事也。

注云「監其安處之，畢乃出」者，謂俟載者安處畢乃出也。

經未言「出」，注補言「出」者，明上介不舍于朝也。出，謂退歸。或以出爲行，非。所受書以行。爲當復展。【疏】

正義曰：「所受書」，即前上介所受於使者之書也，「以行」，謂以書入載隨行也。注云「爲當復展」者，張氏爾岐云：

「上介所受之書，則將之以行。爲至彼國境上，當復展也。」

○王氏士讓、方氏觀承俱謂此及上二條當作一氣讀，謂視所載物及所受書，驗其相符否也。今案：上讀書展幣，已是驗其相符與否。彼時上介亦同視，則不必再驗矣。此二節注說極明，無庸更易也。

右 授 幣

厥明，賓朝服，釋幣于禰。告爲君使也。

賓，使者謂之賓，尊之也。天子諸侯將出，告羣廟，大夫告禰而已。凡釋幣，設洗盥如祭。【疏】正義曰：自此至「亦如之」，言使者與上介將行釋幣之事。○「厥明」，夕幣之明日也。「禰」，父廟也。「朝服」者，賈疏云：「卿大夫朝服祭，故還服朝服告也。」注云「告爲君使也」者，象生時出

必告也。云「賓，使者謂之賓，尊之也」者，此賓即使者，以其將爲賓于他國，故謂之爲賓，以尊異之也。又《周禮·大行人》：「掌大賓之禮及大客之儀。」鄭注：「大賓，諸侯大客，謂其孤卿。」則大夫出使宜稱客，此篇多稱賓者，對文異，散則通也。云「天子諸侯將出，告羣廟，大夫告禰而已」者，《曾子問》曰：「天子諸侯將出，必以幣帛皮圭告于祖禰。」又曰：「諸侯適天子，必告于祖，奠于禰。」鄭注：「皆奠幣以告之。」互文也。是天子諸侯將出，告羣廟也。大夫三廟，告禰而已，辟天子諸侯也。方氏苞云：「古者五十命爲大夫，至爲卿則年必長矣，故出釋奠、反獻薦皆曰于禰，道其常也。下記「賜饗，簋一尸，若昭若穆」，上及于祖，該其變也，蓋間有篤老而父尚存者。」云「凡釋幣，設洗盥如祭」者，云「凡」，非一之辭，蓋兼覲禮言也。陳氏祥道《禮書》云：「《覲禮》侯氏將朝王，釋幣于禰。《聘禮》賓將受命，釋幣于禰。于行皆幣而已，則釋幣猶釋菜耳，牲牢酒齊不預也。」今案：釋幣有幣無牲，告而不祭。《曾子問》：「凡告用牲幣。」鄭注：「牲當爲制，字之誤也。」孔疏引皇氏、熊氏之說，諸侯以下無牲，天子則當用牲也。然釋幣雖不祭，亦必設洗盥如祭時。以執幣奠幣，須盥手致潔也。大夫祭設洗盥，詳《少牢饋食禮》。有司筵几于室

中。祝先人，主人從入。主人在右再拜，祝告，又再拜。更云「主人」者，廟中之稱也。祝告，告以主人將行也。【疏】正義曰：此有司及祝，皆大夫之家臣也。祝，詳《少牢禮》。敖氏云：「室中，奧也。筵亦東面而右几。主人在右，在祝右也。祝在左者，以親釋辭於鬼神，宜變於他時詔辭之位也。《少儀》曰：「詔辭自右。」主人拜不稽首，變於祭。祝不拜，辟君禮。」吳氏廷華云：「祝習於神，故先入。右，祝之北。欄主東鄉，告者西鄉。」注云「更云主人者，廟中之稱也」者，案：《特性》、《少牢》皆稱主人，是主人為廟中之稱，故上云「賓」而此更云「主人」也。云「祝告，告以主人將行也」者，其辭當云：「孝子某，奉君命使于某國，以某日行，敢奠幣告。」釋幣，制玄纁束，奠于几下，出。祝釋之也。凡物十曰束。玄纁之率，玄居三，纁居二。《朝貢禮》云：純四只，制丈八尺。【疏】正義曰：「出」，謂主人及祝皆出也。注云「祝釋之也」者，據《曾子問》：「君薨而世子生，大祝裨冕執束帛，告曰：『某之子生。』」又云：「升奠幣于殯東几上。」故知祝釋之也。此奠于几下，即祝奠之。云「凡物十曰束」者，帛十端曰束，猶脯十脰亦曰束，故云「凡」也。鄭注《士冠禮》、

《士昏禮》、《公食禮》皆云：「束帛，十端也。」云「玄纁之率，玄居三，纁居二」者，《儀禮·士昏禮》曰「納徵，玄纁束帛」，此云「釋幣，制玄纁束」，《既夕禮》曰「公賁玄纁束」，又曰「至于邦門，公使宰夫贈玄纁束」，又曰「贈用制幣玄纁束」，凡用玄纁者，皆玄三纁二，故云「玄纁之率，玄居三，纁居二」也。何氏《公羊注》亦云：「玄三纁二，玄三法天，纁二法地。」《曾子問》疏云：「十端，六玄，四纁。五兩，三玄二纁。纁是地色，玄是天色。」然則玄三纁二，據五兩言之也。云「《朝貢禮》：純四只，制丈八尺」者，案：只與咫通，字又作咫。《周禮·內宰》：「出其度量淳制。」鄭注：「故書『淳』為『敦』，杜子春讀『敦』為『純』。純謂幅廣也，制謂匹長。純制，《天子巡守禮》所云：制幣丈八尺，純四咫與？」彼疏引《鄭志》趙商問云：「《天子巡守禮》制丈八尺，純四咫何？」荅云：「《巡守禮》制丈八尺，咫八寸。四咫三尺二寸，又大廣。四當為三，三八二十四，二尺四寸，幅廣也。古三四積畫，是以三誤為四也。」案：此注云《朝貢禮》，而《周禮注》引作《巡守禮》者，賈氏《既夕》疏云：「《朝貢禮》及《巡守禮》皆有此文。」今案：據杜子春及《鄭志》之說，則「純四只」謂其幅之廣也，「制丈八尺」謂其匹之長也。是以鄭注《曾子問》云：「制幣一丈八尺。」注《既夕禮》云：「丈

八尺曰制，二制合之，束十制五合。」案：十制即十端，五合即五兩也。丈八尺曰制，是其一端。二端合之爲一兩，束十制計五兩也。兩亦謂之匹。《雜記》曰：「納幣一束，束五兩，兩五尋。」鄭注：「納幣，謂昏禮納徵也。十个爲束，貴成數。兩兩者合其卷，是謂五兩。八尺曰尋，一兩五尋，^①則每卷二丈也，合之則四十尺。今謂之匹，猶匹偶之云與？」據此，昏禮雖用二丈爲一端，而其一束五兩、一兩二端則同。昏禮所以必用二丈者，取成數。其他禮幣則皆以丈八尺爲節，謂之制。其幅廣二尺四寸，亦與布幅廣二尺二寸者異也。主人立于戶東，祝立于牖西。少頃之間，示有俟於神。【疏】正義曰：敖氏云：「其立東西相鄉。」高氏愈云：「幽明理殊，故皆出以俟神之來格是也。」又入，取幣，降，卷幣，實于筭，埋于西階東。又入者，祝也。埋幣必盛以器，若藏之然。【疏】正義曰：幣每端長有丈八尺，則奠時固已卷之矣。此云「卷幣」，蓋卷以實于筭也。「埋于西階東」者，《曾子問》曰：「天子諸侯反必告，設奠，卒，斂幣玉藏諸兩階之間。」此云「西階東」，即兩階間也。筭，詳《士昏禮》。敖氏云：「又入者，祝及主人也。祝既取幣，乃與主人俱出。幣必埋之者，

神物不欲令人褻之。」今案：「又入」緊承上「主人立于戶東」二句，似敖說是也。《曾子問》：「小宰升舉幣。」注云：「舉而下，埋之階間。」舉而下，即此經所云「取幣，降」也。案：祝奠之，不使祝取以降者，諸侯官多也。又釋幣于行。告將行也。行者之先，其古人之名未聞。天子諸侯

有常祀在冬。大夫三祀：曰門、曰行、曰厲。《喪禮》有「毀宗躐行，出于大門」，則行神之位在廟門外西方。不言埋幣，可知也。今時民春秋祭祀有行神，古之遺禮乎？【疏】

正義曰：敖氏云：「此釋幣之儀與室中者異，故不蒙如之也。」注云「告將行也」者，以將有事於道路，故釋幣于行以告之。云「行者之先，其古人之名未聞」者，謂古有始教行之人，後遂祀爲道路之神，其名未聞也。云「天子諸侯有常祀在冬」者，《月令》「冬祀行」是也。云「大夫三祀：曰門、曰行、曰厲」者，《祭法》文。是大夫亦有常祀也，但出行則又告之耳。云「喪禮有「毀宗躐行，出于大門」，則行神之位在廟門外西方」者，《檀弓》曰：「及葬，毀宗躐行，出于大門，殷道也。」鄭注：「毀宗，毀廟門之西而出，行神之位在

①「一」，原脫，今據阮刻《禮記注疏》補。

席門之外。」孔疏：「生時出行，則爲壇幣，告行神，告竟，車躐行壇上而出，使道中安穩如在壇。今嚮毀宗處出，仍得躐此行壇如生時之出也，故云「毀宗躐行，出于大門」也。」案：《檀弓》以此爲殷道，則周道不如此矣，故《既夕篇》不言毀宗躐行也。《月令》：「孟冬之月，其祀行。」鄭注：「行在席門外之西。」與此注及《檀弓》注同。吳氏廷華云：「彼據喪禮，故以席門言。若常位，當在大門外之西。」其說似可從，餘詳下記「出祖釋軾」下。云「不言埋幣，可知也」者，言此幣亦埋之，不言可知也。云「今時民春秋祭祀有行神，古之遺禮乎」者，案：《祭法》注亦云：「今時民家或春秋祀司命、行神、山神。」是皆舉漢法爲況也。遂受命。賓須介來，乃受命也。言遂者，明自是出，不復入。【疏】正義曰：「遂受命」者，言釋幣訖遂往受命也。注云「賓須介來，乃受命也」者，據下「帥以受命」言也。云「言遂者，明自是出，不復入」者，斯時釋幣于行，已出在門外，故即往朝，不復入也。上介釋幣亦如之。如其於禰與行。

【疏】正義曰：盛氏云：「衆介亦當有告禰之事，經不言者，略也。」

右將行釋幣告禰與行

上介及衆介俟于使者之門外。俟，待也。

待於門外，東面北上。【疏】正義曰：自此至「斂旌」，言賓介往朝受命即行之事。○方氏苞云：「介必備集于使者門外，^①然後序人于朝，無參錯也。」注云「東面北上」者，

賈疏云：「依賓客門外之位也。」使者載旌，帥以受命于朝。旌，旌旗屬也。載之者，所以表識其事也。

《周禮》曰「通帛爲旌」，又曰「孤卿建旌」。至于朝門，使者北面東上。古文「旌」皆爲「膳」。【疏】正義曰：帥，帥介也。朝，治朝。敖氏云：「受命于朝，亦目下事之言也。朝

蓋指受命之處而言，謂路門外。」是也。注云「載之者，所

以表識其事也」者，載謂載于車上。敖氏云：「此載旌爲將受君命以行也，使事于是乎始，故以其旗表之。」兩引《周禮》，皆《司常》文。李氏云：「旌，通以絳帛爲之，無他色之飾，所謂『周之大赤』也。」云「至于朝門，使者北面東上」者，案：朝門謂庫門也。庫門而謂之朝門者，蒙經「朝」言之。庫門，朝之外門也。天子五門：皋、庫、雉、應、路。諸侯三門：庫、雉、路。《明堂位》曰：「庫門，天子皋門。雉門，天

①「門外」，《儀禮析疑》作「之門」。

子應門。」江氏永云：「此言魯之庫門擬天子之皋，雉門擬天子之應耳。非謂唯魯有庫門、雉門，而餘諸侯不得立也。《檀弓》言庫門者四，除魯莊公既葬而經不入庫門外，其他言君復于庫門，宰夫命舍故諱新，自寢門至于庫門，軍有憂則素服哭于庫門之外，皆通諸侯言之，非專爲魯記也。《禮器》言繹之于庫門內，《家語》謂孔子爲衛莊公言之，則諸侯皆有庫門可知。有庫門則亦有雉門矣。」又云：「朱子曰：『《書》天子有應門，《春秋》魯有雉門，《禮記》云魯有庫門，《家語》云衛有庫門，皆無云諸侯有皋、應者，則皋、應爲天子之門明矣。』此爲定說。注疏言魯有庫、雉，他國諸侯有皋、應者，皆非。」今案：江說是也。又戴氏震謂天子亦三門，無庫、雉，作《三朝三門考》。其言曰：「天子之宮，有皋門，有應門，有路門。路門一曰虎門，一曰畢門，不聞天子庫門、雉門也。諸侯之宮，有庫門，有雉門，有路門，不聞諸侯皋門、應門也。皋門，天子之外門；庫門，諸侯之外門。應門，天子之中門；雉門，諸侯之中門。異其名，殊其制，辨等威也。天子三朝，諸侯三朝；天子三門，諸侯三門，其數同，君國之事侔體合也，朝與門無虛設也。」又言「諸侯宗廟社稷皆在中門內，路門外之左右」，其說亦精妙。又宋劉氏敞亦有天子三門之說，見《公是先生弟子記》。此注云

「至于朝門」，謂使介車至庫門止而下行，少立于庫門外，北面東上，以俟君之進之也。賈疏以朝門爲皋門外，誤。敖氏以爲路門外，^①亦非。云「古文『廬』皆爲『膳』者，胡氏承珙云：『《說文》廬爲旃之或字，《周禮》、《儀禮》皆作『廬』。古文作『膳』者，假借字。』君朝服，南鄉。卿大夫西面，北上。君使卿進使者。進之者，使者謙，不敢必君之終使己。【疏】正義曰：敖氏云：「此在朝，固朝服矣。必簪之者，嫌命聘使或當皮弁服也。南鄉，亦在路門外也。使卿進使者，重其事也。」今案：「進使者」，謂使者先在庫門外，進之乃入。「卿大夫皆西面，北上」者，賈疏云：「此依展幣之位，大夫與卿同西面，避賓。下文使介亦同展幣，北面東上。」使者入，及衆介隨入，北面東上。君揖使者進之，上介立于其左，接聞命。進之者，有命，宜相近也。接，猶續也。【疏】正義曰：「入」，謂入庫門、雉門，至治朝而北面東上也。「其左」，使者西也。盛氏云：「經云『上介立于其左』，則與使者俱進矣，衆介猶在故位。」注云「進之者，有命，

① 「路」，原作「雉」，今據《儀禮集說》改。

宜相近也」者，謂進之使近，便於聞命也。《釋文》云：「近，附近之近。」云「接，猶續也」者，下經「賓立接西塾」，注云：「接，猶近也。」《喪服傳》「以時接見乎天子」，注云：「接，猶會也。」蓋隨文生義。《廣雅》亦云：「接，續也。」此言上介立近使者，可接續而聞命也。敖氏云：「上介必接聞命者，爲使者或有故，則上介攝使事，宜與聞之。」賈人西面坐，啟櫝，取圭，垂纁，不起而授宰。賈人，在官知物賈者。纁，所以藉圭也。其或拜，則奠於其上。今文「纁」作「噪」。【疏】正義曰：朱子云：注「在官」上，疑有「庶人」二字。《校勘記》云：「賈，楊氏作『價』」。案：賈，正字；價，俗字。○圭，瑑圭也。下注引《周禮》曰「瑑圭璋，璧琮以覲聘」是也，此《典瑞》文。又《考工記·玉人》曰：「瑑圭璋八寸，璧琮八寸，以覲聘。」言八寸者，彼疏云：「此謂上公之臣，若侯伯之臣宜六寸，子男之臣宜四寸。」今案：此經是侯伯之禮，則瑑圭六寸也。《論語》「執圭」，包注云：「爲君使，聘問鄰國，執持君之圭。」江氏永云：「大夫聘，執瑑圭，《周禮》有明文。君之圭非臣所執，包氏誤矣。《集注》偶失檢承其誤，以諸侯命圭釋之。《考工記·玉人》曰：『命圭九寸謂之桓圭，公守之。命圭七寸謂之信圭，侯守之。命圭七寸謂之躬圭，伯守之。』是封國之時，天

子命而諸侯守之者。若聘享之圭璋璧琮，《聘禮·記》明言凡四器者，唯其所寶以聘可也，則異於命圭矣。蔡氏《禮經本義》引周章成云：「聘圭與封圭不同。封圭唯朝王及兩君相見用之。若遣使出聘所用之圭，下于封圭一等，所謂瑑圭也。」櫝，藏玉之器。李氏云：「櫝，函也。《論語》曰：『龜玉毀于櫝中。』」郝氏敬云：「玉比忠信，託玉傳信，必面命使者，然後授之。賈人西向跪取，敬也。不起，跪授也。」敖氏云：「授玉不起，賤者宜自別也。宰于其右亦坐受之。」吳氏廷華云：「宰貳君，故代君授受。」注云「賈人，在官知物賈」者，《儀禮釋官》云：「《王制》『庶人在官者』，注『謂府史之屬』，孔疏云：『之屬者，謂工人、賈人及胥徒也。』《少儀》：『臣致襪於君，則曰致廢衣於賈人。』注：『賈人知物善惡也。』案：《周禮·序官》若庖人、大府、玉府、職幣、典婦功、典絲、泉府、馬質、羊人、巫馬、犬人諸職，皆有賈，此賈人當爲府官之屬。《周禮》玉府、內府，皆掌金玉。《內府職》曰：「凡適四方，使者共其所受之物而奉之。」與此經合也。」云「纁，所以藉圭也」者，李氏云：「纁者，以韋衣木，畫以雜采，以之薦玉，又以五綵組繫焉。有事，則組或垂或屈之。垂者，垂之向下；屈者，屈之于手。凡言屈、垂者，皆據組言之。」今案：李氏謂屈垂據組言，是也。但

組與韋版同一物，不得分爲二，故經云「垂纁」，屈纁也。敖氏則謂「纁以帛爲之」，與鄭異，詳下記「皆玄纁繫長尺綯組」下。云「其或拜，則奠於其上」者，據《覲禮·記》「奠圭于纁上」言之，是釋纁所以藉玉之義。然經之所謂「有藉則裼，無藉則襲」者，乃指束帛言，非謂纁也。疏家每以垂纁爲有藉，屈纁爲無藉，誤。辨見記「凡執玉，無藉者襲」下。云「今文「纁」作「璫」者，胡氏承珙云：「《周禮·司几筵》：「加纁席畫純。」鄭司農云：「纁當爲藻率之藻。」《典瑞》注同。《弁師》：「諸侯之纁旂九就。」鄭司農云：「纁當爲藻。纁，古字也；藻，今字也。同物同音。」康成注《周禮》祇釋纁義，不破從藻，故注此經皆從古文作「纁」。今文作「璫」者，《說文·玉部》云：「璫，玉飾，如水藻之文。」引《虞書》「璫火粉米」，蓋許從《儀禮》今文，故凡文采之字作「璫」，而以纁爲繹繭之字，與鄭義異。」今案：下記「圭與纁皆九寸」注云：「古文「纁」或作「藻」，今文作「璫」。」則古文之本又不同矣。《覲禮》「奠圭于纁上」，注云「古文「纁」作「璫」」，此「古文」疑「今文」之誤。宰執圭，屈纁，自公左授使者。屈纁者，斂之。禮以相變爲敬也。自公左，贊幣之義。【疏】正義曰：注云「屈纁者，斂之」者，謂斂垂者而持之於手，下注云「屈纁併持之也」是。云「禮以相

變爲敬也」者，謂一垂一屈相變也。江氏筠云：「自賈人取圭至上介授圭，賈人凡四授受，垂纁與屈纁相間。鄭注謂「禮以相變爲敬也」，敖君善謂蓋相變以爲儀，然亦莫不有義存焉也。蔡敬齋《本義》錄高紫超說曰：「垂纁以示文，屈纁以示敬。」筠謂此所以一垂一屈者，即上展幣之謂耳。賈人啟櫝取圭，解組繫以呈之宰，宰得而省視之，則斂纁以授使者。使者受而開視，因執以受命于公。受命訖，即以示上介，上介既審視，則屈授賈人，命藏諸櫝。賈人之所以必垂纁授宰者，一以明典守不失，又以便尊者之審之也。宰之所以屈纁授使者，付重物於人，宜整理斂束以示付託之慎也。使授上介垂而不屈者，聘使有故，則上介當攝其事，故須令省識之。又其後人竟展圭，但上介北面視之而賓不視。其行聘時，賓但受上介圭，襲執之而纁不垂。介實有代賓展視之義，故其授時宜如此也。其聘時賈人垂纁授上介，上介屈纁授賓者，蓋其義與初同，於臨時復加審慎耳。至歸反命，使者執圭垂纁北面者，垂以呈見于君，明使命之不辱，猶賈人執展，鄭注謂持之告在之意。宰既受玉，則屈而持之。其上介執璋屈纁立于其左者，特以其事未至。迨賓受上介璋，則亦垂之以致命，以其儀與圭同，故經云「亦如之」也。敖氏謂賓襲執圭，不言垂纁可知。郝氏謂

執璋屈纁，璋不呈也。蓋皆以相變爲說者，恐皆非是。」戴氏震云：「賈人啟櫝取圭垂纁者，非以爲文，特解其組繫而垂之，圭與纁竝呈之也。至宰與上介執以授使者，皆屈纁斂其垂而併持之，明己不爲儀也。使者受而垂纁，于君前竝見之，亦以爲儀。然纁與櫝爲類，聘享皆不以纁進，故致聘及還玉時皆無垂屈之節。」今案：江氏、戴氏之說是也。云「自公左，贊幣之義」者，《少儀》曰：「詔辭自右，贊幣自左。」故於公左授使者也。使者受圭，同面，垂纁以

受命。同面者，宰就使者北面竝授之。既授之，而君出命矣。凡授受者，授由其右，受由其左。【疏】正義曰：云

「同面者，宰就使者，北面竝授之」者，《禮經釋例》云：「凡授受之禮，同面者謂之竝授受，相鄉者謂之訝授受。」相鄉，謂對面也。同面，如此經「使者北面，宰亦北面」是也，詳《士昏禮》。吳氏廷華云：「宰君左西面，使者亦轉而西面，在宰之左。」案：吳氏所以易注者，蓋欲遷就「公左」之文也。然受圭受命皆當北面，經不直云「公左」而云「自公左」者，宰西面，本在公左，今自公左至使者之右，北面授之耳，故云「宰就」也。云「既授之，而君出命矣」者，此命即聘時致命于聘君之命也。必授圭乃出命者，以命藉圭而通也。楊氏復云：「受命莫重于受圭，故圭所以致君命而通信誠

也。」敖氏云：「于使者受圭，公乃命之，明其執此以申信也。」云「凡授受者，授由其右，受由其左」者，謂同面授受者，其左右如此也。賈疏云：「據《鄉飲》、《鄉射》、《燕禮》，獻酢酬皆授由其右，受由其左，故云「凡」以廣之。《禮經釋例》云：「詳賈意，蓋以獻酢酬之授受皆竝授也。考《鄉飲酒禮》：「主人西南面獻介，介進，北面受爵。」則是訝受，非竝授明矣。」既述命，同面授上介。述命者，循君之言，重失誤。【疏】正義曰：《校勘記》云：「失誤，楊倒。」○使者受命，又重述之，以備遺忘，恐有失誤也。既述命，乃以圭授上介。或謂宰述之者，非。上介受圭，屈纁，出授賈人，衆介不從。賈人，將行者，在門外北面。

【疏】正義曰：方氏苞云：「此圭宰與使介遞相授而終以屬賈人，責有所專也。」吳氏廷華云：「出授非衆介事，故不從。」今案：上介出授還人，待使者出乃隨出也。注云

「賈人，將行者，以其從行，故以圭授之，使藏諸櫝也。賈疏云：「對上賈人出玉者，是留者也。」王氏士讓云：「賈人取圭授宰後，即起以櫝出而待藏。」則一賈人也，義亦可通。云「在門外北面」者，李氏云：「如使者門外之位也。」受享束帛加璧，受夫人之聘璋，享玄纁束帛加

琮，皆如初。享，獻也。既聘又獻，所以厚恩惠也。

帛，今之璧色繒也。夫人亦有聘享者，以其與己同體，爲國小君也。其聘用璋，取其半圭也。君享用璧，夫人用琮，天地妃合之象也。圭璋特達，瑞也；璧琮有加，往德也。《周禮》曰：「瑑圭、璋、璧、琮，以覲聘。」【疏】正義曰：注「半圭」，毛本作「珪」。《校勘記》云：「諸本俱作「圭」。「配」，《釋文》作「妃」，云「本亦作配」。《集釋》作「妃」。「覲」，葛本、《集釋》俱作「頰」。今案：「覲」，是也。○「束帛加璧」，謂以璧加于束帛之上也，加琮亦然。「皆如初」者，謂受璧、璋、琮三者，皆如受圭之儀也。《典瑞》曰：「瑑圭、璋、璧、琮，繅皆二采一就。」則三者亦皆有繅矣。張氏爾岐云：「束帛玄纁，前授幣時已授矣。此復言者，以方受璧琮，取其相配之物兼言之，如云享時束帛上所加之璧，玄纁束帛上所加之琮耳。」盛氏云：「此時惟受玉乃并束帛言之者，取其相配，且以別於圭璋之無加者也。張說得之。敖云「復取而合諸璧琮」，非。」注云「享，獻也」者，《爾雅·釋詁》文，《說文》同，字皆作「享」，不作「饗」。《周禮·玉府》注云：「古者致物于人，尊之則曰獻」，故云「享，獻也」。云「既聘又獻，所以厚恩惠也」者，《聘義》曰：「已聘而還圭璋。」是圭璋已聘則還之，唯受其享之璧琮幣帛而已，故繼

聘而行享，所以厚恩惠也。覲禮既覲後則行三享，較聘爲尤隆。云「帛，今之璧色繒也」者，繒爲帛之總名。《周禮·

大宗伯》：「孤執皮帛。」鄭注：「帛如今璧色繒也。」賈兩疏俱未能還出實據，秦氏蕙田云：「享君束帛之色，經無明文。鄭以爲與璧色同，亦未詳何色。盛世佐以爲色素，亦恐未然。」今案：敖氏云：「享束帛不言玄纁，文省耳，蓋以享君束帛亦用玄纁也。」其說似是。古禮幣多用玄纁色，於享君不言玄纁，享夫人乃言玄纁，舉後以包前耳，其實一也。云「夫人亦有聘享者，以其與己同體，爲國小君也」者，夫人與國君同體，而國君又與己同體，故聘享及之，敬其君以及其夫人也。記曰「君以社稷故在寡小君」，此之謂矣。云「其聘用璋，取其半圭也。君享用璧，夫人用琮，天地配合之象也」者，《公羊傳》曰：「璋判白。」何注：「半圭曰璋。《爾雅》：「肉倍好謂之璧。《白虎通》曰：「半圭爲璋，方中圓外曰璧，圓中牙外曰琮。」鄭注《大宗伯》云：「璧圓象天，琮八方象地，圭銳象春物初生。半圭曰璋，象夏物半死。」聘君用圭，聘夫人用璋，取陽全陰半之義。璧圓以享君，琮方以享夫人，是取天地配合之象也。云「圭璋特達，瑞也」者，特達，不用束帛也。《聘義》曰：「以圭璋聘，重禮也。」鄭注：「圭，瑞也。」孔疏：「以器言之謂之圭，執以行

禮謂之瑞。瑞，信也。云「束帛有加，往德也」者，「有加」，謂以束帛爲藉也。《郊特牲》曰：「束帛加璧，往德也。」孔疏：「玉以表德。今將玉加於束帛，以表往歸於德故也。」引《周禮》者，《典瑞》文，義已詳前。《周禮·小行人》曰：「合六幣：圭以馬，璋以皮，璧以帛，琮以錦，琥以繡，璜以黼。」此六物者，以和諸侯之好故。據此則琮宜用錦，今《聘禮》享夫人用束帛加琮，不用束錦者，避享后也。又據《小行人》注謂「五等諸侯享天子用璧，享后用琮」，二王後享用圭璋，于諸侯亦用璧琮，子男於諸侯用琥璜，詳《覲禮》「四享皆束帛加璧」下。江氏永云：「享禮用圭者，唯二王後享天子。鄭《小行人》注云：『其於諸侯亦用璧琮耳』，則諸侯使大夫聘而行享必無用圭之事。鄭注《鄉黨》云：『既聘而享用圭璧』，邢疏不能辨正，《集注》遂承其誤。」遂行，舍于郊。於此脫舍衣服，乃即道也。《曲禮》曰：「凡爲君使，已受命，君言不宿於家。」【疏】正義曰：《校勘記》云：「注『使』下，楊氏有『者』字。」○郊，近郊也。云「於此脫舍衣服，乃即道也」者，案：下經：「使者歸及郊，朝服載廬。歸及郊而衣朝服，則行時于郊脫舍朝服明矣。必脫舍朝服者，下記『歸使衆介先』，注云『吉時道路深衣』，明在塗不服朝服矣。或以舍爲止舍，非。引《曲禮》者，釋『遂行』之義。

蓋賓是日自朝服告禰人朝，受命即行，至是乃改服深衣也。斂廬。此行道耳，未有事也。斂，藏也。【疏】正義曰：初時入朝，載廬以表其事。至是斂之，以行道未有事故也。載者，載於車上。斂者，藏於車中，故云「斂，藏也」。

右受命遂行

若過邦，至于竟，使次介假道，束帛將命于朝，曰：「請帥。」奠幣。至竟而假道，諸侯以國爲家，不敢直徑也。將，猶奉也。帥，猶道也，請道已道路所當由。【疏】正義曰：自此至「執筴立于其後」，言過他邦假道之事。○「過邦」，謂道所經歷之邦，非聘國也。竟與境通，經典多用竟。朝，外朝，即所過國君之朝也。敖氏云：「次介，士也。假道禮輕，故使次介。此朝，謂大門外。」吳氏廷華云：「使次介者，上介貳賓誓衆也。凡有言用束帛，無庭實。」蔡氏云：「奠幣，奠束帛于地。不敢直徑，以明敬也。」注云「至竟而假道，諸侯以國爲家，不敢直徑也」者，至竟，抵所過國界上也。高氏愈云：「封境各有專守，不敢踰越，故古者必假道，以盡過賓之禮。」今案：楚使申舟聘齊，不假道于宋，而華元以爲鄙我。晉以璧馬

假道于虞雖屬詭謀，然亦可證假道之禮春秋時猶然矣。賈疏云：「天子行過無假道，以天下爲家，所在如主人也。天子微弱則有之。」《周語》：「定王使單襄公聘于宋，遂假道于陳以聘楚。」服氏注云：「是時天子微弱，故與諸侯相聘同。」是也。云「將，猶奉也」者，郝氏敬云：「將命，奉主君之命以請也。」云「帥，猶道也」者，道與導同。下大夫取

以入告，出許，遂受幣。言遂者，明受其幣非爲許故也。容其辭讓不得命也。【疏】正義曰：「下大夫」，彼國下大夫也。「取」，取幣也。李氏云：「言『遂』者，容其中有辭讓之節，非爲許之而受其幣。或曰：此奠幣受幣與常時授受禮異者，皆以假道禮略，且不欲久稽過賓也。」餼之以其禮，上賓大牢，積唯芻禾，介皆有餼。凡賜人以牲，生曰餼。餼，猶稟也，給也。以其禮者，尊卑有常差也。常差者，上賓、上介牲用大牢，羣介用少牢。米皆百筥，牲陳于門內之西，北面。米設于中庭。上賓、上介致之以束帛，羣介則牽羊焉。上賓有禾十車、芻二十車，禾以秣馬。【疏】正義曰：《校勘記》云：「注『秣』，徐作『抹』，誤。」○「餼之」，謂所過邦餼之也。「上賓」，即使者也。牛、羊、豕具爲大牢。「積」，謂給賓客道用者。注云「凡賜人

以牲，生曰餼」者，餼，猶饋也。不曰饋而曰餼，以有生牲也。下「歸饗餼」，注云「牲殺曰饗，生曰餼」是也。服注《左傳》「餼牽竭矣」，以爲腥曰餼，蓋對牽言之。此《聘禮》篇內所云「餼」，則皆指牲生言。《釋文》云：「牲腥曰餼，謂殺而未熟。」非也。云「餼，猶稟也，給也」者，賈疏云：「於賓爲稟，稟者，受也。于主人爲給，給賓客也。」云「以其禮者，尊卑有常差也」者，謂以爵之尊卑爲等殺也。吳氏《疑義》云：「假道致餼，其禮無考。鄭以此經歸餼及餼賓二禮約言之。」今案：注云「上賓、上介牲用大牢，羣介用少牢」者，是大夫餼賓禮也。云「米皆百筥，牲陳于門內之西，北面」，是主君歸餼禮也。「米設于中庭」，亦據歸餼言之，但歸餼禮，士介米百筥設于門外耳。云「上賓、上介致之以束帛」者，亦歸餼禮也。羣介則牽羊焉，又大夫餼賓禮也。云「上賓有禾十車、芻二十車」者，鄭自爲說也。禾以秣馬，詳下設餼節「門外米禾皆二十車」下。李氏云：「言『積唯芻禾』，則無車米與薪，且獨上賓有之耳。」又李氏心傳云：「賓大牢，則介不得用大牢。積唯芻禾，則無米可見矣。」敖氏云：「其禮者實則大牢，上介則少牢，羣介則特性也。米禾薪芻皆謂之積，積唯芻禾，是無薪與米也。上賓有積，上介以下未必有之。此餼積唯若是，所以降于主國之禮賓

也。然以此而待過客，亦不爲不厚矣。」張氏爾岐云：「介但有餼無積。」今案：經文「上賓大牢，積唯芻禾」，是專言餼上賓之禮。下云「介皆有餼」，乃指上介、衆介言也。二李氏及敖氏、張氏說是。或謂無門外車米而仍有庭中營米，亦與經不合。又謂上介、衆介皆有芻禾，考主君歸饗餼，士介無芻禾，豈過邦餼賓反優于主國待賓之禮邪？以是知上介、衆介皆無積矣。○又案：注云「上賓禾十車，芻二十車」者，蓋以此禮當殺於歸饗餼，而大夫餼賓又無芻禾，故約設餼上介禾十車、芻倍禾之數爲說也。據此，則上介無積益明矣。士帥没其竟。没，盡。【疏】正義曰：「帥」，毛本誤「師」。○蔡氏云：「士帥遣士導引，没其境，盡彼國界也。」今案：《周語》：「候人爲導。」《夏官》候人，士爲之。誓于其竟，賓南面，上介西面，衆介北面東上。史讀書，司馬執策，^①立于其後。此使次介假道，止而誓也。賓南面，專威信也。史於衆介之前，北面讀書，以敕告士衆，爲其犯禮暴掠也。禮，君行師從，卿行旅從。司馬，主軍法者，執策示罰。【疏】正義曰：「策」，毛本作「筴」。《校勘記》云：「嚴、徐本、敖氏俱作『策』，《釋文》作『筴』，云『音策』。《集釋》、《通解》、楊氏

亦俱是『筴』。」今案：《說文》：「策，馬箠也，下從束。」顏氏家訓《五經文字》皆以「筴」爲「策」之訛俗字，故張氏《識誤》據《釋文》改「策」爲「筴」，而戴氏震駁之，是也。今從「策」。石經作「策」，誤多一筆。注「史於」，毛本「史」誤「使」。《校勘記》云：「嚴、徐本、《集釋》、《通解》、楊氏、敖氏俱作『史』。」盧氏云：「『勅』當作『勅』。」○《儀禮釋官》云：「史讀書，謂誓戒之書也。」《左傳》昭六年「楚公子棄疾聘于晉，過鄭，禁芻牧采樵，不入田，不樵樹，不采蓺，不抽屋，不强勾。誓曰：有犯命者，君子廢，小人降。」是其誓書之類。《周禮·掌客職》云：「凡介行人宰史，皆有餼饗餼。」注：「凡介行人宰史，衆臣從賓者也。」史主書，案：彼諸侯相朝法，此大夫出聘，亦當有史從也。《掌客》疏云：「史，大史之屬官。」則此史亦非大史也。吳氏《章句》以爲大史，恐非。《釋官》又云：「此司馬執策，乃司馬之屬官從聘賓行者。」《左傳》：「宋華耦來盟，其官皆從之。」孔疏云：「聘禮有上介、衆介。至國誓于其竟，則史讀書，司馬執策，賈人拭玉，有司展幣，其從羣官多矣。」《詩·緜蠻》之篇言：大臣出行，微臣隨從。是大夫出使，有官從之也。

①「策」，原作「筴」，今據《儀禮注疏》及下疏文改。

大夫本有家司馬，此爲君聘，則司馬當爲公臣。《周禮》大司馬以下至伍長，皆得稱司馬，故有公司馬、兩司馬之稱。此司馬蓋其類也。」 注云「此使次介假道，止而誓也」者，

以經云「誓于其竟」，明是誓于入竟之前，使所過勿犯。經乃言于「士帥沒其竟」之後者，先言「士帥」以終假道之事耳。鄭恐人疑爲既出竟乃誓，故特明之，謂使次介假道時即止而誓也。云「賓南面，專威信也」者，以士衆從行在外，特賓爲統率，故使南面以專威信耳。云「史於衆介之前，北面讀書」者，以衆介北面東上，明從行之衆皆北面可知，故讀於其前，使衆共聞也。褚氏云：「史讀書，注云「北面」，向賓讀也。敖云「東面」，未是。」「君行師從，卿行旅從」，定四年《左傳》文。旅，五百人也。引之以見卿出從行甚衆，恐有犯禮暴掠之事，故誓之。云「司馬，主軍法者，執策示罰」者，言司馬執策立于史後，明書在而法隨之，有犯必罰也。

右過邦假道

未入竟，壹肆。謂於所聘之國竟也。肆，習也。

習聘之威儀，重失誤。【疏】正義曰：自此至「不習私事」，言將至豫習威儀。○《校勘記》云：「壹，《釋文》、《集釋》俱

作「一」。黃氏丕烈云：「張本改「壹」爲「一」，據陸也。」段曰：「一，是。」今案：石經、嚴本俱作「壹」，仍從石經。

注云「謂於所聘之國竟也」者，言經所云「竟」，是所聘之國竟也。「未入」者，將至而未至也。下經云「及竟」，則已至竟矣。云「肆，習也」者，以此云「肆」，下云「習」，其義一也。

《說文》亦云：「肆，習也。」盛氏云：「「壹肆」，謂一次習之而已，對下展幣凡三次而言也。郝云「壹，逐一也」，非。」

爲壇壇，畫階，帷其北，無宮。壇土象壇也。帷其北，宜有所鄉依也。無宮，不壇土畫外垣也。【疏】正義

曰：敖氏云：「築壇而卑曰壇壇，壇卑故畫階。必畫階者，習升降之儀也。」 注云「壇土象壇也」者，案：《周禮·鬯

人》「社壇」注云「壇謂委土爲壇壇」，然則壇土即委土也。賈疏云：「《觀禮》與《司儀》同爲壇三成。官方三百步，此

時無外宮，其壇壇土爲之，無成，又無尺數，象之而已。」張氏爾岐云：「壇須築土高厚，有階級。壇則略除地聚土，令

有壇形而已。」又張氏以壇爲壇名，與敖同，恐非鄭意。云「帷其北，宜有所鄉依也」者，鄉即南鄉、北鄉、東鄉、西鄉

①「令」，《續清經解》本作「略」。「壇形」，《儀禮鄭注句讀》作「形埒」。

也。習禮須明所鄉，今帷其北，則所鄉自明，可憑依以肄習也。云「無宮，不壇土畫外垣也」者，鄭注《覲禮》云：「宮，謂壇土爲埒以象牆壁。」此則不壇土爲埒，亦不畫地爲外垣也。吳氏廷華云：「不畫外垣，禮所不及也。」朝服，無主，無執也。不立主人，主人尊也。不執玉，不敢褻也。徒習其威儀而已。【疏】正義曰：敖氏云：「必言朝服者，嫌肆聘儀，則當如聘服也。凡道路常服，卿大夫則朝服，士以下則玄端與？」盛氏云：「道路常服深衣，至是乃易朝服者，以習儀重之也。不皮弁，下於聘也。敖說非。」

注云「不立主人，主人尊也」者，以主人是主國之君，位尊不敢以人象之也。云「不執玉，不敢褻也」者，玉，重器，不敢褻陳之也。云「徒習其威儀而已」者，徒，猶空也，謂空習之無所執也。敖氏云：「無執，不執玉帛也。無主則無授受之儀，故不必執之。」今案：下云習享，則此專習聘可知。鄭言玉不言帛者，聘時圭特故也，敖說未的。介皆與，北面西上。人門左之位也。古文「與」作「豫」。

【疏】正義曰：敖氏云：「言『皆與』者，肆時介無事，嫌不必與也。」注云「人門左之位也」者，謂下正聘時賓人門左，介皆人門左，北面西上也。李氏云：「賓行聘時，介止于

此。然則所習者，習廟門內之禮。」云「古文『與』爲『豫』」者，詳《士昏禮》。習享，士執庭實。士，士介也。庭實必執之者，皮則有攝張之節。【疏】正義曰：實，謂實于庭者也。敖氏云：「對堂上之幣而言，故謂之『庭實』。」劉氏台拱云：「享之庭實，不見其數，疑無常數。」今案：此云「執庭實」，則玉帛亦不執也。注云「庭實必執之者，皮則有攝張之節」者，庭實或以馬，或以皮，此言「執」，故知爲皮也。下享時經云「庭實，皮則攝之，毛在內，內攝之」，又賓「升致命，張皮」，是其有攝張之節也。習夫人之聘享，亦如之。習公事，不習私事。公事，致命者也。【疏】正義曰：公事，謂君之聘享，夫人聘享及問大夫，皆致君命，故注云「公事，致命者也」。私事，謂私覲私面也。賈疏云：「大夫之幣不在朝付之，至郊乃付之，避君禮，不謂非公事。」

右豫習威儀

及竟，張旌，誓。及，至也。張旌，明事在此國也。張旌，謂使人維之。【疏】正義曰：自此至「遂以人竟」，言賓至竟謁關迎人之事。○張氏爾岐云：「誓亦誓戒

從人，使勿犯禮。」注云「張旛，明事在此國也」者，以過邦假道不張旛，至是張之，示事在此國也。云「張旛，謂使人維之」者，《周禮·節服氏》：「掌朝覲祭祀，袞冕六人，維王之大常，諸侯則四人。」鄭注：「維，維之以縷。」鄭司農云：「維持之。」明此張旛亦然，但人數未聞耳。乃謁關人。謁，告也。古者竟上爲關，以幾異服，識異言。【疏】

正義曰：《校勘記》云：「注『譏』，《釋文》作『幾』，云『本亦作譏』。《集釋》亦作『幾』。」○《周禮·司關》曰：「凡四方之賓客敬關，則爲之告。」鄭注：「謂朝聘者也。敬關，猶謁關人也。」《儀禮釋官》云：「《周禮·司關》：『上士二人，中士四人，每關下士二人。』諸侯謂之關尹，當中士爲之，每關亦有關人，當士旅食爲之。賈疏謂：『司關爲都總，居在國都，每關二人，各主一關。今所謂關人者，謂告每關關人，來告司關，司關爲之告王。』據經謁關人而後入竟，則關人自是竟上每關關人，賈說分析甚確。《國語》：『單子云：周之秩官有之曰：敵國賓至，關尹以告。』韋注引《周禮·司關》及此經爲證。是關人之長，天子謂之司關，諸侯謂之關尹，猶天子有司門，諸侯謂之門尹也。」注云「謁，告也」者，《爾雅·釋詁》文。云「古者竟上爲關」者，鄭注《地官·序官》云「關，界上之門」，是關在竟上也。賈疏謂天子

十二門，有十二關，據魯廢六關，則諸侯半天子也。云「以譏異服，識異言」者，案：《王制》云：「關執禁以譏，禁異服，識異言。」鄭注：「關，竟上門。譏，呵察。」孔疏：「禁此身著異服之人，又記識口爲異言之人，防姦僞，察非違。」據此則異服上當有「禁」字，或注本脫也。關人問從者幾人。欲知聘問，且爲有司當共委積之具。【疏】正義

曰：《校勘記》云：「注『共』，陸氏曰『本或作供』，同，後放此。」○賈疏云：「不問使人而問從者，關人卑，不敢輕問尊者。」注云「欲知聘問，且爲有司當共委積之具」者，以卿聘從人多，大夫問從人少，故知其從人之多寡即知其爲聘爲問也。凡道路給賓客之用，少曰委，多曰積。《周禮·遺人》：「凡賓客會同師役，掌其道路之委積。」是皆有司所當共者，故欲知人數，且爲備委積也。敖氏云：「欲知其人數，所以防奸人。」今案：關人之問，蓋亦兼有此義。以介對。以所與受命者對，謙也。聘禮：上公之使者七介，侯伯之使者五介，子男之使者三介。以其代君交於列國，是以貴之。《周禮》曰：「凡諸侯之卿，其禮各下君二等。」【疏】正義曰：注云「以所與受命者對，謙也」者，介是使者所與受命之人，此以對者，孰以使者也。使以介對，是

謙也。蔡氏云：「止以介數對，不欲以餘隸煩主人也。」義亦通。《禮記·聘義》曰：「聘禮上公七介，侯伯五介，子男三介。」彼注云：「此皆使卿出聘之介數也。」鄭此注本之以立說，非直引《聘義》之文耳。云「以其代君交於列國，是以貴之」者，以聘使代君交鄰國，是以副之介以貴之，《聘義》曰「所以明貴賤也」是也。引《周禮》者，《大行人》文，詳篇首鄭《目錄》下。張氏爾岐云：「不以從者對而以介對，亦以知介數即為聘為問可知，其從者多少亦可知也。」君使士請事，遂以入竟。請，猶問也，問所為來之故也。

遂以入，因道之。【疏】正義曰：《經義述聞》云：「遂以入竟，」竟字因下「入竟」而衍，故鄭注曰「遂以入」，「入」下無「竟」字。下文「下大夫勞者遂以賓入」，與此「遂以入」文同一例。且賓至于竟，則士道之；至于近郊，則下大夫道之。是自近郊以外為士道之也。士道之，則下文曰「入竟」，曰「及郊」，曰「及館」，曰「至于近郊」，皆在「遂以入」三字中，非但道之人竟而已也。然則「遂以入」下不當有「竟」字明矣。《聘義》正義引此文曰「君使士請事，遂以入」，無「竟」字。自唐石經始衍「竟」字，而各本遂沿其誤。謹案：《述聞》之言是也。但石經相傳已久，今仍之，而姑錄其說於此。注云「問所為來之故也」者，上關人但問從者幾

人，未問來故，故此使士問之。敖氏云：「使者既謁關人，因止于竟，未敢輒入。關人以告於君，于是君使士請事。」李氏云：《春秋傳》：「晉韓宣子聘于周，王使請事，對曰：晉士起將歸時事于宰旅，無他事矣。」此其對辭。云「遂以入，因道之」者，謂道之使人也。此請事之士，疑即訝士。《儀禮釋官》云：「《周禮·掌訝職》曰：『若將有賓客至，與士迎賓于疆。』」注：「士，訝士也。」《訝士職》曰：「邦有賓客，則與行人送迎之。」《聘義》曰：「君使士迎于竟。」下文賓歸又云：「士送，至于竟。」疑此士即訝士也。」

右至竟迎人

入竟，斂廬，乃展。復校錄幣，重其事。斂廬，

變於始入。【疏】正義曰：自此至「賈人之館如初」，言入竟三度展幣之事。注云「復校錄幣，重其事」者，前授幣時已展之，此復校錄，是重其事也。經不言墮壇，則是因舍展

之也。郝氏敬云：「展，展視玉帛皮馬之類，恐遠道齋持疎虞也。」云「斂廬，變於始入」者，始入時張廬，示有事於此國。今既入竟，率其行道之常，故斂之。前出時至郊斂廬，注云「此行道耳，未有事也」是也，故云「變於始入」也。布

幕，賓朝服立于幕東，西面，介皆北面東上。賈人北面，坐拭圭。拭，清也。側幕而坐，乃開櫝。

【疏】正義曰：布幕，亦布於地也。李氏云：「賓誓則南面，專衆也。展幣則西面，將命也。」吳氏廷華云：「賓立於幕東西面，異於夕幣之位。賈人北面，以賓西面故也。」盛氏云：「介皆北面東上，則上介與衆竝立也。及視圭之時，上介少進。」注云「拭，清也」者，《爾雅·釋詁》文，謂拭之使潔清也。敖氏云：「拭圭者，就櫝拭之，故下乃云「執」。云「側幕而坐」者，謂坐於幕邊也。開櫝，取圭。遂執展之。持之而立，告在。【疏】正義曰：云「持之而立，告在」者，賈人告賓也。上介北面視之，退復位。言退復位，則視圭進違位。【疏】正義曰：經無進文，以言退知之。退圭。圭璋尊，不陳之。【疏】正義曰：敖氏云：「退之者，其展事畢也，退則藏之於櫝。」注云「圭璋尊，不陳之」者，謂執展之即退，不陳於幕上，對下壁與幣同陳言也。賈疏云：「下乃言夫人之聘享，則璋未拭。而并言璋者，欲見皆不陳故。」陳皮北首，西上，又拭璧，展之，會諸其幣，加于左皮上。上介視之，退。會，

合也。諸，於也。古文曰「陳幣北首」。【疏】正義曰：敖氏云：「退，退復位也。」注云「會，合也」者，《爾雅·釋詁》文，謂合璧與幣而加於左皮上也。李氏云：「幣，束帛也，享用束帛加璧，故今亦合而陳之。」盛氏云：「至是言「會諸其幣」者，以其初授幣與授玉異，日，未嘗會也。必會之者，見其用之之法也。《鄉射》則薦諸其席，亦訓於《廣雅·釋言》文。云「古文曰「陳幣北首」者，古文「皮」作「幣」，鄭不從者，下云「北首」，皮可言首，幣不得言首也。馬則

幕南，北面，奠幣于其前。前，當前幕上。【疏】正義曰：《校勘記》云：「上，楊作「南」。○案：經云「其前」，謂馬前。馬在幕南北面，故其前當前幕上也。幕設之有前後，若作「南」，則奠幣在幕外矣。楊本非。自「陳皮北首」至此，與授幣時陳之之法略同，唯有璧爲異耳。展夫人之聘享，亦如之。賈人告于上介，上介告于賓。展夫人聘享，上介不視，貶於君也。賈人既拭璋琮，南面告於上介，上介於是乃東面以告賓，亦所謂「放而文」之類。【疏】正義曰：注以「賈人告於上介」二句專指展夫人之聘享言之，故云「上介不視，貶於君也」。敖氏謂：「告者，告之以展聘享之幣玉已畢。」則兼君與夫人之聘享而

言。故後人多駁上介不視之說，謂經明言「亦如之」，何獨不視乎？褚氏云：「如之」者，如上圭則拭之展之，璧則拭展而會幣加於左皮也，不兼上介視之在內。蓋君之聘享，上介視之，夫人聘享，上介不視，俟賈人告而轉告于賓，羣幣則有司自展而直告于賓，差降之義也。若上介既視，賈人何必再告之？宜遵注。告則必易其所立之向，注義亦長。今案：褚說是也。賈人、上介本皆北面，告上介則賈人轉而南面，告賓則上介轉而東面，以賓西面故也。「放而文」，《禮器》文。有司展羣幣，以告。羣幣，私

覲及大夫者。有司，載幣者，自展自告。【疏】正義曰：注

云「羣幣，私覲及大夫」者，敖氏云：「注云『及』者，即記所

謂「幣之所及者」也。」此說是，蓋兼問卿、面卿、問大夫、面大夫之幣皆包之矣。云「有司，載幣者，自展自告」者，此有

司即前「官載其幣，舍于朝」者也。「自展自告」，謂有司自展之并自告賓也。○賈疏謂私覲私面之幣，皆賓介自將已

物，非公家所給。其說非。方氏苞云：「賓與上介私齎幣馬，義雖未安，力或能具，士介何從具此？」《周官·校

人》：「凡國之使者，共其幣馬。」鄭注明云使者所用私覲，

賈乃謂天子禮與諸侯異，以曲護己說，誤矣。」江氏永云：

「私覲亦公家之幣，但對享禮為私耳。」惠氏棟、吳氏廷華、

張氏惠言皆辨之。及郊，又展，如初。郊，遠郊也。

周制，天子畿內千里，遠郊百里。以此差之，遠郊，上公五

十里，侯四十里，^①伯三十里，子二十里，^②男十里也。近

郊各半之。【疏】正義曰：《詩·魯頌》孔疏及《爾雅·釋

地》邢疏引此注，「侯」下皆有「四十里」三字，「子」下皆有

「二十里」三字，各本脫，今據補。《校勘記》云：「男十里」

下，《集釋》無「也」字。」○「及郊，又展」，亦是因舍展之。

「如初」，如入竟展幣之儀也。注云「郊，遠郊也」者，以下

云「賓至于近郊」，知此及郊為遠郊也。云「周制，天子畿內

千里」者，《周禮·大司馬職》曰「方千里曰國畿」是也。云

「遠郊百里」者，《載師》注引《司馬法》：「王國百里為郊」。

杜子春云：「五十里為近郊，百里為遠郊。」《白虎通》同。

云「以此差之，遠郊，上公五十里，侯四十里，伯三十里，子

二十里，男十里也」者，《大司徒職》曰：「凡建邦國，諸公之

地封疆方五百里，諸侯方四百里，諸伯方三百里，諸子方二

百里，諸男方百里。」夫天子畿內千里，而遠郊百里，則上公

封五百里，遠郊五十里；侯四百里，遠郊四十里；伯三百

①「四十里」，原無，據下疏文補。

②「二十里」，原無，據下疏文補。

里，遠郊三十里；子二百里，遠郊二十里；男百里，遠郊十里。是其差也。若如譌本注文，謂侯、伯三十里，子、男十里，則是合侯與伯、子與男爲一，非所謂差矣。且郊之里數，原視地廣狹爲制，豈有侯與伯、子與男封疆廣狹各殊，而郊制必合爲一之理哉？賈疏申鄭義云：「畿方千里，王城居中，面五百里，以百里爲遠郊。若公五百里，中置國城，面二百五十里，故遠郊五十里。自此以下，至子、男差之可知。」不言侯與伯同、子與男同，是賈所見本尚未譌脫也。又李氏如圭《儀禮集釋》云：「各以其國封疆十之一差去國之數爲遠郊也。《周禮》諸公封疆方五百里，諸侯方四百里，伯三百里，子二百里，男百里。」據此亦是申明鄭注遠郊上公五十里、侯四十里、伯三十里、子二十里、男十里之說，知李作《集釋》時此注亦尚未譌脫，與孔、邢二疏所引合也。《爾雅》：「邑外謂之郊，郊外謂之牧，牧外謂之野，野外謂之林，林外謂之坰。」郭注：「邑，國都也。假令百里之國，五十里之界，界各十里也。」《詩疏》引孫炎曰：「設百里之國，五者之界，界各十里。」與郭義同。據此則二百里之國，五者之界各二十里；四百里之國，五者之界各四十里可知。近邵氏晉涵作《爾雅正義》，不能援《詩疏》以校正鄭注，而反削去邢疏之文，據《儀禮》譌脫之注牽合附會，失

之。或曰：《尚書大傳》分郊制爲三等，非歟？曰：《書傳》云：「百里之國，二十里之郊。七十里之國，九里之郊。五十里之國，三里之郊。」此夏、殷制，非周制也，亦不得爲五十里、三十里、十里矣。云「近郊各半之」者，鄭注《尚書·君陳》序云：「周之近郊五十里，今河南、洛陽相去則然。」是天子近郊半遠郊五十里，則上公近郊二十五里，侯二十里，伯十五里，子十里，男五里也。及館，展幣于賈人之館，如初。館，舍也。遠郊之內有候館，可以小休止沐浴。展幣不於賓館者，爲主國之人有勞問己者就焉，便疾也。【疏】正義曰：注「賓館」，《校勘記》云：「賓，監本作『官』，誤。」○敖氏云：「幣亦兼玉而言。自入竟至此凡三展者，以聘事將至而愈慎，且一與主國卿大夫爲禮，則不暇及之矣。」方氏苞云：「人竟而展，及郊再展，及館三展，雖載以任輦，尚虞頓撼，又皮帛則燥溼不時，宜頻展也。」①注云「館，舍也。遠郊之內有候館，可以小休止沐浴」者，案：《遺人職》曰：「凡國野之道，十里有廬。三十里有宿，宿有路室。五十里有市，市有候館。」鄭以賓尚未

①「頻展」，《儀禮析疑》作「風日」。

至近郊，則此館非國中之館，故以遣人候館解之。候館五十里，即有，則遠郊內自有之矣。言「可以小休止沐浴」，則可於此展幣也。云「展幣不於賓館者，為主國之人有勞問己者就焉，便疾也」者，吳氏廷華云：「環人、訝士皆當見賓于館。又或主君加禮，有遠郊之勞，竝須受于館，故就賈人之館展之，便疾也。且見賓從不一館矣。」○蔡氏云：「館，國中舍也。即後卿所致者，此以展幣而連及之。」盛氏云：「展幣皆於館舍，非如習儀之於壇壇也。此云「及館」者，謂卿致館之館，前聘一日也。次于此者，因上事而終言之。」今案：經內言「館」，似俱指國中之館言。蔡、盛說亦可存，故竝錄之。

右人竟展幣

賓至于近郊，張廬。君使下大夫請行，反。君使卿朝服，用束帛勞。請行，問所之也。

雖知之，謙不必也。士請事，大夫請行，卿勞，彌尊賓也。其服皆朝服。【疏】正義曰：自此至「遂以賓人」，言賓至近郊，君與夫人使人勞賓之事。○「賓至近郊，張廬」，蓋漸近國都，故張之以自表也。敖氏云：「此後不見斂廬之節，至

館爲之可知。」勞，謂勞其道路勞苦。使卿，亦以其爵也，主君于朝君則親郊勞。注云「請行，問所之也。雖知之，謙不必也」者，上使士請事，特知其爲聘事而來，猶不敢必行聘於本國，故又使大夫請之，謙之至也。至下大夫反告，乃執主人之禮勞之，禮之節次如此。敖氏謂「請行」爲速之行，褚氏云：「尚未勞賓，如何先以請行速之？依注「問所之」之說爲得。」盛氏亦以敖說爲非。吳氏廷華云：「知其來聘矣，又請行者，或兼聘他國，須先往也。」云「其服皆朝服」者，謂士請事、大夫請行皆服朝服，經時于此見之，^①舉後以該前也。○《禮經釋例》云：「凡賓至，則使人郊勞。」

案：《聘禮》賓至于近郊，「君使卿朝服，用束帛勞，賓受于舍門內」。此使者勞賓也。又云：「乘皮設，賓用束錦，賓勞者，勞者再拜稽首受。」此聘賓僨使者也。又：「夫人使下大夫勞以二簋方，其實棗蒸、栗，擇，賓之受，如初禮。僨之如初。」此聘禮之郊勞也。君用束帛，夫人用棗栗。《覲禮》：侯氏至于郊，王使人皮弁用璧勞，侯氏亦皮弁迎于帷門之外，使者不讓先升，侯氏升聽命，降，再拜稽首。此王使人勞侯氏也。又云：侯氏乃止使者，侯氏先升，授几，用

①「時」，疑當作「特」。

束帛乘馬饋使者，使者再拜受。此侯氏饋使者也。此則覲禮之郊勞也用璧，至于聘禮郊勞用朝服，覲禮郊勞用皮弁，聘賓饋勞者用束錦乘皮，侯氏饋勞者用束帛乘馬，皆隆殺之義也。亦有不郊勞者，「聘遭喪，不郊勞」，注：「子未君也。」「小聘曰問，不郊勞」，注：「貶於聘，所以爲小也。」皆禮之殺也。又《聘禮》郊勞畢，「下大夫勞者遂以賓入」，謂入朝也。《覲禮》郊勞畢，「侯氏遂從之」，注：「從之者，遂隨使者以至朝。」其儀竝同。「上介出請，入告。賓禮辭，迎于舍門之外，再拜。」出請，出門西面，請所以來事也。入告，入北面告賓也。每所及至，皆有舍。其有來者與，皆出請入告，于此言之者，賓彌尊，事彌錄。【疏】正義曰：注「者與」，今注疏本作「與」。《校勘記》云：「徐本、《集釋》、楊氏俱無「與」字，與疏合。嚴本「與」作「者」。張氏曰：「注曰其有來者者，巾箱、杭本同監本，無一者字。案：《釋文》云：者與音餘。蓋傳寫者誤以與字作者爾。監本以其重複，遂去其一，尤非也。從《釋文》。」朱子曰：「此非疑詞，不當音餘。複出者字，亦無義理，竊疑本介字也。」今案：褚氏云：「與」字連上讀，乃起下之辭，非誤。」今仍之。注云「出請，出門西面，請所以來事也」者，謂問卿所以來之事也。云「入告，入北面告賓也」者，賓在

舍，有主道，故出門西面者，出闌東也。「入北面告」者，賓當在阼階西面也。敖氏云：「賓禮辭者，以其用幣也。上介以賓辭告勞者，復傳言而入，賓乃出迎。」云「每所及至，皆有舍，其有來者與，皆出請入告」者，此舍即廬、宿、市之類，塗中所以止客者，故所至皆有。其有事來舍者，無不出請入告，即上士請事、大夫請行是也。云「于此言之者，賓彌尊，事彌錄」者，謂前此不言出請入告，獨于此言之者，賓來益近則益尊寵之，其儀文之記錄亦益詳也。李氏云：「《春秋傳》：『魯叔弓聘于晉，晉侯使郊勞，辭曰：寡君使弓來繼舊好，固曰女無敢爲賓，敢辱郊使？致館，辭曰：敢辱大館？』」王氏士讓云：「此禮至春秋時猶可見也。」勞者不荅拜。凡爲人使，不當其禮。【疏】正義曰：勞者，即卿也。餘詳《士昏禮》「納采，主人迎于門外，再拜，賓不荅拜」下。賓揖，先入，受于舍門內。不受於堂，此主於侯伯之臣也。公之臣，受勞於堂。【疏】正義曰：「賓揖，先入」，導之也。敖氏云：「惟云「舍門」，是舍但有一門耳，此公館之異者也。」注云「不受於堂，此主於侯伯之臣也」者，此篇主侯伯之臣言，詳篇首《目錄》下。

云「公之臣，受勞於堂」^①者，李氏云：「案：《司儀職》：『諸公之臣相爲國客。大夫郊勞，旅擯，三辭，拜辱，三讓，登，聽命，下拜，登受。』僎使者如初之儀。及退，拜送。」言「登，聽命」，則公之臣受勞於堂也。」吳氏《疑義》云：「據《司儀》云：『凡侯伯子男之臣，以其國之爵相爲客而相禮，其儀亦如之。』則所謂『登，聽命』者，不止公之臣可知。」今案：鄭云「不受於堂」，蓋以此篇受於舍門內，不言升堂決之。其注《司儀》亦云：「侯伯之臣，受勞於庭。」彼疏云：「聘禮受於舍門內，是不登堂也。」方氏苞云：「受勞不升堂，當以此經爲正。」勞者奉幣入，東面致命。東面，鄉賓。

【疏】正義曰：此在舍，勞者有賓道，故人門左而東面也。「致命」，致其君命。注云「東面，鄉賓」者，以斯時實在舍門內西面也。賓北面聽命，還，少退，再拜稽首，受幣，勞者出。北面聽命，若君南面然。少退，象降拜。【疏】正義曰：注云「北面聽命，若君南面然」者，以命是主君之命，故北面聽命，儼若君在然。秦氏蕙田云：「賓初入門西面，以在館如主人也。及聽命，乃北面，從臣禮也。敖氏云『入門即北面』，非。」云「少退，象降拜」者，以受幣當降階拜，今不升堂，故少退而後再拜稽首以象之。

授老幣。老，賓之臣。【疏】正義曰：此老，賓之家臣也，詳《士昏禮》。出迎勞者。欲僎之。【疏】正義曰：注末，《集釋》有「也」字。○敖氏云：「勞者出俟于門外，上介出請。勞者告事畢，上介入告，賓乃出迎，而告以欲僎之之辭。」吳氏廷華云：「出迎僎之。受命後不即僎者，不以臣事干君命。」勞者禮辭。賓揖，先入，勞者從之。乘皮設。設於門內也。物四曰乘。皮，麋鹿皮也。

【疏】正義曰：注云「設於門內也」者，乘皮之設爲庭實，則當在庭。乃設之於門內者，以僎勞者在庭故也。王氏士讓云：「賓設乘皮，而僎則用束錦者，將其貴者也。」云「皮，麋鹿皮也」者，賈疏云：「《郊特牲》云：『虎豹之皮，示服猛也。』彼諸侯朝享天子，用虎豹皮，此臣聘君，降於享天子，當用麋鹿皮。故《齊語》云：『齊桓公使諸侯輕其幣，用鹿皮四張也。』」^②賓用束錦僎勞者。言僎者，賓在公館如家之義，亦以來者爲賓。【疏】正義曰：敖氏云：「《聘禮》凡大夫士所用之幣皆以錦，蓋不敢與尊者之幣同。」《禮

① 「勞」，原作「命」，今據上文注改。
② 「張」，原作「分」，據《儀禮注疏》改。

經釋例云：「凡賓主人行禮畢，主人待賓用禮則謂之禮，不用禮則謂之饋。」詳《士昏禮》納采、問名禮畢「擯者出請醴賓」下。今案：此郊勞後行饋禮，以勞者爲賓，賓爲主人，故注云「言饋者，賓在公館如家之義，亦以來者爲賓。」勞者再拜稽首受。稽首，尊國賓也。【疏】正義曰：

注云「稽首，尊國賓也」者，賈疏云：「《周禮》大祝九拜：一曰稽首，首至地，臣拜君法；二曰頓首，頭叩地，平敵相拜法。今此勞者與賓同類，不頓首而稽首，故云「尊國賓也」。《禮經釋例》云：「凡臣與君行禮，皆再拜稽首。」亦有非君臣而再拜稽首者，如《聘禮》聘賓饋郊勞及歸饗餼，使者受幣、送幣，皆再拜稽首。主國之卿餼賓，賓再拜稽首受。《公食大夫禮》大夫相食，受侑幣，再拜稽首，主人送幣亦然。此皆相敵者之禮也，皆尊之，故盛其威儀，又不可以常禮論也。」惠氏棟云：「賓用束錦饋勞者」，此饋幣乃彼國君之幣，故受者送者皆稽首。」方氏苞、王氏士讓說略同。今案：如惠說非不可通，但其中亦有非君物而再拜稽首者，故鄭以「尊國賓」解之，而《釋例》亦即宗之爲說也。賓再拜稽首，送幣。受、送，拜皆北面，象階上。【疏】正義曰：賓亦稽首送者，報之也。注云「受、送，拜皆北面，象階上」者，李氏云：「若鄉飲酒，賓受爵，主人送

爵，各拜于其階上北面也。」敖氏云：「案：注云「受、送，拜」者，謂受者、送者之拜也。『象階上』者，謂放饋于堂之禮也。」今案：此饋禮雖行之於庭，而賓主皆北面拜，有似於堂上，主在阼階上北面拜，賓在西階上北面拜，故云「象階上」。李、敖之說得之。賈疏以「受」爲誤，謂「當云「授、送，拜皆北面」，竝據賓而言」。褚氏云：「注「受送」一讀，『拜皆北面』爲句，言受者送者之拜皆北面也。賈將受、送、拜專貼賓說，作三節看，誤矣。」盛氏世佐、張氏惠言竝同褚說，是也。勞者揖皮出，乃退。賓送再拜。揖皮

出，東面揖執皮者而出。【疏】正義曰：李氏云：「揖執皮者，若親受之然。勞者出，執皮者從之出，勞者之從者訝受之。注知東面揖者，以執皮者在東，勞者在西故也。」敖氏據《公食大夫禮》「賓北面揖，執庭實以出」，謂此亦北面揖之。褚氏云：「《公食禮》是對君之禮，庭實爲君禮物，故北面。此勞者不必北面也，從注東面爲是。」盛氏世佐說同。○以上君使人勞賓之禮。夫人使下大夫勞以二竹簠方，玄被纁裏，有蓋。竹簠方者，器名也。以竹

① 「皆」下，《禮經釋例》有「堂下」二字。

爲之，狀如簋而方，如今寒具筥。筥者圜，此方耳。【疏】正義曰：「簋」，《校勘記》云：「唐石經、嚴、徐、聶氏、《集釋》、敖氏俱作「簋」，注同。《釋文》作「簋」，云「本或作簋」。外圓內方曰簋，內圓外方曰簋。《通解》、楊氏載經注，《要義》載經俱作「簋」。張氏曰：「《釋文》明著內外方圓之制，蓋辨或本之誤也，從《釋文》。」案：《冬官·玉人》注、疏及《覲禮》疏引此經立作「簋」。《地官·舍人》注云：「方曰簋，圓曰簋。」疏謂皆據外而言，審此則《釋文》之誤顯然。張氏從之，非也。《說文》曰：「簋，黍稷方器也。簋，黍稷圜器也。」此許君之義與鄭不同。」程氏瑤田《儀禮經注疑直》云：「陸作《釋文》時，蓋據一本作「簋」者釋之，故云「簋音甫，或作簋」也。然據鄭注本作「簋」，又鄭注《玉人》引《聘禮》作「二竹簋方」，是「簋」字非「簋」字也。況唐石經作「簋」，嘉靖本乃從宋元豐本覆刻之，亦作「簋」，則此字斷宜從唐石經及宋槧本，不必因陸氏偶據別本而致疑也。」戴氏震校《集釋》亦云：「據鄭注當以作「簋」爲正。」段氏玉裁《儀禮漢讀考》云：「賈疏曰：「凡簋皆用木而圓，受斗二升。」「用木而圓」，本鄭《周易》注。」「受斗二升」，依《旅人》「簋實一穀」之云。是賈本作「簋」也。宋刻單疏本作「簋」字四見，不作「簋」，今本皆改爲「簋」，則「受斗二升」之云不

可通矣。」又段氏注《說文》簋字云：「許謂簋方簋圓，鄭則云簋圓簋方，不同者師傳各異也。《周禮·舍人》鄭注：「方曰簋，圓曰簋。」「《周易》：「二簋可用享。」「鄭注：「離爲日，日體圓；巽爲木，木器圓，簋象。」「已上可證鄭確謂簋爲圓器。」今案：簋圓而竹簋不圓，故云「方」。若簋本方，則經不必贅言「方」矣。又鄭義既以簋爲圓器，倘經本作「簋」，鄭必破簋爲簋。今鄭不破字，可證舊本相傳作「簋」，後人因《說文》簋方簋圓之訓，誤改爲「簋」耳。此字當從鄭義爲長。鍾本亦作「簋」。○李氏云：「大夫對卿爲下大夫，夫人使下大夫勞賓，降於君也。被，表也。玄被纁裏，竹簋方之衣也。」「《禮經釋例》云：「《士昏·記》：「筭，緇被纁裏。」「此玄被纁裏，蓋夫人與士婦之差矣。」敖氏云：「夫人亦勞之者，^①以其亦奉命而聘享己也。」今案：《考工記·玉人》曰：「案：十有二寸，棗栗十有二列，諸侯純九，大夫純五，夫人以勞諸侯。」鄭注引此經爲證。彼疏云：「玄被者，以玄緇爲表被。《聘禮》諸侯夫人無案，直有棗栗。此后勞有棗栗，又有案，棗栗亦盛於竹簋也。」注云「以竹爲之，狀如簋而方者，簋本以木爲之，又有以瓦爲之者，

①「亦」，《儀禮集說》作「使」。

其形皆圓。此以竹爲之而方，故云「狀如簋而方」也。筥，亦以竹爲之，故云「如今寒具筥」。漢時筥以盛寒具，與竹簋盛棗栗用亦相同。寒具見《周禮·籩人》注。《御覽》引《通俗文》曰：「寒具謂之餠。」汪士鐸云：「寒具蓋餅屬。」《後漢·第五倫傳》注引華嶠書：「人有遺母一筥餅者。」筥，筥屬也。云「筥者圓，此方耳」者，《詩》「維筐及筥」，《毛傳》「圓曰筥」是也。其實棗蒸、栗擇，兼執之以進。兼，猶兩也。右手執棗，左手執栗。【疏】正義曰：

《校勘記》云：「蒸，敖作『烝』。」○其實，謂實於竹簋方也。棗蒸，栗擇，詳《特性·記》。注云「兼，猶兩也」者，案：

《士冠禮》「兼執之」，注云：「兼，并也。」彼謂一手兼執之，此則兩手兼執之，故云「兼，猶兩也」。云「右手執棗，左手執栗」者，敖氏據《士虞禮》謂左手執棗，右手執栗，與鄭互異。褚氏云：「授受之法，左右各執一物者，先將右手之物授人，受者以兩手受，旋亦以右手執之。授者乃以兩手授左手所執者，受者以左手受之。先所受、後所授，必兩手者，所謂『受授不游手』也。經云「二手授栗」，則是右手先授棗，然後二手授栗，注極明，①敖氏故生異說。《士虞禮》：「主婦自取兩籩棗栗，設于會南，棗在西。」何妨右手執者設于西，左手執者設于東邪？未可據以難注。」今

案：褚說是也。賓受棗，大夫二手授栗。受授不游手，慎之也。【疏】正義曰：受謂賓受，授謂大夫授。「不游手」，謂不空一手，是慎之也，義并詳上。賓之受，如初禮。如卿勞之儀。儻之如初。下大夫勞者遂以賓人。出以束錦授從者，因東面釋辭，請道之以人，然則賓送不拜。【疏】正義曰：注「請道」，毛本作「導」，《校勘記》云：「嚴、徐、《通解》、楊氏、敖氏俱作『道』。」○「儻之如初」，謂如儻卿之儀也。敖氏云：「君使以束帛，夫人使以棗栗，賓儻之皆以束錦乘皮者，亦輕財重禮之意也。」人，人國門也。注云「出以束錦授從者，因東面釋辭，請道之以人」者，上「君使士請事，遂以入竟」，注云「遂以入，因道之」，明此云「遂以賓人」，亦道之以人也。請道當有辭，故知以束錦授從者，因東面釋辭也。云「然則賓送不拜」者，此注似可疑，上儻卿勞者出，明云「賓送再拜」，則此送之亦拜可知。經不言者，蓋已統於如初中矣。賈疏舉《公食禮》使大夫戒，賓不拜送，遂從之爲例。不知彼無儻

①「注」下，段校補「疏」字。

禮，與此異。《覲禮》侯氏僕使者，送于門外，再拜，遂從之。此當與彼同。賈因注言不拜，遂分別尊卑，則歧而又歧耳。

○以上夫人使人勞賓之禮。

右 郊 勞

至于朝，主人曰：「不腆先君之祧，既拊以俟矣。」賓至外門，下大夫入告，出釋此辭。主人者，公也。不言公而言主人，主人，接賓之辭。明至欲受之，不敢稽賓也。腆，猶善也。遷主所在曰祧。《周禮》天子七廟，文、武為祧，諸侯五廟，則祧始祖也，是亦廟也。言祧者，祧尊而廟親，待賓客者上尊者。【疏】正義曰：自此至「衆介皆少牢」，言賓初至不即行禮，主人致館設飧之事。○「至于朝」，此外朝也。外朝在庫門外，故李氏云：「朝，大門外之朝也。」但李以大門為皋門，則沿賈之誤，辨見前。注云「賓至外門」，亦謂庫門也。諸侯三門，庫門在外，故曰外門。王氏士讓云：「賓未相見，不先即館，而必至于朝者，明奉君命而告至也。」云「先君之祧」者，莊四年《公羊傳》云：「古者諸侯必有會聚之事，相朝聘之道，號辭必稱先君以相接。」又隱七年《公羊傳》何注云：「禮，聘受之于

大廟。孝子謙，不敢以己當之，歸美于先君，且重賓也。」是其稱先君之義。拊，《釋文》云「灑埽也」，《少儀》「埽席前曰拊」，《說文》作「叁」，云「埽除也」，「拊」是假借字。案：析言之，則「拊」是埽席前之名，渾言之，則凡埽皆可云「拊」也。此經云「拊」，蓋謂廣埽廟之内外，不止席前也。注

云「賓至外門，下大夫入告，出釋此辭」者，此下大夫即上以賓入者，既告于君，乃出釋此辭也。云「主人者，公也。不言公而言主人，主人，接賓之辭」者，案：下行聘享時皆稱「公」，此變公言「主人」，是接賓之辭也。云「明至欲受之，不敢稽賓也」者，以經言「既拊以俟」，明是至即欲受之，不敢稽延也。云「遷主所在曰祧。《周禮》天子七廟，文武為祧，諸侯五廟，則祧始祖也」者，《周禮》序官·守祧：「奄八人。」鄭注：「遠廟曰祧。周為文王、武王廟，遷主藏焉。」又《守祧職》曰：「掌守先王先公之廟祧。」鄭注：「遷主所藏曰祧。先公之遷主藏于后稷之廟，先王之遷主藏于文武之廟。」又《祭法》注：「祧之言趙也，超上去意也。天子遷廟之主，以昭穆合藏于二祧之中。諸侯無祧，藏于祖考之廟中。《聘禮》曰「不腆先君之祧」，是謂始祖廟也。」此鄭言祧之義。但據《守祧》注，似有三祧，以后稷廟稱大廟，故止二祧也。若孔君、王肅則以高祖之父及高祖之祖為二祧，

又謂文、武受命之王，其廟不遷，不在七廟數內，皆與鄭異。《王制》疏及《守桃》疏已駁之。鄭謂《周禮》天子七廟，諸侯五廟者，《王制》曰：「天子七廟，三昭三穆，與大祖之廟而七。」鄭注：「此周制也。七者，大祖及文王、武王之桃與親廟四，大祖后稷。殷則六廟，契及湯與二昭二穆。夏則五廟，無大祖，禹與二昭二穆而已。」又曰：「諸侯五廟，二昭二穆，與大祖之廟而五。」鄭注：「大祖，始封之君。」《祭法》曰：「王立七廟，曰考廟，曰王考廟，曰皇考廟，曰顯考廟，曰祖考廟，皆月祭之。遠廟爲桃，有二桃，享嘗乃止。」又曰：「諸侯立五廟，曰考廟，曰王考廟，曰皇考廟，皆月祭之。顯考廟、祖考廟，享嘗乃止。」《曾子問》、《禮器》皆言七廟，五廟，《穀梁傳》曰：「天子七廟，諸侯五廟。」此皆鄭所本也。《荀子》曰：「有天下者事七世，有一國者事五世，有五乘之地者事三世，有三乘之地者事二世，持手而食者不得立宗廟，所以表積厚者流澤廣，積薄者流澤狹也。」陳氏《禮書》云：「《家語》曰：『天子七廟，諸侯五廟，自虞至周之所不變也。』是故《虞書》『禋于六宗』，以見大祖；《周官》『守桃八人，以兼姜嫄之宮，則虞、周七廟可知矣。』又云：『公、侯、伯、子、男其衣服、宮室、車旗等衰雖殊，其立五廟一也。附庸之封，雖不能五十里，亦國君爾，故亦五廟。《春

秋》書：『紀季以鄆入于齊。』《公羊傳》曰：「紀季請復五廟以存姑姊妹。」則附庸之廟與諸侯同可知也。」今案：陳氏又引《商書》偽古文七世之廟及王肅等說以駁鄭注，今不錄，其論五廟則較孔、賈爲詳。云「是亦廟也。言桃者，桃尊而廟親，待賓客者，上尊者」，案：桃亦與廟同。今接聘賓不于廟而于桃者，以桃是始祖之廟，比之三昭三穆爲尊，接賓客宜于尊者，故云桃也。魏氏了翁云：「桃即廟也。昭元年『其敢愛豐氏之桃』，豐氏大夫，又僅兩世，未有遠祖也。」今案：廟與桃，對文異，散亦通。此經云「先君之桃」，明指始祖廟言之，則鄭說未可易矣。賓曰：「俟閒。」賓之意不欲奄卒主人也。且以道路悠遠，欲沐浴齊戒，俟閒，未敢聞命。【疏】正義曰：注「齊戒」，毛本作「齋戒」。《校勘記》云：「《釋文》作『齊』，云『本亦作齋』。嚴、徐、《集釋》亦俱作『齊』，《通解》、楊氏俱作『齋』。案：《通解》曰：『齋，側皆反。』蓋本『齊』字，故特音之。若作『齋』，則不必音矣。」○「賓曰」，對辭也。敖氏云：「閒，暇也。」注云「賓之意不欲奄卒主人也」者，此注有二義：不欲奄卒主人，一義也；以道路悠遠欲沐浴齊戒，又一義也，故云「且」。奄，《方言》云「遽也」。卒，亦促遽之意，見《漢書注》。言不欲以恩遽迫主人，故荅以「俟閒」，且可容沐浴齊

戒也。云「俟閒，未敢聞命」者，言未敢遵命而即行大禮也，命謂「既拚以俟」之命。蔡氏云：「主人不敢稽賓，故曰「拚以俟」。賓不欲奄卒主人，故曰「俟閒」，謂俟主人暇時，婉詞也。」大夫帥至于館，卿致館。致，至也。賓至此館，主人以上卿禮致之，所以安之也。【疏】正義曰：敖氏云：「大夫」，即歸者以賓人者也。「帥」亦謂道賓，賓至于館則入矣。「致館」，謂以君命致此館於賓也。」郝氏敬云：「致館必以卿，重其禮也。」今案：《國語》云：「司里授館。」韋注：「司里授客所當館，次於卿也。」然則司里授之，而卿以君命致之歟？注云「賓至此館，主人以上卿禮致之，所以安之也」者，言大夫道賓至館後，君復使卿致之。以賓初至，故重其禮以安之也。張氏爾岐云：「以上卿禮致之」，謂使上卿以束帛之禮致之也。《周禮·司儀職》云：「諸公之臣相爲國客，致館，如初之儀。」鄭注云：「如郊勞也，不饋耳。」郊勞用束帛，則此致館亦用束帛可知也。」吳氏廷華云：「據《司儀》云「郊勞有饋，致館如初儀」，則亦有饋矣。」今案：鄭言「不饋」者，亦據此經決之。以下文卿致命，即云「卿退，賓送再拜」，不言饋之，是無饋也。賓迎，再拜。卿致命，賓再拜稽首。卿退，賓送再

拜。卿不俟設飧之畢，以不用束帛致故也。不用束帛致之者，明爲新至，非大禮也。【疏】正義曰：朱子云：「此「致」止謂致館耳。章首目其事而下詳其節也。上無「飧」字，而但云「致命」，注疏何以見爲致飧也？詳又見下章。」今案：朱子說是也。上云「卿致館」，是目其事；此云「賓迎再拜」至「賓送再拜」，乃是詳言致館之儀節也。「卿致命」者，敖氏云：「致其君致館之命也。」不兼飧說爲是。必稽首者，如對主君也。注云「卿不俟設飧之畢，以不用束帛致故也」者，致館使卿，設飧使宰夫，二者不妨並行。注云「不俟設飧之畢」，此釋經「退」字，謂卿致命即退耳。言「不用束帛致」者，因致館用束帛，故兼束帛言之，其實直謂不致耳，非不用束帛而空以辭致飧之謂也。《司儀》：「諸公之臣相爲國客，致館，如初之儀。」彼注云：「不言致飧者，君子聘大夫不致飧也。」又引此記「飧不致，賓不拜」爲證。據此，則鄭意固直云不致明矣。賈彼疏云：「《聘禮》「致館」之下即云「宰夫設飧」，此「致館」下不云致飧，故云「君子聘大夫不致飧」。如是五等之臣皆無致飧也，其義甚明，何於此乃生出不用束帛空以辭致之臆說邪？云「不用束帛致之者，明爲新至，非大禮也」者，對下致饗饌爲大禮言之。此飧爲新至而設，非大禮，故不致也。胡鎬《三禮補

義》曰：「案：注初無兼致飧之語，言兼致者，賈之誤耳。」王氏士讓云：「設飧乃宰夫設之，則非兼致可知。」吳氏廷華云：「卿不俟設飧者，非其職也。」數說皆是。又敖氏謂致館不以幣，而在門外，非。《司儀》注云：「侯伯之臣致館於庭」，則在門內矣。致館有束帛，亦非無幣也。○《禮經釋例》云：「凡郊勞畢，皆致館。案：《聘禮》郊勞畢：「下大夫勞者遂以賓入。」又云：「大夫帥至于館，卿致館，賓迎，再拜，卿致命。」此《聘禮》致館也。《覲禮》郊勞畢：「侯氏遂從之。天子賜舍，辭曰：賜伯父舍。侯氏再拜稽首，賓之束帛乘馬。」此《覲禮》賜舍也。注：「賜舍，猶致館也。」是郊勞畢，皆致館也。又《聘禮》致館後云：「宰夫朝服設飧。」是致館後即設飧，《覲禮》賜舍後則無之。《聘禮》致館後聘賓不償使者，《覲禮》賜舍後侯氏則償之，蓋王朝之與侯國禮不同歟？今案：館，國中待客處也。考之禮，有公館，有私館。《曾子問》曰：「自卿大夫士之家曰私館，公館與公所爲曰公館。」鄭注：「公館，若今縣官舍也。」《雜記》曰：「公館者，公宮與公所爲也。私館者，自卿大夫之家也。」鄭注：「公所爲，君所作離宮別館也。」此篇所言館多是私館，下記曰：「卿館于大夫，大夫館于士，士館于工商。」是也。若《左傳》襄三十年「子產聘晉，使盡壞其館之

垣」，昭元年「楚公子圍聘鄭，館于外」，則當爲公館矣。宰夫朝服設飧。食不備禮曰飧。《詩》云「不素飧兮」，

《春秋傳》曰「方食魚飧」，皆謂是。【疏】正義曰：《周禮·

宰夫職》「掌賓賜之飧牽」，鄭注：「飧，客始至所致禮。」是

飧宰夫掌之，故使設之也。必朝服者，尊賓也。注云「食

不備禮曰飧」者，以所陳鼎止有腥飪而無饌，又饌設不多，

故云「不備禮」也。《司儀》注云：「小禮曰飧。」《掌客》注

云：「飧，客始至，致小禮也。」又下記注云：「草次饌，飧具

輕。」皆與此注相發明。云「《詩》云「不素飧兮」，《春秋傳》

曰「方食魚飧」，皆謂是」者，《詩·魏風·伐檀》文，《毛傳》

云：「熟食曰飧。」鄭彼箋則云：「讀如魚飧之飧。」是鄭以

素飧之義與魚飧一也。案：宣六年《公羊傳》：「晉靈公使

勇士往殺趙盾，勇士上其堂則無人焉，俯而闚其戶，方食魚

飧。勇士曰：「子爲晉國重卿而食魚飧，是子之儉也。」此

魚飧之事。案：勇士以食魚飧爲儉，是所食者唯魚，無多

物耳。《詩疏》引《鄭志》荅張逸云：「禮，飧饗大多非可素，

不得與「不素飧」相配，故易之也。」然則素飧、魚飧皆不備

物之謂，故云「皆謂是」也。或曰：飧，夕食也。此《周禮·

宰夫》注鄭司農之說，則後鄭已不從之矣。或據《毛傳》「熟

食曰飧」，謂此飧之設無生牲，且雖有腥而主於熟，賓即次

未舉火，以熟爲先，故云「飧」也。案：下注亦有「新至尚熟之說，義可兩存焉。」

三；腥一牢，在東，鼎七。中庭之饌也。飪，熟也。

熟在西，腥在東，象春秋也。鼎西九東七。凡其鼎實與其

陳，如陳饗餼。羞鼎則陪鼎也，以其實言之，則曰羞；以其

陳言之，則曰陪。【疏】正義曰：敖氏云：「牢，大牢也。大

牢者，牛、羊、豕各一也。飪鼎九，腥鼎七，乃皆云「牢」者，

主於牛、羊、豕也。」今案：《掌客職》曰：「饗餼死牢如飧之

陳。」案：下歸饗餼，賓飪一牢，腥二牢，此則飪一牢而腥止

一牢者，降於諸侯相朝也。飪正鼎九：牛、羊、豕、魚、腊、

腸胃、膚、鮮魚、鮮腊。羞鼎三：臠、臠、臠。腥鼎七者，無

鮮魚、鮮腊，餘與飪鼎同。注云「中庭之饌也」者，言此皆

饌於中庭，故云「中庭之饌」，對下堂上及門外言也。云

「飪，熟也。熟在西，腥在東，象春秋也」者，飪之言熟，象秋

物熟，故在西；腥之言生，象春物生，故在東。云「鼎西九

東七。凡其鼎實與其所陳，如陳饗餼」者，言其鼎中所實之

物與陳之次序，皆如歸饗餼也。所實之物即上牛羊豕魚腊

之類，餘詳下。云「羞鼎則陪鼎也，以其實言之，則曰羞；

以其陳言之，則曰陪」者，此經云「羞鼎」，而下歸饗餼云「陪

鼎」，恐人疑其有異故釋之，二者名異實同也，《左傳》曰「飧

有陪鼎」謂此。堂上之饌八，西夾六。八、六者，豆

數也。凡饌以豆爲本。堂上八豆、八簋、六鉶、兩簠、八壺。

西夾六豆、六簋、四鉶、兩簠、六壺。其實與其陳，亦如饗

餼。【疏】正義曰：「堂上」者，館之堂上也。此館在廟，云

「西夾六」。《公食大夫禮》亦在廟，云「大夫立于東夾南，宰

東夾北」。《顧命》在寢，云「西夾南嚮」，則廟寢之制，皆有

東夾西夾矣。下歸饗餼云：「西夾六豆，設于西墉下，北

上。」西夾之西有墉，則東夾之東亦有墉矣。又云：「六壺

西上，二以竝，東陳。」注：「東陳，在北墉下。」則夾之北有

墉矣。竊嘗考之，東夾在堂東序之東，西夾在堂西序之西。

東夾之北爲東房，西夾之北爲西房，中有墉隔之，與房不相

通。東夾、西夾，一名東箱、西箱，又名左个、右个，左達、右

達。左即東也，右即西也。夾也，箱也，个也，達也，異名而

同實。統言之爲東夾、西夾，分言之則夾之近北者爲室，近

南者爲堂，故有夾室與東堂、西堂之稱。夾之東西北三面

皆有牆，故得室名。但東夾之東，西夾之西，近北者有牆，

近南者無牆，故其東西近拈之處亦稱爲東堂下、西堂下，非

必東堂向東，西堂向西也。先儒或專以夾室爲達，或專以

東西堂爲箱，皆非是。萬氏斯大云：「東西序外之屋，分言

之則前堂後室，統言之皆夾也。所以名爲夾者，以夾輔乎

中堂也。《釋名》云：「夾室，在堂兩頭，故曰夾。」夾之在正堂東西，此定論也。楊氏《儀禮圖》乃圖夾室於東房之東，西房之西，與房室竝列，誤矣。近焦氏《羣經宮室圖》又圖東堂於東夾之東，西堂於西夾之西，以東堂爲東嚮，西堂爲西嚮，不知堂亦夾之堂也，烏可分夾與堂爲二哉？《顧命》曰「西夾南嚮」，言夾而室與堂可知，言西夾而東夾可知，烏有所謂東嚮、西嚮者哉？楊大堉云：「西夾南嚮」一語，證據千古不易。鄭注《特牲饋食禮》云：「西堂，西夾之前近南。東堂，東夾之前近南。」亦據南嚮定之也。又案：

《顧命》注疏解夾之誤，《鄉黨圖考》已辨之。餘詳《特牲饋食禮》。豆籩、鉶在東房南上，凡席、兩敦在西堂下。又下歸饗餼云：「饗于東方亦如之。」注云：「東方，東夾室。」此但云「西夾六」，則無東夾之饗，殺於饗餼也。吳氏廷華云：「在西夾者，廟中尊西也。」注云「八、六者，豆數也。」

凡饗以豆爲本者，李氏云：「凡饗皆先設豆，故舉豆數以見其餘也。」云「堂上八豆、八簋、六鉶、兩簋、八壺，西夾六豆、六簋、四鉶、兩簋、六壺」者，皆與饗餼同。鄭蓋以鼎同推而知之也，故又云「其實與其陳，亦如饗餼」。門外米、禾皆二十車。禾，稟實并刈者也。諸侯之禮，車米視生牢，禾視死牢，牢十車。大夫之禮，皆視死牢而已。雖有

生牢，不取數焉。米陳門東，禾陳門西。【疏】正義曰：「二十車」，毛本「二」誤作「一」。《校勘記》云：「唐石經『二十』

作『廿』。注『牢十車』，徐本無『牢』字，與疏不合，今俱從嚴本。」注云「禾，稟實并刈者也」者，「稟」謂禾稈，「實」謂

禾穀，「并刈」謂連稟與實而刈之，不去其穀也。《說文》：

「禾，嘉穀也。」段氏注云：「嘉穀之連稟者曰禾。」又於「稼」

字下注云：「全體爲禾，《聘禮》『禾三十車』是也，《禹貢》所

謂『總』也。」今案：禾以供飼馬之用，故致積、設殮、歸饗餼

皆有之，上注云「禾以秣馬」是也。云「諸侯之禮，車米視生

牢，禾視死牢，牢十車」者，《周禮·掌客》文。云「大夫之

禮，皆視死牢而已。雖有生牢，不取數焉」者，李氏云：

「《周禮》大夫之車，米禾無文。此殮禮死牢二，而米禾皆

二十車，饗餼生牢二，死牢三，而米禾皆三十車，知惟視死

牢，不取生牢之數。」云「米陳門東，禾陳門西」者，據下饗餼

言也。薪芻倍禾。各四十車。凡此之陳，亦如饗餼。

【疏】正義曰：《校勘記》云：「此之」，楊作「上所」。注

云「凡此之陳，亦如饗餼」者，謂薪從米，芻從禾也。郝氏敬

云：「供爨曰薪，飼馬曰芻。」今案：《說文》：「芻，刈草也，

象包束草之形。」又云：「藁，草薪也。」舊說多以芻爲養牛

馬之用，然上經「積唯芻禾」，鄭但云「禾以秣馬」，不兼芻

言。《詩》「詢于芻蕘」，《毛傳》云：「芻蕘，采薪者。」然則芻以飼牲，亦可供爨，當兼二用也。上介，飪一牢，在西，鼎七，羞鼎三；堂上之饌六；門外米禾皆十車，薪芻倍禾。西鼎七，無鮮魚、鮮腊。【疏】正

義曰：李氏云：「鼎七者，賓腥鼎之數。堂上之饌，亦與賓西夾同，西夾無饌。」盛氏云：「上介之牢，西鼎減二，無東鼎。堂上之饌亦減二，無西夾之饌。米禾薪芻皆半於賓。此其殺也。」衆介皆少牢。亦飪在西。鼎五，羊、豕、腸胃、魚、腊。新至尚熟，堂上之饌，四豆、四簋、兩鉶、四壺，無簠。【疏】正義曰：注云「亦飪在西，鼎五，羊、豕、腸胃、魚、腊」者，案：有羊豕而無牛，謂之少牢。此用少牢而五鼎，是又殺於上介也。李氏云：「承上文飪，知衆介亦飪也。《少牢饋食禮》五鼎，此少牢故亦五鼎。彼有膚無腸胃，此有腸胃無膚。」今案：彼是大夫自祭禮，此是人君待客禮，故同。《玉藻》朔月五俎之食，以示別也。云「新至尚熟」者，下歸饗餼士介但有饌而無飪，知此不用饌而用飪者，以飧是新至之禮，尚熟故也。云「堂上之饌，四豆、四簋、兩鉶、四壺，無簠」者，上介堂上之饌，本與賓西夾之饌同，此則又視賓西夾之數減之，降殺以兩也。褚氏云：「歸

饗餼盛禮，而士介無堂上之饌，此亦宜無，注所云俟訂。」韋氏協夢云：「經唯言『皆少牢』，是并無堂上之饌矣。無堂上之饌，下於上介也。」二說似亦可從。○盛氏云：「米禾薪芻，賓共百二十車，上介半之，衆介則無，通百八十車而已。蓋卿行旅從，非是則不足以供之也。郝氏謂用車三百六十乘，而以侈費詆經，妄矣。國之經費，賓祭最鉅，皆所以弭災而福民，有不可以儉嗇將之者，且遇凶荒札喪，則又有殺禮之義，見於《掌客》，制禮者豈漫無撙節於其間哉？」

右致館設飧

厥明，訝賓于館。此訝，下大夫也。以君命迎

賓謂之訝。訝，迎也。亦皮弁。【疏】正義曰：張氏爾岐云：「自此至『賓不顧』，皆主國廟中所行之禮。其爲公禮者有五：聘一，享一，聘夫人一，享夫人一，若有言者又一，於是主君禮賓。其爲私禮者有二：賓私覲一，介私覲一，公乃送賓出。又有問君問大夫之儀，此聘之正禮也，分爲四節。」今案：四節者，一聘享若有言，二主國禮賓，三私覲，四公送賓出，問君及大夫。○厥明，賓至館之明日也。注云「此訝，下大夫也」者，上帥至于館是下大夫，故

知此訝賓于館亦下大夫，非掌訝之官也。《周禮》掌訝，中士爲之，其職曰：「凡賓客，諸侯有卿訝，卿有大夫訝，大夫有士訝，士皆有訝。」鄭注：「此謂朝覲聘問之日，王所使迎賓于館之訝。」據云「卿有大夫訝」，此聘使卿，則訝爲下大夫明矣，餘詳下記「卿大夫訝，大夫士訝，士皆有訝」下。云「以君命迎賓謂之訝。訝，迎也」者，此訝是君使之，故云「以君命迎賓」也。訝與迓同，《爾雅·釋詁》：「迓，迎也。」又通作「御」，《詩》「以御于家邦」，《毛傳》：「御，迎也。」云「亦皮弁」者，下行聘時君與賓皆皮弁，故知此訝賓者亦皮弁也。賓皮弁聘，至于朝。賓入于次。服皮弁者，朝聘主相尊敬也。諸侯視朔皮弁服。入于次者，俟辨也。次在大門外之西，以帷爲之。【疏】正義曰：「辨」，毛本作「辦」，《校勘記》云：「張氏曰：『監、杭本作辨。』案：作辨是也，說見《士相見禮》。」○此朝亦外朝也。注云「服皮弁者，朝聘主相尊敬也」者，案：皮弁服，詳《士冠禮》。《周禮·司服》注云：「諸侯之自相朝聘，皆皮弁服。」蓋諸侯在國每日視朝與臣同服朝服，今相朝聘用皮弁服，加于朝服一等，是主相尊敬也。又諸侯覲天子服冕服，其朝天子及使臣聘天子亦皆皮弁服，見《通典》。云「諸侯視朔皮弁服」者，《玉藻》曰「諸侯皮弁以聽朔於大廟」是也。鄭言

此者，見皮弁服尊於朝服之義。云「入于次者，俟辨也」者，鄭注《士相見禮》及《特牲饋食禮》俱云「具，猶辨也」，則此「辨」與「具」義同，謂入次暫止，以待諸事備具也。云「次在大門外之西，以帷爲之」者，大門謂庫門，亦即外門也。此次爲賓而設，主東賓西，故知在西也。下記云：「宗人授次，次以帷。」《周禮·幕人》注：「在旁曰帷，在上曰幕。帷幕皆以布爲之，四合象宮室曰幄。」又《掌次職》有「大次、小次」，鄭注「次，謂幄也」，則次之制與帷異。此云「以帷爲之」者，蓋謂用帷布爲之也。乃陳幣。有司人於主國席門外，以布幕陳幣，如展幣焉。圭璋，賈人執櫝而俟。【疏】正義曰：案：下經行聘時，賓立接西塾，在席門外，而賈人啟櫝取圭授上介，上介授賓，則幣玉皆先設于此可知，故云「有司人於主國席門外，以布幕陳幣」也。又云「如展幣焉」者，謂其陳之之法亦如展幣時所陳也。云「圭璋，賈人執櫝而俟」者，圭璋重器不陳，故仍在櫝，執而俟者，俟事至乃出之也。卿爲上摯，大夫爲承摯，士爲紹摯。摯者出請事。摯，爲主國之君所使出接賓者也。紹，繼也，其位相承繼而出也。主君，公也，則摯者五人；侯伯也，則摯者四人；子男也，則摯者三人。《聘義》曰：「介紹

而傳命，君子於其所尊不敢質，敬之至也。」既知其所為來之事，復請之者，賓來當與主君為禮，為其謙不敢斥尊者，啟發以進之。於是時，賓出次，直闌西，北面。上擯在闌東闕外，西面。其相去也，公之使者七十步，侯伯之使者五十步，子男之使者三十步。此旅擯耳，不傳命。上介在賓西北，東面。承擯在上擯東南，西面，各自次序而下，末介、末擯，旁相去三丈六尺。上擯之請事，進南面，揖賓俱前，賓至末介，上擯至末擯，亦相去三丈六尺。止揖而請事，還入告于公。天子諸侯朝覲，乃命介紹傳命耳。其儀，各鄉本受命，反面傳而下，及末，則鄉受之，反面傳而上。又受命傳而下，亦如之。此三丈六尺者，門容二徹參个，旁加各一步也。今文無「擯」。【疏】正義曰：「擯謂」，毛本謂作「為」，《校勘記》云：「嚴、徐、《集釋》、《通解》俱作「謂」，與疏合。『亦相去三丈』，毛本「三」誤「二」。『則鄉受之』，毛本「鄉」作「卿」，嚴、徐、陳本、《集釋》及《禮記·聘義》疏引俱作「鄉」。又「反面傳而上」，毛本「而」誤「面」，嚴、徐、葛本、《集釋》、《通解》及《聘義》疏引俱作「而」。又「此三丈」，毛本「三」誤「二」，嚴、徐、《集釋》、《通解》、楊氏俱作「三」。○此三擯陳于主國大門外，與賓之介同陳，分為東西兩行也。敖氏云：「擯者，上擯也。」云「請事」，則為上擯可知，

故不必質言之，而但云「擯者」也。云「出請事」而不云人告，省文也，後多類此。」注云「擯，謂主國之君所使出接賓者也」者，案：鄭注《士冠禮》云：「在主人曰擯，在客曰介。」注《司儀》云：「出接賓曰擯，入贊禮曰相。」此注兼之以釋擯義，精矣。云「紹，繼也」者，《爾雅·釋詁》文。云「其位相承，繼而出也」者，是釋經名承擯、紹擯之義也。云「主君，公也，則擯者五人；侯伯也，則擯者四人；子男也，則擯者三人」者，案：《聘義》亦云：「卿為上擯，大夫為承擯，士為紹擯。」孔疏：「承，副上擯也。紹，謂繼續承擯。」又引此注及《大行人》文，謂：「待聘客及朝賓，其擯數皆然。若擯者五人，則士為紹擯者三人；若擯者四人，則士為紹擯者二人。」李氏云：「案：《大行人》，上公擯者五人，侯伯四人，子男三人。諸侯自相待，擯數無文，鄭據天子待己擯數以為己國待賓之擯數也。」敖氏則謂：「諸侯待聘賓，不論尊卑，擯者皆三人。」褚氏云：「鄭據《大行人》推之，雖無明文可徵，亦略得其概。敖創為新論，竊所不取。」今案：聘使之介，上公七，侯伯五，子男三。人數既以爵等分多寡，則主國之擯人數亦當依爵等而分。且朝則交擯傳辭，聘則旅擯不傳辭，待聘客與待朝賓已有區別，則擯之人數與天子待諸侯者同可也。云「《聘義》曰『介紹而傳命，君

子於其所尊不敢質，敬之至也」者，此引以證主賓各立擯介之義。云「既知其所爲來之事，復請之者，賓來當與主君爲禮，爲其謙不敢斥尊者，啟發以進之」者，言賓不敢斥言與主君行禮，故使擯者出請事以啟發之也。云「於是時，賓出次，直闌西，北面，上擯在闌東闕外，西面。其相去也，公之使者七十步，侯伯之使者五十步，子男之使者三十步」者，此謂門外上擯與賓南北相去之遠近也。斯時主君立於門內，南面。《大行人》云：「朝位，賓主之間，上公九十步，侯伯七十步，子男五十步。」卿禮下其君二等，故知公使者七十步，侯伯使者五十步，子男使者三十步也。云「此旅擯耳，不傳命」者，謂但陳列擯介而不傳辭。《司儀》「旅擯」，鄭注：「旅讀爲鴻臚之臚。臚，陳之也。皆陳擯位，不傳辭也。」是也。云「上介在賓西北，東面。承擯在上擯東南，西面，各自次序而下，末介、末擯，旁相去三丈六尺」者，謂次介在上介北，末介在次介北，皆東面。末擯在承擯南，亦西面，所謂「各自次序而下」。末介、末擯在門之東西兩旁，其相去三丈六尺也。賈疏云：「注云『西北東面』者，^①據賓西北望上介，介仍向正北陳之矣。上擯東南望承擯，承擯等仍向正南陳之矣。不謂介西北邪陳，擯東南向邪陳也。」案：此辨極明晰。蓋是時賓直闌西北面，上擯在闌東闕外

西面，介略在賓西而向北直陳，承擯等略在上擯東而向南直陳也。鄭必謂上擯在闌東不在門東者，以便於出入傳命也。若兩君相朝，主君出迎于大門外，交擯傳辭，則君當在闌東，上擯當在門東，與承擯、末擯等並列矣。云「上擯之請事，進南面，揖賓俱前，賓至末介，上擯至末擯，亦相去三丈六尺。止揖而請事，還人告于公」者，案：注云「進南面揖賓」，進者，前行之謂。蓋交擯傳辭，則上擯傳於承擯，以次傳於賓，如注下所云是也。此旅擯不傳辭，則上擯與賓親自問對，故須揖賓使前。李氏云：「上擯入，北鄉受主君命；出，南面遙揖賓使前。上擯南行，至末擯南，西面；賓北行，至末介北，東面，相去三丈六尺，乃請所爲來之事。賓既對，遂入告于公。」是也。褚氏云：「注謂『末介、末擯，旁相去三丈六尺』，云『旁』者，非東西正相去。蓋自末擯直西至末介北，東西相去三丈六尺。末介東至末擯南亦然。若旅擯，則上擯至末擯南，賓進末介北，東西正對，相去三丈六尺。據此則上擯與賓親自問對，其相去三丈六尺，與末介、末擯相去同，故注云『亦』也。」云「天子諸侯朝覲，乃命介紹傳命耳」者，此以下言交擯傳辭之法。云「耳」者，見

① 「面」，原作「南」，據《續清經解》本改。

惟天子於諸侯則然。考朝覲傳命，即《覲禮》「嗇夫承命告于天子」是也。會同亦傳命，《覲禮》曰「四傳擯」是也。《禮經釋例》云：「凡天子於諸侯則傳擯，諸侯於聘賓則旅擯。」傳擯即交擯，《司儀》注云「交擯者各陳九介，使傳辭也」是也。云「其儀，各鄉本受命，反面傳而下，及末則鄉受之，反面傳而上」者，如傳而出，則鄉主君受命；傳而入，則鄉賓受命，所謂「各鄉本受命」也。上擯受命於主君，反面傳於承擯，承擯傳於末擯，所謂「反面傳而下」也。於是賓之末介，鄉末擯受命，反面傳於次介，次介傳於上介，上介以告於賓，所謂「及末則鄉受之，反面傳而上」也。云「又受命，傳而下，亦如之」者，謂上介受命於賓，反面傳於次介，次介傳於末介，於是末擯鄉末介受之，反面傳於承擯，承擯傳於上擯，上擯以告於主君，所謂「亦如之」也。此交擯傳辭之法，鄭并言之以曉人也，互詳《覲禮》注。案：聘用旅擯，不交擯，而《聘義》云「介紹傳命」者，孔疏云：「交擯與旅擯雖別，總而言之，皆是傳命。」是也。又《鄉黨記》「君召使擯」，而云「揖所與立，左右手」，明是交擯傳辭，乃有揖左人、揖右人之事。江氏永云：「君朝用交擯，臣聘用旅擯。考之《春秋》，孔子仕魯時未見國君來朝，亦無卿來聘，意其爲大夫行問禮，主國亦以交擯待之。周末文勝，不盡如禮制

也。」云「此三丈六尺者，門容二徹參个，旁加各一步也」者，案：《考工記·匠人》曰「應門二徹參个」，鄭注：「二徹之內八尺，三个二丈四尺。」盧氏《詳校》云：「徹，轍通，《說文》無「轍」字。」今案：此「徹」謂車轍也。鄭以諸侯庫門廣狹無文，故取天子應門解之。天子庫門在應門外，當更廣於應門矣。「旁」謂門之兩旁，每旁加一步，步廣六尺，二步一丈二尺，合二丈四尺，爲三丈六尺也。所以每旁加一步者，以擯介之立不正當門，于出入乃便也。云「今文無「擯」者，蓋今文此節殘闕，脫落四「擯」字也。或曰：注當云「今文無「擯者」」，蓋「出請事」上，今文無「擯者」二字耳。○江氏永云：「《司儀》：『及將幣，旅擯三辭。』三辭者，上擯以君命請事於賓，賓對以君命臣來之意，此一辭也；主人辭不敢當而賓對，此二辭也；主人又固辭不敢當而賓又對，此三辭也。三辭訖，乃許而納賓。所謂「旅擯三辭」者當如此。《司儀》疏謂辭其以客禮當己，誤矣。《司儀》言「旅擯三辭」，此不言三辭者，文不具耳。下文辭玉亦當三辭，不言三辭者，亦省文也。如注疏說，一請事即納賓，是併無禮辭矣。聘，大禮也，豈可如此簡略？《禮器》曰：「七介以相見也，不然則已慙。三辭三讓而至，不然則已蹙。」此通朝聘言之，倘無三辭而遽納賓，是已蹙矣。此經

仍當依《司儀》，雖旅擯亦有三辭也。」今案：《聘義》曰「三讓而后傳命」，鄭注：「此賓至廟門主人請事時也。賓見主人陳擯以大客當己，則三讓之。不得命，乃傳其君之聘命也。」孔疏云：「鄭解『三讓而后傳命』之節，正當聘禮賓至主人大門，主人請事之時。此云『廟門』，誤也。」案：《司儀》疏謂辭主君以大客禮當己，即本《聘義》注爲說。但《聘義》三讓在傳命前，故鄭據賓言之；《司儀》渾言三辭，則當如江說也。此條可補注所未及，故附錄之。公皮弁，迎賓于大門內。大夫納賓。公不出大門，降於待其君也。大夫，上擯也，謂之大夫者，上序可知，從大夫總無所別也。於是賓主人皆楊。【疏】正義曰：注云「公不出大門，降於待其君也」者，案：據《司儀》諸侯來朝，公當迎之于大門外。今臣來聘，迎之于大門內，是降於待其君也。《禮經釋例》云：「凡迎賓，主人敵者于大門外，主人尊者于大門內。」詳《士冠禮》「主人迎，出門左」下。云「大夫，上擯也，謂之大夫者，上序可知，從大夫總無所別也」者，以納賓是上擯之事，上云「卿爲上擯」，言納賓則其爲卿可知。《儀禮釋官》云：「對言之則上大夫爲卿，散言之則上大夫與下大夫皆通稱大夫，《春秋》卿亦曰大夫是也。此篇之內有上大夫單言大夫者，有下大夫單言大夫者，今各依文釋之。」

云「於是賓主人皆楊」者，李氏云：「未執玉，尚文飾也。」今案：此因經但云「皮弁」，未言楊襲，故注明之。敖氏云：「納賓之辭曰：『寡君須矣，吾子其人也。』賓入門左。內賓位也。衆介隨入，北面西上少退，擯者亦入門而右，北面東上，上擯進相君。【疏】正義曰：『入門』，入大門也。『入門左』，由闕西也。敖氏云：『《玉藻》曰『賓入不中門，不履闕』，又曰『公事自闕西』，亦謂此時也。』注云「內賓位也」者，謂賓入而位于門內也。云「衆介隨入，北面西上少退」者，謂不敢與賓竝立，少退於後也。據此則賓亦北面可知，故下注云「公南面拜迎」也。云「擯者亦入門而右，北面東上」者，先時擯介皆陳于門外，今介隨賓入，則擯亦隨入可知。李氏云：「擯介面位與下人廟門之位同。」敖氏於上「納賓」云「上擯出納賓」，而承擯、紹擯則皆立於門東北面，故於此但云「上擯入門而右」，意謂承擯、紹擯初時未出也。其說非是。云「上擯進相君」者，以公將拜故也。公再拜。南面拜迎。【疏】正義曰：敖氏云：「賓入門左而公乃拜之，是西面拜，迎于入門右之處明矣。公迎大夫乃再拜者，尊國賓也。《相見禮》：『主人於降等者不出迎，一拜其辱。』」今案：注云「南面拜迎」，義已詳上。敖氏以爲

西面，恐非。賓辟，不荅拜。辟位逡遁，不敢當其禮。

【疏】正義曰：「賓」，毛本作「客」，《校勘記》云：「唐石經、《釋文》、嚴、徐、陳、閩、葛本、《通解》、楊、敖俱作「賓」，《石經考文提要》云：「監本作客。」案：下「賓三退負序」疏引此亦曰「賓辟」。今案：《集釋》、陳鳳梧本亦俱作「賓」。

注云「辟位逡遁」者，《說文》：「逡，復也。遁，遷也。」段氏注云：「復，往來也。遷，遷延之意。逡遁，今之逡巡也。

《儀禮》鄭注用「逡遁」十有一。」云「不敢當其禮」者，釋經「不荅拜」之義，《曲禮》曰「君若迎拜，則還辟不敢荅拜」謂此，詳《士昏禮》「納采，主人迎于門外，再拜，賓不荅拜」下。

公揖入，每門每曲揖。每門輒揖者，以相人偶為敬也。凡君與賓入門，賓必後君，介及擯者隨之，竝而鴈行。

既入，則或左或右，相去如初。《玉藻》曰：「君入門，介拂闥，大夫中牀與闥之間，士介拂牀。賓人不中門，不履闥。」

此賓謂聘卿大夫也。門中，門之正也。不敢與君竝由之，敬也。介與擯者鴈行，卑不踰尊者之迹，亦敬也。賓之介，

猶主人之擯。【疏】正義曰：《校勘記》云：「賓人」，楊氏

「入」誤作「立」。「卑」，監本誤作「畢」。○賈疏云：「人大

門東行，即至廟門，其間得有每門者，諸侯有五廟，大祖之廟居中，二昭居東，二穆居西。廟皆別門，門外兩邊皆有南

北隔牆，隔牆中夾通門，若然，祖廟已西，隔牆有三，則閤門亦有三。東行經三門，乃至大祖廟，門中則相逼，入門則相遠，是以每門皆有曲，有曲即相揖，故「每曲揖」也。今案：

「公揖入」者，入雉門也。諸侯三門，庫、雉、路。庫門為大

門，雉門為中門，廟在中門內，此為定說。賈疏之誤，後人

多辨之。《繩軒讀經記》云：「案：上文已云「賓入門左」，

此又云「公揖入」，下乃云「及廟門」，則此「揖入」在大門之

內、廟門之外可知，蓋入雉門矣。賈以為廟在大門內東，則

賓既入門左，何以又云「公揖入」邪？每門每曲，本為兩

事，每門相揖，每曲相揖也。賈云「門皆有曲」亦非。」又劉

氏敞、戴氏震、金氏鶚皆以廟為在中門之內，劉氏說，詳《觀

禮》。戴氏《三朝三門考》云：「《聘禮》曰「公出送賓及大門

內」，《周官·司儀》曰「出及中門之外」，廟在中門內明矣。

《記》曰：「昔者仲尼與於蜡賓，事畢，出游於觀之上。」蜡之

饗亦祭宗廟，廟在雉門內，故出而至觀也。《春秋》桓宮、僖

宮災，火自司鐸踰公宮至桓、僖二廟，廟邇公宮也。季桓子

至，御公立於象魏之外，立當遠火也。《穀梁傳》曰：「禮，

送女，父不下堂，母不出祭門，諸母兄弟不出闕門。」廟門謂

之祭門，觀謂之闕，亦謂之象魏。諸侯設於雉門，是以雉門

謂之闕門，天子蓋設於應門。闕門在外，祭門在內，不出闕

門者，得出祭門者也。《左傳》曰「間于兩社，爲公室輔」，以朝廷執政所在爲言，宜繫君臣日見之朝，社在中門內明矣。其他書傳可證宗廟社稷在中門內，路門外之左右者甚衆，略舉五事明之。」金氏鶚《廟在中門內說》云：「《聘禮》：『公迎賓于大門內。公揖人，每門每曲揖。』及廟門，公揖人。」夫惟廟在中門內，賓客之人必歷外門、中門而後及廟，故得有每門。若在中門外，則入大門即得及廟，何以有每門乎？賈疏謂經三閤門乃至大祖廟，江慎修極稱其說，鶚竊以爲不然。大祖之廟，百世不遷，當特尊於羣廟，故禘祫之禮，必合食於大祖廟。大祖東向自如，羣昭羣穆列於南北，則知大祖之廟必不與羣廟竝列。晉孫毓謂外爲都宮，大祖在北，左昭右穆，以次而南。朱子從之，其說固至當也。《禮經》「每門」之門，文承「大門」、「入門」而言，其非閤門可知。《曲禮》：「每門讓於客。」《周官·閤人》：「王宮每門四人。」與此「每門」文同。廟在雉門內，經文先言「每門」，後言「及廟」，則「每門」爲庫、雉二門甚明。賈以爲閤門，誤矣。「每曲」者，謂入雉門之後，折而向東，是爲一曲。直廟門，折而北，是又一曲。曲不屬於門，賈以爲門皆有曲，抑又誤矣。」今案：此經「每門」，金氏以爲庫、雉二門，甚是。蓋公迎賓于庫門內，賓入庫門，公拜，賓辟，於是公

乃揖之，使北行人雉門。既入雉門，公又揖之使行，於是折而東，則有東曲之揖，折而北，則有北曲之揖，故言「每門」先於「每曲」也，於是乃至廟門。或謂宗廟外爲都宮，則每門中兼有都宮門在內，然總不得以每門爲廟中三閤門，蓋每門之揖在前，及廟之揖在後，經文次序顯然，不容紊耳。至廟制，金氏以朱子、孫毓之說爲是，賈說爲非。王氏士讓、吳氏紱、吳氏廷華、褚氏寅亮皆與金同。竊謂廟即竝列，而大祖居中亦自有門，豈有大祖廟南向無門，而必由西二廟閤門側入之理？此其逞臆說經，決不可信者也。注云「每門輒揖者，以相人偶爲敬也」者，賈疏云：「以人意相存偶也。」《禮經釋例》云：「《大射儀》、《公食大夫禮》注皆有「相人偶」之文，疏未明析。又《中庸》「仁者，人也」，鄭注「讀如相人偶之人」，孔氏無疏。朱文公、王伯厚皆不知出於何書，俟考。」云「凡君與賓入門，賓必後君」者，此賓爲聘賓，與主君尊卑不敵，故人必後君。言「凡」者，見入大門、中門皆如是也。云「介及擯者隨之，竝而鴈行」者，謂上介與上擯竝，次介與次擯竝，末介與末擯竝，各隨賓與君行。而上介上擯在前，次介次擯、末介末擯以次在後，略有參差，如鴈行也。云「既入，則或左或右，相去如初」者，謂既入門則介左，擯右，亦如大門外相去三丈六尺也。云「《玉

藻曰：「君入門，介拂闌，大夫中楨與闌之間，士介拂楨」者，彼注云：「此謂兩君相見也。楨，門楔也。君入必中門，上介夾闌，大夫介，士介鴈行於後，示不相沿也。君若迎聘客，擯者亦然。」云「賓人不中門，不履闕」者，亦《玉藻》文，彼注云：「辟尊者所從也，此謂聘客也。闕，門限。」鄭引《玉藻》者，證君與賓入門及擯介隨人之儀也。李氏云：「凡門之中央所豎短木謂之闌，門之兩旁長木謂之楨，楨闌之間謂之中門。兩君相見，主東賓西，各由中門而入。擯介隨之，鴈行參差於其後，上擯近西，上介近東而拂闌。大夫直君之後，士介拂楨。聘賓入門還依爲君介時，近東而拂闌，不敢中門也。」云「此賓謂聘卿大夫也。門中，門之正也。不敢與君竝，由之敬也」者，此申言賓人不中門之義也。云「介與擯者鴈行，卑不踰尊者之迹，亦敬也」者，此申言「介拂闌」以下之義也。「卑不踰尊者之迹」，謂上介、上擯拂闌後於賓與君，大夫介、士介又以次略後，是不踰也。云「賓之介，猶主人之擯」者，謂《玉藻》拂闌以下雖止言介，其實主國擯者隨人之儀亦同也。○賈疏謂門有兩闌，楊氏復云：「《玉藻》疏云：『闌謂門之中央所豎短木。』則門只有一闌。《爾雅》：『概謂之闌。』注云：『門中之概名闌。』當以《玉藻》疏及《爾雅》爲正。」張氏惠言云：

「案：《聘禮》疏先云聊爲一闌言之，下乃申二闌之說，則一闌爲古說，二闌乃賈意也。」今案：《玉藻》云：「公事自闌西，私事自闌東。」言闌東、闌西而不言東闌、西闌，則其無兩闌明矣。賈氏說於經無據，不可從。近盛氏世佐、焦氏循猶用其說，非也。朱氏大韶詳辨之。及席門，公揖人，立于中庭。公揖先人，省內事也。既則立於中庭以俟賓，不復出。如此得君行一臣行二，於禮可矣。公迎賓于大門內，卿大夫以下入廣門即位而俟之。【疏】正義曰：注「公迎賓」下，毛本無「于」字，嚴本有。《校勘記》云：「徐本、《集釋》俱有，《通解》無。」○席，即大祖席，上經云「先君之祧」是也。敖氏疑爲高祖以下席，非。公立蓋南面，敖氏以爲西面，亦非。經至此始言「及席門」，則上「每門」不得指席門言明矣。注云「公揖先人，省內事也」者，以下經云「賓立接西塾」，不言入，則此時公揖賓先人可知。《曲禮》曰：「客至於寢門，則主人請入爲席。」是言卿大夫士之禮。彼注云：「雖君亦然。」賈疏謂省內事即請入爲席之類是也。云「既則立於中庭以俟賓，不復出。如此得君行一臣行二，於禮可矣」者，《曲禮》「請入爲席」下又云「然後出迎客」，此平等之客，禮當出迎。今聘賓是臣，與君尊卑不敵，故君既省內事，立以俟賓，不復出，於禮可也。「君

行一臣行二，下經賈疏謂出《齊語》晏子辭，王氏應麟云見《韓詩外傳》。今案：《齊語》無此文。《韓詩外傳》卷四曰：「晏子聘魯，上堂則趨，授玉則跪。孔子問之，晏子對曰：『夫上堂之禮，君行一臣行二。今君行疾，臣敢不趨乎？今君之受幣也卑，臣敢不跪乎？』」此鄭注所本也。

張氏惠言云：「此君所立中庭與後楊降立同處，當在庭南北之中，不近內雷。賓入門左曲，公南面與揖；賓北曲，公西南面與揖。揖訖，公東行向堂塗，北行當碑，而賓相及俱揖。是君行一臣行二矣。」今案：此篇注言「君行一臣行二」者，三義各有取，不必拘泥。此節張說得之，賈疏頗支離。下「公升二等」，注云：「先賓升二等，亦欲君行一臣行二。」案：襄七年《左傳》衛孫文子來聘，公登亦登，正與此相反。《朱子語類》：「問行一行二之義？」曰：「君行步闊而遲，臣行步狹而疾，故君行一步，而臣行兩步，蓋不敢同君之行而踐其踪也。」意略近之。又下「公側襲，受玉于中堂與東楹之間」，注云：「東楹之間，亦以君行一臣行二。」此則主君在東，聘臣在西。今不於兩楹之間，而於中堂與東楹之間，是臣更向東行，義至明也。云「公迎賓于大門內，卿大夫以下入席門即位而俟之」者，公迎賓時，上摯、承摯、紹摯在大門外，餘卿大夫士不見入廟之文，而廟中裏事

有宰及宰夫等官。是君未入廟時，卿大夫已先入即位而俟矣，故鄭明之。李氏云：「卿大夫先即位者，於外無事。」賈疏云：「《公食大夫》以其官各具饌物，皆有事，不預入廟，故公迎賓入後，乃見卿大夫以下之位，與此異也。」賓立接西塾。接，猶近也。門側之堂謂之塾。立近塾者，已與主君交禮，將有出命，俟之於此。介在幣南，北面西上，上摯亦隨公入門東，東上，少進於士。【疏】正義曰：此門外之西塾也，餘詳《士冠》「筮與席具饌于西塾」下。注云「立近塾者，已與主君交禮，將有出命，俟之於此」者，上「每門每曲揖，及席門，公揖入」，是與主君交禮也。下「几筵既設，摯者出請命」，是將有出命，故俟之於此也。蔡氏云：「斯時賓在廟門外，西塾之南而東面也。」云「介在幣南，北面西上」者，張氏惠言云：「介西上，則賓在幕西東面可知。故下注云「上介北面受圭，進西面授賓也」。云「上摯亦隨公入門東，東上，少進於士」者，此後不見上摯入廟之文，而下云「摯者出請命」，明公入時隨人可知。言「東上」者，明承摯、紹摯亦隨入也。李氏云：「下文「介入門左，北面西上」，知摯入當門東東上。」褚氏云：「凡立同向者，尊卑不敵，則尊者稍在前，故又云「少進於士」。几筵既設，摯

者出請命。有几筵者，以其席受，宜依神也。賓至席門，司宮乃於依前設之。神尊，不豫事也。席西上，上擯待而出請受賓所以來之命，重停賓也。至此言命，事彌至，言彌信也。《周禮》：「諸侯祭祀，席蒲筵，纁純，右彫几。」

【疏】正義曰：注「依前設之」，陸氏云：「依」，本又作「哀」。

注云「有几筵者，以其席受，宜依神也」者，几筵有爲人設者，有爲神設者，詳《士昏禮》「主人筵于户西西上右几」下。此受聘於廟中，宜依於神，蓋臨之以先君，以結二國之好，故爲神設几筵也。云「賓至席門，司宮乃於依前設之。神尊，不豫事也」者，上云「賓立接西塾」，下云「几筵既設」，是賓至廟門乃設之也。「司宮」，詳《燕禮》。「依」，詳《覲禮》。《儀禮釋官》云：「案：下經曰「宰夫徹几改筵」，則設之疑亦宰夫，《公食禮》「宰夫設筵加几席」可證也。」云「席西上」者，下「禮賓」注云「賓席東上」，此爲神布席，故西上也。《禮經釋例》云：「凡賓至廟門，皆設几筵。《聘禮》：「賓及廟門，公揖入。几筵既設，擯者出請命。」又聘享畢，宰夫徹几改筵，《覲禮》但云「天子設斧依于戶牖之間，左右几」，不云几筵，文不具也。是賓至廟門，皆設几筵也。《士昏禮》納采：「主人筵于户西，右几，使者玄端至，事畢，請禮賓，主人徹几改筵。」《昏禮》使者猶諸侯之聘賓，

故其儀略如《聘禮》也。又《昏禮》親迎：「壻至于門外，主人筵于户西，右几。」又云：「主人揖入，賓執鴈從，至于席門，揖入。」壻至女家則爲賓，故亦設几筵也。亦有不几筵者，《聘禮》：「聘遭喪，不筵几。」注：「致命不於廟，就尸柩於殯宮，又不神之。」又云：「小聘曰問，主人不筵几。」注：

「記貶於聘，所以爲小也。」故《聘禮·記》云：「唯大聘有几筵。」注謂：「受聘享時也。小聘輕，雖受于廟，不爲神位。」又《聘禮》：「賓問卿，卿受于祖廟，及廟門，大夫揖入，擯者請命。」注：「不几筵，辟君也。」又《士冠禮》：「賓至席門，不云几筵，此禮主於冠，故異於賓客之禮也。」云「上擯待而出請受賓所以來之命，重停賓也。至此言命，事彌至，言彌信也」者，待謂待設几筵也，命謂聘君所命使來聘之命。至此請受之，不敢稽賓也。敖氏云：「請命，請致其君命也。」亦通。前此但云「請事」、「請行」，未敢必其聘已，至此始云「請命」，是言彌信也。云「《周禮》：「諸侯祭祀，席蒲筵，纁純，右彫几」者，此引以證所設者，係用諸侯祭祀之几筵也。敖氏云：「注似脫『加莞席纁純』五字。」詳《公食大夫禮》。賈人東面坐啟牘，取圭，垂纁，不起而授上介。賈人歸入陳幣，東面俟，於此言之，就有事也。

授圭不起，賤不與爲禮也。不言楊襲者，賤不楊也。纁，有

組繫也。【疏】正義曰：注「鄉」，《釋文》作「歸」。張氏曰：「《釋文》云：『歸，許亮反，下同。』前釋『南鄉』云『下以意求之』，以二音考之，對鄉之鄉從鄉，曩歸之歸加日。此曩歸之歸也，宜加日。後『鄉公』、『鄉將』、『鄉時』、『鄉以』皆同，從《釋文》。」今案：戴校《集釋》改「歸」，從之。○「賈人東面坐啟櫝」，與在國西面異者，主賓之地殊也。敖氏云：「玉尊，不與幣同陳，故事至乃取之。」注云「賈人歸入陳幣，東面俟，於此言之，就有事也」者，上文賓人次乃陳幣，是時賈人即東面俟，彼不言而於此言之者，以其啟櫝有事，故就此著其面位也。云「授圭不起，賤不與爲禮也」者，以其坐啟櫝即坐以授上介，賈人是庶人在官者，故云「賤不與上介爲禮也」。云「不言楊襲者，賤不楊也」者，江氏永云：「楊襲所以分別文質，質事用襲，文事用楊。質又有三：一是禮盛爲質，一是輕略爲質，一是父黨無容爲質。」此云「賤不楊」者，亦是輕略之意。「纁，有組繫也」者，詳下記。上介不襲，執圭，屈纁，授賓。上介北面受圭，進西面授賓。不襲者，以盛禮不在於己也。屈纁，并持之也。《曲禮》曰：「執玉，其有藉者則楊，無藉者則襲。」【疏】正義曰：賈人不徑授賓而上介執以授賓，尊卑之節。注云「上介北面受圭，進西面授賓」者，以賓東面故也。敖氏則

以上介受圭及授賓皆東面，褚氏云：「當旅擯時，賓北面，介東面，不同向。至廟門外立接西塾時，賓轉而東面，介轉而北面，面位雖改，仍不同向。北面者西上，上介最西，賈人在賓南，偏近上介，故可坐而授圭，而上介仍北面受之。介授圭而西面者，訝授也。注說是。」云「不襲者，以盛禮不在於己也」者，以執圭行聘是賓之事。敖氏云：「襲而執圭者，惟賓與主人行禮者二人耳，故上介不襲而執之。必言之者，嫌聘時執玉者必襲也。」「屈纁」，義詳前。云《曲禮》曰「執玉，其有藉者則楊，無藉者則襲」者，李氏云：「藉者，薦也。圭璋特達，無藉也；璧琮加於束帛，有藉也。襲者禮至敬，尚質；楊者禮差輕，尚文。賓執玉、公受玉皆襲，所謂『無藉者則襲』。賓出，公楊降立；賓楊，奉束帛加璧享，所謂『有藉者則楊』。」今案：鄭引此者，證執圭行聘宜襲而不襲，是盛禮不在於己也。若以垂纁爲有藉，屈纁爲無藉，則此經明云「執圭屈纁」，是無藉矣，何云不襲乎？互詳記「凡執玉，無藉者襲」下。賓襲，執圭。執圭盛禮，而又盡飾，爲其相蔽敬也。《玉藻》曰：「服之襲也，充美也。是故尸襲，執玉龜襲也。」【疏】正義曰：《表記》：「子曰：『楊襲之不相因也，欲民之母相瀆也。』」鄭注：「不相因者，以其或以楊爲敬，或以襲爲敬。禮盛者以襲爲敬，

執玉龜之屬也；禮不盛者以裼爲敬，受享是也。」孔疏：「賓介自相授玉之時，介禮輕，裼而執圭以授賓；賓禮重，則襲而後受圭。是賓之與介，亦裼襲不相因。」今案：鄭注以聘對享言，孔疏以賓對介言，皆足釋此經言「襲」之義。經至是言「襲」，則賓前此不襲可知矣。注云「執圭盛禮，而又盡飾，爲其相蔽敬也」者，案：《玉藻》曰「不文飾也，不裼」，又曰「君在則裼，盡飾也」，是平時以盡飾爲敬，今執圭盛禮，其敬有異於常時，而又以盡飾爲敬，則執圭之敬不見，故云「蔽敬」也。云「《玉藻》曰『服之襲也，充美也』」者，此引以證襲不尚文飾也。《玉藻》又曰「禮不盛，服不充」，禮盛而襲即至敬無文之義。盛氏云：「執圭必襲者，以質爲敬也。以質爲敬者，敬之至也。」是也。云「是故尸襲，執玉龜襲也」者，亦《玉藻》文，引以證執圭宜襲之義。彼注云：「尸襲，尸尊。」執玉龜襲，重寶瑞也。」孔疏：「若執璧琮行享，雖玉裼。此『執玉』或容非聘享，尋常執玉，則亦襲也。龜是享禮庭實之物，執之亦裼。若尋常所執及卜則襲，敬其神靈也。」**擯者入告，出辭玉。**擯者，上擯也。入告公以賓執圭，將致其聘命。圭，贊之重者，辭之，亦所以致尊讓也。【疏】正義曰：注云「擯者，上擯也」者，以相禮是上擯之事，故知擯者爲上擯也，前後言擯者放此。

云「圭，贊之重者」，莊二十四年《左傳》御孫曰：「男贊大者玉帛，小者禽鳥。」玉即圭璋璧琮之屬，是圭爲贊之重者也。此圭，瑑圭也。云「辭之，亦所以致尊讓也」者，以圭爲重器，故辭之。《聘義》曰：「三揖而后至階，三讓而后升，所以致尊讓也。」此辭亦是致尊讓，故注云「亦」也。文十二年《左傳》：「秦伯使西乞術來聘，襄仲辭玉，曰：『君不忘先君之好，照臨魯國，鎮撫其社稷，重之以大器，寡君敢辭玉。』對曰：『不腆敝器，不足辭也。』」是辭玉之禮，春秋時猶有存者，杜注謂「不欲與秦爲好，故辭玉」，非矣。但彼言三辭，此不言三，江氏永以爲省文，見前。敖氏則云：「此辭亦禮辭耳，賓對則擯者復以入告而出納賓也。」**納賓，賓入門左。**公事自闕西。【疏】正義曰：前云「賓入門左」，大門也。此「入門左」，廟門也。注云「公事自闕西」者，《玉藻》文，注云「聘享也」。又云「私事自闕東」，注云「觀面也」。此引以證「入門左」之爲人自闕西也。**介皆入門左，北面西上。**隨賓人也。介無事，止於此。今文無「門」。【疏】正義曰：注云「隨賓人也」者，上云「賓入門左」，此云「介皆入門左」，明介隨賓人自闕西也。云「介無事，止於此」者，對主國擯者有相禮之事也。其位則

北面西上者，上介在西，次介、末介以次竝立而東。必西上者，賓入門，至門內雷，曲而西行，故以近西者爲上也。云「今文無『門』」者，謂今文無「門」字，於文不備，故從古文也。《周禮·司儀》：「凡諸公相爲賓，及將幣，每門止一相，及廟唯上相入。」鄭注：「諸公相爲賓，謂相朝也，相謂主君擯者及賓之介也。謂之相者，於外傳辭耳，入門當以禮詔侑也。每門止一相，彌相親也。止之者，絕行在後耳。」《司儀》又曰：「諸公之臣相爲國客，及將幣，每門止一相，及廟唯君相入。」鄭注：「相爲國客，謂相聘也，唯君相入。客，臣也，相不入矣。」今案：《司儀》注以相爲兼擯介言，而經文於朝則云「唯上相入」，於聘則云「唯君相入」，謂唯主君之相得人，而聘臣之相不入，與此異。賈疏則謂每門止一相。鄭云：「絕行在後耳，非是全不入廟。」又云：「其實皆入，與此同也。」朱子云：「疏說與此不通，當闕。」然則必欲牽合二經爲一，非矣。三揖，君與賓也。入門將曲，揖。既曲北面，又揖。當碑，揖。【疏】正義曰：注云「君與賓也」者，謂君與賓揖也。云「入門將曲，揖。既曲北面，又揖。當碑，揖」者，此節賈疏印本差誤，朱子更加考定云：「前云『公揖入，立于中庭』，賓後獨入。得云『入門將曲，揖』者，謂公先在庭，南面，賓入門將曲之時，既曲北面

之時，主君皆向賓揖之，再揖訖，主君乃東面向堂塗，北行當碑，乃得賓主相向之揖，是以得君行一臣行二。非謂賓入門時，主君更向內雷相近而揖也。」今案：《禮經釋例》亦以賈疏錯誤不可讀，更申明之，與朱子更定文稍異，詳《士冠禮》。至于席門，揖入，三揖下。據賈此疏云非謂主君更向內雷相近而揖，則前「公揖入，立于中庭」疏謂主君立近內雷者，非矣。至于階，三讓。讓，升。【疏】正義曰：詳《士冠禮》。至于階，三讓下。公升二等，先賓升二等，亦欲君行一，臣行二。【疏】正義曰：詳《士冠禮》及前「及席門，公揖入」下。賓升，西楹西，東面。與主君相鄉。【疏】正義曰：下云「公左還，北鄉」，則公初時升堂西鄉可知，故注以賓東面爲與主君相鄉也。敖氏云：「西楹西，言其東西節也。」擯者退中庭。羣公所立處，退者，以公宜親受賓命，不用擯相也。【疏】正義曰：「羣」，毛本作「鄉」，嚴本同，戴校《集釋》改「羣」，今從之。注云「羣公所立處」者，即羣者「公揖入，立于中庭」之處也。云「退者，以公宜親受賓命，不用擯相也」者，下云「賓致命」，是致其主君來聘之命，公宜親受之，擯者不敢與聞，故退也。賓致命。致其君之命也。公左還，北鄉。當

拜。【疏】正義曰：公自西鄉轉而北鄉，故云「左還」。凡堂上之拜，以北面爲正，故知左還北鄉爲將拜也。堂上之拜皆北面，詳《士冠禮》「宿賓」下。擯者進。進阼階西，釋

辭於賓，相公拜也。【疏】正義曰：王氏士讓云：「《論語》『趨進，翼如也』，即在斯時。」江氏永云：「公與賓皆升堂，賓致命，公將北面拜，拜君命之辱。其時擯者位在中庭，從中庭進至阼階西，釋辭于賓，以相公拜。所釋之辭，則後記云『子以君命在寡君，寡君拜君命之辱』是也。經曰『擯者進』，即《論語》『趨進』之進，不言趨者，省文耳。其時賓已致命，公已左還北鄉，將拜，擯者從中庭進至阼階西有數十步，不宜舒緩，故必當趨，趨則急遽，或至垂手掉臂，難其容，故特記容。趨進必有辭，辭無常者不能記，辭有常者不必記也。趨進有辭，見《左傳》者凡五：成三年「齊侯朝于晉，將授玉，卻克趨進」，襄七年「衛孫文子來聘，公登亦登，叔孫穆子相趨進」，襄九年「同盟于戲，晉士莊子爲載書，鄭公子駢趨進」，昭十二年「晉侯以齊侯宴，投壺，公孫佖趨進」，定八年「晉師盟衛侯于鄆澤」，將敵，涉沓掄衛侯之手及挽，衛侯怒，王孫賈趨進」。此五事皆有辭無常者也，凡發足向前爲進。」又云：「趨進，廟中相禮時也。廟中相禮，上擯之事，卿爲之。孔子，大夫也，而相禮，攝相也。夾谷

之會，孔子攝相，此亦重其知禮而使攝，故《論語》特記「君召使擯」。此趨進及賓退復命，皆上擯相禮之事。」今案：鄭已知進阼階西者，以下云「公當楣再拜」，則公斯時在東楹西可知。此進爲贊公拜，且代公釋辭宜近公，故知在阼階西也。此云「進」而不云升，則位仍在堂下可知，《公食·記》所謂「卿擯由下」也。公當楣再拜。拜，脫也。脫，

惠賜也。楣，謂之梁。【疏】正義曰：褚氏云：「當者，面向之也。蓋在楣下少南。」注云「拜，脫也。脫，惠賜也」

者，以當楣之拜爲拜，脫，而又轉釋「脫」字之義也。《聘義》曰：「北面拜，脫，拜君命之辱，所以致敬也。」孔疏云：「拜君命之辱」者，釋此「北面拜，脫」之義，言主君所以拜脫者，拜聘君之命來屈辱也，然則此拜爲拜聘君之命。」敖氏云

「爲將授玉」，非矣。云「楣，謂之梁」者，《爾雅·釋宮》文。郭注「門戶上橫梁」，此則謂堂上東西兩楹間橫梁也，詳《士冠禮》「賓升，當阿致命」下。賓三退，負序。三退，三

遂遁也。不言辟者，以執圭將進授之。【疏】正義曰：李氏云：「序，西序。」敖氏云：「公再拜之間，賓凡三退，見其頃

①「鄆」，原作「剗」，據《續清經解》本改。

刻不敢安也。三退則負序而立矣。此拜雖非爲己，然猶不敢自安若是，敬之至也。」注云「逡遁」，義詳前。云「不言辟者，以執圭將進授之」者，李氏云：「《司儀職》曰：『拜客三辟。』凡爲人使者不荅拜。」褚氏云：「退，即辟也。注意以賓將進授圭，故經不云辟而云『退』，以對下立文，非謂禮節與《周官》異，賈疏誤。」今案：鄭注《司儀》云「客三辟，三退負序也」，則固明以二經義同，褚說是矣。公側襲，

受玉于中堂與東楹之間。側，猶獨也。言獨，見其

尊賓也。他日公有事，必有贊爲之者。凡襲於隱者，公序站之間可知也。中堂，南北之中也。入堂深，尊賓事也。

東楹之間，亦以君行一臣行二。【疏】正義曰：《校勘記》

云：「注『言獨』之『獨』，《要義》作『側』。『可知也』，單疏、

《要義》無『知』字。案：賈疏云：「無正文，故云可也。」則無『知』字明矣。」今案：嚴本及各本俱有「知」字，仍存之。

云「側，猶獨也」者，秦氏蕙田云：「案：經文云『側』者皆訓獨，不獨《聘禮》爲然。盛世佐以側爲堂東偏，非。」詳《士冠禮》「側尊一甒醴」下。云「言獨，見其尊賓也。他日公有事，必有贊爲之者」，案：《大射儀》小臣正贊公襲，此無贊之者，是自致敬以尊賓也。凡執玉必襲，公至是始言襲，則前此不襲可知。云「凡襲於隱者」，謂凡襲宜於隱處。云

「公序站之間可知也」者，賈疏云：「《士喪》襲於序東，謂於堂東地上。此則公在堂上，堂東南角爲站，鄭以意斟酌，隱處無過於序東站北。」今案：此可推而知，故經不言襲處也。云「中堂，南北之中也。入堂深，尊賓事也。東楹之間，亦以君行一臣行二」者，賈疏申鄭謂：「于當楣北面拜訖，乃更前北侵半架，於南北之中乃受玉，故云『南北之中』。」又云：「兩楹之間爲賓主處中，今乃於東楹之間，更侵東半間。」今案：是說頗疑之。凡言「之間」者，必有兩物對待而後可云「之間」。今鄭、賈以中堂爲南北之中，而解東楹之間爲更侵東半間，則經文「與」字及「之間」二字皆無著矣。惟李氏《集釋》云：「受玉于中堂東楹二者之間也。中堂，堂東西之中也，是爲兩楹間。凡敵者受玉于兩楹間，聘賓與主君非敵，故進東近主君，受玉于中堂與東楹之間也。下賓觀受幣當東楹，覲，私事，賓又宜近東而當東楹，則此受玉在東楹之西明矣。賈氏據鄭以中堂爲南北之中，意以東楹間爲東楹之東，若然則賓觀受幣不得反當東楹也。」吳氏《章句》云：「中堂，東西當兩楹之中。曰『與東楹之間』，蓋中堂之東，東楹之西，二者之間也。」此二說較爲得之。「君行一臣行二」，詳前「及席門，公揖入，立于中庭」下。擯者退，負東塾而立。反其等位，無事。【疏】

正義曰：此廟門內之東塾也，負之者北面。下禮賓節亦有「擯者退，負東塾」之文，郝氏謂俱出廟門外，非。江氏筠云：「案：公受玉而擯退者，於時賓將降出，聘事畢故也。其立於此，以便公楊降立即出請賓。其賓升筵而退者，於時有宰夫相，已無事故也。其立於此，以便公用束帛，復進相幣，俱不應在廟門外。」今案：經云「擯者退」，不云出，則在門內明矣，江說極得經意。注云「反其等位，無事」者，

李氏云：「等位，承擯以下門東之位。」敖本無「等」字，或遂以爲衍文，非也。賓降，介逆出。逆出，由便。【疏】

正義曰：《校勘記》云：「賓，閩，葛俱誤作『質』。」○李氏云：「賓不拜送玉者，爲君使也。逆出，後人者先出。」蔡氏云：「介立門左，北面西上。近東者先出，由便也。」今案：惟其逆出，下云「賓出」則俱出矣。賓出。聘事畢。公

側授宰玉。使藏之，授於序端。【疏】正義曰：「授」，毛

本誤「受」。○云「側授」者，無贊也。「宰」，大宰也，下同。鄭知授宰玉使藏之者，受藏之府屬宰也。知授於序端者，以下始云「降」，則斯時在堂上授矣，故知於序端也。「序端」，東序端也。楊，降立。楊者，免上衣，見楊衣。凡當盛禮者，以充美爲敬。非盛禮者，以見美爲敬。禮尚相

變也。《玉藻》曰：「裘之裼也，見美也。」又曰：「麕裘青旒，絞衣以裼之。」《論語》曰：「素衣麕裘。」皮弁時或素衣，其裘同可知也。裘者爲溫，表之，爲其褻也。寒暑之服，冬則裘，夏則葛。凡禮裼者左，降立，俟享也，亦於中庭。古文「楊」皆作「賜」。【疏】正義曰：《校勘記》云：「注『褻』，陸氏曰：『本又作褻。』」禮，張氏曰：「監本以禮爲禮。」「於」，楊本作「如」。云「楊者，免上衣，見楊衣」者，凡服內外之次，冬則親身有禪衫，又有襦袴，外有袍繭，袍繭之上加裘，裘上加楊衣，楊衣之上加上服。夏則不服裘，用葛也，亦無袍繭，葛上加中衣，中衣之上加上服。春秋則服袷，袷之上加中衣，中衣之上加上服也。汪氏錫云：「冬則裘上爲楊衣，春夏秋即以中衣爲楊衣。」《論語》邢疏謂夏時中衣在葛之內，而冬時袍繭之內又有中衣，失之矣。邢疏冬時內有袍繭，而此節賈疏只言襦袴而無袍繭，亦其疏略處。知中衣爲在表裏之中，則知邢疏之失矣。知北地嚴寒，衣裘未有不先衣袍繭者，則知賈疏之疎矣。今案：衣服內外之次，邢疏與賈疏殊。《禮記·玉藻》疏引皇氏說亦未詳析，今依汪說訂定於上。此注云「免上衣」者，上衣即上服，謂行禮時所服於外者如皮弁、朝服之類是也。楊與襲對，袒去上服，以露楊衣，謂之楊。掩其上服，不露楊衣，

謂之襲。上服內即是裼衣，裼衣內即是裘葛，別無一重襲衣，各疏皆然。《曲禮》：「執玉，其有藉者則裼。」孔疏謂裼衣上有襲衣，襲衣上爲皮弁之屬，其說非是，江氏《鄉黨圖考》已辨之。云「凡當盛禮者，以充美爲敬。非盛禮者，以見美爲敬。禮尚相變也」者，此申言用襲用裼之義。「禮尚相變」，即《表記》「裼襲不相因」之義，已詳前。云「《玉藻》曰「裘之裼也，見美也」者，此引以證裼爲見美，襲爲充美也。李氏云：「裼衣皆象其上服與裘之色。」江氏永云：「見美者，見裘之美也。裘雖在裼衣內，裼衣與裘同色，見裼衣則知其是某裘。孔疏謂見裼衣之美，非是。」云「又曰：「麕裘青豻裘，絞衣以裼之。」《論語》曰：「素衣麕裘。」皮弁時或素衣，其裘同可知也」者，鄭注《玉藻》云：「豻，胡犬也。絞，蒼黃之色也。」鄭既引《玉藻》「麕裘青豻裘」，而復引《論語》者，見服皮弁時，裼衣雖有絞素之殊，而裘則同用麕，可知以皮弁色白，麕裘亦白故也。麕係鹿子，《論語》作「麕」同。《玉藻》曰：「君衣狐白裘，錦衣以裼之。」鄭注：「君衣狐白毛之裘，則以素錦爲衣覆之，使可裼也。袒而有衣曰裼。天子狐白之上衣，皮弁服與？凡裼衣象裘色也。」孔疏：「天子視朝服皮弁服，則天子皮弁之下有狐白錦衣也。諸侯于天子之朝亦然。其在國視朔則素衣麕

裘，卿大夫士亦然，故《論語》注云「素衣麕裘，視朔之服」是也。其受外國聘享亦素衣麕裘，裼衣或絞或素不定。熊氏云：「臣用絞，君用素。」皇氏云：「素衣爲正，記者亂言絞耳。」今案：熊、皇異說，後人多以皇說爲優。賈疏謂主君用素衣爲裼，使臣用絞衣爲裼，於經無據。又「禮，君用純物，臣下之」，謂君麕裘還用麕裘，臣則不敢純如君，麕裘用青豻裘是也。云「裘者爲溫，表之，爲其襲也」者，《詩》：「彼都人士，狐裘黃黃。」箋云：「取溫裕。」是裘者爲溫，服之所以禦寒也。《鄉黨圖考》云：「今人服裘或以毛向外，古人正是如此，故有「虞人反裘而負薪」之喻。」今案：《新序》云：「反裘負芻，愛其毛也。」然則常時服之，正毛在外矣。毛在外則襲，故必表之。表之謂裘外有裼衣，且有上服也。云「寒暑之服，冬則裘，夏則葛」者，見裘葛皆有裼襲也。王氏士讓云：「夏葛冬裘，皆有襲裼之宜，春與秋亦然，故經文只言襲裼而不言襲裘裼裘。學者第據《玉藻》文謂惟裘有襲裼，誤矣。」江氏永云：「聘禮不必行於冬，故四時皆有裼襲。惟《玉藻》云「見美」、「充美」，係專指裘言之。非冬月服裘時，則但取禮尚相變耳。」云「凡袒裼者左」者，袒與袒同，《說文》作「袒」，云：「袒者，裼也。」袒則訓爲衣縫，解與「袒」異。今經典相承，「袒裼」字皆用「袒」，亦作

「袒」。此注與《覲禮》注云「凡以禮事者左袒」義同，禮事即吉凶之事也。江氏永云：「古人有袒袖之禮，行禮時開出上服前衿，袒出左袖。」《士喪禮》「主人左袒，扱諸面之右」，扱即插字。吉禮亦當以左袖插諸前衿之右也。凡經傳單言「袒」者，袒而無衣，肉袒也。言「楊」或連言「袒楊」者，袒而有衣也。《覲禮》侯氏請事右肉袒，與尋常左袒者不同，謂刑宜於右也。古人自是有左袒、右袒之法，故至漢初周勃討呂氏，有爲劉氏左袒，爲呂氏右袒之說。鄭注《玉藻》「袒而有衣曰楊」，合之此注「凡袒楊者左」，可知袒楊之義矣。蔡氏德晉云：「古人著衣之節，其變有三：曰袒、曰楊、曰襲。袒者，卷起衣袖而露其臂也。楊者，卷正服之袖而露其裘也。襲，復衣也。或既袒而襲之，或既楊而襲之，在衣曰袒，在裘曰楊，故楊有袒義。袒有左右，楊則左右皆楊。袒有惟卷正服之袖而露其裏衣者，《鄉射·記》所謂「袒纁繻」，袒朱繻也；有并卷裏衣之袖而露其臂者，所謂肉袒也。楊則唯卷正服之袖以露其裘而已。」又云：「古人裘外惟有正服，孔子緇衣羔裘，緇衣謂朝君正服。」又云：「裘外楊衣即朝祭服。」朱氏大韶駁之云：「古無以卷袖爲楊者，誤解爲卷袖，遂一誤而無不誤。朝祭各有正服，五冕及皮弁等服是。《論語》「緇衣羔裘」，即《玉藻》「羔裘緇衣

以楊之」。言楊之者，所以楊此裘也。衣與裘同色，故羔裘之楊用緇，是楊衣與正服異。今云緇衣爲朝君正服，誤甚。《聘禮》聘君與賓俱襲，享皆楊，文質相變。云「在裘曰楊」，是以楊專施於裘，將古人行聘必在冬三月乎？無是理也。《士喪禮》：「主人出，南面左袒，扱諸面之右。」注：「扱諸右掖之下帶之內，取便事。面，前也。」然則袒者，脫左袂而露其肩臂也。喪禮皆肉袒，脫左袂則衣之左畔皆垂而下，故必插於右。若但卷其袖，則左手之袖豈能插諸右掖之下帶之內乎？《大射》：「小臣贊袒，公袒朱繻。」卒袒，小射正贊設拾。鄭云：「先祖乃設拾，拾當以韝於繻上。」射所以必袒者，袖寬恐礙弦，故袒而以拾韝於繻上，鄭云「拾，斂也，所以蔽膚斂衣」是也。《鄉射·記》：「大夫與士射，袒纁繻。君在則肉袒。」惟袒爲脫去左袂，故君大夫必內著繻。肉袒則內不著繻，以拾韝於臂上，若但爲卷袖而露臂，袖卷必褊褊而上，擁於左肱，左手之袖反礙於放弦矣。」又云：「古者禮服皆直領開左右襟，而見其所楊之衣曰楊，掩而不開曰襲，從無以卷袖而露其裘爲楊者。」今案：蔡說多憑乙斷，朱氏駁之是矣，一家之說甚繁，今不具錄。至江氏

①「袒」，原作「袖」，據《續清經解》本改。

謂「經傳單言「袒」者，袒而無衣，肉袒也」，然《射禮》言「袒朱繻」、「袒纁繻」，是袒而有衣，何以亦單言「袒」乎？又據鄭注謂「袒而有衣曰楊」，然《詩·鄭風》「袒楊暴虎」，《毛傳》及《爾雅》皆訓爲肉袒，則袒而無衣，何以亦稱「楊」乎？案：《說文》「但，楊也」、「楊，但也」，二字轉相訓，則或言「袒」，或言「楊」，或連言「袒楊」，其義正同，不必過爲區別。惟有見體之「袒楊」，《詩》「袒楊暴虎」及《孟子》「袒楊裸裎」是也；有見衣之「袒楊」，《內則》「不有敬事，不敢袒楊」是也。毛氏奇齡《經問》云：「袒楊本不同，有去衣之袒楊，有加衣之袒楊。去衣之袒楊，如《射禮》「袒決」、「喪禮」「袒括髮」、鄭《詩》「袒楊暴虎」、《郊特牲》「肉袒割牲」、《左傳》「鄭伯肉袒牽羊」、《史記·微子世家》「面縛肉袒」，俱是也。此脫衣見體，不必皆敬事也。若加衣之袒楊，則《衛風》「衣錦綈衣，裳錦綈裳」，謂夫人衣錦必加單衣於其上，謂之楊衣，但又加一衣，袒而不襲，則其美見焉。又有楊裘，如狐白加錦衣、狐青加綃衣、狐黃加黃衣、羔裘加緇衣，皆加單衣於裘上，但外又加一衣，袒楊之而美見，襲揜之而美不見，《檀弓》所云「襲裘而弔，楊裘而弔」是也。去衣之袒楊爲褻，加衣之袒楊爲敬，明有分別矣。」今案：毛氏謂袒楊有不同，其義甚精，但以去衣、加衣爲說則猶未確。袒楊皆是去衣，

惟去衣而見體之袒楊爲肉袒，故郭注《爾雅》云「脫衣見體」也；去衣而見衣之袒楊爲文飾，故鄭此注云「免上衣，見楊衣」也。袒、楊、襲之義，互詳《鄉射禮》「司射適堂西，袒決遂」下。云「降立，俟享也，亦於中庭」者，謂降而立於庭，以待賓入行享也。前行聘時及席門，公揖入，立于中庭，故知此立亦于中庭也。云「古文「楊」皆作「賜」」者，胡氏承珙云：「賜，古文假借字。」朱氏大韶云：「賜，疑「絳」之誤，從衣從糸之字多通，故古文借「絳」爲「楊」耳。」今案：賜與楊聲義皆不相通，疑朱說是。擯者出請，不必賓事之有

無。【疏】正義曰：聘之後有享，但不敢必其有無，故出請耳。褚氏云：「行聘之期，訝賓於大門外矣。擯者又出請事，蓋明知其行聘禮，而不敢晏然直受以爲聘已也，謙之至也。正聘已行，至於將享，擯者又出請焉。至享禮既終，明知其公事畢矣，而擯又出請事，蓋不敢逆料爲賓必無事，而遽行禮賓之禮，謙之至也。至私覲已行，真無事矣，然猶未敢必賓謂事已竟也，而復請焉。必賓告事畢，公乃出送，此則謙而又謙者也。比前後而觀之，可以識禮意矣。」賓楊，奉束帛加璧享。擯者入告，出許。許受之。【疏】正義曰：凡聘覲，皆行享禮。《禮經釋例》云：

「聘禮」：「賓謁，奉束帛加璧享。」又云：「庭實，皮則攝之。」此聘畢行享也。又云：「聘于夫人用璋，享用琮，如初禮。」此言聘享夫人之禮也。《覲禮》：「四享皆束帛加璧，庭實唯國所有。」注云：「四當爲三。」此覲畢行享也。皆禮之盛者也。諸侯使人於諸侯但一享，諸侯見於天子則三享，覲禮又盛於聘禮也。至於問卿之禮，則摯與庭實同受。士昏禮納徵亦然，士相見之禮但受摯而已，無庭實。又《聘禮》：「若有言，則以束帛如享禮。」注：「無庭實也。皆禮之殺者也。」餘互詳《覲禮》。注云「許受之」，謂許受其禮也。敖氏云：「許，許其人也。」非。庭實，皮則攝之，毛在內，內攝之，人設也。皮，虎豹之皮。攝

之者，右手并執前足，左手并執後足，毛在內，不欲文之豫見也。內攝之者，兩手相鄉也。人設，亦參分庭一在南。言「則」者，或以馬。凡君於臣，臣於君，麋鹿皮可也。【疏】正義曰：《集釋》注「或以馬」下，有「也」字。云「皮，虎豹之皮」者，賈疏云：「《郊特牲》云：『虎豹之皮，示服猛也。束帛加璧，往德也。』文無所屬，則天子諸侯皆得用之。此聘使爲君行之，故知皮是虎豹之皮也。《齊語》云：『桓公知天下歸己，令諸侯輕其幣，用麋鹿皮。』非其正也。」云「攝之者，右手并執前足，左手并執後足」者，鄭據下文「右首」

而言，故以爲右手執前足，左手執後足也。案：《士昏禮·記》曰：「納徵，執皮，攝之，內文，兼執足。左首，隨人西上。」注云：「兼執足者，左手執前兩足，右手執後兩足。」又下記曰：「凡庭實隨人，左先。」蓋人時皮皆左首，不特《昏禮》爲然，當以彼注「左手執前，右手執後」爲正。「右首」之說，詳後。云「毛在內，不欲文之豫見也」者，下賓致命時始張皮見文，故此攝之使在內，不欲豫見也。云「內攝之者，兩手相鄉也」者，謂左手鄉右，右手鄉左攝之也。云「人設，亦參分庭一在南」者，《昏禮》設皮之處參分庭一在南，見彼記，故知此亦然也。云「言則者，或以馬」者，庭實各以其國之所有，下記曰「皮馬相間可也」，是知有用皮者有用馬者，故經言「則」，以見非但皮而已。《禮經釋例》云：「案：《呂氏春秋·慎大覽·權勳篇》：『晉獻公乃使荀息以屈產之乘爲庭實，而加以垂棘之璧，以假道於虞而伐虢。』是晉人聘虞，享時束帛所加之璧爲垂棘之璧，庭實所設之馬爲屈產之乘，言其良也。三傳及《孟子》皆有此文，而何休、杜預、范甯、趙岐不知引享禮以釋之，疎矣。《左傳》哀公七年：『邾茅夷鴻以束帛乘韋，自請救于吳。』乘韋者，四皮，亦庭實也。蓋晉國產馬，庭實用馬；邾國不產馬，庭實用皮也。若皮、馬并產，則享用皮，覲用馬。介覲又用皮，如

經所云，亦相問之義也。」云「凡君於臣，臣於君，麋鹿皮可也」者，賈疏云：「凡君於臣，謂使者歸，君使卿贈如覲幣，及食饗以侑幣，酬幣，庭實皆有皮。臣於君，謂私覲實庭，設四皮，及介以儼皮，此皆用麋鹿皮，故云「凡」也。若然，《大宗伯》云「孤執皮帛」，鄭云「天子之孤用虎皮，諸侯之孤用豹皮」，得用虎豹者，彼所執以爲摯，與庭實不同也。」賓入門左，揖讓如初，升致命，張皮。張者，釋外足見文也。【疏】正義曰：「張皮」，執皮者張之也。《士昏禮·記》曰：「賓致命，釋外足，見文。」與此張皮同，故鄭引以爲證。張氏爾岐云：「當賓於堂上致命之時，庭實則張之見文，相應爲節也。」公再拜受幣，士受皮者自後右客。自由也。從東方來，由客後西，居其左受皮也。執皮者既授，亦自前西而出。【疏】正義曰：敖氏云：「再拜受幣，其儀亦如初，惟不襲耳。幣亦兼玉而言。」張氏爾岐云：「當公于堂上受幣，士亦于堂下受皮。」注云：「從東方來，由客後西，居其左受皮也」者，蔡氏德晉云：「謂主君之士從東方來，由執皮者後過西，客在右，士居其左以受皮也。」今案：北面以東爲右，受皮者在執皮者之西，故曰「右客」。《昏禮·記》曰：「士受皮者自東出于後，自左受。」與此同。云「執皮者既授，亦自前西而出」者，執

皮者在東，今既授，亦由受皮者之前過西而出也。下私覲時，經云「牽馬者自前西乃出」，此經不言，鄭據私覲文補之，故云「亦」也。賓出，當之坐攝之。象受於賓。

【疏】正義曰：李氏云：《司儀職》曰：「賓授幣，下出。」張氏爾岐云：「士初受皮，仍如前張之。及賓出降至庭，乃對賓坐而攝之。當，對也。」注云「象受於賓」者，謂對賓坐攝之，示親受於賓也。公側授宰幣，皮如入，右首而東。如入，左在前。皮右首者，變於生也。【疏】正義

曰：「側」，猶獨也。獨授，謂無摯贊也，《昏禮》受皮者適東壁，此云「而東」，蓋亦然。下記云：「賓之幣唯馬出，其餘皆東。」注云：「皆東，藏之內府。」注云「如入，左在前」

者，惠氏士奇云：「皮四張，執者初時行在前者，立在左。此受者東行，立在左者，行在前，故云「如入」。」今案：此與《昏禮》逆退者異。云「皮右首者，變於生也」者，案：《昏禮》「左首」注云：「象生。」此右首，故以爲變於生也。《禮經釋例》云：「《士昏》納徵，《聘禮》行享，執皮受皮，其例皆同。《士昏》執皮云「左首」，《聘禮》受皮云「右首」，鄭君遂生異議，云：「左首象生，右首變於生。」其說非也。蓋執皮者則左首，受皮者則右首耳。《士昏·記》執皮者左首，而受皮者無文；《聘禮》受皮者右首，而執皮者無文，其例互

見也。鄭氏以《士昏》爲左首，《聘禮》爲右首，敖氏據《士昏·記》欲改《聘禮》爲左首，皆失經之意。蔡氏德晉曰：「凡獻者左首，受者右首，禮相變也。」方之舊說爲長矣。」《釋例》又云：「聘賓問卿，庭實設四皮。問下大夫，如卿受幣之禮。郊勞僎使者乘皮設，其執皮、受皮之節，經皆不詳，蓋文不具也。至於上介覲，僎皮，入門左，奠皮，公再拜，受于中庭，不升堂，有司二人坐舉皮以東。其執皮受皮之節，殺於享禮也。上介面卿，經但云「皮，二人贊」，則又殺可知也。」餘互詳《昏禮·記》。聘于夫人用璋，享用琮，如初禮。如公立於中庭以下。【疏】正義曰：李氏云：「《司儀職》曰：『每事如初之儀。』」敖氏云：「聘、享皆致聘君之命也，夫人不可以親受，君代受之。其受之之禮，則皆與己之所受者同，以夫妻一體也。不言束帛加琮，省文耳。」若有言，則以束帛，如享禮。有言，有所告請，若有所問也。記曰：有故，則束帛加書以將命。《春秋》臧孫辰告糴于齊，「公子遂如楚乞師」，「晉侯使韓穿來言汶陽之田」，皆是也。無庭實也。【疏】正義曰：《校勘記》云：「注『若有所問也』，張氏曰：『監本無有字。』」云「有言，有所告請，若有所問也」者，謂有所告語請求及有所問訊也。「若」及也。云「記曰：有故則束帛加書以將命」

者，以記所云即此「有言」之事也。又引《春秋經》莊二十八年「臧孫辰告糴于齊」，僖二十六年「公子遂如楚乞師」，成八年「晉侯使韓穿來言汶陽之田」，而云「皆是也」者，略舉三事以爲有言之證也。賈疏謂「有所告」即告糴之類，「請」即乞師之類，「問」即言汶陽之田之類。案：「告糴于齊」，《公羊傳》曰：「告糴者何？請糴也。」是告糴亦可云「請」。賈疏分別三事未的。敖氏云：「若有言，因聘以達之，故卒聘而後行此禮也。此如「秦伯使西乞術來聘，且言將伐晉」之類。」今案：據下記云「若有故則卒聘，束帛加書將命」，是此禮於聘後行之，敖氏所引較確。韋氏協夢又引《左傳》「叔孫豹如晉聘，且言齊故」以證之。云「無庭實也」者，謂此禮唯無庭實，餘皆如享禮也。賈疏云：《國語》「臧孫辰以鬯圭者，是告糴之物。服注云：『無庭實也。』」今案：經但云「束帛」，不云加璧，又似無璧矣。韋氏云：「不用圭璧，不敢褻也。不用庭實，禮簡也。」擯者出請事，賓告事畢。公事畢。【疏】正義曰：敖氏云：「上云『請命』，此云『請事』者，以其將命之禮已畢故也。」

右聘享

儀禮正義卷十七 鄭氏注

績溪胡培塈學

賓奉束錦以請覲。覲，見也。鄉將公事，是欲

交其歡敬也。不用羔，因使而見，非特來。【疏】正義曰：

自此至「訝受馬」，言賓請私覲，主君不許而先禮賓之事。

○吳氏《章句》云：「用束錦不用束帛，嫌如享也。」江氏永

云：「私覲之束錦乘馬，^①亦是公家之幣，但對享禮爲私

耳。」今案：《周禮·校人》曰：「凡國之使者，共其幣馬。」

鄭注：「使者所用私覲。」江說是也。注云「覲，見也」者，

《爾雅·釋詁》文。《荀子》曰：「私覲，私見也。」云「鄉將公

事，是欲交其歡敬也」者，「鄉」當作「歸」，謂歸者行聘享公

事未伸其私敬，今請覲是欲交其歡敬也。云「不用羔，因使

而見，非特來」者，《周禮·大宗伯》曰：「卿執羔，大夫執

雁。」是見君之摯。定八年《左傳》：「公會晉師于瓦，范獻

子執羔，趙簡子、中行文子皆執雁。」是見他國之君，卿亦執

羔也。此因行聘出使而見，與特來異，故不用羔也。○《禮

經釋例》云：「案：《覲禮》享後無覲者，諸侯親見于天子，

享時已申其敬，無緣復有私覲也。《聘禮》享後有覲者，享

是聘賓致其君之命，至覲時聘賓始得自申其敬。蓋聘賓代

君行禮，故享後別有私覲，與覲不同也。《郊特牲》云：「朝

覲大夫之私覲，非禮也。」此言朝覲之禮，大夫從君而行，無

私覲也。又云：「大夫執圭而使，所以申信也。」鄭注：「以

君命聘則有私見。」此言大夫奉使出聘，則有私覲也。又

云：「不敢私覲，所以致敬也。」孔疏：「覆明從君而行，不

敢行私覲，所以致敬于己君也。」此申言上文朝覲大夫私覲

非禮之義，非謂大夫執圭而使不敢私覲也。今以《禮經》證

之，《覲禮》無私覲，《聘禮》有私覲，鄭、孔之說悉與經合

也。《賓者入告，出辭。客有大禮，未有以待之。【疏】

正義曰：以賓行聘享大禮未有以待之，欲先禮賓，故辭其

覲也。請禮賓，賓禮辭，聽命。賓者入告。告

賓許也。【疏】正義曰：褚氏云：「《冠禮》、《昏禮》注讀

「醴」爲「禮」者，從此經也。敖氏力欲異鄭，故於《冠禮》、

①「束」上，《鄉黨圖考》有「幣」字。

《昏禮》從經文，而此則讀「禮」爲「醴」。詳《士冠禮》。宰夫徹几改筵。宰夫，又主酒食者也。將禮賓，徹神几，

改神席，更布也。賓席東上。《公食大夫禮》曰：「蒲筵常，緇布純，加萑席尋，玄帛純。」此筵上下大夫也。《周禮》曰

「筵國賓于牖前，莞筵紛純，加纁席畫純，左彤几」者，則是筵孤也。孤彤几，卿大夫其漆几與？【疏】正義曰：《校勘

記》云：「注「緇布純」，重修監本「純」誤作「紳」。」加萑席尋，「萑」，陳本注作「莞」，疏作「萑」，閩本注、疏俱作

「莞」。「云「宰夫，又主酒食者也」者，《釋官》云：「案：

《周禮·宰夫職》：「掌賓客之飲食。」注：「飲食，燕饗也。」

是其又主酒食之事，故此禮賓實觶、薦籩豆脯醢，皆宰夫掌之。」云「將禮賓，徹神几，改神席，更布也」者，上几筵既設，

是爲神設。此爲人，故徹之改之而更設也。云「賓席東上」

者，凡設席，爲神西上，爲人東上。《士昏禮》云：「主人徹

几，改筵東上。」此不云東上，故注補之也，餘詳《士昏禮》。

云《公食大夫禮》曰：「蒲筵常，緇布純，加萑席尋，玄帛純。」此筵上下大夫也者，案：《公食禮·記》又曰「上大夫

蒲筵，加萑席」，此聘賓是上大夫，故鄭引以爲證，且欲推出

下引《周禮》所云是筵孤之禮也。云「《周禮》曰：筵國賓于

牖前，莞筵紛純，加纁席、畫純，左彤几」者，《司几筵》文。

云「則是筵孤也，孤彤几，卿大夫其漆几與」者，鄭以《公食·記》所云是筵上下大夫之法，故以此爲筵孤。又因孤用彤几，謂卿大夫用漆几。案：《周禮》五几：一玉几、二彤几、三彤几、四漆几，又有素几，乃喪事所用。吳氏《疑義》云：「卿大夫舍漆几外，更無他几，故鄭以意言之，非實有所據也。」又案：《司几筵》注謂「國賓諸侯來朝，孤卿大夫來聘」，與此注不同者，蓋鄭注《儀禮》時據《公食·記》推而言之，其《周禮注》未及改耳。公出，迎賓以人，揖讓如初。公出迎者，己之禮更端也。【疏】正義曰：敖氏

云：「『出』，出廟門也。公於門內之揖不盡與羣者同處，乃

云「如初」者，見其亦三揖耳。」今案：上行聘時，及席門，公

揖先入。此云「迎賓以人」，蓋與賓偕入，彌致謙敬也，敖云

「揖不盡與羣同處」以此。注云「公出迎者，己之禮更端

也」者，前是賓致禮於主君，此是主君致禮於賓，故享不出

迎，而禮賓出迎，是己之禮更端也。公升，側受几于

序端。漆几也。今文無「升」。【疏】正義曰：「側受几」

者，公自受几於宰夫，無擯相也。注云「今文無「升」者，

鄭以此宜有「升」字，故從古文也。授几之禮，詳《有司徹》

「授尸几」下。宰夫內拂几三，奉兩端以進。內

拂几，不欲塵坌尊者。以進，自東箱來授君。【疏】正義曰：注「塵坌」，《釋文》云：「坌」或作「被」。○李氏云：「內拂几，拂之向己也。坌，被也。」敖氏云：「先言「拂」，乃言「奉」，是拂時几猶在地也。奉兩端，謂橫執之。凡執几，皆橫執之，惟設時乃縮也。」盛氏云：「下云「公東南鄉」，則宰夫進几蓋西北鄉也。敖云「南面授公」，非。」注云「內拂几，不欲塵坌尊者」，是解所以內拂之意也。云「以進，自東箱來授君」者，據《覲禮·記》「几俟于東箱」也。公東南鄉，外拂几三，卒，振袂，中攝之，進，西鄉。進，就賓也。【疏】正義曰：外拂几，拂之向外也。敖氏云：「宰夫既拂几，公又親重拂之，敬也。卒，謂既拂也。振袂，去塵也。中攝之，謂二手於几之中央攝之也。」蔡氏云：「中攝之，便賓執兩端也。」《儀禮糾解》云：「卒拂而後攝之，則拂時猶宰夫執之也。《有司徹》：「主人二手橫執几，尸二手受于手間。」此中攝之，君禮異也。」注云「進，就賓也」者，前行聘時，公升二等，賓升，西楹西，東面。此公升特，^①賓亦升，不言者，省文也。賓在西楹西，東面，故知進西鄉爲就賓也。擯者告。告賓以公授几。賓進，訝受几于筵前，東面俟。未設也。今文「訝」

爲「梧」。【疏】正義曰：賓進，進至筵前受几也。東面仍前，至設几乃北面。注云「未設也」者，謂几未設也。賈

疏云：「未設而俟者，待公拜送訖乃設之故也。」云「今文

「訝」爲「梧」者，惠氏棟《古義》曰：《公食大夫禮》：「上

介受賓幣，從者訝受皮。」注云：「今文曰梧受。」《既夕》：

「若無器則梧受之。」注云：「謂對相授受。」疏云：「梧，即

逆也，對面相逢受。」案：「梧」本作「梧」，訓爲逆，訝亦逆

也。《既夕》注不疊古文，明古文「訝」亦有作「梧」也。」段氏

玉裁云：《說文》：「梧，逆也。」各本作「逆」，今正。逆，迎

也。逆，不順也，相迎者必相逆。古亦通用「逆」爲「逆」。

又段氏以「梧受」爲「梧」之譌，胡氏承琪云：「案：《釋名·

釋宮室》又云：「梧在梁上，兩頭相觸梧也。」梧之爲梧，亦

由聲近假借，非必字之譌也。」公壹拜送。公尊也。古

文「壹」作「一」。【疏】正義曰：敖氏云：「壹拜者，送几之

常禮。必著之者，以賓荅再拜稽首，嫌此拜爲再拜也。」

注云「公尊也」者，以公尊於賓，故壹拜也。云「古文「壹」爲

「一」者，詳《士冠禮》「賓盥，卒，壹揖，壹讓，升」下。賓

①「特」，疑當作「時」。

以几辟。辟位遂遁。【疏】正義曰：「遂遁」，詳前。北面設几，不降，階上荅再拜稽首。不降，以主人禮未成也。凡賓左几。【疏】正義曰：注「凡賓左几」，毛本「凡」誤「几」，嚴本亦誤。《校勘記》云：「《集釋》、《通解》俱作「凡」。張氏曰：「疏上几作凡，從疏。」○公壹拜而賓荅再拜稽首，臣禮也。注云「不降，以主人禮未成也」者，敖氏云：「不降，辟盛禮也。此禮賓之禮，以用幣之禮爲盛。」①今案：下送幣，公再拜，注云「事畢成禮也」。是禮賓之禮至用幣乃成，故此受几及下受醴皆不降拜，而受幣則降也。云「凡賓左几」者，《士昏禮》「賓以几辟，北面設于坐，左之」是也。言「凡」者，見爲人設几皆如是，神則右几，亦見《士昏禮》。宰夫實觶以醴，加枌于觶，面枌。酌以授君也。君不自酌，尊也。宰夫亦洗升實觶，以醴自東箱來。不面擲，不訝授也。【疏】正義曰：《校勘記》云：「注「不訝授也」，「授」，楊氏作「受」。」○凡醴皆用觶，枌所以扱醴者，詳《士冠禮》。注云「酌以授君也，君不自酌，尊也」者，此注似可疑。《禮經釋例》云：「考《士冠禮》賓禮冠者，《士昏禮》女父醴使者，皆不自酌，而用贊者酌之。至《士昏禮》舅姑醴婦則贊者酌之，亦贊者授之。是醴

不自酌，蓋《禮經》之通例如此，非獨《聘禮》宰夫實醴授公爲尊君也。」云「宰夫亦洗升實觶，以醴自東箱來」者，下記云「醴尊于東箱」，是醴自東箱來，故鄭以爲自下升東箱實觶也。言「亦」者，鄭以几在東箱，授几時當自下升取几，故云「亦」也。案：經不見設洗之文。褚氏云：「《冠禮》醴子，贊者洗于房中，豈醴子洗而醴賓反不洗歟？抑文不具歟？」云「不面擲，不訝授也」者，李氏云：「擲，即葉也。枌之大端爲葉，小端爲枌。面，前也。凡主人授賓醴者皆面枌，賓迎受之皆面葉。《冠禮》贊者酌醴以授主人，主人迎受，故贊者面葉，主人受之得面枌。此宰夫實醴，公不迎受，故宰夫面枌，公受之亦得面枌也。宰夫不言升降者，賤，略之。」今案：互詳《士冠禮》及下經「尚擲」下。公側受醴。將以飲賓。【疏】正義曰：敖氏云：「受醴不言序端，如受几可知。」蔡氏云：「側受，不用擯相也。」注云「將以飲賓」者，謂將以醴授賓也。賓不降，壹拜，進筵前受醴，復位。公拜送醴。賓壹拜者，醴質，以少爲貴。【疏】正義曰：《校勘記》云：「壹，楊作「一」，注

①「禮」，《儀禮集說》作「時」。

同。注「者」字，監本誤作「首」。○敖氏云：「壹拜，亦受禮之通禮。必著之者，嫌賓拜當再拜稽首也。賓於公乃不降而壹拜者，辟受幣之儀也。」盛氏云：「復位，復西楹西東面位。上不著其位而此云「復」，則其與聘時同可知。」今案：公拜亦壹拜，凡不言者可知也。上授几時公先拜送，此則賓先拜，儀節略異也。注云「醴質，以少爲貴」者，賓上下

皆再拜，此獨壹拜，以用醴尚質，以少爲貴故也。宰夫

薦籩豆脯醢，賓升筵，擯者退負東塾。事未

畢，擯者不退中庭，以有宰夫也。【疏】正義曰：籩盛脯，豆

盛醢，^①言「籩豆脯醢」者，見止一籩一豆也。《禮器》曰：

「有以少爲貴者，諸侯相朝，灌用鬱鬯，無籩豆之薦。大夫聘禮以脯醢。」謂此。退，自階下而退也。注云「事未畢，

擯者不退中庭，以有宰夫也」者，案：負東塾是擯者常位，

前行聘時，擯者退中庭，以有釋辭相拜之事，宜近嚮之。至

聘畢，擯者退負東塾而立，注云「反其等位，無事」。此禮賓

之事未畢，乃不退中庭者，以其薦籩豆等事有宰夫主之故

也。或曰：事未畢而退負東塾者，以馬將入中庭故也。

賓祭脯醢，以柶祭醴三，庭實設。庭實，乘馬。

【疏】正義曰：以柶祭醴三，即下記所云「祭醴，再扱，始扱

一祭，卒再祭」是也，詳《士冠禮》。注云「庭實，乘馬」者，

乘馬，四馬也，於賓祭醴時設之，以酬賓也。必知庭實爲乘

馬者，以下云「賓執左馬以出」知之也。降筵，北面以

柶兼諸觶，尚擯，坐啐醴。降筵，就階上。【疏】正

義曰：「尚擯」，唐石經及各本俱作「擯」。《校勘記》云：

「聶氏從木。案：《說文》無擯字，《手部》：「擯，理持也。」

又：「擣，刮也。」《士冠禮》「面葉」注云：「古文葉爲擣。」然

則今文作「葉」，古文作「擣」，或作「擯」。擯，擣雖皆《說文》

所有，宜以擣爲正。凡字之從鼠者，俗皆從葛，如臈、躡、躡

之類，故又爲擣。後人以柶從木，并擯字亦從木，非也。

《少儀》曰：「執箕膺擣。」擣，箕舌也，字亦當作擣。《弟子

職》作揲，揲即葉耳，其字亦從手。」又云：「坐啐醴」，監本

「醴」誤作「酒」。○「以柶兼諸觶」者，祭時左手執觶，右手

以柶祭醴，及降筵北面將啐醴時，則以柶兼并於觶，兩手奉

之以啐也。褚氏云：「敖氏謂以右手執柶，不識脫空

左手何用？」吳氏《章句》云：「尚同上。擯在上，則執枋

也。」注云「降筵，就階上」者，《士昏禮》女父醴使者，西

①「豆」，原作「互」，據《續清經解》本改。

階上北面坐，啐醴。此當與彼同，故鄭以降筵爲就階上，即就西階上也。公用束帛。致幣也。言用，尊於下也。

亦受之於序端。【疏】正義曰：敖氏云：「醴賓而用束帛庭實，所以將厚意，亦如饋禮也。」今案：《士冠禮》冠畢：「乃醴賓以壹獻之禮。主人酬賓，束帛儷皮。」案：儷皮即庭實也。此及《冠禮》醴賓皆有束帛庭實，蓋禮之盛者也。注

云「致幣也」者，謂庭實以束帛致也。云「言用，尊於下也」者，對《冠禮》酬賓束帛不言用也。云「亦受之於序端」者，上受几于序端，知此亦然也。《公食禮》侑賓云「公受宰夫束帛」，則此亦宰夫授之也。建柶，北面奠于薦東。

糟醴不卒。【疏】正義曰：注「卒」字，嚴本及各本多作「啐」。周氏學健云：「當作「卒」。上言啐醴，則非「不啐」明矣。」褚氏云：「酒卒爵而醴不卒爵，故注云「糟醴不卒」，作「啐」誤。」張氏爾岐、張氏惠言亦皆以「啐」爲「卒」之譌。

《校勘記》云：「單疏本《士冠》疏引此作「卒」。《集釋》此節釋辭已缺，尚存「不卒」三字。」戴震云：「似《集釋》所見本亦作「卒」。今據諸說改正。」○盛氏云：「建柶，以柶插觶中，尚枋也。敖云亦尚櫨，非。」今案：建柶而奠之，爲將受幣也。擯者進相幣。贊以辭。【疏】正義曰：擯者

自東塾至阼階西，故云「進」。注云「贊以辭」者，釋「相」之義也。賓降辭幣。不敢當公禮也。【疏】正義曰：嚴本「當」誤「富」。○敖氏云：「辭者，謂既受賜矣，不可以又辱盛禮。」公降一等辭。辭賓降也。【疏】正義曰：敖氏云：「辭者止其降，且不許其辭。」吳氏《章句》云：「兩辭皆擯者傳之。」栗階，升聽命。栗階，趨君命尚疾，不連步。【疏】正義曰：「聽命」，聽公辭之命也。注云「不連步」者，李氏云：「連步者，足相隨不相過，每等先舉一足而後足并之。栗階者，始升連步，至上等則不連步，左右足各一發而升堂。」今案：詳《燕禮》。降拜。拜受。【疏】正義曰：爲將受幣而拜也。公辭。不降一等，殺也。升，再拜稽首，受幣，當東楹，北面。亦訝受而北面者，禮主於己。己，臣也。【疏】正義曰：楊氏復云：「禮賓之禮有三節：受几也，受醴也，受幣也。三者公親受于序端而後授賓，恭之至也。禮莫重於幣，故賓受几受醴皆於筵前，受幣當東楹也。」敖氏云：「當東楹，其視爲君將幣者，又過東矣。」注云「亦訝受而北面者」，前行聘享時，訝授受，賓東面，主君西面。此亦訝受，而賓北面，主君蓋南面也。云「禮主於己。己，臣也」者，己謂聘賓。前聘享

是將君命，故賓不北面。此禮賓是主於己，己，臣也，宜循臣禮，故北面受幣也。退，東面俟。俟君拜也。不北面者，謙若不敢當階然。【疏】正義曰：注云「俟君拜也」者，謂退至西階東面，俟君拜即降也。云「不北面者，謙若不敢當階然」者，李氏云：「《鄉飲酒禮》賓主專階者皆北面。」公壹拜，賓降也。公再拜。不俟公再拜者，

不敢當公之盛也。公再拜者，事畢成禮也。【疏】正義曰：賓見公拜而即降辟，賓雖降，公猶再拜也。敖氏云：「賓已降而公猶再拜者，送幣之禮當然，宜終之也。」注云「不俟公再拜者，不敢當公之盛也」者，再拜爲公盛禮，賓不敢當，故不俟再拜而降也。云「公再拜者，事畢成禮也」者，前此授几、授醴，公皆壹拜。此再拜者，禮賓之事至此已畢，故須再拜以成禮，所以致謙敬也。賓執左馬以出。受尊者禮，宜親之也。效馬者并左右勒授之。餘三馬，主人牽者從出也。【疏】正義曰：敖氏云：「左馬者，上也。然則主人之庭實，亦設於西方而西上也。」蔡氏云：「庭實四馬，以左爲上。庭下北面，以西爲左也。」注云「受尊者禮，

宜親之也」者，解賓自執左馬之義也。云「效馬者并左右勒授之」者，《說文》：「勒，馬羈也。」《少儀》曰：「馬則執勒。」鄭注：「勒所以繫制之者。」《曲禮》曰：「效馬效羊者右牽之。」鄭注：「效，猶呈見。」此并左右勒授之者，便賓之執也。云「餘三馬，主人牽者從出也」者，下記曰：「主人之庭實，則主人遂以出。」是知餘三馬主人使人牽之從賓出，以授賓從者也。上介受賓幣，從者訝受馬。從者，士介。【疏】正義曰：「受賓幣」者，賓蓋左執幣，右執馬以出也。注云「從者，士介」者，鄭以下記云「賓之士訝受之」，又上云「上介受賓幣」，故知此受馬爲士介也。

右主君禮賓

賓覲，奉束錦，總乘馬，二人贊。入門右，北面奠幣，再拜稽首。不請不辭，鄉時已請也。覲用束錦，辟享幣也。總者，總八轡牽之。贊者，居馬間扣馬也。入門而右，私事自闕右。奠幣再拜，以臣禮見也。贊者，賈人之屬，介特覲也。【疏】正義曰：自此至「序從之」，言私覲之事，分賓覲、上介覲、衆介覲爲三節。○《周禮·司儀職》曰：「及禮、私面、私獻，皆再拜稽首，君荅拜。」鄭注云：「禮，以醴禮客。私面，私覲也，既覲則或有私獻者。鄭司農說私面，以《春秋傳》曰：『楚公子棄疾見

鄭伯，以其乘馬私面。」今案：《儀禮》見君謂之覲，見卿大夫謂之面，《周禮》、《左傳》以私覲爲私面者，對文異，散則通也。棄疾事，見昭六年傳。○注「鄉」，戴校《集釋》改「鄉」。「贊者居馬間」，《校勘記》云：「賈疏「居」誤爲「在」。」「云「不請不辭，鄉時已請也」者，「不請」謂賓，「不辭」謂主君。所以然者，鄉時賓已請覲，故今不復請，主君亦不辭也。敖氏謂：「此亦擯者出請，入告而出許，不言者可知。」與注異。褚氏云：「上已言辭請禮賓矣，禮後不必再請，注是也。」「云「覲用束錦，辟享幣也」者，以享君、享夫人皆用束帛，今覲用束錦，是辟享時所用幣也。」「云「總者，總八轡牽之」者，乘馬，四馬也，每馬二轡，故知總爲總八轡牽之也。」「云「贊者，居馬間扣馬也」者，四馬而二人贊，則知每一人居兩馬間，以左右手各扣一馬，助賓牽也。」「云「入門而右，私事自闕右」者，《玉藻》曰：「私事自闕東。」闕東即闕右，彼注以私事爲覲面，是也。但此「入門右」下，擯者辭後，賓仍入門左，《玉藻》蓋據正禮言之。」「云「奠幣再拜，以臣禮見也」者，凡臣於君皆奠而不授，義詳《覲禮》。」「李氏云：「由闕右，自牽馬，不從介，不升堂授幣，皆臣禮。」「吳氏《章句》云：「再拜稽首，奠幣於地，授馬於贊者乃拜也。」「《禮經釋例》云：「前聘享是代君行禮，故不拜；此覲是以私

禮見，故再拜稽首也。」「云「贊者，賈人之屬」者，或疑賈人專掌圭玉，不贊牽馬。褚氏云：「注意言如賈人之等，庶人在官執役者耳，非即指賈人。」「云「介特覲也」者，下上介、衆介皆特行覲禮，明不隨賓覲也。」「擯者辭。辭其臣。」「疏正義曰：辭其以臣禮見也。賓出。事畢。」「疏正義曰：賓以覲事已畢，出廟門外，接西塾立也。擯者坐取幣，出，有司二人牽馬以從，出門，西面于東塾南。將還之也。贊者有司受馬乃出。凡取幣於庭，北面。」「疏正義曰：《校勘記》云：「『塾』，閩本誤作『熟』。」「○「有司」，主國有司。」「東塾」，門外東塾也。敖氏云：「有司牽馬亦二人者，不可多於賓之贊也。」「西面于東塾南」，鄉賓也。」「注云「將還之也」者，謂擯者坐取賓所奠之幣出，令有司二人牽馬以從，示將還之，不敢當其臣禮也。云「贊者有司受馬乃出」者，謂贊者必待主國有司受馬，乃可以出。賈疏云：「幣可奠於地，馬不可散放故也。」「云「凡取幣於庭，北面」者，解擯者取幣北面，而又言「凡」以廣之，見取幣於庭者皆然也。擯者請受。請以客禮受之。賓禮辭，聽命。賓受其幣，贊者受馬。」「疏正義曰：上云「北面奠幣，再拜稽首，擯者辭」，此賓先以臣禮見而擯者辭

之也。此云「擯者請受，賓禮辭，聽命」，是擯者請以客禮受而賓許之也。注云「賓受其幣，贊者受馬」者，謂賓受擯

者取出之幣，贊者受有司牽出之馬也。牽馬，右之。

人設。庭實先設，客禮也。右之，欲人居馬左，任右手便

也。於是牽馬者四人，事得申也。《曲禮》曰：「效馬效羊

者右牽之。」【疏】正義曰：注云「庭實先設，客禮也」者，此

牽馬人設而下乃云「賓奉幣人」，是庭實先設，對上「奉束錦

總乘馬」，幣馬同人爲客禮也。云「右之，欲人居馬左，任右

手便也」者，馬在右，人在左，用右手牽之，便於控制也。云

「於是牽馬者四人，事得申也」者，若如前二人贊，則不得云

「右之」。既言「右之」，明人牽一匹，四馬四人，得申其牽馬

之常，賓不總牽也。敖氏云：「二人受於有司，而後四人牽

之。用四人，則左先隨人而設於西方。」今案：引《曲禮》

者，證「右之」之義也。賓奉幣，入門左，介皆入門

左，西上。以客禮人，可從介。【疏】正義曰：注「可從

介」，《校勘記》云：「陳本『介』作『也』。」○案：此與始覲時

不同。始覲時賓入門右而介不從，此則賓入門左而介又皆

人，蓋用客禮見，故注云「可從介」也。公揖讓如初，

升。公北面再拜。公再拜者，以其初以臣禮見，新之

也。【疏】正義曰：韋氏協夢云：「公再拜者，蓋荅歸時奠

幣之拜也。歸賓奠幣時，不敢以臣禮待之，故不荅拜。然

終無拜而不荅之禮，故于其始人也，即先再拜之。此與他

時拜至之意不同。」今案：韋說是也。賓三退，反還

負序。反還者，不敢與授圭同。【疏】正義曰：聘時賓執

圭，雖三退以避公之拜，然猶東面鄉公，故止退而負序。此

更言「反還」者，謂反轉西面，又還轉東面，乃負牆而立，蓋

益不敢當其禮，與授圭異也。振幣進授，當東楹北

面。不言君受，略之也。【疏】正義曰：振幣，亦謂以袂內

鄉拂其塵而授君也。李氏云：「禮賓、賓覲，授受當東楹，

臣禮也。《春秋傳》：「鄭伯如晉拜成，授玉于東楹之東，士

貞伯以爲視流而行速，不安其位。」凡敵者授受，當於兩楹

間也。」注云「不言君受，略之也」者，經言「進授」，則君

受可知，故不言也。士受馬者，自前還牽者後，

適其右，受。自，由也。適牽者之右而受之也。此亦

並授者，不自前左，由便也，便其已授而去也。受馬自前，

變於受皮也。【疏】正義曰：「前」，北方也。吳氏《章句》

云：「士受馬者，自南來北，至牽者之前，又自北還南，從

其左至牽者之後，故曰「還」。」注云「適牽者之右而受之

也。此解經「適其右，受」，「其」指牽馬者言也。四馬在庭，北面東上，牽者四人，各在馬左。今受馬者從牽馬後適牽者右，明於人東馬西受之也。云「此亦竝授者，不自前左，由便也，便其已授而去也」者，李氏云：「受不由其左者，欲牽者已授馬，右還而出便也。」云「受馬自前，變於受皮者，賈疏云：「上受享庭實之皮，受皮者自後右客。注云：「從東方來由客後西，居其左受皮也。」此亦從東而來，由馬前者，馬是生物，恐驚，故由前，是變於受皮也。」今案：受皮與受馬皆視受幣以爲節，如此經「振幣進授」下「當東楹北面」，即宜接云「賓降階東拜送」，乃序「士受馬者」云云于授幣之下，明君受幣即受馬也。《禮經釋例》云：「凡庭實之馬，右牽之人設于庭。賓授幣于堂，則受馬者受馬于庭，主人授其屬幣則馬出。案：《聘禮》賓覲：「牽馬右之，人設。」又賓升堂受幣之時，經云：「士受馬者，自前還牽者，後適其右，受。」又公側授宰幣之時，經云「馬出」。此《聘禮》賓覲受馬之節也。張氏爾岐曰：「此受馬亦視堂上受幣以爲節也。」《覲禮》：「侯氏享，奉束帛，匹馬卓上，九馬隨之，中庭西上。」又云：「侯氏降自西階，東面授宰幣，以馬出，授人，九馬隨之。」此《覲禮》三享受馬之節也。敖氏繼公曰：「王臣不於內受馬者，無以爲節，亦至尊

之禮異也。凡他禮之庭實，其主人之士受之者，皆以堂上授受爲節。」又《聘禮》：「面卿，賓奉幣，庭實從。」注：「庭實四馬。」蓋賓問卿類正聘之享，故庭實用四皮。賓面卿類正聘之覲，故庭實用四馬。其授受之節，當亦如賓覲也。又禮賓：庭實設，賓執左馬以出。歸饗餼，僎使者：庭實設，馬乘，大夫降，執左馬以出。《覲禮》郊勞：僎使者乘馬，使者降，以左驂出。皆受者親執馬，其節又與賓覲異也。又《聘禮》夫人歸禮：賓僎使者乘馬，上介兩馬。《覲禮》賜舍：僎使者乘馬。賜車服，僎使者四馬。經皆不云授受之節，文不具也。至於庭實用馬，或兩馬，或乘馬，猶之用皮，或僎皮，或四皮也。」**牽馬自前西，乃出。**自，由也。【疏】正義曰：敖氏云：「自前西」者，稍進而前乃西行，又南行而出也。」今案：牽馬者皆自前西。四人同出，出廟門也。**賓降階東拜送，君辭。**拜送幣於階東，以君在堂，鄉之。【疏】正義曰：享幣不拜送，此拜送者，以私覲之幣是賓自致也。階東，西階東也。鄭以階東爲鄉君，敖氏謂拜於西階東，別於己君也。凡臣於異國之君，其拜下者皆不當階。拜於階下者，己臣也。今以《儀禮》諸篇考之，其說亦通。**拜也，君降一等辭。**君乃

辭之，而賓由拜，敬也。【疏】正義曰：注「由拜」，《校勘記》云：「楊、敖『由』俱作『猶』」。浦鏜云：「由，古通猶。」云「君乃辭之，而賓由拜，^①敬也」者，或曰：「乃」當作「已」。上云「君辭」，此云「拜也」，是辭而猶拜，敬主君也。君降等再辭，於賓有加禮也。擯者曰：「寡君從子，雖將拜，起也。」此禮固多有辭矣，未有著之者，是其志而煥乎？未敢明說。【疏】正義曰：「從」，謂從賓而降。「起」，謂起而升階也。注云「此禮固多有辭矣，未有著之者，是其志而煥乎？」未敢明說者，賈疏云：「周公作經，未有顯著之者，^②直云辭耳。此及《公食》皆著其辭，此二者是志記之言，煥乎可見。」又云：「據此二者，觸類而長之，餘辭亦可以意作，但疑事無質，未可明說，故上注每云『其辭未聞也』。」敖氏云：「是時賓主相接，歡敬兩盡，故特見之，食禮亦然。」今案：《士冠》、《士相見》二篇，辭多見於經內，賈以爲志記之言，未確。此注疑有脫誤，闕之可也。栗階升。公西鄉。賓階上再拜稽首。成拜。公少退。爲敬。【疏】正義曰：「公少退」，示不敢當其拜，亦異於本國之君也。敖氏云：「少退，^③荅其反還之意也。」賓降出，公側授宰幣，馬出。庭中宜清。

【疏】正義曰：敖氏云：「于賓之降也，介亦逆出。」注云「庭中宜清」者，以宜潔清，故使馬出也。不言幣出者，皮幣皆束藏之。下記曰「賓之幣唯馬出，其餘皆束」是也。○以上賓覲。公降立。擯者出請。上介奉束錦，士介四人，皆奉玉錦束，請覲。玉錦，錦之文纖縟者也。禮有以少文爲貴者，後言束，辭之便也。【疏】正義曰：「降立」，俟介覲也。注云「玉錦，錦之文纖縟者也」者，纖縟，文繁也。李氏云：「如玉之縝密。」敖氏云：「纖縟而白。」似玉也。云「禮有以少文爲貴者」，士介之錦反文于賓與上介，是以少文爲貴也。《禮器》曰：「禮有以素爲貴者。」素即少文之義也。云「後言束，辭之便也」者，敖氏云：「亦玄纁束之類。」擯者入告，出許。上介奉幣，儷皮，二人贊。儷，猶兩也。上介用皮，變於賓也。皮，麋鹿皮。【疏】正義曰：敖氏云：「賓，卿也，私覲之庭實用乘馬；上介，大夫也，用儷皮；士介不用庭實。

- ①「由」，原作「已」，據《續清經解》本改。
②「顯著」下，《儀禮注疏》有「明言」二字。
③「退」下，《儀禮集說》有「辟之者」三字。

此禮之差等。」蔡氏云：「二人贊，使二人助攝也。」盛氏云：「執皮之法，蓋如享禮。」注云「上介用皮，變於賓也」者，賓用馬，上介用皮，是變也。但庭實唯國所有，或馬或皮不定。經於賓觀言馬，於上介言「皮」，互文耳。皮以兩，殺於賓也。上介若用馬，則亦二馬歟？皆入門右，東上，奠幣，皆再拜稽首。皆者，皆衆介也。贊者奠皮出。【疏】正義曰：注云「皆者，皆衆介也」者，上介祇一人。經兩言「皆」，故知兼衆介也。蔡氏云：「衆介皆奉幣，從上介入門右，奠幣稽首。」云「贊者奠皮出」者，皮與馬殊，可奠之於地，故知介奠幣時，贊即奠皮先出也。擯者辭。亦辭其臣。介逆出。亦事畢也。【疏】正義曰：此上介與衆介同以臣禮見也。擯者辭之，介以事畢故出耳。後擯者請受，乃分觀。上介以客禮見，衆介則仍不敢以客禮見。擯者執上幣，士執衆幣，有司二人舉皮，從其幣，出請受。此請受，請於上介也。擯者先即西面位請之，釋辭之時，衆執幣者隨立門中而俟。【疏】正義曰：注「衆執幣者」，《校勘記》云：「『衆執』二字，楊倒。」○盛氏云：「上幣，上介之束錦也。衆幣，士介四人之玉錦也。其出之次，擯者在前，舉皮者從之，執衆幣者在

其後。經以尊卑爲序，故先言士耳。」今案：經云「舉皮，從其幣」，明是從上介之幣也，盛說是。注云「擯者先即西面位請之，釋辭之時，衆執幣者隨立門中而俟」，敖氏云：「出請受，言其出爲請受也。」盛氏云：「時猶未請受也，而先著其故於出之下，亦經中之一例也。」今案：據敖、盛二說，則此時未請受，亦未釋辭，似是也。若如注說，則此已請矣，何下文又云「請受」乎？委皮南面。擯者既釋辭，執衆幣者進即位，有司乃得委之。南面，便其復入也。委皮當門。【疏】正義曰：注云「擯者既釋辭，執衆幣者進即位，有司乃得委之」，敖氏云：「執皮者從上擯出門，不俟上擯之釋辭，即委皮而退。」盛氏云：「委皮之節，敖得之。」云「南面，便其復入也。委皮當門」者，李氏云：「委皮於門中，北上。贊皮者得北面取之而先入，便。」執幣者西面北上，擯者請受。請於上介也。上言其次，此言其位，互約文也。【疏】正義曰：「執幣者西面北上」，亦在東塾南也。注云「請於上介也」者，李氏云：「雖衆幣亦請於上介，介同時觀，統於上介也。」云「上言其次，此言其位，互約文也」者，鄭意以擯者執上幣節是言其出之次，「委皮南面」以下是言其立之位，約文互見，故經兩言「請受」

也。敖氏則以上「請受」爲申言出之，故秦氏蕙田云：「案：上云『請受』，標其目；此云『請受』，實其事。本無二節。」盛氏云：「注、疏泥於經文之次，且不知上文所云『請受』爲目下事之例，似失其實，敖說爲是。」今案：「請受」，亦謂請以客禮受也。**介禮辭，聽命。皆進，訝受其幣。**此言皆訝受者，嫌擯者一一授之。【疏】正義曰：

《校勘記》云：「『一一』，徐本作『二』。」張氏曰：「注云嫌擯者一一受之，監、杭本以一一爲二。」從巾箱、嚴本。○敖氏云：「聽請受之命者，上介也。而士介亦皆訝受其幣者，此時統於尊者，不敢異之也。介既受幣，贊者乃取皮。」①

注云「此言皆訝受者，嫌擯者一一授之」者，謂上介及衆介皆同時受幣，不一一授之，故云「皆」也。訝受者，執幣者西面，介皆東面，是訝受也。**上介奉幣，皮先，入門左，奠皮。**皮先者，介隨執皮者而入也。入門左，介至揖位而立。執皮者奠皮，以有不敢授之義。古文重「入」。【疏】正義曰：注「皮先者」，「皮先」二字，陳、閩、《通解》俱倒。○獨言「上介奉幣」，明斯時士介不隨入也。敖氏云：「奠皮之處，亦參分庭一在南。」注云「皮先者，介隨執皮者而入也」者，案：執皮者先入，亦庭實先設之義也。云

「入門左，介至揖位而立」者，謂賓觀時，公揖讓如初，升。賓入門，待公揖乃進。此介不升堂，明入門至公揖處而立也。云「執皮者奠皮，以有不敢授之義」者，案：享時庭實用皮，使人執之以授，受皮者不奠於地。此奠而不授，明不敢與享時同也。云「古文重『入』」者，古文「皮先」下有兩「入」字，案：皮先，謂執皮者先於上介，則「入門左」自兼執皮與上介言之，不必重也，故鄭從今文。**公再拜。**拜中庭也。不受於堂，介賤也。【疏】正義曰：《校勘記》云：

「『拜』下，敖有『於』字。」○敖氏云：「公拜蓋西面也，下放此。」注云「拜中庭也」者，案：上云「公降立」以後，不見有升堂之文，故知於中庭拜也。云「不受於堂，介賤也」者，對賓升堂言之。**介振幣，自皮西進，北面授幣，退復位，再拜稽首送幣。**進者，北行，參分庭一而東行，當君乃復北行也。【疏】正義曰：「退復位」，吳氏《章句》謂聘時入門之位，是也。或以爲即上注「揖位」，恐非。

注云「進者，北行，參分庭一而東行，當君乃復北行也」者，謂自皮西進而北行，歷參分庭之一，乃折而東行，與公

① 「取皮」上，《儀禮集說》有「南面」二字。

相當，乃復北行至公所授幣也。敖氏云：「進者，北行將至中庭，與公稍相當，乃東行，及公左而北面，公還南面受幣也。」^①介退，公復西鄉，介拜亦北面。」褚氏云：「是時公立於中庭西面，如敖所云則是對公之面而行，相去無幾矣。注說爲長。」介出。宰自公左受幣。不側授，介禮輕。【疏】正義曰：注「不側授」，「授」，毛本作「受」。《校勘記》云：「徐本、《集釋》作「授」，是也。」今案：嚴本亦作「授」。云「不側授，介禮輕」者，上賓覲云「公側授宰幣」，此不云「側授」，是介禮輕也。李氏云：「不云側授，蓋贊者受於公，轉以授宰。」敖氏云：「文主於受者，故不言側。」褚氏云：「此亦鄭不側授之義爲長，觀下「宰夫受士介幣」之注更明。」有司二人坐舉皮以東。【疏】正義曰：上執皮者奠皮於地，故此坐舉之也。○上介覲禮竟。擯者又納士介。納者，出道人也。【疏】正義曰：注云「納者，出道人也」者，謂擯者出而道之使人也。士介入門右，奠幣，再拜稽首。終不敢以客禮見。【疏】正義曰：賓與上介初以臣禮見，辭之，終以客禮見。此士介仍入門右奠幣，用臣禮者，士介卑故也。吳氏《章句》云：「初擯辭時，雖隨上介聽命，然分又卑於上介，終不敢以客禮見

也。」擯者辭，介逆出。擯者執上幣以出，禮請受，賓固辭。禮請受者，一請受而聽之也。賓爲之辭，士介賤，不敢以言通於主君也。固，衍字，當如面大夫也。【疏】正義曰：注「一請」下，《校勘記》云：「楊無「受」字。」主君「下」，嚴本有「也」字，《校勘記》云：「徐本、《集釋》俱有「也」字，《通解》無。」○敖氏云：「公於士介亦辭之者，以其非己臣也。奠幣者四人，惟執其上幣以出，^②又但禮請受而已。皆殺於上介也。」盛氏云：「上幣，士長一人之玉錦也。」注云「禮請受者，一請受而聽之也」者，謂一請不從即聽之，不再請也。云「賓爲之辭，士介賤，不敢以言通於主君也」者，此釋經士介不辭而言賓辭之義也。云「固，衍字，當如面大夫也」者，賈疏云：「下士介面大夫時，「擯者執上幣出，禮請受，賓辭」，無「固」字，故知此「固」衍字。」李氏云：「一辭而許曰禮辭，再辭而許曰固辭。今擯者禮請受，明無固辭也。下士介面大夫時，賓亦一辭耳。」今案：賈、李之說是也，敖氏以「固」非衍字，褚氏云：「敖謂一辭而得請，亦可謂之「固」，則固辭與禮辭何別乎？」

① 「受」，原作「授」，今據《儀禮集說》改。

② 「惟」上，《儀禮集說》有「擯者」二字。

公荅再拜。擯者出，立于門中以相拜。擯者

以賓辭入告，還立門中闕外，西面。公乃遙荅拜也，相者贊告之。【疏】正義曰：「公荅再拜」者，荅其奠幣之拜也。

《曲禮》曰：「君於士不荅拜也，非其臣則荅拜之。」是也。

注云「擯者以賓辭入告，還立門中闕外，西面」者，以經云

「擯者出」，故知立門中闕外也。知西面者，以士介在門外之西，東面也。斯時公在門內中庭，故云「遙荅拜也」。云

「相者贊告之」者，謂擯者以公拜贊告士介，故云「相」也。

士介皆辟。辟，於其東面位逡遁也。【疏】正義曰：辟，

即逡遁之意。士介聞公之拜，不安其位而逡遁，所以爲敬

也。士三人，東上，坐取幣，立。俟擯者執上幣來

也。【疏】正義曰：「士」，主國之士也。擯者已執上幣，故

取幣祇須三人，此言「取幣」，則前不隨上幣出也。「東上」，

以公在東方也。注云「俟擯者執上幣來也」者，賓辭時，

上幣在擯者手，因有相拜之事，未授宰夫，故士先取餘幣，

立而俟之也。擯者進。就公所也。【疏】正義曰：注云

「就公所也」者，謂擯者自闕外人進至公所，乃授幣於宰夫

也。宰夫受幣于中庭，以東。使宰夫受於士，士介

幣輕也。受之於公左。賓幣，公側授宰，上介幣，宰受於公

左，士介幣，宰夫受於士，敬之差。【疏】正義曰：注云「使

宰夫受於士，士介幣輕也」者，以士介幣輕，故使宰夫受也。

江氏筠云：「謂「受於士」，敖君善謂受上幣於擯者。案：

經於介私面云「老受擯者幣于中庭」，又記詳賓之私獻云「擯

者授宰夫于中庭」，則敖說是也。云「受之於公左」者，《少

儀》曰：「贊幣自左。」經未言，故注明之也。云「賓幣，公側

授宰」者，即上賓覲時，公側授宰幣是也。云「上介幣，宰受

於公左」者，即上介覲時，宰自公左受幣是也。今士介幣使

宰夫受，是其敬有差等也。執幣者序從之。序從者，

以宰夫當一一受之。【疏】正義曰：注云「序從者，以宰夫

當一一受之」者，案：執幣者即上「坐取幣」之三人也，鄭意

以宰夫當一一受之，故此執幣之三人以次授之也。然經不

云「授宰夫幣」而云「序從」，明是宰夫受幣以東，執幣者以

次從之而東也。敖氏云「士三人從宰夫」，是也。○以上衆

介覲。

右 私 覲

擯者出請，賓告事畢。賓既告事畢，衆介逆

道賓而出也。【疏】正義曰：自此至「賓不顧」，言事畢送賓

之事。注云「衆介逆道賓而出也」者，上聘訖云「賓降介逆出」，故知介逆道賓也。但斯時賓及衆介俱在廟門外，此逆道賓出者，謂出中門及大門也。擯者入告，公出送賓。公出，衆擯亦逆道。紹擯及賓竝行，間亦六步。

【疏】正義曰：注云「公出，衆擯亦逆道」者，謂紹擯在前，承擯次之，上擯亦次之，公在後也。云「紹擯及賓竝行，間亦六步」者，六步，三丈六尺也。前行聘門外陳擯，注云「末介末擯，旁相去三丈六尺」，此紹擯及賓竝行，中間相去亦三丈六尺，故云「亦」也。及大門內，公問君。鄉以公禮將事，無由問也。賓至始入門之位，北面，將揖而出，衆介亦在其右，少退西上，於此可以問君居處何如，序殷勤也。時承擯，紹擯亦於門東，北面東上。上擯往來傳君命，南面。遽伯玉使人於孔子，孔子問曰：「夫子何爲？」此公問君之類也。【疏】正義曰：注「鄉」，戴校《集釋》改「鄉」。云「鄉以公禮將事，無由問也」者，敖氏云：「鄉者行禮之時各有其節，不可亂之，故問勞之事至是乃爲之也。」云「賓至始入門之位，北面，將揖而出，衆介亦在其右，少退西上」者，始入門之位即聘時賓入門左，注云「內賓位也，衆介隨入，北面西上少退」是也。云「於此可以問君居處何如，序

殷勤也」者，斯時賓北面，將揖，公南面，正可於此問君居處，以序殷勤記念之意。云「時承擯，紹擯亦於門東，北面東上，上擯往來傳君命，南面」者，即前賓入門左，注云「擯者亦入門而右，北面東上」是也。但上擯以往來傳命於賓，故南面。彼注云「上擯進相君」，當亦南面也。敖氏以爲賓東面，公西面而問之，恐非。遽伯玉事，見《論語·憲問篇》，鄭引之以此爲公問君之類者，朱子云：「所引《論語》非聘事，意略相類耳。」賓對，公再拜。拜其無恙。公拜，賓亦辟。【疏】正義曰：注「恙」字，《校勘記》云：「陳本缺。」○云「拜其無恙」者，「無恙」，言無憂病也。《爾雅·釋詁》：「恙，憂也。」《風俗通》：「恙，病也。」又云：「恙，噬人蟲，能食人心。古者草居，多被此毒，故相問勞曰無恙。」吳氏《章句》云：「公再拜慶之。」韋氏協夢云：「賓對亦當再拜。不言者，文不具。公再拜者，答賓之拜也。」今案：據《司儀》云「問君，客再拜對」，則韋說是。云「公拜，賓亦辟」者，初迎賓入門時，公再拜，賓辟，故知此亦辟也。公問大夫，賓對。公勞賓，賓再拜稽首，公荅拜。勞以道路之勤。【疏】正義曰：「問」，毛本誤「門」。《校勘記》云：「閩本誤以音爲注，以注爲音，葛本遂脫此注。」○

王氏士讓云：「但言『問大夫』，則上大夫卿該之。於君則拜其無恙，於大夫問之而已。」公勞介，介皆再拜稽首，公荅拜。賓出，公再拜送，賓不顧。公既拜，客趨辟，君命上擯送賓出，反告賓不顧，於此君可以反路寢矣。《論語》說孔子之行曰：「君召使擯，色勃如也，足躩如也。賓退，必復命曰：『賓不顧矣。』」【疏】正義曰：注云「公既拜，客趨辟」者，《周禮·司儀職》曰：「出及中門之外，問君，客再拜對，君拜，客辟而對。君問大夫，客對。君勞客，客再拜稽首。君荅拜，客趨辟。」鄭注：「中門之外，即大門之內也。問君曰：『君不恙乎？』對曰：『使臣之來，寡君命臣于庭。』問大夫曰：『二三子不恙乎？』對曰：『寡君命使臣于庭，二三子皆在。』勞客曰：『道路悠遠，客甚勞勞。』介則曰：『二三子甚勞。』問君，客再拜對者，為敬慎也。」今案：《周禮》較此經稍詳而大槩則同，注亦可以互證。此注云「客趨辟」者，即本《周禮》文也。云「君命上擯送賓出」者，以降等之客，君僅送於大門內，故命上擯送賓出也。云「反告賓不顧，於此君可以反路寢矣」者，賓雖出，君猶立而待之，故上擯送賓出大門，必以賓不顧回答君，君於此乃可自廟而回路寢也。又《司儀》注所云問君問大夫及勞客與介之辭，未知所出，《九經古義》引王伯厚云：「此

亦見《說苑》。」李氏云：「凡去者不荅拜。」敖氏云：「凡主人拜送賓，賓皆不顧。經於此見之者，明於尊者之禮如此，則其餘可知。」引《論語》云云，見《鄉黨篇》，此引以為反告賓不顧之證也。賈疏云：「此送賓是上擯，則卿為上擯。孔子為下大夫，得為上擯者，以孔子有德，君命使攝上擯。若定十年夾谷之會令孔子為相，同也。」江氏永云：「案：《鄉飲酒禮》：『賓出，主人送于門外，再拜。』注云：『賓介不荅拜，禮有終也。』此公再拜送賓，賓但趨避而不荅拜，遂不顧，是亦禮有終之意。《鄉黨》記『復命』，不考此注，似『復命』二字為虛文，若非君有命，何以謂之『復命』乎？經但言『賓不顧』，無命上擯送賓及擯者復命之文者，文不具耳。孔子行之，即是禮當如此。當時為擯者，或不復命，孔子則必復命也。上擯送賓，但送賓出大門，若送至館，自有訝者送之。經文此下云：『賓請有事于大夫，公禮辭許。』注謂：『上擯送賓出，賓東面而請之。擯者反命，因告之。』是復命時有二事：一告賓不顧，一告賓請明日有事于大夫也。當時有無未可知，附識於此。孔子攝上擯之說不可不知，知是攝上擯，則召是特召，君命尤重矣。」

右賓禮畢出公送賓

賓請有事于大夫。請問，問卿也。不言問聘，

聘亦問也，嫌近君也。上擯送賓出，賓東面而請之，擯者反命，因告之。【疏】正義曰：自此至「亦如之」，言賓請問卿，

卿先往勞之事。○注「不言問聘」，盧氏文弼云：「此「聘」

字疑衍。」云「請問，問卿也」者，案：「一問」字亦疑衍其

一，注蓋以請問卿解「請有事」也。經言大夫而不言卿，蓋

兼下大夫在內。云「不言問聘」，聘亦問也，嫌近君也」者，

以經言「小聘曰問」，聘亦稱問，嫌其近君，故不言問而言

「有事于大夫」也。云「上擯送賓出，賓東面而請之」者，問

卿乃明日事，於此請之，使先告君也。王氏士讓云：「有事

必請於其君，義無私交也。」云「擯者反命，因告之」者，義已

詳上。公禮辭，許。禮辭，一辭。賓即館。小休息

也。即，就也。【疏】正義曰：注「小休息」，毛本「小」作

「少」，嚴本作「小」。《校勘記》云：「徐本、《通解》俱作

「小」。」云「小休息也」者，謂自厥明訝賓于館，至是賓乃

即館，明日又將有事，是小休息也。此一日之間，行聘、行

享及禮賓、私覲，其事甚多。下勞賓及歸饗餼，亦與聘同

日，記云「聘日致饗」是也。《聘義》曰「聘射之禮，至大禮

也。質明而始行事，日幾中而后禮成，非强有力者弗能行

也。故强有力者，將以行禮也。酒清，人渴而不敢飲也；

肉乾，人飢而不敢食也；日莫人倦，齊莊正齊而不敢解惰，

以成禮節。云云，此之謂也。云「即，就也」者，義已詳《士冠

禮》。卿大夫勞賓，賓不見。以己公事未行，上介

以賓辭辭之。【疏】正義曰：「勞賓」，往賓館勞之也。「賓

不見」，不敢當其先施者。注云「以己公事未行」者，是釋

所以不見之故。「公事」，即問大夫之事。下記云：「問大

夫之幣俟于郊。」幣既公家具之，則事爲公事可知。云「上

介以賓辭辭之」者，蓋賓不見而使上介爲之辭也。知上介

辭者，以下經「上介受鴈」知之也。大夫奠鴈再拜，

上介受。不言卿，卿與大夫同執鴈，下見於國君。《周

禮》：凡諸侯之卿見朝君，皆執羔。【疏】正義曰：大夫以

賓不見，故奠鴈于地而再拜，上介爲受之。注云「不言

卿，卿與大夫同執鴈，下見於國君」者，上云「卿大夫勞賓」，

此但云大夫而不言卿，明卿與大夫同執鴈，下於見國君也。

云《周禮》：凡諸侯之卿見朝君，皆執羔」者，《周禮》掌客

職曰：「凡諸侯之禮，上公五積，卿皆見以羔。侯伯四積，

卿皆見以羔。」是卿見來朝之君執羔也。此見來聘之賓執

卿皆見以羔。」是卿見來朝之君執羔也。此見來聘之賓執

①「聘」，原脫，據上注文補。

鴈，是與見國君有異也。勞上介，亦如之。【疏】正義曰：「亦如之」者，亦勞於其館，上介不見，而士介代受鴈。

右賓請有事卿先往勞之

君使卿韋弁，歸饗餼五牢。變皮弁，服韋

弁，敬也。韋弁，韎韋之弁，兵服也，而服之者，皮韋同類，取相近耳。其服，蓋韎布以爲衣，而素裳。牲，殺曰饗，生曰餼。今文「歸」或爲「饋」。【疏】正義曰：自此至「無償」，言主君使人歸饗餼於賓介之事。○「使卿」者，以賓是上大夫，爵敵也。「五牢」者，飪一腥二，皆饗也；生二，餼也。

注云「變皮弁，服韋弁，敬也」者，李氏云：「《周禮》·司服《先序祭服，次韋弁服，次皮弁服，則韋弁尊於皮弁，故云「敬也」。二云「韋弁，韎韋之弁，兵服也，而服之者，皮韋同類，取相近耳」者，《字林》：「韋，柔皮也。」「韎，茅蒐染韋也。」韎是赤黃色，詳《士冠禮》。蓋皮以茅蒐染之，故其性柔，《釋名》云：「以韎韋爲弁，謂之韋弁。」是也。《周禮》·司服曰：「凡兵事韋弁服。」韋弁服爲兵服，而歸饗餼用之者，以聘用皮弁，皮韋同類，取其相近故也。云「其服，蓋韎布以爲衣，而素裳」者，鄭注《司服》云：「韋弁，

以韎韋爲弁，又以爲衣裳。《春秋傳》曰「晉郤至衣韎韋之跗注」是也。今時伍伯緹衣，古兵服之遺色。」今案：《司服》注謂衣裳亦用韎韋爲之者，蓋據《左傳》、《國語》皆云「韎韋之跗注」，又漢時伍伯緹衣，緹，丹黃色，與韎亦近故也。又鄭氏《六月》詩箋云：「天子之服，韋弁服，朱衣裳。」

據《左傳》「均服振振」，謂戎事上下同服，則卿大夫即戎，當以韎爲裳，韎亦朱類也。韋弁之制，自以《司服》注爲正。此注云「韎布以爲衣而素裳」，則衣用布而不用韋，裳用素而不用韎，皆與《司服》注異。賈疏謂「入廟不可純如兵服」，其說或然，但韎布他書無考，鄭云「蓋」，則亦疑而未定之辭耳。陳氏祥道謂韋弁即爵弁，敖氏從之。今案：爵弁爲士服，而韋弁通於大夫以上，自是二物。且爵弁用布，韋弁用韋，爵色近五人之緹，而韋用一人之韎，固不容強同者，陳氏說非也。云「牲，殺曰饗，生曰餼」者，饗兼飪與腥言，皆是已殺者。餼是生物，故以生與殺對言之。鄭注《論語》「告朔之餼羊」亦云：「牲生曰餼也。」云「今文「歸」或爲「饋」」者，胡氏承珙云：「《論語》「詠而歸」、「歸孔子豚」、「齊人歸女樂」，《釋文》竝云：「歸，鄭本作饋。」蓋《魯論》皆作「歸」，鄭從古文作「饋」。此《儀禮》則古文作「歸」，今文作「饋」，鄭又從古文作「歸」者，古文家亦各有師承，《儀禮》

古文不必與《論語》同也。又《論語》「詠而饋」，鄭注云：「饋，酒食也。魯讀饋爲歸，今從古。」詳鄭意，是《魯論》直以歸爲歸還之歸，與古《論》饋餉異義。故鄭必從古作「饋」，此經古文作「歸」者，本與饋同義，故不必改從饋。今案：《士虞禮》注云：「饋，猶歸也。」是二字義本通。上介

請事，賓朝服，禮辭。朝服，示不受也。受之當以尊

服。【疏】正義曰：注云「尊服」，謂皮弁服，下「賓皮弁迎大夫于外門外」是也。或疑注「朝服示不受」之說，不知朝服卑於皮弁，若賓既辭之，而仍服受之之服，有是理乎？注說未可易。有司人陳。入賓所館之廟，陳其積。【疏】

正義曰：上云「禮辭」，是一辭而許矣，故即入陳也。注

云「入賓所館之廟，陳其積」者，謂有司人賓館陳設之也。

知館必於廟者，下文「揖入及廟門」，注云「大夫行，舍於大夫廡」是也，義詳彼。《聘義》曰：「饋客於舍。」孔疏云：

「於舍，謂於賓館也。」或謂注以饗餼爲積似誤。案：《周禮·宰夫》注云「積謂牢米薪芻」，則下所陳亦積之屬也。

萬氏斯大云：「《聘義》曰：『主國待客，出入三積。』說者謂饋之牢禮米禾薪芻之屬曰積。考《聘禮》賓初至館，宰夫致餼，是一積也。聘之日，使卿致饗餼，是二積也。此所以供

其在館之資也。臨行當更有饋遺，以供其在道之需，是三積也。故曰「出入三積」。注、疏見《聘禮》不言積，因謂「出入三積」專指待上公之臣，《儀禮》是待侯伯之臣，故無積。然則致餼之禮，飭腥凡二牢，米禾皆二十車，而薪芻倍之。歸饗餼之禮，飭腥餼凡五牢，米禾皆三十車，而薪芻倍之，獨非積也邪？蓋分言之曰餼，曰饗，合言之則曰積。」今案：萬說是也。饗，謂飭與腥。【疏】正義曰：《周禮·天

官·序官》注云：「饗，割烹煎和之稱。」割者，腥也。烹、煎、和，飭也。」是饗兼飭與腥而言，故經以饗總目之也。

飭一牢，鼎九，設于西階前。陪鼎當內廉，

東面北上，上當碑，南陳。牛、羊、豕、魚、

腊、腸胃同鼎，膚、鮮魚、鮮腊，設扃鼎。腳、

臠、臠，蓋陪牛、羊、豕。陪鼎三牲臠，腳、臠、臠陪

之，庶羞加也。當內廉，辟堂塗也。腸胃次腊，以其出牛羊

也。膚，豕肉也，唯燂者有膚。此饌先陳其位，後言其次，

重大禮，詳其事也。宮必有碑，所以識日景，引陰陽也。凡

碑引物者，宗廟則麗牲焉，以取毛血。其材，宮廡以石，寔

用木。【疏】正義曰：《校勘記》云：「注『三牲臠』，諸本俱作

「臠」，《釋文》、《集釋》作「臠」。今案：嚴本作「臠」，與《說

文》合，從之。《校勘記》又云：「『唯燂者有膚』，陸氏曰：『燂，一本作燂，音潛。』膚，嚴本作『獻』。」今案：「膚」下「此」字，嚴本作「北」。黃氏丕烈云：「案：『膚此』，誤爲『獻北』，形涉而誤。」《校勘記》又云：「『引陰陽也』，朱子云：『引疑當作別。』周學健云：『別字固直截。或以繩著碑，引之而定方位，則引字亦可解。』敖氏改『別』。『凡碑引物者』，『引』，嚴本作『別』。案：上『引』字可作『別』，此『引』字不可作『別』，嚴本誤也。」○「飪」，熟也。熟食不可久停，故腥有多寡，而飪皆一牢。「鼎九」，即下所陳牛、羊至鮮魚、鮮腊九者也。「設于西階前」，統於賓也。陪鼎即羞鼎，其數三，即下所陳腳、臠、臠是也。陪鼎與銅異，辨見「六銅繼之」下。「東面」，鼎皆東向也。「北上」，鼎居北者爲首也。「上當碑」者，正鼎以牛爲上，陪鼎以腳爲上，謂鼎之上者，北與碑齊，其次向南陳之，故云「南陳」也。魚下言「鮮」，則此魚薨也。鮮腊，析而未乾也。鼎與肩鼐之制，詳《士冠禮》。蓋字，鄭、賈無釋，敖氏、郝氏以爲發語辭。盛氏云：「正鼎曰鼐，陪鼐曰蓋，皆所以覆鼎也。異其名者，鼐大而蓋小也。鼐以他物爲之，故云設。蓋與鼎同物，故不云設。言蓋而不言肩，陪鼎小，其手舉之歟？」秦氏蕙田以盛說爲長。褚氏云：「庶羞應在豆，豆用蓋，不用肩鼐。」

今案：經明云「陪鼎」而以爲豆，恐非。庶羞有盛於豆者，《公食大夫禮》是也。陪牛羊豕者，正鼎有九，而陪鼎止三，故以腳、臠、臠爲陪牛、羊、豕也。王氏士讓云：「五牢之序，先飪，次腥，次乃及餼。賓入館，先用熟者，次用腥者，餼則留以代置也。」注云「陪鼎三牲臠，腳、臠、臠」者，《公食禮》注云：「腳、臠、臠，今時臠也，牛曰腳，羊曰臠，豕曰臠，皆香美之名也。」《說文》：「臠，肉羹也。」段氏注云：「『臠』字不見於古經，而見於《招魂》。王逸云：『有菜曰羹，無菜曰臠。』許不云羹也，而云『肉羹也』，亦無菜之謂。《匡謬正俗》駁叔師說，甚誤。」然則腳、臠、臠即以牛、羊、豕之肉爲羹也。云「陪之，庶羞加也」者，以庶羞是加饌，非正饌，故云「陪」也。云「當內廉，辟堂塗也」者，李氏云：「內廉，西階之東廉也。階有東西兩廉，近堂之中者爲內廉。」《釋宮》又云：「堂塗謂之陳。郭氏曰：『堂下至門徑也，其北屬階，其南接門內雷。』」今案：據郭云「北屬階」，則堂塗直階矣。正鼎設于西階前，當稍近東，堂塗寬故無礙。若陪鼎設于正鼎之西，則有礙堂塗矣，故當內廉以辟之也。當，對也。吳氏《疑義》云：「飪鼎在西階前，稍東爲一列，陪鼎又在其東爲一列。」是也。故下經云：「如飪鼎二列。」云「腸胃次腊，以其出牛羊也」者，腊之後即列腸胃，以其出

於牛羊，故在膚前也。楊氏復云：「牛、羊、腸胃同一鼎，不異之，腍賤也。」云「膚，豕肉也」者，詳《少牢禮》。云「唯燂者有膚」者，鄭意蓋謂唯豕有膚耳，燂字或有譌誤。牛羊有腸胃而無膚，豕則有膚而無腸胃。《記》曰：「君子不食圉腍。」圉，犬豕也。云「此饌先陳其位，後言其次，重大禮，詳其事也」者，賈疏云：「先陳其位者，『南陳』已上是也。後言其次者，『牛羊豕』已下是也。」又云：「設飧，經直云：『飪一牢在西，鼎九，羞鼎三。腥一牢在東，鼎七。』不言次陳位者，飧禮小，略之也。」云「宮必有碑」者，賈疏云：「案：諸經云『三揖』者，鄭注皆云：『入門將曲揖，既曲北面揖，當碑揖。』」若然，《士昏》及此《聘禮》是大夫士廟內皆有碑矣，諸侯廟及天子廟有碑可知。《鄉飲》、《鄉射》言三揖，則庠序之內亦有碑矣，惟寢內不見有碑，但兩君相朝，燕在寢，豈不三揖乎？明亦當有碑矣。云「所以識日景，引陰陽也」者，李氏云：「視碑景邪正，以知日之早晚，視景短長，以知陰陽之盈縮進退。」設碑之處，鄭氏謂「近如堂深」。李氏《釋宮》申之云：「堂下至門謂之庭，三分庭一，在北設碑。」敖氏則云：「碑在庭東西南北之中。」焦氏以恕云：「此歸饗餼，醢醢百饗夾碑十列，又米百筥設于中庭，亦十列，繼醢醢而南。此碑居庭北之一證。又『還玉及賄

禮」章云「賓自碑內聽命」，賓負碑北面，聽命于下。如碑在中庭，而非庭北，則疑立處太遠。又「大夫降中庭，賓降自碑內，東面，授上介于阼階東」。兩言「碑內」，皆近堂階，而與中庭有別，當以鄭說爲是。云「凡碑引物者，宗廟則麗牲焉以取毛血」者，案：《祭義》云：「君牽牲，既入廟門，麗於碑，卿大夫袒，而毛牛尚耳，鸞刀以割，取腍脅乃退。」彼注云：「麗，猶繫也。」是其麗牲取毛血之事。云「其材，宮廟以石，窆用木」者，案：《說文》：「碑，豎石也。」是碑用石之證。段氏注云：《檀弓》：「公室視豐碑，三家視桓楹。」鄭注：「豐碑，斲大木爲之，形如石碑，於椁前後四角豎之，穿中於間爲鹿盧，下棺以綵繞。」案：此《檀弓》注即《聘禮》注所謂「窆用木」也。朱子云：「今禹墓窆石尚存，高五六尺，廣二尺，厚一尺許，其中有竅，以受綵引棺者也。然則窆亦用石矣。」今案：朱子說與鄭異，竝存之。腥二牢，鼎二七，無鮮魚、鮮腊，設于阼階前，西面，南陳如飪鼎，二列。有腥者，所以優賓也。【疏】正義曰：「腥」，殺而未烹也。不曰鼎十有四而云「二七」者，見其每牢七鼎，爲二列也。「無鮮魚、鮮腊」，少飪鼎之二，故每牢止七鼎也。「設于阼階前」，腥在東，與設飧同。「二

列」者，一列在阼階前少西，一列又在其西，當阼階之內廉也。北上，上當碑，俱與鉦同。方氏苞云：「鉦一牢外，復有腥二牢，何也？鉦鼎即日所需，腥鼎則翼日所需，始至，未暇自割牲故也。」○《校勘記》云：「注『腥』，徐本作『腊』。」張曰：「注曰：有腊者，所以優賓。案：疏腊作腥，經曰無鮮魚鮮腊，今注作有腊，傳寫誤也，從疏。」案：張引注無「也」，與徐本不合。今案：嚴本有「也」字。○云「有腥者，所以優賓也」者，對下士四人皆餼大牢無腥言也。堂上八豆，設于戶西，西陳，皆二以竝，東上，韭菹，其南醯醢，屈。戶，室戶也。東上，變於親食賓也。醢醢，汁也。屈，猶錯也。今文「竝」皆爲「併」。【疏】正義曰：「西陳」者，言豆自東向西設之，是東爲上，故下又云「東上」也。「皆二以竝」者，謂八豆皆菹醢，兩兩竝列。下云「韭菹，其南醯醢」，即二以竝之位也。舉此二豆以示人，則其餘豆之位可知。《周禮·醢人》：「朝事之豆，其實韭菹、醢醢、昌本、麋臠、菁菹、鹿臠、茆菹、麋臠。饋食之豆，其實葵菹、羸醢。」此經言豆實，但云韭菹、醢醢而已，不言其他。賈疏因用朝事之豆六，去茆菹、麋臠二豆，而以饋食之葵菹、羸醢足之，蓋據《公食禮》下大夫六豆，用韭菹、

醢醢、昌本、麋臠、菁菹、鹿臠，上大夫八豆，鄭注云「加葵菹、蝸醢」，蝸醢即羸醢；又據《少牢》用韭菹、醢醢、葵菹、蝸醢，朝事、饋食之豆兼用故也。敖氏則以八豆有茆菹、麋臠，而無葵菹、蝸醢，謂經惟言韭菹、醢醢，則爲朝事之豆可知，文省耳。二說不同，後人或從賈，或從敖，紛紛辨論，然經無正文，二者似皆可通。惟解「屈」字之義，則賈、敖俱失之。賈氏云：「屈者，謂其東上醢醢，醢醢西昌本，昌本西麋臠，麋臠西菁菹，菁菹北鹿臠，鹿臠東葵菹，葵菹東蝸醢，蝸醢東韭菹。」敖氏謂：「醢醢西昌本，昌北麋臠，麋西菁菹，菁南鹿臠，鹿西茆菹，茆北麋臠，曲折而下，所謂屈也。」今案：賈、敖之說，與經「二以竝」之文皆不合。賈以東上專屬醢醢，尤非。蓋韭菹、醢醢二者在東，其西爲昌本、麋臠二豆，昌本、麋臠之南爲菁菹、鹿臠二豆，菁菹、鹿臠之東爲茆菹、麋臠二豆。設法自東而西，復自西而東，故謂之「屈」。《公食禮》：「上大夫八豆。」注云：「四四爲列。」亦謂豆兩兩竝列，東西各四，南北亦各四也。○《校勘記》云：「注『於』，監本誤作『乎』。」云「戶，室戶也」者，堂上以室戶之西爲正中，故知戶謂室戶也。云「東上，變於親食賓也」者，案：《公食禮》是公親食賓，云：「宰夫自東房薦豆六，設于醬東，西上。」此云「東上」，是變於親食賓也。云

「醢，醢汁也」者，案：《周禮·醢人》注云：「醢，肉汁也。」又云：「醢醢，肉醬也。」《詩·大雅》疏以肉汁獨多，故名醢。然則醢本肉汁之名，而以之爲醢，則亦醬類，故《說文》云：「醢，肉醬也。」云「屈，猶錯也」者，案：此經言「屈」，下「八簋繼之」乃言「錯」，則「屈」與「錯」異，詳下。云「今文『竝』皆爲『併』者，詳《士昏禮》」。八簋繼之，黍其南稷，錯。黍在北。【疏】正義曰：李氏云：「繼豆以西，黍南稷，稷西黍，黍北稷，八簋間錯陳之。」敖氏云：「八簋，黍稷各四也。錯者，取二物相間之意。」吳氏《疑義》云：「錯者，東一行，北黍南稷；二行，北稷南黍；三行，北黍南稷；四行，北稷南黍。相間錯陳，與屈不同。」今案：屈與錯不可混爲一，吳說是也。黍稷，詳《公食禮》。簋，詳上「竹簋方」及《公食·記》「簋有蓋冪」下。六鉶繼之，牛，以西羊、豕，豕南牛，以東羊、豕。鉶，羹器也。【疏】正義曰：郝氏敬云：「六鉶，繼簋而西，牛居東，西爲羊，又西爲豕，北一列也。豕南爲牛，牛東爲羊，又東爲豕，南一列也。」吳氏《疑義》云：「北列，牛、羊、豕自東而西。南列，牛、羊、豕自西而東。屈也。」今案：經不言屈者，以可推而知。六者牛、豕東西常易位，而羊居不易

也。注云「鉶，羹器也」者，鉶是盛牛、羊、豕之羹，非盛肉也，《周禮·掌客》注亦云「羹器也」。《公食禮》：「宰夫設鉶四于豆西。」注云：「鉶，菜和羹之器。」是鉶爲器名，故《說文》云：「鉶，器也。」鉶以盛和菜之羹，因又以鉶爲羹名，鄭注《士虞禮》云：「鉶，菜羹也。」注《特牲禮》云：「鉶，肉味之有菜和者。」《詩·閟宮》：「毛魚載羹。」《毛傳》：「羹，大羹，鉶羹也。」《周禮·亨人》：「祭祀共大羹，鉶羹。」鄭司農云：「大羹，不致五味也。鉶羹，加鹽菜矣。」是又以鉶爲羹名也。段氏《說文注》云：「案：大羹煮肉汁不和，貴其質也。鉶羹，肉汁之有菜和者也。大羹盛之于登，鉶羹盛之于鉶，鉶羹菜和謂之芼，其詳在《禮經》。鉶，經典亦作鉶，非正字也。《內饗職》鉶作刑，亦假借字。」今案：《說文》有鉶字，云：「似鍾而長頸。」鍾，酒器也。據《說文》鉶與鍾相次，則鉶爲酒器，與鉶異。聶氏《三禮圖》引舊《圖》云：「鉶受一斗，兩耳三足，有蓋。士以鐵爲之，大夫以上以銅爲之，諸侯飾以白金，天子飾以黃金。」聶氏又云：「鉶是羹器，即鉶鼎也，故《周禮·掌客》注云『不殺則無鉶鼎』，然則據羹在鉶則曰鉶羹，據器言之則曰鉶鼎，據在正鼎之後設之則謂之陪鼎，據入庶羞言之則謂之羞鼎，其實一也。」楊氏《儀禮圖》亦因之。今案：此說甚誤。據此經上

云「陪鼎當內廉」，此堂上又有銅，則銅非陪鼎矣。《周禮·掌客》：「公銅三十有八，鼎簋十有二。」侯伯銅二十有八，鼎簋十有二。子男銅十有八，鼎簋十有二。」鄭注：「銅，羹器也。鼎，牲器也。鼎十有二者，正鼎九與陪鼎三。」鄭別銅與鼎爲二器甚明。其云「不殺則無銅鼎者」，謂不殺則無銅與鼎，非爲一物也。自賈氏《掌客》疏云「銅鼎即陪鼎」，後人沿其誤。蓋鼎以盛牲體，銅以盛煮牲肉汁，銅羹亦出於牲，故必殺牲乃有之。《禮經釋例》云：「《聘禮》：堂上六銅，牛以西羊豕，豕南牛，以東羊豕。又：西夾四銅，牛以南羊，羊東豕，豕以北牛。《公食禮》：「宰夫設銅四于豆西，東上，牛以西羊，羊南豕，豕以東牛。」此皆用大牢者，故銅羹有牛、羊、豕之別。《少牢禮》：「上佐食羞兩銅，取一羊銅于房中，^①下佐食又取豕銅于房中以從。」《有司徹》主婦獻尸：「入于房，取一羊銅，主婦贊者執豕銅以從。」注：「飲酒而有銅者，祭之餘銅。」此皆用少牢者，故銅羹有羊、豕之別。《士虞禮》陰厭：「設一銅于豆南。」《特牲禮》陰厭：「兩銅銅芼設于豆南。」此皆用特豕者，唯豕羹而已。」是也。又云：「鹽菜者所以和羹也，凡銅羹皆有之。《公食·記》曰：「銅芼，牛藿、羊苦、豕薇，皆有滑。」是也。案：銅芼，詳《公食禮》。兩簠繼之，梁在北。簠不

次簠者，梁稻加也。凡饌屈、錯要相變。【疏】正義曰：郝氏云：「簠以盛稻梁。兩簠，稻梁各一，繼銅而西，梁居北，稻居南。」注云「簠不次簠者，梁稻加也」者，簠、簋同類，今不次簠而次銅後，以見其爲加也。云「凡饌屈錯要相變」者，是廣言設饌之法。此節不言屈錯者，以兩簠止一行也。稻梁，詳《公食禮》。簠，詳《公食·記》。八壺設于西序，北上，二以竝，南陳。壺，酒尊也。酒蓋稻酒、梁酒。不錯者，酒不以雜錯爲味。【疏】正義曰：「西序」，堂上之西牆也。郝氏云：「酒八壺，順堂西牆，自北而南，兩兩相竝，向南陳也。」今案：《周禮·酒正》「共賓客之禮酒」，《酒人》「祭祀共酒以往，賓客之陳酒亦如之」，謂此。

注云「壺，酒尊也」者，謂盛酒之尊。《周禮·掌客》注：

「壺，酒器也。」《禮記·禮器》注：「壺大一石。」《公羊·昭二十五年傳》注：「壺，禮器，腹方口圓曰壺，反之曰方壺，有爵飾。」又爲盛水之器，見《周禮·序官·挈壺氏》注。又《禮記·投壺》釋文：「壺，器名。」是又爲投壺之器也。云「酒蓋稻酒、梁酒」者，謂稻、梁各四壺也。賈疏云：「以下夫人

①「羊」，原作「豕」，今據《禮經釋例》改。

歸禮，醢、黍、清各兩壺。此中若有黍，不得各二壺。若三者各二壺，則止有六壺，與夫人歸禮同。」又云：「鄭知不直有稻，黍而爲稻，梁者，稻、梁是加相對之物故也。」敖氏云：「八壺之酒，稻也、黍也、梁也。稻黍各二壺，稻在北，黍次之，梁四壺又次之，蓋如設筥米之例。」褚氏云：「注謂稻梁二種各四壺，賈以與夫人歸禮異解之，最的。」今案：八壺之實，經無明文。鄭、敖各以意言之，而鄭說較確。云「不錯」者，兩兩竝設，先稻後梁，不雜錯陳之。云「酒不以雜錯爲味」者，是釋所以不錯之意也。○此設于戶西者，八豆、八簋、六鉶、兩簠及西序八壺，共三十二器，皆陳于堂上也。西夾六豆，設于西墉下，北上。韭菹，其東醢醢，屈。六簋繼之。黍其東稷，錯。四鉶繼之。牛，以南羊，羊東豕，豕以北牛。兩簠繼之，梁在西。皆二以竝，南陳。六壺西上，二以竝，東陳。東陳，在北墉下，統於豆。

【疏】正義曰：西夾設豆之次，賈疏據《公食禮》謂：「先設韭菹，其東醢醢，又其東昌本，南麋鬻，麋鬻西菁菹，又西鹿鬻。」今案：《公食禮》云「設于醬東西上」，此云「北上」，則其陳之必有異矣。唯郝氏敬云：「韭菹在西北，其東爲醢

醢，醢醢之南昌本，昌本之南麋鬻，麋鬻之西菁菹，菁菹之北鹿鬻，鹿鬻之北韭菹，故曰「屈」。其說本「西北上」賈疏之文，實於經義有合，秦氏蕙田說亦同，當以此爲正。姜氏兆錫、盛氏世佐皆嘗更定六豆次序，而與經未符，故不錄。郝氏又云：「六簋，黍稷各三。繼豆而南，黍在西北，東爲稷，稷南爲黍，黍西爲稷，稷南又爲黍，黍東又爲稷，故曰「錯」。亦是也。朱子云：「凡言「北上」者皆南陳，「西上」者皆東陳。此經「西夾六豆，設于西墉下，北上」，至兩簠下，結云：「皆二以竝，南陳。」又云：「六壺西上，東陳。饌于東方亦如之，西北上，壺東上，西陳。」則是東西之饌，自簠以上皆南陳，唯壺東西陳之。疏于東夾之豆亦云于「東壁下南陳」，而布置西夾之豆乃東陳之，又以簋、鉶、簠皆與壺東陳，不唯與經文不合，而亦自相牴牾，殊不可曉。」秦氏蕙田云：「以朱子之說推之，則東西二夾所陳六豆最北，亦簠在豆南，四鉶在簠南，兩簠在鉶南，所謂南陳也。若如楊信齋《儀禮圖》，則豆、簋、鉶、簠在西夾者東陳，在東夾者西陳，與經文不合。」今案：楊《圖》蓋沿賈疏「東陳」一語而誤。六壺之酒，鄭無注。敖氏則謂稻酒、黍酒、梁酒各二壺，未知是否。二以竝，東陳者，謂六壺兩兩竝設，自西而向東陳之也。注云「東陳在北墉下，統於豆」者，鄭意

以豆、簋、鉶、簠皆在西墉下，自北而南，則豆之東尚有餘地，故以東陳爲在北墉下，向東陳之也。鄭知在北墉下者，以其統於豆也。敖氏謂壺不著其所，蓋亦近于簠而設之，與在堂上者之位相似，則已疑鄭說。郝氏乃謂壺在南墉下，不知夾固無南墉也。西夾、東夾之制，已詳前設殯節「西夾六」下。○王氏士讓云：「西統于賓，故飭先陳。在西堂上之饌亦于西，西夾之饌亦先叙。」饌于東方，亦如之。東方，東夾室。【疏】正義曰：盛氏云：「案：「之」，指西夾也。『如』者，如其『六豆北上』以下至『皆二以竝南陳』之儀也。唯設于東墉下爲異。」西北上。亦韭菹，其東醯醢也。【疏】正義曰：李氏云：「雖陳于東墉下，其陳亦以西北爲上，悉與西夾同。嫌統于東墉，以東北爲上，故著之。」注云「亦韭菹，其東醯醢也」者，上西夾設豆之次云「韭菹，其東醯醢」，明此亦然，是以西北爲上也。壺東上，西陳。亦在北墉下，統於豆。【疏】正義曰：

此亦以豆西有餘地，故在北墉下自東向西陳之，統於豆也。○以上設於西夾，六豆、六簋、①四鉶、兩簠、六壺，凡二十四器，東夾亦然，共四十八器。唯壺東西陳爲異，餘兩夾位次悉同。褚氏云：「敖氏強以飭尊而腥卑，又強以堂上之

饌配飭，兩夾之饌配腥，太鑿。」醢醢百饗，②夾碑，十以爲列，醢在東。夾碑在鼎之中央也。醢在東，醢，穀，陽也，醢，肉，陰也。【疏】正義曰：《周禮·醢人》云：「賓客之禮，共醢五十饗。」《醢人》云：「賓客之禮，共醢五十饗。」彼注云：「致饗饌時。」是醢、醢百饗也。王氏士讓云：「醢、醢二物乃飭腥與饌諸品所宜相調和者，故叙次於飭腥之後，以見其爲百物之所需也。」○今案：饗，詳《既夕禮》「饗三：醢、醢、屑」下。注云「夾碑在鼎之中央也」

者，謂在飭鼎、腥鼎二者之中央也。前設鼎云「上當碑」，是鼎在碑南；此云「夾碑」，則似半在碑南半在碑北矣。「十以爲列」，蔡氏云：「謂左右直列。」吳氏《疑義》云：「醢五十饗作五行，在碑之東。醢五十饗作五行，在碑之西。十饗爲列是也。」云「醢在東，醢，穀，陽也，醢，肉，陰也」者，蓋以東爲陽方，西爲陰方也。敖氏則云：「醢在東，醢爲尊也。」褚氏云：「穀陽肉陰而分東西，注義甚精，何取尊卑爲義乎？」今案：褚說是也。惠氏云：「醢，醬也，後儒誤以爲醋，始于《廣雅》。古有梅無醋，《離騷》『吳酸』亦非醋

①「六」，原作「八」，今據上文及下「二十四」改。

②「醢」，原作「醢」，據《續清經解》本改。

也。俟考。鬴二牢，陳于門西，北面東上。牛，以西羊、豕，豕西，牛、羊、豕。鬴，生也。牛羊，右手牽之。豕，束之，寢右，亦居其左。【疏】正義曰：牛羊豕具爲一牢。此二牢者，謂生牛羊豕各二也。「陳于門西」，廟門內之西，爲其踐污館庭，使近外也。「北面」，向堂。自東而西，牛、羊、豕、牛、羊、豕，六者相間，共爲一行。敖氏云：「二牢爲一列，變於腥，亦以惟有牢故也。東上，門西之位然也，亦變於饗。」○《校勘記》云：「張氏曰：『注豕束之，案：疏云：豕束縛其足，亦北首。經云：牛，以西羊、豕。則豕在羊西，言東非也。東字誤作東爾，從疏。』案：嚴、徐、鍾本俱作「束」。云「鬴，生也」者，詳前。云「牛羊，右手牽之」者，《曲禮》曰：「效馬效羊者右牽之。」是也。用右手牽之，則人居其左矣。云「豕，束之，寢右，亦居其左」者，賈疏云：「豕束縛其足，亦北首寢卧其右，亦人居其左。案：《特性》云：『牲在其西，北首東足。』鄭注：『東足者，尚右也。』與此不同者，彼祭禮，法用右胖，故寢左上右。《士虞·記》云：『陳牲于廟門外，北首西上，寢右。』鄭注：『寢右者，當升左胖也。』變吉，故與此生人同也。」米百筥，筥半斛，設于中庭，十以爲列，北上。黍

梁稻皆二行，稷四行。庭實固當庭中，言當中庭者，南北之中也。東西爲列，列當醴醢南，亦相變也。此言中庭，則設碑近如堂深也。【疏】正義曰：筥，竹器。《詩》「維筐及筥」，《毛傳》「圓曰筥」，是也。此筥以盛米，與下記「四秉曰筥」之筥殊，下記又云「十斗曰斛」，則半斛五斗也。注云「庭實固當庭中，言當中庭者，南北之中也」者，賈疏云：「上享時直言庭實人設，不言「中庭」，則在東西之中，其南北三分庭一在南。此更言「中庭」，欲明南北之中也。上文「公立于中庭」，「宰受幣于中庭」，皆南北之中也。」褚氏云：「經凡言「中庭」者，南北之中也。言「階間」者，東西之中也。《燕禮》、《大射》司正立位及《士喪禮》置重之中庭，則既在東西之中，又在南北之中，與此「中庭」同也。敖氏謂「中庭乃東西之中，其南北之節，宜于庭少南」，非矣。」云「東西爲列，列當醴醢南，亦相變也」者，李氏云：「醴醢言「醴在東」，則南北爲列。米言「北上」，則東西爲列。米繼醴醢設之，知在醴醢南也。」今案：經云「十以爲列，北上」，則是十筥爲列，自東至西橫陳之。黍兩行在北，次梁兩行，次稻兩行，次南稷四行，與上醴醢百簠自北而南直陳之者異，故云「相變」也。李氏又云：「米以黍稷爲正，稻粱爲加，故南北兩端陳黍稷，而稻粱于其間設之。」郝氏云：

「稷獨四行。稷，百穀長，用廣也。」云「此言中庭，則設碑近如堂深也」者，李氏云：「醴醢夾碑，米設于庭南北之中而在醴醢南，則碑近北矣。設洗南北以堂深，而鄭言設碑如堂深，則碑東當洗也。」敖氏云：「此米從餼者也。」《禮經釋例》云：「敖以此節在『餼二牢』之下，故望文生義以爲從餼，非也。以米言之，簠簋之米從飭牢，筥米從腥牢，車米從生牢，經例甚明。考之下經，歸上介饗、飭、腥各一牢，堂上之饌六，西夾亦如之。下即云『筥及饗如上賓』，則米筥在醴醢饗之上，則從饗可知。『米百筥』節似非其次，宜在『醴醢百饗』節之上，絕爛誤在『餼二牢』節之下也。」今案：簠簋之米係已炊爲飯者，故從飭牢；筥米係春熟可即炊者，故從腥牢；車米係留以備用者，故從生牢。《釋例》說似亦可從，俟考。○此以上皆陳于門內者。《聘義》曰：「餼客于舍，五牢之具陳于內。」是也。門外，米三十車，車乘有五簋，設于門東，爲三列，東陳。大夫之禮，米禾皆視死牢。乘、簋，數名也。乘有五簋，二十四斛也。簋，讀若「不數」之「數」。今文「簋」，或爲「逾」。《疏》正義曰：《校勘記》云：「三十」，唐石經作「卅」，下同。注「五簋」「五」字，徐、陳、閩、葛俱作「伍」。○「設于門東」，廟門外之東也，下「門西」放此。「爲三列，東陳」，謂每

十車爲一列，首一列在西，餘二列以次向東陳之也。此及下所陳之車皆人輓之，非駕牛馬者。注云「大夫之禮，米禾皆視死牢」者，上飭一牢，腥二牢，合三牢，皆死牢也，故米三十車，禾亦三十車，是皆視死牢也。米禾視死牢，下注文云「乘、^①簋，數名也。乘有五簋，二十四斛也」者，乘、簋皆量器之數名。下記云：「十斗曰斛，十六斗曰簋，十簋曰乘。」注云：「乘十六斛。」是一乘爲十六斛，又五簋爲八斛，通爲二十四斛也。每斛十斗，故下記又云：「二百四十斗也。」此乘亦與「四秉曰筥」之「秉」殊，詳下記。云「簋讀若不數之數。今文『簋』或爲『逾』」者，胡氏承珙云：「鄭云『不數之數』，自是漢人常語，用以比方簋音，如《漢書·東方朔傳》注引蘇林曰『簋，音數錢之數』是也。賈疏以『不數』亦爲數名，恐非。今文『簋』爲『逾』者，『逾』疑當作『匱』。《說文》匱下云：『甌匱，器也，從匚，俞聲。』《玉篇》：『匱，余主切，器受十六斗。』此即《論語》『與之庾』之『庾』，《集解》引包注『十六斗爲庾』，與賈逵《左傳注》、唐尚書《國語注》皆合。」今案：據此，則逾即庾也。簋、庾皆十六斗量名，而鄭從古文作「簋」者，《周禮·陶人》「庾實二

①「注」，原作「經」，今據上注文改。

穀，鄭注「豆實三而成穀」，則穀受斗二升，然則二穀二斗四升，又非十六斗之庾。《周禮疏》謂庾本有二法，鄭恐與「實二穀」之「庾」混，故從古文，不從今文也。禾三十車，車三秬，設于門西，西陳。秬，數名也。三秬，千二百秉。【疏】正義曰：禾亦爲三列，不言者可知也。注云「三秬，千二百秉」者，下記云「四秉曰筥，十筥曰稷，十稷曰秬」，四百秉爲一秬，則三秬千二百秉也。薪芻倍禾。倍禾者，以其用多也。薪從米，芻從禾，四者之車皆陳，北轉。凡此所以厚重禮也。《聘義》曰：「古之用財不能均如此，然而用財如此其厚者，言盡之於禮也。盡之於禮，則內君臣不相陵，而外不相侵，故天子制之，而諸侯務焉爾。」【疏】正義曰：薪芻，義詳前「設飧」節下。敖氏云：「倍禾，謂車數也。獨言「倍禾」者，以其相類而相等故也。」盛氏云：「薪芻之屬，以束計不以秉計，《詩》云「生芻一束」是也。每車束數未聞。」今案：禾三十車，倍之則薪芻各六十車也。○注「古之用財」，毛本「財」誤作「材」。云「倍禾者，以其用多也」者，此言所以倍之之義也。云「薪從米，芻從禾」者，謂其設之亦于門東門西也。賈疏云：「鄭言此者，以經云「倍禾」，恐竝從禾陳之故也。」云「四者之車皆

陳，北轉」者，以其向內爲正故也。秦氏蕙田云：「米、禾皆以十車爲一列。米先西後東，故云「東陳」；禾先東後西，故云「西陳」。其轉則皆北鄉。敖氏以東陳爲西轅者，非。」今案：秦說是也。云「凡此所以厚重禮也」者，是統上文言之，「厚重禮」謂厚此聘禮也。下引《聘義》，即以明所以厚之意。《聘義》原文作「古之用財者」，此引無「者」字。○此以上皆陳于門外者，《聘義》曰：「米三十車，禾三十車，芻薪倍禾，皆陳於外。」是也。賓皮弁迎大夫于外門外，再拜，大夫不荅拜。大夫，使者，卿也。【疏】正義曰：賓不韋弁，嫌其加於致君命時之服也。外門，即大門。迎于外門外，敵禮也。不荅拜，亦爲人使之禮然也。注云「大夫，使者，卿也」者，以經所云「大夫」，即上君所使歸饗餼之卿，故云「使者，卿也」。卿稱大夫者，卿爲上大夫，故散文亦稱大夫也。揖入。及席門，賓揖入。賓與使者揖而入。使者止執幣，賓俟之於門內，謙也。古者天子適諸侯，必舍於大祖廟。諸侯行，舍於諸公廟。大夫行，舍於大夫廟。【疏】正義曰：韋氏協夢云：「揖入亦有每曲揖之節，經不言者，文省。」今案：敖氏以爲廟有外門者，臆說也。注云「賓與使者揖而入」者，經上云「揖

人，人大門也；下云「賓揖人」，謂入廟門也。人大門賓與使者竝入，入廟門則賓揖先入，故注又云：「使者止執幣，賓俟之於門內也。」知使者止執幣者，以下經始云「大夫奉束帛入」故也。云「謙也」者，前聘時公揖人立於中庭，此俟於門內，是謙也，敖氏云「俟之于入門右之位」是也。云「古者天子適諸侯，必舍於大祖廟」者，《禮運》曰：「天子適諸侯，必舍其祖廟。」是也。云「諸侯行，舍於諸公廟」者，賈疏云：「諸公，大國之孤。若無孤之國，諸侯舍於卿廟也。」今案：鄭知舍於諸公廟者，下記云：「卿館于大夫，大夫館于士，士館于工商。」注云：「館者必於廟，不館於敵者之廟，爲太尊也。」以此差之，故知諸侯行不舍於諸侯廟，而舍於其孤廟也。云「大夫行，舍於大夫廟」者，即記所云「卿館于大夫」也。此鄭因及廟門而申言之，以明賓館在廟也。大夫奉束帛。執其所以將命。【疏】正義曰：束帛所以將命者也。人，三揖，皆行。皆，猶竝也。使者尊，不後主人。【疏】正義曰：使者即大夫，主人謂聘賓。賓在館，則爲主人也。此使者奉君命來，故不後主人，與之竝行也。至于階，讓，大夫先升一等。讓不言三，不成三也。凡升者，主人讓於客三。敵者則客三辭，主人乃許升，

亦道賓之義也。使者尊，主人三讓，則許升矣。今使者三讓，則是主人四讓也。公雖尊，亦三讓乃許升，不可以不下主人也。古文曰「三讓」。【疏】正義曰：注云「讓不言三，不成三也」者，《儀禮》經內大率多言三讓，然必主客俱讓至三而後謂之三也。此經但言讓不言三者，褚氏云：「主人第三讓，客遂不辭而先升，主讓三而客讓二，故云『不成三』也。」云「凡升者，主人讓於客三。敵者則客三辭，主人乃許升，亦道賓之義也」者，胡氏承珙云：「凡升階之禮，主人先讓於客而客辭之，至主人三讓，客亦三辭，其數適均。于是主人先升，客從之。此由主人與客敵，或主人尊，皆主人道客先升，故主客適以三讓而升也。」今案：此注是廣言三讓之法，辭亦讓也。云「使者尊，主人三讓，則許升矣」者，謂主人一讓而客一辭，再讓而客再辭，至主人三讓，則客不辭而即升，是無三讓矣。此注即據此經「大夫先升」言之，以明經不云三之義也。使者即謂大夫也。云「今使者三讓，則是主人四讓也」者，案：注「今」，疑「令」之訛，言設令使者三讓也。張氏爾岐云：「假使客三辭而猶先升，則是主人四讓矣，禮固無四讓法也。」又云：「公雖尊，當其爲主人亦必三讓乃先升，此主人自下之義也。」今案：注云「公雖尊，亦三讓乃許升」者，此據行聘時公升二等，賓升，是公先

升，而經亦言三讓，明其爲主人之道如是，與此異也。胡氏又云：「此經大夫歸聘賓饗餼，大夫奉主君之命而來，尊其君命，故讓大夫先升。若《覲禮》郊勞至于階，使者則不讓而先升矣。此後聘賓問卿至于階，讓，賓升一等。鄭亦不從古文作「三讓」，亦以賓先升，不能成三讓也。」今案：此說極明。云「古文曰「三讓」者，此鄭從今文無「三」字，而疊出古文於注也。褚氏云：「鄭言今使者三讓則是四讓也者，明其必不然，是駁古文「三讓」之文，見所以不從之故，賈疏可疑。」今案：此節賈疏本欠明，敖氏又爲宜從古文之說，于是駁注者紛紛，而經義晦矣，今據張、褚、胡諸說申之。賓從，升堂，北面聽命。北面於階上也。【疏】正義曰：注云「階上」，階階上也。賓館于此有主義焉，故升降由階。大夫東面致命。賓降，階西再拜稽首，拜餼亦如之。大夫以束帛同致饗餼也，賓殊拜之，敬也，重君之禮也。【疏】正義曰：張氏爾岐云：「大夫東面致命，在西階上也。賓降階西再拜，東階之西也。殊拜者，分別兩次拜之，成拜訖，又降拜也。」今案：經云「拜餼亦如之」，是饗與餼分兩次拜矣。張氏謂成拜訖又降拜，盛氏以「拜餼亦如之」在「大夫辭」之上，則拜雖兩次，升

降只一番也。蔡氏疑「拜餼亦如之」在「升成拜」之後，蓋與張說同。大夫辭，升成拜。尊賓。【疏】正義曰：敖氏云：「大夫辭，亦稱君命辭之。」吳氏《疑義》云：「辭而升，升而成拜，君臣之禮皆然。注以爲尊賓，恐非。」受幣堂中西，北面。趨主君命也。堂中西，中央之西。【疏】正義曰：《校勘記》云：「注「央」，嚴本作「夫」。張曰：「杭本以夫爲失，監本作央。」西下，嚴、鍾俱有「也」字。」云「趨主君命也」者，斯時大夫在西，賓不受于堂中而至堂中之西受之，是急趨君命也。云「堂中西，中央之西也」者，李氏以爲「中堂與西楹之間」是也，敖氏謂「四分楹間一在西」則非矣。大夫降，出。賓降，授老幣，出迎大夫。老，家臣也。賓出迎，欲償之。【疏】正義曰：云「出」者，出廟門也。○《校勘記》云：「注「償」，徐本、《集釋》俱作「擯」。今案：戴校《集釋》云：「作「擯」訛。」大夫禮辭，許。入，揖讓如初。賓升一等，大夫從升堂。賓先升，敵也，皆北面。【疏】正義曰：「揖讓如初」，謂如前大夫奉束帛入，三揖，皆行，至于階，讓，蓋亦不成三也。胡氏承琪云：「聘賓償大夫則正用尋常賓主敵體之儀，可行三讓矣。乃云「揖讓如初」者，蓋

饋禮略也。其後賓問卿，至于階，讓。賓面卿，云「揖讓如初，大夫升一等，賓從之」。此則主人先升，而亦云「揖讓如初」者，亦以禮略故歟？注云「賓先升，敵也」者，前歸饗餼，大夫奉君命尊，故先升，此賓亦先升者，以饋禮賓主體敵，亦得先升也。云「皆北面」者，以下始云「賓奉幣西面，大夫東面」，明此時皆北面也。庭實設，馬乘。①乘，四馬也。賓降堂，受老束錦，大夫止。止不降，使之餘尊。【疏】正義曰：設庭實，受束錦，將以饋大夫也。高氏愈云：「卿郊勞以束錦饋之，此于致饗餼復然，蓋欲聯二國之好而致其慇懃如此。」注云「止不降，使之餘尊」者，大夫即使者。《禮經釋例》云：「注蓋謂使者奉主君之命來，有主君之餘尊，故不降。賈疏未能發明斯義。」褚氏云：「敖謂『降堂受錦，辟君禮』，是也。至解『不降』之義，細思終以注『餘尊』之說爲優。」賓奉幣西面，大夫東面。賓致幣。不言致命，非君命也。【疏】正義曰：幣，即束錦也。大夫對，北面當楣，再拜稽首。稽首，尊君客也。致對，有辭也。【疏】正義曰：注云「稽首，尊君客也」者，義詳郊勞節「勞者再拜稽首受」下。蔡氏云：「以賓稽首受其君命，故因其禮而答之也。」說亦

通。云「致對，有辭也」者，謂賓致幣當有辭，大夫對亦當有辭，但文不具耳。受幣于楹間，南面，退，東面俟。賓北面授，尊君之使。【疏】正義曰：「俟」者，俟賓拜送也。注云「賓北面授，尊君之使」者，以經云「受幣南面」，故知授者北面也。賓北面而大夫南面，以其爲君使尊之也。賓再拜稽首送幣。大夫降，執左馬以出。出廂門，從者亦訝受之。【疏】正義曰：方氏苞云：「同等宜再拜而不稽首，大夫既稽首拜受，則賓亦宜稽首拜送也。」注云「出廂門，從者亦訝受之」者，前禮賓時賓執左馬以出，從者訝受馬。故知此饋禮大夫執左馬以出，亦從者訝受之也。又《覲禮》郊勞，侯氏饋使者，使者以左驂出，事與此同。賓送于外門外，再拜。明日，賓拜于朝，拜饗與餼，皆再拜稽首。拜謝主君之恩惠於大門外。《周禮》曰：「凡賓客之治，令訝聽之。」此拜亦皮弁服。【疏】正義曰：前迎于外門外，故此送亦于外門外也。李氏云：「案：《鄉射禮》：『明日，賓拜賜于門外，主人不見。』知此拜饗餼亦于大門外也。拜于大門外而云『拜

①「馬乘」，原倒作「乘馬」，據《儀禮注疏》乙正。

于朝」，則諸侯外朝在大門外明矣。」今案：經云「拜饗與餼」，則二者亦殊拜也。

注云「《周禮》曰：『凡賓客之治，令訝聽之。』」者，此掌訝職《文》，據原本作「凡賓客之治，令訝訝聽之」，此引脫一「訝」字。盛氏云：「引之者，欲見賓之拜謝亦以告訝，而訝爲之導也。」○以上卿歸饗餼於賓。上

介，饗餼三牢。飪一牢，在西，鼎七，羞鼎三。飪鼎七，無鮮魚、鮮腊也。賓，介皆異館。【疏】正義

曰：三牢者，飪一、腥一、餼一也。敖氏云：「三牢，亦降以兩也。」○注「也」字，《集釋》無。云「飪鼎七，無鮮魚、鮮

腊也」者，前賓腥二牢，鼎二七，無鮮魚、鮮腊，故知此鼎七亦無鮮魚、鮮腊也。賓飪鼎九，此七爲異耳，羞鼎同。云

「賓、介皆異館」者，前及館云「展幣于賈人之館」，則賓介以下皆異館可知矣。據下記：賓，卿也，館于大夫。上介，大

夫也，館于士。士介，館于工商也。歸饗餼先賓後介，非必同時，以上介在賓館爲之請事入告，必賓禮畢而後能即己

館受禮也。腥一牢，在東，鼎七。堂上之饌六。

六者，賓西夾之數。西夾亦如之。筯及饗，如上賓。凡所不貶者，尊介也。言如上賓者，明此賓客介也。

【疏】正義曰：注「客」，《集釋》作「容」。盧云：「疏兩「客」

字同，亦當作「容」。許宗彥云：「客」不誤，明以此介爲賓客耳。」今案：許說是也。云「凡所不貶者，尊介也」者，

謂凡饌之數同於賓者，皆以尊介也。云「言如上賓者，明此賓客介也」者，經云「筯及饗如上賓」，筯即米百筯，饗即醯醢百饗，與賓同，明以賓客之禮待介也。郝氏云：「此西夾

不殺，以東夾全損也。」蔡氏云：「米醢醬不殺，常用等也。」說可附存。餼一牢。門外米禾視死牢，牢十

車，薪芻倍禾。凡其實與陳，如上賓。凡，凡

飪以下。【疏】正義曰：「死牢」，謂飪與腥也。「牢十車」，則米禾各二十車也。「薪芻倍禾」，則各四十車也。韋氏

云：「賓禮，門外米三十車，禾三十車，與此經所言「米禾視死牢，牢十車」互文見義。」注云「凡，凡飪以下」者，謂自

「飪一牢」至此，其所實之物與其陳設之序皆如上歸饗餼於賓也。下大夫韋弁，用束帛致之。上介韋弁

以受，如賓禮。介不皮弁者，以其受大禮似賓，不敢純

如賓也。儻之兩馬束錦。【疏】正義曰：王氏士讓

云：「儻卿馬乘，此以兩，是其降差。」○以上下大夫歸饗餼於上介。士介四人，皆餼大牢，米百筯，設于

門外。牢米不入門，略之也。米設當門，亦十爲列，北

上。牢在其南，西上。【疏】正義曰：「士介四人，皆餼大牢，米百筥」者，牛、羊、豕具曰大牢，謂每人餼以大牢及米百筥，故云「皆」也。「設于門外」，設于所館之門外也。士介亦異館。或曰：據《周禮·掌客》「凡介皆有饗餼」，此獨有餼者，餼具大牢，禮盛，故特著之，饗從略耳。然下記言士無饗，則士介本無饗矣，闕疑可也。注云「牢米不入門，略之也」者，上文賓餼陳于門西，米設于中庭，皆在門內，上介亦如之。此言「設于門外」，是不入門，故云「略」也。云「米設當門，亦十爲列，北上。牢在其南，西上」者，李氏云：「設于門外，不言東西，明當門。牢亦在米南，與賓介之陳同，此西上爲異耳。」今案：褚氏云：「此注「西上」恐是「東上」之訛。」以宰夫牽牛致命，當近東故也。宰

夫朝服，牽牛以致之。執紼牽之，東面致命，朝服無束帛，亦略之。士介西面拜迎。【疏】正義曰：注「士」，《校勘記》云：「嚴、徐、《通解》俱作「上」。」今案：作「上」誤也。云「執紼牽之」者，紼所以繫制牛者。《少儀》曰：「牛則執紼。」宰夫牽牛，則有司牽羊豕也。云「東面致命」者，謂宰夫于館門外，東面以君命致之也。云「朝服無束帛，亦略之」者，此宰夫，士也，故朝服。下士介亦以朝服受，爵同也。賓及上介皆以束帛致之，此無束帛，是略也。「亦」者，

亦上牢米不入門也。云「士介西面拜迎」者，以其爲主人，故知出門西面拜迎也。上經云「門外米禾視死牢」，此無死牢故無米禾，無米禾則無薪芻矣。士介朝服，北面再拜稽首受。受，於牢東拜，自牢後適宰夫右受，由前東面授從者。【疏】正義曰：上注云「士介西面拜迎」，此由西面轉而北面拜受也。云「受，於牢東拜，自牢後適宰夫右受」者，謂受時于牢東拜，拜訖由牢後適宰夫之右受牛，斯時宰夫蓋亦北面也。云「由前東面授從者」，謂由牢前東面以授從者也。無儻。既受，拜送之矣。明日，衆介亦各如其受之服，從賓拜於朝。【疏】正義曰：「儻」，《校勘記》云：「唐石經、嚴、徐、陳、閩、葛本、《集釋》、《通解》、楊、敎俱作「擯」。李氏云：「「擯」當作「儻」。下經、記無「擯」，及注「不擯賓」同。」秦氏蕙田云：「案：「儻」，石經及宋元本皆作「擯」，故楊復、李如圭皆云當作「儻」，監本已改正。」今案：毛本作「儻」，與監本同，從之。○賓上介受饗餼皆有儻，此士介無儻，義詳下記「無饗者無儻」下。注云「既受，拜送之矣」者，謂士介既拜受，宰夫亦拜送之，經不言者，略也。云「明日，衆介亦各如其受之服，從賓拜於朝」者，案：賓受君賜必拜於朝，衆介自無不拜之理，故注補

之。衆介，兼上介在內。此節注皆以補經所未及也。○以上宰夫饗士介。

右歸饗餼於賓介

賓朝服問卿。不皮弁，別於主君。卿，每國三

人。【疏】正義曰：自此至「如主人受幣禮不拜」，皆言賓問主國卿大夫之事，分四節：賓初以君幣問卿，次以私幣面卿，一也。次上介特面，次衆介皆面，二也。次上介以君幣問下大夫嘗使至者，次上介以私幣面下大夫，三也。次又設言大夫不見之禮，四也。此賓于聘之明日，拜饗餼于朝，返即備舉此禮。○高氏愈云：「聘本爲君也，而因以及其夫人，而并以問其卿大夫，則凡內外尊卑之間，無不致其慇懃敬禮之意，而所以睦於鄰者大矣。」注云「不皮弁，別於主君」者，上聘賓與主君行聘享私覲等禮皆皮弁，此不皮弁而朝服，是不敢與正禮同服，故云「別於主君」也。云「卿，每國三人」者，詳前「君與卿圖事」下。鄭言此者，見問徧及三卿，其下大夫則惟使至己國者問之也。卿受于祖廟。重賓禮也。祖，王父也。【疏】正義曰：賓問卿，卿不辭而即受之者，賈疏云：「初君送客之時，賓請有事于

大夫，君禮辭，許，是以卿不敢更辭。」今案：下記云：「大夫不敢辭，君初爲之辭矣。」是也。注云「重賓禮也」者，謂不受于禰廟而受于祖廟，是重之也。云「祖，王父也」者，

賈疏云：「大夫三廟，有別子者立大祖廟，非別子者并立曾祖廟，王父即祖廟也。今不受于大祖廟及曾祖廟，而受于祖廟，以其諸侯受於大祖廟，大夫下君，故受於王父廟。」

下大夫擯。無士擯者，既接於君所，急見之。【疏】正義曰：《校勘記》云：「夫，唐石經作『大』，誤。」○前主君接賓，有卿爲上擯，大夫爲承擯，士爲紹擯。此則但使下大夫爲擯而已，蓋禮簡於君也，李氏云「不必備士擯」是也。敖氏云：「下大夫擯，公使爲之也。」盛氏云：「此與卿聘而用大夫爲上介之意同。」注云「無士擯者，既接於君所，急見之」者，謂行聘享時卿已與賓相接，故急見之。吳氏《疑義》云：「注說曲而未當。夫使禮果當有士擯，豈得以急見之故，并禮廢之？」今案：吳說似是。擯者出請事，

大夫朝服迎于外門外，再拜。賓不荅拜，揖。大夫先入。每門每曲揖。及廟門，大夫揖入。入者，省內事也，既而俟於寧也。【疏】正義曰：「擯者」，下大夫也。大夫即卿也，下同。「朝服」，如賓

大夫朝服迎于外門外，再拜。賓不荅拜，揖。大夫先入。每門每曲揖。及廟門，大夫揖入。入者，省內事也，既而俟於寧也。【疏】正義曰：「擯者」，下大夫也。大夫即卿也，下同。「朝服」，如賓

服也。大夫亦有每門每曲揖者，盛氏云：「大夫三廟，茲受於祖廟，祖廟在大祖廟之東南，則自入都宮之門之後，又多東行一曲也。」王氏士讓云：「案：大夫二門，人大門東曲，又北曲而至都宮門，然後及廟門。賈疏仍主廟制一列之說，誤。」今案：公迎聘賓在大門內，大夫迎賓在大門外，故有大門外之揖，經云「揖，大夫先入」是也。人大門後，又有每門之揖者，謂至大門內北行有揖，及至都宮門又揖也。「每曲」之說，王氏得之，盛說亦可存參。注云「入者，省

內事也，既而俟於寧也」者，賈疏云「省內事，請入爲席」是也。寧，門屋寧也。不俟於庭者，下君也。《爾雅》：「門屏之間謂之寧。」李巡謂：正門內兩塾間名曰寧，孫炎謂：門內屏外，人君視朝所佇立處。今案：大夫無屏，則寧當即謂正門內兩塾間也。《詩·齊風》：「俟我于著乎而。」孫炎

云：「著與寧，音義同。」然則卿大夫士亦得通稱「寧」矣。蓋公揖人立於中庭，不復出，此則揖人省內事後，復出而俟於兩塾之間，故賈以爲下君也。擯者請命。亦從人而出請，不几筵，辟君也。【疏】正義曰：《校勘記》云：「注

「几」，徐本作「凡」，誤。」云「亦從人而出請」者，謂擯者從卿人而後出請命也。賈疏云：「亦者，亦君受聘時。」云

「不几筵，辟君也」者，詳前「几筵既設」下。敖氏謂：「君使

尊，不敢設神位以臨之。」義可存參。庭實設四皮。麋

鹿皮也。賓奉束帛入。三揖，皆行，至于階，

讓。皆，猶竝也。古文曰「三讓」。【疏】正義曰：《校勘

記》云：「注「三讓」，徐本「三」作「二」，誤。《通解》、《集釋》

俱作「三」。○詳前「歸饗餼」節。賓升一等，大夫

從，升堂，北面聽命。賓先升，使者尊。【疏】正義

曰：注云「賓先升，使者尊」者，使者即賓，言使則見其奉君

命來也，李氏云「聘君之命」是也。賓東面致命。致其

君命。大夫降，階西再拜稽首。賓辭，升成

拜。受幣堂中西，北面。於堂中央之西受幣，趨聘

君之命。【疏】正義曰：上賓致命，爲致其君命，故此降拜

稽首，如見聘君然。賓降，出。大夫降，授老幣，

無償。不償賓，辟君也。【疏】正義曰：《校勘記》云：

「償，唐石經、徐、陳、閩、葛、《集釋》、《通解》、楊、敖俱作

「擯」，注同。」今亦從毛本作「償」，義詳於前。○李氏云：

「案：卿受問之儀與賓受饗餼禮同，惟在君側不償賓爲異

耳。」○以上賓問卿，下乃言面卿之事。擯者出請事，

賓面，如覲幣。面，亦見也。其謂之面，威儀質也。

【疏】正義曰：賓私覲用束錦乘馬，此云「面如覲幣」，則亦用束錦乘馬也。注云「面，亦見也」者，前「賓奉束錦以請覲」，注「覲，見也」，故此云「亦」。敖氏云：「聘使私見於主君曰覲，於大夫曰面，蓋異其稱以別尊卑也。」云「其謂之面，威儀質也」者，以覲儀繁，面則儀簡耳。散文覲亦稱面，詳前「賓覲」下。賓奉幣，庭實從。庭實，四馬。【疏】正義曰：吳氏《章句》云：「庭實不先設，辟君。」入門右，大夫辭。大夫於賓人，自階下辭迎之。【疏】正義曰：「辭」者，辭其人門右也。鄭知階下辭者，賈疏云：「以其授老幣時降故也。」敖氏云：「於中庭南面辭之。」褚氏云：「階下太遠，敖是也。」賈又云：「知迎者，下文「揖讓如初」，明迎之可知。」賓遂左。見，私事也。雖敵，賓猶謙，入門右，爲若降等然。《曲禮》曰：「客若降等，則就主人之階。主人固辭於客，然後客復就西階。」【疏】正義曰：《校勘記》云：「注『固辭』，徐、陳、《通解》『固』俱作『興』。」云「見，私事也。雖敵，賓猶謙，入門右，爲若降等然」者，敖氏云：「賓與大夫爵敵，乃若降等然者，不敢自同於奉命之禮也。」今案：引《曲禮》者，證降等之法。此賓先入門右，因大夫辭而遂左，與降等之客先就主人之階，因主人辭而

復就西階略同，故云「若降等然」也。庭實設，揖讓如初。大夫至庭中，旋竝行。【疏】正義曰：「揖讓如初」者，謂如問卿時三揖，皆行，至于階，讓亦不成三也，義詳前。注云「大夫至庭中，旋竝行」者，褚氏云：「注意必俟賓人，始從階至中庭，^①與之竝行，亦嫌自尊。敖謂「主人至入門右之位，揖賓而皆行」，理較勝。」大夫升一等，賓從之。大夫先升，道賓。【疏】正義曰：前賓奉君命問卿，故賓先升；此則大夫先升者，行體敵之禮，先升爲道賓也。大夫西面，賓稱面。稱，舉也。舉相見之辭以相接。【疏】正義曰：賓稱面，致面見之辭也。敖氏云：「稱面不言東鄉，可知也。」大夫對，北面當楣再拜，受幣于楹間，南面，退，西面立。受幣楹間，敵也。賓亦振幣進，北面授。【疏】正義曰：「大夫對」，答其稱面之辭也。「退，西面立」，俟賓拜送也。敖氏云：「不稽首，別於聘君之命也。不言受馬之儀，如覲可知。」注云「受幣楹間，敵也」者，前受幣堂中西，注以爲趨君命，此受

①「階」下，《儀禮管見》有「下」字。

于楹間，是行敵禮也。楹間，堂東西之中也。賓當楣再拜送幣，降，出。大夫降，授老幣。

右賓問卿面卿

擯者出請事。上介特面，幣如覲。介

奉幣。特面者，異於主君，士介不從而入也。君尊，衆介始覲，不自別也。上賓則衆介皆從之。【疏】正義曰：「幣如覲」，亦束錦儷皮也。「介奉幣」，介即上介也，下同。

注云「特面者，異於主君，士介不從而入也」者，前覲主君時上介及士介同奉幣請覲，此上介特面卿，士介不從而入，是異於見主君也。云「君尊，衆介始覲，不自別也」者，高氏愈云：「君尊，故上介與衆介同時而覲，若臣之覲君也。」今案：云「始覲」者，謂前覲君時，擯者辭後上介乃奉幣先覲，其初則上介、衆介同人門右奠幣再拜，不自分別也。云「上賓則衆介皆從之」者，前賓問卿、面卿時，介皆從入，因經無文，故注補之。李氏云：「上賓面卿亦從介如覲，介統於賓也。」盛氏云：「特面之義有二：一是不與衆介同執幣而入，異於見主君也。一是不以衆介自隨，下於賓也。」○案：上介面卿，貶于賓者有三。焦氏以恕云：「賓問卿與

私面，衆介皆從。今上介特面，士介不從，其貶損者一也。賓私面入門右，大夫即辭，賓亦不果奠幣。今上介入門右，既奠幣，再拜，大夫乃辭，其貶損者二也。賓當楣再拜送幣，今上介降拜，大夫降辭，而後介升再拜送幣，其貶損者三也。皮，二人贊。亦儷皮也。【疏】正義曰：「贊」，義詳前「私覲」節。入門右，奠幣，再拜。降等也。

【疏】正義曰：賈疏云：「言「降等」者，主人是卿，上介是大夫，故入門右，不敢自同賓客。」敖氏云：「介奠幣，贊者亦奠皮出。」大夫辭。於辭上介則出。擯者反幣。出還於上介也。【疏】正義曰：不言反皮者，皮從幣出可知。

庭實設，介奉幣入，大夫揖讓如初。大夫亦先升一等。今文曰「入設」。【疏】正義曰：經云「入」者，入門左也。注云「大夫亦先升一等」者，前賓面卿時，大夫升一等，賓從之，故知此亦大夫先升也。因經未言升，故補之。云「今文曰「入設」」者，胡氏承珙云：「案：上文賓面卿云「庭實設，揖讓如初」，不云入設。鄭以彼決此，故從古文。」介升，大夫再拜受。亦於楹間南面而受。【疏】

正義曰：注「亦於楹間」，毛本「於」誤作「如」。云「亦於楹間南面而受」者，前賓私面時，大夫受幣於楹間南面，此

受幣亦然，故云「亦」也。敖氏云：「介於卿雖降一等，然同爲大夫，故受於堂上，亦得在楹間也。」介降拜，大夫降辭。介升，再拜送幣。介既送幣，降出也。大夫亦授老幣。【疏】正義曰：此注補經所未備也。但大夫降辭後仍升，敖氏云：「降拜者，貶於卿。大夫既辭，則揖而先升，西面。介升拜於西階上，北面也。」補言大夫之升，亦密。○以上上介特面，下乃言衆介面卿也。擯者出請。衆介面，如覲幣，入門右，奠幣，皆再拜。大夫辭，介逆出。擯者執上幣出，禮請受，賓辭。賓亦爲士介辭。【疏】正義曰：「如覲幣」，各玉錦束也。于士介亦親辭，辟君也。蔡氏云：「餘大約與其覲君同。」注云「賓亦爲士介辭者，前士介覲君時，擯者執上幣以出。」禮請受，賓辭者，注以爲士介賤，不敢辭，賓爲之辭，故知此亦然也。大夫荅再拜。擯者執上幣，立于門中以相拜，士介皆辟。老受擯者幣于中庭，士三人坐取羣幣以從之。【疏】正義曰：「老受擯者幣于中庭」，亦受以東也。○盛氏云：「賓奉其君之命問主國卿，因而私面，故其禮特恭。上

介，士介本非卿之敵體，則其因是而加恭也固宜。然其異於覲主君者，經文歷歷可考，惟士介與卿尊卑懸隔，故其私面之儀幾與覲君相似，而奠幣再拜不稽首，卿不使擯者辭而自辭，又其初不與上介俱入，亦足以見其隆殺之辨矣。郝氏乃謂卿所以待之者無以異於主君，何其弗思甚邪！」擯者出請事。賓出，大夫送于外門外，再拜。賓不顧。不顧，言去。【疏】正義曰：盛氏云：「賓亦告事畢乃出，擯者入告，大夫乃送也。」擯者退，大夫拜辱。拜送也。【疏】正義曰：敖氏云：「拜辱，謝其屈辱而相己也。」方氏苞云：「擯者，下大夫也。以同僚而共己之私事，故拜其辱。」今案：下使者歸，介送至使者之門乃退，使者拜其辱，與此義同。注云「拜送也」者，敖氏云：「此拜亦兼拜辱、拜送二義，經蓋以其所主者立文也。」

右介面卿

下大夫嘗使至者，幣及之。嘗使至己國，則以幣問之也。君子不忘舊。【疏】正義曰：注云「嘗使至己國，則以幣問之也」者，謂下大夫嘗以使事至聘賓之國，則

問及之。賈疏云：「諸侯有三卿、五大夫，三卿皆以幣及之，其五大夫，或作介，或特行至彼國者，乃以幣及之，略於三卿故也。」今案：《儀禮釋官》云：「諸侯下大夫五人，謂三卿下佐事者，其餘大夫尚多，不止五人。說詳孔仲達《曾子問》疏。」云「君子不忘舊」者，以嘗使至其國，即有故舊之誼，故問必及之，示不忘舊也。上介朝服，三介，問下大夫。下大夫如卿受幣之禮。上介三介，下大夫使之禮也。【疏】正義曰：高氏愈云：「下大夫賓不親問，而使上介問之，取其爵之相稱也。止三介者，降于賓也。」注云「上介三介，下大夫使之禮也」者，下經云：「小聘曰問，其禮如爲介，三介。」是下大夫出使之禮也。吳氏《章句》云：「此三介，即賓之士介也。」其面，如賓面于卿之禮。【疏】正義曰：張氏爾岐云：「既致公幣，而又私面也。」今案：「如賓面于卿之禮」者，如其禮耳，庭實則用儼皮。士介不面，略也。

右問下大夫

大夫若不見，有故也。【疏】正義曰：此大夫，兼卿、大夫言。下「使大夫」同。注云「有故也」者，謂因有

故而不見也。有故，如疾病、居喪及出使在外之類皆是也。君使大夫各以其爵爲之受，如主人受幣禮，不拜。各以其爵，主人卿也，則使卿；大夫也，則使大夫。不拜，代受之耳，不當主人禮也。【疏】正義曰：賓以聘君之命來問大夫，不可虛其君命，故君使人代爲之受也。盛氏云：「經惟云『受幣』，則不私面可知。」注云「各以其爵，主人卿也，則使卿；大夫也，則使大夫」者，代之必以同班稱也。云「不拜，代受之耳，不當主人禮也」者，謂不敢以主人自居也。褚氏云：「所謂『拜』，即上經『聽命，後降階西，再拜稽首，升，成拜』是也。此則不可代之，故不拜。敖氏謂并揖讓之節亦無，未然。」今案：經云「如主人受幣禮」，則凡禮皆如主人，唯不拜爲異耳。褚說是也。

右大夫代受幣

夕，夫人使下大夫韋弁歸禮。夕，問卿之夕也。使下大夫，下君也。君使之，云「夫人」者，以致辭當稱「寡小君」。【疏】正義曰：自此至「賓拜禮于朝」，言主君

夫人歸禮于賓與上介。○聘享兼及夫人，^①故於歸饗餼之明日，夫人亦歸禮焉。韋弁，與卿歸饗餼同服。吳氏《章句》云：「此即《周禮·酒正》所謂『致飲於賓客之禮』也。」

注云「夕，問卿之夕也」者，下記云「明日問大夫，夕，夫人歸禮」是也。敖氏以夕為不敢與君同時，郝氏以夫人禮從陰，盛氏則謂「此一日之內禮節繁多，賓即館容有至暮者，于是言『夕』，見其不以暮廢事，急歸禮也」。今案：盛說較長。云「使下大夫，下君也」者，此與夫人使下大夫勞賓同為下于君，君則使卿也。云「君使之，云『夫人』者，以致辭當稱『寡小君』」者，賈疏云：「案：隱二年傳，何休注云：『禮，婦人無外事。』明知此使下大夫歸禮者，是君使之可知，而稱『夫人使』者，以致辭于賓客時當稱『寡小君』，故稱『夫人使下大夫』，其實君使之也。」堂上籩豆六，設于戶東，西上，二以竝，東陳。籩豆六者，下君禮也。臣設于戶東，又辟饌位也。其設，脯，其南醢，屈，六籩六豆。【疏】正義曰：「戶東」，室戶東也。「西上」，變于君饌東上也。西上故東陳，二以竝同，東陳則與君饌異。方氏苞云：「聘使卿也而六豆、六籩、六壺，與《掌客》夫人致禮子男同，大國之卿當小國之君，周制也。」○注「設于戶東」上，嚴本及各本俱有「臣」字，《集釋》無，據賈疏似亦無

「臣」字，吳氏《疑義》「臣」作「陳」，張氏惠言云：「『臣』當作『豆』」。今案：經但云「設于戶東」，則「臣」字疑衍，宜從《集釋》。云「籩豆六者，下君禮也」者，君歸饗餼，堂上八豆，此六，是殺于君禮也。云「設于戶東，又辟饌位也」者，君歸饗餼，設于戶西，此于戶東，是又辟君饌位也。云「其設，脯，其南醢，屈」者，姜氏兆錫云：「經不言籩豆所設，注未識何據，豈有六籩但用一脯，六豆但用一醢之理邪？凡經云「薦脯醢」者，約詞耳，豈以是而誤邪？」焦氏以恕云：「君歸饗餼，經云「韭菹，其南醢醢，屈」，省文不全，故鄭放此而云「其設，脯」者，謂六籩設之于北。『其南醢』者，謂醢醢以下之六豆以次相間，交屈而設，蓋舉其一端以概全文，非直謂一脯一醢可知。」今案：鄭此注未詳，當以敖說為正。敖氏云：「此六豆六籩皆宜用朝事者，而各去其末之二。其設之之序，則豆皆在西，籩繼之而東。」案：醢人朝事八豆已詳前，依敖說去其末之二，則六者韭菹、醢醢、昌本、麋臠、菁菹、鹿臠也。至《周禮·籩人》朝事之籩為饗、黃、白、黑、形鹽、臠、鮑魚、鰯八者，依敖說去其末之二，則當是饗至臠六籩而無鮑魚與鰯，較為的實。又凡設饌皆以

① 「夫人」，原作「大夫」，今據上經文改。

豆爲本，則謂豆在西、籩在東，其設亦確。據經文「二以竝」，則是六豆分爲三列，六籩亦分爲三列，以次向東直陳之。經無屈文，固不必以屈言耳。云「六籩六豆」者，鄭恐人疑籩豆六爲籩、豆各三，故著之也。韋氏協夢云：「君歸饗餼，堂上惟有八豆而無籩。此六豆六籩者，君有簠、簋、銅，而又有西夾、東夾之供，夫人無此數者，故堂上設六豆，減於君也。加以六籩，亦厚待賓之意也。」壺設于東序，北上，二以竝，南陳。醕、黍、清，皆兩壺。醕，白酒也。凡酒，稻爲上，黍次之，梁次之，皆有清、白，以黍間清、白者，互相備，明三酒六壺也。先言醕，白酒尊，先設之。【疏】正義曰：敖氏云：「設于東序北上，亦統於豆。」注云「凡酒，稻爲上，黍次之，梁次之」者，敖氏云：「蓋據《內則》三醴之次言之也。」云「皆有清、白」，《內則》曰：「酒清、白。」鄭注：「目諸酒也。」是酒有清、白。云「以黍間清、白者，互相備，明三酒六壺也。先言醕，白酒尊，先設之」者，賈疏云：「醕，白也。上言白，明黍、梁皆有白，下言清，明稻、黍亦有清故也。於清、白中言黍，明醕即是稻，清即是梁，故言互相備也。三酒既有清、白二色，故言六壺必先言醕者，以白酒尊重，故先設之也。」今案：

經云「醕、黍、清皆兩壺」，謂稻酒、黍酒、梁酒皆有清、白兩壺，是六壺也，注釋經極簡明。李氏云：「上介四壺，知此六壺。」秦氏蕙田云：「六壺盛三酒，爲三行。稻最北，黍次之，梁在南，又次之。每行白酒在西，清酒在東，竝陳。」惠氏棟云：「漢律曰：『稻米一斗，得酒一斗爲上尊。稷米一斗，得酒一斗爲中尊。粟米一斗，得酒一斗爲下尊。』顏師古曰：『稷即粟也，中尊宜爲黍米，不當言稷。』蓋據此注而言。」大夫以束帛致之。致夫人命也。此禮無牢，下朝君也。【疏】正義曰：敖氏云：「飧不致，此殺於飧乃致者，蓋主君以設飧爲差輕，而夫人以歸禮爲特重，所以異也。」注云「此禮無牢，下朝君也」者，《周禮·掌客》：「上公之禮，夫人致禮，八壺、八豆、八籩，膳大牢。」侯伯以下，亦皆有牢。彼君來朝有牢，此卿來聘無牢，是下於來朝之君也。賓如受饗之禮，儼之乘馬束錦。【疏】正義曰：云「如」者，亦大略言之，不盡同也。○以上歸禮于賓。上介四豆、四籩、四壺，受之如賓禮。儼之兩馬束錦。四壺，無稻酒也。不致牢，下於君也。【疏】正義曰：注云「四壺，無稻酒也」者，上歸禮于賓，稻、黍、梁皆有清、白兩壺，此去稻酒之兩壺，故四壺也。敖

氏以四壺爲去梁酒，經無明文，義亦可通。敖氏又云：「四豆者，去菁菹、鹿膾。四籩者，去形鹽、臠。」皆從下去之也。此于上介當亦使下大夫歸之，禮窮則同也。云「不致牢，下於君也」者，謂君歸饗餼有牢，夫人歸禮于賓與上介無牢，是下君也。不及士介，禮又殺也。○以上歸禮于上介。明日，賓拜禮于朝。於是乃言賓拜，明介從拜也。今文「禮」爲「醴」。【疏】正義曰：注云「於是乃言賓拜，明介從拜也」者，謂賓之拜禮不言於「饋之乘馬束錦」之下而言于此，明上介亦從拜可知。云「今文「禮」爲「醴」」者，詳《冠禮》「禮于阼」下。

右夫人歸禮賓介

大夫餼賓大牢，米八筐。其陳於門外，黍、梁各二筐，稷四筐，二以竝，南陳，無稻。牲陳於後，東上。不饌於堂庭，辟君也。【疏】正義曰：自此至「牽羊以致之」，言主國大夫餼賓介之事。○高氏愈云：「聘君於大夫有陳皮束帛之問，故大夫於賓亦有大牢八筐之餼。」今案：賓初以君幣問，而又以私幣面，介及衆介皆面，故大夫之致禮於賓介者亦隆也。注云「其陳於門外，黍、梁各二筐，稷四

筐，二以竝，南陳，無稻」者，前君餼士介，牢米皆設於門外，此無入門之文，故知亦陳於門外也。君歸賓饗餼，米百筥，設于中庭，十以爲列，北上，黍、梁、稻皆二行，稷四行，據下記云「凡餼，大夫黍梁稷」，則無稻矣，故知此八筐爲黍、梁各二筐，稷四筐也。「二以竝，南陳」，則黍二筐在北，梁二筐次之，稷四筐分爲二列，每列二筐，以次向南陳之，亦北上矣。筐，竹器，《詩毛傳》云：「方曰筐。」據下記「筐容五斛」，敖氏云：「君餼賓，米百筥，筥半斛。此米八筐，筐五斛，以量言之，則八筐者殺於君米二筐也，所以下之。」今案：君餼賓米用四種，大夫用三種。君用筥，器小而多；大夫用筐，器大而寡，亦所以爲差降也。云「牲陳於後，東上」者，前士介四人，皆餼大牢，米百筥，注云：「米設當門。」又云：「牢在其南，西上。」此陳於後，蓋亦在米南也。彼注「西上」，褚氏以爲「東上」之訛，義詳彼。云「不饌於堂庭，辟君也」者，前君歸賓饗餼，餼二牢，米百筥，皆設于門內堂下之庭。此陳于門外，是辟君也。○賈疏云：「案：《掌客》鄰國之君來朝，卿皆見以羔，膳大牢，侯伯子男膳特牛，彼又無筐米，此侯伯之臣得用大牢，有筐米者，彼爲君禮，此是臣禮，各自爲差降，不得以彼難此。」賓迎，再拜。老牽牛以致之，賓再拜稽首受。老退，

賓再拜送。老，室老，大夫之貴臣。【疏】正義曰：敖氏

云：「賓出門左，西面拜迎聽命。老東面致命，賓還北面拜，乃適老右受。此使老致之者，大夫之臣，老爲尊也。賓于老乃拜迎之，亦重其爲使也。大夫不親餼者，以其禮輕，不欲煩賓也。」蔡氏云：「再拜稽首受」者，以大夫向者稽首受其君命，而因其禮也。」注云「老，室老，大夫之貴臣」者，《喪服傳》曰：「公、卿、大夫、室老、士、貴臣。其餘皆衆臣也。」注：「室老，家相也。士，邑宰也。」是室老與士

皆大夫之貴臣，餘詳《士昏》、《喪服》諸篇。上介亦如之。衆介皆少牢，米六筐，皆士牽羊以致之。米六筐者，又無梁也。士亦大夫之貴臣。【疏】正義

曰：「上介亦如之」者，敖氏云：「牢米亦如賓，蓋以其具不可得而殺故也。」今案：《少牢》有羊豕而無牛，故牽羊以致。注云「米六筐者，又無梁也」者，上八筐無稻，此六筐

又無梁，皆去其加者也。敖氏云：「米六筐，蓋黍、粱、稷各二筐也。」經無正文，說可竝存焉。云「士亦大夫之貴臣」者，詳上。敖氏云：「於賓上介使老，於衆介使士。所使者雖賤，亦不可以無所別也。」

右大夫餼賓介

公于賓，壹食再饗。饗，謂享大牢以飲賓也。

《公食大夫禮》曰：「設洗如饗。」則饗與食互相先後也。古文「壹」皆爲「一」，今文「饗」皆爲「鄉」。【疏】正義曰：自此至「致食以侑幣」，言主國君臣於賓介食饗燕賜之數及不親食饗之禮。○「壹食，再饗」，賈疏以爲五等諸侯使卿大聘之禮，似矣。據《掌客》，天子待子男一食一饗，而諸侯於聘卿再饗，已多於君。賈疏雖以君臣各自爲禮解之，但以此爲侯伯之卿之禮，則上公之卿當又有加，不更多乎？《聘禮》一篇主侯伯之卿言，而亦有通五等言之者，此類是也。凡待賓之禮有三：饗也、食也、燕也。《儀禮》有《燕禮》及《公食大夫禮》而無《饗禮》，近諸氏錦作《饗禮補亡》一篇，未明備也。攷《春秋》內、外傳，諸侯之臣出聘，主國饗之燕之者甚多，食禮亦間行焉，此則古禮之尚存者爾。注云「饗，謂享大牢以飲賓也」者，食禮主於飯，有牲無酒，饗則牲、酒皆有，故云「享大牢以飲賓也」。《公食禮》陳鼎七，用大牢，則饗亦用大牢可知。《左傳》「享有體薦」，是其證也。云「《公食大夫禮》曰：『設洗如饗。』則饗與食互相先後也」者，鄭見此文先言食後言饗，而《公食禮》曰「如饗」，則饗在前可知，故云「互相先後」也。敖氏云：「案：注云『互相先

後」，謂食居二饗之間也。」今案：《周禮·大行人》、《掌客》皆先言饗後言食，敖說或得鄭意歟？云「古文『壹』皆爲「一」」，詳《士冠禮》。「今文『饗』皆爲『鄉』」者，胡氏承珙云：「《說文》享作宮，云：『獻也，從高省，曰象進孰物形。《孝經》曰：祭則鬼享之。凡享之屬皆從宮。』又饗，云：『鄉人飲酒也，從食從鄉，鄉亦聲。』」二字古多通用，故《周禮》、《禮記》饗燕字多作「饗」，《左傳》則多作「享」。此注云「今文饗皆爲鄉」，而《公食禮》注又云「古文饗或作鄉」者，則皆因饗而借，鄭所不從。」燕與羞，俶獻，無常數。羞，謂禽羞鴈鶩之屬，成熟煎和也。俶，始也。始獻，四時新物，《聘義》所謂時賜無常數，由恩意也。古文「俶」作「淑」。【疏】正義曰：饗食有定數，燕無定數，燕禮略輕於饗食也。賈疏云：「《周禮·掌客》：『上公三燕，侯伯再燕，子男一燕。』此臣無常數者，亦是君臣各爲禮，不得相決。」注云「羞，謂禽羞鴈鶩之屬，成熟煎和也」者，案：下記以「禽羞俶獻」連言，故知此羞謂禽羞也。但禽羞與宰夫所歸之乘禽異，彼是未烹熟者，此是已成熟煎和之物，而注同以鴈鶩之屬解之，似少分別。吳氏《疑義》云：「禽羞，當爲《內則》『鴈鶩之屬』。」或然。云「俶，始也」者，《爾雅·釋詁》文。云「始獻，四時新物」者，下記注云：「俶獻，四時

珍美新物也。」俶，始也，言其始可獻也，《聘義》曰「燕與時賜無數」謂此。云「由恩意也」者，謂由恩意有厚薄，故無常數也。葉氏夢得云：「饗以訓恭儉，故至於再。燕與時賜以示慈惠，故無數。」云「古文『俶』作『淑』」者，「俶」是正字，「淑」是假借字。《說文》：「淑，水清湛也。」古文假「淑」爲「俶」，鄭所不從。賓介皆明日拜于朝。【疏】正義曰：「明日」，饗食燕之明日也。王氏《紉解》云：「賓于發去之日乃三拜乘禽于朝，則此之拜賜爲拜饗食燕也。上文「羞俶獻」，經連類及之耳。」敖氏云：「上惟見賓禮，乃言介拜，似非其次，蓋此文宜在下句之下也。」盛氏云：「饗賓、食賓之時，介皆與焉，而燕又以介爲賓，則其從拜可知。上歸饗餼章亦言拜賜於介禮之上，是其例矣。」今案：敖以爲失次，非也。上介壹食壹饗。饗食賓，介爲介，從饗獻矣。復特饗之，客之也。【疏】正義曰：此特食饗上介也。壹饗，殺於賓也。不言燕者，盛氏云：「燕賓之時，賓爲苟敬，上介爲賓，是亦足以伸其敬矣，故不特燕之。」今案：不及士介，微也。注云「復特饗之，客之也」者，謂饗食賓之時，介已從與饗獻矣，此復特饗之，是客禮待之也。賈疏云：「下記『大夫來使無罪，饗之，其介爲介』，故知介

從饗也。」若不親食，使大夫各以其爵，朝服致之以侑幣，如致饗，無償。君不親食，謂有疾及他故也。必致之，不廢其禮也。致之必使同班，敵者易以相親敬也。致禮於卿，使卿；致禮於大夫，使大夫，非必命數也。無償，以己本宜往。古文「侑」皆作「宥」。【疏】正義曰：「大夫」，兼上下大夫言。「侑幣」，侑食之幣，詳下。公親食有侑幣，不親食，故使人以侑幣致之於賓館也。「如致饗」，謂如致饗餼之禮，但無償爲異耳。注云「君不親食，謂有疾及他故也」者，賈疏云：「他故之中，兼及有哀慘。」敖氏云：「若『不親食』之文，雖主於君，然賓有故而不及往者，其禮亦存焉。」張氏爾岐云：「他故，謂死喪及使者聘而誤，^①或大客繼至之屬。案：聘遭喪，主人畢歸禮，賓唯饗餼之受，謂有死喪而致饗與食則賓不受之，餘皆可受也。」云「致禮於卿，使卿；致禮於大夫，使大夫」者，所謂「各以其爵」也。云「非必命數也」者，張氏云：「《周禮·典命》大國小國卿大夫命數不同，此所使致禮，但取爵同耳，不計命數也。」云「無償，以己本宜往」者，張氏云：「食禮賓當往君所受禮，無償使者之法。今雖使人致禮，以資本宜赴爾，^②故仍無償也。」云「古文『侑』皆作『宥』」者，惠氏士奇云：「古有宥坐之器，亦謂置器於坐，以詔侑人也。」今案：莊十

八年《左傳》云：「王享禮，命之宥。」杜注：「飲宴則命以幣物有助也。」是有與侑通。侑，正字。宥，古文假借字。致饗以酬幣，亦如之。酬幣，饗禮酬賓勸酒之幣也，所用未聞也。禮幣束帛，乘馬，亦不是過也。《禮器》曰「琥璜爵」，蓋天子酬諸侯。【疏】正義曰：上言不親食之禮，此言不親饗之禮也。其致之以酬幣，而其儀節一與致食同。

注云「禮幣束帛，乘馬，亦不是過也」者，既言「所用未聞」而又言此，蓋以酬幣雖無正文，但主君禮賓及歸饗餼俱用束帛乘馬，則其幣亦不得過是耳。云「《禮器》曰『琥璜爵』」，蓋天子酬諸侯者，彼注云：「琥璜爵」者，天子酬諸侯，諸侯相酬，以此玉將幣也。」與此注略同。鄭引之者，見酬幣用玉乃天子諸侯之禮，非饗聘使所得用爾。《三禮札記》云：「《禮記》孔疏引崔氏云：『諸侯貴者以琥，賤者以璜。』因言公侯用琥，伯子男用璜。賈疏則謂公侯伯用琥，子男用璜。不同者蓋皆以意言之也。」陳氏《禮書》云：「食有侑食，故有侑幣。饗有酬爵，故有酬幣。《儀禮·公食大夫》：『侑以束帛，而庭實以皮，大夫相食以束錦。此食有侑幣也。』聘

①「使者聘而」，《儀禮鄭注句讀》作「賓有過」。

②「爾」，《儀禮鄭注句讀》作「席」。

禮：「公于賓若不親食，使大夫致之以侑幣，致饗以酬幣亦如之。」大夫于賓若不親饗，則公作大夫致之以酬幣，致食以侑幣。《士昏禮》：「舅饗送者以一獻之禮，酬以束錦。姑饗婦人送者，酬以束錦。」春秋之時號公、晉侯朝王，王饗禮，命之有，皆賜玉五穀，馬三匹。秦后子享晉侯，歸取酬幣，終事八反。魯侯享范獻子，莊叔執幣。此饗有酬幣也。《禮器》曰「琥璜爵」，又王饗號公、晉侯皆賜玉五穀，是天子饗諸侯，諸侯相饗，酬幣用玉也；諸侯食大夫，大夫相食，以皮帛與錦，則侑幣固有差矣。酬幣亦謂之侑，侑幣不謂之酬，故《春秋傳》享禮皆曰有。以侑者，勸酬之通稱也。《禮經釋例》云：「凡食賓以幣曰侑幣，飲賓以幣曰酬幣。」案：《公食大夫禮》：賓三飯後，公受宰夫束帛以侑，賓者進相幣，賓降辭幣，升聽命，再拜稽首受幣，公壹拜，賓降也。公再拜，介逆出，賓北面揖，執庭實以出，公降立，上介受賓幣，從者訝受皮，然後賓復入門左，升堂卒食。此侑幣也。《士冠禮》：「醴賓以壹獻之禮，主人酬賓，束帛儷皮。」注：「飲賓客而從之以財貨曰酬，所以申暢厚意也。束帛，十端也。儷皮，兩鹿皮也。」此酬幣也。儷皮即庭實。醴賓而有束帛庭實者，較飲酒之禮為盛也。《士昏禮》：「舅饗送者以一獻之禮，酬以束錦。」注：「爵至酬賓，又從之以束

錦。」此饗禮但云「束錦」，不云「庭實」者，蓋昏禮之饗，殺於天子諸侯故也。」又云：「《饗禮》篇亡，《禮經》可考者，唯《士昏》及《聘禮》數語而已。《左傳》：「王饗禮，命之有，皆賜玉五穀，馬三匹。」饗，謂饗禮。醴，謂醴賓。馬者，蓋謂饗及醴賓之庭實。故《聘禮》醴賓亦云：「賓執左馬以出也。」杜注以為行饗禮，先置醴酒，恐誤。」今案：陳氏《禮書》謂燕亦有酬幣，詳《燕禮》。大夫於賓，壹饗壹食。上介，若食若饗。若不親饗，則公作大夫致之以酬幣，致食以侑幣。作，使也。大夫有故，君必使其同爵者為之致之。列國之賓來，榮辱之事，君臣同之。【疏】正義曰：高氏愈云：「大夫於賓復行饗食之禮，君之所厚者，臣亦不敢薄也。」吳氏《章句》云：「上介，若食若饗，二者用其一，又殺也。」今案：致食以侑幣，亦謂不親食者也。注云「作，使也。大夫有故，君必使其同爵者為之致之」者，經但云「作大夫」，未言各以其爵，故注補之。敖氏云：「酬幣、侑幣皆用束錦，亦有庭實。此致之以大夫，不嫌與君同者，公作之故也。」今案：《國語》：「晉羊舌肸聘于周，單靖公享之。」又《左傳》：「叔孫穆子食慶封，慶封汎祭。」是大夫相饗食之禮，春秋時猶有存也。賈

疏云：「昭二年《左傳》：『韓宣子來聘，宴于季氏。』傳無譏文，明鄰國大夫亦有相燕之法。」

右主國君臣饗食賓介之禮

君使卿皮弁，還玉于館。玉，圭也。君子於

玉比德焉。以之聘，重禮也。還之者，德不可取於人，相切厲之義也。皮弁者，始以此服受之，不敢不終也。【疏】正義曰：自此至「賓送不拜」，言主君使卿詣賓館還玉及賄與禮之事。○「使卿」者，亦欲與賓爵相敵也。注云「玉，圭也」者，此玉即圭璋也。云「君子於玉比德焉」者，《聘義》

文。云「以之聘，重禮也。還之者，德不可取於人，相切厲之義也」者，案：《聘義》曰：「以圭璋聘，重禮也。已聘而還圭璋，此輕財而重禮之義也。諸侯相厲以輕財重禮，則民作讓矣。」鄭此注大略本此，而又以德爲己所自有，不可取之於人，故還之，以示相切厲之意。此從比德於玉上生出一義也。敖氏云「還玉，即還摯之義」，亦通。云「皮弁者，始以此服受之，不敢不終也」者，案：「受之」，謂受此玉。初時行聘享，以皮弁服受，故今仍以皮弁服還也。賓皮弁，襲，迎于外門外，不拜，帥大夫以入。

迎之不拜，示將去，不純爲主也。帥，道也。今文曰「迎于門外」，^①古文「帥」爲「率」。【疏】正義曰：賓襲，爲將受玉，敬也。大夫，即卿也，亦襲。敖氏云：「帥以人，則是不揖之也。」注云「迎之不拜，示將去，不純爲主也」者，賓在館如主人，上歸饗餼時賓拜迎，是純爲主也。此不拜，故云「示將去，不純爲主」。敖氏云：「禮不主于己，故不拜。」江氏筠云：「此不純爲主，非以將去之故。以其圭爲君物，非己所得而主也。璋亦然，故還璋如初人。其賄與禮亦皆是代君受者，故皆如還玉。《禮記》言君不見使大夫受之儀，自聽命以迄降階，悉與此同，足以明之矣。蓋此之送迎不拜者，猶之奉使不答拜之義。敖氏謂「禮不主于己」者得之。」云「帥，道也」及「古文「帥」爲「率」」，詳前。云「今文曰「迎于門外」者，案：下記云：「卿館于大夫，大夫有二門，外門即大門也。」上歸饗餼云：「賓皮弁迎大夫于外門外。」此今文「門」上無「外」字，故鄭不從。大夫升自西階，

鉤楹。鉤楹，由楹內，將南面致命。致命不東面，以賓在下也。必言鉤楹者，實在下，嫌楹外也。【疏】正義曰：注

①「今」，原作「古」，今據《儀禮注疏》及下疏文改。

「賓在下，嫌楹外也」，《校勘記》云：「在，陳本誤作『佐』。」

云「鉤楹，由楹內，將南面致命」者，謂由楹西轉而之楹北，乃東行至堂中南面致命也。云「致命不東面，以賓在下也」者，上歸饗餼時，大夫東面致命，此不東面而南面，以賓在堂下故也。云「必言鉤楹者，賓在下，嫌楹外也」者，以賓在堂下，嫌由楹外致之，故必言鉤楹，以見其入堂深也。

賓自碑內聽命，升自西階，自左，南面受圭，退負右房而立。聽命於下，敬也。自左南面，右大夫

且竝受也。必竝受者，若鄉君前耳。退，爲大夫降逡遁。

今文或曰「由自西階」，無「南面」。【疏】正義曰：朱子云：

「君使卿還玉于館，賓退負右房而立，賓故館於大夫也，則大夫亦有右房矣。」敖氏說同。今案：下記若君不見使大夫受之禮亦云「負右房而立」，則大夫廟寢之制與諸侯同可知。賈疏乃云：「於正客館，故有右房。」萬氏斯大云：

「《曾子問》有言『卿大夫之家曰私館，公館與公所爲曰公館』，賈疏因謂此『負右房』或不在大夫廟而於正客館，故有右房。意若以舍於大夫，則不當有右房也。予謂古者諸侯之邦交不一，所以待客者當必非一處。而古者上下之等威甚辨，所以待國君與待外臣者當必不從同。即令舍聘賓于公館，亦必大夫之館，而非諸侯之館也。在此經明言『館于

大夫」，乃因有右房而指之爲諸侯之公館，可乎？且賓之

去也，釋皮帛于館堂，賓不致，主人不拜，若公館當稱館人，

豈得稱主人乎？」褚氏云：「大夫之廟而有右房，則士亦有

可知。賈以此爲正客館，蓋欲迴護注意而爲之辭。即云客

館，亦因其本宜有者而制之也。」案：此二條駁賈正客館之

說甚精。蓋東房西室乃燕寢之制，其正寢與廟則自上及下

皆有左右房也，說詳《士昏禮》及《公食大夫禮》。○注

「鄉」，戴校《集釋》改「鄉」。云「聽命於下，敬也」者，上歸

饗餼時，賓從升堂北面聽命，是聽命於堂上也。此云「自碑

內」，則在堂下矣，故云「敬也」。碑內，碑北也。褚氏云：

「不云階間而云『碑內』，近碑可知。注云『敬也』，勝敖氏君

命不主于己之說遠甚。」云「自左南面，右大夫且竝受也」

者，謂賓在大夫之左，大夫在賓之右，南面竝受也。敖氏

云：「升自西階，非受玉之正主也。亦鉤楹，由大夫之後，

乃自左受之。二人俱代君行禮，故皆不北面。」是也。云

「必竝受者，若鄉君前耳」者，賈疏云：「謂于本國君前受圭

璋時北面竝受，今還南面竝受，面位不同，竝受不異，故云

若鄉者在君前受耳。」云「退，爲大夫降逡遁」者，逡遁是解

退意。前行聘時，「賓三退負序」，注云「三退，三逡遁也」是

也。但賓之逡遁，以受圭慎重之故，負右房則在堂之西北

而南面矣。「立」者，俟大夫降乃降也，注以爲「爲大夫降而逡遁」，恐非。云「今文或曰『由自西階』，無『南面』者，胡氏承珙云：「案：『自』即『由』也，言『自』則不必言『由』。凡授受之禮，相鄉者謂之訝授受，同面者謂之竝授受。《曲禮》：『鄉與客竝，然後受。』鄭云：『于堂上，則俱南面，禮敵者竝受。』《士昏禮》：『納采授鴈于楹間，南面。』注云：『竝受也。』今文無『南面』，即竝受之義不明，故鄭俱從古文。」

大夫降中庭。賓降，自碑內東面，授上介于阼階東。大夫降出，言中庭者，爲賓降節也。授於阼階東者，欲親見賈人藏之也。賓還阼階下西面立。【疏】正義曰：注云「大夫降出，言中庭者，爲賓降節也」者，大夫降則出矣，非止於中庭也，乃言「降中庭」者，蓋爲賓降節耳。敖氏云：「大夫降而至於中庭，賓乃發于負右房之位而降，是以之爲節也。」褚氏云：「必言『自碑內』者，見由西階降也。」盛氏云：「此章兩言『自碑內』，一言『中庭』，見其升降皆不由堂塗也。此賓與大夫皆代君行禮，不敢以賓主自居，故異於常法歟？」云「授於阼階東者，欲親見賈人藏之也」者，《儀禮》凡受藏者皆在東，賓自碑內至阼階東授上介，上介又轉授之賈人，斯時賈人蓋在阼階東，故云「欲親見其藏之也」。云「賓還阼階下西面立」者，賈疏云：「以其

賓在館如主人，在階下西面立，是其常處。」敖氏則云：「既授上介，則復立於中庭。」今案：敖說亦可存參。立者，待還璋也。○敖氏云：「《司儀職》曰：『還圭如將幣之儀。』謂君親還之也。則其禮皆與此異矣。」上介出請，賓迎。大夫還璋，如初入。出請，請事於外以入告也。賓雖將去，出入猶東，唯升堂由西階。凡介之位，未有改也。【疏】正義曰：敖氏云：「如初入」者，自帥入以至授介皆如之也。「還璋」，爲夫人還之。」注云「賓雖將去，出入猶東，唯升堂由西階」者，凡主人之義，出入由闌東，升堂由阼階。鄭以此賓將去，不純爲主，唯升堂由西階，而出入仍由東，是以升自西階爲將去之故也。敖氏解上文「升自西階」，云「非受玉之正主也」，則以爲辟正主之故。江氏筠謂敖說得之，又謂：「升不由阼，猶之宰夫待君爲獻主，而升降自西階之義。」其比例亦精。云「凡介之位，未有改也」者，謂介猶在東方不改，故上文云「授上介于阼階東」也。

賓謁，迎。大夫賄用束紡。賄，予人財之言也。紡，紡絲爲之，今之縛也。所以遺聘君，可以爲衣服，相厚之至也。【疏】正義曰：敖氏云：「謁者，已受聘玉則復其常也。大夫于賓謁亦謁，亦上介出請人告乃迎之。」

盛氏云：「于是言楊，則還璋之時尚襲矣，所謂『圭璋特而襲』也。」○注「今之縛也」，《校勘記》云：「縛，《釋文》作『縹』，云：『劉音須，一本作縛，息絹反。』案：《說文》：『白鮮色也，居椽反。』《聲類》以爲今正「絹」字，戴震曰：『《周禮·內司服》注素沙者，今之白縛也，《釋文》劉音絹，《聲類》以爲今作絹字。此獨作縹，縹乃縹之俗體，縹因有須音，然與《周禮音義》刺謬，以《聲類》證之，音絹是也，須乃絹之訛。以《周禮》證之，作縛是也。《釋文》訛而爲縹。」案：注宜作「縛」，不宜作「縹」。此說是也。劉于此注亦作「縛」而音絹耳，《釋文》誤讀劉音，遂誤改注字。監本作「縛」，亦誤。」今案：《說文》：「縛，從糸專聲。」段氏注云：「《聲類》以「縛」爲今正絹字。案：據許則縛與絹各物，音近而義殊。一《禮》之鄭注自謂縛，不謂絹也。縛以其質堅名之，字從專。絹以色如麥稍名之，字從冃。李登作《聲類》時已失其傳矣。」相厚之至也」，《校勘記》云：「徐、陳、《通解》、敖氏俱無「也」字，《集釋》、楊氏俱有。按賈有「也」字。」云「賄，予人財之言也」者，按《爾雅·釋言》云：「賄，財也。」又《一切經音義》引《通俗文》云：「財帛曰賄。」故鄭以賄爲予人財也。云「紡，紡絲爲之」者，《說文》：「紡，紡絲也。」段氏注云：「各本作「網絲」，誤。絲之紡，猶布

帛之績緝也。」今案：絲以紡而成，故謂之紡。《詩·斯干》：「載弄之瓦。」《毛傳》：「瓦，紡專也。」《說文》：「專，一曰紡專。」專與輒同，即紡絲之具矣。云「今之縛也」者，周之紡即漢之縛，故舉以示人也。云「所以遺聘君，可以爲衣服，相厚之至也」者，鄭以此爲遺聘君，而或又以爲賄聘賓。惟敖氏云：「賄禮主于荅其聘。」盛氏云：「賄，主君所以報聘也。」其說是矣。蓋玉帛乘皮以報享，而報聘但用束紡，似乎物薄。然聘以圭璋，已聘還之，主君于聘一無所受，而又不不可忍然已也，故用束紡以致其勤縑之意，注所謂「厚之至也」。此在「還玉」之後，故知爲報聘之物。若以爲賄聘賓，則當在「公使卿贈如觀幣」之下，非其次矣。《呂氏春秋》云：「宋有澄子者，亡緇衣，求之塗。見婦人衣緇衣，曰：『子不如速與我。我所亡者紡緇也，今之衣緇緇也，以緇緇當紡緇，子豈不得哉？』」此束紡可爲衣服之證，而紡與緇對，則亦可見其爲緇之厚者矣。禮玉、束帛、乘皮，皆如還玉禮。禮，禮聘君也，所以報享也。亦言玉，璧可知也。今文「禮」皆作「禮」。【疏】正義曰：敖氏云：「不言迎大夫，文又省。皆者，皆賄與禮玉也。禮玉之庭實不在如中，是亦大槩言之耳。」今案：賄以報聘，禮以報享，更端故須出迎。褚氏謂兩事實一事，無庸再迎，非

也。若是一事，則經當云「如還玉禮」，不必言「皆」矣。李氏云：「卿不報聘君之幣，尊卑不敵。」注云「禮，禮聘君也」者，謂主君以此物禮聘君也。云「所以報享也」者，聘君來享用束帛加璧，有乘皮爲庭實，主君皆受之，故此一一報之，《周禮·司儀職》曰「凡諸侯之交，各稱其邦而爲之幣，以其幣爲之禮」是也。云「亦言玉，璧可知也」者，上還玉爲圭璋，此當爲璧琮之屬，乃亦言玉者，以其享用璧，則報亦用璧可知。云「今文『禮』皆作『醴』」者，謂禮玉及還玉禮之「禮」，今文皆作「醴」也。此以形涉而誤，故鄭不從，詳《冠禮》「禮于阼」下。大夫出，賓送，不拜。【疏】正義曰：送不拜，與迎不拜意同。

右還玉及賄禮

儀禮正義卷十八 鄭氏注

績溪胡培塈學

公館賓。爲賓將去，親存送之，厚殷勤，且謝聘君

之意也。公朝服。【疏】正義曰：自此至「賓退」，言明日賓將發，君往拜賓，賓來請命之事。○敖氏云：「館者，就其館之稱也。」張氏爾岐云：「館賓者，拜賓於館也。」注云

「爲賓將去，親存送之」云云，此釋所以至賓館之由也。「謝聘君之意」，即下拜聘享等是也。云「公朝服」者，前行聘享于廟，主相尊敬，故服皮弁。此館賓，禮輕，故知朝服也。賓辟。不敢受主國君見已於此館也。此亦不見，言辟

者，君在廟門，敬也。凡君有事於諸臣之家，車造廟門乃下。【疏】正義曰：《校勘記》云：「注『不敢受』下，徐本、《集釋》、《通解》、楊氏俱有『主』字。『諸臣之家』，『諸』下，徐本、《通解》俱有『侯』字。張曰：『疏無侯字，從疏。』」○云「不敢受主國君見已於此館也」者，主國君尊，故不敢受

其見已之禮。云「此亦不見，言辟者，君在廟門，敬也」者，前賓即館，卿大夫勞賓，賓不見，此亦與彼同，乃變文言辟者，以其君在廟門，故不敢言不見，而言辟以致其敬也。敖氏云：「不敢辭，不敢見，若隱辟然，故經以之爲稱。此辟字義，與上文所云者異。」云「凡君有事於諸臣之家，車造廟門乃下」者，賓館於大夫廟，大夫家有大門，人大門乃至廟門。凡君至臣家，車造廟門乃下，亦尊卑之體宜然也。《曲禮》曰「客車不人大門」，爲同等言之也。敖氏以爲外門，非。上介聽命。聽命於廟門中，西面，如相拜然也。

賓者每贊君辭，則曰：「敢不承命，告于寡君之老。」【疏】正義曰：《周禮·司儀職》曰：「公館客，客辟，介受命。」謂此。又言遂送者，即下所云「送賓」也。賓辟而使上介聽命，亦猶卿大夫勞賓，賓不見而使上介受雁也。注云「聽命於廟門中，西面，如相拜然也」者，前覲時，受士介幣，公荅再拜，賓者出立于門中以相拜。此聽命在門中，與相拜同。知西面者，君如賓禮東面，介西面向之可知。云「賓者每贊君辭，則曰『敢不承命，告于寡君之老』」者，賓是君之賓者，君尊，不自出辭，故賓者贊之，每一辭出，則上介荅以「敢不承命，告于寡君之老也」。賓稱「寡君之老」者，《玉藻》曰：「上大夫曰下臣，賓者曰寡君之老。」鄭注：「賓者

之辭，主謂見於他國君。」孔疏：「此上大夫出使他國，在於賓館，主國致禮上大夫，此賓者稱大夫爲「寡君之老」，雖以摯爲文，其實謂介接主君之時，辭亦當然，摯、介通也。」孔疏蓋據此經言之，然則《玉藻》之摯者即此經之上介矣。聘享，夫人之聘享，問大夫，送賓，公皆再拜。拜此四事，公東面拜，摯者北面。【疏】正義曰：高氏愈云：「君與夫人有聘享，大夫有問，禮意厚矣。主君不能往拜於其國，故特於館賓拜之。送賓者，館賓之後，公自此不復見賓，故特拜送之也。」注云「拜此四事」者，君之聘享，一也；夫人之聘享，二也；問卿及嘗使至彼國之下大夫，三也；送賓，四也。張氏惠言云：「案：記摯者贊辭，是公每一事再拜。張萇菴以「摯者歷舉四事而君拜之」，則似君總再拜，非矣。」今案：經云「公皆再拜」，言「皆」則是每事拜之明矣，張氏惠言說是也。公退，賓從，請命于朝。賓從者，實爲拜主君之館已也。言請命者，以己不見，不敢斥尊者之意。【疏】正義曰：注意言此公退而賓從之至朝，實爲拜主君之館已也。乃言「請命」者，以己不見，不敢斥尊者之意，故須請命而後拜也。《周禮·司儀》曰：「客從拜辱於朝。」與此言「請命」不同者，盛氏云：「此實拜

辱，而其辭則曰「請命」，謙也。《周禮》緣其意，而此則據其辭，所以異耳。」公辭，賓退。辭其拜也。退，還館裝駕，爲旦將發也。《周禮》曰：「賓從，拜辱於朝，明日，客拜禮賜，遂行。」【疏】正義曰：《校勘記》云：「注「遂行」下，徐本有「之」字。」今案：《周禮》原文無「之」字。云「辭其拜也」者，謂辭賓之拜也。然據《周禮》云「拜辱」，則賓已實拜可知。云「退，還館裝駕，爲旦將發也」者，裝駕，謂束裝整駕也。云《周禮》曰「客從，拜辱於朝，明日，客拜禮賜，遂行」者，皆《司儀職》文，此引以爲旦將發之證也。「明日」，拜辱之明日也。彼注云「禮賜謂乘禽」，詳下。

右公館賓賓請命

賓三拜乘禽于朝，訝聽之。發去乃拜乘禽，

明已受賜，大小無不識。【疏】正義曰：自此至「送至于竟」，言賓行主君贈送之禮。○「乘禽」，詳下記。張氏爾岐云：「他賜皆即拜于朝，唯日歸乘禽，不勝其拜，故於發時總三拜之。」今案：「訝」，主國所使待事於賓客者，亦詳於下記。「聽之」者，賓拜于朝，君不親見，訝爲之人告出報。《周禮·掌訝職》曰：「至于朝，詔其位，入復。」又曰：「詔

相其事而掌其治令。」是也。○注「乘」字，《校勘記》云：「陳本、《通解》俱誤作「承」。」「己」字，張氏曰：「監本已作己，從諸本。」今案：此爲人之己，不當作己。云「發去乃拜乘禽，明己受賜，大小無不識」者，乘禽微矣，猶必拜之，況大者乎？然必發去乃拜者，見己之受賜大小無不識於心也。遂行，舍于郊。始發，且宿近郊，自展軛。

【疏】正義曰：注云「始發，且宿近郊」者，敖氏云：「爲當與主國爲禮於此也。」云「自展軛」者，《曲禮》曰：「君車將駕，則僕執策立於馬前，已駕，僕展軛。」鄭注：「展軛具視。」孔疏：「舊解云：「軛，車欄也。」駕竟，僕則從車軛左右四面看視之，上至於欄也。盧氏云：「軛，軛頭軛也。」皇氏謂軛是軛頭。盧言是也。一則車行由軛，二則欄之芰字不作車邊爲之。鄭云「具視」，謂徧視之。」今案：彼是君禮，故僕展軛。此卿大夫，則自展軛也。公使卿贈，如覲幣。贈，送也，所以好送之也。言如覲幣，見爲反報也。今文「公」爲「君」。【疏】正義曰：敖氏云：「出郊而後贈，亦異於荅聘君之節也。」①褚氏云：「至此始贈賓，見前之束紡專遺聘君。」注云「贈，送也，所以好送之也」者，贈是以物送行之名。《既夕》注亦云：「贈，送也。」此臨行而有贈，所以致二國之好，《左傳》曰「出有贈賄」謂此。云「言如覲

幣，見爲反報也」者，敖氏云：「如覲幣帛用束也，其庭實亦存焉。」今案：贈如覲幣，則不言反報而反報之意見焉。云「今文「公」爲「君」者，胡氏承珙云：「公與君本爲通稱，於義無別，經文固無定例。此節古文作「公」，故鄭不復易之。」受于舍門外，如受勞禮，無償。不入，無償，明去而宜有己也。如受勞禮，以贈勞同節。【疏】正義曰：勞禮受于舍門內，又償勞者，此經云「受于舍門外，無償」，皆是著其異於勞者爾，其受幣之禮蓋與受勞同也。注云「不入，無償，明去而宜有己也」者，此皆對勞言之。勞在門內，贈在門外，是不入門也。已，止也，即禮有終之意。云「如受勞禮，以贈勞同節」者，賓禮以郊勞始，以贈賄終，且俱在近郊，故云「贈勞同節」，《左傳》每云「自郊勞至于贈賄」，以此。使下大夫贈上介，亦如之，使士贈衆介，如其覲幣。大夫親贈，如其面幣，無償。贈上介，亦如之。使人贈衆介，如其面幣。士送至于竟。【疏】正義曰：上使卿贈賓，此使下大夫贈上介，使士贈衆介，亦各以其爵也。敖氏云：「大

①「聘」，原脫，今據《儀禮集說》補。

夫親贈賁上介，而使人贈衆介，以其降等也，亦爲歸者不親受。」今案：《周禮》訝士，中士爲之。此「送至于竟」之士疑即訝士，詳前「君使士請事」下。

右賓行主國贈送

使者歸，及郊，請反命。郊，近郊也。告郊

人，使請反命於君也。必請之者，以已久在外，嫌有罪惡，不可以入。春秋時，鄭伯惡其大夫高克，使之將兵，逐而不納，此蓋請而不得入。【疏】正義曰：自此至「拜其辱」，言使者反命之事。○《校勘記》云：「注『使請反命於君也』，『請』字，陳缺右畔，監本直作『言』。『嫌有罪惡』，『嫌』，徐本作『言』，誤。『使之將兵』，《釋文》無『兵』字，云『一本作使之將兵，兵則後加字』。案：據《公羊》本文無『兵』字，陸說是。『逐而不納』，『逐』，《要義》作『遂』，云『一本遂作逐。監本作遂。』曰：『鄭伯於高克，不召使歸而已，非逐也。遂者，謂遂其將兵之事，而終不召也。於義爲得，從監本。』案：何休云『隨後逐之』，則當作『逐』明矣，張說殊迂。」注云「郊，近郊也」者，此使者歸而及本國之郊也。初時受命遂行，舍于此，故知爲近郊也。云「告郊人，使請反命於

君也」者，反命，猶復命也。郊人，疑即郊遂之官。高克事，見閔二年《公羊傳》。鄭引以證有罪惡不可以入，故又申之云「此蓋請而不得入」者，鄭旁通傳記而爲之說也。其實自外而歸，請而後入，亦禮之常。吳氏《疑義》云：「反命必請，臣禮如此，蓋臣無突然見君之理，故必先請也。」朝服，載旌。行時稅舍於此郊，今還至此，正其故行服，以

俟君命，敬也。古文「旌」作「膳」。【疏】正義曰：注「正其」二字，《校勘記》云：「陳氏本倒。」云「行時稅舍於此郊，今還至此，正其故行服，以俟君命，敬也」者，行時至郊，脫朝服，服深衣；今還至此，去深衣，仍服朝服，是正其故行服也。必朝服者，以俟君命，即人見君，故云「敬也」。褚氏云：「敖謂及郊乃載旌者，出時受命，至此而斂，歸時反命，至此而載，亦其節也，知此則知朝服稅舍之節矣。」又云：「於及郊始朝服，亦見在道服深衣也。」云「古文『旌』作『膳』」，詳前。襁，乃入。襁，祭名也，爲行道累歷不祥，襁之以除災凶。【疏】正義曰：注云「襁，祭名」者，案：經云「襁，乃入」，明是行襁祭乃入，故知爲祭名也。云「爲行道累歷不祥，襁之以除災凶」者，《說文》：「襁，襍襁祀，除厲殃也。」《周禮·小祝》注：「襁，襁卻凶咎。」今案：襁訓

除，又訓卻，卻亦被除之意，故云「攘之以除災凶」。此云「乃入」，謂入國也。下云「乃入」，謂入朝也。乃入，陳幣于朝，西上。上賓之公幣、私幣皆陳，上介公幣陳，他介皆否。皆否者，公幣私幣皆不陳，此幣，使者及介所得於彼國君卿大夫之贈賜也。其或陳或不陳，詳尊而略卑也。其陳之，及卿大夫處者待之，如夕幣。其禮於君者不陳。上賓，使者。公幣，君之賜也。私幣，卿大夫之幣也。他介，士介也。言他，容衆從者。【疏】正義曰：前夕幣在寢門外朝，此陳幣當亦在寢門外治朝也。褚氏云：「西上，敖謂賓公幣在西，私幣次而東，上介幣又次之，三者又以所得先後爲序是也。」注云「皆否者，公幣私幣皆不陳」者，謂士介之公幣私幣皆不陳，又降於上介之公幣陳而私幣不陳也。然據下注，士介之幣亦載以造朝，但不陳不告耳。云「此幣，使者及介所得於彼國君卿大夫之贈賜也」者，謂此幣皆彼國君臣所贈賜，故陳之以爲榮也。云「其或陳或不陳，詳尊而略卑也」者，謂賓之幣公私皆陳，上介惟陳公幣，士介之幣則公私皆不陳，是於尊者詳之，卑者略之也。云「其陳之，及卿大夫處者待之，如夕幣」者，謂此幣陳之之法如夕幣也。又夕幣時，卿大夫在幕東，

西面北上，乃處者之位。此時卿大夫處者在位，待之亦如夕幣也。云「其禮於君者不陳」者，張氏爾岐云：「禮於君者，謂『賄用束紡，禮玉、束帛、乘皮』。不陳之者，以使者將親執以告。」云「上賓，使者」，謂經所云「上賓」即使者也。云「公幣，君所賜也。私幣，卿大夫之幣也」者，案：君所賜之幣，以郊勞始，以郊贈終。卿大夫之幣，如食饗、郊贈之類，經皆可考。賈疏一一臚陳而多舛錯，朱子嘗糾其誤，今不備錄焉。束帛各加其庭實，皮左。不加於其皮上，榮其多也。【疏】正義曰：注云「不加於其皮上，榮其多也」者，注意以經云「皮左」，明皮在束帛之左，是不加於其上矣。不加於其皮上，蓋不令相掩蔽以見其多也。敖氏云：「上經云『陳皮北首』，此『皮左』，皮上左也，故云『加』。」今案：皮即庭實。據經云「束帛各加其庭實」，則在皮上矣。敖說似亦可從，惟謂皮各重累陳之則非。庭實不皆用皮，亦有用馬者。此言「皮左」，謂庭實若用皮，則加於左皮上，與夕幣二耳。焦氏以恕云：「案：此禮見於經者凡三：夕幣也，展幣也，反命陳幣也。夕幣云：『皮北首西上，加其奉於左皮上。』展幣云：『陳皮北首西上，又拭璧展之，會諸其幣，加於左皮上。』此陳幣云：『束帛各加其庭實，皮左。』西爲上者，皮上左也，則三處竝同可知。」公南

鄉。亦宰告於君，君乃朝服出門左，南鄉。【疏】正義曰：

注云「亦」者，亦夕幣時也。此陳幣禮與夕幣略同，故鄭據彼言之。「出門」，謂出寢門也。卿進使者，使者執

圭，垂纁，北面。上介執璋，屈纁，立于其左。此主於反命，士介亦隨入，竝立，東上。【疏】正義

曰：上介執璋，屈纁不垂，以事未至，詳前「宰執圭，屈纁，自公左授使者」下。吳氏《疑義》云：「《玉藻》曰「執圭玉襲」，是執圭必襲，此亦當如聘時襲，文不具耳。賈疏以為賓執圭楊，非。」注云「此主於反命，士介亦隨入，竝立，

東上」者，前將行受命於朝時，君使卿進使者，使者入，及衆介隨入，北面東上。此反命當與受命同，故知士介亦隨入竝立東上也。經略，故注補之。反命曰：「以君命

聘于某君，某君受幣于某宮，某君再拜，以享某君，某君再拜。」君亦揖使者進之，乃進反命也。

某君，某國君也。某宮，若言桓宮、僖宮也。某君再拜，謂再拜受也。必言此者，明彼君敬君，已不辱命。【疏】正義曰：《校勘記》云：「注「某國名也」，「名」，《集釋》、敖氏俱作「君」字，案：作「君」是。「謂再拜」三字，陳、閩、監、葛本、《通解》俱脫。『君已』二字，閩、監、葛本、《集釋》俱倒。」

云「君亦揖使者進之，乃進反命」者，前受命于朝時，使者入，君揖使者進之。注：「進之者，命宜相近也。」故知此

反命時，君亦揖使者進之，使者乃進反命也。云「某君，某國君也」者，若鄭君、齊君之類。云「某宮，若言桓宮、僖宮也」者，春秋時，魯有桓宮、僖宮，故舉以為證。云「必言此」

者，此字指某君再拜言。云「明彼君敬君，已不辱命」者，以奉命往他國行聘享禮，而其君再拜受之，其敬吾君如是，則己之不辱君命可見矣。宰自公左受玉。亦於使者之

東，同面竝受也。不右使者，由便也。【疏】正義曰：注云「亦於使者之東，同面竝受也」者，前受命于朝時，宰執圭屈纁，自公左授使者。使者受圭，同面。注：「宰就使者北面

竝授之。」^①案：公南面，左為東，宰自公左授使者，是在使者之東。此自公左受玉，明亦於使者之東，同面受之。云

「不右使者，由便也」者，凡授受之禮，授由其右，受由其左，則授者宜在受者之右。今宰在使者之東，是不右使者也，故注以為由便。賈謂因東藏之便，其實宰及使者面位，反

命與受命皆同，惟受命時玉由宰授使者，反命時玉由使者授宰，故有不同，不必以常禮拘也。受上介璋，致命

① 「授」，原作「受」，據《儀禮注疏》及上注文改。

亦如之。變反言致者，若云非君命也。致命曰：「以君命聘於某君夫人，某君再拜，以享於某君夫人，某君再拜。」不言受幣於某宮，可知，略之。【疏】正義曰：張氏爾岐云：「受上介璋，賓受之也，賓受璋當亦垂纁而致命。」今案：「亦如之」者，謂其儀節與反命同，宰亦自公左受玉也。

注云「變反言致者，若云非君命也」者，聘於鄰國夫人當受命於夫人，但婦人無外事，亦君命之。今不言「反命」而言「致命」，若本非君命，猶夫人之命然，故變「反」言「致」也，此賈疏之說。敖氏則謂致命與反命同。王氏士讓云：「於君言「反命」，此言「致命」，亦所以明別。」似王說是。致命當有辭，經未言，故注依上經推而補之。云「不言受幣於某宮，可知，略之」者，聘享君與聘享夫人，受幣同處，不言可知，故略之也。執賄幣以告，曰：「某君使某子賄。」授宰。某子，若言高子、國子。凡使者所當以告君者，上介取以授之，賄幣在外也。【疏】正義曰：此亦賓執之以告也。賄幣，束紬也。鄰君所以報聘者，故先執以告公。告後，亦授宰藏之。注云「某子，若言高子、國子」者，某謂賄者姓氏也。春秋時，齊有高子、國子為貴卿而見於經傳，故舉以為證。云「凡使者所當以告君者，上介

取以授之」者，謂使者所當執以告君者，皆上介取以授之，不獨璋由上介授也。云「賄幣在外也」者，上注云：「其禮於君者不陳。」此賄幣是禮於君者，不在陳幣之列，故知在外也。禮玉亦如之。亦執束帛加璧也。告曰：「某君使某子禮。」宰受之，士隨，自後左士介，受乘皮如初。上介取出玉、束帛，士介從取皮也。【疏】正義曰：注「士介從取皮也」，毛本「從」作「後」。《校勘記》云：「徐本、《集釋》俱作「從」，《通解》作「後」。案：《通解》於疏仍作「從」，則注中「後」字偶誤耳，今本遽從之，謬矣。」云「亦執束帛加璧也」者，經云「亦如之」，謂亦執以告公且授宰也。禮玉，即上經「禮玉、束帛、乘皮」也。言「禮玉」者，省文耳。彼注云：「禮，禮聘君也，所以報享也。」亦言玉璧可知也，是禮玉即束帛加璧矣。此亦禮於君者，故執以告公，與賄幣同。云「告曰：「某君使某子禮」者，亦倣上經言之也。云「宰受之，士隨，自後左士介，受乘皮如初」者，乘皮以為庭實，玉、束帛，宰受之，乘皮則士受之也。必知自後左士介受者，前行享時，士受皮者自後右客，注云：「從東方來，由客後西，居其左受皮也。」此亦然，故云「如初」也。云「上介取出玉、束帛，士介從取皮也」者，章氏平云：「案：此注「上介出取」，與上經注「賄幣在外，上介取以授賓」同。但因上

有「左士介，受乘皮」語，故復本土介取皮之節言之，謂上介出取幣，士介亦從而取皮，故士得左士介受也。」執禮幣以盡言賜禮。禮幣，主國君初禮賓之幣也。以盡言賜

禮，謂自此至於贈。【疏】正義曰：禮玉以士，皆其禮於君者，此則使者所得幣也，故至此始言之。必執幣者，若以實其言也。注云「禮幣，主國君初禮賓之幣也」者，初禮賓

則郊勞幣也。云「以盡言賜禮，謂自此至於贈」者，張氏爾岐云：「自郊勞至贈行，八度禮賓皆有幣。執郊勞之幣，而歷舉其全以告也。」今案：由勞至贈幣不勝執，故執初以該終也。公曰：「然，而不善乎？」善其能使於四方。

而，猶女也。【疏】正義曰：「然」字斷句。注「女」與「汝」通。授上介幣，再拜稽首，公荅再拜。授上介

幣，當拜公言也。不授宰者，當復陳之。【疏】正義曰：注云「授上介幣，當拜公言也」者，謂公言稱善，使者當拜之，故以幣授上介，而再拜稽首也。云「不授宰者，當復陳之」者，謂上介受幣，當復陳於故處。此是人己之物，與君物異，故不授宰也。私幣不告。亦略卑也。【疏】正義

曰：注云「亦略卑也」者，賓之私幣雖陳而不告，以其非彼國君尊者之賜，故略之。云「亦」者，亦前「乃人，陳幣于朝」

節，注云「詳尊而略卑也」。君勞之，再拜稽首，君荅再拜。勞之以道路勤苦。若有獻，則曰：「君

之賜也。言此物，某君之所賜予為惠者也。其所獻雖

珍異，不言某為彼君服御物，謙也。其大夫出，反必獻，忠孝也。【疏】正義曰：獻，獻於己君也。若者，有無不定之辭。《曲禮》曰：「大夫私行出疆，反必有獻。」禮與此異。

「某君之賜也」，明其物所自來，此及下「君其以賜乎」，皆是獻於君之辭。注云「言此物某君之所賜予為惠者也」，既

云「賜予為惠」，明非常賜可知。褚氏云：「此所獻，乃公幣外加賜之物。」秦氏蕙田云：「有獻，謂彼國之君於常賜外別有賜予，故獻之於君。敖氏以為賄禮中之物，則是彼國所以遺主君者，非賓之私物，詎可云「獻」乎？」今案：褚、

秦二說是也。云「其所獻雖珍異，不言某為彼君服御物，謙也」者，若言某物為彼君服御物，則是誇其美矣，故不言，是謙也。云「其大夫出，反必獻，忠孝也」者，獻而謂之忠孝，亦謂其有愛君敬君之心云爾。君其以賜乎？「不必

其當君也。獻不拜者，為君之荅己也。【疏】正義曰：注云「不必其當君也」者，言未必可當君用，或其以為賜下之需乎？不敢實言君受也。云「獻不拜者，為君之荅己也」者，

《郊特牲》曰：「大夫有獻弗親，君有賜不面拜，爲君之荅己也。」《玉藻》曰：「凡獻於君，大夫使宰。」又曰：「大夫不親拜，爲君之荅己也。」此二條皆言弗親獻之義。此親獻而不拜，亦是爲恐煩君之荅己。蓋君於士不荅拜，於大夫則必荅拜也。上介徒以公賜告，如上賓之禮。徒謂空手，不執其幣。【疏】正義曰：敖氏云：「徒以告，下賓也。如，如其盡言賜禮。」君勞之，再拜稽首，君荅拜。勞士介，亦如之。士介四人，旅荅壹拜，又賤也。【疏】正義曰：「君勞之」，勞上介也。「勞士介，亦如之」，亦再拜稽首，君荅拜也。注云「士介四人，旅荅壹拜，又賤也」者，謂又賤於上介也。褚氏云：「於使者言『荅再拜』，於上介不言『荅再拜』而言『荅拜』，則一拜可知。於士介言『亦如之』，則旅荅一拜可知。注皆依經立訓，敖氏謂君荅士介皆再拜，是欲破注而先倍經矣。前士介覲而主君荅再拜，以其爲介也。」案：褚說極明析。賈疏云：「案：《曲禮》『君於士不荅拜』，此君荅拜士者，以其新行反命而勞之，故異於常也。」君使宰賜使者幣，使者再拜稽首。以所陳幣賜之也。禮：臣子，人賜之而必獻之君父，不敢自私服也。君父因以予之，則拜受之，如更受賜

也。既拜，宰以上幣授之。【疏】正義曰：《校勘記》云：「注『不敢自私服也』，敖氏云：『服字恐誤。』案：『服』字，敖改作『之』。」云「以所陳幣賜之也」者，「所陳幣」即上經云「上賓之公幣私幣皆陳」者，本是彼國賜使者之物，故仍賜之也。云「君父因以予之，則拜受之，如更受賜也」者，案：《內則》曰：「婦或賜之衣服，則受而獻諸舅姑。若反賜之，則辭不得命，如更受賜。」鄭蓋本此爲說。然則不敢自私者，臣之禮，因以予之者，君之惠也。方氏苞云：「昭四年《左傳》，杜洩曰：『夫子聘于王，王賜之路，復命而致之君，君不敢逆王命而復賜之。』王賜且然，則鄰國之賜，必待君之復賜宜也。」云「既拜，宰以上幣授之」者，案：上幣當是上等之幣，宰不能徧授，故以上幣授之，其餘則有司授之也。盛氏云：「公不荅拜者，以其惠不出於己也，荅之嫌於己賜。」賜介，介皆再拜稽首。士介之幣，皆載以造朝，不陳之耳。與上介同受賜命，俱拜。既拜，宰亦以上幣授上介。【疏】正義曰：注「士介之幣」，《校勘記》云：「士，陳本誤作『上』。」○李氏云：「至此不別上介，知與士介同拜賜。」乃退。君揖人，皆出去。【疏】正義曰：注云「君揖人，皆出去」者，謂君揖人，使介皆退去也。必知君揖人

者，據前受命時「公揖人」言之。敖氏以爲君後人，非也。介皆送至使者之門。將行，俟於門，反又送於門，與尊長出入之禮也。【疏】正義曰：注云「將行，俟於門」者，即前出聘之日，「上介及衆介俟於使者之門外」，是也。乃退揖，揖別也。【疏】正義曰：上「乃退」，使介皆退朝也。此「乃退揖」，介退去，揖辭使者也。使者拜其辱。隨謝之也，再拜上介，三拜士介。【疏】正義曰：注云「隨謝之也」者，謂謝其屈辱而副己出使也，與前大夫拜辱意同。云「隨」者，謂於門外揖別時即拜謝之也。或以「隨謝」爲至介家拜之，誤矣。云「再拜上介，三拜士介」者，以次差之，上介尊，當再拜；士介卑，當人各一拜也。注云「三拜」，似可疑。若以爲總三拜之，則多於上介之再拜矣。若人各一拜，則士介四人，又不當言「三」也。

右使者反命

釋幣于門。門，大門也，主於闕，布席於闕西闕外，東面，設洗於門外東方，其餘如初於禩時。出於行，入於門，不兩告，告所先見也。【疏】正義曰：自此至「亦如之」，言使還禮門奠禩之事。○郝氏敬云：「釋幣于門，使

者自禮其家門也。」注云「門，大門也」者，賈疏云：「以

其從外來，先至大門即禮門神，故知門是大門也。」云「主於闕，布席於闕西闕外，東面，設洗於門外東方」者，主於闕，謂設主於門闕也。據蔡邕《獨斷》：「祀門，設主於門左樞。」未知孰是。「布席於闕西闕外」，據《特牲》筮席而言。李氏云：「《特牲》設筮席西面，此東面者，神位在西也。洗當東榮，故門外設之，亦于東方。」云「其餘如初於禩時」者，謂初行釋幣于禩時也。如之者，如其祝告及釋幣埋幣之事。云「出於行，入於門，不兩告，告所先見也」者，出時先見行，入時先見門，故於所先見者告之，不兩告也。敖氏云：「行爲道路之始，出則禮之，門爲內外之限，入則禮之也。」乃至於禩，筵几于室，薦脯醢。告反也。薦，進也。【疏】正義曰：入門乃即至于禩席者，象生時反必面也。筵几于室，亦有司設之也。薦脯醢，明無牲牢也。注云「告反也」者，謂告禩以使反也。「薦，進也」，《爾雅·釋詁》文。觴酒陳。主人酌進奠，一獻也。言陳者，將復有次也。先薦後酌，祭禮也。行釋幣，反釋奠，略出謹人也。【疏】正義曰：觴，爵屬也。云酒，見其無玄酒也。全經「酌」稱「觴」者唯此。注云「主人酌進奠，一獻也」者，謂主人酌酒進奠，是一獻也。盛氏謂：「此節爲

陳設之事，注以主人初獻釋之，誤。」案：下云「席于阼」，是酢主人矣，豈有未獻而先酢乎？盛說非。云「言陳者，將復有次也」者，李氏云：「不言奠而曰陳者，陳者，次第之言，并後再獻、三獻俱列之。」云「先薦後酌，祭禮也」者，凡燕飲之法，皆先獻而後薦，此先薦而後奠，是祭禮與飲酒之法異。云「行釋幣，反釋奠，略出謹人也」者，行時迫切，故但釋幣以告之。反則行奠祭之禮，具觴酒籩豆，故云「略出謹人也」。席于阼，為酢主人也。酢主人者，祝取爵酌，不酢於室，異於祭。【疏】正義曰：注云「為酢主人也」者，阼是主人之位，故知席于阼為酢主人也。云「酢主人者，祝取爵酌」者，以無尸，故主人自酢祝為酌也。言「取爵」者，明取別爵，無尸爵也。云「不酢於室，異於祭」者，案：《特牲》、《少牢》皆於室內受酢，此不於室而於阼，是與正祭之禮異也。敖氏云：「設酢席于阼，變於祭，且為將與從者為禮於堂也。」薦脯醢，成酢禮也。【疏】正義曰：此脯醢為主人薦也，薦之以成酢禮也。無俎，不殺也。三獻。室老亞獻，士三獻也。每獻奠，輒取爵酌主人，自酢也。【疏】正義曰：注云「室老亞獻，士三獻也」者，室老，家相；士，邑宰。皆大夫之家臣。盛氏云：「正祭以主人、主婦、賓長

為三獻，今主婦不與而取室老、士者，以其為從行之貴臣，故助主人釋奠也。」今案：歸饗饋云「賓降授老幣」，是大夫有老與士從行矣。云「每獻奠，輒取爵酌主人，自酢也」者，褚氏云：「主人自酢也」句，似贅。張氏爾岐言：「當以輒取爵酌主人為句，自酢也為句。言室老、士酌主人，因自酢也。」如此則頗似《特牲》、《少牢》致爵主人之意，亦通。」今案：「主人」二字疑衍。正祭每獻訖，尸酢之，此無尸，故皆自酢。但主人自酢，已詳上注，此言「每獻奠，輒取爵酌自酢」者，指亞獻、三獻言之也，不當有「主人」二字。賈疏舉前包後之說固為迂曲，張說亦未的當。敖氏云：「亞獻三獻皆不薦也，主人初獻而酢于阼，則亞獻、三獻者皆酢於西階上矣。」一人舉爵，三獻禮成，更起酒也。主人奠之，未舉也。【疏】正義曰：注云「三獻禮成，更起酒也」者，上三獻禮成，欲獻從者，故更起酒以為行酬之始。《禮經釋例》云：「凡一人舉觶為旅酬始。」案：《鄉飲酒禮》「主人獻衆賓畢：『一人洗升，舉觶于賓。』」注：「一人，主人之吏，發酒端曰舉。」《鄉射》亦然。此一人舉爵與彼一人舉觶略同。云「主人奠之，未舉也」者，賈疏云：「以其下文云『獻從者』，乃云『行酬』，似《鄉飲》、《鄉射》一人舉觶，未舉，待獻介、衆賓後，乃行酬也。」獻從者，從者，家臣從行者

也，主人獻之，勞之也。皆升飲酒於西階上，不使人獻之，辟國君也。【疏】正義曰：注云「從者，家臣從行」者，則是凡從行之人，皆得與於獻，不特室老、士已也。云「主人獻之，勞之也」者，高氏愈云：「從者雖以國事出，然風塵委頓，亦已勞矣，故特獻之，并行酬以息之。」云「皆升飲酒於西階上」者，案：《特牲禮》獻衆賓及兄弟之等，皆升飲於階上，故此獻從者，亦升飲於西階上可知。行酬，乃出。

主人舉奠酬從者，下辯，室老亦與焉也。【疏】正義曰：乃出，出廟門也。敖氏以此爲飲至之禮。褚氏云：「歸而告反，禮之常也，與飲至禮各別。楚子重伐吳，歸而飲至，乃自誇其功耳。」注云「主人舉奠酬從者，下辯」者，奠即上奠而未舉之爵。辯，猶徧也。言自貴臣以至衆臣，凡從行者，酬之無不徧也。云「室老亦與焉也」者，恐人疑室老備亞獻，或不與於酬，故特明之。不言士者，賈疏云：「文不具，亦與可知。」上介至，亦如之。【疏】正義曰：至，至其家也。亦如之，亦如其禮門奠禰也。李氏云：「士之初行不釋幣，故反亦不告祭。」今案：出而告行，歸而告反，事親之禮，人子所同。或士、介位卑，無釋幣奠祭之儀，故略而不書耳。

右使還禮門奠禰

聘遭喪，人竟，則遂也。遭喪，主國君薨也。

人竟則遂，國君以國爲體，士既請事，已人竟矣。關人未告，則反。【疏】正義曰：自此至「卒殯乃歸」，皆聘者遭喪之禮。或所聘國君薨及夫人、世子喪，或出聘後本國君薨，或聘賓有私喪，或賓死及介死，凡四節。案：文六年《左傳》曰：「季文子將聘于晉，使求遭喪之禮以行。」即謂此也。注云「遭喪，主國君薨也」者，以下更云「遭夫人、世子之喪」，故知此遭喪爲君薨也。云「人竟則遂，國君以國爲體」者，案：「遂」，謂遂行聘事。「以國爲體」，《公羊傳》文，言已至國則不可以已也。云「士既請事，已人竟矣，關人未告，則反」者，此申言人竟，未人竟之別也。上經云：「君使士請事，遂以人竟。」是士既請事，則已人竟也。上經又云：「及竟乃謁關人，關人問從者幾人。」當以告君，若未告則是未人竟，聘使可反也。不郊勞。子未君也。【疏】正義曰：注云「子未君也」者，案：《春秋經》文八年：「天王崩。」九年：「毛伯來求金。」《公羊傳》曰：「何以不稱使？當喪未君也。」案：郊勞當稱君使，子未君，無使之

者，故不郊勞也。敖氏云：「聘不主於嗣君，使人郊勞則嫌也，不郊勞則夫人亦不使下大夫勞矣。」不筵几。致命

不於席，就尸柩於殯宮，又不神之。【疏】正義曰：注云「致

命不於席，就尸柩於殯宮」者，賈疏云：「聘爲兩君相好，今

君薨，當就尸柩，故不就祖廟也。」褚氏云：「君薨則廟皆無

主，故不受於廟，而於殯宮。」云「又不神之」者，筵几所以依

神，若設之，是以神道待之矣，故李氏云：「殯宮不筵几，未

忍異於生。」是也。敖氏謂此亦受於廟。盛氏云：「此必受

於殯宮者有二義：一則大夫爲君持服，不可以入廟攝行

禮。二則所聘者故君也，雖薨而聘君之命不可以不達，故

就殯宮致命焉。在使者爲不廢命，在主國爲不死其君也。

敖說非。」江氏筠云：「賓必就尸柩者，猶之聘君薨，歸復命

於殯之義。其必致命殯宮者，猶之賓未將命死，以棺造朝

之義。」方氏觀承云：「案：下文特著夫人、世子之喪，君使

大夫受於廟之文，則此國君之喪，可知不受於廟也。」今

案：盛氏、江氏發明受於殯宮之義甚精，方氏以夫人、世子

喪證之尤確，敖說斷不可從。不禮賓。喪降事也。

【疏】正義曰：平時行聘享訖，則以醴酒禮賓。今因君薨而

不禮賓，故注云「喪降事也」。蓋君薨而子未君，使大夫受，

亦非正主，故不行禮賓之禮耳。主人畢歸禮，賓所飲

食不可廢也。禮，謂饗餼饗食。【疏】正義曰：注「賓所飲

食，《校勘記》云：「所，《集釋》作「於」。」云「賓所飲食，

不可廢也」者，謂賓所飲食之需，不可廢缺，故悉以歸之，見

不我喪而略待賓之禮也。云「禮，謂饗餼饗食」者，據下

文云「賓唯饗餼之受」，則所歸不止饗餼已矣。饗食有使人

致之之法，故知歸禮中兼有饗食。不言燕者，據上經燕無

致之之法故也。賓唯饗餼之受。受正不受加也。

【疏】正義曰：《周禮·掌客職》曰：「遭主國之喪，不受饗

食，受牲禮。」據云「不受饗食」，則饗食亦在歸禮中可知。

又云：「受牲禮者，即受饗餼也。」彼注云：「「牲」當爲

「腥」，有喪不忍煎烹。正禮餼當熟者，腥致之也。」據此

注，則餼亦致之受之矣。上注不言「餼」者，敖氏云：「受饗

餼，則餼亦受可知。餼，饗餼之細也。」注云「受正不受

加也」者，饗餼是正禮，日夕所必需，故受之。饗食乃主國

所以加禮於賓者，令主國有喪，雖致之，亦不受也。不

賄，不禮玉，不贈。喪殺禮，爲之不備。【疏】正義

曰：賄，即賄用束紬。禮玉，即上所云「禮玉束帛乘皮」。

贈，即使者至郊使卿贈如覲幣者。敖氏云：「賄與禮玉，主

君以報聘君者也。今主君薨，難乎其爲辭，故闕之。贈者，所以荅私覲，遭喪則不覲，故主國亦不贈。」注云「喪殺禮，爲之不備」者，即《掌客》所云：「凡禮賓客，札喪殺禮。」是據大槩言之，不若敖說之細密。遭夫人、世子之喪，君不受，使大夫受于廟，其他如遭君喪。夫人、世子死，君爲喪主，使大夫受聘禮，不以凶接吉也。其他，謂禮所降。【疏】正義曰：於此云「受于廟」，則上君喪不受於廟明矣。聘本宜於廟受之，夫人、世子之喪，則仍其常，與君薨異也。注云「夫人、世子死，君爲喪主」者，

《禮記·服問》曰：「君所主，夫人、妻、大子、適婦。」鄭注：「言妻，見大夫以下亦爲此三人爲喪主也。」云「使大夫受聘禮，不以凶接吉也」者，爲喪主則其服重，故不以凶接吉，而使大夫受。大夫於君之妻、長子亦有服，但較喪主爲輕，故可接吉耳。云「其他，謂禮所降」者，賈疏謂「不禮以下，不贈以上」，意謂君仍使人郊勞廟受，仍設筵几也，然其中亦尚有辨。既使大夫受聘禮，則報聘之賄與禮玉自不可闕。惟喪中不行私覲之禮，則禮所降者，不禮賓、畢歸禮、饗食弗親及不贈耳。敖氏謂此大夫廟受之禮，即記所云者也。盛氏云：「下記云『若君不見，使大夫受』者，謂君有疾及他哀慘之事，非夫人、世子喪之比也。其受玉之儀雖同，而服

則異，彼用皮弁服，此用長衣練冠，如下文所云也。敖一之，非。」今案：盛氏之辨是也。遭喪，將命于大夫，

主人長衣練冠以受。遭喪，謂主國君薨，夫人、世子

死也。此三者，皆大夫攝主人。長衣，素純布衣也。去衰

易冠，不以純凶接純吉也。吉時在裏爲中衣，中衣、長衣，

繼皆掩尺，表之曰深衣，純袂寸半耳。君喪不言使大夫受，

子未君，無使臣義也。【疏】正義曰：注「不以純凶接純吉

也」，「以」，毛本誤「必」。《校勘記》云：「徐、陳、閩、葛，《集

釋》、《通解》、楊、敖俱作「以」。又云：「君喪不言使大夫

受」，案：賈無「言」字。「使」，毛誤作「死」。云「遭喪謂

主國君薨，夫人、世子死也，此三者，皆大夫攝主人」者，賈

疏云：「此經總說上三人死，主君不得受命，故使將命于大

夫。主人即大夫，故鄭云「此三者，皆大夫攝主人」也。」李

氏云：「更云『遭喪』，不蒙上夫人、世子之文，知主國君薨，

亦使大夫受也。」吳氏《章句》云：「遭喪，即上三者之喪。

此蓋以補上文所未及。」今案：上未言將命及受之之服，故

總言以補之。遭喪自兼三者之喪言，敖氏專以爲君喪，盛

氏專以爲夫人、世子喪，皆非也。惟孔氏廣森云：「遭喪，

將命于大夫」者，謂遭主國有喪，而行問卿大夫之禮也。主

人，即所問之卿大夫也。雖遭喪不廢問卿大夫者，使者之

義，無留其君之命也。」說可存參。云「長衣，素純布衣也，去衰易冠，不以純凶接純吉也」者，案：長衣以布爲之，而純以素，故云「素純布衣也」。純謂緣之也。練冠，練布爲冠，小祥所服也。臣爲君喪服斬衰，爲夫人、世子喪服齊衰，是純凶之服矣。聘是純吉之事，今去衰麻而易以長衣練冠，是不以純凶接純吉也。《雜記》：「大夫筮宅，史練冠長衣以筮。」亦是權制此服以接吉耳。彼注謂長衣練冠爲純凶服者，乃對下「占者朝服」言之，此對斬衰、齊衰言，則非純凶矣。云「吉時在裏爲中衣，中衣、長衣，繼皆掩尺，表之曰深衣，純袂寸半耳」者，此因長衣而分別三者之制也。

案：鄭《禮記·深衣》目錄云：「深衣，連衣裳而純之以采者，素純曰長衣，有表則謂之中衣。」與此注相發明。蓋長衣、中衣、深衣三者，皆用十五升布，連衣裳爲之。而長衣之所以異於中衣者，長衣衣在外，中衣衣在裏也。長衣之所以異於深衣者，長衣純以素，深衣純以采也。長衣又有與中衣同者，繼皆掩尺。《玉藻》曰：「長中繼掩尺。」鄭注：「其爲長衣中衣，則繼袂掩一尺，蓋今衰矣。」^①是也。長衣又有與深衣同者，二者皆服之於外，此注云「表之曰深衣」是也。「純袂寸半」，《深衣篇》文。蓋深衣不爲繼掩尺之制，但緣其袂口寸半而已，此其與長中異者也。深衣爲

諸侯大夫士夕服，又爲庶人吉服，其制具詳《禮記·深衣》及江氏永《深衣考誤》。云「君喪不言使大夫受，子未君，無使臣義也」者，李氏云：「無使臣義」者，《春秋》「武氏子來求賻」，不稱使，天子當喪未君」是也。

右遭所聘國君喪及夫人世子喪

聘君若薨於後，入竟則遂。既接於主國君也。【疏】正義曰：敖氏云：「後謂使者既行之後也。云「入竟則遂」，是未入竟則反而奔喪矣。」今案：「入竟則遂」者，謂已入竟，始聞本國君薨，則遂行聘事也。注云「既接於主國君也」者，謂關人人告，君使士請事，是既接於主君矣，此釋所以「則遂」之義也。赴者未至，則哭于巷，衰于館。未至，謂赴告主國君者也。哭于巷者，哭于巷門，未可爲位也。衰于館，未可以凶服出見人。其聘享之事，自若吉也。今文「赴」作「訃」。【疏】正義曰：注云「未至」，謂赴告主國君者也。此言使者已得赴，而其赴于主國君者猶未至也。蓋本國有喪，當急使人告使者，俾未

①「蓋」，《禮記正義》作「若」。

入竟而反，故使者得先聞之。云「哭于巷，哭于巷門，未可爲位也」者，李氏云：「君赴未至主國，不敢專館爲位而哭，故哭于巷也。曾子與客立於門側，其徒之父死，將出，哭於巷。」敖氏云：「其哭也亦爲位。」《奔喪》曰：「諸臣在他國，爲位而哭。」亦謂此時也。」盛氏云：「哭于巷，別於私喪也。巷哭，則不爲位可知。《奔喪》所云赴者，既至之禮也。敖引之，非。」今案：敖說，褚氏亦辨之，云：「衰于館，未可以凶服出見人」者，對下「赴者至，則衰而出」言之。衰于館，言但于館內著衰也。」云「其聘享之事，自若吉也」者，以其主國未得赴告，則行聘享之事，自與吉時同也。云「今文『赴』作『訃』」，詳《既夕·記》。受禮。受饗餼也。【疏】正義曰：鄭知受禮爲受饗餼者，以其饗餼是大禮，主國所宜致於賓者。今赴未至主國，不敢不受也，然則餼亦受之矣。不受饗食。亦不受加。【疏】正義曰：敖氏云：「『不受饗食』者，以主君若饗食已，已有君喪，自不宜往，故雖歸之，猶不受也。」注云「亦不受加」者，上經「賓惟饗餼之受」，注云「受正不受加也」，此亦以饗食爲加禮，故不受耳。赴者至，則衰而出，禮爲鄰國闕，於是可以凶服將事也。【疏】正義曰：吳氏《章句》云：「『衰而出』，當

以自館至朝言。若入而行事則當長衣練冠，與攝主同。」今案：吳說是也，長衣練冠雖非純凶服，亦是凶服之類，注「凶服」中包之矣。賈疏謂正行聘享著吉服，恐非。注云「禮爲鄰國闕」者，襄二十三年《左傳》語。張氏爾岐云：「謂鄰國有喪，爲之徹樂也。」今案：鄭引之者，見鄰國哀樂一體之義。云「於是可以凶服將事也」者，言赴已至主國，則可以凶服將事，不服吉服也。唯稍受之。稍，稟食也。【疏】正義曰：注云「稍，稟食也」者，下記「旬而稍」注同。《周禮》內宰、宮正、廩人、掌固所云「稍食」，注皆以祿稟解之。《說文》：「稍，出物有漸也。」賈疏云：「以其稍稍給之，故謂米稟爲稍。」《說文》又云：「稟，賜穀也。」是稟食乃米穀之類，無牲牢可知。《中庸》之「既稟」，亦是給以米者，或以爲兼有肉食，誤矣。稟或作廩，非。《周禮·掌客職》曰：「賓客有喪，惟芻稍之受。」鄭注：「芻，給牛馬。稍，人稟也。」此承上「赴者至」而云「唯稍受之」，則稍外無一受矣，即或赴至而歸饗餼，亦唯受其米禾芻薪而已。其牲鼎之屬，必不受之，蓋喪已君與喪鄰國之君有別也。稍所以受之者，以卿行旅從，從者既多，稍不可闕爾。○以上使者本國君薨，在所聘國聞喪之事。歸，執圭復命于

殯，升自西階，不升堂。復命于殯者，臣子之於君

父，存亡同。【疏】正義曰：此以下言使者歸本國，復命于殯之事也。敖氏云：「亦衰而執圭也。升自西階而不升堂，告殯之禮然也。是時上介亦執璋立于其左。」郝氏云：

「升自西階」，殯在西階上也。「不升堂」，臣見君于堂下也。今案：敖氏謂「衰而執圭」是已。《雜記》曰：「執玉不麻。」是指行聘享時言之，非謂歸而復命時也。注云「復

命于殯者，臣子之於君父，存亡同」者，蓋不忍死其君，故歸必於殯復命，是事亡如存也。子即位，不哭。將有告

請之事，宜清靜也。不言世子者，君薨也。諸臣待之，亦皆如朝夕哭位。【疏】正義曰：注「淨」，《集釋》作「靜」。云

「將有告請之事，宜清靜也」者，是釋所以不哭之義。「告請之事，即謂下「辯復命」也。敖氏云：「子位在阼階上，不哭者，子臣同。」云「不言世子者，君薨也」者，據經言子不言世子，故釋之。案：《雜記》曰：「君薨，大子號稱子。」鄭引

《春秋》葵丘之會宋襄公稱子以證之，孔疏：「案：僖九年正月，宋公御說卒。夏，公會宰周公、齊侯、宋子以下于葵丘。是宋襄公稱子。案：《公羊傳》云：「君存稱世子，君

薨稱子某，既葬稱子，踰年稱君。」今宋襄公未葬父，當稱宋子某，而稱子者，鄭用《左氏》之義，未葬以前則稱子，既葬

以後踰年則稱君，故僖九年傳云：「凡在喪，王曰小童，公侯曰子。」是未葬爲在喪之稱也。云「諸臣待之，亦皆如朝夕哭位」者，案：《奔喪》曰：「奔父之喪，在家，丈夫婦人待之皆如朝夕哭位。」故知諸臣待之亦然。辯復命如聘。

自陳幣至於上介以公賜告，無勞。【疏】正義曰：注云「自陳幣至於上介以公賜告」者，謂自陳公幣以下，平時聘歸一復命於君者，今亦一一復命於殯，故云「辯復命如聘」也。云「無勞」者，以勞出於君，今君薨，不可代君作勞辭，故知無勞也。子臣皆哭。使者既復命，子於羣臣皆哭。

【疏】正義曰：臣謂羣臣在朝夕哭位者。此云「子臣皆哭」，則上不哭亦子臣同可知，敖說是也。「皆哭」者，痛君親之不親受也。與介人，北鄉哭。北鄉哭，新至別於朝夕。【疏】正義曰：「與介人」，此「人」當如「入堂深」之

「人」，謂稍前近殯耳。賈疏云：「使者復命訖，不見出文，而言與介人者，以其復命訖，除去幣，更與介前人，近殯，北鄉哭。」是也。褚氏云：「復命不得親見君，因鄉前哭，尚非行奔喪禮，故不就朝夕哭位。哭訖，出，袒括髮」以下，乃行奔喪禮也。敖氏謂復命後不哭，出而復人乃哭，恐無此情理，蓋誤解「人」爲入門耳。注云「北鄉哭，新至別於

朝夕」者，案：朝夕哭位在阼階下西面，今在殯前北鄉，以其新至，故與朝夕哭位別也。出，袒括髮。悲哀變於外，臣也。【疏】正義曰：注云「悲哀變於外」者，以其出而袒括髮，是變於外，與人子奔喪入門左，升自西階，殯東袒括髮異者，臣之道然也。入門右，即位踊。從臣位，自哭至踊，如奔喪禮。【疏】正義曰：注云「從臣位」者，謂入門右即位，就阼階下臣位也。云「自哭至踊，如奔喪禮」者，案：《奔喪》曰：「降堂東即位，西鄉，哭成踊。」此雖子禮，其哭踊之節亦與彼同也。李氏云：「《春秋傳》：魯公孫歸父聘于晉，還至笙，聞君薨家遣，壇帷復命于介。既復命，袒括髮，即位哭，三踊而出，遂奔齊，君子善之。」

右出聘後本國君薨

若有私喪，則哭于館，衰而居，不饗食。

私喪，謂其父母。哭于館，衰而居，不敢以私喪自聞於主國、凶服干君之吉使。《春秋傳》曰：「大夫以君命出，聞喪，徐行而不反。」【疏】正義曰：注「謂其父母也」，毛本無「也」字。《校勘記》云：「嚴本、《集釋》、楊、敖俱有。又「凶服干君之吉使」，徐、陳、監本、《集釋》、敖氏俱作「干」。嚴、

鍾、閻本、《通解》、楊氏俱作「于」。戴氏震云：「干」訛「于」。○敖氏云：「不饗食，謂主君饗食，已則不往也，其致之則受之。」盛氏云：「案：唯云「不饗食」，則其他皆受之矣。牲牢乘禽之屬，亦得受之者，《雜記》曰：「三年之喪，如或遺之酒肉，則受之，必三辭，主人衰經而受之。如君命則不敢辭，受而薦之。」是也。」今案：經云「不饗食」，不云「不受饗食」，則敖說是矣。注云「私喪，謂其父母也」者，謂使者之父母也。云「哭于館，衰而居，不敢以私喪自聞於主國、凶服干君之吉使」者，「不敢以」三字直貫下句，蓋經云「哭于館」，明在館哭之，不哭於外，是不敢以私喪自聞於主國也。云「衰而居」，明居時服衰，行禮不服衰，是不敢以凶服干君之吉使也。賈疏謂行聘享仍服皮弁，蓋不以私喪廢公事也。或乃駁之謂當使上介攝。案：下文賓死，介攝其命，則此不使介攝明矣。云「《春秋傳》曰「大夫以君命出，聞喪，徐行而不反」者，宣八年《公羊傳》文。何注云：「聞喪者，聞父母之喪。徐行者，不忍疾行，又爲君當使人追代之。」今案：鄭引之者，證奉命出聞喪不反，君不使人代之，則至彼國當終其事，故其禮如此也。據經云「不饗食」，則已行聘享可知。歸，使衆介先，衰而從之。已有齊斬之服，不忍顯然趨於往來，其在道路，使

介居前，歸又請反命，已猶徐行隨之。君納之，乃朝服，既反命，出公門，釋服，哭而歸。其他如奔喪之禮。吉時道路深衣。【疏】正義曰：注云「已有齊斬之服，不忍顯然趨於往來，其在道路，使介居前」者，釋所以使衆介先之義也。禮：爲父斬衰，爲母齊衰。此私喪中兼有父母，故兩言之。聘爲吉事，已有喪，不可居前，故使衆介先，而已服衰從之也。上云「衰而居」，此云「衰而從之」，明是成服而后行者。《奔喪》曰：「唯父母之喪，見星而行，見星而舍，若未得行，則成服而后行。」鄭注謂「以君命有爲者」是也，與平常至家三日而後成服者異。云「歸又請反命，已猶徐行隨之，君納之，乃朝服」者，此以下鄭補言歸國以後事，「請反命」即上「使者歸，及郊，請反命」也。斯時亦使衆介先，已徐行隨之，君令之人，乃易朝服者，以凶服不可入公門也。云「既反命，出公門，釋服，哭而歸」者，謂出公門後釋朝服，返衰服，哭而歸家也。云「其他如奔喪之禮」者，謂至家人門左，升自西階及哭踊之節，皆與平常奔喪之禮同也。云「吉時道路深衣」者，謂吉時在道深衣，今衰而從，是與吉時異也，餘詳「使者受命，遂行舍于郊」下。

右聘賓有私喪

賓人竟而死，遂也。主人爲之具而殯。

具，謂始死至殯所當用。【疏】正義曰：吳氏《章句》云：

「人竟，則聘事已聞於主君，不可以一人而廢邦交之命也。主人，主國之君也。」今案：若未人竟，則可告於君而反矣。

○注「始」，《校勘記》云：「陳本作『如』。」云「具，謂始死

至殯所當用」者，謂始死至殯時所需用之物，主人皆爲之備具而殯之。必殯之者，以反國尚需時日也。《周禮·掌客》

注云：「死則主人爲之具而殯矣。」賈彼疏云：「在館權殯，

還日以柩行。」其說是也。褚氏云：「若死於俟聞之後，須

以棺造朝，斂之而已，行事後乃權殯。」其說更密。介攝

其命。爲致聘享之禮也。初時，上介接聞命。【疏】正義

曰：注云「爲致聘享之禮也」者，以聘享主君及夫人之禮皆

君所命，不可因賓死而廢，故介攝而致之也。云「初時，上

介接聞命」者，謂初在本國受命於朝時，上介立於使者之

左，接聞命，故今得代致之。此下言介，皆謂上介也。君

弔，介爲主人。雖有臣子親姻，猶不爲主人，以介與賓

竝命於君，尊也。【疏】正義曰：注「姻」，《校勘記》云：「徐

本作『因』，《集釋》、《通解》、楊氏俱作『姻』。」○賈疏云：

「古者賓聘，家臣適子皆從行。是以延陵季子聘于齊，其子

死，葬于嬴博之間。故鄭云：「雖有臣子親姻，猶不爲主人。」敖氏云：「凡諸侯弔于異國之臣，君爲之主。此時其君不在，故介爲主人，受主君之弔，以此時惟介爲尊故也。君弔蓋皮弁服，介爲主，則袒免。《喪服·記》曰：『朋友皆在他邦，袒免。』謂此類也。」主人歸禮幣，必以用。當中奠贈諸喪具之用，不必如賓禮。【疏】正義曰：注云「當中奠贈諸喪具之用」者，此「歸禮幣」與上「具而殯」異。具而殯，蓋謂始死襲與小斂、大斂及殯所用者。此歸禮幣，則殯後之事，注以爲奠贈諸喪具之用。奠者，喪祭之名。贈者，送葬之名。「諸喪具」，非謂棺槨衣衾之具，乃謂喪中奠贈諸事所需用之具。「必以用」，謂必中奠贈諸事之用。《掌客》曰：「凡賓客死，致禮以喪用。」鄭注：「喪用者，饋奠之物。」是也。云「不必如賓禮」者，謂不必如賓生時所致束帛、束錦之類也。介受賓禮，無辭也。介受主國賓己之禮，無所辭也。以其當陳之以反命也。有賓喪，嫌其辭之。【疏】正義曰：注云「介受主國賓己之禮，無所辭也」者，以介既攝命行禮，主國即以待賓之禮待之，介直受之而不辭也。所以然者，以其公幣、私幣皆當陳之以反命也。云「有賓喪，嫌其辭之」者，此辭乃不受之謂，非禮辭再

辭之辭。以有賓喪，嫌其不受，故特著之。不饗食。

【疏】正義曰：此亦謂主君饗食己而不往也，若致之則受之。前經云：「公于賓壹食再饗，上介壹食壹饗。」此待以賓禮，當壹食再饗也。歸，介復命，柩止于門外。

門外，大門外也。必以柩造朝，達其忠心。【疏】正義曰：注云「門外，大門外也」者，此大門即庫門也。諸侯三門：庫、雉、路。諸侯三朝：外朝在庫門外，治朝在路門外，燕朝在路門內。此江氏永《鄉黨圖考》之說。據此則大門外即爲外朝之地，故經言「門外」，而注言「造朝」也。云「必以柩造朝，達其忠心」者，賓死而歸，則介復命於君矣，而猶必以賓柩造朝，是達其忠心也。此以柩造朝，謂本國之朝；下以柩造朝，則所聘國之朝也。介卒復命，出，奉柩送之，君弔，卒殯。卒殯，成節乃去。【疏】正義曰：兩「卒」字皆訓畢。「介卒復命，出，奉柩送之」，謂介復命畢，出大門，乃奉柩送至賓之家也。「君弔，卒殯」，謂君親弔視殯畢而後歸也。盛氏云：「案：大夫之喪至自外之禮，見《雜記》。殯在兩楹之間。」注云「卒殯，成節乃去」者，《士喪禮》：「君視斂，卒塗乃奠，君要節而踊，然後出門。」是成節乃去也。若大夫介卒，亦如之。不言

上介者，小聘上介，士也。【疏】正義曰：吳氏《疑義》云：「如」者，如其爲具以下至卒殯也。」注云「不言上介，小聘上介，士也」者，此大夫介即上介也。以小聘上介是士，故不言上介，而言大夫介以別之。賈疏謂兼見小聘之法，蓋小聘使大夫，則其禮與大夫爲介者同；小聘之上介是士，則其禮與士介同也。

士介死，爲之棺斂之。不具他衣物也，自以時服也。【疏】正義曰：《校勘記》云：「爲之棺」上，《要義》有「則」字。注「衣物也」，「物」，《通解》作「服」。○經云「爲之棺斂之」，明斂而不殯耳，此其下於賓與上介也。注云「不具他衣物也，自以時服也」者，案：此說恐非。《士喪禮》君有致襚之禮，豈他國士介死於其國，而反缺斂衣物邪？方氏苞云：「鄭蓋以『爲之棺』句，謂獨具其棺而斂以親身之衣，不知經意正謂爲之棺而具衣物以斂耳。」君不弔焉。主國君使人弔，不親往。

【疏】正義曰：注云「主國君使人弔，不親往」者，解經「不弔」爲不親弔也。李氏云：《士喪禮》：「君有賜則視斂。」常禮，君不親弔士。今案：賓與上介死，君親弔之。此不親弔，亦其差也。

若賓死，未將命，則既斂于棺，造于朝，介將命。未將命，謂俟閒之後也。以柩造

朝，以已至朝，志在達君命。【疏】正義曰：「未將命」，《校勘記》云：「未，唐石經作『來』，誤。」注「謂俟閒之後也」，毛本「謂」作「請」。《校勘記》云：「徐本、《集釋》、《通解》、楊敖俱作『謂』。」「以已至朝」，張氏曰：「監本已作己。從監本。」今案：賈疏云：「是以鄭云『以柩造朝，以其既至朝，志在達君命。』作『已』字解是也，當作『己』。」○敖氏云：

「此朝，謂大門外也。介將命於廟，如賓禮，既則殯其柩於館。」注云「未將命，謂俟閒之後也」者，前賓入竟而死，未至國。此云「未將命」，則是將行聘享時，故注以爲「俟閒之後也」。「俟閒」者，前賓至，下大夫勞者以賓入至於朝，主人曰：「不腆先君之祧，既拚以俟矣。」賓曰：「俟閒。」此後大夫帥至于館，至明日乃行聘享事。於此之時而死，則必以棺造朝也。云「以柩造朝，以已至朝，志在達君命」者，謂賓人已至于朝，將行聘享，故以柩造朝，所以體死者之心，明必達君命也。朱子云：「禮賓已至朝，主君將欲行禮，賓請閒之後而賓死，則以柩造朝，以尸將事。」《左傳》：

「陳侯使公孫貞子弔吳，及良，將以尸入，吳子使大宰嚭勞且辭。」上介辛尹蓋援聘以尸將事之禮，吳人納之。向令公孫貞子卒于俟閒之後，行此禮可也。今卒于竟內，亦行此禮而吳人從之。杜注又以爲知禮，胥失之矣。」案：此論甚

精，足與經義相發明。若介死，歸復命，唯上介造于朝，若介死，雖士介，賓既復命，往，卒殯乃歸。往，謂送柩。【疏】正義曰：此「若介死」兩「介」字，俱兼上介、士介言。「歸復命，唯上介造于朝者」，士介卑，不接聞命，故不以柩造朝也。敖氏云：「於賓言『止于門外』，於上介云『造于朝』，文互見也。」今案：上賓死云：「介卒復命，出，奉柩送之。」又云：「大夫介卒亦如之。」是上介死，賓復命後，必送其柩至家。恐人疑士介或不如是，故言雖士介，賓既復命，必往送其柩至家，視殯卒乃歸也。但賓與上介死言君弔，此不言君弔，略之。王氏士讓云：「案：《士喪禮》君於士有視斂禮，況奉使有勞於國，君必弔可知。」

右出聘賓介死

小聘曰問。不享，有獻，不及夫人。主人不筵几，不禮，面不升，不郊勞。記貶於聘，所以爲小也。獻，私獻也。面，猶覲也。【疏】正義曰：自此至「三介」，言侯伯行小聘之事。○《校勘記》云：「陸氏曰：『享，本又作饗。』」盧氏文弼云：「注『面，猶覲也』下，

敖有「今文禮作禮」五字，案：下記「不禮」，注「古文禮作禮」，敖乃移於此，而改「古文」爲「今文」。今校《集釋》者亦依敖氏而增此五字，非是。《校勘記》云：「案：敖氏《聘禮》正誤「不禮」一條在「禮不拜至」之後，明係記中之不禮，非此經之不禮也，不知校者何以皆誤認。」今案：嚴本無此五字，從嚴本。○小聘不曰聘而曰問者，《周禮·大行人》：「凡諸侯之邦交，歲相問也，殷相聘也。」歲相問，即謂小聘。「不享，有獻，不及夫人」者，盛氏云：「案：享與獻，皆聘君之所以遣主君也，而其別有二。享，必以玉帛庭實；獻，則隨其國之所有而已，一也。享，君與夫人皆有之；獻，但及君而已，不及夫人，二也。大聘享而不獻，小聘獻而不享，輕重之差也。注以獻爲私獻，非。」今案：《周禮·司儀》曰「及禮私面私獻」，私獻言於私面之後，則是聘臣之所獻，非聘君所獻矣。盛說是也。主人不筵几，下記云「唯大聘有几筵」，注云：「謂受聘享時也，小聘輕，雖受於廟，不爲神位。」案：筵几所以依神，不爲神位，故不設筵几也。郝氏云：「不筵几，不行禮於廟也。」江氏筠云：「不於廟，則本非設神席之處矣，何必贅言不筵几乎？鄭氏以爲禮輕，是也。」不禮，不以禮禮賓也。面不升，注云「面，猶覲也」，謂私覲庭中受之，不升堂也。不郊勞，謂不行郊勞

之禮也。凡此皆禮之殺於聘者，故注云「記貶於聘，所以爲小也」。其禮，如爲介，三介。如爲介，如爲大聘上介。【疏】正義曰：禮，主國待賓之禮，謂飧饗食饗之屬。李氏云：「三介者，大夫降於卿二等。然則公之卿聘七介者，小聘使大夫五介；子男之卿聘三介者，小聘使大夫一介。」注云「如爲介，如爲大聘上介」者，謂所得於主國之禮與爲大聘上介同，蓋小聘之賓與大聘之上介皆大夫爲之，故其禮同也。

右小聘

記

久無事，則聘焉。事，謂盟會之屬。【疏】正義

曰：久無事則聘，注以事爲盟會之屬者，蓋大聘雖定以三年，而若遇盟會之歲，兩君業已相見，又拘於定制，使其臣更行聘禮，則爲煩瀆，故必久無盟會之事，乃聘以通好。此記補經所未及，非於三年之制有違也。惟古者盟會之事，天子主之，《周禮·大行人》「時會以發四方之禁」，又有司盟掌盟載之灋，故其時盟會少而聘問得如常期。厥後霸國

爭雄，擅相搜合，所謂「有事而會，不協而盟」者，幾於無歲無之。如《大行人》疏所引《左傳》魯自襄二十年聘齊及昭九年「孟僖子乃如齊殷聘」，中間相隔二十一年，非古法矣。餘詳篇首鄭《目錄》下。若有故，則卒聘，束帛加書將命。百名以上，書于策。不及百名，書于方。故，謂災患及時事相告請也。將，猶致也。名，書文也，今謂之字。策，簡也。方，板也。【疏】正義曰：注「版」，毛本作「板」。《校勘記》云：「《釋文》、《集釋》、《通解》、楊氏俱作「版」。陸氏云：「版音板。」○此「有故」與經「若有言」同，經云「若有言，則以束帛，如享禮」，而儀節未詳，故記補之。敖氏云：「卒，已也。聘者，兼享而言。束帛加書，以書加於帛上也。」張氏爾岐云：「卒聘，倉猝而聘，不待殷聘之期也。」今案：此禮於聘享畢行之。敖訓卒爲已，是也。張說非。注云「故，謂災患及時事相告請也」者，賈疏以臧孫辰告糴于齊，公子遂如楚乞師爲災患，晉侯使韓穿來言汶陽之田爲時事，蓋皆本上經「若有言」注爲說，是其義一也。云「名，書文也，今謂之字」者，《中庸》曰「書同文」。《論語》「必也正名乎」，鄭注：「正名謂正書字也，古者曰名，今世曰字。」又注《周禮》「外史達書名」，

《大行人》「諭書名」略同，是名即今之字也。《說文序》云：「倉頡之初作書，蓋依類象形，故謂之文，其後形聲相益，即謂之字。字者，言孳乳而寢多也。箸于竹帛謂之書，書者，如也。」段氏注云：「二《禮》、《論語》皆言名，《左傳》「反正爲之」、「止戈爲武」皆言文，六經未有言字者，秦刻石「同書文字」，此言字之始也。」云「策，簡也。方，版也」者，鄭注《既夕》及《中庸》皆同。蓋簡以竹爲之，一片謂之簡，編連謂之策。《莊子釋文》云：「簡，竹簡也。」《曲禮》釋文云：「策，編簡也。」是也。版以木爲之，《少牢》「卦以木」，鄭注「書於版」是也。方是一版不編連者，張氏爾岐云：「字多書於策，策以衆簡編連也。字少書于方，一版可盡也。」賈疏云：「鄭作《論語序》云：『《易》、《詩》、《書》、《禮》、《樂》、《春秋》，策皆二尺四寸，《孝經》謙半之，《論語》八寸策者，三分居一，又謙焉。』是其策之長短。鄭注《尚書》：「三十字，一簡之文。」服虔注《左氏》云：「古文篆書，一簡八字。」是一簡容字多少者。」今案：賈疏原文作《春秋》策皆尺二寸，據《校勘記》改「二尺四寸」，下云《孝經》謙半之，乃一尺二寸也。主人使人與客讀諸門外。受其意，既聘享，賓出而讀之。不於內者，人稠處嚴，不得審悉。主人，主國君也。人，內史也。書必璽之。【疏】正義曰：《校

勘記》云：「注『賓出而讀之』，徐本、《集釋》、楊氏俱重出『讀之』二字，《通解》不重。『主國君也』，徐本、《集釋》、《通解》《要義》、楊氏俱無『主』字，敖氏有。」云「受其意，既聘享，賓出而讀之」者，敖氏云：「公既受書，客降出，公以書授宰，降立，乃使人與客讀書於廟門外。」是也。云「不於內者，人稠處嚴，不得審悉」者，此有二義：一則門外乃清靜之所，讀之可以審悉；一則告請或有密事，不欲使衆共聞之故也。必與客讀之者，欲詳悉其事之原委也。云「人，內史也」者，《周禮·內史職》曰：「凡四方之事書，內史讀之。」故知此使人與客讀者，即內史也。《儀禮釋官》云：「諸侯有大史、小史之官，見《大射儀》。此注云『人，內史』，《尚書·酒誥》曰『大史友內史友』，《左傳》『季孫召外史掌惡臣，而問盟首焉』，則諸侯亦有內史、外史明矣。《禮記·玉藻》曰：「動則左史書之，言則右史書之。」孔疏以大史爲左史，內史爲右史，與《大戴禮·盛德篇》盧注合。考《左傳》，諸國有大史而無內史，有左史而不見右史，則東遷後史官廢闕，不能依禮之故。孔穎達《春秋序》疏遂謂諸侯無內史，失之矣。」云「書必璽之」者，據襄二十九年《左傳》云：「璽書追而與之。」是書必璽之也。杜注云：「璽，印也。」客將歸，使大夫以其束帛反命于館。爲書

報也。【疏】正義曰：敖氏云：「大夫即還玉之卿也。束帛言『其』，是即歸者加書者也。以其束帛反命，亦如還玉之義。此反命蓋與還玉同日。」注云「爲書報也」者，上云

「束帛加書將命」，此云「反命」，雖不言書，明亦有書可知，故注云爲書以報之也。明日，君館之。既報，館之，

書問尚疾也。【疏】正義曰：盛氏云：「此以見反命之節在館賓前一日也。」注云「既報，館之，書問尚疾也」者，言

既報書即於明日館之者，欲以便賓之早歸，俾復書得早達於彼君，故云「書問尚疾也」。

右記有故卒聘致書之事

既受行，出，遂見宰，問幾月之資。資，行

用也。古者君臣謀密草創，未知所之遠近，問行用，當知多少而已。古文「資」作「齋」。【疏】正義曰：受行，謂受命出使也。人既受命於君，出遂見宰。問幾月之資者，宰制國用故也。敖氏云：「見宰，見之於其官府也。」注云「資，行用也」者，謂行者之所用也。云「古者君臣謀密」云云，朱子駁之云：「上言『與卿圖事』，則固已知所之矣，此但言與宰計度資費之多寡而已，注言『未知所之』，非是。」云「古文

「資」作「齋」者，《說文》：「資，貨也，從貝次聲。齋，持遺也，從貝齊聲。」《周禮·外府》：「共其財用之幣齋。」鄭注：「齋，行道之財用也。」《聘禮》曰：「問幾月之齋。」鄭司農云：「齋，或爲資，今禮家定齋作資。」玄謂齋，資同耳，其字以齊，次爲聲，從貝變易，古字亦多或。」段氏玉裁云：「此司農說禮家定齋當作資，而鄭君非之，謂二字皆可用。許則釋資、齋其義分別。」胡氏承珙云：「案：鄭君雖謂齋、資聲義皆同，然其訓之亦微有別。如《周禮·掌皮》：『歲終則會其財齋。』注云：『齋，所給予人以物曰齋。』此與《說文》齋訓持遺者合。《巾車》：『毀折入齋于職幣。』注云：『杜子春云：齋讀爲資，資謂財也。』此又與《說文》資訓貨者合。然則鄭意未嘗無別，惟以二字聲義本同，故可通耳。此注從今文作「資」者，蓋《周禮》故書「齋」多作「資」，見《典婦功》、《典臬》注，其義較古。鄭注《外府》，引《聘禮》作「齋」者，則就《周禮》經文作「齋」故也。」使者既受行日，朝同位。謂前夕幣之間。同位者，使者北面，介立於左，少退，別於其處臣也。【疏】正義曰：《校勘記》云：「唐石經無『既』字，案：疏有『既』字，戴校《集釋》據石經刪『既』。」今案：「既」字因上節而衍，刪之是也。注「少退，別於其處」，毛本如是，《校勘記》云：「徐本、《集釋》、《通解》、

楊氏俱無「於」字，張淳引注亦無「於」字，又據《釋文》去「其」字，與疏合。惟前經「使者北面」節，疏引此注無「於」字而有「其」字。今案：嚴本亦無「於」字有「其」字，從之。○使者受行之日，而朝則同位也。秦氏蕙田云：「敖氏以日朝爲每日常朝，其說甚鑿。褚氏亦謂當於「日」字絕句。」注云「謂前夕幣之間，同位者，使者北面，介立於左，少退，別其處臣也」者，謂夕幣之時，使者北面，衆介立於其左，東上。及將行之日，使者入朝，衆介隨入，北面東上是也。注不徒云「夕幣」而云「夕幣之間」，蓋兼二者言之。蔡氏云：「使者有卿、有大夫、有士，常時朝位各異，此則朝位竝同北面東上，以別於臣之處者也。」出祖，釋輶，祭酒脯，乃飲酒于其側。祖，始也。既受聘享之禮，行出國門，止陳車騎，釋酒脯之奠於輶，爲行始也。《詩傳》曰：「輶，道祭也。」謂祭道路之神。《春秋傳》曰：「輶涉山川。」然則輶，山行之名也，道路以險阻爲難，是以委土爲山，或伏牲其上，使者爲輶祭，酒脯祈告也。卿大夫處者，於是餞之，飲酒于其側。禮畢，乘車轅之而遂行，舍於近郊矣。其牲，犬羊可也。古文「輶」作「被」。【疏】正義曰：《校勘記》云：「注「輶涉山川」，張氏曰：『《釋文》釋經釋輶之注云：注跋涉音同。此輶蓋跋字也，從《釋文》。』又

「伏牲其上」，「伏」上，嚴、徐、《集釋》、《通解》、楊氏俱有「或」字。「上」，陳、閩、葛本俱誤作「土」。今案：嚴本「輶涉山川」亦作「輶」，《集釋》同，段氏《說文》注云：「跋，同音假借字。鄭所引《春秋傳》本作「輶」，《詩·泉水》孔疏引此注，「伏」上亦有「或」字。」云「祖，始也」者，《釋詁》文。云「既受聘享之禮，行出國門，止陳車騎，釋酒脯之奠於輶，爲行始也」者，案：此禮於本國去時行之，故在既受聘享之禮後。知在國門外者，以經云「出」故也。《泉水》孔疏云：「輶祭皆於國外爲之，又名祖，《詩》云「出祖」是也。又名道，《曾子問》云「道而出」是也。」此經輶既爲祭名，則祖不得又爲祭名，故鄭以始解之。孔疏又云：「重己方始有事於道，故祭道之神。」是也。釋，如「釋奠」、「釋菜」之釋。敖氏云：「釋輶者，釋其所輶之物，謂酒脯也。既釋，則人爲神祭之，如《士虞禮》佐食爲神祭黍稷膚、祝祭酒之爲。」案：此解祭字較有分析。盛氏云：「始行而祭曰祖。輶，輶壞也。釋輶者，舍其所祭之物於輶上也。鄭注《月令》，乃「輶」字的解。」案：此以祖爲祭名，而輶爲設祭之處，非鄭義矣。《月令》：「孟冬，其祀行。」鄭注：「行在廟門外之西，爲輶壞，厚二寸，廣五尺，輪四尺。祀行之禮，北面設主於輶上。」此每歲常祀也。上經「釋幣于行」，則爲將行而釋

幣以告之，皆與此較祭有異，故《泉水》疏云：「卿大夫之聘，出國則釋較，在家釋幣于行。」注云「告將行也」，是三者不同，後人欲牽合爲一，故多歧說。云「《詩傳》曰「較，道祭也」者，《生民》篇毛傳文。云「謂祭道路之神」者，此釋傳義，以證較爲祭名也。云《春秋傳》曰「較涉山川」者，襄二十八年《左傳》文。云「然則較，山行之名也」者，謂較本山行之名，而出行之祭亦因名爲較也。《詩·鄘風》：「大夫跋涉。」《毛傳》云：「草行曰跋，水行曰涉。」跋與較義同。云「道路以險阻爲難，是以委土爲山，或伏牲其上，使者爲較祭，酒脯祈告也」者，此解所以釋較之義。道路多有險阻，故爲較祭祈告之，使無險患也。此經但云「酒脯」，則無牲矣。而云「或伏牲其上」者，蓋指天子諸侯禮而言，故云「或」也。又《生民》鄭箋謂較祭有尸，此無尸，亦天子諸侯禮異也。《周禮·大馭職》曰：「犯較，遂驅之。」鄭注：「行山曰較。犯之者，封土爲山象，以苦芻棘柏爲神主，既祭之，以車轆之而去，喻無險難也。」與此注義同。《說文》解「較」字云：「出將有事於道，必先告其神，立壇四通，樹茅以依神爲較。既祭，犯較轆牲而行爲犯較。」是許義亦與鄭同。云「卿大夫處者，於是餞之，飲酒于其側」者，凡送行飲酒謂之餞，《泉水》詩曰「飲餞于欄」是也。賈疏云：「韓

奕《詩》韓侯出租，出宿于屠，顯父餞之」，是韓侯人覲天子，出京城爲祖道。此聘使還，亦宜有祖但文不具。」案：此說可存。云「禮畢，乘車轆之而遂行」者，此謂委土爲山，乘車轆山而行也。若有牲者，則伏牲其上，轆之而行，《說文》及《犬人》注所言是也。《月令》孔疏泥於較壤廣五尺之說，引此注謂轆者唯車之一輪轆耳，若兩輪相去八尺，不得俱轆。今案：此較祭與孟冬在家祀行之禮不同。據注云「委土爲山」，則與常祀爲較壤於廟門外者，大小當懸殊也。云「其牲，犬羊可也」者，言較而用牲，則犬與羊皆可用。《周禮·犬人》：「掌犬牲，伏瘞亦如之。」鄭注：「伏謂伏犬，以王車轆之。」又《詩》曰：「取羝以較。」是犬與羊皆可用也。此鄭廣言釋較之禮，非謂卿大夫較祭亦有牲也。云「古文「較」作「被」者，胡氏承珙云：「被爲除惡之祭，《周禮·女巫》「掌歲時祓除釁浴」，此祓與較音同義別，故鄭從今文。」

右記使者受命將行之禮

所以朝天子，圭與纁皆九寸，剡上寸半，厚半寸，博三寸，纁三采六等，朱白倉，朱白倉。圭，所執以爲瑞節也。剡上，象天闔地方也。

雜采曰纁，以韋衣木板，飾以三色。再就，所以薦玉，重慎也。九寸，上公之圭也。古文「纁」或作「藻」，今文作「璫」。

【疏】正義曰：《雜記》孔疏引此記作「纁三采六等，朱白蒼，朱白蒼」，朱子云：「記只有『朱白蒼』三字，而《雜記》疏所引乃重有之，不知何時傳寫之誤，失此三字。」今案：朱白蒼三采爲六等，必重言之而義始明也，今從之。又案：唐石經亦失此三字。《校勘記》云：「『蒼』，唐石經、嚴本、《集釋》、敖氏俱作『倉』，《通解》、楊氏俱作『蒼』。戴氏震云：『蒼、倉古通用，今從石經。』」注「象天圓」，嚴、徐、《通解》、楊氏俱作「圓」。「以韋衣木板」，陳本作「版」。「上公之圭也」，嚴本、《集釋》、《通解》、楊、敖俱作「上」。今案：毛本「上」誤「三」。○「圭與纁皆九寸」，謂長九寸也。「剡上寸半，厚半寸，博三寸」，凡圭所同也。《雜記》贊大行曰：「圭，公九寸，侯伯七寸，博三寸，厚半寸，剡上，左右各寸半。」與此同。博，言其寬也。《說文》云：「剡，銳利也。」案：圭形上銳。《雜記》疏云：「剡，殺也，殺上左右角各寸半也。圭博三寸，殺上左右各寸半，則成上銳之形矣。」賈疏云：「此記直言『剡上寸半』，不言左右，文不具也。」注云「圭，所執以爲瑞節也」者，《大宗伯》曰：「以玉作六瑞。」《掌節》曰：「守邦國者用玉節。」蓋皆執以通信也。云

「剡上，象天圓地方也」者，殺上左右角，則成圓形矣。上圓而下方，故云取象於天地也。云「雜采曰纁，以韋衣木板，飾以三色。再就，所以薦玉，重慎也」者，纁有五采、三采、二采之異，而其大小長短悉與圭同。《周禮·典瑞》曰：「王晉大圭，執鎮圭，纁藉五采五就以朝日。」鄭注：「纁有五采文，所以薦玉，木爲中榦，用韋衣而畫之。就，成也。」鄭司農云：「五就，五币也，一币爲一就。」今案：《雜記》曰：「藻三采六等。」與此同，而字作藻。鄭注：「藻，薦玉者也，三采六等，以朱白倉畫之再行也。」孔疏：「案：《聘禮·記》云：『纁，三采六等，朱白倉，朱白倉。』是也。既重云『朱白倉』，是一采爲二等，相間而爲六等也。《典瑞》云：『公侯伯皆三采三就。』謂一采爲一就，故三采三就，其實采別二就，三采則六等也。《典瑞》又云：『子男皆二采再就。』二采，謂朱綠也。其實采別二就，二采則四等也。其天子，則《典瑞》云：『纁五采五就。』亦一采爲一就，五采故五就，其實采別二就，五采則十等也。」賈疏云：「注云『三色再就者，就即等也，是一采爲再就，三采即六等也。《覲禮》注云朱白倉爲六色者，亦是一采一币爲二色，三采故六色。」今案：朱子嘗稱孔疏之說爲詳明，賈說與孔亦大略相同，唯所引《覲禮》注，今不可考耳。然則此注云「三色

再就」，即《雜記》注所云「以朱白倉畫之再行也」，故李氏云：「等，猶行也。」纁以薦玉，蓋取重慎之意。云「九寸，上公之圭也」者，《考工記·玉人》曰：「命圭九寸，謂之桓圭，公守之。」是也。但據《典瑞》：「公執桓圭，侯執信圭，伯執躬圭，子執穀璧，男執蒲璧，以朝覲宗遇會同于王。」則朝天子者不唯公，而獨言九寸之圭者，舉公以例其餘耳。云「古文『纁』或作『藻』」，今文作「璵」者，詳上經受命時，「賈人西面坐，啟櫝，取圭垂纁」下。問諸侯，朱綠纁，八寸。

二采再就，降於天子也。於天子曰朝，於諸侯曰問，記之於聘，文互相備。【疏】正義曰：敖氏云：「朱綠者，纁之采也。存朱而加綠，亦尚文之意。上言朝玉與其纁九寸，故於此但言纁而不及玉，省文耳。」今案：以上文「圭與纁皆九寸」推之，則纁八寸者，玉亦八寸也。獨言八寸者，亦舉以例其餘耳。注云「二采再就，降於天子也」者，謂降於朝天子也。李氏云：「此聘圭之纁，采爲一行，二采共爲再行，與朝圭纁異。《周禮·典瑞》曰：『璵圭璋璧琮，纁皆二采一就，以覲聘。』八寸，亦謂上公之聘圭也。《考工記》曰：『璵圭璋八寸，璧琮八寸，以覲聘。』侯伯聘圭當六寸，子男則四寸，各降其君之瑞一等。《考工記》又曰：『璧琮九寸，諸侯以享天子，璵琮八寸，諸侯以享夫人。』亦據上公

禮互言之，則五等侯享天子及后之璧琮，大小各如其瑞。自相享各降其瑞一等。」①盛氏云：「注『二采再就』，『再』字誤，當依《典瑞》作『一』也。」今案：盛說是。《雜記》疏引《典瑞》「纁皆二采一就」云：「此謂卿大夫每采唯一等，是二采共一就也，與諸侯不同。」若作「再就」，則與子男何異？云「於天子曰朝，於諸侯曰問，記之於聘，文互相備」者，蓋於朝舉天子，則自相朝亦然。於問舉諸侯，則聘天子可知，故云「記之於聘，文互相備」也。皆玄纁繫，長尺，絢組。采成文曰絢。繫，無事則以繫玉，因為飾，皆用五采組，上以玄，下以絳爲地。今文「絢」作「約」。【疏】正義曰：《校勘記》云：「注『玉』字，重脩監本誤作『王』。『上以玄』下，最有『爲天』二字。」今案：注又云「下以絳爲地」，此「地」字係言其本質，非天地之地，最本誤衍。○「皆玄纁繫」者，謂朝天子與問諸侯之纁玉皆以玄纁爲繫也。「絢組」者，組有采色也。賈疏云：「上文纁藉，尊卑不同，此之組繫，尊卑一等。」是解「皆」字之義。張氏爾岐云：「纁以藉玉，繫以聯玉與纁，組即所以飾繫者。」今案：

①「自」上，《儀禮集釋》有「諸侯」二字。「各」，《儀禮集釋》作「見」。

張說分別最明析。敖氏以「皆玄纁」爲句，謂朝聘之纁皆以玄纁之帛爲之，表玄而纁裏。其說無據，不可從。褚氏亦謂當依注，以「皆玄纁繫」爲句。注云「采成文曰絢」者，

《論語》：「素以爲絢兮。」馬注云：「絢，文貌也。」鄭注云：

「文成章曰絢。」與此義略同。云「繫，無事則以繫玉，因以

爲飾」者，繫與組同爲一物，繫是其本，組是其飾，繫連於纁，非朝聘行事之時，則以繫玉於纁而藏之，有事則或垂其組，或屈其組以爲飾也。云「皆用五采組」者，謂尊卑同用五采組也。云「上以玄，下以絳爲地」者，謂繫之本質，上用玄，下用絳。賈疏謂上下皆據垂之上下言之，是也。經言「纁」，注言「絳」者，纁即淺絳也。云「今文「絢」作「約」者，

胡氏云：「古從句之字每多作「勾」，如《詩》「杇杇原隰」，

《釋文》「杇，本作杇」，然則絢，約本一字。《說文》有絢無約，從《禮》古文。《儀禮釋文》云：「絢，《聲類》以爲約字。」蓋

《聲類》兼用今文。《玉篇》以約同絢，本之《聲類》。《集韻》以絢爲絢，則非。《雜記》注云：「絢，施諸縫中。」不得與絢

混爲一字也。問大夫之幣，俟于郊，爲肆，又齎

皮馬。肆，猶陳列也。齎，猶付也。使者既受命，宰夫載

問大夫之禮待於郊，陳之爲行列，至則以付之也。使者初行，舍於近郊。幣云肆，馬云齎，因其宜，亦互文也。不於

朝付之者，辟君禮也。必陳列之者，不夕也。古文「肆」爲

「肆」。【疏】正義曰：上經問大夫之庭實唯言「皮」，此兼言

「馬」者，庭實非皮則馬，故兩言之也。注云「肆，猶陳列

也」者，《周禮·序官·肆師》注：「肆，猶陳也。」《國語》：

「歌鐘二肆。」注：「肆，列也。」云「齎，猶付也」者，《說文》：

「齎，持遺也。」《周禮·掌皮》鄭注：「予人以物曰齎。」故云

「猶付也」。知大夫之幣宰夫載而付之者，以上經「命宰夫

官具」故也。云「使者初行，舍於近郊」者，釋所以俟於郊之

義也。云「幣云肆，馬云齎，因其宜，亦互文也」者，幣爲肆

陳之，亦俟其至郊付之。皮馬付之，亦先俟於郊，陳之可

知，故云「互文也」。云「不於朝付之者，避君禮也」者，聘君

聘夫人之幣皆於朝付之，此於郊付之，是避君禮也。云「必

陳列之者，不夕也」者，謂前此夕幣時不陳，故此特陳之，且

欲與衆見之也。云「古文「肆」爲「肆」者，胡氏云：「古肆、

肆字多互譌。《周禮·小宗伯》：「肆儀爲位。」鄭注：「肆，

習也。故書肆爲肆，杜子春讀肆當爲肆。」此爲肆之肆，非

肆習之義，故鄭不從古文。」

右記朝聘玉幣

辭無常，孫而說。孫，順也。大夫使，受命不受

辭，辭必順且說。【疏】正義曰：注云「孫，順也」者，《說文》：「孫，順也。」字作「遜」，段氏注云：「凡遜順字從心，凡遜遁字從辵。今遜專行而遜廢矣。」今案：此經「孫」字及《論語》「惡不孫以爲勇者」，皆「遜」之假借。云「大夫使，受命不受辭」者，本莊十九年《公羊傳》文。原書無「使」字，大夫上有「聘禮」二字。此注引之，以證不受辭者，緣辭無常故也。傳又曰：「出竟有可以安社稷利國家者，則專之可也。」此《論語》言專對之證。云「辭必順且說」者，聘以修好睦鄰故也。說與悅同。辭多則史，少則不達。史，謂策祝。【疏】正義曰：注云「史，謂策祝」者，《尚書·金縢》曰「史乃策祝」是也。策祝尚文辭，故謂辭多爲史。孔子曰：「文勝質則史。」又曰：「辭達而已矣。」若辭少則不足以達意，故辭既順說矣，又順戒，此二者，不可失之多，亦不可失之少也。辭苟足以達，義之至也。至，極也，今文「至」爲「砥」。【疏】正義曰：「義之至也」，吳氏《章句》云：「言於應事之宜爲極至也。」注云「今文「至」爲「砥」者，胡氏云：《說文》：「砥，從厂氏聲，或從石作砥。」《爾雅》：「砥，致也。」《詩·祈父》：「靡所砥止。」箋云：

「砥，至也。」鄭以當文易曉，故不從今文。」辭曰：「非禮也，敢。」對曰：「非禮也，敢。」辭，不受也。對，荅問也。二者皆卒曰敢，言不敢。【疏】正義曰：《校勘記》云：「下句末，唐石經、嚴、徐俱有「辭」字，《集釋》、《通解》、《要義》、楊、敖俱無。張氏曰：「經曰：辭曰：非禮也，敢。對曰：非禮也，敢辭。注曰：辭，不受也。對，荅問也。二者皆卒曰敢，言不敢。又賈疏云：辭謂賓辭主人，荅謂賓荅主人，介則在旁曰：非禮也敢。以注及疏文義考之，下羨一辭字，審矣。又嘗疑注辭不受也之句上更有一辭字，傳寫者誤以注文作經文，今減經以還注。」《石經考文提要》從唐石經。案：張說是也。注以辭、對爲截然兩事，二者皆曰「不敢」，一則不敢不辭，一則不敢不對，故朱子、敖氏俱從張說。注「辭，辭不受也」，「辭」字，嚴、徐本不重。《要義》、敖氏載注亦不重，《集釋》、《通解》、楊氏俱同今本。案：經末「辭」字，即因注首「辭」字而誤衍，在經宜刪，在注不必重，唯魏氏、敖氏得之。張氏引注無「也」字。今案：張氏《識誤》謂經末無「辭」字，是也。謂注首更有「辭」字，而減經以還注，則非。《校勘記》以魏、敖爲得者，魏氏、敖氏之本，經末無「辭」字，注首亦不重「辭」字故也，今從之。○段氏《經韻樓集》曰：《聘禮·記》：辭，句。曰，句。非

禮也，句。敢，句。對，句。曰，句。非禮也，句。敢，句。凡八句十二字。注云「辭，不受也」，因上「辭無常」、「辭多則史」、「辭苟足以達」三辭字皆爲文辭，恐其相混，故分別之。《禮經》若《士冠禮》「醴辭曰」、「醕辭曰」、「字辭曰」，正當作「辭」。若「敢辭」、「禮辭」、「固辭」、「終辭」之類，正當作「辭」。《說文·辛部》曰：「辭，說也，從鬲辛，鬲辛猶理事也。」又曰：「辭，不受也，從受辛。受辛者，辭之。」二字分別畫然，經典不受之義亦作辭，則爲假借。此經二句，謂常事、常禮之外，有非禮之加、非禮之問，必詈詈不阿，乃爲僞職。主人施以非所當施，則辭之，其辭曰：「所以施使臣者，非禮也，敢受乎？」主人問以非所當問則對之，其辭曰：「所以語使臣者，非禮也，敢不對乎？」如僖十二年，齊使管夷吾平戎于王，王以上卿禮饗管仲。管仲辭曰：「臣，賤有司也，有天子之二守國、高在，若節春秋，來承王命，何以禮焉？陪臣敢辭。」此「辭曰：非禮也，敢」之證也。文四年，衛甯武子來聘，公與之宴，爲賦《湛露》及《彤弓》，不辭，又不荅賦，使行人私焉。對曰：「臣以爲肄業及之也。昔諸侯朝正于王，王宴樂之，于是乎賦《湛露》，則天子當陽，諸侯用命也。諸侯敵王所愾，而獻其功，王于是乎賜之彤弓一、彤矢百，旅弓矢千，以覺報宴。今陪臣來繼舊好，

君辱貶之，^①其敢干大典以自取戾？」此「對曰：非禮也，敢」之證也。注云「二者皆卒曰敢」，謂凡言「敢」，多在語之終。云「辭曰」、「云對曰」、「云敢」，傳無不與經印合者。辭與對，畫分二事，唐石經贗一「辭」字，敢、辭之文，不當系對。對，主爭辯是非，不謂辭卻也。經謂賓自辭之自對之。賈疏引鄭《易注》，專屬之介，殊失經意，經不專謂介矣。今案：段說是也。吳氏《章句》云：「主國或有非分之賜則辭之，固以請，乃荅之也。此則以對與辭作一事解，非矣。」

右記修辭之節因及辭對二言

卿館于大夫，大夫館于士，士館于工商。館者必於廟，不館於敵者之廟，爲大尊也。自官師以上，有廟有寢，工商則寢而已。【疏】正義曰：注云「館者必於廟」者，據《禮運》曰：「天子適諸侯，必舍其祖廟。」及此經「歸饗饋于賓館」，云「及廟門賓揖入」是也。云「不館於敵者之廟，爲大尊也」者，據此記云「卿館于大夫，大夫館于士」云云，是不館于敵者之廟也。云「自官師以上，有廟有

① 「貶」，原作「況」，據《續清經解》本改。

寢，工商則寢而已」者，《周禮·隸僕》曰：「掌五寢之埽除糞灑之事。」鄭注：「五寢，五廟之寢也。周天子七廟，唯祫無寢。《詩》云：『寢廟繹繹』，相連貌也。前曰廟，後曰寢。」又曰：「大喪復於小寢、大寢。」鄭注：「小寢，高祖以下廟之寢也，始祖曰大寢。」是廟後有寢，凡廟皆然。《祭法》曰：「適士二廟，官師一廟。」鄭注：「官師，中士、下士。」是自官師以上，有廟有寢也。《祭法》又曰：「庶士、庶人無廟，死曰鬼。」鄭注：「凡鬼者薦而不祭。庶士，府史之屬。」孔疏：「庶人，平民也，賤故無廟。《王制》曰：『庶人祭於寢。』此工商與庶人同，故知有寢無廟也。但士以上有廟有寢，祭在廟，薦在寢。庶人則為寢以薦其先，而其制與士廟後之寢當亦不殊，唯無廟為異。《王制》注謂寢為適寢，竊疑士以上有適寢有下室，庶人則但有下室而已，未必有適寢。以適寢所以行禮，而禮不下庶人故耳。此工商之寢，蓋亦在下室之東為之。與下室別為門牆，故可以館客也。管人為客，三日具沐，五日具浴。管人，掌客館者也。客，謂使者下及士介也。【疏】正義曰：《內則》曰：「五日則燂湯請浴，①三日具沐。」此為客之禮亦如之。然則三日五日，古人平常沐浴之節也。具者，備而勿缺之謂。《校勘記》云：「注『管人』，《通解》『管』作『館』。」云

「管人，掌客館」者，詳上經「管人布幕于寢門外」下。

右記賓館并管人所供

飧不致，不以束帛致命，草次饌，飧具輕。【疏】正

義曰：注云「不以束帛致命」者，謂上經宰夫朝服設飧，但云「設之」而已，不云「以束帛致命」，是不致也。云「草次饌，飧具輕」者，飧是始至之禮，故云「草次」也。言「輕」者，對歸饗饌大夫奉束帛致命為重。賓不拜。以不致命。

【疏】正義曰：《校勘記》云：「注『命』，敖氏作『也』。」云

「以不致命」者，謂上經設飧時，賓無拜受之文，以其不用束帛致命，故不拜也。方氏苞云：「賓初至，力乏事紛，故飧不致，重煩賓荅禮也。」沐浴而食之。自潔清，尊主國君賜也。記此，重者沐浴可知。【疏】正義曰：注云「自潔清，尊主國君賜也」者，以賓雖不拜，猶沐浴自潔清而食之，是尊主國君之賜也。云「記此，重者沐浴可知」者，以記者記此，明重於飧者必沐浴而食可知。或曰：沐浴，以其初至，道路風塵故也。

①「燂」，原作「潭」，今據《續清經解》本及《禮記正義》改。

右記設餼

卿，大夫訝。大夫，士訝。士皆有訝。

卿，使者。大夫，上介也。士，衆介也。訝，主國君所使迎待賓者，如今使者護客。【疏】正義曰：此即上經「厥明訝賓于館」之訝也。因經未言以何人訝，故記補之。《周禮·掌訝》曰：「凡賓客，諸侯有卿訝，卿有大夫訝，大夫有士訝，士皆有訝。」鄭注：「此謂朝覲聘問之日，王所使迎賓客於館之訝。」案：此記悉與彼同，唯主聘而言，故不言諸侯卿訝也。敖氏云：「士皆有訝者，嫌其賤不必訝，若上士則使中士訝之，中士則使下士訝之也。」今案：若下士則當使庶人在官府史之屬訝之。○《校勘記》云：「注『客』，《要義》作『之』。」云「卿，使者，大夫，上介也，士，衆介也」者，賈疏云：「據此篇，是侯伯之卿大聘而言，其實小聘使大夫，亦使士迎之。」云「如今使者護客」者，蓋舉漢法爲況也。賓即館，訝將公命。使已迎待之命。【疏】正義曰：敖氏云：「此節宜在『卿致館』之後。」盛氏、秦氏皆駁之，謂當在賓聘享畢就館之時，蓋以上經聘享畢有「賓即館」之文，與此同故也。案：《周禮·掌訝職》曰：「至于國，

賓入館，次于舍門外，待事于客。」鄭注：「次，如今官府門外更衣處。待事于客，通其所求索。」案：「至于國，賓入館」下，即云「次于舍門外」，則敖說似是。注云「使已迎待之命」者，張氏爾岐云：「謂以君使已迎待之命，告之於賓也。」今案：鄭意蓋以此訝即大夫士之訝，故下注云：

「大夫訝者執鴈，士訝者執雉也。」又見之以其摯，又，復也。復以私禮見者，訝將舍於賓館之外，宜相親也。大夫訝者執鴈，士訝者執雉。【疏】正義曰：又見之，見賓也。

訝既將公命，而又以其摯見之者，以其將舍於賓館之外，示相親也。大夫執鴈，士執雉，本《周禮·大宗伯》文。○注「又，復也」，詳下。賓既將公事，復見之以其摯。

既，已也。公事，聘享問大夫。復，報也。使者及上介執鴈，羣介執雉，各以見其訝。【疏】正義曰：「復見之以其摯」，「之」，毛本作「訝」。《校勘記》云：「唐石經、嚴、徐、《集釋》、《要義》、敖氏俱作『之』」。《通解》、楊氏俱作「訝」。《石經考文提要》云：「監本作見訝，此因《儀禮經傳通解》之誤。《通解》引此記與上文又見之以其摯不相屬，故改爲訝，傳寫者不知其意而沿之。」注云「公事，聘享問大夫」者，謂聘君、聘夫人，享君、享夫人及問大夫也。公事既畢，即復見訝者，答禮尚疾也。云「復，報也」者，上文「又見

之以其摯，注訓又爲復，蓋取重義、繼義，謂既將公命而又見之也。此不訓復爲又，而訓爲報者，蓋取酬報之義，謂賓之見訝，報其來見之禮也。云「使者及上介執鴈，羣介執雉，各以見其訝」者，賈疏云：「謂使者見大夫之訝者，上介見士之訝者，士介亦見士訝者。」○《三禮札記》云：「賈疏於『厥明訝賓于館』下云：『諸侯有掌訝之官。』於此記『賓即館，訝將公命』下又云：『諸侯無掌訝。』殊相矛盾。考《周禮·掌訝職》文，「賓入館而待事於賓館外」者，掌訝職也。又曰「諸侯有卿訝，卿有大夫訝」云云，鄭注謂此朝覲聘問之日所使迎賓之訝，則非朝聘之日無此訝明矣。《周禮·序官》：「掌訝，中士八人。」諸侯當以下士爲之。若大夫爲卿之貳，職掌較重，士亦各有所掌，何得日日伺候於賓館外也？鄭、賈謂諸侯無掌訝，而自「訝將公命」以下，即指爲大夫士之訝，恐非。」吳氏《疑義》云：「『訝將公命』，所謂訝，蓋掌訝耳，烏得謂即上節之大夫士？況賈疏所引又皆掌訝職掌之事，不可以此訝非掌訝也。諸侯無掌訝說亦無據。」今案：據此則首節所云大夫士降一等之訝，乃聘日迎賓之訝，自此以下則皆謂掌訝也。今姑依鄭釋之，而附載《札記》及《疑義》二說於此，俟後人考定焉。

右記賓訝往復之禮

凡四器者，唯其所寶，以聘可也。言國獨

以此爲寶也，四器謂圭、璋、璧、琮。【疏】正義曰：《周禮·大宗伯》曰：「以玉作六瑞，以等邦國。」又曰：「以玉作六器，以禮天地四方。」是瑞與器殊。今此瑞玉亦名器者，對文異，散則通也。《尚書》亦曰五器。注云「言國獨以此爲寶也」者，張氏爾岐云：「四器唯其所寶，故以行聘，非所寶則不足以通誠好矣。」云「四器謂圭、璋、璧、琮」者，盛氏云：「五等諸侯所寶不同，則所用以聘者亦異。公侯伯寶圭璋，子男寶璧琮。上用則已僭，下用則已卑，皆不可也。經但見公侯伯之聘玉，嫌璧琮可以享而不可以聘，故記明之。」今案：《典瑞》曰：「瑑圭璋璧琮以親聘。」舊說謂圭璋以行聘，璧琮以行享，是據此經侯伯之禮言之。若子男則聘用璧琮，享用琥璜也。此記言「以聘」，不言享，又節首言「凡」，則是通五等言之。盛說是也。

右記聘玉

宗人授次，次以帷，少退于君之次。主國

之門外，諸侯及卿大夫之所使者，次位皆有常處。【疏】正

義曰：敖氏云：「授次，授賓次也。設次者，掌次也，宗人則主授之耳。」《釋官》云：「掌禮之官，天子有大宗伯、小宗伯，諸侯以司馬兼之，無宗伯，唯立宗人而已。春秋時諸國皆不見有宗伯，而《左傳》稱魯夏父弗忌爲宗伯，似魯獨立其官。然哀二十四年傳稱：「使宗人鬻夏獻其禮。」定四年傳稱：「分魯以祝宗卜史。」杜注解宗爲宗人，則魯無宗伯可知。鄭注《大宗伯》及《禮器》，引《左傳》俱云：「夏父弗忌爲宗人。」疑今本作「宗伯」者，誤也。《周禮》：「大宗伯，卿；小宗伯，中大夫。」諸侯五大夫無小宗伯，則宗人不在大夫之列，蓋使士爲之。宗人亦稱大宗，見《曾子問》及《祭統》。今案：《文王世子》曰：「宗人授事。」鄭注：「宗人掌禮及宗廟。」孔疏云：「別言『及宗廟』，則宗廟之外，諸禮皆掌。」聘在廟行之，故此賓初至之時，主授次以爲止息也。「次以帷」者，謂次以帷布爲之。《周禮》：「幕人掌帷幕。」鄭注：「在旁曰帷，在上曰幕，帷幕皆以布爲之。」是也。「少退于君之次」者，賈疏云：「君次在前，臣次在後。」敖氏云：「君謂朝君也。」蔡氏云：「君，謂外諸侯來朝者。各有次，少退，不與諸侯次同也。」吳氏《章句》云：「君之次」者，兩君相朝亦有次也。此聘無君之次，蓋以相朝時設次之地言。」注云「主國之門外，諸侯及卿大夫之所使者，

次位皆有常處」者，門外，大門外也。「卿大夫之所使者」，《校勘記》云：「單疏、《要義》俱無『所』字，似無者是。」卿大夫之使者，謂卿大夫來使者也。言次位有常處，以見君之次與臣之次別也。

右記授賓次

上介執圭如重，授賓。慎之也。《曲禮》曰：

「凡執主器，執輕如不克。」【疏】正義曰：賈疏云：「此謂將聘主君廟門外，上介屈纁授賓時。」敖氏云：「上介凡執玉皆如是，不惟授賓之時爲然，記者特於此發之耳。」注云

「慎之也」者，圭輕物，而執之如重，以心存戒慎故也。引《曲禮》者，證執輕如重之義。彼注云：「主，君也。克，勝也。」賓入門，皇，升堂，讓，將授，志趨。皇，自莊盛也。讓，謂舉手平衡也。志，猶念也。念趨，謂審行步也。孔子之執圭，鞠躬如也，如不勝。上如揖，下如授，勃如戰色，足蹣蹣如有循。古文「皇」皆作「王」。【疏】正義曰：《校勘記》云：「注『鞠躬如也』，『躬』，《釋文》作『窮』，云：『劉音弓，本亦作躬。』《集釋》亦作『窮』。張氏曰：『《爾雅》云：鞠，究，窮也。鞠窮蓋複語，自《論語》作鞠躬，

學者遂不復致思於其間，安知非鞠躬若踧踖之謂者乎？如是，則劉音亦誤矣，從《釋文》。盧文弨云：「《廣雅》：『鞠躬，謹敬也。』上丘六，下丘弓反，與此鞠躬字異音義同。」案：《左傳》宣十二年「有山鞠窮乎」，此借常語爲物名也，二字本雙聲。又案：《羣經音辨》云：「鞠躬，容謹也，音弓。鄭康成說孔子之執圭鞠躬如也，今本作躬，據此則賈氏時《儀禮》經注已俱作「躬」矣。」今案：《釋文》載作「躬」之本，則唐初已然，嚴本亦作「躬」，今從之，然「鞠躬」古義不可不知也。「下如授」，《校勘記》云：「授，陳本作「受」。」○此言賓執玉之容也。注云「皇，自莊盛也」者，莊，嚴也，莊亦訓盛，蓋自矜嚴之貌。云「讓，謂舉手平衡也」者，《曲禮》曰：「執天子之器則上衡，國君則平衡。」鄭注：「衡謂與心平。」王氏士讓云：「平衡則不亢，故云「讓」。」敖氏以讓爲後君升堂。褚氏云：「依注「舉手平衡」，擬執玉之容，方與上文「皇」、下文「志趨」一貫。觀下又云「升堂主慎」，可見非讓升之謂。」云「志，猶念也，念趨，謂審行步也」者，《孟子》曰：「夫志，氣之帥也。」注云：「志，心所念慮也。」是志與念同。下注又以志趨爲圈遯而行，是審行步可知。張氏爾岐云：「審行步」者，謂審乎君行一臣行二之節。」是也。注又引孔子之執圭以爲證，云「執圭，鞠躬如也」至「如有循」，皆《論語·鄉黨篇》文。《集

解》引包氏云：「爲君使以聘問鄰國，執持君之圭鞠躬者，敬慎之至也。」又引鄭氏云：「上如揖，授玉宜慎也。下如授，不敢忘禮也。戰，色敬也。足縮縮如有循，舉前曳踵行也。」皇疏云：「舉足前，恒使不至地，而踵或不離地，如車輪也。」今案：《曲禮》曰：「執主器，行不舉足，車輪曳踵。」《玉藻》曰：「執龜玉，舉前曳踵，縮縮如也。」孔疏：「縮縮，言舉足狹數。」云「古文「皇」皆作「王」者，胡氏云：「《洪範》「皇極之敷言」，《史記·宋微子世家》作「王極」。《史記》多用古文，「皇」作「王」，與此正同。鄭云：「皇自莊盛也。」義當爲皇，故不從古文。」授如爭承，下如送，君還而后退。爭，爭鬪之爭，重失隊也。而后，猶然後也。

【疏】正義曰：李氏云：「授如爭承，謂授玉時。」褚氏云：「《集說》讀「爭」字絕句，如此則授受時成何威儀？」秦氏蕙田云：「敖繼公以「授如爭」爲句，「承下如送」爲句。郝敬則以「將授志」爲句，「趨授如爭」爲句，皆非。」張氏爾岐云：「下如送」當與《論語》「下如授」同解，言其授玉時手容也。君還，謂君轉身將授玉於宰，而後賓退而下階。若以「下」爲下堂，「退」爲出廟門，恐非文次。」今案：張說

①「堂」，《儀禮鄭注句讀》作「階」。

是也。○注首，毛本有「爭爭鬪之爭」五字。《校勘記》云：

「五字，嚴、徐、《集釋》俱無。瞿中溶云：『今本因《通解》經下引《釋文》而誤。』」云「重失隊也」者，解「授如爭承」

句。承，接也，謂如與人爭接取物，恐其失隊。

下階，發

氣，怡焉。再三舉足，又趨。發氣，舍息也。再三

舉足，自安定，乃復趨也。至此云「舉足」則志趨，卷遯而行

也。孔子之升堂，鞠躬如也，屏氣似不息者，出降一等，遲

顏色，怡怡如也。沒階，趨進，翼如也。【疏】正義曰：敖氏

云：「下階，謂降而沒階之時也。於此言「發氣，怡焉」，言

「又趨」，則向者之屏氣戰色足如有循可知矣。」○注「至此

云舉足」，《校勘記》云：「徐本、《集釋》俱無「至」字，《通解》

有。賈疏有「至」字，無「云」字。」今案：嚴本有「至」字，從

之。又云：「卷豚而行也，「豚」，嚴、徐作「遯」，《釋文》作

「豚」，張氏從之。」今案：「鞠躬如也」，「躬」，《集釋》作

「窮」。云「發氣，舍息也」者，《經義述聞》云：「下「及享

發氣焉盈容」，注云「發氣，舍氣也」。兩「舍」字，《釋文》無

音。家大人曰：舍，皆讀爲舒，謂發舒其氣也。《說文》：

「舒，從予舍聲。」《小雅·何人斯篇》「亦不遑舍」，與車、盱

爲韻。《春秋·哀六年》：「齊陳乞弑其君荼。」《釋文》：「荼音

舒。《公羊》「荼」作「舍」。此皆古人讀舍爲舒之證。」云「再

三舉足，自安定，乃復趨也」者，此趨謂疾趨也。曰「又」，則

入時亦趨矣。云「至此云「舉足」則志趨，卷遯而行也」者，

《玉藻》曰：「圈豚行不舉足。」鄭注：「圈，轉也。豚之言若

有所循。」圈豚與「卷遯」字同。至此云「舉足」，則前此不

舉足可知，故注以志趨爲卷遯行也。又引孔子之事以證

之，自「升堂鞠躬如也」以下，皆《鄉黨》文。《集解》引孔安

國云：「先屏氣，下階舒氣，故怡怡如也。」皇疏云：「遲，申

也，氣申則顏色亦申，故怡悅也。」「沒階，趨進」，沒，猶盡

也，謂下諸級盡至平地時也。今案：此引《論語》以證「發

氣，怡焉」及「又趨」也。《論語釋文》作「沒階趨」，無「進」

字，云：「一本作「沒階進」，誤也。」盧氏《考證》云：「《史

記·仲尼世家》作「沒階趨進」，《儀禮·聘禮》注引《論語》

同。《曲禮》「帷簿之外不趨」，《正義》及《士相見禮》疏引

《論語》竝有「進」字。」「趨進」者，趨前之謂也。進字不作入

字解，舊有此字，陸氏以爲誤，非也。」「及門，正焉。容

色復故，此皆心變見於威儀。【疏】正義曰：《校勘記》云：

「注「容」，陳本誤作「客」。」「○張氏爾岐云：「出門將更行後

事。此皆心變見於威儀，統指賓入門以下而言。」「執圭，

入門，鞠躬焉，如恐失之。記異說也。【疏】正義

曰：《校勘記》云：「魏氏曰：『溫本作鞠窮焉。』案：以「躬」爲「窮」，與《釋文》合。考「鞠躬」字，經注凡三見，《釋文》於前注作音，不云下同，蓋偶遺之，實皆作「窮」耳。」○此「入門」亦謂將聘執主人廟門時也。「鞠躬焉」，敬謹之至，見於容也。其所以敬謹者，唯恐玉之或失隊也。注云

「記異說也」者，上已記執圭之儀，此又記之，事同而說有微異，故竝記而存之也。及享，發氣焉，盈容。發氣，

舍氣也。孔子之於享禮，有容色。【疏】正義曰：盛氏云：

「發氣與聘時下階同，盈容則和氣且溢於面矣。聘主於敬，享貴於和，故其容貌如是。」○注「發氣」，《校勘記》云：

「嚴、徐本無「氣」字。」今案：各本有「氣」字，是也。云

「發氣，舍氣也」者，舍氣即舍息，詳上。云「孔子之於享禮，有容色」者，亦《鄉黨篇》文，引以爲盈容之證也。衆介

北面，蹕焉。容貌舒揚。【疏】正義曰：敖氏云：「於享

乃云「蹕焉」，以見聘時之不然也。然則衆介容貌之變，其節亦略與賓同矣。」盛氏云：「衆介，謂自上介而下也。此

蒙「及享」之文，當以敖說爲正。據此，則享時介亦皆從人明矣。」注云「容貌舒揚」者，《說文》：「蹕，動貌。」是有

舒揚之意。《詩·公劉》：「蹕蹕濟濟。」鄭箋：「士大夫之威

儀也。」《荀子·大略篇》注：「蹕蹕，有行列貌。」私覲，愉愉焉。容貌和敬。【疏】正義曰：《校勘記》云：「愉愉」，

《釋文》作「俞俞」。○賈疏云：「享時盈容，舒於聘時戰色。此私覲，對享時。又愉愉，和敬，舒於盈容也。」今案：《鄉

黨篇》曰：「私覲，愉愉如也。」《集解》引鄭氏云：「愉愉，顏色和也。」出如舒鴈。威儀自然而有行列。舒鴈，鵠。

【疏】正義曰：出，謂出廟門也。如舒鴈，張氏爾岐以爲兼指賓介，蓋謂賓介同出，而行有次序，如舒鴈然。《詩》曰

「兩鵠鴈行」，是可證也。○注「舒鴈，鵠」，《釋文》「鵠」下有「也」字，張氏從之。嚴、徐本俱無「也」字。云「舒鴈，鵠」

者，《爾雅·釋鳥》文，詳《士昏禮》。皇且行，入門主

敬，升堂主慎。復記執玉異說。【疏】正義曰：注云

「復記執玉異說」者，敖氏云：「先言「皇且行」，乃云「入門主敬」，則與上記「入門皇者」異也。云「升堂主慎」，則又與

入門而如恐失之者異也。是謂「異說」。今案：記文雖異，大指不外致謹於行步威儀而已。蓋聘使鄰國，不可隕越失

容，以爲君羞也。

右三記賓介聘享之容

凡庭實，隨入，左先，皮馬相間可也。隨

入，不竝行也。間，猶代也。土物有宜，君子不以所無爲禮，畜獸同類可以相代。古文「間」作「干」。【疏】正義曰：

《校勘記》云：「注『土物』，徐、陳『土』俱作『士』，誤。」云

「隨入，不竝行也」者，凡庭實以四爲禮，或四皮，或四馬，執之牽之者不竝行，是相隨而入也。相隨而入則有先後，故

又言「左先」。李氏云：「皮北面西上，故左先。」今案：「左先」宜兼皮馬言。入門以西爲左，西上，故在左者先人也。

云「間，猶代也」者，言有無可以相代，如有皮之國則用皮，無皮之國則用馬也。云「土物有宜，君子不以所無爲禮」

者，是釋所以相代之義。《禮器》曰：「居山以魚鼈爲禮，居澤以鹿豕爲禮，君子謂之不知禮。」是可證已。云「畜獸同

類」者，皮用虎豹，是獸也。馬是六畜之一，二者雖有在家在野之殊，然同爲四足而毛之類，故相代可也。褚氏云：

「既有皮，何必更用馬？敖氏謂一節用皮，一節用馬，相間而設，殊不可解。」云「古文「間」爲「干」者，干是假借字。

鄭據《爾雅·釋詁》訓間爲代，其義較顯，故不從古文。賓

之幣，唯馬出，其餘皆束。馬出，當從廐也。餘物

皆束，藏之內府。【疏】正義曰：此「幣」字，蓋統謂玉、帛、

皮、馬也。言主人受賓之幣，唯馬則出之於廐，餘物皆向東

藏之。上經享時曰「皮如入右首而束」，覲時曰「有司二人坐舉皮以東」，又曰「宰夫受幣于中庭以東」，皆是也。必知

藏之內府者，《周禮·內府職》曰：「凡四方之幣獻之金玉齒革兵器凡良貨賄入焉。」鄭注：「諸侯朝聘所獻國珍。」彼

天子禮，諸侯當亦然。《雜記》曰：「宰夫坐取璧，降自西階以東。」鄭注：「以東，藏於內也。」此雖言諸侯相弔含之禮

與聘殊，然其以東藏於內則同也。多貨則傷于德，

貨，天地所化生，謂玉也，君子於玉比德焉。朝聘之禮，以爲瑞節，重禮也。多之，則是主於貨，傷敗其爲德。【疏】正

義曰：注「傷敗」，《校勘記》云：「徐本、《集釋》俱無「敗」字，《通解》、楊氏俱有。」今案：嚴本有「敗」字，從之。云

「貨，天地所化生，謂玉也」者，鄭以此句爲論聘用玉之事。天地所化生，對人所造爲者言之。鄭注《周禮·大宰》「商

賈阜通貨賄」云：「金玉曰貨，布帛曰賄。」是謂玉爲貨也。云「君子於玉比德焉」者，《聘義》文。云「朝聘之禮，以爲瑞

節，重禮也」者，謂朝聘假玉爲瑞節以通信，蓋重禮，非重

玉，故《聘義》曰：「圭璋特達，德也。」云「多之，則是主於

貨，傷敗其爲德」者，蓋玉以比德，若多之則有重玉之意，而

傷害其爲德矣。敖氏云：「言此者見貨之不可多也。」盛氏

云：「貨謂玉帛庭實之屬，不專指玉。」今案：貨亦有兼布帛言，如《漢書·食貨志》所云，乃對文異，散則通之例也。此二句以貨對幣言，明是指玉，鄭說不可易。幣美則沒禮。幣，人所造成，以自覆幣，謂束帛也。愛之斯欲衣食之，君子之情也，是以享用幣，所以副忠信，美之，則是主於幣，而禮之本意不見也。【疏】正義曰：注「愛之」，《校勘記》云：「陳、閩、監、葛『愛』俱作『受』。」云「幣，人所造成，以自覆幣，謂束帛也」者，鄭以上貨為聘玉，故以此幣為享時所用束帛。束帛為人所造成，與天地化生者異。云「愛之斯欲衣食之，君子之情也，是以享用幣，所以副忠信」者，禮曰：「忠信，本也。」忠信即其愛之之情，有是忠信之實，乃用幣以將之，重禮不重幣也。云「美之，則是主於幣，而禮之本意不見也」者，美是人工，極其華麗，則徒見幣之美而不見禮意，是禮為其所掩沒矣。敖氏云：「言此者，見幣之不必美也。」張氏爾岐云：「注『以自覆幣，謂束帛也』，『幣』疑當作『蔽』字，自覆蔽謂其可為衣也。」褚氏云：「注『幣人所造成以自覆』為句，『幣謂束帛也』為句。」今案：張說較勝。○案：《荀子》引《聘禮志》曰：「聘厚則傷德，財侈則殄禮。」與此文稍異而義同。賄，在聘于賄。賄，

財也。于，讀曰為。言主國禮賓，當視賓之聘禮而為之財也。賓客者，主人所欲豐也，若苟豐之，是又傷財也。《周禮》曰：「凡諸侯之交，各稱其邦而為之幣，以其幣為之禮。」古文「賄」皆作「悔」。【疏】正義曰：注云「賄，財也」者，詳前。案：上言貨與幣是聘君所以聘享主國者，此云賄即「賄用束紡」及「出有贈賄」之賄，乃主國所以遣聘國者，蓋亦不可過禮也。云「于讀曰為」者，《士冠禮》「宜之于假」注云「于猶為也」，是于、為聲義相近，故讀從之。云「言主國禮賓，當視賓之聘禮而為之財也」者，鄭讀于為為，而又訓在為視，言主國所以致禮於賓國者，當視賓國聘禮之厚薄而為之財，不可奢亦不可豐也。引《周禮》者，《司儀職》文，證在聘為賄之義。彼注云：「幣，享幣也，於大國則豐，於小國則殺，主國禮之，如其豐殺。」謂賄用束紡，禮用玉帛乘皮及贈之屬是也。云「古文『賄』皆作『悔』」者，胡氏云：「賄正字，悔同音假借字，《曲禮》釋文引《字林》云：『賄音悔。』」

右記庭實貨幣之宜

凡執玉，無藉者襲。藉，謂繅也。繅所以緼藉

玉。【疏】正義曰：注云「藉，謂纁也，纁所以緼藉玉」者，案：纁以薦玉，義已詳前。纁亦稱藉，《典瑞》曰「纁藉五采五就」是也。陸氏佃謂：「經言纁，又別言藉，則藉非纁著矣。」其說誤。但此記無藉者襲，則指圭璋特達而言。《曲禮》曰：「執玉，其有藉者則裼，無藉者則襲。」鄭注：「藉，藻也。裼，襲，文質相變耳。有藻爲文，裼見美亦文，無藻爲質，襲充美亦質。圭璋特而襲，璧琮加束帛而裼亦是也。」案：有藉無藉，當以此注後條爲是。孔疏雜引各家說而無斷制，如所引熊氏說，謂朝聘時用圭璋特，賓主俱襲，行享時用璧琮加束帛，賓主俱裼，是已。而又牽合垂纁屈纁之文，謂垂藻之時則須裼，屈藻之時則須襲，殊未明析。至引皇氏說，謂玉亦有裼襲，尤爲非理。陳氏祥道云：「玉有以纁爲之藉，有以束帛爲之藉，有藉則裼，無藉則襲，特施於束帛而已。聘則賓襲執圭，公襲受玉，及享則賓裼奉束帛加璧，蓋聘特用玉而其禮嚴，享藉以帛而其禮殺，此襲裼所以不同，先儒以垂纁爲有藉，屈纁爲無藉，此說非也。」陸氏佃云：「無藉若圭璋特。」是也。楊氏復云：「《曲禮》曰：『執玉，其有藉者則裼，無藉者則襲。』所謂無藉，謂圭璋特達，不加束帛，當執圭璋之時，其人則襲也。所謂有藉者，謂璧琮加於束帛之上，當執璧琮之時，其人則裼也。」

《曲禮》所云，專指圭璋特而襲，璧琮加束帛而裼一條言之。先儒乃以執圭而垂纁爲有藉，執圭而屈纁爲無藉，此則不然。陳氏、陸氏之言足以破先儒千百載之惑矣，然何以知先儒之說爲非，而陳氏、陸氏之說爲是邪？竊詳經文，裼襲是一事，垂纁屈纁又別是一事，不容混合爲一說。方其始受君命也，賈人啓櫝取圭，垂纁以授宰，宰執圭，屈纁，自公左授使者。使者垂纁受命訖，以授上介。上介受玉，屈纁以授賈人。是時授受凡易四手，有屈垂之文，而無裼襲之禮也。及至主國行聘禮，賓在席門之外，賈人啓櫝取玉，垂纁而授上介。上介不襲，屈纁以授賓。經明言上介不襲，是有垂屈之文而無裼襲之禮也。逮夫主賓三揖三讓登堂，賓襲執圭，公側襲受玉于中堂與東楹之間，及公側授宰玉而後裼降立，是主賓授受則襲，既授宰玉則裼。故鄭注云：「凡當盛禮者，以充美爲敬；非盛禮者，以見美爲敬。」此言是也。當主賓授受之時，曾不見垂屈之文焉。聘禮既畢，君使卿皮弁還玉于館，既歸反命，公南鄉，卿進使者，使者執圭垂纁北面，上介執璋，屈纁主於其左，又有垂屈之文而無裼襲之禮。蓋圭，聘禮之重也，主賓授玉于中堂與東楹之間，禮之正也。方其授于賈人，授于上介，皆擬行之禮及贊禮者之事，故辨垂屈以彰其文。主賓授玉于中堂與東

楹之間爲禮之正，故辨楊襲以致其敬。及歸反命，又於君前以垂屈爲文，而不以楊襲爲禮，豈非玉爲聘禮設，反命亦非禮之正乎？兩義不同，各有其宜。自鄭氏之說始差，熊氏、皇氏從而傳會之，而經意始汨。然經文粲然如日星之在天，又豈得而終汨之邪？」敖氏曰：「藉謂束帛以藉玉也。以此篇考之，則聘以圭璋而不用束帛以爲藉，所謂無藉者也。其實主授受之時，皆襲以執之。執玉之無藉者襲，則於其有藉者楊可知。乃不言之者，楊乃常禮，不特於執享玉之時爲然故也。」今案：陳氏、陸氏、楊氏皆主《曲禮》注後條，而楊說更詳密。至此記但云「無藉者襲」，而不言有藉者楊，則敖說亦可從耳。

右記楊襲之節

禮，不拜至。以賓不於是始至。今文「禮」爲「醴」。【疏】正義曰：注云「以賓不於是始至」者，胡氏承琪云：「禮，不拜至」，當是謂聘享畢禮賓時事。蓋經於聘時無「拜至」明文，記獨言「禮，不拜至」，正見聘有拜至，與經文互相備。注云「以賓不於是始至」，亦對聘時而言。賈云：「聘時不拜至。」非也。賈蓋謂此文承上執玉帛之下，

不知此文乃合下文「醴尊于東箱」及「祭醴再扱」爲一節耳。或曰：「《士昏禮》醴賓拜至，記者恐人疑凡禮皆然，故特明之，見聘禮與昏禮異也。」義亦通。云「今文「禮」爲「醴」者，胡氏云：「今文作「醴」，義自可通。惟鄭於《士冠》、《士昏》謂「醴賓」既皆破爲「禮」，又此經謂「禮賓」祇作「禮」，故于此亦從古文作「禮」，疊今文作「醴」者不用；而下文君有故，使大夫受，不禮，又疊古文作「醴」者不用也。」醴尊于東箱，瓦大一，有豐。瓦大，瓦尊。豐，承尊器，如豆而卑。【疏】正義曰：「箱」，毛本作「廂」。《校勘記》云：「唐石經、嚴、徐、陳本、《集釋》俱作「箱」，「箱」正字，「廂」俗字。」○敖氏云：「《士冠禮》：醴尊于房中，勺觶，角柄，脯醢在其北，南上。此尊于東箱，則勺觶、籩豆之類亦宜近之。」今案：瓦大、豐，詳《燕禮》。薦脯五臟，祭半臟，橫之。臟，脯如版然者，或謂之脰，皆取直貌焉。【疏】正義曰：此醴賓時所用薦脯也，餘詳《鄉飲酒》及《鄉射·記》。祭醴，再扱，始扱一祭，卒再祭。卒，謂後扱。【疏】正義曰：詳《士昏禮》。主人之庭實，則主人遂以出，賓之士訝受之。此謂餘三馬也，左馬，賓執以出矣。士，士介從者。【疏】正義曰：

「主人之庭實」，謂禮賓之庭實也。「則主人遂以出」，吳氏《疑義》云：「即上經注所謂主人牽馬者從出也。以經無文，故記補之。」注云「此謂餘三馬也，左馬，賓執以出矣」者，庭實四馬，賓自執左馬以出，則使人牽以出者止三馬也。云「士，士介從者」，以云賓之士，明是士介從者可知，上經注云「從者士介」與此同。上經從者訝受馬，受賓自執之馬。此云「士訝受之」，受其餘三馬也。

右記公禮賓儀物

既覲，賓若私獻，奉獻將命。時有珍異之物，或賓奉之，所以自序尊敬也，猶以君命致之。【疏】正義曰：言「既覲」，則獻行於覲後矣。覲與獻皆是私禮，而覲有定，獻或有或無不定，故言「若」也。注云「時有珍異之物，或賓奉之」者，獻無常物，有珍異則奉之以獻。云「時有」，云「或」，皆不定辭也。云「所以自序尊敬也」者，序當作遂，達也，言獻所以自達其尊君敬君之忱。云「猶以君命致之」者，獻雖己物，必稱君命以致之，明不敢自私也，臣之於君與子之於父同。《玉藻》曰：「親在，行禮於人稱父。」亦是此意。擯者入告，出禮辭。辭其獻也。賓東

面坐奠獻，再拜稽首。送獻不入者，奉物禮輕。

【疏】正義曰：《司儀職》曰：「私面私獻皆再拜稽首，君若拜。」吳氏《章句》云：「由東面轉北面再拜。」注云「奉物禮輕」者，對私覲禮重，入門奠幣也。擯者東面坐取

獻，舉以入告，出，禮請受。東面坐取獻者，以宜

竝受也。其取之，由賓南而自後右客也。【疏】正義曰：禮請受，詳上經「士介私覲」節。注云「以宜竝受也」者，賓

東面坐奠獻，擯者東面坐取獻，是同面竝受也。云「其取

之，由賓南而自後右客也」者，上經享時云「受皮者自後右客」，注蓋本此為解也。李氏云：「擯者自門東，適賓南，由

賓後，於賓北取幣。」賓固辭，公荅再拜。拜受於賓

也。「固」亦衍字。【疏】正義曰：《校勘記》云：「再，唐石

經作「再」，誤。」注云「拜受於賓也」者，敖氏云：「云

「荅」，則拜非為受也。」此說是。然則「公荅再拜」者，荅賓

之再拜稽首也。云「固」亦衍字」者，賈疏云：「以其上擯

者禮請受，不云固，明知賓不固辭，故云衍字。」今案：云

「亦」者，亦上經士介私覲時「賓固辭」之「固」為衍字也，說

詳彼注。擯者立于闕外以相拜，賓辟。相，贊

也。古文「闕」為「蹙」。【疏】正義曰：相拜者所立，上經云

「門中」，此云「闕外」，文互見也。相拜立于闕外，則內得贊君，外得視賓。擯者授宰夫于中庭。東藏之，既乃介覲。【疏】正義曰：吳氏《疑義》云：「私獻偶然事，不必定是覲時，注未的。」今案：吳說是也。若兄弟之國，則問夫人。兄弟，謂同姓若婚姻甥舅有親者。問，猶遣也，謂獻也。不言獻者，變於君也。非兄弟，獻不及夫人。【疏】正義曰：注云「兄弟，謂同姓若婚姻甥舅有親者」，古人同族多稱昆弟，其稱兄弟則兼異姓有親者言之。注云「婚姻」者，據《爾雅·釋親》「妻之父為婚兄弟，壻之父為姻兄弟」也。云「甥舅」者，據《詩·頌弁》「兄弟，甥舅」也。云「問，猶遣也，謂獻也」者，遣是以物與人之名，鄭解「問」為遣，以別於「聘問」之「問」，謂此「問」與上言「獻」一也。云「非兄弟，獻不及夫人」者，言惟兄弟之國，獻君并及夫人；其他非兄弟之國，雖於君有獻，亦不及夫人矣。經言「若」者，對非兄弟者言也。敖氏引或說「問，猶聘也」，謂此「問夫人」，即經所謂「夫人之聘享」。徐氏卓云：「夫人之聘享，不專主兄弟之國言。此記明言兄弟之國，究當以鄭注為是云。」

右記覲後賓私獻

若君不見，君有疾若他故，不見使者。【疏】正義曰：注「疾」，《校勘記》云：「陳、閩俱誤作『宮』，葛本作『病』。」云「他故」，賈疏云：「謂疾之外或新有哀慘。」使大夫受。受聘享也，大夫，上卿也。【疏】正義曰：注云「大夫，上卿也」者，卿亦稱大夫。必知使上卿者，以其代君受聘享當使職尊者，不使下卿也。自下聽命，自西階升受，負右房而立，賓降，亦降。此儀如還圭然，而賓大夫易處耳。今文無「而」。【疏】正義曰：《校勘記》云：「階，唐石經作『門』，誤。」注云「此儀如還圭然」者，案：「自下聽命」，在堂下聽命也，與還圭時「賓自碑內聽命」，注云「聽命於下，敬也」同；「自西階升受，負右房而立」與還圭時升自西階，自左，南面受圭，退負右房而立同；「賓降，亦降」與還圭時大夫降中庭，賓降同。故云「如還圭然」也。云「而賓大夫易處耳」者，謂還圭時賓在大夫之左受之，此則大夫在賓之左受之，故云「易處」也。云「今文無『而』」者，前還圭時，「負右房而立」有「而」字，此亦當有「而」字，故鄭從古文。不禮。辟正主也。古文「禮」作「醴」。【疏】正義曰：「不禮」，謂聘享畢不禮賓也。敖氏

云：「必言之者，嫌受其聘享則當禮之也。」○《校勘記》云：「古文禮作體」五字，各本俱脫，嚴本、《集釋》、《通解》敖氏俱有，敖氏「古」誤作「今」。注云「辟正主也」者，「正主」謂君，以大夫代受，不敢儼然如君行禮賓之禮，故云「辟」也。

右記君不親受之禮

幣之所及，皆勞，不釋服。以與賓接於君所，賓又請有事於己，不可以不速也。所不及者，下大夫未嘗使者也。不勞者，以先是賓請有事於己同類，既聞彼爲禮所及，則已往有嫌也。所以知及不及者，賓請有事，固曰某子某子。【疏】正義曰：經惟云「卿大夫勞賓」，不辨幣之所及與不釋服之節，故記明之。《國語》：「晉羊舌肸聘于周，發幣于大夫。」敖氏云：「服皮弁服。」郝氏云：「朝服。」案：聘君臣同服皮弁服，敖說爲長。注云「以與賓接於君所，賓又請有事於己，不可以不速也」者，是釋所以不釋服而往勞之故。褚氏云：「見勞賓者，先於致饗餼。」今案：記云「幣之所及，皆勞」，則有所不及而不勞者矣。云「所不及者，下大夫未嘗使者也」者，謂三卿五大夫中，惟未

嘗使至己國之下大夫，幣有不及耳。云「不勞者，以先是賓請有事於己同類，既聞彼爲禮所及，則已往有嫌也」者，言幣未及己而往勞之，是嫌於相干也。云「所以知及不及者，賓請有事，固曰某子某子」者，斯時賓尚未問卿大夫，何以知幣有及有不及？蓋賓請有事之時，即舉所問之人一一言之，因知幣之及己，先往勞也。某子某子，如高子、國子之類。

右記勞賓

賜饗，唯羹飪，筮一尸，若昭若穆。羹飪，謂飪一牢也。肉謂之羹。唯是祭其先，大禮之盛者也。筮尸若昭若穆，容父在，父在則祭祖，父卒則祭禰。腥餼不祭，則士介不祭也。士之初行，不釋幣於禰，不祭可也。古文「羹」爲「羔」，「飪」作「臠」。【疏】正義曰：注云「羹飪，謂飪一牢也」者，即歸饗餼之飪也。云「肉謂之羹」者，《爾雅》文。云「唯是祭其先，大禮之盛也」者，是字指羹飪言。賜饗有飪有腥又有餼，今唯言飪，則其他不祭可知。《論語》君賜食不祭者，以恐或餒餘。此歸饗是大禮，飪又主君潔烹以賜者，故必祭之，不忘先也。云「筮尸若昭若穆，容父

在，父在則祭祖，父卒則祭禰者，以經云「筮一尸」，而又云「若昭若穆」，則或昭或穆不定，故知有父者祭父，無父者祭禰也。「容父在」者，謂或父有廢疾，或父已請老，子爲大夫，出使在外也。敖氏云：「尸云筮，則子弟之從行者衆矣。」又云：「唯羹飪」之文意不具，或脫一「祭」字。云「筮一尸」者，嫌并祭祖禰當異尸也。韋氏協夢云：「敖謂竝祭祖禰而唯一尸，若然則何必言若昭若穆乎？且何以處父在者乎？」褚氏云：「祖與父存沒無定，故科祭其一。若如敖說，則何昭穆之有？」下「皇祖某甫，皇考某子」，誤與此同。今案：敖說之非，盛氏及江氏筠亦俱辨之。云「腥醢不祭，則士介不祭也」者，士介但有醢而無饗，故不祭。若然則上介賜饗亦祭，記不言者，略也。云「士之初行，不釋幣於禰，不祭可也」者，盛氏云：「士介初行，亦告於禰。至是乃不祭者，賤不載主也。」今案：大夫士無木主，詳《士虞禮》「陰厭」節。盛氏謂賤不載主，未確。至謂士初行亦告禰，揆之出告反面，事亡如存之義，士當亦與卿大夫同矣。云「古文『羹』爲『羔』，『飪』作『臚』」者，胡氏云：「案：《說文》『羹』，本從鬲從羔，小篆從羔從美，作羹。此古文『羹』爲『羔』者，蓋字之爛脫。『飪』作『臚』者，『臚』當作『稔』。」《說文》：「飪，大孰也。」此古文蓋借穀孰之「稔」爲之，傳寫

又誤作「臚」耳。《爾雅》：「饋饌，稔也。」《釋文》：「稔本作飪。」此二字互借之證。《郊特牲》「臚祭」，臚亦稔之誤。○賈疏云：「古者天子諸侯行，載廟木主。大夫雖無木主，亦以幣帛主其神。」後人駁之，謂上經釋幣即埋之，不云載之以出，存以備參。僕爲祝。祝曰：孝孫某，孝子某，薦嘉禮于皇祖某甫，皇考某子。僕爲祝者，大夫之臣攝官也。【疏】正義曰：云「孝孫」，又云「孝子」，云「皇祖」，又云「皇考」者，上文云「若昭若穆」，故此亦兩言之。敖氏云：「字祖而謚考，亦假設之辭。」注云「僕爲祝者，大夫之臣攝官也」者，《禮運》曰：「大夫具官，非禮也。」則攝官其常，故注云然。此僕爲祝者，亦是使僕攝祝也。定四年《左傳》：「祝鮀曰：『嘉好之事，君行師從，卿行旅從，臣無事焉。』」是君與大夫出境，祝不從行，故使僕爲之。《釋官》云：「賈疏因此遂謂大夫本無祝官，非是。《少牢》大夫禮，有祝。又《左傳》范文子反自鄆陵，使其祝宗祈死。是大夫之臣有祝矣。」如饋食之禮。如少牢饋食之禮，不言少牢，今以大牢也。今文無「之」。【疏】正義曰：王氏士讓云：「此因事而祭，故惟筮尸，無筮日，又無主婦助祭，且館於大夫之廟。記云如者，亦略倣其大節

爲之耳。」注云「今文無『之』者，蓋鄭於字句間亦必審

擇所從也。假器于大夫，不敢以君之器爲祭器。【疏】

正義曰：王氏士讓云：「案：爲聘使，不得將祭器以行，必假於大夫者，爵同也。《曲禮》曰：『大夫寓祭器於大夫，士寓祭器於士。』去國冀反者如此，則出聘者不以祭器行可知矣。」注云「不敢以君之器爲祭器」者，盛氏云：「君之器

謂鼎豆之屬，君所歸於賓者亦可爲祭器，而臣不敢用也。」

盼肉及廋車。盼，猶賦也。廋，廋人也；車，巾車也，

二人，掌視車馬之官也。賦及之，明辯也。古文「盼」作

「紛」。【疏】正義曰：注云「盼，猶賦也」者，《禮記·王

制》：「名山大澤不以盼。」鄭注：「盼，讀爲班。」《周禮》：

「匪頒之式。」鄭司農云：「頒讀爲班布之班。」是盼、頒、班

三字義俱通。《說文》：「班，分瑞玉。」《爾雅·釋言》：

「班，賦也。」郭注謂布與，蓋皆分物與人之意，故以「盼，猶

賦」解之。云「廋，廋人也；車，巾車也，二人。掌視車馬之

官也」者，《釋官》云：「廋車，注以廋人巾車當之。考《周

禮》廋人，下士，而巾車掌公車之政令，以下大夫爲之。疑

大夫出聘未必有此官從行也。《周禮》廋人下有圉人掌養

馬。廋，圉亦通稱。《左傳》崔子使圉人駕，又《孟氏選圉

人之壯者》，是大夫亦有圉人掌馬也。車則大夫家掌車之

官，若《左傳》云「鮑子之臣差車鮑點」、「叔孫氏之車子鉏商」之類。或曰：廋車，蓋廋人、巾車之徒屬從聘賓行者。云「賦及之，明辯也」者，此謂大夫受饗而祭，祭訖盼肉，廋車賤官亦及之，明其下逮無不辯也。云「古文「盼」作「紛」者，蓋由形近致誤，故鄭不從。

右記賓受饗而祭

聘日，致饗。急歸大禮。【疏】正義曰：《校勘

記》云：「日，唐石經作『自』，誤。注『急歸大禮』四字，今本

俱脫，嚴、徐、《集釋》、《通解》、楊氏俱有。」○聘之日，行聘

享畢，禮賓，禮賓後私覲，賓即館，又卿大夫勞賓，其事繁

矣。乃於是日即歸饗餼，是急歸大禮也。大禮，謂饗也。

明日，問大夫。不以殘日問人，崇敬也。古文曰「問夫

人也」。【疏】正義曰：注云「不以殘日問人，崇敬也」者，謂

不以聘日問大夫，而以聘之明日問大夫，是不以殘日也。

云「古文曰「問夫人也」者，胡氏云：「蓋涉下文「夕夫人歸

禮」而誤耳。」夕，夫人歸禮。與君異日，下之也。今文

「歸」作「饋」。【疏】正義曰：注云「與君異日，下之也」者，

此夕乃問大夫之夕，是與君致饗異日也。云「今文「歸」作

「饋」者，詳前「君使卿韋弁歸饗饋」下。既致饗，旬而稍，宰夫始歸乘禽，日如其饗饋之數。稍，稟食也。乘禽，乘行之禽也，謂鴈鶩之屬。其歸之，以雙爲數。其，賓與上介也。古文「既」爲「饋」。【疏】正義曰：旬，十日也。「既致饗，旬而稍」，謂致饗之後十日，而賓猶未歸，則更致稍食，恐米禾之不繼也。「宰夫始歸乘禽」，亦謂於旬日始也。必使宰夫者，《三禮札記》云：《周禮·宰夫職》：「掌賓客之委積膳獻。」鄭注：「膳獻，禽羞，俶獻也。」此天子禮，諸侯當亦然，故宰夫主歸之。○注「乘禽」，毛本作「乘謂」，《校勘記》云：「謂，嚴本、《集釋》、敖氏俱作「禽」，是也。」今案：「古文既爲饋」，胡氏承珙《古今文疏義》作「古文饋爲既」，云：「十行本作「古文既爲饋」，毛本同。蓋皆傳寫誤倒，今更正。」案：此「饋」爲「既」者，以「饋」爲經內「饗饋」之「饋」，非「既致饗」之「既」也，若以爲「既致饗」之「既」，則既訓已，與饋義絕不相通，無緣致誤，《疏義》說似是。然嚴本及各本俱與十行本同，茲仍之而附其說於後焉。云「稍，稟食也」者，詳上經「唯稍受之」下。云「乘禽，乘行之禽也」者，賈疏云：「別言此者，欲見此乘非物四曰乘。」今案：賈蓋以下多言雙，故疑非物四之乘，然語意未詳。《周禮·掌客》鄭注：「乘禽，乘行羣處之禽，

謂雉鴈之屬，於禮以雙爲數。」方氏苞云：「曰「乘禽」，以其雄雌相乘而爲偶也，故致之亦以雙。」然則乘禽即謂鳥之雄雌並行者矣。云「謂鴈鶩之屬」者，《爾雅》曰：「舒鴈，鶩。舒鳧，鶩。」《莊子》：「命豎子殺鴈而烹之。」《左傳》：「饗人竊更之以鶩。」是二物皆可供膳，故舉以爲證也。云「其歸之，以雙爲數」者，謂歸禽如其饗饋之數，每牢一雙。《聘義》曰「乘禽，日五雙」，謂賓也。賓饗饋五牢故五雙，上介三牢則三雙，士介一牢則一雙。云「其，賓與上介也」者，言乘禽日日歸之，惟賓與上介耳。若士介則間日矣。胡氏承珙云：「古文饋爲既」，案：饗饋字本作氣。《說文》：「氣，饋客之芻米也，從米，气聲。《春秋傳》：齊人來氣諸侯。」①槩，氣或從既。饋，氣或從食。自經典假氣爲雲氣字，而饋客之氣遂皆作饋，或有作既者，如此經古文及《中庸》「既稟稱事」、《大戴禮·朝事》「私覲致饗既」、段氏玉裁以三「既」字皆「槩」之省。案：《一切經音義》云：「饋，古文作槩。」雖不言《儀禮》古文，疑玄應所見《儀禮注》本容有作「古文饋爲槩」者。鄭注《中庸》云「既，讀爲饋」者，轉從今字，使人易曉，故於此經亦從今文作「饋」也。士中日則

①「氣」，原作「饋」，據《儀禮古今文疏義》改。

二雙。中，猶間也。不一日一雙，大寡，不敬也。凡獻，執一雙，委其餘于面。執一雙，以將命也。面前也。其受之也，上介受以入告之，士舉其餘從之，賓不辭，拜受於庭。上介執之，以相拜於門中，乃入授人。上介受，亦如之。士介拜受於門外。【疏】正義曰：注「其受之也」，毛本「也」作「止」，《校勘記》云：「嚴、徐、《集釋》、楊、敖俱作「也」，《通解》作「止」。下句，敖作「上介受之以入告」。今案：嚴本及各本俱作「上介受以入告之」。云「執一雙，以將命也」者，《少儀》曰「其禽加於一雙，則執一雙以將命，委其餘」，與此記義同，惟文有詳略耳。彼注云：「加，猶多也。」云「面，前也」，詳《士冠禮》。云「其受之也，上介受以入告之」至「乃入授人」，略如私獻儀節。惟「士舉其餘從之」，私獻無此文，蓋約「士介面卿時，士三人坐取羣幣以從之」之文也。「賓不辭」，以記無辭文。「拜受於庭」，「拜」字疑衍。上經「賓三拜乘禽于朝」，注云「發去乃拜乘禽」，則此時不拜可知。乘禽微物，乃使賓日日亟拜乎？下云「上介相拜」，亦非。李氏云：「記云「凡獻」，知受之如受賓私獻之禮也。不辭者，歸禽禮輕。上介受如賓，士介受於門外，皆做受饗饋禮。」禽羞，俶獻，比。

比，放也。其致之，禮如乘禽也。禽羞，謂成熟有齊和者。俶獻，四時珍美新物也。俶，始也，言其始可獻也。《聘義》謂之時賜。【疏】正義曰：注「比，放也」，《校勘記》云：「監本「比」誤作「此」。云「比，放也，其致之，禮如乘禽也」者，放與做同，謂其致禽羞俶獻之禮略與歸乘禽同也，餘詳上經「燕與羞俶獻無常數」下。○吳氏《疑義》云：「注以放訓比，謂「禮如乘禽」，不知彼生此熟，烏能做而行之乎？」《經義述聞》云：「全經之例，兩事相若者則云「亦如之」，或云「如某事之禮」，無言「比」者。竊疑「比」字本屬下句，當讀如「比及三年」之「比」，言比及歸大禮之日，既受饗饋，乃請觀也。「禽羞，俶獻」之下，蓋有脫文，今不可考矣。」今案：此節文義難解，《述聞》以為有脫誤者近之。

右記賓主行禮節次及禽獻之等殺

歸大禮之日，既受饗饋，請觀。聘於是國，欲見其宗廟之好、百官之富，若尤尊大之焉。【疏】正義曰：王氏士讓云：「案：《聘禮》有請觀之舉，敖氏疑聘日不給，且譏非禮，以為記文之誤。不知此舉乃於歸大禮之日，請於歸饗饋之卿，以達於君而已，非即日觀也。亦如上經

「賓請有事於大夫」，非即日問也。」方氏苞云：「請觀事微，故不特請，而假於致饗餼者以達之。其人觀之日則惟主君所命，非受饗餼之日旋請旋帥以入也。」今案：王說、方說甚是。下文云「訝帥之」，乃終言其事耳。李氏云：「吳季札聘魯，請觀于周樂；晉韓起聘魯，觀書于大史氏。皆其事。」今案：觀樂、觀書，皆可為「請觀」之證。鄭專主宮廟言者，以下有「自下門入」之文也。訝帥之，自下門入。帥，猶道也。從下門外人，游觀非正也。【疏】正義曰：注云「從下門外人，游觀非正也」者，聘享等事是正事，皆自大門入。此游觀非正，故自下門入。下門，蓋即便門之類。吳氏《章句》云：「下門，其偏隅有門如闔門歟？」

右記賓游觀

各以其爵朝服。此句似非其次，宜在「凡致禮」下，絕爛在此。【疏】正義曰：注「此句」下，嚴本有「似非其次」四字，未有「絕爛在此」四字，今本俱脫。《校勘記》云：「徐本、《集釋》、敖氏俱有，《通解》與今本同。」云「此句似非其次，宜在「凡致禮」下」者，鄭以下文「凡致禮」為致饗食之禮，上經云：「若不親食，使大夫各以其爵，朝服致之

以侑幣。致饗以酬幣，亦如之。」故知「各以其爵朝服」，當在「凡致禮」下，絕爛在此也。盛氏云：「其，謂賓與上介也。致賓以卿，致上介以下大夫。朝服，殺於致饗也。」今案：盛說頗明。或以此句屬上節，非。

右記致禮者之爵服

士無饗，無饗者無儻。謂歸餼也。【疏】正義曰：《校勘記》云：「儻，唐石經、嚴、徐、陳、閩、葛本、《集釋》、《通解》、楊、敖俱作「儻」。李氏曰：「當為「儻」。今案：監本、毛本已改從「儻」。○上經「歸饗餼」云：「士介四人皆餼大牢。」是無饗也。上「賜饗」，注以饗為大禮之盛者，故無饗則禮從簡略，不儻使也。上經已言無儻，但未言其義，故記明之。

右記士介之殺禮

大夫不敢辭，君初為之辭矣。此句亦非其次，宜在「明日問大夫」之下。【疏】正義曰：《校勘記》云：「注「亦非其次」四字，今本俱脫，嚴、徐、《集釋》俱有，《通解》又無「之」字。」○大夫不敢辭，謂賓問卿時，賓者出請

事，但入告而不辭也。所以然者，以賓私覲，退即請有事於大夫，君已禮辭而許之矣，故不敢辭也。

右記賓問大夫大夫不辭

凡致禮，皆用其饗之加籩豆。凡致禮，謂

君不親饗賓及上介，以酬幣致其禮也。其，其實與上介也。

加籩豆，謂其實也，亦實於簠簠。饗禮今亡。【疏】正義

曰：注云「凡致禮，謂君不親饗賓及上介，以酬幣致其禮也」者，即上經「致饗以酬幣」是也。云「其，其實與上介也」

者，上經賓與上介，君皆饗之，唯士介不言饗，故知「其」者

指賓與上介耳。云「加籩豆，謂其實也」者，謂其所實之物，

《周禮·籩人》「加籩之實，蒹苡栗脯，蒹苡栗脯」，「醯人」

「加豆之實，芹菹、兔醢、深蒲、醢醢、箔菹、鴈醢、筍菹、魚

醢」是也。以夫人歸禮推之，則賓加籩豆當各六，上介加籩

豆當各四。《左傳》昭六年晉侯饗季武子有加籩，是其證

矣。記言此者，恐人疑加籩豆在常禮之外，致饗或不用，故

特明之。言「皆」者，皆賓與上介也。云「亦實於簠簠」者，

《校勘記》據單疏、《要義》無「簠」字，疑爲衍文。盛氏以注

約《公食禮》言之，謂豆實於簠，簠實於簠。但記不言簠，簠

亦非簠。或謂豆實濡物實於簠，籩實乾物實於簠，說亦可

從。云「饗禮今亡」者，詳上經「公于賓壹食再饗」下，言此

以見無文可證耳。無饗者，無饗禮。士介無饗禮。

【疏】正義曰：注「饗」，《校勘記》云：「陳、閩、監、葛、楊氏

俱誤「享」。」○此申言致饗唯賓與上介，不及士介也。士介

無饗，已詳上。無饗者無饗禮，以其卑也。

右記致饗與無饗

凡餼，大夫黍梁稷，筐五斛。謂大夫餼賓，

上介也。器寡而大，略。【疏】正義曰：上經大夫餼賓米八

筐，上介亦如之，不言米幾種及筐大小，故記明之。○《校

勘記》云：「注「略」下，聶氏有「也」字。」云「謂大夫餼

賓，上介也」者，敖氏謂凡餼兼士介在內，不知記明言「餼大

夫」，不云「餼士」。又鄭上經注謂「衆介無梁」，此云「黍梁

稷」，明止謂賓與上介，注說是。云「器寡而大，略」者，謂筐

止八，而每筐容米五斛，是器寡而大，對君餼米百筥，筥半

斛，器小而多者爲略也。

右記大夫餼賓上介之實與器

既將公事，賓請歸。謂已問大夫事畢，請歸，

不敢自專，謙也。主國留之，饗食燕獻無日數，盡殷勤也。

【疏】正義曰：注云「謂已問大夫事畢」者，問大夫亦是公事，以其幣物公家具之，且奉君命以行也。鄭恐人疑「既將公事」爲行聘享事畢，故特明之。云「請歸，不敢自專，謙也」者，蓋問大夫畢，即請於主國，以定歸期，是不敢自專也。云「主國留之，饗食燕獻無日數，盡殷勤也」者，獻謂俶獻。無日數，言非一日，所以盡殷勤，故又有旬而稍之禮也。凡賓拜于朝，訝聽之。拜，拜賜也。唯稍不

拜。【疏】正義曰：上經已言「賓三拜乘禽于朝，訝聽之」，此復記之者，賓受君饗餼，受夫人歸禮，受饗食燕，皆明日拜賜于朝，經皆未言「訝聽之」，故此總記以補之也。「訝聽之」義詳上經。注云「唯稍不拜」者，明稍以外無不拜，稍禮詳前。

右記賓請歸拜賜

燕則上介爲賓，賓爲苟敬。饗食，君親爲

主，尊賓也。燕，私樂之禮，崇恩殺敬也。賓不欲主君復舉禮事禮已，於是辭爲賓，君聽之。從諸公之席，命爲苟敬。

苟敬者，主人所以小敬也。更降迎其介以爲賓。介，大夫也。雖爲賓，猶卑於君，君則不與亢禮也。主人所以致敬者，自敵以上。【疏】正義曰：注「介，大夫也」，毛本「介」誤「亦」。○缺。宰夫獻。爲主人，代公辭。①【疏】正義

曰：敖氏云：「燕禮輕，故君與臣燕，則不親爲主，而使宰夫獻，所以明君臣之義也。此與他國之臣燕亦用此禮者，所以別於其君也。」今案：宰夫獻，即《燕義》所謂「使宰夫爲獻主也」。宰夫，當爲膳宰，辨見《燕禮》。《釋官》云：

《儀禮》經內所言「宰夫」，皆與《周禮·宰夫職》合。惟此記云「宰夫獻」，則指謂膳宰。《儀禮》經是周公所作，其記出於後儒之手，如《士冠禮·記》引孔子之言，則作記者在春秋後可知。春秋時通稱膳宰爲宰夫，故此記因之。」

右記燕聘賓之禮

無行，則重賄反幣。無行，謂獨來，復無所之

也。必重其賄與反幣者，使者歸，以得禮多爲榮，所以盈聘君之意也。反幣，謂禮玉、束帛、乘皮，所以報聘君之享禮

①「辭」，《儀禮注疏》作「獻」。

也。昔秦康公使西乞術聘于魯，辭孫而說。襄仲曰：「不有君子，其能國乎？」厚賄之。此謂重賄反幣者也。今文曰「賄反幣」。【疏】正義曰：注「此謂重賄」，《集釋》「重」作「厚」，非。云「無行，謂獨來，復無所之也」者，如《左傳》吳公子札聘魯，遂聘齊、聘鄭、聘衛、聘晉，是所聘不一國，此則特爲己國來，聘訖亦不復往他國，是無行也。秦西乞術聘魯，事在《左傳》文十三年。彼云「厚賄之」，是贈聘使；此云「重賄」，是報聘君，二者不同，鄭特引以爲重賄反幣之證耳。盛氏云：「賄，主國所以遣聘君者，上經賄止用束紂，今則加厚之。反幣，主國所以報享者。上經唯言禮玉、束帛、乘皮而已，今則盡反其享君享夫人之物也。重賄而又盡反其幣，皆所以答其特來之厚意。敖以贈幣釋之，非。」今案：盛說是也。云「今文曰『賄反幣』者，古文作『重賄反幣』，今文無『重』字。案：無『重』字則厚答聘君之意不見，故鄭不從也。」

右記特聘宜加禮

曰：子以君命在寡君，寡君拜君命之辱。此贊君拜聘享辭也。在，存也。【疏】正義曰：《校勘

記》云：「『曰』上，《集釋》、《通解》俱有『辭』字。」○此及下三節，即上經公館賓時所謂聘享、夫人之聘享、問大夫、送賓、公皆再拜之四事也。因經未言贊拜之辭，故記補之。注云「在，存也」者，謂在即，存問之意。《周禮·大行人》曰「歲徧存」是也。君以社稷故，在寡小君，拜。此賓拜夫人聘享辭也。言君以社稷故者，夫人與君

體敵，不敢當其惠也。其卒亦曰「寡君拜命之辱」。【疏】正義曰：注云「言君以社稷故者，夫人與君體敵，不敢當其惠也」者，案：取夫人爲社稷主，見《禮記·哀公問》。盛氏云：「夫人與君同主社稷，故其辭鄭重如此。若曰『君貺寡君，延及寡小君』，是以主君當其惠矣。」注云「夫人與君體敵，不敢當其惠也」者，對下拜問大夫之辭而言。大夫與君不敵，故敢當其惠也。云「其卒亦曰『寡君拜命之辱』」者，上節末云「寡君拜君命之辱」，此節在寡小君下，止云「拜」者是省文，其實節末亦當曰「寡君拜命之辱」也。君貺寡君，延及二三老，拜。此贊拜問大夫之辭。貺，賜也。大夫曰老。又拜送。拜送賓也。其辭蓋云：「子將有行，寡君敢拜送。」自「拜聘享」至此，亦非其次，宜承上「君館」之下。【疏】正義曰：《校勘記》云：「此節經

注，唐石經、嚴、徐、《集釋》俱在「君貺寡君」節下，敖同今本。秦氏蕙田云：「『又拜送』三字，監本及敖本皆在「君貺寡君」之上。唐石經及謝子祥、郝敬、張爾岐、盛世佐諸本，竝在「延及二三老，拜」之下，於文義爲順。」今案：以上經文次考之，送賓在問大夫之後，唐石經及嚴、徐各本是也。《校勘記》又云：「注「自拜聘享至此，亦非其次，宜承上君館之下」共十七字，嚴、徐、《集釋》俱如是，今本作「此宜承上君館之下」，脫九字，《通解》祇有下七字。」注云「自拜聘享至此，亦非其次，宜承上君館之下」者，謂自「曰子以君命在寡君」以下至此，竝當承上記「明日君館之」下也。李氏云：「案：君館之，自終上有故加書之文，此贊拜辭在重賄反幣下，釋皮帛謝主人上，與公館賓之節正相當，其次宜在此。」今案：李說與注異。

右記公館賓拜四事之辭

賓于館堂楹間，釋四皮束帛，賓不致，主人不拜。賓將遂去是館，留禮以禮主人，所以謝之。不致，不拜，不以將別崇新敬也。【疏】正義曰：「主」，毛本誤作「王」。《校勘記》云：「注「所以謝之」下，嚴、徐、《集

釋》、《通解》、《要義》、敖氏俱有「也」字，楊氏無。」○敖氏云：「必釋於此者，明爲館故也。皮亦在堂，禮之變也。」今案：館有主人，而賓釋皮帛以謝之，則其館於大夫士家之廟，益可見矣。注云「不致，不拜，不以將別崇新敬也」者，此亦將去示禮有終之意。敖氏謂「難乎其爲授受」，恐非。

右記賓謝館主人

大夫來使，無罪，饗之。樂與嘉賓爲禮。

【疏】正義曰：來使，謂來聘。敖氏云：「饗之，親饗之也。主國君於賓有饗食燕之禮，但言「饗」者，舉其盛者言之也。」過，則餼之。餼之，腥致其牢禮也。其致之辭，不云君之有故耳。《聘義》曰：使者聘而誤，主君不親饗食，所以愧厲之也。不言罪者，罪將執之。【疏】正義曰：注「腥致其牢禮也」，毛本「腥」作「生」。《校勘記》云：「嚴、徐、陳本、《通解》、楊氏俱作「腥」，《集釋》作「生」。」云「餼之，腥致其牢禮也」者，腥謂殺而未烹。《左傳》：「餼牽竭矣。」服注：「腥曰餼。」是餼亦訓腥。蓋不親饗，故腥致之也。云「其致之辭，不云君之有故耳」者，張氏爾岐云：

「君有故，亦不親饗。此以使者有過而不饗，故致辭異也。」引《聘義》者，證有過不饗之事。云「不言罪者，罪將執之」者，案：罪，失誤之大者；過，失誤之小者。有過雖不親饗，猶腥致之。有罪則不唯不饗而已，亦不饗之也。鄭云「罪將執之」者，蓋據春秋時有執他國之大夫者，然恐非古禮也。敖氏以「過」爲上經「若過邦」之「過」，「饗」即「饗之以其禮」之「饗」。又以下節「其介爲介」之上有闕文，皆謬解，斷不可從。

其介爲介

饗賓有介者，賓尊，行敵禮

也。【疏】正義曰：此承上「無罪，饗之」而言，謂饗賓之時，以賓爲賓，即以從賓來聘之上介爲介，故云「其介」也。必知介爲上介者，敖氏云：「士介賤，不可以與主君爲禮故也。」今案：上經饗食賓介，不及士介，是其證矣。李氏云：「《春秋傳·襄二十七年》：『宋公兼饗晉、楚之大夫，趙孟爲客，子木與之語，弗能對，使叔向侍言焉，子木亦不能對也。叔向蓋爲趙孟介而從饗者。』《食禮》：『介雖從人，不從食也。』」○注「賓尊」，汪氏中校本改爲「尊賓」，義似較勝。云「饗賓有介者」，對《燕禮》以上介爲賓，以賓爲苟敬，無介也。云「行敵禮也」者，賈疏云：「若《鄉飲酒》賓主行敵禮而有介然也。」有大客後至，則先客不

饗食，致之。卑不與尊齊禮。【疏】正義曰：注「尊」下，

《校勘記》云：「嚴、徐、《集釋》、《通解》俱有「者」字，楊本無。」○太客，敖氏以爲朝君，賈疏以爲大國之卿。案：《三禮札記》云：「《周禮·大行人》：『掌大賓之禮及大客之儀。』鄭注：『大賓，要服以內諸侯，大客，謂其孤卿。』據此則大賓大客是對要服以外言之，其要服以內賓客不分大小也。況上經言饗食有定禮，不分別大小國。《左傳·昭元年》：『趙孟、叔孫豹、曹大夫入于鄭，鄭伯兼享之。』曹是小國而其大夫得與趙孟、叔孫豹同享，豈以大國之卿後至，而遂廢小國之卿饗食之禮乎？賈說非矣。《司儀職》雖以諸侯相朝爲賓，大夫來聘爲客，然對文異，散則通。此篇賓客多通稱，則大客即謂諸侯。其先至之大夫，自不得與諸侯齊禮也，當從敖說。」

右記饗不饗之宜

唯大聘有几筵。謂受聘享時也。小聘輕，雖受

於席，不爲神位。【疏】正義曰：小聘不筵几，記恐人疑大聘亦然，故特明之。「大聘有几筵」者，即上經行聘時云「几筵既設，擯者出請命」是也。言「唯」，則小聘之無几筵亦見

矣，詳上經「小聘曰問」下。

右記受聘問之異

十斗曰斛，十六斗曰簋，十簋曰秉。秉，

十六斛。今江淮之間，量名有爲簋者。今文「簋」爲「逾」。

【疏】正義曰：注「今文簋爲逾」，毛本「文」誤「八」。《校勘記》云：「嚴、徐、陳本、《集釋》、《通解》、敖氏俱作「文」。」

云「秉，十六斛」者，上云「十斗曰斛，十六斗曰簋」，此「十簋曰秉」，據簋計之也。若以斛計之，則一秉十六斛矣。此秉爲量名，與下「四秉曰筥」之秉異。云「今江淮之間，量名有爲簋者」，簋與庾同。云「今文「簋」爲「逾」者，詳上經「東秉有五簋」下。二百四十斗。謂一車之米，秉有五簋。

【疏】正義曰：注云「謂一車之米」者，謂二百四十斗爲一車之米也。二百四十斗，即二十四斛也。上經歸饗餼云：

「門外米三十車，車秉有五簋。」蓋每車有一秉五簋也。一秉十六斛，五簋又八斛，是二十四斛也。○自「十斗曰斛」至此，皆言米數也。四秉曰筥。此秉，謂刈禾盈手之

秉也。筥，穡名也，若今萊易之間，刈稻聚把，有名爲筥者。

《詩》云：「彼有遺秉。」又云：「此有不斂穧。」【疏】正義

曰：注「萊易」，毛本「易」作「陽」。《校勘記》云：「《通解》、楊、敖俱作「易」，《釋文》宋本亦作「易」，今本作「易」。案：萊、易，二地名，故云「之間」，或誤作「易」，遂誤作「陽」。今案：嚴本作「易」，黃氏丕烈云：「影宋鈔《釋文》作「易」。段氏云：「凡《釋文》陽字無有作易者，嚴本與《釋文》合。萊、易，二水名。《漢書》：故安易水東至范陽入濡水，亦至范陽入涑。」此萊字當即涑也。」案：地名、水名，二說略殊，然其字之爲「易」無疑矣。云「此秉，謂刈禾盈手之秉也」者，上文云：「十簋曰秉。」鄭恐人以此秉與上乘同，故特辨之。云「筥，穡名也，若今萊易之間，刈稻聚把，有名爲筥」者，案：《周禮·掌客》注云：「米禾之秉筥，字同數異。禾之秉，手把耳。筥讀爲棟栢之栢，謂一穧也。」是筥爲穡名，不特此秉非簋秉之秉，即此筥亦非筐筥之筥矣。云「《詩》云「彼有遺秉」，又云「此有不斂穧」者，《大田》篇文，鄭引以證秉筥之爲禾數也。《毛傳》云：「秉，把也。」孔疏云：「秉，刈禾之把也。穧者，禾之鋪而未束者。筥謂一穧。然則禾之秉，一把耳，米之秉十六斛，禾之筥四把耳，米之筥則五斗。」是其字同數異矣。十筥曰稷，十稷

①「亦」上，《漢書》疊「濡水」二字。

曰秬，四百秉爲一秬。一車之禾三秬，爲千二百秉，三百筥，三十稷也。古文「稷」作「縷」。【疏】正義曰：案：上云「四秉曰筥」，則十筥曰稷，四十秉也；十稷曰秬，四百秉也，故又云「四百秉爲一秬」。○注「古文稷作縷」，《校勘記》云：「縷，閩本作『稷』，誤。《釋文》、《通解》俱作『縷』。」今案：嚴本作「縷」。云「一車之禾三秬」者，即上經「歸饗餼」云「禾三十車，車三秬也」。云「爲千二百秉」者，一秬四百秉，三秬是爲千二百秉。三百筥，三十稷也。《掌客》注云「禾稟實并刈者也」，亦引此記云：「每車三秬，則三十稷也。稷，猶束也。」然則筥爲未束之名，稷爲已束之名。十筥曰稷，則四十把共一束也。云「古文『稷』作『縷』」者，案：《說文·糸部》無「縷」字，惟《禾部》「稷」下云：「布之八十縷爲稷。」胡氏云：「布縷之『縷』，古字蓋借『總』爲之。《說文》『稷』下注解疑有脫誤。『稷』字從禾，當爲禾數，故鄭從今文。」○自「四秉曰筥」至此，皆言禾數也。

右記明致饗米禾之數

儀禮正義卷十九 鄭氏注

績溪胡培壅學

公食大夫禮第九

鄭《目錄》云：「主國君以禮食小聘大夫之禮也，於五禮屬嘉禮。大戴第十五，小戴第十六，《別錄》第九。」【疏】正義曰：「主」，毛本誤作「壬」。《集釋》「大夫之禮」下有「也」字，今從之。○公者，五等邦國之通稱。大夫謂下大夫，對卿爲上大夫也。凡待賓客之禮，有饗有食有燕。燕主於酒而食主於飯，饗則兼之。鄭云「主國君以禮食小聘大夫之禮也」者，案：經云「賓朝服即位于大門外，如聘」，明先聘後食，此所食之賓即聘賓也。必知爲小聘大夫者，小聘使大夫爲賓也。賈疏云：「下文薦豆六，設黍稷六簋，庶羞十六豆，此等皆是下大夫小聘之禮。下乃別云上大夫八豆、八簋，庶羞二十豆，是食

上大夫之法，故知據小聘大夫也。魚、腸胃、膾膚皆七者，謂子男小聘之大夫。」今案：此篇主言食子男小聘大夫，而侯伯大聘使卿爲賓，使大夫爲上介，亦有食可知，敖氏謂「與前篇互見其禮」是也。據《聘禮》云：「賓一食再饗，上介一食一饗。」不言士介，此又單言大夫，則士介無食也。《三禮札記》云：「天子有食諸侯之禮，《大行人》云「上公食禮九舉，侯伯食禮七舉，子男食禮五舉」是也。諸侯相朝有相食之禮，《掌客》云「上公三食，侯伯再食，子男一食」是也。諸侯於本國之臣亦有食禮，《左傳》魏絳和戎，晉侯與之禮食是也。天子諸侯養老，亦用食禮，《禮記》「食三老五更於大學」，又曰「秋食耆老」是也。此篇是主言諸侯食聘賓，竝及大夫相食之禮，即《聘禮》所云「公於賓，壹食再饗；大夫於賓，壹饗壹食」是也。今惟此篇禮存，其餘皆不可考矣。」或曰：《樂記》膏：「食三老五更，袒而割牲，執醬而饋，執爵而酌，冕而總干。」此不親割，不設樂，執醬而不執爵，蓋食禮之中亦有隆殺焉。」又此篇主於食飯，而無賓主之酬酢。其食飯也，亦止賓一人，而主君不舉共食，故無侑席。然而鼎俎具陳，庶羞畢備，其侑勸則皮幣咸有，其執事則卿大夫士皆在，其食既也則卷牲俎以歸

賓，是亦待賓客之重禮也。《禮經釋例》云：「食重於燕，不獨食禮公自爲主人，燕禮使宰夫爲主人之別也。食禮有幣，燕禮無幣；食行於廟，燕行於寢；食牲用大牢，燕牲用狗；食使大夫戒賓，燕於庭命賓。皆其例矣。萬氏斯大乃謂食視燕饗爲輕，誤甚。《饗禮》篇亡不可考，其禮則又重於食焉。」云「於五禮屬嘉禮」者，《周禮·大宗伯》：「以嘉禮親萬民。」飲、食、饗、燕，皆屬嘉禮，故知食亦屬嘉禮也。

公食大夫之禮。使大夫戒，各以其爵。

戒，猶告也。告之必使同班，敵者易以相親敬。【疏】正義曰：自此至「大夫既匕，匕奠於鼎，逆退，復位」，皆設饌以前事，分爲四節：戒賓賓從，一也；陳具，二也；賓人拜至，三也；鼎人載俎，四也。注「戒」謂至賓館戒之，使來主國之廟受食也，據下云「遂從之」，則本日戒可知。云「戒，猶告也。告之必使同班」者，謂食卿使卿戒，食大夫使大夫戒也。敖氏云：「各以其爵，則兼卿大夫言矣，此蓋顧下經見上大夫之禮而立文也。」敖說得經意。云「敵者易以相親敬」者，此釋「各以其爵」之義也。敖氏云：「飲食之禮，賓主敵則主人親戒速，所以尊賓也。此使戒賓而各以

其爵，亦其義耳。」說亦通。上介出請，入告。問所以

來事。【疏】正義曰：注「問所以來事」，毛本以下有「爲」字。嚴本、《集釋》、《要義》俱無。張氏《識誤》云：「注曰『所以來事』，案：《釋文》云：『以爲，于僞反。』今本于『以』字下脫一『爲』字，從《釋文》。」據此則張所見本原無「爲」字，特因《釋文》增入，文句反嫌冗複。黃氏《校錄》云：「單疏述注云『問所以來事』者，釋云『賓使上介出請大夫所爲來之事』，賈蓋以『爲』字釋『以』字。」據此，則賈所見本亦無「爲」字。盧氏《詳校》謂《釋文》是「所爲」誤作「以爲」，非也。今從嚴本。三辭。爲既先受賜，不敢當。【疏】正義曰：敖氏云：「食必三辭者，重於燕也，燕則再辭而許。」今案：饗亦三辭可知。注云「爲既先受賜，不敢當」者，賈以「先受賜」謂聘日致饗。或云饗先於食，「先受賜」謂先受饗也。賓出，拜辱。拜使者，屈辱來迎己。【疏】正義曰：賓出，謂三辭許之，乃出外門外也。注云「拜使者，屈辱來迎己」者，是以拜辱爲拜使者也。吳氏《章句》以爲拜君命之辱，非。此時尚未將命，下「賓再拜稽首」，乃是拜君命也。拜君命必稽首，此但云「拜」，則其爲拜使者明矣。大夫不荅拜，將命。不荅拜，爲人使也。將，猶致

也。【疏】正義曰：爲人使者不荅拜，說已詳前。云「將，猶致也」者，謂致其食賓之命也。賓再拜稽首。受命。大夫還，復於君。賓不拜送，遂從之。不拜送者，爲從之，不終事。【疏】正義曰：注云「不拜送者，爲從之，不終事」者，謂賓從之而來，不終賓主迎送之事，故不拜送也。《覲禮》：「侯氏送于門外，再拜，侯氏遂從之。」案：「遂從之」，文與此同。而「拜送」者，賈謂「尊天子使」，是也。《鄉飲》、《鄉射》亦有「從之」之文，而拜送者，賈《鄉飲》疏謂鄉大夫尊，賓卑，故特拜辱而送之，亦是也。餘詳《鄉飲篇》。賓朝服即位于大門外，如聘。於是朝服，則初時玄端。如聘，亦入於次俟。【疏】正義曰：注云「於是朝服，則初時玄端」者，鄭以經於此始言「朝服」，則前此服玄端，不服朝服也。褚氏云：「行聘，大禮，故登車即皮弁。食禮輕，故至次中始易朝服。」此申鄭之說也。敖氏云：「拜命之時，賓固朝服矣。於此乃著之者，明其與聘服異。」王氏士讓云：「聘禮歸饗餼，賓必朝服禮辭。此公食戒賓，賓再拜稽首，如親對主君然，其必朝服可知。注謂初時玄端，未確。」韋氏協夢云：「賓與大夫行禮皆服朝服。大夫退而賓即從之，并無易服之節，則其先已朝服可知。」

必著之者，嫌聘時皮弁服，食禮盛，或亦與聘同也。」此皆申敖氏，似亦可從。云「如聘，亦入於次俟」者，案：《聘禮》曰：「賓皮弁聘至于朝，賓入于次。」注云：「入於次者，俟辨也。」次在大門外之西，即此注言「俟」之義。褚氏云：「如聘，如至大門外人次之儀也。」

右戒賓賓從

即位，具。主人也。擯者俟君於大門外，卿大夫士序，及宰夫具其饌物，皆於廂門之外。【疏】正義曰：張氏爾岐云：「即位者，待賓之人。具者，待賓之物。」今案：此說最明。具，如「具官饌」之「具」，謂各饌其所當供之物。《燕禮》告具而後即位，此則即位乃具也。注云「主人也」者，謂此即位指主人言也。秦氏蕙田云：「經言即位不言主人者，上言賓即位，則此爲主人可知也。敖氏以即位仍屬賓者，非。郝氏又連上文「如聘即位」爲句，尤誤。」云「擯者俟君於大門外」者，擯者即下納賓之大夫也，立于大門外待事也。云「卿大夫士序，及宰夫具其饌物，皆於廂門之外」者，卿大夫士序立於廟門外，待君迎賓人乃入。以及宰夫所具饌物，斯時皆在廟門外，故因言主人即位而詳及之。

羹定。肉謂之羹。定，猶熟也。著之者，下以爲節。

【疏】正義曰：注「熟」，《集釋》作「孰」。戴氏曰：「古通用「孰」。○云「肉謂之羹」者，《爾雅·釋器》文。云「著之者，下以爲節」者，謂羹定而後陳設，以此爲節也。甸人陳

鼎七，當門，南面西上，設扃鼎，鼐若束若編。七鼎，一大牢也。甸人，冢宰之屬，兼亨人者。南面

西上，以其爲賓，統於外也。扃，鼎扛，所以舉之者也。凡

鼎鼐，蓋以茅爲之，長則束本，短則編其中央。今文「扃」作「鉉」，古文「鼐」皆作「密」。【疏】正義曰：「鼐」，聶氏作

「冪」，注同。注云「七鼎，一大牢也」者，牛、羊、豕具爲大

牢。七鼎者：牛一，羊一，豕一，魚一，腊一，腸胃一，膚一，

凡七也。無鮮魚、腊。褚氏云：「此即《聘禮》致饗上介之

數也。小聘賓與大聘上介爵同，故鼎皆七。」云「甸人，冢宰

之屬，兼亨人」者，賈疏云：「案：天官有甸師氏，又有亨

人，皆屬冢宰。彼天子禮，諸侯比天子爲兼官，故甸人兼亨

人也。必使甸人陳鼎兼亨人者，案：《亨人職》云：「掌共

鼎鑊。」又案：《甸師職》云：「掌帥其徒以薪蒸役外內饗之

事。」故使甸人兼亨人陳鼎。《少牢》無甸人官，故饗人陳鼎

也。《儀禮釋官》云：「《周禮·甸師職》曰：『掌帥其屬而

耕耨王藉。』又曰：『王之同姓有皐則死刑焉。』《禮記·文

王世子》曰：「公族有死皐則磬於甸人。」成十年《左傳》：

「使甸人獻麥。」杜注：「甸人，主爲公田者。」是諸侯謂之甸

人，天子謂之甸師，其職掌一也。據《少牢》大夫無甸人，則

士亦無之。《既夕》士禮，甸人抗重。蓋公臣來治士之喪事

者，非土有甸人也。云「南面西上，以其爲賓，統於外也」

者，凡鼎陳於門外，多北面北上，此南面西上者，以此鼎爲

賓設之，賓在門外之西，故使統於外也。云「凡鼎鼐，蓋以

茅爲之，長則束本，短則編其中央」者，「蓋」，疑辭。李氏

云：「茅之爲物潔白，故鼐疑用之。」方氏苞云：「若束若

編，其爲茅可知矣，著其異於尊冪之用布也。」餘詳《士冠

禮》《設扃鼎》下。設洗如饗。必如饗者，先饗後食，如

其近者也。《饗禮》亡，《燕禮》則設洗于阼階東南。古文

「饗」或作「鄉」。【疏】正義曰：注云「必如饗者，先饗後食，

如其近者也」者，周公作經有饗禮有食禮，饗在先，食在後。

設洗如饗，謂食禮設洗之處如饗禮所設之處耳。二禮相繼

而行，故云「如其近者也」。《聘禮》注雖有「饗與食互相先

後」之文，然終以先饗後食爲正，詳《聘禮》「公于賓壹食再

饗」下。云「《饗禮》亡，《燕禮》則設洗于阼階東南」者，以

《饗禮》既亡無可考，故引《燕禮》以明之。方氏苞云：「饗

禮嚴，凡設而不倚，爵盈而不飲。當時諸侯苦其難行，故去其籍。」云「古文「饗」或作「鄉」，亦詳《聘禮》。小臣具

槃匱，在東堂下。爲公盥也。公尊，不就洗。小臣於

小賓客饗食，掌正君服位。【疏】正義曰：注云「爲公盥也」

者，言盤匱爲公盥設也，槃盛盥棄水，匱盛水以沃盥者。云

「公尊，不就洗」者，凡行禮，賓至，敵者皆盥於洗。公尊則

不就洗，故特設槃匱以待之。祭祀，尸尊，亦不就洗，詳《士

虞禮》「匱水錯于槃中南流」下。云「小臣於小賓客饗食，掌

正君服位」者，《周禮·大僕職》曰「祭祀賓客正王之服位」，

《小臣職》曰「小祭祀，賓客饗食，掌事如大僕之灋」。諸侯

無大僕，以小臣兼之，詳《燕禮》、《大射儀》。然其職掌亦與

天子小臣同，是小臣於饗食掌正君服位也。又《周禮·小

臣職》曰：「祭祀，朝覲沃王盥。」故此公盥之事，小臣掌之。

凡設槃匱者，必有筓巾，《少牢》「祭日設槃匱與筓巾于西階

東」，《士虞》、《特牲》皆有筓巾。此不言者，文略，亦詳《士

虞禮》。宰夫設筵，加席、几。設筵於戶西，南面而

左几。公不賓至授几者，親設湑醬，可以略此。【疏】正義

曰：注「左几」，「几」字，闕，葛俱誤作「凡」。○筵，蒲筵。

席，萑席也。詳下記。注云「設筵於戶西，南面而左几」

者，經未言設筵之處，故注明之。戶西，即所謂戶牖之間，堂上尊位也。凡布席於堂上，皆南面，布席於室中則東面。

左几者，爲人設几也。爲神則右几，詳《士昏禮》「主人筵于

戶西，西上右几」下。云「公不賓至授几者，親設湑醬，可以

略此」者，《聘禮》：「禮賓賓至，公迎賓入，受几授賓。」此但

設之，是不親授，故記「不授几」注云「異於醴也」，謂異於聘

時醴賓也。所以然者，以食禮公親設醢醬及大羹湑，親設

者多，故此可略也。無尊。主於食，不獻酬。【疏】正義

曰：敖氏云：「經言此者，嫌酒漿或用尊也。」飲酒，漿

飲，俟于東房。飲酒，清酒也。漿飲，醢漿也。其俟奠

於豐上也。飲酒先言飲，明非獻酬之酒也。漿飲先言漿，

別於六飲也。【疏】正義曰：李氏云：「此酒漿以醢口耳。」

注云「飲酒，清酒也」者，《周禮·酒正職》曰：「辨三酒

之物：一曰事酒，二曰昔酒，三曰清酒。」鄭司農云：「清

酒，祭祀之酒。」又曰：「辨四飲之物：一曰清，二曰醫，三

曰漿，四曰醢。」鄭注：「清謂醴之泔者。」吳氏廷華、褚氏寅

亮皆以此注云「清酒」爲指四飲中之清，非指三酒中之清

酒。其說是也。云「漿飲，醢漿也」者，《酒正》：「三曰漿。」

注云：「漿，今之載漿也。」然則漿亦四飲之一矣。賈此疏

云：「載之言載，以其汁滓相載，故云載。漢法有此名，故也。」云：「其俟奠於豐上也」者，謂奠於豐上，待事至乃設也。酒漿皆有豐，詳下。云「飲酒先言飲，明非獻酬之酒也」者，以其先言「飲」，明是飲以醕口，非用以獻酬。《周禮·酒人》：「共賓客之禮酒、飲酒而奉之。」鄭注：「禮酒，饗燕之酒。飲酒，食之酒。」是也。云「漿飲先言漿，別於六飲也」者，《周禮·漿人》：「掌共王之六飲，水、漿、醴、涼、醫、醕。」彼先言「飲」，此先言「漿」，後言「飲」，明亦飲以醕口，與六飲用以共飲者不同。《漿人職》曰「凡飲共之」，鄭注：

「謂非食時。」故此云「別於六飲」也。凡宰夫之具，饌

于東房。凡，非一也。飲食之具，宰夫所掌也。酒漿不

在凡中者，雖無尊，猶嫌在堂。【疏】正義曰：注云「凡，非

一也。飲食之具，宰夫所掌也」者，案：上文鼎陳于門外，

洗設于阼階東南，槃匱具于東堂下，筵設于堂，酒漿俟于東

房，而其餘豆簠簋之屬尚多，故以「凡宰夫之具」一語統

括之，見宰夫所掌皆陳在東房也。《儀禮釋官》云：「《周

禮·宰夫》：「掌賓客之飲食與其陳數。」注云：「飲食，燕

饗也。」疏云：「鄭不解經中食爲食禮者，經中言食，則食禮

自明。」注又云：「凡此禮陳數存可見者，唯有《行人》、《掌

客》及《聘禮》、《公食大夫》。」疏云：「《儀禮》具有諸侯之

禮，俱亡滅者多，今存可見者有《聘禮》、《公食大夫》，是待聘客之法。」然則食禮之陳數，宰夫掌之。故此經設筵，授公醢醬，薦豆，設黍稷，設鉶，設觶，豐，授公飯梁膳稻，進觶豐，授公束帛侑賓，皆宰夫主其事也。」云「酒漿不在凡中者，雖無尊，猶嫌在堂」者，酒漿亦是飯食之具，而上特言「俟於東房」，不在凡中者，以經雖云「無尊」，猶嫌酒漿仍在堂，故特言之也。

右 陳 具

公如賓服，迎賓于大門內。不出大門，降於

國君。【疏】正義曰：「如賓服」，亦朝服也。注云「不出大

門，降於國君」者，國君來朝，公迎之於大門外。此不出大

門，是降於國君也。《禮經釋例》云：「凡迎賓，主人尊者於

大門內。」詳《士冠禮》「主人迎，出門左，西面再拜，賓荅拜」

下。大夫納賓。大夫，謂上擯也。納賓以公命。【疏】

正義曰：卿爲上擯。賓入門左，公再拜。賓辟，

再拜稽首。左，西方，賓位也。辟，逡循，不敢當君拜

也。【疏】正義曰：注云「左，西方，賓位也」者，賓之位常在

西，入門左即西也，亦詳《士冠禮》「主人迎，出門左」注下。

云「辟，遂遁不敢當君拜也」者，義詳《聘禮》。《儀禮紉解》云：「《聘禮》公迎賓再拜，賓辟不荅拜者，以公爲聘君而拜，已不敢承其禮也。此則爲食己而拜，故既辟還復再拜稽首。」公揖人，賓從。揖人，道之。【疏】正義曰：上文「賓入門左」，謂人大門也。此云「公揖人」，謂從大門而入也。敖氏云：「此行禮於禰廟，亦有每門每曲之揖，不言者文省。」及廟門，公揖人。廟，禰廟也。【疏】正義曰：《聘禮》：「及廟門，公揖人，立于中庭。」注：「公揖先人，省內事也。」又云「賓立接西塾」，以後乃言納賓，賓入。此「公揖人」下即云「賓入」者，明賓從公而入，禮殺于聘也。注云「廟，禰廟也」者，《儀禮》凡單言「廟」者皆是禰廟，詳《士冠禮》「筮于廟門」下。賈疏云：「受聘在祖廟，食、饗在禰，燕輕於食、饗，又在寢，是其差次也。」賓入，三揖。每曲揖，及當碑揖，相人偶。【疏】正義曰：敖氏云：「此三揖與《士冠禮》同，與《聘禮》異。」蓋以《聘禮》公先入，俟於中庭故也。注云「每曲揖」者，即所謂「入門將右曲揖，將北曲揖」也，詳《士冠禮》「至于廟門，揖人，三揖」下。云「相人偶」者，詳《聘禮》。至于階，三讓。讓先升。【疏】正義曰：注「升」下，鍾本有「也」字，嚴本無。公

升二等，賓升。遠下人君。【疏】正義曰：敖氏云：「此下大夫與公升階之儀乃與卿同，然則升階尊卑之差不過一等。」大夫立于東夾南，西面北上。東夾南，東西節也。取節於夾，明東於堂。【疏】正義曰：敖氏云：「大夫亦兼上下者言。」賈疏云：「此謂主國卿大夫立位。」①是也。詳《士相見禮》。方氏苞云：「至此始見羣臣之位，明公人然後從而入，公與賓升堂，然後羣臣與介各就其位也。」注云「東夾南，東西節也」者，敖氏云：「東夾南，即東堂南。」今案：夾之近南者爲堂，近北者爲室，故有夾室與東堂、西堂之稱，然統言之皆夾也。經言「東夾」，自兼東堂在內，不必分別。詳《聘禮》「設餼西夾六」下。云「取節於夾，明東於堂」者，東序以西爲正堂，東序以東爲東夾，今立於東夾南，是在正堂之東也。士立于門東，北面西上。統於門者，非其正位，辟賓在此。【疏】正義曰：注云「統於門者，非其正位，辟賓在此」者，以立於門東北面，不東上而西上，是統於門也。賈疏云：「《燕禮》、《大射》士在西方，東面北上，不統於門。今統於門者，以賓在

①「立」，原作「之」，今據《儀禮注疏》改。

門西，辟賓在此，非正位故也。」小臣東堂下，南面西上。【疏】正義曰：堂之東下爲東堂下，詳《士喪禮》。南

面西上，統於堂也。敖氏云：「小臣者，小臣正、小臣師與其從者也。」《儀禮紉解》云：「《燕禮》惟小臣師一人，事省足共其役也。此則奉槃、奉匱、執簞、執巾皆一時事，故曰『西上』，明非止一人也。」今案：此有正與師及從者，而經止言「小臣」，蓋總舉其官之辭。至《燕禮》供事者非止小臣師一人，《紉解》誤。詳《燕禮》及《大射儀》。宰，東夾

北，西面南上。宰，宰夫之屬也。古文無「南上」。

【疏】正義曰：江氏筠云：「東夾北，蓋房中也。房中而云『夾北』，則夾室只在後楣以南。而後楣之北統爲房中之地明矣。」焦氏循《荅鄭柿里舍人問夾南夾北》云：「張太史惠言《儀禮圖》以夾北置北階下，本敖繼公《儀禮集說》。敖氏云：『東夾北，北堂下之東方也。』蓋趙宋時說經者以夾室夾於房東西，東夾在東房之東，故以北堂下東方爲夾北，與鄭注以夾北在房中不同。張太史既依鄭氏爲圖，以夾室置房之南，乃不用鄭氏夾北在房中之說，而依敖氏以夾北在北堂下，則違鄭義，亦失敖義矣。」今案：以夾北爲房中，本鄭氏《特性饋食禮》注，其說是也。焦氏又謂夾與房有戶以

相通，則非，詳《特性饋食禮》「豆籩剛在東房」下。注云

「宰，宰夫之屬也」者，宰即謂內宰。《儀禮釋官》云：「《周禮·內宰職》曰：『凡賓客之裸獻瑤爵皆贊，致后之賓客之禮。』注引《坊記》云：『陽侯殺繆，侯而竊其夫人，故大饗廢夫人之禮。』是賓客之饗食，內宰有事焉，諸侯禮亦同也。經云「大夫立于東夾南，宰東夾北」，若以宰爲大宰，則諸侯之大宰是上大夫，何以不位於東夾南，而位於東夾北？據下云「內官之士在宰東北」，注以內官之士爲內宰之屬，則此宰明爲內宰可知。《周禮》外宗祭祀佐王后薦玉豆，內宗佐傳豆籩，賓客之饗食亦如之。是饗食賓客，夫人有薦豆籩之事。籩，豆屬，故使內宰執以授公。彼注乃謂宰爲太宰，不知《周禮·大宰職》不主賓客饗食之事也。《祭統》：「宮宰宿夫人。」鄭注：「宮宰，守宮官。」《周禮·內宰》注云：「宮中官之長。」然則諸侯之內宰，又謂之宮宰也。」今案：《周禮·序官》大宰、小宰、宰夫，皆同官。內宰統於治官，而宰夫爲治官之考，故云「宰夫之屬也」。必云「宰夫之屬」者，以是時宰夫位亦在房中也，當以此注爲正。「後宰右執鐙」注：「宰謂太宰，宰夫之長也。」與此注兩歧，恐非。云「古文無『南上』」者，《儀禮》今文「西面」下有「南上」二字，古文無。鄭以宰爲宰夫之屬，明非一人，故從今文不從

古文也。敖氏則從古文，謂經惟言宰，是獨立於此也，「南上」之文無所用之。今案：《周禮·內宰》：「下大夫二人，上士四人，中士八人。諸侯之官數雖無文，亦不止一人。即如上文「小臣東堂下，南面，西上」，經但言「小臣」，而敖氏以爲兼正與師在內，何此經言「宰」而斷爲獨立邪？又解此宰爲大宰，皆誤甚。褚氏云：「東夾北，非大宰立位也。」焦氏云：「立於夾北者，宰也。」注云：「宰，宰夫之屬也，西面南上。」則必從宰夫而立。宰夫尊，立於南，其屬立於宰夫之北。而內官之士又在宰之東北，蓋皆立於房也。下云「宰夫自東房授醯醬」，又云「宰夫自東房薦豆六」，則宰夫立東房甚明。前云「宰夫立東夾北，西面南上」，兼宰夫而言也。醯醬六豆六簋之設，宰夫主之，宰佐之，宰若遠立北堂下，豈無所事乎？將有事而登降，不勝其煩乎？至於「宰右執鐙，左執蓋，由門入，升自阼階，盡階不升堂，授公，以蓋降，出，入反位」，鄭注此宰爲大宰，宰夫之長。則非立夾北爲宰夫之屬者。賈公彥以此宰即彼宰，疏云：「宰位東夾北，西面南上。今以蓋降出，送於門外，乃更入門，反於東夾北位。」賈說是也。蓋前此宰立房中夾北，佐宰夫設豆設簋，至是出門執鐙授公，又復位於房中夾北者。此下宰夫設鉶，授梁飯，又必宰佐之。蓋凡宰夫之具皆饌

於東房，自東房而設而授，非宰夫一人所能勝，此宰所以必立於東夾北，而東夾北必在東房。不然宰僅有執鐙一事，何不竟立於門外？而乃立北堂下，趨出趨入僅爲一鐙，可謂迂矣。且遠立北堂下，於設俎設簋皆不能目見，何以恰當其時而出執鐙也？則必有探而告之者，亦甚煩矣。惟其佐宰夫於房中，當此設黍稷六簋之後，即趨出執鐙，於事爲便也。」案：焦氏謂「西面南上」兼宰夫而言，其說甚確。然經於「東夾北」不云「宰夫」而云「宰」者，以經云「南上」，則宰夫自在宰之南，而內官之士又在宰東北，故言「宰」而位次始明也。又焦氏解釋前後經文，反復辨論，亦極明析，雖未明言宰爲內宰，固不以鄭氏所云「太宰」當之矣。敖氏謂無「南上」二字，則方氏觀承、胡氏承珙俱已駁之矣，未可從也。內官之士，在宰東北，西面南上。夫人之官，內宰之屬也。自卿大夫至此，不先即位，從君而入者，明助君饗食，賓自無事。【疏】正義曰：敖氏云：「在宰東北，少退於宰也。」王氏士讓云：「自大夫士至內官之士皆主國之臣，故位皆居東方。」注云「夫人之官，內宰之屬也」者，以經云內官明是夫人之官，即內宰之屬也。《儀禮釋官》云：「內官之士，當爲內小臣之屬，《周禮·內小臣》：「奄上士四人。」注：「稱士者，異其賢。」內小臣亦稱

士，故云「內官之士」。其職云「若有祭祀、賓客，則擯，詔后之禮事」，是以位在此。」今案：《周禮》內小臣、寺人，皆內官。寺人亦掌賓客之事，則夫人之官兼有寺人在內也。又此注云「內宰之屬」，則上立東夾北者爲內宰，益明矣。云「自卿大夫至此，不先即位，從君而人者，明勛君饗食，賓自無事」者，案：下文大夫七鼎，①士設俎設羞，是食賓大夫以下皆有事，而云「無事」者，以入門時自無事，故不必先入也。《聘禮》：「及席門，公揖入，立于中庭。」鄭注：「公迎賓大門內，卿大夫以下入席門即位而俟之。」明係先入，與饗食禮異也。

介門西，北面西上。西上，自統於賓也。然則承擯以下，立於士西，少進東上。【疏】正義曰：

注云「然則承擯以下，立於士西，少進東上」者，賈疏云：「以其介統於賓而西上，則擯統於君而東上可知。」李氏云：「承擯，大夫也，故少進於士。」今案：不言上擯者，上擯位在阼階下，記云「卿擯由下」是也。此注謂承擯紹擯立於士西，敖以爲立於士東，韋氏協夢云：「案：上文士立于門東北面西上，承擯是大夫，尊於士，宜在士之上。若立於士東，則反在士下矣。從注是也。」**公當楣北鄉，至再拜，賓降也，公再拜。**楣謂之梁。至再拜者，興禮俟

賓，嘉其來也。公再拜，賓降矣。【疏】正義曰：「至再拜」者，言此拜爲拜至也。「賓降也，公再拜」者，李氏云：「凡言「也」者，皆與下事爲節。」《經義述聞》云：「至再拜」，「再」當爲「壹」，因下「公再拜」而誤也。「至壹拜」者，賓至階上，公則壹拜也。先言壹拜，後言再拜，序也。《聘禮》及此篇下文先言公壹拜，賓降，公再拜，此不當有異。鄭注《聘禮》：「下文「公壹拜，賓降」，皆云「不俟公再拜」，而此獨無之，則所據本已誤作「至再拜」矣。敖繼公《集說》謂「賓降」之上脫「公壹拜」之文，此說尤非也。「至再拜」即「至壹拜」之譌，何須又言公之壹拜乎？若謂「至再拜」爲總括下文之詞，公壹拜，賓降也，公再拜，乃申言上文之再拜，則十七篇無此重沓之文。《聘禮》及此篇下文「公壹拜」之文，②何不聞總括其詞曰「再拜」乎？」今案：《述聞》之說是矣，但經文相傳已久，未敢遽改，而存其說於此。**賓西階東北面荅拜。**西階東，少就主君，敬也。【疏】正義曰：西階東，西階下之東也。荅拜是目下事，實尚未拜。不言稽首，省文也。方氏苞云：「凡荅鄰國之君拜，無不稽首。」

①「七」，段校改作「匕」。

②「文」，原脫，今據《經義述聞》補。

注云「西階東，少就主君，敬也」者，君在東，賓拜不於西階前而於西階東，是少就主君也。擯者辭，辭拜於下。

拜也。公降一等辭，曰：「寡君從子。雖將

拜，興也。」賓降再拜，公降，擯者釋辭矣。賓猶降，終其

再拜稽首。興，起也。【疏】正義曰：「拜也」者，言賓不從

擯者之辭而仍拜也，於是公降一等親辭之。《聘禮》作「擯者曰」，此「曰」上無「擯者」二字，亦省文也。注云「賓降

再拜，公降，擯者釋辭矣」者，上注云「辭拜於下」，謂辭其拜

於下也。然賓猶降拜，公亦降辭。擯者所釋之辭，即「寡君

從子」云云是也。惟聘禮與食釋此辭，蓋待異國之臣與本

國之臣異也。云「賓猶降，終其再拜稽首」者，言公雖降一

等辭，而賓猶降西階東，終其再拜稽首也。官氏獻璠云：

「必知賓之終其再拜稽首者，於升而不成拜知之也。」賓

栗階升，不拜。自以已拜也。栗，寔栗也。①不拾級

連步，趨主國君之命，不拾級而下曰走。【疏】正義曰：「栗

階」上，他本有「賓」字，唐石經無。戴校《集釋》云：「此承

上「賓西階東北面荅拜」，不必更言賓，當從石經去之。《校

勘記》據《燕禮》疏引有「賓」字，以石經為非。《經義述聞》

謂《燕禮》疏約舉其文，不必字字皆同。據《聘禮》云「栗階

升」，無「賓」字，亦是承上「賓降階東拜送」而省也，無者是。

今從石經。注「栗，寔栗也」，毛本「寔」作「實」，嚴本、《通

解》俱作「寔」。「不拾級而下曰走」，鍾本「走」誤作「走」，毛

本誤作「走」。戴校《集釋》云：「《說文》引《春秋公羊傳》

曰：『走階而走。』今《傳》『走』作『蹠』。《釋文》云：『丑略

反，一本作走，音同。』注云「自以已拜也」者，謂已在階

下再拜稽首，故升不拜也。栗階，詳《燕禮·記》。命之，

成拜，階上北面再拜稽首。賓降拜，主君辭之，賓

雖終拜，於主君之意猶為不成。【疏】正義曰：上文賓升不

拜，賓之意自以為已拜於下也。主君不敢受其拜下之禮，

故復命之成拜於上，而賓亦遂於階上北面再拜稽首也。

注云「賓雖終拜，於主君之意猶為不成」者，主君辭之之意，

原欲其拜於上，而賓終拜於下，是猶為不成也。方氏苞

云：「凡再拜稽首而不升拜，唯膳宰送爵於公、大夫媵爵、

大射賓始受饗、燕射之終公命徹幕，卿大夫降拜則然。至

公酬賓、賓媵爵於公，則小臣雖辭，賓升即成拜，而公亦無

再命。唯食禮升而不拜，再有命而後成拜，何也？賓終拜

①「寔」，原作「實」，據下疏文及《儀禮注疏》改。

於下而升不敢拜，自同於膳宰之送爵、大夫之腰觸，以明其震悚不安之意也。惟賓以不敢拜明異敬，故公又以命成拜爲優禮也。」

右賓入拜至

士舉鼎，去甬于外，次入。陳鼎于碑南，南面西上。右人抽扃，坐奠于鼎西，南順，出自鼎西，左人待載。人由東，出由西，明爲賓也。今文「奠」爲「委」，古文「待」爲「持」。【疏】正義曰：「去甬于外」，唐石經、嚴本俱作「甬」。《釋文》、《集釋》、《通解》、楊氏、陳單注本、毛本俱作「甬」，《儀禮識誤》從《釋文》。《三禮札記》云：「古甬，甬字亦通用，但鼎甬作甬，與經例尤合也。今從《釋文》。」各本「陳鼎于碑」下「南」字，石經、嚴本、《集釋》、《通解》、敖氏俱不重，徐本、楊氏、監本、毛本俱重。陳單注本重「南」字，係擠入。敖氏及張氏爾岐俱謂不重者爲脫，則重者是也。戴校《集釋》補「南」字。「坐奠于鼎西南順」，各本皆有「南」字，敖以爲衍文，非。○舉鼎，扛鼎而入。甬，鼎蓋也。賈疏云：「去甬于外者，以其人當載於俎，故去之也。《士喪》、《士虞》皆入乃去甬者，

喪禮變於吉故也。」敖氏云：「次，序也。序入，鼎在西者先，在東者後也。朝位，君南面，故陳鼎於內外皆順之。鼎西，每鼎之西也。」盛氏云：「右人在鼎西，故抽扃即奠於其西，便也。『南順』，言奠扃之法，南北設之，順鼎面也。舉鼎之時，扃橫加於鼎上，及其奠之，直設於鼎旁，故云『南順』也。『出自鼎西』，謂右人奠扃訖，即自鼎西而出也。」今案：「左人待載」，謂立於鼎東，待升肉載俎也。注云「人由東，出由西，明爲賓也」者，褚氏云：「若不爲賓，則出亦當由東矣。出入君門由東，禮之常也。」云「今文『奠』爲

「委」，古文「待」爲「持」者，敖氏云：「奠於鼎西之奠，後篇皆作『委』，宜從今文。」胡氏承珙云：「『奠』與『委』義本相近。下文云：『大夫既匕，匕奠於鼎。』又：『甸人舉鼎順出，奠於其所。』此篇多作『奠』，故從古文也。又『待』、『持』古同聲，《周禮·服不氏》：『以旌居乏而待獲。』杜子春云：『待，書亦或爲持。』是二字古多假借，此時俎猶未入，當云『待載』，故鄭從今文。」雍人以俎入，陳于鼎南。旅人南面加匕于鼎。退。旅人，雍人之屬。旅食者也。雍人言入，旅人言退，文互相備也。出入之由，亦如舉鼎者。匕俎每器一人，諸侯官多也。【疏】正義曰：

敖氏云：「雍人西面於鼎南陳俎，俎南順。旅人南面於鼎北加匕，匕北枋。」注云「旅人，雍人之屬。旅食者也」者，《儀禮釋官》云：「案：《周禮·外饗職》曰：『掌外祭祀之割烹，陳其鼎俎，實之牲體、魚、腊。凡賓客之飧饗、饗食之事亦如之。』天子有內饗外饗之官，諸侯唯有饗人而已。襄二十八年《左傳》云『饗人竊更之以驚』是也。雍與饗通，亦作醢。《國語》佐醢者嘗焉，韋注：『醢，烹煎之官。』旅人，蓋其下府史之屬，如《少牢》之有雍府也。云「雍人言人，旅人言退，文互相備也」者，賈疏云：「雍人言人亦退，旅人言退亦人，皆入而退去，故云『文互相備也』。」褚氏云：「雍人，旅人退，未即出。注云『出人之由，如舉鼎者』，蓋終言之耳。至後取匕舉鼎乃順出，疏謂出而復入，非也。」云「匕俎每器一人，諸侯官多也」者，李氏云：「大夫饋食禮，匕俎皆合執以從。」此雍人執俎，旅人執匕，每器一人，是諸侯官多也。匕，詳《少牢饋食禮》。大夫長盥，洗東南，西面北上，序進盥，退者與進者交于前。卒盥，序進，南面匕。長，以長幼也。序，猶更也。前，洗南。【疏】正義曰：《校勘記》云：「瞿中溶云：『石本原刻南面下，有西上二字，後磨改刪去。』」敖氏

云：「長盥，①亦目下事之辭。國君設洗當東霤，於東夾南爲少東，洗之東南，則又東矣。交於前，不言相右可知也。」今案：大夫立於洗之東南，西面北上，以序進至洗，北面盥，盥畢仍退立於其處，故有退者與進者交於前之事。盥者俱畢，又以序進，至碑南鼎北，南面而匕出鼎實也。盥，賈疏以爲北面，或以爲西面，賈是也。交於前，敖氏以爲相右，或以爲相左，敖是也。褚氏云：「將盥既序進，盥而復位。將匕又序進，故兩言之。」注云「長，以長幼也」者，謂以長幼爲次序也，言長幼則非一人。或謂下大夫七鼎，匕者當七人；②上大夫九鼎，匕者當九人。知侯國五大夫之說爲不然。案：《曾子問》曰：「乃命國家五官而后行。」鄭注：「五官，五大夫典事者。」孔疏：「以屬官大夫其數衆多，直云五者，據典國事者言之。」《儀禮釋官》云：「案：據此疏則諸侯大夫不止五人明矣。《周禮》『傳其伍』，《王制》『下大夫五人』，皆謂三卿下佐事者。其餘大夫尚多，不止此也。」云「序，猶更也」者，序有更義，謂更迭而進。《周禮·御僕》：「以序守路鼓。」注：「序，更也。」是也。云

①「長盥」，《儀禮集說》作「以長而序盥也」。
②「七」，原作「匕」，今據《續清經解》本改。

「前，洗南」者，以大夫既在洗之東南，明退者與進者交在洗南也。方氏苞云：「饗禮亡，燕之牲以狗，用爲脯醢，無所用也。唯食禮專主於食，具大牢，公親視饌，大夫匕，士載，以致其隆也。蓋食禮大夫，士無他職事，唯助君以養賓，故儀繁而不殺。」載者西面。載者，左人也。亦序自鼎東，西面於其前，大夫匕則載之。【疏】正義曰：注「左人」下，毛本有「也」字，嚴本、《集釋》、楊、敖俱無。云「載者，左人」者，上經云「左人待載」，此云「載者」，明即左人也。云「亦序自鼎東，西面於其前」者，上文「士舉鼎序入」，注云「入由東」，故知此亦序自鼎東，西面於鼎之前也。上

未言載者之面，故經特明之。云「大夫匕則載之」者，謂大夫既匕，則載者載之於俎也。魚腊飪。飪，熟也。食禮宜熟，饗有腥者。【疏】正義曰：魚，乾魚。腊，乾獸。此食下大夫七鼎，無鮮魚鮮腊也。賈疏云：「上文直云『羹定』，肉謂之羹，恐魚腊不在羹定之中，故此特著魚腊飪也。」

注云「飪，熟也。食禮宜熟，饗有腥」者，謂食禮宜用熟，饗禮則有用腥者。宣十六年《左傳》曰：「王享有體薦。」賈疏云：「饗禮用體薦，體薦則腥矣。故《禮記》云『腥其俎』，謂豚解而腥之。豚解者，皆腥也。」○陳氏祥道云：「析而乾

之曰脯，全而乾之曰腊。脯在籩，腊在俎。脯常先於醢，腊常亞於魚。有薨腊，有鮮腊，有全腊，有胖腊。《聘禮》賓鼎九，此禮上大夫俎九，有鮮。《聘禮》上介鼎七，此禮下大夫鼎七，無鮮。《少牢》、《特性》、《士冠》、《昏》皆用全，《士喪》、《既夕》、《士虞》胖而已。載體進奏。體，謂牲與腊也。奏，謂皮膚月理也。進其理，本在前。下大夫體七個。

【疏】正義曰：注「个」，《集釋》作「箇」，嚴本作「个」。云

「體，謂牲與腊也」者，下文別言魚及腸胃、膚，故知此所載之體專謂牲與腊也。云「奏，謂皮膚月理也。進其理，本在前」者，凌先生云：「肉理謂之腠，又謂之奏。」詳《鄉飲酒·

記》「進腠」下。云「下大夫體七個」者，賈疏以爲當用右胖肩、臂、臠、肫、骼、脊、脅，其左胖爲庶羞。下文十六豆、二十豆是也。魚七，縮俎，寢右。右首也。寢右，進髻

也。乾魚近腴，多骨鯁。【疏】正義曰：注「近腴」，「近」，

陳、閩、葛本、《通解》、楊氏俱誤作「進」。案：《釋文》爲「近」字作音，「近」是也。「魚七」者，上注云「下大夫體七個」，下經云「腸胃七」，故魚亦依其數也。縮，縱也。「縮

① 「大夫」上，《儀禮析疑》有「故」字。

俎者，魚在俎爲縱，於人爲橫也。若進首進尾，則於俎爲橫，於人爲縱矣。此據賓南面，俎橫設於賓前言之也。「寢右」者，魚卧俎上，右邊在下也。《士虞·記》：「牲北首，寢右。」注云：「寢右者，當升左腓也。」足證右邊在下矣。

云「右首也」者，謂魚首在右也。云「寢右，進髻也」者，髻，脊也。魚右首而寢左，則髻嚮南；右首而寢右，則髻嚮北，故云「進髻也」。云「乾魚近腓，多骨鯁」者，腓，腹下也。乾魚近腓多骨鯁，故必以髻進賓，便於取食也。此食生人法也。《士喪禮》：「大斂奠，載魚左首進髻。」注云：「未異於生也。」凡未異於生者，不致死也，是以其初死，未忍與生異也。但食禮右首進髻，喪禮左首進髻，進髻則同，而左首有異者，反吉也。左首而進髻，則是寢左，與寢右亦異矣。《士虞禮·記》云「魚進髻」，亦是未忍異於生。不言「左首」者，省文耳。《少牢禮》：「魚縮載，右首進腓。」注云：「變於食生也。」是祭祀之禮進腓與生人進髻異也。右首而進腓，則亦寢左矣。經不言者，以此經言「寢右」可推而知也。《少儀》曰：「羞濡魚者進尾，❶冬右腓，夏右鰭。」鰭與髻同，注云「脊也」。此謂進濡魚法與乾魚異，濡魚進尾，則於俎爲橫，於人爲縮，故可右腓，亦可右鰭，與《儀禮》所云進腓進髻者別。孔疏云：「此濡魚進尾及右腓右鰭之屬，皆

謂尋常燕食所進魚體，非祭祀及饗食正禮也。若正禮，魚在於俎皆縮載，無進首進尾之理。」今案：《少牢》「魚縮載進腓」，《公食》「魚縮俎進髻」，是祭祀及饗食正禮。或進髻，或進腓，不進首進尾也。腸胃七，同俎。以其同類也，不異其牛羊，腓賤也。此俎實凡二十八。【疏】正義

曰：此牛與羊之腸胃也。李氏云：「君子不食困腓。」困，謂犬豕也，取牛羊腓而已。」注云「以其同類也」者，是釋經同俎之義。牛羊同食芻，故云「同類」。云「不異其牛羊，腓賤也」者，牛羊之體異俎，而腸胃則同俎，以其腓賤，故不分別之也。云「此俎實凡二十八」者，牛與羊之腸及胃各七，四七則二十八也。此腸胃與牲異鼎異俎者，取其鼎俎奇也。若與牲同鼎同俎，則六不得奇矣。《既夕》、《少牢》

腸胃與牲同鼎者，《既夕》五鼎：羊、豕、魚、腊、鮮獸，《少牢》五鼎：羊、豕、魚、腊、膚，皆無牛。若以羊之腸胃別爲一鼎，則亦六鼎不成奇矣。《士喪》三鼎：豚、魚、腊，《特牲》三鼎：豕、魚、腊，皆無腸胃。《有司徹》三鼎：羊、豕、魚，腸胃亦不別鼎。《少牢》并腸胃於牲鼎，腸胃各三。《既

❶「羞」，原作「進」，今據《儀禮注疏》改。

夕》盛葬，奠腸胃各五。此七者以其取數於牲體，故亦七也。**倫膚七。**倫，理也，謂精理滑脆者，今文「倫」或作「論」。

【疏】正義曰：注「滑脆者」，「脆」，徐、陳、閩、監、葛本、《集釋》、《通解》俱作「脆」。《釋文》、《嚴本》俱作「脆」。

《校勘記》云：「案：《說文》：「脆，從肉從絕省。」作「脆」非也。」○膚謂豕之脅革肉也。七者，亦取數於牲體也。《少牢》則云「倫膚九」，與此皆別為一鼎。若《特牲》、《有司徹》

膚皆從牲同鼎矣。注云「倫，理也，謂精理滑脆」者，蓋謂倫為腠理之精者耳。《說文》：「脆，小栗易斷也。」《少牢》

則訓倫為擇，義詳彼篇。云「今文「倫」或作「論」者，倫、論皆從侖聲，此篇古文作「倫」，今文作「論」。《少牢》則作

「倫」，不作「論」，故鄭從古文也。**腸胃、膚，皆橫諸俎，垂之。**順其在牲之性也。腸胃垂及俎拒。【疏】正

義曰：此言腸胃與膚載俎之法也。橫設於俎而有餘，則垂之於兩邊也。注云「腸胃垂及俎拒」者，詳《少牢》「腸三

胃三，長皆及俎拒」下。○陳氏祥道云：「牛羊有腸胃而無

膚，豕有膚而無腸胃。豕雖有膚，然四解而未體折，無膚。豚而未成牲，無膚。《士喪禮》豚皆無膚，以未成牲也。《既

夕》大遣奠四解無膚，以未體折故也。腸胃常在先，膚常在

後者，以腸胃出於牛羊，膚出於下牲故也。」大夫既匕，匕奠于鼎，逆退，復位。事畢，宜由便也。士匕載

者，又待設俎。【疏】正義曰：既匕，閩本「匕」誤作「七」。敖氏云：「匕奠于鼎，謂加匕于鼎上也，位東夾南。」注

云「事畢，宜由便也」者，事畢，謂匕載已畢也。匕者每鼎一人，匕時序進，則大夫長在先，事畢則後進者先退，是謂逆

退由便也。云「士匕載者，又待設俎」者，上云「左人待載」，左人，即舉鼎之士也。下文「士設俎于豆南」，是士載俎者

又有設俎之事，故經言大夫退，不言士退也。

右鼎人載俎

公降盥。將設醬。【疏】正義曰：此下乃詳食賓

之節：為賓設正饌，賓祭正饌，為賓設加饌，賓祭加饌，賓三飯，侑賓以束帛，賓卒食，禮終賓出，凡八節。注云「將

設醬」者，下文宰夫授公醢醬，公設之，故知此降盥者，為將設醬，盥手致潔也。敖氏云：「於是小臣各執槃匱，巾以

就公盥。」賓降，公辭。辭其從己。卒盥，公壹揖

壹讓，公升，賓升。揖讓皆一，殺於初。古文「壹」皆

作「一」。【疏】正義曰：注「揖讓皆一」，嚴、徐、《集釋》、《通解》、楊氏「一」俱作「壹」，毛本作「一」。○「壹揖壹讓」及注「壹」皆作「一」，俱詳《士冠禮》。宰夫自東房授醢醬，授，授公也。醢醬，以醢和醬。【疏】正義曰：賈疏

云：「案：記云：蒲筵常長丈六尺，于堂上戶牖之間南面設之，乃設正饌於中席以東，自中席以西設庶羞也。」今案：據下經云「設庶羞，旁四列」，則庶羞不正當中席。①以西，

蓋又偏於西也。

注云「醢醬，以醢和醬」者，此云「醢醬」，

下直云「醬」，明醢在醬中，以醢和醬可知。賈疏云：「祭祀無此法，以生人尚褻味，故有之。」公設之。以其爲饌

本。【疏】正義曰：敖氏云：「公設之，示親饋也。」《禮經釋

例》云：「凡正饌醢醬、大羹湑，加饌簠梁，皆公親設。案：

《公食大夫禮》設正饌：「宰夫自東房授醢醬，公設之。」

又：「大羹湑不和，實于鐙，宰右執鐙，左執蓋，授公，公設于醬西。」是正饌之醢醬、大羹湑，皆公親設也。又設加饌：「宰夫授公飯梁，公設之於湑西。」是加饌之簠梁，亦公

親設也。故賓初食時，用正饌之湑醬及加饌之簠梁；卒食後，挽手，興，北面坐取梁與醬以降，西面坐，奠於階西，皆因公親設之故也。「湑西」者，即前公所設正饌之大羹湑

也。正饌以大羹湑爲上，加饌以簠梁爲上，大羹湑在正饌之西，飯梁在加饌之東，故云「於湑西」也。兩饌之間容人，下經云：「賓北面自間坐。」注曰：「兩饌之間也。」兩饌，即所謂正饌、加饌也。」注云「以其爲饌本」者，言此以明親設之故也。《禮經釋例》云：「聘禮設飧，堂上之饌八，西夾六。注：「八、六者，豆數也。凡饌以豆爲本。」疏云：「凡設饌，皆先設豆，乃設餘饌，故鄭云凡饌以豆爲本。」考《士昏禮》贊者設醬于席前，此爲壻設饌也。設醬畢乃薦菹醢二豆，設豆畢乃設俎，設俎畢乃設黍稷二敦，至末始設湑。又云「設對醬於東」，此爲婦設饌也。設醬畢乃薦豆、設敦，與壻饌同。三俎及湑，則夫婦共之。《公食禮》設正饌、醢醬，公設之。注以其爲饌本。設醬畢乃薦豆，薦豆畢乃設俎，設俎畢乃設簠，設簠畢乃設湑，設湑畢乃設鉶。《士虞》陰厭，贊薦豆畢乃設俎，設俎畢乃設敦，設敦畢乃設鉶。《特性》陰厭同。《少牢》陰厭，薦豆畢設俎設敦次序亦同，唯兩鉶至尸入飯時始設之，爲小異也。是設饌之時，有醢醬之豆，則先設醢醬之豆；無醢醬之豆，則先設菹醢之豆也。《聘禮》歸饗餼，堂上之饌，先設豆，次設簠，次設鉶，

①「當」，原作「常」，今據上下文意改。

次設簋，次設壺，兩夾之饌亦然。蓋歸饗餼之禮，雖變於親食賓之禮，而其以豆爲本之例則未嘗變也。」賓辭，北面坐遷而東遷所。東遷所，奠之東側，其故處。【疏】正義曰：「賓辭」者，辭公之親設也。坐，跪也。「北面坐遷」者，謂公南面立設，賓北面跪遷，敬也。而東遷所，謂東遷之於所當設之所也。言「所」者，見賓遷之處即爲醬之定位，公不更移設也。注「故處」下，《釋文》有「也」字，嚴本各本無。○云「東遷所，奠之東側，其故處」者，故處謂公所設之處，賓遷而奠之東，即在故處之側，明不相遠，故賈疏云：「側，近也。」《禮經釋例》云：「凡公親設之饌，必坐遷之。《公食禮》設正饌，宰夫授醯醬，公設之，賓坐遷而東遷所。敖氏云：「遷之者，示不敢當公親設之意，且以爲禮也。」又大羹湑，「公設之于醬西，賓辭，坐遷之。」注：「亦東遷所。」疏云：「明亦東遷所移之故醬處也。」又設加饌，「宰夫授公飯梁，公設之于湑西，賓北面辭，坐遷之。」注：「遷之，遷而西之，以其東上也。」是公親設之饌，必亦坐遷之也。正饌東遷，加饌西遷，則中間可以容人矣。」○以上公設醯醬，正饌之一。

戶

飲酒豐

膚俎

昌本

麋膾

豕俎

腸胃俎

醢醢

菁菹

羊俎

腊俎

韭菹

鹿膾

牛俎

魚俎

牛鉶

牛鉶

黍簋

稷簋

黍簋

蒲

羊鉶

豕鉶

稷簋

黍簋

稷簋

筵

醢醬

北

加

大羹

萑

梁簋

席

稻簋

牛炙

醢

豕炙

醢

豕臠

牛臠

醢

豕臠

加饌

漿飲豐

羊臠

醢

羊臠

芥醬

牛臠

牛臠

羊炙

魚膾

牖

公立于序內，西鄉。不立阼階上，示親饌。

【疏】正義曰：君位當在阼階上，今立於東序之內，則視阼階上爲少北，以其設饌在戶西，序內與戶西少近，故注云：

「不立阼階上，示親饌。」敖氏則謂不立於阼階東者，公尊也。後人多從敖說，以侑幣時饌已設訖，公猶立於此爲證。褚氏云：「依注『示親饌』之義爲長，公既立於此，後即因其故位而立耳。」賓立于階西，疑立。不立階上，以主君離阼也。疑，正立也，自定之貌。今文曰「西階」。【疏】正義曰：「西階上」與「阼階上」恒相對，今賓不立西階上，而立西階西者，以主君在序內已離阼階上之位故也。疑立，蔡氏云：「不敢正對君也。」注云「正立也，自定之貌」，詳《鄉飲酒禮》。云「今文曰『西階』」者，古文作「階西」，今文作「西階」。案：階西即謂西階上之西，省文也。今文作「西階」非是，故鄭不從。宰夫自東房薦豆六，設于醬東，西上。韭菹以東，醯醢、昌本，昌本南，麋臠，以西菁菹、鹿臠。醢醢，醢有醢。昌本，昌蒲本，菹也。醢有骨謂之臠。菁，萸菁，菹也。今文「臠」皆作「麋」。【疏】正義曰：上云「凡宰夫之具饌于東房」，今惟醢醬與豆言自東房，餘不言者，可推而知也。《周禮·醢人》朝士之豆八，此去茆菹、麋臠二者，唯用其六耳。敖氏云：「六豆爲二列，內列自西而東，外列自東而西，惟云『西上』者，明外列統於內列也。」注云「醢醢，醢

有醢」者，醢，肉汁也，詳《聘禮》。云「昌本，昌蒲本」者，《周禮·醢人》注云「昌蒲根」，本即根也。云「菹也」者，昌本不言菹，亦菹屬也。云「醢有骨謂之臠」者，《醢人》注云：「三臠亦醢也。作醢及臠者，必先膊乾其肉，乃後細莖之，雜以梁糲及鹽，漬以美酒，塗置瓶中，百日則成矣。」鄭司農云：「有骨爲臠，無骨爲醢。」是也。云「菁，萸菁，菹也」者，《醢人》注云：「菁，萸菁也。」云「今文『臠』皆作『麋』」者，《說文》：「臠，有骨醢也。臠，臠或從難。」段氏云：「臠，難二聲同部。《公食禮》注今文『麋』係『臠』之誤。《儀禮》、《爾雅》音義曰：『臠，字作臠。』」①《五經文字》曰：「臠見《禮經》、《周禮》、《說文》、《字林》，皆作臠。」據此則《說文》本無臠字，後人益之也。」胡氏承珙云：「此注當本是『今文臠皆作臠』。若作『麋』則於義不通。鄭當定爲字誤，不應僅存而不論矣。」○以上宰夫設豆，正饌之二。士設俎于豆南，西上，牛、羊、豕，魚在牛南，腊、腸胃亞之。亞，次也。不言綏錯，俎尊也。【疏】正義曰：注「不言綏錯」，張氏淳據《釋文》云：「『不綏』中無『言』字，從《釋

①「字」下，《說文解字注》有「林」字。

文》。《校勘記》云：「疏有『言』字。」今案：嚴本及各本俱有「言」字。「俎尊」下，《集釋》、《通解》、毛本俱有「也」字，嚴本、楊氏俱無。○俎即前大夫匕載之俎，不在東房。蔡氏云：「俎亦以西爲上，牛、羊、豕三物爲一行列於北，魚、腊、腸胃爲一行列於南。」今案：此六俎也，并下膚俎爲七。注云「亞，次也」者，謂魚在西，腊與腸胃以次而東也。云「不言紆錯，俎尊」者，紆，屈也。此六俎爲二列，皆自西而東，不紆不錯，對豆紆陳簋錯陳而言，故云「俎尊也」。膚以爲特。直豕與腸胃東也。特膚者，出下牲，賤。【疏】

正義曰：注「也」，《通解》作「北」，嚴本及各本作「也」。○膚以爲特，謂獨爲一行，不在豆南也。注云「直豕與腸胃東也」者，謂膚之設在豕俎與腸胃俎二者之東也，敖氏以爲在豕東，郝氏以爲在腸胃東。案：三說當以鄭爲正。若在豕東，則似與牛羊豕爲一行；在腸胃東，則似與魚腊腸胃爲一行，非特矣。旅人取匕，甸人舉鼎，順出，奠

于其所。以其空也。其所，謂當門。【疏】正義曰：前鼎入時，旅人以匕加於鼎，今仍令旅人取匕以出也。「甸人舉鼎」者，謂前陳鼎於門外係甸人事，今仍使之舉鼎出而奠於其所也。順出，吳氏《章句》謂「牛鼎先，餘則順次而出」，是

也。注云「以其空也」者，鼎肉載於俎則鼎空，故出之。必俟士設俎乃出者，亦其節也。云「其所，謂當門」者，前陳鼎當門，此奠之亦當門，故云「於其所」也。○以上士設俎，正饌之三。宰夫設黍稷六簋于俎西，二以竝，東北上。黍當牛俎，其西稷，錯以終，南陳。

竝，併也。今文曰「併」。古文「簋」皆作「軌」。【疏】正義曰：注「軌」，嚴本誤作「軌」。○此以黍稷爲飯而盛之於簋也，稻粱則爲飯而盛之於簋。故《內則》曰：「飯黍稷稻粱。」《說文》：「黍，禾屬而黏者也，以大暑而種，故謂之黍。」孔子曰：「黍可爲酒，禾入水也。」「糜，稌也。」「稌，糜也。」程氏瑤田《九穀考》云：「黍，大名也。黏者得專黍名，其不黏者則曰糜曰稌。」又云：「糜，一名稌。飯用黍之不黏者，黏者釀酒及爲餌資醅粥之屬，故簋簋實糜爲之。北方方稌，稌音相邇，論者因謂稷、稌一物，而以黏不黏分黍稷，失之矣。《說文》：糜、稌互釋，稷、齊互釋，其爲二物甚明。以稌冒稷，稷既非稷矣。以釀酒之黏黍充簋實，其性黏者幾與餌資之籩實無以異。且《少牢》、《特性》之禮，尸嘏主人，本炊糜爲飯，故有搏黍之儀。若用黏黍爲之，胡爲必搏之而授尸哉？」《說文》：「稷，齊也，五穀之長。」「齊，稷也。」「林，稷之黏者。」《九穀考》云：「稷，齊大名也，黏者別之爲

秫，北方謂之高粱，或謂之紅粱，通謂之秫。秫，南人呼爲蘆稬也。《月令》：「孟春行冬令，首種不入。」鄭注：「首種謂稬。」今以北方諸穀播種先後考之，高粱最先，粟次之，黍又次之。然則首種者，高粱也。秦漢以來諸書，竝冒粱爲稬。鄭司農注《大宰》九穀，稬、秫竝見，後鄭不從，入粱去秫，以其闕粱而秫重稬也。《良耜》之詩箋云：「豐年之時，雖賤者猶食黍。」疏云：「賤者食稬耳。」今北方富室食以粟爲主，賤者食以高粱爲主。是賤者食稬，而不可以冒粟爲稬也。敖氏云：「『東北上』，惟指黍之當牛俎者言也。『錯以終』者，黍西稬，稬南黍，黍東稬，稬南黍，黍西稬也。」今案：「二以竝」，謂一黍一稬東西竝列也。「錯以終，南陳」，謂交錯陳之，自北而南爲三列也。若以三簋爲一列，南北二列，則與「二以竝」之文不合，且是西陳，非南陳矣。一注云「竝，併也。今文曰『併』」，詳《士昏禮》。云「古文『簋』皆作『軌』者，簋，正字；軌，古文假借字。《周禮·小史》注：『故書簋或作九。』九，亦音近假借也。○以上宰夫設簋，正饌之四。大羹湑不和，實于鐙。宰右執鐙，左執蓋，由門入，升自阼階，盡階，不升堂，授公，以蓋降，出，入反位。大羹湑，煮肉汁

也。大古之羹不和，無鹽菜。瓦豆謂之鐙。宰謂大宰，宰夫之長也。有蓋者，饌自外人，爲風塵。今文「湑」爲「汁」。又曰：「入門自阼階，無升。」【疏】正義曰：「由門入」者，《士昏禮》曰：「大羹湑在饗，饗在廟門外也。」記曰：「亨于門外東方。」李氏云：「湑升自阼階者，公親設之故也。」案：「盡階，不升堂」，詳《士冠禮》始加降西階一等下。「反位」，反其東夾北之位也。餘詳「宰東夾北，西面南上」下。注云「大羹湑，煮肉汁也」者，此大羹湑當爲牛湑，若《士昏》、《特牲》則豕湑也。云「大古之羹不和，無鹽菜」者，詳《聘禮》「六綢繼之下」。云「瓦豆謂之鐙」者，《爾雅·釋器》文，彼文「鐙」作「登」，郝氏《義疏》云：「登者，假借字也，俗作登，《說文》作甞，經典俱作登，通作鐙，故《爾雅釋文》云：『登，本又作鐙。』《公食禮》：『大羹湑不和，實于鐙。』鄭注：『瓦豆謂之鐙。』是即《爾雅》作鐙之本也。《詩·生民》傳：『木曰豆，瓦曰登。豆，薦菹醢也。登，薦大羹也。』孔疏云：「大古之羹以質，故以瓦器盛之。」今案：豆足亦名鐙。《祭統》：「夫人薦豆執校，執醴授之，執鐙。」鄭注：「鐙，豆下跗也。」段氏云：「案：跗，《說文》作『拊』，闌足也。」是豆足又謂之鐙矣。云「宰，太宰，宰夫之長也」者，案：此宰當爲內宰，即前立東夾北者，鄭解爲大宰，非是，

詳前。云「有蓋者，饌自外人，爲風塵」者，案：經鐙與蓋似分爲二。吳氏《章句》云：「蓋以辟塵，既不入設，徒執何爲？此蓋當在鐙上，以左手按之，欲其固爾。」此說是也。云「今文「涪」爲「汁」者，詳《士昏禮》」。云「又曰：入門自阼階，無升」者，經升自阼階，古文有「升」字，今文無「升」字。鄭氏從古文，以其義備也。公設之于醬西，賓

辭，坐遷之。亦東遷所。【疏】正義曰：公親設大羹，貴其質也。於醬西者，公故設醬處之西也。賓辭，辭公親設也。注云「亦東遷所」者，亦東遷之於其所，與遷醬之法同，餘詳前矣。○以上公親設大羹涪，正饌之五。宰夫

設鉶四于豆西，東上，牛以西羊，羊南豕，豕以東牛。鉶，菜和羹之器。【疏】正義曰：「鉶」，《釋文》作「鉶」，非也，辨見《聘禮》「六鉶繼之」下。○敖氏云：「東上，變於豆。」案：設豆西上，此設俎在豆西東上，是變於豆也。注云「鉶，菜和羹之器」者，賈疏云：「下記「牛藿羊

苦豕薇」，是菜和羹，以鉶盛此羹，故云「之器」也。」又賈以鉶羹即鉶鼎，陪鼎及羞鼎，誤甚，亦詳《聘禮》。○以上宰夫設鉶，正饌之六。飲酒，實于觶，加于豐。豐，所以承觶者也，如豆而卑。【疏】正義曰：敖氏云：「具饌之時

則然矣，言於此者，爲下文發之。」郝氏則謂至是始實觶加於豐。今案：前經云「飲酒，漿飲，俟於東房」，注謂奠於豐上而俟，則敖義爲長。但前僅云「俟於東房」，未云實觶加豐，故特明之。注云「豐，所以承觶者也」者，此承觶之

豐，與承尊異，詳《燕禮》。宰夫右執觶，左執豐，進設于豆東。食有酒者，優賓也。設于豆東，不舉也。

《燕禮·記》曰：「凡奠者于左。」【疏】正義曰：注云「食有酒者，優賓也」者，案下文賓唯飲漿而不飲酒，然食禮酒與漿竝設，所以優賓也。楊氏復因此注言優賓，遂謂酒非以醑口，恐讀注未審耳。云「設于豆東，不舉也」者，謂設於豆東，即有不舉之義，故引「凡奠者於左」以證之，左即東也。張氏爾岐云：「凡奠者於左，舉者於右。《鄉飲酒》、《鄉射》記皆有此文，注以爲《燕禮·記》，誤也。」○以上宰夫設飲酒，正饌之七。宰夫東面，坐啓簋會，各卻于其西。會，簋蓋也。亦一一合卻之。各當其簋之西。【疏】

正義曰：秦氏蕙田云：「簋設於羹涪之先，至是始啓之事有節也。」注云「會，簋蓋也」者，案：《士虞禮》「敦啓會」，注：「會，蓋也。」是敦與簋皆有蓋，謂之會也。或謂於蓋頂刻爲龜形，非，辨見《少牢饋食禮》「敦皆南首」下。云

「亦一一合卻之，各當其簋之西」者，合字未詳。據經云「各卻於其西」，卻者，仰也，則是每簋之蓋各仰而置之於其簋之西也。賈疏謂簋會有六，兩兩皆相重而仰之，謂之合卻。^①引《少牢》「蓋二以重，設於敦南」為證，謂「亦」者，亦《少牢》，但彼言「重」，故注謂「重累」；此言「各」，注言「一一」，則非重也。賈說恐未然。贊者負東房，南面告具于公。負東房，負房戶而立也。南面者，欲得鄉公與賓也。【疏】正義曰：敖氏云：「贊者，所謂上贊也。具，謂正饌已具。」注云「負東房，負房戶而立也」者，敖氏謂負東房，負其墉也。引《士喪禮》「祝負墉南面」為證，似亦可通。云「南面者，欲得鄉公與賓也」者，斯時公在東序內，賓在戶西，故南面得兼鄉之也。○《儀禮紉解》云：「此正饌，醬最先設，次則豆由房出，又次則俎自階升，又次則簋由房出，又次則湑自階升，至鉶則復由房出。」案：鬴與豐亦由房出也。

右為賓設正饌

公再拜，揖食。再拜，拜賓饌具。【疏】正義

曰：方氏苞云：「食禮，公弗與，故拜饌而興，又推手以速

賓之食。」賓降拜。荅公拜。公辭。賓升，再拜稽首。不言成拜，降未拜。賓升席，坐取韭菹，以辯擣于醢，上豆之間祭。擣，猶染也。今文無「于」。【疏】正義曰：敖氏云：「此所擣者，醢醢而下五豆。惟云「醢」者，省文耳。《少牢饋食》用四豆，尸取韭菹擣于三豆，是其徵也。」今案：韭菹、醢醢，居豆之上列，故為上豆。言「上豆之間祭」者，謂祭於韭菹、醢醢二豆之間也。注云「擣，猶染也」者，《說文》：「擣，染也。」引《周禮》「六曰擣祭」。段氏注謂：「擣，當作「揅」，古音與聲、需聲畫然分別，後人乃或淆亂其偏旁，本從揅者譌而從需，而音由是亂矣。《周禮》：「大祝九祭，六曰揅祭。《士虞禮》、《特牲饋食禮》、《少牢饋食禮》、《有司徹》四篇經文，凡用「揅」字二十，唐石經《周禮》、《士虞》皆作「擣」，《特牲》、《少牢》、《有司》皆作「揅」，此非經字不一，乃《周禮》、《士虞》經淺人妄改也。郭璞「而沿反」，陸德明「而泉反」，皆與聲之正音。」今案：據此，則此篇「擣」字亦當作「揅」，段氏《說文注》蓋偶遺之。云「今文無「于」」者，「擣」下，今文無「于」

① 「之」，原作「文」，今據《儀禮注疏》改。

字，古文有。鄭從古文，亦以其文義備也。贊者東面

坐取黍，實于左手，辯，又取稷，辯，反于右手，興以授賓。賓祭之。取授以右手，便也。賓亦

興受，坐祭之於豆祭也。獨云贊興，優賓也。《少儀》曰：

「受立，授立，不坐。」【疏】正義曰：上宰夫啓簋會云「東面

坐」，此贊者取黍稷亦云「東面坐」，以簋西地寬也。贊者取

黍稷及肺授賓者，以簋俎去席遠也。若豆鉶則不言贊者取

授，以其近也。兩言「辯」者，謂黍稷各三簋，每簋取之以授

賓也。褚氏云：「先黍後稷，六簋偏取，兼授而兼祭。」敖

氏謂此亦壹以授賓，非。」注云「取授以右手，便也」者，

經云「取黍實于左手」，明是右手取以實之。蓋贊者先以右

手取黍實於左手，又以右手取稷實於左手，俟六簋取畢，然

後以所實於左手者仍反於右手以授賓，故知取授皆右手，

由便故也。云「賓亦興受，坐祭之於豆祭也」者，案：經言

「賓祭」，則受可知。但下「祭肺」云：「賓興受，坐祭。」此不

言「興受坐」者，省文，其實亦同也。李氏云：「豆祭，謂前

祭豆處，上豆之間。」今案：《少牢禮》、《有司徹》多有豆祭

之文。方氏苞謂「祭」當作「際」，非。云「獨云贊興，優賓

也」者，賈疏云：「欲見賓坐而不興，是優賓。其實俱興

也。」云「《少儀》曰「受立，授立，不坐」者，此引以證興則俱

興也。三牲之肺不離，贊者辯取之，壹以授

賓。肺不離者，刲之也。不言刲，刲則祭肺也。此舉肺不

離而刲之，便賓祭也。祭離肺者，絕肺祭也。壹，猶稍也。

古文「壹」作「一」。【疏】正義曰：注「刲之也」，②毛本「刲」

作「刲」，③嚴、徐、《集釋》、《通解》俱作「刲」，下竝同。「壹

猶稍」，毛本「稍」下有「也」字，嚴本無。「古文壹作一」，

「古」上，毛本有一圈，非，《通解》亦無。《校勘記》云：

「案：此節經注據《士冠》疏，則經當云「一以授賓」，注當云

「古文一作壹」，今本與賈疏不合，當由後人妄改，然諸本皆

然，其誤久矣。」云「肺不離者，刲之也」者，凡割而不斷

曰離。《少儀》曰：「牛羊之肺，離而不提心。」鄭注：「提，

猶絕也。剝離之，不絕其中央少者，使易絕以祭耳。」是也。

刲，切斷也。此經言「不離」，則是切斷之矣。云「不言刲，

刲則祭肺也」者，李氏云：「刲肺惟祭祀乃有之，故不言刲

也。」云「此舉肺不離而刲之，便賓祭也」者，凡肺，有舉肺，

①「徧」，《儀禮管見》作「辨」。

②「刲」，原作「刲」，據《儀禮注疏》改。

③「刲」，原作「刲」，據《儀禮注疏》改。

有祭肺。此食禮用舉肺，宜割勿絕。今切之使斷者，便賓取以祭也。褚氏云：「本宜用離肺，因便賓祭，故不離而刲之。然不可竟稱爲刲肺，故變其文曰『不離』，見宜離而不離，以優賓也。」云「祭離肺者，絕肺祭也」者，此申言便賓祭之義也。離肺即舉肺。凡祭離肺，必絕其中央少許以祭，若刲則已斷不須絕，故云便也，餘詳《士冠禮》。云「壹，猶稍」者，贊者徧取牛羊豕之肺，一一授賓。吳氏《疑義》亦云：「壹，謂一一授之，一一與稍稍義近，故注轉『壹』爲『稍』。」褚氏云：「經加『壹』字，異於授黍稷者，見逐一授之也。賓亦三次祭，故不云兼一祭之。」案：此說足申注義。敖氏及張氏爾岐訓「壹」爲不再，爲專壹，皆非。賓興受，坐祭。於是云「賓興受，坐祭」，重牲也。賓亦每肺興受，祭於豆祭。【疏】正義曰：注云「於是云『賓興受，坐祭』，重牲也」者，案：上注既引《少儀》「受立，授立，不坐」，則興受自是禮之通例。此注以爲重牲，上注以爲「獨云贊興，優賓」，皆義有難通，後儒多駁之。云「賓亦每肺興受，祭於豆祭」者，據受云「每肺」，則上文「壹以授賓」爲一一授之明矣。搯手，扱上鉶以枲，辯擣之，上鉶之間祭。扱以枲，扱其鉶菜也。搯，拭也，拭以巾。【疏】正

義曰：「搯手」謂賓既祭肺則以巾拭手，而扱鉶以祭也。「上鉶」，上列牛鉶也。「上鉶之間」，上列牛羊二鉶之間也。賈疏云：「此云『上鉶之間祭』者，著其異於餘者，餘祭於上豆之間。」注云「扱以枲，扱其鉶菜也」者，謂賓以枲扱上鉶之菜，徧擣於三鉶，合其味以祭也。賈疏謂四鉶惟有一枲。敖氏謂四鉶皆有枲，其擣之惟用上者之枲。褚氏云：「器無虛設，若惟用上者之枲，餘枲不爲虛設邪？依賈優賓惟有一枲之說爲長。」今案：少牢有羊、豕二枲者，祭神之禮與此異也。祭飲酒于上豆之間。魚、腊、醬、醢不祭。不祭者，非食物之盛者。【疏】正義曰：注末，《集釋》有「也」字，嚴本及各本俱無。○祭于上豆之間，酒在豆東也。李氏云：「魚、腊不祭，則腸胃、膚不祭可知。或曰：《曲禮》『殺之序，徧祭之』，殺，謂出於牲體者。」注云「不祭者，非食物之盛」者，敖氏云：「魚腊屬於牲，醬屬於豆，醢屬於鉶，故此雖設之亦不祭，蓋已祭其大，則略其細也。」案：敝此說善矣。然正饌之設凡七，而賓祭者五：菹醢一也，黍稷二也，肺三也，鉶四也，飲酒五也。醬與大羹醢皆公親設之，不得謂之細。以醬與菹醢同類，醢與鉶同類，既祭菹與鉶，則醬、醢二者可不祭耳。○《禮經釋例》云：「凡祭皆於籩豆之間，或上豆之間。《公食禮》賓

祭正饌，「取韭菹辯擣于醢，上豆之間祭」，此祭豆也。「贊者取黍稷授賓，賓祭之」，注「賓亦興受，坐祭之於豆祭也」，此祭簋也。「三牲之肺，贊者辯取授賓」，注「賓亦每肺興受，祭於豆祭」，此祭俎也。「祭飲酒於上豆之間」，此祭酒也。皆於上豆間祭之。賓祭加饌，「贊者辯取庶羞之大授賓，賓受，兼壹祭之」，注：「庶羞輕也，自祭之於腳臠之間，以異饌也。」庶羞亦實於豆，腳、臠、臠三豆近賓，則注所謂「腳臠之間者，亦上豆之間也。」《士虞禮》尸人九飯：「取菹，擣于醢，祭于豆間。」《特牲》尸人九飯：「右取菹，擣于醢，祭于豆間。主婦亞獻，祝贊籩祭。」注：「籩祭，棗栗之祭也。尸祭之，亦於豆祭。」《少牢》尸人十一飯：「尸取韭菹，辯擣于三豆，祭于豆間。上佐食取黍稷于四敦，下佐食取牢一切肺于俎，以授上佐食，上佐食兼與黍以授尸。尸受，同祭于豆祭。主人獻祝，祝取菹，擣于醢，祭于豆間。」《有司徹》主人獻尸：「尸右取韭菹，擣于三豆，祭于豆間，尸取糒蕢。糒蕢，籩實也。宰夫贊者，取白、黑以授尸，尸受，兼祭于豆間。」主人獻侑：「侑右取菹，擣于醢，祭于豆間。又取糒蕢，同祭于豆祭。」主婦獻尸：「尸祭糒脩，同祭于豆祭。以羊鉶之杞挹羊鉶，遂以挹豕鉶，祭于豆祭。」主婦獻侑：「侑坐取糒脩，兼祭于豆祭。」主婦受尸酢：「右取

菹，擣于醢，祭于豆間。又取糒蕢，兼祭于豆祭。」不饋尸之禮：「主婦亞獻尸，取棗糗，祝取栗脯以授尸，尸兼祭于豆祭。」主婦獻祝：「祝取棗糗，祭于豆祭。」主婦致爵于主人：「主人右取菹，擣于醢，祭于豆間。」《士昏禮》女父禮使者：「賓左執觶，祭脯醢，以杞祭醢三。」注：「凡祭，於脯醢之豆間。」則祭醢亦於豆間。疏云：「此及《冠禮》、《鄉飲》、《鄉射》、《燕禮》、《大射》皆有脯醢，則在籩豆之間。此注不言籩者，省文。《公食》及《有司徹》豆多者，則言祭於上豆之間也。」《士冠》、《士昏》、《鄉飲》、《鄉射》、《燕禮》、《大射》諸經文，不云祭於籩豆之間者，文不具也。」又云：「亦有不於豆間者，《公食》賓祭正饌，上鉶之間祭。賓祭加饌，取梁即稻，祭於醬滫間。」注：「祭稻梁不以豆祭。祭加宜於加。」張氏爾岐云：「醬滫不得言加，注偶誤。」然醬本豆實，大羹滫實于鐙，注：「瓦豆謂之鐙。」則醬滫間亦豆間，但非前所祭上豆之間耳。唯《公食》祭鉶於上鉶之間為異，蓋《有司徹》尸祭鉶亦於豆祭也。」

右賓祭正饌

宰夫授公飯梁，公設之于滫西。賓北

面辭，坐遷之。既告具矣，而又設此，殷勤之加也。遷之，遷而西之，以其東上也。【疏】正義曰：此炊梁爲飯而實之於簋也，故下文云：「左擁簋梁。」梁即粟也，北方謂之小米，南方謂之粟。《說文》：「禾，嘉穀也。二月始生，八月而熟，得時之中，故謂之禾。粟，嘉穀實也。米，粟實也。梁，米名也。麰，赤苗嘉穀。芑，白苗嘉穀。」皆謂梁也。《九穀考》云：「始生曰苗，成秀曰禾，禾實曰粟，粟實曰米，米名曰梁，其大名曰嘉穀。《周禮·倉人》注：「九穀以粟爲主。」注《大宰》九穀中有梁無粟。則梁即粟矣。《內則》言「飯有梁」，又有「黃梁」，是梁者，白梁也。禮設簋簠，不稱黍稷稻粟而云「梁」者，飯必炊米爲之，故舉米名耳。郭璞、孫炎《爾雅注》以粟爲稷，孔穎達於《曲禮》「稷曰明粢」亦釋之曰「稷，粢也」，蓋承其誤矣。今案：梁與稷見於經者，判然二物。《周禮·食醫》：「豕宜稷，犬宜梁。」《禮記·玉藻》：「沐稷而饋梁。」《詩·甫田》：「黍稷稻粱。」《聘禮》八簋黍稷，兩簋稻粱。此篇黍稷爲正饌，稻粱爲加饌，二者固自不同。自漢魏間誤以粟爲稷，遂冒稷爲粱，而以粱爲高粱，誤甚，《九穀考》辨之是也。敖氏云：「梁言「飯」者，以賓主食之也。」蔡氏云：「穀以粱爲貴，故公親設之。」注云「遷之，遷而西之，以其東上也」者，李氏云：

「東上統於正饌。」今案：加饌以東爲上，故遷而西之，以示不敢當公親設之意。且設於滄西，則正當中席，故必遷而西之也。公與賓皆復初位。位，序內階西。【疏】正義曰：即前設醬時，公立於序內，賓立於階西之位也。宰

夫膳稻于梁西。膳，猶進也。進稻粱者以簋。【疏】

正義曰：《說文》：「稻，稌也。稌，稻也。」二字互訓。《字

林》：「糯，黏稻也。粳，稻不黏者。」《廣雅》：「秬，粳也。」

顏師古《漢書注》：「稻，有芒之穀總稱也，秬，其不黏者

也。《九穀考》云：「稻稌，大名也。糯，糯也，其黏者也。

粳之爲言硬也，不黏者也，南方謂之秬。然則稻爲總名，別

言之則黏者爲糯，不黏者爲粳爲秬爲秠矣。《九穀考》又

云：「《周官·稻人》：「掌稼下地。」《詩·白華》云：「漚池

北流，浸彼稻田。」由是言之，稻宜水也。」又引《吳都賦》

云：「國稅再熟之稻。」是稻有一歲再熟者，蓋與粱皆爲穀

之美者矣。注云「膳，猶進也」者，膳，美物也。盛氏云：

「進膳曰膳，猶置尊曰尊，布筵曰筵也。敖氏以「膳」爲「設」

之誤，非。」云「進稻粱者以簋」者，鄭注《周禮·掌客》云：

①「醫」，原作「醬」，今據《續清經解》本改。

「簠，稻梁器也。」是簠爲盛稻梁之器，故云「以簠」也。○以上公親設梁，宰夫膳稻，加饌之一。士羞庶羞，皆有大、蓋，執豆如宰。羞，進也。庶，衆也。進衆珍味可進者也。大，以肥美者特爲饗，所以祭也。魚或謂之鰾，大也。唯醢醬無大。如宰，如其進大羹湑，右執豆，左執蓋。【疏】正義曰：注「右執豆」，毛本「右」誤「石」。張氏敦仁刻注疏本「豆」作「鐙」，似是。嚴本及各本俱作「豆」，今仍之。云「羞，進也」者，此釋經上「羞」字也。云「庶，衆也。進衆珍味可進者也」者，郝氏敬云：「庶羞即下鰾，等十六豆。肴美曰羞，品多曰庶。」云「大，以肥美者特爲饗，所以祭也」者，言每品皆取肉之肥美者爲大饗，加於豆以待祭，故云「皆有大」也。云「魚或謂之鰾，大也」者，《少儀》「魚祭鰾」，鄭注：「鰾，大饗，謂剖魚腹也。」孔疏：「鰾謂剖魚腹下爲大饗，此處肥美，故食魚則剖取以祭先也。」是鰾亦訓大也。云「唯醢醬無大」者，敖氏云：「以經文云『皆』，故言此以明之。醢醬，四醢及芥醬也。」今案：作醢之法，詳《周禮·醢人》注。謂必先膊乾其肉，乃後細莖之，則無大矣。醬亦醢類也。云「如宰，如其進大羹湑，右執豆，左執蓋」者，案：經「蓋執豆如宰」五字，讀者不同。敖氏云：「言執於蓋豆之間，見其兩執也。」張氏爾岐云：

「蓋執豆，兼蓋而執之也。」方氏苞與敖、張說同。郝氏云：「蓋，豆上蓋。自門外人，蔽風塵也。士執庶羞之豆，升階，右執豆，左執蓋，與宰執鐙同。」盛氏謂：「先儒皆以『蓋執豆』爲句，惟郝氏以『蓋』爲一句，『執豆如宰』爲一句，文義較長。」今案：盛說是矣。但「蓋」字當連上讀，謂庶羞皆有大皆有蓋也。惟其有蓋，故執之如宰，右鐙左蓋矣。先者反之，由門入，升自西階。庶羞多，羞人不足，則相授於階上，復出取也。【疏】正義曰：「先者反之」下，毛本有注云：「釋曰『反之』者，以其庶羞十六豆，羞人不足，故先至者反取之。下文云：『先者一人升，設于稻南，其人不反。』則此云『先者反之』，謂第二以下爲先者也。」《校勘記》云：「此『釋曰』以下五十五字是疏，誤作注。《通解》載此疏於下節注下。」盛氏云：「此節疏，監本誤作注，置諸『先者反之』之下。」今案：首有「釋曰」二字，爲疏文無疑。嚴本及陳單注本俱無此注，從之。○由門入，升自西階，亦以庶羞在饗，由門外人，與大羹湑由門入，升自阼階同。但彼授公，故升自阼階，此自西階爲異耳。注云「庶羞多，羞人不足，則相授於階上，復出取也」者，此釋經「先者反之」之文也。但「反之」有二義，張氏惠言以爲有反取之階上者，有反取之門外者，其說甚是。據注言「授於階

上，復出取也」，是反取之門外者。但授於階上，必有受而設之堂上者，其既設則反取於階上。下文「先者一人升，設於稻南」，是反取之階上者。「衆人騰羞者盡階，不升堂」，是反取之門外者。此經「先者反之」，乃統論進庶羞之事。羞多人少，則有反之之法，實兼二者在內。賈疏謂「先者一人升，設於稻南」，其人不反，固誤；謂先者反之爲第二以下，尤泥。至敖氏疑「先者反之」爲失次，盛氏謂當在「升自西階」之下，則皆非也。先者一人升，設于稻南簋西，間容人。簋西，黍稷西也。必言稻南者，明庶羞加，不與正豆併也。間容人者，賓當從間往來也。【疏】正義曰：先者一人升，設於稻南，既設則反取於階上，又以設也。注云「必言稻南者，明庶羞加，不與正豆併也」者，敖氏云：「稻乃加食，其位不與正饌併。而庶羞又設于稻南，明庶羞亦爲加，不與正豆併也。併謂同爲一處。唯云「正豆」者，以其器同也。」云「間容人者，賓當從間往來也」者，賈疏云：「下文「賓左擁簋梁，右執滫以降，公辭，升，反奠於其所」，是賓往來也。」今案：經言「簋西」者，以庶羞與簋並列，庶羞在簋之西，其中間有餘地可以容人。上文公設梁于滫西，賓又遷之于其西，則滫西梁東之間亦可容人往

來也。旁四列，西北上。不統於正饌者，雖加，自是一禮，是所謂「羹載中別」。【疏】正義曰：注「一禮」，《集釋》作「一體」。「旁四列」，「旁」字有數解。敖氏云：「旁者，見正饌之中席，而此在旁也。」郝氏敬云：「正饌堂中，庶羞偏西，故曰旁。」褚氏云：「腳膳直稻南，而腳稍偏西，膳稍偏東。膳牛炙直梁南，而膳稍偏西，牛炙稍偏東。每兩豆當一簋，若在旁然，故云「旁四列」。」今案：「旁」字當以偏西之說爲是，但云「正饌堂中」尚未明析。蓋正饌設於堂中以東，加饌設於堂中以西，此其大分也。今庶羞不正當堂中以西，而又偏於西，是以謂之旁耳。庶羞十六豆，四豆爲列，故云「四列，西北上」，與簋之言東北上者同，蓋亦自北而南陳也。云「是所謂「羹載中別」者，「羹載中別」，《管子·弟子職》文。李氏云：「《曲禮》曰：『左殺右載。』殺，骨體也，爲正饌。載，切肉也，爲庶羞。肉謂之羹，羹則設殺也。正饌在東，庶羞在西，羹載中別也。」惠氏棟云：「《弟子職》曰：『凡置彼食，鳥獸魚鼈，必先菜羹。羹載中別，載在醬前，其設要方。』羹者，菜羹，即銅羹也。」今案：李以羹爲大羹，惠以羹爲銅羹，皆屬正饌，在庶羞之東，中間有餘地，不相連接，是所謂「中別」也。腳以東

臠、臠、牛炙。臠、臠、臠，今時臠也。牛曰臠，羊曰臠，豕曰臠，皆香美之名也。古文「臠」作「香」，「臠」作「薰」。

【疏】正義曰：注「古文臠作香」，「臠」，閩本誤作「臠」。○此自西而東，爲北之第一列，所謂西北上也。牛炙，炙牛肉也。注云「臠、臠、臠，今時臠也。牛曰臠，羊曰臠，豕曰臠，皆香美之名也」者，臠即無菜之肉羹，義詳《聘禮》。云

「古文「臠」作「香」，「臠」作「薰」者，胡氏承珙云：「古人以臠爲香美，故即以香名牛臠，薰名羊臠。小篆以後乃有臠、臠二字，爲牛臠、羊臠之專稱，以別於香薰，故《說文》不載。」今案：《禮記·內則》亦作「臠」，是經典承用已久，故鄭從今文。又胡氏引注作「熏」，嚴本及各本俱作「薰」，

今仍之。炙南臠，以西，牛臠、臠、牛臠。先設臠，紵之以次也。《內則》謂臠爲臠，然則臠用臠。今文

「臠」作「臠」。【疏】正義曰：注「紵之以次也」，「紵」，閩、葛俱誤作「靜」。「內則謂臠爲臠」，《校勘記》云：「張氏曰：

「注曰肉則謂臠爲臠。案：監本肉作內，從監本。」「臠」，徐、陳俱作「會」，張淳、《通解》、楊、敖俱作「臠」。然則臠用臠，徐本「臠」作「臠」，誤。《集釋》上句作「臠」，此句作「臠」。今案：嚴本與《集釋》同。黃氏丕烈云：「臠」當作「臠」，從魚誤也。」○此自東而西爲第二列也。注云「先

設臠，紵之以次也」者，李氏云：「臠配臠而卑於臠。今設之臠上者，欲既設之五臠相錯也。」今案：注言紵者，紵，屈

也，詳《士喪禮》。此設庶羞，一列，自西而東，二列，自東而西，是屈陳之也，三列、四列亦然。必先設臠者，以先設臠，

再設牛臠；又設臠，再設牛臠，二臠相間而設，乃得其次也。云「內則謂臠爲臠，然則臠用臠」者，此經所陳庶羞

與《內則》同，《內則》有牛臠，無牛臠，則是謂臠爲臠也。既謂臠爲臠，則其臠用臠爲之明矣。《說文》：「臠，魚臠醬

也。」段氏云：「醬」字衍。臠者，豕肉醬也，引申爲魚肉醬，則偶魚臠可矣。《公食禮》牛臠，注曰「內則臠爲臠，

然則臠用臠」，謂此經之牛臠即《內則》之牛臠也。聶而切之爲臠，更細切之則成醬爲臠矣。臠者，臠之最細者也。

牛得名臠，猶魚得名臠也。鄭曰「今文臠作臠」，案：臠是假借字，《說文》有耆無臠。胡氏承珙云：「段說是也。《爾雅》：「魚謂之臠。」郭注以爲臠屬。《廣雅》：「臠，煮也。」

是臠本魚煮之類，故《說文》「臠」下即次以「煮」，云「藏魚也」。《釋名》云：「酢菹也，以鹽米釀魚爲菹，熟而食之

也。」牛亦名臠者，古人有以藏魚之法施於牛肉，故亦借臠

①「酢」，《釋名》作「酢」。

名耳。「今文『鮓』作『鮓』者，《少儀》「夏右鮓」，注云「鮓脊也」。蓋牛鮓之鮓，依《禮記·內則》本當爲牛膾，《儀禮》借魚酢之鮓爲膾者，以其義近。今文又借魚脊之鮓爲鮓者，則以其聲同耳。○褚氏云：「鮓，猶膾也。羊豕無膾，魚無炙載，牛是大牲，故三者兼有。」鮓南羊炙，以東羊載、醢、豕炙。【疏】正義曰：此自西而東爲第三列也。

炙南醢，以亞豕載、芥醬、魚膾。芥醬，芥實醬

也。《內則》曰：「膾，春用蔥，秋用芥。」【疏】正義曰：此自東而西爲第四列也。以上十六豆與《內則》所云膳者同，惟「臠牛炙」間，《內則》多一「醢」字，鄭注以爲衍文。郝氏敬云：「終魚膾始臠，所謂西北上也。」衆人騰羞者盡階，不升堂，授，以蓋降出。騰，當作「賡」，賡，送

也。授，授先者一人。【疏】正義曰：注「授先者一人」，監本「一人」二字誤作經在下節首。○盛氏云：「衆人，自先者一人而外也。士騰羞者雖衆，而升堂設之者，唯最先一人而已，其餘則以授於西階上也。」今案：盛氏又謂先者一人不反，非。蓋先者一人雖不反於門外，亦必反於階上，受而復設也。上文「先者反之」，實兼一人在內，義詳前。「以蓋降出」者，謂豆既授，先者一人乃以蓋降階出廟門，與宰

之執鐙授公，以蓋降出者同。王氏士讓云：「騰羞者不升堂而授，即所謂『堂事交乎階』也。」注云「騰當作賡，賡，送也」者，胡氏承琪云：「《燕禮》「賡饌」，今文「賡」皆作「騰」者，以《禮記》亦作「揚饌」，「騰」與「揚」皆訓舉，故「賡」或作「騰」。此「騰羞」者，衆人遞相傳送，祇當作「賡」，自以鄭注爲正。敖氏謂騰取自下而上，郝氏解騰爲升，皆非也。」○以上士羞庶羞，加饌之二。○《儀禮糾解》云：「加饌，梁最先設，次則稻由房出，羞自階升。」又云：「正饌之列，其在東之東者，以西爲上，豆與俎是也，其在東之西者，以東爲上，鉶與簋是也。加饌之列，其在西之北者，以東爲上，梁與稻是也，其在西之南者，以西爲上，庶羞是也。」陳饌之間，亦必相變如此。贊者負東房，告備于公。復告庶羞具者，以其異饌。【疏】正義曰：注「復告」，徐本「復」作「隨」。今案：嚴本、《集釋》、《通解》、楊、敖俱作「復」。云「復告庶羞具者，以其異饌」者，前設正饌云「告具于公」，鄭意蓋以「備」與「具」爲同義。敖氏則謂此言「備」者，備周於具。《禮經釋例》云：「備即是具，似不必分別。若謂備周於具，不應加饌反周於正饌也。」○《釋例》又云：「凡正饌先設，用黍稷俎豆，加饌後設，用稻粱庶羞。案：《公食禮》正饌：公設醢醬，宰夫薦豆，士設俎，

宰夫設黍稷。大羹涪，公設之。宰夫設鉶，飲酒實于觶。

《士虞禮》設饌陰厭：贊薦菹醢，俎人，設于豆東，贊設二敦于俎南，設一鉶于豆南。《特牲禮》設饌陰厭：主婦薦兩豆，俎人，設于豆東，主婦設兩敦黍稷于俎南，兩鉶匕設于豆南，祝酌奠設于鉶南。《少牢禮》設饌陰厭：主婦薦豆，佐食設俎，主婦設黍稷，祝酌奠。皆正饌先設，用俎豆也。《公食禮》加饌：公設飯梁，宰夫膳稻，士羞庶羞。《士虞禮》尸人九飯時：「大羹涪自門人，設于鉶南，載四豆，設于左。《特牲》尸人九飯時：「設大羹涪于醢北，佐食羞庶羞四豆，設于左，南上，有醢。」注：「庶，衆也。衆羞以豕肉，所以爲異味。四豆者，醢、炙、載、醢。」《少牢》尸人十一飯時：「上佐食羞兩鉶，又羞載兩瓦豆，有醢，亦用瓦豆，設于薦豆之北。」注：「設於薦豆之北，以其加也。」皆加饌後設，用庶羞也。《公食》大羹涪在正饌，《士虞》、《特牲》大羹涪在加饌。《公食》加饌有稻粱，《士虞》、《特牲》、《少牢》加饌無稻粱。賓客之禮與祭祀之禮相變也。《公食》、《士虞》、《特牲》鉶羹皆在正饌，《少牢》鉶羹在加饌者，《少牢》無大羹，故以鉶羹易之也。《聘禮》歸饗餼：「腳臠醢蓋陪牛羊豕。」注：「陪之，庶羞加也。」堂上及兩夾之饌，設鉶畢，始設簠。注：「簠不次簠者，稻粱加也。」是加饌有稻粱，與《公

食》同也。《士昏》無加饌者，尚質也。」

右爲賓設加饌

贊升賓。以公命命賓升席。【疏】正義曰：李氏

云：「公不揖食，加饌禮殺。」注云：「以公命命賓升席」

者，敖氏云：「升賓之辭，蓋曰：『吾子其升也。』」賓坐席

末，取粱，即稻，祭于醬涪間。即，就也。祭稻粱

不於豆祭，祭加宜於加。【疏】正義曰：注「不於豆祭」，《集

釋》、毛本「於」作「以」，陳本重「以」字，皆誤，嚴本、楊氏俱

作「於」。「祭加宜於加」，嚴本、《集釋》、《通解》、楊氏俱同，

徐本「加宜」二字誤倒，陳本脫「宜」字。○敖氏云：「坐席

末」者，就加饌也。「取粱，即稻」，言不反粱於左手也。」

注云「祭稻粱不於豆祭，祭加宜於加」者，張氏爾岐云：「醬

涪不得言加，注偶誤。粱是公所親設，醬涪亦公所親設，公

設是饌尊處，故祭粱不於豆而於此耳。」今案：張說是也。

褚氏又謂下降時取粱涪，徹時取粱醬，皆是重公親設之意，

與此祭於醬涪間同。贊者北面坐，辯取庶羞之

大，興，一以授賓。賓受，兼壹祭之。壹壹受

之，而兼一祭之，庶羞輕也，自祭之于腳臠之間，以異饌也。

【疏】正義曰：注「壹壹受之，而兼一祭之」，嚴本及各本同，《集釋》「壹壹」作「一一」，「兼一」作「兼壹」，與經合，今從《集釋》。○前云「庶羞皆有大」，此贊者坐而辯取之，興以授也。張氏爾岐云：「一以授賓」者，品授之也。「兼壹祭之」者，總祭之也。」褚氏云：「贊者所授賓祭者三，正饌則黍稷也，三牲之肺也，加饌則庶羞之大也。經於黍稷則曰「辯以授賓，賓祭之」，是黍稷總授賓，賓總受而總祭也，故曰「辯以授」也。於肺則云「辯取之，一以授賓，賓受坐祭」，是三次授賓，三次祭也，故不云「辯以授」也。于「庶羞之大」則云「一以授賓，賓受，兼壹祭之」，是大亦逐一授賓，賓則逐一受之而總祭之也，故云「兼」也。立文不同，注據經爲解，不可破。正饌豆實祭於上豆之間，大是加饌豆實，宜祭於加饌上豆之間。注云「祭於腳臠間」，亦是也。祭醬飲亦於是處可知。」今案：敖氏謂黍稷牲肺皆壹祭之，又謂祭大亦於醬滯間，皆與注異，褚氏駁之是也。注云「庶羞輕也」者，對三牲之肺而言。賓降拜。拜庶羞。公辭。賓升，再拜稽首。公荅再拜。【疏】正義曰：正饌，公再拜揖食，賓降拜。是公先拜，賓荅拜。此則賓先拜，公荅拜，亦以禮殺故也。

右賓祭加饌

賓北面自間坐，左擁簠梁，右執滯以降。自間坐，由兩饌之間也。擁，抱也。必取梁者，公所設也。以之降者，堂尊處，欲食於階下然也。【疏】正義曰：「左擁簠梁」，監本「左」誤作「右」，「擁」誤作「擯」，毛本亦誤「擯」。徐本、楊氏、毛本「簠」俱誤作「簠」，唐石經、嚴本、《集釋》、《通解》、敖氏俱不誤。《石經考文提要》云：

「《曲禮》「執食興辭」，注引《公食禮》正作「左擁簠梁」。」

注云「自間坐，由兩饌之間也」者，謂正加兩饌之間，即上經所云「問容人」，注謂「賓當從間往來」是也。但彼爲設庶羞，故在簠西炙東之間，此則當在滯西梁東之間，爲微異耳。云「擁，抱也」者，《說文》同。段氏云：「抱之則物必在前。」云「必取梁者，公所設也」者，梁滯皆公所親設，故必取之以降。注不言滯，省文耳。云「以之降者，堂尊處，欲食於階下然也」者，爲堂上尊處，公立於堂，故不敢坐食於席而降階下，示欲食於此也。公辭。賓西面坐奠于階西，東面對，西面坐取之，栗階升，北面反奠于其所，降辭公。奠而後對，成其意也。降辭公，

敬也。必辭公者，爲其尊而親臨已食。侍食，贊者之事。

【疏】正義曰：敖氏云：「公辭者，止其降於下也。」^①階西，賓所欲食之處也，故於此奠之。對者，釋其所以降之意。」

蔡氏云：「既對君，坐取梁滂，升奠於原所，從君命也。」盛

氏云：「反奠于其所者，奠滂於醬西，奠梁於滂西也。」《三

禮札記》云：「前公降一等而賓栗階，此公不從降而亦栗階

者，臣禮彌恭也。」○注「侍食」，監本「侍」誤「待」。^②云「奠

而後對，成其意也」者，賈疏云：「成其降食階下之意，^③故

奠乃對。此決下文大夫相食，賓執梁與滂之西序端，主人

辭，賓反之而不奠也。」云「降辭公，敬也」者，謂既栗階升

矣，乃不於堂上辭公而必降而辭，是致其敬也。云「必辭公

者，爲其尊而親臨已食。侍食，贊者之事」者，以侍食是贊

者之事，若以公之尊而親臨已食，則與贊者無異，故不敢當

也。《曲禮》曰：「客若降等，執食興辭。」亦辭主人之臨已

食也。《禮經釋例》云：「凡公親臨食，必辭之。《公食禮》

賓初食，「降辭公，公許，賓升，公揖退于箱」。辭公故也。

又賓卒食，「降辭公，如初。賓升，公揖，退於箱」。是公親

臨食，必辭之也。」今案：公退于箱者，因賓辭而避於此耳。

公許，賓升，公揖，退于箱。箱，東夾之前，俟事之

處。【疏】正義曰：注云「箱，東夾之前，俟事之處」者，案：

公暫退東箱，以俟賓食，故注以爲俟事之處，互詳《覲禮》
記「凡俟于東箱」下。擯者退，負東塾而立。無

事。賓坐，遂卷加席，公不辭。贊者以告公，公聽

之，重來，優賓。【疏】正義曰：卷，加席，不敢居隆禮也。公

不辭，以其降等也。吳氏《疑義》云：「至此始卷加席，則前

所謂坐即跪耳。古者跪亦稱坐。」注云「贊者以告公，公

聽之」者，斯時公猶在箱，明是贊者以告公，而公聽之也。

云「重來，優賓」者，張氏爾岐云：「公聽之而不輕來，所以

優賓，使不煩勞也。」賓三飯，以滂醬。每飯，歡滂，以

肴搗醬，食正饌也。三飯而止，君子食不求飽，不言其肴，

優賓。【疏】正義曰：注「以肴搗醬」，嚴、徐、陳本、《通解》、

楊氏俱作「肴」，下同。《集釋》、毛本俱作「殺」，閩、葛於此

作「殺」，下「不言其肴」又作「肴」。案：《校勘記》云：

「案：『殺』者，相雜錯也，俗借爲『肴饌』字，作『肴』爲

是。」云「每飯，歡滂，以肴搗醬，食正饌也」者，賈疏云：

「滂言歡，淡故也。醬言搗，鹹故也。」李氏云：「飯，飯梁

①「降」，《儀禮集說》作「食」。

②「侍」、「待」，原作「待」、「侍」，今據文意乙正。

③「降食」，《儀禮注疏》作「食降」。

也。《禮經釋例》云：「凡賓初食加饌之稻粱，則用正饌之俎豆。卒食正饌之黍稷，則用加饌之庶羞。」案：《公食禮》簠粱即前設加饌時公所親設之飯粱也，涪即前設正饌時公所親設之大羹涪也，醬即前設正饌時公所親設之醢醬也。加饌之簠粱、正饌之涪與醢醬，皆公所親設，故先食之。言粱則兼稻，言涪醬則兼俎豆，經不言者，非公親設故也。此食加飯也。又：「賓卒食會飯，三飲。」注：「會飯謂黍稷。」此食黍稷，則初時食稻粱。又云：「不以醬涪。」注：「不復用正饌也。初時食加飯用正饌，^①此食正飯用庶羞，互相成也。後言涪，或時後用。」此食正飯也。考注云加飯即稻粱也，正饌即俎豆也，正飯即黍稷也。賓初食用加飯之稻粱，佐以正饌之俎豆；卒食用正飯之黍稷，佐以加饌之庶羞，故云「互相成也」。云「三飯而止，君子食不求飽」者，禮成於三，不求多也，故引《論語》以證之。蔡氏云：「三飯，以手三舉飯食也。」《禮經釋例》云：「凡食禮，初食三飯，卒食九飯。」案：《公食禮》：「賓三飯以涪醬，宰夫執觶漿飲與其豐以進。」又云：「賓坐祭，遂飲，奠于豐上。」三飯則一飲，是初食三飯也。又賓受侑幣出，復入門左，揖讓，升，卒食會飯，三飲，不以醬涪。吳氏廷華云：「上三飯乃飲，此三飲則九飯也，合正食則十二飯矣。」是卒食九飯也。初食

在侑幣前，故三飯；卒食在侑幣後，故九飯也。」云「不言其肴，優賓」者，賈疏云：「案：《特牲》、《少牢》尸食時舉肴，皆言次第，此不言者，任賓取之，是優賓也。」或以此經但云「以涪醬」，不云「食肴」為疑。褚氏云：「諸禮凡食飯無不食舉者，故注云然。」案：《周官·司儀》，食禮有舉數，以次差之，大夫當三舉，則食舉明矣。宰夫執觶漿飲與其豐以進。此進漱也，非為卒食，為將有事，緣賓意欲自潔清。【疏】正義曰：漱，旁從欠，不從攴。「觶漿飲」者，謂漿飲盛於觶也。蔡氏云：「觶，即前所實酒觶。漿飲，即前俟於東房之漿飲。」江氏筠云：「經云『執觶漿飲與其豐以進』，則是一手執觶漿飲，一手執豐也。若此觶為酒觶，而又別有漿飲，如何一手可執？且前祭正饌時，已祭飲酒於上豆之間矣，何下文又云『坐祭』乎？則此觶明是盛漿之觶，所謂『其豐』即盛漿觶之豐也。」○《儀禮紉解》云：「正饌用酒，宰夫執觶執豐，^②奠于豆東，賓亦既祭矣。加饌用漿，俟于東房，未設也。至是而後執以進，亦取其相變。」賓挽手，興受。受觶。【疏】正義曰：「挽」，唐石

① 「時」，原作「特」，今據《禮經釋例》改。

② 「宰夫」下，《儀禮紉解》有「已」字。

經初從木，後改從手。宰夫設其豐于稻西。酒在

東，漿在西，是所謂「左酒右漿」。【疏】正義曰：經但云「設豐」不云「饌」者，斯時饌在賓手也。注云「酒在東，漿在西」者，案：此設豐於稻西，與前執饌執豐設於豆東者正相對。飲酒從正饌在東，漿飲從加饌在西也。云「是所謂「左酒右漿」者，「左酒右漿」，《管子·弟子職》文。注「所謂」二字，正指《管子》書言也。案：《弟子職》曰：「載在醬前，其設要方，飯是為卒，左酒右漿。」《曲禮》「酒漿處右」，鄭注：「處羹之右。」此言若酒若漿耳，兩有之則左酒右漿，亦據《弟子職》言。《曲禮》注及此注俱作「左酒右漿」，今本《管子》「漿」作「醬」，恐誤。

庭實設。乘皮。賓坐祭，遂飲，奠于豐上。飲，漱。【疏】正義曰：賓，徐本作「實」，誤。○《儀禮紉解》云：「宰夫設豐之後，賓遂坐祭而飲矣。而先言「庭實設」者，著有司設庭實之節也。《玉藻》曰：「水漿不祭，若祭為已俵卑。」而此乃祭漿者，臣禮也，故彼注云：「臣於君則祭之。」注云「飲，漱」者，謂飲漿以漱也。《說文》：「漱，盪口也。」蔡氏云：「坐祭遂飲，飲酒漿也。」兼酒言之，非，辨見前。

右賓食饌三飯

公受宰夫束帛以侑，西鄉立。束帛，十端帛也。侑，猶勸也。主國君以為食賓，殷勤之意未至，復發幣以勸之，欲用深安賓也。西鄉立，序內位也。受束帛於序端。【疏】正義曰：注「復發幣以勸之」，閩本「幣」誤作「弊」。云「束帛，十端帛也」者，詳《士冠禮》「主人酬賓」下。云「侑，猶勸也」者，《詩·楚茨》《毛傳》：「侑，勸也。」是時賓三飯而止，有告退之意，故以束帛侑食也，詳《聘禮》「致食以侑幣」下。云「西鄉立，序內位也」者，即前公立於序內西鄉之位。云「受束帛於序端」者，約《聘禮》「公受几于序端」而知之。敖氏謂受束帛於東箱，褚氏云：「賓既飲，則公出自箱立於序端矣。於是宰夫以束帛授公，而公受之，非受於東箱也。」賓降筵北面。以君將有命也。北面於西階上。【疏】正義曰：注「北面於西階上」，嚴本、敖氏俱無「西」字。徐本、《集釋》、《通解》、楊氏俱有，似有者是。云「以君將有命也」者，謂主君將有侑食之命也。云「北面於西階上」者，降筵而立於此，待君命也。擯者進相幣。為君釋幣辭於賓。【疏】正義曰：此下與《聘禮》禮賓大略相同，解見《聘禮》。注云「為君釋幣辭於

賓者，言爲君釋侑幣之辭於賓也。盛氏疑「幣」爲衍文，非。賓降辭幣，升聽命。降辭幣，主國君又命之，升，聽命，釋許辭。【疏】正義曰：注云「降辭幣，主國君又命之，升」者，約《聘禮》禮賓，賓降辭幣，公降一等辭，賓栗階升「知之。此不言公降一等辭及栗階者，省文耳，非脫也。降拜。當拜受幣。公辭，賓升，再拜稽首，受幣，當東楹，北面。主國君南面授之，當東楹者，欲得君行一，臣行二也。【疏】正義曰：「君行一，臣行二」，詳《聘禮》。退，西楹西，東面立。俟主國君送幣也。退不負序，以將降。【疏】正義曰：注云「俟主國君送幣也」者，謂俟主國君拜送幣也。《聘禮》禮賓：「退，東面俟。」注：「俟君拜也。」義與此同。云「退不負序，以將降也」者，《聘禮》「賓三退，負序」，此云「西楹西」，即西階上，故知不負序以將降也。公壹拜，賓降也，公再拜。賓不敢俟成拜。【疏】正義曰：注云「賓不敢俟成拜」者，謂不敢俟公再拜即降。介逆出。以賓事畢。【疏】正義曰：郝氏敬云：「介逆出，先賓出也。介在門西，北面西上，近門者先出，故曰逆也。」方氏苞云：「公食賓，介有事焉，而公絕不與爲禮，何也？以介當特受食也。」賓北面揖，執

庭實以出。揖執者，示親受。公降立。俟賓反。上介受賓幣，從者訝受皮。從者，府史之屬。訝，迎也。今文曰「梧受」。【疏】正義曰：「上介受賓幣」，受於門外也。「從者訝受皮」，謂主國有司執皮者從賓出，賓從者訝受之也。注云「從者，府史之屬」者，《聘禮》禮賓：「上介受賓幣，從者訝受馬。」注：「從者，士介。」彼大聘使卿，上介是大夫，故知從者爲士；此小聘使大夫，上介是士，故知從者爲府史之屬也。云「訝，迎也」者，謂對面受也。云「今文曰「梧受」者，案：今文以「訝」爲「梧」，①已詳《聘禮》「禮賓」節。

右公以束帛侑賓

賓入門左，没雷，北面再拜稽首。便退則食禮未卒，不退則嫌，更入行拜，若欲從此退。【疏】正義曰：「没雷」，徐本「没」作「汲」，誤。○敖氏云：「雷，門內雷也。没雷，庭南也。没雷而拜，以公立於中庭也。」張氏爾岐云：「没雷，門簷雷盡處。」注云「便退則食禮未卒，

①「文」，原作「又」，今據上下文意改。

不退則嫌」者，謂有貪食之嫌。云「更人行拜，若欲從此退」者，是注以此拜爲告退也。吳氏《疑義》云：「食禮未畢，理應復入。賓之入門，所以終食禮也。其再拜稽首，則即下『升，賓再拜稽首』注所謂『拜主國君之厚意』也。蓋公既侑賓，賓出，公即降立中庭，以待賓反，其意良厚，故入門即拜之。因君辭其拜，故升堂再拜。敖氏謂賓拜於庭南，公辭之乃升而成拜，是也。則上下兩『再拜稽首』只是一事，注分而爲二，是以失之。」今案：吳說是也。又敖氏以此拜爲謝侑幣，褚氏辨之云：「《聘禮》禮賓，於授幣後亦曰『公壹拜，賓降也。公再拜，賓執左馬以出』。下遂行覲，竝未更入門而行再拜稽首禮也。然則此禮之拜，敖以爲謝侑幣，非。凡飲食無論酒與幣皆賓先拜受，而後主人拜送，無送後復拜謝之禮。」案：褚說亦是也。公辭。止其拜，使之卒食。揖讓如初。如初人也。升，賓再拜稽首，公荅再拜。賓拜，拜主國君之厚意，賓揖介入復位。

【疏】正義曰：注云「賓拜，拜主國君之厚意」者，說已詳上。云「賓揖介入復位」者，上文云「介逆出」，下更云「介逆出」，知中間介復入明甚，其賓揖之使人當在入門時，注於此補言之。賓降，辭公如初。將復食。【疏】正義曰：注「食」

字，毛本誤作「入」，嚴本、《集釋》及張氏敦仁所刻注疏本俱作「食」。○賓降辭公，亦辭公之臨已食也，詳見前。賓

升，公揖退于箱。賓卒食會飯，三飲。卒，已

也。已食會飯，三漱漿也。會飯謂黍稷也。此食黍稷，則初時食稻粱。【疏】正義曰：注云「已食會飯，三漱漿也」

者，謂三飲漿以漱口也。敖氏云：「晁者三飯乃飲，此凡三飲，蓋九飯也。後禮更端，故與前三飯不相蒙。」是也。又

云：「食加飯而飲漿，則此所飲者其酒與？」褚氏云：「下大夫禮不得飲酒，注謂『漱漿』是也。敖說誤。」江氏筠云：

「鄭以凡奠者於左，此陳設左酒右漿，則酒明係不舉，故謂實用漿醕口也。」云「會飯謂黍稷也」者，張氏爾岐云：「上文宰夫設黍稷云啓會，是簠兼會設之。稻粱不言啓會，是簠不兼會，故經以黍稷爲會飯也。」今案：敖氏謂：「減簠飯於會而食之，故云會飯。」乃臆說，不可從。云「此食黍

稷，則初時食稻粱」者，案：初時賓三飯未言稻粱，故注推而明之。然據上文云「左擁簠粱」，則賓三飯食稻粱，亦可見也。不以醬涪。不復用正饌也。初時食加飯用正

饌，此食正飯用庶羞，互相成也。後言涪者，涪或時後用。

【疏】正義曰：注「互相成也」，徐、陳本「成」俱作「後」，誤。

「後言涪」下，嚴本、楊氏俱有「者涪」二字，今本無。云「不復用正饌也」者，醬涪，正饌也。不用正饌，則用庶羞可知，故注又云：「初時食加飯用正饌，此食正飯用庶羞，互相成也。」義詳前「賓三飯以涪醬」下。楊氏復云：「用庶羞，經無其文，若可疑者。據下文『上大夫庶羞。酒飲漿飲，庶羞可也』，注云：『於食庶羞，宰夫又設酒漿，以之食庶羞可也。』以彼證此，恐云食會飯有三飲，①亦食庶羞。此注所以有互相成之義也。」云「後言涪者，涪或時後用」者，賈疏云：「前文賓三飯以涪醬，先言涪，後言醬，是先用涪。此後言涪，或容前三飯後用涪，故作文有先後也。」盛氏云：「案：上文以涪醬，據其用之之序言也。此既不用之，故惟據所設之序而言。注疏說非是。」今案：盛說似亦可從。

右賓卒食

挽手，興，北面坐取梁與醬以降，西面坐奠于階西。示親徹也。不以出者，非所當得，又以已得侑幣。【疏】正義曰：「奠于階西」，西階下之西也，即向者賓欲降食之處。注云「示親徹也」者，賓於食畢，取

梁與醬以降，是示親徹之意。公於正饌先設醬，加饌先設梁，獨取二者，固以公親設之故，亦示二饌兼徹也。云「不以出者，非所當得」者，當得則三牲之俎是也。云「又以已得侑幣」者，謂已得侑幣，故不取饌出也。《士昏》賓取脯出，是所當得者。《玉藻》曰：「君既徹，執飯與醬乃出，授從者。」鄭注：「食於尊者之前，當親徹也。」孔疏：「此經食不客，故君既徹之後，執飯與醬乃出授從者。若君與己禮食，則但親徹之，不敢授己之從者也，故《公食禮》：『賓北面坐取梁與醬以降，西面坐奠於階西也。』若非君臣但降等者，則徹以授主人相者，故《曲禮》云：『客若降等。』又云：『卒食，客自前跪徹飯齊以授相者。』注云：『相者，主人贊饌者。』若賓主敵者，則徹於西序端，故《公食禮》：『大夫自相食，徹於西序端。』注云：『亦親徹。』是也。」案：《玉藻》疏言「徹」義頗詳，故竝錄之。東面再拜稽首。卒食拜也。不北面者，異於辭。【疏】正義曰：敖氏謂此亦拜於階西，不於階東。褚氏云：「既奠於西階西，乃進至階東，東面拜。凡西階下之拜無有在階西者，敖說不可從。」注云「卒食拜也」者，言此再拜稽首為卒食拜也。云「不北

①「云」，疑衍。「飲」，原作「飯」，據上經文改。

面者，異於辭」者，褚氏云：「注意專對沒雷北面之拜而言。」今案：鄭以沒雷北面之拜爲辭退，故云「異於辭」也。或曰：以公從而降在東方，故賓東面拜也。公降再拜。荅之也，不辭之使升堂，明禮有終。【疏】正義曰：敖氏云：「公拜亦西面於阼階下。」此說是也。方氏苞云：「食禮既終，賓拜稽首於階下，自同於本國之臣也。公降而荅拜，使賓無庸復升，終不敢以臣禮待之也。」介逆出，賓出。公送于大門內，再拜。賓不顧。初來揖讓，而退不顧，退禮略也，示難進易退之義。賓者以賓不顧告公，公乃還也。【疏】正義曰：「介逆出」，徐本「逆」作「迎」，誤。注云「賓者以賓不顧告公，公乃還也」者，還，謂自廟還路寢也，詳《聘禮》「賓出，公再拜送，賓不顧」下。

右禮終賓出

有司卷三牲之俎，歸于賓館。卷，猶收也。無遺之辭也。三牲之俎，正饌尤尊，盡以歸賓，尊之至也。歸俎者實於筐，它時有所釋故。【疏】正義曰：禮終賓出之後，尚有一事：歸俎實於賓館，一也。賓拜賜，二也。○注「尊之至也」，嚴本無「也」字。「他時有所釋故」，《釋文》作

「它」，云「本又作『他』」。嚴本、《集釋》作「它」，今本作「他」。注云「卷，猶收也。無遺之辭也」者，卷與捲同。云「歸俎者實於筐」者，吉祭有所俎，虞祭無之，尸舉牲體皆盛於筐。此歸俎者，亦是實於筐以歸之也。敖氏謂盡以其俎與其實歸之，褚氏云：「歸饗餼用鼎不用俎，俎乃行禮時設之，不以遣人。注用筐之說爲長。」方氏苞云：「卷者，振取俎實而置於筐也。敖氏謂并以俎歸，則其文當曰：『以三牲之俎歸於賓館。』」今案：褚、方之說是也。云「它時有所釋故」者，案：《特牲》、《士虞》皆云：「俎釋三个。」釋，猶遣也，謂留遣以備陽厭，是有所釋也。它時，即指《特牲》、《士虞》言。此食禮無所釋，故三牲之在俎者盡以歸賓也。魚腊不與。以三牲之俎無所釋故也。禮之有餘爲施惠。不言腸胃、膚者，在魚、腊下，不與可知也。古文「與」作「豫」。【疏】正義曰：注云「以三牲之俎無所釋故也」者，謂三牲之在俎者既盡以歸賓，則魚腊細物可不與也。云「古文「與」作「豫」者，詳《士昏禮》。

右歸俎實於賓

明日，賓朝服拜賜于朝。拜食與侑幣，

皆再拜稽首。朝，謂大門外。【疏】正義曰：案：《聘禮》歸饗餼，明日賓拜于朝，拜饗與餼，不拜束帛。此云「拜食與侑幣」，兼拜侑賓之束帛者，賈疏云：「彼使人致之，故不拜。此食禮君親賜，故拜之。」注云「朝，謂大門外」者，此朝即庫門外之朝，注云「大門」即謂庫門也。訝聽之。受其言，入告出報也。此下大夫有士訝。【疏】正義曰：注云「受其言，入告出報」者，詳《聘禮》「賓三拜乘禽于朝，訝聽之」下。云「此下大夫有士訝」者，案：《聘禮》·記曰：「卿，大夫訝；大夫，士訝；士皆有訝。」此聘日主國君所使迎賓於館之訝，非掌訝職也。經云「訝聽之」，乃指謂掌訝之官。鄭以士訝當之，恐非。詳《聘禮》·記「賓既將公事，復見訝以其摯」下。

右賓拜賜

上大夫八豆、八簋、六鉶、九俎，魚腊皆二俎。記公食上大夫，異於下大夫之數。豆加葵菹、蠋醢，四四爲列。俎加鮮魚、鮮腊，三三爲列，無特。【疏】正義曰：此下別言食禮之異者。食上大夫之禮，君不親食之禮，大夫相食之禮，大夫不親食之禮，凡四事。《聘禮》大聘

使卿，上大夫即卿也，故其食之之禮與《聘禮》歸饗於賓者略同。八豆、八簋、六鉶，如其設於堂上者也。九俎，如其飴鼎九也。魚腊皆二俎者，魚腊皆乾鮮各一也。注云「記公食上大夫，異於下大夫之數」者，前食下大夫，六豆、六簋、四鉶、七俎，此上大夫，每加以兩，是其異也。但自此至「雉兔鶉鴛」，皆是言其異者，注蓋總釋之也。云「豆加葵菹、蠋醢」者，葵菹、蠋醢，《周禮》·醢人「饋食之豆也」。其朝事之豆八，下大夫已用其六，仍餘茆菹、麋臠二豆。今鄭不取以足八豆之數，而用饋食之豆者，蓋以《少牢》四豆，韭菹、醯醢、葵菹、蠋醢，兼用朝事饋食二者故也。敖氏則謂豆加茆菹、麋臠，專用朝事之豆。褚氏云：「若純用朝事豆實，與人君禮無別矣，故注參取饋食二豆也。」云「四四爲列」者，上「四」字乃「二」字之誤，八豆分爲二列，每列四豆，故云「二四爲列」也。云「俎加鮮魚、鮮腊，三三爲列，無特」者，褚氏云：「九俎饌法，當依注爲是。不當如敖氏四四爲列而特鮮獸之說。蓋三俎、五俎、七俎，不得方，故須特。三三爲列，則正方矣，何反用特乎？其饌法則北二列仍如七俎，而鮮魚則加在魚南，鮮腊則加在腊南，移膚於腸胃南也。八豆之次，則韭菹以東醯醢、昌本、麋臠，鬱南菁菹，以西鹿臠、葵菹、蠋醢。八簋之次，則六簋仍舊，加黍於稷南，

稷於黍南。六鬴之次，則牛以西羊、豕，豕南牛，牛以東羊、豕。」今案：褚說俱是也。魚、腸胃、倫膚，若九若

十有一，下大夫則若七若九。此以命數爲差也。

九謂再命者也，十一謂三命者也，七謂一命者也。九或上或下者，再命，謂小國之卿，次國之大夫也。^①卿則曰上，

大夫則曰下。大國之孤視子男。【疏】正義曰：注云「此以

命數爲差也」者，謂魚與腸胃、倫膚三者，各俎所載，又以命數爲差也。敖氏云：「其俎數之同者，又以此見尊卑。」是也。云「九謂再命者也，十一謂三命者也，七謂一命者也」

者，賈疏云：「《周禮·典命》公侯伯之卿三命，大夫再命，

士一命，子男之卿再命，大夫一命，士不命。則諸侯之臣，

分爲三等：三命、再命、一命。不命與一命同。此經魚、腸

胃、倫膚亦分爲三等：有十一，有九，有七。則十一當三

命，九當再命，七當一命。」云「九或上或下者，再命，謂小國

之卿，次國之大夫也」者，上句「若九」指上大夫言，下句「若

九」指下大夫言。九有上下之不同者，以小國之卿與大國

之大夫同再命，再命則九。故小國之卿雖與大國之卿同九

俎，而其載於俎者魚、腸胃、倫膚惟用九數，而不用十一；

大國之大夫雖與小國之大夫同七俎，而其載於俎者魚、腸

胃、倫膚亦用九數，而不用七，是以上下大夫同云「若九」

也。云「卿則曰上，大夫則曰下」者，謂卿爲上大夫，大夫爲

下大夫也。云「大國之孤視子男」者，鄭意以上大夫不兼孤

在內，故別言之。賈疏云：「《周禮·典命》大國之孤四命。

又《大行人》云大國之孤執皮帛以繼子男，又云「其他皆視

小國之君」。若然，孤與子男同十三，侯伯十五，上公十七，

差次可知。」褚氏案：《昏禮》疏推魚之數云：「或諸侯十

三，天子十五，與此疏不同。據此經，卿大夫魚數以命數爲

差，則五等諸侯亦必以命數爲差矣。《昏禮》疏言「或」，疑

詞耳。陳氏祥道反據彼舍此，舛矣。若以此推天子魚數，

其十九與？庶羞，西東毋過四列。謂上下大夫也。

古文「毋」爲「無」。【疏】正義曰：「毋過四列」，監本「毋」爲

「母」。注「古文毋爲無」，鍾本「爲」作「作」，嚴本及各本俱

作「爲」。注云「謂上下大夫也」者，案：列即行也，下大

夫庶羞十六豆，東西四行，南北亦四行；上大夫庶羞二十

豆，東西四行，南北則五行，故經獨云「西東毋過四列」，以

南北可過，而西東必不可過。若過四列，則簋炙間不能容

人，有礙往來矣。西東，謂設之以西爲上，自西而東毋過四

列也。敖氏解爲西列東列，恐非。云「古文「毋」爲「無」

① 「次」，原作「大」，今據《儀禮注疏》及下疏文改。

者，詳《士昏禮》。上大夫，庶羞二十，加于下大夫以雉、兔、鶉、鴛。鴛，無母。【疏】正義曰：下大夫庶羞十六豆，已詳列於前。上大夫庶羞二十，其十六者與下大夫同，所加四豆則以雉、兔、鶉、鴛也。《內則》曰：「雉兔鶉鴛」，鄭注《公食禮》以鶉爲鴛。敖氏云：「西東毋過四列，則是四者爲一列於南也。」注云「鴛，無母」者，《爾雅》作「鴛母」，《說文》作「牟母」。無、鴛、牟三字，古讀音近通借。賈疏據《莊子》「田鼠化爲鶉」，《月令》「田鼠化爲鴛」，以鴛、鶉爲一物。今案：《詩》「鶉之奔奔」，鄭箋：「言其居有常匹，飛則相隨。」與鴛本非同類。此經鶉、鴛並列，《內則》鶉羹與鴛醢異名，明係兩物。段氏《說文注》云：「《內則》、《爾雅》皆鶉、鴛並舉，則不可云鴛即鶉。」是也。「雉、兔」，鄭無注，案：《曲禮》「雉曰疏趾，兔曰明視」，用於祭，亦用於賓也。《說文》說雉有十四種，又云：「兔，獸也，象兔踞後其尾形。」段氏注云：「其字象兔之蹲後露其尾之形也。」《說文》又曰：「兔頭與兔頭同。」此云「鴛」，《內則》云「鶉」，不同者，鶉亦作鴛。《爾雅·釋鳥》：「鶉，鴛。」郭注：「今鴛雀。」《國語》韋注：「鴛，小鳥也。」《內則》又曰：「爵鶉蜩范。」以鶉爲人君燕食所加庶羞之一，則鶉亦可爲羞矣。

右食上大夫禮之加於下大夫者

若不親食，謂主國君有疾病，若他故。使大夫各以其爵，朝服以侑幣致之。執幣以將命。【疏】正義曰：此以上俱詳《聘禮》「若不親食」節。豆實，實于甕，陳于楹外，二以竝，北陳。簋實，實于筐，陳于楹內，兩楹間，二以竝，南陳。陳甕筐於楹間者，象授受於堂中也。南北相當，以食饌同列耳。甕北陳者，變於食。甕數如豆，醢芥醬從焉。筐米四。今文「竝」作「併」。【疏】正義曰：「簋實實于筐」，徐、陳、閩、葛、楊氏「筐」俱作「筐」。石經、嚴本、《集釋》、《通解》、敖氏俱作「筐」。《校勘記》云：「案：注及疏內「筐」字，各本皆同，則經文亦當作「筐」。○豆實，菹醢之屬，實之于甕。簋實，黍稷之屬，實之于筐。又陳之於楹外內，皆與親食異也。甕，瓦器。筐，竹器。敖氏云：「南北異陳，示不相統也。」王氏士讓云：「經第言豆簋之實，蓋舉其全而略其細者。」注云「陳甕筐於楹間者，象授受於堂中也」者，朱子云：「兩楹間，不必與楹相當，謂堂東西之中耳。」今案：兩楹間，兼楹外楹內言，所謂「東西節」也。云「南北相當，以

食饌同列耳」者，吳氏《疑義》云：「食指米，饌指豆實，以其一內一外，南北相當，故曰『同列』也。」云「饗北陳，變於食」者，食指米，謂米南陳而饗北陳，故曰「變」耳。云「饗數如豆」者，以其菹醢異物，不可同饗。一豆則一饗，故云「饗數如豆」也。云「醢芥醬從焉」者，《疑義》云：「注因醢芥醬亦醬之類，故謂其相從。不知正饌在堂，庶羞在碑內，醢芥醬應在庶羞中，烏得從而在堂？」案：吳說亦是也。云「筐米四」者，褚氏云：「賓所食者，梁則筐米四，宜黍、稷、稻、粱各一。不言簠實者，省文也。若簠實陳於碑內，經必明著其文而列其位次。」然則謂黍、稷各二簠者，非也。云「今文『竝』作『併』者，詳《士昏禮》」。庶羞陳于碑內。生魚也。魚腊從焉。上大夫加鮮魚、鮮腊、雉兔鶉鴛，不陳於堂，辟正饌。【疏】正義曰：注云「生魚也」者，李氏云：「生魚，即庶羞所用爲膾者也。膾，切之。此則用全。」王氏士讓云：「庶羞多出於三牲，今牲既不殺，則所陳者四。醢芥醬，其魚未作膾，亦生致之。」今案：下經云「牛、羊、豕陳於門內西方，東上」，是生致之不殺也。不殺而有醢者，醢經百日乃成，不繫於殺也。云「魚腊從焉」者，庶羞之魚膾既生致之於此，則俎實之魚腊當亦從焉。云「上大夫加鮮魚、鮮腊、雉兔鶉鴛」者，下大夫七鼎，其俎實唯有乾魚、乾腊；

上大夫九鼎，加鮮魚、鮮腊，蓋亦從焉。雉兔鶉鴛則上大夫所加之庶羞，自當陳於此。賈疏謂亦生致之，或然。云「不陳於堂，辟正饌」者，親食則庶羞亦陳於堂上，此則辟正饌而陳於碑內，亦變於食。碑內，碑北，與堂尚近也。庭實陳于碑外。執乘皮者也，不參分庭一在南者，以言歸，宜近內。【疏】正義曰：注「宜近內」，徐本「宜」誤「且」，嚴本及各本作「宜」。云「執乘皮者也」者，謂經所云「庭實」指執乘皮者言也。敖氏、郝氏謂不執之，盛氏云：「此庭實亦有執之者，若馬則牽之。敖及郝說皆非。」云「不參分庭一在南」者，凡陳庭實皆參分庭一在南，詳《昏禮·記》。今云「碑外」，則與碑近，凡設碑參分庭一在北，是不參分庭一在南也。云「以言歸，宜近內」者，碑外較之一在南者爲近內，以致食是歸於賓館，故宜近內也。牛、羊、豕陳于門內西方，東上。爲其踐汗館庭，使近外。【疏】正義曰：《聘禮》歸賓餼：「二牢陳於門西，北面東上。」此與彼同。又曰：「牛以西羊、豕。」此陳之次當亦然，但彼二牢，此一牢耳。王氏士讓云：「此三牲若殺，則俎之牛羊豕腸胃膚、醵之滯、祭之肺、庶羞之腳臠臠炙載鰭，皆出其中矣。凡言養者，莫過於三牲。今生陳之，與餼同。然無百筯，無

芻薪之從，則仍是食禮也。」① 注云「爲其踐汙館庭，使近

外」者，上云「庭實陳於碑外」，與碑近，注云「以言歸，宜近內」，此陳於門內，與門近，則近外矣，故注云「爲其踐汙館庭，使近外」也。賓朝服以受，如受饗禮。朝服，食

禮輕也。【疏】正義曰：「如受饗禮」，如《聘禮》歸饗餼，賓受之，自「迎大夫於外門外」至「降授老幣」之禮也。注云

「朝服，食禮輕也」者，對歸饗餼時卿韋弁、賓皮弁言也。敖氏云：「親食時朝服，故此致者，受者皆服之。」無儻。以

己本宜往。【疏】正義曰：「儻」，唐石經、嚴、徐、《集釋》、敖氏俱作「擯」，《通解》、楊氏、毛本俱作「儻」。案：作「儻」是也，詳《聘禮》。○上云「如受饗禮」，但受饗有儻，而此無

儻，故明之。注云「以己本宜往」者，詳《聘禮》「若不親

食」節。明日，賓朝服以拜賜于朝。訝聽命。

賜亦謂食侑幣。【疏】正義曰：注「食」下，敖氏有「與」字。

○此拜君亦不親見，訝爲之人告出報也。言「聽命」者，即《掌訝職》所謂「詔相其事而掌其治令」也。注云「賜亦謂

食侑幣」者，前公親食，明日賓拜賜於朝，拜食與侑幣。此但言賜，未言食與侑幣，故注補之。亦者，亦謂兼拜二

者也。

右君不親食使人往致

大夫相食，親戒速。記異於君者也。速，召

也。先就告之，歸具，既具，復自召之。【疏】正義曰：自此以下，言主國大夫食賓之事。注云「記異於君者也」者，

據下文云「其他皆如公食大夫之禮」，則自此至「再拜，降出」，皆其異於君者也。高氏愈云：「此大夫相食異於公禮

者九：親戒速，一也。迎賓門外，二也。降堂受醬涪幣，三也。賓執梁涪之西序端，四也。辭卷加席，五也。受侑幣，

主人送幣皆稽首，六也。賓辭幣，辭主人臨食皆止降一等，七也。卒食徹于西序端，八也。卒食再拜不稽首，九也。

舉此而公與大夫尊卑之分較然矣。」今案：異於公禮者尚有數事：降盥就洗，一也。侑用錦，二也。卒食拜於階上，

三也。云「速，召也」者，詳《鄉飲》「主人速賓」下。云「先就告之」者，戒也。云「歸具，既具，復自召之」者，速也。親戒

而又親速，賓主人相敵之禮如是，故《鄉飲》《鄉射》皆云戒賓、速賓。若《公食禮》則戒而不速，又不親也。迎賓于

①「食」上，《儀禮紉解》有「公」字。

門外，拜至，皆如饗拜。饗，大夫相饗之禮也，今

亡。古文「饗」或作「鄉」。【疏】正義曰：敖氏云：「迎賓與

拜至，亦皆再拜。」注云：「饗，大夫相饗之禮也，今亡者，

《聘禮》曰：「大夫于賓，壹饗壹食。」是大夫有相饗相食之

禮也。蔡氏云：「如饗拜」，如大夫相饗之拜。蓋古本有

公饗大夫禮，而附大夫相饗之禮於其中，今竝亡矣。」云「古

文「饗」或作「鄉」，詳《聘禮》。降盥，受醬、涪、侑幣

束錦也，皆自阼階降堂受，授者升一等。皆

者，謂受醬、受涪、受幣也。侑用束錦，大夫文也。降堂，謂

止階上。今文無「束」。【疏】正義曰：王氏士讓云：「降

盥，降階下就洗也。降盥則賓從降，必著之者，嫌若公尊不

就洗也。」今案：王說是也。注云「皆者，謂受醬、受涪、

受幣也」者，謂經云「皆自阼階降堂受」指此三者言也，授者

蓋其家臣。云「侑用束錦，大夫文也」者，君侑幣用束帛，大

夫侑幣用束錦，錦文於帛，《聘禮》注所謂「以少文爲貴」是

也。云「降堂，謂止階上」者，此與《昏禮》婦降堂，《聘禮》賓

降堂同，皆謂降堂不降階，詳《士冠》始加賓降西階一等下。

褚氏云：「《禮器》言諸侯堂七尺，大夫五尺，士三尺。敖氏

乃以七尺，五尺分五等諸侯爲二，而以大夫與士同三尺，不

可從。」今案：褚說是矣。但敖氏必以士大夫與士同三尺

者，意以大夫堂五尺則階五等。受者在階上，而授者止升

一等，疑太遠故也。盛氏則謂間三等相授，恐無此授法，疑

經文「升一等」，「一」字或「三」字之譌耳。云「今文無「束」

者，凡物十曰束，故上注云：「束帛，十端帛也。」若無「束」

字，於義不備，故鄭氏從古文。賓止也。主人三降，賓

不從。【疏】正義曰：注云「主人三降，賓不從」者，賈疏

云：「以主人降堂，不至地，故賓止不降也。」張氏爾岐云：

「注言「三降」，不數降盥者，盥時賓亦從降，自如常法也。」

賓執梁與涪，之西序端。不敢食於尊處。【疏】正

義曰：公食之則降階，此執以之西序端，不降也。注云

「不敢食於尊處」者，敖氏云：「亦爲主人立於堂，故不敢食

於席也。其尊敵，故但避之於堂上而已。」主人辭，賓

反之。【疏】正義曰：「主人辭」，辭其食於西序端也。

「賓反之」，反於其席也。卷加席，主人辭，賓反

之。【疏】正義曰：公食之卷加席，公不辭，此則主人辭而

賓反之，以其敵也。「反之」，謂反其設席之常不卷也。辭

幣，降一等，主人從。從辭賓降。【疏】正義曰：敖

氏云：「辭而降一等，爲恭也，從亦降一等也。從者辭其降，且不許其辭。」受侑幣，再拜稽首。主人送幣，亦然。敵也。【疏】正義曰：注云「敵也」者，係解經「亦然」之義。以賓主人俱是大夫，體敵，故賓受幣再拜稽首，主人送幣亦再拜稽首也。賈謂「雖敵亦稽首」，失注意矣。又蔡氏疑「稽首」爲「頓首」之誤，謂非國君不當稽首，不知大夫不能親食，公猶使人以侑幣致之，則其幣爲官給可知。故受幣者如對主君必稽首，而送幣者亦必稽首以荅之也。此說方氏苞、王氏士讓、惠氏棟俱已辨之。辭于主人，降一等，主人從。辭，謂辭其臨己食。卒食。徹于西序端。亦親徹。【疏】正義曰：注云「亦親徹」者，公親食，賓卒食，取梁與醬以降，奠於階西。注云「亦親徹」也，此徹於西序端亦是親徹，但不於階下耳。東面再拜，降出。拜，亦拜卒食。【疏】正義曰：東面再拜與《公食》同，但不稽首耳。此先言「拜」而後言「降」，明拜於階上，非階下也。其他皆如公食大夫之禮。【疏】正義曰：毛本此下有注云：「釋曰：『云其他謂豆數、俎數，陳設，皆不異上陳。但禮異者，謂親戒速，君則不親

迎賓。公不出，此大夫出大門。公受醬涪幣不降，此大夫則降也。公食大夫，大夫降食於階下，此言西序端。上公食卷加席，公不辭，此則辭之。皆是異也。」《校勘記》云：「此段疏八十六字，今本俱誤作注。」盛氏云：「監本亦誤。」今案：嚴本、陳單注本俱無此注，從之。○敖氏云：「他謂在《公食禮》中而不見於上者也。然上禮所不見者，亦未可盡與《公食禮》相通。經云『皆如』者，大約言之耳。」

右大夫相食之禮

若不親食，則公作大夫朝服以侑幣致之。作，使也。大夫有故，君必使其同爵者爲之致禮。列

國之賓來，榮辱之事君臣同。【疏】正義曰：褚氏云：「注云『同爵』，專據主國大夫言。主人卿也，則使卿致；主人大夫也，則使大夫致。」賓受于堂，無償。與受君禮同。【疏】正義曰：「償」，唐石經、嚴本、《集釋》、敖氏俱作「償」，徐本、《通解》、楊氏、毛本俱作「償」，說詳上。注云「與受君禮同」者，敖氏云：「言此者，嫌或與君禮異也。賓受大夫餽不於堂，故明之。」

右大夫不親食君使人代致

記

不宿戒。食禮輕也。此所以「不宿戒」者，謂前期

三日之戒。申戒爲宿，謂前期一日。【疏】正義曰：注云「食禮輕也」者，鄭見諸禮皆有前期之宿戒，而食不然，故云「禮輕也」。云「此所以不宿戒者，謂前期三日之戒，申戒爲宿，謂前期一日」者，鄭解宿戒爲二，謂戒爲前期三日，宿爲前期一日。賈疏以《大射》前期三日宰夫戒宰及司馬，《少牢》前期一日宿證之。然《士冠》前期戒賓，又前期宿賓，戒、宿俱在冠日前，亦可證也。此不宿戒，謂無前期之宿，又無前期之戒，但即日戒耳。敖氏云：「宿戒」者，先期日而戒之也。此則當日乃戒，故云「不宿戒」。是訓宿爲豫，與鄭異。戒，不速。食賓之朝，夙興戒之，賓則從戒者而來，不復召。【疏】正義曰：注云「食賓之朝，夙興戒之」，是即日戒也。云「賓則從戒者而來，不復召」者，鄉飲、鄉射雖即日戒賓，然戒後尚有速。此則賓從戒者而來，並不速也。食禮所以如此其簡者，以主國待賓之禮有饗有食有

燕，若皆拘於三日戒一日宿之例，則相繼行之，爲日必多，恐不免留賓廢事之愆，故必從其簡也。至饗先於食，或有宿戒與否，其禮亡，不可考矣。不授几。異於醴也。【疏】正義曰：注云「異於醴也」者，謂異於聘禮醴賓，公親授几也。無阼席。公不坐。【疏】正義曰：注云「公不坐」者，以食禮公前無食，賓食則公退於箱，不坐於阼，故無席也。

右記食禮異於常禮

亨于門外東方。必於門外者，大夫之事也。東方者，主陽。【疏】正義曰：章氏平云：「經中言「亨」，惟《鄉飲酒》「亨于堂東北」，其他吉禮、賓禮皆「亨于門外」。又惟《士虞》「亨于廟外之右」，餘皆於東方。《特性》士禮，亦亨于門外東方，則注所云「大夫之事」，未知何指？疏旁摭經、注，而於《特性》惟出「主婦視饔饔于西堂下」，獨不及其下句，豈有意回護邪？」今案：互詳《燕禮》。

右記 亨

司宮具几，與蒲筵常，緇布純，加萑席

尋，玄帛純，皆卷自末。司宮，大宰之屬，掌宮席者

也。丈六尺曰常，半常曰尋。純，緣也。萑，細葦也。末，

經所終，有以識之。必長筵者，以有左右饌也。今文「萑」

皆爲「莞」。【疏】正義曰：注「掌宮廟者也」，「掌」，毛本誤

作「宰」。「宮」，閩本、《通解》俱誤作「官」。「今文萑皆爲

莞」，爲「釋文」作「作」。○此几與席，司宮具之。據《聘

禮》注，所具之几蓋漆几也。筵與席，散文通，對文則近地

者爲筵，其上加者爲席，故此蒲稱筵，萑稱席也。蒲筵加萑

席，蓋筵上下大夫之法。此節雖無文，然據下文云：「上大

夫蒲筵，^①加萑席。其純，皆如下大夫純。」則上大夫與下

大夫同矣。故鄭注《聘禮》「宰夫徹几改筵」引此文，即云：

「此筵上下大夫也。」注云「司宮，大宰之屬，掌宮席者

也」者，賈疏云：「案：大宰之下有宮人，掌宮中除汙穢之

事，即此司宮。」《儀禮釋官》云：「案：司宮當以此注爲正，

《燕禮》注解爲小宰，誤。此疏既釋爲宮人，又云：「《燕禮》

司宮設尊，故以小宰解之，此司宮設几席，故以大宰之屬解

之。」其說甚非。《小宰職》無設尊之文，大宰之屬無司几筵

之官。總之，注既誤解爲小宰，疏欲護注，故多紕繆耳。」互

詳《燕禮》。云「丈六尺曰常，半常曰尋」者，半常則八尺也，

故《考工記》注云：「八尺曰尋，倍尋曰常。」《說文》亦謂：

「尋，八尺也。」云「純，緣也」者，謂緣邊也。云「萑，細葦也」

者，《爾雅》「葭蘆」，郭注：「葦也。」又云「蒹葭」，郭注：「似

葦而小，實中。」《說文》：「蒹，萑之初生，一曰蘆，一曰騅。」

《詩》：「八月萑葦。」《毛傳》：「八月蘆爲萑，葭爲葦。」是萑

與蒹葭一物，初生名蒹名蘆，既秀爲萑也。云「末，經所終，

有以識之」者，織席有經緯，經所終是末，蓋有首尾可記識

也。云「必長筵者，以有左右饌也」者，案：筵之長倍於席，

以正饌在左，加饌在右，皆陳於筵前，故宜長也。云「今文

「萑」皆爲「莞」者，鄭此注云：「萑，細葦。」而箋《詩》解

「莞」爲小蒲，二者皆可爲席。鄭於此定從古文作「萑」，而

敖氏據《周禮》·司几筵「諸侯祭祀席，蒲筵績純，加莞席紛

純」，又謂「萑乃葦屬，爲物羸惡，宜從今文作「莞」」。胡氏

承琪駁之云：「《周禮》諸侯祭祀席，蒲筵加莞席；昨席，莞

筵加纁席。其筵國賓與昨席同。《聘禮》明云「改筵」，則此

食禮之席必不同於祭祀之蒲筵莞席。敖氏徒斤斤莞、萑二

物之美惡，而不辨禮之差等，妄矣。」《禮經釋例》云：「萑

席，即《周官》莞筵也。莞、萑聲相近。」蓋欲組合爲一。胡氏

①「筵」，原作「席」，今據《續清經解》本改。

云：「莞、萑明係二物，萑席以細葦爲之，亦未爲羸惡。」今案：《周禮·司几筵》：「掌五几五席之名物。凡大朝覲、大饗射，凡封國命諸侯，設莞筵紛純，加纁席畫純，加次席黼純。」鄭注《覲禮》：「天子設斧依」節引之。又：「諸侯昨席，莞筵紛純，加纁席畫純。」鄭注《燕禮》：「設公席」節引之。《司几筵》又曰：「筵國賓于牖前，亦如之。」謂亦用莞筵紛純加纁席畫純也，鄭注《聘禮》：「醴賓」節及此記下節引之。獨此節不引《周禮》爲證者，蓋以禮文參差，未可強合也。

宰夫筵，出自東房。 筵本在房，宰夫敷之也。天子諸侯左右房。【疏】正義曰：「東房」，毛本誤作「東方」。

注云「筵本在房，宰夫敷之也」者，經云「宰夫設筵」，此云「筵出自東房」，明是司宮具之於房內，宰夫敷之，故云「出自東房」也。云「天子諸侯左右房」者，賈疏云：「以其言東房，對西房。若大夫士直有東房而已。」又《大射儀》：「宰胥薦脯醢，由左房。」注云：「左房，東房也，人君左右房。」又《禮記·禮器》：「君在阼，夫人在房。」注云：「天子諸侯有左右房。」《喪大記》：「婦人鬢帶麻於房中。」注云：「婦人之鬢帶麻於房中，則西房也。天子諸侯有左右房。」案：鄭氏釋經屢以此爲說，蓋謂天子諸侯之宗廟、路寢、射宮皆有東房西房。大夫士無西房，唯有東房西室而已。然其說

考之於經實不合，故後儒多駁之。陳氏祥道《禮書》云：「《鄉飲酒·記》薦出自左房」，《鄉射·記》「出自東房」，與《大射》諸侯擇士之宮「宰胥薦脯醢，由左房」，其言相類。蓋言左以有右，言東以有西，則大夫士之房室與天子諸侯同可知。鄭氏謂大夫士無西房，誤矣。」李氏如圭《儀禮釋宮》云：「《聘禮》賓館于大夫士，君使卿還玉于館，賓退負右房，則大夫亦有右房矣。」敖氏繼公《儀禮集說》同。萬氏斯大《儀禮商》云：「余於《鄉飲酒》謂大夫士若無右房，則賓坐西北，已逼西序，不容衆賓之席，以爲必有西房。茲於《聘禮》還玉，賓升自西階，受圭，退負右房而立，則明言有右房矣。」江氏永《釋宮增注》云：「案：堂後室居中，左右有房，上下之制宜皆同。若東房西室，則室戶牖偏西，堂上設席行禮皆不得居中，疑古制不如此。」據此諸說，則以大夫士宗廟、正寢、學制爲無西房者誠誤也。然東房西室乃諸侯以下燕寢之制。又天子宗廟、路寢、明堂三者同制，有五室，無左右房。諸侯以下至士宗廟正寢，皆有左右房。鄭以天子諸侯統言之，與《詩·斯干》箋、《禮記·玉藻》注不合，蓋未及追改。詳《士昏禮》及《覲禮·記》。

右記筵席

賓之乘車在大門外西方，北面立。賓車

不入門，廣敬也。凡賓即朝，中道而往，將至，下行，而後車還立於西方。賓及位而止，北面。卿大夫之位當車前。凡朝位，賓主之間，各以命數爲遠近之節也。【疏】正義曰：「賓之乘車」，謂大夫所乘入朝之車。「西方」，賓位也。敖氏云：「車北面立者，俟賓之出，宜鄉之。」云「立」，明其不稅駕。」注云「賓車不入門，廣敬也」者，《曲禮》曰：「客車不入大門。」今云「在大門外」，是不入也。云「凡賓即朝，中道而往」者，《王制》曰：「道路，男子由右，婦人由左，車從中央。」是也。云「將至，下行，而後車還立於西方」者，《少儀》曰：「僕於君子，君子升下則授綬。」又曰：「君子下行然後還立。」鄭注：「還車而立，以俟其去。」是此注言還立之義也。云「賓及位而止，北面。卿大夫之位當車前」者，蓋賓至大門外，下車入於次。及賓者出請事，賓出次步進，直闌西，北面立。所謂位，即朝位也，《周禮·大行人》曰：「凡大國之孤，朝位當車前。」不言卿大夫有異，故知卿大夫與孤同也。云「凡朝位，賓主之間，各以命數爲遠近之節也」者，即《大行人》所云「上公朝位賓主之間九十步，侯伯七十步，子男五十步」是也。

右記乘車

銅莖，牛藿、羊苦、豕薇，皆有滑。藿，豆

葉也。苦，苦茶也。滑，莖荳之屬。今文「苦」爲「苳」。【疏】正義曰：「銅」，《釋文》作「鉗」，非。「牛藿」，周學健云：「石經『牛』字作『半』。」《校勘記》云：「石經『半』字今已剝缺，蓋初作『半』，而後改爲『牛』也。」①「藿」，徐、陳、閻、葛、《通解》俱作「霍」，嚴本、《集釋》俱作「藿」，徐本注仍作「藿」。「苳」，從下不從卜，嚴、徐、葛本俱作「苳」，誤。○銅莖，記銅羹所用之菜也。《說文》「莖」字下，引《詩》「左右莖之」，段氏注云：「《毛鄭詩考正》曰：『莖，菜之烹於肉涪者也。』《禮》羹、莖、苳、醢，凡四物：肉謂之羹，菜謂之莖；肉謂之醢，菜謂之苳。苳、醢生爲之，是爲醢人豆實。莖則涪烹之，與羹相從，實諸銅。」今案：《土虞》、《特性》二篇亦記銅莖，但彼止有特豕。此食禮用大牢，牛、羊、豕具，故別言之，牛則用藿，羊則用苦，豕則用薇也。《土虞》、《特性》言「用苦若薇」者，以止有特豕，苦、薇二者皆可用，隨用其一也。《土虞》又云有杞者，以銅有菜，宜用杞扱之。此不

①「改」，原脫，今據《十三經註疏校勘記》補。

言，亦有柄可知也。注云「藿，豆葉也」者，說文「藿」作

「藿」，云：「未之少也。」未，即豆也。少，幼少也。《詩毛

傳》云：「藿，猶苗也。」是也。李善引《說文》作「豆之葉

也」，與鄭合。云「苦，苦茶也」者，《爾雅·釋草》：「茶，苦

菜。」郝氏《義疏》云：「《說文》：『茶，苦菜也。』經典單言茶

者，如「采茶薪樗」、「莖茶如飴」、「誰謂荼苦」，皆謂苦菜也。

單言苦者，如《詩》「采苦采苦」，《內則》「濡豚包苦」及《公食

大夫·記》「鋼芼羊苦」，亦皆謂苦菜也。今案：《詩·邶

風》毛傳云：「茶，苦菜。」《唐風》傳云：「苦，苦菜。」是苦與

茶爲一物也。薇，注無釋，案：薇亦藿類也。《說文》：

「薇，菜也，似藿。」段氏注云：「謂似豆葉也。陸璣《詩疏》

曰：「薇，山菜也。莖葉皆似小豆，蔓生，其味亦如小豆，藿

可作羹，亦可生食。今官園種之，以供宗廟祭祀。」項安世

曰：「薇，今之野豌豆也。」《爾雅·釋草》：「薇，垂水。」郭

注：「生於水邊。」段氏云：「薇，采於山野生者也。《釋草》

云垂水，乃薇之俗名耳。不當以生於水邊釋之。」云「滑，莖

莖之屬」者，《內則》曰：「莖莖、粉榆、免蕘、滷藹以滑之」，

故注以滑爲莖莖之屬也。此記但云「皆有滑」，不言所用何

物。《士虞·記》則云：「有滑，夏用葵，冬用莖。」注：「莖，

莖類也，乾則滑。夏秋用生葵，冬春用乾莖。」《特性·記》

亦云：「皆有滑，夏葵，冬莖。」注：「莖，莖屬，乾之，冬滑於

葵。」案：《說文》：「莖，草也。根如薺，葉如細柳，蒸食之

甘。」段氏注云：「《大雅》：『莖茶如飴。』《毛傳》：『莖，菜

也。』《夏小正》：『二月榮莖。』案：《爾雅·釋草》莖有二：

「齧苦莖，《詩》、《禮》之莖也；莖莖草，《晉語》之「置莖於

肉」，即今附子也。《內則》釋文云：「莖音丸，似莖而葉大

也。《說文》：『葵，葵菜也。』崔寔曰：『六月六日可種葵，

中伏後可種冬葵，九月可作葵菹，乾葵。」案：葵至九月始

乾，故鄭云：「夏秋用生葵也。」《士虞·記》注云：「莖

乾則滑。」又云：「乾之，冬滑於葵。」此所以冬春用乾莖也。

《內則》注云：「冬用莖，夏用莖。」與此不同者，孔疏《內則》

莖、莖相對，故冬用莖，夏用莖。《士虞禮》葵與莖相對，故

夏用葵，冬用莖也。所對不同，故注有異。今案：《儀禮·

記》明云「冬莖」，而《內則》注云「夏用莖」，究屬兩岐矣。云

「今文『苦』爲『芡』者，《說文》：『芡，地黃也。』即引此記作

「羊芡」，蓋從今文。然此字宜作「苦」，不宜作「芡」，鄭已辨

之。《士虞·記》《特性》二記注皆云：「今文『苦』爲『芡』。《特

性》又云：『芡乃地黃，非也。』是鄭已辨之矣，王石臞先生

云：「古人飲食無用地黃者，芡乃苦之假借字也。」

右記鋼芼

贊者盥，從俎升。俎，其所有事。【疏】正義

曰：盥者，以將佐賓祭，宜致潔也。注云「俎，其所有事」

者，敖氏云：「贊者之所有事於賓者，簠俎庶羞之祭也。而

俎先二者而設，故從之以升。」今案：賈疏謂豆亦從下升，

黍稷亦贊祭。不知豆從下升，乃加饌之豆，設之在後。若

正饌之豆與黍稷皆自東房出，不由下升，故贊者必從俎也。

賈說誤。敖氏以簠爲言，亦未的。江氏筠已辨之。

右記贊者升節

簠有蓋幕。稻粱將食乃設，去會於房，蓋以幕。

幕，巾也。今文或作「幕」。①【疏】正義曰：注「幕，巾也」，

毛本「巾」誤作「中」，「今文或作幕」，徐本「幕」作「鼎」。陳、

監作「幕」，亦誤。嚴本、《釋文》俱作「幕」。云「稻粱將食

乃設，去會於房，蓋以幕」者，賈疏云：「簠簋相將，簋既有

會，明簠亦有會可知。但黍稷先設，故卻會於敦南，簠盛稻

粱，將食乃設，故鄭云：「去會於房，蓋以幕也。」賈又云：

「至於陳設，幕亦去之。經云「有蓋幕」，據出房未設而言。」

云「幕，巾也」者，幕與幙同，《周禮注》：「以巾覆物曰幙。」

《說文》「幙」下云：「《周禮》有幙人。」今《周禮》作「幕」，胡氏承珙云：「此不過偏旁有在左在下之異耳。此經古文作「幕」，與《周禮》同。」云「今文或作「幕」」②者，幕是帷幕，《說文》：「帷在上曰幕。」與巾幕字異，故鄭不從。簠制，詳《士昏禮》「黍稷四敦」下。

右記簠

凡炙無醬。已有鹹和。【疏】正義曰：注「和」下，

《釋文》、《集釋》俱有「也」字，嚴本無。○凡炙無醬，謂凡食

炙者皆不用醬也。此篇設庶羞有牛、羊、豕炙，故於此記

之。注云「已有鹹和也」者，釋所以無醬之義。

右記炙

上大夫蒲筵，加萑席。其純，皆如下大

夫純。謂三命大夫也。孤爲賓，則莞筵紛純，加纁席畫

純也。【疏】正義曰：記因上云「蒲筵常，緇布純，加萑席

①「幕」，原作「鼎」，今據《儀禮注疏》及下疏文改。

②「幕」，原作「鼎」，今據《儀禮注疏》及上疏文改。

尋，玄帛純」，無上下大夫之文，恐人疑上大夫與下大夫有異，故特明之。上大夫亦用蒲筵，加萑席，而其純又如下大夫之純，是上下大夫同也。言「皆」者，謂蒲筵亦用緇布爲純，萑席亦用玄帛爲純，二者之純皆同也。吳氏《疑義》云：「不言常與尋者，筵之丈尺未聞有尊卑之別，故略之。」注云「謂三命大夫也」者，上大夫、卿有三命，再命之不同。注獨言「三命」者，見三命之大夫亦與下大夫同也。云「孤爲賓，則莞筵紛純，加纁席畫純也」者，鄭意以公之孤四命，上大夫不兼孤在內，故推言之。《周禮·司几筵》曰：「筵，國賓于牖前，莞筵紛純，纁席畫純，詳《聘禮》。」宰夫徹几改筵」下。

右記上大夫筵席與下大夫同

卿擯由下。不升堂也。【疏】正義曰：「擯」，監本誤作「賓」。注云「不升堂也」者，謂卿擯於堂下，詔禮而不升堂。此卿擯即上擯，以卿爲之，故曰「卿擯」。郝氏敬解「卿擯」爲食卿之擯，非。又謂食卿則擯立堂下，有事由下降，與鄭異。江氏筠云：「案《經》「擯者」之文凡三見：辭賓於階下，荅公拜至，一也。公揖退時，擯者退負東塾立，

二也。進相侑幣，三也。此三節《聘禮》亦具有之。據二經於辭拜時俱云「公降一等，辭」，則擯者爲公釋辭，無反居堂上與由下降之理。其負塾與相幣俱止云進云退，亦竝無升堂降堂之事，郝說非也。」上贊，下大夫也。上，謂堂上。擯、贊者事相近，以佐上下爲名。【疏】正義曰：注云「上，謂堂上」者，敖氏云：「上贊，即經所謂「贊者」也。以其佐賓食於堂上，故云「上贊」。」云「擯、贊者事相近，以佐上下爲名」者，擯佐於堂下，贊佐於堂上，故擯云「由下」而贊云「上贊」，以此爲名也。敖氏又云：「此上贊以下大夫爲之者，欲其不尊於賓。」案：此記食下大夫之法，贊在堂上，佐賓祭黍稷、祭肺、祭庶羞，其儀甚繁。若使尊於賓者爲之，恐不免有尊臨己食之嫌也。

右記擯贊

上大夫庶羞。酒飲漿飲，庶羞可也。於食庶羞，宰夫又設酒漿，以之食庶羞可也。以優賓。【疏】正義曰：注云「以優賓」者，謂優於大夫也。張氏爾岐云：「前經下大夫不言食庶羞，言飲漱不言飲酒，亦其禮之殊者。」高氏愈云：「上大夫庶羞，多言於酒飲漿飲之時，雖食

庶羞亦可。」江氏筠云：「上大夫食庶羞時，酒飲漿飲得兼用之，以演安其庶羞之食耳。」盛氏云：「此節疑有脫誤，當闕之。」今案：細繹記文，難以強解，敖氏已言之矣。注說簡質難明，高、江說異於注而於記亦未盡洽，當從盛說爲是。拜食與侑幣，皆再拜稽首。嫌上大夫不稽首。

【疏】正義曰：注云「嫌上大夫不稽首」者，鄭以此節文承上大夫言之，故云然。褚氏云：「記明無論公親食與否，而兩者之拜，上大夫不得與下大夫異其儀也。」褚蓋以不親食之禮，經但云「拜賜於朝」，未言「再拜稽首」，故記統明之。說亦通。○劉氏敞補《公食大夫義》曰：「食禮，公養賓，國養賢，一也。親之故愛之，愛之故養之，養之故食之。食而弗愛，猶豢之也。愛而弗敬，猶畜之也。饗禮，敬之至也。食禮，愛之至也。饗爲愛，弗勝其敬。食爲敬，弗勝其愛。文質之辨也。公使大夫戒，必以其爵，恭也。己輕則卑之，己重則是以其貴臨之也。賓三辭聽命，言是禮之貴弗敢當也。弗敢當，故難進也。公迎賓於大門內，非不能至于外也，所以待人君之禮也。臣之意欲尊其君，子之意欲尊其父，故迎賓於大門內，所以順其爲尊君之意也。三揖至于階，三讓而升堂，充其意，諭其誠也。於廟用祭器，誠之盡也。君子於其尊敬不敢狎，不敢狎故神明之，神明

之故忠臣嘉賓樂盡其心也。大夫立於東夾南，西面北上。士立於門東，北面西上。小臣東堂下，南面西上。宰東夾北，西面南上。內官之士在宰東北，西面南上。百官有司備，以樂養賢也。設筵加席几，致安厚之義也。公設醬，然後宰夫薦豆菹醢，士設俎。公設大羹，然後宰夫設鉶啓簋，言以身親之也。賓徧祭，公設梁，宰夫膳稻，士膳庶羞，爲殷勤也。賓三飯飯梁，以湑醬，以君之厚己也。①賓必親徹，有報之道也。庭實乘皮，侑以束帛，雖備物，猶欲其加厚焉也。公拜送，終之以敬也。有司卷三牲之俎，歸於賓館，不敢褻其餘也。上大夫八豆、八簋、六鉶、九俎，庶羞二十，其餘衰，見是德之殺也。②君子言之曰：③「愛人者，使人愛之者也。敬人者，使人敬之者也。親人者，使人親之者也。自卑者，使人尊之者也。」是故公養賓，國養賢，其義一也。未有愛之、敬之、親之、尊之，而其位不安者也。未有不愛、不敬、不尊、不親，而能長有其國者也。將由乎好德之君，則將怡焉唯恐其不足於禮。將由乎驕慢之君，則

①「以」，《公是集》作「此」。

②「見是」，《公是集》作「是見」。

③「言之」，《公是集》作「之言」。

將曰是食於我而已矣。故禮，君子所不足，小人所泰餘也。孔子食於少施氏，將祭，主人辭曰：「不足祭也。」將殮，主人辭曰：「不足殮也。」孔子退曰：「吾食而飽，少施氏有禮哉。」故君子難親也，將親之，舍禮何以哉？」

右記庶羞及侑幣

儀禮正義卷二十 鄭氏注

績溪胡培壑學

覲禮第十

鄭《目錄》云：「覲，見也，諸侯秋見天子之禮。春見曰朝，夏見曰宗，秋見曰覲，冬見曰遇。朝宗禮備，覲遇禮省，是以享獻不見焉。三時禮亡，唯此存爾。覲禮於五禮屬賓禮。大戴第十六，小戴第十七，《別錄》第十。」

【疏】正義曰：毛本「賓」下脫「禮」字，「小戴」下脫「第」字，《集釋》俱有，臧輔堂本「賓」下亦有「禮」字。○云「覲，見也」者，《爾雅·釋詁》文。云「諸侯秋見天子之禮」者，據《周禮》言也。云「春見曰朝，夏見曰宗，秋見曰覲，冬見曰遇」者，《周禮·大宗伯》文。鄭彼注云：「六服之內，四方以時分來，或朝春，或宗夏，或覲秋，或遇冬，名殊禮異，更遞而徧。朝，猶朝也，欲其來之早。」

宗，尊也，欲其尊王。覲之言勤也，欲其勤王之事。遇，偶也，欲其若不期而俱至。」又《大行人》曰：「春朝諸侯而圖天下之事，秋覲以比邦國之功，夏宗以陳天下之謨，冬遇以協諸侯之慮。」鄭注：「圖，比、陳、協，皆考績之言。王者春見諸侯，則圖其事之可否。秋見諸侯，則比其功之高下。夏見諸侯，則陳其謀之是非。冬見諸侯，則合其慮之異同。六服以其朝歲四時分來，更迭如此而徧。《司馬灋》曰：「春以禮朝諸侯，圖同事。夏以禮宗諸侯，陳同謀。秋以禮覲諸侯，比同功。冬以禮遇諸侯，圖同慮。」《詩·韓奕》孔疏云：「《說周禮》者，賈逵以爲一方四分之，或朝春，或覲秋，或宗夏，或遇冬。藩屏之臣，不可虛方俱行，故分趣四時助祭也。馬融以爲在東方者朝春，在南方者宗夏，在西方者覲秋，在北方者遇冬。是由經無正文，故先儒爲此二說。鄭《大宗伯》《大行人》二注並言分來，則是從賈逵之說，一方而分爲四時也。韓侯雖是北方諸侯，其在北方爲西偏，蓋於時分之，使當秋覲也。」《周禮》賈疏誤謂春則東方盡來，夏則南方盡來，致王氏與之駁之，謂諸侯皆來，卒有乘間而起，孰能禦之？褚氏寅亮《儀禮管見》云：「康成言「六服之內，四方以時分來」，謂每一方內

各分四時，^①再以六服遠近定疏數之節。此期一定，子孫率以爲典。其有事而朝者又不在此數，故東方亦可以秋覲，北方亦可以夏宗也。此足申鄭義矣。云「朝宗禮備，覲遇禮省」者，《曲禮》：「天子當依而立，諸侯北面而見天子曰覲。天子當宁而立，諸公東面，諸侯西面曰朝。」鄭注：「諸侯春見曰朝，受摯於朝，受享於廟，生氣，文也。秋見曰覲，一受之於廟，殺氣，質也。朝者位於內朝而序進，覲者位於廟門外而序入，王南面立於依宁而受焉。夏宗依春，冬遇依秋。春秋時齊侯唁魯昭公，以遇禮相見，取易略也。」今案：《樂記》曰：「朝覲然後諸侯知所以臣。」《祭義》曰：「朝覲所以教諸侯之臣也。」《經解》曰：「朝覲之禮，所以明君臣之義也。」禮每以朝覲對舉，則朝可該宗，覲可該遇。鄭氏夏宗依春，冬遇依秋，朝宗禮備，覲遇禮省之說，當有所受矣。《白虎通》云：「朝則迎之於著，覲則待之於阼階。」是亦言朝覲之異也。陳氏祥道云：「朝宗於朝以春夏者，萬物交際之時，故諸公東面，諸侯西面，^②以象生氣之文。而王於堂下見之，所以通上下之志也。覲遇於廟以秋冬者，萬物分辨之時，故諸侯一於北面，以象殺氣之質。而王於堂上見之，所以正君臣之分也。」《朱子語類》

云：「覲是正君臣之禮，較嚴。天子當依而立，不下堂而見諸侯。朝是講賓主之儀，天子當宁而立，在路寢門之外，相與揖讓而入。」二說足申朝、覲禮異之義。云「是以享獻不見焉」者，案：下經明言享，而此云「享獻不見」，此句疑有闕誤，難以強說。舊解「享」字上讀，以「獻不見」爲義，賈疏譏其不辭，誠然。但謂鄭據《周禮·大行人》而說，卻亦未確也。云「三時禮亡，唯此存爾」者，以《儀禮》十七篇中止有《覲禮》，無朝宗遇禮，故鄭注《曲禮》亦云：「《覲禮》今存，朝宗遇禮今亡也。」《五經異義》：「公羊說：『諸侯四時見天子及相聘皆曰朝，以朝時行禮，卒而相逢於路曰遇。』」古《周禮》說：「春曰朝，夏曰宗，秋曰覲，冬曰遇。」許慎按：《禮》有《覲》經，《詩》曰「韓侯人覲」，《書》曰「江漢朝宗於海」，知有朝、覲、宗、遇之禮，從《周禮》說。鄭駁之云：「此皆有似不爲古昔。案：《覲禮》曰：『諸侯前朝皆受舍於朝。』朝，通名也。秋之言覲，據時所用禮。」段氏玉裁《說文注》云：「此條許、鄭本無異，不得云駁也。」今

①

「方」，《儀禮管見》作「州」。

②

「諸侯西面」四字，《禮書》原重。

案：朝與覲，對文異，散文亦通。此《覲禮》云「諸侯前朝」，云「乃朝以瑞玉」，則覲亦可名朝，故鄭云：「朝通名也。」至以秋見爲覲，則鄭與許同。《春秋》隱公四年秋九月，「衛人殺州吁於濮」，而傳云：「王覲爲可。」又云：「朝陳使請。」案：《左氏》於陳言朝，於王言覲，是秋覲之名至春秋時猶存也。萬氏斯大謂朝、覲止是一禮，并疑《周官》春朝、夏宗、秋覲、冬遇之文不足據，非矣。○褚氏寅亮云：「此篇分三節，自『至于郊』至『乃歸』，言在廟受覲正禮。『諸侯覲于天子』以下，言時會殷同之禮。『祭天』以下，言巡狩而盟之禮。」王氏士讓《儀禮紉解》云：「此篇主言廟中特覲之禮甚明。自篇首至『饗禮乃歸』，覲於廟中者也。自『諸侯覲于天子』至末，復以覲于國外、覲于方岳之禮附焉。」所謂「覲于方岳」者，謂祭天以下，王巡狩而一方之諸侯皆覲也。

覲禮，至于郊，王使人皮弁用璧勞。侯

氏亦皮弁迎于帷門之外，再拜。郊，謂近郊，去

王城五十里。《小行人職》曰：「凡諸侯人，王則逆勞於畿。」則郊勞者，大行人也。皮弁者，天子之朝朝服也。璧無束帛者，天子之玉尊也。不言諸侯，言侯氏者，明國殊舍

異，禮不凡之也。郊舍狹寡，爲帷宮以受勞。《掌舍職》曰：「爲帷宮，設旌門。」【疏】正義曰：張氏爾岐《儀禮鄭注句讀》云：「此下言侯氏人覲初至之事。至郊則郊勞，至國則賜舍，凡二節。」○《校勘記》云：「帷，石經補缺誤作『惟』。張氏曰：『注曰《小行人職》曰，按監本日作曰，從監本。』」逆，徐本作「迎」。束，重脩監本誤作「東」。今案：嚴本作「曰作逆」，各本多同嚴本。○案：《聘禮》郊勞以前有許多禮儀，此直從「至於郊」始者，盛氏世佐《儀禮集編》云：「此篇自郊勞以前，賜車服以後，文多不具，必其詳已見於朝禮，故略之也。」今案：使者聞王命即出迎，無出請人告禮辭之節，與聘異者，不敢自同客禮也。「再拜」，拜使者也。或以爲拜天子之命，斯時命尚未宣也。且拜天子之命，亦不得僅云「再拜」矣。覲時服冕，勞服皮弁者，勞禮輕於正禮也。侯氏亦皮弁者，賓主服宜同也。注云「郊，謂近郊，去王城五十里」者，《書序》：「命君陳分正東郊成周。」鄭云：「天子之國，近郊半遠郊，去國五十里。」與此注同。餘詳《聘禮》「及郊」下。云「則郊勞者，大行人也」者，此無正文，以凡諸侯人王，小行人逆勞於畿推而知之，故引《周禮·小行人職》文爲證也。必知郊是近郊者，以《聘禮》賓至近郊，主國使卿勞知也。《左傳》：「昭公如晉，

自郊勞至於贈賄，無失禮。」又遠啟疆曰：「人有郊勞。」《聘禮》：「勞賓於近郊。」是朝聘皆以郊勞爲重。竊謂近郊之勞，五等諸侯皆有之。《大行人》曰：「上公三勞，侯伯再勞，子男一勞。」或侯伯加以遠郊勞，上公加以畿勞。爵尊者其勞遠，爵卑者其勞近，禮宜然也。下經「賜侯氏以車服」，明言使諸公，此但云使人者，以五等諸侯爵位不同，使人亦異，故渾言之也。《白虎通》曰：「諸侯將至京師，使人通命於天子。天子遣大夫迎之百里之郊，遣世子迎之五十里之郊矣。」又引《尚書大傳》曰：「天子太子年十八曰孟侯，於四方諸侯來朝迎於郊。」案：此鄭所不用，蓋以諸經無使世子郊迎法也。《考工記·玉人》曰：「案：十有二寸，棗栗十有二列，諸侯純九，大夫純五，夫人以勞諸侯。」鄭注：「夫人，王后也。勞朝諸侯皆九列，聘大夫皆五列，則十有二列者，勞二王之後也。」又《聘禮》夫人勞以二竹簋方，其實棗蒸栗擇。據此則王后亦當有勞，經不言可知也，互詳《聘禮》。云「皮弁者，天子之朝朝服也」者，《周禮·司服》云：「眡朝則皮弁服。」此天子常朝之服也。以常朝之服勞侯氏，亦如《聘禮》諸侯以朝服勞聘賓也。云「璧無束帛者，天子之玉尊也」者，下經侯氏行享皆束帛加璧，此用璧而不用束帛，特之所以重其事也。敖氏云：「璧無束帛，

別於享禮，且爲其當還之也。」云「不言諸侯，言侯氏者，明國殊舍異，禮不凡之也」者，五等通曰諸侯，此曰侯氏，就來觀之一人言之，故云「不凡之也」。云「郊舍狹寡，爲帷宮以受勞。」《掌舍職》曰「爲帷宮，設旌門」者，據《聘禮》受勞於舍門內，此云「帷門」，不云「舍門」，則知別爲帷宮以受勞矣。以天子使勞，徒旅衆多，郊舍恐不足以容之也。引《掌舍》文者，取證帷宮之事，非以旌門爲帷門也。彼注云：「張帷爲宮，則樹旌以表門。」褚氏云：「帷宮而旌門，天子之制也。帷宮而帷門，諸侯之制也。既有門，則未有不圍其四旁以象宮者。」語最分析。敖氏謂帷門不爲宮，非矣。使者不荅拜，遂執玉，三揖。至于階，使者不讓，先升。侯氏升聽命，降，再拜稽首，遂升受玉。不荅拜者，爲人使不當其禮也。不讓先升，奉王命尊也。升者，升壇。使者東面致命，侯氏東階上西面聽之。【疏】正義曰：注「西面聽之」，毛本「面」誤「向」。○王氏《紉解》云：「上云『璧』，此云『玉』，凡圭璋璧琮琥璜皆玉爲之，故總稱玉。下文莫圭稱瑞玉，加璧稱撫玉，皆其義也。《禮經釋例》云：『凡人門將右曲揖，北面曲揖，當碑揖，謂之三揖。此於郊爲帷宮，非若寢廟有碑，而亦三揖，

蓋將右曲揖，北曲揖，至於中庭又揖歟？三揖皆在入帷門之後，經不云入門，文不具也。」《紉解》云：「經著『再拜稽首』之文凡十一次，此受玉與還璧及下受賜舍、受戒日四次皆未親覲王而先凜咫尺也。」張氏惠言《儀禮圖》云：「經言『遂升受玉』，則不升成拜也。下還玉亦同。」注云「不荅拜者，爲人使不當其禮也」者，詳《士昏禮》「納采」下。姜氏兆錫、吳氏廷華皆以奉王命尊故不荅，與下「不讓先升」同。今案：《昏禮》納采，主人迎於門外再拜，賓不荅拜。彼夫家與女家尊同，賓又何爲不荅拜乎？姜、吳之說非矣。下經賜侯氏車服，侯氏迎於外門外，再拜，經不云荅拜，則亦不荅拜也。云「不讓先升，奉王命尊也」者，凡讓而先升者，敵禮。下僨使者，侯氏與之讓升，侯氏先升是也。此時奉王命來，則使者尊，故不讓先升。王氏《紉解》云：「《禮》《冠》、《昏》、《鄉射》、《聘》、《食》，三揖時皆有三讓法。此王使尊，不讓，故特著之。」云「升者，升壇者，以帷宮無堂，故知升爲升壇也。必知帷宮有壇者，襄二十八年《左傳》云：『子產相鄭伯以如楚，舍不爲壇。』」注云：「至敵國郊，除地封土爲壇，以受郊勞。」是也。又宣十八年傳：「子家壇帷復命于介。」壇、帷連言，則帷宮內有壇明矣。云「使者東面致命，侯氏東階上西面聽之」者，以下經賜車服，諸公升自

西階，東面，侯氏升西面，知此亦然也。○敖氏謂升就使者，北面訝受之。秦氏蕙田《五禮通考》云：「侯氏受玉之位當在西面，與使者相竝。下云『使者左還而立』，是使者於授玉之後方南面，明是時猶東面也。敖氏以爲北面訝受，非是。」使者左還而立，侯氏還璧，使者受。侯氏降，再拜稽首，使者乃出。左還，還南面，示將去也。立者，見侯氏將有事於己，俟之也。還玉，重禮。【疏】正義曰：「璧」，毛本誤「壁」，嚴本亦誤。○還璧，注不言面位，張氏《儀禮圖》云：「當北面，以使者南面也。」蔡氏德晉《禮經本義》云：「前降拜，受玉也。後降拜，送玉也。」或曰：前降拜，拜王命也。後降拜，拜王勞己也。「使者乃出」，勞禮畢也。注云「左還，還南面，示將去也」者，謂由東面轉而南面，以示將去也。敖氏謂左還東面，非是。敖氏蓋以使者授玉時南面，故左還爲東面也。不知由南面轉而東面是右還，非左還矣。云「立者，見侯氏將有事於己，俟之也」者，謂南面少立以俟還璧也。云「還玉，重禮」者，《聘禮》勞用束帛不還，此《覲》用璧則還之。《聘義》曰：「已聘而還圭璋，此輕財而重禮之義也。」賈疏云：「此以天子之璧不加束帛，尊之與圭璋同，故亦還之，爲重禮也。」

侯氏乃止使者，使者乃入。侯氏與之讓升。侯氏先升，授几。侯氏拜送几，使者設几，荅拜。侯氏先升，賓禮統焉。几者，安賓，所以崇優厚也。上介出止使者，則已布席也。【疏】正義曰：注「出止使者」，毛本「出」誤「正」。《校勘記》云：「張氏曰：『注曰則已布席也，按杭本已作已，從杭本。』案：嚴、徐、鍾本、《集釋》俱作「已」。○敖氏云：「有司既布席，侯氏乃出止使者。止，止其去也。且迎而欲饋之，使者亦禮辭許。侯氏揖先入，使者乃入也。既入不言「三揖」者，如上禮可知。讓升，侯氏與使者三讓而先升。使事既畢，則行賓主禮也。饋而用几，尊王使也。授几設几之儀，見於《昏禮》、《聘禮》及《少牢》下篇，此經文略也。」注云「侯氏先升，賓禮統焉」者，李氏如圭《儀禮集釋》云：「統者，統於主人。以此時侯氏爲主人也。《曲禮》：「主人與客讓登，主人先登，客從之。」孔疏：「主人先登，亦肅客之義。」又云：「《聘禮》歸饗餼，賓設禮饋大夫，賓升一等，大夫從升，以賓作主人故也。此亦然。」云「几者安賓，所以崇優厚也」者，案：《有司徹》「受宰几」，注云：「几所以坐，安體。」此使者不坐而亦設几優之，又對《聘禮》「饋勞者無几爲優厚也。云「上介

出止使者，則已布席也」者，楊氏復《儀禮圖》云：「設几則必有席，蓋几，席相將，無席何以設几？故知上介出止使者時已布席也。」經云「侯氏乃止使者」，不云「上介」，注云「上介出止」者，蓋侯氏先使上介出止之，繼乃自出迎賓人也。張氏惠言《儀禮圖》云：「司儀，諸侯相朝勞皆有摯介傳辭，則此亦陳摯介可知也。」侯氏用束帛，乘馬饋使者，使者再拜受。侯氏再拜送幣。饋使者，所以致尊敬也。拜者各於其階。【疏】正義曰：王氏士讓《儀禮細解》云：「《聘禮》饋勞者以束錦不以束帛，以乘皮不以乘馬，錦文而帛質，皮輕而馬重，覲崇於聘也。」今案：使者拜受，侯氏拜送，皆再拜，同爲王臣，敵也。注云「饋使者，所以致尊敬也」者，案：饋，主人待賓之禮，此及下賜舍、賜車服皆有饋者，所以致尊敬之意。云「拜者各於其階」者，謂侯氏與使者行敵禮，若《鄉飲》、《鄉射》賓於西階上拜，主人於阼階上拜也。使者降，以左驂出。侯氏送于門外，再拜。侯氏遂從之。駢馬曰驂。左驂，設在西者。其餘三馬，侯氏之士遂以出，授使者之從者於外。從之者，遂隨使者以至朝。【疏】正義曰：注「其餘三馬」，《校勘記》云：「徐、陳、閔、葛、《通解》、楊氏俱作

「二」，《集釋》作「三」，與疏合。今案：嚴本作「三」，毛本同。○注云「駢馬曰驂」者，《說文》：「駢，驂也，旁馬也。」馬之在旁者謂之駢，亦謂之驂。《詩·小戎》鄭箋：「驂，兩駢也。」孔疏：「車駕四馬，在內兩馬謂之服，在外兩馬謂之駢。」兩駢即兩驂也。云「左驂，設在西」者，①馬在庭，北首，以西爲左。左驂，最西一馬也。云「其餘三馬，侯氏之士遂以出，授使者之從者於外」者，案：《聘禮·記》：「主人之庭實，則主人遂以出，賓之士訝受之。」注：「此謂餘三馬也，左馬賓執以出矣。」據此知餘三馬，主人使人牽之從賓出，以授賓之從者於門外也。此侯氏僎使者，侯氏爲主人，使者爲賓也。云「從之者，遂隨使者以至朝」者，約《聘禮》「下大夫勞者遂以賓人至於朝」知之。高氏愈云：「遂從之」者，以天子勞使既至，故不敢即安而急趨王所也。」

右王使人郊勞

天子賜舍。以其新至，道路勞苦，未受其禮，且使即安也。賜舍，猶致館也，所使者司空與？小行人爲承擯。今文「賜」皆作「錫」。【疏】正義曰：注「作」上，毛本脫「皆」字。《校勘記》云：「嚴本、《集釋》俱有「皆」字。」○此

舍與下「受舍於朝」之舍異。蔡氏云：「賜舍之舍，館舍也，有屋宇。受舍之舍，次舍也，以帷幕爲之。」②注云「以其新至，道路勞苦，未受其禮，且使即安也」者，李氏云：「聘禮」賓至即欲受之者，主人之禮。《覲禮》「且使即安」者，君上之惠。云「賜舍，猶致館也」者，案：館，舍通稱。《曾子問》：「有司所授舍，則公館已。」是館亦稱舍也。此「賜舍」與《聘禮》「致館」一也，義互詳。彼但聘是鄰國之臣，此是己臣，故云「賜」耳。云「所使者司空與」者，《聘禮》卿致館，此司空亦卿，故云「司空歟」。必知是司空者，《國語》《周禮》敵國賓至，司里授館。先大父樸齋先生《儀禮釋官》云：「據《國語》云：『營室之中，土功其始，火之初見，期於司里。』則司里當爲司空之屬，主營宮室者。客館亦宮室之事，故司空致之，而其屬司里授之也。」云「小行人爲承擯」者，此致館亦陳擯介。《周禮·小行人職》曰：「及郊勞，眠館將幣，爲承而擯。」是也。云「今文「賜」皆作「錫」者，胡氏承珙《儀禮古今文疏義》云：「案：賜，正字。錫，假借字。皆者，皆下文「賜伯父舍」也。」曰：「伯父，女順

①「左」，原作「在」，今據上鄭注改。
②「帷幕」，原作「爲幕」，今據《儀禮訓解》改。

命于王所，賜伯父舍。」此使者致館辭。【疏】正義

曰：《校勘記》云：「唐石經脫『曰』字。」今案：嚴本及各本

俱有。○下文有伯父、叔父、伯舅、叔舅之稱，此云「伯父」

者，舉以概其他也，下經言「伯父」同。此「女」與「汝」通。

凡諸侯朝覲之禮，皆天子命之，故言順命而來也。《春秋》

曰：「公朝於王所。」敖氏曰：「賜舍不用幣，尊者之禮

也。」注云「此使者致館辭」者，使者當即司空也。吳氏

廷華《儀禮疑義》云：「此當是賓者傳辭，然後使者帥至於

館。」非是。王氏《紉解》云：「侯氏至朝，其時天子即降賜

舍之命。於是帥至於舍，而司空乃宣是命辭於舍門外焉。

《聘禮》：「大夫帥至於館，卿致館。」可推也。」侯氏再拜

稽首。受館。【疏】正義曰：謂拜受館也。賓之束

帛、乘馬。王使人以命致館，無禮，猶賓之者，尊王使

也。侯氏受館於外，既則賓使者於內。【疏】正義曰：注

「猶賓之者」，《校勘記》云：「賓，徐、陳、閩、葛俱作『賓』，

誤。」今案：嚴本不誤。注云「王使人以命致館，無禮，猶

賓之者，尊王使也」者，對上郊勞言也。郊勞用璧，是有禮。

此空致館辭，無物以將之，是無禮也。「猶賓之者」，以王使

為尊，尊王使即尊王命也。敖氏云：「注云『禮』，謂禮物。」

是也。云「侯氏受館於外，既則賓使者於內」者，外謂館舍

門外，內謂館內。據上郊勞，賓使有出入、升降、拜受、拜送

之節，其禮不可行之於外，此賓使者亦當如之。經但言「束

帛、乘馬」，省文耳。敖氏謂賓之亦在舍門外。褚氏云：

「注言『受於外』者，受而後即館也。受舍後豈有賓於門外之

理？敖誤甚。」

右王賜侯氏舍

天子使大夫戒，曰：「某日，伯父帥乃初

事。」大夫者，卿為訝者也。《掌訝職》曰：「凡訝者，賓客

至而往，詔相其事。」戒，猶告也。其為告，使順循其事也。

初，猶故也。古文「帥」作「率」。【疏】正義曰：張氏爾岐

云：「此下言將覲之事。王使人告覲期，諸侯先期受次於

廟，凡二事。」○注「卿為訝者也」，《校勘記》云：「陸氏曰：

「卿或作鄉，非。」張氏曰：「監、巾箱、杭本皆作鄉。從《釋

文》、嚴本。『今文帥作率』，『今』，嚴本作『古』。」今案：《聘

禮》「帥衆介夕」、「帥大夫以入」，鄭兩注皆云「古文『帥』作

「率」，則此注他本作「今文」，誤也，當從嚴本。○蔡氏

云：「某日，告以覲日也。」注云「大夫者，卿為訝者也」

者，案：《周禮·掌訝職》曰：「凡賓客，諸侯有卿訝，卿有大夫訝，大夫有士訝，士皆有訝。」鄭注：「此謂朝覲聘問之日，王所使迎賓客於館之訝。」據此則諸侯朝覲之日有卿爲訝，故鄭云「卿爲訝者也」。又引《掌訝職》曰：「凡訝者，賓客至而往，詔相其事」者，取以證使戒之義。案：此「詔相其事」之訝，亦即上云「卿爲諸侯訝，大夫爲卿訝」之類，非謂掌訝也。經但云「使大夫戒」，鄭知大夫是卿爲諸侯訝者，以此訝主迎賓客於館，故告覲日使之也。云「戒，猶告也。其爲告，使順循其事也」者，《公食禮》：「使大夫戒。」注：「戒，猶告也。」與此同。《爾雅·釋詁》：「率，循也。」率與帥同。《國語》：「帥長幼之序。」韋注：「帥，循也。」帥又有順意，《逸周書·大匡解》：「諸侯咸率。」孔注：「率，謂奉順也。」鄭以順、循二字解經帥字，謂其所爲告者，告之使順循其事也。云「初，猶故也」者，初有始義，又有故義。《禮記·檀弓》：「夫魯有初。」鄭注：「初，謂故事也。」此「帥乃初事」，亦即帥循故事之謂，非始事，故鄭以故解之。云「古文『帥』作『率』」者，詳《聘禮》「帥衆介夕」下。侯氏再拜稽首。受覲日也。【疏】正義曰：謂拜受告覲日之命也。

右王戒覲期

諸侯前朝，皆受舍于朝。同姓西面北上，異姓東面北上。言諸侯者，明來朝者衆矣。顧其人覲，不得竝耳。受舍於朝，受次於文王席門之外。《聘禮·記》曰：「宗人受次，次以帷，少退於君之次。」則是次也。言舍者，尊舍也，天子使掌次爲之，諸侯上介先朝受焉。此覲也言朝者，覲遇之禮雖簡，其來之心猶若朝也。分別同姓異姓，受之將有先後也。《春秋傳》曰：「寡人若朝于薛，不敢與諸任齒。」則周禮先同姓。【疏】正義曰：《校勘記》云：「注『受舍於朝』，『於』，重脩監本誤作『子』。『次以帷』，徐、陳、閩本『帷』俱作『惟』，誤。葛本亦作『帷』。」今案：嚴本作「帷」，毛本同。又「聘禮」下，嚴本無「記」字，《集釋》有，毛本亦有。○前朝，謂先覲日也。朝，猶覲也，與下「受舍於朝」之「朝」異。蔡氏云：「同姓西面，從主人之位。異姓東面，從賓位也。」今案：皆北上者，以近王爲尊也。《曲禮》曰：「諸侯北面而見天子曰覲。」此云「西面」、「東面」者，謂廟門外爲位時，其人見則皆北面耳。注云「言諸侯者，明來朝者衆矣。顧其人覲，不得竝耳」者，上言侯氏祇就一人言之，此云「諸侯」，又云「皆」者，依《周禮》六服四時分來，則同時人覲者必多，其行之有次序，不得竝，故須前期受舍，以防凌越也。云「受舍於朝，受次

於文王廟門之外」者，賈疏謂：「《聘禮》待聘賓在桃，天子待覲遇亦當在桃。《祭法》云天子七廟，有二桃。《周禮》守桃」鄭注：「遷主所藏曰桃。穆之遷主，藏於文王廟。昭之遷主，藏於武王廟。」今不在武王廟而在文王廟者，父尊而子卑，故在文王廟也。」今案：鄭注《聘禮》云：「待賓客上尊者。」賈說是矣，但未明言「受舍於朝」為何朝，致滋後人議論。李氏心傳云：「受舍於朝，所謂外朝也。」後人以外朝去廟門甚遠，疑鄭說為未確。考《曲禮》孔疏云：「凡天子三朝，其一在路門內，謂之燕朝，太僕掌之。其二是路門外之朝，謂之治朝，司士掌之。其三是皋門之內，庫門之外，謂之外朝，朝士掌之。」又《周禮》：「小宗伯掌建國之神位，右社稷，左宗廟。」鄭注謂：「庫門內，雉門外之左右。」非也。劉氏敞《天子五門議》云：「禮說天子五門，曰皋門，曰庫門，曰雉門，曰應門，曰路門。此有五門之名，無五門之實。以《詩》、《書》、《禮》、《春秋》考之，天子有皋門，無庫門；有應門，無雉門；有畢門，無路門。諸侯有庫門，無皋門；有雉門，無應門；有路門，無畢門。天子三門，諸侯三門，門同也而名不同，三同也而制不同。何以言之邪？《詩》曰：『乃立皋門，皋門有伉，乃立應門，應門將將。』《書》曰：『二人雀弁執惠，立于畢門之內。』又曰：『王出在

應門之內。』此皆道天子之禮者也，無道庫門、雉門者，非天子門故也。《明堂位》曰：「庫門，天子皋門。雉門，天子應門。」此言魯之庫門制如皋門，魯之雉門制如應門也。魯用王禮，故門同王門，其制雖同而名不同也。《春秋》曰：「雉門及兩觀災。」雉門，諸侯之禮。諸侯有路寢，路寢之門是謂路門。此諸侯三門也，無道皋門、應門、畢門者，非諸侯門故也。天子三朝，諸侯三朝，天子治朝在應門之內，諸侯治朝在雉門之內，其建國之神位，左宗廟，右社稷，皆夾治朝。此《春秋》所云「間于兩社，為公室輔」者也。仲尼助祭於廟，事畢，出遊觀之上。觀者，雉門也。祭畢而出遊，乃得至觀之上，明廟在治朝之左，雉門之內也。」戴氏震作《三朝三門考》，說與劉略同，亦舉五事證宗廟社稷在中門內路門外之左右，其說甚確。詳《聘禮》「公揖入，每門每曲揖」下。然則受舍於朝，即治朝也。廟在治朝之左，故鄭云「受次於文王廟門之外」也，李氏以朝為外朝，非矣。《樂記》曰：「祀乎明堂而民知孝，朝覲然後諸侯知所以臣。」鄭注：「文王之廟為明堂制。」是其意亦以覲為在文王廟也。云「《聘禮》·記曰『宗人授次，次以帷，少退於君之次』」者，引之以證此舍為次舍也。褚氏云：「廟門外豈能容許多廬舍，故注以為帷次。敖氏以舍為廬舍，非是。」又云：「春夏

朝宗，受摯於朝，受享於廟，則設次於大門外，而廟門外無次。秋冬覲遇，一受之於廟大門外，不須次，而廟門外有次。」說本賈疏。云「則是次也，言舍者，^①尊舍也」者，以其受自王朝，尊之，故言舍也。云「天子使掌次爲之，諸侯上介先朝受焉」者，《周禮·掌次》：「諸侯朝覲則張大次小次。」是次係天子使張之，有定處，諸侯使上介先朝受焉也。知上介受者，以下經有「上介皆奉其君之旂置于宮」之文，知此亦上介也。云「此覲也，言朝者，覲遇之禮雖簡，其來之心，猶若朝也」者，釋經稱朝之意也。云「分別同姓異姓，受之將有先後也。《春秋傳》曰「寡人若朝于薛，不敢與諸任齒」，則周禮先同姓」者，言次位如此分別者，爲將來受覲有先後之序也。《左傳》隱十一年：「滕侯、薛侯來朝，爭長。公使羽父請于薛侯曰：『周之宗盟，異姓爲後。寡人若朝于薛，不敢與諸任齒。』」是其先同姓之禮也。《曲禮》孔疏云：「《覲禮》同姓西面，異姓東面。鄭注「受之將有先後也」，則是《覲禮》之法先同姓，後異姓。若然，案：《檀弓》注云「朝覲爵同同位」，則爵尊先見。《覲禮》見不同者，二文雖異，其意則同。就爵同之中，先受同姓之朝。周之盟會，亦先同姓也，故定四年祝佗稱踐土之盟載書云：「晉重、魯申、蔡甲午、鄭捷、齊潘。」鄭雖小國，而在齊上

也。」王氏士讓云：「同異姓皆北上，則同異姓又各以其爵爲序：公居上，侯次之，伯次之，子男又次之，相繼而南也。」

右受次於廟門外

侯氏裨冕，釋幣于禰。將覲，質明時也。裨冕者，衣裨衣而冠冕也。裨之爲言埤也。天子六服，大裘爲上，其餘爲裨，以事尊卑服之，而諸侯亦服焉。上公衮無升龍，侯伯鷩，子男毳，孤絺，卿大夫玄，此差，司服所掌也。禰，謂行主，遷主矣，而云禰，親之也。釋幣者，告將覲也。其釋幣，如聘大夫將受命釋幣于禰之禮。既則祝藏其幣，歸乃埋之於桃西階之東。今文「冕」皆作「纁」。【疏】正義曰：張氏爾岐云：「此下至『升成拜降出』，備言入覲之事。質明，先以將覲告行主，乃入覲，以瑞玉爲贊，次行三享，次肉袒請罪，凡三節。王勞之，乃出。」○《校勘記》云：「裨」，閩、監俱誤從「示」，注竝同。又注「上公衮」，監本「衮」誤作「裘」。「孤絺」，陸氏曰：「絺，劉本作希。」案：

①「言」上，原衍「言」字，今刪。

《司服》注讀「希」爲「絺」，以「希」爲字之誤。『今文冕皆作絺』，注未嚴本有此六字，與單疏標目合，今本俱脫，徐本亦脫。案：「作」，單疏標目作「爲」。『今案：《集釋》亦有此六字。』注云「將覲，質明時也」者，謂覲之日質明時釋幣也。

《聘禮》：「賓厥明釋幣于禰。」云「裨冕者，衣裨衣而冠冕也」者，是釋裨、冕二字之義。五等諸侯，袞、鷩、毳服不同，而統名爲裨衣。先鄭注《司服》專以裨衣爲鷩，故後鄭不從也。云「裨之爲言裨也」者，《說文》：「裨，益也。裨，增也。增，益也。」裨、裨皆訓爲益。鄭以《詩》云「政事一埤益我」，裨之爲益，其義較顯，故以裨釋裨也。云「天子六服，大裘爲上，其餘爲裨，以事尊卑服之，而諸侯亦服焉。上公袞無升龍，侯伯鷩，子男毳，孤絺，卿大夫玄，此差司服所掌也」者，《周禮·司服》云：「王之吉服，祀昊天上帝，則服大裘而冕，祀五帝亦如之。享先王則袞冕，享先公、饗、射則鷩冕，祀四望山川則毳冕，祭社稷五祀則希冕，祭羣小祀則玄冕。」鄭注：「六服同冕者，首飾尊也。《書》曰：『予欲觀古人之象，日、月、星辰、山、龍、華蟲，作繡；宗彝、藻、火、粉米、黼、黻，希繡。』此古天子冕服十二章，舜欲觀焉。希讀爲絺。王者相變，至周而以日月星辰畫於旌旗，所謂「三辰旌旗，昭其明也」。而冕服九章，登龍於山，登火於宗彝，尊

其神明也。九章：初一日龍，次二曰山，次三曰華蟲，次四曰火，次五曰宗彝，皆畫以爲繡；次六曰藻，次七曰粉米，次八曰黼，次九曰黻，皆希以爲繡。則袞之衣五章，裳四章，凡九也。鷩畫以雉，謂華蟲也，其衣三章，裳四章，凡七也。毳畫虎雉，謂宗彝也，其衣三章，裳二章，凡五也。希刺粉米，無畫也，其衣一章，裳二章，凡三也。玄者，衣無文，裳刺黻而已，是以謂玄焉。凡冕服皆玄衣纁裳。《司服》又云：「公之服，自袞冕而下如王之服。侯伯之服，自鷩冕而下如公之服。子男之服，自毳冕而下如侯伯之服。孤之服，自希冕而下如子男之服。卿大夫之服，自玄冕而下如孤之服。」是鄭所據以爲差也。《禮記·曾子問》：「大祝裨冕執束帛。」鄭注：「諸侯之卿大夫所服裨冕，絺冕也，玄冕也。」案：《周禮》孤服絺冕，卿大夫止服玄冕。此注統言卿大夫者，孔疏云：「《周禮》謂三孤六卿爲九卿，是卿名通於孤也。」《曾子問》又云：「諸侯適天子，冕而出視朝。」鄭注：「諸侯朝天子，必裨冕，爲將廟受也。裨冕者，公袞，侯伯鷩，子男毳。」《玉藻》：「諸侯裨冕以朝。」鄭注：「朝天子也。裨冕，公袞，侯伯鷩，子男毳也。」《樂記》：「裨冕摺笏。」鄭注：「裨冕，衣裨衣而冠冕也。裨衣，袞之屬也。」孔疏云：「袞之屬，謂從袞冕之衣以下皆是也。」是鄭解裨冕

俱與此注同。李氏如圭《儀禮集釋》云：「衮者，卷龍衣也。上公亦服之，以無升龍爲異。」《鄭志》云：「大裘之上又有玄衣，與裘同色，亦是無文采。」是鄭意以大裘、玄衣爲上，其衮驚毳以下俱是附益之衣，故名裋衣。但天子享祀饗射亦隨事服之，不名爲裋，唯諸侯及大夫服之乃名裋者，蓋以爲此所服者俱是天子附益之衣，非上衣，亦猶金路、象路、革路、木路之稱偏駕，有不敢自同於尊之意。或因下注有「衮衣者，裋之上也」一語，遂疑裋冕當指驚冕以下言之，不知注意謂裋冕有五，衮冕爲上，猶之衮冕爲首云耳，非以衮與裋較，謂衮冕在裋冕之上也。敖氏直以裋冕爲公驚，侯伯毳，子男希，又云此朝以裋冕與《周官·大行人》異。褚氏云：「《玉藻》『裋冕以朝』，鄭注『裋冕，公衮，侯伯驚，子男毳』，與《大行人職》所云『上公冕服九章，侯伯七章，子男五章』同也。」盛氏云：「上公衮冕九章，侯伯驚冕七章，子男毳冕五章，皆其上服也。而謂之裋者，據王而言，猶下記以金路而下爲偏駕也。」《玉藻》亦云：「諸侯玄冕以祭，裋冕以朝。」是《三禮》所言合矣。「侯氏裋冕」，爲將朝也。「釋幣」，則因事而服之耳，故與正祭異也。褚氏云：「諸侯自祭玄冕，而朝王何以服上服？尊天子也。然不各指其冕名而均曰裋者，言其最上服猶是天子之裋云爾，尊君抑

臣之義也。」又云：「裋字之義，當從注訓爲裋，不當如楊倞訓爲卑。」今案：楊氏倞注《荀子·富國》、《禮論》等篇，俱是直用鄭此注「裋之言卑也」。「卑」字當是「裋」字之誤，後人因《禮論》有卑冕之文，誤改「裋」爲「卑」，不知卑冕即裋冕，楊注已破卑爲裋矣。云「裋，謂行主、遷主矣，而云裋，親之也」者，《禮記·曾子問》曰：「孔子曰：『天子巡守以遷廟主行，載於齊車，言必有尊也。』」此遷主也。又：「曾子問曰：『古者師行無遷主，則何主？』」孔子曰：「主命。」問曰：「何謂也？」孔子曰：「天子諸侯將出，必以幣帛皮圭告於祖禰，遂奉以出，載於齊車以行。」此所謂「主命」，即行主也。《文王世子》「守於公禰」，鄭注：「公禰，行主也。行以遷主，言禰在外，親也。」是其言親之意。但彼注及此注先言行主，似兼主命在內。蓋謂若初封之侯無遷主，則所載必主命也。章氏平云：「經云『禰』，蓋姑設未有遷主而載主命者言之。」今案：《曾子問》明云：「諸侯適天子必告於祖，奠於禰。」既奠告於祖禰，則必奉奠告之幣帛皮圭以行可知，是經言「禰」之意也。云「釋幣者，告將觀也」者，謂因以將觀告禰而行釋幣之禮也。郝氏敬云：「古者天子受覲於廟，所以昭先烈也。諸侯入覲告禰，所以述先職也。」云「其釋幣，如聘大夫將受命釋幣於禰之禮。既

則祝藏其幣，歸乃埋之於桃西階之東者，案：《聘禮》不言桃，此注言桃者，諸侯以始祖廟爲桃，遷主藏焉，故言桃，與大夫異也。又案：《曾子問》云：「反必告設奠，卒斂幣玉，藏諸兩階之間。」此雖指將出告奠之幣玉言，其覲日所釋之幣當亦歸埋於兩階間也。西階之東，即兩階間也。餘詳《聘禮》。敖氏云：「釋幣之禮，筵几于其館堂戶牖之間，南面。祝升自西階，君升自阼階，祝奠幣于几下，君北鄉，祝在左，君及祝再拜，興。祝曰：『孝嗣侯某，將覲天子，敢用嘉幣告于皇考某侯。』又再拜，君就東箱，祝就西箱，有間，君反位，祝乃取幣藏之。君反于阼，乃降而遂出也，歸則埋幣于禰廟西階之東。」王氏士讓云：「敖氏約《聘禮》、《特牲》、《少牢》諸篇爲此儀，所謂推而致於諸侯之說也。」今竝錄之。云「今文『冕』皆作『統』」者，胡氏承珙云：「《說文》：『冕，大夫以上冠也，從月，免聲。統，冕或從糸。』」段氏玉裁云：「《覲禮》注云：今文冕皆作統。許或之者，許意從古文也。統字亦見《管子》、《淮南子》、《逸周書》、《封禪書》。」案：鄭出今文於注，意正與許同。「乘墨車，載龍旂、弧韞，乃朝以瑞玉，有纁。墨車，大夫制也。乘之者，人天子之國，車服不可盡同也。交龍爲旂，諸

侯之所建。弧，所以張縵之弓也，弓衣曰韞。瑞玉謂公桓圭、侯信圭、伯躬圭、子穀璧、男蒲璧。纁，所以藉玉，以韋衣木，廣袤各如其玉之大小，以朱白蒼爲六色。今文「玉」爲「圭」，「纁」或爲「璵」。【疏】正義曰：《校勘記》云：「注『木』，葛本誤作『本』。『今文玉爲圭』，嚴本、《通解》俱作『圭』。」今案：毛本「圭」作「璧」。○乘墨車，覲之日自館舍乘此車以入覲也。龍旂、弧韞，載之於車也。朝，即覲也。《鄭志》云：「朝覲，四時通稱，故《覲禮》亦云朝也。」瑞玉，分封時所頒。《小行人》「成六瑞」，鄭注：「瑞，信也，皆朝見所執以爲信。」是也。有纁者，備奠玉也。注云「墨車，大夫制也」者，《周禮·巾車職》云：「大夫乘墨車。」此侯氏乘之，從大夫制也。敖氏云：「乘墨車，屈也。載龍旂，不沒其實也。」王氏士讓云：「墨車，加黑色而漆之，不畫者也。自士昏乘之爲攝盛，自人覲乘之則爲屈。」云「乘之者，人天子之國，車服不可盡同也」者，張氏爾岐云：「《巾車》云：『同姓金路，異姓象路，四衛革路。』各得天子五路之一。今乃乘大夫之墨車者，以金象等路皆在本國所乘，既入天子之國，方服裊冕以朝，不可更乘此車同於王者，故注

① 「系」下，原衍「作」字，今據《說文解字》刪。

云：「車服不可盡同也。」云「交龍爲旂，諸侯之所建」者，《周禮·司常》云：「交龍爲旂。」又云：「諸侯建旂。」鄭注：「諸侯畫交龍，一象其升朝，一象其下復也。」旂與旗別，旗畫熊虎也。云「弧，所以張縵之弓也，弓衣曰鞬」者，案：旂之正幅爲縵，張縵之弓曰弧，鞬弓之衣曰鞬。其縵外又有旂，綴於縵以爲飾。《考工記》：「弧旌枉矢，以象弧也。」鄭注引此文云：「旌旗之屬皆有弧也，弧以張縵之幅，有衣謂之鞬。又爲設矢，象弧星有矢也，枉矢蓋畫之。」《考工記》又云「龍旂九旂」，則旂有旂矣。《說文》：「鞬，弓衣也。」鄭注《既夕·記》及《少儀》，亦皆以鞬爲弓衣。《廣雅·釋器》云：「鞬，弓藏也。」王氏《疏證》云：「鞬之言鞬也。《內則》注：「鞬，鞬也。」今案：鞬與弋同。《說文》：「弋，弓衣也。」張氏曰：「弧鞬與龍旂並言，注以爲張縵之弓，仍是旂上一物，俟考。」盛氏世佐云：「龍旂，象文德也。弧，弓也。載弧，不忘武備也。」似以龍旂與弧鞬爲二。今案：《考工記》言弧旂於旂下，《明堂位》亦云「載弧鞬，旂十有二旂」，連屬言之，則弧即張旂之物明矣。《月令》之「帶以弓鞬」，自別爲一物，非旂上之弧也。云「瑞玉謂公桓圭、侯信圭、伯躬圭、子穀璧、男蒲璧」者，《周禮·典瑞》：「公執桓圭，侯執信圭，伯執躬圭，子執穀璧，男執蒲璧，以朝覲。」

宗遇會同於王。」是也。云「纁，所以藉玉，以韋衣木，廣袤各如其玉之大小，以朱白蒼爲六色」者，《聘禮·記》：「所以朝天子，圭與纁皆九寸，剡上寸半，厚半寸，博三寸，纁三采六等，朱白蒼。」是也。餘詳《聘禮·記》。云「今文「玉」爲「圭」，「纁」或爲「璵」者，胡氏承珙云：「言玉則兼圭璧，言圭嫌不見子男，故鄭從古文。」云「「纁」或爲「璵」者，詳《聘禮》「賈人西面坐啟牘，取圭垂纁」下。天子設斧依于戶牖之間，左右几。依，如今綈素屏風也。有繡斧文，所以示威也。斧謂之黼。几，玉几也。左右者，優至尊也。其席莞席紛純，加纁席畫純，加次席黼純。【疏】正義曰：《校勘記》云：「注『有繡斧文』，「繡」，徐、陳、閩、葛俱作「屏」。《集釋》、《通解》、楊、敖俱作「繡」，與疏合。」今案：嚴本作「繡」。○《周禮·司几筵》：「凡大朝覲，大饗射，凡封國命諸侯，王位設黼依，依前南鄉。」是斧依司几筵設之。此云「天子設斧依」者，言天子之制如是，猶云「王位設黼依」云爾。下文「天子衮冕負斧依」，乃言見諸侯之事。斧，亦作黼。依，亦作扆。鄭義以天子廟制如明堂，此云「于戶牖之間」，則仍是中央室左右房之制，非明堂五室之制，詳下記「凡俟于東箱」下。所云「戶牖之間」者，據堂後之室言之。古人宮室之制，前爲堂，後爲室，室之左右爲東

房西房。房有戶而無牖，室則戶牖俱有。戶在東，牖在西，皆在室之南壁，向堂開之，故堂上以室爲中。而室戶之西，室牖之東又爲室外正中之地，堂上以此爲尊位，故設斧依於此。《爾雅·釋宮》：「牖戶之間謂之扆。」郭注：「窗東戶西。」窗即牖也。牖之東，戶之西，即所謂「戶牖之間」也。《書·顧命》云：「狄設黼衣綴衣，牖間南嚮。」邵氏晉涵《爾雅正義》云：「牖間，即戶牖之間，舉牖以該戶。」是也。《士昏禮》：「主人筵于戶西。」鄭注：「戶西者，尊處。」是戶西，亦即此戶牖之間也。《明堂位》：「天子負斧依」，鄭注亦以斧依在戶牖間，孔疏引皇氏云在明堂中央，大室戶牖間，此說非也。明堂爲五室之制，與此經所言廟制殊，每室四戶八牖，一戶有兩牖夾之，所謂兩夾窗也。戶在中，牖在戶之兩旁，則戶牖間不得爲正中，故經但言「負斧依」，不言戶牖之間，鄭據此經推之，疏矣。「左右几」者，謂斧依之左右皆設几也。注云「依，如今綈素屏風也。有繡斧文，所以示威也」者，案：鄭注《司几筵》云：「斧謂之黼，其繡白黑文，以絳帛爲質。依，其制如屏風。」然《明堂位》注云：「斧依爲斧文屏風。」邵氏《爾雅正義》云：「鄭屢以屏風況依者，據漢制言之。《釋名》云：『扆，倚也，在後所依倚也。』屏風，言可以屏障風也。」是鄭以屏風釋依，而《詩·公劉》疏乃

云：「斧者，屏風之名。扆則戶牖之間地。」誤矣。《漢書·文帝紀》：「身衣弋綈。」注：「弋，阜也，黑色也。」《賈誼傳》又云：「身衣皐綈。」是漢之綈多黑色。素，白也。漢之綈素屏風有似周之依，爲白黑文，故云「如今綈素屏風也」。或曰綈，《說文》云「厚繒也」。素，不畫也。《魏志》：「太祖平柳城，頒所獲器物，有素屏風，特以賜毛玠。」漢之素屏風以綈爲之，故云「綈素屏風」與？又鄭注《司几筵》云「以絳帛爲質」，謂以絳爲地而施白黑於其上也。王氏鳴盛《尚書後案》云：「周人尚赤。黼衣，天子之位，當用所尚正色，故以絳。絳，正赤色也。」今案：以白黑文繡斧形於依上，故字作斧，又作黼，賈氏《周禮疏》及此疏謂據繡次言之。《考工記》云：「白與黑謂之黼。」故云黼，據文體形質言之，近刃白，近鋸黑，則曰斧是也。《爾雅·釋器》曰：「斧謂之黼。」郭注：「黼文，畫斧形，因名。」是二字得通用。又依《書·顧命》及《爾雅》作扆，三禮多作依，扆有依倚義，故字亦得通用也。《王制》：「諸侯賜鈇鉞然後殺。」《中庸》：「不怒而民威於鈇鉞。」鉞即斧也，是斧有威義，故鄭云「所以示威」。賈氏《周禮疏》以爲取斷割之義，失鄭意矣。聶氏《三禮圖》引舊《圖》云：「依，從廣八尺，畫斧無柄，設而不用之義。」邵氏《爾雅正義》云：「《大雅·公劉》：『既登

乃依。」鄭箋云：「登堂負依。」《士虞禮·記》：「佐食無事則出戶，負依南面。」鄭注云：「戶牖之間謂之依。」是天子諸侯以及士皆設依，天子唯畫斧文爲異耳。」云「几，玉几也」者，據《司几筵》「左右玉几」及《顧命》「馮玉几」諸文而知也。云「左右設几，優至尊也」者，《儀禮》凡爲神設几右之，《少牢饋食禮》「祝設几于筵上右之」是也。爲人設几左之，《有司徹》「尸奠几于筵上左之」是也。此左右竝設，是優尊之意。郝氏敬曰：「神几尚右，人几尚左。左右兼設，以安至尊，爲神人共主也。」云「其席莞席紛純，加纁席畫純，加次席黼純」者，《周禮·司几筵》云：「王位設黼依，依前南鄉，設莞筵紛純，加纁席畫純，加次席黼純，左右玉几。」凡設几必先布席，此經言几不言席，略之，故鄭據《司几筵》之文補之也。彼言「莞筵」，此注言「莞席」，筵與席一物。對文近地爲筵，以上加之爲席，散則通耳。餘詳《公食大夫禮》。天子衮冕，負斧依。衮衣者，裨之上也。纁之，繡之爲九章。其龍，天子有升龍，有降龍。衣此衣而冠冕，南鄉而立，以俟諸侯見。【疏】正義曰：盧云：「衮從合，誤。」○云「衮衣者，裨之上也」者，謂裨有五，以衮爲上。衮亦在裨中，說見前。衮，王者之服，唯上公以王者之後亦得服之。賈疏云：「五等諸侯，衣有三等，不得定其號，故總

言裨衣。此據天子一身，故指其衣體言衮冕。」是也。《周禮·節服氏》：「掌祭祀朝覲衮冕，六人維王之大常。」則朝覲服衮冕也。《詩》：「衮衣繡裳。」《毛傳》云：「衮衣，卷龍衣也。」衮爲正字，卷爲假借字，《禮記》多作卷。《玉藻》：「天子龍卷以祭。」鄭注：「龍卷，畫龍於衣，字或作衮。」又《王制》：「一命卷。」鄭注：「卷，俗讀也，其通則曰衮。」是衮爲正字也。云「纁之，繡之爲九章」者，即《司服》注所云龍至宗彝五者纁之於衣，藻至黼四者繡之於裳，衣五章，裳四章，爲九也。詳見前。云「其龍，天子有升龍，有降龍」者，對上公所服之衮無升龍言也。云「衣此衣而冠冕」者，言天子服此龍衮之衣，而冠後高前俛之冕也。云「南鄉而立，以俟諸侯見」者，《曲禮》：「天子當依而立，諸侯北面而見天子，曰覲。」《明堂位》：「天子負斧依南鄉而立。」故知立以見諸侯也。《明堂位》注云：「負之言背也。」言斧依在後，背之而立也。《國語》「王背屏而立」，是鄭言背之義也。敖氏云：「負斧依以俟侯氏人，所謂『不下堂而見諸侯』也。而《周官·齊僕》乃言車送逆朝覲者之節，《大行人》言朝位賓主之間相去之步數，與是禮異者。」①詳後行享節「侯氏

①「者」下，《儀禮集說》有「歟」字。

升致命，王撫玉」下。○案：鄭氏九章之說，先儒多疑之。《禮經釋例》云：「案：鄭氏鑄云：『日月星辰，登於旌旗，王與公同服九章之袞，君臣無別，其說創自康成，六經無見也。今以此經文質之，子男之服自毳冕而下如侯伯，則上不服鷩冕可知。侯伯之服自鷩冕而下如公，則不服袞冕可知。公之服自袞冕而下如王，則不服日月星辰可知。經文謂自袞冕而下，則袞服而上之章非日月星辰而何？王服十二章明矣。』說與康成異，楊氏復、敖氏繼公皆主之。近方氏苞、戴氏震亦謂大裘而冕當為十二章之服也。」江氏永云：「三代制禮，有益亦有損。天子用物雖得備十二，然冕戴於首，既有十二旒，十二玉以則天數。冕服之章，以九為尊，取陽數之極，禮尚相變也。古用十二章，周損為九章，日月星唯畫於大常，正是監前代損益之精意，倘有益無損，則制度彌文，伊於胡底乎？鄭說俱允當。」今案：陳氏《禮書》亦云：「鄭康成謂周服九章，登龍於山，升火於宗彝。觀《周禮》稱袞冕，《禮記》稱天子龍袞，言龍袞而不及山，則升龍於山可知也。《司服》五章之服則毳冕。毳，毛物，虎蜚也。五章言毳冕而不言藻，則升火於宗彝可知也。《左傳》：『三辰旌旗昭其明也。』然則冕服止九章，而日月星辰畫於旌旗，鄭氏之說當有所受之矣。」嗇夫承命，告于

天子。嗇夫，蓋司空之屬也，為末擯，承命於侯氏下介，傳而上，上擯以告於天子。天子見公，擯者五人；見侯伯，擯者四人；見子男，擯者三人。皆宗伯為上擯。《春秋傳》曰：「嗇夫馳。」【疏】正義曰：「上擯以告」下，毛本無「于」字。《校勘記》云：「嚴本、《集釋》俱有「于」字，與疏合。」○《曲禮》：「諸侯見天子，曰：『臣某侯某。』」鄭注：「謂嗇夫承命告天子辭也。其為州牧，則曰『天子之老臣某侯某，奉圭請覲。』」然則此承命告天子者，蓋以侯氏請覲之辭告也。注云「嗇夫，蓋司空之屬」，又引《春秋傳》「嗇夫馳」者，《左傳》昭十七年叔孫昭子救日食，引《夏書》云：「辰不集于房，瞽奏鼓，嗇夫馳，庶人走。」《儀禮釋官》云：「案：嗇夫之名，始見於《夏書》，周殆因夏制歟？《夏小正》「嗇人不從」，嗇人疑即嗇夫。《漢書·五行志》引《左傳》「嗇夫馳，庶人走」，說曰：「嗇夫掌幣吏，庶人其徒役。」《曲禮》疏引《音義隱》云：「嗇夫主諸侯所齎幣帛皮圭之禮，奉以白於天子。」解與此經略合。《儀禮》唯《覲禮》尚存天子之制，而有嗇夫，其為冬官之闕無疑。」又曰：「案：《漢書·百官公卿表》及《張釋之傳》皆有嗇夫。鄭氏箋《詩》云：「田峻，司嗇，今之嗇夫。」則漢亦有此官，所掌或與周異。」顧氏炎武曰：「注不引《書》而曰《春秋傳》者，孔氏古文康成時未

見也。」鄭又以嗇夫爲末擯者，《釋官》曰：「據《漢書》云：『庶人，其徒役』，則嗇夫當士爲之。」《聘禮》：「卿爲上擯，大夫爲承擯，士爲紹擯。」此雖諸侯禮，天子亦然，故注以嗇夫爲末擯也。」云「承命於侯氏下介，傳而上，上擯以告於天子」者，賈疏云：「案：《周禮·司儀職》兩諸侯相朝皆爲交擯。則此諸侯見天子交擯可知。此所陳擯介，當在廟之外，門東陳擯，從北鄉南；門西陳介，從南鄉北，各自爲上下。」今案：此命即謂辭也。君朝用交擯傳辭，臣聘用旅擯不傳辭，已詳《聘禮》「卿爲上擯」節下。此經交擯傳辭之法，當合下注乃備。此注云「承命於侯氏下介」者，蓋侯氏先以請覲之辭告上介，上介傳於次介，次介傳於下介。天子末擯承侯氏下介之辭傳於承擯，承擯傳於上擯，所謂「傳而上」也。於是上擯人以告於天子。又下節注云「上擯又傳此而下至嗇夫，侯氏之下介受之傳而上」者，謂上擯人告後，受天子命侯氏人之辭又以傳於承擯，承擯傳於末擯嗇夫，侯氏之下介受嗇夫之辭以傳於次介，次介傳於上介，亦所謂「傳而上」也。又云「上介以告其君，君乃許人」者，謂上介以告侯氏，侯氏遵天子命乃人也。然則經云「嗇夫承命，告于天子」，乃據擯介交接者言之，以省文耳。其實嗇夫承命非親承於侯氏，其告亦非親告於天子也。此與《聘禮》注言

「天子諸侯朝覲，命介紹傳命」者略同，義互詳彼注。但諸侯相朝，主國當先以請事之辭傳於賓，此先以請覲之辭傳而入，則天子禮與諸侯異也。又諸侯相朝，主君迎于大門外，此《覲禮》則天子不下堂。又《司儀》云：「交擯三辭。」據此經則一辭而已，皆《覲禮》簡嚴故也。賈疏云：「《司儀》『交擯三辭』，據諸侯自相見言，其天子春夏受享於廟，亦可交擯三辭矣。然朝宗禮亡，無可徵也。」云「天子見公，擯者五人；見侯伯，擯者四人；見子男，擯者三人」者，竝據《大行人》文。云「皆宗伯爲上擯」者，《大宗伯職》云：「朝覲會同則爲上相。」上相，即上擯也。又《肆師職》云：「大朝覲佐儔。」鄭注云：「爲承擯。」《小行人職》云：「凡諸侯人王，將幣，爲承而擯。賈疏謂時會殷同則肆師爲承擯，四時常朝則小行人爲承擯。是承擯或肆師爲之，或小行人爲之，而爲上擯則皆大宗伯也，故注云「皆」也。賈疏又云：「嗇夫爲末擯，若子男三擯，此則足矣。若侯伯四擯，增一士。上公五擯，增二士。」天子曰：「非他，伯父實來，予一人嘉之。伯父其人，予一人將受之。」言非他者，親之辭。嘉之者，美之辭也。上擯又傳此而下至嗇夫，侯氏之下介受之，傳而上，上介以告其君，

君乃許人。今文「實」作「寔」，「嘉」作「賀」。**【疏】正義曰：**《校勘記》云：「『天子』下，石經補缺脫『曰』字。」○《曲禮》：「君天下曰天子，朝諸侯，分職授政任功曰予一人。」鄭注：「皆擯者辭。」據此經言也。又《玉藻》：「凡自稱天子曰予一人。」孔疏謂：「天子與臣下言，及遣擯者接諸侯，皆稱予一人。」是也。《曲禮》注引《覲禮》曰：「伯父寔來，余一人嘉之。」竝云：「余，予，古今字。」則是《曲禮》作「予」，《覲禮》作「余」也。今《覲禮》作「予」，「寔」又作「實」，非鄭本矣。此節爲擯者辭，云「天子曰」者，傳述王言以納賓也。蔡氏云：「『伯父實來』，言其專爲勤天子而來也。『伯父其人』，命之使人，不出迎也。」注云「言非他者，親之辭」者，盛氏云：「案：《詩》云：『豈伊異人，兄弟匪他。』《昏禮》墍見之辭亦曰：『某以非他故。』皆親之之意也。」云「嘉之者，美之辭也」者，《爾雅·釋詁》：「嘉，美也。」云「上擯又傳此而下至嚮夫」云云，解已見上。云「今文『實』作『寔』，『嘉』作『賀』者，胡氏承珙云：『案：《說文》：『實，富也。』《爾雅》：『寔，是也。』《公羊》桓六年傳云：『寔來者何？』猶曰是人來也。《穀梁傳》曰：『寔來者，是來也。』實、寔二字，聲義竝殊。《大雅·韓奕》：『實墉實壑』，鄭箋正之曰：『實當作寔。趙魏之間，實、寔同聲。寔，是也。』此

經「伯父實來」，猶言伯父是來，依義當作「寔」。鄭從古文作「實」者，以二字經典多通。《毛詩》「寔命不猶」，《韓詩》作「實」。《類弁》：「實維伊何。」箋云：「實，猶是也。」意謂假實爲寔，其義亦猶寔之訓是也，不必改耳。《廣雅》曰：「賀，嘉也。」是賀與嘉義同。《爾雅》：「嘉，美也。」又曰：「嘉，善也。」則作「嘉」於義更親，故鄭從古文。「侯氏入門右，坐奠圭，再拜稽首。入門而右，執臣道，不敢由賓客位也。卑者見尊，莫摯而不授。」**【疏】正義曰：**《校勘記》云：「圭，閫、監、葛本誤作『主』。」注「入門」下，嚴本、《集釋》、《通典》、楊、敖俱有「而」字，《通解》無。「不敢由賓客位也」，張氏曰：「監本客作之，從監本。『卑者見尊』，張氏曰：『《釋文》見侯注云：卑見同。卑見，謂此也，中無者字。』今案：戴校《集釋》依張氏《識誤》，改「客」爲「之」，并刪「者」字，茲從嚴本。」注云「入門而右，執臣道，不敢由賓客位也」者，案：門之中央有闕，門以向堂爲正，闕之東爲右，闕之西爲左。《曲禮》曰：「主人入門而右，客人入門而左。」是門左爲賓客位也。又曰：「大夫士出入君門由闕右。」注云：「臣統於君。」是門右爲臣道也。《禮經釋例》曰：「凡以臣禮見者，則入門右。」詳《士相見禮》「賓奉摯入門左」下。此侯氏入門右，故云「執臣道，不敢由賓客位

也」。云「卑者見尊，奠摯而不授」者，《禮經釋例》云：「凡卑者於尊者，皆奠而不授。」詳《士昏禮》「納采」下，此注釋經「坐奠圭」之義也。案：奠圭、再拜稽首，皆臣禮。《曲禮》：「坐而遷之，戒勿越。」孔疏云：「坐亦跪也。坐，通名跪；跪，名不通坐。」此「坐奠圭」謂跪而奠所執圭於地乃拜，下記「奠圭于纁上」是也。吳氏《章句》引《明堂位》「崇圻康圭」，意謂奠之於圻。又謂圻亦在門右，非矣。「崇圻康圭」與「反圻出尊」連言，自是兩君相見之禮與此別也。擯者謁。謁，猶告也。上擯告以天子前辭，欲親受之，如賓客也。其辭所易者，曰「伯父其升」。【疏】正義曰：《爾雅·釋詁》云：「謁，告也。」此注云「謁，猶告也」者，蓋以謁為傳辭，猶上告於天子之告也。云「上擯告以天子前辭，欲親受之，如賓客也」者，凡卑見尊，奠而不授，賓客則親相授受，此天子欲親受之如賓客，故上介傳天子之命以告侯氏也。但其告侯氏即用前辭，唯易「伯父其人」為「伯父其升」耳。《禮經釋例》曰：「凡相大禮，皆上擯之事。《覲禮》「擯者謁」注以擯者為上擯，則下文「擯者延之曰升」，又「擯者曰予一人將受之」，又「擯者謁諸天子」，皆上擯之事。注不言者，可知也。」餘詳《聘禮》「几筵既設，擯者出請命」下。侯氏坐取圭，升致命。王受之玉。

侯氏降，階東北面再拜稽首。擯者延之曰：「升。」升成拜，乃出。擯者請之。侯氏坐取圭，則遂左，降拜稽首，送玉也。從後詔禮曰延。延，進也。【疏】正義曰：《校勘記》云：「乃出，《通解》『出』作『退』。」今案：唐石經及各本俱作「出」。○前坐奠圭，跪而奠之於地。此坐取圭，亦是跪取之，執以升也。「致命」，鄭無注。方氏苞《儀禮析疑》云：「朝覲，述所職也。小大庶邦各有所命之常職，今來王所親致之。」吳氏廷華《儀禮疑義》曰：「朝覲，本王命，此致其奉命而來之意，與聘賓致命不同。」一說，命即辭也，致命猶致辭。其辭蓋曰：「臣某侯某奉圭覲王。」李氏云：「階東，西階之東也。」案：《燕禮》、《大射》，臣升降皆自西階，故知階東，西階之東，非阼階東也。《禮經釋例》云：「凡臣與君行禮，皆堂下再拜稽首。此侯氏降階東北面再拜稽首，臣禮也，所謂「北面而見天子」也，所謂「拜下禮」也。」《釋例》又云：「凡君待以客禮，下拜則辭之，然後升成拜。《覲禮》：「執圭行覲，侯氏坐取圭，升致命，降，再拜稽首，擯者延之曰升，升成拜。覲畢，王勞之，再拜稽首。擯者延之曰升，升成拜。」王賜侯氏車服，侯氏降兩階之間，北面再拜稽首，升成拜。注：「大史辭之。」此皆先拜於堂下，君使人辭之，復拜於堂上者也。」此即上注所謂「欲

親受之，如賓客也」。「王受之玉」，即親受也。「乃出」，觀事畢也。王氏士讓云：「《燕禮》、《大射》、《聘》、《食》各有成拜之文，公有荅拜。此篇侯氏再拜稽首，王無荅拜者，此見王禮，視侯禮爲嚴也。」今案：《大戴禮·朝事儀》曰：「奠圭降拜，升成拜，明臣禮也。」注云：「擯者請之，侯氏坐取圭，則遂左」者，謂侯氏初奠圭在門右，今聞擯者謁告之辭，即取圭徑趨門左，升自西階致命。賈疏謂：「坐取圭即言升致命，無出門之文明，知遂向門左，從左堂塗升自西階致命。」是也。吳氏《疑義》據聘賓私覲初入門右，擯者辭，乃出奉幣入門左，謂此經當亦如之。今案：此與聘賓固殊，聘賓爲他國之臣，此爲己臣，故禮有不同也。凡臣禮之異於客禮者有三：入門右也，拜下也，奠而不授也。上

經「擯者謁」，注以「欲親受」解之，又著其辭曰「伯父其升」，是但告以升堂授玉，非令其入門左也。且侯氏奠圭時，王已在堂上，天威不遠咫尺，而顧出門入門爲此迂曲之禮乎？則其徑趨門左宜矣。張氏《儀禮圖》謂經言「乃出」，不言東，知自闕西出。亦非。《曲禮》曰：「大夫士出入君門由闕右。」諸侯之於天子，亦猶大夫士之於國君，則出入固皆由門右也。下覲畢，侯氏肉袒于廟門之東，入門右，告聽事，再拜稽首，出，自屏南適門西，遂入門左，王勞之。此

勞禮略如賓客，與覲時正君臣之禮殊。且經明云「出」，明云「入門左」，則固與此經異矣。云「降拜稽首，送玉也」者，《禮經釋例》曰：「凡卑者於尊者，皆奠而不授，若尊者辭乃授。」經言「王受之玉」，則侯氏升堂授玉可知，故降拜爲送玉也。云「從後詔禮曰延」者，案：《特牲饋食禮》：「尸至于階，祝延尸，尸升。」《少牢饋食禮》：「祝延尸，尸升自西階，人，祝從。」是祝在尸後詔之，故注云：「由後詔相之曰延。」明此擯者亦在侯氏後北面詔之也。云「延，進也」，《釋詁》文。○《禮經釋例》曰：「《覲禮》不云還玉。考《覲》郊勞用璧，①侯氏還璧，使者受。注：「還玉，重禮。」覲用命圭，自無不還之理。今《覲禮》存，春朝夏宗冬遇禮亡，或別見三時禮歟？」今案：《白虎通》引《覲禮》曰：「侯氏執珪升堂。」又引《尚書大傳》曰：「諸侯執所受珪與璧，朝於天子。無過者復得其珪，以歸其邦；有過者留其珪，能正行者復還其珪。」此足爲覲還圭之證也。

右侯氏執瑞玉行覲禮

① 「覲」下，《禮經釋例》有「禮」字。

四享，皆束帛加璧，庭實唯國所有。「四」

當爲「三」，古書作三、四或皆積畫，此篇又多四字，字相似，由此誤也。《大行人職》曰：「諸侯廟中將幣，皆三享，其禮差又無取於四也。初享或用馬，或用虎豹之皮。其次享，三牲魚腊，籩豆之實，龜也，金也，丹漆絲纁竹箭也，其餘無常貨。此地物非一國所能有，唯所有分爲三享，皆以璧帛致之。」【疏】正義曰：《校勘記》云：「注『皆三享』，徐本『三』作『一』，誤。『金也』，徐、陳『金』俱作『今』，誤。『此地物』，《集釋》無『地』字。『唯所有』，『唯』下，《集釋》有『國』字。」今案：戴校《集釋》云：「『地』，衍。」又云：「注疏本脫『國』字。」案：嚴本有「地」字，無「國」字。「此地物」，謂此土地之物也。今仍從嚴本。○享，獻也。詳《聘禮》。案：《朝事儀》曰：「奉國地所出重物而獻之，明臣職也。」注云：「『四』當爲『三』，古書作三、四或皆積畫，此篇又多『四』字，字相似，由此誤也」者，賈疏云：「《堯典》云：『帝曰：咨！三岳。』《皋陶》云：『外薄三海。』《泰誓》序云：『作《泰誓》三篇。』^①是古書三、四皆積畫也。」今案：《說文》：「三，籀文四。」《周禮·內宰職》注：「天子巡守禮，制幣丈八尺，純四絜。」賈疏引《鄭志》荅趙商問云：「四當爲三，古三、四積畫，是以三誤爲四也。」又《周禮·質人》疏、本經《聘禮》疏

引《鄭志》荅趙商問竝同。惠氏棟《九經古義》云：「《春秋傳》子革云：『是四國者，專足畏也。』劉光伯《規過》云：『《楚語》云：今吾城三國。無四國也。古四字積畫，四當爲三。』」胡氏承珙云：「《大戴禮》『公冠四加玄冕』，注云：『四當爲三。』《穀梁》定十五年疏云：『范例云會葬四，案：經有三，四當爲三，字有誤耳。』」云「此篇又多四字」者，賈疏云：「下有『四傳擯』，又云『路下四亞之』，又云『四馬』、『四門』、『四尺』。四字既多，積畫四又似三，由此故誤爲四字也。」云「《大行人職》曰：諸侯廟中將幣，皆三享，其禮差又無取於四也」者，案：《大行人》公侯伯子男五等皆云「廟中將幣三享」，是無四享也。先大父《論語補箋》云：「諸侯朝於天子三享。諸侯自相朝一享，諸侯使其臣聘亦一享。又小聘曰問，不享。是享雖有差等，要無取於四也。」云「初享或用馬，或用虎豹之皮」者，《聘禮·記》曰：「凡庭實，皮馬相間可也。」鄭注：「問，猶代也。土物有宜，君子不以所無爲禮。畜獸同類，可以相代。」是有馬者用馬，有皮者用皮。又見此經「享用馬」，《聘禮》「享用皮」，故以或用馬或用皮爲初享也。知皮爲虎豹之皮者，據《郊特牲》云「虎豹之皮，

①「三」，原作「三」，今據《儀禮注疏》改。

示服猛也」。云「其次享，三牲魚腊，籩豆之實，龜也，金也，丹漆絲纁竹箭也，其餘無常貨」者，據《禮器》文。《禮器》曰：「大饗，其王事歟？三牲魚腊，四海九州之美味也。籩豆之薦，四時之和氣也。內金，示和也。束帛加璧，尊德也。龜爲前列，先知也。金次之，見情也。丹漆絲纁竹箭，與衆共財也。其餘無常貨，各以國之所有，則致遠物也。」鄭所以引此者，以經明言「三享」，則非僅皮馬之屬，而所用之物經未有正文，故據《禮器》臚陳之，以存享物之概。鄭彼注雖以大饗爲禘祭先王，而於「三牲魚腊」等句下，注云：「此饌諸侯所獻。」又於「內金示和也」下，注云：「此所貢也，內之庭實先設之。」「龜爲前列，先知也」下，注云：「龜知事情者，陳于庭在前。」是皆以爲庭實也。《郊特牲》曰：「旅幣無方，所以別土地之宜，而節遠邇之期也。龜爲前列，先知也。以鐘次之，以和居參之也。虎豹之皮，示服猛也。束帛加璧，往德也。」鄭彼注亦以爲庭實所用。「旅幣無方」，即此經「庭實唯國所有」之義。又《大行人》曰：「邦畿方千里，其外方五百里謂之侯服，歲壹見，其貢祀物。又其外方五百里謂之甸服，二歲壹見，其貢嬪物。又其外方五百里謂之男服，三歲壹見，其貢器物。又其外方五百里謂之采服，四歲壹見，其貢服物。又其外方五百里謂之

衛服，五歲壹見，其貢材物。又其外方五百里謂之要服，六歲壹見，其貢貨物。」鄭彼注云：「祀物，犧牲之屬。嬪物，絲枲也。器物，尊彝之屬。服物，玄纁絺纈也。材物，八材也。貨物，龜貝也。」此皆諸侯貢享之物，與《禮器》亦略相合，故鄭據《禮器》釋經也。鄭又云：「此地物非一國所能有，唯所有分爲三享」者，謂土物各有所宜，如《禮器》注據《禹貢》云：荆、揚二州貢金，荊州納錫，大龜、貢丹，兗州貢漆絲，豫州貢纁，揚州貢篠簜之類，非一國所能備有，故但就其所所有者分之爲三享，非謂一國三享中盡用此物也。吳氏《疑義》乃譏鄭以《禮器》所陳出之四海九州者，今一國貢之，則讀此注未審矣。云「皆以璧帛致之」者，以經云「三享皆束帛加璧」，則知三享庭實雖有異，而以璧帛致之則同也。《小行人》曰：「合六幣：圭以馬，璋以皮，璧以帛，琮以錦，琥以繡，璜以黼。」鄭注云：「六幣，所以享也。五等諸侯享天子用璧，享后用琮，其大各如其瑞，皆有庭實，以馬若皮。皮，虎豹皮也。用圭璋者，二王之後也。二王後尊，故享用圭璋而特之。《禮器》曰「圭璋特」，義亦通於此。其於諸侯，亦用璧琮耳。子男於諸侯，則享用琥璜，下其瑞也。凡二王後、諸侯相享之玉，大小各降其瑞一等。及使卿大夫覲聘，亦如之。」《考工記·玉人》曰：「命圭九寸，謂之桓

圭，公守之。命圭七寸，謂之信圭，侯守之。命圭七寸，謂之躬圭，伯守之。」是所謂瑞玉也。又曰：「璧琮九寸，諸侯以享天子。瑑圭璋八寸，璧琮八寸，以覲聘。」又曰：「瑑琮八寸，諸侯以享夫人。」上言享天子，不言享后，下言享夫人，不言享君，互相見也。鄭注《鄉黨》享禮云：「既聘而享用圭璧。」《鄉黨圖考》辨之曰：「按享禮用圭者，唯二王後享天子。鄭注《小行人》云：「其於諸侯亦用璧琮耳。」先大父《論語補箋》據此諸文詳考朝聘時享禮所用之玉，①曰：「諸侯朝天子，五等諸侯享天子用璧，享后用琮，其大各如其瑞。上公九寸，侯伯七寸，子男五寸。二王後享天子用圭，享后用璋而特之。諸侯自相朝，二王後及公侯伯享君用璧，享夫人用琮；子男享君用璋，享夫人用璜。大小各降其瑞一等。二王後及上公八寸，侯伯六寸，子男四寸。諸侯使臣聘二王後及公侯伯之臣，享用璧琮。子男之臣，享用琥璜。上公八寸，侯伯六寸，子男四寸。」今案：此經言「束帛加璧」，則通謂五等諸侯也。經言享天子不言享后者，方氏苞謂儀法已見於春夏，故不言也。○《禮經釋例》云：「注據《禮器》言，非也。《聘禮·記》「凡庭實皮馬相問」，言有皮則以皮，有馬則以馬，即《覲禮》「唯國所有」之義。觀下文但云：「匹馬卓上，九馬隨之。」不云他物，則

三享皆皮馬，無他物可知。《聘禮》享，庭實云皮；私覲，庭實云馬。《覲禮》享，庭實亦云馬，皆互見也。至《禮器》云：「大饗，其王事與？」又云：「其出也，《肆夏》而送之。」蓋指饗食燕之饗禮而言，故有三牲魚腊籩豆之屬，非謂《覲禮》之享也。《禮器》注以為洽祭先王，亦非。《郊特牲》所云亦指饗禮言，與《禮器》正合。孔疏謂「賓入大門」以下為論燕饗之禮，謂「旅幣無方」以下為論朝聘庭實之物，蓋依違鄭注而為此說，不知《禮經》聘覲之享，庭實唯有皮馬也。今案：鄭注《小行人》云：「五等諸侯享天子，皆有庭實，以馬若皮。」不言他物，與此注似異。然莊二十二年《左傳》曰：「庭實旅百，奉之以玉帛，天地之美具焉。」「奉之以玉帛」，即謂束帛加璧也。庭實而云「旅百」，則所陳之物甚多，當非僅皮馬，故杜注云：「百，言物備也。」又云「天地之美具焉」，則與《禮器》所云「四海九州之美味」、「四時之和氣」義正同。《聘禮》享諸侯惟「享」，故止用皮馬；《覲禮》享天子有三享，故備物。或亦隆殺之義宜然歟？奉束帛，匹馬卓上，九馬隨之，中庭西上。奠幣，

①「父」，原作「夫」，今據胡氏引書文例改。

再拜稽首。卓，讀如「卓王孫」之「卓」，卓，猶的也。以素的一馬以爲上，書其國名，後當識其何產也。馬必十匹者，不敢席王之乘，用成數，敬也。【疏】正義曰：《校勘記》云：「注『王之乘』，《通典》『之』作『所』。」○奉，侯氏親奉也。上云「束帛加璧」，此止云「束帛」，省文。璧加於束帛之上，言束帛則璧在其中也。下奠幣之幣亦兼璧帛言，《小行人》：「合六幣，璧以帛。」是璧、帛同稱幣也。「匹馬」，一馬也。《聘禮·記》曰：「凡庭實隨入，左先。」注：「隨入，不竝行也。」此經云「匹馬卓上，九馬隨之」，謂一馬前行，九馬隨之而人也。云「中庭西上」，謂此馬陳於庭南北之中而以西爲上，即《聘禮·記》「左先」之義。凡人門向堂，以西爲左。此一馬先進者在西，而其後則以次竝列而東，故曰「西上」。云「奠幣，再拜稽首」者，亦如前受摯時奠圭再拜稽首，俟摯者傳將受之辭，乃升致命也。敖氏云：「此奠幣蓋於人門左之位。」張氏《儀禮圖》云：「享不言入門右，則由闕西。」二說竝誤。臣之於君，出入皆由闕右，前已辨之矣。《玉藻》「公事自闕西」，注以公事爲聘享者，彼謂他國之臣代其君行聘享之禮；此是己臣自行享禮，與彼異也。下注云：「至於享，王之尊益君，侯氏之卑益臣。」是覲以辨等威，至享益嚴，豈覲入門右而享乃入門左哉？經不言人

門右者，以文已見於覲時，不言可知也。注云「卓讀如『卓王孫』之『卓』。卓，猶的也。以素的一馬以爲上，書其國名，後當識其何產也」者，段氏玉裁云：「素的一馬，謂白馬也。鄭意白馬出衆，故謂之卓。」胡氏承珙云：「《說文》卓本訓高，竹角切。鄭意蓋不以卓爲高，欲見卓爲素的，故以卓王孫之卓譬況其音，而以的比方其義。的即《易》的類，《爾雅》的類白顛之的。然則鄭讀此卓字，似與凡言『卓』異。《廣雅》卓、的竝訓爲明，可知卓有的義。段云：『白馬出衆，故謂之卓。』誤矣。惟當時讀卓王孫之卓，未審何音。《漢書·江都易王非傳》『淖姬』，顏注引鄭氏曰：『淖，音卓王孫之卓。』不直言卓而必用此爲況者，蓋『卓』姓之『卓』固與『卓』異讀也。」「書其國名」，賈疏云：「謂若晉有鄭之小駟，復有屈產之類是也。」云「馬必十匹者，不敢席王之乘，用成數，敬也」者，案：《五經異義》：「《易》孟京、《春秋》公羊說，天子駕六；《毛詩》說，天子至大夫同駕四，士駕二。」鄭駁從《毛詩》說，是王所乘止四馬也。今用十馬，備王選擇，故云「不敢席王之乘」也。又《聘禮》賓覲，庭實用乘馬，乘馬，四馬也。此篇僕使者亦多用四馬，今用十馬，以享王之禮盛於他禮，故云「用成數，敬也」。李氏如圭云：「《書》：康王既尸天子，諸侯皆布乘黃朱，賓稱奉圭兼

幣，曰：「一二臣衛，敢執壤奠。」皆再拜稽首。乘黃朱，四黃馬朱鬣也。彼因喪而見，與此禮異。」○案：鄭訓「匹馬卓上」之「卓」爲的，後儒駁之者多，惟王尚書《經義述聞》之說最詳，今竝錄於後。熊氏朋來云：「案：《韻釋》：「卓，蚤也。」蓋諸侯朝覲進十馬，難盡數牽引至殿庭，先引上一馬而九馬隨之。當以卓訓蚤，於義爲通。」敖氏云：「匹馬卓上」，謂以一馬卓然居前而先行也。①言此者，明其人不與九馬相屬也。」王氏士讓云：「詩稱「駟驪」，周尚赤也，享王不宜尚白。凡朝覲會同，毛馬而頒之，校人齊其色。享王亦當齊色，又似不宜別以素的矣。」《經義述聞》云：「卓之言超也，絕也，獨也，上前也。卓上者，超絕其類，獨行而前之謂也。《廣雅》：「超，絕也。」李善《西都賦》注：「連蹕，猶超絕也。」《匡謬正俗》曰：「連者，謂超踰不依次第。」超，連與卓，古竝同聲，其義一也。《說苑·君道篇》：「蹕然獨立。」《說文》：「蹕，特止也。」徐鍇《傳》曰：「特止，卓立也。」蹕與蹕，卓古亦同聲，皆獨貌也。卓上，猶云獨前耳。古者上與前同義，在前謂之上，行而向前亦謂之上，此與下文「中庭西上」之上殊義。」擯者曰：「予一人將受之。」亦言王欲親受之。【疏】正義曰：秦氏蕙田云：

「案：受覲聽事所稱天子之命，皆擯者述之。彼云「天子

曰」，此云「擯者曰」，互見爲義。」侯氏升致命。王撫玉。侯氏降自西階，東面授宰幣，西階前再拜稽首，以馬出，授人，九馬隨之。王不受玉，撫之而已，輕財也。以馬出，隨侯氏出，授王人於外也。王不使人受馬者，至於享，王之尊益君，侯氏之卑益臣。【疏】正義曰：《校勘記》云：「注「授王人」，閩、葛，《通解》「王」誤作「玉」。「至於享」，「至」，徐、陳、閩、葛，《集釋》、《通解》俱作「主」，楊氏作「至」。張氏曰：「案：疏云今至於三享云云，詳其義，主字當作至。」今案：毛本作「至」，戴校《集釋》改「至」，嚴本亦誤「主」。○侯氏先奠幣，聞擯者辭即取幣奉以升，與前覲時儀同。此不言取幣，省文。致命者，方氏謂：「職貢皆王所命也。」一說，致命猶致辭，其辭蓋曰：「臣某侯某敢執壤奠。」享玉，即束帛所加之璧也。幣兼璧帛言，詳上「侯氏自奉幣降西階」下。「東面授宰」，《聘禮·記》：「賓之幣，唯馬出，其餘皆束。」時宰在東，故東面授也。宰，賈疏謂即大宰，是也。《周禮·大宰職》：「大朝覲會同，贊玉幣。」鄭注：「玉幣，諸侯享幣也。」《聘禮》享時

①「一」，原脫，今據《儀禮集說》補。

云：「公受幣。」又云：「公側授宰幣。」是公親受而授宰。此《覲禮》王不親受，而侯氏自執以授宰，至尊禮異也。「西階前再拜稽首」，送幣也。敖氏云：「西階前非正位，以欲執馬，由便也。」注云「王不受玉，撫之而已，輕財也」者，撫，以手撫之。不受玉，謂不親受，非不受也。敖氏云：「撫之者，示受之。」是也。撫是尊者之禮，與《昏禮》「舅撫婦之摯」同。《聘義》曰：「以圭璋聘，重禮也。已聘而還圭璋，此輕財而重禮之義也。」鄭注：「財謂璧琮享幣也。」但彼以圭璋還而璧帛不還為輕財，此對上瑞玉親受而璧帛不親受為輕財，^①財即謂璧帛也。云「以馬出」者，謂侯氏親執一馬以出。云「隨侯氏出，授王人於外也」者，謂九馬隨之而出，均以授王人於外也。《周禮·校人》：「凡賓客受其幣馬。」則王人其即校人歟？云「王不使人受馬者，至於享，王之尊益君，侯氏之卑益臣」者，對上入覲時王親受玉，此不親受。又庭實並不使人受之於庭。又行覲時，降拜則辭之，然後升成拜，此降拜不辭，為益君益臣也。《聘禮》賓覲，使士受馬于廟內；此侯氏自執以出，故云「王不使人受馬」也。《郊特牲》曰：「覲禮，天子不下堂而見諸侯。下堂而見諸侯，天子之失禮也，由夷王以下。」此篇受玉撫玉俱在堂上，是不下堂也。覲以正君臣之禮，故益嚴也。又

案：《周禮·大行人》：「朝位，賓主之間，上公九十步，侯伯七十步，子男五十步。」鄭注：「朝位謂大門外賓下車及王車出迎所立處也。」案：經文於「立當車軹，擯者五人」下，即云：「廟中將幣三享。」注又云：「朝先享，不言朝者，朝正禮，不嫌有等也。」則是出迎之禮，據享而言。賈疏謂：春夏受贄於朝，無迎法，受享乃迎之。覲禮則受摯受享，皆無迎法。與《曲禮》疏所引熊氏說同。又《齊僕》云：「朝覲宗遇饗食，各以其等，為車送迎之節。」賈氏謂：因此朝覲宗遇而與諸侯行饗食在廟，有迎法。是《齊僕》所云送迎者，乃饗食之禮，非謂朝覲宗遇正禮也。朱氏大韶云：「經云「朝覲宗遇饗食」者，謂朝覲宗遇之饗食，非以六字平列。覲禮主乎嚴，故不下堂，饗食略君臣之分而致賓主之儀，故有送迎。」此說是也。陳氏《禮書》乃謂「春朝夏宗秋覲冬遇，送迎之禮同」，誤矣。○賈疏謂：聘禮享君，尚有幣問卿大夫。此諸侯享天子訖，亦當有幣問公卿大夫。據隱七年《左傳》「戎朝于周，發幣于公卿」為證。此篇無之，蓋亦文不備與？事畢。三享訖。【疏】正義曰：自「奉束帛」至「以馬出，授人，九馬隨之」，皆言初享用馬之儀。

① 「受」，原作「授」，今據《續清經解》本改。

其次二享，庭實惟國所有，無定物，故經不言而以事畢括之。又三享物雖不同，其禮則一，即一享可例其餘也。注云「三享訖」者，以經云「三享，皆束帛加璧」，則三享實分三度致之，必三享訖，乃可云「事畢」也。賈疏謂一度致之，非矣。

右覲已即行三享

乃右肉袒于廟門之東。乃入門右，北面立，告聽事。右肉袒者，刑宜施於右也。凡以禮事

者左袒，人更從右者，臣益純也。告聽事者，告王以國所用爲罪之事也。《易》曰：「折其右肱，無咎。」【疏】正義曰：

注「無咎」，毛本「無」作「无」。《校勘記》云：「《通解》作「無」，與單疏標目合。」今案：嚴本作「無」。○《大戴禮·

朝事儀》曰：「肉袒入門而右，以聽事也。」即謂此。郝氏敬云：「此諸侯述職待罪也。覲享既畢，黜陟未分，懼王或

譴，乃右肉袒請事。」是也。門以向堂爲正，東爲右，解見前。「袒于廟門之東」，便於入門右也。「北面立」，荅君之

義也。「告」，告擯者轉以告王也。注云「右肉袒者，刑宜施於右也」者，肉袒，袒而無衣見肉也。江氏《鄉黨圖考》

云：「《喪禮》肉袒，《祭禮》迎牲割牲，《養老禮》割牲，皆肉

袒。《射禮》：「君在，大夫射則肉袒。」禮之言「肉袒」者多矣，此獨言「右肉袒」，故鄭以爲「刑宜施於右也」。云「凡以禮事者左袒」者，謂禮事無問吉凶，皆袒左也。詳《鄉射禮》「司射適堂西袒決遂」下。此袒右，敖氏以爲變於禮事，是也。云「人更從右者，臣益純也」者，《玉篇》：「更，復也。」

前覲享入門右，此人復從右肉袒待衆，臣禮益純也。云「告聽事者，告王以國所用爲罪之事也」者，謂己國所以得罪之事。張氏爾岐云：「告王以己國所爲多罪，願聽王譴責之事也。」云《易》曰「折其右肱，無咎」者，係《豐卦》九三爻辭。豐，離下震上。賈疏云：「凡卦爻，二至四，三至五，兩體交互，各成一卦，先儒謂之互體，故鄭隨其義而注云：

三，艮爻，艮爲手，互體爲巽。巽又爲進退，手而便於進退，右肱也，猶大臣用事於君，君能誅之，故無咎。引之者，證

刑理宜於右之義。」張氏惠言《周易鄭氏義》云：「互體兌，爲毀折。」又云：「此雖言大臣，實兼有覲禮。初震在離前

爲朝春，三離後體兌爲覲秋也。」擯者謁諸天子。天

子辭于侯氏曰：「伯父無事，歸寧乃邦。」謁，

告。寧，安也。乃，猶女也。【疏】正義曰：「乃邦」，毛本

「邦」誤「拜」。《校勘記》云：「唐石經、嚴本、《通典》、《集

釋》、《通解》、楊、敖俱作「邦」。徐本誤同毛本。注「猶女

也。」葛本「女」作「汝」。○敖氏云：「凡擯者於侯氏之行臣禮，如奠圭之類，皆以謁諸王。其告於侯氏也，則皆傳王命也。上文不言謁諸天子，天子辭於侯氏，此不言擯者告於侯氏，皆互見其文耳。」今案：上云「告聽事」，告王以己國所爲得罪之事。此云「伯父無事」，言無所爲得罪之事也。李氏引《書·文侯之命》曰：「王曰：『父義和！其歸視爾師，寧爾邦。』」乃邦即爾邦，故鄭云「乃，猶女也」。女與汝通。侯氏再拜稽首，出，自屏南適門西，遂入門左，北面立，王勞之。再拜稽首。擯者延之曰：「升。」升成拜，降出。王辭之，不即左者，當出隱於屏而襲之也，天子外屏。勞之，勞其道勞也。【疏】正義曰：「適門西」下，毛本有一圈。《校勘記》云：「蓋因《通解》分節而誤。」敖氏云：「『西』下似脫『襲』字。」今案：各本皆無「襲」字，但注云「當出隱於屏而襲之」，則是經言「襲」，注恐人不知襲之所在而注之也，似鄭本原有「襲」字。○「侯氏再拜稽首」，拜王辭也。下又再拜稽首，拜王勞也。「出，自屏南適門西，遂入門左」，蓋王將勞之而待以客禮也。「出」字爲句。斯時出亦由門右。敖氏云：「出自屏南，乃適門西，則侯氏出入天子之門亦必由闌東

矣。」姜氏兆錫云：「適門西者，將入門左也。至是乃入門左者，王將勞之，成君意也。」據此二說，則覲享時不入門左明矣。成君意，謂成君以客禮待之之意也。《禮經釋例》云：「臣於君，入門右係常禮。若君以客禮待之則辭，於是出，乃復入門左。」《覲禮》告聽事，先入門右，天子辭之乃出，復入門左。侯氏前聽事，故從臣禮；後天子勞之，故從客禮也。然則侯氏再拜稽首出，出門右也；下升成拜降出，出門左也。經文兩出同而有異如此。」注云「王辭之，不即左者，當出隱於屏而襲之也」者，賈疏云：「以屏外不見天子爲隱。向者右袒，今王辭以無事，故宜襲也。」云「天子外屏」者，賈疏云：「據此文，出門乃云『屏南』，即是外屏。」又引《禮緯》云：「天子外屏，諸侯內屏，大夫以簾，士以帷。」今案：「天子外屏」，《荀子》、《淮南子》均有此文。

《釋宮》：「屏謂之樹。」《論語》：「邦君樹塞門。」李氏云：「屏謂立小牆當門中以自蔽也。諸侯內屏在路門之內，天子外屏在路門之外。臣朝君至而加肅敬，故屏有遠近也。」案：李云路門內外，本《曲禮》孔疏。江氏嘗駁之，謂天子以應門爲正門，屏在應門外；諸侯以雉門爲正門，屏在雉門內。說詳《鄉黨圖考》。但以上皆據朝言之，此屏則設於廟。江氏又云：「《覲禮》廟門外之屏，唯天子有之。」《明堂

位『所謂『疏屏，天子之廟飾』者也，諸侯廟內無屏。《聘禮》賓入廟門內雷，不見有屏。邦君樹塞門之制，在朝不在廟。」此言是也。《春秋》哀公四年，亳社災。《穀梁傳》：「亳，亡國也。亡國之社，以爲廟屏，戒也。」范注云：「立亳之社於廟之外，以爲屏蔽。」此天子廟屏之制歟？《明堂位》言魯用天子禮有疏屏，故有亳社，他國不得有也。云「勞之，勞其道勞也」者，謂勞其道路勤勞。敖氏云：「王勞之，亦擯者傳王之辭也。」○朱子云：「《周禮》冢是大行人等官屬之司寇難曉。蓋《覲禮》諸侯行禮既畢，則降而肉袒請刑，王曰『伯父無事，歸寧乃邦』，然後再拜稽首出，此所謂『懷諸侯則天下畏之』也。如此等處，皆是合著如此，初非聖人私意。」

右侯氏請罪天子辭乃勞之

天子賜侯氏以車服。迎于外門外，再拜。賜車者，同姓以金路，異姓以象路。服則衮也，驚也，毳也。古文曰「迎于門外」也。【疏】正義曰：張氏爾岐云：「自此至『乃歸』，皆言王賜禮侯氏之事。」○賜侯氏以車服，即《虞書》所謂「車服以庸」也。高氏愈云：「不賜於

入覲之時，而特遣使賜於侯氏之館，重其禮也。」吳氏廷華云：「此亦報享之意。」方氏苞云：「迎拜及送，皆與勞者同。」王氏士讓云：「此時諸公太史亦不荅拜，如郊勞。」

注云「賜車者，同姓以金路，異姓以象路」者，《周禮》：「巾車掌王之五路，一曰玉路以祀。」賈疏謂：「尊之，不賜諸侯。」是也。又金路同姓以封，象路異姓以封，革路以封四衛，木路以封蕃國，賜車中兼有此四者，鄭止言金路、象路，舉以例其餘也。云「服則衮也，驚也，毳也」者，據《司服》云：「公之服自衮冕而下，侯伯自鷩冕而下，子男自毳冕而下。」是也。云「古文曰『迎于門外』也」者，古文作「門外」，與今文作「外門外」異。敖氏云：「上文賜舍，則此『門外』乃舍門外也，凡舍惟有一門。」胡氏承珙云：「案：《聘禮》賓館于大夫，其歸饗餼還玉，皆迎于外門外。天子賜諸侯之舍，何知惟有一門？敖氏之說殊不足據。鄭於《聘禮》『還玉』從古文作『外門外』，此又從今文有『外』字，其去取當矣。」路先設，西上，路下四，亞之。重賜無數，在車南。路，謂車也。凡君所乘車曰路。路下四，謂乘馬也。亞之，次車而東也。《詩》云：「君子來朝，何錫予之？」雖無予之，路車乘馬。又何予之？玄衮及黼。」重，猶善也。所加賜善物，多少由恩也。《春秋傳》曰：「重

錦三十兩。【疏】正義曰：注「而東也」，毛本「東」誤「束」。「由恩也」，毛本「恩」誤「思」。「又何予之」，毛本「予」作「與」。《校勘記》云：「嚴本、《集釋》、楊、敖俱作『予』。」○「路先設」，「先」字對服言。下文「服諸公奉之」，服可奉，車不可奉，故先設之於舍之庭也。上「路」字兼車馬言，車西馬東，以西爲上，故曰「西上」也。下「路」字專指車言，敖氏云：「四馬設於車東，異於駕也。」吳氏廷華云：「重賜在車南，加賜卑於車也。」注云「路，謂車也。凡君所乘車曰路」者，案：《巾車》：「王與后之車皆稱路。」《白虎通》云：「路，大也、道也、正也。君至尊，制度大，所以行道德之正也。路者，君車也。天子大路，諸侯路車。」云「路下四，謂乘馬也」者，四馬所以駕車，故謂四馬爲「路下四」也。云「亞之，次車而東也」者，亞以東西言，謂車設於西，四馬次之而設於東，竝列也。引《詩》者，《采菽》篇文，引以證賜車服之事。《采菽》序：「以幽王於諸侯來朝，不能錫命以禮，故思古以刺也。」《毛傳》：「君子，謂諸侯也。予，賜也。路車乘馬，賜車也。玄衮及黼，賜服也。」又《韓奕》詩云「韓侯入覲，王錫韓侯，淑旂綏章，簞弗錯衡，鉤膺鏤錫，鞞鞫淺幘，幘革金厄」，^①是賜車，「玄衮赤舄」，是賜服，亦與此經合也。云「重，猶善也。所加賜善物，多少由恩也」者，言賜

物多少由於君之恩，解經「無數」之意也。《周禮·小宗伯》：「掌衣服車旗宮室之賞賜。」《國人》：「凡賓客牽馬而入陳。」鄭注：「賓客之馬，王所以賜之者。」《內府》：「掌受九貢九賦九功之貨賄，良兵良器，以待邦之大用。」鄭注：「大用，朝覲之頒賜。」《樂記》：「所謂大輅者，天子之車也。龍旂九旒，天子之旌也。青黑緣者，天子之寶龜也。從之以牛羊之羣，則所以贈諸侯也。」鄭注：「贈諸侯謂來朝將去，報之以禮。」然則《內府》所謂「大用」，《樂記》所謂「寶龜」、「牛羊」，其即此「重賜」之類歟？云「《春秋傳》曰『重錦三十兩』」者，閔二年《左傳》文。服注云：「重，牢也。」孔疏云：「杜以遭夫人之錦貴美不貴牢，故易爲錦之熟細者。」是重錦即美錦，美有善義，故鄭引以證重之爲善也。諸公奉篋服，加命書于其上，升自西階，東面，大史是右。言「諸公」者，王同時分命之而使賜侯氏也。右，讀如「周公右王」之「右」。是右者，始隨入，於升東面，乃居其右。古文「是」爲「氏」也。【疏】正義曰：篋制詳《士冠禮》。服盛於篋，故云「篋服」。命書，即王命賜車服

①「幘」，原作「條」，今據《毛詩正義》改。

之書。加於其上，加於籩上也。使諸公奉之者，見錫予之重也。大史，掌禮書者，詳下。

注云「言諸公者，王同時

分命之而使賜侯氏也」者，以來觀非一國，王同時使三公分往命之，故言「諸公」也。《春官·序官》：「大史，下大夫二

人，上士四人。」是亦足敷分命矣。敖氏謂：「奉籩服者一人耳，乃云「諸公」者，若師、若傳、若保，不定也。」則是以命賜者止一人，設來觀國多，恐日不暇給矣，敖說非也。云

「右，讀如「周公右王」之右。是右者，始隨人，於升東面，乃

居其右」者，案：「周公右王」，襄二十一年《左傳》文，言周公左右王室也。諸侯職崇，大史職卑，始隨人在公後，及升自西階，則與公同東面，而居公之右，蓋在公之南也。吳氏

《章句》云：「經曰「是右」，則非但在其右也，蓋如「周公右王」之「右」，謂左右之，如下述命、加書之事。」云「古文「是」為「氏」者，惠氏棟云：「《曲禮》：「五官之長曰伯，是職

方。」注云：「是或為氏。」《漢書》：「造父後有非子，玄孫氏為莊公。」顏注曰：「氏與是同。」《韓勅脩孔廟後碑》以「於氏」為「於是」，「漢末有是儀」，亦作「氏」。氏，是兩字本通，

非有異義。」胡氏承珙曰：「鄭注《周禮·射人》引此經「大史氏右」，仍依古文作「氏」，於此則從今文作「是」者，以大史係在諸公之右，若作「氏」恐與侯氏之氏混，故從今文。」

侯氏升，西面立。大史述命。讀王命書也。【疏】

正義曰：侯氏升而云「西面立」，則升降自阼階可知。蓋侯

氏在館，有主道也。述命，謂讀王命書，亦詔辭自右之義。

或因《周禮·內史》「掌書王命」，遂疑讀之者為內史，不知

此命書內史書之，大史讀之也。《大史職》曰：「大祭祀戒

及宿之日，與羣執事讀禮書而協事。」又云：「大會同朝覲，

以書協禮事。」是讀命書正其職。《儀禮釋官》云：「《玉藻》

疏引此經「大史是右」，謂「大史代內史宣行王命，故居右」，

非也。」侯氏降兩階之間，北面再拜稽首。受

命。【疏】正義曰：兩階，謂東西兩階之間正中也。《周

禮·射人》：「射朝之位，三公北面。諸侯在朝亦北面。據

《明堂位》「三公中階之前，北面東上」，則在朝三公居中，諸

侯在旁可知。故前覲享或拜於西階之東，或拜於西階之

前，不於兩階之中拜，避三公位也。此在己舍與朝廟異，故

拜於兩階之間也。郊勞但云「降，再拜稽首」，不言何處，當

亦在兩階間拜也。注云「受命」者，謂此拜為拜受命也。

升成拜。大史辭之降也。《春秋傳》曰：「且有後命，以

伯舅耄老，毋下拜。」此辭之類。【疏】正義曰：注云「大史

辭之降也」，謂辭其降拜也。引《春秋傳》證辭下拜之事。

僖九年《左傳》云：「王使宰孔賜齊侯胙，齊侯將下拜。孔曰：『且有後命。』天子使孔曰：以伯舅耄老，加勞賜一級，無下拜。」齊侯卒下拜，登受。」今案：下拜者，臣之正禮，未有不辭而升成拜者。此節「升成拜」，經不言「辭」，文不備，故注特補之。敖氏乃謂：「不辭之而升成拜，尊者之禮。」盛氏世佐云：「案：升成拜，以公辭之故也。既拜於下乃辭，禮之正也。《左傳》王使宰孔賜齊侯胙，齊侯未下拜而孔辭之，待以殊禮也。既不復成拜於上者，謙不敢貪天子之命也，與此異。敖說非。」褚氏云：「辭之而升成拜者，順君之命，不得不成拜於上，然已略兼賓主之儀矣。敖謂不辭之而升成拜，儼若天子以賓禮待己者，不已亢乎？」秦氏蕙田云：「盛氏駁敖不辭之說極當，但鄭注謂『大史辭之』，盛氏謂『公辭之』，案：上文述王命者大史，則此辭侯氏者亦必大史也，盛說似非。」今案：秦說是也。大史加書于服上，侯氏受。受篋服。【疏】正義曰：敖氏云：「此受於堂，乃不著其所，是就而受之明矣。」就而受，謂侯氏就諸公受也。但敖氏謂受亦北面，諸公南面訝受之。張氏《儀禮圖》則以為東西面受。案：上文諸公東面，經不更著南面之文，則張《圖》是也。姜氏兆錫云：「又言『加書』者，取讀之復加之也。」蔡氏云：「大史宣讀已畢，乃加之篋

內服上。」吳氏廷華云：「服在篋，故亦曰服上。」今案：經未有開篋之文，則吳說是也。使者出。侯氏送，再拜，僕使者：諸公賜服者，束帛、四馬，僕大史亦如之。既云「拜送」，乃言僕使者，以勞有成禮，略而遂言。【疏】正義曰：使者出，賜車服事畢也。使者兼公與大史言，僕使者為總目之辭，下乃分言也。諸公賜服者，即上奉篋服者，僕之束帛、四馬，僕大史亦如之，亦束帛、四馬也。使事同，僕禮亦同也。王氏士讓云：「此與郊勞賜舍僕使同而又有異。彼止一人，此則二人矣。考《典命》，王之三公八命，其大夫四命。大史，下大夫也，而與公同僕數，尊王命也。」注云「既云拜送，乃言僕使者，以勞有成禮，略而遂言」者，張氏爾岐云：「僕使者在拜送前，乃於送後略言之者，以前經郊勞時已詳載成禮，故略言已足也。」○汪氏克寬云：「周制，諸侯踐位而入見則有錫命，修聘來朝則有錫命，能敵王所愾而獻功則有錫命，此禮之正也。無就其國而錫命之禮，如《春秋》書「王使榮叔來錫桓公命」、「天王使毛伯來錫公命」之類，皆非正也。」

右王賜侯氏車服

同姓大國，則曰「伯父」，其異姓，則曰

「伯舅」。同姓小邦，則曰「叔父」，其異姓小邦，則曰「叔舅」。據此禮云「伯父」，同姓大邦而言。

【疏】正義曰：「其異姓小邦則曰叔舅」，唐石經及各本皆如是。《經義述聞》云：「異姓大國曰伯舅，不言大國者，蒙上而省也。然則異姓小邦曰叔舅，「小邦」亦當蒙上而省，今本有「小邦」二字，即涉上句而衍。《周官·大宰》疏引此有「小邦」二字，則賈所見本已然，不始於唐石經矣。《康王之誥》正義、《文侯之命》正義、《小雅·伐木》正義、隱五年《左傳》正義引此皆作「其異姓則曰叔舅」，則孔所見本無「小邦」二字，^①於義爲長。」朱氏大詔云：「經以國之大小分別伯父、伯舅、叔父、叔舅之稱。於同姓大國曰伯父，則稱伯舅者亦大國可知。於同姓小邦曰叔父，則稱叔舅者亦小邦可知。上下立文相對，此句不須重言小邦，當以孔所引爲正。石本始衍，各本因之。」今案：注「據此禮云伯父」，毛本「云」誤「曰」，嚴本作「云」。「據」字，故本在「伯父」下，屬下句。○此天子稱諸侯之辭。父與舅，以姓同異而別也。伯與叔，以國大小而別也。謂之伯叔父舅，尊之親之之稱也。案：《曲禮》則以二伯稱伯父伯舅，九牧稱叔父叔舅，

與此異，當以此爲定稱。經邦、國互言，《說文》：「邦，國也。國，邦也。」是二字本通。鄭注《周禮》云：「大曰邦，小曰國。」此無注，則亦以爲通稱也。方氏苞云：「以國大小爲別，未安。」今案：方說非也。《儀禮》經是周公所作。周初封建五等之國，以功德大小爲差，不比後世由於兼并，則大國稱伯，小國稱叔，宜矣。春秋時晉取爲強大，而天王命辭見於內外傳者猶稱叔父，則其沿周初之稱可知也。注

云「據此禮云伯父，同姓大邦而言」者，上經多言「伯父」，乃同姓大國之稱。此經兼言同姓小國、異姓大小國，以覲兼五等，故竝詳其稱謂也。注意蓋謂據此禮云伯父，乃指同姓大邦言，若小邦則曰叔父，異姓大小邦則曰伯舅叔舅矣。敖氏引此注作：「此禮云「伯父」，據同姓大邦而言。」義似較顯。然敖氏引注多所移易，未必注本如是也。

右王辭命稱謂之殊

饗禮，乃歸。禮，謂食燕也。王或不親，以其禮

幣致之，略言饗禮，互文也。《掌客職》曰：上公三饗三食

①「則」，原作「作」，今據《續清經解》本改。

三燕，侯伯再饗再食再燕，子男一饗一食一燕。【疏】正義曰：《校勘記》云：「注『略言饗禮』，楊氏作『享』，下竝同。」又「三饗」「再饗」「一饗」，毛本俱作『享』。《校勘記》云：「嚴、徐、陳、閔、葛本，《集釋》、《通解》、敖氏俱作『饗』。」段氏玉裁注《說文》「享」字云：「案：《周禮》用字之例，凡祭享用『享』字，凡饗燕用『饗』字。如《大宗伯》吉禮下，六言『享』；先王嘉禮下，言『以饗燕之禮親四方賓客』，尤其明證也。《禮經》十七篇用字之例，《聘禮》內臣享君，字作『享』。《士虞禮》、《少牢禮》『尚饗』，字作『饗』。《小戴記》用字之例，凡祭享、饗燕皆作『饗』，無作『享』者。《左傳》則皆作『享』，無作『饗』者。《毛詩》之例，則獻於神曰『享』，神食其所享曰『饗』，如《楚茨》『以享以祀』下云『神保是饗』，《周頌》『我將我享』下云『既右饗之』，《魯頌》『享祀不忒』，『享以騂犧』下云『是饗是宜』，《商頌》『以假以享』下云『來假來饗』，皆其明證也。鬼神來食曰『饗』，即《禮經》『尚饗』之例也。獻於神曰『享』，即《周禮》『祭享』作『享』之例也。」今案：段氏之說詳矣，而《禮經》『饗燕』字作『饗』，尚未言及。《儀禮·聘禮》『臣享君』字作『享』，《覲禮》亦然。至饗燕之饗，則《聘禮》、《公食大夫禮》、《覲禮》字皆作『饗』。此注引《掌客職》『三饗再饗一饗』，《周禮》本作『饗』，《儀禮》各

本亦皆作『饗』，惟毛本作『享』，誤矣。「一」，《周禮》作『壹」。○歸，反國也。方氏苞云：「聘使饗燕畢，將歸而後贈賄。侯氏則賜車服，重賜竝頒，及將歸而後饗禮，何也？奉使而誤，不過主君不親饗食，而邦交如故也，故次第致禮。侯氏而有干王章，或賊賢害民，暴內陵外，雖時會來，王不遽加以九伐之法，必將有削地降律之罰焉，故必肉袒請聽事。待天子有『無事歸寧爾邦』之命，更賜車服重加命書，然後繼此得為諸侯，於是乎榮以饗食，厚其燕好而歸之，此先王制禮之精意也。」注云「禮，謂食燕也」者，

案：待賓客之禮有饗、食、燕三者，此經不單言饗而言饗禮，故知禮謂食燕也。云「王或不親，以其禮幣致之」者，謂王或有故不親食燕，如《公食大夫禮》『若不親食，使大夫以侑幣致之』，《聘禮》『若不親饗，則公作大夫致之以酬幣，致食以侑幣』之類是也。又《周禮·酒人》：「共賓客之禮酒，飲酒而奉之。」鄭注：「禮酒，饗燕之酒。王不親饗燕不親食，而使人各以其爵，以酬幣侑幣致之，則從而以酒往。」是王有致食燕之事也。《掌客職》亦曰：「若弗酌則以幣致之。」此注云「禮幣」者，禮即《聘禮·記》所云「凡致禮」之禮，注謂「以幣致其禮」是也。云「略言饗禮，互文也」者，容王無故親饗，有故不親饗，即以禮幣致之。王有故不親食

燕，以禮幣致之，無故即親食燕，故云「互文也」。引《掌客職》曰：「上公三饗三食三燕，侯伯再饗再食再燕，子男一饗一食一燕」者，證饗之外有食燕也。但今本《周禮·掌客》作「侯伯三饗」，鄭引作「再饗」者，《郊特牲》孔疏辨之曰：「南本或云侯伯亦三饗，誤也。」則今所傳殆唐時誤本，是以《周禮·內宰》、《職金》疏引《掌客》文，俱作「侯伯再饗」也。或疑《掌客》所言係諸侯自相朝，非天子待諸侯禮。據《大行人》云：「饗禮九獻，食禮九舉。」不言燕禮，似天子待諸侯有饗食無燕者。不知《大宗伯》云：「以饗燕之禮親四方賓客。」《司儀》云：「王燕則諸侯毛。」又《湛露》詩序云：「天子燕諸侯也。」鄭箋云：「諸侯朝覲會同，天子與之燕，所以示慈惠。」則覲有燕明矣。賈疏因《聘禮》言「致食以侑幣，致饗以酬幣」，不言致燕以幣，遂謂燕禮無幣。《詩》孔疏謂《燕禮》亦當有幣。今案：《鹿鳴》詩序云「燕羣臣嘉賓也」，而其詩曰「承筐是將」，則燕有幣明矣。陳氏祥道謂：「古人燕賓，未嘗不用酬幣，特《燕禮》之文不備耳。」是也。又案：《周禮·酒人》疏云：「案：《鹿鳴》燕羣臣嘉賓有實幣帛，則致燕亦以酬幣致之與饗同。」是賈亦自相矛盾矣。○方氏苞云：「諸侯適天子必告於祖，奠於禰，命祝史告於社稷宗廟，所過山川命五官道而出，如《曾子問》所記是也。」

入王畿則有誓衆、謁關人、習覲享、展羣幣、小行人出勞，所經致積之禮一切不具，而自至於王郊始，蓋凡此皆具於春朝夏宗，而無庸複出也。今案：《周禮·司儀》云：「凡賓客送逆同禮。」《訝士》：「邦有賓客則與行人送逆之。」《掌訝》：「若將有國賓客至，則戒官脩委積，與士逆賓於疆，爲前驅而入。及歸，送亦如之。」是諸侯入覲有逆之之禮，及歸有送之之禮。《聘禮》云：「士送至于竟。」此不言者，蓋亦見於春朝夏宗禮，而此不具耳。

右略言王待侯氏之禮以上廟受覲禮竟

諸侯覲于天子，爲宮方三百步，四門，壇十有二尋，深四尺，加方明于其上。四時朝覲受之於廟，此謂時會殷同也。宮，謂壝土爲埒，以象牆壁也。爲宮者，於國外，春會同則於東方，夏會同則於南方，秋會同則於西方，冬會同則於北方。八尺曰尋，十有二尋則方九十六尺也。深謂高也，從上曰深。《司儀職》曰：「爲壇三成。」成，猶重也。三重者，自下差之爲三等，而上有堂焉。堂上方二丈四尺，上等、中等、下等，每面十二尺。方明者，上下四方神明之象也，上下四方之神者，所謂明神

也。會同而盟，明神監之，則謂之天之司盟，有象者，猶宗廟之有主乎？王巡守，至於方嶽之下，諸侯會之，亦為此宮以見之。《司儀職》曰：「將會諸侯，則命爲壇三成，宮旁一門，詔王儀，南鄉見諸侯也。」【疏】正義曰：張氏爾岐云：「自此至篇末，皆言時會殷同及王巡守爲壇而見諸侯之事。」今案：據鄭注，則自此以下至「禮山川，晉陵於西門外」爲會同之禮，「祭天」而下爲巡守之禮也。方氏苞云：「『記』字宜冠此節之首。」又云：「方明者，木也。自爲注釋，通經所無，記文多此類。」吳氏廷華云：「上『侯氏裨冕』，疏謂《白虎通》引《禮·記》『天子乘龍，載大旆，象日月升龍』，其文與下節略同，則漢人固以此數節爲記也。考十七篇中，有有記者，有無記者，獨此篇記只三語，又與諸經不同，則此節以下其爲記說無疑。」盛氏亦以爲「詳其文體，有似乎記」。今案：「四傳擯」下注云：「王受玉撫玉，降拜於下等。及請事，勞，皆如《觀禮》，是以記之觀云。」據此則鄭注固明以此數節爲記矣，方氏、吳氏說可從。○《校勘記》云：「張氏曰：『注曰官謂壇土爲埽，案：諸本官皆作官，從諸本。』從上曰深，浦鏜云：『按《秋官·司儀職》疏引此作『從上向下爲深』，義尤悉。』案：《通典·巡守篇》引此亦有『向下』二字。『所謂神明也』，『神明』，監本、《集

釋》、楊氏俱作「明神」，與疏合。「則命爲壇」，「命」，徐本未刻，陳、閩、監本俱作「會」。「爲」，徐本作「焉」。《集釋》、《通解》、楊氏、毛俱作「命爲」。^①「詔王儀」，「詔」，徐本未刻。今案：嚴本「官」亦誤「官」，「牆」作「牆」。黃氏丕烈云：「各本作『牆』，^②『牆』乃誤字。」又「所謂明神」，嚴本作「神明」，毛本同。案：作「明神」是也。又「命爲」字及「詔」字，嚴本俱不誤。○此下言會同而云「諸侯覲于天子」者，《周禮》每以會同爲大朝覲，此記之於覲，故以覲言。上是覲於廟中之禮，此是覲於國外之禮也。云「爲官方三百步」者，《司馬法》：「六尺爲步。」方三百步，縱橫皆三百步，則爲方千八百尺，即方一里之地也。四門，謂四方皆有門，取洞達之義，即《周禮·司儀》所謂「宮旁一門」也。《掌舍職》會同「爲壇壇宮棘門」。則此宮掌舍爲之，司儀主令之歟？《司常》又云：「會同置旌門。」此謂王晝行止息之地，即《掌舍職》所云「爲帷宮設旌門」是也。此門當爲棘門，非旌門矣。壇，築土爲之，《漢書注》「築土而高曰壇」是也。「十有二尋」言其廣，「深四尺」言其高。「方三百步」者，宮之廣十

①「爲」下，原衍「本」字，據《十三經注疏校勘記》刪。

②「各」，《儀禮校錄》作「李」。

有二尋者，宮內之壇之廣也。此云「深四尺」，而《司儀》云「爲壇三成」，三成即上等、中等、下等三等也，每等一尺，通堂上計之爲四尺，文異實同也。方明者，謂上下四方之神，形制詳下。加於壇上，待祀也。必加方明者，會同爲非常之事，故設此以爲神所憑依。鄭注《司儀》云：「加方明於壇上而祀焉，所以教尊尊也。」王氏士讓云：「王者行事，百神享之，必有所依。」高氏愈云：「蓋即協和萬邦而懷柔百神之意。」注云「四時朝覲受之於廟，此謂時會殷同也」

者，賈疏謂：「朝宗雖在朝，受享則在廟，故并言『受之於廟』。此經言『壇』不言『廟』，故鄭以爲時會殷同之禮也。」

《大宗伯》曰：「時見曰會，殷見曰同。」鄭注：「時見者，言無常期，諸侯有不順服者，王將有征討之事，則既朝覲，王爲壇於國外，合諸侯而命事焉。《春秋傳》曰『有事而會，不協而盟』，是也。殷，猶衆也。十二歲王如不巡守，則六服盡朝，朝禮既畢，王亦爲壇，合諸侯以命政焉。」《大行人》曰：「時會以發四方之禁，殷同以施天下之政。」鄭注：「時會，即時見也，無常期。諸侯有不順服者，王將有征討之事，則既朝，王命爲壇於國外，合諸侯而發禁命事焉。禁，謂九伐之法。殷同，即殷見也。王十二歲一巡守，若不巡守，則殷同。殷同者，六服盡朝，既朝，王亦命爲壇於國外，

合諸侯而命其政。政謂邦國之九法。殷同，四方四時分來，歲終則徧矣。」殷同又謂之殷國，《大行人》曰：「十有二歲，王巡守殷國。」鄭注：「殷國則四方四時分來，如平時。」是也。《司儀》曰：「將合諸侯則令爲壇三成。」鄭注：「合諸侯，謂有事而會也，爲壇於國外以命事。」又云：「王巡守殷國而同，則其爲宮亦如此歟？」是會同爲壇於國外也。敖氏專以此爲王不巡守諸侯來朝之禮，又謂爲宮於國門外之南方。褚氏寅亮辨之云：「以王不巡守之歲爲壇以合諸侯，未免漏卻時會一禮。時會之時而逢朝覲，其當朝諸侯既循常制見於廟，復偕羣后見於壇。其不當朝者，則惟見於壇。若殷同之歲，竝無當朝諸侯，祇見於壇而已。其來亦分四時，其爲壇自必各以其方，而不專在南方矣。注言之未詳，故後人往往致疑。」今案：合《周禮注》觀之，則鄭氏於會同之禮未嘗言之不詳也。特敖氏以臆說經，未足爲據耳。又褚氏以殷同之歲竝無當朝諸侯，與鄭《周禮注》既朝而爲壇合諸侯命政者亦異。案《周禮》，十二歲係王巡守之期，王巡守則諸侯不來朝矣。殷同係因王不巡守而爲同禮，以與諸侯相見，則諸侯自於壇朝，不於廟朝。若六服盡來，既行受摯受享之禮於廟，復行奠玉將幣之禮於壇，不亦煩瀆乎？褚氏之言，自於經合也。云「宮，謂墮土爲埒，以

象牆壁也」者，案：埒，《說文》「庫垣也」，段氏注云：「卑垣延長而齊等若一，是之謂埒。《掌舍》：『爲壇墼宮。』鄭注云：『平地築壇，又委墼土，起埒埒以爲宮。』又《邕人》注云：『委土爲埒壇。』是壇爲委土之名。凡宮必有牆圍繞於外，此無牆，但於壇之外起土，委於地爲卑垣，以象牆壁也。云「爲宮者，於國外，春會同則於東方，夏會同則於南方，秋會同則於西方，冬會同則於北方」者，以會同諸侯，來者衆多，城中恐不足容之，故於國外。又見下經先言拜日於東門外，故知春會同則於東方，夏、秋、冬以此推之可知矣。鄭注《司儀職》云：「天子春帥諸侯，拜日於東郊，則爲壇於國東。夏禮日於南郊，則爲壇於國南。秋禮山川丘陵於西郊，則爲壇於國西。冬禮月四瀆於北郊，則爲壇於國北。」亦據下經言也。云「八尺曰尋，十有二尋，則方九十六尺也」者，八尺曰尋，詳《公食大夫禮》。十有二尋，蓋縱橫皆十二尋，故注以爲方九十六尺，此謂壇之下等其廣如是也。云「深謂高也，從上向下曰深」者，據《校勘記》增「向下」二字，謂從堂上向下至地，其高四尺也。云「《司儀職》曰：『爲壇三成。』成，猶重也」者，此經但言「深四尺」，不言重，故引《司儀》文證之。「成，猶重也」，謂三成爲三重，本《司儀》先鄭注也。云「三重者，自下差之爲三等，而上有堂焉」

堂上方二丈四尺，上等、中等、下等，每面十二尺」者，三重即三等，下等廣於中等，中等廣於上等，故云「自下差之爲三等」也。三等而上有堂，則堂在三等之上矣。堂上方二丈四尺，其下三等，每面十二尺，兩面加二十四尺，則上等當方四十八尺，中等當方七十二尺，下等當方九十六尺矣。盛氏云：「堂上以祀方明，竝王立之所。」云「方明者，上下四方神明之象也，上下四方之神者，所謂明神也」者，言方明爲上下四方神明之象，而上下四方之神即《司盟》所謂明神也。《司盟》云：「北面詔明神，既盟則貳之。」彼注云：「明神，神之明察者。」是也。云「會同而盟，明神監之，則謂之天之司盟」者，襄十一年《左傳》云：「司慎司盟，明神殛之。」服注：「二司天神，是爲天之司盟也。」鄭意蓋以方明即司盟。褚氏申之曰：「方明固爲上下四方之神，盟時即爲司盟之神，二而一也。但方明不專爲盟設，《曲禮》云：『涇牲曰盟。』會同有不盟者，據《春秋傳》云『不協而盟』，是協則不盟矣。」云「有象者，猶宗廟之有主乎」者，言爲方明之象以依神，亦猶宗廟設主以依神也。鄭注《司盟職》云：「覲禮加方明於壇上，所以依之也。」是也。云「王巡守，至于方嶽之下，諸侯會之，亦爲此宮以見之」者，如《舜典》、《王制》言歲二月東巡守，至于岱宗，覲諸侯。五月至南嶽，

八月至西嶽，十有一月至北嶽，皆如之是也。知亦爲此宮者，據《尚書大傳》云：「維元祀，巡守四嶽八伯，壇四奧。」是知亦爲壇爲宮也。又《左傳》：「王巡號守，號公爲王宮于珪。」亦其一證。但會同壇於國門之外，巡守壇於方嶽之下爲異耳。云「《司儀職》曰『將會諸侯，則命爲壇三成，宮旁一門，詔王儀，南鄉見諸侯』」者，引以證會同爲壇見諸侯之事。但彼本文會作合，命作令。會與合，命與令，義亦通也。方明者，木也，方四尺。設六色：東方青，南方赤，西方白，北方黑，上玄，下黃。設六玉：上圭，下璧，南方璋，西方琥，北方璜，東方圭。六色象其神，六玉以禮之。上宜以蒼璧，下宜以黃琮，而不以者，則上下之神，非天地之至貴者也。設玉者，刻其木而著之。【疏】正義曰：《校勘記》云：「注『而不以』下，《通典》有『此』字。」○此節詳方明之形制。案：《竹書紀年》：「大甲十年，大饗于大廟，初祀方明。」《漢書·律曆志》：「《伊訓篇》曰：『伊尹祀于先王，^①誕賓有牧方明。』」則祀方明之禮，殷已有之矣。方明以方四尺之木爲之，上下四方，共有六面。「設六色」者，每面各設一色，以象其神。「設六玉」者，每面各設一玉，以爲之飾。方

明不必定指日月山川，蓋言上下四方而六合以內之神悉該之矣。會同特加於壇而祀焉，其典至重，其物至貴，飾以玉焉宜也。孟康《漢書音義》曰：「方明者，神明之象也。以木爲之，畫六采。」然則六色畫之於木歟？聶氏《三禮圖》引舊《圖》云：「方明者，四方神明之象，用槐木爲之。」未知然否？秦氏蕙田云：「六色先東南西北而後上下，六玉先上下而後南西北東。變文無義例也。」注云「六色象其神」是也，云「六玉以禮之」則非，且與下「設玉者刻其木而著之」之說不合。上節言加方明於壇上，此節因釋方明之形制，非以禮神也。下經反祀方明，乃是禮神之事。注云「刻其木而著之」，賈疏謂刻木安於中，是也。然禮神用玉多矣，未有刻而著之於木者，既云「刻其木而著之」，則是以玉飾木，非禮神明矣。郝氏敬云：「設六玉，每方以其玉函木上。」張氏爾岐云：「刻木爲陷，而飾以玉。」皆不從注禮神之說也。《大宗伯職》曰：「以玉作六器，以禮天地四方。以蒼璧禮天，以黃琮禮地，以青圭禮東方，以赤璋禮南方，以白琥禮西方，以玄璜禮北方。」係言禮玉，與此別，不過璋璜圭名偶同耳。注云「上宜以蒼璧，下宜以黃琮，而不以

①「王」，原作「生」，今據《續清經解》本改。

者，則上下之神，非天地之至貴者也」者，鄭注《大宗伯》以天爲天皇大帝，地爲崑崙，故以爲神之至貴者。不知言上下四方，則天地之神亦在其中矣，奚庸區別乎？總之，《大宗伯》所言係禮神之玉，此係飾方明之玉，二者不容合爲一。鄭欲依彼爲解，故語多出入。敖氏遂以彼禮玉爲方明之玉，褚氏云：「經言設六玉與六色之木相配，竝不言禮神也。又蒼璧不可以爲圭，黃琮不可以爲璧，夫人而知之也。敖氏乃欲以《大宗伯職》所謂「玉作六器，以禮天地四方」者當之，未免附會牽合。」今案：褚說是也。上介皆奉其

君之旂，置于宮，尚左。公侯伯子男皆就其旂而立。置於宮者，建之，豫爲其君見王之位也。諸公，中階之前，北面東上。諸侯，東階之東，西面北上。諸伯，西階之西，東面北上。諸子，門東，北面東上。諸男，門西，北面東上。尚左者，建旂，公東上，侯先伯，伯先子，子先男，而位皆上東方也。諸侯入墻門，或左或右，各就其旂而立。王降階，南鄉見之三揖。土揖庶姓，時揖異姓，天揖同姓。見揖，位乃定。古文「尚」作「上」。【疏】正義曰：注「尚左者」，毛本「者」作「皆」。《校勘記》云：「徐本無『皆』字，陳、閩、葛本、《集釋》、《通解》俱作『者』，與疏合。楊氏

作『皆』。」今案：嚴本作「者」。戴校《集釋》云：「作『皆』說。」「土揖庶姓」，毛本「土」作「上」。《校勘記》云：「嚴、徐、陳本、《集釋》、《通解》俱作『土』，閩、葛俱誤作『土』。」○云「上介皆奉其君之旂，置于宮」者，上介，諸侯之上介也。云「奉其君之旂」，則似旂各以其國爲識，故賈疏謂與銘旌及在軍徽幟同。然謂以尺易仞，小而爲之，恐非。《司常》云：「諸侯建旂。」又云：「凡祭祀各建其旗，會同賓客亦如之。」是會同各建其旂，不聞小爲之也。李氏《集釋》引摯虞曰：「建旂者，所以殊爵命，示等威也。」又引《詩》曰：「君子至止，言觀其旂。」今案：《周禮·典命》云：「上公車旗以九爲節，侯伯以七爲節，子男以五爲節。」《大行人》云：「上公建常九旂，侯伯七旂，子男五旂。」是旂以爵命爲殊也。注云「置於宮者，建之，豫爲其君見王之位也」者，以下云「公侯伯子男等就旂而立」，必旂已建而後可就，是建之在先，故云「豫爲其君見王之位也」。經云「置」，注云「建」，一也。云「諸公，中階之前，北面東上」，及諸侯、諸伯、諸子、諸男面位，鄭皆據《大戴禮·朝事儀》而言。周公朝諸侯於明堂，其位亦如此。云「尚左者，建旂，公東上，侯先伯，伯先子，子先男，而位皆上東方也」者，盛氏世佐云：「尚左者，據王而言也。王南鄉，以東爲左，故諸公北面者

東上。諸侯在諸伯之東，諸子在諸男之東，是皆以左爲上也。」云「諸侯入壇門，或左或右，各就其旂而立」者，以旂在左者趨而左，旂在右者趨而右，故云「或左或右」也。經雖有四門，但據《司儀》王南鄉，則諸侯均當自南入也。秦氏蕙田云：「會同爲官方三百步，六尺爲步，則方二百二十五尋也。壇方十二尋，居宮之中央。壇之下距壇門一百六尋有四尺，則公侯伯子男立位在焉，上介奉旂而置於宮者是也。」云「王降階，南鄉見之三揖。土揖庶姓，時揖異姓，天揖同姓，見揖，位乃定」者，案：《司儀》云：「詔王儀，南鄉見諸侯，土揖庶姓，時揖異姓，天揖同姓。」鄭注：「謂王既祀方明，諸侯上介皆奉其君之旂置於宮，乃詔王升壇，諸侯皆就其旂而立。諸公中階之前，北面東上。諸侯東階之東，西面北上。諸伯西階之西，東面北上。諸子門東，北面東上。諸男門西，北面東上。王揖之者，定其位也。庶姓，無親者也。土揖，推手小下之也。異姓，昏姻也。時揖，平推手也。天揖，推手小舉之。」據此注是王升壇在先，諸侯乃入門就旂而立也。鄭以彼經據王而言，此經據諸侯而言，其儀則一，故兩經互引爲證。但注云「見揖，位乃定」，則似諸侯初入門時就旂而立，皆北面。既揖，乃各如其面位。以《燕禮》卿大夫入門皆北面，公降揖之，卿乃西面北

上，大夫北面，少進，推之可知也。又《司儀》「南鄉見諸侯」不云降階，此注云降階者，亦約《燕禮》而知也。云「古文『尚』作『上』」者，胡氏承珙云：「案：上下字作『上』，尊尚字作『尚』。鄭從今文作『尚』者，取其當文易曉耳。」敖氏必以上義優於尚，非矣。四傳擯。王既揖五者，升壇，設擯，升諸侯以會同之禮。其奠瑞玉及享幣，公拜於上等，侯伯於中等，子男於下等。擯者每延之，升堂致命，王受玉撫玉，降拜於下等。及請事、勞，皆如覲禮，是以記之覲云。四傳擯者，每一位畢，擯者以告，乃更陳列而升其次，公也，侯也，伯也，各一位，子男俠門而俱東上，亦一位也。至庭乃設擯，則諸侯初入門，王官之伯帥之耳。古文「傳」作「傳」。【疏】正義曰：注「王受玉撫玉」，毛本誤作「撫王」。《校勘記》云：「嚴、徐、閔、監、葛本、《集釋》、《通解》俱作『撫玉』。陳本『受玉撫玉』俱作『王』，尤誤。『皆如覲禮』，閔、葛『皆』俱誤『者』。『而俱東上』，閔本『上』誤作『士』。張氏曰：『注曰王官之伯帥之耳，吉觀國所校監本改王爲曰，未知孰據？篇末之注有是王官之伯會諸侯而盟，從諸本。』官，《通解》作『宮』。『古文傳爲傳』，重脩監本『傳』誤刻作『傳』。○『傳擯』者，設擯而傳命，與旅擯異義，見前。云「王既揖五者，升壇，設擯，升諸侯，以會同之禮」者，

謂王從壇降，揖五等諸侯。既揖乃復升壇，於是設擯，傳告五等諸侯，使升壇行會同之禮也。云「其奠瑞玉及享幣，公拜於上等，侯伯於中等，子男於下等」者，據《司儀》「及其擯之，各以其禮，公於上等，侯伯於中等，子男於下等」而言也。但彼文不言拜，此言拜者，案：彼注云：「上等、中等、下等者，謂所奠玉處也。」又云：「諸侯各於其等奠玉，降拜，升成拜，明臣禮也。」既，乃升堂，授王玉。」聶氏《三禮圖》云：「公奠玉於上等，降拜於中等。侯伯奠玉於中等，降拜於下等。子男奠玉於下等，降拜於地。及升成拜，皆於奠玉之處。」又云：「或可降拜者皆降於地，升成拜於奠玉之處也。」今案：聶氏降拜之說，以後說爲長，其前說則仍《司儀》賈疏之文耳。臣之拜君，以下爲敬，自應皆降拜於地。其升成拜，則俱謂於奠玉之處。據鄭彼注云「既，乃升堂，授王玉」，上升成拜，不言升堂，則亦謂於奠玉處拜也。然則此注所云「公拜於上等，侯伯於中等，子男於下等」者，謂奠玉幣及升成拜公皆於上等，侯伯皆於中等，子男皆於下等也。姜氏兆錫云：「見以土時天之三揖以尚親，而拜以上中下之三等以尚爵。」是也。云「擯者每延之，升堂致命，王受玉撫玉，降拜於下等，及請事，勞，皆如覲禮」者，謂上云於上等、中等、下等者，係會同之禮在壇，與

覲異。至擯者延之、升堂致命以下諸儀節，則皆與《覲禮》同。受玉謂覲時，撫玉謂享時。《典瑞職》云：「公執桓圭，侯執信圭，伯執躬圭，子執穀璧，男執蒲璧，以朝覲宗遇會同于王。」是會同亦執瑞玉與覲同。《司儀》又云：「其將幣亦如之。」鄭注：「將幣，享也。」是會同亦行享禮，與覲同。「降拜於下等」，「等」字係涉上文「下等」而衍。降拜於下，即降拜於地也。若以爲下等，則義有難通矣。「請事、勞」，謂覲時肉袒請事及王勞之也。會同以發禁施政，其禮較大於覲，亦必有告聽事及王勞之禮。以上各事，擯者每延之曰升，此會同亦然，故云「皆如覲禮」也。云「是以記之覲云」者，以會同之禮略與覲同，故記之於覲，是鄭亦以「諸侯覲於天子」以下爲記也。云「四傳擯者，每一位畢，擯者以告，乃更陳列而升其次，公也，侯也，伯也，各一位，子男俠門而俱東上，亦一位也」者，鄭以公侯伯三次傳擯，子男同一次傳擯，爲四傳擯。敖氏則以一朝三享爲四傳擯。褚氏云：「注四位之說本於《孟子》，夫有所受之也。」①《禮經釋例》云：「敖氏以五等之位皆北面爲一列，又以一朝三享爲四傳擯，皆與注異。竊謂五等之爵，不應無差等，享時亦不

①「也」下，《儀禮管見》有「與」字。

應升拜，注說不可易也。」秦氏蕙田亦以敖說爲非。云「至庭乃設擯，則諸侯初入門，王官之伯帥之耳」者，謂如《康王之誥》「大保帥西方諸侯入應門左，畢公帥東方諸侯入應門右」是也。「至庭乃設擯」，對《覲禮》門外設擯言之。必知至庭乃設擯者，以《司儀》云「及其擯之，各以其禮」，在王見諸侯三揖之後，故知諸侯入門時未有擯也。云「古文『傳』作『傳』」者，胡氏承珙云：「傳與傳聲義皆不相近，自由形似而誤。《周禮·訓方氏》：『誦四方之傳道。』」注：「故書傳爲傳，杜子春云傳當爲傳，書亦或爲傳。」是也。」天子乘龍，載大旂，象日月、升龍、降龍，出，拜日于東門之外，反祀方明。此謂會同以春者也。馬八尺以上爲龍。大旂，大常也。王建大常，繆首畫日月，其下及旒交畫升龍、降龍。《朝事儀》曰：天子冕而執鎮圭，尺有二寸，繅藉尺有二寸，搢大圭，乘大路，建大常十有二旒，樊纓十有二就，貳車十有二乘，帥諸侯而朝日於東郊，所以教尊尊也。退而朝諸侯。由此二者言之，已祀方明，乃以會同之禮見諸侯也。凡會同者，不協而盟。《司盟職》曰：「凡邦國有疑會同，則掌其盟約之載書及其禮儀，北面詔明神，既盟則藏之。」言北面詔明神，則明神有象也。象

者其方明乎？及盟時又加於壇上，乃以載辭告焉。詛祝掌其祝號。【疏】正義曰：「載大旂」，毛本「旂」作「旆」。《校勘記》云：「唐石經、《集釋》、《通解》、楊、敖俱作「旂」，注同，與疏合。張氏曰：「載大旆，諸本旆作旂，從諸本。」今案：陳鳳梧本經、注俱作「旂」。《玉海》引亦作「旂」。嚴本經作「旆」，注作「旂」。黃氏丕烈云：「旂，是。旆，誤。」注「王建大常」，毛本「大」誤「太」，下同。《校勘記》云：「案：大讀如字。大常，猶大旂也。今人讀他蓋切，非是。」「繅藉」，嚴、徐、閩、葛俱從竹作「籍」。黃氏丕烈云：「藉譌爲籍，形涉而誤。」又《校勘記》云：「由此二者」「由」，閩、葛俱誤作「曰」。「不協而盟」，「協」，閩本誤作「僞」。既盟則藏之」，盧文弨云：「藏是。」戴校《集釋》依本文改「貳」。但疏云「司盟之官，覆寫一通自藏，擬後覆驗」，則注疏本自作「藏」，然「藏」即是「貳」，兩者俱可通，而「藏」字義較顯。」今案：嚴本作「藏」，仍之。○此謂天子會同之日，先拜日而後朝諸侯也。依行禮節次，此當在公侯伯子男皆就其旂而立之前，因奉旂，就旂連叙爲順。而就旂而立及四傳擯，四時會同之禮皆同。拜日、禮日、禮月、禮山川丘陵，四時有異，故先以同者叙於前，而以其異者退叙於後。此記者叙次之法，後儒多誤駁注，說詳下。天子乘龍，乘路車

而駕龍馬也。「載大旂」，載之於車也。「象日月、升龍、降龍」，言繪日月升降龍之象於旂也。「出」，謂自國而出也。

「拜日於東門之外」，謂王城東門外也。「反祀方明」，謂既拜日而反，乃於壇祀方明也。上言「加方明于其上」，未祀也，此乃祀之。既祀，乃朝諸侯傳擯也。注云：「此謂會同以春者也」者，會無常期，有以春者，有以夏秋冬者，同則不巡守之歲。春，東方諸侯來。夏，南方諸侯來。秋，西方諸侯來。冬，北方諸侯來。此云「拜日于東門之外」，故知謂會同以春者也。云「馬八尺以上爲龍」者，《周禮·庾人職》

文。云「大旂，大常也」者，案：《周禮·司常》云「日月爲常，交龍爲旂」，則旂與常別。此云「大旂，大常」者，對文異，散則通。桓二年《左傳》：「三辰旂旗。」服氏注云：「九旂之總名。」是九旂總名旂旗，故常亦得稱旂。云「王建大常」者，《司常職》文，引以證大旂之爲大常也。云「繆首畫日月，其下及旒交畫升龍、降龍」者，《白虎通》引《禮·記》曰：「天子乘龍，載大旂，象日月升龍。」傳曰：「天子升龍，諸侯降龍。」是日、月、升龍、降龍皆畫於旂也。旂之正幅爲繆，下屬爲旒。《爾雅》：「繆帛繆。」郭注云：「繆，衆旒所著。」是旒屬於繆也。經先言日月，次言升龍降龍，故知日月畫於繆首，而其下及旒畫升龍降龍也。《郊特牲》曰：

「旂十有二旒，龍章而設日月。」謂此也。《司常》但云日月不云升龍降龍者，九旂之制，上得兼下，下不得兼上，故以日月與交龍對言也。引《大戴禮·朝事儀》者，以朝日之事與此同，故引以爲證。云「天子冕而執鎮圭，尺有二寸，纁藉尺有二寸，摺大圭」者，《玉藻》云：「天子玉藻，十有二旒，前後邃延。」《郊特牲》云：「戴冕璪十有二旒，則天數也。」《玉藻》又云：「玄端而朝日於東門之外。」鄭注：「端，當爲冕。」賈疏遂以《朝事儀》所云「冕」爲玄冕。今案：覲服衮冕，則會同不得服玄冕。《玉藻》「玄冕朝日」，鄭注以爲春分朝日之禮與此異。《典瑞》：「王晉大圭，執鎮圭，纁藉五采五就以朝日。」鄭注：「晉讀爲摺，摺謂插於紳帶之間。」《玉人職》曰：「大圭長三尺，杼上，終葵首，天子服之。鎮圭尺有二寸，天子守之。」鄭注此篇「有纁」云：「纁，所以藉玉，廣袞各如其玉之大小。」故鎮圭尺有二寸，纁藉亦尺有二寸也。云「乘大路，建大常，十有二旒，樊纁十有二就」者，大路，玉路也。《周禮·巾車》：「一曰玉路，錫樊纁十有再就，建大常十有二旒以祀。」鄭注：「樊，讀如『鞶帶』之『鞶』，謂今馬大帶也。纁，今馬鞅，皆以五采屬飾之。」就，成也。云「貳車十有二乘」者，貳車，副車也。《大行人》上公貳車九乘，故王十二乘。哀七年《左傳》云：「周之王也，

制禮，上物不過十二，以爲天之數。」故天子服物多用十二也。云「帥諸侯而朝日於東郊」者，「朝日於東郊」，與此經「拜日于東門之外」一也。郊在國門外云東郊，則知東門之外爲王城東門外，鄭注《玉藻》云「東門，謂國門」是也。敖氏乃以東門即此宮之東門，❶非矣。云「所以教尊尊也」者，《典瑞》鄭注云「王朝日者，示有所尊，訓民事君」，是教尊尊之義也。云「退而朝諸侯」者，以上皆《朝事儀》文，彼文「退而朝諸侯」下即云「爲壇三成，宮旁一門」，則知退而就壇朝諸侯矣。云「由此二者言之，已祀方明乃以會同之禮見諸侯也」者，言《朝事儀》朝諸侯在朝日之後，而此經拜日之後即祀方明，是已祀方明乃見諸侯也。《王制》孔疏據此注申之，謂：「未祀方明，未有見諸侯之事。皇氏以爲未祀方明之前已見諸侯，非也。」云「凡會同者，不協而盟」，又引《司盟職》文者，「不協而盟」，《左傳》文，見前，謂凡會同雖不盡盟，而有不協者，則會同之後必盟，故引《司盟》文以證之也。云「《司盟職》曰『凡邦國有疑會同，則掌其盟約之載書及其禮儀，北面詔明神，既盟則藏之』」者，案：《周禮》本文「載」下無「書」字，又「藏」作「貳」。云「言北面詔明神，則明神有象也，象者其方明乎」者，鄭意欲解方明與司盟之明神爲一，與上「諸侯覲于天子」節注意略同，故言詔明神

必有象乃可詔，則此方明者即明神之象也。云「及盟時，又加於壇上，乃以載辭告焉」者，言會同之禮先祀方明，既祀，徹之而朝諸侯。若有盟，則於盟時又加方明於壇上，以載辭告焉。云「詛祝掌其祝號」者，案：《周禮·詛祝》云：「掌盟、詛、類、造、攻、說、禱、祭之祝號。」鄭注：「八者之辭，皆所以告神明也。」其職又云：「作盟詛之載辭。」是引以證盟時以載辭告之義也。○案：鄭注據《朝事儀》考之，謂已祀方明，乃以會同之禮見諸侯。又謂此言拜日于東門之外，爲春會同之禮。下「禮日于南門外，禮月與四瀆于北門外，禮山川丘陵於西門外」，爲夏、冬、秋會同之禮。其說至精確。敖氏乃謂此言已受諸侯之朝享，乃帥而拜日，其節與《朝事儀》不同。又謂「禮日于南門外」以下三禮，皆與上事相屬而舉之。盛氏世佐從其說，以鄭注爲非。姜氏兆錫至以此訾鄭之踳駁。今引諸儒之說正之。張氏爾岐云：「推其次第，上介先期置旂，質明，王帥諸侯拜日東郊，反祀方明。二伯帥諸侯入壇門，王降階，南鄉三揖，諸侯皆就其旂而立，乃傳擯。」褚氏云：「此及下兩節，行禮次第當在公侯伯子男皆就其旂而立之前。東門，王城東門也。先拜日

❶「門」下，原有「爲」字，據《儀禮集說》刪。

于東門外，乃至壇祀方明，然後徹方明朝諸侯。或有盟誓之事，則朝畢復加方明。節次宜如是。若先受朝而始拜日祀方明，恐非敬神之道。夏秋冬以此推之。若如敖氏不分四時，專就壇宮三百步之地，一日而編輯五端，姑無論日力不給也，即如此日受朝之後，乃始出壇東門而拜日，復反而祀方明，又至南門重禮已拜之日，乃越西門至北門而禮月與四瀆，終乃旋至西門以祀山川丘陵，其紛雜無緒甚矣。周公制禮，夫豈其然？秦氏蕙田云：「敖氏謂此三禮者皆與上事相屬，則是於拜日祀方明之後復舉之。既拜日，東門外，又禮日南門外，一事而再祭，毋乃數而瀆乎？」以上三說皆辨正敖氏之失，而褚氏之說尤詳備，其有功經注大矣。禮日于南門外，禮月與四瀆于北門外，禮山川丘陵于西門外。此謂會同以夏冬秋者也。變拜言禮者，容祀也。禮月於北郊者，月，大陰之精，以為地神也。盟神必云日月山川焉者，尚著明也。《詩》曰：「謂予不信，有如皦日。」《春秋傳》曰：「縱子忘之，山川神祇其忘諸乎？」此皆用明神為信也。【疏】正義曰：注「夏冬秋」，《校勘記》云：「賈疏作『秋冬』」。今案：作「冬秋」是也，詳下。「又容祀也」，毛本「容」作「客」，《校勘記》云：「嚴本、《集釋》、《通解》俱作『容』，與單疏述注合。《通典》作『祭』」，

誤。今案：盛氏云：「作『客』者，傳寫之譌耳。」又「大陰之精」，嚴本、《集釋》俱作「大」，毛本作「太」。據《釋文》「大史音泰」，注云「後大陰同」，則作「大」是，下同。○此亦就其異者言之也。上言天子車旂之制及反祀方明，此三時會同禮亦皆如之。惟夏則禮日于南門外，冬則禮月與四瀆于北門外，秋則禮山川丘陵于西門外，與春拜日于東門外異，故特記之也。祀方明係總祀羣神於壇，此則各就其方位拜禮之。四瀆，《爾雅·釋水》云：「江、河、淮、濟為四瀆。四瀆者，發原注海者也。」丘陵，詳下節。郝氏敬云：「日為陽精，故於南。月與四瀆陰精，故於北。山川丘陵主成物，故於西。」王氏士讓云：「日，太陽之精，拜於東而禮於南，皆陽方也。月，大陰之精，四瀆為極陰，故同配北方。月又尊，故先言之。山川丘陵出雲見風雨為微陰，故同配西方也。」注云「此謂會同以夏冬秋者也」者，上拜日東門外為春會同之禮，則此三者為夏冬秋會同之禮明矣。鄭於《司儀》注言之特詳，已見前。經言「南北西」，故注言「夏冬秋」，淺人謂為秋冬誤倒，非也。云「變拜言禮者，容祀也」者，鄭意以此拜與禮當有祀事，但言拜則祀不見，言禮則祀見，故云「變拜言禮，容祀也」。秦氏蕙田云：「上言拜，此言禮，互文也。」云「禮月於北郊者，月，大陰之精，以為地神

也」者，日爲太陽之精，月爲大陰之精，《淮南子》、《說文》等書多言之。《春秋感精符》曰：「月者，陰之精，地之理。」鄭注《禮記》以日爲天神，故以月爲地神也。言此者，見日月同尊，故言禮日即言禮月，解經先北於西之意。四瀆與月同禮於北，而川不於北者，敖氏云：「四瀆尊，宜避之。」是也。然丘陵亦山類，四瀆亦川類，故下注以「日月山川」括之。云「盟神必云日月山川焉者，尚著明也」者，即《司盟》注「明神，神之明察者，謂日月山川」是也。引《詩》者，《王風·大車篇》文。引《春秋傳》者，定元年《左傳》宋仲幾語。然傳文本作「山川鬼神」，此引作「山川神祇」，似「神祇」是也。云「此皆用明神爲信也」者，言《詩》與傳皆用著明之神爲信之事也。鄭意蓋以會同必有盟，此經於上下四方之神獨禮日月山川，故引《詩》、傳反復申明以爲盟神之證焉耳。然祀方明與拜禮日月山川原係兩事。祀方明，凡會同皆然；拜禮日月山川，則各因其方位行之，春夏不必禮月山川，秋冬即不必禮日，且亦不專爲盟禮之，即不盟亦然。方明爲上下四方之神，則日月山川亦在其中，然不可專以方明爲日月山川之神也。○案：敖氏誤以此三禮皆與上事連舉，辨見上。又注「容祀」二字，俗本誤作「客祀」，張氏爾岐據之遂作「主客」之「客」解，爲《儀禮集編》所譏，則讀書

校訂之功不容少矣。

右會同之禮

祭天，燔柴。祭山、丘陵，升。祭川，

沈。祭地，瘞。升、沈，必就祭者也。就祭，則是謂王

巡守及諸侯之盟祭也。其盟，惕其著明者。燔柴、升、沈、瘞，祭禮終矣，備矣。《郊特牲》曰：「郊之祭也，迎長日之

至也，大報天而主日也。」《宗伯職》曰：「以實柴祀日月星辰。」則燔柴祭天，謂祭日也。柴爲祭日，則祭地瘞者，祭月

也。日月而云天地，靈之也。《王制》曰：「王巡守，至於岱宗，柴。」是王巡守之盟，其神主日也。《春秋傳》曰：「晉文公爲踐土之盟。」而傳云山川之神，是諸侯之盟，其神主山

川也。月者，大陰之精，上爲天使，臣道莫貴焉。是王官之伯會諸侯而盟，其神主月與？古文「瘞」作「瘞」。【疏】正

義曰：注「其盟惕其著明者」，毛本「惕」作「揭」。下「其」字，賈疏作「於」。《校勘記》云：「揭，嚴、徐、陳本，《通解》

俱作「惕」，與單疏述注合，《集釋》、楊氏從手。案：《釋文》

音苦蓋反，是讀爲「忤歲惕日」之「惕」，明係「惕」字，今本《釋文》亦誤作「揭」，唯宋本不誤。或曰「惕」當作「揭」，《職

金》注曰：「今人之書，有所表識，謂之楊槩。」今案：陳鳳梧本亦作「楊」。下「其」字，嚴本及各本俱作「其」，從嚴本。又「主山川也」，毛本「主」誤「上」。《校勘記》又云：「月者」，《通解》者作「乃」。是王官，《通解》王作「五」。○此經言巡守祭祀之禮與上異。上不言祭天地，又川與四瀆分禮。此言祭天地、祭山川、祭丘陵川，不及四瀆。蓋巡守但就所過山川祭之，四瀆不必兼祭矣。其叙於《觀禮》之末者，以巡守至方岳有覲諸侯之事，故因會同而並記之也。張氏爾岐云：「此言天子巡守四岳，各隨方向祭之。於山言升，於川言沈，是就其處而舉此禮，故知是王者巡守之事。鄭前注云：『王巡守至於方岳之下，諸侯會之，亦為此宮以見之。』為此經設也。」秦氏蕙田云：「案：此經自『諸侯覲于天子』以下，論會同之禮。此條謂王巡守覲諸侯之禮也。王巡守，諸侯來覲，為壇壝宮，加方明，四傳擯，皆與時會殷同之儀同。但會同則拜日及禮日月山川丘陵四瀆而已，巡守則祭天地，其禮尤大，故特記之。《尚書》曰：『歲二月東巡守，柴。望秩于山川，肆覲東后。』《王制》曰：『歲二月，東巡守，柴。而望祀山川，覲諸侯。』《郊特牲》曰：『天子適四方，先柴。』此巡守祭天與山川之明文，經傳雖不言祭地，然有柴又有望，則有瘞從可知。」蔡氏德晉

云：「《舜典》、《王制》所謂『柴，望』，既祭天，自未有不祭地者，此云『祭地，瘞』，可補二經之缺。」今案：《王制》：「天子將出，類乎上帝，宜乎社。」社即祭地，巡守將出而祭地，則所至亦必祭地明矣。《詩序》云：「《時邁》，巡守告祭柴望也。《般》，巡守而祀四岳河海也。」皆足為此經之證。《祭法》曰：「燔柴於泰壇，祭天也。瘞埋於泰折，祭地也。」是每歲常祭之禮。《爾雅》：「祭天曰燔柴，祭地曰瘞瘞，祭山曰瘞縣，祭川曰浮沈。」是泛釋祭名。《周禮·大宗伯》云：「以禋祀祀昊天上帝，以實柴祀日月星辰，以粢燎祀司中司命風師雨師，以血祭祭社稷五祀五嶽，以狸沈祭山林川澤，以醠辜祭四方百物。」是總言祀天神祭地祇之禮，皆與此別。燔柴，郭注《爾雅》云：「既祭，積薪燒之。」鄭注《周禮》「禋祀實柴粢燎」云：「三祀皆積柴，實牲體焉。或有玉帛燔燎而升煙，所以報陽也。鄭司農云：『實柴，實牛柴上也。』是三祀皆積柴，加牲其上而燒之，惟玉帛或有或不有耳。案：《肆師》云：『立大祀用玉帛牲牷。』鄭司農云：『大祀天地。』則此燔柴祭天，當玉帛牲俱有矣。「柴」，《說文》作「柴」，云「燒柴祭天也」，引《虞書》亦作「柴」。「瘞縣」，郭注云：「或瘞或縣，置之於山。《山海經》曰：『縣以吉玉』是也。」此不云瘞縣而云升者，以巡守兼有封禪之

事。鄭《時邁》箋云：「天子巡行邦國，至於方岳之下而封禪也。」《白虎通·封禪篇》云：「王者易姓而起，必升封泰山，何？報告之義也。封禪以告太平也。」又云：「升封者，增高也。」《禮器》：「因名山升中於天。」鄭注：「名，猶大也。升，上也。」亦引《孝經說》曰：「封乎泰山。」是其言升之義也。祭山兼言丘陵者，《說文》：「丘，土之高也，非人所爲也。陵，大阜也。」是丘陵謂山之高者。《考工記·玉人職》曰：「天子以巡守，宗祝以前馬。」鄭注：「禮，王過大山川，則大祝用事焉。將有事於四海山川，則校人飾黃駒。」是巡守過大山川皆祭之也。「浮沈」，郭注云：「投祭水中，或浮或沈。」此但言「沈」者，《周禮·小子職》云：「凡沈辜侯禋，飾其牲。」鄭司農云：「沈謂祭川。」《大宗伯》注亦云「祭川澤曰沈」是也。「瘞埋」，郭注云：「既祭，埋藏之。」此但言「瘞」者，鄭注《禮運》云「埋牲曰瘞」，是瘞與埋義一耳。《司巫職》曰：「凡祭事守瘞。」鄭注：「瘞謂若祭地祇有埋牲玉者也。守之者，以祭禮未畢，若有事然，祭禮畢則去之。」是祭地言瘞也。注云「升、沈，必就祭者也。就祭，則是謂王巡守及諸侯之盟祭也」者，案：山川各有主名，各有處所，不比戴天履地，四方皆同也。經言「升」，則是就其山之處升祭之，言「沈」，則是就其川之處

沈祭之，故云「必就祭」也。注以「就祭」謂王巡守，是矣。而以爲「及諸侯之盟祭也」，則非。《禮》曰：天子祭天地，祭山川。諸侯祭山川而已。諸侯之盟，何得祭天地也？云「其盟，惕其著明」者，段氏玉裁云：「字作惕，從心。義作揭，從手。揭者，舉也。惕蓋揭字之假借，應基竭切，而陸氏乃苦蓋反。賈疏亦不定「惕」字之義，皆其疏也。」今案：「揭其著明」，即上注盟神尚著明之義。云「燔柴、升、沈、瘞，祭禮終矣，備矣」者，郭璞謂燔瘞在既祭之後，即注所謂「終」也。天、地、山、川四者皆舉，所謂「備」也。注引《郊特牲》及《宗伯職》文，以證祭天之爲祭日，又以柴爲祭日，推之謂瘞亦祭月。又因經言祭天地，不言祭日月，復云：「日月而云天地，靈之也。」展轉申說，義多未安。又引《王制》以證王巡守之盟，其神主曰：引《春秋傳》以證諸侯之盟，其神主山川。今案：《王制》注以柴爲祭天告至，其說自當。《左傳》晉文公爲踐土之盟在僖二十八年，竝無山川之神語，未知鄭何所據。又云「月者，大陰之精，上爲天使，臣道莫貴焉」者，案：《淮南子》云：「月者，大陰之精。」又云：「日月，天之使也。」是鄭所本，言此以證王官之伯會諸侯而盟，其神主月，義多牽合。陳氏祥道云：「經言「祭天」而鄭氏言「祭日」，經言「祭地」而鄭氏言「祭月」，且方明

以象上下四方，而經傳凡言主盟者，多稱明神，曰司慎司

盟、名山名川、羣神羣祀、先王先公、七姓十二國之祖。《齊

語》桓公與諸侯約誓於上下神祇，則諸侯之盟非特主山川

也。鄭氏謂王之盟主曰，諸侯主山川，王官之伯主月，其禮

無據。《秦氏蕙田》云：「鄭氏據《大宗伯》以實柴祀日月星

辰」，因謂燔柴祭日，瘞祭月。但《周禮》裡祀、實柴、樛燎三

者，自昊天上帝、日月星辰、司中司命、風師雨師皆同之，謂

日月皆燔柴則可，謂祭日燔柴祭月瘞則不可。以祭月爲瘞

者，鄭之臆說也。燔柴與瘞自是巡守告祭天地之禮，非祭

日月以爲盟神，不得與方明牽合爲一。且日月天神，非地

示也。祭天可以主日，祭地必不可以主月。據《祭義》：

「大報天而主日，配以月。」祭天則日月從祀，故言祭天可以

包日月，不得以祭日月而冒天地之稱也。」今案：此節注本

支離，陳氏、秦氏駁之甚是。鄭氏之意蓋謂會同巡守必有

盟，故前後注多謂日月山川爲盟神，以牽合方明。不知會

同固有不盟者，至巡守以考制度、頒政教，竝非爲盟而起，

必以盟言之，誤矣。云「古文「瘞」作「瘞」者，胡氏承珙

云：「《爾雅》孫注云：「瘞者，翳也，既翳翳藏地中也。」《大

雅·皇矣》：「其畜其翳。」《釋文》：「翳，《韓詩》作瘞。」《釋

名》：「瘞，翳也，就隱翳也。」是瘞、瘞二字聲同，義亦可通，

故古文假瘞爲瘞。鄭從今文者，用其正字。」

右巡守之禮

【疏】正義曰：《校勘記》云：「記，徐本、《要義》俱作

「設」。案：此下三句爲記文無疑，石經補缺亦作「記」。

徐本作「設」者，殆因注而誤也。嚴本與徐本同。」今

案：黃氏現刻嚴本作「記」，不作「設」，不知《校勘記》何

據云然。○或以「記」字宜在「諸侯覲于天子」之上，似

是，詳前。今未敢移易，而附其說於此。

几俟于東箱。王即席，乃設之也。東箱，東夾之

前，相相待事之處。【疏】正義曰：《校勘記》云：「几俟，石

經補缺、徐、陳、閩、葛「俟」俱誤作「俟」，《集釋》、《通解》俱

作「俟」。今案：嚴本作「俟」。注云「王即席，乃設之也」

者，《儀禮》几爲神，則几、席竝設；爲人，則先布席而後設

几。《聘禮》：「几筵既設，擯者出請命。」注云：「有几筵

者，以其席受，宜依神也。」是爲神几、席竝設也。又：「宰

夫徹几改筵。」注云：「將禮賓，徹神几，改神席，更布也。」

賓席東上。」又：「公迎賓入升，公受宰夫几，執以授賓。賓訝受于筵前，北面設几。」是爲人先布席而後設几也，《昏禮》禮賓亦然。《有司徹》：「司宮筵于戶西，南面。」注：「爲戶席也。」又：「主人迎戶升堂，執几授戶，戶受奠于筵上。」是布席在先，設几在後矣。此云「俟」，故知俟王即席乃設之也。几，即左右几也。設之者，司几筵也。敖氏謂天子登席於既設几之後，此云「俟于東箱」，指未設几之前而言。案：既設几而後登席，則無所庸其俟矣，敖說非也。云「東箱，東夾之前，相相待事之處」者，案：東箱即東夾，注乃云「東夾之前」，則是以東箱爲東堂矣。詳《特性》「几席兩敦在西堂」下。《釋名》云：「翔，佯也。相翔，猶相佯也。相佯亦作相羊，亦作倘佯。」《後漢書》注：「相佯，猶徘徊也。」《文選》注：「倘佯，猶徘徊也。」又云：「倘佯，猶翱翔也。」《漢書》注：「相羊，翱翔也。」然則鄭意蓋謂東夾之前可以徘徊待事，故云「相相待事之處」也。《公食禮》：「公揖退于箱。」注云：「箱，東夾之前，俟事之處。」與此一也。賈疏云：「覲在文王廟中，案：鄭《周禮注》「宗廟、路寢，制如明堂」，明堂有五室四堂，無箱夾。此有東夾者，周公制禮據東都，乃有明堂。此文王廟仍依諸侯之制，是以有東夾室。若然，《樂記》注云「文王廟爲明堂制」者，彼本

無「制」字，直云文王廟爲明堂。」今案：《玉藻》疏以此記東箱爲記人之誤，非是。據上經設斧依于戶牖之間，則亦是中央室左右房之制，與明堂五室異矣。《詩·斯干》箋云：「宗廟及路寢，制如明堂。」孔疏云：「《顧命》說成王崩，陳器物於路寢，云西房、東房。《鄭志》荅趙商云：「成王崩之時在西都，文王遷豐，作靈臺辟廱而已，其餘猶諸侯制度。故喪禮設衣服之處有夾室與東西房也。周公攝政致太平，制禮作樂，乃立明堂於王城。」如鄭此言，則西都宗廟路寢依先王制，不似明堂。此言「如明堂」者，《鄭志》荅張逸云「周公制禮土中，《洛誥》「王入大室裸」是也。《顧命》成王崩於鎬京，承先王宮室耳。宣王承亂，未必如周公之制。」以此二荅言之，則鄭意以文王未作明堂，其廟寢如諸侯制度。及周公制禮，建國土中，以雒邑爲正都，其明堂廟寢天子制度，皆在王城爲之。其鎬京先王之宮室尚新，周公不復改作。故成王之崩有二房之位，由承先王之室故耳。及厲王之亂，宮室毀壞，先王作者，無復可因。宣王別更修造，自然依天子之法。故知宣王雖在西都，其宗廟路寢皆制如明堂，不復如諸侯也。」此疏較賈疏尤詳。《鄭志》荅趙商、張逸問二條，《書·顧命》疏、《禮記·玉藻》疏亦引之，足證覲在文王廟云「戶牖之間」與「東箱」，猶據西都宮室制

度言之也。偏駕不入王門。在旁與己同曰偏。同姓金輅，異姓象輅，四衛革輅，蕃國木輅。駕之與王同，謂之偏駕。不入王門，乘墨車以朝是也。偏駕之車，舍之於館與？【疏】正義曰：注「在旁」，毛本「在」誤「左」。《校勘記》云：「監本、《集釋》、《通解》、楊氏俱作「在」，與疏標目合。」「與王同」，「王」，重脩監本作「主」。」「謂之偏駕」，《集釋》、楊氏俱重「偏」字。」「不入王門」，「入」，重脩監本誤作「人」。今案：嚴本作「在」，又「偏」字不重，從嚴本。又「輅」，《集釋》俱作「路」。云「在旁與己同曰偏，同姓金輅，異姓象輅，四衛革輅，蕃國木輅，駕之與王同，謂之偏駕」者，案：同姓金路，據《巾車》云「金路同姓以封」，是同姓之國乘金路也，以下俱見《巾車職》。《巾車》又云：「玉路以祀。」此五路王備乘之，諸侯止得駕其一，與王同，故謂之偏駕。《禮記·仲尼燕居》曰：「達於樂而不達於禮，謂之偏。」鄭注：「偏，不備耳。」「《國語注》：「偏，偏有一也。」是也。《列子》注訓偏爲邊，是鄭言「在旁與己同」之義。云「不入王門，乘墨車以朝是也」者，據上經朝時乘墨車，是金路、象路之等不乘以入王門矣。云「偏駕之車，舍之於館與」者，此無正文，但既不入王門，自舍於館矣。盛氏世佐云：「王門，王城門也。不入者，以其疑於天子也。然則諸

侯在天子之國乘墨車，不獨朝時爲然，故記著之。」方氏苞曰：「人王都而羣駕天子之車，則使人疑。故五等之國乘墨車，所以彰臣節，定民志也。不入王門，則於畿內得乘可知矣。」今案：上經「乘墨車」鄭注云：「人天子之國車服不可盡同也。」是諸侯在天子之國，不得乘金路等車矣，盛氏、方氏之說是也。莫圭于纁上。謂釋於地也。古文

「纁」作「璵」。【疏】正義曰：《校勘記》云：「注末「古文纁作璵」五字，諸本俱脫，嚴本有。」○上經「乃朝以瑞玉，有纁」，此云「莫圭于纁上」者，謂侯氏入門右，奠圭於地時，以纁爲之藉。故記云「莫於纁上」，而注以「釋於地」解之也。云「古文「纁」作「璵」」，詳《聘禮》。○凌先生諱廷堪補《觀義》曰：「古者，天子以賓禮親邦國，春見曰朝，夏見曰宗，秋見曰覲，冬見曰遇，時見曰會，殷見曰同。是故天子當依而立，諸侯北面而覲；天子當宁而立，諸公東面、諸侯西面而朝。凡朝覲宗遇會同於王，公執桓圭，侯執信圭，伯執躬圭，纁皆三采三就。子執穀璧，男執蒲璧，纁皆二采再就。廟中將幣皆三享。諸侯朝于天子曰述職，一不朝則貶其爵，再不朝則削其地，三不朝則六師移之。故曰：「朝覲之禮，所以明君臣之義也。」朝者，位於內朝而序進，受贄於朝，受享於廟，生氣，文也。覲者，位於廟門外而序入，受摯

受享皆於廟，殺氣，質也。覲禮至于郊，王使人皮弁用璧勞，優侯氏也。天子賜舍，使侯氏即安也。天子袞冕負斧依，鄉明出治，象天道也。侯氏裨冕入門右，所以承天，象地道也。覲用命圭特達，禮以少爲貴也。享用束帛加璧，有庭實，隆殺之義也。奠圭于堂下，擯者辭，然後升致命，降階，再拜稽首送玉，擯者辭，然後升成拜。覲禮盛，侯氏先以臣禮見，天子以客禮受之也。三享皆中庭奠幣，升堂致命，降階再拜稽首，不復升成拜者，享禮殺，全乎爲臣也。享畢不禮賓，天子尊也。不覲，侯氏自來，非使人也。禮畢，乃右肉袒於廟門之東，天子威諸侯也。賜侯氏以車服，天子懷諸侯也。或曰：奠圭，降拜，升成拜，明臣禮也。肉袒入門而右，以聽事也。饗禮乃歸，賓客之道也。時會殷同之禮，諸侯覲于天子，爲宮方三百步，四門，壇十有二尋，深四尺，加方明于其上。古者諸侯不順服，王將有征討之事，則既朝覲，王爲壇於國外，合諸侯而命事焉，謂之時會。十二歲王如不巡守，則六服盡朝，朝禮既畢，王亦爲壇，合諸侯以命政焉。所命之政，如王巡守，謂之殷同。方明設六色六玉者，禮天地四方也。覲受之於廟，會同受之於壇，文質相變也。上公建常九旂，侯伯建常七旂，子男建常五旂，故曰：「公侯伯子男皆就其旂而立也。」拜日于東門之

外，日升于東也。禮山川丘陵于西門外，山川導自西也。禮日于南門外，就陽位也。禮月與四瀆于北門外，就陰位也。祭天燔柴，祭山丘陵升，本乎天者親上也。祭川沈，祭地瘞，本乎地者親下也。天子將行會同之禮，必先朝覲諸侯於廟，故孔子曰：「宗廟會同，非諸侯而何？」爲其相者，諸侯之卿大夫士也。故曰：「宗廟之事如會同，端章甫，願爲小相焉。」朝覲宗遇，常禮也。會同，大禮也。朝覲宗遇之於會同，如祠禴嘗烝之於禘祫也。先王之制，邦內甸服，邦外侯服，侯衛賓服，蠻夷要服，戎翟荒服。甸服者祭，侯服者祀，賓服者享，要服者貢，荒服者王，日祭，月祀，時享，歲貢，終王，先王之訓也。《大雅》曰：「韓侯入覲，以其介圭，人覲于王。」言覲禮也。又曰：「王錫韓侯，淑旂綏章，簞第錯衡，玄衮赤舄，鉤膺鏤錫，鞞鞞淺鞬，偉革金厄。」言既覲而賜之車服也。《小雅》曰：「赤芾金舄，會同有繹。」言會同之禮也。」

右記附覲義

鳴謝

《儒藏》精華編惠蒙善助，共襄斯文；謹列如左，用伸謝忱。

本煥法師

智海企業集團董事長 馮建新先生

NE·TIGER 時裝有限公司董事長 張志峰先生

張貞書女士

付剛先生

壹佰萬元

壹佰萬元

壹佰萬元

壹佰萬元

伍拾萬元

北京大學《儒藏》編纂與研究中心

本冊審稿人
本冊責任編委

陳殿
王豐先

ISBN 978-7-301-11765-1



9 787301 117651 >

定價:1200.00 元

